





3. 17. 6. Aico liure tre soldi dea sette e mezza  
Remden







1-3



# FRANCISCI TORTI

Philosophiæ, & Medicinæ Doctoris Mutinensis;

IN PATRIO LYCEO

Professoris Primarii;

SERENISSIMI RAYNALDI I.

MUTINÆ, REGII, MIRANDULÆ & C. DUCIS

MEDICI;

A Consiliis QUATUORVIRORUM Publicæ Valetudinis; & Societatis  
Regiæ Londinensis Sodalis.

THERAPEUTICÆ  
SPECIALIS

Ad Febres Periodicas Perniciosas.

EDITIO TERTIA AUCTION, CUI SUBNECTUNTUR  
*Ejusdem Auctoris Responsiones Jatro-Apologeticæ ad  
Clarissimum Ramazzinum.*



VENETIIS.

APUD LAURENTIUM BASILIUM.

ANNO MDCCXXXII.

SUPERIORUM PERMISSU, AC PRIVILEGIO.



# TORRANCIS

Philosophia, & Medicina Doctoris Minutius  
IN PATRIOLYCE

SERENISSIMI RAYNALDI

Mortuus, Regis, Mortuus, &c. Decis

MEDICIS

A. Camille C. & Co. Regis, Mortuus, &c. Decis

THE RAPETUTIC  
SPECIALLIS

AD PARS PARS PARS PARS  
PARS PARS PARS PARS  
PARS PARS PARS PARS



VENETIS

AD PARS PARS PARS PARS

ANNO MDCCXXII  
SUPERIORUM VERUSU, AD PARS PARS



# LECTORI TYPOGRAPHUS.



Larissimi Viri FRANCISCI TORTI Opera tibi sistimus, Lector Benevole: Therapeutice quidem Specialem tertio editam, Responsiones verò Jatro-Apologeticas ad Cl. Ramazzinum secundo. Editionem secundam Mutinensem Therapeutices hìc illic ab Auctore locupletatam in hac nostra secuti sumus, adjectis solummodo Epistola Dedicatoria, & Præfatione, ex prima impressione anni 1712. desumptis, quibus te carere nolimus, cum eas citet Auctor in sua Prolusione ad Respons. Jatro-Apologeticas. Utilitati insuper tuæ ac commodo studentes ubicumque Cl. Auctor in suis responsionibus primam suæ Therapeutices editionem notatis paginis, ac Historiis proferebat, ad hanc nostram accommodavimus. Vale.



**VIRO. CELEBERRIMO.**

**ÆQUEAC. DOCTISSIMO.**

**RERUM. NATURALIUM. SOLLERTISSIMO.**  
**SCRUTATORI. ET. CONQUISITORI. INCLYTO.**  
**FAUTORI. BONARUM. ARTIUM.**  
**MUNIFICENTISSIMO.**

**ILLUSTRISSIMO. DOMINO.**

**HANS. SLOANE.**  
**BARONETTO.**

**COLLEGI. REGALIS. MEDICORUM. LONDINENSIIUM.**  
**ET REGIÆ. SOCIETATIS.**  
**AMPLISSIMO. PRÆSIDI.**  
**POTENTISSIMI.**

**MAGNÆ. BRITANNIÆ. REGIS.**

**GEORGIUS. II.**  
**ARCHIATRO.**

**REGIÆ. SCIENTIARUM. ACADEMIÆ.**  
**PARISIENSIS. ET. BEROLINENSIS. SOCIO.**  
**SUIS. SCRIPTIS. ÆTERNUM. VICTURO.**

**OPUS. HOC.**

**EXIMIÆ. IN. ARTE. MEDICA. UTILITATIS.**

**AB. AUCTORE.**

**REGIÆ. LONDINENSIS. SOCIETATIS. SODALIS.**  
**NOVISSIME. AUCTUM.**

**OBSEQUENTISSIMUS. VOVET. ET. DICAT.**

**TYPOGRAPHUS MUTINENSIS.**

**AU.**



# AUCTOR

## LECTORI SUO.



*H*abe iterum, ac ea denuo, qua primo usus es, excipe humanitate Specialem hanc Therapeutice meam, Lector benevole. Cum sum de illa rursus edenda consilium mihi aperiret Bibliopola, eidem mox sciscitanti, num quicquam haberem, quod adderem; me plura potius habere quæ delerem respondi: quippe qui supervacanea prænoscere, tædioque posthac futura legentibus tot, quæ ad vendicandam ab effæctis Humoristarum oppositionibus febrifugam, innoxiamque virtutem Peruviani Corticis modo nemini suspectam, aut dubiam, prolixius olim sum persequutus: neque meliorem sortem probabiliter obventuram Theoreticis quoque meis, quotquot sunt, ibidem aggestis, mihi que ipsi (ut sum fassus vel tum cum protuli) parum acceptis; quorum supellex versicolor, & ruditer consarcinata, merx quedam est jam obsolescere incipiens, ut proinde in recentioris, ac speciosioris concursu paucos hodie apta sit ad se licitatores allicere, ac ferme nullos emptores. His de causis, atque ut simul qui severiorum oculis, non minus quam humaniorum rursus exponendus est Liber, non superinducta quidem ulla venustatis, sed quadam saltem deposita vetustatis specie in novam lucem prodiret, quicquid in eo extra nudæ praxeos pomeria vagatur, videturque quodammodo superfluere, illud omne rescicare optassem, ac penitus amovere. Ast tantum inde molis sine pari ad pondus supplemento detrabi minime passus est idem Bibliopola, Librum, ut agebat, mutilum iisdem Typis detrectans recudere, quibus olim cuderat integrum, maxime cum memetipsum æque detrectantem audiret nova condere, quæ veteribus substituerem, selectioris ordinis succedanea. Qualem ergo Scriptionem meam, quantacunque illa fuit, antea tulisti, talem & modo, quin & nonnullis hic illic appositis additamentis paullo auctiorem, æquum est ut pariter feras. Sed & aliud quippiam tibi ultra ferendum superest: exigit siquidem abs te condecens institutio tua, quisquis indiges plenius institui, omnemque tum usum admittendum, tum abusum vitandum Peruviani Febrifugi perfecte callere, exigit inquam, non modo ut Tractatum hunc, etsi sublimibus meditationibus cassum, vel ex asse integro, vel saltem quatenus circa praxim (versatur autem & sparsim ubi agit aliud) non renuas attente pervolvere; sed & insuper exigit, ut meas quoque non grave-ris expendere Responsiones Jatro-apologeticas (\*) ad criticam, quæ illis membratim inserta visitur, Dissertationem Cl. Ramazzini de usu recto Chinæ Chinæ nimis stricte, de Abusu nimis late sentientis. Neque vero laborem istiusmodi te pigeat suscipere, cuius postmodum suscepti te, ut reor, non poenitebit. Haud equidem vana ulla me tangit elati animi affectio, cuius stimulis actus mea perlegi tam sollicitè inculcem, quasi hucusque idem hoc Opus, minus forte quam par

\* 3 fuerit,

(\*) Quas ideo ad calcem Therapeutices, scilicet pag. 391. in hac editione adjungere visum est non incongruum.



fuerit, minusve saltem quam mea tulissent vota, de Medica Republica benemerens  
 fuerit habitum, vel re ipsa neglectum; cum potius ex aduerso supra expectationem  
 quoque meam illud noverim plenis statim ulnis ab ingenuis exceptum humaniter,  
 viderimque subinde ad metam universalis approbationis feliciter vela faciens, etsi  
 ventis tunc undique aduersis medico pelago recens commissum; sed tantum me mo-  
 vet rationalis metus, ne quanta forsitan opus erat ad circumspectam Methodum ca-  
 pessendam, habita fuerit a plurimis illius ratio. Arrisit quippe magis, fervida  
 praesertim iuventuti (cujus ausis nequivit saepe non respondere, saltem prima fron-  
 te, felix eventus) arrisit, inquam, magis ea pars, quae admirandam, & ex  
 se innocuam Chinae virtutem late complectitur, quam ea, quae animadver-  
 siones, & cautiones omnes pro usu illius recto, tempestivo, & tuto particula-  
 tim indigitat, simulque noxas, quas Pharmacum hoc, suapte ceteroqui natura  
 saluberrimum, & innocens, inconsulte vero, ac intempestive adhibitum, nonnun-  
 quam valet inferre. Aedepol putassem nunquam, id me vivente eventurum, quod  
 seris tantum nepotibus Lib. tertio ad calcem cap. 5. fueram vaticinatus; nem-  
 pe, Remedio huic olim rejecto, atque proscripto, mox vero cunctis sensim placitu-  
 ro, suam ipsam tandem obsuturam esse, deprehensa cum fuerit, efficaciam, atque  
 in despectionem abiturum usum illius, quippe promiscuum nimis, & ultra leges  
 artis intemperantem. Sane quicumque incedit hac via, non plus sapit, quam sa-  
 piat quævis è trivio lippiens Anicula, emergitque interim a tumultuaria, & in-  
 consulta huiusmodi praxi, modo præpropere, modo præpostere, adeoque saepe inuti-  
 liter, aut præter rem, nonnunquam & damnose exercita, egregii remedii immane  
 proluvium, cui posthac, ni male conjicio, vix suffectura est tota Quitensis Regio.  
 Ut huic dispendio parum laudabili, atque in dies crescenti sufflumen aliquod,  
 priusquam ultima fata subeam, pro viribus coner imponere, te monitum velim,  
 prudens Lector, ut postquam Methodum ad sanandas copiosa, & celeri Peruvia-  
 ni Corticis oblatione Febres Periodicas vere Perniciosas, & plane lethales,  
 etiam cum mors præ foribus est (dummodo postridie tantum Aegri cubiculum ingressu-  
 ra) postquam, inquam, Methodum illam exacte perspexeris, & curationem illarum  
 dignoveris in iis circumstantiis, ut loquimur est, omnino Coactam, ad ea etiam,  
 quæ de administratione ejusdem Remedii in aliis quoque febribus toto Tractatu abun-  
 de prostant, animum diligenter advertas, & præcipue ad cautiones, quibus eodem  
 utendum pluries indicavi ad istarum quoque rationale, ac prudens regimen; quod sane  
 secundum varia praesertim illarum tempora, & secundum variam ipsarum naturam,  
 diversasque habitudines, varie admodum debet institui. Harum porro cautionum  
 non pauca specimina me prodidisse scio, tum olim Lib. 1. cap. 3. 8. & 10. &  
 Lib. 4. cap. 5. tum nuper in hac postrema editione Lib. 5. cap. ult. Verum hæc  
 omnia incassum, Amice Lector, nisi simul naturam, species, & differentias fe-  
 brium curandarum probe dignoscas, & ab invicem per sua signa discrimines: item  
 nisi particularia earum tempora, in nonnullis breviora, in aliis longiora futura  
 prænoscas, & ad normam præexistentis Fluidorum apparatus per sua stadia metia-  
 ris: tandemque nisi Symptomatum pondus æqua lance, iusta videlicet, ac pruden-  
 ti aestimatione perpendas. In hoc Studio tibi primus impendendus labor; tum vero  
 rectam, & rationalem, non mere empiricam, Peruviani Corticis administra-  
 tionem ex huius Operis lectione percipies; sin minus de tuo profectu actum est. Vale.



*EPISTOLA DEDICATORIA,*  
*Et Auctoris Proœmium, quæ leguntur in Prima*  
*Editione anni 1712.*

---

SERENISSIMO,  
ET EXCELSO PRINCIPI,  
RAYNALDO I.  
MUTINÆ, REGII, MIRANDULÆ &c.  
DUCI,  
DOMINO SUO CLEMENTISSIMO,  
Franciscus Tortus Felicitatem.



Quandoquidem ea Famulatus mei auspicatissimi fors est, ea clementissimi animi TUI lenitas, ea comitas Majestatis, DUX SERENISSIME, ut planè assidua nolis exigere a me Aulici cultus officia, quemadmodum, & Magnitudinem TUAM, & obsequium meum cæteroqui deceret, sed liberaliter annuis, ut, iisdem remissiùs præstitis, tum Exedræ publicæ, tum quotidianæ Praxeos exequar munia, otium propterea, quodcumque est mihi ( si quodpiam est ) nonnisi donum gratuitum dixerim, a largitate, ac munificentia TUA mihi concessum. Hoc ipsum verò, quod uni Clementiæ TUÆ acceptum refero, beneficium, me suadet intimè, ut quidquid ab exantlatis laboribus in publicam utilitatem subsecivis horis valui colligere, curisque meis surripere, illud omne SERENISSIMÆ CELSITUDINI TUÆ, quæ mihi fecit hæc otia, sacratum velim. Una hæc potissima ratio alacrem cunctanti animum addit, quò fidentiùs specie debiti, & in tesseram reverentiæ, tenue hoc Opus Excelso TUO illustratum No-



mine, TUO quoque voveam patrocínio. Nimia nihilominus audacia fortasse quispiam insimulare me poterit, qui, vel materiae humilitatem, vel levitatem munusculi, severiore supercilio respiciat. Verum is mirari desinet, meique ausus animositatem redarguere, cum noverit, rudem hunc incultae Palladis foetum, nativis alioqui latibulis, quò comptior nonnihil fieret, diutius destinatum, ex ipsius **SERENISSIMAE TUAE CELSITUDINIS** nutu (quo nil gloriosius mihi) in lucem prodire, nec propterea sibi quarendam aliunde tutelam, nisi unde iussus est palam vivere, seque spectandum praeberē. Sed & insuper ipsius dignitatem materiae, Remedii nempe, cuius usum scriptis hisce peculiariter promovendum suscepi, id unum tueri potis est, quòd illud a longo jam tempore coeperit per Aulas, perque ora Magnatum circumferri, eorumque identidem sanatione insigniri, imò quòd de eodem ipsam **SERENISSIMAM CELSITUDINEM TUAM** in colloquiis humanioribus verba facientem, & curationibus meis, praeter communem aliquando expectationem, ejus ope feliciter gestis, pro innata benignitate plaudentem, ipse non semel rubore perfusus audierim. Tenuitatem verò muneris, Operis videlicet aequè parum culti, ac parum compti, id forsitan poterit Magnanimitati TUAE acceptam reddere, quòd in eodem arduum de servanda, nec rarò, nec sorte ancipiti, pereuntis Hominis vita negotium agatur, absolvaturque: qua equidem in re gravissima, cum plurimum ponderis habeat quidquid probabile, nil levitatis potest habere quod certum. Tanta autem me nunquam teneret fiducia, ut Excelso Nomini TUO auderem quicquam vovere, aut Orbi spondere, quod verum centies constanti experientia non antea comperissem. Maxima idcirco me spes solatur, suadetque, fore, ut benigno, quo affoles, vultu digneris excipere, quod Tuarum in primis, necnon aliarum quoque Gentium prospicit incolumitati, ut qui Politico non minùs Regimini, quàm Pietatis, & Religionis cultui incessanter addictus, bonas Artes benefica in dies humanitate amplexaris, foves, ac protegis. TU namque, **INCLYTE PRINCEPS**, ille idem jugiter es, qui, dudum depulsis hostibus, & subtractis alieno iugo Subditis Urbibus, atque Provinciis, mox rebus Belli, Pacisque satis compositis, refectis, quas ipse expugnaveras, Arcibus, revocatis ad suos alveos, & intra novos aggeres vi coercitis deviis Fluminibus, Annona propriis sumptibus pluries instaurata, ampliatoque tandem novi Ducatus accessione Dominio, Populorum felicitatem aequè, ac propriae Magnitudinis incrementum, & Gloriam, indefessa noctu & interdiu vigilantia, semper exquiris. Sic **CELSITUDINEM TUAM SERENISSIMAM** ad maiora diutissimè sospitet Deus, & continuata Regni, ac Nepotum propagatione, mea, & communia amantissimorum Subditorum vota ultro fortunet.

Mutinae Pridie Nonas Augusti MDCCXII

LECTO-



# LECTORI BENEVOLO.



Uisquis hujusce Tractatus molem cum præmissa illius Synopsi, potioreve Tituli partem cum adnexis comparas additamentis, vereor, ne lusu in oppositum verso, Horatianum illud obtrudas,

— Amphora cœpit

Institui, currente rota cur Urceus exit?

Mihi namque Urceus, quem cœperam instituere, currente rota excrevit in Amphoram; nec tantum fortuito quidem, sed & consulto: ut inde scilicet commodius imbui possent, quibus præcipue ac ferme unice scribo, Artis Medicae Candidati. Neque enim, ut fatear, resectam hanc a suo Toto adhuc indigesto, & informi, universalioris Therapeutices Partem, Pyretologica simplicioris ordinis immixta suppellectile, connexaque Historiarum congerie (utinam non supra modum) pinguefactam, styloque humili, ac plano, in morem scholasticum exaratam, ausim exponere nisi Tyronibus. Stetissem autem promissis, illamque ante biennium circiter edidissem, prout exigere videbatur, quæ anno 1709. præcessit, ejusdem Synopsi, in Italicis non modo, verum & in Trevoltiensibus, ac Lipsiensibus Ephemeridibus subinde evulgata, ni Typographi mora, Operis jamdudum inchoati complementum, interposita non semel plurium, ac plurium mensium intermissione, in hanc usque diem protraxisset: quò sanè temporis tractu, quantum veritatis, a crebriore experimento petita, in dies accessit eidem Operi, tantundem novitatis demptum videtur.

Ideam hujusmodi condendi Tractatus indidit quondam menti meæ, præter publicam utilitatem fidenter præsumptam, monitum quoque Sapientissimi Baconi 4. de Augm. Scient. Cap.2. dicentis, Plurimum referre, si Medici aliqui (loquebatur ille quidem de aliis a me) opus aliquod conficiant de Medicinis probatis, & experimentalibus ad morbos particulares; censebat enim Vir Magnus, Therapeutice hanc particularem, & desiderari adhuc in Arte Medica, & ipsi Arti fore perutilem: quandoquidem, agebat ille, Medici hujusce ætatis particulares Medicinas, quæ ad curationem morborum proprietate quadam spectant, aut non bene norunt, aut non religiosè observant, experientiæ scilicet non satis tribuentes, judicio plus nimis. Cum itaque nostris quoque temporibus, quibus sanè plurimus est, cum luxus in opinando, tum cultus in scribendo, aliquis tamen, si fas est dicere, sit rerum practicarum neglectus, intantum, ut earum tractandarum ratio in quamdam veluti desuetudinem abire cœperit, ipse, declinatis plerumque abditioris Doctrinæ Theoreticæ, ac penitioris Eruditionis recessibus, posthabitoque simul omni, qui materiam minimè deceret, verborum fuco, hanc Medicinæ partem quadantenus, & pro modo virium, illustrandam, ac promovendam suscepi, selectaque ad id dogmatica, vulgari, & fusa, quæ Tyrones erudire valeat, scribendi forma, malui utilitate elegantiam, quàm elegantia utilitatem supplere. Quòd si quid incomptum morosis Censoribus carpendum occurrat, omnem rudioris culturæ notam æquo animo feram, ubi ex hujus, etsi minimè perpoliti, Tractatus evulgatione vel unum tantum hominem, ceteroqui periturum, aliquando servatum sciam, qui plurimos jam pereuntes, vixque alia, quàm quæ hic prostat, Methodò sanabiles, favente Deo servatos novi: id, quod suo loco fideliter descripta, luculenter patefacient Historia.

Impulit quoque animum meum ad hanc ipsam minùs tritam Methodum aperiendam (quam pro summa Operis reputo, & quæ circa specialem Peruviani Corticis oblationem in Perniciosis quibusdam Febris versatur) firma credulitas, me rem prolaturum, ut plerisque non ante obviam, ita scitè necessariam, Reique idcirco publica non  
parum,



parum proficuum. Quamvis enim ea Collegis quoque meis, saltem nonnullis, quibus pluries, vel in consultationibus proposui, vel in colloquiis communicavi, vel in praxi oculis subjeci, nota sit, & usu jam capta; cum tamen illorum non paucos etiamnum lateat, imo forsitan sit quibusdam, alio sensu præoccupatis, minus accepta, quibusdam aliis, haud satis appositè utentibus, suspecta, illam ideo publici juris facere libenter decrevi, ut sic Concivibus saltem meis, si non Alienigenis, prosum: eo scilicet animi candore, eaque boni exitus securitate pandens, quæ sum centies, ac centies expertus, ut nullus sanè hinc mihi sit metus subeundi notam fœdissimam, quam sui ævi Medicis Plinius inussit, eos nempe famam novitate aliqua aucupantes, animas statim nostras negotiari.

Sed quoniam agrè poterat Methodus hæc, pro varia casuum exigentia, secundum circumstantias omnes congruenter tradi, nisi Februm, ea mediante curandarum, graphica præmittebatur descriptio, hoc ideo quoque pensum pro virili parte absolvendum suscepi. Qua tamen in re, si Perniciosarum Intermittentium descriptionem respiciamus, cum unus eminuerit Ludovicus Mercatus, Practicus sui ævi Celeberrimus: si verò respiciamus earum curationem, ope China China institutam, excelluerit Richardus Morton, Professor Londinensis Experientissimus, Primi proinde Auctoris Tractatulum integrum, Secundi verò singulare quoddam Caput, ab eorum scriptis excerpta, ac recusa, & Scholiis quibusdam meis interpositis explanata, huic ipsi Tractatui libuit inferere: mox, utroque lumine prævio, propriam quoque earundem Februm, ad peculiare species redactarum, descriptionem aggredi, simulque curationem, media China China absolvendam, tradere: ac tandem Methodum ipsam specialem exponere, strenuum istud Febrifugum aptè, ac utiliter in iisdem administrandi.

Pariter, cum non desint adhuc meticulosi quidam, vel præjudiciis imbuti (pauci sint licet) quibus, generaliter loquendo, suspectus redditur usus China China vel in ipsis benignis, diuturnisque Intermittentibus, non abs re censui, medicaminis ipsius innocentiam, operandi modum, & proportionem illius cum Februm quarumlibet Intermittentium Causis, tam secundum Veterum, quam secundum Recentiorum principia consideratis, examinare, illiusque, in iisdem benignioribus Intermittentibus tempestivè exhibendi, tum cautiones opportunas, tum formulas vulgatiores præmittere, priusquam peculiarem illius usum in Perniciosis, non modò Intermittentibus, sed & Subcontinuis, describere aggrederer.

Denique, cum nimia sit ex adverso apud alios ejusdem medicaminis aestimatio, tantaque interdum, ut illud ceteris quoque indiscriminatim Februm generibus, plurimisque aliis Morbis, præsertim periodicè recurrentibus, insigniter proficuum censeant: propterea his quoque, in proprio sensu nimium abundantibus, post statutam in Perniciosis Methodum, occurrendum censui. Quamobrem, quasi Corollarii loco, singulas seorsim Februm cujuscumque generis species, aliosque insuper, sed compendiosius, morbos libuit perpendere, & quibus China China rationabiliter conveniat, vel non conveniat, prælucente simul experientia, decernere: ne scilicet Tyronibus erudiendis ulla desit circa remedii hujus rectam administrationem notitia.

Febrifugum equidem istud, quantum ex se, vulgatissimum est, usitatissimum, simplicissimum, & in prima inventionem suam merè Empiricum, Arboris nempe cujusdam Indica, Gannaperide nuncupata, Liber, seu Cortex, quem Chinam Chinam dicimus; ejus tamen peculiarem in peculiaribus Casuum planè deploratorum Circumstantiis administrationem, neque simpliciter Empiricam censeo, neque vulgarem, sed selectiora inter Artis præsidia reponendam, quam scilicet ratio quondam dictavit, suavit analogismus, & constans experientia feliciter confirmavit; atque ita quidem, ut vi.



ut vi illius intra paucas horas datum sit, Egrotantes non paucos ab Orci faucibus facile eripere, & pristina, dictum factum, incolumitati restituere.

Gloriosiore forsitan, quam par sit, vocabulo uti videar, Methodum istam identidem Meam appellans; sed haud indecenter hoc me mihi tribuisse crediderim, probe gnarus, me, praesente nemine, illam in recensitis Casibus, ac Circumstantiis propria tantum observatione, ac experientia comperisse, eamque non semel, favente Deo, vel minus credulis suspiciendam praestitisse. Hinc, veritate rei palam cogente, factum est, ut ipse, qui ceteroqui remediis plurimis communiter receptis (quibus nihilominus utor) saepe non multum tribuere consuevi, usu tamen istius certo Loco, Modo, & Tempore adhibiti, plurimos constanter credam absolute servatos, mortique imminenti subtractos, per curationem scilicet huic uni remedio sic administrato, non vero soli Naturae, aut praegressis auxiliis, ut in morbis tardioris motus, & lentioris periculi frequenter assolet, adscribendam.

Quid in huiusmodi casibus extra Civitatem nostram agatur, precise non novi. In finitimis certe Urbibus, iis etiam, quibus plurimi usus est China China, Methodum hanc exerceri, saltem ut eam fama circumferat, etsi quaesierim, non audio: an quisquam privatim teneat, ignoro. Cum longinquioribus haud satis intercedit commercii, ut probe exploratum hoc habeam. Non me quidem latet, Scripta quamplurima eruditissima circa actionem, usumque Peruviani Corticis, & a remotis, & a propinquis Provinciis, ac Urbibus (inter quas & nostra) etiam dum hac scriberem, imò post editam Synopsin Tractatus mei, in lucem prodisse: ut scilem, ante paucos quoque dies me subaudisse, huiusce ordinis quidpiam fuisse recenter editum a Transalpino quodam Viro Celebri; cuius tamen rei nullam usque adhuc, sive in Exteris, sive in Nostratibus Diariis, mentionem reperi. Haec autem Illustrum Virorum Lucubrationes omnes, vel earum plurimae, saltem quas mihi videre contigit, in id precipue collineant, ut Corticem ipsum, & vulgatiore illum exhibendi formulas ad omne indiscriminatum Februm genus, praeter Intermittentes, absque peculiari Specierum earumdem, vel Methodi in illis usurpanda delectu, ampliare conentur. Pro omnibus stet Febrifugi Anglici ante annos 32. circiter promulgatio in Gallia, cuius remedii usus hodie ibidem est fere promiscuus in quibusvis Febris, & cuius tota vis in uno Cortice Peruviano, larva quondam imposita nunc spoliato, plane consistit. Sed, ut verum fatear, plura, quae de ipso a pluribus predicantur circa Februm Continuarum Continentium, Acutarum, Inflammatarum, & Malignarum a primordiis, aliorumque insuper Morborum longe disparatarum, curationem, nisi magna cum limitatione intelligantur, partim aperte falsa in usu practico, partim dubia admodum deprehendi. Et propterea, ut supra monui, ne quis error obrepat in hac non levi materia, ad complementum Tractatus, singulas etiam aliarum Februm species (praeter Perniciosas pro scopo primario constitutas) placuit examinare, & quibus utilis sit, quibusque frustraneus Cortex, innuere.

Quod autem Scriptores Febris quoque Malignis Remedium istud genericè, nec proinde semper cum utilitate, accommodantes, minime loquantur, aut possint intelligi de Febris illis Malignis, de quibus impraesentiarum ego, vel exinde constare videtur, quod illorum Methodus lenta nimium, enervis, ac languida, vel per solam Corticis percolatam infusionem, vel per illius quidem substantiam; sed non satis larga dosi, nec satis apta distributione oblatam, par non sit, teste experientia, extinguendis illicò, prout saepe necessitas exigit, huiusmodi Febris: adeoque, vel de his verè locuti non sunt, vel adequatam curationem earum non omnino calluerunt, vel, si calluere, haud satis perspicue docuerunt.

Unus,



Unus, quod sciam, rem prope attigit, meque, inscium licet, quodque nondum promulgatum erat sciendi incapacem, in hac materia praeivit, citatus Morton, nunquam satis laudatus. Hujus Auctoris Scripta, quorum non pauca est cum meis circa hoc symboleitas, licet ante duodecim circiter annos ad manus meas pervenerint, non prius tamen, quam ante triennium attentè pervolvi, eo nimirum Tractatu, ubi Methodum videtur indicare, a mea non longè dissimilem. Neque alio nomine Pyretologiam illius percurrere sum aggressus, nisi ut, priusquam hæc, quæ tunc scriptitabam, publicæ luci exponerem, omnes, quotquot possem, hac de re Scriptores, consulerem. Cum autem Viri istius Accuratissimi Opera (saltem, quæ apud me extant) impressa fuerint Geneva anno 1696. ego autem Methodum meam in Febris Perniciosis anno 1695. plurima cum notione exercuerim, nullus, apud nos saltem, suspicioni locus esse potest, quod Actorum meorum regulam a Mortono (quamvis id mihi non indecorum foret) vel ab ullo alio Scriptorum desumpserim. Sed quorsum hæc? Neque enim gloriam inventionis hujusce, quantulacumque illa sit, aucupor apud universam Rempublicam Medicam, eique sponte nuncium remitto, quam assequi datum foret apud Nostrates. Tantum mihi metipsi gratulor, quod cogitatis, aut inventis meis, Viri Famigeratissimi auctoritas robur adjungat, & gratulor eidem, quod illius inventa, & cogitata, nimium fortè hucusq; neglecta, mea (qualiscumq; ego sim) fidelis experientia confirmet.

Hanc ergo Febres hujusmodi Perniciosas curandi Methodum (sive mea tantum dicatur, sive alteri cuipiam communis) hanc, inquam, Tyrones doceo, eosque omnes, qui doceri apti sunt: Insulatis verò Professoribus per transennam indigito, paratus ego ceteroqui doceri ab omnibus. Id unum interim stat, quod, omni, & quolibet, sive Mortoni, sive aliorum Scriptorum praeunte lumine, qualecumque illud sit, adhuc in tenebris non exigua pars Medicorum versatur; quodque magis dolendum, propemodum inermis visitur, pro repellendo, cum maxime oporteret, præcipiti hujusmodi Februm Perniciosarum periculo: & egomet video passim, nimiumque video, dum Aegrotantes Methodo mox declaranda curati (ignoscas mihi, Lector, de me ipso aliquid prædicanti, aiebat Tullius) alacres surgunt, video, inquam, alios, iisdem planè correptos morbis, sed eodem remedio, eademve Methodo destitutos, pretiosiore licet, aut etiam sæviore medicamentorum apparatu instructos, inevitabili Fato succumbere. Sane istiusmodi comparatio haud minimo mihi incitamento fuit, ut hunc facile Tractatum ederem seorsum a reliqua, rudi quidem, atq; confusa, ceterorum, quos condere tunc meditabar, nunc abs me seponere cogor, materia: præcipue cum plura in dies de hoc Remedio, modò nimis humilia, & restricta, modo nimis elata, & expansa, ad modulum scilicet Scribentium Idea, impetusve illorum ingenii, minimè verò ad normam solidæ præceos constituta, non sinè veritatis, & publicæ utilitatis detrimento, videam promulgari.

An ipse pro voto scopum attigerim, & an meus hic labor omnibus acceptus futurus sit, adhuc ignoro; hoc ipsum tamen, quod ignoro juvat sperare. Etenim, si penes Medicam Rempublicam non malè meruit Talbotius, tumultuariam, ut sic dicam, licet non prorsus inutilem, Methodum exhibendi Peruvianum Corticem, callida quadam, ac mercenaria olim liberalitate, tradens: cur mihi, longè utilioris, ut reor, magisque ingenuæ Methodi Oblatori gratuito, gratia quedam non erit ineunda? Id verò si apud omnes non liceat assequi, liceat saltem apud Te, Lector Amice, quem a cæteris fortè segregat comitas major. Tu ergo, quem præ aliis mihi benevolum spondeo, pro tua erga bonarum Artium Cultores, Promotoresve facilitate, hosce conatus meos, qualescumque, fore ut humaniter excipias, confido, si non alio titulo, saltem, ne ulterius molienti (si quando manum, quam plura interim retrahunt, Operi rursus admove datum sit) quam indidisti fidentiam, eripias. Vale.

ELEN-



# ELLENCHUS

## Librorum, & Capitem.

### LIBER PRIMUS

Præstantiam, ac vim Peruviani Corticis adversus Febres Intermittentes, & earum Causas, illius pariter tutelam, usumque methodicum in iisdem Intermittentibus, saltem vulgariis, aliaque hujuscemodi comprehendens.

**CAPUT PRIMUM.** *Historia primum inveni apud Mutinenses Chinæ Chinæ usus. Innocuum illa, præstansque Febrifugum. Recursus Februm post eam parcius assumptam contingens, ex adverso perperam allegatus. Pro usu illius, præter Experientiam, & Rationem, Auctoritas multiplex.* Pag. 1.

**CAP. II.** *Pervicax Antipathia, qua nonnulli abhorrent ab usu Peruviani Corticis, illumq; proscribunt. Ratio recursum Februm tempestive occurrendi.* 10.

**CAP. III.** *Princeps oppositio in Chinæ Chinæ usum ex carentia sensibilis evacuationis post eandem assumptam petita, diluitur: Experimenta quadam, tentata ad explorandam illius vim Febrifugam, exponuntur.* 16.

**CAP. IV.** *Ad placita Humoristarum, & Galenicorum accommodata evacuationum prædictarum sensibilium carentia.* 28.

**CAP. V.** *Perpensio circa Februm Intermittentium Causas placitis Neoterico- rum profitentium Fluidorum Systema, decernitur, ab assumpta China China nullam sensibilem evacuationem fieri debere. Idem multo magis asseritur in Solidorum Systemate, de quo, & de nonnullis eidem coherentibus pauca obiter.* 35.

**CAP. VI.** *Theoremata ex diversarum Opinionum examine, aliaque Cogitata circa Intermittentium originem. Inde usus Chinæ Chinæ stabilitur, absque ulla*

*necessitate insignis evacuationis.* 46.

**CAP. VII.** *Usus methodicus Chinæ Chinæ in vulgaribus Intermittentibus diuturnioribus, variaque illam præscribendi formula.* 61.

**CAP. VIII.** *Diligentior investigatio, an liceat in principio quoque earundem Vulgarium Intermittentium Chinam Chinam exhibere.* 68.

**CAP. IX.** *An Chinæ Chinæ oblationem precedere debeat Purgatio, aut Venæ sectio.* 76.

**CAP. X.** *Doctrina præcedens de Cortice, modo propinando, & modo non, in principiis Intermittentium, variis confirmatur Curationum Historiis.* 82.

### LIBER SECUNDUS

Februm Perniciosarum Intermittentium [saltem ab ortu] descriptionem, & curationem continens, ex aliorum Auctorum observatione, additis Scholiis materiam hanc magis illustrantibus.

**CAPUT PRIMUM.** *Malignus mos, & prava in universum Februm hujusmodi Perniciosarum Natura indicatur. Accurati circa hanc materiam Auctores perpauci. Vis Peruviani Corticis adversus eas eximia.* 97.

**CAP. II.** *De Tertianâ Perniciosa, ex LUDOVICO MERCATO, Scholiis aliquot insuper adjectis.* 100.

**CAP. III.** *Prima Tertianâ Perniciosa differentia, ex eodem MERCATO, additis, ut supra, Scholiis.* 103.

**CAP. IV.** *De Tertianâ Perniciosa ob tenuis humoris putredinem, ex LUDOVICO MERCATO, cum iisdem pariter Scholiis.* 108.

**CAP. V.** *De Tertianâ Perniciosa ex prava humorum natura, ex eodem MERCATO,*



CATO, cum Scholiis, ut supra. 112.  
CAP. VI. De Tertianâ Perniciosa ex  
miscella crassorum humorum cum sero-  
sis, & tenuibus, ex LUDOVICO  
MERCATO, adjunctis itidem Scho-  
liis. 115.

CAP. VII. De Perniciosa Tertianâ ob  
aliquod accidens, quod succrescit, ex  
eodem MERCATO, cum iisdem Scho-  
liis. 120.

CAP. VIII. Prava rursus Perniciosarum  
Februm Intermittentium natura innui-  
tur, ex descriptione RICHARDI  
MORTON, adjunctis pariter ad cla-  
ritatem fusioribus Scholiis. 123.

### LIBER TERTIUS

Continens Februm omnium Pernicio-  
sarum, tum plane Intermittentium,  
tum etiam Subcontinuarum descriptio-  
nem ex propria observatione, illarum-  
que Curationem, media peculiari  
Methodo Chinâ Chinâ in iisdem  
administrandi.

CAPUT PRIMUM. Februm om-  
nium Perniciosarum Periodicarum  
Natura, Differentia, Diagnos, at-  
que Prognosis, singillatim exponun-  
tur. 134.

CAP. II. Periodicarum Februm perni-  
ciosus character generaliter expenditur  
in sua Causa. Varia illarum pravi-  
tas, & actio diversa in triplicem no-  
stri Corporis regionem. Earundem Chi-  
nâ China curandarum Idea quadam  
practica generalis. 145.

CAP. III. Methodus exhibendi valide,  
atque feliciter Peruvianum Corticem,  
adversus singulas recensitas Februm  
Perniciosarum species, etiam in casibus  
ferme deploratis. 156.

CAP. IV. Dilucidatur Methodus exposi-  
ta, examinatur, & defenditur a male  
feriatorum dictariis. Porro circumstan-  
tia, in quibus ea locum habet, & in  
quibus non, indicantur. 168.

CAP. V. Evitare Censuram Vulgi diffi-  
cile, si aliquando Ager hac Methodo

curatus occumbat. Recensentur ideo fi-  
deliter Casus omnes lethales, in quibus  
culpatus est insons Cortex, etsi non  
oblatus, ut & ii, in quibus vere obla-  
tus non profuit, iique insimul, in qui-  
bus nec profuit, nec poterat prodesse. 178.

CAP. VI. Historia peculiaris, quæ primam  
occasionem inventioni Methodi tradite  
auspicatissime præbuit. 186.

### LIBER QUARTUS

Curationes insignes quamplurimas exhi-  
bens omnium specierum Februm Per-  
niciosarum, alias recensitarum, Me-  
thodo jam descripta absolutas, una  
cum gravi circa hanc materiam Pra-  
xeos Problemate.

CAPUT PRIMUM. Historie insignes  
Intermittentium Perniciosarum, in  
primam præcipue Corporis Regionem se-  
vientium nostra methodo jugularum.  
Harum species sunt, Primò Cholericæ,  
& Dysentericæ, Secundò Subcruentæ,  
& Atrabilaris, Tertiò Cardiacæ. 194.

CAP. II. Historia mirabiles Perniciosarum  
agentium lethaliter in secundam  
præsertim Corporis Regionem, curata-  
rem eadem Methodo. Harum differen-  
tiæ sunt, Primò Diaphoreticæ, Secun-  
dò Syncopalis, Tertiò Algida, Quar-  
tò Subcontinua Malignans. 205.

CAP. III. Historia memorabiles Intermit-  
tentium Perniciosarum, agentium fe-  
rociter in tertiam primario corporis re-  
gionem, eodem quoque ritu sanatarum.  
Harum species unica est Lethargica. 227.

CAP. IV. Aliæ insignes Historie, ab  
Amicis communicata, variarum spe-  
cierum Februm Perniciosarum, cura-  
tarum ope Chinæ Chinæ nostra Me-  
thodo administrata. 240.

CAP. V. Utrum, quando Perniciosa se-  
cundi Ordinis, sive octava Speciei,  
nempe Subcontinua malignans, conti-  
nuitatem essentialem, & acutam affe-  
ctant citissime, hoc est, in ipsa statim  
principio, expediat illico, aut liceat  
Corri-



Corticem administrare, Febrisque cursum intercipere. Id, etsi probabiliter saepe liceat, non tamen indiscriminatum videtur semper licere. 262.

CAP. VI. Exempla nonnulla felicia citæ oblationis Chinæ Chinæ in principio Periodicarum Perniciosarum, gressu celerissimo ad Continuas essentialiter, atque Malignas vergentium. Ea tamen nonnisi cautam circa hoc, circumspectamque fiduciam prudenti Medico videntur præbere. 278.

## LIBER QUINTUS

Februm omnium Continuarum, necnon aliorum quorundam Morborum, præsertim recurrentium, examen continens, docensque, in quibusnam earum, eorumve possit esse proficius Cortex: item, quænam illius utilitas ad Prægnantium, ac Puerperarum Febres, & quæ vis ejusdem in Clysteribus, ac Epicarpiis adhibiti.

CAPUT PRIMUM. Generalis præmittitur Februm divisio materia de qua agitur congruenter aptabilis. 287.

CAP. II. Peruvianus Cortex inutiliter exhibetur in Febris Continuis Continentibus, seu non Remittentibus, tam simplicibus [ ut vocant ] quam Putridis, atque his quidem, tum Symptomaticis, tum Essentialibus, tum Solitariis, tum Comitatis, sive Malignæ fuerint, sive Acute simpliciter. Mortoni Praxis in hoc castigatior detegitur, ac vulgo sit credita; non tamen plane recipitur. 293.

CAP. III. Explicatur adhuc Mortonus: mox statuitur, Chinam Chinam utilem esse in Febris Continuis per subingressum Paroxysmorum, Subintran- tibus appellatis, non ita in simpliciter Remittentibus, quarum peculiaris natura describitur. In Remittentibus autem periodice, sive Proportionatis, quæ generali Continuarum nomine solent

donari, distinguitur. Dissensus & hic aliquis a Praxi Mortoni. 301.

CAP. IV. Allata nuperrime distinctio de Cortice in quibusdam Proportionatis utili, & in quibusdam inutili, illustratur quoad hanc postremam partem [ de prima enim jam satis alias ] nonnullis exemplis. 310.

CAP. V. Proficius assertitur Peruvianus Cortex, primò ad Febres Complicatas vulgatiores, puta Hemitritæos &c., secundò ad Lentas, præsertim Puerorum, Hecticas abusive dictas. Confirmatur exemplis postrema hac assertio. Demum ad Febres singulas indigitandas, quibus utilis est China China, & quibus non, universalis earum Categoria, & varia insimul metamorphosis, Corticem modo admittens, & modo respuens, iconice exprimitur, ac explicatur. 316.

CAP. VI. Enodantur nonnulla Quæsitæ variis titulis comprehensa circa usum etiam ulteriorem Peruviani Corticis: Et Primò Queritur, an ille conveniat aliis Morbis, præsertim periodicis, præter Febres; nec nisi cunctanter creditur, spectatis exemplis. 329.

Queritur Secundò, An, ubi Cortex vere indicatur, liceat ratione Subjecti illum administrare citra periculum Mulieribus Gravidis, Puerperis, Abortum passis, aut Menstruas purgationes actu patientibus: & incunctanter assertitur, experientia duce. 345.

Queritur Tertiò, An ex eo, quod China China sit Remedium suapte natura innocens, liceat eam tentandi gratia indiscriminatum usurpare in quibuslibet Febris, & Morbis, iis etiam, in quibus communiter deprehendi solet inutilis: & negatur. 348.

Queritur Quartò, An Cortex Peruvianus per Clysteres injectus, aut Carpis appositus, quicquam curationi Februm conferre valeat. Primus modus, utut imbecillus, non plane rejicitur. Secundus nil prope præbet fiduciæ, languida illinc, hinc inani respondente experientia. 356.



**M**ulta in Modo rei, & Circumstantiis ejus nova sunt, quæ in Genere ipso nova non sunt: qui autem ad observandum adjiciet animum, ei etiam in rebus, quæ vulgares videntur, multa observatu digna occurrent.

BACONUS Lib. 4. de Aug. Scientiarum, & speciatim Medicinæ Cap. 2.

# NOI REFORMATORI

Dello Studio di Padova.

**A**Vendo veduto per la Fede di Revisione, e Approbazione del P. Fra Tommaso Maria Gennari Inquisitore, nel Libro intitolato, in due Tomi il Primo *Francisci Torti Philosophiæ, & Medicinæ Doctoris Therapeutices Specialis ad Febres Periodicas perniciosas*, il Secondo *ad Criticam Dissertationem de usu Chinæ Chinæ Responsiones &c.* non v'esser cos' alcuna contro la Santa Fede Cattolica, e parimente per attestato del Segretario Nostro, niente contro Principi, e buoni costumi, concediamo Licenza a Lorenzo Baseggio, Stampatore, che possi esser stampato, osservando gli ordini in materia di Stampe, e presentando le solite copie alle Pubbliche Librarie di Venezia, e di Padova.

Data 18. Novembre 1730.

( Andrea Soranzo Proc. Reform.

( Gio: Piero Pasqualigo Reform.

(

Agostino Gadaldini Segretario.

Adi 2. Agosto 1731.

Registrato nel Magistrato degl'Illustrissimi ed Eccellentissimi Signori Esecutori contro la Bestemmia.

Angelo Legrenzi Segretario.





# THERAPEUTICES SPECIALIS LIBER PRIMUS.

PRÆSTANTIAM, AC VIM PERUVIANI CORTICIS  
Adversus Febres Intermittentes, & earum Cauſſas, illius  
pariter tutelam, uſumque methodicum in iisdem Intermit-  
tentibus, ſaltem vulgatiſſimis, aliaque huiusmodi com-  
prehendens.

## CAPUT PRIMUM.

*Historia primum inueſti apud Mutinen-  
ſes Chinæ Chinæ uſus. Innocuum il-  
la præſtanſque Febrifugum. Recurſus  
Februm poſt eam parcius aſſumptam  
contingens, ex aduerſo perperam al-  
legatus. Pro uſu illius, præter Expe-  
rientiam, & Rationem, Auctoritas  
multiplex.*



**Q**UAM olim ſponte im-  
politam edidi, talem etiam-  
num recudi ſum paſſus,  
nonnullis tantum hic il-  
lic additamentiſ appoſitis,  
peculiarem Methodum à  
ſeptem jam lūtris mihi perſpectam, ex-  
hibendi Peruvianum Corticem, vulgo  
*China China*, vel *China China*, aliis  
Gallico more *Quinquina*, ſeu *Kinkina*  
appellatum, pro curandis Malignis qui-  
buſdam febribus ſubdolis æque ac exitia-  
libus, aduerſus quas, poſtquam etiam  
*Terti Therap. Spec.*

hominis vitam in extremum diſcrimen  
adduxerint, eximiis illum pollere viri-  
bus, animadverſum antea non fuerat  
apud Noſtrates. Priuſquam tamen rem  
propius aggrediar, operæ pretium me fa-  
cturum puto, ſi ad ſternendam mihi pla-  
nitiorem viam, nonnulla communio-  
rem Febrifugi huius uſum in *Benignis* tan-  
tum, & diuturnis Intermittentibus re-  
ſpicientia præmittam. Licet autem hæc,  
& plura iſtiusmodi, quæ toto ferme hoc  
primo Libro perſequi lubet, ſupervaca-  
nea forte cuiſpiam videri poſſint, ea ta-  
men, ſi probe ſpectentur, ad intentum  
facere, atque ad innuendam congruam,  
ut decet, completamque egregii huiusce  
medicaminis adminiſtrationem non pa-  
rum conducere, poterit, ut reor, haud  
difficulter dignoſci. Etenim, vindicato  
ab oppoſitionibus fieri ſolitæ tam ſalu-  
bri remedio, nec non inſiſta propor-  
tione, quam poteſt habere cum Februm  
expugnandarum cauſſis multifariam con-  
ſideratis, ſenſim ducemur ad tutam, &  
A ratio-



rationalem Methodum eodem utendi in iisdem Intermittentibus, saltem *benignioribus* ( quod gradum faciet ad Methodum quoque, quam pro *Malignarum* curatione sponendi, suo loco pandendam ) & ad seligendas è vulgariis utiliores ipsum præscribendi formulas, dignoscendamque insimul opportunitatem tempestivæ oblationis illius.

Non tamen ideo hic est in animo historiam sive originis, sive inventionis, sive translationis Chinæ Chinæ in Europam à primordio repetere; Id enim cum solertissimus Vir *Sebastianus Bado* jam luculenter præstiterit peculiari Libro Anno 1663. Genuæ impresso, genesim universam remedium, tunc Orbi nostro nascentis, legere potest curiosus quilibet, tum apud eundem, tum apud alios, qui vel mediate postmodum, vel immediate Facti seriem decerpserunt à Bado. Neque pariter mihi mens est ineffabilem saluberrimi hujusce pharmaci virtutem febrifugam, ac operandi modum, sicut nec abditas Februm Intermittentium causas, per eandem depressas, ex professo, atque intimius ad unguem usque rimari; arduum siquidem opus hoc cum omnes hæcenus incassum tentarint, non minus inaniter & ipse tentarem. Sat fuerit suo loco, ubi nodus iste plane intactus relinqui non poterit, tenuia quædam abstrusæ utriusque rei specimina, sive generaliores quædam considerationes tantum non oscitanter proferre. Impræsentiarum vero liceat historiam omnem Chinæ Chinæ ab ingressu, atq; progressu illius intra Urbem dumtaxat nostram, pro exercita a me in rebus Medicis praxi, obiter auspicari, ne vel a notione intra spatium temporis valde modicum acquisita, vel a parciore, quam par sit, successuum numero animadversiones meas sumpsisse credar.

Ex quo innotuit Europæ Cortex Peruvianus ( cujus Planta integra prope *Loxam*, seu *Lojam* humili proceritate abunde succrescens, ab Incolis *Gannapride*, seu *Guananepide*, *Chinanepide*, vel *Guananegide* dicitur ) ex quo inquam *Liber* istius Arboris innotuit Eu-

ropæis regionibus, Hispaniæ videlicet primum, mox Italiæ, opera quidem, & pietate Eminentissimi Card. de Lugo, aliorumque Patrum Inelytæ Societatis Jesu, de utroque Orbe plurimis certe nominibus, sed insuper ob hoc ipsum de nostro optime merita, statim excellentia novi Febrifugi, certo, ac multiplici apud Exteros experimento comprobata, sedulitatem allexit Præstantissimi Viri *Antonii Frassoni*, Præceptoris quondam mei dilectissimi, ut illud pro bono publico, & pro breviori, certiorique Aegrorum curatione in usum deduceret. Et sane recensendus ille inter primos Corticis receptores, cujus rei testimonium exhibet idem Cl. *Bado* in citato Libro, cui titulus — *Anastasis Corticis Peruvia*, ubi Epistolam *Frassoni* ipsius inserit sibi inscriptam sub Anno 1656. in qua idem *Frassonus* refert, se ante annos aliquot de Cortice felix periculum fecisse in pluribus, ac signate in splendido Viro D. Comite Alexandro Eminentissimi Card. Facchenetti fratre. Cum ergo circa Annum 1649. translatum fuerit è Regione *Quitensi* in Hesperiam Remedium, nemo neget, quin inter primos, qui illud admiserint, vere sit connumerandus *Frassonus*.

Cœpit ille uti China China ( quam etiam *Gentianam Indicam*, *Antiquarium Peruvianum*, *Pulverem Comitissa*, *Pulverem Card. de Lugo*, vel *Jesuiticum pulverem* vocitarunt nonnulli ) post administrata præsidia universalialia, & particularia, in Quartanis ultra proVectis, quo tempore tum Aegri, tum Medici tædio affecti ad remedia quælibet Empirica, atque etiam anilia solent confugere. Cumque illi curationes ex voto succederent, ad Tertianas quoque Spurias, ut ajunt, tum simplices, tum duplices, benignas tamen, seu saltem non perniciales, nec non ad alias quascunque Febres Intermittentes ( diuturniores scilicet ) curandas, pari successu transitum fecit, fretus auctoritate *Badi* ante memorati, aliorumque ævi sui Illustrum Medicorum, quorum testimoniis quamplurimis, iisque gravissimis,

*Bado*



*Badus* ipse Opus suum pro tutela Peruviani Corticis roboravit. Reluctabantur interim, &, quoad vixit idem *Frassonus*, semper obstrepere omnes ferè Civitatis Medici, adeo ut ad evitandum severum eorundem tribunal, profugus, & exul Cortex non ausus fuerit in Pharmacopœas introire, sed quasi clam intra Claustra quarundam Monialium fuerit coactus sese recipere, unde postea illum petebat Vir solertissimus, ut Aëgris sibi commissis subministraret.

Dabat autem adultis initio Paroxysmi, quemadmodum tunc solenne erat, ex præscripto Romanæ Schedulæ, *drachmas duas* Corticis in subtilissimum pulverem redacti, dosim vero exiliorem natu minoribus, habita ætatis ratione, sive deinde in forma haustus, ut plurimum quidem in Vino, modo tenuiore, modo generosiore, ad *uncias quinque*, plus minus, facta, vel etiam omissa prævia infusione (quod perinde est) sive in forma boli, sive alio consimili artis ritu, superepoto pariter Vini momento. Hac methodo a primo adventu Corticis, ut dictum est, in Italiam, usque ad annum 1677. (quo tempore ad Praxim sub Ipso addiscendam me contuli) Febres omnes Intermitientes longiusculas suppressabat, iisdemque non raro, ut mos est, redivivis, repetito semel, aut bis Febrifugo finem imponebat. Quod millies ac millies sine ullo unquam sinistro eventu sibi contigisse, mihi pluries asseruit Vir ille fide dignissimus, ac omni exceptione major. Et egomet postmodum, testis de visu, id ipsum illi perpetuo accidisse deprehendi usque ad annum 1680. (nec enim quispiam, nisi planè vitiligator, adversetur ob singularem casum, de quo infra *Cap. x. Hist. XIII.*) quo nempe anno diem suum obiit, lacrymabili sane jactura, Vir experientissimus, ac de Urbe nostra admodum benemeritus, qui vel moriens & in hoc profuit, quod eo extincto, extinctæ cum eodem, vel saltem topitæ fuerint Nostratium fere omnium, qui tunc aderant, Medicorum in Corticem inimicitia; plures enim ex iis China Chinæ

antea osiores, ac hostes, eadem paullo post, semotis cavillationibus, uti cœperunt. Quæ fors nonnullis quoque aliis peculiaribus obtigit post ejus obitum *Frassoni* remediis, dum viveret, improbatis; ea namque communibus sensim suffragiis fuere subinde adeo recepta, ut ipso etiamnum *Frassoni* nomine insignita circumferantur. Atque hisce incidenter occurrentibus liceat amantissimi *Præceptoris* Manibus parentasse.

Ab eo autem tempore cœpit adeo clarescere in dies hujusce fama Febrifugi, ut jam nostro ævo nil notius sit in Medicina, nil certius, quam Febres Intermitientes China China depelli. Communis iste mos est omnibus ferme Europæ Nationibus, quod innumera undique scripta luculenter testantur. Hinc est, quod ex tam liberali illius impendio detur ansa pravis hominibus, iniquum de corio humano lucrum facientibus, eandem adulterandi, de quo passim jure merito (quandoquidem verum sit) conqueruntur Auctores, ut proinde alicubi in publicis Nosocomiis in locum genuini Corticis jam prope deficientis, suffectus fuerit pulvis ex Nucibus, aut ex Corticibus Cupressi, & Malorum aureorum dulcium, item ex radicibus arboris Persicæ, Fraxini, Gentianæ, & hujusmodi, referente præ aliis Eruditissimo *Luca Tozzi*: quibus remediis ter exhibitis, ait quandoque tolli Febres, quæ cæteroqui unica tantum oblatione Cortici Peruviano semper cedere consueverunt.

Enimvero succedanea quævis, sive naturalia illa sint, sive artificialia, nimium distant viribus ab hoc Cortice, ut qui inter omnia hucusque nota, Febrifugum præstantissimum est, ac summe innocens. Præstans equidem præ omnibus, quia præ omnibus infallibiliter, & celerrime Febres omnes Intermitientes abigit, dummodo nulla partis alicujus solidæ læsio organica sit morbi fomes. Inde fit, ut propinatis semel cuilibet Quartanario, aut Tertianario *drachmis duabus* Corticis, mo-



re maxime vulgari, in principio, vel declinatione Febrilis Accessus, possit Medicus absque ulla hæsitacione spondere, ultimum fore paroxysmum illum, nec rediturum alterum. Quid citius? quid certius? Veritatem hujus asserti, si quis, cui notum non sit quod notum est omnibus, habeat suspectam, provoco ad experimentum; nec alium Testem, aut Judicem volo, nisi qui contra hucusque senserit. Ad me quod attinet, testari possum de experientia quinquaginta circiter annorum, quo temporis tractu semel tantum, vel bis, quod memor sum, in casu Febris Quartanæ (absque ullo tamen Aegri detrimento) expectationem meam fefellit Cortex, siquidem ille genuinus fuerit, quod nihilominus credere non recuso. Sed quid tum? Quandoque per accidens materiam combustibilem non comburit ignis: numquid propterea non erit idoneus ad comburendam, cum millies combusserit? Quod vero innocuus, & insons ille sit, experientia pariter mihi satis demonstrasse videtur. Quidquid enim aliis contigerit, cum non tenear de facto alieno, loquor de proprio, testorque coram Deo, & hominibus (quod & plures testantur de suis Aegrotis gravissimi Scriptores) nullum unquam ex meis Aegrotantibus periisse, quod sciam, ob usum Corticis, neque in morbum graviolem, sed in leviolem fere semper, etiam cum reciderit, incidisse; idque pariter mecum perpetuo animadverterunt quotquot sub me Praxim Medicam exercuere, & propria dein experientia se junctim noverunt. Si quid vero unquam incommodi accidisse fortuito visum sit, ut in nonnullis historiis referam; id certe non culpa remedii tunc contigit, suapte natura insonis; sed ob intempestivam suppressionem febrium plane salubrium, & depurativarum, culpa videlicet Medici, remedium febrifugum, ubi progressus febrium stabat remedii loco, incaute offerentis. Quod de substantia Corticis semper innoxia a me deprehensa tam fidenter assero, haud ita facile proferre possem de

ullo alio Medicamento usitatore, præsertim in linea Solventium, quorum tamen tanta esse solet apud Osores Corticis æstimatio.

Si qua nihilominus alicunde quærenda sit, ac opponenda Cortici criminatio, ea petenda est a *Recidivis* (utor hoc vocabulo ad sensum Artis, aliisque utar in progressu minus excultis) post fugatas ab eodem Febres identidem recurrentibus. Neque hic ego inficias ibo, ut inficiantur quamplurimi, omnem culpam in errata convalescentium, nec semper immerito, refundentes, quin ultro fatebor, exhibito semel, ac unica tantum dosi, Peruviano Cortice, Febrem sæpesæpius redire. Nisi hoc unum obstar, Arborem Vitæ in China China superstitem divina Clementia crediderim. Adhuc tamen fidenter respondeo (plura circa hoc alibi prolaturus) primò, quod non semper recidunt Aegri ab assumpto Cortice, ut experientia constat, si præsertim rite, ac per repetitas justo ordine vices exhibeatur. Secundò, quod ex opposito sæpissime recidunt ter, quater, & quinquies, etsi Corticem nunquam assumpserint, sed alia methodo medica fuerint curati, unde posset contra talem methodum retorqueri eadem censura. Sed revera solutis etiam sponte, nullius omnino remedii interventu, sed solius Naturæ ope, quandoque Febribus, in easdem denuo, citra ullius culpam, relabuntur Aegri. Quid tunc dicendum? Loquamur ingenuè. Recidunt Aegri sumpto, & non sumpto Cortice, frequenter Autumno, qua tempestate contumaciores sunt Febres. Recidunt raro sumpto, & non sumpto Cortice, tempore Veris, & in principio Aestatis, quibus tempestatibus quælibet methodus, felix est, cum Febres tunc temporis etiam suo Marte cito solvantur. *Non igitur Medicamentum* (inquit egregie *Mortonus* hæc omnia complexus in responsione sua ad objectionem a *Recidivis* petitam) *sed Febris indoles in culpa est, si à perenni humorum fonte enutriatur, necnon ab aere, aut alio accidente externo. Sive enim*

natura



natura, sive arte quavis sanetur, ad revirescentiam valde proclivis est. Multa enim experientia fretus (perpendantur quæso verba hæc digna consideratione Practicorum, immo & eorum assensu) fidenter affirmare audeo, *Febrem a Corticis usu fugatam, & demum recidivantem, licet quacumque alia methodo, vel Febrifugo, vel viribus naturæ subacta fuisset, nihilo secius redituram fuisse.* Neque minus nervose similia protulerat ante Mortonum *Restaurandus* in Præfatione Tractatus sui, cui titulus — *Hippocrates De usu Chinæ Chinæ — Quid enim iniquius (inquit ille) quam à China China extorquere, ut nequaquam ab ea assumpta revertantur Febres? Numne sæpe sæpius animadvertitur illarum reditus, postquam fuerint curatæ, ab assumptis catharticiis, aliisque remediis? Præterea, an China China tenetur prohibere, ne qui reduce fruatur valetudine, errata in diata committat, ne causæ externæ, & animi pathemata Febrim exullem revocent? &c. Nonne quid simile accidere videmus ab efficacia Solstitii hybernici, si quando eo tempore Febris aliqua remisit: namque unus, vel alter paroxysmus in Vere rediivus est, ni prius revocata fuerit, præsertim per cathartica? Sed interim in medium prodeat remedium pari efficacia Febres profligans, qua China China. Nullum certe suppetit. Dico tertio, quod quando contingit ab assumpto Febrifugo recidiva, non semper accidit vitio ipsius Febrifugi, fermentum febrile imbecilliter, aut imperfecte subigentis, sed sæpe etiam, si non semper, culpa convalescentium sibi nimis fidentium. Quarto, quod quoties recidunt, etsi Febris nonnunquam de simplici possit fieri duplex, semper debilior illa est: idque fere perpetuum observavi, ut idcirco raro vocetur Medicus pro tali curanda recidiva, adeo levis Illa est, & sponte evanescens. Quinto denique, quod per repetitam, & opportunam Corticis oblationem potest eadem recidiva non modo semper curari cum veniat, sed, quod magis est (dummodo*

*Torti Therap. Spec.*

congruum id censeatur) etiam priusquam adveniat, penitus, ut in progressu videbimus, præcaveri. Propterea cum sit ut plurimum in potestate nostra malum istud pro libito avertere, ferè nonnisi volentes afficere potest huiusmodi objectio.

Soluta, ut reor, hisce responsionibus potiore difficultate, cui & alibi valide occurram, non est cur hic inutiliter tempus teram in refellendo, quod Nebulones quidam scurriliter blaterant, ad territandum popellum, nempe quod Corticem potantes, intra annum, vel, quod magis ridiculum est, intra septem annos moriantur, sopito videlicet, & postea ferocius recrudescente eodem, vel alio pejore morbo: item quod China Chinæ pinguibus obsit, & tantum graciles sanat, aliaque huiusmodi prorsus exhibilanda. Nam præterquam quod nullus Medicus, quod sciam, quibuslibet adhibitis in Curatione remediis, cuiquam per annum, multoque minus per septennium, sanationem ratam facit (quasi teneatur ad tempus de manutenenda Ægri salute, ut Faber Murarius de consistentia Domus constructæ) facillimum insuper est, experientia ipsa impostores istos mendacii convincere. Plures etenim (quos ob digniorem causam alias sum relaturus) ac præterea plus centum alios, & pingues, & macilentos, per Corticem curatos a decem, & quindecim retro annis, hucusque tamen incolumes, possem adducere: quin memetipsum, qui anno 1696. epotis uno haustu sex drachmis illius, à morte imminente illico evasi, & etiamnum vivo, & etiamnum scribo. At hanc Zizaniam nullius ponderis ab ullo, qui Medici nomen mereatur, satam, vix adducor, ut credam.

Sed præter experientiam, quæ sola sufficit ad ostendendum Corticis usum prorsus innocuum, id ipsum etiam, vel nuda ratione spectata, evincitur ex eo, quod nullam vere, quæ possit nocere, vim in se contineat Cortex, sive de primis illius, ut ajunt, qualitatibus,



sive de secundis, sive etiam de occultis sit sermo. *Calidus* enim *ex. gr.* & *siccus* est? Calidiora sunt, atque sicciora Zinziber, Piper, Semen Sinapi, Mithridatium, Theriaca &c. *Amarus* est? Amariora sunt Absynthium, Ruta, Gentiana, Chamedrys, Fumaria, Centaurium minus &c. *Stipticus* nonnihil est? Stipticiora sunt Nucum putamina, Nucces, Cupressus, Verbena, Aurantiorum Cortices &c. quæ sunt usitatiora, nec prorsus contemnenda Febrifuga, intercedente tamen inter illa, & Corticem hoc uno discrimine, quod illa, etsi ut plurimum calidiora, ac proinde magis suspecta, Febrim vix unquam tollant, & Cortex semper. Quoad occultas vero facultates, nullam in eo reperire datum est, nisi antifebrilem. Neque enim ullam *Narcosim* præferat, cum nullum soporem, quin potius vigilantiam, & mentis alacritatem, etiam copiose assumptus, inducat: unde, secundum plurimos, Opii consortium facile admittit, quod secus fieri deberet, si Cortex ipse eadem polleret narcotica facultate, qua Opium; rationabilis quippe subesset de nimio sopore incutiendo suspicio. Insuper si China China (ut clare demonstrabimus in historiis) soporosas Febres, atque *Lethargicas* momento temporis solvit, & cum illis submovet soporem adjunctum, satis patenter constat, illam vi potius pollere contraria: tantum abest, ut Causam Febrilem hypnotico veluti vinculo obstringat, præsertim ad tot hebdomadas, quot sunt induciæ inter morbum & recidivam, quotiescumque ista contingat, cum, ne per horam quidem, nodum huiusmodi narcoticum injiciat spiritibus. Quod si contendatur, illam exercere narcosim, & quidem diuturniorem, adversus solum Fermentum febrile, hæc, ut patet, dici nequit vera narcosis, sed potius absorptio, illaqueatio, aut retusio fermenti, vel quid his analogum, in quo facile conveniemus, quippe in re semper innocua. Ad hæc, nullas Cortex intra viscera, vel intra fluida excitat turbas, nullum cit vomitum,

secessum nullum (quod illi perperam vitio vertitur) non sudores prolicit per vim expressos, non urinas immodicas, non ullam aliam sensibilem, saltem ut plurimum, promovet evacuationem, quarum tamen aliquam si quando (quod haud infrequenter accidit) habeat adjunctam, placida illa est, modica, Ægro facilis, ac saluberrima. Uno verbo, China China citra omnem molestiam, excepto deglutitionis incommodo, materiam febrilem, quæcumque illa sit, undecumque procedat, quocumque tendat, aut ubicumque moretur, materiam inquam febrilem directe petit, corripit, intercipit, aut subigit, eodemque temporis momento celebrem illam, ut ajunt, humorum coctionem, diu, sæpe tamen frustra, quæsitam, & à plurimis pro dextero usu cujuscumque Febrifugi requiri creditam, quotiescumque non præextiterit, ipsa facit, vel saltem ut fiat efficit, correcto fermento Febrili, vel sublato illius affluxu, quæ concoctio statim in Urinis altera ipsa die ab illius assumptione manifestatur, estque phænomenon perpetuum, sicuti summa dignum observatione, ita & facillime observabile; Ut propterea in hac re, quæ non de *conjectura*, sed de *facto* est, & cuilibet obvia, diutius immorari non liceat.

Quod si quispiam de arcana ista Corticis facultate, de qua tamen plura in progressu, adhuc ulteriora quærat, ut ea fidentius utatur, is quærat potius ab expertis, quid illa præstare consueverit, quemadmodum de Febrifugis, sive Alexipyretis huiusmodi faciendum monet Doctissimus *Mercurialis* — *De præsidiis* (inquit) *operantibus arcana qualitate minime loquendum est; siquidem, ut scribit Galenus, medicamenta hæc cum sola experientia sint inventa, cogimur fidei iis adhibere, qui longa, & debita experientia testantur sese ipsa cum fructu usurpasse.* Quid autem dicant, qui milles usurparunt, jam proxime disquirendum. Sex idcirco in medium prodeant, universalem totius Reipublicæ Medicæ approbationem secum trahentes, Testes eximii,



eximii, experti, ac omni exceptione majores, videlicet laudatus *Badus*, *Restaurandus*, *Monginot*, *D'Acquin*, *Sydenham*, & *Morton*, qui omnes præ cæteris mihi dehinc in hac materia semper erunt Antesignani.

*Badus* Corticis innocentiam testatus — *Sancte* (inquit) id juro coram Deo meo; Nec nisi aliunde damna resciscam, profecto ego nescio quid unquam, uspiamve attulerit detrimenti: Scio immo semper egregiam operam navasse, & reportatis trophæis inclytum, & manubiis admirandum fuisse, & gloriosum. Hæc ille non minus ingenue, quam cum ibidem fatetur Corticem ter, quaterve illum fefellisse, in quibusdam scilicet *Tertianariis*, quibus tamen copulati alii morbi, *Gallicis* potissimum, & *Tabidis*, quod est extra activitatem illius. Auctoritas unius *Badi* fecunda est insuper plurimis Celeberrimorum Virorum testimoniis ab eodem adductis, quos inter eminet Doctissimus *Conygius*, sive *Honoratus Fabri*. Hic Auctor, paullo post primum Corticis adventum in Europam, peculiari Libro suo testatus est, *Romæ*, ubi moram trahebat, intra annum aliquot hominum millia pulverem *Peruvianum* adhibuisse, & non modo innoxium, sed saluberrimum quoque fuisse probatum. Nostri temporibus, eadem Orbis jam pene universi assertio est.

*Restaurandus* post plurima enucleata *Peruviani* Corticis præclara facinora — *Id vero* (inquit) addidero, me nunquam hoc remedium citra successum exhibuisse, hoc est ejus ope semper curatas fuisse *Febres*: ac maximam partem me ad ejus usum confugisse in illarum pertinacia, aut cum symptomata verenda comitarentur. Clarius vero ipsam securitatem remedii antecedenter testatus — *Ad illud auxilium* (dixerat) citra ullum periculi metum confugiendum est, nec permittendum, ut vivi comburantur *Ægri*, ac discerpantur.

Primarius pariter Regis Christianissimi Medicus *Cl. D'Acquin* de remedio *Anglico*, cujus basis *China* est, sic scriptum reliquit — *Nulli unquam re-*

*medio potiori jure specifici remedii nomen, quam prædicto adscriptum est; nec enim hætenus ullum nobis innotuit, quod Febres pari celeritate, & securitate profli-gaverit. Revera Quinquina*, qua illius est basis &c. Et inferius ad ostendendam innocuam operationem remedii — *Locus non est* (subdit) ut credam ab illius usu imminere discrimen aliquod: æconomiae naturali nullam vim infert, cum, non secus ac cætera remedia amara temperata, nihil noxium corpori humano inurere valeat.

*Monginotius* quoque de præstantia Corticis verba faciens, remedium hoc talis esse indolis asseverat, ut — *Nullum hætenus* (sunt ejus verba) *præstantius fuerit à natura productum*; ac de eodem in aliis quoque morbis, in quibus nondum usurpatum est, periculum esse faciendum incunctanter insinuat — *Quandoquidem* (ait) *extra omnem damni a- leam usurpari potest medicamentum qualitatis noxiæ omnino expers.*

*Sydenham* autem hæc habet de Cortice — *Vere affirmare possum, non obstante tam vulgi, quam per paucorum è doctis præjudicio, me nihil mali Ægris accidisse ab ejus usu vidisse unquam, vel cum ratione suspicari potuisse.* Paullo vero post — *Et profecto, si tam effectorum durationem, quam Corticis hujus innocentiam, exploratam haberem, principem illi locum inter omnia, quotquot sunt remedia, deferre nullus dubitarem, cum non tantum in hoc morbo insignium esse virium deprehendatur, sed & in Uteri, & Ventriculi etiam affectibus: Tantum abest, ut de ejus insalubritate merito quis conquerratur. Addamus & acrem hujusce Magni Viri querelam in Dissertatione Epistolari ad Cole, petentem eos præcipue (si qui tunc fuerint in ea regione) qui Cortice pro se, & domesticis suis utebantur, & interim eos pigebat (quod & per extensum confirmat *Mortonus* testis de auditu) eos, inquam, pigebat idem remedium aliis Ægrotantibus præscribere, quin & ipsum Corticem ibidem innotescere. Quam querimoniam prodic his verbis Vir iste Clarissimus — *Quam-**



*vis vero in Februm Intermittentium curatione egregia præstet, ne dicam miracula, dictus Cortex, atque eodem tum ipsi nos libenter utamur, tum Uxoribus, Liberisque usurpandum imperemus, quoties res postulet (en testimonium innocentiae remedii) sunt tamen quibus haud minus jam displicet, quod tam certo, subitoque morbos expugnet, quam olim displicebat, quod non nisi nuper his terrarum oris innotuerat.*

*Mortonus denique — Me quod attinet (inquit) ego fidenter dico, idque postquam jam ad 25. annos quotidiano usu ejus vires explorando expertus sum, me nunquam novisse aliquid mali ab usu Corticis cuiquam evenisse, præter surditatem aliqualem (quod tamen ego, hisce nostris in regionibus saltem, non sum expertus) quam sponte illico a morbo evicto, vel pulveris omissione cessare semper observavi. Me hujus remedii nunquam poenituit, nunquam aliquem Cachecticum, Tabidum, aut quocumque alio morbo affectum, multo minus quasi toxico interfectum novi. Atque ter tantum (ut olim innui) optato eventu, in Febre Intermittente ope ejus sananda, destitutus sum. Alibi quoque hæc eadem nervosius repetit his verbis — Ego sane, qui jam ad quatuor lustra, & quod excurrit, hoc Polychrestum remedium fere quotidie præscripsi, vix aliquid incommodi Aegrotantibus ortum inde observavi (quidquid clamose, atque falso oggerant male feriat quidam, atque Ignorantes) quin etiam non nisi ter, uti sincero animo prius asserui, in Febris Intermittentibus spem meam frustratus est. Utinam idem dicere licuisset de quoquam alio, quantumvis celebri remedio, in cæteris humani Corporis affectibus debellandis decantato. Quibus assertionibus nondum contentus, sed universali insuper approbatione munitus, in hæc alibi tandem prorumpit. Suffragio jam Professorum pene universali in censum medicaminum salubrium, & maxime efficacium adoptatus est Cortex. Nec de suo jure apud Doctos, & probos Viros decedet ante consummationem seculorum, ut ut ex astutia, malitia,*

*temeritate, aut ignorantia non desinant aliqui hucusque obstrepere, & oggannire.*

Demonstrata jam satis secundum experientiam, rationem, & auctoritatem præstantia Peruvianæ Corticis, nocendi nesciæ, superesset adhuc ex mente citati *Mercurialis* hanc ipsam experientiam ulterioribus, præter adducta, gravissimorum Auctorum *China China* utentium Testimoniis confirmare. Sed cum ex una parte plusquam quinquaginta Illustrum Medicorum attestations, ut dictum est, circa hoc olim protulerit *Badus*, quibus modo universa subscribit *Respublica Medica*, sive *Italiam* respicias, sive *Galliam*, sive *Angliam*, sive *Germaniam*, sive *Hispaniam*, sive aliam quamvis (ut verbo tandem dicam) *Mundi*, saltem politioris, *Regionem*: ex alia vero parte, cum ego *Tractatum* hunc, animadversiones tantummodo meas, præsertim practicas, continentem, quovis tum philologico, tum affectatæ auctoritatis ornatu destitutum, ut & toto semper margine lævigatum velim, ideo ab enumeratione *Scriptorum Chinam Chinam* totis ulnis amplexantium (quorum series numerosa late ultra plurium existimationem extenderetur) lubens abstineo, eosdem doctis Viris satis superque notos jam sciens, aliis vero, si velint, inventu faciles. Non enim apud *Garamantas*, & *Indos* hujusmodi notitiam querere est opus, quandoquidem nullus ab inventione Remedii fuit hucusque, qui de Febris scribens, siluerit de *Cortice*. Sed & eandem notitiam, si non integram, saltem luculentam, atque præcipuam colligere quisque poterit ex *Notis Clarissimi Nigrisoli Professoris Ferrariensis* in editione per eundem repetita *Opusculorum De Blegny, Monginot, Restaurandi, & Sponii*, ex *Zodiaco Medico Gallico* excerptorum, & ab eo in unum congestorum in Libro, cui titulus — *Febris China China expugnata* — ubi, præter non vulgarem ipsius eruditionem, solidam insuper proxim in usu talis remedii, & observationes summe veras, ac utiles, meisque

(expe-



( experientia utrinque teste ) omnino consonas, deprehendere est: ut propterea Virum istum inter saniores, & magis expertos hujusce Remedii Patronos jure merito lubeat referre.

Id unum monitos velim Osores Corticis, ut priusquam eundem damnent, quid de ipso scriptum sit, quid ab expertis assertum, legere non recusent: neque enim æqui Iudicis munere fungi potest, qui antequam judicium ferat, integram Rei causam, aut defensionem remittit audire. Huic, quæso, quem facile pro Tribunali sedentes exercere queunt, ne parcant labori, ut labori crurum non parcunt ad supervacue palpan- dos Ægros, quibus sæpenumero acceptior est sanatione blandimentis cassa, officiosa jugulatio.

Liberum hunc loquendi modum, quem in decursu quoque identidem offendet Lector, & a quo cæteroqui cavere mihi religio est, ne quis mihi vitio plane vertat, is attendat velim, procedere hoc ipsum, non ex dicacitate, aut malitia, sed ex ipsius necessitate materiæ, ad Apologeticam nonnihil vergentis; quippe crimen istud ( si vera hæc pandere crimen reputatur ) familiare est Auctoribus omnibus, quotquot sunt, qui de hoc Remedio scripserunt experti, & non tantummodo per conjecturas, aut ex aliorum relatu: ii namque, ut obvium est cernere, temperare nequeunt a laudibus, neque a tutela fervidiore tanti medicaminis, sicut nec ab amara, & acri querela, neminem tamen specialiter impetente, quod ei tot futiles objectiones, tot somnia, totque figmenta frequenter opponantur: signum evidens, quod hujusmodi Scriptores referentes ex intima conscientia, quæ vera sunt, & experta sibi, sine querimonia, & indignatione quadam ferre nequeunt vanas, & aperte falsas hujusmodi Hominum inexpertorum, fallacique idea præoccupatorum cavillationes, dato etiam quod nonnulli Corticis Patroni, in illius usu minus temperantes, abundant aliquo excessu credulitatis, orto nihilominus ex admi-

rabili, & innocua, quam pluries deprehenderunt, illius virtute.

Ob eandem causam, veniam aliquam me assequuturum facile credam, etsi trita nimis interdum inculcem circa usum hujusce Remedii, quæ cæteroqui puderet efferre in doctorum conspectu, quorum oculis vulgaria quædam fortasse vilescunt; sed qui lustrabit Historias meas, in iisque, non modo inexpertorum incredulitatem, & tergiversantium diffidentiam, sed & identidem Adversantium animositatem, mucidarumque rationum, ac doctrinarum oppositionem animadvertet, parcat insimul impugnationi minus conquistæ, triviali, & Minervæ Repugnantium accommodatæ. Quo pacto enim, quæso, dabitur mihi, usum validum, & liberalem Chinæ Chinæ in Febribus quibusdam exitialibus suadere iis, qui vel in benignis illam abdicant, atque proscribunt, ex indelebili inanium principiorum præventionem, nisi illis, data etiam eorundem rancidorum principiorum positione ( quæ refellere nimis tædiosum foret, ac tandem inutile ) ostendam innocentiam Remedii junctam infallibilitati felicitis eventus?

Sunt namque & hodie ( pudet ferè hoc in propatulo ponere, licet ita sentientes nec pudeat, nec pigeat palam profiteri ) sunt, inquam, vel apud nos, qui contra totius Orbis experientiam, atque consensum, damnant Peruvianum Corticem, æque ac si Arsenicum foret, aut Sublimatum; neque usque adhuc sibi suadere possunt, illum Febres Intermitteutes fugare, vel id innoxie saltem præstare, neque norunt ( etsi plura norint altioris indaginis ) quæ dosi præcise ad ipsas abigendas vulgo usurpetur: adeo scilicet exosum illis est nomen Corticis, & gravis ipsa cogitatio de eodem; crescitque in dies illorum aversatio ea proportionem, qua crescit ex præclatis operibus fama Remedii. Quod autem in hac Regione contigit, Viris cæteroqui doctissimis, eruditissimis, & ingenuis Professoribus abunde referta, puto rationabiliter contingere posse & in aliis.



aliis. Liceat itaque minus doctos ad modulum captus eorum erudire, salva integra Eruditorum existimatione: etenim (ut alias sum protestatus) Tyronibus scribo, iisque tantum, qui Tyronibus æquiparari merentur, non maturis, doctisque Professoribus, quibus peculiariter tantummodo Chinæ Chinæ administrationem in arduis quibusdam Casibus, meamque simul experientiam in historiis expressam, fidenter exhibeo, ut eam fugaci saltem, humanoque intuitu, donare non dedignentur. Cætera, si lubet, ad lusum percurrant, & jocum.

## C A P U T II.

*Pervicax Antipathia, qua nonnulli abhorrent ab usu Peruviani Corticis, illumque proscribunt. Ratio recursum Februm tempestive occurrendi.*

**S**UNT igitur hodie nonnulli (perpauci licet) præjudiciis vetustioris Pathologiæ nondum exuti, qui reluctanti-  
bus insimul experimento, ratione, atque Orbe toto, adhuc male sentiunt de Cortice, &, quod turpius est, crimen istud tangit præcipue nos Italos, cum tamen omnem ferme, quam intra totius Europæ confinia nactus est famam, ab Italis Scriptoribus primum traxerit Cortex; ut proinde stupidus exclamet Auctor quidam Anonymus (*Helvetius creditur*) in Libello gallice conscripto, cui titulus — *Les admirables Qualitez du KinKina* — nobisque exprobrat, quod in Italia, unde antiquiorem melioremque deduxit China China nominis sui propagationem, ibi pauciores, quam alibi, inveniat patronos, cum in Gallia, ubi serius apparuit, tantam existimationem, etiam propter Italorum testimonia, sit affecta. Illius ideo verba huc referre non piget — *C'est une chose assez surprenante, que le KinKina, qui fait aujourd'hui tant de bruit en France, par la guerison d'un nombre infini de personnes, auxquelles il a rendu la santé, trouve si peu de partisans en Italie, où il*

*commença à paroître, il y a près de quarante ans, sous le nom de la poudre du Cardinal de Lugo Espagnol, & qu'on n'y peut encore croire qu'il soit un remède spécifique pour toutes sortes de fièvres.* Quæ quidem querela justissima est, dummodo plurimum restringatur, neque credulitatem nostram extensam velit ad omnes æqualiter Februm, etiam Continuarum, species, in quam exceptionem alibi consentire videtur idem Auctor; quandoquidem, Febres Intermittentes (& quæcumque, subdo ego, ab initio tales fuere, necdum omnino a sua natura desciverunt) esse verum objectum actionis Peruvianæ Corticis, asseverat dum inquit — *Les plus admirables effets de ce Fébrifuge paroissent dans toutes les fièvres intermittentes, qui en sont le véritable objet.* Quod vero etiam in istis perpetuo ablegetur a quibusdam idem remedium, sane, si non in Fatum quoddam, non in aliud, quam in ingenitam quandam eorum antipathiam potest refundi; Sed & hanc ipsam satis mirari nequeo, quoties hæc, quæ cogitanti occurrunt sæpius, mecum ipse revolve.

A prima Medicinæ origine ad hæc usque tempora, maxima fuit Medicorum sollicitudo, longo sæculorum tractu incessanter exulta, ut Febrifugum aliquod invenirent, ad sistendos Februm Intermittentium Paroxysmos. Nil intentatum reliquit illorum sollertia, triplex regnum Naturæ, Animale scilicet, Vegetabile, ac Minerale, susque-deque volventium, ut vel aliquid naturale ad hoc aptum detegerent, vel artis adminiculo redderent tale. Usque eo devenit Artis tentamen audax, ut ad Dracones, ut vocant, mitigatos, hoc est ad ipsa venena præparata, & non nihil retusa, experiunda confugerit. Hinc Antimonium, & Mercurius (quæ, ut notum est, nocentiora sæpius sunt præparata, quam cruda) Arsenicum ipsum, Vitriolum, Scammonium, Colocynthis, & hujusce farinæ sexcenta alia, paullo ante accessionem exhibita, crebro in usu fuere. Ex his, & similibus  
fabre-



fabrefacta sunt Febrifugà *Riverii*, *Muscoschii*, & *De Clos*, *Hercules Bovii*, *Arcanum duplicatum Mynsichti*, pulvis *Algorethi*, *Cornacchini*, & id genus alia, nomen veri Febrifugi nequaquam merentia, quorum omnium valde periculorum, ut & aliorum mitioris ordinis, sed plane inutilium, si vellem Catalogum texere, Tractatus iste in amplum volumen excresceret.

De prioribus ergo tantum, scilicet de energeticis loquendo, si ea bis, ter, vel quater fuissent exhibita, fama erat, quod periodus febrilis tandem inhibebatur. Interim vomitus immanes, enormes secessus, tormina, cruciatus, anxietates Aegrum torquebant, quandoque non sine vitæ discrimine, &, quod pejus est, saepesapius (dato quod nonnunquam res ex voto cesserit) Febris pari passu, si non etiam pejore, progrediebatur, cum insigni interim virium jactura, & vitalis œconomiae detrimento. Proponebantur nihilominus, atque ultro propinabantur, etsi spem pluries fefellerint, constanter, & absque ulla trepidatione aliis Aegrotantibus, quibus postmodum si febris de more inexpugnata processisset, sat erat dixisse, eos saltem à pravis humoribus esse purgatos (verius dictum foret melioribus destitutos) quos nisi Febrifugum illud adeo strenue, licet cum aliquo incommodo, evacuasset, maligna, lethalisque illis Aegritudo imminebat. Sed tandem a Medicis sanioribus, ac ingenuis, immo vel ab Aegrotantibus ipsis cognita proprio sumptu fallacia, ab hujusmodi remediis feriaricœperunt.

Cum vero hanc ipsam auxiliorum penuriam male ferrent utrique, Clinici vero eandem supplere pro virili contenderent, idcirco, incassum licet, *In varias abire vias*, quas inter peculiari mentione digna videtur Methodus propinandi paucis ante accessiones horis medicamentum conflatum ex diaphoreticis calidioribus, sudore insimul externis adminiculis provocato, mox offerendi hora paroxysmi Catharticum, mistura quadam spiritiosa, & diaphoreti-

ca solutum, vi quorum remedium, in medio Febris impetu, omnes illæ oppositæ simul coinciderent operationes, ut nimirum Ager jam algens sudare, & e lecto surgere ad alvum deponendam cogeretur; sicque Paroxysmi progressus confunderetur, atque interturbaretur. Cujus animosæ methodi, quæ paucos habuit sequaces, auctor fuit Celeberrimus Practicus Londinensis *Thomas Sydenham* ad curandas Tertianas Intermittentes, priusquam in iisdem vires Corticis, quas in Quartana tantum noverat, experiretur. Perspecta namque paullo post integra illius virtute, de eodem tam bene sensit, ut purgationibus, cæterisque evacuationibus plane posthabitis, nullum aliud remedium illi æquiparandum duxerit, quoad tutum usum, ac effectus promptitudinem, ut nuper vidimus.

Irreparabili itaque deprehenso utilium Febrifugorum, vel Methodi cujuscumque certæ, tutæque defectu, factum est, ut magna pars Medicorum, arti consuetæ, plusquam par sit, fortasse fidentium, Quartanas Febres, & Tertianas diuturniores, crebris, ac usualibus purgationibus, sanguinis missionibus pluries repetitis, julapiis, jusculis, pulveribus ad nihilum, nisi ad Aegri nauseam, tædiumque facientibus, pertinaci usu curare tentaverit; quibus demum nil proficientibus, ad simplicia vegetabilia, Febrifuga reputata, ut Centaurium minus, Camedrym, Gentianam &c. item ad alia Specifica, sic dicta, carpis apposita, vel digitis alligata, ad Amuleta de collo suspensa, tandemque ad puerilia, & plane ridicula confugere cogeatur. Quod si beneficio temporis in horum remedium administratione inaniter consumpti, sponte naturæ non convalescebat Ager, ad aeris, tempestatis, vel regionis mutationem relegabatur. Altera vero pars Medicorum magis sincera, & Arti fidens tantummodo quantum decet, vel Febres contumaciores nullo pacto attingebat, vel administratis potioribus remediis, & tentatis rationabilioribus, præscrip-  
proque



ptoque congruo victus regimine, eadem aliquantulum enervatas soli demum naturæ curandas, præmissis tantum ingenuo de diuturnitate prognostico, relinquebat.

Affulsit interea beneficium lumen cœcutientibus, detecto Peruviano Cortice, in quo vis illa Febrifuga, tot diu quæsitæ laboribus, eminenter emicuit. Sed (mirum dictu) reperitur ex voto Remedium omnis omnino pravitatis expers, Febres momento temporis fugans, nullos in Corpore tumultus excitans, nullam penitus molestiam pariens, ac si nihil sumpsisset Æger, & statim repertum rejicitur, immo cæteris jamdudum rejectis, noxiis, ac inutilibus, quasi deterius foret, postponitur. Numquid forte illud audax quidam Chymjater ex Antimonio, vel ex Mercurio sublimatis eleganti periculo fabrefecit? Minime gentium. Non alium Opificem habuit China China, quam Deum, & à solo Deo omnem, quam nacta est, febrifugam virtutem recepit. Anne ergo Deus illa utitur in humanum genus specie juvaminis in ultionem Peccatorum? Cur illi tantam vim indidit, ut ea demum deluderemur, ut ea nos perderet? Absit hæc a nobis ingrati animi blasphemia. Si reliquis Plantis, & earum cuilibet injunxit Creator virtutem suam, qua postmodum à nobis detecta, si salubris appareat, fidenter utimur, quare virtute Corticis febrifuga eidem impressa, & à nobis evidenter detecta, pari fiducia non erit utendum? At quid dixi, Medicos fidenter uti consuetos, herbis, & rebus, quarum virtutem perspectam habeant? Quin iis utuntur ut plurimum in fide Parentum, de quarum natura, & viribus, nullam, nisi confusam, incertamque habent notitiam. Illis tantummodo, velut egregiis utuntur, quia semper utuntur inutiliter; Cortice vero, cujus virtus perspicua est, & incomparabilis, quandoquidem cum fructu adhibetur, uti piaculum est.

Viguit perpetuo (liceat paululum digredi, & serio ridere, siquidem quandoque

— ridentem dicere verum

Quid vetat?) —

viguit, inquam, perpetuo immortalis, & cavillosa garrulitas inter Pharmacopolas non modo, verum & inter Medicos quosdam Pharmacopolarum more philosophantes, acriterque disputantes, an res quamplurimæ refrigerent, an calefaciant. Vetus Theorema est, Acida omnia refrigerare, Amara calefacere. Dubitatur tamen, an Acetum, aut Spiritus Vitrioli in linea Acidorum refrigeret, & an Cichorium, in linea licet Amarorum, ullo pacto calefaciat. Recentior modo dissensus est inter Neotericos, an voluptuosæ quædam nuper in Orbem nostrum, mox & in usum Medicum inductæ Potiones, quicquam sanitati, generaliter loquendo, conferant, an detrahant, ut potus Chocolatæ, Thè, Coffee, similiave

*Pocula, ab Odrisio multum laudata Tyranno,*

Laudant promiscue inter Medicos ii, quorum palato nova hæc, & exotica arrident: improbant, qui iisdem minime oblectantur, *Juris antiqui* seguaces. Laudo Ego, quia saltem sobriolantibus antea Vini spiritum, potiones hujusmodi in illius locum suffectæ, gravius delinquendi ansam præcidunt. Pariter divisa sunt vota, an Camphora, ut semen extinguere credita, frigefaciat intense, an, ut facillime inflammabilis, impense calefaciat. Idem pari contentione quæri solet de Opio, de Vipera, ac de mille aliis rebus maximi ponderis in praxi, quarum scilicet usus præposterus insigniter potest obesse, ut oblatio v. gr. Purgantium in principio, aut fine morborum, præsertim acutorum, nunquam satis damnata, sed nondum satis ab usu seposita, & hujusmodi. Medicus ergo quilibet, pro captu ingenii sui, prædictis omnibus utitur, unus quidem ad calefaciendum, alter vero ad refrigerandum &c. Sed veritas una est: Cichorium, Acetum, Spiritus Vitrioli, Camphora, Opium, Vipera, vel refrigerant, vel non refrigerant. Alter de duobus Medicis infal-



infallibiliter errat, Æger vero pœnas luit:

*Delirant Reges, plectuntur Achivi;* Neuter tamen culpatur, etiam si error, qui in alterutro est certus, sit in materia quandoque gravi, ut in Opio stupefaciente (neque enim semper in solo calore, vel frigore, vel in solo Cichorio, aut Aceto consistit, quod parum referret) neuter, inquam, culpatur, quia in materia incerta, sua quisque ductus ratione, & sua fultus auctoritate, conscius licet de opposita opinione, & de errandi probabilitate, operatur. Culpabitur forte tamquam de crimine, si Chinam Chinæ offerat, quia virtus illius certissima est, & indubia, nec potest controversi, an febrem tollat, nec ne. Dixi, errorem sæpe contingere in materia gravi, quia sæpe in materia gravi gravissimæ sunt controversiæ, & nihilominus lubricæ determinationes. Quænam, quæso, non vigent Quæstiones circa generalem usum *Phlebotomia*, quæ à pluribus doctis Medicis, nostri etiam sæculi, fere perpetuo ablegatur? Quænam non leguntur dissidia circa usum illius particularem in Variolis, Morbillis, Peticulis, & huiusmodi? Quænam lites non sunt, ut nuper agebam, circa usum *Purgantium* in Acutis, & in illorum principiis? Hoc non obstante, quotidie præscribitur fidenter utrumque, aut alterutrum, cum scientia contrariæ sententiæ (quæ, si vera foret, proh quantum noxia foret, nostra præscriptio!) licet pro alterutra parte, quantumvis probabiliore, nulla constans stet, aut indubia experientia, ut in usu Corticis certo febri-fugi, & nihilominus adhuc pro suspecto habiti.

Procedamus ulterius. Non modo in rebus incertis hallucinantur aliquot saltem Medici, sed ultro errant (donetur veritati hæc libertas, parum fortasse cauta, quippe nimis ingenua) errant, inquam, etiam scienter, si modo velint animadvertere, se nonnullis uti rebus, quibus vel invalidam, vel nullam inesse virtutem, pro obtinendo fine, in

quem usurpantur, mille antea experimentis (quidquid in contrarium scripserint vafri quidam, vel nimium creduli) luce clariusprehenderunt. An graviter peccent, sive ob imperitiam id fiat, sive ob socordiam, palatum simul, & crumenam Ægrorum, quandoque pauperum, male multando, videant Theologi. Ego sane remedium, quod pro meipso non usurparem, alteri nunquam præscribam. Non hic præcise loquor de tot Confectionibus Cardiacis, de tot pretiosis Medicamentis inutilibus, quibus abutuntur nonnulli, fortasse Corticem improbantes, ac illiusmodi Medicamenta inertia Cortici activo perperam, & frustranea impensa anteponentes, quos proinde incurrere in Legem *Repetundarum* autumat *Badus*. Neque sermo mihi est de celeberrimo Lapide Bezoartico a Medicis potius Ægrorum sudores frustra expectantibus, quam ab Ægris ipsis sudores eliciente, cuius nihilominus (etsi spem millies frustra-verit) tam creber, tamque inanis est usus, absque eo quod, illo etiam nil operante, quidquam metuant, qui præscripserint; sed de abusu loquor magis vulgari, minus forsan notato, & maxime universali.

Atque, ut cum assumpta hactenus comparatione procedam, nonne illi iidem Medici, quibus tantum est curæ, ne tractu temporis noceat Cortex, quem cæteroqui vident statim prodesse, præbent pro curanda *verb. gr.* Scabie, post repetitas supervacaneas purgationes, & phlebotomias, tantum succi Cichorii crudi, quantum vix Uter caperet, tantum Seri lactis, quantum vix Labrum, tantum pulveris ex testaceis, quantum vix admitteret Bulga, licet post longam experientiam certo didicerint, huiusmodi remediis vix unquam Scabiem sanari, quam cæteroqui sanant Viperata intus, & Sulphur extus, tempore idoneo, & cum regimine adhibita? Neque tamen, ex tam copiosa succi illius ingurgitatione, ullam metuunt cruditatem in stomacho; cum ex adverso illud idem Cichorium in Acetariis, Oleo,



## Therapeutices Specialis

leo, Sale, & modico Aceto correctum, ac conditum, a pastibus religiose prescribant: neque ullam a tanta feri accessibilis, aut corruptibilis illuvie læsionem, ullamve a tot pulveribus terreis, crusta quadam Ventriculum, ac intestina obducentibus, obstructionem reformidant, cum cæteroqui sciant terrea hujusmodi ingesta Chlorosim, & malum habitum inducere, præbeantque incunctanter, licet de non curanda intra annum hisce remediis Scabie moralem habeant certitudinem. Non est tamen, quod plane improbem enarrata remedia, quibus, defectu meliorum, utor & ipse, moderamine tamen, atque fiducia viribus eorum satis perspectis correspondente; sed dico, ridiculum esse, quod illis tam fidenter utamur, China China vero tam trepidanter, cum illinc irritus utplurimum, hinc faustus semper succedat eventus.

Dicam amplius. Nedum remediis, quorum virtus incerta est, & iis, de quibus certum est, quod non sanant, utuntur Medici, Corticem tanto horrore metuentes, sed & insuper aliis, quorum noxa præsens certissima est, incertissimum vero futurum levamen. Exemplo sint Cucurbitulæ, remedium pro Rusticis, ac Bajulis ob assuetudinem, & Vessicantia pro Cappuccinis ob amorem Crucis, quemadmodum dicere consueverat, cum viveret, nostræ nunquam memoriæ moriturus *Malpighius*: quorum Epispasticorum acrimonia dolorifica ex Cantharidibus, Euphorbio &c. præter partes externas, ad internas usque, dysuria teste, progreditur; & tamen de illorum juvamine res adeo controversa est, ut ab innumeris Auctoribus, tum Antiquis, tum Recentioribus, velut absolute, ac perpetuo noxia damnentur. Hæc, inquam, quæ Sanis febrem inducere apta sunt, Febricitantibus graviter decumbentibus affiguntur ab iis identidem Medicis (quos tamen non ob id semper damno) qui leviter Febricitantibus renuunt prescribere Corticem, cujus juvamen præsens certum est; incommodum vero, quod ex Fe-

brium suppressione ominentur, somnium, & ab expertis millicies nunquam deprehensum.

Hujusmodi equidem terriculamenta imaginaria circa usum Corticis, facile condonari, *Chisletio*, *Plempio*, *Serponto*, *Magneno*, *Paravicino*, *Casato* &c. sicuti nimiam forte circumspeditionem suam censeo condonandam *Jo: Forti*, suam, ut levissimam, cunctationem *Villisio*, suam cautelam *Malpighio*, omnemque tandem trepidationem aliis quibuscumque Magnis Viris, qui vel tempore tantum primi adventus, & nascentis usus hujusce Febrifugi floruerunt, vel saltem nondum plenam experimentorum illius notionem habuere. Equum enim tunc erat novitatem remedii examinare, discutere, ac de inusitato eventu, fausto licet, nonnihil dubitare: nec ipse quidem tunc egissem aliter, donec prima paucorum experimenta longior tandem usus comprobasset. At postquam diuturna, & crebra Medentium experientia, votoque unanimi recepta est, ceu utilis, ac innocens illius operatio, nec consensu minus universali rejecta est Scholarum Humoristarum doctrina, cui præcipue innitebantur quotquot inventa fuere contra Corticem Machinamenta, nullus profecto amplius trepidationi, aut hæsitantiæ locus potest superesse, nisi larvata sub specie panici timoris lateat pervicacia.

Atque his positis equidem fateor, me intelligere non posse, cur China Chinæ improbetur, nisi forte eo solum nomine improbetur, quod profit; reliqua vero approbentur, eo quod non profit. Memet explico. Adeo assueti sunt Medici uti remediis, quorum Virtus creditur potius, atque supponitur, quam dignoscitur, ut de hoc, cujus virtutem in omni sexu, ætate, temperamento, ac climate sensibilibiter tangunt, præ admiratione metuant (quasi foret aliquid in Natura præstigiosum) ne quid mali, vel doli subfit. Revera qui Chinam Chinæ pro fugandis Febribus Intermittentibus respuunt, utuntur constanter, etsi semper frustra, *Absynthio*, *Centauro*,



taurio, Chamædryo, Gentiana, Fraxini Cortice, & hujusmodi, quærentes sanationem à plantis, quæ nequeunt illam præstare, & ab ea, quæ præstare valet, nancisci nolentes. At Bone Deus! Cortex Fraxini pro Febrifugo proponitur ab Antiquis, à quibus Peruvianus Cortex proponi nequibat, utpote nondum notus. Cortex Peruvianus, detectus postmodum, proponitur à Neotericis. Uterque est *Liber Arboris* à Deo datæ; Uterque dicitur Febres fugare, & quidem uterque sine ulla sensibili evacuatione. Cortex tamen Fraxini, dum exhibetur, semper, aut fere semper, exhibetur incassum; Cortex vero Peruvianus nunquam, aut fere nunquam. Quid? Ille laudatur adhuc, & usurpatur; Ille damnatur adhuc, atque rejicitur. Quanam quæso cæcitas est isthæc? Forsitan si in Fraxini Cortice parem Medentes virtuti nostri Corticis reperirent virtutem, illam pariter haberent suspectam, adeoque fallant eos remedia necesse est, ut illis adhibeant fidem.

Si vero Chinæ Chinæ eandem deneget, quia illius assumptio, Febre depulsa, relinquat homines in recidivam pronos, præter ea, quæ superius dixi, addo fidenter, quod etiam si soli Chinæ Chinæ imputare velimus recidivas, quæ à tot aliis occasionibus pendere possunt, & frequenter pendent, adhuc tamen non posset eadem culpari, nisi ob imperfectam Morbi judicationem, nequaquam vero ob noxam; Quod equidem incommodum, quacumque alia etiam Methodo sanentur Ægri, sæpissime solet contingere, immo etiam si sanentur sponte, nulloque remedio prorsus adhibito. Duplici autem modo possumus his recidivis occurrere, ut alias tetigi, scilicet vel eas ocysime iterum curando, quoties redierint (quemadmodum in omnibus aliis Recidivis independenter a Cortice contingentibus conamur facere) vel easdem in totum, si velimus, præcavendo, quorum tamen neutrum tam facile vulgari medendi Methodo valemus assequi. Apposui con-

ditionem — *Si velimus* — tam levis enim est sæpè sæpius accessionum recursus, ut nonnunquam expediat febrilis fermenti reliquias ipsi effervescentiæ Febrili duobus, vel tribus accessibus dissipandas relinquere, quo demum non rite succedente, ad artis ministerium fas est denuo confugere.

Pro curanda itaque Febre iterum recurrente, quemadmodum Cortice non utentibus mos est iterum atque iterum eandem plebotomias, & purgationes, eosdem Syrupos, & pulveres, cum quibus morbus antea fuerat imperfecte judicatus, repetere, cum eventus etiam diuturnioris incertitudine, cur non poterit eadem de causa, præmissa etiam, quotiescumque redierit febris, si cūlubeat, aliqua ventris expiatione, iterum atque iterum repeti oblatio Corticis, usque ad perfectam judicationem, cum certitudine, & promptitudine eventus? Sane in pluribus Morbis, ut Dysenteria, Colica, Nephritide, aliisque doloribus præscribuntur remedia Narcotica, eaque identidem repetuntur, ad impetrandas tantum inducias, cum certitudine recrudescentiæ fortioris, causæque morbi non modo superstitæ, sed & sæpius ob id ipsum contumaciore reddita; Cur ergo tutius non poterit adhiberi Cortex in eundem, vel poriorrem finem, eodem iure, quo cum discrimine in aliis morbis usurpantur Narcotica?

Pro inhibendo autem etiam penitus, priusquam ingruat, Febris recursum, in promptu est modus, isque tutissimus, facillimus, atque ut plurimum certus, repetendo scilicet, Febre statim fugata, & per plures postmodum dies continuando, immo, post aliquod temporis intervallum, iterum ad aliquot dies renovando lentum usum ejusdem Corticis, sive mavis Extracti illius, juxta præparationem, quam *Charas* instituit, per quam spoliato (si Auctori sit adhibenda fides) partibus inutilibus, & febrifugarum activitatem remorantibus, aut infringentibus, remedio, adeo efficax illud redditur, ut, eo congruenter



ter assumpto, omnis omnino recidivæ tollatur occasio; qua de re idem, si placet, consulatur Auctor. Potest ne levioze incommoao, minore impendio redimi hoc infortunium? Qui Cortice non utuntur in Febribus, nonne præscribunt Syrupos ad Septimanas, & Menses, ut sensim per viam alterationis, ut ajunt, Morbum expugnent? Nonne passim in Febre quavis periodica lentioze, Apozematis per Epicrasim purgantibus per hebdomadas pariter Aegrum fatigant, & sæpius incassum? Nonne in aliis casibus extra febres usurpant decocta aliorum Lignorum, & Corticum, eandemque protrahunt ad quadraginta, & sexaginta dies, immo illa quotannis repetunt, ut in curatione Luis Venereæ, post plures prophylaxes iterum atque iterum facile reviviscentis? Cur ergo Cortex Peruvianus, qui tam strenuum Alterans, tam vespecificum Absorbens est, ut quam cito febrile Fermentum componat, ac tandem domet, non debebit, aut poterit, pro totali Febris eradicatione, ad aliquot dies, ut alia omnia alterantia, repetitis vicibus usurpari? Sane *judicio nostro* (inquit egregie Baconus) *opinio fuerit magis blanda, quam vera, si quis existimet, Medicamentum aliquod tam potens, aut felix fieri posse, ut usus ejus simplex curationi alicui grandiori sufficiat*, subditque paullo post. *Quæ in natura eximie possunt, ac pollent, sunt, Ordo, Prosecutio, Series, & Vicissitudo artificiosa.* Qua igitur ratione Cortex debet sanare perpetuo, dum semel tantum offerretur? Anne cætera febrifuga vegetabilia offeruntur semel? Offeratur ut reliqua, & sanabit longe certius, ac reliqua. Numquid illi soli onus incumbit, una, vel altera oblatione tollendi febres, & inhibendi recidivas, cum aliis remediis concessum sit per menses Aegrum torquere, angere, & expectationem deludere? Discant ergo prius Corticem exhibere qui damnant; rite experiantur, & damnent.

## C A P U T III.

*Princeps oppositio in Chinæ Chinæ usum, ex carentia sensibilis evacuationis post eandem assumptam petita, diluitur: Experimenta quadam tentata ad explorandam illius vim Febrifugam exponuntur.*

UNA superest tollenda difficultas plurimi habita, & obtrudi solita contra usum Peruvianæ Corticis, in cujus objectionis examine paulisper immorari necesse est. Id autem duplici ratione, quia nempe hujusmodi objectio multa, & varia simul complectitur, & quia omnia, quæ ex illius solutione resultant, ac facere possunt pro usu innocuo Chinæ Chinæ, generaliter loquendo, multo magis facere poterunt pro eodem, loquendo in particulari, nempe in casibus, in quibus nullum aliud Asylum suppetit, quod est intentum meum, in cujus gratiam cuncta, quæ dicta sunt, & plura, quæ mox dicentur, placet præmittere.

Opponitur itaque, quod ab assumpto Cortice nulla sequatur sensibilis evacuatio, adeoque causa Febris, illiusve fermentum figatur, & intus detineatur pro recidiva, vel alio pejore morbo inde imminente.

Vulgarissima hæc oppositio gratis supponens ab usu Chinæ Chinæ intus coercitas jugulatarum Intermittentium Causas, æque gratis supponit, eas pro curatione semper indicare evacuationem, non vero solam absorptionem, aut correctionem sui. Fundatur insuper illa in absone satis illatione, quandoquidem ab incertissimis Febrium causis (de quibus nil certius habemus, quam quod sunt incertæ) ad impugnandam certissimam Corticis operationem procedit: oppositis enim plane gressibus est incedendum, ab infallibili videlicet, ac uniformi ejusdem actione, in varias Febrium species sine manifestis evacuationibus exercita, ad rimandam occultam, & molis sæpius inconspicuam, earum-



earumdem causam, semper æqualiter expugnatam; ne scilicet ab ignoto ad confundendum notum, sed ut a noto ad deregendum ignotum ordinata methodo convertamur. Hanc methodum philosophandi, in hac speciatim re, discere nos non pudeat à Celeberrimo Jo: Alphonso Borello, Matheseos Professore, qui de Febris, & de fermenti, seu Causæ febrilis extinctione verba faciens, & ab hoc opere sensibiliores evacuationes excludens, suum assertum ex actione Peruviani Corticis confirmat his verbis — *Hinc deduci posse videtur, quod Febres nunquam, aut raro curari queunt ob copiosas humorum purgationes, & ejectiones, cum fermentum febrile exigue molis esse soleat; quod evincitur ex curatione Februm cum rigore advenientium à Cortice febrifuga, ab India nuper advecta, quæ absque ulla ejectione, aut per alvum, aut per sudores, vel per urinas, Febrem tollit.*

Non tamen universaliter certum est quod Borellus primis hujusce remedii temporibus facile concessit, & quod nimium supponitur ab Opponentibus, nempe quod nulla unquam post epotam Chinam Chinæ sequatur evacuatio sensibilis, cum nonnunquam aliquæ per sudores, per urinas, & per secesum observentur, ut indicabo in historiis, insignes evacuationes, licet [quod ingenue fateor] ut plurimum non succedant. Sed si non succedunt insignes, nonne adsunt evacuationes consuetæ, post debellatas per Corticem Febres insigniter mutatæ, quæ possunt sufficere? Nonne alvi faeces sunt manifesta Corticis tinctura infectæ? Nonne Urina semper copiosior nonnihil redditur, croceo ut plurimum, vel alio quovis morbooso colore in citrinum converso, & crassa, vel tenui consistentia in medio-crem, cum signis coctionis, statim mutata? Numquid sub istis solis evacuationibus, etsi consuetis, latere non poterit Fermentum febrile, vel portio saltem illius activior a Cortice absorpta, vel quomodolibet secreta, ac inde cum reliquis quotidie excernibilibus

more solito foras detrusa? De evacuatione, seu dissipatione insensibili, quæ haud improbabili-ter cum Cl. D' Acquin, & aliis posset in medium afferri, ne verbum quidem hic facio, ne videar latibula quærere, ac diverticula. Istam tamen non adesse, vix ullus impugnator probare posset.

Sed demus, quod uti sæpe non adest sensibilis copiosa, ita nunquam adsit ulla, vel sensibilis, vel insensibilis evacuatio. Demus insuper, quod Causa Februm debilitata tantummodo, non debellata intus remaneat, sitque veluti portio fermenti resistans quasi sopita, ut iterum reviviscat. Quid tum? Anne semina Peponum asservata gignent Cucurbitas? Sic & semina Tertianæ, vel Quartanæ residua, si per incuriam, dimisso curationis progressu, sibi sinantur, ad summum Tertianam iterum, vel Quartanam reproducent. Neque enim, si res examinetur, quicquam deterius succedere consuevisse demonstrant ipsæ, quæ nonnunquam subsequi solent, Recidivæ consimiles, ut ut Hydopes, Cachexias, Apoplexias, & mille alia infortunia, post seculum adventura, inde præsagiant, reclamante licet quotidiana experientia, nonnulli Vaniloqui.

Vaniloquos appello hujusmodi Homines, qui hæc, & similia effutiunt de Cortice, tanquam de re ab intrinseco noxia, nec nisi pravos effectus, postquam febriles paroxysmos inhibuit, producere apta. Non tamen ideo plane negaverim, ex illius quoque [non secus ac ex cujusvis alterius selecti medicaminis, cibive ipsius] incongrua, aut intempestiva oblatione, inopportunaque inde secuta februm suppressione, suboriri forsitan nonnunquam posse quidpiam incommodi, ut Cap. 8. & 10. hujusce Libri, & Cap. 5. Lib. 4. serio perpendemus. Neque enim semper hoc remedio, quantumvis egregio, indiscriminatim, & absque methodo, seu cæca quadam libidine Febres illi-lico quomodolibet supprimendi, quovis earum tempore, & in quavis cir-



cumstantia forsitan uti licet: sed tantummodo ad certas leges, & regulas toto hoc Tractatu in hunc finem descriptas, extra quas, si illud prorsus empirice præscriptum, videlicet præter tempus, & ordinem sibi debitum, optato, & bono careat successu, id illi minime vitio vertendum, sed inconsultæ, aut intempestivæ oblationi, ut suis locis peculiariter adnotabimus.

Cæterum, ut redeamus in viam, per hoc etiam quod depulsa tempore idoneo per usum Corticis febre, aliquod forsitan illius semen intus remaneat, nil aliud tandem probatur, etsi totum, quod opponitur, concedatur, nisi quod, vel ante oblationem Corticis debeat prius Corpus exacte purgari, quod fidentibus purgationi permittitur, vel ad summum, quod a Cortice semel tantum exhibito, nec satis prius purgato corpore, immineat ejusdem morbi recidiva, quod nequaquam negatur. Hæc ipsa vero quam levis in tali casu regulariter esse soleat, & sua radice mitior, quam cito iterum curari valeat, impetratis interim languenti robori induciis, quam facile denique possit etiam penitus præcaveri, & portio reliqua Fermenti febrilis, seu causæ morbificæ radicitus averruncari, jam satis, ut reor, præcedenti Capite demonstravimus.

Quoniam vero de Causa ista Februm Intermittentium eliminanda tanta est anxietas, liceat de eadem, quæcumque illa sit [ de quo fusius infra ] generaliter quærere, an sermo sit de causâ, ut ajunt, Conjuncta, quæ scilicet paroxysmum præsentem actu producit, an de Antecedente, quæ futuros est productura, &, vel secundum paucos universæ massæ sanguineæ intime confusa est, vel secundum plures alicubi latet in corpore veluti in sua Fodina, ut statis periodis affundatur sanguini, illumque in motum effervescentiæ febrilis ad tempus cieat, ut ab eo postmodum media tali effervescencia illum despumante segregetur, & hac ip-

sa arte foras per consequens eliminetur. Si itaque de causâ Conjuncta protrudenda sit sermo, cum accessio quælibet sit particularis judicatio, cui regulariter sponte naturæ subsequitur particularis aliqua, sive insensibilis, sive sensibilis evacuatio, aut crisis, per sudores ut plurimum, vel per urinas ( unde paroxysmus actu solvitur ) non est cur a China China id optemus, quod jam nobis Natura ipsa fermentationis, aut ebullitionis ministerio sponte largitur. Si vero loquamur de causâ Antecedente, cum ista, ut verbo Antiquorum utar, nec sit, nec possit esse in suo Foco concocta ( sive dicatur minus probabiliter in sanguine dispersa, illique citratumultum confusa, sive probabilius in alio loco distincto congesta, conclusa, nec adhuc excarcerationi, aut excretioni matura ) cum, inquam, non sit concocta intra quancumque, ut ajunt, Mineram, nec queat concoqui, usquequo non subjacet fermentationi sanguinis: item cum non lædat, nisi quatenus cum illo ebullit, aut effervesceat, nec, nisi quatenus ebullit, aut effervesceat, queat segregari, hinc est, quod nulla utilis exigi possit citra fermentationem, aut effervescentiam febrilem ejusdem evacuatio.

Porro ea ipsa medicamenta arte parata, evacuantia per secessum, per vomitum, aut etiam per sudores, quæ, perperam licet, Febrifugi nomine solent audire, paullo ante paroxysmum exhibita, si plus expellant, quam sit pro illo paroxysmo congestum, atque excretioni jam sponte dispositum, tantum abest, ut prosint, quin potius absolute noceant, & morbum augeant [ sintque hodie idcirco fere obsoleta ] agitando videlicet, confundendo, irritando, ac perturbando quod quiescens adhuc, & inconspicuum, ut verbo Hippocratis utar, nondum lædebat. Id ipsum, quod a medicamentis materiæ concoctæ vim inferentibus dictum est fieri, quotidie pariter observamus [ quæ nobis est regula infallibilis a Natura constituta, ne crudos adhuc succos exagitemus ]



remus ] in spontaneis illis excretionibus, quæ per vomitum, & per secesum in Accessionum principio, & per sudorem, vel per urinam in fine, copia nonnihil exuberante contingunt. Ab illis namque profusis evacuationibus, non modo in principio, sed in ipso etiam paroxysmorum fine subortis, nonnisi longos morbos, aut difficulter solubiles, omnes, quotquot sunt, Practici experientia ducti ominantur.

Cum ergo qui Febres Intermittentes curare aggreditur, nil aliud possit intendere, nisi submovere paroxysmos, & ad coctionem [ verbo iterum usitato sit venia ] causam perducere : & cum postremum istud per viam evacuationis, ut notum est, nequeat obtineri, reliquum est tantummodo, ut, sublatis per Chinam Chinæ accessionibus, ipsa demum antecedens causa, quæcumque sit, ad intestinam secretionem, & inde secuturam spontaneam excretionem paulatim disponatur, per viam alterationis, in ipsa quoque minera, ut ajunt, vel foco suo, ne lædat, cum sanguini advenit ; quod ab eadem China China diutius usurpata haud infirme præstari, dummodo congrua serveretur proportio inter vim, aut copiam peccantis materiæ, & remedii dosim, cuilibet in hac palæstra, vel mediocriter exercitato quotidie sit obvium.

Si ergo Febrifugum, sive Alexipyretum istud de genere alterantium est, vel, si mavis, medicamentorum agentium, ut ajebant Antiqui, a tota substantia, & ex specifica proprietate, cur ab eo quærimus evacuationem, quam a nullo alio quærimus, aut querere possumus Alterante, a nullo alio Specifico, a nullo denique alio simplici Febrifugo etiam imperfectius agente? Quid, quæso, evacuant celeberrima illa Febrifuga unanimi tot seculorum consensu ex classe vegetabilium petita, & alias memorata, Centaurium nempe, Imperatoria, Camædrys, Pentaphyllus, Gentiana &c. quid earundem Plantarum sales, quid Theriaca ante accessiones exhibita, quid cor Leporis comestum,

quid Animalcula de collo suspensa, quid tot alia carpis apposita, à quibus nihilominus citra ullam evacuationem subita paroxysmorum fascinatio, frustra licet, speratur? Cur igitur uni Cortici Peruvianæ imputatur febrilium Accessionum suppressio cum nulla sensibili evacuatione conjuncta, quando cætera quoque Febrifuga non modo solventia non sunt, aut ullo pacto sensibilibus vacuantia, sed maxima etiam ex parte adstrictoria, & stiptica, ut vidimus?

Minus inverisimiliter forsitan nonnulli, censescentes cum *Frider. Hoffmanno* fieri a China China præcipitationem quandam Materiæ febrilis, objiciunt postea carentiam successivæ evacuationis illius: qui equidem operandi modus, scilicet per præcipitationem, ab ipsis Antiquis fuit tributus Febrifugis quoque suis specificis, inter quæ numerabatur *Pulvis e Cochlearum testis a Crollio* descriptus, & *Conchis Margaritiferris, seu matre perlarum calcinata, ex oculis Cancrorum &c.* Quæ Medicamenta præcipitatione quadam vim illam effervescenti, & paroxysmum excitandi ab humoribus tollere posse [ ut *Cerevisiæ acescenti creta injecta* adimitur aciditas ] vel ipse explicare conatus est verbis modo relatis, suo tempore, *Daniel Sennertus*, quem nec latuit effervescentia *Acidi, & Alkali, nec Fermenti Febrilis* nomenclatura.

Sed neque ista fortasse præcipitatio [ quæ physice explicata, ut absorptioni succedanea, contemnenda non est ] neque, inquam, ipsa inducit necessitatem insignis, atque conpicuæ evacuationis. Etenim, si hujusmodi præcipitatio supponatur fieri intra Sanguinem, ea non poterit attingere materiam antecedentem, quæ probabiliter nondum sanguini confusa est, nec cum eo effervesceat, sed solummodo illam portunculam, quæ eidem pro uno tantum paroxysmo est mixta, siquidem partitis tantum vicibus censenda est fieri hæc qualiscumque affusio novi fermenti, & sic non alia requiritur evacuatio, præter illam ordinariam, quam Accessio



quælibet, dum solvitur, secum ferre solet, & quæ revera contingit. Si vero talis præcipitatio, ad hoc ut tollere possit materiam plurium paroxysmorum, qui per Chinam Chinæ inhibentur, supponatur contingere in ipsa (ut vocant) Minera, seu Foco extra Sanguinem, quatenus materia Febrilis ibidem veluti congesta, ob immediatum remedii illuc pertingentis contactum, cum eodem remedio effervescat, inde uniatur, ac postmodum præcipitetur, quodcumque etiam hoc fieret, quod non absolute negatur, id ipsum absque alia tunc facta sensibili evacuatione, saltem supra consuetas (intra quas, ut vidimus, latere potest hostis depulsus) id ipsum, inquam, plane sufficeret. Neque enim quidquam amplius ab Arte, vel a Natura extorquemus per viam alterationis, atque coctionis in succis febriliter effervescentibus [immo & in non effervescentibus, ut in Acido Venero per usitatas decoctiones absorpto, & successive præcipitato] dum defæcationem eorum promovemus, media secretionem particularum subsidentium, & præcipitatarum, quæ respectu totius fluidi sunt molis admodum exiguæ, illarum postea excretionem serius nonnihil, sed tutius a Natura expectantes, quam Arte tentantes, sæpè sæpius quò Natura ipsa vergat incerti. Quod idem prorsus faciendum est, curatis per Chinam Chinæ Febribus, ne materia Febrilis [si ita etiam lubeat] præcipitata, nec adhuc excrera, intempestive iterum commota exaltetur potius, quam educatur, ut luculenter testatur experientia.

Multo minus [ut & hoc obiter tangam] assentiri possum censentibus, quod eadem China China Febrilem causam, in tota sua latitudine sumptam, præcise figendo, succos nempe effervescentes una cum Fermento febrili, ipsumque simul cruorem constipando, vel ex opposito eosdem nimium strictos, aut ad stagnandum dispositos præcise rarefaciendo, vel dilatando, suum munus absolvat, in quo nobis-

cum quoque sentit *Villisius* clare in-  
quiens — *Annotetur, quod hoc remedium, non quemadmodum vulgaria febri-  
fuga sanguinem figendo, aut etiam funden-  
do, accessiones febriles sistit.* Nam, præter-  
quamquod non est cur China China di-  
catur causam Febris potius figere, quam  
solvere cum *Conygio*, vel eandem re-  
tundendo tantum, aut aliter subigen-  
do, enervare, ac tandem devincere, male insuper infertur ex eo, quod illa Fermentum febrile absorbeat, aut præ-  
cipitet, & hoc nomine, si sic lubeat, etiam figat (quod in hoc sensu est to-  
tum id, quod exquiritur ab arte) male, inquam, infertur, quod alios etiam figat, aut vitiose constipet humores, ipsumque cruorem, qui ejusdem extra-  
nei fermenti accidentale, & insons sub-  
jectum est. Novi etenim per experien-  
tiam, quod, si uni Febricitanti pulsus sit magnus, & plurimum elatus, ac ef-  
fervescentia febrilis æqualiter expansa, cum vaporoso undique calore, alteri vero sit parvus, atque omnino depres-  
sus in ipso etiam febris vigore, quæ proinde sepultam habeat effervescentiam, & calorem absconditum, utrique nihilominus propinata China China pul-  
sum in naturalem mediocritatem, fu-  
gata æqualiter febre, illico restituit, illi quidem arteriam nimis elatam ve-  
luti deprimendo, ac fluidum conten-  
tum constipando, isti vero illam nimis depressam elevando, contentumque Cruorem veluti rarefaciendo: ut sileam, quod illa tam Febres [uti videbimus suo loco] quæ sunt de genere Colli-  
quativo, quamquæ sunt de genere Coa-  
gulativo, indiscriminatim sanat. Qui duo effectus oppositi nequeunt directe præstari ab una, & eadem China Chi-  
næ uniformiter agente, nisi quatenus illa absorbendo Causam febrilem, quæ pro diversa fluidorum dispositione modo unum, modo alterum effectum pro-  
ducit, eosdem pariter, licet oppositos, indirecte, & alternatim producit effe-  
ctus.

Hinc est, quod illa nihil intra corpus nostrum sensibiliter innovando, præter expul-



expulsionem febris, ejusque symptomatum, sicuti nullas sensibiles excitare solet, ita nec ullas soleat cohibere evacuationes criticas inchoatas, siue per secessum illarum sint, siue per aliam quamlibet viam: supprimat vero *symptomaticas* tantum, & a Febris demum sublatis antea pendentes, supprimatque præcise per hoc, quod Febrem illarum productricem deleat, non quia illas vi quadam adstrictoria cohibeat. Ob id Gravidis non modo, sed & Puerperis, vel Menstruas purgationes patientibus tuto exhibetur; neque tamen Menstrua, vel Lochia naturaliter fluentia sistit, aut nimium promovet, ut videbimus in historiis — Quo pacto ergo (inquit Mortonus) *pharmacum*, quod in Puerperio salubriter ministratur inter Obstruentia numerari potest? Veteres isti Philosophastri, qui Aetiologiam omnium morborum ex humoribus & manifestis qualitatibus petendam esse duxerunt, ubi sine aliqua evacuatione sensibili, febriles fermentationes illico à justa dosi Corticis exhibitæ, sopitas viderunt, inde experientia reclamante, & rei ipsius natura, nescio quam omnipotentem Constringendi, & Obstruendi facultatem Pharmacum huic inesse commenti sunt. At sane Cortex febriles fermentationes neque facultate obstruente, neque deobstruente sistit, verum vi sua Alexipharmaca, qua eximie præpollet. Quocirca non est, quod quisquam hisce terriculamentis, insomniis, & deliramentis Philosophicis ab usu Polychrestis hujus Pharmaci terreatur.

Quoniam verò hæc suspicio, aut opinio, quod China China suum munus cohibendi febres exerceat per hoc, quod figat illarum causam, admodum communis est in ore Medicorum quorundam, non secus ac in ore Vulgi, ut propterea hinc recidivas graviores, & mille mala ominentur, lubet idcirco opinionem istam nonnihil examinare, & (semotis etiam plurium Auctorum tali sententiæ ex diametro oppositorum validis rationibus, quas referre supersedeo) illam blandiuscule excipere in bono sensu, non in eo videlicet, in

Terti Therap. Spec.

quo intelligitur ab opponentibus, sed in eo in quo congruenter potest intelligi, & in quo verosimiliter puto eam esse veram, & admittendam, utpote effectus Chinæ Chinæ satis naturaliter explicantem.

Recolligendo itaque hic, quæ sparsim dicta, & dicenda sunt, extra dubium est, Chinam Chinam non agere in fluida, ut ea in universum figat, neque hoc ab ullo asseri posse; sed ad summum, quod figat Causam febrilem fluida ipsa perturbantem, & effervescentem facientem. Non figi sanguinem, aliosque succos utiles, ostendit perfectio actionum naturalium, vitalium, ac animalium statim a febre depulsa ope Corticis. Ostendit idem, ut modo dicebam, criticarum evacuationum cujuscunque generis inchoatarum continuatus progressus a China China assumpta, pulsus solutus, ac liber, cum prius depressus esset, atque conclusus, evanescentia fixationum ipsarum, seu tumorum Lienis, aut Hepatis a febris productorum & mille alia, quæ circulationem perfectam, & inculpatam fluiditatem succorum evidenter patefaciunt, non modo conservatam assumpto Cortice, si antecedenter adfuit, verum & restitutam, si defuit.

Ad solam itaque causam, seu materiam febrilem, humores nostros, ante mixtionem talis materiæ cæteroqui bene se habentes, agitantem, perturbantem, & effervescentem facientem, tota contrahitur decantata fixatio. Sed ecquis certo novit materiam illam, quæ Fermenti Febrilis nomen sortitur, non esse aliquid in sanguine, vel alio quolibet succo nimis exaltatum, aut a vinculo mixtionis solutum, quod figi idcirco debeat, ac deprimi? Hoc sane a probabilitate non multum abludit. Verum, quoniam ignota natura talis fermenti, nequit circa hoc quidquam præcise determinari, fas sit pro nunc indeterminate tantum, sed simul valde verosimiliter sic ratiocinari.

Hæc Causa febrilis nobis incognita, ubicumque delirescat, & quantacumque

B 3 sit,



sir, non erit, saltem ut plurimum, molis, aut quantitatis insignis, immo, sepositis jam, atque exhibitis humoribus imaginariis Antiquorum, fas est credere cum Doctissimo *Borello*, quod sit succus, vel humor quidam molisæpius exiguæ, quem fortasse cochlear unum caperet, per intervalla sanguini affusus, illumque in motum febrilem concitare aptus. Qui enim quandoque exeunt copiose per vomitum, aut per secessum, humores, præsertim in Tertianarum principio, non sunt veræ febrium Causæ, illis enim exeuntibus febris vel solveretur, vel saltem miteretur, cum tamen contra potius augeatur, ac exacerbetur; sed sunt effectus Causæ febrilis, molis, ut aiebam, exiguæ, ut ut tumultum illum, & immaturas excretiones inducentis. Certe quicumque perfecte sanus, & bonis humoribus scatens comedat ova piscis Barbi, vel Fungos noxios, vel Emeticum vehemens, aut Catharticum, paullo post copiosissimos per vomitum, & per secessum effundet humores. An propterea exigua non fuit moles Causæ suscitantis tantam evacuationem humorum minime peccantium, sed a violenta irritatione expressorum, & ab assumpto tantum pravo cibo, vel pharmaco corruptorum? Ad vitiandam magnam molem fluidi sani, sufficit immixta exigua moles fluidi vitiosi. Una Vini mucidi, acidi, aut inclinantis pinta potis est inficere, aut corrumpere dolium integrum Vini meraci. Portiuncula spiritus Vitrioli injecta in phialam olei Therebintinæ totum liquorem effervesce facit. Cur & totum sanguinem non poterit inficere, ac in effervescentiam ciere immixtus illi paucus liquor febrilis?

Hoc rationabiliter posito, supponamus huiusmodi succum febrilem (quem præ activitate magna in parvitate molis nomine Fermenti donarunt Auctores) a China China vere defigi, sed simul examinemus quo pacto vere defigi possit. Non profecto per veram narcosim, ut vidimus, ut patet experientia, & ut patere cuique potest ratione. Non er-

go alia via, nisi per modum illaqueationis, & vinculi, seu per coalitum, & coaptationem particularum Fermenti cum particulis Febrifugi, hoc est per ingressum illarum intra poros istius, eo pacto, quo Acida Alchalinorum porositates subeunt, ut *Lemeryo* placet: uno verbo, per absorptionem fermenti factam a Cortice illud *combibente, absorbente*, atque hoc pacto a reliquis humoribus, quos inquinabat, vel inquinaturus erat, *separante*, & in hoc tantummodo sensu, si loqui sic lubeat, *figente*.

Sed hoc est unice quod quæritur a Medico, hæc est intentio primaria, quam adimplere studemus cæteris omnibus Febrifugis specificis in curatione Febrium Intermittentium, omnibus Alexipharmacis in curatione Malignarum, omnibus Antidotis in correctione Venenorum, omnibus Chalybeatis in fermentatione succorum stagnantium, omnibus Antivenereis, Antiepilepticis, & Antiscorbuticis in medela talium affectionum, omnibus denique generaliter Alchalicis in absorptione quorumvis Acidorum. Istiusmodi ergo fixatio, seu potius separatio, & specifica castigatio febrilis fermenti tantum abest, ut prava sit, quin potius sit omne id, quod ab Arte potest exquiri, ut notum est, pro curatione ipsarum Febrium. Et sicuti in Morbis antedictis non sumus solliciti de successiva evacuatione Causæ peccantis absorptæ, molisque pariter per exiguæ, sed illam committimus Naturæ, eandem Causam sic absorptam, vel perfecte subigenti, vel per consuetas ut plurimum excretiones, sive sensibiliter, sive insensibiliter evacuanti, ita pariter non est cur major sit in casu depulsarum febrium nostra sollicitudo, maxime, cum quotidie videamus febres gravissimas, & periculosissimas sponte sine ulla sensibili evacuatione per viam coctionis, ut ajunt, ab ipsa Natura integre, ac perfecte sanatas.

Et sicuti etiam quandoque contingit in prædictis Morbis, ut tractu temporis il-



ris illorum Causa, etsi antecederet absorpta, per accidens reviviscat, vel quod vitio viscerum, aut fluidorum universaliter iterum regeneretur, sicque Chlorosis, Scorbutus, Lues Celtica, & hujusmodi saepius repullulascant, quo fit, ut eodem Chalybe, Cochlearia, Guajaco &c. rursus curentur, absque eo quod istis medicamentis imputetur vitium de *fixata nec evacuata* Causa illorum productrice, deque inde secuturis recidivis, aliisve morbis deteriores; ita etiam si fermentum febrile semel absorptum aliquando reviviscat, ac veluti a Cortice illaqueante iterum dissocietur, ac sejungatur, vitio vel naturae diutius illud foventis, nec prompte subigentis, aut expellentis, vel alimenterum fermentescibilium ingestorum, vel aeris, vel tempestatis &c. quae omnia illud rursus exaltare valent (ut ope solius aeris vim emeticam iterum resumat Stibium diaphoreticum) aut si vitio Viscerum, fluidorumque universaliter idem fermentum denuo reproducatur, non propterea culpandus est Cortex de *fixata*, ac veluti in Visceribus sequestroposita, sine ulla retensione, Causa febrili, vel de eadem insimul *non evacuata*, vel de cruore *constipato* pariter, atque *fixato*, ut perperam intelligunt, blaterantque nonnulli oppositores. Atque hic, meo iudicio, est probabilior modus agendi Peruvianae Corticis, seu generalior, ac crassior, congruentior tamen illius explicatio. Non enim suppetit animus perscrutandi penitus modum plane admirabilem, quo praecise Febrifugum istud agit in fluida, vel in reconditas Februm Intermittentium Causas, cum me imparem agnoscam intimae explicationi sensibili, qualem nostri seculi eruditio, & solida ejusdem, non verbalis, philosophandi consuetudo exigeret.

Haud inficior, me aliquando tentasse experimentum aliquod, vi cuius possem Chinæ Chinæ actionem in varia fluida a longe saltem subolfacere, sed incassum; neque enim quicquam supra id, quod retuli, licuit deducere. Dicam ta-

men quod contigit. Illam superinjeci diversis liquoribus, modo sejunctis, modo conjunctis, puta succis Limonum, ac Aurantium, Aceto, Aquae, tum dulci, tum salis, Oleo, Bili bovinæ, Lymphæ caninæ, Urinæ humanæ, Salivæ &c. Parum autem, ac fere nihil alterari ab immixto Cortice talium liquorum sapes dignovere, qui gustaverunt, nisi quantum adjuncta illius amarities, atque stypticitas ferebat, perinde ac quodlibet aliud Amarum, & stypticum, minime tamen febrifugum, iisdem confusum, tulisset. Pariter sapor Corticis, postquam liquores illos absorpsit, iterum exsiccati non magis alteratus est, quam par fuerit, habito ad liquorum absorptorum sapes adjunctos respectu; quod cuilibet similiter Amaro, & styptico non febrifugo illis immixto contigisset.

Sed quia non satis actum videbatur, explorando quid ageret Cortex immixtus fluidis Brutorum Animalium, quæ Febris Intermittentibus non videntur obnoxia, ut Homines (fortasse ob maximam victus illorum diversitatem, quæ maximam quoque diversitatem succorum procul dubio producit) placuit ideo eandem Corticis commixtionem institueret cum aliquot succis humanis præter jam dictos & præcipue cum Sanguine, ac Bile. Quoad primum, videlicet Sanguinem, nihil animadversione dignum datum fuit intueri, neque verum id reperire, quod ab aliquibus traditur, Chinam Chinam nempe sanguini recentem educto commixtam, illius coagulationem impedire. Haud diffiteor, quod diviso intra quatuor vitrea vasa *sani* hominis sanguine per unam phlebotomiam extracto, tardiuscule concrevit portio, cui Cortex Peruvianus inerat, quam duæ portiones, quibus ille non inerat; Sed hoc ipsum procedere a ruptione fibrarum facta per agitationem sanguinis, requisitam ad commixtionem illius cum Cortice, nec non ab ipsa pulvere materia (idem enim præstitisset alius quivis pulvis injectus) quæ fibrarum earundem distractionem, pro-



pter sui intermixtionem producit, me satis certum reddidit idem phænomenon, quod in alia portione sanguinis æque observavi, in qua videlicet Mali arboris corticem pulveratum immiseram, quæque tardius etiam concrevit, & concreta flaccidior apparuit ac portio, quæ Chinam Chinam admiserat. Ob id etiam tenacius adhærebant parietibus Vasorum portiones sanguinis impermixti, quam portiones utroque pulvere scatentes.

Quoad secundum vero, nempe quoad Bilem humanam, idem quodammodo mihi sum visus observasse, ac in bubula, hoc uno excepto, quod absorptio bilis humanæ Cysticæ, nequaquam morbosæ, instituta per infusionem Corticis, & descensus istius intra eam, longe lentior, & observatu difficilior apparuit, ac intra bubulam, quia longe crassior, opacior, ac densior est bilis humana cystica (saltem quæ fuit ad manus, & quam alias etiam licuit inspicere) quam bubula pariter cystica. Quod igitur observabilius mihi visum est in Cortice respectu ad bilem bovinam (humana pro nunc seposita) & respectu habito ad alios liquores eadem bile tenuiores, fuit modus, quo inæqualiter diversos liquores istos absorbebat ipse Cortex in pulverem redactus. Cum enim ille acida omnia, item aquam, & dulcem, & salitam, urinam &c. ægre admodum absorberet, bilem tamen celeriter combibebat, adeo ut in reliquis illis liquoribus bile minus crassis, minusque ponderosis, siquidem bilis eadem illis immixta subsidebat, pulvis Chinæ Chinæ, ut mos est, diu innatarer, cum in bile crassiore, atque graviore mergeretur, ac fundum peteret, celeritate non multum absimili, licet non tanta, ac subsidebat in oleo omnibus illis fluidis longe levior. Eadem vero China China imposita bili cum aceto mixtæ, immo etiam mixtæ cum aceto simul & saliva [quæ duo fluida a bile sejuncta ægre combibebantur a Cortice] visa est celerius adhuc, vel saltem æqualiter mixturam illam absorbe-

re, ac solitariam bilem. Sed istæ qualescumque observatiunculæ vix aliquid effatu dignum suggerunt, pro explanatione etiam remota, operationis admirandæ Peruviani Corticis in Februm Causas, tum quia idem spectaculum modo parum absimili, licet non plane eodem, observabatur in corticibus pulveratis aliarum plurium Arborum, & Fruticum, aquæ, aceto &c. diu innatantibus, in bile vero celeriter subsidentibus [levi tantum inter illorum, & Chinæ Chinæ descensum intercedente discrimine] tum quia parum refert observare quid China China operetur intra bilem qualemcumque, cum nos lateat quinam sit, vel esse possit ad causam Intermittentium constituendam bilis concursus. Interim tentamen meum, etsi irritum, fas sit curiosioribus retulisse.

Si quid autem ex his licet arguere, illud est fortassis, quod China China [ & ad illius normam aliarum proportionaliter Arborum cortices ] intra suas porositates facilius admittat minimas humoris biliosi particulas, illasque promptius combibat, & absorbeat, quam particulas minimas aquæ, aceti &c. quod constare videtur ex faciliiori illius intra bilem ponderosorem, atque crassiore descensu, quam intra aquam minus ponderosam bile, minusque crassam. Suppono etenim, seu potius ex re ipsa deduco, nudam Corticis, ut & aliorum lignorum materiam, semotis omnibus interclusis porositatibus, esse specificè graviores tum aqua, tum bile suis adhuc poris, si quos habet, scatente, omnemque intra eadem fluida innatandi vim, quam suapte natura habent omnia fere ligna [ quæ proinde specificam gravitatem, talium fluidorum gravitate minorem, data scilicet paritate molis, habere dicuntur ] procedere ex multitudine, atque amplitudine eorundem pororum intra ipsa ligna copiosissime latitantium; sive huiusmodi poros vacuos dicamus, sive aere, aliaque subtiliore materia repletos, quod parum refert: adeoque quo laxior est lignorum com-



compages, illa eo facilius emergunt, difficilius vero, quo strictiorem habent texturam, ut in Illice, aliisque lignis densioribus observare est, si mergantur, fundum petentibus. Hoc supposito, dicendum est, quod China China pulvis porosus impositus tum bili, tum aquæ, in utroque liquore ideo sensim mergatur, & fundum petat, inquantum intra illius porositates tantum bilis, & tantum aquæ subintrat [præstante id potissimum circumambientis aeris pressione] quantum sufficit ad tollendam levitatem, non quidem absolutam, quam nulla obtinent corpora, sed respectivam, quam scilicet nudis ejusdem Chinae Chinae particulis adjungebant interspersa spatiola, sive inania, sive aere tantum referta, aliave quavis materia levioze, tum bile, tum aqua subingredientibus. Et licet gravitas adjuncta particularum subintrantium non sit major gravitate specifica suorum liquorum, quibus imposita est China China, sed æqualis: cum tamen sit major gravitate materiæ intra Corticis poros præ-existentis, & ab iisdem exclusæ, adeoque juncta nudæ Corticis materiæ, quæ aqua, & bile gravior est, componat novam gravitatem, mole nequaquam adaucta, majorem specifica gravitate subjectorum fluidorum, hinc est, quod in utroque liquore China China descendit, atque submergitur, ut in aqua mergitur Navis per ingressum ipsius aquæ intra cavitatem illius. Cum itaque facilius, atque celerius id fiat in bile, licet graviore, ac fiat in aqua, licet minus gravi, concludendum est omnino, quod facilius, & citius absorbeatur a Cortice bilis, quam aqua, adeoque quod porri Corticis habeant figuram magis dispositam, & aptam ad suscipiendas minimas bilis, quam aquæ particulas.

Quanam vero individualiter sit ista proportio, quam habent particule bilem constituentes, magis ac habeant particule componentes aquam, acetum &c. cum poris Peruviano Cortici existentibus, arduum est definire, ignota nobis genuina talium particularum,

ut & pororum hujusmodi particulas admittentium, figura. Præscindendo tamen ab hac specifica determinatione, videtur ista major facilitas posse refundi in illam, quam bilis (præsertim bubula, in qua experimentum clarius emicuit) manifeste præferret unguinosæ oleositatis speciem, quæ analogam quodammodo Bilis, & Olei structuram videtur indicare, licet Olei, & Bilis tam diversum sit pondus, ut olim mihi hæc, & similia curiose inquirenti, non injucundum spectaculum licuerit observare. Immissis intra vitreum tubum æquis circiter portionibus primò Bilis humanæ crassioris, densioris, fuscoque, ut dictum est, colore præditæ; secundò Bilis Bovinæ longe minus crassæ, minusque fulcæ: tertio Aquæ: quarto tandem Olei, omnes illi liquores sedem sibi a primordio, ordineque antedicto assignatam retinere. Concusso postmodum, & moto susquedeque Tubo, ac proinde confusis omnibus, quilibet liquor paulatim suam sedem sponte repetiit, ibique substitit, humana scilicet bile immediate supra Tubi fundum, bile bubula supra humanam, Aqua supra bilem bubulam, & Oleo supra Aquam locum tenente. Cum ergo, ut supra retuli, fere æque facile mergatur Cortex intra Bilem longe graviorem Oleo, ac mergatur intra Oleum ipsum: mergatur vero difficillime intra Aquam, Oleo quidem graviorem, sed leviozem Bile, satis patet id præcise non pendere a majori, vel minori gravitate illorum fluidorum comparative ad gravitatem Corticis, sed a faciliiori, vel difficiliori ingressu particularum cujuscunque fluidi intra poros illius, unde facilius redditur augmentum ponderis ejusdem Corticis, ac proinde etiam faciliior illius submersio in Bile graviore, quam in Aqua minus gravi. Itaque, cum submersio hujusmodi fere æque facilis sit in Bile, ac in Oleo, Bilis autem, & Olei plurimum analogæ sit structura, licet utriusque fluidi plurimum diversa sit gravitas, hinc est, quod Bilis potest habere majorem proportionem

cum



cum poris Corticis, ut eos subintraret, ac habeat Aqua; & consequenter huiusmodi proportio potest haud irrationabiliter refundi in quasi oleagineam Bilis structuram poris Corticis fere æque facile aptabilem, ac sit iisdem aptabilis structura Olei.

Hanc Bilis, & Olei similitudinem in structura plurimi suadent effectus utrimque similes. Sic licet fatear cum *Glissonio*, Bilem non minus quam Aquam extinguere ignem, neque flammam facile concipere, æque tamen certo expertus assero cum *Ettmullero*, & aliis, eam, si vehementiori igne urgeatur, absumpta aquea humiditate, plurimum unguinis exhibere, inflammabilis olei adinstar. Pariter ab Oleo, & a Bile alvus redditur lubrica, & ab utroque liquore solvuntur colores. Denique sicuti gutta olei supra pannum v. gr. laneum decidua, illum statim pervadit; ita gutta bilis eundem penetrat, sed paullo segnius, gutta vero aquæ hæret globuli ad instar in ejusdem panni superficie, nec illum pervadit; unde quod levius est in hoc casu citius penetrat, penetrat paululum tardiuscule quod gravius, nullo pacto penetrat quod medio modo se habet inter utrumque in genere gravitatis. Non ergo varia præcise liquorum gravitas, sed varia partium illos componentium figura, variaque illarum in casu nostro cum poris Chinæ Chinæ proportio faciliorem, vel difficiliorem reddit illorum absorptionem, & consequenter submersionem ejusdem Chinæ Chinæ, quæ proinde fere æque facile mergitur in bile, etsi graviore, ac mergatur in oleo leviore, minime vero facile in Aqua, Acero &c. licet liquores isti sint ut graviore oleo, ita bile leviores. Symboleitas autem nonnullarum partium bilis cum oleo sicuti fortasse sufficit ad hoc, ut bilis admixta Aceto, Salivæ &c. reddat liquores illos, utpote sibi arte implicatos, facilius aptabiles poris Corticis, cum cæteris qui sejuncti a bile ægre admittantur ab eodem: ita ex adverso non sufficit ad tribuendam bili nec levitatem, nec

promptam inflammabilitatem olei, propter consortium aliarum partium conjunctarum, & illam integrantium, puta terrestrium, aquearum &c. quæ id tandem efficiunt, ut bilis, quantumvis quoad apparentiam plurimum, & quoad substantiam non parum oleaginea, nullatenus tamen sit Oleum, sed Bilis.

Quod de bile, & oleo constat per experientiam, potest fortasse per conjecturam credi de Fermento febrili, si ve ad illud constituendum bilis concurrat, si ve aliud fluidum oleosæ forsitan naturæ particeps. Potest enim contingere, quod tale fermentum æque facile, & forte facilius absorbeatur a Cortice, saltem quoad particulas magis noxias, & febrilis tumultus reas, ac ab eo absorbetur ipsa bilis, effata postmodum, ac enervi remanente ejusdem fermenti sic retusi portione superstite: sicuti contra potest minus feliciter exerceri talis actio in idem febrile fermentum ab aliis Corticibus, atque pulveribus Febres infirmius pellentibus, quemadmodum illi iidem pulveres bilem ipsam, oleumque nonnihil diversimode absorbent, ac illam absorbeat Cortex noster, etsi in illa non longe absimiliter submergantur, atque præcipitentur. Ratio autem tam insignis diversitatis inter actionem Peruviani Corticis, & actionem aliorum Corticum, non admodum insigni diversitate bilem ipsam absorbentium, videtur aliquo modo elici posse ex ipsa partium Chinæ Chinæ componentium analysi, & notabili ejusdem ab aliis Corticibus diversitate: siquidem [admisso quod asserunt Artifices fide digni] China China, præter alias peculiare suæ texturæ prærogativas, habet hanc insuper, ut quadruplum circiter Salis contineat, exhibeatque comparative ad aliarum Arborum Cortices. In qua fortassis etiam Salis copia, simul ac peculiari configuratione, ea potest eminenter contineri Virtus febrifuga, quæ in aliis Corticibus minori Salis, etiam debilioris, quantitate præditis, infirmior est, ad hoc,



hoc, ut febrile fermentum ab iisdem salibus retundi possit, atque dulcescere.

Et hac occasione nequeo plane subscribere doctissimo *Fabri* ex inclyta Societate Jesu Viro Celeberrimo, qui sub nomine *Antymy Conygii* Chinam Chinam propugnaturus, inquit, illam componi ex minimis talem determinatam figuram habentibus, quæ porositates Fermenti febrilis per vim, & cunei adinstar pervadens, ac ipsum triturans (non absimili ritu, ac ferrum solvit Aqua Stygia) reddit illud, & impotens ut lædat, & dispositum ut excernatur. Potius enim ob rationes dictas crediderim, fluidas fermenti particulas ingredi (saltem sensibilius) poros Corticis, siquæ a Cortice absorptas illaqueari, & infringi, quam particulas Corticis ingredi poros fermenti, ea præsertim vi, quæ valeat illius texturam nervose solvere, licet ingressum etiam reciprocum particularum Corticis in porositates fermenti nequaquam rejiciam, cum non minus a Cortice, quoad maximam licet sui partem præcipitato, saporem aliquem mutuenter fluida, ac humectationem pariter, & saporem a fluidis Cortex infusus. Utcumque, siue absorptum dicatur, siue distractum febrile fermentum, facile postea est intelligere, quomodo, si opus sit, possit illud foras protrudi: id siquidem nullo negotio fieri poterit, ut alias diximus, per ordinarias Naturæ vias, per alvum scilicet, per urinam, per sudorem, aut per insensibilem transpirationem, non quidem critica, copiosa, & repentina semper evacuatione [id enim paucula sæpe illius moles non exigit] sed modica, & sensim, sub velamine scilicet consuetarum excretionum, non quantitate notabiliter adaucta, sed qualitate tantum mutata, licet vix dignoscibili, mox prodeuntium.

Et in hoc solo sensu concedere non renuo, aliquam quandoque exigi posse, & probabiliter etiam sæpe contingere, causæ morbificæ evacuationem ab assumpto Cortice; hanc ipsam tamen absolute necessariam esse, non æque conce-

derem. Posse enim per solam variationem texturæ partium, liquores plurimos a sua Crasi desciscere, & per novam earundem partium coaptationem in pristinum restitui, absque eo quod ab illis quicquam dematur, aut sensibilibiter separatur, satis ostendunt Vina æstate morbida facta, & fugientia, autumno vero nonnunquam sponte redeuntia; idemque confirmat Urina a solo frigore corruptionem patiens, per calorem vero iterum clarescens, ac restituta, & alia id genus, mutata scilicet in iis sola particularum componentium textura, & situ. Quod idem, data proportione, succo, aut humori febrili, per contactum intimum Chinæ Chinæ posse quandoque accidere, citra ullam omnino illius evacuationem, non est cur absolute negemus.

Huic opinioni non parum videtur favere *Borellus* alias citatus, qui pro Febrium curatione solam salium fermenti febrilis retusionem, edulcationem, & contemperationem requirit, mediante commixtione salium diversæ naturæ, qualia sunt, quæ in China China delitescunt. Potius igitur (inquit) eo quod salium separatio ab humoribus, & expulsio frustra speratur [ & hic notetur insperata salium morbosorum extractio, &eductio ] prædicti sales contemperari, & dulcorari possunt, vel admiscendo fluida Menstrua appropriata, vel adhibendo Salia contraria, ut experimur in Aqua forti, quæ acredine salina Vitrioli, & Aluminis componitur adeo valida, ut possit argentum corrodere, & dissolvere in Atomos minutissimas. Huic vero Aqua forti si addantur Sales ammoniaci multo magis acres, quam sint Vitriolum, & Alumen, nedum vim majorem corrodendi non acquirit, sed e contra eam vim, quam habebat, amittit; adeo enim retunditur, & debilitatur, ut nequeat amplius argentum corrodere. Similiter mistura Salis nitri, & Sulphuris accensibilis est, & addito Sale ammoniaci, accendi nequit. Alibi postea Sal prunella ex eisdem Nitro, & Sulphure combustis compositum, inflammationes tollit,



tollit, & fusionem succorum coagulatorum promovet. Sal quoque, & pulvis Cornu Cervi, & Cancrorum, acridinem acidissimam retundunt, & tollunt: & ipsum acetum distillatum plumbo affusum, dulcedinem Saccharo similem acquirit. Ex his ergo, & ex aliis exemplis, quæ adduci possunt, constat acridinem salinam fermenti febrilis retundi, dulcificari, & destrui omnino posse ab aliis Salibus admistis contrariae naturæ. Sed jam satis concessimus hisce minutulis disquisitionibus, ex quibus nihilominus obvium est conjicere non modo quam difficilis, & dubia sit explicatio ulterior modi individualis [de genericis enim notionibus quilibet novit loqui] quo Alexipyretum istud agat in causam febrilem; verum etiam quam parum consistens sit Eorum opinio, qui ut a Cortice reportatam de Febribus credant victoriam, opima evacuationum spolia ostendenda requirunt.

#### C A P U T IV.

*Ad placita Humoristarum, & Galenicorum accommodata evacuationum prædictarum sensibilibus carentia.*

**R**ESTITANTE adhuc intra caligines mirabili agendi modo Peruvianæ Corticis, iterum monuisse non erit inutile, quod, quemadmodum nulla, ut vidimus, potest adduci congrua explicatio actionis illius, nisi dilucida habeatur cognitio Causarum Febres Intermitteutes materialiter, ac efficienter producentium, ita sine eadem dilucida cognitione, nulla contra illam potest adduci nervosa oppositio. Cum vero omnes, quotquot circa Intermitteutium naturam, & causas circumferuntur, hypotheses [si candide velimus fateri] nondum scopum attigerint, quælibet objectio proinde contra certam operationem Corticis perpetuo laborat suppositione quapiam fundata supra hypothesim aliquam saltem incertam, immo probabiliter falsam. Sic difficultas, quæ tanti sit de carentia evacuationis post as-

sumptum Corticem; supponit, quod causa Februm sit aliquid, quod debeat absolute sensibiliter eliminari, non solummodo temperari, aut retundi, non aliquid stagnans, quod tantum egeat moveri, non aliquid fixum, quod exspectat exaltari, non quicquam exaltatum, quod exigat deprimi, non quid intempestive influens, quod debeat inhiberi, non quid obstructum, quod indicet reserari &c. quæ tamen omnes, & similes hypotheses, nullius sensibilis evacuationis necessitatem inferentes, sua nequaquam carent probabilitate. Sane causas aliorum plurium Morborum periodicæ recurrentium, ut Astheniæ, Arthritidis, Epilepsiæ, & hujusmodi, præmissis [ut loqui consuetum est] universalibus, non evacuatione semper sensibili, sed alterantibus, temperantibus, edulcantibus, decoctis exsiccantibus &c. radicitus extirpare pro viribus artis conamur, pensum postea evacuationis materiæ dispositæ uni Naturæ linquentes.

Exemplo sit inter vulgaria, sed maxime proficua medicamenta, Aqua Stibiata Pomponacii, ex Antimonio crudo, lapide Pumice, Salsa parilla, & Visco Querno infusis, atque decoctis confecta, quæ ad morbos innumeros, eosque gravissimos, tum venereos, tum alterius analogæ, contumacisque naturæ curandos, quam felicissime solet usurpari. Nonne illa, licet quandoque notabiles excretionem habeat adjunctas, sæpius tamen absque ulla insigni evacuatione, immo facibus, & urinis, aquæ epotæ quoad quantitatem vix correspondentibus, humorem Ischiadicum v. gr. absomit, ulcera sanat, scabiem pustulosam emendat, cachexiam tollit &c. reflorescente quam cito vivido faciei colore, & maturecente simul fructu optimæ renutritionis? Et tamen sæpius, ut dixi, vel nil excernitur, vel, si quid excernitur, id sit non raro per modicam succi alicujus prava qualitate peccantis quantitatem, qui sub consuetis evacuationibus, quoad apparentiam vix immutatis, delitescens, cum reliqua excrementis



crementorum turba indiscriminatim foras abigitur.

Nollem itaque suspicari, allatam objectionem, adhuc inniti mucidæ suppositioni a Scholis jamdudum exhibitæ, ac explosæ, de celebri quaternario Humorum, tum alibilium, ut vocabant, tum excrementitiorum numero, quibus putrescentibus attribuebantur Febrium Causæ, Biliosum scilicet humorem Terrianæ assignando, Pituitosum Quotidianæ, Melancholicum Quartanæ &c. quod figmentum anteactis seculis vix condonandum. Sæ sit eos humores admittere, quos cernimus, & quibus humectamur, non quos per metaphysicas abstractiones imaginabantur Antiqui. Sunt autem isti, Chylus, Sanguis ipse, & ab eo secreti liquores, iique, sive in usus digniores reservati, sive ut inutiles foras protrusi, sive post longa itinera in eundem reduces, quorum generum diversorum sunt Latex nerveus, seu mavis spirituum animalium continuatum syntagma, Serum ipsius sanguinis, Lympha eundem Cruorem duplici flumine perluens, Pinguedo, cæterique peculiare succi, ut Pancreaticus, Salivaris, Stomachicus, Biliosus, alique complures, tum a Conglobatis, tum a Conglomeratis Glandulis prodeuntes, quorum Catalogus hujus loci non est, & quorum nihilominus compositio, ac integralis constructio ab innumeris Salibus pender, ex quorum varia combinatione, tum saporis alteratio, tum motus eorum inordinatio, tum denique actionum, & naturalis œconomiae læsio paulatim emergit. In his ergo humoribus alteratis, & vitiata illorum crasi, seu mavis structura, compage, & motu quærendæ sunt Febrium Causæ, non in fictitiis, & imaginariis.

Talia quidem commenta etiamnum amplectentes, absit, ut aggrediar refellere; Nam, præterquamquod hodie sine stomacho nequit audiri hujusmodi controversia, illud præterea certum est, quod prorsus incassum hanc Provinciam adornandam susciperem. Neque enim sperare fas esset, quod hujusce Tracta-

tus, vel lectioni vacare vellent, vel rudi admonitione resipiscere, qui tot gravissimorum Scriptorum Opera, ex quibus propriæ hallucinationis medellam addiscerent, vel legere neglexerunt, vel iisdem præoccupato jam animo inspectis, nondum resipuerunt. Sane istos, omnia per consequens Artis Medicæ recentiora incrementa, quantumvis certa, quantumvis utilia, cæco quodam, ac irrationabili instinctu respuentes, haud leviter peccare crediderim, ut qui plurimos Antiquorum errores crassos, atque palpabiles, quibus nonnunquam curationes morborum innixæ sunt, adhuc retinent, adhuc sectantur: cum tamen ubique prostent apud Neotericos tot Experimenta, & Dogmata inconcussa, ex quibus hujusmodi errorum correctio, saniorque proinde medendi methodus, a verioribus Hippocratis præsertim, immo & ipsius Galeni placitis nequaquam aliena, statim emergeret. Scruteretur Medicus necesse est, & examinet quidquid, saltem cum plausu, & cum aliqua non contemnendæ novitatis fama, scriptum est hinc illinc, facitque ad majus complementum Artis, quod Prisci Medicinæ Patres integre præstare non potuerunt, licet innumera æternum venerabilia præstiterint, plura fortasse daturi, quam ii, a quibus nihilominus corriguntur, si diutius vixissent. Si quid autem certum, ac evidens, sive ex Antiquis, sive ex Recentioribus noverit quispiam depromere, id alacriter seligat; si quid vero in alterutris, vel in utriusque rationi, aut experientiæ minus consonum repererit, id rotum animose respuat; prius tamen expendat, ac trutinat, antequam judicet. Nisi hoc pacto se gerat Medicus, vereor, ne sibi, ac conscientiae suæ inexcusabili defectu desit; neque enim id peragit, quod ab eo strictè consuevit exigere quisquis se illi committit, ut nempe recte pro viribus pensitet quidquid bonæ valitudini conservandæ conducit. Talis autem omissio, ut patet, est de re admodum gravi, tum ratione subjecti, tum ratione rei ipsius, cum



cum ex vi talis omissionis Medicus quandoque rerat iter, oculo ipso iudice, omnino fallax, a quo tamen, si quæ Scriptis undique tradita sunt probe calleret, procul dubio deflecteret. Sed hæc Tyronibus tantum. Jam vero claudamus hos rivos,

— *sat prata biberunt.*

Quandocumque igitur veteri Doctrinæ de Humoribus superstructa sit objectio Corticem culpans de sensibilis evacuationis defectu in Februm expulsionem, licet hoc nomine audienda non sit, lubet tamen, data etiam tali hypothese, respondere, quod Februm, ut & aliorum plurium Morborum solutio dupliciter, ut ajunt ipsi Humoristæ, solet contingere, scilicet, vel per *Crisim*, cui de more adjuncta est aliqua evidens evacuatio, vel per *Pepasmum*, per quem absque ulla evacuatione solvitur Morbus. Atque postremus iste modus est admodum frequens, & consistit secundum Galenum in quadam vel *maturatione*, vel *deductione in mediocrem temperiem*, quam idem Galenus *Coctionem* vocat, seu *Pepsim*, eamque docet, ut modo dicebam, in *sola succorum alteratione* consistere. Hujusce doctrinæ semina prius jecit in *lib. de Affect.* Magnus Hippocrates, eamque insuper remediis antifebrilibus, nil evacuantibus, adaptavit, dicens — *Ea vim habere in his Febris* [loquitur de Tertianis, ac de Quartanis] *ut pota corpus conservent in consueta caliditate, ac frigiditate, & neque præter naturam calefiat, neque frigefiat.* Quid obstat ergo, quo minus dicatur China Chinæ istam succorum moderationem, istam deductionem in mediocrem temperiem, istam corporis in consueta caliditate, ac frigiditate, quam diebus a paroxysmo vacuis sortitur, conservationem inducere, seu mavis illam bilem, vel melancholiam, in quibus putrescentibus causa Februm somniatur, a putredine vindicare?

Forte obstat celeritas illa, qua momento temporis jugulatur Febris, cum cæteroqui *Pepasmus* lentiores consuecat habere progressum? At cur vitio

vertete volumus Peruvianæ Cortici ipsam celeritatem, & energiam operandi, humoresque tumultuantes cito compescendi, quam in omnibus aliis specificis adeo quarimus, & commendamus? Denique, si nimia illi virtus obest, in promptu est remedium. Cortex sanat æque, si lubeat, illico, ac per longiusculas moras. Una dosi Paroxysmos sistit, & pluries paulatim repetita eodem præcaver: eadem vero diminute ab initio, ac sensim exhibita, diutius non nihil humorum coctionem, & morbi solutionem protrahit. Sic qui metuit Torrenti e directo aggerem opponere, eodem oblique, ac sensim opposito impetum illius infringit, ut cursum paulatim deflectat. En ergo, quo pacto per Chinam Chinæ lentam humorum alterationem, præparationem, ac *Pepsim* assequi possumus. Huc forte respiciens acerrimus Humorista, & ipsius Circulationis Sanguinis injuriis olor *Restaurandus*, etsi *bilem* a reliquis humoribus *secretam* pro Februm Causa conetur statuminare, attamen loco evacuationis [quam experientia ductus, ut mox videbimus, maxime improbat, Chinam Chinam ideo impurgatis Aëgris præscribens] loco, inquam, evacuationis, id potius a Peruviano Cortice quærit, & assequi semper gloriatur, nempe, ut *talis humor*, ex vi remedii, *massam iterum subeat*, qua *secessum fecerat*, unde *temperetur*, ac *nutritioni aptus evadat*, non secus ac *Aqua Deserti* [sunt illius verba] *in Mara dulcis facta fuit a ligno, quod Moyses injecit ex mandato Dei ad alendos Israelitas.* Hæc Auctor ille de China Chinæ experientissimus, qui idcirco illius usum Hippocratis doctrinæ summe consonum demonstrare contendit Tractatu peculiari in hunc finem edito.

Hanc ipsam succorum attemperacionem absque sensibili evacuatione multo magis admittit, atque tueretur in China China *Monginotius*, qui licet immunis a præjudiciis Humoristarum data nihilominus eorum suppositione, ait — *Sæpe fieri, ut pauca subsit materia evacuan-*  
*da, id*



da, id quod illi supponunt, deferrente humorum aestu, maximam illorum partem contemperari, & ad idoneum statum a natura deduci, quae in rectum usum remedium adaptavit, — afferitque in confirmationem exempla eorum, qui paroxysmos experti vehementissimos, nullis usque remediis, nullaque manifesta naturali, aut artificiali humorum exclusione, febre tamen subito desunguntur, nullo inde secuto verendo symptomate. Cui proinde textui appositae haec notas subdit Cl. Nigris solus in lib. alias citato. Nonne per asmo mitigantur humores? Nonne, juxta D. Praeceptoris effata, libro de Veteri Medicina, concentratione, & permixtione meliora, ac mitiora omnia fiunt in Homine? Cur etiam Acidum febrile superstes in sanguine mortificari similiter, ac dulcificari concentratione non poterit? Idem quoque dixerat Cl. D'Acquin, qui dans pariter per modum concessionis, aliquid restitute in corpore, & vasis post depulsas ope Corticis febres, subjunxit. At vero, etsi reliqua quaedam in corpore delitescerent, illae hujus [nempe Corticis] ope temperantur, ac Naturae gratiam recipiunt, vel saltem per reiteratas, & continuas digestionem concoquuntur, maturantur, & discutiuntur.

Quod si nihilominus hujusmodi temperationi, sive coctioni succedentem quis optet evacuationem, is sciat, eam non posse cum fructu, quantum novi, per artem tentari, sed necesse esse, quod illam moliatur, atque perficiat Natura. Quorsum enim vergendum est, ut causa morbifica expellatur? An per vomitum, vel per secessum? At, si Fermentum febrile saepe saepius emeticum est, atque catharticum, ut experientia testatur, & ob id ipsum contumacius: item, si fugatis per Corticem Febribus, quodlibet Catharticum, vel Leniens, ut ut leve, febrem revocat, quo jure speranda est expulsio causae morbosae a medicamentis eidem Causae analogis, & morbum eundem prius depulso certo certius revocantibus? Deinde, si humor peculiaris, qui Febres Intermittentes signare creditur, stabularetur intra ca-

vitates Intestinorum immediate, aut Stomachi, quasi iisdem vel innatans, vel adhaerens, unde purus, & impermixtus citra opus secretionis posset educi; atque insuper a tali suppositione non multum ablueret experientia, in tali profecto casu aliquis rationabilior, primo aspectu Purgantibus, vel Emeticis locus esse posset: quemadmodum iisdem, saltem levioribus, locus est, illisque identidem utimur ad educendum noxium, venenatumve cibum ingestum, priusquam ille Lactearum valvulas praetergre diatur. Sed jam clare dignoscimus rem aliter se habere, hoc est, vel Fermentum febrile in talibus cavitatibus vere non esse, vel saltem ab iis per hujusmodi medicamenta, & tentamina de more nequaquam educi: constat enim experientia, neque a Natura per repetitas vomitiones, aut alvi dejectiones in paroxysmis Februm saepissime contingentes, neque ab Arte cuncta haec provocante, Februm causam vel tantillum submoveri; quinimmo saepe saepius fortiolem, & contumaciorum reddi. Cum itaque probabiliter hinc deducamus, vel idem Fermentum longe altiores radices habere, saltem quoad scaturiginem suam, licet adhuc occultam, vel illud alteratione potius, atque attemperatione sola demulcendum esse, quam irrita expulsionem tentandum, non est ideo, cur hujusmodi fidamus evacuationibus, casve a China China, per solam alterationem febrifuga pertinaciter velimus exquirere.

Dicant ingenue, si velint, ipsimet, qui opponunt, quot Quartanas, quot Tertianas Autumnales [de Vernis enim non loquor, qualibet Methodo, etiam minus recta, sicut multo melius si sibi relinquuntur, cito solubilibus] per repetitas purgationes sanaverint; vel, si renuant ipsi fateri, dicant tot Scriptores, a crebro Cathartorum usu spirituum dissolutionem, succorum perturbationem, ac viscerum enervationem, loco sanationis succedere clamitantes. Inter hos unus audiat iterum Monginotius, qui Purgantium effectus cum effectibus Chinae Chinae conferens, haec habet



habet — *Ab his* ) loquitur de Purgantibus ) atteri vires , robur Ventriculi, aliarumque partium infringi, concoctiones imperfecte obiri, hinc perennem pravorum humorum generationem ( inquit generationem, non extirpationem ) subsequi, experientia patet. Quamobrem febres ab illis potius saepenumero foveantur, quam abolentur, cum ex opposito, si in usum ducatur hoc remedium, videlicet Cortex, saepe uno ictu declinantur accidentia ab aliorum usu plerumque metueda. Super quo textu dignæ sunt, ut per extensum lustrentur solidæ, doctæque animadversiones citati *Nigrisoli*.

An ergo per urinam tandem, vel per sudorem sollicitanda erit humoris peccantis expulsio? At per istas vias soli humores, qui sunt in sanguine, atque in coctione subacti solent excerni. Quo pacto ergo materia antecedens ( conjuncta enim quolibet paroxysmo subigitur, & expellitur ) quæ vel sanguini citra ullam secretionem confusa est, vel probabilius eidem nondum immixta, sed adhuc extra illum degens in loco particulari, poterit per glandulas renales, vel per cutaneas evacuari? Sed frustra est, quod diutius de postremis hisce excretionibus verba faciam, pro quibus obtinendis, quandocumque etiam possent prodesse, Ars est remediorum inops, & effectuum incerta. Tota fiducia, jam scio, reposita est in Catharticis, quæ tamen, quantum observare licuit, vix aliud unquam Ægrotantibus præstare novi, quam quod illis præstaret Fungorum noxiorum esus. An & istos pro Intermittentium medela loco Peruvianæ Corticis malimus præscribere? Claudamus hoc Caput textibus duorum, vel trium Auctorum satis appositis, quos etsi prolixiores, contra quod proposueram, non piget transcribere.

*Nemo miretur* ( inquit *Morton* de Intermittentibus verba faciens ) veteres Medicos futilem, atque inanem operam navasse huic morbo debellando: Sensibus enim magis quam par est confisi, humores in receptaculis nescio quibus stagnantes fomitem morbi fuisse somniarunt, in-

deque toto cælo errantes, utramque curationis paginam longo apparatu medicaminum Deobstruentium, & Evacuantium impleverunt, idque methodice, licet absque certa aliqua indicatione a natura rei ipsius desumpta, sed in propriis ipsorum Musæis excogitata. Cumque morbosum hunc fomitem penitus eradicari impossibile crederent, absque sensibili humorum evacuatione, copia medicaminum Incidentium humores præparabant, ut Remediis evacuantibus magis obsequentes fierent. At hos ipsos Medicos appello, noverint ne unquam, nisi fortuito, hac methodo, utut diutius protracta, quemquam perfecte sanatum? Me quod attinet, ego simplicem Tertianam, eamque admodum benignam, & legitimam inde non raro in Hemitritæam, vel Quartanam mutatam esse, cum Hydropisi, aliisque duris symptomatis sociatam observasse memini, Natura hisce Venæ sectionibus, & purgationibus incassum laceffita. Hujus male, & infelicitis praxeos ( quæ per multa secula cum magno Ægrotantium incommodo inter nostræ Artis professores invaluit ) ὁπῶτον ἡ ἄλῃς est falsa Ætiologia: Non enim, nisi ex accidenti, ut in Plethora, Cachexia insigni &c. ( de quibus posthac dicetur ) ulla omnino evacuatio indicatur; Verum ut plurimum istæ evacuationes, Naturam inaniter laceffendo, veræ curationi multum officiunt, saltem copiam Antidoti ( videlicet Chinæ Chinæ ) admodum ingrata multo majorem necessario requiri faciunt. Hæc Ille philosophica libertate, nimiane, an nimium veridica?

Neque ab eodem dissentit Experientissimus Sydenham, qui licet post solutas [& quidem sine ope Corticis] Autumnales, & diuturnas Intermittentes, aliquam purgationem admittat per epicrasim institutam, morbo tamen ( quod palam inculcat ) penitus depulso, eo nimium tempore, quo, ut ait, non tantum paroxysmi perceptibiles, sed etiam alteratio ista, qualis qualis ea fuerit, quæ diebus illis, in quos Paroxysmus incidere debuerat, persentiscitur, omnino evanuerit, atque unus insuper mensis fuerit elapsus:



*elapsus: eandem tamen purgationem, durante vel insensibiliter febrium motu, prorsus abdicat. Ea siquidem tunc temporis instituta — Id tantum, inquit, lucri a purgatione fecerimus, ut morbus contumacior evadat, subditque: Quotidiana id nos docent eorum exempla, qui in morbi παρὰ μὴν, ut Theoria isti morem gerant, quæ in tollendis obstructionibus, & evacuando humore melancholico ( loquitur enim præcipue de Quartana ) qui mali fons, & origo vulgo habetur, curationis spem omnem ponit, repetitis purgationibus misere plectuntur; quibus sane quicquid id demum est humorum, quod a corpore divellitur, atque eliminatur, compertissimum est nobis, Febrem altiores exinde radices agere, & pertinacius stationem suam tueri, quam si non fuerit proritata. Quapropter religio mihi est Catharticum propinare &c. additque tandem, quod, etsi post elapsos a fine morbi duos, vel tres menses, potionem aliquam identidem ex lenitivis vulgaribus consuescat præscribere, singulis tamen vicibus haustulum aliquem paregoricum hora somni assumendum, finita jam medicamenti operatione, successive porrigit, ut nempe, inquit, Paroxysmose de novo ingerendi ( etiam post tam insigne spatium temporis ) ansam præscindamus, quam aliter forte arriperet ex occasione tumultus, atque orgasmi, quos vel mitissima excitant Cathartica.*

Idipsum confirmat alias citatus *Restaurandus* Mospeliensis Universitatis Professor, qui licet, uti Galenicorum principiis imbutus, Causam Febrilem reponat, ut diximus, in *bile* a reliquis humoribus *secreta*, & intra venas *ac-censa*, adeoque licet in ipsius peccan-tis, & secretæ bilis purgationem videatur esse debere propensus, nihilominus sola ductus observatione experimentali candide inquit — *Experientia quotidiana constat, si Febris Intermittens desi-nat, nulla prægressa purgatione ( id quod sæpenumero contingit, præsertim in Febris tertianis ) convalescenti autem Catharticum datum fuerit, eadem die se-Torti Therap. Spec.*

*brem resurgere* : Quia vero locum aliquem ipsi nonnunquam purgationi reservare vellet, en, dum aliquod quærit latibulum, quo se condar, en, inquam, quomodo ineluctabili convictus experientia, eidem purgationi ipsam rursus anteponat omissionem purgationis hoc alio textu — *Nec tamen purgationem improbaverim, si modo ejus indicans, Cachymia, adfuerit, ac Febris character nullus omnino supersit* (observentur, quæ solæ conditiones). Porro id ut securius succedat, concedendum est aliquod temporis spatium præterire, immo die uno, vel altero ante usum Cathartici, & die subsequente, utile est infusionem Chinae Chinae assumpsisse in aqua frigida factam, quod nisi factum fuerit, postliminio redit febris: quare satius sit abstinuisse, quam periculo Aegrum exposuisse: satis fuerint phlebotomia, enemata refrigerantia, & proba dieta, quæ illis præferenda. Videant ergo, qui tantum fidunt Solventibus in Februm curatione, quid testentur ab experientia coacti Auctores ipsi a purgatione minus alieni, in ipsa Februm Intermittentium (ex quibus illatio fiat a fortiori de eo, quod dicendum est in Acutis) diuturniorum medela. Qua igitur ratione accusatur Cortex, Intermittentes hujusmodi fugans, eo quod non pollet purganti, aut alia insigniter evacuante virtute, cui Februm earundem possit adscribi sanatio?

Revera quo pacto sanitas Hominis febricitantis, sanguinemque proinde (quæcumque hujusce rei sit causa) immodice tumultuantem habentis, poterit obtineri ab ullo remedio vim purgandi, majoresque idcirco tumultus excitandi possidente? Mucet jam, foetetque in Scholis commentitius putrescentium humorum, & in Latrinas ablegandorum, Quatuorviratus, cujus auctoritate jam penitus collabescente, corrui pariter, quæ illi famulabatur, Purgatio. Satis norunt omnes, Cathartica, etiam *Minorativa* dicta, immo & quæ *Lenientia* vulgo appellantur, omnia secundum magis & minus acria esse, & irritan-



tia, mediamque quodammodo rationem habere inter Alimentum, & Venenum, plusque accedere ad istius, quam ad illius naturam; & propterea id, quod ab illis expellitur, de more excerni per expressionem violentam, & immaturam succorum sæpius utilium, fere ac si veneficum poculum quis sive sanus, sive febricitans assumpsisset, unde noxa plurima, levamen nullum potest emergere. Norunt pariter pharmaca ista corruptiva ingesta, quæ primam vim suam in fibras Solidorum exercent, secundum aliquam saltem portionem sui, necessario Lacteas ingredi, & massam sanguineam subire, cum illis non minus, ac aliis esculentis pateat indefinenter huiusmodi aditus. Quinam autem inde tumultus, quænam confusio, & agitatio sanguinis, nemo non videt. Neque enim imaginaria illa sympatica attractio, quæ ipsi hodie denegatur Magneti, potest amplius sustineri, præsertim cum tormina, tenesmi, convulsiones, & alia huiusmodi, quæ difficilem non raro purgationem comitantur, manifeste suadeant oppositum. Norunt tandem, quod ad utiles, conferentes, & facile tolerabiles instituendas evacuationes, necessaria est prævia intestina secretio, maturitas, atque concoctio. Harum nullam (siquidem differant inter se) nullum potest efficere, nisi ea præextiterit, solvens medicamentum. Si præextiterit, nullo negotio, vel levi adjuncta clysmatis usu, quæ secretionem fecit, faciet & expulsionem Natura. Usus in contrarium si quis fuit, præsertim vero in *Acutis*, ut abusus delendus & abolendus.

Non hæc sane docuit, nisi per vim trahatur ad id, quod vere non docuit, Magnus *Hippocrates*, immo ausim dicere, nec *Galenus* ipse, qui licet Aphorismum primæ Sectionis *Hippocratis* vigesimum quartum exponens, purgationem quodammodo admittat in Acutorum principiis (in solo tamen casu *materie turgentis*) dum verba nihilominus tanti Præceptoris perpendit, videlicet

\* *In Acutis passionibus raro, & in principiis medicinis purgantibus uti, & hoc*

*cum præmeditatione faciendum* \* — Per hæc verba, inquit, quantum huiusmodi vereatur purgationes, manifestat *Hippocrates*. Neque enim: subdit idem *Galenus*: *minimum periculum est in Morbo acuto uti purgante medicamento, cum omnia id genus medicamenta sint potentia calida; Febris vero, quatenus febris est, & sui ratione, non calefacientibus, atque exsiccantibus, sed potius contrariis, hoc est humectantibus, & refrigerantibus egeat. Non igitur ob igneam febris caliditatem purgationem adhibemus (hanc enim scimus sui ratione nocituram) sed propter humores illam efficientes. Quare maiorem oportet ex noxiorum humorum evacuatione fieri utilitatem, quam id, quod necessario consequitur ex purgantibus medicamentis, detrimentum. Ut autem ista subsequi possit utilitas major, quam noxa, tot tantæque subjungit *Galenus* cautiones, ut fere impossibilis sit casus, in quo liceat, juxta huiusmodi regulas, instituere Purgationem. Cum itaque *detrimentum, & periculum* ex Purgatione in Febris, tanquam duo mala certa, fateatur *Galenus*, stetque etiam in Febris non *Acutis*: quæ tamen facile in *Acutas* migrare possunt, ac solent: firma ea ratio, præter tot alias longe potiores, quod Purgantia omnia, ut calida, Febrī cuiuslibet, ut calidæ, & igneæ, male congruant; addo ego, quod non in Fluida immediate, ut perperam censet imperitorum vulgus, sed in Solida, seu fibras agant: & cum ex alia parte cesset nostro hoc seculo ratiocinatio opposita de humoribus putrescentibus evacuandis, ut cessavere tot alia non minus erronea, non aliud superest dicendum, nisi, quod mens *Hippocratis*, & ipsius *Galenus* (qui suis quoque temporibus Purgationem vix trepidanter admittebant, in conspectu majoris, quod falso imaginabantur, mali) nisi, inquam, quod mens eorum sit, quoties malum illud, quod timetur, timeri non debeat, toties ab omni purgatione, in Febris quoque non *Acutis*, esse abstinendum, vel saltem ea, quotiescunque aliunde indicetur,*



cetur, nonnisi summa cautione, atque circumspeditione nobis utendum.

## C A P U T V.

*Perpensis circa Februm Intermittentium Causas placitis Neotericorum profitentium Fluidorum Systema, decernitur, ab assumpta China China nullam sensibilem evacuationem fieri debere. Idem multo magis asseritur in Solidorum Systemate, de quo, & de nonnullis eidem coherentibus pauca obiter.*

**Q**UEMADMODUM, ut nuperrime vidimus, nulla, secundum principia Humoristarum, expectanda est, vel expectanda insignis evacuatio post Corticem exhibitum, ad hoc, ut per eum Febres credantur cum ratione sublatae, ita nec ulla talis exigi debet ad normam aliarum Thesium, saltem magis famigeratarum, quæ circa Februm Intermittentium causam, & earum genesim frequentius resonant in Recentiorum Scholis. Has ideo quoque sententias, saltem plurimas, cursim recensere operæ pretium est, ut ad modulum earumdem Corticis actionem successive metiamur.

Primo igitur, si cum *Villifio* hujusmodi causa refundatur in diathesim, vel acrem, vel acidam Sanguinis, succum nutritium, seu Chymum non rite subigentis, sed in materiam periodice, citius quidem, aut tardius, fermentescibilem convertentis, sat erit, quod China Chinæ absque ulla excretionetalem diathesim emendet, cruoremque innativam *crasim* quasi dulcorando reducat, sive ut eidem Auctori placet, in novam quamdam fermentationem compellat.

Si secundò cum *Sylvio* Succus Pancreaticus, ob moram in ductibus Pancreatis lateralibus obstructis nimium accensens, obice demum perforato, intra tenue Intestinum, vitiose cum bile illuc confluyente effervescat, cruorique perviam Chyli periodice instillatus paroxysmos Febriles producat, sufficiet, quod

China China, posthabitis evacuationibus, eidem succo Pancreatico nimiam adimat aciditatem, vel motum ei naturalem reddat, viscidam forsitan pituitam in ductibus Pancreatis lateralibus incidendo, ad hoc, ut idem succus libere fluens, ac blande cum bile effervescens, blandam quoque, & naturalem in sanguine foveat fermentationem.

Si denique cum *Borello* Intermittentium causa ex nervoso potius, quam ex arterioso genere petita, reponatur in glandulis obstructis ad apices nervorum appensis, unde succo nerveo, a materia aliqua viscida ibidem detento, aciditas, vel alia quævis acrimonia accedat, vicijus idem fermentescens, Cerebro prius, mox & fibris Cordis motricibus irritationem communicet, & excandescentiam febrilem successive producat, illud a Cortice præstandum erit tantummodo, quod Auctor ipse pro curatione Februm exposcit, nempe quod referentur Glandulæ, attenuata crassa materia obstructe, & temperetur, seu diluatur fermentum, ut a Natura ipsa vel per sudores, vel per insensibilem, ut idem innuit, transpirationem, penitus dissipetur.

Tres istæ sunt potiores circa hanc materiam Sententiæ, quarum prima causam Febris agnoscit intra ipsum Sanguinem, altera extra illum in succis aliquot eidem refundendis, tertia denique in lactice nervoso ab eodem dissito. Sed præter illas, sunt aliæ complures, quæ iisdem, veluti Matribus, videntur subordinari, & quarum, utpote non nihil diversarum, aliqua obiter habenda est ratio, ut illis quoque operationem Corticis ordinariam demonstremus congruere.

Sic opinioni *Borelli*, ut ordine inverso suas unicuique consentaneas referamus, affines sunt Hypotheses *Mundii*, & *Cole*, Februm Intermittentium causas in nervoso pariter Systemate, diversa licet nonnihil via, quærentium; sed actum agere pergam, si hujusmodi placitis accommodare coner actionem Corticis citra ullam evacuationem Febres fugantis, cum ipse *Cole* peculiari Capite — *De Corticis Peruviani, circa*



*Febres Intermittentes sistendas, facultate*, hanc quoque circumstantiam minutim examinando, rem totam plane confecerit, immo ab ipsa evacuationum sensibilibus carentia hypothese suam confirmare sategerit, ut ideo supervacaneum sit hic idem repetere.

Sylvianæ autem hypothese, cujus exemplar retroactis seculis velut in nube, delineare visus est Perspicacissimus inter Humoristas *Fernelius*, cum in Mesenterio, Pancreate, reliquisque imi ventris visceribus, eorumque peculiari succo Intermittentium Focum agnoverit, quodammodo divinando, utpote veris Anatomes luminibus destitutus [ nondum enim ductum Pancreatis *Virsungus* detexerat, sicut nec Lacteas inferiores *Asellius*, multoque minus Thoracicam *Pecquetus*, laticemve Lymphaticum *Rudbechius*, *Bartholinus*, aut alius quispian] Sylvianæ inquam hypothese, cui subscribit *Graaf*, & alii, consonant, immo & eandem ampliando, magis illustrant opiniones *Nigrisoli*, & *Tozzi*, quorum primus in glandulis omnibus succos suos sanguini, sive mediate, sive immediate suggerentibus, Febrium Intermittentium Mineram reponit: Alter vero in succis pariter omnibus astruit, ad tenuia intestina confluentibus, iisque vitiatis, ac incongrue mistis, quin & in aliis fluidis, qui a glandulis lumbalibus, ac mesentericis prodeunt, & chylo, atque allabenti lymphæ commiscantur; tandemque concludit Febrium fermenta, non modo ab his, quæ dictæ sunt partibus, sed ab innumeris pene aliis suggeri posse. Hujusmodi autem sententiis quam bene quadret operatio Corticis sine evacuatione contingens, vel exinde patet, quod idem *Nigrisolus* usque contendat, per actionem remedii febrile fermentum, absque eo quod per vim illud extrahere tentemus, tum in ipso sanguine, quatenus jam eidem accesserit, tum in suo ipso Foco, extra, vel ultra sanguinem extinguere, sive nempe fermentum illud in Ventriculo, & Intestinis, sive in Glandulis remotioribus hospitetur,

Hypothesi vero Villisianæ, quæ plures habuit plaudentes, quam affectas, haud parum conformis videtur opinio *Sydenhamii*, qui totam ponit in sanguine, seu in illius particulis non probe assimilatis, Febrium Intermittentium, ut & Continuarum causam, licet non mutuatis a Chymo recenti, sed ab ipsa Minera sanguinea pro nova accessione suppetiis. Eidem quoque quodantenus videtur accedere ea, quam protulit *Jones*, quatenus & ipse, si non puri Sanguinis dyscrasiam, saltem particularum aliquot intra ipsum degentium, & ægre cum ipso circulantium pravam habitudinem, nec non improprietatem Chymi, partiumve illius crudiorum, nec bene subactarum, sed accrescentium, & cum sulphureis Sanguinis tumultuantium, pro causa Intermittentium accusat: mutuato tamen ex alia parte modulo suæ opinionis ab Antiquis, eandem causam in Corporis habitu collocantibus, quatenus & ille supradictum febrile Fermentum in eodem Corporis habitu, sive in arteriarum extremitatibus hæere, atque accrescere statuit; illincque postea partibus sensilibus primam vellicationem inferre, ut dein febrilem commotionem Sanguini imprimat universo. Ad eandem Villisianam propius adhuc accedit opinio *Sponnii*, qui ex improprietate itidem Chyli cum Sanguine mistura, & fermentatione, Febrium causam deducit, licet radicem talis improprietatis non in ipso Sanguine collocet, ut *Villis*, sed in Chylo, propter aciditatem eidem impressam a succo Glandularum tunicae Pannosæ Ventriculi, atq; Intestinorum, nec non a latice Salivari, & Pancreatico (circa quod cum *Sylvio* coincidit) intra quas Glandulas primariam Fermento febrili sedem assignat. In quibus sane Sententiis pro Febrium curatione, nil aliud a China Chinæ expectandum erit, nisi, si de prima sit sermo, ut, semotis evacuationibus, vel sanguini universo robur addat, unde facilius particulas minus assimilatas possit ille subigere, vel ut easdem haud satis sub-



subactas ad talem recipiendam actionem, sive coctionem disponat. Si vero sermo sit de secunda, sat erit, si Chylosim juret, ac particulas ejusdem Chyli crudiores, & ad motum segniores, quæ in extremis hærent, atque acescunt arteriis, ab acore contracto vindicet, & pari cum aliis velocitate circulationi restituat. Si denique sermo sit de tertia opinione, sufficiet, quod China Chinæ eandem Chyli aciditatem retundat, vel impediatur, correcto Glandularum Ventriculi, & Intestinorum fermento, ob nimium pariter acorem peccante. Quæ omnia sine sensibili evacuatione obtineri facile possunt, ut fufius videre est apud eosdem Auctores, Peruviani Corticis etiam Patronos.

A vitiata pariter digestionem, sive id fiat culpa assumptorum, sive Fermenti digestivi, remotiorem Intermittentium causam in Stomacho fabricari putat *Etmullerus*, qui postea sensim in *Sylvianam* Sententiam descendere non refragatur, licet nec eam voto satisfacientem existimet, ut qui ordinatos Februm recursus inexplicabiles censer, illorumque rationem se prorsus nescire, ingenua, & magno Viro digna confessione fatetur. Si ergo prima tantum ex allatis Causa spectetur, suas in curatione Februm partes satis absolver China Chinæ, si absque ulla evacuatione digestionem simpliciter corrigat, & fermentum ipsum Stomachi digestivum restauret. Quod si spectentur causæ magis propinquæ ad mentem *Sylvii*, de his jam supra facta est mentio, quantum opus est, & difficultas sublata.

Huic sententiæ affinis est alia, quam tradit *Monginotius*, Fermentum febrile acidum adstruens, a pravo Chylo, vel alimentis assumptis suppediatum: ex qua suppositione postea deducit, Chinam Chinæ directe pravum ejusmodi fermentum in Febris alterare, alienam illi naturam imprimere, illudve destruere, & in nihilum redigere, ac etiam insensibiliter, si non sensibiliter, e corpore eliminare.

Ita quoque *D'Acquin*, aliud acidum  
*Terti Therap. Spec.*

febrile statuens in sanguineis particulis, ab ipsis acquisitum in Vena Portæ, intra quam, velut intra amnem, lentius excurrant, in solo sale fixo Chinæ Chinæ verum ejusmodi acidi correctivum agnoscit, nulla postmodum inde quæsitâ sensibili evacuatione: quam quoque multo minus in suo Systemate exigit *Blegnyus*, quippe qui autumat Peruvianum Corticem stypticitate, & adstrictione sua, sanguini justam particularum cohesionem, quadam veluti constipatione, redintegrare.

Sed & ex præcipuis saltem hætenus allatis opinionibus, earumque veluti combinatione, ac commixtione, suam peculiarem condidit *Cl. Sacchus*, fermenti Febrilis radices constituens in obstructione tali Viscerum imi Ventris, facta ab humore viscido, & lento, quæ valeat Sanguini per obstructam partem transitum ad tempus impedire, donec, superato obice a nisu ipsius cruoris, propter sui occlusionem effervescentis, idem vicissim recurrat, & superetur impedimentum, & in hoc quoque casu totum Corticis Peruviani pensum erit, vel crassum illum humorem vasa obstruentem, & impulsui sanguinis validiori cedere solitum, immediate attenuare, atque dissolvere, vel ipsi cruori tantam volatilitatem, & penetrationem injungere, quanta par est ad perterebrandum, superandum, vel omnino tollendum illud obstaculum.

Sententiam quodammodo huic oppositam visus est prius protulisse *Barbette*, inquantum, non in alicubi præpedita, ut *Sacchus*, sed in aucta per omnes Corporis partes sanguinis circulatione, Februm essentiam generaliter constituit. Sed ex alia parte, cum Intermittentium causam fundet in prava Chyli crudioris, Bilis, & Succi Pancreatici mistura, & inde orta ejusdem bilis regurgitatione per Cavam ad Cor, patet, eum non longe distare a *Sylvii* placitis; adeoque sat esse, si China Chinæ tollat impropotionem, quam ii succi inter se habent, ut dictum est: quapropter neque in ista, sicut neque in superiore



periore sententia, ulla evacuatione est opus ad amovendam causam febris.

Multo minus eadem est opus in sententia *Dolai*; licet enim in quacunque parte Corporis solida, etiam in digito, Februm Intermittentium fomitem existere posse contendat, ordinaria tamen lege, ab obstructione ductuum Chyliferorum, & stagnatione ipsius Chyli, easdem Intermittentes oriri decernit. Quo casu in promptu est dicere, sat esse, quod China Chinae in expugnatione Februm, absque eo quod quidquam sensibilibus excernat, ductuum Chyliferorum obstructiones simpliciter aperiat, & eidem Chylo, ne in posterum stagnet, occasionem tollat; ut propterea vanum sit, & amethodicum, velle ad fugandam simul Febrem, & evacuandam causam illius, eidem Chinae Chinae, quam ceteroqui summe commendat hic Auctor, purgans aliquod admiscere, ut ipse nonnunquam, vim illius infringendo potius, quam roborando, commiscet; siquidem experientia testatur, per repetitam Chinae Chinae solventibus associata oblationem, vel nullatenus Febres depelli, nisi per accidens actio diuturna febrifugi praevaleat viribus enervantis adjuncti, vel seriores saltem, debilioremque subsequi curationem, nisi ea per simplicem tandem impermixti Corticis exhibitionem absolva- tur, ut praemissis se junctim de more purgationibus solet contingere. Neque tamen in mitioribus Intermittentibus hujusmodi methodum plane improbarem, si quid boni a Solventibus Solitariis ceteroqui observassem. Utcumque sit, ubi Morbi benignitas det inducias, quilibet ad modulum suae credulitatis potest hac in re sequi methodum, quae sibi magis arrideat; non sic in casu arduo, ac praecipiti februm Perniciosarum, de quibus *Libro Tertio* sumus acturi.

Nullius denique sensibilis evacuationis necessitatem a China China excitandae infert ingeniosa sententia Famigeratissimi *Bellini*, ut quae lentorem alicujus visceris, sive ingeni, sive adventitii sanguinem inquinantis, pro

causa Intermittentium statuit: hoc siquidem pariter casu sufficiet, ut eadem China China sola vi sua absteriva lentorem illum, seu viscidum lentescens incidat, abstergat, & ultro urgeat, illudque sic fluxile redditum motui sanguinis universali, ac aequabili sensim restituat, nulla sensibili facta supra ordinarias illius evacuatione.

Omnium vero expeditissimam, & operationi Corticis facillime adaptabilem, sed intellectui discendi cupido minus acceptabilem hypothesin prodidit Experientissimus *Morton*, Vir longe felicior in usu remedii, quam in explicanda illius actione, vel abdita Februm expugnationum causa. Putat hic [praecuntibus quodammodo *Bado*, *Protospatario*, & *Josepho Donzello*] Chinam Chinae esse veram Antidotum, adeoque sine ulla sensibili evacuatione Fermentum febrile corrigere, seu mavis extinguere: quo nomine specioso occultam vere, ac admirandam illius virtutem designare contendit. Ab Antidoto, de quo nequit reddi ratio praeter experientiam, progreditur ad statuendum, febrile Fermentum esse verum sui generis Venenum, seu, ut inquit, *Deleterium quid in Spirituum Systemate delitescens, quod fermenti ad instar eos adoriens, atque aestro primum exagitans, deinde humoribus, secundo quasi momento, varias mutationes, atque qualitates morbosas, nobis sensibiles impertit*. Qua explicatione, obscuriore adhuc re ipsa explicata, vix ulla pariter potest reddi ratio essentiae ipsarum Februm, vel periodorum, vel causarum earundem. Subjectum autem talis Veneni, ut dictum est, solos Spiritus esse asseverat, & hanc ipsam assertionem latatur in uno *Protospatario* se reperisse, quin & in eandem sententiam conatur alicubi *Badum* trahere, eo quod nomine Antidoti utentem videat, licet plane adversantem in re videre potuerit, quin & asserta *Protospatarii* sic opinantis expresse refellentem. Revera tamen in hac parte *Protospatarium* ipsum *Campanella* praecessit, Causam videlicet cujuscumque Febris primam, &

ante-



antecedentem esse quærendam, non in humoribus, inquiens, sed in spiritibus accendentibus, & agitantibus humores.

Quod vero iidem spiritus miasmate quopiam venefico inficiantur in Febribus Intermittentibus, etiam *benignis*, singularis, quod sciam, est opinio *Mortoni*, atque, si lubet, etiam *Protospatarii* [ siquidem Iste nomen *miasmatis* pro vero Veneno, & non pro quacunque spirituum, minime quidem vitæ, sed Mixto cuilibet nullatenus etiam viventi, inexistentium excandescencia, morbosam massæ sanguineæ fermentationem suscitare apta, usurparit, quemadmodum, ex dicto ipsius *Protospatarii*, *Donzellus* explicat ] ni velimus illis adungere eundem quoque *Josephum Donzellum*, *Protospatario* quodammodo subscribentem, necnon etiam *Talbotium*, qui, referente *Anonymo* quodam alias citato, dicere consueverat, Corticem Peruvianum operari adversus Febrim, ut Antidota adversus Venena — *Ayant reconnu*, sunt illius verba, *par les experiences innombrables, qu'il avoit faites en Angleterre, & en France, qu'il operoit*, videlicet China China, *sur les Fieures ainsi que font les Antidotes contre les Venins, lorsqu'ils sont donnez à temps*: quod quidem verum est, quoad effectum clarum in se, sed obscurum in causa, & productionis modo. *Mortonus* tamen, dato quod obscurius, aut infirmius [ ut & alii eundem prægressi ] Februm causam exposuerit, satis tamen viriliter supra eos utilissimam illarum curationem, per usum animosiores, atque methodicum Peruviani Corticis, indigitavit, ut suo loco videbimus. Pro nunc ex ista Hypothesi, non secus ac ex cæteris omnibus hucusque recensitis, sufficiat colligere cum illius Auctoribus, nullam requiri pro Fermenti, aut Miasmatis, ut vocant, febrilis extinctione evacuationem, quemadmodum in omnium Antidotorum, & communium Alexipharmacorum usu, pro edomando malignarum Februm veneno, sicut & in administratione reliquorum Febrifugorum vegetabilium, quæ dicuntur spe-

cifica, pro eodem vincendo Intermittentium fermento, qualecumque illud sit, quotidie succedit.

Nec aliter quidem potest evenire; nec aliter quoque potest Medicus se gerere in praxi. Etenim, si ulli unquam Specifico Febrifugo locus est [ loquor de quovis communiter recepto ] semper adversus eum militare poterit ratio, quod Causam Febris non evacuet, sed intus detineat. Licet enim plures præmissæ fuerint purgationes, aliæve evacuationes artificialiter institutæ; quando tamen post eas omnes Febris perseverat, itaut pro sui depulsione aliquo Specifico indigeat, semper stat, quod Causa Febris perseverantis perseveret & ipsa, & consequenter, quod a Specifico illo nil evacuante non expellatur, sed intus detineatur. Si ergo aliquando non tenet huiusmodi ratio, quando scilicet alia præscribuntur specifica, sive id dicatur non officere, eo quia sufficienter jam purgatus sit Patiens ( cum tamen haud ita purgatus sit, quin adhuc febricitet, causa videlicet Febris nondum educta ) sive ob aliam quamvis emendicatam excusationem, quare sub iisdem excusationibus eadem ratio seponi non poterit, ut citra culpam Peruvianum Specificum efficacissimum possit exhiberi, quemadmodum alia citra culpam quotidie exhibentur imbecilliora, & inania sæpe Specifica? Satius ergo sit, evacuationes nil proficientes dimittere, utpote parum congruentes cum experientia, & minime cum allatis opinionibus vulgatorum huiusce materiæ Scriptorum.

Vulgatiores consulto dixi post Galenicam sectam, quos nuper retuli de hac materia Scriptores; cæteros, utut doctissimos, sed vel minus notos, vel minus acceptos, libenter prætergressus. Non ideo cum Paracelsistis, aut Helmontianis hic mihi res est; quorum tamen Ideis apprime congrueret actio Corticis sine sensibili evacuatione exercita, sive illa dicatur Sulphur, & Nitrum peccans corrigere, sive Archæi indignationem compescere, sive alio si-



mili modo turbas febriles componere. Eos namque præcise selegi, qui ab ex-olera Humoristarum schola deflectentes, usque tamen in perturbata, vel assidue ex principiis intrinsecis, vel periodice extranei cujuspian laticis affluentis culpa, particularum sanguinem integrantium dispositione, ac textura, & in vitiato proinde multifariam earundem motu, solidis secundo tantum affectis, Febres omnes, quas essentielles vocant, & conjunctam illarum Causam, seu Fermentum ipsum febrile mecum reponunt. Supervacaneum quippe credidi, pro eadem actione Corticis nil nos cogentis excernere, in novissimo *Solidorum*, ut vocant, *Systemate* Apologiam texere; tum quia hujusmodi remedium unanimi consensu amplexantur in Febribus antedicti Systematis Conditores primi, eorumque sequaces: tum quia revera sufficit in eorum sententia, quod Cortex, absque eo quod quicquam sensibilibiter deturbet e corpore, congruas vasorum Oscillationes, vel mediate, vel immediate restituat, eisque adnexum fluidorum æquilibrium, & harmonicam circulationem.

Neque vero miretur quispiam, qui me a vacuis quibuscumque vocabulis, rem minime declarantibus, cæteroqui alienum sciens, in designanda tamen Intermittentium causa, metaphorico *Fermenti* nomine etiamnum utentem videt: quo certe nomine nil hodie magis exosum Mechanicis, iis præsertim, qui antedictum *Solidorum* Systema profitentur, cujusmodi sunt famigeratissimi viri, *Pitcarnius*, & *Boerhaavius*, necnon doctissimus *Hecquetus*, mihi plurimis humanitatis, ac benevolentiae suæ argumentis semper colendus, alique non pauci, tum *Transalpini*, tum *Cisalpini* Scriptores, quibus omnibus præclaro suorum Theorematum lumine præivit (ipsis quidem non differentibus) celeberrimus Italus noster *Laurentius Bellinus*. Ne inquam præmature nimis quispiam miretur de servata hucusque a me, & in posterum etiam servanda

*Fermenti* nomenclatura; sciatque idcirco, malle me inscitiam meam ingenue prodere, dum vocem *Fermenti*, quidpiam mihi reapse ignotum connotantis, usurpo, quam Provinciam novam suscipere, cui plene administrandæ sim impar; non quidem quod Systema hujusmodi planum non sit, & captu facile vel iis ipsis, qui Geometricen vix a limine salutarunt; sed quia per illud, etiam usquequaque adoptatum, nondum satis doceor, ut explicandis sufficiam *ordinatis* Intermittentium *periodis*; quo sane defectu laborat & illud systema non minus quam cætera. Cum ergo per illud reddi satis nequeat, aut explicari ratio periodi, consequens est, ut neque satis explicari queat ratio Causæ, quæ cum obscura, & inexplicata remaneat, æque potest appellari *Fermenti* nomine, ac quovis alio, dummodo eo nomine causam eandem nos indicare tantum, non explicare fateamur. Insuper cum Causa hujusmodi, seu primum principium motus febrilis, quodcumque illud sit, a Fluidis primario affectis de more, ut supra, petendum putem, non autem a Solidis, nisi forsan in Symptomaticis febribus; idcirco Systemati *Fluidorum* inhærere satius duxi, quam *Solidorum*, etsi hoc ipsum (quotiescumque per illud peculiari quoque fluidorum texturæ quidpiam activitatis tribuatur, ut a Scriptoribus Medicomechanicis potius, quam Mechanicomedicis, solet attribui) laude non modica dignum censeam, illique in sensibili explicatione rerum vere sensibilibiter explicabilium, quoad plurima libenter assentiar.

Caveat nihilominus (liquidem in hanc messem datum sit quasi furtim, & cursim obrepere) caveat, inquam, qui Artem vere Medicam satagit exercere, ne ad lectulum Ægrotantis accedat Mathematicus nimium, seu Mathematicus magis, quam Medicus, ni forte sibi gloriosius putet, meliorem in medicina faciendam Mathematicum dici, quam Medicum. Rationalis equidem Medicinæ Professore omnis esse Matheseos ex-

per-



peritem, nedum indecorum censeo; sed & hominem ejusmodi, nisi acri admodum polleat ingenio, facile dixerim adrite capeffendas omnes physico-mechanicas Artis notiones haud sufficienter dispositum. Alium tamen interim universa instructum Mathesi, sive junior ille sit, sive in virili etiam constitutus ætate, monitum velim, ne nisi post exercitiam assidue quadragenariam in rebus medicis praxim, crebramque, ac sedulam institutam sine præoccupatione observationem, rationali Medicinæ Mathesin applicet; siquidem una tantum ex his conditionibus deficiente, res nullatenus ex voto succedet. Hinc fit, ut passim præ Medico plus mathematicis, quam medicis disciplinis imbuto, excellet rudior: sed in operibus Artis magis versatus, diagnosimque, prognosim, & curationem morborum per triviales indicationes, ex ipsa rei natura, & observatione depromptas, præ illo feliciter absolvat, etsi eorundem causas, & productionis modum ad regulas geometricas nequeat explanare: quod ex adverso ingeniosissime præstabit bonus Geometra. Hic ipse tamen, ut ut elegantior reddere sit aptior rationem eorum, quæ evenere postquam evenerint, & quæ profuere, aut obfuerint, postquam profuerint, aut obfuerint; incertissimam nihilominus fateatur necesse est præcognitionem a priori, & præordinationem eorum, quæ sunt eventura, profutura, vel obfutura: quo facile eveniet, ut forte medelam morbi (utinam satis cogniti) per indicationes a remotissimis suæ Matheseos fontibus conquiritas tentet absolvere, ad quas tandem implendas, vel media deficient, vel si præsto sint, sæpe sæpius aberrabunt a scopo. Ob id ipsum (si exemplo rem liceat illustrare) in sanandis infirmis cujuspiam Torrentis aggeribus, vel dirigendis tortuosis ejusdem fluctibus, præ Viro Mathematicis disciplinis imbuto nonnunquam præstat rudis Homuncio omni jejuna Mathesi, sed ad ripas fluminis natus, & diutinus illius loci incola, qui nempe sollertem observationem adhibuerit

ad cuncta, quæ sunt varie tumescentibus, & varie detumescentibus aquis. Id equidem (fateor) non accidit ob ineptitudinem principiorum Viri Mathematici; hæc enim in se ipsis vera sunt, & infallibilia; sed ob applicationem eorum haud satis apposite institutam, seu magis ob implexam, nec satis dignoscibilem rei, cui applicantur, materiam, & ob diversas, incertasque circumstantias concurrentes in facto: neque enim Mathematicus, quantumvis peritissimus, mistos, reflexos, repercussos, & intercisos aquarum fluentium motus, ac impetus, fluctusve ipsos interiores diversis lineis se decussantes, & intersecantes, potest ad leges mechanicas exacte metiri, sicut nec resistantias lateralis soli hic illic varias, multoque minus inæquales hic illic alvei inclinationes; propter quas circumstantias haud satis patentes, factumque ipsum occulte variantes, Torrens ipse per artem nonnunquam coactus recta progredi, veteremque alveum deserere, haud longo temporis tractu per absconditas, ac ferme imperscrutabiles, sed veras Hydrostaticæ leges, obliquo, ac tortuoso cursu sponte redit ad consuetum iter, argilla, & sabulo illud idem Incile sensim opplens, ac obruens, quod planum, rectum, declive, & amplum illi non multo ante Mathematica aperuerat industria; quem sane eventum expectationi contrarium a rudi homine per solam experientiam docto tempestive prævisum, constanterque prænunciatum ipsemet non semel vidi, nec sine mea admiratione, alienoque dedecore ipsa re comprobatur. Propterea tamen nequaquam inficiabor, quin data utrinque paritate observationis per diutinam experientiam comparatæ, rudi quovis Homine, ut ut experto, rem longe melius sit confecturus bonus Geometra.

Idem data proportionem dicas de re Clinica; plura quippe sunt in Physiologicis etiam sensibilibus, quin & in ipso architectonico humani corporis ædificio, nedum Mathematicis omnibus, verum & Anatomicis ipsis etiamnum incomper-



comperta, & ex compertis obscura non pauca; plurima in Pathologicis circa morbos, eorumque symptomata, & causas ferme incomprehensibilia; innumera in Semejoticis, iis præsertim, quæ ex *Hippocratis* observatione præagia respiciunt, admirabilia potius, quam perscrutabilia; infinita propemodum in Therapeuticis, nempe in Remediorum Inventionem, & Compositionem incerta, siue materiam eorum consideres, siue usum ipsum, propter circumstantias etiam identidem diversas, ancipitem: circa quæ profecto omnia expertissimus Mathematicus sine consummata in rebus medicis praxi, non potest quin ingeniose nugetur. Cuncta hæc ergo prius experiatur, expendatque exacte prudens Medicus Mathesi instructus; dein sobrie, temperanter, & caute, quantum fert Artis incertitudo, & observatio phænomenorum illius, Rationali Medicinæ Mathesin applicet.

Certe animadversiones istiusmodi ex diuturna Naturæ, Artisque observatione prognatæ, impulere me non parum, ut Systemati fluidorum semper adhærerem in praxi: ubi enim contendatur, quod in hydraulico-pneumatica humani corporis machina, cui præter vectes, Trochleas, Funes, Tubos, Fistulas, Incernicula, Cola, & organa huiusmodi, insunt insuper diversi generis fluida, quibus intercluditur spiritus summe activus, capaxque tribuere illis omnibus momentum, & vim ad exercendas functiones suas idoneam, ubi inquam contendatur, quod in Machina sic conformata eadem Solida primario ex se ipsis se ipsa moveant, ac exerceant, & ab ipso exordio se movere cœperint, ac exercere, sintque ea tantummodo, quæ fluida urgeant, triturent, ac pinsint; neque quicquam fere aliud præstent fluida ipsa, nisi suum esse fluxile, & fluxile quidem a sola Solidorum vi quaquaversus motum, & actum, plura pro certis in hac Hypothesi supponere necesse est, quæ talia fortasse non sunt; quæque tamen nisi pro certis assumantur, Mathesis nequit per Medicinam

universam tam late spatium, ut eam architectonice regat, efficiatque, ut conjecturalis hæc Ars, quæ simplici est ut plurimum probabilitate, & nonnunquam divinatione contenta, sepositis, neglectisve humilioribus conjecturis, quas longus usus ad cuiuspiam certitudinis gradum evehit, valeat pari passu cum Mathesi procedere, illive arcte semper inhærere, aut ancillari quasi pedisequa: etenim si vinculum huiusmodi nimium sit, ac ferme individuum, res facile inauspicato finietur prope lectulum Ægrotantis, etsi in exortu suo speciem prætulerit magistrali e Cathedra auspicatissimam. Ubi vero Solidorum motus a liquido Fluidorum elatere dicatur emanare, & ab eodem primitus emanasse, ita ut eadem fluida non mere passive se habeant, meliusve, aut infirmius operentur præcise per hoc, quod magis, vel minus fluxilia sint, sed radicitus, & principaliter per hoc, quod talem, vel talem sortiantur texturam, intimamque compagem, latior Rei medicæ campus patet, tam pro intelligendis ordinariis, quam pro corrigendis extraordinariis Naturæ phænomenis. Licet enim secundum congruam, vel incongruam sanguinis, aliorumque laticum fluxibilitatem, & secundum proportionatum, vel improporionatum eorundem motum, exerceantur immediate secundum Naturam, vel præter Naturam solidorum actiones; attamen proportio, vel improporportio isthæc a justa, vel alterata Crasi, seu mavis determinata compage, ac textura ipsorum Fluidorum radicitus pendet; ad quorum proinde alterationem, ac restitutionem in pristinum statum, si ab eodem deflexerint, tota convertitur Medicinæ intentio, & opera, cum non nisi media Fluidorum correctione possint medelam suscipere ipsamet Solidorum alteratorum fibræ. Qua dubio procul in re feliciter peragenda, opus est ut Mathesis Arti medicæ quodammodo famulari non renuat, ut revera quadantenus decet, nec nisi usque ad certos progrediatur limites, subsistens deinde nonnihil, ac locum



locum conjecturis concedens, ubi progressui vere scientifico, ipsique adeo Mathesi non est, ut sic dicam, commensurabilis proteiformis materia.

Non tamen ideo sibi quisquam persuadeat, me nullam in ipsis Fluidis, & naturalibus eorum motibus mechanice admittere, quin potius eam elegantissimam in iisdem suppono, sed nobis inexplicabilem, ob varias, & multiplices particularum fluida nostra, præcipue vero sanguinem, naturaliter componentium, & mole, figura, ac pondere differentium, combinationes, multoque magis ob diversos, & mistos earundem motus in unum æquabilem conspirantes. Longe minus ad regulas mechanice explicabilis est vitiata in febribus, ac interrupta earundem particularum dispositio, ac textura: cum enim tunc sanguis præcipue, ob errores in rebus, quas non naturales vocant, & ob præpeditas subinde secretiones, confundi incipiat, ac tumultuari, simulque alicubi lentescere, vel torpescere, alicubi exorbitare, & inflari, dubio procul præposterum huiusmodi motus certis regulis nostræ Mechanice non sunt determinate explicabiles, sed indeterminate solummodo, ac generaliter, quippe non a Solidis primario affectis, sed a Fluidis intestino tumultu commotis pendentes, a Fluidis, inquam, ipsorum tunc Solidorum vim vi propria superantibus, ac in usum ab officio suo sæpius alienum cogentibus. Cæterum in statu naturali mechanicam sanguinis, & succorum præcipue alibitum, dispositionem, occultam licet, talis elegantia, ordinis, ac dignitatis reputo, ut in uno *vitalium Fluidorum* Mechanemate intimo, nobis abscondito, latere credam principium illius Mechanice, quæ solis adscribitur Solidis, in quantum scilicet solis *vitalibus* Fluidis æthere, & aere turgidis, radicatus saltem, & primitus inesse reor Principium illud Viventibus omnibus insitum, quod negari æque, ac explicari non potest, & ab Hippocrate dicitur *Impetum faciens*; quodque per participationem intimam a Fluidis deriva-

tur in Solida, ut in solidas Molendini rotas derivatur motus ab aqua jugiter influente: qui sane Molendini motus æque diceretur illius rotis communicatus ab eadem aqua, aliunde licet perenne adveniente, si Molendinum talibus organis instructum foret, quæ valerent vi sibi ab aqua motrice, principaliter saltem, impressa, eandem aquam ultro pellere eo nisu, qui potis esset illam reduci gressu in ipsum Molendinum artificiosa circulatione referre. Machinæ humani Corporis Hydraulico-pneumaticæ, cui fert suppetias assiduas inspiratus aer, & affluens Chylus, haud longe dispar est ratio: eandem siquidem vim, quam ratione suæ gravitatis, majus semper in descensu momentum adeptæ, pro movendis solidis Molendini partibus habet aqua, per apertos, ac liberos canales excurrentes, eam habet sanguis intestino spiritu pollens, ac intra canales undique clausos coercitus, assidue torrentis insequentis appulsu ultra venarum valvulas, regressum vetantes, adactus, ut medio spiritu in nervos transfuso, ipsi demum Cordi eundem sanguinem impulsuro, quam a principio vim dare cœpit, indefinenter pergat suppeditare. Ad normam itaque collationis hujus, aliarumve elegantiorum, quas subministrare possent tot hydraulica, & pneumatica simul, quæ passim visuntur in aquis artificiose ludentibus, ingeniosa spectacula, quibus quoque continuatus, hinc flatus immissi, illinc aquæ subeuntis influxus, eam quodammodo diuturnitatem posset impertiri, quam machinæ nostri corporis impertiuntur hinc indefinens aeris, illinc repetita alimentorum ingestio; ad normam inquam crassiorum huiusmodi artefactorum facile dixerim, proportionem hinc inde habita, omnem vim suam motricem, suumque intimum elaterem a solis Fluidis vivifico spiritu imbutis mutuari [anima quidem immortalis, nunc jubente, nunc etiam inscia, etsi jugiter informante] Fibras ipsas oscillantium Vasorum, & contractilitate ab ipsis fluidis medullitus recepta, fluida eadem ulterius urgentium;



tium ; non autem fluida [ si recte con-  
jicio ] in circulum acta mere passive se  
habere , ut a solis Solidis , tanquam a  
Motoribus sibi prorsus extrinsecis , pri-  
mam originem sui motus agnoscant .

Haud equidem difficeor, mutuum da-  
ri inter Solida, & Fluida actionem, &  
reactionem, & a justa proportionem im-  
pulsus, & resistentiæ inter utraque,  
emergere congruam naturalium actio-  
num habitudinem, ab æquilibrio virium,  
& potentiarum hujusmodi resultantem,  
ut ab earundem virium improportione  
resultant actiones morbosæ, ac læsæ;  
nihilominus, quamvis ad eas concurrant  
mutuo tum Solida, tum Fluida, atque  
idcirco non tam facile videatur in si-  
multaneo hoc, & utrinque necessario  
concurſu decernere, cui debeantur pri-  
mæ; ferme non dubito, quin intra cor-  
poream Animalium machinam princi-  
pium motus sit petendum a fluidis pri-  
mò actuantibus solida, a quibus deinde  
sic actis *diuturnitatem* sui motus ipsa  
fluida recognoscant, & sic deinceps vi-  
cissitudinario utrinque subsidio: intel-  
ligendo semper nomine *Fluidi* quidquid  
actu fluit, vel aptum est fluere; cum  
cæteroqui me non lateat, prima ipso-  
rum fluidorum componentia solida esse;  
quod tamen veræ fluidorum denomina-  
tioni nil detrahit, quemadmodum nil of-  
ficat veræ Solidorum appellationi, quod  
Solida ex fluidis sic compositis fuerint a  
principio suo coagmentata: notum est  
quippe, Solidiores quasque humani Cor-  
poris partes ab exordio fuisse in Embryo-  
ne mollissimas, mucosas, & fluxiles;  
cumque in adulto nutriantur illæ, & con-  
serventur assidue in suo vigore a fluidis,  
ex illis quoque credendum est fuisse con-  
flatas, primamque suam vim systalticam,  
& occillatoriam a Fluidis recepisse, ean-  
demque ab illis per influxum perennem  
jugiter mutuari, anima semper, quan-  
diu corpori jugatur, mechanicos illius  
motus, saltem quos ipsa imperat, mo-  
do ineffabili per spiritus exercente. Hunc  
ergo ordinem in movenda universaliter  
humani Corporis machina libenter di-  
xerim a Natura assumptum, & constan-

ter servatum a prima ipsa humani cu-  
juscunque Fœtus conformatione usque  
ad interitum illius, sive deinde prima  
hæc conformatio dicatur fuisse coæva  
Mundo a principio creationis illius, &  
nova tantummodo quotidie nobis appa-  
rens per solam *evolutionem*, sive *expli-  
cationem* partium jam constructarum,  
latentium in Ovo muliebri, latente pa-  
riter cum Prædecessoribus omnibus, &  
cum tota Posteritate nascitura æque ac  
non nascitura in primæ Parentis Ovo,  
specie integra etiam possibili turgido,  
ut post *Malebranchium* opinantur Neo-  
terici non pauci, iique doctissimi; si-  
ve revera in quocunque humano con-  
ceptu fabrefiat de novo structura ejus-  
dem corporis, magisterio quidem haud  
plane explicabili, sed tamen mechani-  
co, & vero, ut ego libentius opinor,  
utque magis cohærenter fert, quod nu-  
per innui, Fluidorum Systema, cui su-  
perstructam volui Therapeutice hanc  
meam ad Febres Intermittentes, ut &  
aliam compendiarium, quam præ ma-  
nibus habeo ad Continuas; siquidem  
hanc ad umbilicum perducere sinant  
Vires, quæque pluries ab opere manum  
dimovit lubrica nimium, & labilis va-  
letudo.

Cæterum etsi vulgato *Fluidorum* po-  
tius, quam *Solidorum* Systemati adhæ-  
ream, iterum fateri non renuo, plura  
in postremo quoque reperiri, tum lau-  
dabilia, tum ingenuorum assensum pro-  
merentia: usquequo enim possumus sen-  
sibiliter, & mechanice progredi, dubio  
procul faciendum, dummodo caveamus,  
ne Machinam aliter ac ea est, constru-  
ctam, vel motam nobis fingamus, eam-  
que ideo nostris aptemus regulis, non  
regulas ipsi Machinæ, ut omnino oport-  
eret. Sic exempli gratia dum in eo Sy-  
stematē ablegantur *Fermenta* [ quæ re,  
& usu vere sint talia ] ab opere natu-  
ralium secretionum, quotiescunque si-  
ne huiusmodi fermentis, per solam se-  
cernentium organorum, & liquidorum  
secernendorum dispositionem, eadem se-  
cretiones commode queant explicari,  
profecto hæc opinio alteri anteferenda,  
quippe



quippe magis consona simplicitati Naturæ. Quod si forte hujuscemodi secretionum opus magisterio, vel analysi fieret veluti chymica, cui præter dispositionem instrumentorum, suis, ut sic dicam, opus esset igniculis resolutoriis, saltem occultis, eo casu parum differret a Fermentistarum Hypothesi mechanica hæc explicatio; siquidem ipsi fermento pistorio suos igniculos, ipsisque igniculis peculiarem suam mechanice inesse nullus dubito, quæ videlicet panis massam, ejusque particulas sibi artius invicem adherentes a nimio contactu liberat, atque disponit, quo facilius in stomacho subigantur, & vertantur in Chylum.

Atque in hoc quidem opere, quod digestionis est, non secretionis, esto quod minus recte usurpetur *Fermenti* nomen, cui melius substituitur vox *Menstrui*; attamen quidpiam aliud ad hoc munus peragendum requiri præter Ventriculi, & Viscerum circumprementium motum, cibos triturantem, pinsitantem, & comminuentem, rationi consentaneum videtur. Certe sola Saliva in masticationis actu cibos solidos vix dentibus contritos ita dissolvit, ut eos non æque dissolveret, inertis quopiam liquore madidos, pistillum ullum in ullo mortario; quamobrem Salivam saltem, & probaliter alios Latices salivæ congeneres in ventriculum influos, & Menstrui cujusdam gerentes munus, eandem dissolutionem principaliter efficere, & promovere crediderim, ut Leguminum coctionem faciliorem reddit non tam leguminum eorundem in Lebetes ferventium, ac susdeque actorum tumultuaria agitatio, quam prævia eorum maceratio in lixivio dulci: quidpiam namque lixivio analogum inesse Salivæ, aliisque succis existentibus in ventriculo, & intestinis, præsertim tenuibus, pro ciborum chylicatione, persuasum habeo; vixque quicquam ad hoc præstare autumo actionem viscerum circumprementium; quam tamen minime inficior, conferre nonnihil ad ulteriorem Chyli jam elaborati attenuationem, primas-

que tenere in adjuvanda, & promovenda protrusione illius in proximas lacteas. Vix enim adduci possum, ut credam, prædicta Legumina integra cum corticibus deglutita ab Animalibus pennatis, ne dicam lapillos, & Limaces, ipsumque adeo Ferrum, posse per simplicem Ventriculi, & adjacentium viscerum compressionem, ac motum in Chylum redigi absque Menstrui alicujus concursu, quod actione sua in cunei morem exercita, intimam earum rerum solutionem efficiat, saltem ut solutionem colorum efficit bilis, quæ crassiora ipsius Chyli recrementa naturaliter solet fluxiliora reddere. Hujusmodi *Menstrui* sublato subsidio, difficile est, intra ventriculum debitam Chylicationem fieri, quantacunque vis extrinsecus premens per potentias mechanicas, in corpore nostro cæteroqui validissimas, ac admirabiles, superpositis musculis, & circumpositis visceribus tribuatur. Pari ratione difficulter crediderim, ab eadem *mollium Solidorum* actione, & motu, posse peragi in Ventriculo hominis dissolutionem, & Chylicationem Ovi gallinacei ad duritiem cocti, & detracto tantum putamine, ac investiente, quippe asperiore, pellicula, integri deglutiti [quod ab Hæluonibus nonnullis joci gratia non semel peractum vidi] nisi dissolvens aliquod *Menstruum* in potiore causam hujusmodi effectus vocetur. Cujus profecto rei conjecturam augent recrementa ipsa, & fæces per alvum excretæ, nihilque propemodum de manso cibo referentes, tam in Volucris, & Quadrupedibus, quam in Homnibus. Idipsum, inversa regula, videntur confirmare alimenta, quæ in Lienteria, & Cæliaca passione, immo & in nonnullis quandoque febribus inconcocta redduntur, etsi motus molaris Ventriculi, & actio pinsitantium Viscerum, ac prementium musculorum in suo vigore maneant, vixque, quoad solida, trahi possit in partem culpæ, fibrarum Pylori inservientium laxitas quædam; nisi ab omnimoda illarum paralyti velimus harum ægritudinum



num causam gratis emendicare. Cuncta tamen hæc, & quotquot ex antedictis Physiologiam respiciunt, nolim ita Lector accipiat, ut me illis plane acquiescentem putet: non enim tam facile mihi prætereunda est plurium illustrium Virorum, & Geometrarum aliter sentientium auctoritas; in quorum tamen castris me nondum sinunt descendere, donec melius erudiar, non modo aliorum plurium in Physicis, & Mathematicis haud minus illustrium Virorum mihi faventium auctoritates; verum & plurimæ, nescio an rationes naturales dicam, an præocupationes intellectus mei, quas aliquando forsan in medium proferam, dummodo vita, & otium suppetat, easque vel refellam ipse, si a probabilitate alienas agnoverim, vel, si iudicii tantum ancipitis, sanioribus expendendas, & ne hiscens quidem, castigandas dabo. Jam vero de his satis, quæ hujus loci non sunt, nisi quatenus *Fermenti* nomen a me in Febribus metaphorice usurpatum, & cæteroqui ubi non bene sonat, aut ubi superfluit, rejectum, longiusculæ huic digressioni occasionem præbuit.

## C A P U T VI.

*Theoremata ex diversarum Opinionum examine, aliaque Cogitata circa Intermittentium originem. Inde usus Chinæ Chinæ stabilitur absque ulla necessitate insignis evacuationis.*

**E**X collatione vulgatiorem Opinionum hæcenus allatarum idem dicendum de similibus, quæ possent afferri: quarum unicuique quædam plus minus inest veritatis portiuncula, licet earum nulla rem integre complectatur, crediderim, erui posse Generalia quædam Asserta sat probabilia, quæ Peruviani Corticis usui plurimum conferre, illiusque actioni apprime respondere videntur: Hæc autem, spectatis phænomenis, quæ Febres omnes Intermitteutes, & singulas earum species, a prin-

cipio ad finem comitari solent, sunt, quæ sequuntur.

Primò, quemadmodum Februm Continuarum Continentium radix stationem suam agere videtur in sanguine potius, quam in quolibet alio fluido, ita Fermentum Intermittentium consideratum, ac sumptum, ut scholastice loquar, in suo esse completo, ut proxime aptum ad excitandam Febrem, non vero respectu habito ad remotam materiam illius, videtur pariter esse aliquid, quod sanguini potius vel accedat, vel insit, quam alteri succo, v. gr. Nerveo, quandoquidem talis succus [bona venia Opinantium aliter] est potius terminus, ad quem quandoque progreditur prava Februm dispositio, quam terminus, a quo proxime soleant, ut reor, ipsamet exordium capere.

Secundò, quemadmodum in Continuis memorata radix in sanguine pululat ab intrinseco, seu ab ipsius particulis constitutivis, sed incongruis, olimque sua alterius amici laticis larva, puta chyli, lymphæ, aeris &c. introductis, ac post diutinam tantum moram fermentescentibus: ita in Intermitteutibus fermentum illud sanguini probabiliter advenit immediate ab extrinseco, velut aliquid extraneum, quod statim lædit, per totum nempe tempus tam Exhorrescentiæ, quam Effervescentiæ febrilis, donec per tempus despumationis subigatur, ac secernatur.

Tertiò, sicuti in illis, videlicet Continuis, materia febrilis sensim, ac sensim, lentaque aggregatione congeritur in sanguine (cum quo secundum minima integraliter coit, circulaturque, etsi segnius) illique tam arcte miscetur ut non secuta, per consuetas cribrorum naturalium filtrationes, debita ejusdem materiæ secretionem, tandem ob illius heterogeneitatem haud diutius sociabilem, suscitetur febrilis effervescentia, qua mediante sensim pariter, lentoque progressu eadem materia ab ipso sanguine subigatur, & intra tempus despumationis necessarium secernatur: ita ex opposito in istis, videlicet Intermit-



rentibus, Fermentum febrile videtur esse aliquid, quod alicubi aggestum, affatim potius, successivi torrentis adinstar, sanguini adveniat, illique quolibet paroxysmo per commixtionem minus intimam veluti confundatur, quam quod paulatim tempore intermissionis aliunde stillans, ibidem ad turgentiam colligatur vicissim, & vicissim pariter dissipetur. Adeoque principium paroxysmi potius haberi crediderim *ab extra*, in actu primi ingressus materiae febrilis in sanguinem, quam *ab intra*, in actu turgentiae ejusdem materiae, sensim antecedenter aggestae, etsi ab extrinseco, ut dictum est, pariter procedentis.

Quartò, cum in sanguinem latex nullus conspicuus soleat introduci, qui non deferatur per viam Ductuum Lacteorum, vel Lymphaticorum sese tandem mutuo concursu exonerantium in Subclaviam, non per alia Vasa, nisi per ista possumus, ratione aliqua praecunte, asserere, quod Fermentum febrile debatur in ipsum sanguinem, & consequenter quod vel intra aliqua ex istis Vasis, Glandulisve, quas ipsa Vasa pervadunt, congeratur, ibidemque ad tempus stagnet, & ad tempus ab iisdem excarceretur, vel quod cum illis (etsi extra situm) aliquo saltem modo communicet, ut per intervalla possit in eadem insinuari. Etenim (ne vel hoc in tractum relinquam) introductionem lentam, rariusculam, & indeterminatam rei cujuspiam exoticæ in torrentem sanguineum derivatae ab interstitiis, si sint, extremarum arteriarum, atque venarum, & ab iisdem venis potius, quam a lymphaticis cum sanguine refluxo absorptæ, de nihilo esse ferme crediderim; quantum sit pro assignanda plana, ut requiritur, ac regulari fermenti febres Intermittentes gignentis semita, & scaturigine, ac pro celeri explicanda, ut opus est, illius irruptione, etsi hac forte via Pus v. gr. Ulceris alicujus absorptum, & sanguini affusum, accidentalis, ac vagæ cujuspiam febris causam esse posse, minime inficiet. Semota ex-

go postrema hac Fermenti febrilis in sanguinem refluxum, Venis mediantibus, introductione, remanet, quod illud per Vasa tantum Lactea, vel Lymphatica, uno ex duobus recensitis modis introducatur; nempe, vel quia intra eadem Vasa, Glandulasque interpositas stabuletur, vel quia cum illis, etsi extra eadem positum, aliquo modo communicet.

Si itaque fermentum istud se habeat primo modo, sitque situm *ad intra*, nullus aptior locus collectioni illius, etiam temporaneæ, neque magis obstructionum facile solubilium, & renovabilium capax intra totum tractum Lymphaticorum, & Lacteorum reperitur, quam Glandulae in Mesenterio sitæ, ubi Chyli, & Lymphæ fit inæqualis concursus, & mutua commixtio. Neque ullum foret Theatrum magis accommodatum ad explicandam scenam symptomatum, non modo horroris, rigoris, & frigoris, sed & reliquorum omnium, quæ in Tertianis praesertim, exercetur in Regione Gastrica, Epigastrica, Hypogastrica, Lumbari, atque Dorsali: si nempe conclusum in Mesentericis Glandulis idem Fermentum, primo vim faciens, ut sua acrimonia, suoque nisu viam sibi paret, postmodum sic furens, exclusum, & per propinqua loca, Canalemque tandem Thoracicum excurrens, ac successive in sanguinem repens, consideretur.

Si vero sit situm *ad extra*, ita ut cum iisdem Vasis communicet, eademque statò tempore subeat, non alibi possumus Fodinam, seu Focum illius constituere, nisi in locis, unde repleti incipiunt, osculisque suis hiant eadem Lactea, vel Lymphatica. Et sic vel respectu priorum ab Intestinis exordium ducentium, dicendum erit, coacervari in Ventriculo, & Intestinis ipsis, vel in illa saltem confluere Fermentum febrile, sive immediate ab eorum Glandulis stillans, sive mediate a propinquis partibus, puta Pancreate, aut Folliculo fellis subministratum: vel respectu posteriorum credendum erit, ipsum latitare in parti-



partibus omnibus, artubus extremis, atque visceribus, unde oriuntur lymphatica. Atque in utroque casu eandem æque facile, ac superius diximus, explicarentur symptomata. Si enim loquamur de primo, cum parum distent a Mesenterio Intestina, idem idcirco, quin immo magis extensum in tali suppositione esset iter Fermenti febrilis per Lacteas tum primi, tum secundi ordinis. Si vero loquamur de secundo casu, facilius adhuc explicarentur horror, rigor, ac frigus Intermittentium per confluum fermenti ab omnibus, extremisque partibus, & glandulis conglobatis universi corporis: reliqua autem symptomata fere æque facile; quatenus tandem eosdem Ductus Chylolymphicos, seu Lacteas secundi ordinis, Receptaculum nempe Lumbare, Lacteamque Thoracicam pari passu (maxima saltem ex parte) subiret idem fermentum. Sola periodus, seu vicissitudinaria ista conclusio, & exclusio, intromissio, & extromissio, generatio, & extinctio Fermenti febrilis nodum maximum præsefert, ac difficulter solubilem.

Quintò, licet ex omnibus locis in antecedenti Theoremate recensitis, & consideratis ut talibus, ut in iis probabiliter delitescere possit Fermentum febrile, nullus a me determinate approbetur, nec ullus pariter determinate excludatur; dico tamen, durum nonnihil videri, quod materia febrilis, vel in Intestinis, tanquam in sua sede cumuletur, vel per ipsa in Lacteas primi ordinis excurrat in accessionum principio, per modum laticis transeuntis, sive a Pancreate, sive a Vesica fellea, sive ab alia quavis, si qua est, parte peculiariter cum Intestinis communicante, suppeditati.

Hanc dubitationem suggerit crebra experientia, qua videmus, nunquam, aut fere nunquam, ut alibi dictum est, sive distante, sive instante, sive invadente Febrium Intermittentium paroxysmo, materiam febrilem egredi, vel educi per copiosas, & repetitas vomitiones, ac dejectiones, sive a Natura, si-

ve ab Arte institutas: quod secus semper, aut fere semper fieri deberet, si talis materia in cavitatibus Intestinarum intermissionis tempore cumularetur, ibidemque pacifice oriaretur (quod pariter arduum intellectu, nempe quod ibi subsideat quovis tempore, nec irriter, sursumve, aut deorsum exeat, nisi fingamus in Intestino cæco *v. gr.* recondi) vel si in eadem Intestina, instante accessione, per Ductum Pancreaticum, aut Choledocum antecederet obstructos, mox reseratos, irrumperet succus febrilis. Et hæc ratio non a fallacibus speculationibus, sed ab experimento petita, una est ex fortioribus, propter quas etiam in hisce febribus tam religiose abstineo a purgantibus, & emeticis: quæ tamen, fateor, si in ullis unquam febribus possunt convenire, in Intermittentibus potissimum, nuda quadam, & superficiali spectata ratione, convenire videntur; illisque sicuti olim in gratiam talis indicationis inaniter sum usus, & blandioribus etiamnum (raro licet, & cautius, aliisque solum notus indicationibus) utor, ita semper uterer, nisi oppositum mea, & aliena infelicior me docuisset experientia.

Sed & alterum experimentum dat ansam huic dubitationi, nempe quod intra cavitates Intestinarum nec stabiletur, nec forte percurrat ab aliis procedens partibus Fermentum febrile, cæteroqui per Lacteas secundi saltem ordinis, & per Lymphaticas, in cruorem delatum. Istud autem petitum est ab usu Peruviani Corticis, qui, quocumque modo agat, & Fermentum febrile corrigat, illud profecto melius, & facilius corrigeret quatuor, aut quinque horis ante febrilem accessum exhibitus (quo tempore corripere omni sua vi idem fermentum proxime ingressurum in Lacteas) quam aliis temporibus a paroxysmo distantibus, quod tamen secus contingit: constat enim experientia, Chinam Chinam exigere pro sua operatione tempus ut plurimum horarum vigintiquatuor, ante adventum paroxysmi inhibendi. Cum ergo China China etiam



etiam valide administrata, neque instante, neque invadente, bene vero distante, ut supra, paroxysmo, suam exerat operationem, neque agat in materiam futuræ accessionis, nisi post horas longe plures, ac exigit correctio rei existentis in cavitatibus Ventriculi, aut Intestinorum, signum est, ab illa non corripi eandem materiam intra Intestina, sed ab ea quæri in locis penitioribus, hoc est saltem intra Ductus Chyliferos secundi generis, vel alius; & consequenter, quod in illis potius, vel alibi, quam in cavitatibus Ventriculi, & Intestinorum lateat Fermentum febrile.

Hac in re si paritate aliqua uti liceat, subit observare, quod si in Ventriculo, & Intestinis, sive ad modicum, sive ad breve aliquod tempus moraretur succus febrilis benignarum Intermittentium [de malignis enim alibi] vitiosus quidem, sed non venenatus, adeoque solum quadantenus, & cum detractio- ne, suscitaturus turbas, quas suscitare solet Chylus aliquis veneno extrinsecus propinato infectus, idem quadantenus in Curatione illi accidere deberet, quod isti. Sicuti itaque Venenum assumptum, quamdiu est intra cavitatem Ventriculi, & intestinorum (nisi sit summe deleterium) obsequitur ut plurimum vomitoriis, etiam mitioribus, & oleosis, sicuti & mollioribus laxantibus alvum, eo- que sic educto, statim solvitur omnis molestia; secus vero, si ultra primarum Lactearum valvulas sit intrusum, adeoque irrevocabile: ita Fermentum febrile benignarum Intermittentium, prævum quidem, sed non venenosum, quamdiu in illis cavitatibus degeret, & non ultra [quod profecto, instante saltem accessione, infallibiliter certum foret ob imminentem ingressum in Lacteas] deberet obsequi Emeticis, atque Catharticis, sive mitioribus, sive fortioribus, & extrahi e corpore, & sic imminens saltem Accessus inhiberi. Pariter, sicuti Venenum propinatum longe felicius, ac citius corrigitur a sua specifica Antidoto statim ab epoto Ve-

*Terti Therap. Spec.*

neno, vel paullo ante ipsum epotum assumpta, quamdiu scilicet eadem Antidotus immediato contactu intra Ventriculum, & Intestina potest illud infringere, quam si in penitiores Chyli vias idem sese insinuarit: ita materia febrilis imminentis paroxysmi, noxia saltem, ni venenata, longe fortius, ac melius corrigi deberet a specifico Febrifugo Peruviano, si istud exhiberetur tempore illo, quo in dictis jam cavitatibus eadem materia est integre cummulata, & Lacteas ingressura, adeoque parata ad suscipiendam immediato contactu illius actionem, quam si alio tempore propinaretur, dum eadem materia in Pancreatico, vel Choledoco ductu adhuc obstructis, intime reconderetur, & forte in ipsis Pancreatis, aut Hepatis glandulis, tamquam in sua scaturigine, esset quærenda. Et tamen, ut diximus, aliter evenit, meliusque inhibetur quo magis distat, quam quo propinquior est paroxysmus.

Non est tamen ideo, quod excludam Ventriculum, Intestina, & Lacteas primi ordinis ab omni suspitione, quod præbeant vel sedem, vel semitam materiæ febrili in sanguinem deferendæ, quia nempe neque per purgationes, neque per vomitiones, aut spontaneas, aut artificiales illa educatur: cum me non lateat, etiam venena in Ventriculo existentia neque per vomitum ab iisdem excitatum, neque per solventia, aut emetica propinata *semper* extrahi, aut impediri, ne migrent in lacteas; immo ab iisdem, si fortiora sint, & acrioris naturæ, ipsum Venenum acui, & deterius reddi. Quare potius ex hoc deducitur, quod febrilis quoque materia, etiam in primis latitans viis [cum ex se ipsa sæpe emetica, atque cathartica sit, etiam cum benigna est] tantum abest, ut ab emeticis, & catharticis educatur, quin potius, tamquam a similibus, ad nocendum adjuvetur: & siquidem per eas vias sit educenda, potius tendandum id sit blandioribus remediis, ut oleo amygdalarum, sero lactis, & hujusmodi, quam irritantibus,

D

ut in



ut in venenorum educatione facere consuecimus: potius, inquam, infertur hoc, quam quod ullo pacto ibi non lateat talis materia.

Sed adhuc posito absolute, quod eadem ibi hospiretur, sive per modum permanentis, sive per modum transeuntis, immo posito, quod illa mediis solventibus, aut vomitoriis, educi non modo possit, sed & revera educatur, datoque per consequens, quod materia illa, quæ in exordio accessionis per vomitum exit, quæque, soluta accessione, postmodum per catharticum educitur, non sit aliquid diversum a materia febrili, per vinum expressum, & a quolibet sano homine, cui emeticum, vel catharticum [sæpius cum damno] propinetur, facile educibile, sed sit ipsa materia febrilis accessionem proximam productura: cum tamen eandem accessionem vere non tollat, aut remoretur, quin potius intendat, ac augeat, signum est saltem, quod loco materiæ educæ nova jugiter ex perenni aliquo fonte succrescit [ut demonstrat irrita quævis, etiam epicratica purgatio] nova pariter gignens incommoda. Quamobrem his stantibus cuique non præoccupato sat obviis, inferendum videtur, succum febrilem, etiam si in Ventriculo, & Intestinis sedem teneat, nec posse radicitus a remotiore aliqua scaturigine sua, Intestinali ipsam mineram instaurante, nec debere, etiam si posset, educi. Est enim ille probabiliter succus quidam naturalis, suumque circulum, & peculiariter, & cum universaliori sanguinis circulo, junctis invicem fluminibus, agens, qui tantum per accidens a sua crasi desciscit, & desciscit totus [sive acida, sive alius generis sit illius dyscrasia, & sive ex intrinsecorum principiorum vitio, sive ex heterogenearum, & alienigenarum particularum intima commixtione illa procedat] adeoque non evacuari, non agitari, non exasperari; sed leniri, corrigi, & alterari tantum indiget, sive per viam absorptionis, sive alio quolibet attemperationis modo, ut strenue a China China fieri videmus, quotiescumque

constans est illius usus, nec maxime refractaria (quod in quibuslibet morbis nonnunquam contingit) totius succi peccantis, visceramque illum perperam elaborantium, dyscrasia. Posito itaque, ut redeamus in viam, non repugnare absolute, quod fermentum febrile in ipso quoque Ventriculo, & Intestinis stabuletur: omnes propterea, quotquot sunt, primas vias comprehendemus inter loca, quæ probabiliter sedem, aut semitam præbent eidem fermento febrili in sanguinem ingressuro. Interim conjecturas, quæ favent illius ingressui per lymphaticas, & per lacteas secundi potius, quam primi generis, retulisse non pœnitet.

Sextò, cum intra Vasa Chylifera, Chylo-lymphica [quo nomine Lacteas secundi ordinis donare lubet] atque Lymphatica, & intra Glandulas iisdem Vasis interpositas, atque utrisque communicationem præbentes, non alii latices admittantur, quam Lympha, & Chylus (forsan & adeps) dein cum Chylo conjuncti, quin & ab eodem distincti, Succus Biliosus, Pancreaticus, Salivaris, & quotquot a Glandulis Intestinalibus, quas *Peyerianas* vocitant, proficiuntur: in istisporro succis, vel omnibus, vel quibusdam præternaturaliter alteratis, acescentibus, stagnantibus, fermentescentibus, aut alio quovis pacto vitiatis, periodice autem, ac regulariter (typo scilicet variis febribus correspondente) influentibus, proxima Intermittentium materia videtur probabiliter debere constitui. Quod si verum foret, quod supra suspicati sumus, nempe fermentum febrile, ne per modum quidem transeuntis, perluere cavitates Intestinalium, atque Ventriculi, in tali casu vix ullus locus esset imputandi causam febris aliis succis, quam Chylo, & Lymphæ, iisque intra penitiora tantum vasa vitiatis. Alios nihilominus succos modo recensitos plurimum conferre ad vitiandum ipsum Chylum, & Lympham, & consequenter ad acendum ipsum febrile fermentum, quin & ad multiplicanda, atque insigniter inten-



intendenda febrilia symptomata ultro crediderim.

Cum vero succi fermentum constituentes, quicumque sint, non videantur posse ad tempus inhiberi, ne influant in sanguinem, nisi per interpositam obstructionem, neque in libertatem pristinam pluries vindicari, nisi per ejusdem obstructionis temporaneam sublationem, aut apertionem; hinc est, quod vitium peculiare istorum fluidorum, & præ reliquis aliis magis certum, videatur esse *Stagnatio* eorundem, eaque *temporanea*, esto quod postrema hæc qualitas, aut conditio adjuncta, quæ regularem ipsius stagnationis periodum includit, difficillime sit explicabilis.

Septimò denique, ex sententiis omnibus diversorum Auctorum Capite antecedente relatis, deducitur quidem veluti corollarium quoddam, Mineram Intermittentium, seu congestionem febrilis fermenti latere in aliqua ex tribus hisce Regionibus, nempe vel *citra* sanguinem, vel *intra* sanguinem, vel *ultra* sanguinem; sed ex Propositionibus a nobis hucusque præmissis potius videtur, in altera ex duabus tantum regionibus enumeratis eandem Fodinam esse constituendam, videlicet, vel *citra* sanguinem, vel *ultra* sanguinem, non autem *in ipso* sanguine; licet postremum istud, ut minus verisimile tantum, nequaquam vero ut absolute falsum, hic excludatur.

Ex una itaque parte, vel intra totum tractum Vasorum Lacteorum, & Chylo-lymphaticorum in sanguinem tendentium, sed alicubi forte obstructorum, sive in loco aliquo prope Lactearum oscula confecto, & cum iisdem communicante, hujusmodi Minera statuenda erit: vel ex alia parte, in puris Lymphaticis, ab arterioso, quin & nervoso probabiliter genere jam inebriatis, atque in ipsum denuo sanguinem refluis, sive in eorum remota scaturigine, glandulisve longe distitis, erit quærenda. Si tamen postremum istud seligatur, id saltem oportet admittere, quod, etsi a principio tam longinquo derivetur fe-

brilis materia, maxima nihilominus ex parte, in memorata jam Chylo-lymphica influat, citra sanguinem posita, ut iisdem mediis in ipsum tandem sanguinem asportetur, in quem cæteroqui minore dumtaxat ex parte, a membris superioribus immediate potest influere. Ultra hos limites progredi non audeo; licet me non lateat, quantum ad rectum usum Peruviani Corticis, & ad definiendam litem instituendarum, vel omittendarum evacuationum, pro Febrium Intermittentium curatione, conferre possit ultima inquisitio Causarum febres hujusmodi producentium. Immo fateor, me quondam hac de causa, præviis iisdem Theorematis, quæ supra exposui, altiore hujusce rei tentasse indaginem, Icario tamen ausu, nec sorte multum absimili. Ut cumque, incertos, aereosque, ut sic dicam, mentis volatus, in medio demum itinere collabescerent, qualitercumque referre non piget.

Illust itaque mihi aliquando phantasma quoddam, quo, mecum ipse considerans, ab ulcere, vel abscessu glandularum Mesenterii Febres lentas, & continuas fieri, quæ prius glandulis iisdem tumentibus tantum, & obstructis intermittentes fuere: item animadvertens, quod tuberculo in pede suborto, & tumefacta subinde glandula in Inguine, diaria febris exoritur, quæ dubio procul periodica fieret, si periodice recurreret ejusdem glandulæ tumor: ad consimilia postmodum conficienda ratiocinia circa Febrium Intermittentium Causas, per analogismum quemdam transiitum feci, hæc quæ mox subdam, commentus. Si aliqua viscida, & glutinosa materia ex ipsis Chyli, & Lymphæ particulis crudioribus, & impropportionatis genita, intra loculos earundem glandularum Mesenterii ita *laxe* condensaretur, ut illac transitum omnem, vel fere omnem, tum Chylo, tum Lymphæ impediret quidem ad tempus aliquod, sed tamen, accedente majore fluidorum momento, liberiores progressum eisdem concederet, non ita, ut ab illis fluidis



penitus ablueretur [ id namque non sineret illius visciditas, nisi repetito pluries eodem opere ] sed ita, ut simpliciter perforaretur, transitum scilicet pleniori torrenti concedens, eundemque negans exiliori rivulo, aut stillicidio: si, inquam, positio hujusmodi, quam in Pancreate olim *Sylvius* adstruxit, ad glandulas aliquas Mesenterii insigniores posset transferri, profecto longe facilius, & clarius foret hic, quam ibi, tum symptomatum omnium etiam infrequentiorum, tum ipsorum etiam Circuituum explicandorum ratio.

Enimvero quod glandulae omnes, quae Chylum a vasis suis *deferentibus*, idest a Lacteis primi generis, & Lympham a solitariis Lymphaticis recipiunt, ut liquorem utrumque simul mistum, quin & in iis adauctum, per Lacteas secundi generis, seu per vasa Chylo-lymphica *efferentia*, ultro promoveant ad Receptaculum commune, & inde ad Canalem Thoracicum, facile possint infarci, & obstrui quadam veluti mucositate, glutine, aut pulve, inficiabitur nemo, qui utriusque laticis inaequalitatem tum absolutam, tum respectivam animadvertat. Chylus siquidem ex diversis, & disparatis eduliis confectus, & ex pluribus succis Intestinalibus illum integrantibus coagmentatus, lentorem facile contrahit, atque crassitiem, quae illum intra sua vasa, & successive intra glandulas Mesentericas stagnantem potest efficere: Lympha vero mille ob causas vel crassior, vel acidior reddita, non modo eundem effectum producere potis est, sed & a Chylo productum augere, adjungendo scilicet eidem Chylo concretionem ulteriorem, eo pacto, quo ulteriorem crassitiem aptus est ad jungere Lymphae idemmet Chylus: unde non modo sibi succus quilibet, sed & alter alteri, motum intra glandulae loculos valet praepedire, visciditatemque, ac stagnationem mutuam, ubi simul coeunt, impertiri. Adde tandem, ab ipsis succis, Bilioso, Pancreatico [ fortassis etiam Adiposo ] & glandularum Intestinalium, solitarie quoque aliquando in-

fluentibus per Chyli vias, eandem, si aliquo peccent lentore, aliave ad simul concrescendum dispositione, in glandulis Mesentericis obstructionem posse produci.

Quod vero hujusmodi obstructioni, aut infarctui aliqua peculiariter ex illis Glandulis, & quidem officio insigniores, ac notatu dignae, sint magis obnoxiae reliquis, magisque dispositae, si ve ob intimae structurae compositionem, si ve ob aptitudinem situs, si ve ob exercitii majorem, vel minorem usum, si ve ob succorum affluentium copiam plenior, aut parciorem, si ve aliam quamvis ob causam, facile concedet, qui observavit, Strumas frequentius oriri in Collo, quam in Inguine, Obstructiones in glandulis Lienis potius, quam Hepatis, Inflammationem Pleurae faciliorem esse, quam Peritonaei, Paraplegiam saepius in sinistra, quam in dextera Corporis parte contingere, & similia, quorum ratio mechanica non est hujus loci.

Quod denique Aestate potius, & Autumno, quam aliis temporibus, ut facilis est Februm Intermittentium generatio, ita facilis sit hujusmodi Glandularum infarctus, & obstructio, suadent coctiones stomachi imbecilliores, ob enervata universaliter fermenta Chylificationis, & dispositio succorum accensibilium, quales sunt Chylus, & Lympha, ad ulteriorem acorem contrahendum, ut illum facile per eas tempestates contrahunt Vina. Adde & hic concursum aliorum succorum Intestinalium, aptiorum tunc temporis [ etiam ratione ambientis externi, in nativa temperie inaequaliter excedentis ] ad augendam in iisdem Glandulis Chyli, & Lymphae impropotionem, unde & facilius in utroque latice ad vitiosas ibidem fermentationes excitandas, & successivas praecipitationes, hinc & ad obstructiones gignendas dispositio.

Pro glutinosae autem obstructionis hujusmodi *alterna* reclusionem, atque occlusionem, obvium est animadvertere, id ipsum saepiuscule [ irregulariter licet ] obser-



observari in Ictero ab obstructis bilariis ductibus procedente, ubi scilicet conclusæ bili aliquis nonnunquam referatur aditus, atque iterum clauditur; perforata videlicet quandoque obstructione ab ejusdem bilis impulsu, eademque obstructione iterum coalescente, quod fæces modo flavæ, modo cineræ, colorque faciei, & oculorum, modo minus, modo magis citrinus satis patefaciunt. Periodicæ vero, ut sic dicam, occlusionis, & reclusionis ipsius lymphæ a suis Vasis, & Glandulis, specimen aliquod nobis exhibent nonnulli Coryza, vel Rheumate laborantes, qui e naribus affatim, & e pectore insignem Lymphæ copiam emungunt, vel expuunt, quasi illam intra capsulam aliquam coacervatam haberent, idque statis horis, puta matutinis, aut vespertinis: ut sileam similia fieri constanti ritu non modo in vasis, & glandulis infarctis, sed & in amplis quoque cavitatibus. Sic, etsi in plurimis inæqualis admodum sit modus, quantitas, & hora assumendi alimenti, tamen in iisdem regulatis admodum est hora alvum deponendi, sive quotidie, sive alternis diebus, item hora esuriendi, sitiendi, mingendi &c. intantum, ut & dormientes ob id ipsum expergiscantur, licet id ipsum non exigat ulla necessitas, sed quædam potius Naturæ consuetudo, ad certas tamen quamvis occultas Mechanices leges exercita. Sic pariter menstruam Mulierum excretionem integro Lunæ spatio, quasi alicubi congestam, parum gnari suspicimus; eandem vero [quod magis est] quolibet mense per os institutam, & apud alios legimus, & in duabus Fœminis ipse vidi, quarum altera Phthysi tandem confecta obiit. Admodum ergo mirum forte non erit in casu nostro, quod aperiat, & vicissim claudatur mollior, recensque obstructio Glandulæ mesentericæ, Ductusve chylolymphici, quando hoc idem, vel simile phænomenon in aliis casibus observamus; sicut nec adeo mirum erit, quod hoc ad regulam quandam fiat, quotiescumque hujusce regulæ mechanicum artificium, vel mecha-

*Terti Therap. Spec.*

nici artificii probabilitas aliqua constare possit, ut infra.

His præmissis, ponamus, dicebam tunc [modo vero dico, fingamus] aliquam ex memoratis Glandulis mesentericis insignioribus ita infarctam esse viscido illo, quod diximus, glutine, ut omnem, vel fere omnem Chylo, & Lymphæ illac fluentibus ultra se Cisternam versus, progressum inhibeat. In hoc casu totum Vas Lacteum [sive autem unum sit, sive multiplex, parum refert] quod ab Intestinis ad glandulam protrahitur, Chylo stagnante replebitur; pariterque Lymphaticum *inferens* integrum, quod in eandem inseritur, ab exortu suo usque ad eundem terminum, lymphæ sua similiter stagnante, utpote exitum non inveniente, sensim repleri necesse erit.

Cum autem Chylus iste sic stagnans assidue non urgeatur ab alio Chylo, quippe inæqualiter, & per interruptas vices influente, & cum influit habente alios ductus patentes, per quos nullo negotio potest insinuari, nullum idcirco patitur conatum [excepto eo levi, quem potest recipere a compressione Viscerum propinquorum, & a Valvulis, tunc tamen feriantibus, Vasis obstructi] nullum, inquam, patitur conatum, vi cuius possit ultro promoveri ad superandum obicem in glandula existentem. Necesse est ergo, totam vim ad hoc opus requisitam exerceri ab humore lymphatico, tum fluidiore, tum valentius, atque velocius, ratione validioris impellentis, tum etiam perenne influente. Hoc facile intelligetur, si consideremus, quod Vas hujusmodi lymphaticum, ut supra obturatum, naturaliter quidem semper irrigatur liquore suo, sed non ita, ut patiatur repletionem, aut distensionem notabilem, qualem patietur, si per injectam ligaturam stranguletur, aut obstruatur. Itaque si Vas istud tale quidpiam quodammodo patiatur intra glandulam [quantum sit pro intercipiendo illius liquore] quale patitur ab injecto extrinsecus vinculo, necesse erit, quod paulatim totum Vas,



scilicet interstitium omne, quod intercipitur a primo illius exortu, usque ad insertionem in glandulam, lymphæ indefinenter influente distendatur usque ad turgentiam insignem ejusdem Vasis, seu usquequo capax illud est distensionis: cum rivuli, si qui sint, per anastomosim, vel aliter cum eodem Vase communicantes non possint supplere omnem defectum causa obstructionis illius resultantem. Et quoniam, repleto Vase, cessat quidem introductio liquoris in illud, sed non cessat, quin potius augetur circa primam illius originem conatus primi impellentis [arteriarum videlicet, ac si lubeat, etiam nervorum ibi sese exonerantium] assiduam lymphæ secretionem, & introductionem in idem lymphaticum molientis, adeoque secretam antecederet, & in ipso præ-existentm lympham urgentis, ac indefinenter prementis, accedente etiam aliquatenus valvularum officio, & circumfitorum musculorum motu: hinc est, quod multiplicato per repetitas vices hujusmodi potentiarum nisu, brevi cedat mucosum obstaculum in glandula lentescens adhuc, nec satis solidum, transitumque idcirco prementi, atque acrimonia quoque sua perterebranti liquori concedat, usquequo durat illius impetus, atque vis perforans, & non ultra.

Cum itaque regularis, & continua sit secretio lymphæ ab arteriis [dicamus & nervis] fieri solita, item determinata, plus minus quantitas liquoris secerni soliti, & determinata pariter capacitas Vasis liquorem excipientis, sequitur per consequens, quotiescumque fiat, renovereturque hujusmodi summa distensio, determinatum quoque, & fere æquale semper esse debere tempus, quod requiritur tum ad summe distendendum, replendumque ipsum Vas, tum etiam ad superandam resistantiam obstaculi extrema illius infarciensis: sumendo hoc tempus determinatum in aliqua latitudine, prout scilicet magis, vel minus viscida est materia obstruens, & consequenter prout citius, aut celerius com-

municatur extremo liquori glandulam intime attingenti vis, atque pressio in prima Vasis origine indefinenter exercita, ubi videlicet impeditam ob incapacitatem Vasis incassum moliantur arteriæ lymphæ secretionem, conamine semper fortiore, quo diutius repetito, & frustra tentato.

Istud autem tempus determinatum intercedens a puncto transitus inhibiti ipsius lymphæ usque ad tempus summæ repletionis, seu ad tempus superati obicis, quod idem est ac dicere totum tempus morbosæ collectionis lymphæ fermentum febrile principaliter constituentis, usque ad tempus exclusionis illius e suo carcere, longius, aut brevius esse debet, prout major, vel minor erit capacitas ipsius Vasis, spectato diametro, & longitudine illius, & prout magis, vel minus resistens erit viscida materia Glandulæ impacta, quæ liquorem in extremo vase remorabitur.

Potest autem contingere, quod inter plurimas Glandulas, quæ huic vitio peculiariter sunt obnoxia, aliquæ [ & quidem numerosiores ] appendantur tali lymphatico, pro cuius extrema plenitudine, & successiva contenti liquoris excarceratione mechanice, ut supra, facienda, requiratur spatium temporis 48. circiter horis circumscriptum, aliæ vero [minus quidem frequentes] Vas aliud possideant, sive longius protensum, remotiusque derivatum, sive recipiens parcius lymphæ secretæ stillidium in suo principio, cui ideo pro eodem opere, summæ videlicet repletionis, & quod magis est, successiva reclusionis, ob majorem primi impellentis distantiam, vel ob illius minorem nisum forte difficilioris, necessarium sit intervallum horarum circiter 72. & aliæ denique sint [nec ipsæ quidem numero plurimæ] quarum Vas ad idem opus non exigat plus quam horas 24. Et sic periodus Tertianæ febris cæteris frequentioris, Quartanæ minus frequentis, & Quotidianæ pariter rarioris, poterit haud difficulter intelligi. Quod si duæ Glandulæ sustinentes obstructionem horarum



rum 48. seorsim successive obstruantur, ita ut una hodie, altera cras idem vitium capiat, Tertianæ duplex duplicem habens Focum emerget. Si duæ, aut tres Glandulæ ex iis, quæ sustinent suum, ut sic dicam, infarctum ad horas 72. diversis successive diebus infarctum similem suscipiant, Quartanæ duplex, aut triplex orietur; & hac proportionem fient Hemitritæ, aliæquæ Febres Complicatæ. Non tamen absolute negaverim, pro varia glutinis obstruentis visciditate, & consistentia, itemque pro varia humoris gluten ipsum perterebrantis acie, diversas Febrium Intermittentium species ab una forsan, & eadem insigniore Glandula obstructa posse pendere, sicut & varias forsan ejusdem speciei, aut generis Febrium differentias.

Hæc Idea, qualiscumque sit, primam Febris generationem complectens, circuitum pariter illius ob oculos ponet, si perpendamus, quod superato per vim ut supra diximus, obice, extremum Vasis intra Glandulam obturante, liquor quidem excarceratus per viam recenter apertam facile dilabitur, nec finit iterum gluten illud coalescere, quousque durat illius impetus, quin potius ipsi Chylo intra Lacteum similiter occlusum stagnanti aditum referat per eandem Glandulam, ut eum secum rapiat, & per Chylo-lymphicos *effequentes* Ductus cum eodem ad Cisternam properet, & dein in sanguinem delabatur: attamen cum brevis, & temporaneus sit hujusmodi torrentis etiam lentioris affluxus, necesse est, quod conniventibus denuo iisdem Vasis, Lacteo videlicet, atque Lymphatico, idem mucus tum ipsi Glandulæ, tum Vasis lymphatici antecederet obstructi oris extremis adhærens, ad novam concretionem disponatur, cessante, ut dictum est, impetu illum perforante solum, non abludente, vel abstergente, & succedente, loco torrentis lymphatici jam jam exhausti, lento tantum, ac enervi lymphæ recenter secretæ stillicidio, novam perforari antea glutinis concretionem nequaquam impedire, aut superare valente. Et quo-

niam idem vitium nativum, vel crassitiei, vel acoris in lymphæ a primitivis suis causis adhuc fovetur, sicut fovetur in Chylo [præsertim tempore morbi] eadem ac antea prava dispositio multoque magis in fermentis, & succis ipsum Chylum actuantibus, & ex parte integran- tibus: hinc est, quod concesso per vim transitu liquori urgenti, & perforanti, paullo post idem facile recurrat impedimentum, & vitium, remanente scilicet in parte obstructa portione adhuc maxima Causæ conjunctæ, integroque etiamnum superstitie in fluidis Causæ antecedentis vigore. Cum itaque statotempore, ut supra, eandem fieri collectionem, & successivam effusionem febrilis Fermenti necesse sit, statotempore renovari opus erit febrilem Circuitum. Hujusce rei rude quoddam specimem in Ictericis, in Rheumate affectis &c. passim observari jam supra notavimus.

Quo pacto vero lymphæ aliquo modo jam peccans, postmodum diu detenta, item Chylus tot succis fermentescibilibus [quales sunt in primis Bilis, & succus Pancreatis] imbutus, diutius stagnans: quantulumcumque sit illius portio; adeoque, dum stagnat, ferme corruptus, possint, dum Chylo-lymphica pervadunt, Receptaculum commune, & Canalem Thoracicum, incommoda omnia producere, quæ Febrem incipientem comitari solent, qualia sunt Horror, Rigor, Frigus, Dolor dorsi, & lumborum, Vomitus biliosus, alvi Fluxus &c. quilibet ex se facile potest conjicere.

In sanguinem vero suapte etiam fortasse natura tunc male constitutum, delata hæc omnia, quomodo in eo effervescentiam febrilem excitare valeant, tandiu duraturam, quandiu succus febrilis subigatur, & redigatur ad Naturæ leges, extraneis jam salibus spoliatus, per diaphoresim, diuresim, aut alia quavis via excernibilibus, optime novit quilibet ex pauxilla puris portione, ab ulceribus etiam externis in sanguinem absorpta, Febres quandam quo-



que periodi speciem habentes identidem suscitari observavit. Sed de his adhuc aliquid Capite octavo.

Hæc, & alia plurima, Sylvianam quodammodo hypothesim a Pancreaticis ad Mesentericas Glandulas transferentia, menti quondam meæ obversabantur, quibus modo, cum nimiam compositionem sapere, nec satis simplicitati Naturæ etiam errantis, respondere videantur, nequaquam acquiesco; sed illa, ut manca tantum, & imperfecta profero. Sat sit eadem adumbrasse, ut, si rudem aliquam, ac indigestam veritatis speciem in illis quispiam reperiatur, ulteriori cultura ad meliorem frugem reducat.

Possit equidem fortassis adhuc ambigere nonnemo, ut alias tetigi, an Febrile Intermittentium Fermentum sit quiddam *exoticum* a partibus, vel quibusdam, vel omnibus proficiscens, & a *Venis* cum sanguine refluxo potius, quam a *lymphaticis* absorptum, atque ad corporis interiora delatum: quod, licet ægre crediderim, aliquo tamen pacto congrueret cum iis, quæ dixi, & mox dicturus sum de probabili quoque illius sede in aliis Glandulis, etiam circa corporis ambitum, & viscera confisiis, cum discrepantia tantum circa vias, per quas inde transferatur in sanguinem. Possit quoque suspicari quispiam alius, an Fermentum huiusmodi sit succus quidam perculiaris nobis adhuc *ignotus*, qui vel per semitas ordinarias Chyli, & lymphæ *per vim*, ac *præter naturam* intrudatur, vel per *occultas*, & *nondum patentes* (quandoquidem sunt, ut reor, in corpore nostro succi adhuc ignoti, & ignotæ viæ) ut exinde pariter deferatur in sanguinem. Sed hoc esset explicare ignotum per ignotius. Quamobrem, sepositis iis, quæ nondum patent, si revera illius natura, & existentia in succis, & locis notis sit quærenda, præter ea, quæ supra retulimus, non plane quoque displiceret materiam febrilem, cujus germanam indolem designare arduum quammaxime semper erit, ab universo corporis ambitu in centrum

eiusdem per vasa lymphatica derivare; hoc est a Glandulis conglobatis, five omnibus, five saltem aliquibus universi corporis, & viscerum illius, unde prima lymphaticorum origo: ut per huiusmodi semitas, ab eadem corporis, & viscerum peripheria, in ipsum sanguinem, quasi in centrum, simultaneo quopiam, & periodico confluxu, difficulter tamen explicabili, adduceretur, immediate quidem respective ad lymphatica superiora, mediate vero per Ductus omnes Chylolymphicos, respective ad inferiora, & media. Sic saltem congrua haberi posset explicatio illarum Februm mitioris indolis, quæ cum rigore, & frigore, sine ullo alio intestino tumultu solent invadere, & universali demum sudore facile solvi. Sed, si cui non satisfaceret pro explicandis Symptomatis Tertianarum in infimo Ventre maxime observabilibus ea, quæ posset adduci, irritatio facta a fermento febrili in Cisterna Chyli, aliisque Lacteis secundi ordinis, is ad salvandos enormes vomitus, motumque Ventriculi inversum, & Intestinorum antiperistalticum explanandum, a Lacteis primi ordinis, & a succis omnibus intestinalibus illac fluentibus, præsertim vero a bilioso, adjumentum quærat.

Si vero de explicandis perspicue huiusmodi symptomatis in prima paroxysmorum invasione fere perpetuis, & circa infimi Ventris confinia valde conspicuis, sit minus sollicitus, influxum succi febrilis in sanguinem, quem nos acervatim fieri posuimus, ipse paulatim factum (cæteroqui non improbabiler) statuatur, succumque ipsum febrilem a quavis affecta corporis glandula, modo hac, modo illa, modo una, modo pluribus, cum Auctoribus non paucis deriveret, stillicidio quidem assiduo, sed cruoris excandescientiam periodicam, noxiæque materiæ sensim congestæ expulsivam non inferente, nisi donec succus peccans fuerit intra cruorem ipsum ad turgentiam collectus. Quod quidem pro diversitate loci, seu Glandulæ suppeditantis, & pro varia liquoris, pari post-



ri postmodum proportionem in sanguinem influentis, quantitate, modo per breviora, modo per longiora, semper tamen ab invicem æquidistantia, temporis intervalla, repetitis subinde vicibus, posse contingere, haud arduum erit intellectu.

Pro reddenda autem ratione saltem aliqua symptomatum in infimo præsertim Ventre, locisque propinquis invadente paroxysmo apparentium, poterit is fortasse dicere, sanguinem tunc præter naturam fermentescere incipientem, in primo illo conatu ita turgescere intra sua vasa, ut valeat obistere novo succo febrili, sive per Lacteam thoracicam, sive per solitaria lymphatica perenne affluenti, prohibendo scilicet, ne tunc temporis succus iste recenter adveniens superare possit obstantem valvulam, ad ostium Canalis thoracici in Subclaviam tendentis appositam, vel aliam quamcumque excipiendo lymphaticorum tributo destinatum, atque ab eodem fermentescente, & contranimente cruore compressam. Sic Padus tumens, furens, & ad latera premens nec Gabelli, nec Scultennæ consuetum facile admittit vectigal, sed illud repercutit. Sicuti autem minora illa flumina intra aggeres suos repulsa, & detenta, plurimas in circumstitis locis excitant turbas, ita & succus febrilis sit repercussus, & intra occlusum Canalem Thoracicum, Chylique Lacunam, vel intra quævis solitaria lymphatica per vim coercitus, cum neque ultro propter inhibitum illius progressum, ut supra diximus, neque retro propter inferiorem portionem sursum urgentem, & propter obstaculum valvularum regressum prohibentium, viam sibi parare queat, interimque a stagnatione sua ulteriorem acrimoniam adipiscatur, potis erit suscitare in præcordiis, stomacho, & alibi, angores, vomitus, irritationes, aliaque incommoda, quæ in iisdem locis tunc temporis observantur. Enimvero tumultus non longe minores immo illis non parum analogos ob eandem fortasse rationem, nonnunquam excitare ibidem

solet simplex Chylus, si quando ex cibo paullo ante Accessionem exhibito contingat intempestiva protrusio illius in Sanguinem, fermentescere, ut supra, atque tumescere incipientem, ipsique propterea Chylo, quo minus libere possit ingredi, aditum præcludentem. In universa hac rerum serie, atque congerie, Veteribus ipsis, cæteroqui caligantibus, non prorsus ignota, tota ratio Intermittentium posita videtur; & hanc persequi fortasse non foret inutile, si omnium humorum peculiarem motum, statumque tempus Circuitus particularis eorundem distinctius nosceremus: inde namque explicandæ quoque periodi modus forsitan aliquis plausibilior elucesceret. Sed hic est Scopulus, ad quem infeliciter allidunt omnium Opinantium Naves in hoc Mari vela facientium.

Retenta itaque pro nunc hypothesi probabiliore, & universaliore, scilicet, quod humor febrilem effervescentiam periodice inducens, sit succus aliquis per accidens tantum vitiatus, & vel prævia stagnatione per intervalla statim sanguini affusus, vel congectione paulatim aliunde suppeditata, per intervalla pariter in eodem turgescens, qui propterea suam sedem, aut semitam habeat, vel citra ipsum sanguinem, hoc est circa pylorum, intestina, & lacteas utriusque generis (ut omnia primæ regionis loca indiscriminatim comprehendamus) vel ultra eundem sanguinem, hoc est in Glandulis, Vasisque lymphaticis, haud difficile erit conjicere, quomodo China China possit (quod est intentum nostrum) materiam febrilem, vel alterare, ac emendare in ipso suo Foco, vel intercipere, atque corripere in medio itinere, priusquam in sanguinem deferatur, nulla sensibili præter consuetas facta illius evacuatione.

In primo siquidem casu, cum China China diutius immoretur intra cavitates Ventriculi, & Intestinorum: quod segnior ramentorum illius excretio, & sæcum tinctura satis patefacit: item, cum ductibus omnibus Cyliferis secundum



dum minimas sui particulas adhæreat, eosque lentius pervadat, poterit nullo negotio febrilem laticem ibidem conditum infringere, combibere, retundere, & ad naturalem crasum reducere, vias ipsas, Glandulasque Chylo-lymphicas abstergere, ac reserare, aliaque hujusmodi diuturno usu præstare, quæ materiam, & occasionem febrilem, nec non *ipsius* quandoque *occasionis initium*, ut verbo *Hippocratis* utar, sine ulla excretionem admodum sensibiliter adaucta, valeant submovere.

In secundo vero casu, ubi Fermentum febrile supponatur radicari ultra sanguinem, videlicet in glanduloso, lymphaticoque Systemate, cum istud e sua, ut ajunt, Minera dupliciter possit in sanguinem influere, nempe, vel mediate [ & quidem magis abunde ] per Chyli vias secundarias, vel immediate ( & parcius ) per ipsa lymphatica, statim in eundem sanguinem se exonerantia, dupliciter quoque poterit suscipere extra ipsum sanguinem actionem Corticis, & ab eo debitam alterationem recipere, uno nempe loco intra Receptaculum chyli; ceterosque illius ductus lymphæ communes in sanguinem tendentes, in quibus idoneam pariter, ut in primo casu, potest recipere a Cortice alterationem: & siquidem Minera ipsa remotior non plane attingatur, correctæ tamen assidue per continuationem remedii nova fermenti illuc affluentis portione, a glandulis etiam longinquis subministrata, ipsa demum corrigi potest, aut exhauriri remota scaturigo. Altero vero loco correctionem suam potest a Cortice sortiri febrile fermentum ultra sanguinem stabulans, videlicet in ipsis glandulis, viscerum, & corporis ambitum, aliumve quemvis locum occupantibus, unde lymphaticorum origo, vel propagatio: quandoquidem ad extremam hujusmodi glandulosam provinciam potest pertingere ipsa tenuior substantia, tinctura, & actio Corticis, mediantibus arteriis in glandulas desinentibus, quæ arteriæ ipsum forsitan febrile fermentum [ non excluso, si cui lubeat

nervorum ministerio ] iisdem glandulis antea subministrarunt. Facile namque concipere possumus, non modo, quod materia lymphatica in sanguine [ majore saltem ex parte ] residens, quæ febrilis quoque fermenti glandulis imprimendi materia futura est, per Corticem alteretur, atque demulceatur: verum etiam possumus intelligere ( quod mihi quidem magis arridet ) quomodo eadem minimæ Corticis particulae, sub chyloso vehiculo etiamnum integræ, suæque virtute pollentes, sanguinem transmeent, illo intacto, videlicet eum notabiliter non immutando, suamque vim integram soli fermento imprimant ultra ipsum sanguinem, sive in glandulis, sive ubivis existenti, atque ibidem per eas absorpto. Quod si etiam ipsi sanguini taliter impressam quis velit Corticis virtutem, ut illum balsamico quopiam robore muniat adversus fermentum ab extrinseco undelibet adventurum, is, licet me plane consentientem non habeat, actioni tamen Corticis citra sensibilem evacuationem febrifugæ plane favebit. Et hæc quo ad virtutem Corticis agentem contra fermentum, suum Focum, sive, ut ajunt, suam Mineram agnoscens, vel citra, vel ultra Provinciam sanguineam.

Quotiescumque vero intra ipsum cruorem immediate *orta* simul, atque *congesta* ad turgentiam credatur, quousque effervescat, febrilis Intermittentium materia ( etsi hoc minus verisimile reputem ) adhuc facilius erit explicatio actionis Chinæ Chinæ in ipsum cruorem, nulla sensibili evacuatione subsequente; sive id fiat per hoc tantummodo, quod illa Fermentum febrile combibat, ac absorbeat, sive illud juxta *Conygium* disgreget, atque dispergat, ut Aquæ salis retundit aciem Aquæ dulcis affusa [ quo pacto non inepte fortassis explicaretur dispositio cruoris ad remorbesendum, quatenus scilicet eadem facile renovetur, ni impediatur per continuationem Remedii, salium febrilium coacervatio, priorque unio ] sive alio quovis modo ejusdem fermenti ener-



ti energiam reprimat; quæ res, cum multifariam possit contingere, difficile est definire quo pacto præcise contingat, interque varias probabilitates veritatem, quæ una est, exacte seligere.

Cum tamen aliquo ex prædictis modis se habere fermentum febrile certum videatur, æque certum per consequens est, aliquo ex iisdem modis haberi correctionem illius a Peruviano Cortice. Cumque vitiosus latex, qui tale fermentum constituit, vel in se continet, debeat redigi ad naturæ leges, vel per effervescentiam febrilem [resistente plurima illius portione utili, secreta vero inutili] vel per alterationem medicamentosam, quæ ipsam portionem inutilem magna ex parte rectificet per solam contrariarum qualitatum alterationem, seu per vim occultam, proveniente a tota substantia, ut ajebant Antiqui, si ve denique, ut sensibilibus loquamur, per variationem texturæ particularum minimarum febrile fermentum componentium, habitam quomodolibet a commixtione particularum minimarum Corticis; hinc est, quod nulla, vel pauca evacuatione sit opus. Etenim, quando cumque etiam ad correctionem fermenti aliqua requiratur particularum ejus absorptio, præcipitatio, & excretio, bene possunt hæc omnia integre haberi a China China; cum enim malitia fermenti febrilis consistat in pauca mole (quod bene novit, qui novit, quam pauca sint magnorum etiam morborum semina) potest ultro excerni, quod excernendum est per illas evacuationes, modo sudoris modici, modo alvinæ dejectionis, modo (quod frequentius est) urinæ notabiliter adauctæ, & immutatæ, quæ post depulsas ope Corticis febres quotidie observatur. Sane postrema hæc evacuatio, lotii scilicet sensibilibus aucti, atque concocti, evidens est, ac perpetua, sanguinisque defervescentiam, atque defecationem aperte testatur; non quidem fortasse quia China China agat immediate intra ipsum sanguinem, sed quia agit intra Ductus Chylo-lymphicos, quorum latices dum

corrigit, & primam sic coctionem juvat, mediate saltem juvat & alteram, quemadmodum videmus ex sola fermenti stomachici correctione debitam statim urinarum coctionem subsequi. Quod eo facilius in hoc casu succedit, quoniam, impedita per Chinam Chinam nova sanguinis conspurcatione, ille facilius se se expedit ab inquinamentis antea susceptis, unde urinarum concoctio, earumque uberior proventus emergit. Quid ergo de aliis copiosis excretionibus, quæ secundum Hippocratem — *non multitudine sunt æstimandæ* — sumus solliciti, cum, quid illæ per Artem institutæ conferre possint ad curationem Intermittentium, plane ignoremus?

Propterea [iterum repero] nunquam mirari desinam, quomodo in tanta rerum, & opinionum caligine circa Intermittentium causas, earumque sedem, quomodo, inquam, Virtus Febri-fuga Corticis per experientiam clara, tuta, certa, & evidens, quibusdam suspecta reddatur, eo quia nihil insigniter evacuando, doctrinæ Febrium, causarumque earundem non satis videatur quadrare. Hoc sane nonnisi ex defectu experientiæ potest procedere, & ex defectu fidei erga experientiam alienam, ne dicam etiam ex carentia peritiæ in administratione remedii, si quando illud, vel unica tantum vice, vel bis ad summum, vel pluries quidem, sed parcius quam par sit, præscribant, vel si exhibeant admixtum Catharticis, ad evacuandam, ut opinantur, simul & semel materiam morbificam, vel si eadem Cathartica propinent postridie, aut paucis elapsis diebus ab exhibitio Corticis: signum evidens infirmioris experientiæ, tum in illis, tum in Auctoribus omnibus, qui talem Methodum docent, utpote qua nil certius ad revocandam febrem, ut alias diximus, utque luculenter testatur *Restaurandus* his verbis — *Si nonnulli Chinam Chinam usurpantes, ejus ope febres non expugnant, id illorum imperitiæ adscribendum est. Hodie Chinam Chinam exhibent, postridie purgans porrigunt. Qua die illa data est,*



ta est, febris desinit; purgans autem de novo paroxysmum accersit: adeo sibi invicem adversantur. Ego illam absque successu nunquam exhibui. Siceteri Medici voto exciderint, procul dubio id illorum culpa contigit. Si non hanc culpam, saltem cautelam abstinendi a quocumque solvente vel levi post usum Corticis, fassus est Sydenham ipse, purgationi quondam addictus, in postremis suis Epistolis clara ista protestatione — *Advertendum autem, quod, cum de Febris Intermittentibus olim agens, Aegrum sublato morbo sedulo purgatum iri admonuerim, hoc intelligi velim de iis solum febribus [rectius forsan de nullis] quae, vel sponte sua, vel alio, sive medicamento, sive methodo, prater Corticem Peruvianum, erant debellatae. Etenim curatio, cum huic remedio, de quo jam loquor, innitatur, purgatione nec eget, nec eandem plane fert. Ita potenter dictus Cortex sine ope Catharticum non solum paroxysmis, sed & dyscrasiae, quam corpori iidem inflixerunt, subvenit. Vitanda itaque ante omnia evacuationes qualescumque, cum vel blandissima catharsis, quinimmo Enema e lacte saccharato [haec autem cautela est nimia] in morbi discrimen certissime, forte in morbum ipsum, denuo Aegrum conjiciet.*

Quod si nihilominus quispiam contenderet, succum febrilem Lacteam alicubi subeuntem non esse liquorem per accidens tantummodo vitiatum, solitumque in statu naturali illac cæteroqui confluere, cujus proinde crasis solum indigeat alterari, illiusque elaboratio, secretio, aut motus redigi ad Naturæ leges; sed potius vellet, illum esse aliquid plane præternaturale, vel mere excrementitium, insuperque tale, quod omnino debeat, ac possit affatim e corpore, & *elective* ut ajunt, educi, etsi illius extractionem e Minera irritam experiantur quotquot Catharticis, vel aliter evacuantibus medicamentis, Quar-tanarum v. gr. [idem dic data proportionem de Tertianis, ac Quotidianis] curationem tentant: in hoc casu, unicuique mordicus ita sentienti, relin-

quando in primis Methodum suam positam in manu consilii sui, luberet tandem palpum obtrudere, & ad dirimendam litem cum eodem mitius deinceps agere. Quamobrem in rejectam hucusque sententiam per modum concessionis quodammodo descendendo, Antagonistam hujusmodi, si quis forte esset, sic alloquerer. Estne purgandum? Eja, purgemus. Mittendus etiam est sanguis? Mittamus. Omnifariam evacuandum adhuc est? Evacuemus, extenuemus, excarnificemus [non sic forsan supra corium suum luderet Antagonista] At post tot lanienas, saltem incassum, ni cum detrimento patratas, quando tandem Rutam, Serpillum, Verbenam, Chamædrys, quando Mithridatium, aut Theriacam, aliave Febrifuga Specifica, invalida tamen, & inertia comparative ad Corticem, præscribimus, quando carpis Bursam Pastoris, vel Auriculam Muris contusam, quando telas Aranearum, vel Ovi pelliculas digitis admovemus, quando denique Animalcula insontia Aegrorum collo suspendi jubemus, & alias hujusmodi, vel aniles, vel dolorificas nugas, ante Chinæ Chinæ adventum jam familiares [quarum tamen nullæ materiam febrilem evacuant] usurpamus, tunc saltem, nisi citius, exhibeamus Corticem, ut sollemne erat vel ipsis meticulosis Auctoribus, qui tantum superficie tenus Chinam Chinam noverunt Orbi nostro primum nascentem: exhibeamus, inquam, tunc Corticem, si non alio titulo, certe ob remediorum inopiam; quoniam non sine pudore fateri cogimur, ad contendas, ni sponte solvantur, diuturnas Intermittentes, si Corticem demamus, Artem prope deficere.



## CAPUT VII.

*Ufus methodicus Chinæ Chinæ in vulgaribus Intermittentibus diuturnioribus, variaeque illam præscribendi formula.*

**S**TATUTO in antecedentibus Peruviani Corticis usu, tanquam innocuo, utili, & nonnunquam necessario ad profligandas Febres Intermittentes, consequens est, ut vulgatiores, selectioresque illum præscribendi formulas methodice prosequamur, in gratiam saltem Candidatorum Artis: cum cæteroqui satis notæ sint, prostantque ubique variæ, ac multiplices eundem præparandi, ac propinandi Regulæ.

Atque, ut a primæva Praxi mea exordium ducam, ipse quidem, statim ac per obitum Præceptoris evasi mei juris in Arte Medica, Methodum, quam didiceram, præcise prout didiceram, & prout a Romana Scheda docebar, sapissime in usum deduxi. Itaque, præmissis omnibus ex Arte præmittendis, pro certa subinde Febrium adhuc vigentium curatione, dosim integram *duarum drachmarum* Corticis, ex Vino, ut mos erat, exhibebam hora ingruentis Paroxysmi, & quidem die vehementioris insultus, si Febris *v. gr.* Tertianæ, duplex erat; quippe observaram, quod si die minoris Cortex fuisset exhibitus, correspondens tantum Paroxysmus, levior videlicet, inhibebatur, graviore superflite, ac Tertianæ duplici in simplicem mutata: si vero die gravioris accessus propinatus fuerat, minor quidem immediate subsequebatur paroxysmus, gravior autem correspondens, non modo supprimebatur, sed & post illum alter minor; nec ullus alius deinceps viscebatur. Quod si eadem Tertianæ, aliæve Febres Intermittentes simplex erat, nulla animadversioni huic erat occasio.

Quia vero, fugatis Febribus, frequentes Recidivas, quæ suboriri consueverant, ægre ferebam, easdem quodammodo mihi reputans indecoras, de his-

dem quoque præcavendis, serio, ac solite intra memetipsum cogitare cœpi. Quamobrem ad repellendum pro viribus Febrium reditum, per octo circiter subsequentes dies, omni mane *Semidrachmam* pulveris exhibebam per modum alterantis cujuscumque, ratus, me probabiliter inter paucos dies consecuturum a Cortice illam humorum, ut ajebant, præparationem, quam alias per plures menses a centum Julapiis, & jusculis frustra quæsieram; immo, quo certior fierem de prohibenda recidiva, elapsis iterum quindecim, plus minus, diebus, ut ut optime convalesceret Ager, per per alios saltem sex dies *scrupulum unum* ejusdem Corticis singulo mane sumi jubebam, qua repetitione, juxta exigentiam casuum, quandoque etiam pluries instituta ante reditum Febris omnem fomitem, ac omne fermentum pro recidiva superstes non raro penitus tollebam. Et hac methodo etiamnum utor, si quando Febres Intermittentes longiusculas per Chinam Chinam curare aggreddior.

Non absimili admodum via incedunt hodie cautiores quamplurimi; qui ad tollendam sensim, nec uno quasi ictu comprimendam febrilem effervescentiam, ipsum Corticem exhibent a principio per modum levioris alterantis, imminuta scilicet semper, ac parca dosi [puta ad *Semidrachmam*, vel circiter] idque semel tantum in die, tempore, quo Accessio deferbuit, vel omnino cessavit, sive in forma solida, sive in aqua etiam aliqua stillatitia, puta Card. b., Scorzoneræ &c. potius, quam in Vino; quam dosim semper æqualiter ad plures, & plures dies protrahunt, usquequo nempe Febris extincta sit, ac ultra etiam, ut præcaveatur regressus. Atque hanc quoque methodum in naturis, palatisve delicatulis, & in *debiliorum Febrium diuturnitate* haud infrequenter, & ipse teneo.

Sed si causa Febrium valida sit, uberior, & contumax, ob metum vero imminentium symptomatum, vel ob aliam justam rationem congruum videatur, Febrem



Febrem longas admodum moras non admittentem, suppressere, tunc satius est prius exhibere dosim integram *duarum drachmarum*, postea sensim imminuta dosi procedere; sic namque citius, & infallibilius effectum consequimur. Neque enim *sex scrupuli v. gr. pulveris*, per sex successivos dies assumpti, æquivalent activitati, licet æquivalent ponderi *duarum drachmarum* uno haustu assumptarum; quod, ut maxime verum est, ita & maxime notandum in praxi. Hinc est, quod unus Medicus, cum *drachmis sex*, vel cum *unc. j.* Chinæ Chinæ, quamlibet Febrem Intermittentem diuturniorem sanet, & recidivam etiam præcaveat: alter vero cum *unc. iij.* vel *iiij.* vix, ac ne vix quidem, id assequatur; si videlicet primus *drachmas duas* prima vice porrigat [quibus solis Febrem immediate suppressit] dein post unam, vel alteram diem, *drachmam unam* iterum propinet, ac sequenti die alteram similiter *drachmam*, demumque interposito octo circiter dierum spatio, *semidrachmam* quotidie per alios octo dies continuos exhibeat, qua methodo omnis fere semper inhibetur recidiva: alter vero *tres uncias* integras ad *scrupulum unum* quotidie (prope inutiliter) impendat. Sane una tantum libra aquæ affatim effusa par est extinguendo ignitorum carbonum cumulo; duæ vero libræ guttatim, & longiusculis intervallicis stillantes tractu temporis difficile idem præstant. Sic purgatio per epicrasim instituta, quamquam persæpe tutior sit, ac utilior purgatione mediocriter valida, non est tamen citior, aut certior, quoad obtinendum finem evacuationis. Idem dicendum prorsus de Dosi congrua, & integra Chinæ Chinæ, quoad effectum certiorum pellendi Febres, cæteris paribus.

Practicæ hujus veritatis ope decerni quoque posse videtur de usu liberaliori, prudenti tamen, omnium ferme Alterantium. Horum sane doses nostris temporibus sunt adeo diminutæ, & in dies diminuuntur, propter nescio quandam scrupulositatem magnorum etiam Viro-

rum, minus tamen Practicæ addictorum, ut sapius fortasse cunctationi huic imputari possit felicitum successuum carentia frequentior, & fraudatio expectationis nostræ, quam jure merito nobis indidit longa Patrum experientia, & auctoritas, sed nimia nostri seculi in usu practico fefellit cautela. Ad hanc superstiosam, ut ita dicam, medendi rationem referri quoque potest austeritas nonnullorum Vini usum pro Chinæ Chinæ infusione, ac assumptione reprobantium, cum tamen illud, pro complendo hoc opere, cæteris quibuscumque liquoribus sine ulla suspitione præferri possit. Neque enim ab illo, etsi nonnunquam generosiore, per infusum tamen Corticem aliquo modo enervato, quicquam detrimenti unquam evenisse dignovi, sicuti nec interesse, album ne illud sit, an rubellum, austum, an dulce &c. ut proinde liceat innoxie uti eodem, vel in Febribus plurimum intensis, teste experientia, & Sydenhamii auctoritate, quem inter cæteros lubet seligere — Neque enim (inquit ille) mihi unquam contigit, ut viderem, Vinum, in quo propinatur Cortex (quod jure quis possit suspicari) febricitanti obfuisse; e contra vera calor, sitis, cæteraque Febris symptomata ut plurimum, post assumptionem hujus remedii quantitatem sufficientem, mox evanescent, Vino haud obstanti.

Aliis itidem imitatoribus Methodi, quam sub Arcani nomine tanti vendidit in Gallia Talbotius Anglicus, in usu est solam Corticis percolatam infusionem ex Vino, rejecta ipsius Corticis substantia (ne videlicet stomachum gravet) ad *unc. v.*, vel *vj.* propinare, idque assidue repetere, interposito quatuor scilicet horarum intervallo, incipiendo a remissione cujuslibet paroxysmi (nequaquam vero a principio) usque ad alterius adventum, & sic primo ad plures, & plures dies, deinde mane tantum, & sero, tandemque semel tantum in die, ad plures usque hebdomadas sensim procedendo, Febre etiam sublata.

Sed,



Sed, ut verum fatear, licet hanc præparationem absolute non improbem, sua quippe præstantia nequaquam carentem, ea tamen minus arridet, non quidem ratione temporis exhibendi Febrifugi, quod potius cum aliis commendando, cum tutius sit hostem fugientem, Febrim nempe, insequi a tergo, quam venientem aggredi a fronte: sed primo, quia debilis admodum est huiusmodi modus, & tardioris effectus, immo etiam incerti; secundo, quia sic fieri solet inutilis consumptio remedii præstantissimi, ac in urgentissimos casus solícite potius servandi, cum pro tali infusione necessaria sit magna quantitas Chinae Chinae, ad uncias nempe sex, vel octo, ut ipsi fatentur Auctores Galli, pro uno tantum Ægro perfecte sanando. Accedit, quod huiusmodi infusio, partitis etiam vicibus instituta, nonnisi in pluribus Vini libris, longa postmodum mora vappescentis, potest institui: siquidem cuilibet unciae Chinae Chinae, una saltem Vini Pinta Parisiensis, continens uncias xxxij, immo, secundum *Lemeryum*, duæ Pintæ solent affundi. Quod sane impendium Corticis ad excessum usque producit pro morbo vulgari, qui cum exigua cæteroqui Corticis, & liquoris mole curari potuisset. Et revera solo Cortice tali infusioni superstitite, rejectoque jam ut effæto, ac inutili, plures Ægrotantes pauperes sanatos novi, cum tamen pro uno ditiori vix tota, quanta erat, infusio suffecerit. Tanta est substantiæ Corticis etiam per infusionem præcedentem enervati activitas, & tam debilis est activitas simplicis infusionis illius, etiamsi vegeti. Hanc nihilominus Methodum amplexa est Gallia fere universa, postquam ea usi sunt omnes Regii sanguinis Principes, & Sacra ipsa Regis Persona, cui tamen vere profuit ipsa Corticis epoti substantia. Editaproinde est, ac promulgata eadem Methodus cum approbatione Aulicorum Medicorum, scilicet Clarissimorum *D'Acquin*, *Fagon*, *Le Bel*, & *Du Chesne*, accedente universali aliorum totius Regni Medicorum usu.

Laudabilior tamen meo iudicio est mos eorum, qui facta dilutioni, ut supra, infusione unciarum duarum, vel trium Chinae Chinae, eandem non *percolatam*, sed nonnihil *turbidam*, eadem pariter, ut supra, dosi, iisdemque temporibus, cum non absimilibus interval- lis præbent; qua demum prope absumpta, reliquæ portioni Chinae Chinae infundo subsidentis, novum Vinum, quin etiam tantillum novi Corticis (ut & factitabat *Talbotius*) affundunt usque ad veteris, & novi pulveris absumptionem: sic enim citius, & certius sortiuntur intentum. Sed neque hoc plane satisfacit, quatenus pro occasione nimis levi nimium pariter sit Chinae Chinae proluvium, nimisque diu vexantur Ægri nauseosa, & frequenter repetita ingrati medicaminis oblatione. Si ferat nihilominus Ægri stomachus, nec eum pigeat expensæ supervacaneæ, huiusmodi methodum improbare non audeo.

Sunt aliæ plures China China utendi formulæ, singulæ suo robore præditæ: ex ea siquidem parantur Tincturæ admodum efficaces, Extracta pariter non parum activa (plus minus tamen pro ratione menstrui, ac modi eandem conficiendi) quæ sicut simplicem Corticis substantiam superant quadam jucunditate saporis, efficiuntque ideo, ut assumantur facilius, ita ambigo, nec sine causa, an æquent virtute, ac energia operandi, ut quandoque opus esset, præsertim si huiusmodi artefacta diutius aserventur, immo nisi sunt valde recentia. Quod si auctoritati Famigeratissimi *Malpighii*, & aliorum in hoc velimus subscribere, sane tincturæ potius, quam substantiæ, quippe lignæ, ac proinde gravioris, sicut & administrationis paulatim potius, quam cumulatim institutæ, usum tutiorem reputabimus. Ego vero solícitus de certitudine, & promptitudine eventus, ubi præsertim aliqua urgeat necessitas, circa primum caput, meum adhuc votum suspendo, etsi satis felicem sæpiusculè [haud diffiteor] Extracti pariter, ac Tincturæ experientiam nactus. *Mortonus* tamen in ad-  
mini-



ministrando Cortice exercitatus, dum Tincturam suam satis elegantem, neque cum Vini spiritu [ qui aliorum mos est ] extractam commendat, eidem nihilominus aliquot drachmas pulveris in substantia præmittit pro fundamento Curationis. De Dosi autem, quod secundum est, quid sentiam, jam dixi superius: nec majorem requiri quantitatem in Casibus *vulgarium* Intermittentium, ac tunc edixerim, reor, ut ut idem *Mortonus* dosim augere soleat, non alio nomine, nisi quia spurium, & effectum Corticem genuino, & integro copiose mixtum, nostris temporibus suspicatur. In *Schedula Romana*, inquit ille, *dosis drach. ij. precise adultis præscripta erat: Jam autem quia Cortex adulterinus est, coacti sumus saltem unc. j. nonnunquam duas, vel tres ingerere, priusquam scopum attingere possimus Drachmas duas vix jam sufficere Infantium, ac puerulorum Febribus fugandis, cuilibet in Medicina exercitato notum est.* Sic ille. Hujusmodi autem fraudem in Cortice apud nos Ego, ut verum fatear, nondum deprehendi, eundem nimirum effectum, ac primis temporibus, a consueta dosi etiamnum reportans.

Pariter cum Conservis Rosarum, Absynthii, Violarum &c. admixta China Chinæ, speciei Opiatæ, vel Electuarii utiliter exhibetur; item, quod commodius est, cum Syrupo de Absynth., de Cortice Citri &c. vel cum solutione Tragacanthi, in formam boli redigitur, vel cum saccharo, & idoneo liquore coquitur ad consistentiam Syrupi. Sic ego sæpius tinctura ejusdem forti in Julapium redacta pueros, quibus amarum ingratum est, ni fallantur specie dulcedinis, curare consuevi. En mea illius descriptio.

*R. China China in tenuissimum pollinem redacta unc. j. Irroretur Vini spiritu quousque humescat tota, mox infundatur in unc. xvj. Vini albi generosi. Digeratur in B. M. tepido per biduum, vel triduum, agitando Vas pluries in die, deinfusa per linteum valde rarum colatura, cum forti expressione (ut portio sal-*

*tem tenuior substantia Cortici traiciatur) adde Sacchari albi clarif. unc. viij. Et in Vase fictili coquatur lento igne ad consistentiam Syr. Dosis unc. j. unc. j. ss. unc. j. , & ultra, si lubeat. Julapium istud eo efficacius erit, quo turbidius, & substantia Corticis magis imprægnatum, secus vero quomagus perspicuum. Poterit autem in tali casu, vel si adultis sit præscribendum, acui, & roborari additione substantiæ Corticis ad scrup. j. vel ad drach. ss. pro qualibet unica, quæ commixtio tempore oblationis valde utilis esse potest, nec multum incommoda.*

Omnibus hisce modis, quorum unicuique sua vis inest, exhibitus debita, continuata dosi, tum in Paroxysmo, ut olim, tum extra Paroxysmum, ut modo, & quidem partitis vicibus, Peruvianus Cortex, in tenuissimum pollinem (quod ungue notandum est) probe redactus, Febres omnes Intermittentes fugat, modo citius, modo tardiuscule, prout magis, vel minus valida, copiosa, aut frequens fuerit illius oblatio. Harum tamen Formularum nulla ex relatis promptiorem sortitur effectum, quam ea, quæ primum fuit inventa, exhibendo videlicet *drachmas duas* Chinæ Chinæ per aliquot horas (quod tamen minime necessarium) in Vino antecedenter infusæ; invadente Paroxysmo, vel, si mavis, eodem declinante: siquidem in principio accessionis metus est, ne vomitu tunc temporis facile rejiciatur; illo enim paroxysmo transacto, certo certius non redit alter. Et si constanter, ac opportune repetatur remedium modo ad *drachmam*, modo ad *semidrachmam* ad plures dies, semelque tantum, vel bis in die, prout opus videbitur, videlicet priusquam semiconfossus hostis vires resumat, præcavetur etiam recidiva. De reliquo non est, cur simus admodum solliciti de elegantia illius præparatione, nisi id fiat gustus gratia, vel ob difficultatem assumptionis ex parte Aegrorum; tunc enim Tincturas tantum, vel Extracta, aliasve Remedii contractiones, per infusionem, decoctionem, expressionem &c. cogimur



mur anteponere substantiæ illius. Extra hujusmodi occasionem absque ullo furo exhibeatur Cortex; quandoquidem, quocumque modo offeratur, nostram semper expectationem implet, eo fortior, quo simplicior.

In hanc rem audiat *Mortonus*, qui de *China China Tincturis*, *Extractis* &c. verba faciens, concludit — *Audeo palam affirmare, multa, ac diuturna experientia fretus, Chinam Chinam simplicem, & in substantia exhibitam (modo in pollinem seu Alcohol arte prius redacta fuerit &c.) certius, ac compendiosius vires suas exercere, atque finem optatum attingere, quam si multa arte, aut igne torqueatur, ac nativis viribus spoliata, more pomposissimo, exhibeatur; adeo ut in istis preparationibus oleum, & opera perdatur. Neque cuiquam auctor ero, ut nugæ hujusmodi captando, atque reapse nihil efficiendo, temporis pretiosissimi iacturam faciat. Alibi pariter idem inculcat, sic inquit — *Febres sane Substantia Corticis citius, ac certius, quam quacumque speciosissima ejus Tinctura, Extracto, vel Elixire fugari, atque fugatas ad recidivationem minus aptas esse, certo certius constat. Quod idem paucioribus his dixerat Blegnyus — Porro, me iudice, simplicissima preparationes, & quæ minus artificium redolent, omnibus præferendæ sunt.**

Neque tamen primos *China China* Fautores latere istæ, quæ recentiores vulgo reputantur, illam præparandi formulæ; siquidem de ipsis expressam mentionem facit laudatus *Badus*, qui non modo *Extracta*, & *Tincturas* (quas inter celebris est, quam profert ex descriptione *Jo:Gregorii a Glantz Medici Cæsarei*) sed etiam *Sales*, & *Spiritus* ejusdem, immo & *Aquam stillatitiam*, vel tunc fabrefactam indigitat, de cujus tamen viribus nollem inexpertus quicquam spondere.

Sed tanto luxuriantium præparationum apparatu nondum contenta ostentatio Medica cogitavit adhuc de adiungenda huic *Achilli*, qui sibi solus sufficit, aliorum Medicaminum inutili.

*Terti Therap. Spec.*

lium (unam non contrariorum) societate, si non titulo expugnandæ Febris, saltem leniendorum symptomatum: quo nomine *Laudanum opiatum*, ubi præsertim symptomatica diarrhæa, vomitusve frequens febribus adjungatur, communiter (nec tamen male) solet Cortici commisceri. At licet injuria cæteroqui annectatur *China China* consortium cuiuscumque remedii (ubi enim ea convenit, convenit sola) cum omnia Februm Symptomata quantumvis gravia, devictis per Corticem Febribus, tollantur penitus; attamen, si cui lubeat eadem addere, non sine plurimorum Scriptorum auctoritate, addat, licet ut plurimum supervacue.

Id unice admittere nequeo, etsi eorum nonnulli facile admittant, aut suadeant, nempe quod Cortici ulla Cathartica, utut levia, admisceantur, vel post eam oblatam propinentur; per solos enim Clysteres repetitos satius est negotium absolvere. Usu namque satis didici (quod & a Scriptoribus magis expertis est animadversum) ea ipsa familiaria Remedia, quæ vix, ac ne vix quidem, naturam alimenti transcendunt, suntque convalescentibus usui ordinario ad alvum lubricam servandam, ea inquam ipsa, post assumptum Corticem Febres iterum suscitare. Quamobrem ea certitudine, qua Febris per *China China* expellitur, eadem pariter per Cathartica revocatur. Quod diutina observatione adeo constans reperi, ac adeo perpetuum reputo, ut olim *Quartanario* cuidam bimestri, per Corticem curato, & adhuc nihilominus querulo, quod plura mala ex istiusmodi curatione metueret, quam ex Febre non satis diu [ut agebat] gestata, impatiens responderim, quod si tanti Febrim suam faceret, ut, ea sublata, re meliore per me spoliaturum se crederet, paratus eram illico Febrim ipsam illi medio Cathartico restituere. Melius consultus renuit, & vixit incolumis.

Quoad modum diætandi *Ægros* tempore Febrifugi oblatis, ego [quidquid aliis placeat] eandem servari jubeo vi-

E

ctus



Etus rationem, qualem pro ratione Febris ante Corticis usum præscripseram, servato congruo semper intervallo inter cibum, atque remedium, quemadmodum in aliis quoque casibus mos est, ut scilicet purior, quantum fieri potest, ac impermixta deferatur quotendit substantia remedii. Neque ex hac praxi ullum unquam incommodum in stomacho Ægrotantium, quale describitur ab iis, qui ventriculum jejunum nolunt, sed cibus refertum, ut melius Corticem ferat, contigisse memini. Forsitan id illis accidit, qui quarta quaque hora plures uncicas infusionis Chinæ Chinæ stomachum inundantis, assumunt. Non sic certe in præscriptione mihi familiari. Ingurgitationem idcirco, ac frequentem Ciborum præsertim solidorum oblationem, quæ nonnullis arridet, in hac saltem Regione laudare nequeo.

Intra hos cancellos vulgo subsistit usus frequentior Peruviani Corticis, tum quo ad dosim, tempus, & modum offerendi remedii, tum quo ad Febres, quæ pro scopo activitatis illius communiter designantur. Innumeras equidem alias Chinæ Chinæ præparationes, atque illius ante infusionem prævias irrorationes, commixtiones &c. ex plurimis Auctoribus huc afferre possem longiori ordine, sed crambem millies recoctam abnuo recoquere: nonnullas tamen ex iis, quæ præstantiores creduntur, in gratiam Tyronum tantummodo minime gravabor transcribere. Interim, antequam pergam, mihi generaliter dixisse sufficiat, *drachmas duas* gentini pulveris, sive solitarii, sive aliis Febrifugis associati, & quomodolibet, una vice, tempore idoneo exhibiti sive in forma liquida, sive solida, sive in Aquis stillatitiis, sive in Vino (quod Ego, præsertim si tenuius sit, cæteris liquoribus antepono) quamlibet Intermittentem fugare: eundem vero pulverem pro arbitrio, & pro morbi exigentia, parciore dosi ad plures dies similiter exhibitum, ac subinde etiam repetitum, ejusdem Febris reditum ut plurimum prohibere. Ne tamen sicco pede aliorum præscriptiones

transigere videat, vel negligere elegantiores, ut spocondi, nonnullorum formulas hic apponam.

Sydenham in *Observationibus Medicis* simpliciore hanc habet. *R. Peruviani Cort. sub. pul. unc. j. Conf. Ros. rubr. unc. ij. M. Capiat Æger quantitatem nucis mosch. majoris, mane & sero quotidie, diebus a genuino paroxysmo vacuis, donec totam confectionem absumpserit. Repetatur porro ad tres alias vices, interjectis semper diebus quatuordecim.* In Epistolis postmodum ab eodem conscriptis, postquam experientia profecerat, unciam unam pariter ejusdem Corticis Syrupo Caryoph., aut de Rosis siccis commixtam, vel duabus Vini libris infusam exhibet, duodecim partitis vicibus, singulo quadrihorio, tempore intermissionis; ea scilicet porportionem, ut intra duos tantum dies tota quantitas absumatur, atque octo tantum interjectis diebus, remedium repetit, idque ter, vel quater renovat ad arcendas recidivas.

Idem Auctor pro Infantibus sequens (ut inquit) Julapium solet conficere *R. Aq. Ceras. nigr. Vini Rhenani an. unc. ij. Corticis Peruviani sub. pul. drach. iij. Syr. Caryoph. drach. j. M. f. Julapium. Capiat cochleare unum, alterumve, pro ratione ætatis, quarta quaque hora. donec paroxysmi non amplius discrucient, instillando alternis dosibus (si diarrhæa adfuerit) Laudani liquidi gut. j. vel. ij.* Limpidam autem ex diligenti percolatione infusionem Corticis, quam pro delicatulis præscribit, nullius fere roboris esse, plurima fretus experientia pro certo habeo. Claris hujusmodi infusionibus, exigua Corticis virtute imbutis, anteponerem potius Vinum *Monginotii* (cujus tamen nullum mihi fuit unquam experimentum in praxi) paratum tempore vindemiarum ex China China immixta, in pulverem redacta, illiusque probabiliter viribus media fermentatione validiuscule imprægnatum.

Mortonus autem Corticis strenuus administrator illum exhibet per octo, decem, vel duodecim vices ad *drach. j.* singulo trihorio, vel quadrihorio, tempore



pore absentis paroxysmi, modo in forma potus, modo in forma boli, vel pillularum. Quæ quidem dosis sic repetita, quemadmodum excedere solet exigentiam Intermittentium benigniorum, ita nonnunquam non æquat, ut suo loco videbimus, exigentiam quarundam Perniciosarum, utut Methodos aliorum efficacia superet. Formulæ autem illius sunt sequentes. & Aq. Card. b. unc. ij. Aq. Epid. Syr. Caryoph. an. drach. ij. China China elect. subt. pulv. drach. j. M. f. haustus, qui absente paroxysmo illico propinetur, repetaturque tertia, vel quarta quaque hora ad viij., x., vel xij. vices. Vel

& Cort. Peruviani elect. in subtiliss. pollinem redacti drach. j. Syr. Caryoph. q. s. M. f. bolus sumendus. ut supra. Vel

& Pul. Peruviani subtiliss. triti unc. j. vel unc. j. ss. Syr. e Rub. Idæ q. s. Balsami Peruv. scrup. j. vel drach. ss. M. f. Elect., de quo sumat Ager quantitatem nucis mosch. tertia, vel quarta quaque hora extra paroxysmum. Vel

& Pul. febrifug. elect. & subtil. triti unc. j. vel unc. j. ss. Mucilag. Gum. Tragacanthi Aq. Plantag. extract. q. s. M. f. Pill. mediocres deaur., quarum viij. x. vel xij. quarta quaque hora intermissionis deglutiat.

Pro iis autem, qui ægre ferunt substantiam Corticis, post dosim aliquot drachmarum illius pro fundamento curationis prius propinatarum hac tinctura utitur ad perficiendam curationem. & Cort. Peruviani crasse pul. unc. iij. Coque leniter in Aquæ fontis lib. j. ad mediæ consumptionem: deinde f. Colatura, atque reliquias Decocti, eadem Aq. quantitate recens affusa, coque, & cola iterum, hoc modo repetendo operationem ad tertiam vicem, vel donec tota Corticis amarities fuerit extracta Denuo omnes colaturas commisce, & adde Aq. Epidem. Syr. Caryoph. an. unc. iv. vel v. M. f. Apozema, sive Tinctura, de qua sumat Ager unc. iij. v. vj. quarta quaque hora extra paroxysmum, vel sæpius ad libitum.

Ex Zodiaco Medico-Gallico præter Re-

medium Anglicum, seu præparationem Talbotii, de qua infra, & alias præparationes aliorum, habemus specialiter hanc Opiatam non inelegantem. & Quinquina pul. Fol. aut Flor. Centaurii min. sub. pul. Theriaces an. part. equal. Confice ex his Opiatam, de qua sumat Ager bis in die drach. j. ss. sex dierum spatio, superbibendo haustum Vini rubelli optimi, & Aq. Plantag., vel Buglossi. Eandem, meo iudicio, efficaciorē (quippe Chinæ Chinæ plus admittentem) reddit Cl. Nigrifolus immutans hoc pacto. & China China pul. unc. ss. Fol. Centaur. min. pul. Mithridat. opt. an. drach. ij. M. & cum Syr. de Absynthio, vel de Cort. Citri, vel Aurantiorum f. pill. (non præscribit molem, aut pondus singularum, sed facile est id cuique determinare) quarum sex, vel saltem quatuor assumat Ager quotidie, superhausto cyatho Vini generosi, vel Aq. Card. b., aut Sonchi &c. continuando usum talis Opiatæ per aliquot dies, etiam sublata Febre, ad recidivæ præcautionem.

Ex eodem denique Zodiaco, & ex ipso Nigrifolo innuere solum juvat, minime vero transcribere celebrem præparationem Talbotii, utpote satis notam, scitu facilem, relatu operosam, & a vulgari infusione parum discrepantem. Me tamen vade, ea per se imbecillis est; quidquid enim roboris eidem inest, illud a crebra tantummodo, & diuturna ejusdem oblatione procedit. Cæterum excellentia, quæ illi a nonnullis tribuitur, eo quia virtutem nudam Corticis in se contineat extractam a crassiore substantia, quæ proinde rejicitur (sed perperam) ut effœra, tanta revera laud est, quanta creditur: & plane versute id factum ad velandum remedium cognitu nimis facile, ut scilicet pro arcano posset venditari. Id unum expedit animadvertere, quod quotiescumque simplici infusione uti velimus, idque sinat morbi benignitas, opus est dosim saltem duplicare, & macerationem duorum, vel trium dierum præmittere, ac sæpiusculæ vas liquoris concutere: ut sic liquore, quantum fieri potest, im-



prægnato, probabilem sortiamur effectum ab infusione duplicatæ dosis, quem a substantia dimidiæ certum consequeremur. Qui magis elaboratas expetit hujusce Remedii præparationes, illiusve Tincturas, Extracta &c. adeat *Badum, Sturmium, Rolfinchium, Lemeryum, Donzellum, Doleum, Monginotium, Talbotium* modo memoratum, seu potius *Blegnyum* pandentem arcana *Talbotii, Helvetium, Charas*, & alios, quorum plurimos etiam reperiet in uno Antidotario Mediolanensi acervatim citatos.

Similiter cum Confectionibus Cardiacis, ut de Hyacintho, Alchermes &c. solet a nonnullis simpliciore apparatu, & retenta illius substantia, misceri Cortex, supervacanea quidem impensa, sed eventu nihilominus æquali, dummodo illius sit dosis, ususque sufficiens, cujusmodi exempla passim videre est apud Auctores fere omnes Cortice utentes. Mixturis autem hujusce modi, præsertim vero Opiatis amaricantibus paullo supra relatis, uti possunt ii præcipue, quibus occasio est Corticem velandi, vel quia Ægrotantes panico terrore perculsi renuant assumere, vel quia ipsi erubescant palam offerre, eo quod alias incaute nimis, aut studiis propriis ducti, illum damnaverint: odor enim, & sapor Theriaces satis notus, simulque amarities Centaurii saporem Chinæ Chinæ celabunt, ac obruent. Quod reliquum est, ut ingenue loquamur, cum quidquid illi commiscetur (etsi simpliciter bonum) eadem sit imperfectius, non est cur moles remedii augeatur adjuncto aliquo imbecilliore, quod a sola China China efficaciam ferre totam debet mutuari. Satis apposite in hanc rem agebat Doctissimus Sydenham — *Qui aliquid Cortici adjiciunt, præter vehiculum eidem in ventriculum transmittendo necessarium, aut ex ignorantia peccant, ut mihi videtur, aut dolo malo, a quo Vir probus ex animo abhorrebit.*

Extensionem vero Remedii istius ad alias Febres expugnandas, puta Conti-

nuas, Malignas &c. a nonnullis propositam, vel usurpatam: item ejusdem injectionem per Clysteres ab *Hadriano Helvetio* descriptam, & a me quoque aliquando institutam, variosque illius usus ad alias Ægritudines, hic loci, ubi de usu tantum vulgari ejusdem in Intermittentibus agitur, examinare supersedeo, cum ex professo de his omnibus suo loco sim plura dicturus.

## C A P U T VIII.

*Diligentior investigatio, an liceat in principio quoque earundem Vulgarium Intermittentium Chinam Chinam exhibere.*

**Q**UÆ diximus hætenus de tuta, citata, ac certa actione Peruvianæ Corticis in diuturniore Febrium Intermittentium progressu exhibitæ, & quæ de Caussis ipsarum Intermittentium superficie tenus tetigimus, omnem locum videntur surripere propositæ quæstioni, an scilicet illam etiam in principio earundem liceat offerre; quandoquidem omnibus temporibus: & quo citius, eo melius: morbum semper tolli debere, si possibile sit, extra dubium videtur. Sed non est plane ita; Aliud namque quærendum est prius, quod magis refert, nempe an vere hujusmodi Febres ab initio liceat suppressere (quod & circa usum suorum Alexipyretorum adnotarunt Antiqui) præscindendo, an id mediante Cortice, vel alio quovis Febrifugo tentare expediat: nam quotiescumque id facere congruum censeatur, nil profecto melius Cortice in hunc finem occurret. Sed non est res parvi momenti decernere, an congruat tempori.

Pro hujusce nodi solutione labet aliqua ex parte convenire cum Sydenhamio admonente — *Curandum esse ante omnia, ne premature nimis hic Cortex ingeratur, ante scilicet quam morbus suo se marte aliquantisper protriverit, nisi collabescentes, & jam fractæ Ægri vires* (virium autem collapsus in morbi princi-



principio nequit contingere, nisi ob ingravescentiam Symptomatum, quam ideo satius fuisset exprimere ) eundem temporis suggerendum esse dictaverint — Sed quia ratio illius innititur suppositioni, quod causa Intermittentium, æque ac Continuarum tota delitescat in sanguine, alia idcirco nobis, hac de re diversimode sentientibus terenda est via, ut nihilominus, etsi discordes in ratiocinio, fere coincidamus in Praxi. Jamque in hanc rem præsto est quædam *Avicenna*, aliorumque plurium Scriptorum distinctio ipsi quoque *Sydenhamio* accepta, qua uti solebant pro regula practica curandi Febres, insignem aliquam cutaneam eruptionem, v. gr. Variolarum, vel Morbillorum secum ferentes, quas si vere pro *Depurativis* (sic dictis) seu *Perfectivis* habebant, neque sanguinis missionem, neque ullam aliam opus illud inturbare valentem, celebrabant operationem: sed totum negotium committebant Naturæ sanguinis depurationem suo tempore media ejusdem ebullitione maturanti. Si vero *Corruptivas*; talis erat illarum nomenclatura: reputabant ejusmodi Febres, illas totis viribus artis statim aggredi, moderari, ac tandem expugnare conabantur. Hæc eadem itaque sit nobis norma, & distinctio in resolutione allati Problematis; si nempe Febris Intermittens *Depurativa* sanguinis, aliorumve succorum rationabiliter censeatur, ea uti expers periculi, & facile tolerabilis, vel nonnihil diutius, vel etiam omnino sinenda est, vel vulgaribus tantum remediis, cum circumspectione tamen, tractanda. At si ejusdem sanguinis, vel visceris alicujus læsiva, ac veluti *Corruptiva* videatur, tunc ab ipso exordio per Corticem suppressi poterit.

Pro hujusmodi autem distinctionis ulteriori explicatione, & practica utriusque casus dignotione, huc iterum revocanda sunt in gratiam Tyronum, quæ de Febribus adnotavimus Capite præcedenti: ex duobus siquidem, vel tribus Theorematis generalibus ibidem

*Torti Therap. Spec.*

relatis tota pendet solutio Problematis; & varia, rationalisque administratio remedii.

Suppono itaque ex jam dictis, Febres tam Continuas ( eas saltem, quas putridas appellarunt Antiqui ) quam Intermittentes in hoc convenire, quod illarum scena intra sanguinem peragatur: idque vel perpetuo, vel saltem ut plurimum, ob rei alicujus non exacte miscibilis, aut in probum cruorem convertibilis, copia vero, aut activitate supra modum luxuriantis, heterogeneitatem. Suppono pariter, easdem Continuas, & Intermittentes in eo ipso, in quo diximus convenire, ab invicem discriminari per hoc, quod illud incongruum, nec probe miscibile, quod Continuas parit, illarumque Fermentum appellari potest, sit aliquid ipsum sanguinem integraliter constituens cum ipso specie cruoris assidue, licet forte imperfectius circulum agens, & cum Chylo, lymphæ, aere &c. longo temporis tractu insensibiliter aggestum; sed nec unquam post diutinos labores eidem cruori assimilatum, vel assimilabile, neque per repetitas circulationes in naturalibus viscerum Cribris secretum, aut expulsum. Quare facto sensim determinato illius cumulo, qui non amplius a reliqua utili sanguinis massa dilui, ferri, aut abscondi queat, eam necesse est, levi qualibet accedente occasione, insurgere luctam, & intestinam discordiam, quæ Febrilem effervescentiam, aut ebullitionem constituit. Hujusmodi autem effervescentia plurium dierum curriculo pari passu procedens, nec interrupta, sed æquali vicens duratione, unius accessionis adinstar ( aliquam tamen etiam obscuram exacerbationem non excludentis ) vel integram sanguinis depurationem ab intestino inquinamento, vel ejusdem integram pariter conspurcationem, corruptionem, aut inflammatoriam stagnationem asciscit, unde dispar exitus aut salutis, aut mortis.

Intermittentium vero Fermentum, ut reor, est aliquid, quod sanguini confusum



fusum potius, quam mixtum, eundem cruorem nequaquam vere constituit, neque adhuc in eo specie liquoris assimilabilis delitescit, sed illi accedit omnino ab extrinseco, velut aliquid ab eodem plane diversum, quod periodice aliunde suggeritur, tanquam e Fodina peculiari, a sanguine dissita, ut eandem ebullitionis [ periodicæ tamen, non assiduæ ut supra ] scenam intra ipsum cruorem exerceat. Sed & hic idem succi extranei ingressus in sanguinem, seu illius intra istum confusio dupliciter potest contingere, nempe, vel quatenus intra breve temporis intervallum [ quantum videlicet intercedit inter unum & alterum paroxysmum ] succus huiusmodi paulatim congeratur, & intra idem intermissionis tempus sensim ad turgentiam, mox & effervescentiam pertingat, vel quatenus affatim, & unico appulsu [ successive tamen ad breve aliquot temporis spatium continuato ] cruorem invadat, illumque statim perturbet, ac in febrilem effervescentiam cieat. Circa hoc haud diffiteor, quod licet primo modo facilius reddatur propositæ quæstionis solutio, & explicatio actionis Corticis non tam in correctionem succi vitiosi affluentis, quam in subsidium, & adjumentum cruoris recipientis; secundus tamen modus, ut jam diximus, magis arridet, tanquam phænomenis Intermittentium omnibus, præcipue vero quæ in invasione contingunt, explanandis, magis consentaneus.

Crediderim itaque haud improbabili-  
liter, in exordio paroxysmi Februm Intermittentium succum febriferum Lacteas statim Venas, sive omnes, sive secundi tantum ordinis, undelibet ille iisdem accesserit, pervadere, eo quidem pacto, quo Chylus per easdem delabitur: in quo itinere mirum non est, si peregrinus humor ille easdem excitet turbas angoris stomachi, vomitus, & alvi fluxus, quas etiam excitare solet Chylus ipse ex re aliqua prava, ne dicam venenata, aut confectus, aut saltem infectus, ut proinde analogia qua-

dam venenosus quoque aliquando dici possit succus ille Chyli venenosi vi-  
ces quodammodo gerens, ut alibi dicemus. Quo forsitan nomine excusandus foret alias citatus *Mortonus*, si Venenum suum Febrile hoc pacto intelligeret, sed revera se aliter explicare videtur. Ad ipsum vero cruorem jam jam pertingens in axillari latex antedictus, a scaturigine sua fervidiore longe dimotus, non modo ratione naturæ suæ, tunc cum sanguine non sociabilis, sed forsitan ratione suæ actualis frigiditatis (respective scilicet ad naturalem fervorem sanguinis ob partium heterogeneitatem assidue fermentescentis) facile est intelligere, quo pacto postquam rigorem, & horrorem excitavit in regione Lumbari, in Dorso, & Scapulis, utpote locis, per quæ excurrunt lacteæ insigniores, & Canalis ipse Thoracicus tali tunc succo scatens, facile inquam est intelligere, quo pacto idem Febrilis latex sanguinem ipsum, cui pleno gurgite infunditur, quodammodo frigefaciat, saltem usquequo moram trahit citra Cor, intra Axillarem & Cavam, suumque illi motum tam fermentativum, quam circularem interturbet, ac ad tempus retardet. Indicio sunt pulsus arteriarum depressus, ac ferme abolitus, extremorum perfrigeratio, labia pallida, facies universa insigniter immutata, & huiusmodi. Sed & conjecturam hanc auger vulgata liquorum artificialium in Vasa sanguifera Viventium Brutorum per Syringam injectio, ex qua eadem suboriri symptomata, cuique obvium est experiri. Tandiu autem durat hæc Scena, quandiu durat extranei succi intra cruorem ingressus: quo absoluto, ac subinde acquisita ab eodem Succo intra utrumque successive Cordis sinum intimiori quadam cum sanguine commixtione, majorique calore, ac ad effervesendum dispositione, factaque idcirco primum tumultuaria utriusque succi confusione, mox lucta, sensim quod intrusum est, ab ipso præpollente sanguine quodam quasi attritu comminuitur. Demum suscitata per mechanica-

cam



cam necessitatem cuique sensato sat notam, succi utriusque ebullitione, ordinata subsequitur partium miscibilium societas, & immiscibilium secretio; unde paroxysmus media heterogenei facile separabilis [quippe confusi potius, quam mixti] exclusionem, vel subactionem qualicumque, omnimode solvitur.

In hoc opere vicissitudinario per repetitos novi Succi febrilis accessus exercito, illud Lampadi nostræ vitali, sanguine, velut oleoso pabulo, sustentatæ (si metaphorice saltem, ni physice sic loqui liceat) illud, inquam videtur accidere, quod veræ lucernæ accideret, si per intervalla, & regulato stillicidio supra ellychnium ea parte, quæ oleum inter & flammam mediat, aquæ guttula una, vel altera concideret. Aqua etenim recenter affluens, oleoque intra ellychnium præexistenti confusa, statim ac ad flammam, quæ debet ali (ita cum vulgo potius, quam cum Philosophis loquor, ut expeditius me explicem) pertingit, flammulam eandem subinde languescere cogit, ac prope emori. Sed paullo post resumptis viribus ipsa flamma oleosis particulis adjuncta certamen init, & excitato crepitu tandiu durat lucta, quandiu præpollentes olei particule, illisque inhærentes igneæ, aqueas pessundant, subigunt, ac explodunt.

Hæc collectanea potius hinc inde excerpta, quam mea, seu ex aliorum opinionibus resultantia, & per transennam tantum oculis eruditorum oblata, serio meditantibus, non longe forte distare a probabilitate reperientur. Quidquid tamen sit, ea probare mei nunc instituti non est; Sat erit, si assensum aliquem ab ingenuis assequat in re abscondita, cujus principium verax nos latet. Id solum fidenter audeam proferre, nempe, per istam succi febrilis coacervationem extra sanguinem, & dein subitanam (successivam tamen, ut supra) eidem affusionem, dummodo ea non aliunde repugnet, longe melius explicari, ut modo innuebam, Intermittentium phænomena, quam per lentam, & paulatim factam congestionem intra

ipsum sanguinem, si hæc dicatur absoluta plane ante febres, plenoque acervo in singulas postmodum Accessiones dividendo, sive tempore ipsarum Februm, partitis tantum portionibus, quolibet intervallo repetitis, aut reproductis, non quidem ab extrinseco, sed ab ipso sanguine, velut ex radice, prodeuntibus; Quod pariter mihi dari, si licet, citra probationem peto. Probari autem maxime posset ex ipsa Peruvianæ Corticis actione, quæ impedit precise febriles Intermittentium accessus, antequam fiant, & solas Paroxysmorum sese mutuo excipientium periodicas renovationes, in Febris Subintrantibus, seu per subingressum Continuis, nequaquam vero suffocat ipsam, qua Cortex offertur (si sit inchoata, vel imminens) earundem Intermittentium accessionem, neque tollit Febres essentialiter Continuas, sicut neque illam accidentalem, quæ Continuis per subingressum quandoque superest, sublata periodo, continuitatem. Hæc enim, quæ uni jam sanguini inhæret, non tollitur per Corticem, ut per eum tollitur statim periodus, sed sponte absumitur insensibiliter, inquantum nulla amplius ab extrinseco accedit copia auxiliaria novi Fermenti febrilis, quæ suppetias ferat, utpote per Corticem impedita.

Ex hoc patet, Chinam Chinæ assumptam forsitan relinquere sanguinem in eo statu, in quo eundem reperit, ut dicebamus Capite antecedenti, illique tantum occasionem præbere, ut a materia heterogenea propriis viribus se ipsum expediat, mediante præconcepta effervescentia. Quod quidem opus, ut ab eodem sanguine citra impedimentum peragi possit, ipsa China China occurrit Fermento febrili adventuro, & ne vel influat, vel saltem nonnisi correctum, valide obsistit; atque ita non in Febrem (quæ non corrigitur facta, sed præcavetur ne fiat) neque in sanguinem directe agit, sed in solam causam Febris aliunde illuc tendentem. Et hæc observatio non est parvi momenti in pra-



xi; siquidem ducit nos in cognitionem, quod symptomata Febrilia, quantumvis gravia, dummodo ab iisdem Febribus producta, atque pendentia, nullo indigent post sublatas Febres directo remedio; sed sufficit, ut per Corticem pugnemus adhuc adversus causam Febrilem, ut eadem certius avertantur Febres, a quibus produci solent, atque foveri talia symptomata, contra quæ cæteroqui, quoties pendeant ab alio vitio sanguinis non periodice febrili, vel facta sint idiopathica, nil valet Cortex.

Istæ, & aliæ non abssimiles observationes practicæ me trahunt in sententiam, quod huiusmodi remedium parum agat in sanguinem, repurgando illum a febrili miasmate præconcepto, aut eundem firmando contra miasma sensim accessurum intermissionis tempore; sed potius agat immediate in ipsum Fermentum febrile, priusquam sanguini immisceatur: sive postea illius influxum dicatur avertere, aut quomodolibet impedire, sive illud (influxu non impedito, ut probabilius videtur) corrigere, ac emendare. Quod dictum intelligo, etiamsi fermentum non modo in primis viis stabuletur, vel ad eas quomodolibet pertingat, verum etiam si degat in glandulis remotis, & in ipso corporis habitu, quo dubio procul China China, ejusve tinctura, a fluidis nostris extracta potest pertingere, tanquam ad Mineram, prætergrediendo sanguinem, atque intra illum transitorie vagando, altius tendens, si altior sit Minera fermenti: prætergrediendo, inquam, ipsum sanguinem habentem in se (si quidem in se tunc habeat) miasmata febrilia disgregata, & dispersa tantum, atque confusa, agendo vero contactu immediato in nudum fermentum, ubicumque illud lateat. Intra istas conjecturas lubens subsisto, nec ulterius transcendere suppetit animus, easque expono uti tantum probabiles: neque tamen ullam ipsarum adopto.

Sed si res ita se habet, dicet quispiam, allata nuper distinctio Februm

Intermittentium in *Depuratorias* & *Corruptivas* (in cujus distinctionis gratiam cuncta hæc fuere præmissa) corrumpit omnino; siquidem nunquam ut depurativa cruoris considerari poterit ulla Febris Intermittens, quæ suum Focum non habet in Sanguine: neque is proinde dici poterit unquam peccare, nisi quatenus periodice conspurcatur a succo febrili, a quo cæteroqui per se ipsum immunis est: adeoque Febris Intermittens semper erit Corruptiva, nunquam vero Depurativa sanguinis, nisi ex suppositione, quod eadem ipsum antecederet infecerit. Quapropter una corrumpet ipsa Praxis ex adducta distinctione resultans, quo ad usum Peruviani Corticis, qui proinde nulla potius interposita mora, ut sentiunt Auctores quamplurimi, statim ab initio præscribendus erit, prohibendo scilicet, quam primum fieri potest, ne sanguis inficiatur. Vanum est enim velle illum, qui per se purus est, depurari per Febrem; quod idem est ac expectare, quod impurus fiat, ut postmodum depuretur.

Si hoc ductus ratiocinio controversam exhibitionem Corticis in principio Intermittentium benigniorum indiscriminatim suaderem, non aliud profecto agerem, nisi quod ante me Gravissimi Scriptores egere, & quod Practici Celeberrimi adhuc agunt, & agi debere non sine solida ratione contendunt: potest enim revera bene fieri utrumque, etsi forsan non æque bene. Quia tamen ego in hac materia forte sum delicatior, & cautior, ac sibi quispiam persuadeat, ideo non tam facile, ut vulgo creditur, in hanc sententiam delabor. Dico itaque, sanguinem vere in Intermittentibus per se non peccare, nec, quantum est ex hoc Capite, depuratione indigere, cum se habeat mere passive, ad recipiendam conspurcationem ab extrinseco. Adhuc ramen, si non indiget depurari sanguis, indiget depurari Corpus universum a vitioso succo sanguinem inficiente, vel indiget idem succus depurari ab iis, quæ præternaturaliter ipsum alterant, inficiunt,



ciunt, & vitiosum, seu stagnantem reddunt. Cum autem experientia constet, raro per naturales, & fere nunquam per artificiales evacuationes ante ipsam Corticis oblationem in principio institutas, Corpus a tali succo, seu Fermento febrili radicitus expurgari: insuper, cum talis succi congrua alteratio, correctio, vel purificatio per Chinam Chinæ quomodolibet obtenta (detur semper locus veritati, maxime vero cum agitur de hominum vita) relinquat nos incertos de modo genuino, quo ejusmodi attemperationem consequamur, spectata quoque incertitudine opinionum circa ipsas Intermittentium Causas, quæ opiniones omnes, & singulæ, non plus quam par sit faciendæ sunt in praxi, cum securitate semper ubicumque liceat instituenda: propterea non sine aliqua præmeditatione, aut limitatione decernendus est in principio hujusmodi Febrium usus Corticis, ne forsitan supra explicatam depurationem aliquo modo impediat, aut remoretur, eamve saltem nimis imbecilliter præstet. Adde, quod cum Febrifugum istum, etsi optimum inter cætera, totam tamen radicem, vel scaturiginem haud semper perfecte tollat, aut attingat (quod crebriores Recidivæ oblationi præmaturæ Corticis, ubi causa Febrium valida sit, pertinaciter succedentes nonnumquam videntur restari) nec alius proinde suppetat modus succum illum certo absumendi, vel corrigendi, quam sinere, ut partitis vicibus, atque portionibus transferatur in sanguinem, ut ibidem ope Febrilis effervescentiæ, partim assimiletur cruori [si sit quid capax] partim vero, vel etiam in totum [si quidem sit quid omnino dissymbolum] foras eliminetur: idcirco etiam pro supprimendis universaliter hisce Febribus in earundem principio per præcocem Corticis oblationem, haud ita facile, aut indiscriminatim calculum meum appono.

Sed & alia circa hoc ipsum adhuc occurrunt animadversione digna, priusquam propositum quæsitum integre re-

solvatur. Nam ex una parte, non modo ex cursu Febrium aliquandiu sibi relicto, nec statim præpedito, id commodum sequitur, quod hac via per repetitas succi febrilis asportationes in sanguinem, & per repetitas pariter utriusque laticis ebullitiones idem succus secundum partem saltem vitiatam per vires sensim absumatur, unde spontanea plerumque Intermittentium solutio; sed hac eadem occasione potest insuper contingere, quod idem sanguis aliis ingentis impuritatibus scatens, licet nondum lædentibus, media effervescentia febrili iisdem quoque paulatim repurgetur, atque hoc etiam nomine Febrem sinere tantisper expediat, nec statim suppressere. Ex alia vero parte potest æque contingere, quod idem sanguis, per se forsitan non bene dispositus, ab influente insuper vitioso succo ultro inficiatur, ac labem majorem contrahat, impotens eo magis hostem advenientem integre superare. Sive potest contingere, quod, etsi sit probe dispositus, ab energia tamen, copia, vel pravitate succi affluentis adeo obruatur, ut nequeat ab eodem se penitus expedire, sed aliquid subinde non subactum remaneat, quod vel accessiones protrahere, vel Febrem continuam inducere sit potis. Sive denique contingere potest, quod, licet benignioris naturæ, faciliorisque subactionis sit succus febrilis, sanguis item sat validæ constitutionis ad ipsum subigendum; adhuc tamen, si diutius protrahatur Febrium duratio, tandem idem cruor per crebras, & diutinas deflagrationes paulatim enervetur, ac vappidus fiat: unde, vel eodem in Visceribus minus volatilisato gignantur obstructions, vel in minora ipsa febrili facilior reddatur novi succi morbofi generatio, ejusdemque (facta scilicet circulari noxa) pro nova semper periodi repetitione proventus. Atque ita pro diversa habitudine tum cruoris, tum extranei fermenti, Febris Intermittens modo Depurativa dici poterit, modo Corruptiva. Quod maxime verum reperitur in praxi; quandoquidem non raro Intermittentes diuturnæ, velut



velut ignis Naturæ purgator [ ut aiebat *Hoffmannus* ) a pluribus aliis morbis sanant, & ad longum tempus ab iisdem præcavent: ut ideo quandoque sit optabilis huiusmodi occasio, quæ cujuscumque quasi lixivii loco sordes omnes universaliter abluat, quas nulla forsan medica prophylaxis valeret abluere. Nonnunquam vero ex opposito eadem Intermitteutes, puta Quartanæ, vel etiam Tertianæ longiores sanguinem adeo, & viscera infarciunt, ac lædunt, ut ex earum vel diuturnitate, vel pravitate, pravus item habitus, cachexia, aut hydrops haud infrequenter suboritur.

Quamobrem, ut totum tandem negotium ad praxim contraham, ea Febris Intermitteutes Depuratoria censenda erit, ordine habito tam ad universum Corpus, quam ad ipsum cruorem, saltem data occasione, ac eo, quo explicuimus modo, quæ tantumdem succi febrilis qualibet accessione maturat, & expellit, quantum fuit introductum in sanguinem, nullis pravis resistentibus ejusdem reliquiis; immo aliis, si quæ inibi præextiterint, cum eodem depulsis. Itaque in tali Febre genuina sit necesse est, & plane inculpabilis intermissio, vividus Naturæ vigor, & facilis symptomatum tolerantia: eademque symptomata, etiam si alicujus sint intensio- nis, non tamen modum excedant, habito respectu morbi, temporis particularis ejusdem ( alia siquidem debet esse intensio symptomatum in principio, alia in augmento, & statu ) subjecti ægro- tantis, regionis, & tempestatis. Item sint vel signa, vel saltem rudimenta co- ctionis, excretiones moderatæ, & congruæ, morbo itidem respondentes, alia- que Practicis sufficienter nota. Et in tali casu, licet Chinæ Chinæ usum non improbem, immo forte proficuum fore minime inficiet, attamen tutior mihi videtur via usu illius aliquantisper super- sedere, tum ob rationes superius alla- tas, tum etiam quia, si quando ex sup- pressionem Februm vix inchoatarum con- tingat, aliquam Fermenti febrilis reli- quiam in suo foco non integre extinguere,

sitque inde possibilis [ quod incertum est adhuc ] alicujus alterius morbi gene- ratio, in quem commutentur Febres præmature suppressæ ( quemadmodum ex intempestiva suppressione Scabiei nonnunquam depurativæ, Ulceris antiqui, Fistulæ, Fonticuli &c. gravior quando- que pullulat morbus ) satius fuisset, il- las prius tulisse paulisper, in nullum tutiorem morbum commutabiles, vel eas vulgari tantum, cauta tamen, & prudenti methodo tractasse, vel denique ipsi Naturæ industriosæ morborum me- dicatrici prorsus curandas reliquisse. Industriosam morborum medicatricem cum *Hippocrate* Naturam voco; sed propterea nollem ( & hoc semel monuisse sufficiat ) Naturæ nomine intelligi quandam veluti Rectricem imagina- riam, quæ corpus architectonice guber- net, sed mechanicam ipsam nostri cor- poris dispositionem a summo Opifice conditam, cum Solidorum, & Fluidorum vicissitudinario ad invicem motu reciprocantium proportionem tali, ut ea mediante ( anima vero immortalis emi- nenter agente ) motiones omnes, co- ctiones, secretiones, excretiones &c. organis Hydraulico-pneumaticis, aliis- que ad regulas præsertim staticas, absol- vantur.

Corruptiva vero dicenda erit ea Inter- mittens, quæ opposito modo se habebit, ac supra descripsimus: videlicet, quæ succum febrilem haud integra subigit, aut expellit, sed potius eidem alias ad- jungit a se ipsa commotas impuritates, cujusque ideo symptomata graviora sunt, quam par sit pro ratione morbi, cæte- roqui cum facilitate, & utilitate solu- bilis. Quod quidem ex duplici capite potest procedere, nempe vel ex pravi- tate quadam Causæ febrilis, vel ex ipsarum Februm nimia diuturnitate. In primo casu vitium rursus se potest tene- re, vel principaliter ex parte Succi fe- brilis, sive copia, sive qualitate, sive inæquali, & irregulari [ etiam intra ean- dem accessionem ] influxu peccantis, vel minus principaliter ex parte ipsius Sanguinis antea etiam male dispositi, vel



vel ex parte utriusque. Quomodocumque autem hæc fiant, quæ pluribus sane modis fieri posse videntur, certum est saltem, hinc emergere identidem suspectam paroxysmorum extensionem, quæ ad continuitatem gradum facit, pariterque accessionum inæqualitatem, immodicam intensiorem, irregularemque in ipsa accessionis declinatione, nedum in principio, recrudescentiam: item sæpenumero emergere symptomata gravia, ut stagnationes fluidorum intra viscera, deliria, comatosos affectus, & huiusmodi, quæ adhuc magis metuenda sunt, si cum signis cruditatis appareant. In secundo vero casu vitium fere omne se tenere videtur ex parte ipsarum Februm, quæ licet benignæ sint, in symptomatis moderatæ, & a miti causa (contumaci tamen) pendentes, tantam nihilominus sortiuntur longitudinem durationis, ut sanguis ex toties repetita effervescentia, & ut ita dicam, lucta defatigatus, exhaustus, ac spiritibus depauperatus, tum piger in circulo, tum torpidus in fermentatione, tum refractarius in secretionibus, tum viscidus alicubi, tum alicubi serosior, & fibrarum inops evadat; indeque mille trahat morborum semina, nisi aliquæ saltem eidem impetrentur induciæ, ut tantisper resurgat, fortius dein, si opus sit, pugnaturus. Et in utroque casu, quolibet corruptivæ Intermittentis tempore (ipso non excluso, ubi hæc possint coire, morbi principio) expedit Corticem exhibere, & Febrem suppressere modis omnibus, & formulis luculenter jam recensitis.

Quia vero & in hoc aliquis potest utiliter haberi delectus, e re fore putarim, si præ sola Februm diuturnitate præscribenda sit China Chinæ (& hoc sit ultra Quæsitum de oblatione in principio) eam epicraticæ, ac imminuta dosi propinare, ut scilicet vel in hoc imitemur Naturam, lento quodam gradu in eodem opere pro viribus absolvendo procedentem. Si vero præ gravitate symptomatum sit usurpanda, id fiat magis viriliter, ea scilicet proportionem, quæ

ipsi exigentiæ respondeat, quemadmodum sumus dicturi tum alibi, tum maxime *Capite 5. Libri 4.*, ubi Quæstionem eandem de ancipiti oblatione Corticis in *principio quarundam Intermittentium Perniciosarum* potiore jure instituemus. Prout enim citius, vel tardius opus est Febres suppressere, plus etiam, vel minus Corticis est offerendum, idque crebrius repetendum, vel rarius: quandoquidem in nostra omnino potestate est Febrem sistere eo præcise, quo volumus tempore, si in Cortice exhibendo simus versati, dummodo congruens detur, breve licet, temporis spatium, ut fusius pariter alibi dicturi sumus. Fateor equidem, quod cum character Febris Corruptivæ supra descriptus raro benignis Intermittentibus accidat, vel possit accidere in illarum principiis, quoniam neque diuturnitas combinari potest, ut patet, cum illarum principio, neque pariter cum eo ferocia symptomatum, ut quæ in Intermittentibus non Perniciosis nonnisi post plures periodos potest apparere, tollentes jam rationem principii ab iisdem Intermittentibus, si Quartanam excipias, cujus principium videlicet late satis extensum huiusmodi characteris est capax: fateor, inquam, quod penes me vix locum habere solet in earundem *Intermittentium benignarum principio* Chinæ Chinæ usus. Immo ultro lubens edico (licet tanta, tantisque rationibus de virtute, ac præstantia ejusdem hucusque prædicaverim) me fere nunquam in illis etsi diuturnioribus consuevisse Corticem exhibere, nisi vel supervenientia gravia symptomata, vel Ægrorum tædio affectorum preces me cogant. Mihi namque sollemne est, saltem per totum Ver, & per primam Æstatem [quibus tempestatibus benigniores ut plurimum sunt, & *depurativæ*, etiam cum diuturniores sunt Febres] quasi perpetuo ferari ab exhibitione ejusdem Corticis, quem in usus longe digniores ampla manu profusus reservo.

Neque etiam diffiteor, esse quandoque, rarissime licet, qualdam pervicaces



ces Intermittentes, quibus curandis præsertim ab initio sit impar Cortex, quibusque alia idcirco medela conveniat. In iis etenim, etsi Fermentum febrile per Corticem copiose, vel diutius assumptum absorbeatur, remanere tamen potest in Visceribus ferax, & fixa radix assidue reproductiva novi fermenti consimilis, vel materiæ illius saltem remota, quæ potius Toti prospiciendum esse suadeat per alia remedia, quam ipsi Fermento per sola febrifuga. Memini siquidem, me observasse nonnunquam Febres hujusmodi Intermittentes benignas, adeo refractarias, ut ea facilitate, qua pluries redibant ante usum Corticis, eadem quoque recurrerent, etiam dum actu ille ad prophylaxim assumebatur, etsi ope illius fuerint antea pluries depulsæ. Hujusce naturæ fuit Tertianam modo simplex, modo duplex, quæ Nobilem Virum, Patritiumque Lucensem, Præfectum Aulæ Sereniss. Principum Mutinæ, *Dominum Marchionem Nicolaum Luchesium* corripuit. Hic an. 1709. dum Corrigii decumberet, cujus Urbis Gubernatoris munere tuncungebatur, circa morbi initia (nec tamen prima) morem, ut inquit, Patriæ suæ securus, Corticem sumpsit suo Marte, vix conscio Medico. Sed postmodum tota Æstate, Autumnoque anni illius, mox Hyeme, ac Vere anni subsequents forsanduo decies recidit, duos identidem, vel tres, quatuor, vel quinque Tertianæ pariter nunc simplicis, nunc duplicis paroxysmos patiens: ad nihilum valente, pro impedienda Recidiva, repetita Soli mutatione, vel diuturno usu Corticis, modo meo, modo aliorum Medicorum consilio, modo proprio Marte, modo Amicorum suasu, & quidem diversis formulis, ac Methodis etiam Transalpinis, assumpti; qui tamen Cortex pro iisdem Febribus qualibet vice ablegandis consuetum munus egregie præstabat. Sed & sponte quoque pluries abiit Febris, abiitque pariter aliis sine Cortice curata remediis; redibattamen æque sponte soluta, ac aliis remediis; depulsa. Et sicuti Cortex ad præserva-

tionem assumptus eam minime arcebat, ita nec cæteræ prophylaxes sedulo institutæ illam remorabantur tantillum, si ve sermo sit de Purgantibus epicraticis, si ve de deobstruentibus, atque omnifariam alterantibus Remediis, si ve etiam de iis, quæ loco Febrifugorum habentur.

Licet autem hæc monstra raro contingant, neque rarius contingere soleant ubi Febres absque Cortice curatæ sunt, nihilominus me quodammodo retrahunt, efficiuntque quo minus Febres istas, ubi nulla suadeat necessitas, vel notabilis earum diuturnitas, per hujusmodi remedium curare aggrediar. Unde subit mirari, quomodo Obrectatorum Corticis adeo me tangat magistralis Scurica, ut non semel contigerit, quosdam Ægrotantes ab iisdem aliquando deceptos, ne dicam seductos, priusquam se mihi committerent, voluisse mecum pacisci, ne Corticem [quasi in hoc sim nimis] illis unquam præscriberem, mori potius sine illo, quam ope illius sanari, ut aiebant, contenti. Quod sane eo magis ridiculum mihi visum est, quo certior sum, inter Medicos Cortice utentes neminem in Curatione *Benignarum* Intermittentium, quas sæpe pro *Depurativis* habeo, me parcio rem esse, magisve sobrium circa usum illius.

## C A P U T IX.

*An Chinæ Chinæ oblationem præcedere debeat. Purgatio, aut Vena sectio.*

**R**EMANET adhuc alia solvenda quaestio, quæ Scriptorum vota divisit, an scilicet quocumque Febris Intermittentis tempore offeratur Cortex, debeat prius Corpus purgari.

Si hac quoque vice vellemus, ut maximo jure possemus, subscribere *Sydenhamio*, in promptu esset resolutio Problematis, dicendo nempe cum ipso, quod + *Neque Catharsi, multo minus Vena sectione subducenda est materia febrilis*



*brilis pars aliqua, quo liberius Cortex suo fungatur munere: Cum enim [inquit ipse] ab utraque labefactetur quadantenus œconomia Corporis, eo promptius, certiusque recrudescunt Paroxyismi, evanescente semel pulveris vi; quod & paullo inferius confirmat subdens — Quod si Medicamenta purgantia subinde adhibeas [adhiberi scilicet solent eo prætextu, ut obstructiones expellantur, atque humores in primis viis stabulantes exturbentur] vel si, quod præcipuum est, in constitutione epidemica venæ sectio celebretur, fiet, ut morbus in longissimum tempus procurrat, atque interim, ut Ægri mille symptomatis, iisque periculosissimis exponantur — Hæc Sydenham.*

Sed ut illius, aliorumque seposita auctoritate, dicam paucis quod sentio, & mirius agam, quam credar, respondeo, facile esse ex alibi dictis colligere, me quidem a purgantibus in hoc quoque casu parum, vel nihil commodi unquam sperare, immo potius profiteri, si non absolute debere cum *Sydenhamio*, posse saltem præscribi in Intermittentibus Chinam Chinæ non modo impune, sed cum ratione, & cum felici successu, ut sum non semel expertus, cum idoneum tempus adfuerit, nulla purgatione præmissa; nihilominus ex alia parte ad evitandam calumniam, & ad aliquam Corporis expiationem, dummodo cautam, quin & ad meliorem forsan dispositionem pro suscipienda Febrifugatione, posse prius alvum leniri, & venam secari; immo utrumque præsidium de more congruere nequaquam diffitebor, quippe hoc ipsum mihi quoque ferme sollemne est.

Haud equidem tanti facio cautelam istam, quin sæpesæpius vel alterutrum, vel utrumque ex dictis præsidiis æque bene omitti posse sim certus, maxime cum neutrum, & præsertim purgatio, de qua principaliter procedit quæstio, nec ratione Febris, nec ratione causæ indicetur; immo & ratione Febris, si sit plurimum intensa, & ratione causæ, si sit facile agitabilis, potius prohibeatur, eoque fortasse magis, quo-

niam curatio, ut supponimus, est Cortice peragenda: siquidem, ut adnotat *Restaurandus* — *Revera huic medicamento nihil magis repugnat, quam cathartica: quamobrem [subdit] id remedium in usum duxi majori emolumento impurgatis meis Ægris, præmissa solum phlebotomia, injectis clysteribus, exhibitisque iusculis refrigerantibus* — Sed purgationem circumspectam, & levem, quæ sæpius etiam uno, vel altero Clystere injecto [ & quidem tutius ] potest suppleri, non rejicio, quin & admitto; sed solum admitto, inquantum ea exigatur ab aliis peculiaribus corporis ægrotantis dispositionibus, neque ab ipsa Febre prohibeatur; non vero inquantum directe indicetur a Febre, vel a causa immediata ejusdem Febris. Huc forsan respiciens *Hippocrates de Affectionibus* in curatione Tertianæ, & Quartanæ Febris incipientium, non legem imponit de instituenda universaliter ante usum Specificorum sui temporis purgatione, sed conditionaliter loquitur in utroque casu, suadetque pharmacum dari tantummodo — *siquidem Æger impurgatus sinuerit — siquidem videbitur tibi non purgatus esse* — signum evidens, purgationem in prædictis Febribus & absolute, & ante usum Specificorum omitti posse, eamque, ubi opportuna censeatur, solummodo instituendam esse occasione aliarum præexistentium corporis dispositionum, quæ Februm hujusmodi curationem per Antifebrilia absolvendam (ubi vere illæ adfuerint) possent remorari.

Quia tamen non pari semper passu, siue in quibusvis Corporibus, siue in quibusvis Anni temporibus incedendum est, priusquam de eadem purgatione, vel sanguinis missione instituenda specialius judicium feratur, iterum cum *Sydenhamio* distinguere oportet (quod non parvi est in praxi momenti) inter Febres Intermittentes, Vernas, Æstivas, & Autumnales; de Hybernis enim non loquor, quippe quod tali tempestate incipiant fere nullæ, vixque ullæ soleant occurrere, nisi earum aliqua,



aliqua, ut Quartana, Æstate, vel Autumno orta, in Hyemem protrahatur. Alius ergo est status sanguinis, & fluidorum Vere, alius Æstate, & alius Autumno, quemadmodum diversus est status liquoris cuiuspiam, qui fermentatur, qui fervet, & qui defervit. Vere siquidem succi omnes corporis nostri, non secus ac succi Vegetabilium, spiritu turgent per Hyemem compresso, & vivifico. Anni juvenescens, Solisve calore perfusi, quaquaversum alacriter expanduntur, suntque ideo facile in fermentationes depurativas, & utiles secretiones proni. Æstate vero iidem succi nimio fervore acti facile fusiones patiuntur, dissipantur, ac sensibili, & insensibili transpiratione evaporant. Autumno denique ex prægressa Æstatis deflagratione spirituum inopes, & enerves reddit, vappescunt ut Vina, aut acorem contrahunt, unde in lentores, stagnationes, concretiones, atque, his quodammodo oppositas, dissolutiones, ac corruptiones (aucto scilicet ad excessum ipsius concretionis gradu) haud difficulter aguntur.

His stantibus, si pro Febris Intermittentis curatione Verno tempore China Chinæ uti contingat (raro tamen tunc ob Februm brevitate, facilemque earum solutionem huiusmodi occasio solet contingere) suavis sum, ut tali tempestate, quæ Hippocrati quoque præinstituta, ubi conveniat, purgatione, & Venæ sectione, videtur accommoda, levis aliqua præmittatur corporis expiatio, & concurrente vel modica plenitudine, ætate congrua &c. etiam sanguinis missio. Neque vere obstat usui circumspexto Solventium ante oblationem Chinæ Chinæ ea, quæ inter hanc, & illa intercedit dissymboleitas supra allata ex *Restaurando*, & propterea ut fatear, non æque cavendum ab iisdem Solventibus ante, ac post exhibitum Corticem: quandoquidem in primo casu non impeditur, ut usus satis me docuit, futura illius actio, sicuti in secundo deletur prægressa. Sint tamen ex usu ad maiorem cautelam Sol-

ventia tantum mitiora, v. gr. Cassia sola ad *unciam* circiter, vel cum *drachma una*, aut altera Cremoris Tartari admixta, sive Cremor ipse Tartari ad *unciam* pariter, sive Syrupus aureus ad *uncias tres*, vel *quatuor*, cui superbibatur serum lactis, vel aqua Nuceria ad *libras tres*, vel *quatuor*, sive aliud simile diluens, & sine ulla quantum fieri potest irritatione alvum leniens medicamentum.

Si autem China Chinæ utendum sit Æstivo tempore, tunc in purgandis Corporibus, & sanguine mittendo cautius est incedendum; siquidem cum alvus tunc temporis soleat ut plurimum esse lubrica, bile scilicet magis fluxili, & validius illam vellicante, sat erit pro eadem alvo abluenda potius, quam sollicitanda, Serum Lactis simpliciter ad libras aliquot absque ullo, vel saltem cum levissimo vehiculo (puta paucio Cremore Tartari) propinare, vel Oleum amygdalarum dulcium sine igne recenter expressum, & tantillo juris dilutum, ad *uncias quatuor* circiter, maxime si notabilis succorum acrimonia Ventriculi, & Intestinorum tunicas vellicet, cum inani, & sicca, vel etiam humida vomitione. Phlebotomia pariter, vel parca sit, vel etiam omittatur, diebus præsertim canicularibus, nisi fervor quidam sanguinis, ejusve quasi turgentia, Æras vegeta, plenus habitus, & vasorum distensio id plane suadeant; experientia etenim clare comperimus, sæpe tali tempestate, eadem ipsa phlebotomiæ, aut purgationis die, febrem ex simplici duplicem fieri, quod tamen etiam haud raro sponte contingere, etsi nil tale Medicus præscripserit, nequaquam inficiabor.

Denique, si Autumno pro curatione Intermittentium, præscribendus sit Peruvianus Cortex [minori, generaliter loquendo, adhibita religione in purgando, quam in sanguine mittendo, præsertim si Febris curanda Quartana fuerit, quarum Februm feracior est illa tempestas] ipsum Cremorem Tartari ad *unciam unam*, vel Electuarium lenitivum,



vum, vel Cassiam, eadem dosi [admixto etiam, si lubeat, tantillo Rhabarbari] vel quid antedictis analogum, pro alvo lenienda, ex usu esse posse censuerim, superepoto juris potius tenuioris, vel hordeacei, si aeris temperies ad frigidiores inclinaret, quam Seri, largiore haustu. Sanguinis vero missionem parca semper manu, & nonnisi validis suadentibus indicationibus [quæ in Intermittentibus tunc maxime vix possunt adesse, nisi ingravescant symptomata] esse instituendam, ex jam descripta ipsius sanguinis diathesi videtur satis constare.

Exinde patet, quod quo minor est Februm, atque Symptomatum intensio, eo liberalior esse potest Solventium moderatorum usus; & contra parcius, quo major est & Februm, & Symptomatum vigor. Hinc in febribus Lentis, & Chronicis, vel ad Chronicas saltem tendentibus (Intermittentibus tamen) tutior censenda est levis purgatio, etiam epicraticè instituta, ante oblationem Corticis, quam in aliis nonnihil fortioribus, in quibus, ut dictum est, pro ratione majoris, aut minoris intensio- nis ipsarum, nec non Symptomatum earundem, plus vel minus indulgendum est purgationi ab aliis casuum singularium circumstantiis indicatæ, dummodo Febris ipsa intensa nimis non omnino prohibeat; quo casu prorsus est abstinendum ab omni Solvente, & tota Intestinorum expiatio Clysteribus absol- vendæ.

Neque inconsulte conditionem istam rursus apposui in usu Solventium, nempe illa posse adhiberi, si ab aliis circumstantiis exigantur, nec prohibeantur a Febre. Præter enim id, quod pluries terigimus, & præter noxam, quam sua- pte natura certo scimus semper inferre Purgantia etiam mitiora, nisi summa eum cautione usurpentur (non hic lo- quor de morbis acutis, in quibus Ca- ne pejus, & Angue vitanda esse, cla- mat Auctoritas, Ratio, & Experien- tia) præter, inquam, hæc, & alia in- numera, quæ hujus loci non sunt, pos-

sum testari fortuito quidem experimen- to, sed non fortuita animadversione, me Æstate, & Autumno Anni speciali- ter 1707. peculiari solertia in id totum fuisse, ut observarem quid præstarent in Intermittentibus, quatum ferax fuit annus ille, evacuationes tum sponta- neæ, tum artificiales. Id quod sine ullo Ægrotantium discrimine licuit experi- ri, cum magna pars eorum ab aliis pri- mitus Medicis curaretur, ut Cortici aversis, ita purgationi facile indulgen- tibus: pars alia, etsi mihi uni commis- sa, illum potare renuerit: & alia deni- que me parum proclivem ad eum præ- scribendum invenerit. Istis autem Ægro- tantibus vel sine Cortice, vel eo solum tardius assumpto curatis, cum plurimæ, etiam sponte sua, obtingerint dejectio- nes, hac arrepta occasione potui melius memetipsum examinare, num ex vi ali- cujus præjudicatæ opinionis, plus quam par esset, a Solventium usu distraherer. Ut rem paucis perstringam, & Caput claudam, aliquem tantummodo casum subnectam obiter.

I. Domina *Barbara Cattanea*, Sere- nissimæ Ducissæ Mutinæ gloriosæ re- cordationis Cubicularia primaria, du- plici Tertiana laborabat circa initia sua satis forti. Hanc cum Doctissimus Ami- cus, atque Collega, Serenissimique pa- riter Ducis Medicus, *D. Davinius*, & Ego insimul curaremus, eamque a prin- cipio ad finem morbi assumptioni Chi- næ Chinæ, ut pluries [modeste qui- dem] edixit, repugnantem agnoscere- mus, ab illius propterea oblatione toto morbi decursu abstinuimus. Riguit il- la, sudavit, & alit, ac præterea [quod unice notari velim] contumaci, copio- saque diarrhæa spontanea ad plures heb- domadas vexata fuit. Febris tamen, vix moderato primorum accessuum impetu, usque perseverabat. Suppressa est diar- rhæa; at Febris nihilominus pari passu processit. Rediit denuo eadem diarrhæa ad tempus non breve; Febris vero in- terim adhuc eadem. Iterum diarrhæa suppressa est omnino, & Febris minime immutata: nil proficientibus videlicet repe-



reperitis Venæ sectionibus, nec jusculis alterantibus, nec Febrifugis amaris vulgaribus, nec aliis quibuscumque remediis, quorum enumeratio nimia hîc esset. Tandem cum Febris videretur declinationi propinquior, remissa scilicet vi, sed perseverante jugiter contumacia, præscriptum est a Collega [ neque enim semper conveniebamus ] Apozema solvens ad plures dies, Ægra, ut reor, instante, meque mox non dissentiente, quippe qui Doctissimo Collegæ potius, quam mihi fidens, posse credidi ad istius quoque experimenti incudem soliditatem meæ opinionis examinari. Sed cum exinde potius augeri Febrem, quam imminui dignosceremus, dimisso Apozemate, curationem Naturæ commisimus, & Tempori. Revera a solo tempore emerfit medela morbi. Febris namque prima die Septembris orta, omnibus evacuationibus irritis, ultra Brumale Solstitium perseveravit, tandemque sponte, ac post feriatiorem omnimodam a remediis paulatim evanuit.

II. *Monialis quadam Carmelita Excalceata*, habitus gracilioris, valetudinaria, & Tertianis æstivis obnoxia eodem pariter anno ex simplici Tertiana decubuit. Quadam intermissionis die Serum Vaccinum depuratum ad libras aliquot bibendum præscripsi: ex quo tot biliosæ dejectiones cum tolerantia subsequutæ sunt, ut idem remedium altera intermissionis die propinare non dubitaverim. Dejectiones adhuc plures, & faciles; idemque contigit aliis vicibus, repetito Sero. Febris de Tertiana simplici facta est duplex; sed accessiones mitiores ambæ, ac veluti ex divisione unius fortioris resultantes. Alternis idcirco diebus [ de aliis remediis nullam mentionem facio, cum non sit opus ] idem Serum offero, & semper eum pari successu dejectionum copiosarum, summe biliosarum, spumosarum, & facile excretarum; Febres tamen semper æquales. Substiti ab usu Sero ad aliquod tempus; sed Febres non substitere. Cum vero alvus non flueret, Serum rursus, Ægra poscente, alternis diebus potari

permisi. Sumpsit forsan vigesies toto morbi decursu. Mirum quor, & quanta dejecerit sine fructu. Stupidus fere, eo quod nunquam Serum simplex, ut assollet in progressu, sed semper dejectionibus acerimis ( non tamen plane humoralibus ) infectum redderet, usum illius nihilominus interdixi. Post aliquot dies Febris adeo immutata est, ut prope evanescere visa sit: recruduit tamen paullo post. Iterum ad aliquot dies Serum exhibitum pari exitu. Tandem perseverante pertinaciter Febre, dimissis evacuationibus, Peruviano Cortice particulatim assumpto, eodemque in recidiva, quæ post mensem contigit, repetito, curata est.

III. Unus ex tenerioribus Ephœbis Sereniss. Ducis nostri *D. Marchio Joachimus Salviati* Florentinus, simplici Tertiana Intermittente correptus, materiam porraceam plane humoralem, olei adinstar, adeo copiose per vomitum excernebat ( respondente paullo post non absimiliter alvo ) ut vix credibile videatur, habita ætatis ratione; vomitus siquidem solus quatuor librarum pondus facile superabat. Perseveravit sic per plures accessiones Febris semper intensa, sed plane intermittens, & copioso semper sudore soluta. Tractu temporis imminutæ sunt excretiones, sed durantibus Febribus per artem sunt evocatæ. Exhibitum scilicet est aliquoties Oleum Amygdalarum, Serum Vaccinum modo simplex, modo Syr. ros. aur. associatum, unde faciles, & copiosæ dejectiones, sed irritæ. Post mensem Febris dedit inducias; at paullo post revixit ferox, ut prius iisdemque copiosis comitata vomitibus. Iterum purgatus est Æger, præscriptaque sunt, præter Juscula alterantia [ non omissa suo tempore Venæ sectione ] salia etiam Vegetabilium Febrifugorum, quoniam Æger ob saporem Corticis ingratum erat ei omnimode adversus, quidquid ex Patria sua identidem audiret adversus repugnantiam hanc puerilem. Procebat nihilominus Febris, institutæque insuper per repetitam Rhabbari infusionem epicraticæ purgationi ne-



ni nequaquam cedebat. Uno verbo, se-  
pries saltem recidit, semperque graviter,  
Febre modo simplicis, modo duplicis  
Tertianæ typum servante: & sæpe sæpius  
cum videretur imminui tam quoad in-  
tensionem, quam quoad extensionem, sta-  
tim nulla occasione recrudescebat fero-  
cior, & primis perpetuo conjuncta vo-  
mitibus. Post duos tandem menses cæ-  
pit Æger tædio victus, nec ullis suble-  
vatus evacuationibus, Corticem assume-  
re per modum alterantis cum levamine  
notabili, sed non prout expectaveram.  
Aucta est idcirco nonnihil dosis Corti-  
cis; sed eodem pariter tempore aucta est  
Febris, ut consueverat statim ac cæpe-  
rat imminui. Suspiciatus sum de effœta  
substantia Remedii, de cujus infirma  
qualitate aliquod antecedens indicium  
habueram. Eo itaque rejecto, substitu-  
tus est melior Cortex, exhibitusque dosi  
modica tunc, cum Febres incrementum  
suum validius capiebant. Statim uno ictu  
suppressæ sunt, & cum illis symptoma-  
ticæ excretionibus: continuatoque levi-  
ter, ac repetito per aliquot dies remedio  
perfecte sanatus est Æger, unam tan-  
tum post mensem Febrem passus, quæ  
intra horas quadraginta sudore sponte  
soluta nullo ulteriore indiguit Corticis  
auxilio, aliove remediorum apparatu.

IV. *D. Viennam Mellinam*, canoram  
Sculennæ nostri Sirenem, ultra bime-  
stre spatium Tertiana duplici affectam  
nulla purgatio (prout illi spondebat,  
quoties præscriberet, Medicus senior,  
& osor Corticis) unquam sanavit. Hanc  
sine alia evacuatione illico sanavit ob-  
latus Cortex, & recidivam levio-  
rem repetitus sustulit.

V. *Tres filiolos D. Comitæ Sorra* Ter-  
tiana duplici intermittente per æstatem  
correptos, Syrupo de Cichorio cum Rha-  
barbaro quotidie utentes, & quotidie  
pariter copiose alvum exonerantes, ex-  
acta semper victus ratione servata, tu-  
midos tamen, & inflatos per tres men-  
ses, & ultra assidue decumbentes vidi,  
donec Hyemale Solstitium ope ali-  
quam, Vernale vero Æquinoctium [non-  
nisi tamen post plures, ac plures recidi-

*Terti Therap. Spec.*

vas] integram valetudinem attulerit.

VI. Idem omnino *tribus aliis* conti-  
git *filiis D.* quondam *Joseph Galliani*  
*de Coccapanis*, Mutinensis Patritii, quo-  
rum neque Febribus, neque inflationi  
ventris quicquam profuit diuturna, le-  
visque purgatio, sicut nec torminosa,  
quæ uni eorum contigit diarrhæa spon-  
tanea. Hos omnes procul dubio, tran-  
sacta aliquot tantum dierum epicratica  
purgatione, citius, & certius sanasset  
Cortex. At minime solus ipse Curæ in-  
cumbentibus (illos enim majore assidui-  
tate invisebat de more *D. Candrinus*)  
neque in Febribus exitus cæteroqui sa-  
lutaris, neque in subjectis puerilibus fa-  
cile illas ferentibus, magna erat in me  
ipso ad eum proponendum proclivitas.

Plurimos casus haud absumiles Ægro-  
tantium ab aliis præsertim Medicis pur-  
gationi liberalius indulgentibus cura-  
torum, ad quos invisendos accersitus  
fui, quosque nullæ purgationes, sed so-  
lus tandem Cortex liberavit, non affe-  
ram, ne longior sim. Paucos inter tot,  
qui possent adduci, retulisse sufficiat,  
ut quam parum conferant purgationes,  
etiam benignius institutæ, in Intermit-  
tentibus [iis saltem, quibus altiores  
radices sunt] palam fiat: ut ideo parum  
inter sit, etiam si illæ non semper religio-  
se præmittantur oblationi Corticis, præ-  
cipue si non ob morbi diuturnitatem,  
sed ob supervenientiam symptomatum  
[quæ duo in praxi sunt valde distinguen-  
da] offeratur remedium. Sed jam illius  
administrandi sors varia tam in princi-  
pio, quam in progressu vulgatum In-  
termittentium, ad leges scilicet, &  
normam cautionum tum in hoc, tum  
maxime in præcedenti Capite exposita-  
rum, ex sequentibus Historiis clarius ap-  
parebit.



## CAPUT X.

*Doctrina precedens de Cortice modo propinando, & modo non in principiis Intermittentium, variis confirmatur Curationum Historiis.*

**E**TSI ad Februm *Corruptivarum* categoriam revocaverimus eas etiam Intermittentes, quæ sola *diuturnitate* nostri Corporis œconomiam notabiliter pervertunt, earum tamen curationes per Chinam Chinæ feliciter absolutas non lubet referre; cum hujusmodi casuum tanta suppetat copia, ut quilibet Medicus in usu hujusce remedii vel mediocriter versatus centenas facile Historias istius generis possit congerere. Ea propter nonnullas tantummodo in medium proferam, in quibus aliquid occurrat ad rem nostram notatu dignum, quod nimirum respiciat vel oblationem Corticis in Intermittentium benignorum *principiis* vario cum successu administratam, vel eandem usurpatam tantum in illarum *progressu* ob supervenientiam graviorum symptomatum; eorum tamen, quæ remotum solummodo periculum a longe minantur, non quæ proximum, & præcepta afferunt; quandoquidem de hisce postremis specialior suo loco habenda est consideratio. Ut ergo ab iis exordiar Casibus, in quibus præcox contigit exhibitio Corticis, nullo prævio examine, an Febris curanda *Depurativa* fuerit, an *Corruptiva*, progrediendo postmodum ad eos, in quibus Corticis oblatio fuit maturior [Febribus scilicet jam ad *Corruptivas* vergentibus] in promptum sunt qui sequuntur.

I. D. *Flaminia*, Uxor Clarissimi quondam Viri, D. *Nicolai* postea *Comitis de Sanctis*, a Secretis, & Status Consiliarii Sereniss. Ducis nostri, dum Lauretum pergeret, in medio circiter itinere sub die ipsa *Æquinoctii* Autumnalis anni 1704. correpta est simplici *Quartana Intermittente*, adeo quidem levi, ut cum vespertinis tantum horis recurreret *Ægra* somnum placidum tra-

heret per noctem, & mane vegetior surgeret, ac ante morbum: idque sibi perpetuo accidisse quandiu vixit *Quartana*, pluries asseruit. Post paucos dies ab invasione Febris in Patriam redux, in medio pariter itinere, mihi unde illa discesserat proficiscenti occurrens narrat quæ sibi contigerant. Suasor sum, ut bene se regat in itinere, remedia postea, si opus fuerit, administraturus in Patria cum illuc appulerim. His auditis, iter proseguitur: cumque alia de causa Bononiæ per duos, vel tres dies moram trahere cogeretur, jussu vigilantissimi Conjugis eximios aliquot inclyti illius Archilycæi Professores consuluit, qui habito forsan gracilioris constitutionis, ætatisque paululum inclinantis respectu, vi quorum imparem diuturno morbo ferendo fortassis *Ægram* sunt suspicati, Extractum quoddam Chinæ Chinæ (ut mihi relatum fuit) satis blandum, partitis, & parcis dosibus assumendum statim præscribere. Annuit iis libenter amantissimus Conjux, qui mirandas quondam noverat, me præscribente, in lethali ægritudine Filii sui unici Corticis vires: illiusque proinde Extracti sufficientem quantitatem *Ægra* secum detulit Mutinam, ubi cœptum Bononiæ usum prosecuta est cum notabili paroxysmorum imminutione. Mihi interim in Patriam restituto narrantur quæ acta sunt, *Ægra* tamen submurmurante, se quodammodo gravius habere, & quandam veluti majorem lassitudinem percipere post imminutas accessiones, ac antea. Culpatur tamen iter: ast ego subdo, quod libenter illi adstissem, cum Professores Bononienses consuluit, ut nonnullas animadversiones meas circa *Ægræ* statum ex notione rerum jamdudum prægressarum petitas, iisdem minime consciis potuissem exponere, executurus postea quidquid illis placuisset, re clarins intellecta. Dixissem nempe, illam ex gravibus prægressis animi pathematis [occasione præsertim gravissimarum ægritudinum Conjugis, & Filii] etsi nunquam complete ægotantem, valetudinariam tamen



men perpetuo fuisse, ac in Cachexiam, vel pectoris hydropem, quandoque proclivem, suadente id diuturna modica licet pedum, ac tibiæ intumescencia, scabiei cujusdam retrocessione &c., quibus pravis dispositionibus adhuc latentibus in una lance positus, & levibus Quartanæ adeo mitis accessibus in altera, censuissem Viros illos doctissimos, rem totam Naturæ concedituros fuisse, ut ego dubio procul institissem, reservato usu Corticis in casu tantummodo gravioris recrudescentiæ. Ad hæc instabat amantissimus Conjux, progressum remedii suspendi, si mihi de rebus prægressis optime conscio illius usus non arrideret. Huic tamen respondi, me quidem dubitare, an felicior partem elegerint Magni illi Viri; sed non proinde mihi constare de opposito, neque conjecturas meas esse tanti ponderis, ut eorum placita infirmare valerent: meque solum optasse, posse illas tunc iisdem exponere, esto forte super illis idem quoque potuerit cum ratione decerni, quod decretum jam fuerat. Tandem omnem hæsitacionem reseculi concludens hæc omnia fortasse locum habere potuisse re integra, non cum jam remedium magna ex parte Febres sustulerat: neque ideo suspiciones meas, forsitan vanas, effectum jam prope completum debere, aut opportune posse impedire. Et revera, paucis vix elapsis diebus, Febris in totum evanuit. Paullo post lassitudo cæpit ad articulos determinari, & sensim in arthritidem universalem, ac dolorificam, cui nunquam Ægra obnoxia fuerat, commutari. Quid multis? Duravit ad longum tempus arthritica affectio non sine aliqua pulsus perturbatione. Invocabatur tamquam Numen aliquod denuo Quartana Febris, ut accederet, quemadmodum colebatur antiquitus, ut procul abesset. Accessit, & nonnihil levaminis attulit; non tamen affectionem sustulit: immo Ægra & Febre, & arthriticis cruciatibus longa vicissitudine alternatim torquebatur. Post plures tamen, & plures menses, repetitis sudoribus, in accessionum declinatio-

ne, medio etiam diaphoreticorum usu, promotis, tandem convaluit; restitente solum diuturna in partibus affectis imbecillitate, de qua etiamnum, humidioribus præsertim tempestatibus, quandoque conqueritur.

Ex hujusmodi casu posset forte illustrari Theoria constituentium causas Intermittentium in Nervoso systemate. Sed, si illum ad leges in antecedentibus sancitas fas sit revocare, dicendum erit, ob inhibitum influxum fermenti Quartanarii (quodcumque sit illud) in sanguinem, vel saltem eodem, priusquam influat correcto, atque retuso, cessasse quidem febrilem effervescentiam, per quam depurabatur sanguis, non modo a suprascripto affluente fermento, sed & data occasione, ab aliis quoque impuritatibus non febrilibus intra illum præexistentibus; veruntamen remansisse superstitem in eodem cruore, velut in Mari, sedata licet procella adhuc turbato, motum quemdam, vel dispositionem irrequietam ad facile fermentescendum, illi impressam a prægressa effervescencia, seu ab humore, qui effervescentiam hujusmodi suscitavit. Hinc particulæ sanguinis suo præter jam ingenio non bene dispositæ fluctuantes adhuc, atque tumultuantes, neque sibi placide coherentes amplius, ut cohererebant in statu sano, loco febrilis ebullitionis clandestinam, & occultam potius iniere fermentationem, ac inde imperfectam secretionem, vi cujus impuritates ejusdem Cruoris antecedenter aggestæ decubuerunt ad articulos, necnon etiam ad universalem corporis habitum, quasi Rheumatismi ad instar. Et hoc casu locum habere videtur, quod non semel se observasse refert Sydenham [subdens tamen hoc esse unicum incommodum, quod a Cortice allatum noverit unquam] nempe, quod qui pluries Chinam Chinam assumpserint, Rheumatismo fiant ad breve tempus nonnunquam obnoxii: quo tamen mihi, ut verum fatear, alias nunquam videre contigit, hoc, & sequenti casu excepto, ubi quoque usus Chinæ Chinæ diutinus aut



exuberans non fuit, sed fortasse potius immaturus.

Itaque a posteriori videtur constare, quod satius fuisset, vel Febrem, quæ *depurativa* erat, sinere, quousque talis mansisset, nec Corticem exhibere, vel saltem priusquam exhiberetur, sanguinem ab inquinamentis suis mundare, siue remediis diaphoreticis occasione defervescentiæ febrilis facile in actum reducibilibus, siue diureticis, aliisve similibus, præmissa etiam blandiori ventris expiatione, quin & parca forsitan (quam *Ægra* facillime, non obstantibus iis quæ diximus, ferre consueverat) sanguinis detractione: ut sic purus, & fluxilis, quantum fieri potuisset, redditus idem Cruor, inhibita postmodum Febris commodo tutius, atque tranquillius perfrui valuisset.

II. Haud longe absimiliter contigit *D. Pegault* Obstetrici olim *Aulicæ*, habitu corporis valde obeso prædita, atque a toto tempore suæ mansionis in Italia [quippe, quæ *Parisiensis* erat] variis ægritudinis obnoxia, fluxui scilicet immodico sanguinis ab utero, efflorescentiæ cuidam cutaneæ acerrimæ per singulas *Æstates*, aliisque diversis incommodis, quæ robustam licet, sæpius perturbare consueverunt. Hæc anno 1700. dum appropinquaret, immo immineret partus *Serenissimæ Ducissæ Mutinæ*, correpta est *Tertiana* simplici *Intermittente* satis valida, & non modicæ diuturnitatis signa præbente ob copiosos vomitus, & alvi dejectiones, profusosque in ipso Febris augmento sine levamine sudores. Quapropter, cum ei admodum curæ esset excipere partum *Dominæ* tum suæ, tum inæ, rogavit me, ut Febrem quam cito vellem suppressimere saltem, si penitus extinguere datum non esset. Tertio itaque vix elapso paroxysmo, præmissaque diebus antecedentibus phlebotomia, & Clysterum administratione, Corticem propinavi, cuius usu opportune continuato, impetratæ sunt induciæ Febri, quantum exigebat opus illud, quod propterea ad ultimum usque terminum feliciter perdu-

xit. Post mensem circiter recidit, & curata est methodice, purgata scilicet, aliisque consuetis omnibus adiutariis. Sed neque plane profecit hæc methodus: siquidem alias recidit, nec semel; quamobrem nova Corticis oblatione, quam efficaciter imploravit, iterum est sanata. Sed [quod adnotavit *Sydenham*, ut supra diximus, & quod forsitan *Transalpinæ* magis, quam *Cisalpinæ* genti est familiare] non multo post vagos in regione præsertim lumbari passa est dolores, a Rheumatismo non longe absimiles: ac demum, iisdem flexuræ genuum pertinaciter infixis, non sine incommodo descensum scalarum, & stationem ipsam ad aliquod tempus valuit exercere, nec nisi serius in pristinum restitui. Illud insuper de illa notandum, quod quotiescumque sumebat Corticem (sumpsit autem pluries, ac pluries per modum alterantis) toties illi alvus copiose fluebat, ferme ac si solvens aliquod ea sumpsisset, quod & aliquando se observasse *Mortonus* asserit, & *Sydenhamius* — ob peculiarem, ut inquit, quorundam corporum temperiem, atque idiosyncrasiam — iique proinde Auctores in tali casu Laudanum miscent cum Cortice; neque tamen per hoc admodum feliciter ea curabatur, ut retuli: iisque diebus, quibus feriabatur ab assumptione Corticis [ut pluries mihi placuit experiri] illis eisdem alvus in statum naturalem redibat. Quod sane in ulla alia persona mihi nequaquam contigit observare; cum in *Italīs* *Ægris* aliquam potius alvi siccitatem, quam lubricitatem, utpote — operationem tam suæ naturæ [eodem *Sydenhamio* iudice] quam morbo plane contrariam — consuescat inducere.

Atque hi duo casus respiciunt oblationem Corticis haud satis felicem in *Intermittentium* principio, ubi sanguis depurari indigeat non modo a fermento febrili, verum & ab aliis inquinamentis in eo præexistentibus: nunc duos alios subdam longe minus felices, & notata dignos, quos mihi nuper tantum, sexdecim videlicet annis a prima hujusce



hujusce Tractatus editione mihi contigit observare, commonstrantes eandem oblationem ne semper quidem tutam in ipso febrium intermittentium, plane tamen depurativarum progressu.

III. Estate Anni 1728. dum Ruri agerem, Nobilis quidam Adolescens a Villa mea mille passus distans corripiebatur levissima intermittente Tertiana, primum simplici, mox duplici, sed quæ intra paucas horas copioso sudore integre solvebatur, remanente per totum tempus intermedium omnimoda actionum alacritate. Perseverante jugiter hujusmodi statu, nil prorsus faciendum duxi, sed totum negotium Naturæ relinquendum ad excoquenda per ignem febrilem tam blandum quæcumque fluidorum vitia, quæ ob prægressos errores, præsertim in potu, insolatione, & nimio corporis exercitio commissos, potuissent in agrotante latere. Jamque vigesimus tertius præterierat accessus, cum ab importunis precibus Adolescentis alias a me rejectis tandem commotus, illi more gerendum censui, Peruvianum scilicet Corticem dosi saltem paulatina eidem præscribens, præcipue cum ille clam domum meam ob idipsum pedibus venisset, mihi quæ asseverasset, sed falso, nullo amplius, aut ferme nullo sudore paroxysmos levissimos, nec ultra tres, vel quatuor horas protractos, solvi consuevisse. Præscripsi ergo *tres drachmas* Corticis in sex partes divisas, & intra sex pariter dies omni mane sumendas. Assumpsit ille, & circa tertiam, vel quartam diem febris evanuit. Cumque vero duas alias portiones superstites duobus diebus subsequentibus ad præcautionem potasset, prima post absolutum medicamen die, ex improvise correptus est paroxysmo, quem Oppidanus Chirurgus epilepticum reputavit, cui tamen morbo Adolescens ille nunquam antea fuerat obnoxius. Nunciata mihi per eundem Chirurgum eventus serie, statim venam secari jussi; quæ tamen operatio, nonnisi post horas quinque, vel sex fuit celebrata: ab ea vero motus convulsivi, seu jactationes

*Torti Therap. Spec.*

Corporis cœpere quidem, ut fuit relaturn, illico imminui, sed eos excepit profundus sopor, vi cujus Æger ferme exanimis videbatur: qua de re novam iterum venæ sectionem præcepi, & perseverante jugiter sopore, ac oppressione mentis, vessicantia quoque brachiis, & cruribus affigenda proposui. Hæc tamen omnia cum incassum acta intellexerim, mane sequenti Ægrum mihi invisendum omnino credidi; quem cum deprehendissem obmutescentem, ac veluti obdormientem, sed nonnullos nihilominus motus, quos per evulsionem capillorum ipse excitaveram, facile edentem, eosque tunc observassem sopiti potius, atque subdeliri, quam Epileptici hominis proprios, securitatem omnimodam Matri sum pollicitus, ut revera contigit, etsi nonnisi post horas 38. per novæ, ac unicæ febriculæ supervenientiam ab ejusmodi paroxysmo integre liber evaserit. Evasit tamen, neque amplius usque adhuc quidquam simile, vel ullum aliud incommodum passus est, optimam quippe, ac firmam valetudinem Deo dante assequutus. Una remanserat adversus Corticem Parentum querela, quam tamen ego statim sustuli, asseverans febrifugum ex se insons fuisse, ac strenue suo munere functum; me potius haud satis cautum in concessione mea, & subdolo Adolescentis relatu nimis credulum ingenue confessus.

IV. Inclinate Autumno ejusdem Anni Urbi restitutus in consilium vocabar pro Aulico Equite nostro florentis ætatis, qui dum Viennæ Austriacæ hyberno tempore moram traheret, levi Tertiana duplici intermittente, & copioso sudore solvi consueta, fuit ibidem correptus. Eam tamen ad decimam sextam usque diem protractam cum diutius ferre ob impatientiam detrectaret, Medicus, etsi quodammodo invitus, fervidis petitionibus illius tandem indulgens, Chinam Chinam frequenti haustu, per breviter videlicet intervalla potandam præbuit; quo factum est, ut sequenti die febris nullatenus apparuerit, sed ejus loco successerit perturbatio quædam Ven-



tris infirmi, tremor Viscerum, evaporatio ad caput, & dein manuum, ac digitorum convulsiva contractio; itaut affectio isthæc ab Epileptica parum abluere visa esset, nisi mentis, & sensuum omnium usus integer aliud suassisset. Injecto statim Clystere, sedata sunt omnia; noctu tamen bis, aut ter, etsi levior rediit insultus, qui postmodum irregulariter se se exerere non desit. Progressu temporis supervenere iterum febres, quæ per sexaginta dies, & ultra, modo Tertianæ, modo Quartanæ typum referebant, modo nonnisi erraticarum more invadebant; iisque etiam vigentibus recurrebat identidem insultus ipse, quamvis debilior. Febribus tandem per amara depulsis, remansit nihilominus larva quædam transitoria ejusdem insultus, quæ a primariis Urbis illius Medicis pro mera hypochondriaca affectione fuit habita consensu unanimi. Cum tamen ea post epotas etiam quasdam Thermales aquas recurrere, quamvis imbecillius, nequaquam cessasset, reditus ad nativum aerem pro medela fuit Ægrotanti præscriptus. In Italiam itaque reduci meo suasu secta est vena prope hyemale solstitium, non neglectis familiaribus quibusdam remediis, quæ Medicus illius ordinarius præscripserat, quibus extenuata quidem remansit hujusmodi affectio, non tamen plane sublata; illius namque eradicationem ad Vernum Æquinoctium differre fuit opus, martialibus tandem remediis absolvendam.

Hi duo itaque Casus satis clare videntur ostendere, non quod Cortex in se, vel ex se sit unquam noxius, quemadmodum quispiam male feriatus posset opponere. Cortex enim hisce Casibus febrim interceptans non aliud præstitit, nisi quod debebat, & quod solet etiam tunc cum pereuntis hominis vitam ab imminente vindicat morte; sed solum videntur ostendere, quod Medicus debeat summa cautela procedere in suprimendis quocunque vero specifico febrifugo (si quid aliud sit præter Corticem) Febribus depuratoriiis, non mo-

do in earum principio, verum etiam in earundem progressu, quando nulla id exigunt symptomata, sed potius oppositum suadet facilis Ægrotantis tolerantia: potest enim nonnunquam contingere, raro licet, quod non modo saburra in sanguine præexistens, & latens; sed & ipsum fermentum febrile a Febrifugo absorptum non integre subigatur a Natura, itaut possit vel insensibiliter dissipari, vel per ruinæ vias, uti frequentius mos est, vel per alias æquivalentes excerni; sed feratur per Metastasin infrequentem quidem, sed tamen possibilem, ut in duobus hisce casibus, ad caput, vel alio, ibique noncontemnenda producat phænomena, quamvis millies in similibus Casibus id non acciderit. Quamobrem Medicos monitos velim, ne febrium omnino depuratoriarum, & plane salutarium, etsi nonnihil provectarum, ullo vero febrifugo suppressionem etiam paulatinam tam fidenter, ut sæpe assolet, tentent, nisi earum diuturnitas sensibilia quæpiam gignat incommoda, quorum ratione Febres hujusmodi ob solam diuturnitatem suam videantur jam Naturam nonnihil corruptivam adipisci: quod non prius quam ultra quadragesimam diem solet de more contingere. Interim tamen sicut nimiam fidentiam in animosioribus per exempla isthæc temperandam credidi, ita ne nimiam trepidationem pavidioribus incutiam, ad feliciora exempla oblationis Chinæ Chinæ in ipso Intermittentium principio progredior.

V. *Matrem meam*, tunc prope octogenariam, adhuc tamen robustam pro ratione ætatis, & sanguine satis vegeto etiamnum refertam, querulam licet, mense Novembris anni 1706. Quartana Febris adorta est. Tribus elapsis accessionibus mediocris intensiois, cum non satis fiderem virium nonnihil prostratarum robori, in tam provecta ætate facile resolubili, & cum nihil incongruum intra illius sanguinem præexistens agnoscerem, quod occasione febrilis incendii indigeret absumi; sed contra metue-

rem



rem potius ejusdem cruoris conspurcationem a Fermento febrili ( quod tractu temporis non semper perfecte subigi solet ) vel saltem enervationem ipsius sanguinis a modici etiam temporis lucta, seu effervescencia, ad ejusdem fermenti subactionem requisita; idcirco ab ipso initio sufflumen aliquod paroxysmis imponendum duxi, ne nimium excurrerent. Quapropter statim Corticem ad *scrup. j.* quotidie mane propinavi, per modum scilicet levioris alterantis, ratus me forte intra decem, vel duodecim dies febriles accessus ad summam extenuationem, vel ad totalem abolitionem paulatim deducturum. Sed mea me fefellit opinio; siquidem tertia die assumpti remedii, qua die quarta accessio expectabatur, vix ea sensibilis fuit: quare continuato ad duos alios tantum dies, eadem quoque dosi, eodem medicamine, Febris penitus abiit contra expectationem meam. Substiti proinde ab usu Corticis expectans post aliquot dies reditum Febris, quam nonnihil sinere decreveram; sed ea non amplius reversa est. Immo, cum post aliquod tempus occasione cujusdam errati in victu, vomitum nocturnum passa esset Aegra, cui se adjunxit incalescentia febrilis, hæc nihilominus pari velocitate sponte abiit, ac advenerat. Neque ab eo tempore usque ad ejus obitum ullum insultum febrilem experta est Genitrix mea, quæ Deo favente deinceps vixit incolumis.

VI. *D. Margaritam de Marchesii* 76. annos natam, & alioqui sanam, Hyeme Anni 1708. Febris Quartana corripuit. Tribus elapsis paroxysmis, Filius Chirurgus domum meam petit, consilium capturus an Corticem Matri debeat offerre, nec ne. Absente me ab Urbe, Juniores Medicum, quem tunc instituebam in Praxi, allocutus est, votum illius saltem excerpturus. Cautus Adolescens se præbet ancipitem; subdit tamen sibi notum esse, quod Matrem meam in principio Quartanæ eo remedio feliciter ipse curaverim. Hac noticia contentus Chirurgus, nec quicquam

ultra quærens, statim prima die vacua, post tertium paroxysmum exhibet Matri suæ *drach. j.* Corticis: altera die pariter vacua, alteram similiter Corticis *drachmam*, & die quarti futuri paroxysmi *drach. ij.*; quibus epotis, idem quartus paroxysmus minime apparuit, nec ullus alius deinceps: immo nec recidiva, nec ullum amplius (quod unice notandum occurrit) ex suppressa cito Quartana successit incommodum, sed integra plane, constans, & inculcata valetudo.

VII. *Filiolus bimus, unicusque D. Petri Joannis de Pedronis*, cæteroqui vividus, ac probe valens, Febre Quartana duplici ex improvise corripitur, quæ illum intra paucos dies plurimum extenuat, angit, atque debilitat. Huic præmissis aliquoties intermissionis tempore nonnullis cochlearibus *Syr. de Cichorio cum Rhabarbaro*, qui alvum vix tantillum subduxit, exhibitum est statim Extractum Peruviani Corticis, pauco *Syr. ex Corticibus Citri edulcatum*, paucaque similiter aqua ex ejusdem Floribus aromatizatum: quo per aliquot dies exhibito, sublata penitus est Febris, cui successit nullo interturbata incommodo perfecta sanitas.

Ex tribus hisce postremis exemplis cum pateat ex adverso adhibitum esse feliciter in ipso Intermittentium principio Peruvianum Corticem, videtur inferri posse, quod ubi nil purgandum in sanguine præexistit, sed solum peccat in ipso fermentum febrile adveniens ab extra, capax tamen tractu temporis, si paulatim restitet, febrem naturæ ancipitis in corruptivam convertere, non ab re sit eodem nonnunquam in ipso pariter principio, caute tamen, ac prudenter uti. Modo transitum faciamus ad alias recensendas historias itidem felices citæ oblationis Chinæ Chinæ in febribus corruptivam naturam nondum quidem adeptis, sed tamen ad eam acquirendam non longe dispositis.

VIII. *Amita mea Monialis* 78. annum agens, insultum apoplecticum ante tres circiter annos passa, atque ex



eo hebes jam, immemor, ac ferme stupida reddita, anno demum 1708. capitur Tertianæ duplici suapte natura Intermitte, cum paroxysmis tamen sese invicem excipientibus. Vix elapsis primis diebus, quibus præsidia medica consueta, & possibilia usurpata fuerant, eo devenit stupiditatis, ut nec cibum capere, nec urinam reddere, neque aliud quidpiam sciens, aut volens, exercere potis esset, durante accessione, præsertim potiore, vel saltem nonnisi circa extremam declinationem ejusdem, cui postea fere immediate subsequebatur altera cum rigore paullo minore. In hoc statu dixi Monialibus assidentibus [quoniam Ægrotans eo passu ad obitum tendebat intra paucos dies, non tam ratione Febris, quam ratione adjunctorum] non aliunde quicquam spei superesse nisi forsitan ex tentamine Chinæ Chinæ, si eam aliqua hora minoris stupiditatis deglutire valeret: cujus tamen remedii administrationem, utpote in tali statu difficilem, & probabiliter inanem, earum arbitrio relinquebam, ut solum si luberet, tentarent. Faciles se præbuere Moniales: & quoniam intra Claustra Pharmacopolium usuale habent, statim attulere remedium, quod summa caritate, & industria administratum fuit, & quasi vi illata, ab Ægra deglutitum ad *semidrachmam*. Vespere repetitum est eadem dosi, & facilius haustum, quoniam declinabat jam fortior accessio. Mane sequenti oblatum est ad *drachmam unam* (semper enim facilius potabat) & vespere ad *semidrachmam* cum debito intervallo, & congrua ab alimento distantia. Altera die, propinato ad *semidrachmam* pariter mane, & sero eodem remedio, vix tantillum Febris apparuit, quæ brevi postmodum, continuato paulisper medicaminis usu, disparuit omnino. Hoc autem mihi nequaquam mirum. Illud potius miratus sum, & etiamnum miror, quod soluta Febre, statim Ægrotans adeo vegeta, prompta, & memor evaserit, ut vix talis fuerit ante insultum apoplecticum, nedum ante Febrem. An vero phænomen-

non istud plane mirandum Cortici adscribendum sit, an acerbo & continuo rumentium hæmorrhoidum dolori [quod symptoma sublatae pariter Febri statim supervenit] anceps hæreo. Eventum tamen non absimilem ab usu Corticis refert de suo Avunculo *Morton, Historia* 26. *De Proteiformi Febr. Intermitt. genio*. Perseveravit ad aliquot hebdomadas, paucas tamen, Ægra in hoc statu, solo hæmorrhoidum dolore vexata, & adjuncta alvi stipticitate, Clysterum usum ægre admittente. Tandem sive propter hoc, sive ob intermissum præmature nimis, nec diu continuatum, aut repetitum Corticis [metu scilicet, ne ab illius actione emergerit in hoc uno casu hæmorrhoidum tumor, ac dolor] Febris rediit, & cum ea mentis, ac sensuum torpor consuetus, quin etiam major. Aberam forte tunc ab Urbe, neque Ægram invisi, nisi post tertiam diem, quo tempore vix percipiebat, quæ circa eam fierent, aut dicerentur, meque ipsum vix dignoscebat. Quinta die cum esset nonnihil vegeta, sibi, ut aiebat, brevi morituræ institit ministrari Sacramenta Ecclesiæ, quibus integre munita, redeunte statim accessione, quæ vehementer invasit, fere lethargica facta est, & deglutiendi impotens: ac propterea de China China propinanda ne cogitandi quidem fuit locus; quamobrem nullo perturbata remediorum incommodo, septima circiter die animam Deo reddidit. Ex hoc casu, si non aliud in rem nostram, saltem efficaciam remedii in subjecto constitutionis jam descriptæ, veterum affectionum temporaneam correctionem, & vitæ ipsius, laboriosæ licet, protractionem ab administrato, necessitate cogente, circa initia remedio, subit animadvertere.

IX. *Aliam Monialem* ex ordine Carmelitarum Excalceatarum, anno 76. natam, habitu corporis a multis jam annis cachectico, & squallore faciei cadavericum prope æmulante refertam, suffusione oculi utriusque fere obcæcatam, antiquoque insuper, & continuo asthmate laborantem, ita ut unum, vel

alte-



alterum gressum movere non posset, quin anhelitu gravissimo ipsam loquelam præpediente corripere, Autumno anni 1707. invasit Tertianæ duplex Intermittens, nec admodum fortis. Roganti, ut præmisso leniente levissimo, phlebotomiam jamdiu intermissam, antiquitus vero pro minuenda spirandi difficultate, sibi [etsi ex tunc etiam cachecticæ] familiarem æque ac proficuum permitterem, annui limitata ad tres, vel quatuor uncias sanguinis detractio: ex qua facillime tolerata nullum sive commodum, sive incommodum subsequi dignoscere potui. Processit Febris de more nonnihil intensior in augmento morbi. Cumque in quinto Paroxysmo, quintaque pariter die non parum somnifera videretur, licet quo ad alia non plus gravaretur, quam par esset: perfectis, quæ illi aliunde imminabant periculis, si Febris vel tantillum ingravesceret, vel modice protraheretur, præscripsi *scrup. j.* Extracti Chinæ Chinæ quotidie mane assumendum: quo bis tantum adhibito septima die vix umbra Febris se prodidit. Continuato deinceps, Febre licet jam extincta, ad alios tres dies eodem remedio, Agra integre convaluit, & (quod magis refert) sine ulla penitus recidiva.

X. *Alia pariter Menstrualis*, degens in Cœnobio S. Claræ senex gracilis, & valetudinaria, inclinante Æstate anni 1709. corripitur Quartana simplici intermittente. Hæc ante quatuor circiter menses passa erat insultum levis Apoplexiæ, statim solutum per decubitus materiam ad nervos partis sinistræ [unde ejusdem partis stupor universalis] nec non ad nervos opticos, & linguæ motorios, unde hæsitatio sermonis in ista, in oculis vero fenestrationum objectorum representatio, & tandem stabilis caligatio. Superveniente Quartana credidissimè, auctoritate *Hippocratis*, materiam in nervos tum deturbatam, tum influere valentem, posse attenuari digeri, atque resolvi; sed fortassis ætas, & debilis constitutionis languor obstiterunt. Quamobrem, licet Febris primis

insultibus non admodum gravis videretur; cum tamen paullo post sumpserit incrementum, & robur, merum aliquem incussit tum Agræ, tum mihi, ne scilicet Ea suapte natura debilis pluribus accessibus veleret diu sufficere. Eapropter cum potius debilitari, quam refici partes affectas, & precipue visionem, quotidie noscerem: in ipso etiam morbi principio, videlicet circa quintum [ni fallor] Paroxysmum, vel eo vix transacto, cœpi Corticem offerre ad *drach. ss.* singulo mane. Substitit Febris etsi valida post sex circiter oblationes, nihilominus continuatum est remedium usque ad dies 14.; postea, quiete duarum plus minus hebdomadarum interposita, iterum exhibitum est ad *drach. j.* quotidie per tres dies. Immo ad majorem præcautionem altero simili intervallo posito, circa Æquinoctium Autumnale rursus exhibita est quotidie *drach. j.* Corticis per alios tres dies; unde stabilis sanatio, & præservatio absque ullo alio incommodo; immo potius cum levamine. & alacritate ad motum, sola oculorum caligatione superstite: a qua nihilominus nequaquam impedita est, quin sola, & sine adminiculis etiam post biennium quaquaversum vagaretur, & consueta munia mediocriter exerceret.

Atque Casus istos circa oblationem Corticis bono successu institutam in principio Intermittentium, *corruptivam* nondum naturam vere adeptarum, sed tamen in eandem proclivium, retulisse sufficiat. Modo nonnullos alios circa eandem oblationem præ urgentia symptomatum administratam, Febre scilicet in deterius labente, recenscamus.

XI. Honestus Juvenis *Franciscus Degoli*, structura corporis universa ad Tabem apprimè disposita donatus, cujusque Frater jam tabidus, & Mater peripneumonica obierant, correptus est Anno 1699. circa medium Augustum Quartana simplici, quæ paullo post duplex est facta, illique adjuncta Tussis importuna noctu, & interdum præcipue vero toto accessionis etiam declinantis tempore



pore Ægrotantem concutiens, cum plurimo sputo materiæ spumosæ insipidæ. Hunc a principio hortatus sum, ut Febres ferret, opem postea idoneo tempore laturus, & citius etiam, si Tussis admodum increbresceret. Tulit ille tacitus Quartanam duplicem per duos Menses, tussimque contumacissimam, & molestissimam, qua ad marasimum usque deductus est, cum tanta sputi spumosi copia, ut quanta fuerit, vix credi possit. Deerat a sputo omnis purulentia, non omnis tamen deerat intermissionis (qualiscumque) die febrilis incallescencia; cætera Tabidum consumptum referebat. Rursus accitus Ego, ac prædicta omnia considerans, statim, paucis præmissis, exhibui Corticem ad *drachmas duas* in Vino, ingruente Paroxysmo graviore, & confestim utraque jugulata est Quartana, tussisque inde manifeste imminuta, ipsumque adeo sputum. Per octo dies assumpsit *semidrachmam* ejusdem pulveris, & interim sedata est Tussis, Febre jam ante depulsa. Hinc ad duos Menses abfuit æque Febris ac Tussis; sed circa brumale Solstitium utraque reversa est, & utraque repetito pulvere iterum fugata. Quia tamen Quartana modo duplex, modo simplex, levior licet, irregulariter nonnunquam redibat, & cum eadem Tussis acerrima, sputumque suspectum, ideo Æger coactus fuit pluries idem Remedium parca dosi haurire, donec prope Solstitium Æstivum Anni 1700. a Febre, Tussi, & Macie, cui in dies succedebat proba nutritio, perfecte sese extricavit, nullum amplius morbum ab eo tempore passus ad Annum usque 1727., quo tempore e vivis sublatus est.

XII. D. Carolo Antonio de Agnanis Sacerdoti, Tertiana simplex Intermittens, quæ illum die 26. Julii 1707. adorta est, post septem leviores circuitus duplex est facta, æque tamen adhuc intermittens, ac levis. Curata est methodice; sed loco levaminis, potius paulatim exacerbata est Febris, quæ usque processit, ut rigoribus, tremoribus, ac concussionibus intolerabilibus in inva-

sione Ægrum vexaret, succedente dein plurima in somnum proclivitate, cum torpore mentis sat gravi, & postmodum delirio: quæ tamen omnia symptomata copiosus tandem sudor una cum Febre solvebat. Instabat Mater, ut Chinam Chinam præscriberem, Natum imparem oneri morbo credens. Renuebam tunc ego, ut qui vigesimam saltem diem jam prope imminuentem expectare decreveram; vires enim erant ferendo. Transacta vigesima, Febris fit fortior, illiusque simul ingravescent symptomata; insuper urina crassa est, pauca, & impense rubra. Renovantur querelæ de Cortice non adhuc propinato. Cunctabundus hærebam, videns morbum in summo vigore, quem proinde tunc veluti suffocare minime audebam, certus (ut opinabar) de recidiva longiore, cum tamen Febris adhuc intermittens securitatem cum diuturnitate polliceretur. Augebatur interim nonnihil qualibet accessione sopor, atque delirium. Et licet solveretur utrumque, soluta Febre; cum tamen relinqueret aliquod vestigium sui, instante viriliter Matre (mihi dubio procul infortunia quæ accidissent, exprobratura) Corticem præscripsi ad *semidrachmam* tantum mane ante Febrem, & sero declinante Febre. Sed cum postremus accessus iisdem non modo symptomatis, sed & ultra morem gravioribus fuerit comitatus, sequenti die dosim duplicavi, ut & die tertia. Statim Febris abiit; Urinæ factæ sunt concoctæ, & omnia tranquilla. Sumpsit Corticem iterum ad *drachmam semis*, semel tantum in die ad modicum tempus: quo elapso, Rus adiit, ubi paullo post, spontanea diarrhæa superveniente, perfecte convaluit, duos vel tres tantummodo Tertianæ paroxysmos post Æquinoctium Vernalis anni 1708. iterum passus.

XIII. Generosum Virum, Supremum Domesticæ Ducalis Rei Præfectum, D. Comitem Ludovicum de Marsciano, Quartanæ prope bimestris, ni fallor, qua tenebatur (contigit id anno 1696.) ad nauseam usque tædebat. Curabat illum de more D. Davinius, meque tunc pro-



propter ægritudinem impedito, & cæteroqui in consilium vocari solito, socius illi jungebatur in curatione Vir Scriptis suis, & multifaria eruditione Clarissimus, ac Orbi notus, *D. Bernardinus Ramazzinus*, Comprofessor quondam meus, summopere colendus in Lyceæ Mutinensi, postea suspiciendus in Patavino, ubi Primariam merito occupavit Pract. Med. Cathedram. In morbi progressu accitus sum & Ego, ut qui meam jam cœperam circumferre convalescentiam. Nobis itaque omnibus in consilium vocatis, suum Ager de sumendo Cortice desiderium ardens exposuit. Jam Lien illi cœperat nonnihil intumescere, ac propterea ne ultro, ut mos est, durantibus Febribus intumesceret, instabat eadem illico suppressi. Me autem præ cæteris mirabatur cunctantem, quem faciliorem sibi persuaserat, quippe tunc a morbo gravissimo Corticis ope convalescentem. Ponderato symptomate, & iis omnibus, quæ contra usum Corticis adduci potuissent [ quatenus metuendum foret, ne plus ob suppressam hoc pacto Febrem augeretur lienis tumor, quam si illius curatio vel omitteretur, vel remediis consuetis absolveretur ] decretum fuit, paucis præmissis, esse annuendum votis Aegri, qui propterea statim sumpto Remedio eodemque modis jam dictis continuato, tum a Febre, tum a Splenis tumore absque ulla recidiva liberatus est: nisi forte Morosus quispiam recidivam morbi illius appellare velit lethalem Ejusdem ægritudinem post septennium a causa evidenti productam, Febrem videlicet acutam, ex suppressa cutanea quadam habituali affectione oriundam, & intra 14. dies per abscessum ad anum imperfecte judicatam; quo demum abscessu prius in Gangrænam converso, mox difficulter curato, translatoque interim Aegro in aerem palustrem, Febris erratica subsecuta est, quæ tractu temporis lienis tumorem ascivit, dein Icterus, mox Hydropem, & mortem.

XIV. Gracilis Uxor *D. Francisci Guicciardi* Cantoris egregii anno 1708. du-

plici Tertianæ Intermittentæ laborans, intra paucos dies, accessionibus sese mutuo excipientibus, eo devenit, ut jam versaretur in non levi discrimine, testante id pulsu exili, moribusque manuum, & linguæ tremulis, cum subsultibus tendinum, & hujusmodi gravibus symptomatis, ratione quorum Viatico Eucharistico fuit munita. In Consilium vocor; & quoniam reliqua remedia ex arte præscripta fuerant, & Febris adhuc motum sensibilem suæ invasionis servabat, priusquam iste obliteraretur, statim Corticem Peruvianum proposui. Obstabat, vel videbatur obstare insignis, & amplus lienis tumor tempore morbi, brevi licet, genitus, qui *D. Florianum* Medicum curantem, Doctum, ætateque magis proVectum, nonnihil hæsitantem reddebat. Cunctantem nihilominus hortatus sum, ne in gravi periculo præsentaneum, quod spondebam, Corticis auxilium ommitteret ob suspicionem augendi lienis tumorem, quem tractu temporis postea Agra superstite curare poterat, nisi, sublata per Corticem Febre, sponte evanesceret: quod pluries mihi contigisse asseverabam. Annuit ille; & oblatis in remissione Febris *duabus drachmis* Chinæ Chinæ, & *drachma una* quotidie per duos sequentes dies, Febris omnimode depulsa est. Præscribitur tamen ad majorem cautelam alia *semuncia* in octo partes dividenda, qua ad impediendam recidivam assumpta, præter illius expectationem Splenis tumor evanescit in totum: & sic eodem fere tempore a Febre simul, & a tumore lienis curata est absque ulla penitus recidiva. Plures Casus istiusmodi, nempe de Febribus Intermittentibus, præsertim Quartanis, tumore Viscerum infimi Ventris comitatis, & per Corticem una cum tali symptomate sanatis, afferre possem, quos tamen, utpote triviales, & passim obvios, satius est silentio præterire.

XV. Non æque tamen silentio præteream (ne scilicet meæ nunquam desin ingenuitati) Casum singularem inter tot felices minus faustum, qui non mihi qui-



hi quidem, sed meo quondam Præptori contigit, dum viveret; quamquam nec illum inter meos connumerem, neque Cortici imputandum credam, ut ei fortasse imputarunt mussitantes quidam Cynici illius temporis. Referam tamen, ut alii judicent.

Meus itaque colendæ semper memoriæ Præceptor, *Frassonus*, Nobili cuidam Viro Quartana Febre per mensem circiter detento, & supra modum vexato, cum notabili anhelitus difficultate, atque œdematoso pedum tumore, ante Febrem exortis, & cum ea indies crescentibus, Chinam Chinam exhibuit, & Febrem sustulit. Post aliquot alios successive dies tumor œdematosus suapte natura in incrementum pronus major est factus ad tibias, & crura sensim procedens Ventre non immuni; atque ita, increbrescente anhelitus difficultate, intra paucos tandem menses a serosa colluvie universaliter obrutus Ager Fato cessit, Hydropicus Abdominis simul, & Pectoris.

Si Casum hunc iusta lance obiter pensitare velimus, pro Corticis idemnitate subit animadvertere, non modo ante illius oblationem, verum & ante Febrem inchoata jam esse utriusque Hydropis rudimenta, cui Causæ quoque prægressæ [quas modo recensere non vacat] plurimum contulerunt: unde ex præexistente dispositione in actum jam partim deducta potius quam ex suppressione Februm, quibus non solum vigentibus, sed & ante eas, ab alia causa ortum duxerat, Hydrops ille accersendus videtur, quemadmodum egregie distinguit *Raymundus Restaurandus* — *Vel enim* [inquit ipse] *Hydropem præcedunt Febres, præsertim Quartana, sicuti Celsus adnotavit, vel hæc subsequuntur Hydropem. Posterioribus his inutiliter exhibetur China China; quandoquidem sunt productum causæ, ut plurimum curationem respuentis. Id remedium aliquando a me usurpatum est in gratiam Aegrorum illud efflagitantium, solatium aliquod illis quesituro: desinebat revera Febris, sed paucis post diebus revertens,*

*vel saltem Hydropi nihil detrahens, ut plurimum lethali* — Quod & confirmat propria experientia *Cl. Nigrisoli* in Scholio ad hunc Textum — *Non eadem est ratio* [sequitur *Restaurandus*, celebris licet Humorista] *si Febres antecedunt Hydropem: nam non admodum difficulter curantur, nam sæpenumero Hydrops recedit, dummodo omnia convenienter accedant, præsertim in cathartorum usu, quæ eadem die Febres revocantia, hoc pacto Hydropi augmentum, & fomentum præbent.*

Sed etiam præter hoc, quod maxime verum observatur in Praxi, certum est ex adverso, & omnibus notum, plurimos ex Quartanis per Chinam Chinam nequaquam depulsis sponte sua in Hydropem labi. Immo Æstate anni specialiter 1707. non paucos vidi in Urbe nostra ex Tertianis simplicibus, atque duplicibus, quibus Cortex administratus non fuerat, intra paucos dies tumidos factos, ac veluti Anasarca [rectius pectoris Hydrope] correptos obiisse, inter quos Puerula *D. Comitissæ Soræ*, tres circiter annos nata, Parentum suorum antea deliciæ, mox luctus. Contra, eodem tempore *Germanus* quidam ex ignobiliore famulatu Serenissimæ Ducissæ Brunsvicensis Dominae mæ, Quartana triplici laborans, cum universali Corporis, præcipue vero Abdominis intumescencia, itaut jam Hydropicus conclamaretur, curatus est a *D. Clerici*, me tunc absente, vocato, per Chinam Chinæ: per quam fugatis Febribus, fere sponte, vel saltem paucissimis, atque levissimis adminiculantibus remediis, Hydrops ille, plus quam incipiens, utpote Februm vel soboles, vel comes prorsus evanuit. Immo, dum hæc actu conscriberem, Quartanarium *Sacerdotem Ecclesiæ S. Viti Rectorem* China China ipse curavi, cui Quartana simplex in duplicem conversa pedum, tibiæ, crurum, nec non ipsius abdominis intumescencia intulerat, cum respiratione difficili, & ad quemcumque corporis motum valde anhelosa. Huic ergo, sublati ope Chinæ Chinæ Febri-



Febribus (simplici tantum leniente præmisso) partes omnes antea turgidæ, sponte, ac brevi detumuerunt, & respiratio in statum omnino naturalem rediit, itaut libere ambulare, ac ipsi venerationi indulgere facile potuerit. Et licet mox recidivam sit passus quoad Febres, non tamen ullam passus est intumescentiam, aut anhelitus difficultatem; unde nullo negotio, post modicum temporis repetito remedii usu, prorsus convaluit.

Si ergo ex una parte sine usu Chinæ Chinæ Quartanæ Febres sæpius Hydroperem accersunt: ex alia vero parte, si ope illius evanescit cum Quartanis Hydrops inde productus, ut modo retuli, cur in casu unico, ubi, fugatis per eandem Febribus, processit ultro jam inchoatus Hydrops, adscribendus erit ille ipsi Chinæ Chinæ, non vero antecedenti dispositioni postdepulsas Febres adhuc superstiti? Exemplum Febricitantium, quibus Hydrops adungebatur, curatorum ope Chinæ Chinæ, sunt adeo in Praxi obvia, adeoque familiaris est huiusmodi curatio utentibus Peruviano Cortice, ut minime hæsitavit idem *Restaurandus* peculiare Caput inscribere — *De Hydropis succedentis Febribus Curatione ope Chinæ Chinæ*: ubi plures adducit historias huiusce generis notatu dignissimas. Idem vide apud *Monginotium*, *Jonesium*, *Blegnyum*, *D'Acquin*, *Badum*, *Glantzium*, & alios; quod Lectori lubet indicare, ne unum tantum uni Casui videar opponere, cum prostant mille favorabiles.

His stantibus, decernat modo pro libito quicumque vult super eodem Casu infausito superius allato, intra annos triginta unico, quantum novi, videaturque, an tanta illum teneat fiducia, ut Corticem propterea velut absolute noxium valeat damnare. Ad me quod attinet, crediderim, illum non suffecisse quidem curationi Hydropis a Febre nequaquam pendentis, ut suffecit curationi ipsius Febris; minime vero putarim ulli eorum obfuisse: cuius rei exemplum non absumile afferam ipse *Lib. 3. Cap. 5. Hist. 5.*

Quod si vere obfuisse contendatur, id saltem præcipitanter non imputetur Remedii suapte natura insonti, sed inopportune forsitan, aut præmaturæ illius oblationi. Hanc ob causam constitutæ a nobis sunt, quæ in antecedentibus exstant, pro congruo illius usu Regulæ, ac Exceptiones: quibus cum hoc Casu collatis satis patet, suspectam de inani eventu quo ad sublationem Hydropis esse potuisse ab initio oblationem Febrifugi. Quandoquidem, etsi vere Depurativa non erat Febris adjuncta, itaut Corticem absolute respueret, neque tamen erat vere Corruptiva, itaut plane eundem admitteret, quippe Hydroperem illum ante ipsam sponte ortum nequaquam producens. Notum est autem, quodvis Remedium, utut innocuum, sæpe non prodesse, & nonnunquam etiam obesse, si minus tempestive administretur — *Sed hoc est peccatum temporis (inquit Badus) non est Medicinæ peccatum.*

XVI. Eo ipso tempore, quo curabam *D. Comitem Nogarolam* a Quartana simplici in *Pernicialem* conversa, insignemque illius curationem specialiter describendam *Cap. 6. Lib. 3.*, trahebam felicissime media valida methodo tunc primo a me excogitata offerendi Chinam Chinam in casibus huiusmodi, eodem quoque tempore habebam præmanibus *D. Geminianum Levizzanum*, Virum Patricium, decumbentem ex Tertianâ Intermittente primo simplici, mox duplici, tandemque naturam *subcontinuum*, & *corruptivam* adeptam. Circa morbi initia, cum errata in victu prægressa, & repletionem Ventriculi fateretur Ager, oblatum est vacua die, nempe 13. mensis Septembris anni 1695. Elect. lenitivum ad *unc. j.*, mox altera die vacua correspondente celebrata est pliebotomia, & in progressu administrata sunt ex arte consueta remedia. Cum hæc nihil proficerent, sed Febris quotidie magis invalesceret, vocatus est in consilium *D. Ramazzinus*, cuius suavis exhibitus est 23. Septembris die inter reliqua Cardiacæ Lapis Bezoarticus,



cus, & die 25. affixa sunt femoribus vesicantia, ob motus artuum convulsivos, gravemque totius nervosi systematis affectionem. Quia vero morbus in deterius labebatur, & qualibet accessione pulsus fiebat humilior, ac abolitioni proximus, algorque feralis artus omnes universaliter detinebat ad plures & plures horas: ideo metuentes ambo, ne una, vel altera accessione superveniente Ager occumberet, de antevertendo totis viribus paroxysmo eramus solliciti; idque sperabamus quidem unanimiter a China China, sed cum hoc discrimine, quod *D. Ramazzinus* ei non satis fideret in tali casu ad exitum tendente (esto quod periodi adhuc non obscure se proderent) Ego vero certam illi fiduciam adhiberem, eo quod insignes ejus vires in casu longe graviore, & morti proximo, nempe in memorato *Comite Nogarola* actu experirer. Cum autem die 27. illius mensis Corticem exhibuissem eidem *Comiti*, & mane diei 28. eum jam morti ereptum, ut referam suo loco, invenissem, eadem die 28. Septembris enarrans *D. Ramazzino* casum, & exitum felicem, omnem ab eo hæsitantiam submovi circa oblationem Chinæ Chinæ in hoc quoque casu magis vulgari, etsi gravissimo. Quamobrem ea ipsa die 28., qua mirus effectus Corticis die prægressa oblatis *D. Comiti Nogarola* jam per Urbem celebrabatur, illum obtulimus *D.* quoque *Levizzano*, sed methodo tantum vulgari, ut vulgaris adhuc quodammodo dici poterat (quantumvis gravissima, sed tamen inducias aliquas adhuc præbens) morbi conditio. Oblatus ergo est Cortex ad *drachmas* tantum *duas* juxta morem; quoniam sufficiens erat a futuro paroxysmo distantia, ut vis remedii juxta dosi exhibiti in actum deduceretur. Repetitus est dein illius usus die ejusdem mensis 30. ad *drach. j.* & per quinque dies sic continuatus: unde celer, & integra Febris quondam *benigna*, mox naturam *corruptivam* sensim adeptæ, solutio.

XVII. *D. Carolo Tamburino*, præcla-

ro, & egregiæ indolis Adolescenti, postea Cassinensi Monacho, Quartana correpto, in tertio Paroxysmo supervenit ex improvise cæcitas fere omnimoda cum dilatatione pupillæ utriusque oculi. Symptoma hoc visus abolitionem minitans uno, vel altero repetito Febris accessu *D. Candrinum* illi assidentem impulit, ut de Febre gravissimi hujusmodi affectus productrice supprimenda cogitaret. Super hac re tamen me privatim consuluit, & annuentem habuit; dein consilio inito cum *D. Ramazzino* (sic exigente Aegrotante) sancitum fuit inter ipsos, Corticem nulla mora interposita esse propinandum: quo facto, statim substitit Febris, nec amplius rediit, visusque sensim cæpit in pristinum statum reduci, mediantibus etiam aliis remediis materiæ jam parti infixæ discussionem promoventibus: quod egregie præstitum fuit, remanente tantummodo ea visus imbecillitate, quæ pro acutiore, ac minutiore obtutu, opem Specillorum exposcit.

XVIII. Pro Coronide casum hunc addam, qui meo quondam *Præceptor*i pariter contigit, & qui signate adnotetur velim, cum super hoc uno fundata primo fuerit Praxis mea circa usum meliorem Corticis, translatum scilicet, atque promotum ad curandas Febres Exitiales, de quibus tum Libro sequenti, tum præsertim tertio. Casus autem fuit hujusmodi.

Patritius quondam Vir *D. Octavius Masellus* quinquagenarius, habitusque Corporis summo opere obesi, corripitur Febre Quartana simplici Intermittente circa annum 1678. Post aliquot Paroxysmos incipiunt accessiones fieri aliquantulum fortiores, & in sua duratione protrahi. Observantur tractu temporis in vigore febrilis effervescentiæ aliqui motus tremuli, & subsultus tendinum, lingua fit scabra, urinæ imminuta, ac crassæ, mensque non omnino constans: soluta tamen accessione, solvantur omnia. Quia vero quolibet Paroxysmo gradatim intenduntur eadem symptomata, & paroxysmi iidem majorem



rem extensionem acquirunt, de propinando celeriter Cortice, priusquam Febris reddatur Continua, decernit *Experientissimus Frassonus* curans. Et quoniam eundem Aegrotantem amicitiae ergo invisere solebat alter Medicus majoris auctoritatis, & gradus, licet nec majoris eruditionis, nec aequalis experientiae, huic quoque communicari *Frassoni* consilium, congruum visum est assidentibus. Horruit hic, iis auditis, mala innumera Aegro ominatus, si China China oblata fuisset, cui potius remedia Cardiaca, & Bezoartica substituenda esse clamabat, repetita insimul, quae paullo ante luculenter celebrata fuerat, Venae sectione, hirudinum quoque, & cucurbitularum appositione instituta, & aliis huiusmodi. Haec *Frassono* relata impedimento fuere, ne Corticem offerret; protestabatur tamen, quod cuncta male cessura erant Amico Aegrotanti, neglecto usu Corticis opportuno. Differi in alteram saltem accessionem huiusmodi remedium instabant Consanguinei Aegrotantis. Periculum esse in mora, respondebat *Frassonus*: se tamen nolle, altero Medico non approbante, immo palam improbante, Corticem exhibere. Interim non obstantibus, quotquot praescriberentur, Cardiacis, aliisque praesidiis, novus de more Paroxysmus accessit, iisdem, sed longe intensioribus stipatus symptomatis, quibus insuper singultus frequens, atque importunus addebatur. Neque evanescere brevi, ut antea, eadem symptomata, sed tantum imminuta fuere cum proportionem aliqua ad decrementum Febris, quae tamen protrahi coepit usque ad alterum paroxysmum, remissionem tantummodo modicam passa loco consuetae intermissionis. Intra duas, vel tres accessiones mortem futuram non sine lacrymis ominabatur *Frassonus*, omissionem culpans ex una parte, & ex alia gratias Deo reddens, eo quod fors veluti quaedam obstiterit oblationi Corticis, quem fortassis inaniter, & cum calumniae periculo tentatum (quandoquidem tentatus foret) ex iis, quae subsequuta

erant, suspicabatur. Clamabat contra alter Medicus, optimum consilium fuisse, abstinuisse a Cortice, quippe remedio semper quidem suspecto, maxime vero in hac Febre, occultam prius, mox remediorum methodicorum ope develatam, malignitatem praeseferente. Clarissimus interim J. C., Philologus eximius, & Mathematicus Sereniss. Ducis, D. quondam *Jo. Baptista Boccabatus*, Amicus Aegrotantis amantissimus, *Frassonum* privatim interpellavit, suavitque, ut Corticem vellet exhibere, posthabitis alterius Medici in Curam nequaquam vocati sophismatis, quotiescumque eo remedio Aegrum sanari posse haud improbabiler crederet, quem ceteroqui ad exitium properantem, ipse clare diagnoscebat: subdens insuper, æquum non esse, ut propter Medicas cavillationes, vel politicas cautelas, vel vana officia periret homo, intentato remedio probabiliter profuturo. Ad hæc respondebat *Frassonus*, occasionem suapte natura præcipitem jam lapsam esse, Febrem jam, nedum Continuum (et si remittentem) sed & malignam esse redditam, & consequenter Cortice inexpugnabilem. Interroganti vero, num saltem sine damno posset remedium tentari, ultro respondebat, se credere Corticem in hoc casu æque insontem, ac invalidum: nolle tamen proinde dubio tentamine illum Aegrotanti præscribere, *nec subire speciem ejus ut occisi, quem brevi fors ipsius erat peremptura*. Si res sic habet, subjunxit alter: offeram ipse; nec refert, si Virum mihi amicissimum, ceteroqui moriturum jugulasse dicar, quem interea forte servare per remedium tutum in periculo certo, & in occasione ancipiti, extra spem non est. Hoc dicto, abiit statim, *Drachmas duas* pulveris Chinæ Chinæ a Monialibus emptas secum detulit, easque ex Vino, ut mos erat, Aegro potandas dedit ingruente paroxysmo: quo non sine magno discrimine tandem transacto, novus non rediit. Inscius rei gestæ alter Medicus triumphum canebat, reportatam de morbo victoriam Cardiacis adscribens. *Frassonus*



*sonus* vero totius successus conscius jam factus, dolo laudabili, eundem Corticem adhuc præscribebat ad *semidrachmam* singulo mane in forma boli, sub nomine Confectionis Alchermes, & de Hyacintho. Hac pia fraude citra aliud pharmacum Ager a reliquiis febrilibus, a motibus convulsivis, singultu &c. intra paucos dies feliciter evasit, nullam omnino dein recidivam passus.

Hujus eventus menti meæ tunc valide impressi crebra postmodum reminiscencia quemadmodum mihi occasionem præbuit olim excogitandi Methodum efficaciorē China China utendi pro Februm Perniciosarum tum Intermittentium, tum Subcontinuarum medela, ut nuper innui: ita postea fidentius animum addidit pro faciliore, vulgarique illius usu in quibuslibet Intermittentibus non plane quidem *Perniciosis*, sed ob adjuncta in progressu gravia symptomata naturam *valde corruptricem* nactis. Sic nuper [ut unum, alterumve hujusmodi exemplum cursim subnectam] tenellam Virginem, Neptem ipsius Præceptoris mei *Frasconi*, Tertianā duplici primum Intermittente, mox Subcontinua cum præexistente Chlorosi, ac Cachexia detentam, dum transacta decima septima morbi die Febris in Acutam jam sensim degenerantis indicia se proderent cum notabili periodorum obscuracione, China China bis in die parca dosi propinata satis laudabiliter curavit: Chlorosi quidem pro tunc superstitē, sed & ea quoque propriis remediis opportuniori demum tempore sublata. Aliam denique (ne longior sim) Adolescentulam, Infectoris cujusdam filiam antiqua item Chlorosi, tussi molestissima, diuturna que si-

mul Tertianā duplici Subcontinua, quæ acuta palam symptomata tandem asciverat, laborantem, unde illi vel Vitæ periculum proxime imminebat, vel transmutatio Febris in habitualement [id quod macies insignis cum calore ad tactum acerrimo, tussis contumax, & symptomatica indefinens sudatiuncula satis indicabant] exhibitus in his circumstantiis Cortex, idemque ad diuturnum tempus continuatus, ac repetitus, perfecte sanavit.

Atque has tandem Historias, quarum ferme quælibet rationalem, & cautam Chinæ Chinæ administrationem ostendit in Febribus Intermittentibus, suapte quidem natura *benignis*, sed quopiani sui progressus tempore ob superventum graviorum symptomatum naturam *corruptricem* adeptis, placuit recensere: immo & aliquam ex iis inferere, in quibus Febris neque Perfectiva quidem, sed neque ex se plane Corruptiva, alicui morbo etiam insanabili præorto, vel saltem præconcepto, supervenit, qualem *num. xv.* supra retulimus. Quæ sane omnia non alio nomine hic fuimus complexi, nisi ut multifariæ oblationis Peruviani Febrifugi in quibuslibet Intermittentibus non Perniciosis, ut & in quibusvis illarum circumstantiis, & quolibet pariter ipsarum tempore institutæ, exemplum aliquod prosteret modo magis, modo minus felix, ad illustranda secundum praxim, confirmandaque cuncta, quæ antea statuimus, & ad complementum integrum primi hujusce Libri: cui propterea, omnibus jam, quæ in eo proponere contigit, absolutis, Deo dante, finem imponimus.



# THERAPEUTICES SPECIALIS LIBER SECONDUS.

Februm Perniciosarum Intermittentium (saltem ab ortu) descriptionem, & curationem continens, ex aliorum Auctorum observatione, additis Scholiis materiam hanc magis illustrantibus.

## CAPUT PRIMUM.

*Malignus morbus & prava in universum Februm huiusmodi Perniciosarum Natura indicatur. Accurati circa hanc materiam Auctores perpauci. Vis Peruviani Corticis adversus eas eximia.*



AM vero postquam latiuscule spatiati sumus, fas est paululum vela contrahere, & recta deinceps terminum petere, in quem ab exordio, totoque pariter primi Libri decursu saltem indirecte collinavimus. Etsi autem, quæ hactenus tradidi, reputem talia, ut cum subsequenter, licet longe certioribus, non male cohæreant, quippe nec in semetipsis vana, nec in praxi absorta, vel contemnenda: si cui tamen ea non prorsus arrideant, liberum sit ei sentire quod velit in rebus identidem tam incertis, ac dubiis, me quidem hic loci minime reluctante. Quamobrem mutata in totum priore scena, fingere saltem non renuo, fallaces fuisse usque adhuc omnes ratiocinationes meas. Atque hac fictione supposita, do lubenter cuicumque (nec piget) Chinam Chinæ in benignis Intermittentibus, etsi fuerint diuturnioris, aut difficilioris judicationis, non adeo liberaliter esse usurpandam: do, quod ignoro nobis modo intimiore operationis illius, quasi agen-

*Torti Therap. Spec.*

tis incantamenti adinstar, detur ansa suspicandi, quod causa Febris intus detineatur, quod Febris ipsa consopiat potius, quam sanetur, post repetitam quandoque pluries, ac pluries remedii oblationem nihilominus reversura. Hæc, inquam, omnia do cuicumque contra Febrifugum istud pertinacem etiamnum antipathiam fovendi; immo fateor, quod hæc ipsa qualiscumque nonnullorum constans averratio, quantumvis vana, non potest, quin mihi metipsum, oppositum licet palpanti, sed de imbecillitate mea, ut par est, demisse sentienti, quidpiam vel demat, vel saltem enervet fiduciæ meæ: ut propterea Peruvianum Corticem rariuscule in iisdem Intermittentibus *benignis*, quæ scilicet non raro *depuratorie* sunt, nisi aliqua inde emergens urgeat necessitas, consuescam præscribere, ut alias edixi. Quod forte haud facile credidisset quisquam ex iis, qui me pro huiusmodi remedio in antecedentibus quasi declamantem (neque tamen dicti me poenitet) ac veluti pro aris, & focis dimicantem legerit.

Revera minime ex animi proclivitate ingenita erga illud, remedium istud tueor, vel opiniones meas, vel dicta mea, quæ parvi facio: sed miseros tantum Ægrotantes studeo tueri ab exitio, ceteroqui nonnunquam irreparabili, quomodocumque illos & prompte, & certo tueri valeam. Neque enim refert in

G præ-



præcipiti casu, & instante morte querere, utrum tollatur omnino, an solum consopiat, vel figatur Causa Febris, sicuti neque, an Curatio sit quodammodo Palliativa, & an metus sit Recidivæ. Qui enim jam prope moritur, quoquo modo sanari queat, sanetur saltem ad tempus, ut iterum possit ægrotare, ut in posterum, dummodo serius, possit occumbere. Hoc unum si sponderem, non quid minimum sane sponderem. Quid si integram, favente Deo, incolumitatem pollicear? Cum ergo istam & firmam, & tutam opportuno Peruviani Corticis usu in quibusdam Casibus, etiam ferme deploratis, obtineri posse plurimo usu compererim: ideo, posthabitis Theoriis omnibus, quæ fallaces esse possunt, & fortasse ut plurimum sunt, certam tantummodo sanationem in certo periculo ostendam; quod est potissimum totius nostri Tractatus argumentum.

Contingit itaque aliquoties, ut Intermittens Febris quælibet, maxime vero Tertiana tum Æstiva, tum Autumnalis, tantam præferat pravitatem, eamque primis paroxysmis adeo occultam, adeo latentem, ut quantumvis Medicus (nisi admodum cautus sit, & expertus) nil tale metuat, illa tamen inopinato tertia, quarta, vel quinta accessione Ægrum tollat de medio, omnibus artis conatibus plane irritis, excepto Peruviano Cortice: cui uni, si valide usurpetur, indita fuit a Deo facultas, hominem in extremo periculo constitutum præsentaneo auxilio ab Orci faucibus eripiendi, dummodo ad vigintiquatuor horas circiter victurus sit, quatenus scilicet per totidem distet a nova accessione ipsum proxime inreremptura. Priusquam tamen certam Methodum prodamducendi in usum strenuum istud Medicamentum in hujusmodi casibus, in quibus posse illud proficere, ne per somnium quidem ante me (absit a verbo veritatis jactantia) cogitaverat quisquam apud nos, necesse est, casus ipsos, seu Febres illas peculiare, atque exitiosas, in quibus specialiter conve-

nit, exacte describere: maxime cum istiusmodi Febres constituent intra genus Intermittentium speciem suam determinatam, in varias etiam differentias, seu subalternas species divisibilem. Neque enim illæ, licet non admodum frequentes sint comparative ad Intermittentes benignas, sunt adeo infrequentes, ut quolibet anno aliquas saltem earum cuilibet Medico Ægros plurimos invisenti non contingat observare; immo audeam asserere, illas in quibusdam constitutionibus præsertim fervidioribus, & prope dies in primis caniculares, necnon etiam ultra Autumnale Æquinoctium, adeo familiariter nunquam grassari, ut nescio quid, fere dixerim, Epidemici redolere videantur. Atque ideo non parum forte præstitero, neque Monstri cujuscumque in Medicina perrari jugulationem tradidero, sed morbi ferocissimi, & passim obvii, suamque, ut dictum est, speciem apud Medicos saltem accuratiores obtinentis, si Februm harum prius Naturam, aut morem describam, ut possint dignosci; mox Methodum exhibendi in iisdem Peruvianum Corticem proferam, ut possint expugnari.

Ne tamen videar affectare novitatem, ubi ea vere non est, palam profiteor, in ore Medicorum identidem subaudiri illarum nomenclaturam, easque vulgo *Perniciosas* appellari. Sed id fere tantum dici consuevit, cum jam hominem interfecere: quasi Medicus eo casu non ultra teneatur pro sui tutela, nisi de aperiendo post obitum Ægrotantis nomine Morbi inopinato lethalis facti, sitque satis, si re infelicitè gesta stupidus exclamet, ac terrefactus — *Quis unquam credidisset?* Neque plane reprehensibilis hucusque fuit hujusmodi excusatio: cum retroactis temporibus vix tantillum luminis proflaret Medicis pro tempesta fraudulenti hujusce Morbi dignotione, aut curatione. Etenim nulla fere apud Auctores (exceptis infra recensendis) facta reperitur nisi per transennam mentio Intermittentium *Perniciosarum*: & siquidem reperitur; nulla tamen peculiaris



liaris earundem præscribitur cura, sed oscitanter prætermittitur: dum ex adverso *Benignarum* sola periodo se proidentium, & septeno ut plurimum circuitu sponte cessantium, graphica traditur descriptio, & copiosissimus instituitur pro ipsarum curatione remediorum apparatus.

Unus inter Antiquos excipitur, ut qui utrumque egregie præstitit, *Ludovicus Mercatus*, Vir celeberrimus suorum temporum, & duorum Hispaniæ Regum, Philippi Secundi, & Tertii Protomedicus, qui Tertianarum Intermittentium Perniciosarum descriptionem æque ac curationem distinctam pro viribus Artis illius seculi incomparabili sedulitate complexus est. Illius deinde animadversiones Diagnosticas tantum, atque Prognosticas in fide Auctoris potius, quam ex propria observatione retulit, ac in epilogum satis luculenter contraxit *Daniel Sennertus*, omissa tamen multifaria primi Auctoris curatione, singulis Perniciosarum speciebus, aut differentiis ab ipso constitutis, ac commodata. Et quasi nil de hac re possit ipse testari, priusquam sensa *Mercati* referre aggrediatur, hanc veluti protestationem partes tantummodo relocatoris agens præmittit — *Verum, licet Tertianas Febres Intermittentes omnium Putridarum brevissimas, & securissimas esse vulgo tradatur: quia tamen Ludovicus Mercatus lib. de febr. 6. experientia sibi compertum scribit, etiam tertianas nonnunquam periculo non carere, & febres etiam Intermittentes inopinato Ægros non paucos perdidisse, breviter complecti libet, quæ ille adnotavit* — Reliqua vide apud eundem *Sennertum* suo loco. Alii quoque Auctores (quod & alibi sum dicturus) Perniciosas Intermittentes dari scripserunt, aut docuerunt exemplis, sed obiter; nemo autem, quod sciam, Spartam hanc, ut *Mercatus*, adornandam suscepit.

Inter Recentiores vero *Richardus Morton* Practicus Londinensis felicissimus Intermittentis Perniciosæ descriptionem sub aliorum potius Morborum nomine,

quam sub nomine ipsius Febris (cujus tamen iidem morbi sive veri, sive credi, sunt mera symptomata) aggressus est: & quod magis refert, illius Curationem ope Chinæ Chinæ (mibi quoque, antequam ipse sua ederet scripta, Urbe mea teste compertam) auspicato attigit, & experientia multiplici confirmavit; licet apud nos, nescio quo Fato, perexiguam, ac fere nullam visus sit fidem obtinuisse; forte quia, vel quæ protulit de suo Veneno Febrili, & de actione Peruvianæ Antidoti in illud, communiter parum arriserint, vel quia larva illa Proteiformis, quam ipse Febribus Intermittentibus imposuit (easdem sub aliorum morborum specie, omni suppressa Febris signatura, latere asseverans) illas adeo velarit, ut potius Morbos illos, quam Febres velle curare per Chinam Chinam sit creditus. Quod equidem, sicuti in his terminis falsum esset, ita sic intellectum pro falso forte reputatum est; licet Auctor omni laude, omnique fide dignissimus, si attente legatur, vere aliter sentiat.

Cum itaque contra Methodo clarissima in Perniciosarum Intermittentium descriptione procedat *Mercatus*, Illi propterea, utpote Primo Observatori, concedenda est in præeundo dignitas ordinis. Et quoniam tam dilucide scripsit, ut non facile fas sit æquali claritate, ac ordine idem præstare, liceat potius, quam vel id intentare, vel Lectorem illuc relegare cum incommodo, liceat, inquam, quæ ipse exaravit, transcribere ad literam, prout jacent in Codice meo, & brevibus tantummodo Scholiis apposis, a veteris Doctrinæ Zizania tantillum purgare. His absolutis, *Mortoni* postmodum sensa lubet adjicere in subsequentibus, ad hoc, ut Lector commode possit utramque descriptionem ob oculos positam, cum utilitate simul conferre: ut demum, tantis roto secundo hoc Libro præmissis luminibus, clarius quæ ex observatione mea, & diutina praxi, ipse tandem sum prolaturus in tertio, valeant intelligi,



credi, & in communem usum adoptari.

## C A P U T II.

De Tertianâ Perniciosa ex Ludovico Mercato, Scholiis aliquot insuper adjectis.

**I**N eo febrium genere, quod febres complectitur tertio die exacerbationem efficiunt, perniciosa hæc, neque satis vulgata, aut cognita tertiana species, non sine magno laborantium exitio, & Medicorum admiratione reperitur. Quæ sane ut rarius accidit, ita difficilius noscitur, graviusque ob id invadit, & ob ignorationem, majorem infert terrorem, & admirationem; & quod perniciosius est, negligentius curatur. Quis enim credet usquam, tertianam febrem posse lethalem fieri, eo maxime cum ab Hippocrate dictum sit: Quocunque modo intermiserit, periculum abesse significat, & mille aliis in locis tertianam brevissimam, securissimamque esse. Sed mirari jam desinat quisque, cum experimento non admodum raro constet, febres multis modis intermittentes inopinato laborantes non paucos perdidisse, decepisseve Medicos, vel doctissimos. Quamobrem quod experimento mihi in hac re habeo compertum, hoc uno capite patefacere studui.

### S C H O L I U M I.

Auctor reapse ad Perniciosæ Febris genus solas tantum Tertianas cum simplicibus, tum duplices refert; quod quidem frequentius, & infortunio magis præcipiti solet contingere: nihilominus etiam Quartanis Intermittentibus tam simplicibus, quam duplicibus, aut triplicibus eundem characterem (rarius licet, ac lentius) nonnunquam accedere, satis ostendunt Historia ultima Libri antecedentis, alique in subsequentibus exponendæ. Idem quoque videre est apud Donatum, Mortonum, & Horstium. Idque ipsum pariter Intermittentibus quibusvis quandoque accidere posse, nullus dubito. Pravam autem hujusmodi Febrium naturam satis aperte in ipsa definitione patefacit, ubi eas lethali nomine statim designat,

Est itaque perniciosa tertiana febris quædam, quæ simulata tertiani circuitus effigie, lethalis, & mille accidentibus periculosissimis implicata existit. Tertianæ tamen vocabulo, & simplicem, & duplicem subaudiendam esse diximus, cum utramque perniciosam esse haud raro mihi, & multis compertum sit.

Fieri quidem perniciosam aliquam tertianam, contingit uno e sex modis: Primò quidem, occasione membri alicujus præcipui, in quod decumbat humor, quem natura a vasis ad eorum extrema transmittit: nam cum membrum ex præcipuis sit, dubium non est, vitæ periculum impendere ex læsione quavis in ipsum illata, haud secus quam in turgentibus humoribus, a quibus factam affectionem ob id periculosam arbitramur, quod vereamur, ne humor turgidus in aliquod membrum princeps irruat. Secundò talis efficitur, quia humor, qui a venis ad prædicta extrema ejicitur, tenuis admodum sit, & summe putridus, qualis censetur tenuissima bilis copioso ichore plena: quo fit, ut qui hac febre laborant, frequentissime syncope corripiantur, & eo, quod facillime exolvantur, inanitione periclitentur, sudore enim pernicioso dissipantur, quod ex humoris vitio, spirituum, & alitura substantiæ plurimum cum sudore habeat. Tertio ab humoris (non putredinem quidem) sed summam pravitatem, vi pravorum alimentorum contractam, cujus constat meminisse Hippocratem 7. popul. tex. 81. referentem causas, & occasionem cholera morbi, quem in has febres commigrare plerumque refert, ut optime intellexit Vallesius: aut prodeunt sic vitiosi ob ustionem, & peculiare vitium, quale sortiuntur bilis vitellina, prassina, æruginosa, & quæ in confinio est atræ bilis, quippe cum tanta sit horum humorum pernicies, si accedat insuper putredinosus calor, eosdem adeo excitat, & deterrimos reddit, ut quocunque ierint, perniciosissima inferant, & lethalia accidentia. Multi vero ex barbaris Medicis arbitrati sunt, impossibile esse, ex prædictis humoribus febres fieri, cujus census fuere Isaac, & Ravius,



Rasius, Avic. Serapio, & Halia, eo quod humores ejusmodi, ut Averro. 7. collig. scripsit, de natura essent veneni: quos protinus in quovis affectu natura per vomitum trudit, licet lethaliter sapius: & nituntur probare suum dogma ex Arist. qui 4. meteor. profert, ignem, & quæ ignea sunt, putrescere non posse. Verum si quis rem ipsam, & auctores penitus consulat, reperiet, hos humores, & febres, & alios etiam affectus excitasse: nam primo eorum meminit Galen. lib. 12. method in exemplo de juvene febriente, qui æruginosam evomuit choleram, & ob id convulsione correptus. Zoarus etiam expresse 3. thes. febrium reminiscitur, quæ ex his humoribus concitantur, dicens: Febris, quæ fit de genere transitionis febris ephemeræ ad febrem cholericam, si fuerit de genere prassinæ, aut æruginosæ, habebit accidentia magis fraudulenta. Item dicit: Febris ex cholera, quæ in ultima caliditate, ac siccitate existit, cum substantia densa, & crassa, sicut est cholera vitellina, prassina, & æruginosa, febres perniciosas gignit, & Aver. 4. collig. scripsit etiam in confirmationem hujus veritatis. Pejor specierum causonis est illa, quæ fit ex cholera zinaria, vel prassina, & tertiana insanabilis. In tanta autem Auctorum controversia censeo primos sensisse, non posse fieri febrem salubrem ex prædictis humoribus, non autem ex toto negasse ejus generationem. Quinimmo ex eorum rationibus ego colligo, non raro posse succrescere febrem interpolatam, nam ut Isaac scribit, tantum est odium, quod natura habet cum cholera prassina, & æruginosa, quod non patitur ejus malitiam invenire: quo fit, ut certius sit ab hoc humore febrem interpolatam fieri, quam continuam; quam sane fore gravissimam, & malignam, nemo dubitabit. Quartò, tertiana efficitur perniciosa, ob humoris crudi, & inequalis crassitie, ac tenuitatis maximam copiam: cujus ratione more febris syncopalis humorosa tertiana etiam talis efficitur, unde non raro, sicut illa cordis calorem, ita hæc totius corporis calorem extinguere nititur, & Torri Therap. Spec.

ob id periculosissima existit. Quintò non minus perniciosa efficitur ex adjuncto aliquo accidenti; nimirum ob aliquem defluxum, quem calor febrilis mox a principio concitat, cujus ratione thorax, pulmo, & cor non raro, aut ventriculi os anxietate, difficili respiratione, & pulsus interceptione, mille modis periclitantur. Quod etiam & longe gravius accidere conspiciamus, si uterus, aut uteri aliquod vitium febrilis caloris vehementia in consortium trahatur. Sextò vero & ultimo perniciosior efficitur tertiana ob venenosam, ac pestilentem, & contagiosam aliquam humoris, qui e vasis ejaculatur conditionem, qui sane eo quod moveatur, longe graviora efficit accidentia. Quinimmo die intermedio latitans, & quiescens, ac humoribus aliis adjunctus videtur nil mali efficere, neque corpus laborare, post vero in accessione propriam naturam, ac venenosam conditionem, non sine magno laborantis malo ostendit. Hæ sunt in universum, optime Lector, causæ hujus perniciosi mali, quas hucusque adinvenire valui, quarum omnium seorsum meminisse opus erit, ut cujusque constent natura, signa, & medendi ratio, si prius omnis tertiana perniciose in communi signa, & præsagium scripsero.

## S C H O L I U M II.

Cum notabilem in his Febribus diversitatem noverit Auctor tum ratione sævitiei, & pravitatis iisdem veluti intrinsecæ, tum ratione celeritatis motus, tum ratione symptomatum variæ conditionis, plusque, vel minus intensorum, tum denique ratione aliorum adjunctorum, indolis etiam, atque speciei diversæ, mirum est, quam ingeniose conatus sit, cunctas hujusmodi differentias distinguere per suas causas, labantibus licet innixus sui seculi fundamentis. Negari idcirco non potest, quin ipsis in tenebris aliquod cæspitanti lumen affulserit, vi cujus nonnunquam abstrusam hujusce materiæ veritatem a longe saltem salutarit. Sic & Philosophi Ethnici, innumeris licet erroribus involuti, in veritates quandoque orthodoxas inscii impegerunt. Si vixissent Atavi nostri



At in hæc usque tempora, fortassis & supra nos profecissent. Ob id semper colendi, & suspiciendi, dummodo non eo usque, ut nos ab ulterioribus inquirendis avertant, aut remorentur: unde quis merito nobis exprobet cum *Tacito* socordiam nostram — *dum vetera extollimus, recentium incuriosi.*

*Monstrant quidem tertianam fore perniciosam gravia quædam & perniciofa accidentia, quæ statim primo accessu necessum est hæsitabundum reddant Medicum. Hujus naturæ est laborantis vultus, prima accessione cadaverosus, aut nimis tumidus, cum pulsus inæqualitate, parvitate, debilitate, aut interceptione, vel asphyxia. Urina nimis crassa, & pravi coloris, inquietudo insolita, anxietas, syncopis, animi deliquium, exsolutio, & frigidi sudores, vel toto accessionis tempore inordinati rigores, difficiles respirationes, deliria, aut somni profunditas, vomitus etiam æruginosus, paucus, cum gravi nausea: & qui non confert. Alvi fluxus pinguis, dysentericus, variegatus, aut synceri humores, ingens totius corporis gravitas, aut inquietudo, & sitis quæ nullo potu sedatur. Sed præcipue tertianam perniciosam esse ostendunt hæc signa, & alia, quæ cæteris tertianis sunt communia, cum ab eis nondum ex toto in die quietis liber evadit laborans: sic etenim malum portendit delirium aut somnus, qui usque in diem quietis protrahuntur: item eadem die languidos, inquietos, anxios, & siticulosos superesse laborantes, aut alio quovis accidenti oppressos, quantumvis febris, vel levissima, vel nulla appareat. Sic rigorem vigente febre superesse perniciosum censemus: aut rigoris tempore corpus sudare, vel sudando frigere, animo linqui, & plurimum vexari. Quæ sane omnia diligenti animo expendat Medicus oportet, ut discat primo accessu quantum mali affectio minari possit.*

### S C H O L I U M III.

Diagnosis in universum completa est, & Medici practici consideratione dignissima, quia omnia signa generaliter comprehen-

dit. Sæpe quidem ex istis pauca concurrunt, ac quandoque vix unum tantum; quod tamen, si vehemens sit, & ex deterioribus, plurimi faciendum est. Nec ideo fraudulentæ quieti subsequenter intermissionis nimium fidendum, sicut ex opposito neque nimis metuenda afflictio, qualitercumque gravis. Et in hoc judicium difficile; quod, ut maxime oporteret, ita maxime nequit doceri.

Atqui licet prædictas tertianarum species perniciosas esse constet, non subinde existimandum est, omnes fore lethales: quædam enim perniciose, & timore plenæ sunt, alia in alios morbos migraturas se ostendunt: nonnullæ in diutinos affectus, & plerique licet sævissimis accidentibus insigniantur, non omnino lethales existunt. Sic profecto quæ ex defluxu ad membrum aliquod princeps fiunt, plerumque perniciose sunt, & lethales, sed ex his quædam magis, & quædam minus: quæ autem ad cerebrum tendunt, lethales fiunt, si in lethargum, aut phrenitidem commigrent: quæ vero in cor irruunt, sive ex oppressione, sive ex humoris vitio, omnes lethales sunt. Inter quas hæc est differentia, quod hæc, quæ ex oppressione fiunt, in principio accessionis interficiunt, quæ vero ex humoris vitio, non nisi in declinatione, ob virtutis, & caloris vitalis dispendium. At si in os ventris humores irruant, partim fiunt lethales, & partim secus: nam si ex ventre per vomitum fiat copiosa, & spontanea vacuatio, conjectabile est conferre, si laborans toleraverit; sin aliter, minime: verum, si plurimum laborans conqueratur, & nihil notatu dignum excreverit, vereri oportet, ne præ nimio dolore succumbat virtus, & morbo non sufficiat. Item si syncopis frequenter accidat, mortem ocysime venturam monstrat; sin aliter, minime, sed morbum fore gravem: Quod si in jecur malum incumbat, vel morbi diuturnitatem, vel hydropem pertimescere oportet. Et tandem in his omnibus malignam, & continuam febrem posse subsequi existimandum est; sic profecto ex his, qui ex putredine tenuium humorum exsolvantur, vel subitum



bitum virtutum casum, vel hecticam febrem vereri oportet: hoc quidem consumptis tenuibus solidorum membrorum humiditatibus, illud quidem nimium resolutis spiritibus. Qui vero ex crudorum, & inequalium succorum copia laborant, plerumque suffocatione periclitantur, & maxime ineunte accessione: vel saltem febris in diuturnissimum commigrat affectum. Item qui ex humoribus adustis, & omnino perniciosus infirmantur, vel in causonem, vel in hecticam febrem, vel in gravem dysenteriam degenerant. At qui fluxu alicujus humoris simul cum febre interpolata detinentur, vel suffocantur catarrho (ut ajunt) suffocativo vi accessionis evocato, vel cessante tertiana, difficulter deinceps respirant, aut tale symptoma patiuntur, quale fuerit membrum, in quod defluxus prolabitur. Ceterum, qui venefico, & pestilenti humore abundant, licet interpolata febre corripiantur, non ob id in minori periculo versantur, quam qui pestilenti alia febre laborant, sed forsitan majori, quod in die accessionis veneficus ille humor valde moveatur, quod solet in pestiferis morbis perniciosissimum esse, & sic non raro conspiciamus, subita morte quam plurimos inopinato interiisse.

## S C H O L I U M IV.

Prognosis pariter undequaque absoluta, tam hic, ubi generaliter instituitur, quam infra, ubi instituitur specialiter, quamlibet Perniciosarum differentiam respiciens. Digna ideo ubique, ut diligenter perpendatur sicut Diagnos, ita & Prognosis Auctoris, quarum postrema eo verior, quo funestior. Febres namque vere Perniciosæ Aëgrum interimunt sæpius (nisi illis cito, & valide Cortice opitulemur) quam in diuturnos morbos commigrent. Nonnullas equidem, antequam in iisdem curandis Cortice uteretur, etiam sine illo sanatas vidi; at paucas, & difficillime. Sed eheu! quot vidi contra iisdem sublatis, quos vix dubitem fuisse sanabiles, Cortice exhibito, si tunc virtutem illius integram, validamque (quod seriuscule comperi) ejusdem administrandi methodum perspectam habuissem.

His habitis opus erit, uniuscujusque præ-

dictarum causarum seorsum meminisse, ut cujusque constent peculiaria signa, præsagium, & propria, ac genuina curandi ratio.

## C A P U T III.

Prima Tertianæ Perniciosæ differentia ex eodem Mercato, additis, ut supra, Scholiis.

**E**FFICITUR quidem perniciosæ tertianæ fors, & differentia, quod humores transmittat natura errans, aut impotens in partes, & extrema vasorum membri alicujus cordi, vel alteri membro principi vicini. Accidit profecto hoc mali genus his corporibus, quibus adeo totius corporis vasa, vel obstructa, vel carne, aut pinguedine oppressa sunt, quod ad extimas vasorum propagines, & eas quæ degenerant in carnosas partes sese natura exonerare minime possit, vel quod ipsa nimis languida, & impotens sit. Quo fit, ut cum e vasis majoribus primum se nitatur exonerare, humorem ad partes internas per vasa sibi proxima studeat transmittere; qua in re conjectabile est, necessario humorem transmissum prope aliquod membrum princeps prolapsurum. Occasio autem transmittendi humores communis naturæ est cum reliquis febribus interpolatis, nimirum copia, aut vitium irritationi naturæ sufficiens, sed in hac febre non aque valens, quod longe a partibus præcipuis non possit pellere, vel impedita, ut dictum est, si id sua sponte possit.

## S C H O L I U M I.

Quod inquit Auctor, fieri per affluxum humorum decumbentium in partes, mediantibus venis illuc eosdem propellentibus, intelligere facile possumus, fieri per stagnationem eorundem, mediis arteriis illuc delatorum, nec pari facilitate absorptorum a venis, sive sanguiferis, sive lymphaticis. Reliqua fundata supra vanas hypotheses de Natura transmittente in partes internas, & viscera, cum non possit, sive propter imbecillitatem propriam, sive propter impedimentum ali-



quod, transmittere ad remotas, & externas, corrigantur mechanice, & redigantur ad eundem modulum.

*Verum licet in hac febris sorte hac sint communia, nihilominus tamen duplex ex hac causa suboritur febris conditio, duplicia, & varia accidentia, & longe diversa signa, ac ex consequenti varia presagiendi, & curandi via, quæ omnia specialius expendisse oportet.*

*Ad primum igitur accedendo, conjectandum est, transmissum humorem ad extrema vasorum membri præcipui, aut juxta ipsum, vel esse copiosum, vel malignum: quippe ex hac varietate reliqua, quæ sequuntur necessum est insigniri. Verum potissima varietatis ratio ex membri, prope quod incumbit humor, natura, & præstantia petenda est; si vero in venulas juxta cor vitiosus humor illabatur, tunc procul dubio syncopem, pulsus parvitatem, frequentiam, inæqualitatem, & aliquando omnimodam asphyxiam sequi necessum est. Quæ omnia accidere solent, cum faciei rubore, sudore, & oculorum cavitate ob impensam spirituum vitalium resolutionem, ex quo subitum virium casum, & inopinatam mortem reperi oportet, ac plerumque in accessionum inclinatione, vigore vitali simul cum febrili calore solutis. Quod si humorum crassities potius quam malitia prope idem etiam membrum causam præstiterit, tunc quidem pulsus magna inæqualitate inter magnitudinem, & parvitatem pollet, ubi parvitas elucet magis, & intercadens nonnunquam efficitur, ac non raro myurus deficiens. Torpet laborans, fronte exsudat, & maxime frigidum, suspiriosus est, & nesciens referre quid sentiat, plerumque angore premitur, & impotens ad motum, quasi gravi onere pressus efficitur. Ex qua sane affectione laborantes, vel cum frigido sudore, & pulsu formicante, aut omnino deficiente, tertia, aut quinta accessione pereunt, vel si has effugerint, gravi febre, eaque continua, & plerumque de malignarum sorte, corripiuntur.*

*Si tamen ad vasorum extrema, quæ ad ventris os terminantur, vel juxta ip-*

*sum projectus e vasis humor profluant; ibidemque diu immoretur, dolorem orisque ventriculi morsus sequi est necessum, nec non & cardiacum affectum, cum biliosis, æruginosis, aut nimis crassis, aut viscidis vomitibus, ceteram minutis, aut præcedenti ingenti nausea, utpote humore penitus in carnis venulis imbibito (nam in reliquis tertianis licet copiosior in ventrem confluat bilis, non quidem ad carnem oris ventriculi, & per venas alimenti, sed ad cavitatem per communes canales) quod quidem monstrat anxietas, inquietudo, exsolutio pulsus, vel ingentissima frequentia, & parvitas, vel raritas, maxime si prope syncopim fuerit laborans, ut multis videatur febre carere, adest & frigidus prope frontem sudor, faciei pallor, oculorum grandis cavitas, & calor. In quo quidem vereri oportet (ni cito præveniatur, potissime si frequentior succrescat syncopis) mortem quinta accessione, aut ante, nisi affectus factus fuerit continuus, in quo jam nihil transmittitur in os ventris, utpote cessantibus accessionibus, & humoribus intra vasa manentibus, licet ob id laborantes non omnino videantur periculo carere, verum præbet expectandi inducias, quod accidentia majori ex parte cessaverint.*

#### S C H O L I U M II.

Quæ dicuntur in ambobus hisce locis de translatione febrilis humoris per vasa alimentum deferentia (quæ pariter, non pro Venis, quæ revehunt, sed pro Arteriis, quæ deferunt, sunt habenda) ad Cor, & ad os ventriculi, non sunt omnino extra probabilitatem inquantum Fermentum febrile sanguini affusum, per omnes Arteriolas, & si cui lubeat, etiam per Nervos, (inquinato eadem occasione illorum succo) ad ea viscera tendentes potest dispergi. Probabilius tamen crediderim, Cor ipsum ab affluente intra suos sinus una cum sanguine eodem febrili latice, molestiam fere omnem, quem patitur, posse recipere; Ventriculum vero eam mordicationem pati, non modo a succis intestinalibus, motu inverso in eum assurgentibus, propter irritationem factam a Fer-



Fermento febrili in ductibus Chyliferis, & partibus circumjacentibus (unde & tunicarum, nervorumque stomachicorum consensus) verum etiam a succo glandularum ipsius ventriculi, aut depravato, aut immaturo, & per violentam expressionem ab iisdem stillante, illius sensile orificium spasmodyce vellicante, portionemque febrilis fermenti forsitan constituyente. Quæ omnia, & singula suis temporibus Auctor nosse non poterat. Animadversione denique dignum est, quod legitur Cap. Si tamen ec. prope finem, nempe Febrem hujusmodi Cardialgia comitatam quarta, vel quinta accessione mortem minari, nisi affectus factus fuerit continuus. Revera etenim observatione didici, rem ita se habere: ac proinde peioris conditionis esse hanc Febrem, si sit Intermittens, quam si fiat Continua; siquidem tunc cesset, ut assollet, symptoma ferox lethalis Cardialgiæ: sicuti æque verum est, quod ex hujusmodi transmutatione Febris Intermittentis in Continuum impetrantur quidem induciæ, non tamen aufertur periculum; sed saltem differtur.

*Verum si vel ad capitis vicinam partem mutatur humor, vel ad ipsum caput, aut omnino ex humore vapores consendant, in gravem somnum laborantem delabi, vel in gravem aliam ex soporiferis affectionibus conspicias, maxime si caliginosus, & ex crassa materia ortus prodeat vapor: sicut dum acris est, & mordax, in paraphrenitidem migrat affectio, cessat tamen in die quietis. Caterum si humoris aliquid errabunda natura illuc miserit, non omnino ad antiquum statum laborantem redire conspicias: ac pertimescendum est, ne tertia, aut quarta accessione iterum in ipsum caput novo humore irruente omnino essentielle fiat malum. Quod sane ostendit dies intermedia, in qua laborans non omnino resipiscit, si vel dormierat, vel phrenitico aliquo affectu laborabat.*

## S C H O L I U M I I I.

In Capite Tragœdiam fieri, vel propter stagnationem succi febrilis, per arterias cum sanguine ad Cerebrum, & meninges delati, vel propter illius adhuc vividi transmissionem in nervorum principia, su-

peratis glandulis corticalibus ejusdem Cerebri, certum videtur, nedum probabile.

*Præterea si in jecur humores irruant, minus quidem periculi est, sed affectio mox continua fiet, & morbus diuturnior ob ingentes obstructions, & magnam jecoris imbecillitatem. Cujus occasione in hydropem sic affecti non raro deciderunt, quod nosces ex majoribus pulsibus, majorique febre, dolore ipsius hepatis, cum gravitate, & difficili respiratione, donec febris solvatur. In plerisque enim ex his qui hac occasione laborant, tussicula quædam in principio accessionum reperitur, sicca quidem, & cum ipsius jecoris ponderoso dolore, præludium quidem future in ipso inflammationis.*

## S C H O L I U M I V.

Hepar affici periodice, ut periodice afficitur Cor, Ventriculus, & Caput, in Intermittentibus Perniciosus præcise non novi; nec ob id fortasse illas (quippe, ut fatetur Auctor, minus periculosas, & potius diuturnas) Perniciosarum nomen proprie mereri crediderim, ut qui hunc characterem adscribo Febribus Intermittentibus citioris motus, & inusitatæ sævitiæ. Quæ de Diagnosi vero, ac de Prognosi dicuntur in casibus enunciatis, ut & quæ dicuntur in subsequentibus, nulla indigent limitatione, aut additione, quippe quæ sunt exactissima; quod semel tantum hic monuisse sufficiat.

Utcunque, & ad quodvis membrum humor irruat, diligentissime cognita, & accepta occasione curationem aggredi oportebit: quippe si in his malis differas, periculum ocysime accerses: procrastinatio enim in his nunquam non fuit perniciosa. Commune autem præceptum sit, si in cor, si in cerebrum, si in ventrem irruat humor, maxime si vitiosus sit, protinus expurganti medicamento uti, haud secus quam in quavis alia humoris turgentia facies, præcavens, ne in membrum princeps agitati humores irruant: verum expurgantia medicamenta non tenentur transcendere rhabarbari vires. Itaque cognita ex prædictis signis accessionis  
prava



prava conditione, mox sequenti die citra cunctationem corpus purgabis manna, vel cassia fistula, cum infuso rhabarbari, vel syrupo ex novem infusionibus. Cui usui censeo proficuum fore dilutum drach. j. rhabarbari, cum unc. ij. & ss. mannae electae, vel pulpae cassiae fistulae drach. vj. superbibitis unc. iij. & ss. syrapi solutivi rosarum. Item drach. v. catholici, cum drach. j. rhabarbari. Quo facto, si sequens accessio par afferat periculum, & aequae gravia symptomata, pronuntiato prius discrimine, & viribus constantibus, sanguinem detrahes ex dextra basilica. Verum si vires ex purgatione, & accessionum gravitate lapsae sint, ex salvatella, vel talo censeo plus commodi laborantes suscepturos. Quibus factis pro virium robore, & enematis alvo laxiori facta, & aliquando irritata, his, quae acria sint, victu utendum erit copiosioris nutrimenti, sed facili, ea lege, quam cap. de tertiana exquisita adduximus: si tamen accessionis periculum ex humoris copia suboritur, consultius te facturum arbitror, si mox a principio sanguinem miseris, maxime viribus robustis existentibus, & urina aliquo modo id poscente, idque prima, aut secunda quietis die, praesertim si symptomata non accendant vitio oris ventriculi, quo tempore a sanguinis detractione abstinendum esse, fere omnes consulunt Auctores; nec displicet in hoc tertianarum genere vel a poplitis, vel a manus dextrae, vel sinistra venis sanguinem fundere, quo longius a partibus affectis, & quarum ratione periculum succrescit, humorem distrahas: quo facto, ante quintam accessionem, si fieri potest, Aegrum purgato aliquo ex praedictis pharmacis. Postea autem curandum est, omni arte ad extimas partes, & carnosum genus humores evocare duriusculis frictionibus, & linteis odorato aliquo suffumigatis, extremas partes ligare, aut plurimas, & minutas cucurbitulas toti corpori affigere, quibus extremae, & extremae corporis partes patientiores sint, & ob caloris in eis revocationem humores ad ipsas natura pellat: quo forsan a periculo suffocationis liberabis, & accidentium

immanitatem compesces. Servabis tamen hanc legem in adhibendis cucurbitulis, frictionibus, & ligaturis, quod in his accessionibus, in quibus periculum suffocationis imminet, eis uteris parum ante accessionem, & ipsa adhuc incipiente, quo ad extimas motum a natura humorem evoces: in reliquis vero, quibus ob dissipationem caloris periculum incumbit, censeo tutius esse in die quietis naturam ad extrema evocare, ut dissuescat a consuetudine mittendi ad interiora, quam dum laborantes dissipantur humoris malitia, his auxiliis ulterius spiritum, & calorem dissipare. Sed ad peculiaria cujusque membri affecti auxilia tempestivum est devenire.

## S C H O L I U M V.

Curationem, tam modo, quam in posterum sicco pede semper transigam, ne a proposito nimium aberrem. Universaliter tantum dico, eam esse prompte, & quam cito in hisce casibus instituendam; quippe (ut inquit Auctor, si in his malis differas, periculum ocysime accerses: procrastinatio enim in his nunquam non fuit perniciofa; quod maxime locum habet, ubi negligatur Methodus apta ad inhibendos paroxysmos lethales, qualis est ea, quam proponemus Libro sequenti. Interim Methodus curandi ab Auctore adducta, licet non sit notionibus nostri seculi omnino cohaerens, ac proinde non levi castigatione indigeat, circumspecta tamen admodum, & prudens est pro ratione illorum temporum, adeoque admittenda etiamnum, & in pluribus usurpanda, dummodo in Purgationis usu, quam tantopere metuit Auctor, mitius adhuc, & timidus procedamus, ac praescripserit ipse, potius ex consuetudine, quam ex voluntate nonnihil delinquens. Caeterum illius religio, atque cautela in tractando leniter, ut decet, efferro hoc Morbo, vel ex eo patet, quod, etiam ubi soporosi affectus lethali ter ingruant, Vesicantia nihilominus, indiscriminatim in hisce casibus Medicis vulgaribus adeo familiaria, sibi vero (ut ex hoc satis patere videtur) suspecta, nusquam proposuerit.

Premissis igitur his, quae generalia, & omnibus membris communia sunt, cordi, si in



si in hac affectione patiatur, providendum est, non quidem frigidis epithematis, ne penitus in seipsum sese inferant, & insinuent humores, quinimmo ante accessionem unguento naphthæ, aut ejus oleo cum pulveribus electuarii de gemmis vel diamargaritonis frigidi, & granæ: In accessione vero, quia opus est, quod juxta existit resolvere [antea enim non resolvere, sed roborare solum expediet] oleo Matthioli, & electuario de gemmis, aut de hyacintho ipsius regionem inunges: & oleo etiam Angelicæ, quod in discutiendis, & evocandis ad cutem humoribus miram habet efficaciam. Item hac eadem adjicies oleo, & unguento naphthæ cum prædictis pulveribus, aut aquam stillatitiam ex cinnamomo cum guttis odoratissimi vini; interius tamen ea porriges, quæ & flatus cor irruentes discutiant, & longe ab ipso, si quid ibidem moratur, pellant, ac rursus ipsum robovent, velut sunt tabellæ diamargaritonis frigidi, aut electuarii de gemmis, & modico diamusco confectæ vino, aut aqua stillatitia cinnamomi. Verum quod efficacius esse arbitror, est electuarium de hyacintho miris encomiis a plerisque commendatum. Ante accessionem tamen cucurbitulis uteris, & in die accessionis rarius, & in hypochondrio sinistro: ac in dorso e regione cordis, si forsan cogaris adhibere, scito opus esse aliquam scarificare, ne plus quam evoces extra, intus magis allicias.

Quod si caput periclitari, & pati videatur, præmissis distractionibus, crurum lavacris, & evacuationibus, quæ satis sint, oxorrhodino utendum est, maxime in quietis die. Quod si ea die accidentis alicujus, sive delirii, sive profundioris somni aliquid supererit, vel sanguinem detrahes ex vena cephalica juxta carpum manus, vel cucurbitulas in brachiis scarificabis; quas si parum ante accessionem adhibueris, magis ex usu facies: nam in die quietis eas affigere oportet a cruribus ad nates, in die vero accessionis a cervice ad nates per dorsum. Providendum etiam est, ut laborans acetum rosaceum olfaciat, aquam rosaceam, & alia

frigida odoramenta, quæ latius scripta reperies libro hujus operis 7. in correctione accidentium, quæ febribus succrescere solent.

Si tamen ventriculi os pati in hac febre compertum sit, præterquam quod mox sanguinem mittere recusabis (sunt enim hujus visceris accidentia, maxime dolor, ex his quæ summopere vires labefactant, non solum ut sanguinis detractionem non ferant, si accessio præcessit, & vereamur talem fururam quæ sequitur, verum neque morbum adhuc ipsum, nisi vires post accessionem iterum robustæ appareant, maxime si constiterit jecur in os ventris bilem rejicere: quo tempore tutissimum erit ex dextra basilica, aut salvatella sanguinem mittere: nam si vires in die accessionis etiam languidæ supersint, cavendum est ab hoc auxilio) protinus aliquo ex prædictis pharmacis, quæ purgationi idonea esse diximus, utendum est. Ac si vires adeo esse dejectas constiterit per epicrasim purgabis singulis diebus intermediis, pauxillulum purgantis exhibens cum syrupo aceroso, aut cichorii, & violarum. Et a purgatione ventrem roborabis oleo melino, rosarum, & omphacino, sparsisque desuper pulveribus coralli, rosarum, santalorum, & diarrhodonis. Cataplasma etiam conficies ex tosto pane, vino rubro madefacto, cum prædictis pulveribus, & oleis, vel ex eo quod ex furfure, vino, & ejusdem pulvisculis conficitur. Cui etiam (gratia vitandi animi deliquium) modicum aceti addere poteris: tandem omni arte curandum est, aut roborare, aut quodammodo adstringere, ut vel non recipiat venter, vel si quid receptum habet, ocysime pellat. Quod si id fieri sit difficile, studendum est, humorem in os ventriculi jam fluxum compescere, & attemperare, vel aquæ calidæ potibus, vel succo granatorum, agrestæ, papaveris, aut de portulaca, vel potu aquæ frigidæ, vel (ut etiam vires roboventur, & spiritus reficiantur) vini albi, & optimi modico haustu. Ceterum quod satius esse frequenti experimento comperimus, est vel ante accessionem clyste-



clystere aliquo, quo laborans aliquid purget, uti: vel saltem vomere, maxime si id ventriculus tentaverit, & in ejus cavitate aliquid immorari constiterit, non tamen instante accessione, ne vomitoriis motibus, & auxiliis plus bilis ad ventrem ipsum evocetur. Curandum quidem est in hac febre, si his quæ diximus non cedat, correctionem, & præparationem humoris moliri, ut vel copiosius purgetur, vel natura promptius ipsum devincat. Quod si in alterius naturæ febrem tertiana hæc migraverit, longe salubrius fore existimato.

## C A P U T IV.

De Tertiana Perniciosa ob tenuis humoris putredinem ex Ludovico Mercato, cum iisdem pariter Scholiis.

**E**FFICIT non minus perniciosam Tertianam tenuis, seu biliosus humor plurimo, & copioso ichore permixtus, secretusque, & separatus ab aliorum humorum consortio, & in extrema vasorum projectus, ubi summam nanciscitur putredinem: tum quod ipse sit vitiosæ naturæ, tum quod aliis non temperetur, tum etiam quod locus sit arctus, & conclusus. Quibus etiam accedit, ut affectus gravior fiat, corpus esse raræ contexturæ, & porosum, & maxime excalfactum, ita ut possint partes extimæ, & extrema vasorum facile susceperare prædictos succos. Quem sane affectum etiam accidere comperimus his, qui plurimos horarios fructus ingesserunt, ut Hippocrat. 7. popul. tex. 81. de cholera morbo recenset, quæ parte etiam in malignos morbos, & ut Vallesius exponit, in febres intermittentes degenerare refert; qui sane succus cum putrescit, quocunque loco sit, adeo est perniciosus, ut gravissimam, & perniciosam non raro efficiat tertianam, maxime si laborans raræ sit contexturæ, & facilis resolutionis. Quo profecto fit, ut ex ingenti illa putredine, quam statim illius succi conditio, & peculiaris natura contrahit, & ex prædicta hominis contextura, facile qui sic afficitur, resolutione,

& anxietate animo liquat, aut syncope, & mille aliis accidentibus prematur. Quippe tales succi adeo malefica qualitate sunt affecti, ut ex motione, vel leviorum agitatione laborantes ocysime prædictis symptomatis corripiantur, affectio quidem syncopali minutæ, ut refert Avicenn. sen. 1. 4. tractat. 2. cap. 53. per similes, nomine tantum febris syncopalis minutæ, in qua sane dispendium sit immodicum spiritus ob sanguinis attenuationem, atque etiam ob expultricem facultatem immoderatus in toto corpore concitatus: quod etiam ex imbecillitate re-  
tentricis plerumque accidere monet Galenus 12. method. cap. 6. ut paullo inferius latius sum probaturus. Hujusmodi enim humores quam citissime exhalant, quia tenuiores a febrili calore redduntur, in iis maxime quorum retentrix imbecilla existit, qua ratione diaphoreticis sudoribus sic affecti exsolvantur. Quapropter tria necessaria in hoc affectu reperiuntur, nimirum humorum tenuissimorum in ventriculo, & universo corpore copia: secundum virium imbecillitas: tertium vero vitiosa meatuum, & venarum in laxitate compositio, a quibus procul dubio necessum est subsequi immodicam resolutionem, & subitum virium lapsum.

## S C H O L I U M I.

Totum hoc Caput dignum est, ut attente legatur, illiusque omnia fere dogmata ducantur in usum. Theoria ipsa non paucam laudem meretur; in ea siquidem elucet perspicacia Auctoris, adjunctis bili ab iis, quæ illam temperare valent, secretæ, consortium copiosi ichoris, ulteriorem labem incongrua mistura sua illi communicantis. Si Auctoris innotuisset via, qua isti humores in sanguinem possent vehi, nonne Sylvianam hypothesim fere attigisset, permutato tantum ichore illo in succum Pancreaticum, tunc temporis nondum detectum? Curatio quoque ista peculiaris est summe cauta, paucisque modificatis, aut semotis recipienda, præsertim ab initio, cum scilicet occasio, vel opportunitas exhibendi Corticem nondum adfuerit.

In hoc Capite, cum iterum recenscat Auctor



Auctor elegantem Hippocratis Textum, quem & primo Capite attulerat, simulque Doctissimi Vallesii expositionem, utrumque lubet huc transferre, ut a Divino etiam Sene notatas videamus huiusmodi Perniciosas Febres, vel aliquam saltem illarum speciem. Inquit itaque Hippocrates loco citato, juxta interpretationem Eruditissimi Mercurialis — *Cholerica affectiones magis in Æstate sunt, & Febres Intermittentes, & quibus horrores accedunt. Hæ quandoque maligna fiunt, & ad morbos acutos perveniunt. Verum cavere oportet. Judicat autem tales morbos maxime quinta, & septima, & nona dies. Melius tamen est cavere usque ad decimam quartam. Juxta Vallesium vero sic habet Textus — Cholerica precipue in Æstate, & Febres Intermittentes, & quibus rigores accedunt; hæ aliquando maligna fiunt, & ad morbos acutos perveniunt; sed cavere oportet. Maxime autem tales morbos arguit quinta, septima, aut nona; melius autem usque ad quatuordecimam observare. Hunc ergo Hippocratis Textum sic exponit idem Vallesius — Dicit \* Cholerica \* — idest Choleras morbos fieri precipue in Æstate &c. Addit — \* & Febres Intermittentes, & quibus rigores accedunt, \* — quæ periphrasis significat Febres Tertianas precipue, deinde vero & Quartanas &c. Addit nunc Hippocrates, hæ Febres in Æstate ortas aliquando malignas fieri, & in Febres continuas, & acutas mutari; ac proinde cavere oportere, idest timere, & curare caute (sunt verba aurea) neque quippiam erroris committere, etsi principio exiguus prorsus morbus, & contemptibilis esse videatur &c. & paullo post subdit, quod suspectos semper habeamus morbos, qui alioqui ob propriam figuram videantur esse securi; tandemque concludit — Hippocratem nolle, nos ab Intermittentibus Æstivalibus securos esse, usque dum prateriisse quatuordecimam periodum (an potius diem?) viderimus, neque fieri continuas. Quæ interpretatio, ut patet, restringit sententiam Hippocratis, saltem ad genus illud pravarum Intermittentium, quæ in Continuas, Acutasque degenerant. Istæ autem in linea Perniciosarum, etsi admodum periculosæ, sunt minus formidabiles reliquis, vel saltem longiusculas, etiam cum interemerint, præbent inducias, ut supra diximus. Si ergo in his tantopere metuendum est ex Vallesio, quanto magis erit metuendum de terribilibus illis, quæ Intermittentes adhuc manentes, quarta, vel quin-*

ta accessione, post dolosam intermissionis quietem hominem jugulant?

Quamobrem qui sic laborant, vel levi corporis motione animo deficiunt, faciliter citra levamen sudant, pulsum habent parvum, debilem, ac frequentissimum, urgent vigilia, caput vaporibus infectatur, adest vomitio, aut inanis nausea, quam antecedit oris amaritudo, inappetentia, & tenebrosa vertigo, ut Hippoc. refert 4. aphor. 17. ac mox sequitur synopsis. Vultum etiam, qui sic affecti sunt, Hippoc. habent quam simillimum, ob ingentem resolutionem citra dolorem in aliquo signato loco. Tandem loquens Avicenn. citato capite de febre ex huiusmodi humore oborta, profert eam esse acutam, & quandoque non sufficere in ea virtutem usque ad quartum: quo fit, ut jure optimo inter lethales numeranda sit.

Curationem autem hujus febris longe aliter institues quam reliquarum: quippe in hac præter levem quandam purgationem, quam prius ratione a principio mali, & antequam vires labantur, institues, omni arte cutis coarctanda est, & humores densandi. Sic profecto, quo citius possibile fuerit, corpus purgabis syrupo solutivo e rosæ Hispanis, cum decocto corticum myrobalanorum citrinorum, vel cum unc. ij. mannæ, & eodem decocto, vel pulveribus earundem corticum, cum pulpa cassiæ fistulæ, vel rhabarbari infuso largiori cum syrupo rosarum. Deinceps tamen humorem compesces ante accessionem syrupo rosarum siccarum, & violarum, ana unc. ss. syrupi rosarum unc. j. aquæ deauratæ unc. iij. cui adde pulveris diargaritonis, aut coralli, aut electuarii de gemmis gr. viij. quibus humores densiores fiunt, & longe melius coquantur. Sed humores amplius densabis, ineptioresque ad fluxum, & putrefactionem reddes his, quæ intus sumuntur, qualis naturæ est syrupus rosarum siccarum, de malis punicis, de portulaca, & papavere, cum aquis, aut decoctis rosarum, portulacæ, oxalidis, cum aqua ferrata, aut deaurata. Caterum prodesse non parum



*rum comperies, abluere in aliqua predictarum aquarum boli Armeni, aut terræ sigillatæ scrup. j. aut drach. ss. cum modico syrupo papaveris, aut agrestæ: hoc sane medicamentum, præterquam quod humores densat, & corpus comprimit, inhibet quoque putredinem, & viscera roborat, ac præcavet. Confert etiam id, q. R. pulveris triasantali, & rosatæ novellæ, ana drach. j. succini scrup. j. sacchari rosati soluti in aqua rosacea, quod sufficiat, ut fiat electuarium in rotulis, cujus sumat laborans drach. j. & ss. cum haustu frigidæ aquæ, aut aliqujus ex dictis. Utilissimum quoque est aliud, q. R. conservæ rosarum unc. ij. pulveris electuarii de gemmis, aut diamargaritonis frigidi drach. ss. confectionis Alchermes, vel de hyacintho scrup. j. succini, ossis de corde cervi, pulveris granæ ana scrup. ss. misce, & fiat conditum: Cordi præterea, ac cerebro roborantibus providebis, ut Galen. consulti lib. 12. method. cap. 6. Sic quidem primo facies attemperanda est frequenter aq. rosarum, myrtillorum, & plantaginis cum modico aceto rosaceo. Cujus indicationis gratia involvitur etiam Æger linteo aqua rosarum madente, aut conspergitur multo rosarum rubearum pulvere, vel myrtillorum. Verum ut extoto syncopitici accessibus, & sudoribus subveniamus, adhibere oportet epithema sceminarum mammis, aut virorum testibus, q. R. aquæ rosarum unc. x. aquæ oxalidis, & buglossæ, ana unc. j. & ss. vini optimi unc. ij. aceti rosati unc. ss. pulveris margaritarum, santalorum, coralli, seminis acetosæ, succini, ana unc. ss.*

### S C H O L I U M I I.

Potissima indicatio, quam pro curatione elicit Auctor, est, ut humor densetur, a fluxu, & putrefactione prohibeatur, & quantum fieri potest, ante accessionem compescatur. Quæ quidem indicatio maximi est momenti, illamque nonnunquam mihi contigit cum fructu adimplere, priusquam vires Peruviani Corticis plane nossem in hisce Febribus, bo-

lo isto, duabus, vel tribus ante accessionem horis exhibito, quo etiamnum utor in casibus non extreme periculosis, & in quibus nondum placeat ad Corticem devenire. R. Theriaca rec., Conf. Hyacinth., Salis Absynth. (vel, pro re nata, Crystall. Mont. præp.) ana scrup. j. Laudani opiat gr. j. vel ad summum gr. ij. M. f. h. sumendus, ut supra, superepoto Vini rubelli momento, vel haustu modico Aqua Plantag., Buglossi, vel totius Citri, prout magis placuerit. Quod remedium eximie confert, præsertim ubi evacuationes immanes, & quasi Cholericæ Paroxysmum ingruentem solent comitari, atque ideo valde gravem, ac tandem perniciosum reddere.

*Aer, quomodo & cutis, attemperetur, refrigereturque frigidis asperginibus, sparsis humi floribus, & foliis rosarum, pampinorum vitis, salicis, cannarum, & myrti, supersarsa aqua rosacea cum modico aceto: item eundem aerem flabellabis linteo aliquo madido aqua frigidissima, aut rosaceo cum modico aceto. Præstat quoque cordis regionem inungere unguento, q. R. pulveris electuarii de gemmis, & diamargaritonis frigidi, ana drach. j. lapidis Bezoar. gr. xv. pulveris granæ drach. ss. olei foliorum nymphææ luteæ, aut olei rosarum omphacini unc. ij. ceræ albæ, quod sufficiat, ut fiat linimentum molle: item predictos pulveres unguento rosaceo excipies, addeque terræ sigillatæ drach. ss. rasuræ eboris, & cornu monocerotis scrup. j. & eandem partem inunges. Thoracem etiam, & abdomen illinies hoc unguento, q. R. olei rosati omphacini, & myrti unc. ij. olei melini unc. j. bulliant cum unc. ij. aquæ rosarum ad consumptionem aquæ, & adde pulveris rosarum rubearum drach. j. santalorum omnium, ana drach. ss. ceræ q. s. ut fiat unguentum. Hepati etiam, ac fronti gratia inhibenda dissipationis, adhibebis præsidium, q. R. mucaginis tragacanthi, & seminis psyllii, & citonorum unc. 6. albumina duorum ovorum, misce, & predictas partes illine, spargeque desuper pulverem, q. R. santalorum omnium, rosarum, seminis arnoglossæ, ana drach. j. Quibus pro-*



profecto & sudoris impetum, & virium resolutionem compescas: id tamen prudenter, & paulatim facito, ne ex cutis densitate intensior fiat febrilis calor. Securissimum tamen est, & utile secur illinire oleo rosaceo omphacino cum pulveribus santalorum, positis desuper panis aqua intybi madidis, vel succo agrestæ, & aqua plantaginis, rosarum, & solatri. Maximi etiam sunt momenti, cerebri adhuc roborandi gratia, odorata omnia tum naribus, temporibus, ac pulvis adhibita, tum super faciem roris modo inspersa, cuius census est id, q. R. rosarum, santalorum omnium, Spodii, anascrup. ij. ambra gr. ii. moschi, & camphoræ, ana gr. ij. aquæ myrti unc. j. aquæ rosarum unc. iij. misce: ad cuius pensum odorata omnia frigida prodesse possunt.

## S C H O L I U M III.

Quantum ad morborum curationem conferat bene disposita Aeris temperies, satis patefacit varia locorum, & tempestatum salubriorum, vel insalubriorum constitutio, varias quoque gignens nonnunquam constitutiones morborum, ob id modo facilius, modo difficilius sanabilium: ut sileam, quæ de hac re per se nota, tum sparsim, tum cumulate in Libris peculiaribus olim scripsit Hippocrates, & quæ plurima eruditione, ac doctrina, plurimoque styli nitore edidit Doctissimus Lancisius Pontificius Archjater — De nativis, deque adventitiis Romani Cæli qualitatibus, & de emendanda accidentali Aeris illius insalubritate.

Certe nostro Seculo, quo Aer non modo Thermometrorum, verum & Barometrorum, Hygrometrorum, & Anemometrorum examen subire coactus est, atque ita, media Fistula Torricelliana, Staticæ quoque judicium sustinere, quin & mirabili Scloppi Pneumatici artificio, propriæ elasticitatis vim dimetiendam exhibere, non secus ac violento Machinæ Boylianæ tormento, pati dimotionem e sede sua, vacuis tandem relictis, quæ antea tam pertinaciter occupaverat, latibulis, inanitionem sui stupentibus quidem, sed tamen ferentibus, Ars quoque Medica his inventis ditior facta, Aeris ipsius, quo nil ad Vitam magis necessarium, penitus

cogniti usuram meliorem cœpit institueret. Hinc Eruditissimus Ramazzinus Libro suo jam edito — De Principum valetudine tuenda, — sano consilio monet, non negligendum esse varium Aeris pondus, quod nobis exhibet assidua inspectio Barometri, qua facta animadversione, quemadmodum Sanorum valetudinem tueri, ita & Ægrotantium casus dignoscere, præcavere, necnon iis opportune subvenire valebimus. Idque eo magis cum plausu, & utilitate eximia poterimus assequi, quo remotior est a vulgari censu cognitio, quam medio Barometro acquisivimus, de vario variis temporibus Aeris pondere: ut proinde assertionem, cæteroque propemodum paradoxa, liceat statuere, Barometro iudice, Aerem nebulosum, pluviosum, ac turbidum, contra id, quod censuit Famigeratissimus Borellus (quem tamen fortasse fefellit magis observatio circa experimentum minus exacte instituta, quam ratiocinium inde elicatum) leviores esse Aere sereno, sicco, & perspicuo: pariterque eundem Aerem leviores esse in Australi, quam in Boreali constitutione, licet huiusce phænomeni nondum a quopiam satis dilucidati difficilima sit explanatio; ut ideo tam famosi Problematis adhuc germana solutio desideretur.

Neque enim ipse inficiabor (ut hoc quoque innuam, perfunctorie licet) ea, quæ anno 1695. Academico potius lusu, quam philosophice, ac serio circa hanc materiam conscripsi in peculiari Dissertatione mea, *Ephemeridibus Barometricis* Cl. Ramazzini adnexa; ad tutamen aliquod ipsius Borelli, minus forsitan, ac fuerit creditum, hac occasione decepti, rem minime tetigisse: sicut neque negaverim, id a me ne postea quidem fuisse præstitum iis omnibus, quæ in altera Tricipiti Dissertatione iterum edidi anno 1698. In ea siquidem, licet non plane improbabilia censeam, quæ Viris Doctissimis Rodolpho Jacobo Camerario Medico Profefs. Tubing., & P. D. Cajetano Fontana Mutinen. reposui: immo, licet reputem absolute vera, & demonstrabilia ea saltem, quæ adversus hypothesim alterius Cl. Viri Guntheri Christophori Schelhameri Prof. Medici kilon. haud hæsitante ibidem adstruxi, nihilominus neque hinc solidam Problematis solutionem emeruisse, lubens admitto. Aliud est enim aliorum hallucinationes, aliud rei ipsius naturam detegere.

Quod



Quod ea non hoc, vel illo modo se habeat, facile est assequi: quo vero præcise se habeat, difficile. Interim neque diffitebor, ea, quæ adversus *Schelhamerum* protulit eodem tempore, quo illius hypothesim ipse rejeci, *Clarissimus Ramazzinus*, eaque pariter, quæ contra repetitos ejusdem *Schelhameri* conatus recenter adduxit *Vir Perspicacissimus Jacobus Placentinus*, eaque tandem, quæ pro solutione completa controversi Problematis, nupera ad *Celeberrimum Scroekium* Epistola, ex eleganti hydrostatico *Famigeratissimi Leibnitii* experimento, typis tradidit idem *Ramazzinus*, illustravitque demum laudatus *Placentinus*, plurimum saltem luminis contulisse, ad dilucidandam hanc rem, cæteroqui satis obscuram. An ea nihilominus sit proinde plane confecta, adhuc ambigo. Sed quæcumque sit ratio phænomeni, certe experimentum ipsum accuratis Medicis, pro utili *Ægrotantium* regimine, juxta varium *Aeris* statum, aliquid opis afferre posse, extra dubium videtur: quemadmodum extra dubium est, eundem *Aeris* statum, siquidem mediantibus hujusmodi observationibus, non bene dispositus pro *Ægrorum* salute deprehendatur, artificialis alicujus correctionis esse susceptibilem, eorumque indigentiam aliquo modo aptari posse, ut multiplici industria hoc loco conatus est facere noster Auctor, in iis tantum ungendis nimis industrius.

*Victu* etiam subvenire his oportet paulo ante accessionem, vel in ipsius accessionis principio, sit autem ex his, qui citissime nutriunt, & modice adstringunt, sint carnes assæ, & elixi gallorum testes, & qui austeris condiantur; vinum sit rubrum modice acerbum, dilutum aqua frigida, aut decocto hordei, vel radicis buglossæ. Præterea cum linqunt animo, vino mali punici acidi pane excepto, item renutriendus est *Ager* crebris, & minutis cibationibus ejus alimenti, quod non ocysime dissolvatur, velut est caro perdicum, caponum, vituli, & ejus aliquod ex his confectum cum pane loto, & saccharo: fructus item acerbi, & putredini resistentes. Potus sit ex vino rubro, ut dictum est, aqua ferrata, aut deaurata diluto. Quod si morbus præstiterit expectandi inducias, & vires ad meliorem statum redierint, urinaque rubicun-

dior apparuerit, non erit ab re ex *salvætella* dextra manus modicum sanguinem extrahere, aut iterum aliquo ex prædictis pharmacis per *epicrasim* purgare, donec affectionem mitiorem esse factam comperiamus.

## C A P U T V.

De *Tertiana* perniciose ex prava humorum natura, ex eodem *Mercato*, cum *Scholiis*, ut supra.

**A**DEO sunt perniciose naturæ, & conditionis bilis vitellina, prassinæ, & æruginosa, ut dubitatum sit quemadmodum antea diximus, inter *Arabes Medicos*, possintne ex eis febres succendi: cum hoc tamen præter adductam *Autorum* mentem, nos etiam ex his nonnullas vidimus, quarum natura adeo fuit perniciose, ut pestilentem affectum emulari viderentur: sunt autem ex his humoribus hac lege, & ratione.

*Media* *Æstate* ob ingentem resolutionem propriæ humiditatis humorum, aut nimiam exustionem, & maxime si subito frigus occurraverit his corporibus, quæ improba, & biliosa nimis usa fuere victus institutione, adustam bilem, prassinam, æruginosam, & in confinio atræ bilis existentem succrescere non raro visum est: præsertim si homo ira, furore, aut aliis vehementibus animi pathematis percitus fuerit. Quo quidem tempore mirum non est, si febre corripitur, eam fore periculosam, etiamsi *Tertiana* fuerit. Quippe si vires non admodum dejectæ sint, si humorum copia non grandis, certum est, naturam posse, quod intra venas molestum fore persentit, aut degustat, pellere. Quod si ad emunctoria, & corporis canales pellere non possit, poterit quidem prope partes sentientes sensim, & paulatim projicere, ut facile vel præmissa succensione dissolvatur: quo fit, ut more solito tertio quoque die id efficiat, quia sic humoris conditio postulat.

Dignosces quidem hanc febrem tertianam ab humoribus pravis ortam ex vehementi.



*hementissimis horroribus* ( quod humor sit mordacior ) & qui diutius protrahuntur ob humoris crassitiem: quippe synceri sunt, & citra nativam humiditatem. Febris mox a rigore vehementer crescit, quod humor suapte natura siccissimus, & exurentissimus sit, sicut crassissimus: nam illi haud secus accidit, quam pici, & resinae, dum succenduntur, quæ licet crassam habeant compagem, ocysime inflammantur. Mox vero ab inflammatione sitis, & linguae asperitas, nigredo & ingentissima siccitas succrescit. Oculi ob magnam spirituum resolutionem cavantur, & coloratio universa facies ( licet cadaverosa ) efficitur, anxius, inquietus, & universo corpore compunctus, ac veluti exulceratus Ager hinc inde vagatur; qui neque potu, neque ventilatione, neque respiratione subsidium susceperat. Urina ignea, ac veluti lixivium apparet, pauca, & cum cinericio, vel fursuraceo sedimine, aut cum pinguedine supernatante: pulsus mediocris magnitudinis, non admodum debilis, dum viget febris; cæterum frequentissimus, & celerrimus, die autem quietis parvus, debilis, durus, & creber subest, quod vires ex accessione abierint, respiratio crebra, alvi dejectiones opimæ, pingues, aut bilis vitellina, porraceæ, aut æruginosæ naturam referentes, plerunque dysenteriam efficientes. Vomitus quandoque alicujus dictorum humorum substantiam, & colorem emulatur, cum angore maximo, & animi deliquio. Laborantes parum aut nihil sudant, quod crassior & sine humiditate sit materia, nisi prope mortem cum diaphoreticus erumpit.

## S C H O L I U M I.

Quæcunque sit, & qualiumcunque succorum mixtura, quæ bili dat denominationem prassinæ, æruginosæ &c., certum est, ut inquit Auctor, hujusmodi humores acerrimos media Æstate, & ferventissimis potissimum tempestatibus observari. Æque certum est, quod eorundem humorum excretio sive syncera, sive variiegata, magnum semper facessit negotium: & quotiescunque apparuerit, dat semper Torti Therap. Spec.

ansam suspicandi aliquam pravitatem subesse, quæ morbum reddit non contemptibilem, etiamsi alioqui mitem, quod & Hippocrates docuit.

Quod sane malum mille pericula afferre solet, ac multis modis perniciosum efficitur, nam cujusvis prædictorum humorum talis est natura, & conditio, ut etiam citra putrefactionem, aut succensionem, quamcunque partem inierint, vel erodant, aut gravius aliud malum machinentur, ne dum cum in extremis vasorum, & prope partes sentientes jam putrescunt, initio etiam putredinis a vasis majoribus sumpto. Quo profecto tempore certum est, ipsam febrem mediante validissima virium exsolutione, laborantem, aut interimere in febris ipsius inclinatione, aut ocysime labefactata natura in causonem, vel gravissimam aliam febrem migraturam, & quod certius est, ni arte, aut diligentia præveniat, in habitualement febrem. Tanta enim est primarum humiditatum, & substantiæ membrorum, in quibus hi humores putrescunt, resolutio, ut non ultra quartam accessionem visum sit laborantem in hecticam migrasse, maxime si gracilis sit, juvenilis ætatis, & suapte conditione rari habitus, & contextura.

## S C H O L I U M II.

In Prognosi occurrit animadversione dignum, quod ista perniciosæ Tertianæ species ultra quartam accessionem non extendatur, seu, ut ait in fine Capitis, quintam ad summum accessionem non transcendat; sed vel intra hos terminos necare soleat, vel in Causonem, aliamve gravissimam Febrem, ac tandem certius in Habitualement commutari. En ergo quantum teneamur Divinæ bonitati, quæ præsentaneum remedium dedit, vi cujus & ab ocysima morte, & ab aliis periculis eandem longiore afflictione tandem inferentibus, certo possimus evadere.

Non fert maligna, & atrocissima hujus morbi conditio in exhibendis auxiliis moram ullam: nam cum certum sit, hujusmodi humores nullum posse beneficium



gratiam, aut coctionem a natura recipere (immo ut inquit Auerroes 3. collect. corrumpant formam specificam illius) procul dubio necessum est, protinus humorem purgare, maxime si in convenientem regionem incumbat ipse sua sponte. Quippe si in superiorem ventrem irruat, vomitibus, cum accessio instat [quo facilius excernatur] & venter nauseabundus apparet, minuendus est. Servabis tamen hoc praeceptum in ejus educatione, ut maxime ipsum admisceas humectioribus cibariis, & copioso potu, tum ut facilius venter evomat: tum vero ut sine noxa; gravis enim, & periculo plenus est hujusmodi humoris contactus, & ob ipsum humidis praesidiis compescere, & attemperare opus est. Quod si in inferiorem ventrem humorem irruere persenseris, aut saltem ad nullam aliam se partem inclinare, per ipsum expurgabis; id quod caute facies: sive enim purges, sive secus, periculo res non caret: quippe scimus, vel levissimis pharmacis gravissimas accersiri dysenterias, quod si has effugias, contabescet laborans, quo fit, ut prudentia, & maturo consilio opus aggredi, aut ab eo subsistere tenearis. Sic profecto in hujusmodi humoris purgatione, blandioribus, verum seligentibus pharmacis admixtis rem ages: illud quidem ne nimis exacerbetur humor, hoc vero, ut peccans succus citra aliorum agitationem excernatur: id quidem facies cassia fistula superbibito lactis sero, in quo prius rhabarbari drach. j. maceraveris, aut ipso diluto copiosiore facto, vel syrupo ex jx. infusionibus violarum, cum infuso scrup. iv. rhabarbari, vel hordei cremore cum praedicto rhabarbari infuso. Item confectione Hamech simplici, superbibito copioso haustu aquae hordei cum saccharo, aut feri lactis, vel decoctionis violarum, & seminis malvarum. Praestat & manna dissoluta in aqua hordei, vel violarum, sed robusta corpora optime ferre poterunt drach. j. & ss. electuarii de psyllio, vel catholici drach. iv. cum copiosa aqua oxalidis, vel hordei. Quo etenim semel facto, non licet plurimum inniti in sanguine extrahendo: quippe pra-

dicti humores, neque corpus eisdem scattens id plurimum exposculant, neque innoxie ferunt, plerunque a sanguinis missione continua evadit febris, quod impotens, sanguine detracto, natura ad pellendum a vasis nocivum superfit. Verum si vel simul sanguinem aliquo modo redundare (quod raro exustis humoribus accidit) vel opus esse comperias, id quidem ex salvatella manus dextra facito. Postmodum vero humores, & universum corporis habitum, ac viscera etiam humectare, curabis plurimum, & modice refrigerare, pusillus enim calor natus, qualem haec corpora habent, nec evacuationem, nec refrigerationem innoxie ferunt, sed ut Galen. 12. method. in doloribus ab erodentibus succis ortis consulit, paulatim & sensim lenire, sic sequenti die a pharmaco copiosam aquam hordei cum syrupo violarum, aut saccharo rosaceo, vel decoctum violarum bibendum dare oportet, quo & vis medicamenti, & humorum acrimonia retundantur, abluanturque: Clysmatis praeterea utendum est, maxime cum laborans dormiturus est: quae sane conficito ex decocto hordei, vel violarum, aut seminis malvarum, & papaveris, cum saccharo, & oleo rosarum, violarum, & vitellis ovorum. Praeterea summo mane, aut prope somnum, laboranti porriges aquae hordei, acetosae, violarum, scorcionerae, vel per mortarium lapideum excolatae unc. vj. syrupi acetosae, de succo limonum, rosarum, aut violarum unc. j. Confert & saccharum rosaceum, sed violaceum magis, quibus admisce roborandarum virium gratia margaritarum preparatarum, aut electuarii de gemmis scrup. j. Praestat & diacorallium cum mucilagine seminis citoniorum, & psyllii pondere drach. j. Eiusdem usus est, quod ex his omnibus conficitur forma boli, & pondere duarum drach. summo mane exhibitum. Sed ferunt non contemnendi Auctores, & Conciliator etiam adstruit, alexipharmacum nullum reperiri in arte medica his humoribus pretiosius, quam crystallum, cujus drach. j. in subtilem pulverem redacta, & aqua dissoluta, mire opitu-



opiruletur: ego autem arbitror, id forsan occulta quadam proprietate illi accidere. Verum si dysenteria ex predictis humoribus prodeat, vi sua adstringente extra omnem expectationem prodesse comperimus: censeo tamen admiscendum fore aliquod ex predictis pharmacis. Exterius vero corpus refrigerante Galeni, aut rosaceo, vel unguento ex cucurbitulis iuxta dorsum inunges, aut cordi epithemata appones, ea lege, qua capite de Tertianâ exquisita scripsimus.

## S C H O L I U M III.

Quam vana spe autem id expectare liceat ab aliis remediis, ostendit curatio. Magna Remedia, ex mente Auctoris, hic nullum fere locum habent; etenim, si de purgatione sit sermo. — *Caute id facies* (inquit ipse) *sive enim purges, sive secus, periculo res non caret* &c. Si vero de sanguinis missione loquamur, — *Ægrotautes hujusmodi* (subdit ille) *tale praesidium non innoxie ferunt, & plerunque a sanguinis missione continua evadit febris.* Magnis ergo Remediis fere proscriptis, quid sperandum superest a levioribus, & nullius ferme vigoris, saltem respectu habito ad tantam indigentiam, ut norunt Practici? De crystallo quidem non contemnendam mentionem facit Auctor (selecta fere semper remedia indigitans) pro corrigendis pravis illis humoribus recensitis; & ego quoque experientia fretus eisdem remedio in mitioribus saltem casibus, ut paullo ante innui, non parum tribuo. Sed furente jam, sparsis quaquaversum fluctibus, Torrente, frustra infirmioribus hisce instructus

*Pugnat in adversas ire Natator aquas.* In hac sane procella si quis consulisset Mercatum, jure merito contremiscentem, quærens, an liceret Lignum Corticis amplecti, certum plane pro naufragio evitando refugium, videlicet Specificum certum pro mansuefaciendis efferis hujusmodi humoribus, nullum cateroqui beneficium, gratiam, aut coctionem (ut omnimoda certitudine affirmat Auctor) a Natura recipere aptis, quid, quæso, respondisset? Mussitassetne, aut hæsitasset?

Quod tamen majoris momenti arbitror, est victum summe humectantem, & fa-

cilis, atque copiosioris alimenti institueret: ob id jura caponum, & carnes pulorum ex lacte, aut hordeo nutritorum ex usu esse comperimus, & ex oleribus decoctam lactucam, aut scariolam, & borraginem: tandem potus sit hordei aqua, vel purissima cum saccharo. Quod si vires laborantis labi videantur, consultissimum est, vinum tenue, album, & maxime dilutum præbere: tandem si affectionem perstare adhuc contingat, existimandum est, jam in alterius naturam commigrasse, nam ex predictis humoribus non transcendit quintam accessionem: quamobrem juxta naturam ejus, in quam degeneravit, curationem institues.

## C A P U T VI.

De Tertianâ Perniciosa ex miscella crassorum humorum cum serosis, & tenuibus ex Ludovico Mercato, adjunctis itidem Scholiis.

CUM in humanis corporibus intra venas humores abundant ea copia, quæ naturam irriter ad sese deonerandam; ceterum quæ non adeo gravet, quod ad extrema vasorum pellere non possit, sit quidem, ut humorem pellat ipsa tertio quoque die: sed quod frequentius est, more duplicis tertianæ singulis diebus, maxime prope noctem ad extrema vasorum, & præcipue juxta os ventriculi humorem transmittat, quo febris syncopali humorosa simillima existit. Quo fit, ut ob ejus copiam, quæ sui respectu major est, quam fuit respectu majorum vasorum, a quibus pellit natura, procul dubio adeo graventur, & offendantur universi corporis partes, ut hac sola ratione tertianâ, quæ sui natura salubris foret, perniciosa efficiatur: cui accedit, humorem esse mixtum ex tenui bilioso, & crasso, cujus crassitiem veluti ex congelatione, & condensatione factam arbitramur. In cujus febris natura expendendum primo est, quâ ratione hi humores gravent naturam in extremis vasorum, cum intra majora non adeo graves exstiterint. Secundo, quâ ratione ob id perniciosa exi-



stat. Circa primum conjectandum est, humorem hunc concretum, quem secum movet biliosus, & tenuis humor, qui in accessionem prorumpit, cum ad extrema venarum funditur, non protinus, aut simul ad dicta loca transmitti, nec simul incallescere, sed paulatim projicitur, ac succenditur; tum quod copiosus sit, tum quod inequalis. Quo fit, ut tenuior pars primo succendatur, & ex crassioribus, quæ primo transmittitur, & reliquæ sic successive, ut natura pellit. Præterea cum mox tenues partes succendantur, quæ crassæ sunt, simul incallescunt, gravioresque & rariores fiunt, eo quod ex calore, quod crassum est, ocysime fundatur, & liqueatur. Quo fit, ut ea humorum copia, quæ vasis majoribus non erat magna, nunc in extremis vasorum liquata, & fusa maxima fiat, gravis, & ponderosa, ex quo procul dubio sequitur, perniciosam, & periculo plenam efficere febrem, cum vereri oporteat, ne universi corporis calor ex copioso illo humore suffocetur, extinguaturque, aut laborans syncopi frequenter corripiatur. Finitima quidem est hæc febris conditio ei, quam Medici syncopalem humorosam vocant, cujus Galen. 12. method. meminit nomine febris cum redundantia crudorum succorum, licet ex continuarum fiat genere, transactis primis accessionibus, quod impotens sit natura longe a cordis vasis humores illos crassos, & copiosos pelleræ, hæc vero intermittens.

#### S C H O L I U M I.

Torquet in hoc Capite se ipsum Auctor, ut explicet modum, quo detrudi supponit ad extrema vasorum, ibique succendi inæqualiter crassos, & tenues humores. Ignorato fluidorum motu tunc temporis occulto, mirum non est, si in tot figmenta sæpius labebantur Prædecessores nostri etiam Doctissimi. Quæ nihilominus ille adstruit de inæquali crassitie, ac tenuitate humorum irregulariter effervescentium, sive, ut loquitur, succensorum, omnino locum habent in isto casu, si modo sensibiliore explicentur. Quæ pariter addit de condensatione, congelatione, ac concretionem eorundem humorum

crassorum, commixtorum cum biliosis, & tenuibus, videntur nonnihil congruere cum iis, quæ ex principiis *Acidi*, & *Alkali* hodie deducunt quamplurimi. Quocunque tandem modo meliore hæc explicentur (quod Theoreticis relinquo) certum est saltem, vi hujusce Febris, seu Causæ illius immediatæ, inæqualem ebullitionem intra sanguinem suscitatis, sive deinde id fiat ob heterogeneitatem particularum præexistentium in ipso sanguine, illumque ex parte constituentium, sive ob peculiarem, inæqualemque dispositionem, aut compositionem febrilis Fermenti in sanguinem influentis, sive propter utrumque.

Verum ob id gravis, licet procul a partibus cordi, & ventriculo, aut jecori vicinis eosdem valeat pelleræ; e quo vereri oportet universi corporis caloris extinctionem, & ob id differunt etiam hæc febres ex occasione periculi, nam in illa vereri oportet, ne humorum pondere, & copia cordis calor extinguatur, quod prope ipsum existat plenitudo, in hac vero ne totius corporis calor pereat, præterquam quod [ut dictum est] aliqua humorum crassorum portio prope viscera transmittatur, licet in utraque ob vitium, & damnum ventriculo illatum laborantes periclitentur. Triplex igitur causa necessaria est hujus febris generationi, crudorum nimirum humorum copia ventriculorum & carnosum, ac arteriosum genus opprimens, virium infirmitas, quæ caloris paucitatem sequitur, & vitiata angustorum meatuum, & venarum compositio.

Cognosces autem hanc febrem ab his humoribus inæqualiter crassis, & copiosis provenire, quod lente, & cum diuturno, ac moroso rigore incipiat, quem nonnunquam interrumpit calor quidam, veluti flamma exurgens, quem iterum rigor compescit, ita ut per intervalla rigeant, & incallescant qui sic affecti sunt. Quod symptoma illis succrescere censeo, quia humor copiosior est, & crassior [potius profecto] quam quod simul totus possit a natura pelli, & si pellatur, simul succendi. Quo fit, ut pars post partem succendatur, & primo quæ in eo tenuior est, post vero quæ crassior. Dignosces etiam



iam id, quod laborantes tarde incalescant, ex toto, & quod calor diu duret, & non admodum sit extensus, sed per aliquod intervallum flammea in corpore compareat caliditas, sed mox cesset, & mitis appareat calor: quod licet ita sit, anxium reddit laborantem ob pressuram, & gravitatem arteriarum, & musculorum totius corporis, quam fusi, & copiosi præstant humores. Impotens etiam toto febris tempore efficitur laborans, & cum anxius sit, sese movere nequit, quo fit, ut molestius ferat, & veluti obtusus sensibus existat. Calore videtur carere, & siti plerumque premitur, & a potu gravius se habet, præcordio in principio inflato, corpus totum ampliori mole, quam pro naturæ modo, tumens, color omnino vitiatus, aliisque albidior, quam pro naturali habitu, & aqua inter cutem laborantibus persimilis, vel lividus. Urina copiosa subalbida, copioso sedimento, & crasso plena apparet. Pulsus ex parvitate, & magnitudine inequalis, aliquando interceptus, & quo magis crescit febris, evidenter fiunt prædictæ differentie, quod eo tempore rarior fiat humor, & vehementius naturam premat; celeritas tamen & crebritas non plurimum a natura dissident, ita ut plerisque videatur febre carere. Sæpe etiam animo deficiunt, & aquæ potu non levantur, neque aspersione aquæ supra faciem, quinimmo frictionibus, & vinculis melius se habent: respiratio frequens est, & suspiciosa: in febris autem inclinatione laborantes maxima cum inquietudine ab umbilico ad caput exsudant, & aliquantulum liberari videntur, & licet febre carere appareant, adhuc accidentia aliquot supersunt, quibus constat nimio pondere laborantes confringi: tandem hoc est in huiusmodi febribus tanquam pathognomonicum signum, nimirum, nec augmentum, nec statum, nec declinationem equaliter fieri, sed in augmento aliquando inclinat febris, deluditque Medicos, & potu exhibito, aut citra ipsum iterum increscit, in statu vere plerumque novum incrementum, & aliquando declinationem, & postea aliud incrementum suscepat, quod

Torti Therap. Spec.

pari pensu in declinatione cernimus. Præter id hoc habet proprium, & peculiare, quod accidentia, quæ propria sunt principiis reliquarum febrium, sibi vehementiora sint, & majora prope statum, quam in principio: quo fit, ut eo tempore inæqualitates pulsus, laborantis suffocatio, & periculum sine dubio sint majora: ratio est, quia cum hæc mala in hoc affectu ex arteriarum compressione, & caloris suffocatione prodeant, & hæc eo tempore commodius fiant, in quo major fuerit plenitudo, & hæc major sit prope statum, quia in hac febre usque ad id tempus semper a vasis aliquid pellat natura ad minora, & quod pellit magis attenuetur prope statum, fit profecto, ut eo tempore accidentia principii eluceant magis.

## S C H O L I U M II.

Ob id, signum Febris huiusce speciei quasi Pathognomonicum esse dicit Auctor, quod nec augmentum, nec statum, nec declinatio æqualiter fit; sed in augmento aliquando inclinat Febris, deluditque Medicos, dum potu exhibito, aut etiam eo non exhibito, iterum increscit, idemque non raro repetit in statu, aut etiam in ipsa declinatione; quod maxime verum est in Praxi: & ideo summe pariter observabile ad plurimos errores vitandos.

Verendum profecto est in hac febre, ne unum e tribus malis laboranti succrescat, primum ne laborans in augmento ipsius febris, cum jam incalescere cœpit universum corpus, antequam ex toto incalescat, suffocetur. Quippe eo tempore rarior efficitur materia ob fervorem, quem contrahere incipit, quo fit, ut compressione vasorum, & extinctione caloris in toto corpore, vel in syncopem gravem, & periculosam, vel in mortem prolabatur Ager; quod si quis quaesierit, qua ratione in hac febre, quæ suffocatione interficit, laborantes pereant in statu, & prope ipsum, cum in reliquis quæ hoc modo interficiunt, in principio laborantes suffocatione periclitentur; dicendum est, hoc esse principium huius febris, quatenus ad eam portionem attinet, eo quod natura non transmittat simul humores a vasis,

H 3 sed



*sed paulatim usque ad statum : quo fit, ut eo tempore [ praterquamquod funduntur, & effervescent, & liquantur ] copiosiores utraque ratione sint, quam in principio, & ob id eo tempore calorem suffocent magis. Secundum, si forte natura sese a syncopi tueatur, pertimescere oportet gravem, & diuturnum aliquem affectum subsequuturum; nam cum tertiana hac plerunque sit nimis extensa, facile continua efficitur, vel saltem sub ingressum duarum tertianarum. Quarum occasione non raro succrescere solet tertium malum, nimirum malus corporis habitus: quippe cum calor in dies impotens reddatur, procul dubio verendum est, ne etiam bonum sanguinem conficere non possit, ac subinde neque corpus probe nutriri, & malum habitum ex consequenti subsequi.*

*Videtur profecto posse hanc febrem curationem suscipere simillimam ei, quam febribus syncopalibus humorosis proficuum esse Auctores scribunt, siquidem in omnibus fere aequales existunt: in qua re non in parvam dubitationem incidimus, siquidem Galen. non satis aperte monstrat, an liceat in huiusmodi febribus sanguinem mittere, aut expurgare, cum solum frictionibus utendum esse consulat, nec immerito quidem, cum in hac febre crudorum humorum maxima copia subsit, precipue iuxta ventriculi os, quæ sanguinis detractionem plerunque intercidit, nec rursus expurganti pharmaco videtur esse a principio utendum, cum corpus plenum sit, & ob id non cessurum medicamentis: quo profecto fit, ut in dubium vertendum sit, quid agere oporteat. Quippe solum uti frictionibus, insufficiens est tanto malo, nec licet corpore existente pleno, quod Galen. interdixerat 4. de sanit. tuend. Quamobrem censeo Averroem a Galen. dissensisse 7. collig. qui non esse solum agendum frictionibus scripsit, cui favet Trallian. qui neque mediam, neque multam frictionem sufficere docet, Rasis etiam 6. conti. cum Trallian. purgantia protinus consulit. Verum si quis rem hanc diligenter expendat, reperiet procul dubio, huiusmodi febris longe diversam esse medendi rationem a*

*curatione febris syncopalis humorosa, & continua. Nam praterquamquod in Galen. doctrina non expresse constat huius febris notitia, ejus, quæ illi assimilatur, 12. method. non dissimilis est curandi ratio. Sed dato, quod verendum sit sanguinem mittere, aut expurgare in illa, in hac vero ambo auxilia prærequiruntur, & utrique superest a principio commodissima occasio. Primum quidem eo, quod plenitudo illa, quæ in hac febre subest, non sit adeo copiosa intra vasa, quia tantum est plenitudo in potentia, quæ in extremis vasorum efficitur actu, certum est subesse locum expurgationi: ac si cum sanguinis presentia adsit copia illorum humorum, quos & crassos, & tenues esse diximus, ob id credendum est, non deesse occasionem mittendi sanguinem. Quapropter cum in hac febre periculum sit, ne in accessionis principio, aut statu, ex humoris effervescencia, & plenitudine, calor universi corporis suffocetur, ob id, si sanguinem præesse simul compertum fuerit, vel occasionem malo præstiterit sanguinolenta evacuationis suppressio, demendus sanguis est, vena basilica dextri brachii scissa, idque semel, aut bis pro virium robore: sin aliter, cavendum est a sanguinis detractione tanquam a magno malo: Nam plerunque sic affecti calore, & viribus carent. Verum si prædictos humores tantum dominari constet, a purgatione, & seligenti pharmaco facta, principium curationis auspicari oportet ex syrupo solutivo rosarum, cum infusione foliorum senæ, aut cum expressione agarici, vel carthami. Prodest & diacatholicon, in decocto senæ dilutum, vel diaphœniconis modicum cum confectione Hamech simplici. Post hanc vero purgationem sanguis demendus est, quod si opus fuerit magis probo, quam ante purgationem, & coctionem, si antea missus non fuerit. His tamen factis, omni arte curandum est corporis calorem evocare, atque excitare, quod facilius possit copiam humoris discutere, quippe in hoc malo frictionibus, & ligaturis, aut cucurbitis, licet utamur, non quidem ut evocemus humorem ad extimas partes,*



tes, ut in reliquis dictum est, cum potissima ratio periculi sit copiosior humor, aut caliginosus, & frigidus halitus in partibus carneis, sed ut solum calorem ipsum sopitum excitemus, evocemusque ad easdem. Quod sane facies leviusculis, sed longioribus frictionibus, quibus, quod facilius evocari ad cutim possit, facile sequatur, & cum is sit calor, & spiritus, is procul dubio succrescit. Item parvis, & frequentibus cucurbitis, quibus ablatis, universum corpus suffumigabis, & perfricabis calidis linteis, quod sane facies parum ante accessionem, aut in ipsa, & per vices, & intervalla in ipso augmenti tempore, ut per carneas partes aliquid ejus, quod ibidem moratur, antequam calorem offendat, evanescat, aut calor, qui id conterat, excitetur. Curandum etiam est, ut die quietis laborantes per alvum deficiant clysmatis, & suppositoriis acrioribus, vel vomant, quod profecto grandi diligentia exsequendum est. Quod si his omnibus factis animo linquant, etiam incipiente accessione modicum panis vino madefactum porrigere oportebit, qui etiam odorem reficiendi sunt: quod secundo, aut tertio iterabis, donec incallescere corpus, & calorem conspicue excitari comperias. Ac si eo pulsus parvitas devenire videatur, quod efficacioribus auxiliis opus sit, porriges cum modico vino pulverem, q. R. aromatici rosati drach. j. margaritarum preparatarum scrup. ij. pulveris electuarii de gemmis scrup. j. pulveris ossis de corde cervi drach. j. rasuræ cornu monocerotis unc. ss. misce, & cum melle rosaceo fiat bolus, cujus porrige scrup. j. Quo facto, cor, & dorsum inunges unguento, q. R. olei liliorum, & de semine Angelicæ, ana unc. j. olei cinnamomi drach. ij. pulveris cariophyllorum, & naphthæ, ana scrup. j. diambre gr. j. pulveris florum rosmarini drach. j. croci scrup. j. bulliant cum odorato vino in duplici vase, & facta expressione prædicti partes inunge. Ventriculo etiam providebis unguento, q. R. olei nardini, & nucis muscatæ, & absynthii, ana unc. ss. cariophyllorum drach. j. galliæ

muscatæ gr. x. ceræ q. s. ut fiat unguentum. Mammis vero foeminarum, & virorum testibus adhibebis, quæ odorata sint, & calorem concilient, velut est vinum calidum cum aqua melissæ, & pulvere aromatici rosati, & diacymini.

## S C H O L I U M 111.

Difficultatem curationis demonstrat controversia de sanguine mittendo, & de instituenda purgatione, licet utrunque præsidium tandem Auctor admittat. Neque enim hæc Febris species revera est adeo exitiosa inter reliquas, ut aliquam Curationem, ut ajunt, Methodicam saltem circa initia non patiatur.

His factis in die accessionis, studendum est in diebus quietis humorum copiam minuire, & cruditatem, & crassitatem moderari, quod facies addito oxymelite, vel syrupo de corticibus citri, ac modico syrupo de duabus radicibus cum aquis cinnamomi, anici, fœniculi, Angelicæ, vel de radice Chinæ, ac procedente affectu non recusarem, oxymellitis scyllitici modicum adjicere. Postquam preparationem si coctio apparenter eluceat, plenius corpus purgabis his, quæ superius diximus, aut pilulis aggregativis, vel de agarico. Verum si lentius naturam concoquere constet, satius esse duxi, per epicrasim corpus purgare pilulis ex mastiche, rhabarbaro, & agarico, aut pilulis ex hiera Galen. & agarico, vel prunis Damascenis ex decocto senæ conditis, aut infuso rhabarbari, & agari-ci, vel carthami decocto: Formidare enim in his oportet copiosas purgationes, ne humore copiosius in ventriculum irrudente, citius in irreparabilem syncopen concidant. Præterea si ve purgent, si ve opus aliquod agere velint, e lecto non surgant, ne commoti humores citius syncopem excitent. Interim tamen providendum est hæmorrhoidibus, & mensibus: tandem post prædictas purgationes, theriaca cum modico vino utendum est, aut aromatico rosaceo, & vino passulato, vel diacymino.



## S C H O L I U M IV.

Circumspeditionem tamen suam in purgando satis ostendit idem Auctor verbis illis — *Formidare in his oportet copiosas purgationes, rectiusque forsan dixisset, etiam modicas. Sat ergo fuisset superius dixisse — Curandum est, ut die quietis laborantes per alvum deiciant clysmatis, & suppositoriis.*

*In hac sane febre, & somno, & vigilia opus habemus: quippe somnus concoquit, & vigilia digerit. Item opus est victum instituire extenuantem, & parcum, ac saepius, aut ex longis intervallis; vinum fere his omnibus ex usu est, si non dormierit laborans, noctu, sin aliter, diu. Providendum etiam est, ut laborans quam minime turbetur, distrahaturve aliquo animi pathemate, quod sic affectis summo pere noceat.*

## C A P U T VII.

De Perniciosa Tertiana ob aliquod accidens, quod succrescit, ex eodem Mercato, cum iisdem Scholiis.

**E**ST itaque quinta perniciosa tertiana species ea, quæ non ex propria conditione, & natura talis efficitur, sed ex aliquo accidenti, quod illi succrescit, cuius ratione ipsa periculosa efficitur, quantumvis suo more salubris, & signis firmata securissimis existat. Sic profecto hac lege uno e duobus modis aliquam tertianam periculosam fieri conspiciamus: Primo, quando crescente calore in accessione ipsa pituitosus, aut crassus ob contrariam fusionem, & tenuitatem ab ipso calore prestitam, instillat, decumbitque in aliquam partem, ac velut suffocativum (ut ajunt) catarrhum, si ex capite; vel difficilem respirationem, aut orthopnoeam, si ex thorace; vel articulares, & gravissimos dolores concitat, si in articulos prædictus humor prolabatur; quippe certum est, non raro contingere his, qui caput habent catarrhosum, humidum, & fluxionibus obnoxium, si fe-

bre tertiana corripiantur, tempore accessionis ob calorem tantam defluere pituita fluxilis copiam, quod in gravissimam suffocationem, aut lateralem dolorem pleuritico dolori persimilem ocysissime periclitari videantur, sicut his, qui asthmate laborant ob crassos, & viscidos humores, thoracis vasa, & partes obsidentes ab eodem calore liquari, & moveri, excitareque difficillimam respirationem, & gravissimam orthopnoeam. Ita prorsus his contigisse scimus, qui articulare morbum pati sunt assueti, quibus vi caloris fusis humoribus, tenuior quædam pars in articulos migravit, qua quidem gravissime, & molestissima fiunt tertianæ accessiones. Quæ omnia finita accessione protinus aliquando cessant, eo quod calor, qui humores liquavit, eosdem discutere valuit, aliquando vero ejusdem mali, quod excitavit, aliquid adhuc superest, quod molestam, & non raro periculosam minatur fore venturam accessionem, si malum malo succrescat. Secunda quidem hujus tertianæ species suboritur, cum febrilis calor iterum in consensum allicit, commovens corruptos vitiososque ibidem morantes succos, quibus motis, accidentia succrescunt, tota accessionis duratione æque gravia, ac periculosa, his quæ hystericis foeminis accidere assolent.

Signis profecto in hujusmodi tertianis non plurimum opus habemus, cum constet, prædicta accidentia, quæ illi succrescunt, non accidere ob caloris febrilis, aut humoris peccantis, vel membri, in quo humor febrilis incumbit, vitium, sed accidentia longe diversa esse a natura prædictorum, esseque symptomata, quæ aliis humoribus ab his, quæ tertianam efficiunt, diversis propria sunt. Quippe affici catarrho, aut difficulter respirare, vel articulos dolere certum est, distinctum quid esse, & accidentale a natura febris tertianæ: & ob id cum hac accidentia succrescunt, conjicies tertianam fieri perniciosam ex accidenti, & non ex nativa sorte.



## S C H O L I U M I.

Circa universum hoc Caput dico, quod si accidentia, quæ succrescunt Febris, vere sint talia, ut nullam habeant cum Febre communionem Causæ, vix potest peculiaris species Febris Perniciosæ exinde constitui; nam hoc nomine Perniciosa etiam dici posset Ephemera, si illi grave aliquod accidens superveniret. Oportet itaque diligenter animadvertere, an succrescentia accidentia omnino sequantur Periodum Febris, itaut ea invadente invadant, & ea cessante cessent. In tali enim casu potius censenda sunt symptomata Febris, quam alterius naturæ, etiamsi motus febrilis, tantum data occasione, ea suscitare videatur: secus, si non sequantur Periodum, motumque febrilem. Sic, si Mulieri semper in accessione superveniat passio aliqua, Hysterica dicta, quæ non alio tempore invadat, & soluta Febre, semper solvatur, reputanda erit soboles Fermenti febrilis (licet tantum per accidens) in subjecto disposito, & intra ejusdem fluida turbas illas suscitantis: idemque dicendum crediderim de Colica, de Vertigine, ac de ipsa nonnunquam affectione Epileptica, una cum febrilibus Paroxysmis recurrense in subjecto assueto. Fateor equidem, accidentia perniciosa hic ab Auctore enumerata, nempe *Catar-rhum suffocativum*, *dolorem Pleuritico similem*, *Asthmaticum affectum*, & *Arthriticos dolores*, quæ cuncta illi forte sæpiusculæ videre contigit, mihi rarius, ac ferre nunquam in Perniciosis videre contigisse, quin potius alia frequentius observasse perniciem inferentia, quæ ipse nominatim non recenset, & quæ ego specialiter recenserebo *Capite primo Libri sequentis*.

Verendum quidem est in his tertianis, ne aliquod ex prædictis malis, quæ calore accessionis fiunt, vel laborantem suffocet, vel si iterum revertatur, essentialē fiat, & proprium: Quapropter sic affectos in die quietis præcavere oportet, ne iterum revertatur malum, & in accessionibus periclitentur.

Curandi ratio in hac affectione peculiare sibi præscribit considerationes, quas maximi esse momenti censeo. Prima sane est, quod in ipsa accessione, ubi majus

imminet periculum, id præcaveamus juxta symptomatis, quod succrescit, naturam: In die vero quietis curandum est, ne iterum revertatur. Namque in curatione ipsius tertianæ nil novi agendum est præter id, quod in reliquis tertianis salubribus ex usu esse diximus: præterquam quod hæc paullo celerius, atque diligentius expostulat curari: ne si diutius protrahantur accessiones, & frequentius repetant, aliquo ex prædictis modis laborans in ipsis periclitetur. Sic profecto urgente fluxionis periculo, sive ad fauces, sive ad thoracem, sive cum dolore, aut secus, vel cum difficili respiratione, & orthopnoea, omni arte curandum est fluxum a capite ad alias partes divertere, quod facies brachiis vehementer fricatis, aut ligatis, vel si ipsis cucurbitas appoveris, bis in singulis horis, quod fluxio illuc evocetur. At si grande periculum immineat, ipsas scarificare oportebit, & postmodum scapulis iterum alias affigere, quo flatus a thorace discutiantur, & aer partibus dilatatis commodius recipi possit. Quod si lateralis eluceat dolor, brachiis sat est ipsas apponere, & discutientibus, ac siccis præsiidiis prope partem dolentem uti, ut sacculis ex milio, & furfure, chamæmelo, & sale: Nam si inunctionibus, aut evaporatoriis utaris, laxiore facta parte copiosius ipsa recipiet, & fluxionem evocabis. Sic profecto utero providebis juxta affectionis, quæ succrescit, indigentiam, ut Lib. nostro de Mulierum affectionibus abunde dictum est. Podagricis, aut quibusvis aliis articulo-rum doloribus nihil adhibebis, ne, si frigidum sit, ad principalis membrum repellas; si vero calidius, plus ad affectas dolore partes attrahas, sed blandioribus auxiliis curandum est, laborantem ab accessionis sevitia eruere, quod leges fusius libro nostro de arte medendi morb. intern. proprio capite. Cessante vero accessione, providendum est, ne iterum præcedens symptoma revertatur, quod facies eisdem præsiidiis, quibus si præsens fuisset, curasses: hoc uno in considerationem adhibito, quod si fieri possit, uno & eodem præsidio feбри, & symptomati provideas,



*videas, sive sanguis mittendus sit, sive corpus purgandum. Verum, si id complicationis conditio non ferat, symptoma auferendum est, ac si sanguinem miseris, ex ea parte, & vena facito, quæ vel capiti mandanti, vel thoraci, a quo malum oritur, e directo respondeat: aut a jecore, & venis majoribus, si articulosum membrorum genus pati videatur: vel ex talo, si aut menses, aut hæmorrhoides deficiant, vel uterum compati constiterit. Quod quidem pari beneficio proderit feбри, & accidenti haud secus, quam expurgans medicamentum, si eadem lege præstiteris: quippe ea adhibebis primo, quæ materiam accidentis respiciant; postea vero quæ febrem, licet aliquando mixta adhibere oporteat medicamenta, utrunque nimirum respicientia. Verum si ex prædictis accidentibus aliquod jam firmatum esse constet, quod liquido cernes, eo quod die etiam quietis adhuc perseverat, non omnino posthabita febris curatione, ipsi ex toto innitendum est, quod facies juxta naturam mali, quod supererit, idque quæres proprio ejus capite, ut & universalia, & particularia auxilia probe administrare possis. Verum si morbus præstiterit expectandi inducias, majori diligentia studendum est tertianam febrem curare, siquidem illa vicem causæ moventis gerit, & ea curata facile accidentia delitescunt.*

## S C H O L I U M I I.

Cum ergo in hisce casibus ex mente Auctoris — sic affectos præcavere oporteat, ne iterum revertatur malum, & in accessionibus periclitentur, supposito quod malum hujusmodi sequatur accessionem, velut umbra Corpus, soli idcirco Paroxysmorum præcautioni (quoniam facile hodie possumus) per usum Chinæ Chinæ insistendum esse, nullus dubito, omisis tot medicamentorum catervis, quæ ad tollendos hujusmodi affectus solent usurpari: pro quibus in tali casu submovendis unus cæteroqui sufficit Cortex, ut constat etiam ex *Historiis* xi., & xvii. Cap. x. Libri primi relatis, de Tussi Tabem minante, & de visus Obcecatione, per Quartanam inductis, & per Chinam Chinam curatis,

Quoties enim strenuum istud Febrifugum conveniat (ut in similibus casibus, si graves sint, profecto convenit) non est, cur de tot aliis remediis infirmioribus æque ac superfluis sumus solliciti. Cardo Præceos versatur non in multiplicitate, sed in electione remediorum, simulque in opportunitate noscenda, & captanda occasione. In iisdem propterea circumstantiis idem morbus remediis iisdem ab uno Medico tollitur: ab alio non ita. Ordo quippe, seu tempus peculiare administrati remedii exitus varietatem parit. Ars quævis Mechanica paucis Instrumentis perficitur, eademque iisdem a duplici Artifice inæqualiter exercetur, parium Instrumentorum usu dispari diversitatem faciente. Haud aliter modicus medicamentorum apparatus (quem in numero satis parcere consistere, & nihilominus sufficere, aliquando forsitan ostendam) in manu periti Medici, Morbis fere quibuslibet sanabilibus sanandis par est. Octo tantummodo voces Musicæ, si rythmice disponantur, concentibus omnibus, utut diversis, edendis sunt satis: inconcinne vero, vel intempestive prolatae, & dissonant, & harmoniam perturbant. In regenda sanitate, quæ in fluidorum, & solidorum harmonia consistit, analogismi par ratio. At de hoc satis.

*De Tertiana Perniciosa ob humoris venenositatem, quæ necessaria ad curationem, & notitiam existunt, reperies libro &c.*

## S C H O L I U M I I I.

De eo denique, quod innuit Auctor circa *Sextam* speciem Tertianæ Perniciosæ tum dignoscendam, tum curandam, nil dico, cum eam ad commune Febrium Malignarum, & Pestilentium genus reducat, communemque cum illis Diagnosim, Prognosim, atque Medelam alibi instituat; quod hujus loci non est.



## CAPUT VIII.

*Prava rursus Perniciosarum Februm Intermittentium natura innuitur ex descriptione Ricardi Morton, adjunctis pariter ad claritatem fusioribus Scholiis.*

**V**ARIAS Perniciosæ Intermittentis icones hactenus nobis exhibuit *Mercatus*: modo versicolore illius imaginem, diversos, ut ait, morbos mentientem pingat *Mortonus*, simulque vim eximiam Peruviani Corticis pro tanto hoste debellando testetur. Testetur, inquam, ipse, me asseverante, seu [quod dignius est] ipse doceat, me solum testante. Æquum est enim, ut quemadmodum ille ante me insignia Corticis experimenta in casibus admodum arduis, & nonnunquam in Perniciosis Febris, de quibus impræsentiarum est sermo, tentavit, ac feliciter absolvit [quod Historiæ ab eo descriptæ satis ostendunt] ita in earundem Februm descriptione, ipsarumque per Corticem curatione tradenda, primas teneat: ego vero ad confirmanda illius asserta tantummodo calculum addam ex propria, & multiplici experientia petito. Ingenue tamen reposito, quod & olim Lectori præfatus sum, me nempe circa hoc nihil, ne analogice quidem, desumpsisse a *Mortono*, cuius Opera, quæ penes me existunt, tempore, quo primum, satisque notum in Urbe mea tentamen inii (permittentibus id ipsum quamvis spe nulla aliis Comprofessoribus tum Nostratibus, tum Exteris) nondum erant cusa, nedum mihi nota. Et licet in ipsis admonear a Bibliopola, Tractatum Pyretologicum se junctum prius impressum fuisse, illius profecto nullam unquam ne per famam quidem notitiam habui. Sed hoc nil interest. Si de opposito quis velit, valeatve suspicari, sciat, majorem mihi fore laudem, ac gloriam, si Viri Clarissimi potius, quam meo fretus consilio, prima experimenta (utut rationalia) dicar tentasse. Utcunque, ego

de hac nostra in Methodum non longe absimilem, sed tamen diversam, coincidentia adeo mihi complacui tunc, cum *Mortoni* Pyretologiam lustravi, antea [fateor] ferme neglectam, ut, jus promeritum Eidem redditurus, parum quidem abfuerit, quin Tractatum ipsum integrum reimprimi curarim [quem tamen a fronte ad calcem attente a cunctis considerari velim] illique meas observationes, casuumque consimilium Historias adnexerim. Id autem aggressus essem, ut quamplurimas veritates practicas inibi existentes, sed vel non satis patentēs; vel non satis perspectas, & fortasse minime creditas in propatulo ponerem. Iis etenim alicubi dilucidatis, & ab aliquo identidem excessu [si fas sit dicere] castigatis, melior fors accessisset, majorque itidem perlegendibus utilitas. Sed ex alia parte, cum quidquid in eo Tractatu propius videtur respicere *Perniciosas* Intermittentes, erui possit partim quidem ex Capitibus, ubi de signis Intermittentis Febris tum Diagnosticis, tum Prognosticis, sed præcipue ex Capite speciali, ubi de Genio Intermittentium versatili, aliosque morbos etiam acutissimos simulante, sermonem habet; idcirco hoc unum saltem *Caput* ad unguem transcriptum hic inferere lubens decrevi. Ne vero cum *Mortono* aliter agerem, ac egerim cum *Mercato*, congruum duxi illius quoque sensa perpendere, nonnullisque animadversionibus tantillum augere, propriam subinde, & apertam Perniciosarum Periodicarum Descriptionem, ac Curationem promulgaturus, Peruviano Cortice valide administrato feliciter absolvendam. Quod quidem intelligendum est, ut tunc dicturus sum, non modo de eadem Febre suos adhuc typos, etsi crudeliter, patenter tamen servante; sed de ipsa etiam jam in *Continuam* conversa, & obscuratis, nondum tamen plane abolitis periodis ad exitium properante, cum nempe jam frigefactus universaliter Ægrotans cum minutulis sudatiunculis fere sine pulsu jacet, moribundo similis, dummodo usque



que in alteram Exacerbationem [a qua per diem naturalem circiter distet] valeat sufficere. Priusquam ergo ista propius aggrediar, mihi interim præludat —

## RICARDUS MORTON

De Proteiformi Intermittentis  
Febris Genio.

**E**XEMPLA *Februm Intermittentium* Cortice Peruviano curatarum adjungere, irritum plane atque inutile esset, postquam Cl. Badus, Sturmus, cæterique Remedii hujus Polychrestii Fautores hanc Provinciam jamdudum suscepint: Et nemo hodie [quod scio] de viribus hujus Remedii Febrifugie dubius hæreat. Quandoquidem autem ob vehementiam Symptomatum, ubi Natura ferre integra acrius stimulatur ad luctam cum veneno hostili instituendam, hæ Febres haud raro plerosque alios Morbos, eosque acutissimos simulare soleant, Corticis tamen viribus cedant, & si Cortex non exhibeatur, sæpius funestæ evadant; opera pretium duxi Exempla aliquot hujusmodi Februm, quas nuperrime observavi, seligere, scriptis mandare, atque publici juris facere. Atque equidem hoc pensum eo lubentius aggredior, quia Nemo adhuc (quantum scio) hoc subjectum tractavit, cujus cultura ad Praxim Medicinalem promovendam maximi momenti mihi esse videtur. Siquidem inter innumera illa symptomata hæc Febres comitari solita, nullum est quod non aliquando adeo vehementer sæviat, ut vita Aegri inde in præsens discrimen adducatur, & Typus Febris in variis suis stadiis Algoris, Caloris, & Sudoris abscondatur penitus, & opprimatur, ita ut neque ex Urina, Temperie, Pulsu, vel alio quoque solito modo distinguere possit; necum sub larva Algoris funesti, Vomitionis indefinientis, Diarrhææ torminosa, Cholera morbi, Colicæ ventriculi, Hemicranicæ periodica, Apoplexiæ, Syncope, Rheumatismi, Spasmi universa-

lis, Pleuritidis, Peripneumoniæ, Doloris lateris punctorii, vel alterius Morbi secure delitescens, Medicum a scopo suo non raro abducat. Symptoma quidem interea Remedii propriis, sed incassum, tentatur; Nam, posthabito Fermento Febrili, proxima effervescentia periodo, priora, aut deteriora symptomata inexpectato recrudescent, Medicus Sisyphus saxum volvit, atque Ager vitæ dulcissima dispendio, aut saltem magno sumptu, ignorantia vel incuria Medici pœnas sero luit.

### S C H O L I U M I.

Supervacaneum jure merito reputat Cl. Auctor, hisce temporibus scribere curationes Intermittentium vulgarium ope Chinæ Chinæ absolutas; sed ex adverso æque merito necessarium censet, ac opportunum recensere curationes earum Intermittentium Pernicialium, quæ hominem in maximum vitæ discrimen adducen-tes, Cortice nihilominus rite oblato æque prompte curantur ac benigniores. Hanc itaque praxim illustrare maxime interest, præcipue cum ea extendatur ad Febres ipsas recentem continuitatem adeptas, dummodo fuerint Intermittentes ab ortu, & post acquisitam continuitatem, consuetas adhuc incrementi, & decrementi vicissitudines, atque periodos servant. Illas enim considerandas esse ut Intermittentes, & ut tales Cortice pariter certo curari, nos docet præter Mortonum Doctissimus Sydenham in Epistola ad Bradium, ut videbimus tum Cap. 5. Libri 4., tum Cap. 3. Libri 5. Nos itaque in hac Praxeos Medicinalis parte promovenda Mortoni morem secuti, post statutam Methodum nostram offerendi Corticem in hujusmodi Febribus, cæteroqui lethalibus, complementum ejusdem methodi ab exemplis suo loco subnectendis mutuabimur.

Non sine magna ratione hoc remedium hic, & alibi ab Auctore Polychrestum dicitur, quippe vere ad multa, & magna perutile in linea Alexipyretorum. Utinam ad alios morbos similia possideremus; sed paucis demptis, quorum virtus certa est, & utilitas evidens, Ars nostra Medicamentis superfluis alioqui ditissima, bonis, certisque, quæ innotuerint, caret: immo forsitan ob hoc ipsum est inops, quia inutilibus, dubiisque superfluit. Obru-

nem-



nempe vel ipsum Medicum supervacanea Pharmacorum copia: quandoquidem ægre nimium e mille figmentis una, quæ forte vix est, practica veritas potest secerni. Deme (audeo dicere) ab Arte Medica Phlebotomiam, Purgationem, Chalybem, Chinam Chinam, Ipecacuanham, Opium, Thermas, Viperam, Mercurium, diversaque Antivenerea, Lac, Serum, aliaque non multa, & ferme nudam reddes. De Chirurgia, quod est ad remedia quædam, non absimile sit Judicium. Perita namque manus sæpe sola, vel ferro prudenter, vel igne caute, vel fasciis eleganter, & cum regimine instructa, quamplurima præstat. Contrectatio vulnerum crebrior, & medicaminum multiplex appositio, vana sæpe, immo plerunque noxia Artis ostentatio est. Super hac re satis diserte suis temporibus *Cæsar Magatus*, illumque secutus *Septalius* (quodcunque sit, quod de utroque fert judicium *Sennertus*) nostris vero temporibus *D. Bellot* ejusdem *Magati* Sectator novissimus, siue deinde hujus cum illo conformitas fortuito tantum contigerit, quod non repugnat, siue potius de industria, ut in peculiari Epistola notat, & in pinguiori, quod meditabatur Opere, se ostensurum fore videbatur Accuratissimus *Sancaffanus*. Utcunque, Inventum primum raræ solutionis vulnerum, *Romanis Chirurgis*: morem vero ablegandarum turundarum, *Apparicio* cuidam *Vasconi*, mox & *Lemosio* tribuit ingenue *Jo. Baptista Magatus*, *Cæsaris* Frater: Methodum autem hujusmodi praxeos rationalem ipsi *Cæsari*, quem fuisse, doctæque tueretur in suis *Considerationibus Medicis* Tom. 1. Partis 3. At hoc nihil ad nos. Sicuti ergo pauca Chirurgi remedia, ita & non multa sufficiunt Clinico. Inter ea locum sane non infimum tenet China China, immo ausim dicere, quod omnibus palmam præripiat. Magnorum equidem remediorum nomina sibi vindicant antonomastice Venæ sectio tantum, atque Purgatio; sed istiusmodi privilegium illis quandoque competit, quandoque non. Ego Magna voco quæcunque sanant: & eo majora, quo melius.

En quomodo Perniciosas Febres describit Auctor, quasi sub aliorum morborum acutissimorum larva delitescentes, nec proinde in propria specie cognoscibiles (adeo obscurari putat earum naturam) sed exitiales interim, atque funestas, nisi Cortice statim domentur. Ex quo potissimum

effectu debellatæ jam Febris essentiam, veluti a posteriori, deducit, aut aliunde deductam confirmat.

Fallitur hic Auctor, dum se istarum Febrium primum Observatorem, aut Relatorem credit, etsi a semetipso tantum didicerit. Vidimus jam quid scripserit de iis, & quam luculenter *Mercatus*, qui *Vallesium*, *Zoarum*, & *Averroem* quoque hujusmodi Febrium non omnino ignaros censeret, ut ex eorum textibus ab ipso *Mercato* allatis, & de *insanabili Tertianâ* mentionem facientibus, videtur posse deduci. Vidimus pariter, aut saltem enuciavimus, quomodo *Lucubrationem* ipsam *Mercati* per compendium denuo transcripserit *Daniel Sennertus*. Ab ullo quidem alio peculiarem institutum fuisse Tractatum, peculiaremve Curationem non novi; a pluribus tamen aliquam obiter, infructuosam licet, ac sterilem factam fuisse mentionem, facile est palam facere. Sic *Lazarus Riverius* Practicus Celeberrimus Tertianarum Intermittentium prognosim designans — *Prognosis*, inquit, *desumitur ab Hippocrate Aphorismo 59. sect. 4. — \* Tertianâ exquisita septem circuitibus ad summum judicatur. \* — Et Aphorismo 43. ejusdem sectionis. — \* Febres quocunque modo intermiserint, periculum abesse significant. \* — Quod tamen intelligendum est, subdit idem Riverius, de Tertianis Febribus omnis malignitatis expertibus. Dantur enim Tertianæ Malignæ, quæ quamvis evidentes habeant intermissiones, Ægrotantes tamen non raro de medio tollunt. Præterea multa Febri Tertianâ possunt supervenire, quæ vitæ periculum inferre possunt, quamvis Febris ex se periculosa non sit. Clarius autem pravam Tertianarum perniciosarum naturam exprimit, ubi de Febribus pestilentialibus agens, ait, tales esse quandoque Febres Intermittentes, his verbis — *Quamvis dixerit Hippocrates, febres Intermittentes periculo carere, quomodocunque intermiserint, id tantum intelligendum est de iis, quæ nullius sunt malignitatis participes. Videmus enim singulis fere annis, in hac saltem regione, Febres tertianas intermittentes, quæ summa malignitatis sunt participes, tertia, vel quarta accessione Ægros de medio tollere: alias, quæ eos in gravissimum vitæ discrimen conjiciunt, maxima symptomatum sævitia — cujusmodi etiam exempla reiert in Centuriis suarum Observationum. Hieronymus Mercurialis de Tertianâ Intermit-**



tente verba faciens habet hæc incidenter — *Tertiana, quæ fit a bile aruginea, non solum periculosa, verum etiam exitiosa est* — agensque postmodum de *Tertiana notha*, idem raptim confirmat ex sententia *Avenzoar*. Unius itidem Casus perniciosi huiusce generis, quasi prodigii cuiusdam meminit *Hercules Saxonia*, hæc de *Tertiana* crassiusculo sermone conscribens — *dico, ex se esse salutarem* (intellige *Tertianam*) *quia ratione motus materiæ non admodum salutaris; si moveatur maximo cum impetu ad os ventriculi, qui habent os valde sensibile ventriculi, fit cardialgia talis, quæ desinit in syncopem, & mortem: quale exemplum memini me vidisse, dum essem Junior. Pompejus quoque Sacchus Cardialgiam considerans, ut Febrium symptoma, eam leviter adumbrare videtur Tertianæ Perniciosæ speciem, quæ propter adjunctam Cardialgiam fit talis, inquit obiter — Cardialgia Febricitantes, etiam ex Intermittente Febre, ad extremum vitæ ducit, & multoties perimit, bile morsu oris ventriculi cum summo dolore vires resolvante, cum perversione Cerebri, & Cordis, cum quibus prædictum orificium summam habet connexionem.*

Alii insuper, quos summam præstat, quam operose recensere, de iisdem Perniciosis Intermittentibus, perfunctorie licet, locuti sunt, inter quos *Epiphanius, Donatus, Horstius, Rhodius, Restaurandus, Sydenham, Salmuth, Sylvius, Ettmullerus* &c. ut propterea opinioni, quam de se uno *Mortonus* habuit, locus non detur. Quia vero omnes hucusque recensiti Scriptores, *Mercato* excepto, nec non, si velis, *Restaurando* etiam, & *Sydenhamio*, ut infra, *Praxim Medicam* suis luminibus vix tantillum in hac linea promoverunt, *Mortonus* vero nervosam, certamque curationem viriliter docuit: ideo non injuria plurimum sibi tribuit, si non quo ad descriptionem morbi, saltem quo ad curationem; quamobrem non modo excusationem meretur, verum & laudem. Me quoque reputabam Ego *Methodi* quondam meæ in *Perniciosis* Inventorem unicum; cum tamen *Methodum* non valde ab similem ad easdem jam tum quoque, & ante me, ut testantur illius Scripta, in regione sua exerceret *Mortonus*. Immo cum in ipsa Italia, Senis nempe, Florentiæ, in Regno Neapolis, & Romæ, referente *Bado*, adhiberi cœperit, fere statim ac innotuit *Cortex*, *Miscellaneas* ad Fe-

bres, ut ajunt, & *Hemitritæos* (cujus *Febris* miram curationem ope *Chinæ Chinæ* a se absolutam in quodam Sacerdote ex *Capuccinorum* familia idem *Badus* per extensum describit) quin & ad *Continuas* simpliciter profligandas: ulterius, cum postremis hisce temporibus, sub *Cælo præsertim Romano, ac Hetrusco*, prout indicare videntur *Opuscula* inde profecta, in usu sit idem remedium, non secus ac in *Gallia*, ad omnes parit Febres, quas humorales vocant (utinam semper cum fructu) & signate ad eas, quæ præcipiti periculo mortem minantur, non potest, quin inter illas, saltem fortuito, etiam *Intermittentes Perniciosæ* quoquo modo comprehendantur.

Testem expertum jam mihi se præbuit huiusce rei laudatus nuper Doctissimus *Lancisus* nitidissima *Epistola* sua, quam quidem, utpote ratione elegantiae suæ publica luce dignissimam, hic placuisset inferere, nisi uberior erga me Auctoris humanitas, & laudum minime promeritarum copia, mihimet mecum habitanti, curtamque supellectilem meam satis noscenti, sufflamen imposuisset, ne incaute foras excurrerem. Paragraphum tamen unicum, rem perstringens, ex tota liceat excerpte *Epistola*. *Opus tuum* (ita Vir Amplissimus) *de Febribus Perniciosis Cortice Chinæ Chinæ potissimum subactis, plura sunt, quæ mihi, cunctisque Artis nostræ Professoribus expectatissimum efficiunt: illud tamen maxime desiderium meum excitat, quod Romæ observaverim in epidemica istiusmodi Februm constitutione, anno 1695. ex Aquis stagnantibus orta, Corticem illum specificum Antidotum fuisse. Quamobrem, cum studia nostra in solam veritatem querendam directa sint, futurum confido, ut observationes meæ tuis animadversionibus, & commentariis accuratissimis sint plurimum illustranda. Cum autem nuperrime tantum, ac proinde fera hæc ad me notitia pervenerit (profecta scilicet nimis jam *Preli opera*) obstiteritque angustia temporis, ne *Cl. Viri Observationes*, siquidem illas, ut videtur innuere, typis ediderit, mihi tempestive parare potuerim, congruum duxi, incidenti hæc ejusdem assertionem, id ipsum, quod paullo antegeneraliter conjeci, specialius in præsentia, validiusque confirmare.*

Ut ad *Mortonum* redeam se reputantem Observatorem unicum *Intermittentium Perniciosarum*, minime silentio præ-



prætereundum videtur, quod, cum *Restaurandus*, ut supra innuebam, descripserit, atque illustrarit historiis Curationem Febrium Syncopalium, Cardiacarum, Diaphoreticarum, Hepaticarum, Hemitritæorum &c. ope Chinæ Chinæ, etsi cæspitanter, ac methodo languidiore, satis patet, aliquam saltem Perniciosarum quarundam curationem per usum Chinæ Chinæ innotuisse huic Auctori. Immo cum Scripta sua pluries postmodum recusa jam olim primo evulgarit Auctor iste, aliqua facile poterat, si non debuerat (neque enim tenetur nosse quilibet, quod scripsit quisque) *Mortono* posterius, ut mihi videtur, scribenti præluxisse notitia, quod non sibi soli, verum & *Restaurando* observatæ fuerint nonnullæ exitiales Intermitteutes, & quod ipse *Restaurandus* per oblationem Corticis eas curaverit, aliisque eodem remedio, per vulgatam tamen tantummodo illius infusionem, curandas proposuerit. *Sydenham* pariter in Epistola responsoria ad *Bradium* sibi scribentem anno 1670. in peculiari paragrapho mentionem facit Intermitteutium quarundam (quas nos *Lethargicas* appellabimus) in quarum principio, loco symptomatum consuetorum, veræ potius Apoplexiæ symptomata apparebant, ut mox videbimus; quas tamen Febres solo interim Cortice sanabiles censet. Hæc quidem obiter quoque *Sydenham*. Quod vero specialiter, & forte a reliquis valde distincta, in arduis quibusvis, ac multifariis Perniciosarum Intermitteutium circumstantiis, ac differentiis, extremisque Aegrorum angustiis usurpetur Cortex (quo indiscriminatim, ut aiebam, utendum esse in omnibus Febribus, haud facile assentiar) seu, quod usurpetur modo peculiari, quo opus est, dosique, ac Methodo determinata ad rite obtinendum effectum, hoc est, quod non adeo tritum adhuc censeo, & quod uni forte *Mortono* mecum innotuisse crediderim.

Progreditur nunc Auctor ad recensendos morbos (melius dixisset gravia symptomata aliorum cæteroqui Morborum potius, quam Febris Intermitteutis propria) sub quibus abditam latere Intermitteutem Febrem, conatur probare ex periodico eorundem symptomatum recurso, & ex medela per Corticem afferri apta Aegrotantibus huiusmodi, alioqui quasi de repente, ut inferius inquit, animam efflatis, nullaque alia arte sanabilibus.

Quam tamen Febrem adeo absconditam statuit, & omni veræ Febris caractere destitutam, ut neque ex urina, temperie, pulsu, vel alio quoque solito modo, aut indicio distingui possit, aut accuratissimo Observatori se prodatur. Ego vero fateor, me talem obscuritatem nunquam observasse, nisi cum jam tertia, vel quarta accessio Aegrum ad extrema fere deduxerit. Cæterum primis accessibus manifestissimam semper, & non raro blandam Febrem Intermitteutem deprehendi: & si forte aliquando sero vocatus sim, postquam res in præceps ruerit, facillime pariter ex Adstantium, aut Aegrotantis relatu, de præcedentibus paroxysmis, atque periodis conscius factus, Perniciosam Febrem (utut algidus, ac sine pulsu appareret Aeger) semper dignovi, & quemlibet Medicum facile dixerim ad huiusmodi dignotionem teneri. Sic illas omnes palam dignovit, atque distinxit *Mercatus*, ut videre est apud illum, ubi de simulato dolore Pleuritico, Catarrho suffocativo, Asthmate, Rheumatismo &c. mentionem facit. Ista autem omnia, non ut morbos, sed ut accidentia Febris Periodicæ patentis, non vero absconditæ considerat. Iterum equidem fateor, enumerata nuperrime accidentia, a *Mercato*, atque *Mortono* in Perniciosis observata, mihi perraro occurrisse, quemadmodum alia nonnulla mihi cum *Mortono* comperta forte non observavit *Mercatus*, ut jam adnotavi in Scholiis ad ipsum *Mercatum* Cap. 7. Schol. 1. & ut dicturus sum de Differentiis Perniciosarum ex observatione mea, *Libro sequenti, Cap. primo*.

Sed præter *Mercatum*, *Sydenham* quoque huiusmodi Febrium Perniciosarum accidentia alios morbos simulantia, pro meritis earundem symptomatis expresse dignovit, atque ut pro talibus tantum haberentur, monuit his verbis in citata nuper ad *Bradium* Epistola — Hic autem commemorare libet, quod sub primis hujus Constitutionis annos symptoma quoddam insigne Febribus Intermitteutibus quandoque supervenerit. Nempe earum Paroxysmi non cum rigore, & horrore, quos postea Febris excipit, invadebant, sed Aeger insdem plura symptomata tentabatur, ac si Apoplexia vera laborasset, quæ tamen nihil aliud erat, utcunque hunc affectum amularetur, quam ipsa Febris caput impetens &c. Hoc autem in casu, quantumlibet evacuationes omnes, cujuscunque demum generis sint, indicari viden-



videntur, ad revellendos scilicet ex cerebro humores, ut in Apoplexia primaria fieri solet; eadem tamen omnino omittenda sunt, utpote quæ originaria hujus symptomatis causa, Febrî nempe Intermittenti, prorsus adversentur, ac proinde mortem accersant; quod & ipse novi. At e contra expectandum, donec paroxysmus sponte sua evanuerit, quo tempore Cortex, modo citius idem ingeri non poterit, quam primum est exhibendus, & in Intervallis ab hujusmodi accessionibus liberis idem sedulo repetendus, usque dum perfecte convalescerit Aeger.

Sic ubi, præ gradu Veneni summe Deleterio, Spiritus adeo perculsi sunt, ut a primo ictu sese iterum nullatenus expandere valeant, Algor, qui primum horum paroxysmorum insultum, ex instituto Naturæ, comitari solet, eoque protrahitur, donec Aeger Deliquiis frequenter recurrentibus confectus, tandem Fatis cedat. Interea Remedia intus, vel extra ad flammam vitalem resuscitandam incassum applicantur, Febris autem nullo indicio ex Urina, Temperie, vel Pulsu, accuratissimo Observatori sese prodit.

#### S C H O L I U M II.

Quæ passim obtrudit Auctor de veneno febrili spirituum expansionem plus, aut minus impediende, ordinem habent ad illius Hypothesim, qua considerando Corticem Peruvianum ut Antidotum, Fermentum febrile ut Venenum respexit. Equidem Peruvianum Corticem, sive Antidotum vocites, sive Absorbens specificum, Febribus præsertim Intermittentibus additum, parum refert; in quo sensu non male quis Chalybem appellaret Antidotum Chlorosis, Sulphur Antidotum scabiei, & sic de pluribus aliis remediis ad alios morbos. Pariter Caussam Februm, sive Fermentum dicas, sive Venenum, nisi aliud addas, resæque obscura est, & tota fere discrepantia videtur consistere in vocibus; nihilominus communis acceptio utriusque termini aliquid in re valde diversum solet importare. Quid per Fermentum febrile soleat intelligi a plurimis Auctoribus in explicanda Intermittentium causa, & quid intelligam ipse, generaliter saltem, atque confuse, vidimus alias: statuimusque ad

minimum, illud esse succum aliquem incongruum, ac heterogeneousum, cum sanguine non probe miscibilem, adeoque illum in morbosam fermentationem, seu mavis effervescentiam concitare aptum, donec ab eo secernatur, & expellatur: cui succo sensibili, atque, aut ajunt Scholæ, quantitativo, peculiarem in Corpore nostro sedem habenti, velut vero, & palpabili Fermento, si posset determinari, accidentalis postea sit varia, & modo minor, modo major, modo maxima, & incomprehensibilis activitas, aut acrimonia, quæ proinde nonnumquam maligna, & venenata per nostrum debilem intelligendi modum queat appellari. Cum enim vitiosa succi hujusmodi dispositio non in universa consistat illius quantitate, sed tantum in salibus aliquot parvæ molis, & peculiaris naturæ, aut configurationis in ipso existentibus, quibus retusis, vel solutis, aut quomodolibet enervatis, restituitur debita crasis eidem succo peccanti: quod omnibus universaliter competit nostri corporis humoribus quoque modo vitiat: hinc est, quod sales hujusmodi, dum talis naturæ sunt, ut vulgarem tantum, ac benigniorem excitent effervescentiam, etsi simul quoque afficiant spiritus, sintque molis, ut diximus, inconspicuæ, verum tamen veneni nomen nequaquam mereantur: mereantur vero cum talis naturæ sunt, ut vere deleterium, ac infabilis, effæraque pravitatis præferant characterem in ipsorum præsertim textura exotica, & sapore abominabili inde procedente repositum. Quid ergo per Venenum generaliter quoque, ac indistincte debeat, aut soleat intelligi, ex his ipsis, quæ modo per transennam diximus, sufficienter potest dignosci: satisque liquet, characterem hujusmodi febrilibus succis nonnumquam quidem accedere posse; sed tamen ut plurimum non accedere.

Mortonus autem simplex, nudumque Venenum deleteria vi præditum esse contendit id omne, quod Febrem gignit, & quod dici consuevit in solis Malignis, ac Pestilentibus Febribus de Veneno ingenito, explicari solito relative ad duo venenorum genera, quorum alterum figit, alterum dissolvit humores, ac pessundat spiritus, ipse ad omnes etiam Benigniores Intermittentes absque notabili distinctione, nisi pro diverso majoris, vel minoris intensionis gradu, traducit. Cumque Ficis Febriferas, quas Pharaonis vocant, in Sar-



in Sardinia nascentes, & Tertianam Febrim caussantes (ut ex *Conciliatore*, & *Cardano* refert *Badus*, & ex *Bado* ipso *Mortonus*) iisdem manifestis qualitatibus pollere credat ac Cortex eandem Tertianam fugans, visum propterea est Illi in duobus hisce quo ad effecta contrariis, & quo ad sensibiles qualitates similibus, eam statuendam esse abditam oppositionem, quæ inter Venenum intercedit, & Antidotum. Quod si quis ab eo quæret, non quidem plane quid sit, & quale Venenum febrile, sed saltem ubinam, aut unde generetur, cuinam subjecto primitus inhæreat, a quo postmodum imprimatur in spiritus, cum in illis immediate gigni non possit; item quo pacto sit aliquando tam mite, cum tamen sit semper Venenum, quomodo per intervalla vel reproductum, vel motum, & alia huiusmodi: etsi plurimæ ex his instantiis omnes torqueant in quocunque philosophandi systemate, vereor tamen, ne Ille, plusquam cæteri, tandem cogeretur respondere, se potius metaphorice, & per analogismum quemdam, quam strictè, & proprie Veneni nomen usurpasse. Et sic in assignando huiusce Veneni vehiculo quantitativo, primave illius scaturigine, cum aliis fortasse coincideret.

Neque satis eidem suffragari videtur ingenua confessio, quam sponte profert, ad evitandam difficultatem explicationis suæ Hypotheseos: se nescire scilicet Venenorum æque ac Antidotorum naturam, sicuti & naturam spirituum, in quos Venena primario agunt, & Antidota, *satiisque esse, Philosophum modestam Philosophiam professum, sana mente quadam ignorare, quam insane nugari, & delirare.* Ad nihilum, inquam, videtur valere huiusmodi confessio; quia, quemadmodum ineffabilis virulentia Cicutæ, Arsenici, Cantharidum &c., ipso notante *Mortono*, reapse latet sub determinato, & palpabili vehiculo substantiæ quantitativæ talium Plantarum, Mineralium, Animalium &c. (rectius forsitan sub determinata combinatione salium essentialium, seu particularum illas componentium, talem, ac talem determinatam figuram habentium) quæ Plantæ, Animalia &c. possunt a nobis indigitari, tanquam subjecta illius virulentiae nostris spiritibus communicabilis: ita cum proportionem dicendum foret de Veneno febrili; ac propterea munus Auctoris esse fluidum ali-

*Terti Therap. Spec.*

quod, seu solidum designare, cui, tanquam subjecto, inhæreat, seu, in cuius salium, particularumque figura, atque textura consistat ipsa cæteroqui inexplicabilis virulentia Fermenti febrilis. Sane secundum generalem, & indeterminatam Illius appellationem morbos omnes a peculiari Veneno oriri, possumus asserere, omniaque eorum remedia, quæ Specifica vulgo appellantur, Antidota nuncupare.

Auctorem tamen nonnihil juvat ejusdem Tractatus, in quo conatur ostendere quam similia sint, plus minus, Februm, ac Venenorum accidentia, quomodo in diversis Febris diversorum pariter nominatim Venenorum observetur Character, & similia, quæ in Praxi prorsus contemnenda non sunt, sed immo quæ perpendantur digna. Et, ut verum fatear, cum in Febris saltem Perniciosæ, adeoque Malignis, accidentia quandoque talia contingant, qualia a Toxico propinato solent suboriri, nullus dubito, quin tunc saltem venenatum dici queat, sterili quidem nomenclatura, illarum Fermentum. Id propterea a *Mortono* unice peroptassem, ut loco talis Veneni vehiculum potius aliquod sensibile quemadmodum supra innuebam venenositatem nonnunquam suscipiendi capax, pro causa Februm ordinaria attulisset, seu succum aliquem, sæpius quidem, vel semper incongruum, non vero semper venenatum; sed aliquando talem, & aliquando non: hoc est succum vitiosa quidem, sed benigniore dyscrasia ut plurimum præditum, nonnunquam vero etiam sylvestri, ac exotica, sive (quemadmodum loqui mos est) venenata, ut nonnihil fusius suo loco videbimus. Ast vehementi, quam præconceperat, tenaciter adhærens ideæ, quod Cortex Intermittentes benignas æque ac malignas vincens, esset ubique vera Antidotus secundum rigorosam, obscuramque per consequens huiusce termini significationem, omnes indiscriminatim Febres ab ipso devictas, veri quoque veneni, obscuri pariter, ac ignoti, sobolem esse, sibi haud difficulter persuasit; quod tamen in hisce terminis nonnisi difficulter poterit aliis forsitan suadere.

Ad modulum autem suæ hypotheseos cuncta per affectionem spirituum a veneno varie percussorum explicare conatur per totum Caput, ubi semper nomine diversorum Morborum gravissima Perniciosa-



ciosarum symptomata designat, iisdem Febribus, secundum ipsum, omnimode absconditis. Utilis nihilominus est ad praxim illius descriptio, quam ideo ad calcem usque Capitis legenti considerare expediet: quamvis in ea non modo Perniciosas Febres a *Mercato* descriptas, verum & alias antiquas, ac confirmatas affectiones, aliosque morbos quandam forte periodum præferentes, sub specie Febris quodammodo latentis identidem pingat. Qua in re, cum Morbos essentielles cum Symptomatis Februm videatur quasi confundere, possitque idcirco Auctor noster vel in præscribendo Cortice notari de excessu, vel de defectu in describenda Febre, hinc fortasse est, quod minor, quam par fuisset, illi a plurimis sit adhibita fides, dum tamen in iis, quæ ad Perniciosas Intermitteutes revera trahi possunt (quæ ubique in toto Capite sunt permulta) fidem omnimodam mereatur.

*Parili modo, ubi in primo Stadio Paroxyismi, Fomes Venenatus Spiritus tantum opprimat, ut non ultra solitam Sphæram sese possint expandere, absque indicibus Febris præsentis, de Nausea, Aegritudine, & Vomitione Ager unice conqueritur, donec Veneno a Cortice Peruviano, vel alia Antidoto subactis, Spiritus in nativum statum restituantur.*

*Nonnunquam Venenum Febrile sub initium Paroxyismi glandulas Intestinarum petit, & Fluxum Alvi torminosum, vel Dysenteriam excitat. At, cum Spiritus diu uno tenore opprimuntur, hæc symptomata utut continua, statis Periodis exacerbantur, & periodica evadunt, sine Febris indicibus manifestis, & vires Opiatorum, & Adstringentium longe superant, donec a Cortice Peruviano cum Laudano commixto, Causa, sc. Fermentum Febrile, Massam colliquans, æque ac Symptomata inde orta auferantur.*

*Ubi Venenum Emeticam simul ac Catharticam naturam participat, Ager frequenti vomitione & dejectione detinetur; & nisi Spiritus in primo Paroxyismi Stadio expansione legitima virulentiam excutiant, formatur inde Cholera morbus, Febre neque per Pulsum, Urinam, vel Temperiem se manifestante. Ventriculo interea, aut Intestinis, aut utrisque simul*

*ab acrimonia Humorum intensissime venenata Sphacelatis, Ager brevi Fatis cedere cogitur, aut saltem post Inducias infidas datas, a veneno, proximo Paroxyismo recrudescente, Symptomata eadem crudelia & funesta revirescunt, nisi a tempestiva Antidoti Febrifuge exhibitione antevertantur.*

*A parili gradu Veneni non raro observavi Aegros, præsertim antiqua, & confirmata huiusmodi Febre lacessitos, denovo (typo Febris legitimæ amisso) perpetua Nausea, Aegritudine, Vomitione, Sudore colliquativo, Suffocationibus Hystericis, ceterisque id genus Symptomatis in genere Nervoso pene confectos, atque Animam quasi derepente effluros, quos debita Dosi Corticis [nulla alia arte sanabiles] illico restitui.*

### S C H O L I U M III.

Quod de antiquis, & confirmatis Febribus hic inquit Auctor, locum magis habere videtur in Recentibus Perniciosis tunc, cum (ut videbimus in descriptione, & in historiis specialibus earundem) Ager post tertiam, vel quartam accessionem algidus factus, & sine pulsu, typo jam legitimæ Febris amisso, confectus jacet, quasi de repente animam efflaturus, quem tamen nulla alia arte sanabilem debita dosis Corticis illico restituit. Profecto verba ista sunt aurea; complectuntur siquidem descriptionem Aegrotantis vere ad extrema redacti, nec Febrem amplius suam tactui Medico exhibere potentis, deficiente scilicet Calore, & Pulsu: quod quidem pluribus Perniciosis familiare est, ut videbimus suo loco. Complectuntur pariter mirandam virtutem Corticis, Aegrotantes huiusmodi illico restituendi, quod verissimum est, si debita, ut inquit, dosi administretur, Quænam autem sit dosi debita, suo loco dicemus, & quidem regula certiore, dispositioneque elegantiore, & magis ordinata, ac doceat ipse *Mortonus*. Tandem complectuntur Prognosim (heu nimis certam!) de morte huiusmodi Aegrorum, si Corticis auxilio sint destituti. Funestum hunc eventum satis ostendit crebra experientia, satisque illum patefecere lethalia prognostica Diligentissimi *Mercati*, incassum a Veteri Medicina præsidia quærentis; ut proinde nullus



nullus sit locus invidæ, malignæve assertioni, quod hujusmodi Febres in tali statu Cortice statim, intra unum videlicet, aut alterum diem, jugulatæ, sine ipso etiam, & tutius sanatæ fuissent, vel quod sponte simpliciter sua sanatæ sint. Loquamur aperte, & vel invita, ac refractaria ore tenus, intime tamen, & in corde suo assentiatur fremens pervicacia. Obeunt non oblato Cortice fere omnes in eo statu; & si quis inter centum servatur, nonnisi longa, & difficili judicatione convalescit. Contra oblato congrue Cortice servantur fere omnes, & (quod illi uni inter remedia naturalia competit) servantur illico. Hujusce asserti veritatem melius patefaciet Methodus nostra, & evincent Exempla Curationum satis numerosa, & insignia.

Unicuique etiam in Medicina versato notum est, horrendos Dolores (& iis, qui a toxico propinato proveniunt non minores) Lumbos, & Crura spasmodice lancinantes, non raro primos insultus Februm Intermittentium legitimarum, præsertim Quartanarum comitari solere, durante Algore, & Rigore, donec Spiritus multo nisu expansi, ac agitati pares sint Veneno activo eliminando. Flamma autem inde accensa, Spasmi dolorifici sensim cessant: Verum, ubi Spiritus vi veneni non tantum deprimantur, sed etiam in statum Explosivum universim adigantur, nonnunquam deprehendi totum Corporis Systema inde perpetuo algens, idque diu, ac sine ulla Febris nota; totam autem Machinam interea Spasmi universalibus, iisque horrendis, & versatilibus hinc inde vellicatam, & lancinatam. Nec mirum est, si Ager perpetua Aegritudine, Vomitione, atque deliquiis inde confectus (ut fieri solet) brevi Mortem oppetat, nisi Ars tempestive Natura languenti succurrat.

Haud raro etiam Spiritus a nativa sua debilitate, vel obstructione, atque præsertim a Frigore percepto, vel alia quavis causa evidenti ansam præbente, in statum Explosivum adiguntur; unde partes aliquæ singulares, præsertim Thoracicæ, Pulmones scil., Pleura, Diaphragma, aut Ventriculus, ac Intestina

vellicantur, & Spasmi lancinantur. Ager præ atroci dolore perpetuo alget, atque Deliquiis frequentibus, Suffocationibus, & Vomitionibus fatigatur, sine aliqua nota Febris evidenti; Urinam claram reddit, & sine Pulsu Moribundus jacet, quousque Spiritus veneno icti Arte, vel Natura expansi flammam in Massa denno excitant: Morbus autem a Cholera morbo, Pleuritide, seu Peripneumonia, duntaxat ex Tussis & Pulsus defectu, Vomitionis, & Doloris excessu, Deliquiis, & extremorum Frigiditate dignoscendus est.

Sape etiam Aegros de dolore lateris unius, aut alterius punctorio conquerentes novi, in quibus tamen Febris κατ'ήρα deprehendere non potui per plures dies, nisi quod Pulsus paullo iusto celerior erat. Postquam autem Venæ sectione, & usu Laudanici cum Alexipharmacis commixti, isti Spasmi mitigabantur, atque inde vis Spirituum Elastica nativa aucta fuit, signa flammæ in Massa accensa, quam citissime sese prodiderunt. Urina tincta est, & turbata. Pulsui fortitudo, ac celeritas pari passu accessit. Temperies universim incaluit, sitis clamosa evasit, Aphthæ linguam, atque Os cooperuerunt. At ad Flammam, & doloris Exacerbationem statis periodis recurrentem semper, quasi ad Cynosuram, auspiciato cursum meum dirigens, Copia Corticis Peruviani cum Laudano commixti, & intervallicis Paroxysmorum exhibiti, Venenum subegi, & Aegrotantes a Febri, ac dolore penitus liberavi.

Præter cetera omnia mihi pluries mirari contigit, post subactionem Veneni Febrilis ab Expansione Spirituum quodamtenus effectam, cum ex Pulsu forti, ac celeri, Urina intense rubra, ac turbata, Temperie calida, ceterisque indicibus, Febris sese palam ostendat, Artus hisce Doloribus spasmodicis, statis periodis recurrentibus, & more Rheumatismi versatilibus esse affectos, cum Tumore, & Ardore partium laborantium a nisu Spirituum in his partibus sese expandere satagentium. At hosce Dolores, adhibita Venæ sectione debita, usu Cor-



ticis Peruviani copioso extra Paroxysmum ministrato feliciter semper profli-gavi.

Denique Cerebrum, primo insultu Febris legitimæ affici non tantum Vertigine, a Spiritibus veneno Activo oppres-sis, ac turbatis, verum etiam Dolore A-cuto, vel Gravativo, a nisu Spirituum in membranis sese expandere satagen-tium, cuivis Medico notum est. Non-nunquam autem Spiritus hoc Tempore Fe-bris adeo opprimuntur & turbantur, ut Ægrotans more Apoplecticorum, duran-te toto Paroxysmo, sine Febris indicitiis Mortuo similis jaceat, & eadem Sym-ptomata simul cum Paroxysmo subsequen-ti sæpe recrudescent: Quibus Symptoma-tis utut Venæ sectione, Vesicatoriis, cæ-terisque ejusmodi Apoplexiæ veræ Reme-diis jure merito succurrendum sit, Revi-rescentia tamen eorum sine Cortice præ-caveri nequit.

#### S C H O L I U M I V.

Notandum hîc est, quod de gravibus symptomatis repetit (pluries enim idem superius dixerat) illa scilicet propriis re-mediis esse curanda. Circa hoc constanter assero, non improbanda quidem esse re-media, quæ possunt vel minuere, vel tol-lere gravia illa symptomata, quæ mortem videntur minari. Dico tamen, eadem re-media, præcipue si Ægrotanti onerosa sint, vel dolorifica, post Chinam Chinam valide oblatam adhibenda non esse, quo-tiescunque adsit moralis certitudo, ipsum Ægrotantem ab illa saltem accessione esse evasurum: ea enim superata, & altera per Corticem impedita, cessant sponte symptomata. Hanc vero moralem certi-tudinem habebimus, si jam Paroxysmus cœperit de suo vigore, & symptomata il-lius de sua intensione remitti; asperiora enim remedia, quæ tollendis nonnunquam hujusmodi symptomatis apta creduntur, officere potius, quam proficere ipsi Febri, nuper vidimus ex Sydenhamio Schol. I. Pa-riter dico, nulla esse adhibenda conquista remedia ad præcautionem; sed solum suf-ficere purum Corticem offerre, illumque omnium aliorum remediorum jure merito exulantium loco (Clysteribus, si sit opus, exceptis) justa, & assidua dosi repetere. Assertioni meæ de successiva symptoma-

tum quorumlibet evanescencia, post de-pulsas ope Corticis Febres, prout etiam tetigimus Cap. 8. Libri primi, plene asti-pulatur Monginotius inquit — Obser-vandum venit, quod crebra experientia edo-ctus dico, id præterea illi (videlicet Chi-næ Chinæ) peculiare inesse, ut plerunque extinguat maximam partem symptomatum Febres comitantium, ut imi Ventrîs infla-tiones, & dolorificas tensiones, jecoris, & lienis, aliarumque partium infarctus, ci-borum fastidium, concoctionem lasam, diar-rheam, aliaque accidentia, quæ, cessante Febre, una ut plurimum desinunt.

Atque eo libentius inculco, omittenda esse alia remedia ad correctionem sympto-matum, & ad eorundem præcautionem, quoniam non parum asperam in Curatio-ne, quam rationalem vocat, video ab Auctore usurpari Methodum, dum passim ab eo afferuntur in medium, quasi forent artis blanditiæ, Vesicatoria, Cathartica, Emetica, & hujusmodi. Mirum sane a Viro commenta Veterum Theoretica pa-lam reprobante, & notiones per conse-quens postremo hoc seculo satis obvias possidente, veterem tamen praxim mini-me castigatam adhuc retineri. Et tamen, si attendamus illationes, quæ ex Recen-tiorum inventis cohærenter traduntur, longe humaniorem, saltem ut plurimum (neque enim remedia nonnunquam rigi-diora ab usu plane Medico, ubi ea vere indicentur, ausim proscribere) simpliciorem, ac utiliorem, esto minus magnificam medendi methodum, etiam præciso Cor-tice, profitebimur. Sed hanc veritatem, quam præjuditiis forsan consuetudinis præoccupatus haud satis videtur dignosce-re in curatione symptomatum, satis lu-culenter fatetur in curationem Februm, ubi de Methodo rationali verba faciens — Quantum dedecet: inquit: probum, ac misericordem Medicum adeo in Corio huma-no ludere, Artem nostram in Lanienam fre-quenti Epispasticorum applicatione converte-re, atque tandem Ægrotantis vitam in-certis, atque hallucinantibus ratiocinatio-nibus nostris temere subicere, quarum pœ-nas Æger crumena, ac vita sua dispendio non raro luit.

Hemicraniam Periodicam etiam ob-servavi a nisu Spirituum in membranîs Cerebri sese expandere conantium, quam spatio bidui, Venæ sectione, & usu Cor-ticis penitus sustuli; licet in hujus Sym-ptomatis



*ptomatis Curatione, Venæ sectio, Vescatoria, Emerica, Cathartica, Errhina, Masticatoria ad hebdomadas aliquot spem meam deceperant.*

*brifugi prius memorati, ubi vires Corticis ob diutinam assuesactionem, vel peculiarem Ægri dispositionem defecerant.*

## S C H O L I U M V.

Casus iste, quem Historia 27. de se ipso conscripta confirmat Auctor, satis ostendit (quod & in aliis ejusdem Historiis videre est) Illum, non modo Febribus Intermittentibus, gravi aliquo symptomate alium morbum veluti simulante, comitatis, mederi Cortice; sed & aliis vere morbis, periodice quodammodo recurrentibus, in quibus, sicuti nulla omnino Febris indicia adesse constanter affirmat, ita illam nihilominus latenter foveri, gratis omnino videtur asserere, quasi sub tali prætextu affectet usum Peruvianæ Antidoti: pro qua tamen in hisce quoque casibus rationabiliter adhibenda, quotiescunque eventus feliciter responderet, supervacaneum foret ad reddendum legitimum illius usum præsentiam Febris mendicare, ubi ea non est. Sed revera de constanti eventu, & Chinæ Chinæ constanter adscribendo in hujusmodi casibus, plurimum dubito; neque proinde tantum virium Peruviano Cortici inesse reputarim, neque tantundem beneficii ab ipso ausim exigere.

*Quo genius Versatilis morbi hujus Proteiformis ad vivum depictus dignoscatur, & ut inde sciatur, quo pacto Naturæ hisce Symptomatis laboranti tempestive succurri possit, Historias huc spectantes hic subnectam, quibus unam Historiam admodum raram subjicere non pigebit Febris a dolore Nephritico orta, Symptomatis horrendis spasmodicis stipata, & Cortice curata; uti & efficacia nostri Fe-*

## S C H O L I U M VI.

Historias tandem, quas hic recenset Auctor, utile erit apud eundem videre. Ex illis, fateor, non omne id, quod expectabam, accepi. Perniciosas Febres haud satis expressas video; sed tamen aliquas earum ibidem describi, atque curari extra dubium est: Alias quoque, ut modo retuli, nostrum negotium minime tangentes identidem afferri, est æque certum: idque ordine relativo ad ea, quæ in hoc Capite (quod propterea est veluti illius Historiarum Elenchus (firmat de variis Morbis, latentem Intermittentem velantibus. Cum ergo hujusmodi Historiæ, ac Dogmata Curationem Febrium per usum Chinæ Chinæ non nihil tumultuariam exhibeant, & forte Remedium transferant, ut diximus, non nihil extra limites suæ activitatis (ita abundamus omnes in sensu nostro) propterea minutiori aliquantulum, distinctaque indagine opportunum erit in decursu hujusce Tractatus quærere, quænam sint Febres, præter Intermittentes benignas, de quibus jam *Lib. primo*, in quibus Cortex conveniat, & in quibus non: itemque quomodo ubi conveniat sit usurpandus, qua nempe fortiore Methodo, seu qua dosi, quo tempore, & ordine, ad hoc, ut cum insigni Ægrotantium, cæteroqui summopere periclitantium, utilitate, & cum non tenui Medici præscribentis laude, queat administrari. Quod juxta experientiam meam qualemcunque, sequenti Libro sum proxime præstiturus, ubi ad Perniciosas protinus Febres, hucusque ex aliorum tantummodo descriptione relatas, sermonem meum specialiter convertam.



# THE RAPETICS

## SPECIALIS

### LIBER TERTIUS.

Continens Febrium omnium Perniciosarum, tum plane Intermittentium, tum etiam Subcontinuarum descriptionem ex propria observatione, illarumque Curationem, media peculiari Methodo Chinam Chinam in iisdem administrandi.

#### CAPUT PRIMUM.

*Febrium omnium Perniciosarum Periodicarum Natura, Differentia, Diagnos, atque Prognosis singillatim expouuntur.*



ASSUMPTO jam toto Libro antecedente in transcribendis, & dilucidandis aliorum placitis circa Perniciosas Intermittentes, æquum est in præfenti, ut secundum observationes nostras earum descriptionem, divisionem, ac dignotionem, ipsamque tandem, media Peruviani Corticis oblatione, Curationem prosequamur, *nostram* videlicet *Methodum* exponendo, defendendo, & curationum historiis, ut par est, confirmando.

Febris ergo Periodica Perniciosa (præ cæteris autem Tertiana cum simplex, tum duplex) ea est, ut vidimus ex *Mercato* — *Quæ, simulata Circuitus effigie, lethalis, & mille accidentibus periculosissimis implicata existit.* Haud equidem, proprie loquendo, *simulatam* ipse dixerim *effigiem Circuitus*, cum hunc, & verum præseferat, & manifestum; sed potius *simulatam* dixerim, ex vi *Circuitus*, *effigiem benignitatis*; atque ideo illius Malitia ex mille accidentibus periculosissimis, quibus implicata existit,

nobis principaliter depromenda videtur, & secundum illorum præcipuam diversitatem in varias classes distinguenda. Porro generaliter Febris hæc Periodica Pernicialis vel talis est, ut perseveranter intermittat, efferamque naturam suam tantum prodatur immuni quopiam, & peculiari symptomate febrilem Paroxysmum comitante, cujus ferociam exitialem minime tollit intermedia quies, quæ cæteroqui securitatem ex *Hippocrate* pollicetur: vel talis est, ut, intermissione paulatim deperdita, ad Continuum, & Acutam, sæpius quidem lente, nonnunquam & festinanter tendat, cum extensione gravium quorundam, variorumque symptomatum ad tempus ipsum turbulentæ quietis. Utroque modo Perniciosum characterem induit, diversimode adhuc in utraque linea sese prodentem.

In prima itaque linea, ubi Febris Periodum etiamnum suam cum intermedia apyrexia regulariter servat (saltem usquequo, rebus omnibus in præceptis actis, cuncta, ut mos est, obscurantur, ac confundantur) septem ut plurimum modis præcipuis solet interimere, quorum quilibet a funesto quopiam, & peculiari symptomate Febrem comitante, cæterisque ferociæ palmam præripiente, dependet; unde a diversitate primarii, lethalisque symptomatis diversæ Febris huiusmodi Intermittentis emergunt



gunt differentiae, potius a sensibilibus accidentibus, ut nuperrime diximus, quam ab ignota illarum intima essentia, vel ab obscuris earundem causis petita: Illa autem symptomata sunt I. Vomitus, & Alvi fluxus vehemens, *Cholerico* ut plurimum, nonnunquam & *Dysenterico* similis. II. alter Ventris fluor similis fluxui, saepius (ut ajunt) *Hepatico*, quandoque etiam *Atrabiliari*. III. Cardialgia. IV. Sudor frigidus, ac *Diaphoreticus*. V. Syncope. VI. Algor indefinens, quem nec calor ullus, nec sudor excipit. VII. Soporosus affectus gravis, & ab Apoplexia parum distans. Et haec sunt differentiae Febris Periodicae Perniciosae in prima linea constitutae, nempe veram adhuc intermissionem servantis. In secunda vero linea, ubi Febris Intermittens semetipsam mutare affectat, & continuitatem acquirere, unam tantum, quae in ordine *Octava* est, differentiam sortitur, hanc ipsam videlicet, quod ad Continuum, & Acutam vergat, licet pluribus modis, varioque symptomatum praecedente, & comitante apparatu, in hunc unum scopum collimet.

Quod si lubeat melioris ordinis gratia hasce varias Perniciosarum Februm differentias ad terminos Scholarum, & ad peculiarem Categoriā reducere, in promptu erit, supposita generali Intermittentium omnium tum simplicium, tum duplicium, tum triplicium divisione in Benignas, & Malignas, istas iterum subdividere in *Comitatas* ferali aliquo symptomate verum morbum simulante, immo & æquante, adhuc tamen Intermittentes, & in *Solitarias*, seu nullo peculiari symptomate, sed potius multiplici, & vario comitatas, & ex dispositione intima in Continuitatem, atque, ut vocant, Acutiem quammaxime proclives. Comitatas adhuc Intermittentes rursus subdividemus, habito respectu ad conjunctum symptoma, in Colliquativas, & Coagulativas, ut Continuarum etiam Malignarum mos est. Ad Colliquativas erunt referendae quatuor priores species enumeratae, quas mutato nomine ab ipso symptomate vocabi-

mus I. *Cholericam*, vel *Dysentericam*. II. *Subcruentam*, vel *Atrabilem*. III. *Cardiacam*. IV. *Diaphoreticam*: siquidem hanc ad Colliquativas referre velimus, cum forte etiam ad Coagulativas possit quandoque pertinere. Ad easdem vero Coagulativas revocabimus tres posteriores species, videlicet I. *Synopalem*. II. *Algidam*. III. *Lethargicam*. Et sic primum membrum propositae divisionis explebimus. Quo ad aliud vero membrum ejusdem divisionis, in quo collocavimus Intermittentem nullo peculiari, distinctoque symptomate comitatam (quam idcirco *Solitariam* diximus) sed ex natura sua in Continuitatem, atque acutiem valde proclivem, hanc sub una tantum specie reponemus, cujus tota ratio erit haec ipsa, quod ad Continuum essentialiter, & acutam tendat, licet inde in innumeras differentias accidentales [quotquot scilicet sunt accidentales omnes Februm Continuarum differentiae] possit subdividi, & *Subcontinuum* simpliciter nuncupabimus: eamque, utpote differentiarum omnium, etiam inter se oppositarum, facile susceptibilem, ad nullum determinatum genus sive *Colliquationis*, sive *Concretionis* alligabimus, cum modo ad unum, modo ad alterum, frequentius tamen ad Coagulativum soleat pertinere.

Omnes ergo istas differentias, quae sunt potiores a me observatae, & sub quibus alias congenere lubuit completi, fas est exponere, si non quantum exigit pondus materiae, saltem quantum sat est, ut eadem valeant probe dignosci, Lectorem plura cupientem relegando ad descriptionem, quam ex *Mercato* transcripsimus Libro praecedenti, ut idcirco frustraneum sit omnino alibi actum rursus agere. Exordiendo itaque a differentiis prioris ordinis, & specialiter ab iis, quae spectant ad genus Colliquativum, haec earum sit series.

*Primo* necat hominem Perniciosa Intermittens, potissimum Tertiana (Quartana etenim, aliave Intermittens rariuscule in primo membro nostrae divisionis locum habere solet, saepius vero in



secundo, ubi ad continuitatem vergat, & ad acquirendam acutiem ) necat, inquam, Tertianæ Perniciosa, quando circa Paroxysmi initium, cui de more vomitus biliosus, sæpe etiam nonnihil copiosus, similisque dejectio solet associari, vehemens contingit, violentaque, ac simultanea excretio sursum, atque deorsum humorum vitioforum, prava insimul qualitate, atque immodica quantitate peccantium, sive sinceri illi sint, sive variegati, & bile ut plurimum prassina, vel æruginosa referti: quibus nonnunquam vomitibus, ac dejectionibus copiosis, & crebris, singultus adjungitur, vox [ut ajunt] clangosa, aut rauca, oculorum concavitas, angor stomachi, sudatiuncula minuta circa frontem, pulsus exilis, extremorum perfrigeratio, aut livor: uno verbo, omnia accidentia, quæ Cholera morbum comitari solent, a quo tamen distinguenda est hæc affectio quasi Cholera, in quantum est merum symptoma Febris supra consuetam intensionem adauctum, & Febris ipsius periodum, ac motum subsequens, velut umbra corpus. Hæc quocunque tempore appareant, etiamsi non omnia, immo etiamsi extrema semper non sint intensionis modo descriptæ, hanc tamen sequenti periodo certo minantur, ac mortem, intermedia quiete ad nihilum suffragante, præsertim si morbus adhuc fuerit, ut plerumque assolet, in augmento.

Contingit alias, ut affectio, fere dixerim, Semidysenterica potius, quam Cholera invadentem Paroxysmum concomitetur, quatenus humores in primis biliosi, & alius etiam naturæ, tam acres, ac erodentes excernuntur, ut post ipsos mucus cruentus exeat tam sursum, quam deorsum, cum tenesmo, & torminibus, stomachique dolore, perinde ac si illius membranæ divellerentur, & exoriarentur, ut revera œsophagum exoriri intuemur in humoris excreti transitu, & vomendi conatu. Hujusmodi excretionem cruentam, & dolorificam minus periculi secum trahere, sæpius observavi, quam supra descriptam.

Et licet Febris in hoc casu videatur intensior, est tamen magis expansa; nec secum fert funestam illam perfrigerationem, angorem, ac sudatiunculam, etsi singultum admittat, jactationem irrequietam, urinarum croceam rubedinem, linguæ scabritiem &c. unde facile in Continuum migrat, aut inflammationem aliquam minatur: ac proinde non parum & ipsa portendit periculi.

*Secundum* peculiare symptoma funestum, peculiarem pariter Perniciosa Intermittentis differentiam constituens, est quidam alvi fluxus loturæ carniū similis, qualem Veteres fluxum dictum Hepaticum describere. Istud autem symptoma, licet aliquando ab Hominibus obesis præcipue viderim tolerari, nec illis mortem inferre, sed potius, superata procella, morbi diuturnitatem: ut plurimum tamen funestum observavi, atque exitiale, priusquam nossem modum prohibendi Febrem cum annexo symptomate. Solet ergo nonnunquam vel invadente, vel etiam declinante accessione suboriri placida quædam, frequensque, ac copiosa dejectio, quæ intra paucas horas nullo fere sensibili Ægrotantis incommodo ad magnam molem, & pondus excrevit. Materia ista plane serosa videtur, sed subcruenta, Ægrumque primo nil tale timentem brevi deducit ad summam virium imbecillitatem cum pulsu minuto, ac exili, & extremorum notabili perfrigeratione; vox attenuatur nonnihil, oculique concamerationem contrahunt. Cæterum sitis non molestat, mens est vegeta, nec de alia re conqueritur patiens, nisi de summa virium prostratione, ac proclivitate in lipothymiam, quæ facile quoque, si e lecto surgere velit, solet succedere. Evanescente Febre sensim sedatur tumultus, qui raro diem Intermissionis occupat, si vero occupet, vel die sequenti! Cum autem recurrente accessione idem recurrat alvi fluxus, augeaturque & ipse circa morbi statum [incrementum tunc suscipientibus accessionibus] vix fieri potest, quin intra duos, vel tres ab invasione symptomatis Pa-



ris Paroxysmos Æger succumbat.

Hoc idem certius etiam, ac citius evenit, si alia quædam fiat excretio non materiæ loturæ carniū similis, sed sanguinis atrii, ac nigricantis modo concreti, modo dissoluti, modo ex utroque mixti: quæ dejectio (cujus sæpe mentionem facit *Hippocrates*, & quam forte Antiqui Atrabilem vocitarunt) si copiosa sit, & ad libras ascendat, ut assolet, supra memorata symptomata facile infert, & successivam sub specie placidæ cujusdam defectionis celeriter mortem.

*Tertium* symptoma, quod mortem haud raro solet accersere est Cardialgia. Contingit hæc, quoties invadente Paroxysmo Febris Tertianæ, dum adhuc rigor, & horror Ægrum infestat, sive etiam dum idem Æger incipit incallescere, illum simul corripit acerrimus morsus oris ventriculi [cujus orificium superius Antiqui Cor vocavere, illiusque morsum symptoma malignum appellavit *Hippocrates*] cum pauca ut plurimum, vel inani vomituritione. Si ergo in Febre Intermittente, præcipue vero, ac forsan unice in Tertiana, contingat hujusmodi morsus, comitemque habeat, ut assolet, frequentem animi defectionem, ratione cujus hæc affectio a nonnullis syncope stomachica nuncupatur, cum pulsu exili, facie Hippocratica, luctuosis suspiriis &c., sitque dolor ille, seu mordicatio tam ferox, ut quandoque pro expiratione reddantur clangores, & ululatus [non enim quilibet stomachi dolor, etsi sensibilis, utpote in Tertiana familiaris, pro vera Cardialgia habendus est, atque ut læthalis metuendus] sive breviter deinde sint hujusmodi accidentia, & tantummodo torqueant Ægrum in principio accessionis, sive usque ad statum ejusdem protrahantur (quo tamen diutius, eo pejus) vita est in discrimine; & quocunque Paroxysmo, sive secundo, sive tertio [raro enim in prima invasione id accidit] appareant, metuendum est, ne uno adhuc, vel altero ingruente paroxysmo, de vita sit actum: quandoqui-

dem vix quintam accessionem morbus iste cum tali circumstantia solet transcendere.

*Quarto* fraudulentior est ea Febris, quæ nullo præcedente pravitatis indicio Ægrum invadit more solito cum horrore, rigore, & frigore, cui succedit calor, & statim sudor aliquantulum præcox, qui equidem Febrem videtur primo aspectu alleviare, sed revera post illum potius intenditur Febris, quam remittitur; immo eo fortior videtur fieri, quo copiosior est sudor. At iste non est terminus occultæ fraudis, hinc enim potius longitudo morbi significatur, quam mors. Quod pejus est, frigesit paulatim sudor, & in diaphoreticum sensim degenerat. Sudat perpetuo Ægro- tans, & defluit undequaque frigido sudore perfusus: sicque perpetuo algens, & sudans, sicut cera liquatur, dissolvitur, & deficit. Pulsus celer est, minutus, ac debilis, respiratio fit anhelosa, & frequens, dissipantur spiritus, & virtus universaliter languet. Mens sola lucidissima est, & sentit homo, se paulatim mori. Nisi autem hoc illa ipsa accessione succedat, in proxime futuram tantum protrahitur.

Alia etiam via nonnihil diversa algidum sudando fieri, & occumbere Ægro- tantem aliquando novi, quem cætero- qui in similibus circumstantiis jure quis diceret cum suspitione tantum longitudinis evasurum. Occumbit ille tamen inopinato, in quantum transacta feliciter tota fere accessione solummodo circa tempus declinationi proximum incipit minuto, frigidoque sudore perfundi, frigidusque & ipse fieri, ut marmor: licet sudor paucus sit, & viscidus, ac prope declinationem tantum apparere incipiens, adeo ut in tali casu (rariore quidem) videatur loco declinationis succedere mors, quam facies Hippocratica illico facta, & paullo ante præmonstrat, & paullo post secum trahit. Atque istæ sunt quatuor priores Perniciosarum Intermittentium differentiarum de genere Colliquativo, videlicet *Cholerica*, vel *Dysenterica*, *Subcruenta*, vel



vel *Attrabilis, Cardiaca, & Diaphoretica*. De Coagulativo autem genere sunt tres, quæ sequuntur, *Syncopalis* nempe, *Algida, & Lethargica*. Continuando itaq; ordine successivo seriem assumptam.

*Quinto* funestos reddit, quos comitatur nonnunquam, *Tertianæ Intermittentis* paroxysmos *Syncope* vera, non solum cum ea fuerit *Cardialgiæ*, ut crebro assolet, succedanea; verum etiam cum primaria fuerit, simplex, & solitaria: vi nempe ejus *Æger* nullo licet dolore perculsus frequenter, graviter, & absque causa manifesta languet, exolvitur, & animo deficit, sive de latere in latus se velit convertere, sive solummodo brachium, aut manum tentet loco movere. Concurrit & hic pulsus depressio, & vicissitudinaria ejusdem defectio cum parvitate, & celeritate, sudores minuti circa collum, & frontem, oculorum cavitas, caligatio, & languor, ac denique universalis virium collapsus, ut continuis odoribus, & irrorationibus *Æger* recreari indigeat, ne deliquium, quod nihilominus patitur, crebrius patiatur. Si hæc sint durante augmento, vel statu accessionis accidentia, quantumvis tranquilla subsequatur intermissio, res *Ægrotantis* male agitur, nisi provida *Medici* cautela futuras accessiones mature præcaveat; si etenim sibi metipso blandiatur *Medicus*, vel quia minus gravem reputaverit prægressam afflictionem, vel quia transactæ procellæ memoriam infida oblitteret malacia, facile est, quod brevi pereunte *Ægro* impingat in turpe illud — *Non putaram*, eique postmodum exprobreetur illud aliud *Hippocratis* de *Leonidæ* filia — *Medicus non intellexit: puella mortua est*.

*Sexto* modo *Tertianæ Perniciosa* hominem jugulat, cum Frigus quoddam mortiferum incipienti Paroxysmo jungitur, quod non, ut assolet in Benignis, paulatim evanescit, ut illud sensim calor excipiat; sed protrahitur, & protrahitur, maximamq; partem paroxysmi occupat, itaut nec pulsus resurgat, nec calor ad tactum conspicuus erumpat: qua-

mobrem post horas & horas *Ægrotantem* adhuc in principio accessionis diceret. Siticulosus est propterea, gembundus, anxius, cadaverosus. Si in ipsa accessione, qua primo se prodit symptoma istud ferox, *Æger* satis non cedat, agre saltem, & nonnisi post longum tempus incipit tantillum incallescere, & pulsus antea absconditus sese nonnihil exerere, itaut tamen parum frequentia, aut celeritatis supra statum naturalem ostendat, sitque adhuc non parum depressus, cum miti ad tactum calore, voce tamen paululum clangosa, & lingua nonnunquam scabra, urina vero vel copiosa simul, ac tenui, vel pauca, ac impense rubra. In hoc statu durat *Æger* per totum tempus *Intermissionis*, quo ad alia satis bene se habens, sed subsequente accessione ut plurimum moriturus. Sin autem symptoma istud *Algoris* protracti sit mirius, & subsequens reviviscentia pulsus tantillum vegetior, calorque aliquantulum vaporosus, diuturnioris potius morbi, quam mortis erit præsagium. Sed ista vix aliud quam usus potest sufficienter docere.

*Septimum* denique lethale symptoma *Perniciosæ* cuilibet *Intermittenti*, non uni *Tertianæ* familiare, est gravis affectus soporosus, seu profundus *Lethargus*, qui paroxysmos febriles sæpè sæpius comitari consuevit. Contingit iste quandoque in principio accessionis, quandoq; in augmento: & crescente Febre, servata proportionem, cum eadem crescit, quemadmodum ea declinante paulatim declinare solet: resistente tamen ut plurimum aliqua in soporem propensione, etiam tempore *Intermissionis*, quæ affectum paulatim radicari, & ad *Idiopathicum* tendere satis admonet. Proinde si negligatur, nec inhibeatur progressus, *Lethargum* una, vel altera accessione mortiferum, ac omni arte invincibilem, fortis *Apoplexiæ* instar, fere dixerim certo portendit. Cum hujusmodi affectus incipit, *Æger* primo est in soporem pronus, a quo excitatus, statim in somnum relabitur; paulo post fit immemor rerum immediate ante



ante gestarum, unde non raro matulam poscit, deinde mingere obliviscitur, atque interim dormitat; nonnunquam obloquitur, nec suos conceptus valet exprimere; & licet sui erroris sit compos, se tamen nequit corrigere, aut continere: immo quandoque balbutiens, vel verba mutilat, vel unum pro alio profert, non secus ac si levi Apoplexia in linguæ paralyfim degenerante foret detentus. Ingravescente tandem sopore omnino jacet, ac stertit naribus, neque ulla voce, ulla vi, frictione, ligatura, cucurbitularum, aut vesicantium appositione, immo nec igne quandoque actuali valet excuti; & siquidem excutiat, aliquantisper, statim in eundem soporem, immo in profundiorē recidit, nec nisi declinante accessione incipit expergisci. Quod si una, vel altera vice resipiscat quidem, sed semper paullo difficilior, aut si soporosa affectioni adjungatur singultus, tertia ad summum, vel quarta accessione, inevitabili fato succumbit.

Sunt istæ septem differentiae magis conspicuae Perniciosarum Intermittentium *Comitatarum*, quæ naturam etiam suam perfecte, vel quasi perfecte Intermittentem servantes, in aliquo accessu valent, atque consuecunt inopinato hominem de medio tollere. Harum plurimas complexus est *Mercatus* sub prima tantum Tertianæ Perniciosæ differentia; reliquas vero saltem implicite sub titulo *De eadem Perniciosa ob aliquod accidens, quod succrescit*, ubi nihilominus (ut quod est fatear) diversas potius alias recenset explicite, quas quoque *Mortonus* indicat, quam istas. Cum tamen quas recenset Ille, rarius, ac fere nunquam mihi observare contigerit, quemadmodum ipsi *Mercato* forte non contigit observare nonnullas ex iis, quas recensui ego, ideo data opera eadem subtrui, frequentioribus tantum mihi compertis contentus. Non est tamen ideo, quod ab aliis allatas excludam, cum mille sint viæ, quibus ad Stygem itur; sed eas inter infrequentiores tantum connumero. Omnes ni-

hilominus, quotquot sunt, quæ Vitæ periculum inferunt ex quovis adjuncto symptomate, sive de genere Colliquativo illud sit, sive de Coagulativo, tacite comprehensas volo, eademque simul methodo dico curandas.

Licet autem in enunciatis Intermittentibus Perniciosis nonnunquam accidat, ut Ægrotans lethalem alioqui accessionem, ægre licet, ac difficillime sustineat, vitamque protrahat usque ad tempus subsequentis accessus, totoque hoc tempore intermedio vere febricitet, esto sit algidus, sine pulsu, ac moribundo similis; attamen adhuc Febrem hujusmodi Intermittentem appello, vel saltem ad Intermittentes refero cum *Sydenhamio*. Cujus rei ratio mihi est, tum quia Febris hæc orta est Intermittens, & talis conservata usque ad extremum exitum, in cujus latitudine confusis omnibus, mirum non est, quod ipsa obscuratur periodus, tum quia etiam in extrema illa rerum angustia eadem Febris, utur recentem continuitatem referens per violentam extensionem sui [cito tamen, & infauste finiendam] Cortici nihilominus rite, & celeriter administrato fere æque facile cedere consuevit, ac si primis accessibus manifeste Intermittentibus ille fuisset exhibitus. Cæterum proprie, ac stricte loquendo, quando Intermittens Perniciosa hominem non interimit repente in eo accessu, in quo manifeste tentat interire, sed eum constituit in eo statu deplorabili, quem supra retulimus, tunc non amplius vere Intermittens dici potest, cum jam sit Continua: uti pariter talis est, quando octavam differentiam infra describendam nanciscitur, retenta tantum in utroque casu obscura quadam specie primævi circuitus, vi cujus adhuc Intermittentem placuit appellare, habito respectu ad originariam illius dispositionem. Et hoc est quidpiam peculiare, quod supra communem existimationem tradere intendo de actione Corticis adversus Febres hæc, tandem vere Continuas, Malignas, & Exitiales, sed Intermittentes ab ortu, vel



vel Intermittentibus saltem analogas.

Omnes ergo in prima linea recensitæ Februm Perniciosarum differentiæ suam denominationem, ut patet, desumunt principaliter, ac fere unice ab insigni aliquo, feralique symptomate, quod se solo perniciem videtur inferre; sive aliud ab humorum violenta dissolutione, ac colliquatione, sive ab eorundem concre-tione, ac coagulatione procedat. Hoc autem præceptum symptoma nonnunquam tam inexpectatum supervenit, ut veluti totum simul, unoque ictu minime præmonstrato erumpat; & tunc non prius se prodit, ac hominem interimat. Sed hoc rarum est: neque potest accidens huiusmodi cadere sub dignotione, aut curatione medica. Immo neque solet tale symptoma in prima sui invasione tantæ intensiōis esse, quantam illi in singulari uniuscujusque descriptione supra assignavimus, neque universo aliorum accidentium inibi expositorum satellitio stipari; cum enim res eo devenit, jam clara est, & unicuique nota. Quamobrem superius relata totam Tragœdiam fere exactam ostendunt, non imminuentem tantum, aut incipientem.

Pro magis tempestitiva itaque dignotione, ac præcautione periculi animadvertendum est, magnum illud, feroxque symptoma [qualecunque sit ex recensitis] quod Febri Intermittenti Perniciosum imprimit characterem, in primo sui exortu, ordinaria Naturæ lege esse nonnihil mite, tolerabile, ac, ut ita dicam, in parvo contractum, ita tamen, ut pravum esse non desinat: quemadmodum fœtus Tigridis sua non caret ferocia, etsi recens editus: cujus pravitatem sufficienter demonstrant alia signa enumerata insimul apparentia, etsi nec semper omnia, nec ab initio tam sæva. Progrediente vero parumper morbo, cuncta cito intensiōem acquirunt, & grandiora fiunt, adeo ut altero ab invasione primarii symptomatis paroxysmo haud difficile sit certo de malitia morbi decernere, & de ingruente periculo. Quapropter cautus sit oportet, oculatus, & expertus Medicus in omnibus

simul conferendis, considerandis, ac ponderandis, quotiescunque perniciosi symptomatis præsentia appareat, aut saltem illius suspicio non levis. Etenim in negligendo, aut temere contemnendo quæ contemnenda non sunt, sicut & in formidando quæ non sunt formidanda, expertos quandoque Medicos hallucinari certum est. Utrunque equidem malum; sed primum pejus.

Ut vero monitum istud illustretur ex praxi, sit hoc exemplum. In aliquo Febris Intermittentis paroxysmo symptoma quodpiam grave ex supra relatis se prodat, sed non adeo clare, quin Medicum relinquat adhuc ancipitem, an vere perniciosum sit, an benignæ quoque Febris, sed intensioris proprium, ut oris Ventriculi mordax dolor, vel vomitus simul, & alvi fluxus sat validus in principio Febris Tertianæ, vel importuna in somnum proclivitas &c. quæ singula postmodum mitescant declinante Febre, & evanescente evanescant. Cum ergo omnia hæc signa sint nonnihil æquivoca, ac inter benignum, & malignum quodammodo media, solumque pro ratione minoris, vel majoris intensiōis suæ, aut diversæ impressiōis in subjectum patiens, modo pro trivialibus, modo pro perniciosis habenda, quippe modo cum salutari, modo cum intermittente Febre conjuncta, necesse erit recurrere ad alia signa concomitantia, quæ supra enumeravimus, ex quorum varia syndrome, ac collectione, & præcipue ex illorum incohærentia cum morbo, facile occultam malitiam licebit suspicari. Sic si absoluto paroxysmo quodam ob grave aliquod symptoma, & ob alia etiam signa suspecto, quædam remaneat die Intermiſſionis linguæ siccitas, nedum scabrities, sive insolita Ægri nec febricitantis, nec de quopiam certo dolentis jactatio, inquietudo, vel suspiriorum ad quoddam levamen emissorum frequens eruptio, vel inanis identidem, nullaque occasione concita vomitio, vel alvi dejectio sincera, vel intempeſtiva in somnum propensio, vel alia huiusmodi a perito Medico facile obser-



observabilia, in tali casu ( nisi ab affectione hypochondriaca, aliave causa manifesta procedant ) metuendum est, ne subsequente accessu vera Cardialgia, aut affectio quasi Cholericæ, aut Lethargus fere inexpugnabilis palam fiat, unde constituatur Ager in summo discrimine. Cavere etiam oportet, ne illa eadem exceptio, quam in parenthesi apposui, nobis imponat, ne scilicet nomine affectus hypochondriaci perniciosos symptomatum characteres donemus, eo quod Patiens Hypochondriacus esse soleat, vel credatur talis; ideoque minuta, & delicatissima, prudentitamen, non nugatoria opus est disquisitione, atque animadversione in hisce casibus, in quibus

— *sæpe exiguus Mus*  
*Augurium tibi triste dabit.*

Præ cæteris autem id, quod certius Perniciosum Characterem in suspecto primario symptomate patefacit, inter signa concomitantia est Pulsus, loquendo tamen de primis sex Perniciosarum Intermittentium differentiis; septima enim differentia non a Pulsu, sed potius a respiratione, immo a simplici, & solitario symptomate soporis (cujus intensio- nis gradus ex se facile est mensurabilis) solet dignosci. In illis itaque hoc perpetuum est, ut semper Pulsus toto afflictionis tempore, atque illo etiam elapso, notabiliter deprimatur plus minus, pro ratione majoris, vel minoris intensio- nis perniciosi symptomatis: cum ex adverso, ubi symptoma vulgare est, et- si alioqui onerosum, pulsus consuescat resistere, oppressusve statim resurgere. Ut ergo certam quandam regulam habeant Tyrones pro distinguendo sympto- mate pernicioso ab eo, quod, licet si- mile sit, perniciosum non est, tan- quam ad Lydium lapidem [ nisi illud se solo se prodat ] recurrant ad Pulsam, sciantque in Febribus Intermittentibus, quæ vel I. affectione quasi Cholericæ, aut Dysentericæ, vel II. fluxu Subcruento Hepatico dicto, aut Atrabiliari, vel III. Cardialgia, vel IV. Sudore Diaphoretico vel V. Syncope, vel VI. Algore fu-

nesto adjunctis necare solent, summum, extremumque gradum talium Acciden- tium esse, quando omnimodam Pulsus abolitionem inferunt tactu judice. Ubi enim ad hunc statum deventum est, universalis subsequitur, ni prius appa- ruerit, totius corporis, præcipue vero extremorum frigiditas, aut livor, facies hippocratica, indeque mors. Et licet nonnunquam ad duos, vel tres dies et- iam in eo statu protrahatur vita, certum tamen fere semper subsequitur exitium; nisi illud tempestive reparet rite oblatus Peruvianus Cortex. Atque propter hanc asphyxiam, & algorem funestum Aegro- tantes hujusmodi non alio titulo pro Fe- bricitantibus habendos, aut dignoscen- dos esse autumat Mortonus, ut vidi- mus, *typo jam* [ ut inquit ] *legitimæ Fe- bris amisso*, nisi quia Corrice Peruvia- no sanantur: Febre videlicet Intermit- tente sub larva aliorum Morborum de- litescente, & occulta, seu mavis secun- dum *Mercatum*, & secundum nos ma- nifesta, variisque illiusmodi perniciosis symptomatis comitata. Cum itaque gra- dus extremæ intensio- nis symptomatis perniciosi Pulsus abolitionem, in sex speciebus nuper expositis, soleat infer- re, mensura congrua illius erit exacte observare quantum afficiatur, deprimatur, ac langueat Pulsus præsentem sym- ptomate, quantum illo superato desiscat a validitate sibi debita, quantum singu- lis certaminibus deperdat vigoris; uno verbo, quantum distet ab extremo gra- du suæ concentrationis. Quæ sane om- nia in justa lance posita, & cum aliis quoque signis collata non minimum di- ligenti, & experto Observatori suppeditabunt indicium crescentis periculi, si- mulque argumentum tempestivæ præ- cautionis.

Dixi, Pulsus rationem primas tenere in examine perniciosorum symptoma- tum, relative tantum ad Sex priores Fe- brium differentias primi membri nostræ divisionis, non vero relative ad *Septi- mam*, quæ Capitis affectionem soporo- sam unice respicit; in ea siquidem non parvitas, aut imbecillitas Pulsus, sed po-  
tius



tius turgentia quædam, ictusque validitas, qualis in essentiali apoplexia solet percipi, persentiscitur, cum aliqua nonnunquam raritate potius, quam cum insigni frequentia conjuncta. Nascentem tamen, atque paulatim crescentem in Perniciosis Comatosum affectum, quantum opus est, ut opportune valeat dignosci, jam satis exacte, ordinatimque paullo supra descripsimus.

Superest aliud membrum divisionis nuper statutz, juxta quod *Octava* emergit Perniciosarum periodicarum Species, quatenus illæ intermissionem suam paulatim amittentes, ad omnimodam Continuitatem, & simul Acutiem latenter, ac malignanter tendunt. Non ergo hic loquor de placida illa, benignaque continuitate accidentali, quam nonnunquam Intermittens Febris acquirit, cum primo de Simplici fit duplex, aut triplex, mox tandem Subintrans, adeoque, presse loquendo, Continua per hoc præcise, quod protrahatur nonnihil duratio levior paroxysmorum, suapte natura (si tempus sineret) perfecte solvendorum, quo sane casu unus paroxysmus, sæpiusculæ etiam anticipans, supervenit alteri, priusquam integre solvatur præcedens, sed his non obstantibus sub ista etiam accidentali, & benigna continuitate, adhuc eadem servatur periodus, idem prope invasionis modus, cum sensibili etiamnum rigore, horrore, aut frigore, eademque solutionis saltem dispositio, si non totalis solutio. Ad hæc Patiens Febrim hujusmodi per paroxysmos sese leniter excipientes, & Subintrantes dictos Continuum redditam, fert facillime, ferme ac si ea esset adhuc Intermittens, nullumque grave symptoma patitur præter vulgaria, nisi paullo majorem imbecillitatem virium, a frequentiori luctamine citra consueta intervalla repetito fatigatarum. De his, inquam, Febribus, hujusmodi continuitatem sibi prorsus accidentalem, simulque benignam acquirentibus modo sermo mihi non est; nullum etenim ex se minantur periculum, nec aliter exigunt tractari a perito Medico, ac tractentur veræ In-

termittentes, aliqua tantum adjecta circumspectione; adeoque viribus etiam Corticis, ubi illum adhibere velimus, æque facile cedunt ac Intermittentes omnino, ut suo loco repetemus. Non per hoc tamen fit, ut asseram, Febres a primordio Intermittentes simplices, mox duplices, aut triplices, demum Continuas per subingressum factas nequire ad Continuitatem essentialem, atque periculosam, quin & ad summam pravitatem, & malignitatem progredi; hoc enim esset negare quod experientia constat, & cuncta fere destruere, quæ proxime, ac etiam alibi sum prolaturus; sed velim intelligi, quod quotiescunque Intermittens Febris fit Continua per subingressum eo, quo dictum est, & quo sæpe assolet modo, omnique proinde caret gravi, malignoque symptomate, de illa, quippe minime Perniciosa, impræsentiarum mihi non est sermo; sed de illa tantum, quæ Continuitatem acquirit simul, & Acutiem, ac pravitatem, & tunc tantummodo, quando illam acquirit: sive deinde hoc fiat per viam paroxysmorum subingredientium, sive alia quacunque via, siquidem alia [quod non crediderim] via id possit contingere.

*Octava* igitur, & ultima Perniciosarum Periodicarum differentia, seu species est, cum Febris nullo licet præcipiti stipata symptomate, pluribus tamen aliis gravibus, sibi que impropriis paulatim afficitur accidentibus, qualibus Febres Acutz, Malignæque solent ut plurimum insigniri: ac propterea & ipsa de Intermittente sensim in Continuum, Acutam, & Malignam migrat. Per hoc autem quod plura, & varia sortiatur accidentia, ut Continuarum mos est, non fit, quod habere quandoque non possit aliqua etiam ex iis, quæ exposuimus in Perniciosis supra descriptis, ut Lethargum, Cardialgiam, Syncopem &c. sed ea solet habere in gradu remissione, ut eadem habere solent nonnunquam Continuz ipsæ primariæ, non vero in immani, tamque conspicua intentione, ut inter cætera quammaxime super-



peremineant, valeantque idcirco se solis huic Febri & exitium summe præceps, & peculiarem denominationem tribuere, quemadmodum eandem illi primario tribuit acquisita Continuitas. Hæc autem Perniciosarum Februm differentia postrema, quam *Subcontinua* nomine lubet appellare, absque aliis signis ex ea, quæ paulatim fit, periodorum obscuracione, & successive acquisita continuitate est cognitu facilis. Sed quoniam expedit nosse a principio naturam hujusmodi Febris, ut illi, priusquam nos fallat, possimus obviam ire, eaque opportune præmittere, quæ tempestivo, scilicet neque præcoci, neque nimium dilato usui Corticis viam planiorem, atque methodicam sternere valent: illius ideo morem, atque progressum operæ pretium est fusius explicare, & verisimiliora, frequentioraque ejusdem signa describere. Hæc vero, licet nec omnia, nec semper concurrant, nec eorum quodlibet Perniciosæ Febris semper sit index, plurimam tamen lucem perito Artifici, eadem pro re nata consideranti, pensitanti, combinanti, & conferenti poterunt afferre: & eo majorem, si illis immisceatur symptoma aliquod nonnihil conspicuum ex iis, quæ Perniciosarum constanter Intermittentium sunt peculiaria.

Priusquam tamen hujusmodi descriptionem aggrediamur, opportunum erit præmittere, & adnotare, quod octava hæc species [quam unicam constitui- mus, quia a sola continuitate præter ordinem acquisita omnem perniciosæ naturæ suæ occasionem nanciscitur] hæc, inquam, una plures differentias accidentales potest suscipere, eas scilicet omnes, quas passim Auctores Continuis Febris, præsertim Proportionatis, solent tribuere, quales sunt Horrifica, Helodes, Affodes, Hepiala &c. ut proinde *Mortonus* ipse hanc nostram octavam speciem tot differentiarum fœcundam, unoque nihilominus Cortice curabilem, peculiari Capite consideraverit, quemadmodum videre est apud ipsum *De Proteiformi Febris Continentis*

*Genio*, quamvis a pluribus sub hoc nomine Febrem quoque essentialiter Continuum, atque primariam credatur (& revera alicubi videatur) velle comprehendere, dummodo *Remittentem*, seu *periodum servantem*. Sed cum minutiores hujusmodi differentie parum, aut nihil immutent curationem ope Corticis absolvendam, ideo ab hac multiplici subdivisione ad rem nostram inutili hic lubens abstineo. Quia vero ad eandem curationem medio Cortice instituendam facit aliquid varia ipsius Continuitatis habitudo, hoc est diversa celeritas, modus, & tempus, quo Febris ex natura sua Intermitteus continuitatem acquirit, ideo hanc ipsam diversam habitudinem in octava hac specie placet considerare, atque distinguere.

Degenerat ergo Intermitteus Febris in Continuum vel in morbi progressu, vel in ipso statim principio. Rursus si in progressu, vel hoc fit celeriter, adeout, etiamsi post quartum, vel quintum tantummodo paroxysmum contingat, fiat tamen intra unum, aut alterum circuitum evidenter, ac sensibilibiter: vel contingit paulatim, itaut si post quartum item, vel quintum paroxysmum incipiat Febris aliquam continuitatem affectare, non tamen sensibilibiter eam sit assequutura, nisi sensim, & post plures adhuc circuitus. Si ergo Continua fiat Febris Intermitteus in aliquo sui progressu, sive deinde id celeriter, sive paulatim fiat, curanda est Cortice in ipso actu suæ metamorphoseos, in quo perniciosum incipit induere characterem: idque agendum methodo ordinatim describenda infra *Cap. iii.* hujusce *Libri*, regulisque in hunc eundem finem ibidem apponendis. Si vero Febris orta Intermitteus fiat Continua in ipso fere statim exortu suo, ut non infrequenter accidit, in hoc casu, licet sub octava hac specie Perniciosa illa continueatur, de ea tamen absolute intelligi non debent, quæ infra dicturi sumus de Cortice in Perniciosis incunctanter offerendo: cum de oblatione illius in hujusmodi circumstantia maturam considerationem



derationem exigente peculiare examen  
simus instituturi *Cap.v. Libri sequentis.*

Hoc præmissis, transeo jam ad exponenda signa remotiora Febris Intermittentis modo celerius, modo lentius in Continuum Acutam, Malignamque migraturæ. Suspecta itaque ab exordio sui erit, ne in Continuum acutam degeneret ea Intermittens, quæ cum paucis, aut nullo rigore solet invadere, sed potius cum sensu caloris: item quæ prima die leviusculam [ dummodo tamen vere febrilem ] infert accessionem, altera vero die [ non altera periodo ] fortiolem, & sic progrediendo motum servat graviolem per dies pares, loquendo per modum exempli de Tertiana duplici ab ortu. Quod si eadem sic orta in Simplicem statim mutetur, etsi hoc laudabile sit, non desinit tamen esse suspectum, si primam accessionem validam debilis, ut supra, immediate præcessit: potest enim facile typus ille mutari, qui ordine inverso potuit incipere. Proximum pariter imminentis Continuitatis indicium est, si in Tertiana, præsertim simplici [ idem, servata proportione, intellige de Quartana, quæ, si continua essentialiter fiat, suapte natura ut plurimum lethalis est, ut norunt Practici ] indicium, inquam, continuitatis est, si quidam appareat intermissionis die mordax ad tactum calor, qui aliquam etiam secum trahat pulsus perturbationem, sitim, aut linguæ siccitatem; quæ omnia incendium universale jamjam disponi præmonstrant. Urina quoque notabiliter pauca, & simul rubra, vel crocea, sicut in omnibus Febris est semper symptoma summe considerabile, quantum novi, ita in Intermittentibus non parvum facessit negotium, periculumque saltem continuitatis portendit. Assolet etiam in iisdem ad suscipiendam continuitatem dispositis apparere faucium, & gutturis inflammatio quædam ulcerosa cum crusta alba summi rædii præ impeditæ deglutationis incommodo, quam *Aphtas albas* nonnulli, *Alcoholam* alii vocitant. Symptoma istud, utut nonnunquam quasi

critice appareat circa finem morbi, quemadmodum etiam [ & quidem frequentius ] pustulæ circa labia erumpentes; nihilominus ut plurimum maliominis esse consuevit, vel saltem signum difficilis judicationis, & peculiaris pravitatis succorum, mediis glandulis illis a sanguine secretorum, aut consuetorum secerni. Quamobrem quotiescunque visitur hujusmodi crusta, de Febre ad Continuum essentialiter tendente suspicari fas est: immo de eventu sinistro, si præsertim parvitas Pulsus, vocis clangor, & singultus [ qui tamen hic minus, quam alibi timendus, utpote soboles inflammationis hujusmodi ] simul concurrant. Denique omnia accidentia, quæ in Continuis malignitatem subesse, quæcunque sit illius indoles, solent ostendere, illa eadem si in Intermittentibus observentur, idem, si non statim, saltem progressu temporis, prænunciant, excepto delirio temporaneo, quod aliquando in statu paroxysmi fervidioris solet accidere, & statim evanescere citra periculum; secus si in febricula mitiore contingat, vel ea etiam declinante perseveret. Facta vero jam Continua essentialiter, ac Perniciosa Febris suapte se ingenio patefacit. Et licet lentius procedat, interimatque, ac cæteræ Perniciosæ, maximo tamen, & diutius metuendo non caret periculo, quamvis ab origine fuerit Intermittens. Etenim trahit illa nonnunquam secum sæva quævis symptomata, quæ secum pariter deferunt Malignæ ipsæ Primariæ v. gr. parotides, quas non semel in hujusmodi Febris contingit observare, perpetua deliria, convulsionem, aversiones a cibo, & maxime a quocunque potu, non secus ac si hydrophobia detinerentur Ægri, & similia Februm summe Malignarum, ac Pestilentium propria, modo ex Colliquativo genere, modo & forsitan frequentius ex Coagulativo: quæ omnia unicuique Præxim exercenti se produnt sæpissime. Enimvero tam frequens est hæc una species Febris Perniciosæ, quæ singula Februm ab ortu Continuarum, Acutarumque



rumque sensum sibi asciscit symptomata, licet incœperit Intermittens, vel quasi, ut se sola membrum alterum generalioris nostræ divisionis merito impleat, quippe quæ plures differentias Perniciosarum a *Mercato* sub diversis titulis recensitas una comprehendit. Atque idcirco non inutile erit relegare iterum, ut ab initio etiam hujusce Capituli, Lectorem ulterioris instructionis avidum, ad completam descriptionem, quam prodidit idem *Mercatus*, cujus ideo aureum de hisce Febribus Tractatum recusum volumus, & antecedenti Libro integre insertum.

## C A P U T II.

*Periodicarum Februm perniciosus character generaliter expenditur in sua Causa. Varia illarum pravitas, & actio diversa in triplicem nostri Corporis regionem. Earundem China China curandarum Idea quadam practica generalis.*

**D**ISTINCTIS penes præcipua symptomata, & progrediendi modum, frequentioribus, magisque observabilibus Perniciosarum Intermittentium differentiis, e re videtur easdem ultro distinguere penes ipsarum Causas internas, si non ultimas, quod difficillimum, saltem generaliores ad normam eorum, quæ *Libro I. Cap. vi. & viii.* protulimus: quod equidem lubet non asseveranter, sed dubitative tantum, & superficie tenus tentare. Cum enim Theoremata, quæ fundamentorum adinstar ibidem jeci, quantumvis probabilia, & ratione suæ universalitatis non facile falsa, incerta tamen in plurimis agnoscam & ipse, non est cur fidenter admodum explicationem Causarum, utut generalium, hujusce rei illis superstruam. Dicam tamen quæ cum praxi, & curatione cohærent; adeoque si quis notionibus istis, saltem pro quopiam veritatis modulo sibi propositis, utatur, non multum, ut reor, a recto curationis scopo aberrabit: non quia Idea hu-

*Torti Therap. Spec.*

jusmodi indubitanter vera sit, sed quia ad illius exemplar æque bene curatio succedit, ac si vera esset. Ita ad modulum suæ Hypotheseos, quantumvis obscuræ, certissimam istarum Februm depulsionem per usum Peruviani Corticis fassus est se excogitasse *Mortonus*; quod Illi profecto in praxi non male cessit. Ita pariter Mundi systema, licet Sacrarum Literarum testimoniis, & Decretis Ecclesiæ minus, ut videtur, consonum, ad regulas tamen praxeos Astronomicæ, & ad cœlestia salvanda phœnomena sufficienter dispositum condidit *Copernicus*. Ita quoque materialia suæ Physicæ principia, non ut vera, & certo talia, qualia depinxit, sed ad explicandos naturales effectus æque apta, ac si vera forent, protulit *Cartesius*, ob ingenuam saltem confessionem suam commendabilis, secundum quam Cogitata sua, suamque Methodum, etsi explorandis Naturæ arcanis satis accommodatam, non magis tamen pro *Historia*, quam pro *Fabula* venditat. Utinam vero Magnus Vir, cum de Pallade sua tam moderate senserit, vel conatus suos ad purioris doctrinæ amussim magis adhuc castigasset, vel nullum pravis præoccupatum affectibus Lectorem nactus esset, quem transversum agere, aut egisse crederetur. Ita multo magis ego de ratiunculis meis Theoreticis sentio, siue Fabulæ sint, siue Historiæ: quod citra contentionem sanioribus omnibus dijudicandum relinquo, *refelli a cunctis*, ut aiebat *Cicero*, si opus sit, *sine iracundia paratus*.

Ratum itaque hic habendo, quod jam alibi statuimus, nempe sanguinem in Febribus Intermittentibus se habere mere passive, principii vero activi rationem habere succum quempiam heterogeneum, per intervalla eidem sanguini affusum, & febrilem in eo fermentationem, siue effervescentiam concitantem, cohærenter sequitur, quod in Perniciosis tota ratio, & tota vis, secundum quam illæ tam immaniter sæviunt, vel omnino, vel saltem principaliter pendeat a tali succo, quicumque

K                      ille



ille sit, peculiarem diathesim, pravam tamen supra consuetudinem suam, atque sylvestrem, & septicam adepto, per quam tam gravia, tam ferocia, & tam varia producat symptomata. Sed cum ignorato hujusmodi succo ejusdem pariter ignoretur natura, & qualitas omnium tum nativa, tum præternaturalis, cumque de eo vix quicquam fuerimus ausi statuere præter motum, viam, atque successivum progressum illius in sanguinem: ideo posito quod talis liquor Fermenti febrilis ordinariam rationem obtinens, in Perniciosis Intermittentibus nescio quid majoris supra consuetam pravitatis habeat, seu nescio quid ascititiæ venenositatis, atque malignitatis (prout diximus Libro antecedenti in animadversionibus ad textum *Mortoni Scol. ii.*, & ut fusius infra sumus dicturi) præmissa, inquam, hujusmodi positione, nil aliud superest a Causæ Morbificæ consideratione petendum ad distinguendas earundem Perniciosarum differentias, nisi motus, actio, & distributio ipsius Materiæ febrilis in triplicem nostri Corporis regionem, nempe *primo* in primas vias, sic dictas, *secundo* in massam sanguineam, *tertio* denique in principium nervosi generis: penes quem motum, actionem, & successivam propagatione mfebrilis fermenti in varias hæc Provincias, si illud peculiariter pravum, ac efferum fuerit, illæ eadem, quas supra exposuimus, emergere possunt, & nonnihil dilucidari Intermittentium Perniciosarum differentiarum.

Itaque prout in primam Regionem, Ventriculum nempe, si lubet, Intestina, Ductusque omnes Chyliferos repit Fermentum istud vehementi quadam, venenata, ac prope arsenicali, erodente videlicet, ac colliquante acrimonia sive ingenita, sive aliunde acquisita imbutum, eosdem ferme producit effectus, ac Chylus quidam ex esculentis venenatis confectus, seu ex eodem veneno plus, minus infectus, perinde ac si Ephemerum Cholchicum quis assumpsisset. Proinde orificium sensile stomachi acriter

mordens, & vellicans, *Cardialgiam* infert, & per consensum comitem lipothymiam. Eundem vero Ventriculum, Intestina, & annexos Ductus immantiter pungens, & in spasmos, ac contractiones excretorias provocans, affectionem *Cholericæ* similem gignit. Quod si ferocia nonnihil minore sæviat, quatenus succis viscidioribus sit irretitum, adeoque contactum illius etiamnum ferre possint, etsi non sine magna molestia affectæ Membrænæ, tunc ea sequitur irritatio, quæ prius lentam abrasionem, mox excoriationem illarum partium, denique succorum omnium illuc confluentium, ipsiusque sanguinis illas intime perluentis excretionem inducit: unde vomitus mucosus, simulque cruentus cum conatu dolorifico, alvi-que fluxus consimilis, ac *Dysenterico* analogus, aut *Dejectio* copiosa *loturæ carniū similis*, aut alia quædam *sanguinem atrum referens*, solet emergere. Reseratis quippe, & abrais a succo illo sive arsenicali, sive alius corrodentis naturæ, etsi succis quoque mitioribus, ut dictum est, nonnihil implicito, reseratis, inquam, & abrais Arteriarum Gastricarum, & Intestinalium osculis, immo vel erosio, vel laceratio excretoriis glandulis ad extrema vasorum appendis, non potest non egredi, qua data porta contentus cruor, aut serosior saltem illius portio. Et sic fere statim ac excidit e Minera sua, & in cavitatem Ventriculi (data suppositione) deinde in Intestina, & Chyliferos ductus sese insinuat Fermentum istud non modo vitiosum ab ortu, sed indolem insuper Emetico-cathartica in itinere suo, utar brevi, propter aliorum succorum miscellam hinc inde mutuatum, potest haud difficulter intelligi, quo pacto nonnullas constituat Perniciosarum differentias: illas videlicet, quæ vel a *Cardialgia*, vel ab affectu quasi *Cholerico*, vel ab alvi fluxu *Hepatico* dicto, *Dysenterico*, *Atrabiliari*, aut quomodolibet cruento, perniciosam naturam suam sortiuntur, simulque secundum nos denominationem *Cardiacæ*, *Cholericæ*, aut *Dysen-*



*Dysenterica, & Subcruenta, aut Atrabilis.* Unde est [ut & hoc obiter repetam] quod facile hallucinentur ii, qui supposita in locis omnibus antedictis Fermenti febrilis præexistencia, plurimum fidunt Emeticis, atque Catharticis pro Febrium Intermittentium curatione; cum tamen ostendat experientia, cui astipulatur & ratio, quam facile sit remediis huiusmodi cum Fermento febrili maximam symboleitatem habentibus: ut constet ab effectu utrinque pari: quam facile, inquam, sit, idem Fermentum potius acuere, & roborare, quam vincere, & debellare. At de hoc jam forte nimium.

Quod si a Ventriculo, Intestinis, Lacteisque primi ordinis [ut *Libro primo Cap. vi.* tetigimus] lubeat Fermentum febrile proscribere, illudque tantum agnoscere in Lacteis secundi ordinis, non ideo minus facilis erit explicatio singularum Perniciosarum in primam Regionem sævientium, feraliumque symptomatum earundem. Malignum siquidem Fermentum in secundarios Ductus Chyliferos irruens, quasi e suis compedibus excarceratum, tantam in ipsis Ductibus irritationem, molestiam, atque sævitiam exerere potis est, quantam exerit venenatus Chylus e Lacteis primi ordinis illuc delatus. Excitata etenim lucta acerrima cum succis quibuslibet ibidem præexistentibus, simulque mordicatis immaniter tunicis Lactearum, & sensibilibus earum fibrillis, eam necesse est sequi spasmodicam omnium partium infimi Ventris connexarum contractionem, ac convulsionem, quæ succos acerbos, & nondum excretioni maturos, eosque propterea summe mordaces, & efferos (ut qui etiam ex natura sua, Æstivo præsertim, & Autumnali tempore in quibusdam signate corporibus, sunt tales) quæ, inquam, succos acerbos ex Glandulis omnibus Intestinalibus, & ex Canalibus illuc confluentibus, Pancreatico scilicet, atque Chole-doco, per vim valeat exprimere. Qui equidem succi sic expressi, præterquam quod ex se ipsis summam vellicationem

in stomacho, & Intestinis gignere apti sunt, & illa in violentas excretiones cogere, abradere, excoriare, & inde cruorem ipsum elicere, ulteriorem etiam noxam inferre valent, quatenus Lacteas ipsas tum primi, tum secundi generis permeando, Fermento quoque febrili suppetias ferunt, illudque deterius adhuc, & ferocius reddunt adventu, & societate sua. Addamus fibrarum nervosarum undequaque divulsarum consensum multiplicem, potentem inducere Cardialgiam, Lipothymiam, aliaque huiusmodi gravia symptomata. Addamus tandem, si liceat, ex tam violento tumultu, & ex diversis Vasorum Lacteorum, Mesenterii, Intestinorumque contractionibus secundum varias fibrarum directiones excitatis forte fieri posse retrogradum a Chyliferis Ductibus in ipsa usque Intestina tenuia Fermentum febrile, superato vi convulsionum valvularum obstaculo. Ex quo qualis ibidem fieret succorum Intestinalium cum Fermento febrili miscella, qualisque confusio, & qualis pariter fluxus, atque refluxus in ipsis Ductibus Chyliferis, eisdem succos, idemque Fermentum suapte natura, saltem per alia ostiola, iterum admittentibus [siquidem non plane impossibilis, ut reor, sit talis positio] nemo non videt. His, & similibus modis posse huiusmodi malignum Fermentum solas Lacteas secundi generis occupans, Ventriculo, Intestinis, Lacteisque primi generis antecedenter intactis, symptomata omnia Perniciosarum in primam Regionem sævientium producere, probabiliter autumo. Indiscriminatim nihilominus & hic, ut jam loco citato, omnes, quotquot sunt, primas vias, velut primum limen ipsius maligni Fermenti in sanguinem ingressuri, lubet adhuc considerare, & eadem universali suppositione retenta, ut cœptum est, deinceps prosequi.

Haud equidem diffiteor, arduum esse definire in quonam consistat intrinsece peculiaris illa, & determinata virulentia, quam identidem supra consuetam pravitatem suam solet acquirere febrile



Fermentum, five hinc, five inde illud derivetur, dum singulas producit Perniciosarum species: quam pravam diathesim ascititiam intantum malignam, & venenatam voco, inquantum eam dilucide nequeo explicare. Pro usu tamen practico sat sit dicere, eam esse in casibus nuperrime recensitis ubi primarum statim viarum tumultaria subversio suboritur, eam, inquam, tunc esse febrilis fermenti naturam, qualis plus minus est, ut modo dicebamus, indoles vehementiorum Emeticorum, atque Catharticorum, seu qualis est natura, ut rem propius designem, ipsorum succorum nostri corporis Cholera Morbum producentium. Sane morbus iste, quantum ex accidentibus patet, causam agnoscit Veneno similimam: Tertianæ item Perniciosæ modo memoratæ, saltem earum aliquæ, maximam habent similitudinem cum Cholera. Itaque quæ ratione lethalis esse consuevit Cholera morbus, eadem quoque ratione lethales sunt ut plurimum hujusmodi Febres: eamque similitudinem, quam cum Veneno extrinseco habent humores, & succi Cholera efficientes, illam eandem habet cum eodem Veneno succus febrilis, pro talium Febrium causa receptus. An vero tum illi, tum iste habeant acrimoniam quandam veneficam prorsus ineffabilem, an talis conditionis, quæ semoto etiam obscuro hoc nomine queat sensibilius explicari, præcise non quaero, istamque litem, quæ ad purum nomen ferme reducit, nec ad praxim conducit, Theoreticis subtilioribus ad extremum usque apicem discutiendam relinquo.

Si tamen liceat super hac re per analogismum quendam crassiuscule ratiocinari; quoniam exactius non possumus absque sophismatum periculo; dicam, illud esse data proportionem discrimen inter succum febrilem, cum Tertianis benignis, & eundem cum Perniciosis modo descriptis excitat, illud, inquam, quod intercedit inter Antimonium uno modo, idemque alio modo præparatum, secundum quas diversas præparationes in

linea Emetici, atque Cathartici, modo benignius, modo violentius præstat utrumque, aut alterutrum, varie videlicet alterata, vel immutata heterogeneorum illius particularum textura. Sed, ne longe admodum per remotiores comparationes a fluidis humani Corporis recedamus, nonne videmus quantum discrepet a flava bile quo ad acrimoniam, & pravitatem bilis æruginosa, & glastea, five utraque sit idem humor varie alteratus, five tertium quid ex diversorum succorum commixtione resultans? Nonne pariter plures succi suapte natura, si seorsim sumantur, plane innocentes, evadere possunt Naturæ nostræ infesti, acerrimi, & erodentes, si simul misceantur? Quid, si vitari jam sint seorsim singuli, & a crasi sua desciscientes, ut in casu nostro, atque insuper insimul mixti. In hoc forte uno consistit tota ratio formalis, ut scholastice loquar, Emetici, atque Cathartici, quæ reperitur in Fermento febrili relate ad illius actionem in primas vias, ratio coagulantis, aut dissolventis relate ad actionem in Massam sanguineam, & ratio stupefacientis, aut aliter lædentis respective ad actionem, quam exerit in principia nervosi generis, concurrente videlicet insimul cum eo dispositione *medii, & termini ad quem*. Hinc tota Malignitas, Venenositas tota quarunlibet Perniciosarum intantum solummodo occulta, inquantum occultus latex ipse febrilis, alique confluentes succi, eorumque varia commixtio, necnon commixtionis eorundem varia proportio. Sic videmus, unam, & eandem Thermalem Aquam (quancunque velis) statim ac e prima scaturigine simplex prodit, talem determinatam vim, suæ Fodinæ, vel, ut ajunt, Mineræ correspondentem, five bonam, five malam secum deferre: si vero diversas in progressu, & deteriores Mineras perluat, diversam pariter ac deteriore pro diversitate Mineralium, five Fossilium, quorum salibus adventitiis imprægnatur, subinde naturam nancisci; unde indoles primigenia notabiliter alteratur, ac de-



ac deterior evadit, necnon quandoque venefica. Idem cum proportionem dicendum de Fermento febrili in casu nostro. Est enim, ni fallor, intra confinia maximæ probabilitatis credere, quod Ferbrium Intermittentium fermentum, seu latex extraneus, qui primo, & principaliter sanguinem in periodicam excandescientiam, aut effervescentiam concitat, sit quidem ex se ipso, statim ac e Minera sua purus putus egreditur, indole quadam peregrina præditus, quæ cum natura cruoris minime conveniat, sitque adhuc deterior, cum Perniciosas, quam cum Benignas Intermittentes gignit: sed neque extra rem est ulterius suspicari, quod ille idem latex febrilis fiat adhuc deterior ratione pravæ, & variæ dispositionis, quam invenit in diversis locis, atque regionibus, per quas transit, vel in quibus hospitatur. Atque ideo, quatenus a termino suæ scaturiginis ad terminum sui confluxus in sanguinem progreditur, & in varios succos morbosos impingit, cum quibus confunditur, ac commiscetur tum intra primas vias, tum intra ipsam cruoris Massam, talem probabiliter ex huiusmodi commixtione acquirit dyscrasiam, quin & virulentiam, atque malignitatem, quæ Febri cæteroqui benignæ, perniciosam naturam, eamque variam pro varietate succorum, quibus diversimode inficitur, valet imprimere. De pravitate illius violenter Emetica, atque Cathartica intra primas vias acquisita, & intra easdem immaniter exercita, variasque idcirco Perniciosarum species constituyente, jam satis hæcenus. Ad reliqua nunc pergendum.

Prout igitur idemmet febrilis latex succis non quidem vehementer Emeticis, aut Catharticis, ut in primo casu, pravis tamen, & incongruis secum raptis, in secundam Regionem, seu in sanguineam Massam delabitur, venenositatem alius generis, primæque regioni (quam ideo vel innocue transigit, vel magna ex parte declinat) non admodum infensam solet exercere. Hæc in duas ut plurimum species potest subdivi-

*Torti Therap. Spec.*

di, quatenus duplex insigne sanguini damnum solet inferre, ipsum videlicet vel coagulando, vel nimium solvendo concurrente insimul vitiosa aliqua dispositione, aut labe intra eundem sanguinem præexistente, ipsamque pravi Fermenti diathesim ad hanc, vel illam noxam specialius determinante. Proinde talis nonnunquam ex huiusmodi commixtione resultat indoles Fermenti febrilis, ut Venenorum fixantium adinstar [quorum prostat ex Vegetabilibus, Animalibus, & Mineralibus numerosa seges] in sanguineas particulas, & spiritus torporem quemdam inducat, cui primum fermentativi, mox & circularis quoque motus retardatio succedit. Hinc vel *Syncope cardiaca* (constipato potius, quam rarefacto, cum primum appellit ex Cava ad dexterum Cordis sinum, cruore) vel universalis quasi coagulatio, aut congelatio ejusdem cruoris, *Algor* partium indefinens, & abolitio pulsus absque restitutione ulla, vel saltem pauca, & exili subsequi solent. Idque fortasse, ut clarius me explicem, duplici potest ratione contingere. Vel enim succus febrilis diathesim modo enunciata sortitus statim ac sanguini affunditur, illum plane constipat omnino citra Cor, & citra Pulmones, vel in Pulmonibus, vel intra Cor ipsum. Et in hisce casibus, in quibus vel mortiferam syncopem, vel suffocationem repentinam inducit in ipso accessionis principio, Cor ipsum non prætergreditur, neque per Aortam ultra Cor distribuitur ad inficiendam reliquam cruoris massam, cum statim interimat. Vel pravitatem suam minus immaniter exerit succus ille in ipsum sanguinem, itaut totum iter a Lacteis ad Aortam possit complere, & Accessionem febrilem ad augmentum usque, statumque perducere. Et in hoc casu illam specialiter potest in universo cruore producere effervescentiam, quam *frigida* vocant, quæque ex puris acidis cum puro sale volatili commixtis solet emergere, ut in plurimum liquorum citra manifestum caloris sensum effervescentium



commixtione observamus. Quia cum suis limitationibus posita paritate, non adeo capto difficile redditur, quomodo talis esse possit indoles Fermenti febrilis, talisque salium illius cum salibus cruori inexistentibus proportio, ut consimilis excitari possit effervescencia, Febrium *Algidarum*, *Syncopalium*, vel similibus, si quæ sint aliæ, productiva, quod satis potest succedere, cum Fermenti febrilis indoles tum nativa, tum ascititia, acida peculiariter est, & coagulativa.

Contra, quandoque ex succrescente mixtura, quam diximus, talis resultat indoles ejusdem Fermenti, ut Venenorum potius dissolventium adinstar [quorum pariter plurimæ sunt, notæque species] ipsiusmet sanguinis compagem discindat cita, ac veluti explosiva divulsione partium illius fibrosarum, necnon serosiorum fusione præcipiti, unde sudores statim colliquativi, frigidi, ac *diaphoretici* emergunt: quamquam hoc etiam a concretionem partium sanguinis fibrosarum, ut supra, & inde succedente serosiorum effluxu possit procedere. Atque omnibus hisce pravis conditionibus stipatum febrile Fermentum, si activum sit valde, imbecillemque inveniat, atque dispositam ad suscipiendam celeriter aliquam ex prædictis impressionibus sanguinis crasim, eas statim [modo unam, modo aliam] Febrium differentias gignit, quas vel *Syncope*, vel *Algor* funestus, vel frigidus, ac *Diaphoreticus sudor* Perniciosas, & lethales reddit, quæque ideo *Syncopales*, *Algidas*, & *Diaphoreticas* dicimus.

Quod si alterutram, ut supra, sortitum sit Fermentum febrile veneficam diathesim, & præcipue coagulantem, quippe frequentiore: dissolvente tamen etiam quandoque minime exclusa: eam vero segnius, ac lentius in usum deducatur, sive quia illam in remissione gradu possideat, sive quia minus dispositam inveniat sanguinis compagem, ut impressionem hujusmodi valeat suscipere: tunc ea lento progressu introducitur dispositio, quæ Febrem ab ortu Intermittemtem sensim in *Continuam*, *Acutam*,

atque *Malignam* convertit. Cum enim veneficum hujusmodi Fermentum Coagulans [idem ratione in oppositum versa intellige de Colliquante] non ita facile intra unum paroxysmum integre subigatur, quin aliquas sui reliquias intra cruorem suapte etiam natura male dispositum relinquat: cumque in dies renovatis accessibus recens semper febrilis hujusce succi renovetur influxus, novaque per consequens, crasi sanguinis semper imbecilliore reddita, resistet illius portio non rite subacta, non potest, quin ex congestis repetito cumulo portionibus talis tandem fiat earum acervus, qualis Febrem essentialiter *Continuam*, *Acutam*, atque *Malignam*, ex vitiosa sanguinis stagnatione, aut nimia etiam fusione gigni consuevit, solet producere. Et hinc ea emergit Perniciosæ Febris natura, quæ *Octavam* secundum nos speciem passim obviam, cæterisque omnibus ampliorem constituit, *Subcontinuum* nobis dictam, cujus indoles multiformis tunc cum suo complementum est assequuta, tot & tantis solet sociari symptomatis, quot & quanta sunt ea, quæ Febrem a *primordio* *Continuam*, atque *Malignam* comitari consuevere: cum hac insuper deteriore additione, ut ultra *Continuitatem* hic succrescat nova *Periodus*, non quæ obscuram exacerbationem pluribus *Continuis* ex natura sua familiarem imitetur, sed quæ æmulatur, licet remissius, pravam *Perniciosarum Intermittentium* accessionem, adeoque fatigatas jam vires ultro prosterbens, & ob id febrem hujusmodi reddens supra *Malignas* essentialiter, & ab ortu tales, metuendam.

Denique, prout ad prima tertiæ Regionis confinia pertingit, eademve occupat Fermentum febrile, licet pluribus modis Cerebrum, ac principia nervosi generis possit afficere, & vere multifarie nonnunquam afficiat inferendo deliria, motus convulsivos &c., unico tamen graviore modo, cum citiorem infert perniciem, solet obesse, *Soporosum* videlicet affectum profundissimum inducendo.



cendo . Id autem videtur contingere , quatenus idem Fermentum extraneis , ut dictum est , salibus , aliunde quoque derivatis imbutum , talis naturæ , & gradus venenositatem acquirit , ut Mandragoræ , aliisve soporiferis Venenis analogice respondeat , suamque exerat virtutem non tantum intra Massam sanguineam , verum etiam : & quidem principaliter : in nervosum laticem , seu , quod idem est , in spiritus animales , quibus ab infecto sanguine vel subministratur materia narcotica assiduo appulsu ad glandulas corticales Cerebri pertingens , & inde in nervosum genus diffusa , vel consueta denegatur ; nec influit , uti fas esset , pro restaurandis iisdem spiritibus ad obeunda sensus , & motus munia : sanguis enim narcosi infectus forsitan stagnare cogitur in extremis arteriis pro eorundem spirituum instauratione ad Cerebri Corticem desinentibus . Hinc fit , quod exacto citra omnem tumultum primarum viarum itinere , quin blande , & subdole fascinatiis cruoris spiritibus specie tranquillitatis cujusdam torpentibus , sensim ab accessionis initio altius sese insinuet Fermentum febrile . Cum vero plurimam sanguinei Torrentis congelationem nequeat producere , ut in Febris *Algidis* supra descriptis , particularem saltem in Cerebro stagnationem , & fibrillarum ejus nervosarum relaxationem ob spiritus vel interceptos , vel ex narcotica materia confectos , inducit . Talis autem , tamque vehemens nonnunquam est hujusmodi dispositio a Fermento sanguini confuso introducta , ut ea durante per totam extensionem Augmenti , & status Accessionis febrilis *Æger* lethargicus jaceat , ac ferme apoplecticus , donec subacto prope declinationem eodem Fermento [ ni prius *Æger* occumbat ] dissolutoque sanguinis torpentis vinculo , & superato ejusdem stagnantis obice , spiritibusque primæ volatilitati , fibrisque Cerebri primæ tensioni restitutus , paroxysmus solvatur , & cum paroxysmo ipsum ferale Symptoma soporosi vehementer affectus . Et hinc denique illam Perniciosæ Intermittentis differen-

tiam , quæ a Comatoso lethali affectu denominationem capit , & *Lethargicam* dicimus , videmus expositam .

Quod autem unum , idemque Fermentum in diversis subjectis , ætatibus , tempestatibus , aliisque circumstantiis possit varias venenositatis tum Colliquativæ , tum Coagulativæ species suscipere tam ob multiplicem plusque , vel minus activam pravitatem suam , quam ob diversam dispositionum habitudinem subjecti , in quod agit , quales requiruntur ad diversarum Perniciosarum differentias constituendas , facile sibi suadere poterit quicumque ab uno , eodemque veneno , æqualem in se ipso semper acrimoniam servante , prout altiora sensim Corporis penetralia pervadit , diversisque ejusdem Corporis succis sese immiscet , ea omnia , etsi varia , & inter se nonnunquam opposita animadvertat successive produci symptomata , qualia in enarratis Februm speciebus supra descripsimus ; indicio satis conspicuo , longe majorem esse , ac esse videatur , symbolearum Causarum accidentia hujusmodi , dissimilia licet , producentium : eamque proinde a nostris humoribus accedente præsertim aliorum mixtura esse facile susceptibilem .

Hisce universis generaliter , & superficie tenus libatis circa variam indolem Fermenti Perniciosas Intermittentes producentis , obvium est conjicere , quod etsi in diversas species , aut differentias distinximus , *Mercato* præeunte , easdem Perniciosas Febres , ut quæ tantum distant a benignis Intermittentibus , quantum distat Morbus salutaris a Morbo lethali , & tantum differunt inter se ipsa , quantum fere differunt *v. gr.* Cholera Morbus , & Apoplexia : nihilominus si spectemus Fermentum illas & istas produciens , unum ab alio non plus quam accidentaliter videtur differre , quatenus accidentale est uni , quod habeat acrimoniam intensioris gradus , ac habeat aliud , & quod commixtionem salium peregrinorum , & exoticorum aliunde mutuatorum admittat . Quod si alicui rixas Logicas affectanti aliqua in terminis *Generis* , *Speciei* , & *Differentiæ* confusio ,



fusio, aut discrepantia subesse videatur, litem hanc agat cum ipso *Galeno*, & illam componat pro libito, meque, in quamcunque partem trahat, annuentem habebit. Dico igitur, Fermentum Intermittentium tam Salutarium, quam Perniciosarum idem esse quo ad rem ipsam, sive, ut loquuntur Scholæ, *substantialiter*, habito respectu ad Intermiſſionem, & ad Periodum; *accidentaliter* vero differre, habito respectu ad malignitatem uni adjunctam, & alteri non: quemadmodum accidentaliter differunt Boleti venenati a non venenatis, flava bilis a bile glauca &c. Sic Antimonium crudum, vel diaphoreticum (ut prosequar comparisonem, qua usus sum alias) quo ad substantiam non differt a Vitro, aut Flore Antimonii, quia revera semper Antimonium est, saltem ex radice; differt tamen accidentaliter secundum diversam præparationem, juxta quam in primo casu innocens est, in secundo vero sæpiſſime noxium, nec carens omni suspitione Veneni.

Uniformem istam utriusque Fermenti naturam (quod est ad principia essentialia) satis patefacit Peruvianus Cortex, & illius actio febrifuga utrinque æqualis, experientia teste; neque enim virtuti illius cedit minus Perniciosarum, quam Benignarum Intermittentium Fermentum, aucta tantummodo, ubi opus sit, juxta exigentiam dosi Remedii, ut aucta est in maligno Fermento energia fortior nocendi. Quod si illud cæteris succis nocentibus mixtum dicatur aliam a consueta naturam acquirere, & in tertium quid veneficum converti, cui non amplius competat ratio indolis primigeniæ, dico adhuc experientia fretus, quod cum venenum istud tertium ex plurium succorum combinatione, seu potius confusione resultans, habeat pro basi Fermentum febrile Intermittentium proprium, ut ostendit adhuc Intermiſſio ipsa, atque Periodus: cumque Fermentum illud suapte natura consueſcat cedere actioni Corticis, cedit eidem Cortici etiam tunc, quando evadit pars integralis ra-

lis veneni; adeoque ex sola simplicis hujusce Fermenti reſuſione totius veneni (si modo loqui sic liceat) Perniciosas producentis infringitur activitas. Sic in præparatione Venenorum usui Medico deservientium, ex sola unius partis activioris reſractione integra totius veneni habetur correctio; etsi illud non sit Aggregatum per accidens, ut in casu nostro, sed Mixtum verum ex Mineralium, aut Vegetabilium genere. An vero simili ratione, ut conjeci, & non alia dometur a Cortice Fermentum, quod Perniciosas gignit, ignoro: quod dometur æque certo, ac Benignarum Fermentum, fere usque ad extremas angustias, indubitanter assevero.

Hoc autem, quod diutina fretus experientia, quæ in dubium revocari nequit, affirmo, alia etiam planiore spectata ratione, videtur ita debere contingere. Itaque considerare est, quod, cum diversæ benignarum Intermittentium species, Quotidianæ scilicet, Tertianæ, & Quartanæ ab uno Peruviano Cortice æqualiter expugnentur, necesse est, earum Causas in aliqua ratione præcipua univoce convenire, propter quam earum extinctio uniformiter sequatur, licet specie dicantur differre, spectata dissimili earum natura, periodo, & symptomatum societate. Hæc autem communis Causa, si variam periodum respiciamus, videtur esse posse stagnatio temporanea alicujus succi in sanguinem ingressuri, eaque modo longior, modo brevior quo ad durationem, & forte modo, in remotiore, modo in propinquiore loco succedens: qua sola per Corticem sublata, omnis æqualiter tollitur diversarum Februm periodus. Et cum in ratione Periodi Intermittens Perniciosa, v. gr. Tertianæ, minime differat ab Intermittente Tertianæ salutari, hinc est quod utraque, quantum ex hoc capite, per Corticem æqualiter expugnetur.

Si vero respiciamus succum ipsum hîc, & nunc varie, seu per diversa interval- la stagnantem, adeoque diversimode etiam nonnihil se habentem, & consti-

tuen-



tuentem Fermenta ipsa diversas salutarium Intermittentium, puta Quartanarum, Tertianarum &c. species producentia, etsi ista ob hoc ipsum, & propter diversitatem symptomatum, quæ pariunt, diversam quoque inter se dyscrasiam habere minime dubitem, adhuc tamen in illis radicalem quandam symboleitatem, & uniformitatem semper servari crediderim, ratione cujus non obstante aliqua difformitate conveniant univoce in præcipua quadam vitiosa dispositione, supra quam cæteroqui fundatur, vel cui accedit diversa nonnihil hic, & nunc ipsorum Fermentorum habitudo. Suadet hoc vulgaris experientia, qua constat, tam Tertianæ, quam Quartanæ Fermentum ab uno, ut diximus, & eodem Peruviano Cortice æqualiter retundi. Suadet hoc succus ipse febrilis, qui probabiliter, ut aiebam, semper est idem latex, vel saltem de eodem genere, conclusus, & stagnans, & ob longiorem solum, vel breviorē stagnationem modo hac, vel illa tempestate, modo in hoc, vel in illo loco contingentem, nonnihil diversimode vitatus. Suadet denique alia experientia, qua notum est, quam facilis sit, & crebra metamorphosis unius speciei Intermittentis in aliam, quod nonnisi a symboleitate Fermentorum potest procedere. Si enim toto cælo diversa, & fere ad invicem contraria supponantur Tertianarum v. gr., & Quartanarum Fermenta, arduum erit intelligere non solum quomodo contingat huiusmodi transmutatio, verum etiam quo pacto unus & idem Cortex possit in illa opposita agere, ut agit: nisi velimus totum opus refundere in diversos Corticis sapes, ut opinatur *Thomas Donzellus*, vel nisi clarius talem supponamus propter huiusmodi sapes Chinæ Chinæ constitutionem, ut Salium Hermaphroditorum ad instar oppositas etiam inter se acrimonias æqualiter temperet, eo pacto, quo data proportionem una & eadem simplex Aqua acidam v. gr. æqualiter, ac salsam sui additione acrimoniam diluit.

Cum itaque minus, quam differant ad invicem Tertiana, & Quartana benignæ, differant inter se Tertiana perniciofa, & Tertiana benigna (istæ enim sunt ejusdem speciei, teste eadem periodo, secus ac illæ) hinc est, quod utriusque Fermentum æqualiter dometur a Cortice, ut ab eodem domatur æqualiter Fermentum Tertianæ, & Quartanæ benignioris. Cum enim tota diversitas Tertianæ benignæ, ac malignæ nobis elucescat ex solo symptomate pernicioso huic adjuncto: & cum tale symptoma non differat ab alio simili non pernicioso in Tertiana benigna apparente: ut vomitus v. gr. in ista moderatus, in altera immanis: cum, inquam, non differat nisi ratione majoris intensiōis, ita forte nonnisi ratione majoris intensiōis consuetæ dyscrasie, aut acrimoniæ suæ, quæcunque illa sit, differt Fermentum Tertianæ perniciosæ a Fermento Tertianæ non perniciosæ, adeoque tota illius malignitas, ac venenositas, quæ ineffabilis dicitur, non aliud est nisi major intensio activitatis ejusdem Fermenti febrilis, cujus indoles solita cum ignoretur, æque ideo ignoratur intensior insolita. Sed quo pacto per Corticem rite administratum illa corrigitur, eodem quoque corrigitur & ista, Fermento scilicet istius æqualiter retuso, licet in hoc casu nocentior, quam in alio ejusdem sit vis. Sic idem relum æquali nisu vibratum in eandem corporis partem, prout magis, vel minus acutum est, modo leve, modo lethale vulnus infligit; si vero omni acie sua, tam quando acutius est, quam quando est obtusius, per eandem limam æque spolietur, ab infligendo tam lethali, quam leviori vulnere æqualiter prohibetur. At istiusmodi ratiocinationes nodis quamplurimis inextricabilibus implexas, nonnisi ut nutantes velim accipi caligantis intellectus mei cæspitationes.

Firmiore talo deberet posse per hanc arenam incedere, si materia fineret, Medicinæ practicæ bene jugata Matthesis, quæ utinam æque feliciter applicari posset Mor-



set Morbis, ut loquebantur Antiqui, Similaribus, sive in intemperie constitutis, adeoque Febribus tam simplicibus, quam putridis, ut pariter agebant, atque malignis, ac applicatur Morbis Organicis. In his certe quoniam Solidorum affectio vel solitaria est, vel saltem prævalet Fluidorum læsioni, locum satis amplum potest habere Mechanice, anatomicis, chirurgicis, clinicisque simul observationibus juncta: id quod in rebus ad Opticem pertinentibus quam maxime elucescit. Immo & eandem ingeniose usurpata ad plures alias extendi posse nequaquam negaverim Medicinæ provincias, ut luculenter testantur tot practica non minus quam subtilia, & docta Clarissimi in dies *Hecqueti*, aliorumque nostri ævi Scriptorum tum alibi memoratorum, tum etiam non memoratorum Opera Medico-mechanica, in quibus etsi Solidorum systema probasi sternatur, sua tamen quoque vis non plane denegatur Fluidis insito quaquaversum turgentibus spiritu.

Haud æque facile forsitan procedit res in explicandis Morbis inorganicis vulgo appellatis, seu Similaribus, & specialiter Febribus, quarum abstrusa, & implicata natura mechanicum utrumque systema non parum fatigat. Quia vero Ætiologia earundem Februm, in quibus, ut reor, Fluida per se exorbitant, atque orgasmo suo Solida ipsa consecutive afficiunt, ac lædunt, melius concordare videtur cum observationibus Naturæ, si fluidorum Systemati superstruatur, quam si superstruatur systemati solidorum; optandum idcirco superest, ut iidem Celebres Viri, vel iis jam emeritis, alii posthac mechanicis iidem principiis innixi, post sedulam praxim Medicam a diutino tempore exercitam, conatus suos ultro urgeant, ut hanc Spartam adornent per Mathesin fluidis quoque humani corporis, eorumque tum peculiari texturæ, tum motibus intestinalis, quodausque licet, applicitam, etiamsi res ardua hæc sit, ac perdifficilis, maxime cum nondum satis compertam habeamus omnium singilla-

tum succorum naturam, vim, & secretionis modum, immo nec circulos satis calleamus eorundem particulares, aut varias velocitates, qua singuli circumaguntur, ut ad Circulum universalem concursu redeant inæqualiter æquali. Alaborandum nihilominus æque dixerim hac etiam via; neque tamen, ubi sic exigat rerum ordo, pigeat quemquam petere principium motus, non immediate quidem a Solidis in prima sui creatione sic ineffabiliter constitutis, sed potius a Fluidis spiritu suo insito, & elastica vi, quantum par est, abunde pollentibus, illamque jugiter in Solida transferre valentibus.

Hæc rursus si forte teratur universaliter semita, quam antehac calcavere tot alii præclari Viri universa Mathesi præstantes, quamvis, ut fatear, theoriæ Februm, præsertim Periodicarum, ut & omnium, quas Malignas vocitamus, aut Pestilentes nondum satis extricarint; nullus tamen dubito, quin improbo, ut dici solet, labore adhibito, plurimus saltem sit emergens Tyronibus præsertim instituendis profectus; esto quod ob peculiarem conditionem materiæ nimium inæqualis, & variæ, nimiumque irregulariter mobilis, non omnis circa hoc ab Arte suapte natura conjecturali demi queat incertitudo. At de his iterum satis; universalia namque isthæc innuere si forte licet, inculcare amplius non decet, ne iis, qui longe supra nos eminent, philosophandi leges temere videamur velle præscribere. Resumptis ergo crassioribus nostris sermocinationibus, ad Methodum curandi Febres Perniciosas pro scopo unico nostræ specialis Therapeutices assumptas, quo cœpimus gradu pergamus.

Munus ergo sollertis Medici, qui Perniciosam Intermittentem dignoverit, erit statim paucis præmissis, quæ indicationibus universalibus, prout e re videbitur, respondeant, vel iis omissis, si occasio sit præceps, erit, inquam, munus illius statim ipsi Fermento directe occurrere, ut imminens paroxysmum



num periculo sæpius, atque terrore plenum anteverrat, vel saltem imminuat, ac leniat. Considerata itaque gradata omnium prægressarum, præcipue vero postremæ accessionis intensione, & inde elicitæ conjectura futuri accessus, necnon habita mensura distantia illius, eam plus, aut minus, citius, aut lenius præmittat remedii Febrifugi quantitatem, quæ enervando plus, aut minus, citius, aut tardius, prout opus esse videbitur, Fermento adventuro sit satis; adeout vel omnino præcaveatur Paroxysmus, vel, si plane id non liceat, vel forte non libeat, saltem leniatur, ut vires ægrotantis ferendo sint, usque ad integram paroxysmorum sublationem, quæ omnino est in arbitrio experti Medici etiam quo ad tempus, & modum.

Hac in re rite gerenda expediet præ oculis habere Theoremata illa generalia Februm Intermittentium proprietates nonnullas respicientia, quæ *Capite vi.*, & *viii. primi Libri* protulimus. Nobis ideo congruum est, ut saltem fingamus pro crassiore quadam, sed utili curationis idea, quod illarum Fermentum, etsi in loco peculiari adeo repositum, ut viribus Cathartorum, atque Emeticorum sit ut plurimum inaccessible, & radicitus inexpugnabile, habeat nihilominus cum primis viis, & specialiter cum Ductibus Chyliferis sive propinquiorem, sive remotiorem aliquam communicationem, ad hoc ut possit, quodcumque e suis loculis proruperit, easdem vias subire. Quod equidem fieri poterit vel per eadem ostiola, per quæ Chylus primum ingreditur, vel etiam mediis aliis communicationibus, quæ per totum Lactearum tractum a primo illarum exortu usque ad locum insertionis earum in sanguinem plurimæ sunt, ut ostendit lymphæ Chylum ubique diluens, & Lacteis potissimum Mesentericis (Chylo jam per eas in sanguinem adveſto) recentem adveniens, ex observatione *Malpighii*, *Nach*, *Municks*, aliorumque recentiorum Anatomicorum. Ponamus insuper, Chinam Chinam in tenuissimum pollinem reda-

ctam, & quomodolibet deglutitam, si non ipsam Fermenti Fodinam directe, & immediate perere, saltem in Intestinis ipsis, & Ductibus Chyliferis ad longiusculum tempus morari, illisque ad modicum intervallum adhærere: quod non plane negabit qui animadverteret, res plurimas nutritioni ineptas, etsi ob molem, figuram, & pondus ad secedendum ab intestinis magis dispositas, ad longum tamen tempus in iisdem demorare delitescere, antequam cum Chyli recrementis crassioribus foras amandentur. Id ipsum autem eidem Chinæ Chinæ non modo potest accidere, sed vere accidit, ut ramenta illius excreta, & fæces alvinæ tinctura ejusdem infectæ longe satis ab illius assumptione palam testantur. Atque ita actionem Chinæ Chinæ adversus Fermentum febrile per immediatum etiam utriusque contactum facile erit intelligere; & eo facilius, si præter iter Corticis per Intestina consideremus insuper necessarium progressum particularum illius in Lacteas, necnon longiusculam earum moram in iisdem Lacteis, in quas saltem, & per quas aliquando vehi debet Fermentum febrile ad sanguinem tendens, quicumque sit terminus, a quo in easdem illud delabatur. Denique ponamus, eandem Chinam Chinam si non crassiore, tenuiore saltem substantia sua, succis intra Intestina hospitantibus intime mixta, quod idem est ac dicere, virtute sua iisdem communicata, & impressa, Fermenti adinstar massam aliquam imprægnantis, eosdem succos ita alterare, & suis viribus roborare, ut continuato assidue illius usu evadant apti ad præstandam medelam Fermento febrili, cum quo alicubi sunt commiscendi, & ad illud retundendum, quoties eidem commiscebuntur. Quemadmodum enim, si pravi sint, possunt illud deterius reddere, ita si virtute polleant Febrifuga sibi a Peruviano Cortice communicata, non modo illud non acuent, sed balsamicam, quam quodammodo acquisierunt, naturam ipsi demum Fermento imprimunt, pro residendo eodem ad no-



ad nocendum inerti, etiamsi non statim ac retusum est, præcipitur, sed in ipsam Massam sanguineam se insinuet, dummodo tamen assidua sit, & valida per novam Febrifugi ingestionem illius retusio.

Quod si etiam velimus nobis suadere eandem Chinam Chinam vel sanguinem munire adversus Fermentum adventurum, vel depurare illum, ac abstergere ab eodem Fermento intra eundem, veluti in sua Minera degente (quod alias cæteroqui non sumus lubenter amplexi) immo si velimus, eam altius penetrare ad lustranda remotiora quæque ejusdem Fermenti seminaria, non ideo sub hac hypothese pro correctione ipsiusmet Fermenti febrilis minus feliciter curationem instituemus. Atque hoc dictum volo, etiamsi metuamus, quod China China nudum Fermentum adorta vel in suo Foco, vel tantum in suo itinere, *Causam* ejusdem Fermenti *productricem* nequaquam tollat. Neque enim de hoc, quod pro dubio ad summum, ac incerto haberi potest, adeo solliciti esse debemus in casu ocysime extremo, ut ob id præsens, & certum exitum velimus negligere, maxime cum impetratis induciis, tractu temporis vel Natura ipsa, vel Ars, vel ætas, vel corporis exercitatio, vel anni tempus integram medelam consuescant subministrare. Certe in Cancro serius exitum minitante mos est adhibere Curationem, ut vocant, *Palliativam*, quæ mortem tantummodo protrahit, nec unquam sanat. Quidni ergo in casu præcipiti Febris Perniciosæ liceat, imminente morte, uti [cum præsto sit] Curatione vera, & satis firma, ubi potiore jure, quam in Cancro, ipsa optabilis esset simplex Palliativa? Denique, si ex *Cornelio Celso-Multa in præcipiti periculo recte fiunt, quæ alias essent omit-tenda: meliusque est anceps experiri remedium, quam Ægros certo exitio relin-quere*, cur in eodem præcipiti, certoque exitio omittendum erit remedium suapte natura tutissimum, & minime anceps, quod vel in morbis periculo carentibus communiter solet administrari?

His ergo pro fundamento, aliis vero, quæ præmisimus, pro modulo agendi nobis propositis, facile est, ut juxta exigentiam casuum diversorum in ardua qualibet Februm Perniciosarum circumstantia, & temporis angustia, Peruvianum Corticem rite, & cum fructu valeamus offerre; nihilominus, ut firmiore talo in hoc possimus incedere, Methodum ipsam Specialem, certis regulis constitutam, & variis casibus, quæ in Praxi contingunt, accommodam, vel saltem haud difficulter aptabilem, pro Medici videlicet curantis judicio, & pro diversa identidem eorundem casuum exigentia, jamjam aggredior luculenter exponere.

### C A P U T III.

*Methodus exhibendi valide, atque feliciter Peruvianum Corticem adversus singulas recensitas Februm Perniciosarum species, etiam in casibus ferme deploratis.*

**P**ER hoc, quod Febres Perniciosas antea descriptas Peruviano Cortice curandas velim, non ideo cætera remedia rejicio, quæ, priusquam ingruat ferox perniciës solo Cortice domabilis, locum habere solent, & vel universalem humorum sensibilibus peccantium alterationem, vel etiam peculiarem (quantum conjectare valeamus) Fermenti febrilis correctionem, aut mitigationem respiciunt. Rideo equidem, seu potius doleo, quod iis solis adeo fidamus, ut in eorum usu enervi, & imbecillo teramus assidue, ac inutiliter tempus, & verum, validumque Febrifugum illis posthabeamus: magisque rideo, dum in ea curandi ratione, quam *scrupulosam, & supersticiosam* festive appellat *Baconus*, rixas pueriles identidem audio inter — *Tenaces propositi Viros* — sive circa numerum foliorum herbæ cujuspiam domesticæ, puta lactucæ, jusculo incoquendæ, vel amygdalarum emulsioni addendarum, an scilicet quinque sint plures, quatuor vero pauciores, quam par



par sit, vel circa usum Endiviæ potius, quam Cichorii, eo quod nonnulla certe sit talium Vegetabilium (et si succedaneorum ad invicem) ut & salium eorundem diversitas: quasi in stomacho, & corpore nostro mille cibariis longe diversis assueto citra sensibilem humorum, aut sanitatis alterationem, quicquam insigniter diversum mediante usu jusculi medicati per quatuor, vel quinque dies assumpti possit efficere Endivia supra Cichorium. Proh quanta est delicatulorum aliquando Medicorum discordia circa delectum herbarum aliquot convivalium, in quarum tamen usu promiscuo tantus est Coquorum non modo, sed & Botanicorum consensus!

Rideo pariter, sed risu Sardonio, cum a nonnullis non ob credulitatem [quod condonandum foret] sed ob garritutem, & vanam quandam ostentationem artis, ne dicam sui, pretiosa potius, sæpe inutilia, quam vulgaria, & minus conquistata remedia, meliora tamen (quæ scilicet ex mente *Plinii — pauperrimus quisque cœnat*) prescribi video, vel vulgaribus ab alio Medico propter eandem indicationem præscriptis substitui, ad captandum popellum: quasi Concharum, vel Cornu Cervi pulvere, quo ad effectum longe præstaret pulvis Margaritarum, aut effectum Magisterium earundem, magisq; excelleret, ubi indicetur porus ferratus, extinctio (debiliior licet) Auri, quam Chalybis candentis, quemadmodum pretio supra Chalybem excellit Aurum. Ostentationes sane ridiculæ, simulque nauseosæ, esto quod ad illarum fulcimentum hæc difficile sit nugatorias comminisci ratiunculas, ab ingenuis, cordatisque Viris despiciendas, & minime audiendas. Medicis hujusmodi optima supra cæteros memoria est opus, ne scilicet quod semel ab alio propositum repudiarent, ut noxium in tali morbo, & subjecto, in eo ipso post annum tanquam utile proponant, affectatæ olim reprobationis obliti: quod aliquando contigisse memini.

Non ergo pro curatione Februm Perniciosarum de remediis inutilibus lo-

quor, vel de utilium æquipollentium inutili, nimiumque religioso delectu; sed loquor de congruis omnibus recta, & ingenua Methodo administratis, eaque, quoadusque possunt prodesse, suis loco, & tempore esse usurpanda, ultro concedo. Cum tamen vita Hominis est in discrimine, nec nisi per promptam inhibitionem Paroxysmi Febrilis possumus declinare exitium imminens, tunc saltem, nisi prius, aliis remediis posthabitis ad Peruvianum Corticem debemus confugere; nec, nisi cum nostræ conscientiæ detrimento, perspectis jam illius viribus, possumus, ut reor, hujusmodi auxilium certum æque ac innocuum omittere. Nimium suadet hoc ipse certitudo mortis, & certitudo remedii illam impediens; si quod enim est in Medicina certum de morte præsagium, illud est unice in casibus Perniciosarum septem præsertim priorum specierum, cum illæ jam pulsus abolitionem, algorem universalem, lethargum mortiferum &c. intulerunt. Quæ sane certitudo funesti præsagii tanta nunquam est in moribundis, vel in agone constitutis ex qualibet Febre abortu Maligna, ut ipsa evincit experientia. Qui enim ad statum jam memoratum devenit Ager, etsi non statim expiret, sed per diem adhuc tantillum resurgat, accessione tamen correspondente certo perit, ni servetur ope Corticis, de cujus præsentaneo auxilio non minor est, ac esset antea de imminente morte certitudo. Liceat exemplo rem explicare, satis, ut puto, apposite. Si quispiam nandi nescius mergatur in vasto gurgite, nec illi quidquam circumproster, quod possitprehendere, ut emergat, is profecto, licet semel, aut bis conatu suo naturali, & vi subeuntis aquæ, sursum trusus efferatur nonnihil, cito tamen, & certo suffocabitur, ni illi baculus, vel quid simile porrigatur ab adjutrice manu. In gurgite mergitur Ager ex Perniciosa Febre algidus factus, & sine pulsu, utut paululum relevari semel, ac iterum videatur. Lignum extrahens e gurgite est Peruvianus Cortex rite porre-



porrectus. Manus adiutrix est manus Medici, illum methodice, ac opportune porrigentis.

Non una tamen præcise est Methodus in omnibus hisce casibus adhibenda, sed potius duplex, habito respectu ad duplicem ordinem Februm Perniciosarum. Rursus utraque adhuc varia evadit nonnihil pro diversitate motus, seu velocitatis ipsius Febris modo magis, modo minus celeriter in præceps ruentis: itemque pro diversitate temporis, quo vocatur Medicus, seu pro longiore, aut breviori intervallo, quod illi superest ad agendum, postquam vocatus fuerit pro inhibitione imminentis exitii. Juxta varias igitur hujusmodi circumstantias varia quoque aliquantulum est, nempe modo lenior, modo fortior Methodus exhibendi Corticem, ut mox apparebit.

Et quidem generaliter loquendo, Methodus fortior convenit magis septem prioribus Perniciosarum speciebus, quas in primo membro latioris nostræ divisionis sumus complexi; & sunt, quando Febris quantunvis Exitialis suam Intermiſſionem, suumque Circuitum etiamnum servat. Atque eo validior ea esse debet, quo celerior est motus ipsius Febris ad exitum properantis, & quo brevius est intervallum temporis, quo distat Accessio, quodque ad illam inhibendam Medico superest. Methodus vero lentior magis convenit octavæ, & ultimæ speciei, quam in postremo membro ejusdem primæ divisionis solitarie collocavimus; & est, quando Febris Intermittens ab ortu ad Continuum essentialiter Acutam, & Malignam tendit. Atque hæc ipsa quoque Methodus, levior licet respective ad Methodum supraddictarum, nonnihil fortis aliquando (& quidem magis, vel minus) debet evadere, prout velocior, aut lentior est motus ipsius Febris ad Continuum essentialiter tendentis; proutque majus, vel minus est spatium temporis, quod superest Medico vocato ad impediendam continuitatem.

Exordium itaque ducendo a validio-

re, & quo ad effectum celerem mirabiliore Methodo, septem priores Perniciosarum Intermittentium differentias respiciente, vel eam, ut dictum est, adhibere contingit, quando Febris minus præceps in suo motu ob gravissimum symptoma maximum quidem periculum portendit, sed non immediate: verum probabiliter post duos circiter [anteactorem respectu habito] paroxysmos; & tunc etiam si minus valide usurpetur Cortex, nempe more fere vulgari, adhuc sat est; vel eandem methodum contingit adhibere [quod frequentius accidit] cum jam Febris ferali symptomate, quodcunque fuerit ex recensitis suo loco, Ægrum in tali statu repente constituit, ut vix illam, quam actu patitur, accessionem videatur posse transigere, cum morali certitudine quod alteri non sit futurus superstes, & in tali casu validissima opus est Corticis oblatione.

In quocunque autem ex duobus casibus modo recensitis reperiatur Æger, Perniciosam Intermittentem quamlibet passus ex prioribus septem speciebus, statim ita curandus est, ut quo citius possibile sit, viæ omnes, per quas Fermentum futuræ accessionis transire debet, ut inde elutrietur in sanguinem, Peruviano Cortice abunde conspergantur, omnesque, quotquot sunt, succi in primis viis cum Fermento alteram accessionem producturo commiscibiles, omnes, inquam, eodem pulvere inebrientur; adeoque Venter, Intestina, Vasa Chylifera, omnesque succiper eadem Vasa reptare soliti, hoc pulvere Febrifugo copiose scateant necesse est, ut hospitem efferum sive in illis latentem, sive illis accessurum, excipiant ut par est; illum videlicet enervando, debellando, ac mansuefaciendo, ne ultra pergens, ultra lædar.

Ad hoc opus cito absolvendum de more non minus requiritur, quam quantitas *sex drachmarum* pulveris, nec plus, quam *uncia una*, ad impediendum scilicet futurum accessum, & *tantundem* circiter postea ad firmandam valetudinem, & inhibendam recidivam. Quæ  
quan-



quantitas modo celerius, modo lentius debet absumi, prout magis, vel minus distat imminens paroxysmus, & prout majus, vel minus est imminens paroxysmi periculum. Sciendum est enim, ut dicebamus *Capite I. § viii. Libri primi*, ad sistendam Febrem quamlibet Intermittentem sufficere quidem *drachmas duas* pulveris, si uno haustu assumantur longe satis ab accessione futura, nempe vel in principio, vel saltem in fine accessionis antecedentis [loquor de correlativa ad eam, quam intendimus inhibere] sed si talis distantia non adsit, ita ut paroxysmus, qui debet impediri, distet v. gr. per xxiv. horas tantummodo, vel etiam minus, & tamen opus sit illum impedire ratione periculi, quod secum laturus est [non loquor de paroxysmo vel jam invadente, vel quam proxime imminente, sive lethalis, sive mitior ille futurus sit, quoniam ad eum curandum pertingere tempestive nequit actio Corticis] in tali casu necesse est, quod copia pulveris suppleat defectum temporis, & quod ipsa quantitas adaucta absumatur ea proportionem, & ordine, ut primus haustus, si offeratur in forma liquida, vel prima oblatio, quomodo-cunque fiat, constet tali quantitate pulveris, ut potis sit probabiliter ipsum paroxysmum vel sistere, vel plurimum enervare: quod facilius assequemur per primam oblationem validam, a paroxysmo inhibendo magis distantem, quam per reliquas, quarum actio serius in actum deducitur. Et hinc est, quod si primo offeratur in pauca dosi, etiamsi postmodum, vel frequenter exhibeatur, ut mos erat *Talbotii*, & aliorum, vel copiose etiam, sed prope accessionem, facile fraudemur sine nostro; secus si longe ab accessione fortius, prope vero accessionem debilius agamus. Utrunque autem ea proportionem faciendum, quæ securitati effectus, & casuum exigentiæ modo majori, modo minori apte respondeat.

Hanc autem regulam, & consona Proportionem dispositam distributionem

remedii paullo infra melius determinabimus, atque exemplo illustrabimus, ut vim remedii cum brevitate temporis, quod superest ad impediendum futurum accessum, commensurare possimus, & cum prævia cognitione, ac quasi ex certa scientia id assequi in casibus arduis, quod in vulgaribus quasi fortuito nonnunquam contingere observavit *Monginotius* inquit — *Notandum venit, si infusio* [intellige Corticis] *admodum valida fuerit, aut si crebrius fuerit exhibita, nonnullos a primo etiam paroxysmo liberationem obtinere: unde Medicamento plurimum laudis accedit.* Et licet hanc citam curationem in casibus minime urgentibus, in quibus tantummodo illam observavit, minus firmam censeat, illique propterea anteponat (nec forsitan male) nonnihil lentiores; in casibus tamen præcipitis exitii, eadem, utpote coacta, hanc exceptionem pati non potest: satius est quippe recidere segnius in Febrem, quam cito mori. Sed & de rara in hisce ipsis casibus recidiva aliquid infra sumus dicturi.

Si itaque Æger in talibus circumstantiis sit constitutus, ut probabiliter duos adhuc *ex. gr.* ferre possit, etiamsi intensiores futuri sint, paroxysmos, quatenus scilicet Febris sit motus non adeo præcipitis, & perniciosum symptoma habeat adhuc quandam mediocritatem: in hoc casu (si quidem fidendum sit morbo, qui nullam sæpe servat proportionem, adeo ut non raro post accessum levem sequatur immediate lethalis alter) in hoc, inquam, casu, declinante accessione, vel ea integre solata sufficere exhibere *drachmas duas* Corticis, prout de more in Intermittentibus Benignis. Quia tamen Febris Perniciosa habet nescio quid pravitatis, & pertinaciæ supra Benignam, ideo ad majorem cautelam, si Febris præsertim duplex fuerit (loquor de Tertianæ per modum exempli, & de hac semper intelligi velim, quippe magis obvia, & pernicioso characteri magis obnoxia) ad majorem, inquam, cautelam utile erit sequenti die,



die, minoris scilicet afflictionis, *unam* adhuc *drachmam* præscribere, ipsoque futuri paroxysmi fortioris die pluribus horis ante accessionem adhuc *alteram*; sic enim dubio procul paroxysmus ille majoris afflictionis non succedet, sicut nec subsequens levior. Quod si, ut dicebam, suspicio de symptomate pernicioso sit minor, & periculum magis distans, Febrisque tantum simplex, possumus etiam solis *drachmis duabus* antecedente paroxysmo exhibitis contenti esse, & observare quid inde sequatur, priusquam Corticem repetamus, cum morali certitudine, quod, etiamsi correspondens paroxysmus adveniat, levior is erit, & longe minoris periculi; adeoque poterimus, si velimus, etiam per *semidrachmas* pulveris vel semel, vel bis in die exhibitas, paulatim accessiones imminuere, & intra paucos dies in totum extinguere. Mihi tamen semper magis probabitur Methodus validiuscula, ubi suspicio perniciei justum fundamentum habeat; tum quia infidus est ordo, & inæquale incrementum accessionum, quæ quandoque nos fallunt; tum quia, cum innocuum semper repererim in quacunque dosi remedium istud, non est cur ubi decernitur necessarium, hæreamus in parva, maxime cum fortius operetur, quo fortius exhibetur: & quo fortius operatur, eo minus sit semper periculum, quod repullulet Febris recisa.

Si vero ob neglectas Febres, nondumque ab ullo Medico curatas, vel ob easdem non satis a curante Medico observatas, aut observabiles propter occultam illarum malitiam, repentinamve, ac præcipitem mutationem, si, inquam, ob has, vel similes causas Æger [quod sæpe contingit] jam ruerit in exitium, sitque ideo in tali statu, ut jam frigidus, anhelosus, ac fere cadaverosus appareat, & quod pejus est, in eodem statu diutius perseveret destitutus auxilio Corticis, Medico videlicet illius restitutionem tentante per sola Alexipharmaca, atque Cardiaca vulgaria: in tali casu, dummodo vita in futuram saltem accessionem protrahi debeat (quæ condi-

tio omnino requiritur ad evitandam calumniam, non vero quia China China obsit, cum nequit prodesse, ut fusius explicabimus sequenti *Capite*; neque enim hominem intra illam ipsam accessionem expiraturum vel Cortex, vel aliud quidquam sanare valet) in tali, inquam, casu, licet res in angusto sit posita, & insuper postridie *v. gr.* adventura sit nova Accessio procul dubio cæteroqui lethalis, nihilominus omni conatu statim tentanda est viriliter introductio liberalis quantitatis Peruviani Febrifugi, posito quod Æger possit illud deglutire; hæc enim difficultas, quæ in lethargicis præsertim facile occurrit, non semel in causa fuit, ut quispiam remedio destitutus occubuerit, qui fere certo convalescisset, si potuisset assumere.

Ponamus itaque per modum exempli, quod Ægrotans aliquis post duos paroxysmos *v. gr.* Tertianæ simplicis Intermittentis, quorum prior levissimus fuerit cum nullo, vel paucio stomachi angore in principio accessionis, & alter nonnihil fortior cum dolore mordaci oris ipsius Ventrinuli, tertium patiatum fortissimum cum tali, tantoque morfu ejusdem stomachi, ut primo ejulans, ac ululans, dein clamandi impotens, jactabundus, nauseabundus, animo deficiens, cum pulsu pertinaciter abscondito, oculis concavis, suspiriis luctuosis, sudationicula frigida, & hujusmodi, videatur animam efflaturus. Ponamus pariter, quod a Natura, atq; a Remediis adjutus, & recreatus post plures, & plures horas tandem incipiat reviviscere cum levi aliquo ad tactum calore, pulsus, utut minutuli, elevatione, morsusque ventriculi imminutione, adeo ut Medicus moralem certitudinem habeat de vita in futuram accessionem protrahenda, sed simul æqualem de morte tunc temporis adventura una cum Paroxysmo febrili, qui, quartus cum sit, cæterisque de more ferocior, quippe cum morbi statu coincidens, & die septima, in hoc certe casu lethalis omnino futurus erit. Ponamus adhuc, quod statim ac appareat ea symptomatum remissio, quæ sinit Ægrotantem



rem loqui, ille tum animæ primum, tum rebus deinceps suis successive consulat, ad quæ peragenda non parum temporis necessario requiritur. Omnibus hisce tandem peractis, mane sequenti (quæ dies est ab accessione vacua) ponamus denique alterum Medicum in consilium vocari, Ægro aliquantulum quidem, sed parum respectu ad dies antecederet correspondentes allevato, & quo ad actus externos aliquantulum vegeto, ad motum non segni, & ad respondendum, licet languidiuscule, prompto: sed ex alia parte, remanente pulsu adhuc exili, & non-nihil celeri, sudatiuncula quadam viscida cum splendore faciei, nausea, aut apestia cum quadam sensatione molesta in regione stomachi, oculis cavernosis, voce sepulta, suspiriis identidem anhelosis, & nonnunquam singultuosis: ita ut de futura accessione sequentis diei, ac per consequens de futura morte inter Medicos curantes facile conveniat, nisi impediatur paroxysmus (quod primo loco requiritur) ad impetrandas saltem inducias pro iis, quæ supersunt, symptomatis ex arte corrigendis, & pro tollenda pulsus celeritate, & frequentia febrili, etiam extra paroxysmum noviter introducta, quæ tamen nullo negotio etiam sponte post inhibitum paroxysmum cum reliquis symptomatis solet evanescere. Cum vero nullum in Medicina remedium sit, a quo possimus promptam inhibitionem paroxysmi sperare, nisi a Cortice Peruviano rite administrato, iste propterea in hoc statu, quin & in pejore [in quo ne ipsi quidem Medici cæteroqui Cortice utentes, illum posse proficere quondam credidissent] nulla mora, vel cunctatione interposita, proponendus est a Medico recenter vocato, & nervose exhibendus.

Obstat equidem in hoc casu brevitatem temporis [quæ aliquando etiam major est in aliis casibus] obstat, inquam, brevitatem temporis, quod superest usque ad futurum accessum. Et certe in tali temporis angustia *duæ drachmæ* Corticis, quæ requirunt pro actione sua totum saltem spatium, quod intercedit

inter unam, & alteram accessionem, non sufficiunt ad impediendum, quin immo neque ad minuendum quantum opus est proximum paroxysmum, qui quoque, etiam si levior foret, & cardialgia minus feroci comitatus, adhuc tamen hominem viribus jam destitutum, qualem supra descripsimus, dubio procul jugularer. Igitur in hoc casu necesse est, ut Æger, quo citius fieri poterit, saltem *drachmas sex* Corticis deglutiat, primo quidem haustu *semunciam* circiter, & reliquum partitis vicibus, *ex. gr. drachmam unam* post horas sex, vel octo, & post simile intervallum alteram, habita cautione, ut ultima oblatio, si proficua futura est pro paroxysmo proximo, distet ab eodem paroxysmo per horas circiter duodecim; quæ enim China China exhibetur paucis admodum ante accessionem horis, ea pro inhibenda accessione huiusmodi nihil valet, nisi forte in quantum præcesserit horis congruis alia quantitas roborari capax ab hoc adjuncto. Quo nomine etiam expediet in casibus brevissimæ a paroxysmo distantie, oblata dosi ampla tempore remotiore, aliam portionem repetere etiam non longe a paroxysmo, licet cæteroqui huiusmodi oblatio prope Febrem magis influat ad impediendos subsequentes paroxysmos, quam ad averendum imminens, tali oblationi nimis immediatum. Quod dictum est de *sex drachmis*, intelligi potest de *uncia integra* in casibus summe urgentibus ante paroxysmi adventum absumentia, & prudenti partitione distribuenda.

Sin autem imminens paroxysmi propinquitas sit talis, ut reddatur dubia quo ad affectum etiam prompta oblatio *trium*, vel *quatuor drachmarum* Corticis ob temporis brevitatem, & Ægrotantis instans exitium; ut *v. gr.*, si paroxysmus lethalis per duodecim circiter horas tantummodo distet, tunc ad *sex usque drachmas* simul unica vice (quod pluries feliciter a me, & ab aliis me suadente factum est) licebit transcendere, *duabus*, quæ supersunt, *drachmis*, in duos sequentes dies reservatis, si Æger tam-



diu supervivat: quemadmodum, si distantia a paroxysmo sit plurima, ut in Quartanis, vel etiam Tertianis, Medicusque sit præsens postremo accessui perniciem aperte præmonstranti, habeatque ideo totum tempus tum declinationis paroxysmi, tum subsequenter intermissionis, pro præscribendo citra tumultum Cortice, sufficiet prima vice exhibere *drachmas tres*, vel etiam *duas*, ut paullo ante dicebamus, dein *drachmam unam* identidem, & frequenter repetere, singulis *v. gr.* sex horis ante adventum paroxysmi, aliisve modis supra expositis, donec quantitas *sex drachmarum* circiter sit absumpta.

Brevi hac, facili, & valida servata Methodo per totum tempus, quod accessionem antecedit (supposito, quod illud sit horarum plus minus viginti quatuor, ab incepto usu remedii usque ad horam futuri paroxysmi) idem paroxysmus vel inhiberi solet omnino, vel levissimus apparere, vel saltem procul dubio non lethalis esse; quæ fors non contingit ulla alia Methodo in usum ducta, ut, si solam infusionem Chinæ Chinæ more *Talbotii*, *Helvetii*, aliorumve quantumvis frequenter usurpemus, vel si alio quocunque modo procedamus, nisi *unciam* circiter, si affectus sit præceps, ejusdem Chinæ Chinæ in pura substantia assumpserit Ager, vel tantum saltem Extracti recentis, aut validæ tincturæ Corticis, quantum potest æquare virtute *unciam unam* ejusdem substantiæ ante adventum futuri paroxysmi; cum animadversione etiam, quod dimidium integræ dosis Ager jam uno tantum, vel duplici haustu habeat assumptum duodecim circiter horis, si fieri possit, longe ab ipso paroxysmo: siquidem necesse est, bonam quantitatem intra breve tempus hausisse, & hausisse longe ante horam, quantum fieri potest, futuri paroxysmi.

Propterea qui infusionem *trium*, vel *quatuor unciarum* Chinæ Chinæ præscribunt factam in magna liquoris mole, & plurium dierum spatio potandam, in casibus Perniciosarum Intermittentium moram non admittentibus, invalide utun-

tur Cortice: cum talis Methodus vix valeat in benignis, atque diuturnis Febris, minus agente quantitate *quatuor unciarum* parvis dosibus usurpata, ac agat quantitas *uncia unus* larga dosi, brevi-que temporis spatio administratæ, ut diximus *Capite vii. Libri I.* Addo insuper, tantum interesse non solum Corticem præscribi in quantitate liberali, intra breve tempus absumenda, verum etiam talem quantitatem distribui ea, quam diximus, proportionem, ut data pari quantitate, *v. gr. uncia una* Chinæ Chinæ, eaque intra æquale tempus, *ex. gr.* intra viginti quatuor horas absumpta, in casu pari Febris Perniciosæ, adhuc tamen potest sanari Plato *v. gr.*, & non sanari Socrates, præcise ob inæqualem administrationem remedii quatenus Platoni oblata fuerit primo haustu *semuncia* Febrisfugi, & reliquum ad *drachmam*, & *drachmam*; Socrati vero oblata fuerit *drachma una* singulo trihorio *v. gr.* juxta *Mortoni* Methodum, vel aliter. Cum enim sic, & nimis imbecilliter agatur primis horis, a paroxysmo futuro magis distantibus, in quibus incidit occasio præceps, ac tota agendi opportunitas, & fere incassum agatur secundum dimidiam circiter portionem remedii, postremis horis inutilibus administrati, hinc est, quod in casu præcipiti nullus sequatur effectus, qui ex adverso sequitur per oblationem *semuncia* primis horis, cui quidquid distributive, & parce postmodum suppeditatur, satis est. Et hoc necesse est, quod sciant, atque intelligant ii, si qui forte sunt, qui, ut usui Chinæ Chinæ plaudere videantur, tamquam rei sibi notissimæ, Psittacorum more, quod minus perspicue hinc inde excerpterunt, confuse repetunt per vicos, & per compita, scilicet audendum esse, & Chinam Chinam in Febris quibuscunque crebro, & liberaliter esse propinandam. Hoc enim jactare sine experientia, & tradere sine lege, est remedium contemptui exponere, & semetipsos censuræ ob asserti nimium late patentis animositatem, & ob frequentem carentiam successus.

Positis



Positis autem in tuto hac stricta Methodo Ægri rebus, ad ulteriorem expugnationem Fermenti febrilis, & ad præcautionem Recidivæ, morbo, ut ita dicam, in medio sui vigoris suffocato, necesse est insistere in usu remedii per plures dies, illudque postquam ad dies aliquot omissum est, ad plures alios denovo repetere; alterna siquidem reciprocatio temporanei usus, & omissionis illius mirifice conducit ad intentum, præstatque ipsi usui non interrupto. Expediet idcirco non semel opus aggredi modis, & formis luculenter expressis *Libro I. Cap. præsertim vii.*, ut ideo hic idem repetere non sit opus. Illud addam tantummodo, quod in casibus Perniciosarum, qualis est, quem attuli paullo supra per modum exempli, satius est primis diebus post fugatum paroxysmum, & præcipue si aliqua febrilis incalescentia, ab ultimo paroxysmo relicta, constanter non nihil perseveret [quod tamen per duos tantum, vel tres dies solet observari] satius, inquam, est primis diebus, quibus Cortex ad prophylaxim exhiberi solet, illum præscribere nonnihil liberalius, ac in benignis, *ex. gr. ad drachmam unam* quotidie per tres circiter dies, dein ad *semidrachmam* bis in die per alios tres dies; unde quemadmodum *sex drachmæ* absumptæ fuerunt paullo ante adventum paroxysmi pro eo impediendo, ita *sex* aliæ postea absumantur pro eodem longius pellendo. Interposita vero quiete sex dierum circiter, *semunciam* adhuc ad *semidrachmam* quotidie sufficiet præscribere pro eodem paroxysmo, si possibile sit, penitus arcendo. Atque ita *duabus uncis* ad summum Chinæ Chinæ in totum absumptis, sed dosi provide inæquali, & quidem intra spatium trium hebdomadarum [comprehendendo quietem intermediam unius hebdomadæ] Perniciosa Febris jugulatur, hominem cæteroqui statim jugulatura: cum ex adverso apud alios, *uncis quatuor*, vel *quinque* enervi Methodo exhibitis vix pellatur Benigna.

Quod si adhuc radix aliqua febrilis repullulascere videatur, illa vel paulif-

per sibi sinatur, sua sponte cessatura, vel postquam cursus aliquis illi permisus est, præmissa, si lubeat, leni aliqua corporis expiatione, vel sanguinis missione, iterum repetatur usus benignior ejusdem Corticis, *v. gr. ad semidrachmam*, vel ad *scrupulum unum* quotidie mane per dies duodecim circiter ad impediendam omnem Febris revirescentiam sive in forma potus, sive in forma boli, sive in Extracto, aut Tinctura, sive cum Syrupis, aut Conservis, sive alio quovis modo, quod parum refert, ut fusiùs citato *Cap. vii. Libri I.*, ad quod etiam in hoc casu Lectorem remitto. Atque hæc est Methodus valida pro curandis illis Febribus Intermittentibus Perniciosis, quas in primo membro divisionis genericæ collocavimus, quæ videlicet etiam in sua pravitate naturam adhuc servant intermissionem.

Exponenda superest alia Methodus temperatior pro curandis illis, quas collocavimus in secundo membro, & Octavam Perniciosarum speciem constituunt, scilicet *Subcontinuarum*, earum nempe, quæ ex Intermittentibus ad Continuas, & Acutas tendunt. Ista autem Methodus, quam lentiolem voco, respectu habito ad supra descriptam, non semper adeo lenta est, ut aliquam non exigat celeritatem, neque tam levis, ut validum quandoque non admittat operandi robur, & dosim Corticis liberaliorem. Ab hoc ut cito me expediam, sat erit generaliter dicere, quod pro Medicicurantis judicio varianda est dosis Chinæ Chinæ, & repetenda illius oblatio ea proportionem, quæ sensim valeat ita enervare paroxysmos ad continuitatem vergentes, ut priusquam adveniat tempus probabile futuræ Continuitatis, atque (ut ajunt) Acutiei, iidem paroxysmi omnino sublatis sint, absumpti scilicet intra tale tempus apta distributione *drachmis sex* Peruviani Corticis. Paroxysmis etenim sic inhibitis, seu non recurrente nova accessione mirum est, quam facile ipsa evanescant semina, & rudimenta succrescentis cæteroqui Continuitatis.



Ponamus itaque & in hoc casu, quod transactis quatuor, vel quinque paroxysmis Tertianæ Intermittentis, quos inter aliquis calor, atque siticula mediarit ipsa intermissionis die, & quibus invadentibus minor semper qualibet accessione facta fuerit sensatio frigoris, adeo ut levis tantum, & brevissima evaserit extremorum perfrigeratio, ponamus, inquam, quod post hujusmodi paroxysmos, longiorem etiam extensionem, majorem semper intensiorem, & brevior, ac obscuriorem intermissionem habentes, subsequatur alter, cui loco intermissionis succedat tantum notabilis remissio, perseverante cum siti etiam linguæ siccitate, inquietudine, jactatione, calore ad tactum acriore, dolore capitis, urinis paucis, rubris, ac crassis, & aliis hujusmodi: adeo ut Febris de Intermittente jam facta sit Subcontinua, seu Continua per subingressum; non quidem per simplicem mitiorum paroxysmorum extensionem, sed propter violentam intensiorem, & validiorem simul extensionem eorundem; unde sub hac proportionem palam fiat, quod Continuitas ista, quæ per subingressum paroxysmorum initium sumpsit, minime velit in hac linea subsistere, sed ultra pergere ad Acutiem, atque Malignitatem, simulque ad Continuitatem essentialem, post duos circiter paroxysmos acquirendam, nullaue amplius periodo, vel non nisi obscurissima distinguendam; in quo statu vel inutilis omnino, vel saltem imbecillus admodum semper est Cortex, ut *Lib. V.* dicemus.

In hoc ergo casu Acutiem proxime, & Perniciem longiuscule præmonstrante, præmissis suo tempore, quæ debebant præmitti, & repetita etiam, si opus sit, paullo ante usum Febrifugi, ut casus quidem ferre videtur, Venæ sectione, vel omissa tali repetitione, si jam antecederet plenitudini, & exigentiæ sit satisfactum, aut si nova accessio jam prope imminet, vel non admodum distet, danda statim est opera, ut paroxysmus imminens continuitatem majorem allaturus enervetur insigniter,

non autem inhibeatur omnino: quoniam cum effervescencia febrilis admodum valida sit in hoc casu, in quo intermissio jam evanuit, fortasse minus conveniens est illius repentina, & violenta suppressio, maxime cum nec unus, nec alter paroxysmus mortem sit allaturus, sed solam Acutiem. Enervato siquidem imminente paroxysmo, per repetitum usum Corticis magis enervatur & alter, donec sensim tertius omnino tollatur, & paullo post etiam ipsa care-roqui invalescens continuitas. Hoc autem citius, vel lentius agendum est, prout magis, vel minus distat primus Accessus, & prout magis, vel minus celer est motus, quo Febris ad continuam vergit, majorve, aut minor ad succumbendum oneri dispositio Ægrotantis.

Redeundo itaque ad casum jam positum, in quo Medicus post elapsam quintum paroxysmum cogitet sequenti die de impedienda continuitate, sexto accessu validius adventura, dico, quod præmissis antea præmittendis, statim poterit exhibere mane *v. gr. Scrupulos quatuor*, vel *drachmam j. ss.* Corticis, vespere vero *drachmam ss.*, vel *scrupulos duos*. Die autem ipsius Accessus, mane *drachmam unam* solam, vel *duos* tantum pariter *scrupulos*, totidemque sero declinante Febre, offerre sufficiet, & sic per duos, vel tres dies continuare, insumendo scilicet quotidie partitis vicibus *scrupulos* tantum *quatuor*, vel circiter pulveris: posito quod prima die, primoque haustu liberalior aliquantulum fuerit, ut supra, dosis assumpta. Et quia, ubi agitur de Febre ad Continuitatem, atque Acutiem properante, suspectus quipiam videri poterit Vini usus, propterea ad majorem cautelam in hac Febris specie expediet Corticem offerre in aliqua aqua stillatitia, puta Cardui benedicti, Scorzonæræ &c., vel eandem Aquam loco Vini ipsi Cortici assumpto in forma boli superbibendam præscribere: quamquam (ut fatear) neque in his circumstantiis Vini, præsertim tenuioris, usum unquam noxium sim expertus.

Subla-



Sublata in hunc modum periodo, & successive evanescente, quæ supererat, Febre, ne facile eadem repullulascet, utile erit post quietem unius, vel alterius diei, immo etiam trium, vel quatuor, Corticem rursus offerre ad *drachmam ss.* modo semel, modo bis in die juxta majorem, vel minorem Aegri dispositionem ad recidivam; quod oculato Medico haud difficulter constabit. Atque ita pro varia ista Aegrotantis dispositione, & Febris indole, brevior, aut diuturnior esse debet, & citius, aut tardius, crebrius, aut rarius, ac per breviora, aut longiora dierum intervalla resumit usus ejusdem Corticis; hac tamen cautela generali semper adhibita, ne scilicet usus crebrior transeat in abusum. Absumpsisse siquidem satis est *duas*, plus minus, *uncias* Chinæ Chinæ in substantia, quomodolibet id fiat, pro una ægritudine integra; quod enim non præstat hæc quantitas, nec præstat major. Immo non semel observavi pendente ipso Corticis usu liberaliore (qui pertinaciter a nonnullis in Benignis Intermittentibus perperam instituitur) Febrim insimul rediisse; illa videlicet cum remedio sibi familiari reddito aliquod tandem societatis fœdus ineunte.

Quod si celerrimo gradu Febris ad Acutiem, & Continuitatem properet, itaut statim ac incipit obscurari intermissio præter indicia superius exposita, aut illis similia, appareant etiam, ut quandoque assolent, alia fortiora, qualia sunt motus artuum tremuli, aut convulsivi, subdelirium non plane intermittens, vox tremula, urina subjugalis, singultus, aut alia hujusmodi, tunc gradu pariter velociore debet incedere Medicus in exhibendo Cortice ferme ad regulam Methodi in Perniciosis Comitatis constanter Intermittentibus usurpandæ. Ut enim se habet respectu illarum imminens exitium, ita se habet respectu istarum imminens Acuties; utrumque magna quidem celeritate impediendum, non tamen omnino pari, quoniam dispar quo ad tempus est extremum utriusque periculum. In casu

*Torti Therap. Spec.*

itaque Perniciosæ post aliquot Intermit- tentes accessus motu celerrimo in Continuum degenerantis, expediet prima oblatione (quæ semper, ut alias diximus, cæteris longe validior esse debet, ut cum fructu efficaces esse possint leviores, quæ debent subsequi) expediet, inquam, prima oblatione *duas* saltem, vel etiam *tres drachmas* Corticis exhibere, dein altera die *drachmam unam* mane, & sero: postea ad *drachmam semis* transcendere modo semel, modo bis in die, prout opus erit, donec absumatur *prima uncia* circiter Corticis: reservata alia *uncia* vel integra, vel dimidia, distribuenda pro prophylaxi eo modo, & ea proportionem, quæ Medico curanti videbitur opportuna, ut satis, superque jam diximus.

Nec est, quod quispiam meticulosus liberaliorem dosim, diuturnamve repetitionem Corticis eo, quo diximus, modo reformidet; præterquam enim quod major quantitas, & diuturnior oblatio ob leviolem causam in usu jam fuit, & est quotidie, diversa quidem methodo, apud alios, & præsertim in Gallia, nec tamen quidquam detrimenti a tanta, & supervacanea Corticis ingurgitatione ad plures videlicet, ac plures illius uncias, suboriri intelligimus: addere insuper possum & ego experientiam meam, quæ respectu ad usum innocuum Chinæ Chinæ generaliter est annorum circiter L., præter experientiam præviam Præceptoris mei, ab ipso Corticis in Italiam adventu initia sua sortitam; respectu vero ad usum largiorem in Perniciosis Febribus est annorum XL., quod potest sufficere ad firmandam ancipitem pusillorum fidem. Et quoniam Virorum omnium honestorum experientia, agentium de Corio humano, acquiescendum est, lubet adjicere quoque experientiam *Mortoni* ab annis xxv. petitam, & *Sydenhamii*. Nunquam (inquit *Mortonus*) me pœnituisse memini, quod Corticem frequenter, & copiose exhibuerim; Inde enim saepe appetitum magis firmatum, coctionem alimentorum in Ventriculo restitutam, generi nervoso robur



*adjectum, & Habitum Corporis a statu tabido in Athleticum mutatum observari. Quæ quidem omnia sapissimæ mihi quoque observare contigit. Immo copiosæ, ac repetitæ Corticis oblationi tantum tribuit citatus Auctor, ut incommoda, quæ aliquando Febres fugatas sequuntur in aliquibus, qui Cortice solum usi sunt quantum par fuit ad pellendam Febrem, & non ultra, adscribat nimis parco Corticis usui, Fermentum febrile ob idipsum supprimentis potius, quam subigentis: adeoque subdit, huiusmodi incommoda resitantia, quæcunque sint, A repetito, & iusto Corticis usu absque quacunque alia methodo sponte cessare: tandemque concludit — Culpentur ergo Medici, qui ipsum satis copiose non exhibuerunt, aut Ægri, qui ejus repetitionem respuebant, non vero pharmacum, quod insons est. Sydenham pariter in Febribus præsertim Continuitatem affectantibus, in quibus cæteroqui magis suspecta videtur esse debere copiosa Corticis quantitas, illum liberaliter exhibet in substantia præcise ob hoc ipsum, quod Febris ad Continuum disponitur. Observandum est (inquit ille) quod quo magis Febris sive sponte sua, sive regimine calidiori ad continuitatem accedat, eo major Corticis quantitas exhibenda: itaut nonnunquam viderim morbum hunc nonnisi sesquiuncia, vel unciiis ejusdem duabus cessisse. Sed de hoc fusius adhuc sequenti Capite.*

Denique pro coronide monendum superest, quod cum in casibus Perniciosarum quarunlibet, & præsertim postremarum, quæ octavam differentiam constituunt, earum suppressio contingat ut plurimum circa statum morbi universalem (si enim periculum continuitatis in ipso statim se prodatur principio, suo loco quæremus, an tunc quoque expediat Corticem administrare) cum, inquam, morbi mutilatio, ut ita dicam, contingat in medio illius cursu, ideoque tunc facilius recurrere posse videantur recidivæ, reciso quidem, sed non ab omni forsan radice penitus evulso febrili fermento ob remotam scilicet pro-

ductricem causam, quæcunque fuerit, fortassis adhuc vigentem: propterea in huiusmodi casibus utile erit, recidivam, si contigerit, non statim iterum reprimere, sed aliquantulum sinere, quoniam semper debilior est ac fuerit invasio prima, suamque Febris facilius, ac diutius, quam tunc, servat Intermissionem; atque ideo satis est efficaciter egisse a primordio periculi. Cæterum quæ subsequitur levior invasio vulgaribus tantum, congruisque, & cautis remediis erit tractanda, donec vel sponte, vel consueta Artis Methodo perfecte curetur. Quod si his non obstantibus vel diutius, quam par sit, protrahatur, vel iterum cum periculo recrudescat Febris, vel ad continuitatem essentialem tendat, tunc prompte, & sine ulla cunctatione repetendus est Cortex sive fortius, sive temperantius, juxta exigentiam casuum diversorum, & secundum regulam in *Historiis sequenti Libro* subdendis servatam: quod omne pariter faciendum est eodem modo, quoties sive bis, sive ter, sive etiam pluries pervicax, & indomitæ fere cervicis Febris valide recruduerit.

De diætâ servanda eo tempore, quo juxta Methodum utranque remedium in usum ducitur, nil habeo, quod addam supra id, quod obiter dixi de hoc *Cap. vii. Libri primi*: maxime cum facile sit cuilibet Medico vel mediocriter versato, alimentum in debita qualitate, quantitate, & temporis distantia præscribere; præsertim ubi vel Methodus curativa lenior, vel mera prophylaxis sit instituta. Ubi vero præ manibus sit Methodus validior, in qua copiose, & frequentius exhibetur Cortex, attente magis quo ad partitionem, & caute magis quo ad quantitatem victus est offerendus, ne cum eo confundantur intempestive remedium. Sed hæc ipsa cautela cito desinit, cum brevitâs unius diei naturalis, qua negotium magna ex parte solet absolvi, difficultatem ullam vix possit admittere.

Circa hoc tamen illius non sum sententiæ, ut cum nonnullis credam, crebrum, & pleniorum ciborum usum conferre



ferre Cortice utentibus; immo cum permixtio medicamenti cum cibis apud me sit semper suspecta, quo enim purior, & simplicior permeat Chyli vias substantia Remedii, eo activior est, & validior, satius duco, quod ea serveretur victus ratio, quæ congruit naturæ morbi in data positione Acuti jam facti; ut propterea solliciti admodum esse non debeamus, saltem in Regione nostra (ut *Libro* etiam *prima* innuebamur) de cibo offerendo, quasi in adjumentum Remedii. Atque ideo præter Vinum, in quo frequentius propinatur Febrifugum (esto quod & in Aquis stillatitiis, & in forma solida cum fructu æque offeratur) præter Vinum, inquam, quod portionem aliquam alimenti supplere potest, convenient juscula carniū, ova sorbilia, fercula ex illis confecta, panatellæ, emulsionēs ex seminibus peponum, ex Amygdalis recentibus, & hujusmodi.

Quo ad intervallum vero inter cibum, & Corticem, ego hanc regulam generalem teneo, ut quando Remedium offertur, Ventriculus sit a cibo, si fieri potest, vacuus, vel saltem sit peracta digestio: & quando cibū offertur, Remedium pariter, majore saltem sui portione, sit a Ventriculo ad Chyli vias propulsum. Idcirco quatuor saltem horis ante cibum exhibeatur Cortex; elapsis vero quatuor itidem, vel quinque horis ab assumpto tenuiore cibo iterum repetatur, & sic deinceps toto tempore, quo durat frequentior oblatio ejusdem Corticis. Hanc tamen regulam quandoque variare expedit, ubi urgeat necessitas tum nutriendi, tum Febrifugum exhibendi: quo casu, partito singulis sex horis cibo dilutiore, ac tenui, horis demum intermediis [videlicet tribus elapsis ab assumpto jusculo] potest exhiberi Cortex, immo etiam paullo post, vel paullo ante assumptum jusculum, si sit opus; quandoquidem aliquam alimentorum, præsertim liquidorum (forte & solidorum) societatem non prorsus excludit remedium istud, facile Fermentorum nostrorum objectis, ut Fermentis ipsis nostris accommodabi-

le. Quæ itaque pro regula generali circa hoc sunt prolata, non adeo religose intelligenda sunt, quin variam pro diversitate casuum, & Methodi adhibitæ, ampliationem, aut limitationem juxta Medici curantis judicium identidem patiantur.

Hæc ergo est Methodus completa curandi Febres Periodicas Perniciosas per usum Chinæ Chinæ. Superest, ut Methodum eandem hucusque expositam, quæ omnem forte legentis cujuspiam expectationem [tam facilis illa est, & obvia] nondum implevit, licet supra plurimum expectationem mea sæpius, & Ægrotantium impleverit vota, *sequenti Capite* dilucidemus, examinemus, & a præcipuis, quæ obtrudi facile possent, objectionibus vindicemus. Jam enim mihi videor audire non paucos dictis meis succensentes, & palam clamantes

*Quid dignum tanto tulit hic promissor hiatu?*

Docuit, inquiet aliquis, curare Febres suapte natura Intermittentes mediante *uncia una*, vel *altera* Chinæ Chinæ, quod Lippis jam, arque Tonforibus notum. Docuit, inquiet alter, experimentum periculosum, ferme deploratos curare tentans, temeraria affatim, & exuberante Corticis oblatione. Docuit denique, concludent alii, sive recoxit, quod ante illum docuit præter alios etiam *Mortonus*, ob id ipsum a sanioribus universaliter reprobatus. Hæc jam, & similia meis scriptis ominor. Etsi vero vel ob inania hujusmodi præjudicia, vel ob alienam incuriam, vel ob denegatam fidem, vel ob pervicaciam [neque enim unquam crediderim, quod ob nequitiam] in contemptum cadant hæc mea, nullus dubito, quin ipsi contemptores, vel obrectatores mei, si qui futuri sint, Methodum istam, quam palam fortasse spernent, clanculum tandem usurpent, vel siquidem eam aperte profiteantur, confidenter apud ignaros jactitent, velut sibi jamdudum compertam, antequam mihi. At hoc parum refert: nullam enim hinc famam quaerito, sed Proximi utilitatem; nec me vana tangit



prurigo garriendi, per quem vivat hac arte servatus homo, dummodo vivat. Cum longior autem dies, & diuturnus usus, isque dubio procul felix, universalem approbationem, ut juvat sperare, huic Methodo conciliaverit, tunc justitiam, quam mihi forte Nasuti complures denegabunt viventi, reddent extincto. *Tempori, Judici æquissimo* (ita monere videtur exemplo Celeberrimi *Harveii*, hisque ferme verbis innuere *Cl. Ramazzinus*) *Causa comittenda, & despiciendi Obtrektorum latratus, neque responso dignandi, donec tandem ferietur livor, qui ut plurimum in vivis pascitur, ac cineribus parcat.* Sed & istud perinde mihi erit ac illud: quippe qui reprobantes audire vivens nolo, approbantes extinctus nequibo.

#### C A P U T IV.

*Dilucidatur Methodus exposita, examinatur, & defenditur a male feriatorum dictis. Porro circumstantia, in quibus ea locum habet, & in quibus non, indicantur.*

**N**E quæso existimet quispiam, eo quia plurimum tribuerim Methodo expositæ pro curandis Perniciosis Febribus supra descriptis, in ardua fere qualibet earundem circumstantia, extremaque prope Ægrotantium angustia, velle me Methodum eandem jactanter venditare pro peregrino quodam Cogitato, aut Invento, quod menti hominum unquam nec occurrerit, nec potuerit occurrere; cum tamen admodum similem ante me excogitarit (me quidem inscio, cum antequam excogitasset, & in usum duxissem, non promulgarit) *Mortonus*, alique forsitan privatim suo Marte tentarint, aut excoluerint, absque eo quod illam peculiari dignam reputarint historia. Non ea sane mihi mense est; nec me latet, quam parum distet a communi usu Inventum Istud, quippe quod habet pro basi Remedium vulgatissimum, & pro scopo Febres Febribus eidem Remedio communiter addictis analogas.

Non ergo Methodum hanc propono, ut rem abstrusæ, atque sublimis indaginis, sed ut rem summæ, atque admirandæ utilitatis, a cunctis quidem facile excogitabilem, sed a paucis excogitatam, & a perpaucis excultam, qua median- te servantur quamplurimi, cæteroqui perituri, & sine qua plurimi pereunt, qui certo servarentur, pereuntque præcise per hoc, quod Methodus ista si- ve obvia, si ve recondita, si ve vulga- ris, si ve peculiaris, si ve aliena, si ve mea, communiter non noscitur, nec in usum ducitur. Quod si quis illam ante nos se novisse jactitet, etsi pudeat pro hac gloriola decertare, adducat in exem- plum curationes nostris, quas sumus al- laturi, æquales pondere, ac priores tem- pore, & manus vinctas dabimus. Sed aliud est decantare, quod pluribus jam Libris nimium liberaliter evulgatum est, ex ideali quadam conjectura, Chinam Chinæ omnibus generaliter Febribus, & quolibet earum tempore posse conve- nire, in casibus autem arduis, ubi ve- re convenit, nescire præscribere pro exi- gentia affectus curandi: aliud per pra- xim methodicam, propria observatione sibi comparatam, certisque regulis con- stitutam, prænunciato contra commu- nem expectationem successu, utilissime administrare, seque vadem eventus præ- bere in agone rei.

Invento huic qualicunque (siquidem Inventi nomine velimus illud dignari) in- cipit jam prope contingere, quod con- tigit olim jocosio Invento satis noto de Ovo stante, quod postquam viderunt, sciebant omnes, & priusquam videret, sciebat nemo. Sciunt autem ex No- stratibus Medicis ingenui non pauci, qui me præeuntem in hoc saltem uno se- cuti sunt, & imitati; digni tamen, ut illos in longe pluribus sequar ipse, sci- unt, inquam, & experiuntur, quot mo- do sanantur hac via, qui prius inevi- tabili sorte interibant. Sed jam male sonat [nosco] delicatis auribus repetita pluries hæc cantilena, quam nihilomi- nus vel invito sæpius extorquet sinceræ veritatis studium, non inanis jactantia.

Quid-



Quidquid autem singulare habet hæc Methodus, si quidquam habet, a duobus pendet. Unum se tenet ex parte Morbi, alterum ex parte Methodi ipsius. Ex parte Morbi mirabile est prorsus, non præcise quod Febris Intermittens, etsi violenta, per Chinam Chinam depellatur; sed quod depellatur Febris, quæ licet fuerit Intermittens, jam Continua facta est, Maligna, & Exitialis, & quidem in eo statu, in quo Æger lethali-bus undique stipatus symptomatis videtur jam morti proximus cum algore univer-sali, frigidove sudore; pulsusque ipse nullam fere amplius Febris habitudinem prodit, cum vix prodar se ipsum. In quo equidem statu de nullo fere Remedio cogitare consueverant Medici, nisi de Cardiacis, ut vocant, & restauran-ribus vires, quorum tamen pretioso ap-paratu instructi, ne dicam infarcti, Ægrotantes dirissime moriebantur. Ex parte vero Methodi peculiare quidpiam est, quod China China eo modo, & ea proportionem exhibeatur, ut consuetam activitatem suam valeat transcendere non modo curando morbum, qui a nullo amplius remedio videtur curabilis, quippe ferme *deploratus*, & quem propterea *non oporteat attingere*: verum etiam illum curando intra breve temporis inter-vallum, intra quod Benignam Intermit-tentem, si vulgaris quælibet usurpetur Methodus, non valet curare, & intra quod, etsi angustum, si curaret, non curaret amplius, si videlicet serius actio illius esset protrahenda, & priusquam talis actio se posset exercere, novus se exereret paroxysmus.

Hæc sunt, quæ Methodum hanc *Peculiarem* reddunt, atque spectabilem, cum cæteroqui summa illius in hoc tan-tum consistat, ut augeatur supra vulga-tiorem dosis Chinæ Chinæ videlicet *ad drach. vi.*, vel *ad unc. i.*, quod distri-buatur determinata quadam proportio-ne, ut prima oblatio sit potis, Febrem non longe distantem valido ictu plecte-re, atque mulctare, & quod hæc dosis sic adaucta, & sic distributa intra bre-ve spatium temporis absumatur integre,

ac etiam, si opus sit, tota simul. Quæ omnes circumstantiæ, si singillatim con-siderentur, sunt leves quidem, & quasi fortuito inventæ, sicut fere fortuito o-lim applicitæ (ratione tamen duce) Ca-sibus quibusdam, quibus parum, vel ni-hil profuturæ reputabantur; sed si con-siderentur conjunctæ, ubi agitur de ser-vanda pereuntis hominis vita, præstant effectum [ atque frequens equidem est occasio præstandi ] præstant, inquam, effectum & citum, & certum, & ru-tum, & admirabilem: uno verbo talem, qualem re vera assequi nullus antea Medicinæ Liber, sive ex Hippocrati-ca, sive ex Galenica, sive ex Chymica Schola unquam nos docuit.

Ut magis elucescat peculiaris hæc No-vitas cordatiorum oculis, ponamus exem-plum. Notum est omnibus, Pleuritidem copiosa non modo, ac repetita pluries, quantum finit virium status, phlebotomia curari, verum etiam id fieri per Specifica, ut ajunt, propinata, puta Dentem Apri in pulverem redactum, Mandibulam Lucii piscis, & hujusmo-di. Hac nihilominus apud omnes vigen-te notitia, quot pereunt quotidie Pleu-ritici, quibus jam ad extrema redactis inutilia sunt, nec proinde amplius ad-ministrantur prædicta præsidia? Si ergo Medicus aliquis ratione, & multiplici experientia fretus doceret modum cer-tum sanandi eos, etiam cum jam ster-tor bronchia pulmonum obsidet, sup-presso sputo, cum pulsus exilissimus, fa-cies Hippocratica, & anhelitus sublimis mortem præ foribus esse, & postridie cubiculum ingressuram prænunciant: doceret autem id assequi per oblationem *copiosiore*, & intra breve statutum tem-pus *crebro repetitam*, Dentis apri *v. gr.* itaut loco scrupuli unius, vel semidra-chmæ, quæ est dosis usitator, semun-ciam *v. gr.* affatim offerret, ac subinde statis brevibus intervallis oblationem parciorem renovaret, donec uncia una quamprimum esset absumpta, is profe-cto *peculiarem*, & novam Methodum prodidisse, merito diceretur curandi Pleuritidem jam fere desperatam, licet reme-



remediis, pro morbo illo curando notissimis id præstaret. Sic *Lazarus Riverius*, eo quia Febrem Malignam Epidemicam intra biduum ab exortu Parotidum Ægros fere omnes, quos corripiebat, necantem curare, & sanare cœperit iterata solum phlebotomia, & purgatione in eo gravi statu administrata, Methodum suam nomine *Insignis Experimenti*, quod silentio præterire sit nefas, donare minime dubitavit *Cap. de Febre pestilenti*. Sicque pariter, qui modo prædicto provectam, ut supra, Pleuritidem sæpius sanaret, *insigne experimentum* se peregrisse, & *specialem Methodum* curandi Pleuritidem in eo statu se reperisse, haud immerito gloriaretur, etsi vulgaribus tantum id ageret, notisque remediis: quia videlicet, quos alii sanare nequeunt, ipse sanaret, præcise ob *peculiarem* notorum Medicamentorum administrationem, in quo uno tota sita esset prærogativa talis actionis. Ob id jure maximo agebat *Magnus Verulamius* hanc materiam egregie suo more pertractans. — *Sciant pro certo Medici, posse plura Medicamenta ad morbum aliquem gravem curandum recte præscribi, quæ debito ordine, & debito intervallo sumpta curationem præstent: quorum singula si per se tantum sumerentur, aut si ordo inverteretur, aut si intervallum non servaretur, fuerint prorsus nocitura: etenim* [liceat hic ex eodem auctore alibi dictum repetere] — *Quæ in natura eximie possunt, & polleunt, sunt Ordo, Prosecutio, Series, & Vicissitudo artificiosa*. Perfectio rerum consistit in parvo. Excellentem Picturam non reddit præcise congrua colorum electio, sed & consona dispositio. Crassiora quæque lineamenta efformant effigiem. Pauca, & tenuia efficiunt similem.

Sed neque in aucta dosi, & proportionata distributione Chinæ Chinæ mere consistit vis, & utilitas Methodi expositæ. Aliud namque requiritur, quod designari quidem potest aliquo modo, ut jam pro viribus factum est, sed nequit plane communicari. Tria sunt circa Methodi usum scitu necessaria, *Ubi*

nempe usurpanda sit, *Quando*, & *Quomodo*. *Ubi* respicit Febres omnes, in quibus potest, aut debet administrari; *Quando* respicit tempus opportunum, & *Quomodo* quantitatem medicaminis, & proportionatam, celeremque distributionem illius. Contra *Ubi* peccatur, quando non dignoscitur natura Febrium, in quibus conveniat, ac proficit, & in quibus non, exhibendo v. gr. ubi nequit agere, vel omittendo, ubi miranda quandoque præstare posset. Circa hoc autem plura jam hucusque protulimus, & non pauca posthac, præsertim *Lib. V.* sumus prolaturi, ut nempe istud *Ubi*, quod plurimum refert, perspicue dignoscatur. Contra *Quando* peccatur, cum tempore inopportuno exhibetur Cortex, nempe vel procrastinando in occasione præcipiti, & offerendo nimis sero, cum lapsa est occasio, morsque jam proxime imminet, vel exhibendo nimis celeriter ob timorem Panicum: cum cæteroqui satius esset, Febrem vel nonnihil, vel omnino, sinere. Et de hoc pariter actum est, & deinceps agetur. Denique contra *Quomodo* delinquitur, cum quantitatem medicamenti, & illius distributionem non aptamus debita proportionem Febri modo majorem affatim, modo minorem Corticis copiam, modo lentiolem, modo citatorem repetitionem, & modo æqualem, modo inæqualem illius partitionem intra congruum tempus exigenti. Et circa hoc quoque, ut reor, quantum sat est, quid sentiam aperui, speciales cautiones, & observationes meas experimentales candide aperiens.

Haud equidem inficior, hanc ipsam dosim largiorem, atque etiam nonnihil celeriter absumptam in usu esse apud *Mortonum* [idem quodammodo dici posset de *Sydenhamio*, aliisque compluribus Exteris] atque ab eo nonnunquam applicari, seu applicitam fuisse Febribus Perniciosis supradescriptis, ut pariter fuit ab eodem applicita (forte nimis quam par fuerit, sed tamen minus, quam fuerit hactenus creditum, ut videbimus) aliis quibusdam Febribus, ne dicam



dicam Morbis omnibus aliquid periodici redolentibus. Et propterea fallus sum alibi, atque hic iterum fateor, Methodum meum consimilem uni forte Mortonno ante me innotuisse, ut testantur illius historiae annum sapientius 1690. quandoque & 1680. connotantes, licet Opera ejusdem serius impressa illam nobis non aperuerint, nisi post coeptum a me meum Methodi usum, ut Historia peculiaris Capite VI. hujusce Libri exponenda, & alia deinceps Libro sequenti manifeste patefacient. Si tamen aliquis chronologiae hujusmodi fidere nolit, meque velit a Mortonno, vel aliis Auctoribus instructum, parum refert; hinc enim, ut alibi dixi, plus mihi gloriae, quam pudoris emerget; emerget siquidem gloria saltem imitationis in melius evectae, si gloriola qualiscunque inventionis denegetur.

Illud tamen mihi fidenter tribuo, aliisque compertum volo non ob contentionem quidem praeminentiae, sed ob utiliore tantum Aegrorum curationem; nempe aliquam, nec prorsus levem esse discrepantiam inter meam, & Mortonni Methodum. Ille enim, cum dosim non augeat, nisi ob suspicionem, quod Cortex sit adulterinus, ut videlicet drachmae sex hujus adulterini sortiantur effectum drachmarum duarum genuini pulveris, uti vidimus jam Capite VII. Libri primi, eandem dosim non distribuit proportionem satis valida, ut quandoque opus est in casu praecipiti; ideoque in talibus casibus forte fallax erit Mortonni Methodus, sex illas drachmas praescribentis, & dividensis in sex partes aequales, singulis quatuor horis assumendas, quae est Methodus illi magis familiaris, nimis languide incipiens, & nimis prope Accessionem inhibendam desinens. Inquit itaque ille differens de Praeparatione, Electione, & Exhibitione largiore Corticis — Nonnunquam vix decimam illius partem in Capsis Mercatorum genuinam deprehendi — & paullo post subdit — Corticem, qui prostat in officinis venalis, reapse maxima ex parte esse spurium, effectum, ac puti-

dum, testes appello Medicos &c. Quin & res ipsa idem clamat: quare enim dosim sollemnem drachmarum duarum adultis olim praescriptam, hodie in Febrilibus curandis ad tot uncias augere coacti sumus? En ergo qua ratione dosim adaugeat. Denique (quod & alibi retulimus) clarius inquit — Dosis drach. ij. praecise adultis praescripta erat; jam autem, quia Cortex adulterinus est, coacti sumus saltem unc. j., nonnunquam duas, vel tres ingerere, priusquam scopum attingere possimus &c. Hoc posito, cum finis adauctae dosis sit solum, ut intra illam totam quantitatem includantur saltem drach. ij. germani Corticis, illa pariter distribuitur lento, & aequali progressu, nulla habita Februm Benignarum, vel Malignarum, lentiorum, aut velociorum, casuumve magis, vel minus urgentium ratione: ac proinde curationes insignes, quas nonnunquam videtur absolvisse Morton, absolvit fere fortuito per dosim liberalem in validas quidem, sed non quantum aliquando par esset, portiones distributam, genuini probabiliter Corticis, pro adulterino habiti. En illius generalior praescriptio — Adultis praescribendus est Cortex, prout plus, vel minus genuinus sit, ab unc. ss. ad drach. vj. unc. j. unc. j. ss. unc. ij. Infantibus, ac Pueris pro ratione aetatis a drach. j. ad j. iij. iv. Neque tantam molem unica vice ingerere necessarium est, cum satius sit partitis vicibus, drach. j. scilicet, drach. ss., scrup. j. quarta quaque hora, respectu ad aetatem habito ministrare. Haec ille.

Ego vero, cum fraudem, ac fucum hujusmodi in Cortice a nostris Pharmacopolis electo, & dispensato, raro, vel nunquam deprehenderim, solisque drachmis duabus in ordinario Intermittentium cursu optatum effectum semper sortiri consueverim: idcirco sex drachmas, quas in casibus arduis celeriter praescribo, praescribo ut bonas, neque ut aequivalentes duabus tantum, sed ut triplo fortiores quam duae, immo etiam plus; cum sex conjunctae, quas ali-

quan-



quando mihi contigit & assumere, & exhibere, longe plus agant, ac sex se-junctim, & per intervalla absumptæ, ut jam diximus per extensum *Cap. vii. Libri primi*. Cum itaque plurimum inter sit, ut prima, nonnunquam etiam altera, oblatio sit valida, ubi videlicet præceps imminet periculum, ideo Methodus *Mortoni*, in quibusvis casibus non plus, quam *drachmam unam* Corticis singulis tribus, vel quatuor horis præscribens, etsi præter Auctoris estimationem genuinus ille fuerit, si versemur in præcipiti casu, erit infirma. Et hæc est ratio propter quam Curationes, quas adducit in suis Historiis, licet insignes profecto sint, universaliter tamen non sunt admirabiles: immo propter hanc ipsam rationem censeo, Ægros aliquot gravius affectos, quos refert, quibusque Cortex opitulari nequivit, Methodo forte nostra sanari potuisse, cum plurimos haud ab simili modo laborantes, hac eadem Methodo sanatos noverim. Cæterum nunquam satis in hoc laudari potest idem Auctor: omnesque propterea, quotquot sunt, Medicos efficaciter hortor, ut scripta illius circa Februm Curationem Peruviano Cortice absolutam, ac præsertim Experimenta, & Historias Curationum attente legant, nec negligant, aut contemnant; plurimum enim veritatis hujusmodi Historiis inesse, nullus dubito, in illis etiam iisdem casibus, in quibus videtur esse nimius, ut nonnunquam est, in præscribendo Cortice citatus Auctor, nempe in ipsis Continuis. In his enim consideratis, & sumptis in eo statu, in quo Ille easdem sumit, atque considerat, nempe in statu manifestæ, & periodicæ remissionis, bene potuit, potestque nonnunquam, si non semper, esse proficiuus Cortex, quatenus Febres hujusmodi aliquem tunc characterem Intermittentium præferunt, licet illas sub tali etiam circumstantia nomine Februm *Continuum* designet præter morem in Scholis usitatiorum. Quod hic obiter monuisse sufficiat; cum hoc idem, quod communi forsan æquivocationi

circa illius asserta ansam dedit, exactius ad trutinam revocandum sit *Libro V.*

Haud sum nescius, quod & nuper innui, scrupulosis quibusdam, & in praxi parum versatis, largam nimis videri posse tum quantitatem Corticis universalem, tum dosim particularem a me in Perniciosis præscribi solitam. Sed de nihilo est cavillatio respiciens generalem quantitatem, ut de hac prius loquar: cum enim ea in uno Ægro non soleat transcendere *unc. j. ss.*, vel *unc. ij.*, aut saltem cum paullo ultra extendatur pro curanda simul *Febre*, & impedienda *Recidiva*, nullo modo culpari potest hodie: hæc etenim minor est quantitas, quæ impendi consuescat. Gallia universa Chinam Chinam usurpat ad *unc. tres*, quatuor, & ultra, ut vidimus *Cap. vii. Libri I. Sydenham* in Observationibus ad *unc. quatuor* in substantia *longo*, & repetito usu per modum alterantis ascendit: immo illum in Epistolis serius impressis, in quibus cum *Mortono* ferme concordat, *duas uncias brevi* temporis spatio assumendas, sæpius præscribere consuevisse, adnotavimus jam *Cap. antecedenti. Monginotius* Vir cautissimus, & in usu Chinæ Chinæ versatissimus hanc regulam generalem tradit agens de præparatione Remedii in *Zod. Med. Gall. August. 1681.*, nimirum — *In Curationem unius Individui impendendam esse sesquiunciam, vel unc. ij. Quinquinae, immo aliquando superandam illam quantitatem pro varietate occasionum.* Quid multis? Prostat experientia *Mortoni* de usu Corticis in substantia usque ad libras duas tractu temporis exhibiti *Exercit. 1. hist. 29.* Cui dosi liberali adscribit Ille vegetiorem contractum ab assumente Vetula corporis habitum: quod & ipse nonnunquam observavi, ac in historiis retuli *Cap. x. Lib. I.*; adeoque balsamicas huic remedio vires inesse, videtur exinde deducere idem *Mortonus*, qui dosim idcirco illius uberiores semper anteponit pariori.

Quo vero ad dosim particularem, primis



primis præsertim cyathis liberaliorem ( in quo consistit major efficacia Methodi nostræ ) nullum circa eam video cunctationi locum : quandoquidem æque innoxie Aëgris exhibentur , quantum centies expertus sum , tres , vel quatuor simul *drachmæ* tenuissimi pulveris , ac exhibeantur *duæ* more vetustiori ; extracta namque a Fermento ventriculi Corticis tinctura febrifuga , & utili , intrusisque per lacteas particulis tenuioribus , crassior , & lignea substantia per alvum sensibilibiter amandatur , quemadmodum sollemne est , oblata etiam cæterorum omnium lignorum substantia , puta Santalorum , Salsæ , Guajaci , & similium . De innocentia Remedii intrinseca jam satis *Capite prim. Lib. I.* De eadem vero etiam in aucta dosi egregie subdit idem *Monginotius* in contextu supracitato , post arbitrariam , & indeterminatam supra uncias duas dosi taxationem — *Cum nihil mihi in animo obversetur , quam ut optimum quodque , & usu probatum adferam , dosim eo usque extuli , ratione , & experientia testibus . Cum ab hujus Remedii usu omne omnino absit periculum , satius est ad majorem quantitatem ascendisse , quam in minori hæsisse , ut Curationis rō ἀσφαλὲς sequatur .* Idem plane asserit *Charas* , loquendo de dosi Extracti sui in hunc modum — *Mais il n'est pas nécessaire d'être scrupuleux sur la dose de ce remède : car il a cet avantage , que l'augmentation de la dose en peu au-delà de l'ordinaire , ny la reiteration des prises ne laissent aucune mauvaise impression , & ne peuvent faire mal a personne .* Ita sentiunt Auctores omnes in præscribenda , & adhibenda China China exercitati . Et hæc quo ad dosim Adultis administrandam , quam , ut frequentiore , pro modulo plus minus adduxi ; ex ea namque facile est perito Medico , proportionem elicere dosi Pueris , & Infantibus præscribendæ pro ratione ætatis eorum : jacto semper fundamento , quod , etsi liberalior nonnihil sit ipsa dosi , agitur de Remedio suapte natura innocuo , & de Absorbente æque inculpabili , ac cætera ,

quibus assidue utimur , sed magis specifico .

Neque pariter negaverim tam meæ , quam *Mortoni* Methodo objici posse , quod suppressis in ipso Morbi vigore Februm paroxysmis aliquando recidant Aëgri . Sed hoc excellentiæ ipsius Methodi nihil videtur detrahere : nam præterquamquod sæpissime non recidunt , & præsertim quo magis ad extremum fuerint redacti , & præterquamquod recidiva vel inhibetur continuato remedio , vel , si prorsus inhiberi non possit , saltem debilior solet esse radice sua , ut diximus agendo de oblatione Corticis in Benignis Intermittentibus , adhuc tamen , etiamsi recidiva certo recurreret , & si gravis æque foret ac ante [ quod profecto non accidit ] adhuc , inquam , hoc nihil officeret in nostris casibus , ubi agitur vel de exitio certo , ac imminenti vel de periculo quammaxime impediendo , aut saltem suspendendo . Sicuti enim , si quispiam ex gravi Febre delirans se præcipitem daret in puteum , esset extrahendus e puteo , etiamsi recens emersum eadem Febris certo esset interemptura : ita in hisce casibus Aeger est subtrahendus naufragio suo per Corticem , qui unicum , certumque remedium est , etiamsi contendatur esse Palliativum , ut sic dicam , aut forte Narcoticum ( quorum nempe pro leviori occasione frequens est usus ) Causam Febris consopiens , ac ad tempus figens , ad impetrandas scilicet saltem inducias adversus mortem . Ea enim tunc temporis propulsata potest deinde Medicus , qui Cortici satis non fidat , aliam pro libito Methodum , si quam se putat habere meliorem , eligere pro eradicatione integra Causæ morbificæ . Caveat tamen , ne remedia , quæ Cortici putat ad prophylaxim substituenda , mortem iterum , quam Cortex propulsavit , accersant . Interim sat sit , si usu illius nostra Methodo administrati protinus vivat Aeger , qui cæteroqui proxime moriturus erat , præsertim cum vivat non moriturus paullo serius : quod tamen quis flocci pendat ? sed victurus diutius , suosque



suosque dies naturaliter impleturus. Si tamen, postquam intra duos, vel tres dies ab Orci faucibus evidenter ereptus est, atque ad infebricitationem omnimodam redactus, obnoxius remaneat uni, vel alteri recidivæ leviori, post duas circiter hebdomadas contingenti, id æquo ferat animo. Feret autem, si memor fuerit periculi recenter elapsi, & si animadvertat, difficulter a remedio naturali restitui posse sanitatem ferre in instanti, uti restituitur a Cortice, absque ulla recidivæ suspitione; huiusmodi enim modus agendi miraculosus foret, solique Deo reservatus. Sed revera nonnunquam transactæ procellæ obliti Ægrotantes, & ab hominibus male feriatis, cum recidunt, seducti facile exclamant quandoque, fatius fuisse Febrem sinere, a qua fortassis evasisent absque tædio tot recidivarum, quam illa violenter suppressa diuturniore incommodo præcocius sanationis poenas tandem luere. Profecto receptum beneficium non exprobrarent, si Febri illos jugulanti relictis fuissent; sed probi Viri est, cunctos servare, quos potest, & serere beneficium, etiamsi sit messurus calumniam. Non sic ajunt postea, cum alios cernunt, in similibus circumstantiis hoc remedio, hacque Methodo destitutos perire.

Fateor equidem, quod, quando Febris Acuta jam facta ferri potest, nec hominem propterea interimit, sed suum cursum integre, ac feliciter absolvit cum universali tandem, & critica fluidorum depuratione circa finem (dico integre, atque feliciter: sæpius enim hoc fit imperfecte, & tunc quoque ex imperfecta judicatione plures recidivæ contingunt) melius, ac tutius quo ad suspitionem recidivæ judicatur morbus, ipso etiam latente *Mortono*, quam si per Corticem impedito febrilis effervescentiæ progressu: etiamsi retusum simul sit, correctumque ipsum febrile Fermentum: integra impediatur per consequens eorundem fluidorum, & præcipue sanguinis despumatio; quod circa citam nimis, validamque, ubi opus urgens non sit, Corticis obla-

tionem observavit & *Monginotius*, a nobis super hoc ipso citatus *Cap. antecedenti*. At non proinde coercetur intus morbi fomes, toris suis viribus iterum resumpris æque revicturus ac antea, sed longe debilius resurrecturus; siquidem aliqua sui parte possit resurgere, reviviscere, aut reproduci. Illud namque discrimen mihi videtur intercedere inter Febrem solutam primo, & resectam secundo modo, quod intercedit inter Arborem radicitus evulsam, & eandem ab imo trunco securi recisam. In primo casu ita extirpata est Arbor, ut nullum amplius possit emittere surculum. In secundo quoque certe integre resecta est; nihil tamen obstat, quominus tenuius aliquod a detruncata radice pullulet germen, minima qualibet sirpicula facile averruncandum. Ita est profecto in casu Febris per Chinam Chinam curatæ. Non modo obtruncatus est Paroxysmus, sed prope radicem resectus, absorpto videlicet, correcto, enervato, ac retuso Fermento febrili; remotiores tamen, & universaliore Causæ, quæ ipsum genere Fermentum, etsi hac ipsa via enervatæ sint, non tamen sunt adeo domitæ, ac radicitus evulsæ, quin novum adhuc Fermentum, licet infirmius, aliquamve iterum illius portionem valeant progignere: qua de re fusius infra *Lib. iv. Cap. V.* Sed quorsum hæc? Objectioni siquidem de periculo recidivæ, ubi agitur de imminente morte, nullus est locus, ni velimus in re seria fabellam renovare, qua fertur sitientem quendam proxime suspendendum patibulo, Vinum montanum potare renuisse, quippe quod saxoso loco genitum tractu temporis Calculum Vesicæ gignere poterat. Ne tamen festiva hac tantummodo, valida licet responsione velle satisfacere videar, ingenue repeto, quod pluries observavi, vel saltem quod mihi observasse sum visus [quod quidem ex historiis suo loco afferendis poterit quisque melius conjicere] perraram nempe contingere contuivisse recidivam in iis, quibus Methodo valida oblatus est Cortex in extremo prorsus eorum periculo; contra vero facilio-



ciliorem, quando periculum aliquantisper ab extremo distabat, ut cum Ager duas adhuc Accessiones, vel unam saltem poterat probabiliter sustinere.

Est & alia Aegrorum non querimonia, sed potius despicientia adversus hanc Methodum, & est hujusmodi. Tam cita est, & tam facilis Illorum sanatio, nulla scilicet concurrente famosa operatione, nullo fere labore, dolore nullo, ut vix noscant, aut credant, etsi videant, se ab insigni liberatos periculo, quasi pretiosa illis non videatur acquisita sanitas, quæ non empta fuerit vel ingenti auri pretio, vel ingenti ipsorum cruciatu. Non ita foret, si copiam Lapidis Bezoartici nil agentis deglutissent, si torminosa, & nauseosa potassent pharmaca, vel si cucurbitulis, aut vesicantibus excarnificati ægre convaluissent. Proh magna innocui, & benigni Remedii calamitas! Eo quod facile est, mansuetum, & minime dolorificum, vilescit. Sed & alia adhuc est ratio, propter quam vilescit sanitas per Corticem adeo mirabiliter acquisita. Ea est, quia Aegri assueti sunt credere, quoties evadunt a morbis, semper evasisse propter illa remedia, quibus sunt usi, licet nullum fuerit sive certum, sive sensibile illorum juvamen: ideoque etiam per Corticem sanati, non illi, vel Medico præscribenti plus tribuunt, ac tribuant aliis remediis, quorum pendente usu alias convaluerunt, licet sæpius non propter illa convaluerint, sed beneficio Naturæ. Hæc autem exceptio vere Cortici nullatenus competit, quippe qui statim sensibiliter, & semper suum munus absolvit in ardua fere quacunque circumstantia; ei namque uni in tota Medicina datum est privilegium hocce, ut Medicus ante oblationem illius possit spondere subitam, certamque saltem moraliter Salutem, & restituto Aegro possit intra se modeste gloriari, exultare, & sibi metipsum dicere — *Hunc Hominem certo pereuntem hoc uno Remedio vere servavi.* Sed hoc, quod probe dignoscitur a Medicis, minime dignoscitur ab Aegrotantibus; adeoque illis minus conspi-

cua redditur singularis excellentia Remedii, Medicique illud apte, & opportune præscribentis industria. Verum hoc quoque parum refert. Et quoniam in aliis quandoque casibus laudatur a sanato Aegrotante Medicus, cum illius saluti nil fere præstitit, haud ægre ferat, si aliquando non laudetur, cum præstitit plurimum.

Denique illud, quod maxime exponit calumniæ Methodum istam, est necessitas illam quandoque adhibendi in talibus circumstantiis, ut forte Homini intra tres, vel quatuor horas animam efflaturus, illam contingat inutiliter administrare, & *subire speciem ejus, ut occisi, quem fors ipsius peremit.* Circa hoc ocularius valde sit oportet, cautus, ac peritus Medicus in dignoscendis casibus, ubi sit, vel non sit locus congruus actioni remedii, præsertim in *splendida persona, ne, si non servet, occidisse videatur.* Et ut repetam quod *Capite* antecedenti obiter monui [est enim hæc magni momenti circumstantia] scire oportet, quod, sicuti ad hoc, ut virtus Corticis etiam copiose administrati in actum possit perfecte deduci, requiritur debitum temporis intervallum, xxiv. circiter horis circumscriptum, ita ne inutiliter exhibeatur necesse est, ut per xxiv. circiter horas victurus sit homo, cui debet exhiberi: adeoque oportet, ut ultra paroxysmum atrocem, quem actu patitur, vita illius sit protrahenda saltem in alterum, seu quod in illa Accessione occumbere non debeat, sed ad minimum in proxime sequenti. Caveat idcirco sibi Medicus, ne calumniam subeat, videatque, ac attente perspiciat, si vigente aliquo terribili paroxysmo vocetur, an a tali Accessione evasurus sit Ager (quod haud difficulter dignoscet, si expertus, & peritus sit) priusquam Corticem propinet. Neque enim statim ac vocatur, semper opus est illum immediate præscribere, sed satius est declinationem aliquam etiam hoc nomine expectare. Si enim aliqua symptomatum appareat remissio, & quædam Aegri jam fere morientis reviviscentia, utut ferme  
fine



sine pulsus, & cum aliis lethalibus signis idem perserveret, alacriter exhibendus est Cortex cum spe probabili, ne dicam certa de servando homine propter moralem certitudinem, quam habet Medicus de impediendo futuro Accessu.

Quod si res Ægrotantis eo devenierit, ut vita illius etiam intra paucas horas sit in discrimine, sive quia paroxysmus jam inchoatus videatur non posse ad declinationem pertingere, quin prius Æger deficiat, sive quia idemparoxysmus, non inchoatus quidem, sed quam proxime instans, nec proinde per Corticem amplius inhiberi capax, ultimus absolute, lethalisque futurus esse videatur: tunc, licet melius cautum foret famæ Medici non exhibendo Corticem, qui neque paroxysmos ipsos Benignarum Intermittentium vel inchoatos, vel proxime instantes valet coercere, adhuc tamen, ne caritati erga proximum suum ullo modo desit, ut quodammodo videtur deesse, si ob metum calumniæ negligat, vel omittat auxilium in talibus circumstantiis incertum quidem, ac probabiliter inutile, sed nihilominus innocuum, & forte juvandi capax, adhuc, inquam, crediderim, eundem Corticem a Medico misericordie offerri posse, plano tamen prius, & aperto præmisso prognostico, incunctantique protestatione de futura probabiliter inutilitate innocui cæteroqui tentaminis. Id eo magis licet aggredi [si non titulo curandi, saltem titulo indulgendi, atque tentandi, ut dictum est] si tale auxilium ab Assidentibus, vel ab ipso Ægrotante expresse expetatur, quandoquidem fama Remedii paucis ab hinc annis satis perspecta est, & vulgata cuique, dummodo Æger ipse jam fere non bagat animam, Febrisque ex natura sua sit capax remedii, & non aliter. Aliud est enim illud tentare in Febre, cui cæteroqui conveniret, ni mors proxime instaret, aliud tentare in ea, cui nunquam, ne antecedenter quidem, convenerat. Illud, quamvis successu careat, condonandum; istud non ita.

Etsi tamen omnes quotquot excogitari possunt cautelæ, frustraneæ quandoque futuræ sint, itaut a male feriatis hominibus nihilominus male audiat Medicus, qui Homini paullo post vita functo Corticem præscripserit, qualiscunque tunc fuerit Ægri status, qualiscunque illius, vel Adstantium efflagitatio, & qualiscunque propria protestatio ante remedii oblationem, non ob id Christianum Medicum decet abstinere prorsus ab usu talis remedii, ubi aliqua congruens ratio id exigat, vel tenuissima quævis non plane irrationabilis spes salutis in longinquo etiam affulgere, aut transpici posse videatur, ut si Ægrotus sit juvenis, & cæteroqui validus. Mihi etenim non semel contigit, licet non semper contigerit, Hominem non modo a lethali paroxysmo futuro parum distantem; sed etiam in eo, quem patiebatur expiraturum creditum; quin & prope expirantem ope Corticis Peruviani copiose, & celeriter ministrati servare, ut ex Historiis posthac afferendis patebit: etsi etiam post restitutam sanitatem, & calumnias Detractorum, & querelas Convalescentium, & beneficii minime cogniti contemptum, & mala cuncta, quæ supra recensui, sim pluries expertus. Quid, si Cortice inutiliter ministrato Ægrotantes ejusmodi occubuissent? Idcirco desperatis omnino nunquam offerendus est, ne sine spe juvaminis infametur. Atque eo magis ab illo abstinendum, vel eo saltem cautissime utendum, si cum circumstantia status Ægri plane deplorati concurrat altera circumstantia temporis, de invadente jam, vel instante quamproxime paroxysmo: quo casu duabus, vel tribus horis ab assumpto Cortice, debet probabiliter Æger proxima jam Fata sua subire. Satiùs ergo semper est, si fieri possit, remissionem Febris, ut supra diximus, expectare, ne orta ex Morbo calamitas in Remedium refundatur: uti non modo propter horam oblationis intempestivam, paullo videlicet ante paroxysmum, sed forsan [crediderim ego] ob hanc



hanc ipsam Morbi dispositionem, in Perniciosis præsertim facilem, aliquando in Anglia quid simile contigisse refert *Sydenham*, subortæ inde cunctationis nebulas dissipans, usumque Corticis, quodammodo tunc fatiscentem, nervose restituens.

Quod dictum est de Cortice non exhibendo deploratis omnino, & citissime morituris, intelligendum est etiam de casibus [rarioribus quidem] in quibus Perniciosa Febris conjunctam habeat insignem aliquam læsionem organicam Viscerum, supra quam nullam habet conditionem Cortex; quare si a talipotius vitio, quam a consueto Fermento producat Febris, hæc tolli nequibit a Cortice, qui nil potest adversus hujusmodi Causam. Si vero eadem Febris periodi rationem habeat a Fermento ordinario, læsio vero organica Visceris alicujus, puta Gangræna, Ulcus, Abscessus &c. sit vel quid adjunctum per simultaneam coincidentiam, vel symptoma productum ab ipsa Febre, tanquam effectus a sua causa, in tali quoque casu, etiamsi per Chinam Chinam removeatur periodus, non tamen removebitur Gangræna, Ulcus, Abscessus &c., sicut neque Febris illa Continua, quæ hujusmodi affectiones comitari solet, aut subsequi, & quæ vel citam mortem, vel diuturnitatem morbi, ut plurimum inexpugnabilem, consuevit inferre. Hæc quidem coincidentia in Perniciosis nostris non est admodum frequens; ubi tamen ea contigerit, frustra est præscribere Corticem: quemadmodum in ipsis diuturnis Intermittentibus, quas Ulcus aliquod internum, externumve profundum foveat, plurimi experti sunt, & fassi ingenui Scriptores; utque ego ipse possum testari, maxime si labes aliqua insignis Thoracem præ cæteris occupaverit; sed de his fusius alibi.

Addamus pro coronide aliam nec levem, nec infrequentem, fere dixerim, calumniam, quam subire solet hæc Methodus: eam videlicet, quam aliæ Methodi curandarum Februm, seu potius

non curandarum, ut suam collabescen-  
tem sustineant existimationem, necessitate quadam tutelæ *culpabilis*, huic affigunt. Primo itaque loco nonnulli Chinæ Chinæ infensissimi, soloque illius nomine exhorrescentes, qui scilicet eam nullo examine prævio ab usu jam medico proscribere, mirum est dictu, quot nugas, quot ineptias, quot blaterationes, quot jurgia in illam effutiant. Illorum interim Methodus in curandis Febribus, nostra rejecta, & exhibilata, ea ipsa est, quam lepide describendo deludit Celeberrimus *Lucas Tozzi* peculiari Capite — *De Methodo, qua reguntur nostris temporibus, qui se Galenicos jactant*, ad quod curiosum Lectorem relego. Alii sunt, qui China China vix audent uti in Febribus Intermittentibus Benignioribus, atque diuturnis, postquam videlicet omnes Pharmacopæorum alveolos incassum exinanierunt. Apud istos Methodus nostra male audit; temeraria quippe, Empirica, & phantastica, semel per accidens utilis, pluries vero noxia, reclamantibus licet experientia, & ratione, reputatur. Præter hos nolim facile credere alios quoque reperiri posse, qui Methodo hac quomodo-libet excerpta, vel intellecta, neque inutili in praxi reperta, quasi tamen eos pigeat, ipsam, aliamve parum ab similem palam profiteri, pudeatve alienum quodammodo morem sequi, ea clanculum, ut ita dicam, utantur, etsi cæspitanter, atque casu tantum nonnunquam utiliter. Isti, siqui sint, illam identidem, ut opinor, subfrigide, ac quibusdam tantummodo additis limitationibus laudabunt, sive laudabunt quantum sat est, ut ea possint uti sine exprobratione, si deprehendantur in facto, sed simul quantum sat est, ut possint opponere, & cavillationes adducere, eamve nonnihil [parum licet experti] reformare, vel castigare tunc, cum eadem sibi proponitur, vel mustitare saltem, cum ab aliis exercetur. Quod tamen ex his omnibus nemo ex prava intentione peccet, sicuti me certum reddit ipsorum integritas, ita æquum est,



ut Lectores reddat æque certos integritas mea, me quoque in decursu totius Operis semper respicere, atque corripere opinionem tantummodo Adversantium, non mores: etsi præter intentionem alicubi forsan, ut & hic, mihi exciderint verba, quæ aliud sonare videantur. Cum itaque ex Opponentibus istis nemo, ut aiebam, peccet ex prava intentione, sed *primi* ex præoccupatione quadam vetusta, *secundi* ex terrore Panico, & stiptica quandam circumspectione, *postremi* vero ex mutila experientia, sophisticis ut plurimum ratiociniis coinquinata: ideo pandere huiusmodi Methodum aperte decrevi, ut sublata dubitandi, murmurandive occasione, omnibus indiscriminatum prosum pro viribus, nominique deinceps meo hac spontanea qualicunque oblatione & consulam, & caveam.

## C A P U T V.

*Evitare Censuram Vulgi difficile, si aliquando Ager hac Methodo curatus occumbat. Recensentur ideo fideliter Casus omnes lethales, in quibus culpatus est insons Cortex, etsi non oblatus, ut & ii, in quibus vere oblatus non profuit, iique insimul, in quibus nec profuit, nec poterat prodesse.*

**C**AVEAT tamen sibi quantum velit, & quantum lubeat prudens Medicus, nunquam Censoriam Adversantium virgam declinabit: & quoadusque vivet Ignavorum blateratio, eousque culpabitur Cortex, & qui Corticem præscripsit, si quando unus tantum intercentum, suapte natura patenter jam moriturus, moriatur assumpto Cortice. Sed, bone Deus! aliud est mori sumpto Cortice, aliud est mori propter assumptum Corticem; nihilominus apud homines huiusmodi idem est mori aliquando post eum assumptum, ac propter eum assumptum; cum tamen non propter assumptum Pharmacum, nec propter assumptum Cardiacum, Bezoarticum, aut alia sexcenta dicantur unquam mori tot,

qui istis assumptis quotidie moriuntur. Anne soli Cortici injuncta est necessitas vel sanandi etiam deploratos, vel necandi quos sanare non valuerit? An quisquam illum venditavit pro Pharmaco immortalitatis, ut præstet primum? An aliquam habet, ut habent tot alia, quæ passim præscribuntur, noxiam, aut deleteriam qualitatem, ut præstet secundum? Cum vero tam præstans non sit, ut omnes sanet, præsertim in agone constitutos (licet forte sanet ex iis etiam nonnullos) num propterea ut Venenum audiet? Hic sane adamussim quadraret, quod ratione longe minore protulit olim *Botallus*, & ex Botallo nostris temporibus *Sydenham*, quorum uterque cum liberaliorem sanguinis missionem in Febribus Pestilentialibus usurparet, seque culpari rescirer, si quando aliquis tali adhibita Methodo occumberet, *Verum* [inquit] *Nebulones nequissimi, & ignavissimi in id semper culpam convertere satagunt, non quod nocuit, sed quod per nefas a cunctis vituperari exoptant. Aut si id nequitia non faciant, ignorantia tamen efficiunt: utraque certe perniciofa, sed illa magis.*

Non equidem ego in hanc querelam effundor, eo quia mihi, quod memor sum, unquam contigerit casus aliquis, qui alicui etiam in dicacitatem prono potuerit ansam præbere similia effutendi; sed potius conqueror, quod hæc aliquando ab ignaro vulgo, vel delirio hominibus promulgata sint in Casibus quandoque Illustrium Personarum, quæ obierunt, quibus vere Cortex non fuit oblatus, quibusque utinam oblatus fuisset. Cæterum denuo possum testari coram Deo, & Hominibus, ut alias pariter testatus sum, me nunquam ulli Corticem exhibuisse, cui ille obfuerit, vel potuerit mihi serio meditati suspicionem ullam incutere de damno illato: excipiendo semper hic, & ubique suspensiones in historiis secundæ huic Editioni additis adumbratas, usumque minus tempestivum pharmaci cæteroqui innocui respicientes. Ne vero alicui intra Urbem nostram conscio de casibus quibusdam



busdam lethalibus, in quibus aliquando fama mendaci culpatus est Cortex, minus candida videatur assertio mea, placeat hic Casus ipsos obiter recensere, & ab iniqua calumnia insontem Corticem vindicare.

Sed prius circa hoc generaliter velim notari, quod, quando Ager, qui in extrema angustia Corticem potavit, vita fungitur ante adventum futuri paroxysmi, scilicet correspondentis ei, quo pendente oblatus est Cortex, non potest tunc idem Cortex culpari non modo de damno, ut patet, sed neque de inefficacia: quandoquidem in tali casu perit Ager in ipso paroxysmo, quo oblatus est Cortex, diutius protracto. Effectus autem Corticis est, inhibere correspondentem, ut diximus; adeoque quotiescunque vivente Aegro usque ad tale tempus correspondens paroxysmus inhibeatur, Cortex jam suum munus absolvit, sive deinde Ager successive sanetur, ut vere assolet, sive etiam inhibito licet paroxysmo, adhuc occumbat ob aliquam v. gr. labem adjunctam, quæ Febriculam Continuum foveat, sublata etiam periodo, lethalem, ut in nonnullis Casibus contigit, immediate infra subdendis.

Primo igitur loco fama tulit apud nonnullos, Clarissimum olim Virum *D. Nicolaum de Sanctis*, A secretis, & Status Consiliarium Serenissimi Ducis Nostris, in postrema ægitudine sua [qua Fato cessit] assumpto juxta hanc Methodum Cortice obiisse; sed falsum est. Sumpsit quidem alia remedia vulgaria, & obiit; Corticem autem vere non sumpsit: nec obiisset fortasse, si vere sumpsisset. Torquet adhuc animum meum memoria de Cortice non oblato tunc, cum tempus aderat, de non tentato saltem etiam tunc, cum præterit. Quatuor eramus curantes Medici, *D. Candrinus*, *D. Ferrarius*, *D. Davinius*, & ego, qui propter levem quandam invaletudinem, qua paullo ante correptus fueram, postremus accessi, nec primis, ut alias consueveram, morbi diebus interfui curationi. In alia difficillima

ægitudine ejusdem Patientis non sine fructu tale remedium, vix vix indicatum, cum aliis tamen quamplurimis longo temporis tractu præscripsimus, & ab eo morbo contra ipsam expectationem nostram evasit. An Cortex simul cum aliis remediis, an sola Naturæ actio opus illud absolverit, ignoro. Eadem fiducia propositus fuit unanimiter Cortex per modum alterantis in novissima ægitudine, tempore congruo, cum videlicet Febris Tertiana duplex, sat valida, & per subingressum paroxysmorum Continua, suas adhuc servabat periodos; sed & unanimiter (postquam paratus fuit in pyxide, & secundum tenuem portiunculam ab eodem libatus) ab ulteriori illius oblatione supersedimus victoriam a sola Natura sudationum quasdam tentante per viam vel crisis, vel lentioris coctionis, concordi voto sperantes. Sed quid? Non multo post intenditur morbus; tandemque irritis Cardiacis, & Bezoarticis ruit in præceps. De tentando Cortice remanet anceps judicium. Creditur inutilis futurus, timetur calumnia, nec offertur; eoque intentato occumbit Ager, superstiti intra pyxidem Cortice: Medici vero subeunt calumniam de eodem perperam oblato, dum eos pœnitet non tentasse ob calumniæ metum.

Secundo loco Nobilissima Matrona *Domna Gertrudis de Sanvitalibus*, Emin. Cardinalis Soror, *Marchionissa Rangona*, anno 1707. post paucos paroxysmos duplicis Tertianæ in soporem incidit tam gravem, tamque profundum tempore accessionis cujusdam, ut de illius Vita maxime opere a curantibus Medicis dubitaretur. Duo erant hi; unus quidem Junior [talem quippe respectu alterius licebit illum appellare] alter vero Senior, nempe *Cl. Ramazzinus*, qui durante Patavinorum Studiorum interstitio Mutinæ agens, amplissimæ huic Matronæ operam suam, ut quondam consueverat, in hac quoque ægitudine præstitit. Applicita sunt statim, gravi hoc ingruente symptomate, ex eorundem curantium Medicorum præscripto Vessi-



cantia, aliaque peculiaria remedia; jam enim universalia præcesserant. Tandem advocor & ego tempore, quo sopor nonnihil incipiebat una cum accessione remitti: ipsa namque Patiens paullo post me noscens est alloquuta. Statim Corticem valide administrandum propono ad impediendum paroxysmum correspondentem. Annuit meis motus rationibus, meisque, si fas sit dicere, sibi fat notis experimentis *D. Ramazzinus* in curatione præcipuus (quidquid olim minus favorabiliter in suis *Constitutionibus Epidemicis Mutinensibus* scripserit ille de Cortice in hisce præsertim circumstantiis, aliud scilicet sentiens ante annum 1595. & aliud post) cunctante tamen, nec nisi præ auctoritate ipsius *D. Ramazzini*, pluribus nominibus sibi æstimabili, consentiente altero Medico; quamobrem parata est illico *semuncia* Chinæ Chinæ evestigio potanda, saltem pro medietate; sed inculcante rursus eodem Juniore Medico adesse tempus commodum pro expectanda majori remissione, prima oblatio, quæ a me illico proponebatur, serius [me quoque officiose consentiente] protrahita est. Sumpsit itaque Nobilissima Ægrotans tantummodo *drach. j. ss.* circiter pulveris uno haustu circa noctem. Mane diluculo alia similis saltem dosis debebat exhiberi, & repeti post aliquod breve temporis intervallum, prout fert Methodus mea; sed quia constanter asseverabat antedictus Junior, qui permanentius adstabat, accessionem illius diei consuevisse esse parvi ponderis, quod tamen non facile admittebant domestici, nec proinde opus esse tam festina Corticis oblatione, nescio, an Ipsius, an Assidentium deliberatione loco Chinæ Chinæ cibus fuit exhibitus. Cumque paullo post ipse supervenissim, sub fiducia rerum mihi narratarum [maxime cum statim a cibo remedium opportune amplius exhiberi non posset] circa meridiem tantum illud propinari posse censui. Ast inopinato ante tale tempus nova Accessio, quæ debuerat esse minor ex relatu, violenter Ægram cor-

ripuit cum tanta mentis hebetudine, ut Chinam Chinam oblatam non valuerit assumere, actum degluritionis edere nescia; illam enim, postquam ore diutius agitaverat, deglutire credens, expuebat: nec inde potuit ullo modo eam per œsophagum demittere, sed facta omnino lethargica, mane sequenti obiit, annum implens ætatis suæ LIII. Forte tamen, ne dicam certo, non obiisset, si primo haustu *quatuor*, vel *sex drachmas* pulveris, ut facile poterat, assumpsisset.

*Tertio D. Candrinus* Medicus, qui post receptam Methodum meam (recepit autem statim ac vidit) plures ea mediante perfecerat curationes eximias, in ultima ægitudine sua, cui medebatur, me per accidens absente, *D. Davinius*, paulloque post simultaneo officio medebar pariter superveniens & ipse, sæpius mihi inculcabat, ut memor essem de propinando Cortice more meo, quotiescunque se offerret occasio; noscebat enim, Febrem Continuum cum exacerbationibus obscuris, & irregularibus, qualis erat ea, qua detinebatur, Corticem nondum plane admittere. Levis aliqua remissio circa decimam quartam diem, & sudores inde erumpentes cum facili tolerantia bonum omen tractu temporis videbantur spondere: adeoque, etiamsi aliquis forte tunc locus esse posset usui Corticis, non tamen opportunus admodum, necessariusque videbatur. Interim transacta die xxi. labuntur vires. Circa xxiv. morbus in pejus ruit, *D. Davinio* plura incassum meditante, & agente, mihi que post duorum dierum absentiam in Urbem recenter redeunti, proponente, antequam Ægrum inviserem, an novam venæ sectionem, an potius Corticis usum seligerem in hoc casu, in quo nonnisi censuram prævidebat ex utroque remedio, quodcunque eorum inutiliter administraretur. Recta ideo conferimur ad invisendum Ægrum, ut alterutrum seligamus: sed cum jam properantem ad interitum cum gravi anhelitu, & pulsu deficiente reperimus. Et quoniam nul-

lus



lus phlebotomiæ, vel ulli remedio, virum robur exigenti, locus erat, Corticem potius tentari posse credidimus, licet probabiliter sine fructu, ut pleno palam ore protestari sumus. Assumptis ergo prius Ecclesiæ Sacramentis, meliore quo potuit modo, levem Corticis portionem potavit; sed crescente jugiter gravi anhelitu, & pulsu ruente, impotens factus est ullam amplius portionem assumere: immo, etiamsi potuisset, abstinendum præcepimus ab ulteriore oblatione in statu jam evidenter lethali, quo in sequens tantum mane protracto, intra diem xxvii. expiravit, & intra annum ævi sui IL.

*Quarto* tandem Vir Patricius D. Joseph Gallianus de Coccapanis annum agens 64., quem quondam laborantem Tertiana Perniciosa Cholerica sanaverat Cortex, ut suo loco dicemus, Æstate anni 1708. post superatam in principio Veris gravem ægritudinem Tertiana simplici corripitur, cujus prior Accessus accidentalis creditur ab Ægrotante, atque a cruda repletionem pendens ob vomitum adjunctum materiæ inconcoctæ. Accitus ego secunda morbi die, infebriticantem omnino deprehendi, & in omnibus vegetum, Tertianam nihilominus Febrem sequenti die se prodituram, eidem prænuncians. Tertia die mane illudit ille mihi de inani prognostico: adeo sibi fidebat, nil incommodi percipiens. Redit tamen post meridiem Accessio comitata dolore stomachi satis sensibili, & vomitu laborioso, quæ duo symptomata illi semper fuere in Febribus omnibus familiaria. Duravit per quatuor horas vexatio; quæ me vesperi accedente, blandaque remedia præscribente evanescebat. Mane sequenti potat Oleum Amygdalarum dulcium, quo materia biliosa placide per alvum educitur. Optime tolerat, totaque die immunis a Febre Amicos admittit, & cum iisdem amœne confabulatur. Altera die, quæ erat morbi quinta, assumit bolum confectum ex crystallo mont. præp., Conf. de hyacintho, ac tantillo Theriaces re-

*Torti Therap. Spec.*

centis; & tranquille se habet per totum mane. Accedo hora suspecta, quæ erat tertia pomeridiana, & invenio illum recenter expergefatum a somno cum vi, & impetu, ratione insomnii cujusdam, in quo sibi visus est expellere Diabolum sub aspectu mulieris ad se accedentem. Narrat somnium istud, aliudque insuper plane festivum; de utroque ridet, & interim præterlabitur hora tertiæ Accessionis. Moror adhuc ibi per aliquod tempus; dumque discessum meditor, inquit ille: *modo non admodum bene me habeo*. Hoc dicto, statim turbatur pulsus, insurgitque angor stomachi, & proclivitas in vomitum. Præscribo jusculum tenue, identidem potandum ad demulcendam humoris acrimoniam, misturam anodynæ ex absorbentibus, incrassantibus, & Cardiacis, cochleatim sumendam, fons externos, aliaque hujusmodi, & ab eo quo me trahit statuta hora Consultatio quædam gravis. Post horas quinque circiter redeo [versabamur autem circa secundam noctis horam] & ab Assidentibus, priusquam Ægrum invisam, intelligo, immanem fuisse irritis auxiliis omnibus illius Accessionis Cardialgiam, adeo ut Æger vix loqui valeret interciso sermone, & irrequietus huc illuc assidue jactaretur. Intra memetipsum statim cogitavi de Cortice propinando, metuens exitium in quarto Accessu; sed Ægrum subinde inspiciens, inveniensque in eo statu, ut potius metuendum esset de morte in illa eadem Accessione, quam in altera, mutato consilio abstinui, alia tantum cardiaca remedia substituens: factoque interim funesto prognostico, & præscriptis Ecclesiæ Sacramentis, discessi subdens, quod si forte Accessio illa perveniret ad declinationem, itaut spes esset, vitam posse protrahi in alterum Accessum, mane Corticem exhiberem. Mane igitur quandam sensuum promptitudinem, quam etiam maximam habuit in assumendis Sacramentis, observans, etsi Febris adhuc vigeret, & protraheretur potius intensa, quam ad remissionem vergeret,



cæteraque omnia mortem proximam minarentur, unum haustum Corticis satis moderatum [hærebam enim non parum] exhibui post tres dein horas alterum oblaturus. Sed accedens rursus, ut hunc exhiberem, novi Ægrum semper in deterius labi, nec illam Accessionem, quippe nondum declinantem, prætergressurum esse; ideoque ab ulteriori Corticis oblatione supersedi, illum pro deplorato omnino reputans, ut nimium circa secundam noctis horam confirmavit eventus. Atque ita periit Amicus, qui forte non periisset, vel saltem non periisset tunc, si illi post secundum statim paroxysmum integram Corticis dosim propinasset. Sed quis quantumvis oculatus tam præceps exitium in tanta tranquillitate prænovisset?

Hæc sunt, de quibus Medicos moneo in curatione Perniciosarum, indigus præ aliis, ut admonear ipse, esto quod mea nonnunquam prælagia fortunet eventus: quo demum capti popellus, atque plebecula,

— *Me quoque dicunt*

*Vatem . . . . sed non ego credulus illis* ab inopinato identidem successu doctus oppositum. Mihi tamen in casu tam repentino, & minime præmonstrato (præmonstraverat tamen aliquid Accessio secunda, licet tam præceps non indicavit exitium) mihi, inquam, in hoc casu nulla per Urbem objecta est omissio, quæ vere a nemine mihi poterat objicere nisi a me ipso, ut qui forsitan in persona minus splendida statim Corticem obtulisset; forte tamen etiam non. Sed si obtulisset in hac post secundum tantum paroxysmum, qui fuit primus, quem inspexerim, pluresque postea, ut suspicari fas est, contigissent recidivæ, vel si in earum aliqua obiisset Æger, quid quæso dictum foret de Cortice, quid dictum, immo quid non dictum de me? Evitavi tamen Censuram, quia obiit vulgari curatus methodo; non evitasset, si curasset feliciter Cortice. Utinam ita egissem tunc, ut modo Censuram paterer. Videant ergo, quam crasse hallucinentur ii, qui censent (si

qui sunt, qui censent) in enarratis Casibus propinatum fuisse toto conatu Corticem, cum vere propinatus non fuerit, vel saltem pro non propinato habendus sit: cujus rei veritatem, ac seriem Assidentes, & Consanguinei Defunctorum possunt testari. Quia vero ingenuitati meæ, vel publicæ fidei nunquam deero, fateor (quod latet Obtrectatores Corticis) in nonnullis Casibus præter recensitos fuisse a me exhibitum Corticem, & nihilominus Ægrotantes illos æque obiisse, ac obiissent eo non assumpto: adeoque minime inficior, illum aliquando, raro licet, inutilem esse, ut sæpius sunt quævis remedia; sed absolute nego esse noxium, præsertim si methodice adhibeatur.

I. Ita contigit, ne quicquam reticeam, alteri Viro Patrio *D. Antonio de Quattrinis*, cui medebar ego adjuncto mihi in societate *D. Davinio*. Illi itaque pendente cursu simplicis Tertianæ addita est dysenteria ferox, & essentialis, quæ tunc fere epidemice vagabatur per Urbem. Utroque Æger vexatus morbo, brevi frigidus factus est, singultuosus, & fere sine pulsu. *D. Davinius* tunc me sciscitatur, cur Corticem non proponam, ut mihi mos est, in tali angustia. Respondeo, dysenteriam esse essentialem, nec sequi motum Febris, adeoque illam Cortici Febres cum suis tantum symptomatis tollenti non simul cessuram. Desperatis tamen rebus tentandum censuimus. Itaque oblato valide remedio, nulla amplius observatur febrilis recrudescencia horis periodicis, sed perseverante pertinaciter dysenteria cum indiciis sphacelatæ partis, intra paucos dies Æger vita fungitur. Forte in hoc casu majorem, quam China China, contulisset opem Ipecacuanha tempestive oblata, si præsto fuisset, etsi nec æque certum, nec forsitan semper æque tutum, innocensve remedium sit Ipecacuanha in linea Antidysentericorum, ac China China in linea Alexipyretorum.

II. *P. Felix de Tagliazucchi* ex ordine Fratrum Minorum Sancti Francisci de



sci de Paula, quem curabat *D. Riccius*, in quodam Tertianæ, non sum memor an simplicis, an duplicis paroxysmo, sudoribus diaphoreticis frigidissimis abunde diffuens cum totali asphyxia, sensibus licet vegetus, jam moriebatur. Absente ab Urbe curante Medico advocor ipse, ut qui tunc felicissimam Curationem in illa vicinia absolveram in casu valde consimili. Anceps ego, an suffecturus sit Æger usque ad declinationem accessionis, quippe inscius de morbi cursu, & de rebus gestis, ut nihilominus Amicorum adstantium petitionibus morem geram, præmisso prius prognostico de infausto exitu, adducor, ut Corticem ad *unc. ss.*, ni fallor, statim præscribam, sed incassum; nam perseverantibus iisdem sudoribus intra illam eandem Accessionem post paucas horas e viventium numero deletus est.

III. *D. Francisco de Favalottis*, quem *D. Davinius* curabat, detento duplici Tertiana ob gravissimum Comatosum affectum perniciose, Corticem more meo propinandum esse, consultus credidi; erat enim meo iudicio morbus eo remedio sanabilis, & opportunum tempus oblationis illius. Sed, nescio quo Fato, quave infausta Pharmacopolæ, aut Assidentium diligentia, illi percolata tantum infusio, seu potius decoctio *uncia unius* Chinæ Chinæ exhibetur per statuta intervalla loco ejusdem Chinæ Chinæ in substantia, liquori, ut proposueram, conjungendæ. In hoc æquivoco moramur per duos ferme dies: dumque aliam pyxidem similem paratam video, eidem semper innixus credulitati indico, satius esse pro tunc supersedere sufficientem jam assumpti remedii reputans quantitatem pro impedienda Accessione proxime futura. Redit tamen illa eodem forti, lethargicoque comitata symptomate. Miror novitatem rei, & melius inspecta pyxide errorem deprehendo. Cogitavi statim de præscribendo validius remedio (non enim tunc cum Collega curante illuc conveneram) sed renui facere solus, & tantummodo superaccitus, nec mihi metipsum amplius

satis fidens in eo rerum statu. Interim Æger fit summe lethargicus, & deglutiendi nescius. Die sequenti habitus est pro expirante; aliquot nihilominus tenues cyathos illius percolatæ decoctionis cochleatim hausit, vitamque præter multorum expectationem ad tres, vel quatuor dies frigidus, & sine pulsu, simulque sine exacerbatione protraxit, donec pari passu deficiens tandem expiravit, quo forsitan remedio nervosius oblato sanari potuisset.

IV. *D. Ludovicus Caesar de Carandinis* valetudinarius perpetuo, & in Tabem pronus, diuturna Quartana Ruri detentus, quæ tractu temporis pertinacem diarrhœam, mox & vomitum cum summa virium dejectione, & corporis extenuatione secum traxit, Urbem transfertur, & *D. Riccio* Medico suo ordinario curandus committitur. Invenit is, ut retulit, Quartanam non amplius Intermittentem, suos tamen circuitus etiamnum manifeste servantem, & comitatum prædictis symptomatis, maxime vero vomitu fere assiduo. Cumque Accessio quælibet Ægrum fatigaret tali proportionem, ut paucis in posterum suffecturus videretur, cogitavit ille de præscribenda China China ad *drach. ij.* more vulgari. Quia tamen continuas introducta, quæ si essentialis fiat, de more lethalis esse consuevit [ut norunt Practici], rationalem aliquam illi suspicionem incuriebat de infructuosa oblatione, me ideo in consilium vocavit. Annuï ego, atque animum adjeci, eo quia adhuc manifesta mihi narrabantur signa periodi, inter quæ frigus in accessione invadens, naturamque Febris Intermittentis etiamnum designans in ipsa accidentali, ut ita dicam, & recenti continuitate. Quoniam vero non longe distabat paroxysmus, hunc prius observari debere censui, antequam plane statueretur oblatio Corticis. Advenit Febris, quæ Ægrum fere sustulit, remansitque ille cum pulsu vix perceptibili etiam in majore Febris, & symptomatum remissione. Tunc statim ad *drach. ij.* præscriptus est Cortex, & sequentibus duobus diebus



ad *drach.* j. mane, & sero; sicque Accessio die correspondente non rediit. Continuata est ad aliquot alios dies eadem China China, non quidem amplius in substantia, quia eam nauseabat Aeger, quomodolibet offerretur, sed in Extracto ad *scrup.* j. bis in die. Jamque nullum omnino periodi indicium amplius viscebatur; sed nihilominus nec resurgebat pulsus, nec tollebatur lenta febricula, nec removebantur, licet paululum remitterentur, symptomata. Interim Aeger languidior fiebat; tandemque diarrhoea sensim colliquante, vomituque vix cibum admittente, statimque rejiciente confectus expirabat. In hoc casu, quin vitium aliquod grave latuerit in partibus solidis, nempe in Visceribus, minime dubito; præstitit tamen Cortex quod potuit, & vitam, ut reor, ad aliquot dies protraxit.

V. Alium Casum addam de Pictore quodam, nomine *Dominico de Villanis* a *D. Candrino* curato, qui cum Quartana longissima Hydropem simul confirmatum patiebatur. Venter illi immaniter turgebat; sonabat percussus, & repercutiebatur Aqua. Facies similiter turgebat, & intra palpebras inflatas, ac diaphanas adeo condebantur, ut vix apparerent oculi. Pedes æque insigniter intumescebant; brachia vero, tibiæ, & crura summe gracilia, extenuataque apparebant. Sed mirum! Ipse marasmus erat tumor: casu namque compressæ digito partes istæ foveam profundam nil tale cogitanti exhibuerunt; quare subducto calculo non nisi ossa, & pellis arida, sero subcutaneo flaccide turgida, tactui se se offerebant. Erat insuper totus ad sensum frigidus, identidem singultuosus cum pulsu summopere exili, & egre cibum capiebat. Solum mente constabat, languide loquebatur, & noscebat se paulatim mori. Ad hæc paroxysmum Quartanæ suæ periodice patiebatur, quo durante semper profunde somnolentus jacebat, ut mortuus videretur, donec declinante paroxysmo aliquantulum, semper tamen imperfectius revivisceret. In consilium vocatus, immo expresse ac-

citus, ut tantum inspicerem, non ut curarem, renuebam ipse quidquam proponere Homini chronicis jam morbis insanabilibus ferme confecto, ætatemque insuper sexagenariam agente; sed ab Amicis illius, atque domesticis postmodum rogatus, ut quidquid etiam inutiliter tentari posset, vellem tentare, & curanti Medico prompte cuncta exequuturo indicare, ausus sum Corticem proponere. Uno verbo, Cortex oblatus est, & repetitus pluries suis temporibus, statimque sublata est periodus, & comatosa affectio conjuncta. In eum deinde statum devenit, ut per mensem jusculum Viperinum, aliaque remedia reliquas affectiones respicientia potuerit assumere, Corticis quoque usum imminuta, & continuata dosi per intervalla repetens. Usque tamen durabat Hydrops cum extremitatibus maxime excarnibus, & nihilominus maxime tumidis. Revixit singultus summumque simul cibi fastidium, sensimque Aeger post tres circiter, ni fallor, menses ab oblato Cortice (quos omnes dubio procul ope Corticis vixit) decessit e vivis. Atque hanc historiam, quam jure merito inter triumphos Corticis numerare possem, quia mortem Aegrotantis inevitabilem, & imminentem longe serius, quam par erat, protraxit, inter eventus nihilominus infavosos lubet collocare.

VI. Obiit quoque *D. Flaminia de Ingonis* Matrona spectabilis, de cujus ægritudine vix, quantum sat est, sum memor; memini tamen quæ præcipua sunt. Ab initio Tertiana simplici laboravit ex gravi animi pathemate, & facile remediis ordinariis liberata est. Recidit illa, atque iterum similiter sanata. Recruduit denuo morbus, Febrisque non Intermittebat, ut antea, sed Continua apparuit cum periodicis obscurissimis exacerbationibus. Ingravescente morbo *D. Davinius* fit mihi curationis socius. Administrantur quæ sunt ex arte, sed irritum semper successu. Tandem erumpunt duæ Parotides, unaque earum satis insignis. Evanescit tamen utraque citra suppurationem, ac subinde paullo manifeste.



nifestiores videntur fieri Exacerbationes, & Remissiones Febris; verum in ipsis exacerbationibus gravis sopor se prodit cum summo virium languore, pulsuque minime consistente. Re in pejus ruente, ambo cupidi prohibendi exacerbationes Febriles, soporosi symptomatis mortem portendentis productrices, decernimus de tentando usu Corticis. Auctor sum ipse: consentit Collega. Prima vice assumit illa, sed difficulter, profundo quippe sopore oppressa: qua de causa potis non est remedium repetere, sicque incepto inauspicato opere, dein imperfecto remanente, Aegra paullo post lethargica prorsus e vivis sublata est.

VII. VIII. Decessere denique mihi, absque eo quod historias per extensum referam, nil proficiente usu Corticis etiam tempestive administrati, duo Religiosi Viri ex Carmelitarum Excalceatorum familia, quorum unus septuagenarius, debilis, & valetudinarius erat, obiitque correptus Tertiana duplici, perniciose, & exitiali facta ob continuitatem, & acutiem irriti Cortice progredientem. Alter vero Juvenis erat, qui a Febre primum Acuta, & Continua Proportionata, mox & ab Intermitte, in quam recidit, fuerat sanatus, & quidem semper sine Cortice. Recidit ille tertio, febriculas iterum Intermitte longiusculas passus, & Cortice leviter per modum alterantis assumpto denuo sanatus est. Recidit quarta vice. Et quia Febres videntur ad acutiem vergere cum tendentia ad soporem, præmissis ex arte in tali casu præmittendis, offertur iterum Cortex validiuscule in formam Opiatæ; sed incassum. Omittitur idcirco illius usus nondum plane completus, aliaque remedia volatili, & dissolvente virtute prædita substituuntur; sed frustra: Juvenis namque cum pulsu raro, & quodammodo, ut videbatur, laudabili, profundum in soporem labitur, vix potis cibum capere; tandemque singultuosus, & anhelosus cum pulsu minuto, & celeri Deo suo piam animam reddit.

Sunt hi fideliter Casus omnes Aegro-

tantium tractu annorum ferme XL. defunctorum, quorum sum memor: eorum videlicet, quibus Cortex incassum a me propinatus fuerit in Febribus Perniciosis antea descriptis, quas ceteroqui idem Cortex eadem methodo, sed opportuniore tempore, & in circumstantiis magis propitiis administratus curare potuisset. Nonnullos equidem alios præter hos, paucosque casus, in quibus irriti pariter successu oblatum est remedium istud, referam *Lib. V.* Ast id contigit in Febribus tantum quibusdam essentialiter Continuis, vixque paululum, ac ne vix quidem remittentibus, pro quarum medela cum suapte natura anceps sit actio, & effectus Corticis, ipsa quæ subsequuta quandoque est, carentia successus, nobis eo loco suppeditabit fundamentum suspicandi de ipsius inefficacia in Febribus illiusmodi, in quibus ideo non nisi certa quadam adhibita distinctione ut vere proficius admittetur. Sed hæc hujusce loci non sunt.

Ut vero ad recensitos nuperrime casus, in quibus inaniter ministratus est Cortex, fugaci saltem intuitu convertamur, statim animadvertere est, eundem Corticem prioribus quatuor Aegrotis proprie non fuisse propinatum, vel saltem nostra non servata, aut non completa methodo. Iis etenim fere contigit, quod contigit [ne vel minimum quidquam suppressam] Patricio Viro, Serenissimæ Ducalis Camerae Generalis Procuratori, *D. Gaspari de Quattrofratris*, qui anno 1697. ex Tertiana Perniciosa Diaphoretica irritis omnibus curantis Medici conatibus jam plane confectus, Chinam potare coepit quatuor circiter ante obitum horis, unoque tantum, vel altero assumpto haustu spiritum edidit, remanente domi remedio, Pauperi cuiuspiam levius febricitanti dispensando. Idem etiam contigit, & quidem patenti, uni ex ejusdem Nepotibus, qui vix unica ante obitum hora, dum scilicet illi suffocans stertor jam in bronchiis inflammatorum Pulmonum obstreperet (occumbebat enim Peripneumonicus) tam enixe Chinam Chinam expetiit, eamque sibi



sibi denegari tam ægre tulit, ut ad solamen morientis liquorem aliquem amaricantem sub specie Chinæ Chinæ eidem offerre decretum fuerit. Cum vero casu præsto esset ibi ipsum remedium, paucula statim illius portio exhibita est, quam summis vix attigit labiis, cumque id abunde sufficere, præsens ipse subjunxerim, substitit ille: & sic expleta imaginatione sua post horam circiter expiravit.

Hujusmodi ergo, atque similibus Ægrotantibus nemo profecto jure dixerit, oblatum fuisse Corticem. Aliis autem pluribus ex iis, quos recensui, licet vere oblatus fuerit, id tamen actum fuit desperatis jam æque rebus, morte quamvis paullo plus distante, tentandi scilicet solum, vel indulgendi causa, paucisque tantum, ut ex relatu patet, fuit oblatus in circumstantiis, quæ valeant ostendere [quod a me non negatur perpetuo] invalidum nonnunquam, incertumve in difficillimis quibusdam casibus esse posse robur remedii, cæteroqui saluberrimi, & admirabilis, cui par non est, nec unquam fuit in linea Alexipyretorum. Ex opposito namque plus centum illustres historias Hominum ab imminente morte servatorum possem adducere, quarum non paucas sequenti potissimum Libro sum allaturus: relicta unicuique, qui sibi os strenue perfricuerit, libertate blaterandi, me donasse nomine non potentium servari, quotquot China China necavit; nomine vero sanatorum, quotquot ea nequivit occidere.

Quod si aliquibus Cortice perperam vel languidiuscule, dosique irregulari, aut priusquam, plusquamve deceat imminuta utentibus, vel præscribentibus ubi non conveniat, ut in Febribus essentialiter Continuis, & in extremo earum periculo, ille non videatur proficere, non id in medicaminis, vel Methodi meæ vitium vertant, sed in culpam Methodi suæ, si quam habent, aut habere credunt: si enim huic (quam protuli in eum finem, ut qui eam non satis callent, callere possint) fidem velint adhibere, eamque integre non renuant

amplecti, feliciores procul dubio posthac curationes absolvent.

Sed eheu! nimium fortassis Methodum hanc amplectentur nonnulli, & indiscriminatum in usum ducent, nimiumque forsitan intemperanter tractu temporis illam Medicis suggerent importuna mulierculæ, adeoque in abusum, & tandem in contemptum, culpa scilicet utentium promiscue, & sine delectu, cadet Remedium eximium, fietque tandem de Cortice, quod jam perperam factum est, ac quotidie fit de Cardiacis, & Bezoarticis. Neque enim legitime mortuus vulgo crederetur homo, cui non sit prope mortem oblatus Cortex, quæcunque sit Febris, aut quæcunque affectio, quæ illum jugulet, quemadmodum legitime mortuus vulgo non creditur, qui ventre pretiosis lapidibus, eorumve confectioibus turgido Lethem non tranat. Cumque hoc pacto Remedium alioqui saluberrimum sapissime inutiliter exhibitum fuerit, ac inde fundamentum aliquod acquisierit Obtreptatorum dicacitas, a communi etiam Saniorum æstimatione fortasse decideret, ac in legitimis quoque casibus, in quibus vere proficeret, rejiceretur. Verum quid angor sollicitus de futuro, cum satis prosterunde conquerar de præsentis? Sat sit huic occurrere;

—*maneant seros ea cura Nepotes.*

## C A P U T VI.

*Historia peculiaris, quæ primam occasionem inventioni Methodi tradita auspiciatissime præbuit.*

**P**RÆMISSIS Casibus omnibus, quos mihi memoria suggestit, infaustum eventum sortitis, licet semper sine crimine Corticis, & sæpius etiam sine assumptione illius, saltem ad leges Methodi expositæ, jam tempus est, ut plurimum inter quamplurimos faustorum, & si fas sit dicere, admirabilium seriem subnectam. Priusquam tamen illos certo ordine ad peculiariora redigam capita Libro sequenti, unum a cæteris lubeat



bet discernere, & seorsim exponere, quippe qui huic Methodo primam dedit originem, mox incrementum, & famam. Fuit autem huiusmodi.

Vir Generosus *D. Comes Bailardinus Nogarola*, tunc Præfectus Aulæ Serenissimi Ducis nostri, annum agens LIII., sanguineo temperamento, habituque corporis carnolo præditus, & podagricis insultibus, fluxuique sanguinis hæmorrhoidalis periodice obnoxius, sub finem mensis Augusti 1695., fluente adhuc, nec diminute quidem hæmorrhoidali stillicidio, corripitur Febre Quartana simplici Intermittente. Accitus ego, inveniensque *Malum bene compositum*, sanguinisque excretionem, modum Naturæ servantem, nil insigniter agendum, vel movendum duxi: quapropter, præscripta tantummodo victus ratione, juscule matutino paucis herbis alterato, nec non emulsione sem. melon. cum tantillo pul. Cornu Cervi in vigore accessionis potanda, clysteribusque blandis ad alvum lubricam servandam identidem injiciendis, suavor fui, ut Febrem, suapte natura, eaque præsertim tempestate diuturnam futuram, æquo ferret animo absque majore remediorum apparatu, dummodo intra consuetos limites illa subsisteret; me postea paratum offerens ad eam Peruviano Cortice fugandam, postquam cursum suum nonnihil exegisset, & postquam ego Equinoctii non longe distantis phænomena observassem, ne scilicet ea diutius in Autumnum protracta, auctaque insinul, quæ jam supervenerat, lienis obstructione, radices ageret non facile per totam Hyemem extirpandas.

Transactis sex Circuitibus, die 18. Septembris (erat autem dies septimam periodum immediate antecedens) Febris extra ordinem Aegrum invadit, repetiturque die 19. ut consueverat. Mane sequentis diei, nempe die mensis xx. cum protraherentur nonnihil reliquæ antecedentis accessionis, & sanguinis hæmorrhoidalis fluxus esset notabiliter imminutus, ac insuper Aegrotans assereret, se persentiscere remota quædam

indicia, vi quorum horis pomeridianis novam accessionem præstolabatur, statim præmissio clystere ex lacte, & saccharo, Venam brachii secari jussi, & sanguinem detrahi ad uncias decem. Post meridiem circa horam xx. rediit Accessio, ut sibi prænuñciaverat Aeger, atque eundem servavit motum diebus pariter xxi. & xxii. subsequentibus, ut de triplici Quartana nulla posset esse dubitatio. Quia tamen nativam ea servabat intermissionem, esto quod paroxysmi majorem extensionem cum aliqua postpositione acquirerent, ideo iisdem remediis inhæsi, addendo tantummodo paululum Salis Prunellæ juscule matutino, propter aliquam subortam urinarum imminutionem, ut nempe blandioribus istis remediis hostem demulcere datum esset, abstinendo a fortioribus illum exasperare aptis, donec saltem Equinoctialis anomalix præterlaberetur influxus.

Die mensis xxiiij., quæ sexta erat a triplicatione Quartanæ, *D. Davinio* urbana forte quædam officia Aegrotanti præstante, occasionem arripui illum mihi adjungendi socium in curatione. Habita Consultatione, statuitur methodus fere eadem ac antea, febrisque circa horam xxiij. suum renovat accessum sub oculis Medicorum consueto, minore tamen cum frigore invadens. In hoc Paroxysmo, scilicet in vigore ipsius [ut mane retulit Uxor vigilantissima] Aeger passus est levem aliquam oblocutionem, quod symptoma in nullo alio unquam morbo toto vitæ suæ tempore passus fuerat, ut & notabilem quendam capitis, & membrorum tremorem cum aliqua etiam rerum ab ipso paullo ante expectatarum oblivione. Symptoma istud magnum mihi timorem incussit; quare iterum convocato Collega, nova inita est Consultatio, novaque sunt præscripta remedia, aliaque proposita vicissim, & vicissim rejecta, ut in opinabilibus mos est.

His non obstantibus die xxiv. vespere circa horam 24. rediit accessio, in qua nullum quidem subdelirium observatum est,



est, sed loco illius altus sopor, a quo difficulter admodum excutebatur vocatus *Æger*, atque concussus. Obliviscebatur bibere, & mingere, postquam *Scyphum*, & *Matulam* postulasset; immo utrunque vas facile illi manibus excidebat, postquam prehendiſſet.

Die xxv. confessus est peccata sua, & post meridiem, longe etiam ante accessionem (erat enim dies *Quartanæ* primariæ juxta vetus morbi stadium) adaucti sunt notabiliter motus tremuli membrorum, ipsi *Ægrotanti* sensibiles, quin & illis socium se adjunxit singultus: quæ symptomata ansam dedere disquirendi, an *Vesicantia*, aut *Emplastrum Sinapismum* apponi possent partibus arthritidi obnoxiiis; factoque rei examine, statuta fuit *Sinapismi Emplastrum* appositio, & vespere in usum deducta. Ingruente postmodum circa tertiam noctis horam paroxysmo cum frigore semper minore (usque tamen sensibili) in profundum adeo soporem demersus est *Æger*, ut quibusvis plane functionibus edendis impar esset, perinde ac si fuisset *Cadaver*; nec nulla qualibet dolorifica Artis industria excuti potuit per multas horas. Non loquebatur, non movebatur, nec oculos aperiebat, sed tantummodo involuntarie mingeat, nil tale sentiens. In hoc statu permansit ad plures & plures horas, tandemque ligaturis, & frictionibus summe dolorificis, cucurbitulis tractis, & evulsis, *Vesicantibus* statim incunctanter apposis, spirituque salis ammoniaci naribus admoto, & sale volatili *Cornu Cervi* in os intruso, Deo dante, in eum statum sensim devenit (appropinquante scilicet jam *Febris* declinatione) ut prope *Auroram* *Venerabile Eucharistiæ Sacramentum* valuerit assumere.

Mane vero jam facto, die nempe mensis xxvi., cum conspicua nonnihil esset remissio *Febris*, atque symptomatum (omnia tamen, etsi paululum remissiora, usque perseverabant, sopor videlicet gravis, singultus, & *Febris* ipsa; quæ jam de *Intermittente* continua facta per paroxysmos se mutuo excipientes ad Con-

tinuam essentialiter celerrime properabat) cum, inquam, nonnihil conspicua esset ejusdem *Febris*, symptomatumque remissio, statuta est nova sanguinis missio sat liberalis, videlicet ad libram, partitis tamen vicibus: qua celebrata, & ab *Ægro* bene tolerata, supervenit jussu *Serenissimi Ducis* (cui summopere cordi erat *Viri* tam egregii vita) *Bononia* accitus *Clarissimus*, & in *Patrio Archilycæo* Professor quondam eximius *D. Jo: Galeatus Manzini*. Is intellecta facti serie, & approbata methodo in usum ducta, saltem insuper *Viperæ*, spiritumque fuliginis, & similia remedia proposuit ad precautionem præcipue, & sublationem soporosi symptomatis. Sed & hæc, ut & alia præmissa, incassum usurpata fuere: siquidem paullo post, videlicet longe prius, & longe magis ac consuevisset antea, cœpit gravari caput, obmutescere nempe *Ægrotante*, qui paullo ante haud difficulter loquebatur, & in profundum, assiduumque soporem jam jam labente, nullumque motum edente, excepta ea violenta universi corporis concussione, quam identidem suscitabat, absque eo quod illum a somno excuteret, importunus, frequensque singultus. Sic perseveravit usque ad horam 23. quo tempore cum nonnihil magis frigeri visus esset, de invasione novæ accessionis incidit suspicio, præscriptumque fuit spe fere nulla cochlear *Julapii* gemmati cum pauxillo lapidis *Bezoartici*, exhibendum tantummodo circa v. noctis horam, siquidem *Æger* quidquam deglutire valuisset. Revera tamen non 23. hora diei, ut creditum est, sed solum circa quartam noctis advenit accessio; id præmonstrante non tantum levi extremorum prefrigeratione, verum & aliqua pulsus concentratione, majoreque symptomatum omnium, & præcipue soporis, atque singultus intensione. Tunc sane talia fuere, tam gravia, tamque funesta cuncta accidentia, tantaque, & tam patentia proximæ mortis signa, ut *Parochus* *Sacramentum* extremæ unctionis illi ministrans anxie festinaverit pro complenda functione, metuens scilicet, ne ex-



ne expiraret Æger, priusquam ille sacrum opus absolveret. Remansit itaque Patiens usque ultra nonam noctis horam quasi in vero mortis agone, quo postmodum tempore perexigua quædam dare cepit motus, & sensus specimina, ac proinde in sequens mane vitam adhuc, ægre licet, protraxit.

Itaque mane diei xxvii. circa horam 14. a nobis inspectus, vix capax inventus est deglutiendi plurima quoque adhibita industria cochlear illud Julapii gemmati, quod assumpsisse debuerat nocte præcedente, si potis fuisset. Quapropter considerata proportione, qua celeriter, atque vehementer augebatur Febris, & cum Febre lethargus, motus convulsivi, & singultus: item clare inspiciendo hæc omnia jam ad novum incrementum non longe disponi (quod satis præmonstrabant singultus frequentior, subsultus membrorum crebriores, & nictatio assidua, involuntaria, ac pertinax cum intermixto narium stertore) unanimi omnium nostrum voto sancitum est, nil amplius superesse spei, futuramque accessionem, quacunque hora invaluisset, fore ultimam Vitæ, etsi juxta calculum Quartanæ simplicis accessio hæc non incideret in diem majoris afflictionis, sed in antecedentem, hoc est in correspondentem diei primæ metamorphoseos. Etenim absque ullo dierum calculo revera impossibile videbatur, posse Ægrotantem ab imminente accessione evadere, etiam ut mortem tantum differret in subsequentem; maxime cum adeo invalescerent quotidie paroxysmi, eorumque symptomata, ut nulla amplius observaretur in illis quartanaria proportio, nec amplius distinguere posset accessio gravior, nisi in quantum semper gravior erat novissima. Commissa ergo tantummodo Assidentibus cura Ægrum cochleatim per juscula refocillandi, si fuerit opportunitas, discedebamus concordēs in funesto prognostico, quin & in hora circa circum futuri interitus; quæ hora cum ad summum circa ad mediam noctem designaretur, immo cum eam *D. Man-*

*zins* propiorem adhuc metueret, institit ille deferri statim Serenissimo Duci ferale præsagium, sibi que Mutinæ [ ut agebat ] inutuli quamprimum parari quadrigam, qua vectus posset eadem die Bononiæ restitui. Fuit autem Ille de instante, certa que morte Ægrotantis adeo persuasus, ut, cum in medio itinere a quodam Equite sibi obvio interrogaretur de statu *D. Co. Nogarola*, absque ulla hæsitazione responderit (etsi conscius mei tentaminis, quod mox subdam) eum jam probabiliter mortuum esse, vel, siquidem adhuc viveret eo momento, tandiu non esse victurum, ut ille Mutinam petens vivum amplius posset invenire.

Interim dum Quadrigam præstolaremur, simulque ubi conveneramus moraremur paulisper, *D. Manzio* discessuro urbanitatis officia præstituri *D. Davinius*, & ego; ego, inquam [ quem præ familiaritate, mutuoque amore summe pigebat tantum Virum, & amicissimum perire ] plurima volutabam mente, plurima meditabar pro eo salvando, quem Febris a primordio Quartana jam jam jugulabat, & quem dosis duarum drachmarum Peruviani Corticis ante paucos dies oblata, ut tunc in usu erat, a tali excidio citra dubitationem præservasset. Præ cæteris autem meæ menti obversabatur casus *D. Octavii Maselli Lib. I. Cap. x. Hist. 18.* recensitus, dicebamque intra me. Quantumvis lethalis & esse videatur, & reapse sit status istius Ægrotantis, certe vel viveret, ut vixit *Masellus* [ etsi tunc minus graviter affectus, sed in hunc eundem statum tendens ] vel, inquam, viveret, vel saltem serius occumberet, si posset aut inhiberi omnino, aut notabiliter enervari imminens paroxysmus: quo enervato, tantillum temporis lucraremur pro magis semper enervandis, ac paullo post debellandis subsequentibus paroxysmis, ut & symptomatis probabiliter concomitantibus, quemadmodum videram in præcitato casu ante annos 17. circiter mihi forte observato.



Pro hoc autem opere perficiendo me secreto alloquens prosequabar; etiam in casu Febris, recentem quidem continuitatem adeptæ, quin & Acutæ Malignæ, atque Exitialis jam factæ, sed nativum adhuc periodi characterem servantis, pro hoc, inquam, opere absolvendo potis esset China China, quantum est ex intrinseca virtute illius, ut vidi in recensito casu, si *tempus* sufficiens adesset, requisitumque ad opus huiusmodi, & si in *Ægrotante* adesset *capacitas* ad deglutiendam tantam molem remedii. Quo ad *tempus*, non minus tunc requiri censebam, aut noveram in Quartanis sive simplicibus, sive duplicibus, sive triplicibus, quam totum intervallum, quod est inter unam & alteram accessionem Quartanaria proportionem sibi respondentem, idemque data proportionem credideram de Tertianis, sive simplices illæ fuerint, sive duplices, quod perinde putaram, nec male; sic namque me docuerat experientia, quoties *duas* tantum *drachmas* Corticis uno haustu in principio accessionis obtuleram, quibus correspondentem solum accessionem, non inter medias, inhiberi observaram. Quo ad *impotentiam* vero *Ægrotantis*, hanc evidenter agnoscebam in difficili oblatione materiæ cujuscunque fluidæ, etiam gustui non ingrata, cochleatim facta; quid fieret ergo (dicebam contra pariter intra me) si offerrem pulverem copiosum, nauseosum, & ægre degluti aptum in plurimo liquore? Primæ autem difficultati occurrebam ipse mihi met subdens: Forsitan insignis quædam quantitas Corticis celeriter, si fieri posset, in ventriculum illius intrusa, efficeret intra breve tempus, quod solet efficere intra longiusculum quantitas modica. Secundæ vero difficultati, quæ aucta remedii mole simul crescebat, sic reponebam. Fortasse si ab insigni, quam meditor, & insolita Corticis quantitate tantum Tincturæ recentis valido vehiculo extractæ (non quidem nudæ, sed tenuiore insimul, optimeque triturrata ejusdem substantia imprægnatæ) posset educi, quantum

posset in pauca mole æquare virtute *sex*, vel *octo drachmas* puri pulveris fortassis, inquam, & degluti intra breve tempus cochleatim posset, & intra breve tempus Accessionem instantem licet, saltem infringere, vitamque prorogare in crastinam diem. Sed si ab hodierna in crastinam, cur non & a crastina in alteram, & sic deinceps, continuo congruenter, magisque postea temperanter usu remedii?

Staturo intra me, quoties consensissent Collegæ mei, tentamine, statim hæc omnia, qualia cogitaram, combinaram, & seriatim deduxeram, palam feci, ampla protestatione præmissa, me nulla omnino spe ductum ea proponere, sed tantummodo ne mihi sollicitudo ulla superesset, extincto Amico, de non communicato consilio, frustraneo quidem forsitan, ac inutili, sed simul innocuo, quod mihi non Ars, quæ ibi locum habere nequibat, sed cæcus quidam, & inutilia quoque tentaturus amor suggererat. Cum autem interrogarer a Collegis, quo pacto hæc omnia generalia, & dictu speciosa in praxim demum, usumque peculiarem ducere cogitarem, item qualis futura esset hæc tinctura Corticis, num ab aliis in hisce casibus hæc acta viderim, aut legerim, & similia, respondebam: me nondum specialiter cogitasse de modo tenendo; aliquem tamen mente revolvere: neque idcirco vidisse me, aut legisse exempla huiusmodi; vidisse tamen unum aliquo modo simile, cum Junior essem, in *Ægroto* sola *drachmarum duarum* Corticis oblatione sanato; sed præsentem Casum esse longe magis præcipitem, & plane desperatum, neque me proinde quidquam sperare, sed votum tantum permissivum exquirere, dummodo id rationale, & tutum in talibus circumstantiis iisdem videretur, & non aliter. Quotiescumque enim non solum pro inutili, verum & pro temerario, aut damni suspecto ab illis reputaretur tentamen meum, summa animi tranquillitate, atque interna quiete abstinere ab eodem eram paratus, ut qui ab infau-

sto,



sto, qui prae foribus erat, eventu, si non calumniam, derisionem saltem me reportaturum noscebam.

Annuir illico, qui primus interpellabatur, *D. Manzius*, admissio mecum supposito, quod vere quævis diligentia inutilis futura esset, invalidumque, ac irritum quodlibet, utut conquisitum Artis tentamen. Atque hoc serio tenens, quod res ipsa clamare videbatur, statim discessit. Annuir pariter eadem confirmans de re plane deplorata *D. Davinius*, mihi que uni rei totius agenda pensum denuo concessit; suo tamen æque ac antea continuato, ut spondit usquequo viveret Ager, ad eundem accessu.

Nulla itaque mora interposita abii; atque ad Pharmacopolam ingressus iussi extrahi celeriter strictam tincturam ab *unc. ss.* Chinæ Chinæ cum vino malvatico in B. M., quæ tinctura cum forti expressione substantiæ Corticis elicita, & ad pauca cochlearia redacta, non sine difficultate ipso mane diei xxvij. circa meridiem propinata fuit Aegrotanti, cui ab initio vi adhibita os apertum est, & aperto injectus liquor. Una plus minus elapsa hora (sive id contigerit ope vini, sive ope remedii) coepit ille loqui, interciso tamen sermone, quod mihi animum addidit ultra pergendi ad paroxysmum imminentem validius anteverendum. Assumpta itaque *unc. j.* novæ Chinæ Chinæ, & ea Vini spiritu irrorata, mox addita, aliqua Vini malvatici portione, novam tincturam extrahi iussi per simplicem infusionem cum expressione validissima, cui admodum saturatæ, & turbidæ adjici curavi modicam quantitatem Vini tenuis; inde evaporato Vini spiritu in B. M. liquorem restringi iterum iussi, cujus majorem portionem per clysterem injectam volui [quod factum ab alio quopiam nondum noveram] minorem vero per os exhibui circa horam 24. Quæ omnia sine difficultate acta sunt, Aegro facilem se præbente, somnolento licet, obtuso, suisque motibus convulsivis, & importuno singultu indefinen-

ter vexato. Nocte autem ipsa, quia expectabatur funestus Paroxysmus circa horam sextam, levis tantummodo, vixque observabilis facta est accessio cum omnium admiratione; quare mane subsequente, nempe xxvij. Septembris portis fuit me ad Lectum illius appropinquantem amabiliter amplecti, & osculari, ut & Consanguineos, ac Amicos intimos, eosque alloqui, & cum iisdem de rebus omnibus alacriter differere cum integro mentis, nec non modico corporis vigore; quod omne ipse jam cernens, vix oculis meis fidebam, mirabarque (quod mirabantur, & alii omnes) mei felicitatem tentaminis, cui simile nemo in hac urbe, ne per somnium quidem, antea peregerat, aut viderat. Atque ita post cursum decem dierum ab inchoata triplicitate Quartanæ intra 24. horas, quin etiam citius in hunc statum devenit, qui mane antecedente derelictus plane fuerat ut conclamatus, & pro tali a cunctis inevitabili Fato habitus, ut & rationabiliter habendus.

Eodem nihilominus mane repetita est oblatio Corticis ad *drach. ji.*, ad arcendum certius paroxysmum illius quoque diei, eo quia in eam diem incidebat Accessio præcipua juxta periodum antiquam Quartanæ simplicis. Cum tamen ea minime apparuerit, statuta deinceps fuit a me pro pluribus diebus sequentibus continuatio Corticis dosi tantummodo diminuta, per modum scilicet levioris alterantis, prius ad *drach. ss.*, postmodum ad *scrup. j.*, donec penitus abolita fuerit quælibet, utut levis umbra periodi.

Sublata in hunc modum quavis periodo, & redacta ad summam exilitatem febricula permanente, sive Continua, quæ postremis angustia diebus irreperat, expugnato lethargo, sedatisque moribus membrorum tremulis, ac convulsivis, unus supererat singultus, qui pertinaciter perseveravit per undecim dies irritis ante hunc terminum omnibus remediis: erat enim tam vehemens, ut facile audiri posset etiam in aliqua



aliqua distantia transeuntibus per viam. Exacto nihilominus, ut dictum est, undecim dierum curriculo, cessit tandem, nescio an Cortici, an pluribus aliis remediis tam internis, quam externis constanter adhibitis, & applicitis. Inter hæc mirabilis fuit, quantunvis aspera Vessicantium, & Sinapismi Emplastri tempore procellæ appositorum operatio, quibus remediis perraro cæteroque, & in quibusdam tantum, quæ non facile simul coeunt, circumstantiis uti consuevi. Ab illorum autem appositione in casu enarrato excitatis vespulis, & excoriatis genibus, effluxit per mensem, & ultra quantitas incredibilis materiæ putridæ, quæ ipsa sæpius strata, & pulvinaria penetrabat, non sine mea admiratione: qua demum evacuatione completa, easdem, aliasque etiam articulationes corripuit Arthritis, quæ eoque vagata est huc, & illuc, donec illi supervenerit iusto moderamine, & stillicidio fluxus hæmorrhoidalis, ultimum tandem universæ Aegritudini finem imponens intra 40. dies ab enunciata triplicitate Quartanæ. Circa bramale equidem Solstitium ejusdem anni 1695. (ut nihil subdiceam) cum Tridentum usque profecisset, Serenissimi Ducis Sponsam Serenissimam gloriosæ etiamnum recordationis excepturus, eique famulaturus in itinere Mutinam usque, leviores aliquot febriculas passus est, quas facile tulit per totum iter, consueta nunquam munia intermittens; ab iisque, priusquam Mutinam pertingeret, nulla ope medica perfecte liber evasit.

Atquæ hæc est ingenua narratio historię morbi, & Curationis illius: de cujus narrationis veritate in omnibus, & singulis ejus partibus absque ullo addito fucō non est quod quisquam dubitet; nam præterquamquod non desunt de hac re testes oculati omni exceptione majores, ipse insuper apud me servo universam, & exactam descriptionem Casus, singularumque circumstantiarum illius Italico conscriptam idiomate, firmatamque, ac roboratam propria manu, & caractere Generosi pariter Viri

*D. Comit̃s Aloysii Nogarolæ filii* Aegrotantis, quam huc non transtulī, eo quia plura continet ad rem nostram minime facientia, variasque sermocinationes singulis Consultationibus habitas, quæ molem historiæ inutiliter augerent. Quæ tamen hic inserta visuntur, ab ipsa descriptione sunt excerpta, ut cuique curioso non pigeat ostendere.

Alios equidem casus, quos Libro sequenti sum relaturus, etsi non minus insignes sint nuper exposito, immo ipsorum nonnulli sint eodem adhuc mirabiliores, non tamen, ut hunc, ex peculiari quadam descriptione penes me asservata possum colligere; pendente siquidem ægitudine memorati Nobilis Viri otium aliquod mihi suppetebat, quod inde non ita suppetiit; quippe tunc solutus eram recenter nodo aulico per obitum Serenissimi Francisci II., necdum obstrictus eo, quo nunc teneor immeritus. Quamobrem cum fere cuncta fidere memoriæ labili fuerim subinde coactus, quotidianam omnium expositionem modo persequi est impossibile; & quodcumque etiam facile id foret, esset tamen nimis prolixum, etsi ex alia parte majoris foret utilitatis. Aliud est enim describere Morbum lethalius jam symptomatis stipatum, aliud est videre gradatim progressum ipsius Morbi in talem statum pervenientis, ad hoc ut possimus recte noscere, quantum præstiterit remedium in eodem vere ad exitum tendente, non vero propter imminuentem fortasse Crisim, vel ob Judicantis imperitiam, aut præoccupacionem tali apparente, ac perperam credito. Id tamen fidenter exigam a Lectoribus meis, ut scilicet pro certo habeant, quod licet compendiosius, quæ supersunt, historias sim relaturus, & licet minutas illarum circumstantias, ac seriem ordinatam nequeam exprimere (quod tamen ubi poterit fieri pro modo fiet) attamen, nonnisi quæ certo mihi comperta sunt, scribam, quæ nempe vel ex schedulis impolitis, sed veridicis, apud me loco Adversariorum, aut historiarum servatis, vel ex ipsa mea



mea indubitata reminiscencia deprompta sunt. Neque enim Histrionum more quidquam attollere, sed castigatissime, prout Virum candidum decet, cuncta referre mihi lex est. Quod tamen si non plane quispiam admittat, hunc ad Sanatorum, Assidentium, Consanguineorum, & Amicorum eorundem Tribunal appello.

Etsi vero [ut pro coronide repetam quod alias protuli] etsi, inquam, has, & cæteras hujusce ordinis protestationes sparsim habitas, tam abunde hætenus edidisse contigerit, ut eas, fere dixim, videar jactasse: absit tamen, ut

alio id egerim, agamve studio, nisi ut mearum, quotquot sunt, assertionum veritatem, ac ingenuitatem [de utraque enim æque sum, nec parum, sollicitus] coner in propatulo ponere, atque hac tandem via, prævio scilicet multiplicis, & indubitabilis experientiae lumine, cunctis pateat, me pro ingenii modulo [si Sydenhami verbis uti liceat] me, inquam, pro ingenii modulo omnes animi nervos in hoc intendisse, ut, si quo modo fieri possit, Morborum [dicam ego, Februm Perniciosarum, saltem Periodicarum] medela post cineres meos majori cum certitudine administretur.





# THERAPEUTICES SPECIALIS

## LIBER QUARTUS.

Curationes insignes quamplurimas exhibens omnium specierum Februm Perniciosarum, aliàs recensitarum, Methodo jam descripta absolutas, una cum gravi circa hanc materiam Praxeos Problemate.

### CAPUT PRIMUM.

*Historia insignes Intermittentium Perniciosarum, in primam præcipue Corporis Regionem sævientium, nostra methodo jugulatarum. Harum species sunt, Primò Cholericæ, & Dysentericæ, Secundò Subcruenta, & Atrabilaris, Tertiò Cardiaca.*



UT ORDINE aliquo procedat historiarum omnium, cæteroqui nonnihil disparatarum, & octo celebrioribus jam recensitis Februm Perniciosarum speciebus respondentium series, congruum hic loci censeo commodiorem illam divisionem sequi, secundum quam Cap. II. Libri III. distinximus illas in triplicem ordinem, habito respectu ad triplicem nostri Corporis regionem, in quarum aliquam peculiariter plus quam in aliam nonnullæ ipsarum sævire solent. Qui quoque ordo, si bene spectetur, ab aliis divisionibus antea præmissis non multum abludit.

Juxta hanc ergo divisionem ad primum ordinem connotantem primam regionem reducentur species istæ Perniciosarum, quas alibi jam Sylviano more peculiari donavimus nomenclatura; nempe, Primò Cholericæ, & Dysentericæ, Secundò Subcruenta, & Atrabilaris, Tertiò Cardiaca. Et harum Historiæ primo hoc Capite describentur. Ad se-

cundum ordinem connotantem secundam Corporis provinciam referentur primò Diaphoreticæ, Secundò Syncopalis, Tertiò Algida, Quartò Subcontinua malignans; Et historiæ istarum sequenti Capite comprehenduntur. Ad tertium denique ordinem respicientem tertiam pariter Corporis regionem revocabitur unica species, nempe Lethargica. Atque illius historiæ successivo pariter Capite narrabuntur. Et sic sub tribus tantum Capitibus Historias omnes octo specierum Februm Perniciosarum a nobis statutarum, nulla servata temporum, aut conditionis personarum ratione, ordinate complectemur, quibus postquam alias non ab similes ab Amicis in nostræ Methodi confirmationem communicatas junxerimus, hunc tandem Librum claudemus arduo quodam in Praxi circa hanc materiam Problemate, cujus dilucidationem aliæ nostræ non parum promovere poterunt peculiares historiæ. Cohærenter itaque ad divisionem ut supra admissam inter historias hujusce Capitis primam sedem teneant

### CHOLERICÆ HUMIDÆ.

I. **D.** *Joseph Gallianus de Coccapanis,* cujus obitum præcipitem ex Perniciosa Cardiaca paullo ante descripsimus, laborabat anno 1696. Tertianæ simplici intermittente, comitata vomitibus biliosis indefinentibus, & biliosa pariter dejectione correspondente. Cum alias con-



consuevisset morbo hujusmodi cum symptomatis similibus, præsertim cum copioso vomitu, corripit, itaut non semel constitutus fuerit in Vitæ discrimine, tulisset tamen semper, etsi ægre, labores consuetos, adjutus remediis usitatoribus, blandiebat ipse mihi conjectans quod et hunc pariter morbum remediis iisdem, quæ jam in usum ducebantur, adhibitis esset laturus. Ast quarta, ni fallor, vel quinta accessione tam immanis, tamque ferox, tam frequens, tamque copiosus vomitus supervenit cum simultanea semper, ac per brevissima intervalla repetita dejectione materiæ, biliosæ, ferosæ, & corruptæ, ut utroque motu Æger jam fere confectus, universaliter perfrigeratus jaceret cum pulsu ferme abolito, oculis cavernosis, singultu, anxio anhelitu, supinoque decubitu, quippe jam impotens se vel erigere, vel convertere in alterutrum latus, ut vomeret, vel alvum identidem irritatam exoneraret. In hoc statu, in quo dubitabatur, an posset quidquam ingratum gustui deglutire, vel deglutitum, retinere, cum juscula ægre deglutirer, & deglutita rejiceret; immo in quo Sacri Ministri eidem ut absolute morituro assidentes, nec non ego ipse metuebamus, ne non usque in crastinum victurus esset, in hoc, inquam, statu ausus sum cum Censuræ periculo præscribere Corticem (quo mediante paullo ante evaseram ipse a morte propinqua) & quidem ampla dosi juxta Methodum antea descriptam, remediumque intra horas aliquot congrua proportionem repetere, ut jam tradidi *Lib. III. Cap. III.*; neque enim opus est eandem crambem pluries recoquere. Hinc factum est illico, ut subsequens paroxysmus nequaquam accesserit, licet quo ad reliqua adhuc moribundus Æger videretur. Paroxysmo autem inhibito, & impetratis induciis, pulsus cœpit non nihil elevari, & Ægrotans, esto difficulter, atque tardiuscule incalescere; quare, continuato remedio, & liberaliore insimul facto etiam ultra Medici indulgentiam Vini usu [vix enim aliud quicquam assumere poterat, aut retine-

re primis præsertim diebus] sensim convaleuit, intra non multos dies fere a morte revocatus in vitam, quam ad duodecim inde annos sine ulla recidiva nervose protraxit.

II. *Uxor Bartholomæi Giannasii* binos passa cum dolore ventris, vomituque, ac secessu copioso in Accessionis principio, Tertianæ simplicis paroxysmos, quos pro talibus minime noverat, tertium ferocissimum subit, in quo cum ingenti intestinorum, stomachique dolore humoralia immodica excernit sursum, atque deorsum sine intermissione, unde frigida reddita, & sine pulsu cum pallore mortali, oculis concavis, acutis naribus, collapsis temporibus, conclamata creditur, & quidem confecta dolore colico. Advocor nihilominus, describiturque mihi ab Ægra vix loqui valente, ut & ab Assidentibus ipsis morbus sub specie doloris intestinalis, nulla facta Febris mentione. Carentia fere omnimoda pulsus, & carniū frigiditas non sinebant me certiorari de Febre, multoque minus de natura, & specie illius. Intelligens tamen non sine labore, & ex vi interrogationum repetitarum, recursum alternum cum anticipatione regulari, & cum proportionali augmento intensiōis symptomatum semper similium, facile suspicatus sum de Tertiana Perniciosa abscondita, ut *Mortonus* loqui consuevit. Statim itaque ad Corticem confugi, non ea quidem dosi, quæ valeret Febrem plane suppressere (quippe adhuc hærebam non nihil anceps de natura morbi) sed ea tantum, quæ valeret eandem imminuere, observaturus interim melius quod mihi tunc confuse tantum describebatur. Altera die pulsus revixit, licet minutus, & paululum frequens, carnibus tepor aliquis redditus est, cæteraque omnia minus gravia apparuere; quod mihi de Tertiana Cholericæ præbuit fortius indicium. Vesperis cum coactus essem recedere ab Urbe, noctu vero expectaretur quartus paroxysmus, aliquam rursus, sed levem præscripti portionem Corticis in forma boli Cardiaci, me-



que mane reversurum sponendi, ut Ægram curiosus inviserem, nec operi christiana pietate incepto ullo pacto deficerem. Cum autem nocte invalisset Febris etiam anticipans, Ægra moræ impatiens præ dolore, vomitu, atque secessu consueto, licet tolerabiliore, alium me absente Medicum summo mane accersiri curavit. Dum iste varia pro solvendo stomachi, ventrisque dolore [neque enim alium morbum accusabat Ægra, neque ex pulsu frigido, ac vix perceptibili poterat Medicus cæteroqui Cortici amicus quidquam aliud conjectare] ipse superveni, & de periodo certior jam factus, ac de Perniciosa Tertianâ, amicum Medicum monui de vero morbo; ac de inchoato jam usu Corticis, vi cujus illa accessio, utut gravissima, aliquod nihilominus susceperat moderamen respectu prioris. Obstupuit ille his auditis, mihi que inceptam curationem meam absolvendam concessit lubens, & de exitu curiosus. Statim ergo Chinam Chinam præscripsi valida Methodo, statimque pariter Febris, vomitibus, torminibus, & dejectionibus modum imposui, non quia morbus ad declinationem vergeret [subsequentibus etenim crudeles recidivæ parefecerunt oppositum] sed quia febrifugum larga dosi sumptum cuncta composuit. Perseveravit ea in usu ejusdem febrifugi diminuto, & sana visa est; paullo post tamen Febris eadem, licet parum manifesta quo ad alias febriles circumstantias, clare repullulavit quo ad symptomata prædicta, & periodica. Quoniam vero hæc minus fortia se prodiderunt, curationem primum tentavi Methodo, ut loqui mos est, rationali, per usum scilicet Enematum anodynorum, per oblationem *Olei amygdalarum*, *Crystall. mont.*, *Salis absynth.*, *Theriaca recentis*, *Conf. de hyacinth.*, *Laudani opiat* &c. mox his non proficientibus, Febreque cum dictis symptomatis invalescente transitum feci ad usum *Syrupi de China China* Cap. VII. Lib. I. descriptum, cui in progressu ipsam Corticis pulverati substantiam placuit adjungere. Sed cum hæc quoque

nihil proficerent, mihi que jam metum incussisset effera quædam, quæ his non obstantibus successit Accessio, ne in subsequente periret Ægrotans, ad validam Methodum rursus confugi, unde omnimoda statim Febris, & mentitæ Cholericæ affectionis abolitio. Post aliquod tamen diuturnum tempus iterum periodica affectio semicholerica alternis diebus se prodidit, Febre vix, ac ne vix quidem sensibili. Hanc blandis tractavi remediis, & sine Cortice sanasse sum visus. Cum ecce ex improvviso ea iterum caput extulit, sed alia sub larva: siquidem loco excretionis flavæ, ac viridis, cruenta impense, ac nigricans, ut mihi relatum est, successit dejectio. Huic pariter nondum Cortice, sed aliis interim remediis, donec materiam altera periodo datum esset inspicere, obviam eundum esse censui, utut exilitas pulsus quammaxima non levem mihi terrorem incuteret. Cum vero die affectionis modica, nec ullius pravi coloris fuerit excretio materiæ per secessum, & nulla per vomitum, substiti, nec Corticem præscripsi: sensim autem interea morbus inducias dedit. Non multo post gravidam quadrimestrem mihi notabilem ventris illius intumescientiam exploranti se prodidit Ægra non ante conscia; idque ex certis signis ante paucos tantum dies sibi constasse indubitanter asseruit. Dimisi illam non bene credulus; sed iterum vomitus, nec levis quidem, sed nec immodicus, alternis diebus illam torquebat cum febrili tamen incalescentia, & cum debita pulsus emissionem: quod per tres ante menses nunquam deprehenderam. Venam ideo in brachio secari jussi, cum antea præ exuberantia excretionum, & pulsus exilitate non ausus fuero. Visa est melius habere, resumptis viribus, carnibus, & modico faciei colore. Aliquam nihilominus fere citra Febrem passa est vomitus, & biliosæ dejectionis recrudescentiam alternis diebus, typoque adhuc tertianario recurrentem, quæ postmodum appropinquante brumali tempestate sensim dispersit; unde Ægra stadio suæ gestationis



nis satis feliciter exacto partum edidit naturalem, sana jam reddita, & in novæ tantum gestationis recidivam prona.

### CHOLERICA SICCA.

III. **G** *Eminianus Campiolus* ætatis annorum XLIX., habitus admodum gracilis, aspectusque squalidi, ac luridi, Tertianæ simplici correptus cum inani, sed diuturniore vomitione, post tres, vel quatuor accessus eo pervenit, ut illi jam continua, ac indefinens fieret in vomitum propensio, vi cuius liquida omnia, & potulenta assumpta statim rejiciebat, tantumque ova sorbilia (quæ tamen, ut & alia quæcunque, admittebat ægre) ad breve aliquod tempus retinebat. Extra vero occasionem cibi assidua erat, ut diximus, in vomitum proclivitas cum nonnulla etiam, parca licet biliosæ materiæ acerrimæ rejectione. Alvus pariter respondebat vomitioni, sæpe scilicet Ægrum sollicitans, paucam vero, serosamque identidem excretionem pariens. Præscripta sunt remedia ex arte; sed incassum: adeo ut ingravescentibus paroxysmis, & duplicata jam Febre, augerentur in dies symptomata. Pulsus debilis fiebat, & celer; immo Febris a primordio intermittens post acquisitam duplicitatem, aliquam etiam continuitatem affectare, quin & adipisci videbatur. Jamque res in angusto erat posita, neque illi administrari Sacramentum Eucharistiæ permittebat metus rejectionis. Lingua sicca erat, arida, & scabra; urina pauca, crassa, & rubra: aderat quoque jactatio assidua, virium exolutio, oculorum concameratio, & tandem singultus. Præscribo Corticem copiosum in plurimos bolos divisum, partitis vicibus cum Vino tenuiore ex cochleari sumendos, si Æger possit assumere. Vi sibi illata nonnullos deglutit, & retinet. Renuit laborem sumendi reliquos. Hortor, suadeo, insto, ut assumat, si illi ceteroqui morituro jucundum est vivere. Annuat tandem, assumit, & retinet. Sic perseverans evadit ab Accessu futuro,

*Torti Therap. Spec.*

qui nempe non advenit. Incipit sedari vomitus, & alvus densari, ac sisti. Perseverat adhuc levis Febricula superstes ad duos dies, quæ continuato usu Corticis cito desinit. Denique per septem, vel octo dies usurpato per modum alterantis remedio, eo solo, clysteribus ex lacte identidem injectis, perfecte sanatus est absque recidiva. Duobus, vel tribus inde annis elapsis, eodem morbo, iisdemque prorsus symptomatis corripitur. Priusquam ad extremam descripta perveniat, circa quartum videlicet, vel quintum paroxysmum, præscribo Corticem dosi modica, terque, vel quater debilius repetito. Sanatur perfecte, pariterque non recidit.

### DYSENTERICA.

IV. **U** *Nus* ex famulis Splendidi, ac Nobilis Viri D. Marchionis Camporei duplici Tertianæ Intermittente, plurimum tamen intensa, vexatus cum biliosis vomitibus admodum laboriosis, ingruente tertio paroxysmo potiore materiam primo porraceam, & vitellinam vomere cœpit, atque deijcere, mox mucositatem quandam cruentam copiosam, qualem in vera Dysenteria contingit observare; cum hac tamen differentia, quod hujusmodi excretio in Dysenteria per alvum tantummodo fieri solita, in hoc casu fiebat etiam per vomitum, ita ut ex inspectione talis materiæ per vomitum excretæ, quisque illam prodixisse per secessum, indubitanter credidisset. Alia insuper observabatur differentia inter hanc excretionem, & eam, quæ in vera Dysenteria contingit, quod scilicet in hoc casu dolores, atque cruciatus Ventriculum præcise occupabant, non vero Intestina, in quibus tormina nulla persentiebantur, licet ab omni tenesmo non essent immunia. Sævum hoc Symptoma maximam Ægrotanti jactationem inferebat, linguæ scabritiem, urinarum paucitatem, crassitiem, croceumque impense ruborem; Febris vero tum intensior facta, tum magis extensa, jam



ad continuam essentialiter tendere conspiciebatur. Repetita est ideo die minoris afflictionis Venæ sectio antea celebrata, & injecti clysteres ex jusculo, cremore hordei, lacte chalybeato &c. item continuatus est usus seri Vaccini antea præscripti, aliaque in usum revocata, quæ humorum omnium fervorem, & acrimoniam temperare, ac retundere apta sunt credita. Quarto nihilominus Paroxysmo graviore, qui motu admodum obscuro, nulloque fere frigore se prodidit, rediit longe violentior ac prius eadem excretio ex mucro copioso, & cruore mixta, per alvum quidem abunde, sed satis diminute per vomitum. Irrequietus Æger nesciebat momento temporis stare loco: clamabat, ululabat, sibi erodi, atque divelli stomachum identidem repetens, nil videlicet proficientibus diluentibus, oleosis, incrassantibus, anodynis &c. Non equidem compatiebatur cor, neque pulsus (proinde non erat hæc Cardialgia) sed ferocia nihilominus doloris, Febris intensissima, ardor universalis, vigiliæ pertinaces, concidentia faciei, & carniū repentina extenuatio, vel aliquam inflammationem internam præ foribus esse prænunciabant, vel irreparabilem transitum in Febrem ardentem, hoc adjuncto symptomate facile lethalem. Hærebam hinc (fateor) circa oblationem Corticis; immo proclivior eram in continuationem Methodi inceptæ propter rationes quamplurimas; sed cum plura jam incassum methodice administrassem, nec eventum meliorem ominari fas esset, nisi per promptam inhibitionem paroxysmorum (siquidem hanc amplius liquisset assequi, progrediente jam celeri passu ad continuitatem Febre) idcirco tandem decrevi Corticem offerre, methodo tamen nonnihil leviori, ea videlicet, quæ pro curatione Perniciosarum Octavæ præsertim speciei descripta est *Lib. III. Cap. III.* Oblata itaque, & repetita temperanter China China in forma boli, eique superbibenda præscripta Aqua Plantaginis, statim subsequentes Paroxysmi vix perceptibiles sunt red-

diticum manifesta Febris intermissione, mucosæ, cruentæque excretionis omnimoda suppressione, urinarum coctione, somno modico, & sufficienti linguæ antea arefcentis humectatione: adeoque intra tres dies fere sanus visus est, factusque subinde post alios duos, vel tres perfecte talis, nullam expertus recidivam, sed simplicem tantum Ephemeram post menses a causa procatartica, & evidenti oriundam. Passus & hic est iterum, nescio quo anno, similem morbum cum simili symptomate: & eadem methodo ab ipso anxie expetita citius adhuc sanatus est; nec amplius, quod sciam, ægrotavit.

#### SUBCRUENTÆ.

V. **P**lector quidam nomine *Joseph Cerchiaris* anno 1697. in secundo simplicis, intermittentisque Tertianæ Paroxysmo, serosa quadam, atque subrubra, simulque copiosa dejectione corripitur. Conringit hæc in ipsa Febris invasione, & per modicam quoque accessionis extensionem perseverat: ab ea tamen quicquam incommodi, vel doloris Æger non percipit præter notabilem virium prostrationem. Cumque die subsequente satis leviter se habeat, sitque omnino infebricitans, nondum putat se indigere ope Medici, ac proinde tertium præstolatur Paroxysmum, antequam decernat de implorando auxilio. Succedit itaque tertius Accessus, in cujus principio statim plurimas habet sedes materiæ copiosissimæ subcruentæ, ac loturæ carniū similis, qualis est ea, quam nomine *Fluxus Hepatici* donare consueverunt Veteres. Prodibat hæc tam facile, tamque blande, seu, ut melius loquar, tam subdole, ut Æger inde levamen potius aliquod, quam detrimentum capere sibi videretur saltem ab initio; sed progrediente copiosis, & repetitis vicibus dejectione, tanta sensim, ac talis supervenit virium prostratio, ut non amplius potis esset ullo pacto de lecto surgere ad alvum deponendam, quin & in lecto decumbens frequentem

patie-



patiebatur lipothymiam. Ob id statim advocor; narranturque mihi, quæ similiter, licet longe mirius, contigerant accessione antecedente. Inspicio materiam totam (erat autem plurima) quæ veram loturam carniū referebat, nec quicquam aliud. Intueor Ægrum adhuc frequenter deficientem, oculis cavernosis, voce clangorem edente, acutisque naribus præditum. Pulsus illi exilis, celer, atque minutulus, & successive palam deficiens: languet ille, exsolvitur, & frigidus universaliter jacet, etsi a pluribus jam horis febricitet, immo etsi in augmento Accessionis jam antea incaluerit. Quo ad reliqua, satis bene se habere videbatur. Non sitiebat admodum, optime constabat mente, nulla tormina, nullosque patiebatur cruciatus, ac tantummodo, se assidue deficere, mortemque propero jam gradu accedere sentiens, ac noscens asseverabat. Præscribo statim corroborantia, fluxum compescientia, & vires instaurantia, quantum sinit angustia, & circumstantia temporis; atque ita ab accessione illa paulatim, difficulter licet, evadit. Sequenti mane fluxus sistitur sponte, ut contigerat etiam post secundum paroxysmum: vires tamen, & pulsus notabilem exsolutionem patefaciunt, itaut novæ certo accessioni consimili nequeat Æger sufficere. Munitur ideo Sanctissimo Viatico, deinde assumit *unc. ss. Corticis*. Vespere *duas* pariter potat ex Vino ejusdem Corticis *drachmas*. Die sequenti nulla redit accessio, neque pariter ulla dejectio. Diebus aliquot sequentibus utitur eodem remedio in modum vulgaris alterantis, & perfecte curatus est absque ulla unquam recidiva. Neque hic quispiam obtrudat, morbum jam forte cum tali evacuatione fuisse solutum, neque Cortici adscribendam curationem; nam *primo* in similibus casibus, priusquam Cortice uteretur, alium profecto progressum, alium exitum observabam; *secundo* nimium frequens est, nimisque immediata post Corticem quolibet morbi tempore propinatum sanatio, ad hoc ut semper ea

Naturæ adscribi possit, vel Casui; *tertio* generaliter advertendum est, quippe hoc in plurimis occasionibus militabit, quod qui sanantur per Corticem tertio paroxysmo periculoso, sponte sanati credi nequeunt; quartus enim saltem paroxysmus, si tertius præsertim validus fuerit, de more inevitabilis est, ac semper intensior, ut norunt Practici.

VI. Reverenda Monialis *Mater Maria Joanna a Cruce Carmelita* Excalceata, & Monasterii Rectrix anno 1703. post duos Tertianæ simplicis Intermittentis paroxysmos tertium patitur copiosissima dejectione loturæ Carniū simili comitatum, cujus tanta est ferocia, ut Ægram semiconfectam, frigidam, pulsu, voceque carentem, & præ nimia evacuatione prostratam omnino, exsolutam, & jam prope deficientem reddat. Debilis illa constitutionis, & valerudinaria habitualiter erat ante. Facile ideo est conjectare, cum hoc adjuncto qualis evaserit. Jam prope mori videbatur, languida, anhelosa, & animo deficiens, illique propterea Sacramenta Ecclesiæ celeriter sunt ministrata. His absolutis, præscriptæ sunt *drach. vj. Corticis* ex Vino potandæ partitis vicibus longe ante horam quarti paroxysmi; tertium siquidem Cardiacis dictis, aliisque spirituosius remediis, non sine magna tamen difficultate transegit, in subsequenti probabiliter defectura: quo remedio statim cohibitus est, alioqui futurus accessus, & una cum eo subcruenta lethalis dejectio. Perseveravit deinde aliquandiu in usu remedii ad prophylaxim, vixque levem tractu temporis recidivam, cito, & sponte solutam, passa, perfecte convaluit.

## A T R A B I L A R E S.

VII. **M**illes quidam prædiarius Urbis nostræ in tertio pariter Febris Tertianæ paroxysmo, quantum colligere licuit ex confuso illius relatu, dejectionem passus est impense nigricantem, ac veluti ex cruore, partim concreto, & partim dissoluto conflata.



Referebat illa nonnihil fluxum copiosum sanguinis hæmorrhoidalis; sed revera color ater, excrementis ipsis mollioris consistentiæ intime, ac exacte permixtus, altiore illius accusabat originem. Prodigabat hæc pariter etiam syncera, & excrementis impermixta, sanguini atro simillima, qualem vocarunt Antiqui *Atrabilem*. Copiosam valde observare erat, frequentem, & cum impetu erumpentem hujusmodi dejectionem, hominemque insimul facie Hippocratica plane insignitum, frigidum in extremis, ac lividum, totum cadaverosum, pulsuque ferme carentem, & in lacu tetræ hujusce materiæ præ paupertate sepulrum potius, quam natantem; ab illa tamen irritis conatibus, & jactatione irrequieta se se expedire tentantem. Præscribuntur idcirco quamcitissime Sacramenta Ecclesiæ omnia, deinde Peruvianus Cortex, valida quidem Methodo, sed spe fere nulla. Mane sequenti manet anceps judicium de invivendo Ægro, ob suspicionem probabilem de morte illius. Vivebat tamen; sed summe prostratus viribus, ac pulsu, atque adhuc subfrigidus. Renovatur usus medicamenti, ut mos est, leviori dosi; nec aliud quidquam præter hoc, & victum præscribitur. Altera die levissima fit Accessio, in eaque pulsus incipit attolli, & corpus tantillum calefieri, sedata jam, nec redeunte atra dejectione. Eadem proportionem singulis postmodum diebus in melius Æger profecit: quare, nulla amplius renovata Accessione, & continuato nihilominus pro prophylaxi ad nonnullos dies remedio, cito, integre, & absque ulla pariter recidiva convaleuit.

VIII. Decumbebam adhuc anno 1696. vix convalescere incipiens a Perniciosa Febre, a qua evaseram ope Corticis copiose poti, ut referam sequenti *Capite*, cum *D. Cervius* Amicus amaræ simul, suavisque memoriæ, mihi tenerrime assidens nunciavit, se habere præ manibus Ægrotantem mihi notum, & alias me quoque socio ab eodem curatum, nempe *D. Antonium Mariam Zanni*, cujus hæc fuit ægritudo. Tulerat ille tam facile

aliquot Tertianæ simplicis Intermittentis paroxysmos, ut die vacua potuerit e lecto surgere, consuetoque scribendi muneri vacare. Et revera die ipsa feralem Accessionem mox describendam proxime antecedente, computa gravia suæ administrationis exacte reddiderat, cum die subsequente circa meridiem consuetam corripitur Febre; cui repentina copiosa, & immanis adjungitur dejectio materiæ atrosanguineæ. Hujus autem tanta fuit ferocia, ut Ægrum eadem die sine pulsu ferme confectum, universaliter summe frigidum, & carnibus veluti arefactis, ac induratis præditum cum voce clangosa, singultu, aliisque funestis symptomatis, jamjam in agone constituerit. Hac mihi enarrata historia sciscitatus est *D. Cervius*, num in hoc casu locum posset habere Cortex, quem in casu meo mirabilem noverat: metuebat siquidem, ne symptoma expositum immutaret adeo circumstantias, & naturam ipsam morbi, ut res per ullum febrifugum nequiret absolvi. Respondi alacriter, dummodo Æger in crastinum viveret, pulsu, licet perexiguo, restituto, incunctanter statim offerendum esse largam dosi Corticem, quo nempe futurum accessum impediendo, impediri quoque, ac inhiberi debere symptoma ipsum dejectionis atrocitatis ab ipsa plane accessione pendentis, certo censebam. Mea ille confirmatus assertione (erat quippe, uti cautus valde, ita & facile meticulosus) statim Ægrum adiit, eumque inveniens in statu aliquo vitæ sperabilis usque ad novum paroxysmum, pro eodem impediendo Corticem obtulit ad *sex drachmas*, ut a me viderat assumptum. Hoc uno Febri finem imposuit, & cruentæ dejectioni; unde paullopost salus integra subsequuta est: quod miratus idem Medicus, lætabundus statim nunciavit mihi, de reliquis postea neque conscio, neque curioso, quippe iterum paullopost ægrotanti. Suasi tantummodo diuturnam Corticis repetitionem, quam, an usurparit, ignoro: crediderim tamen. Vixit porro restitutus Æger ille per annos XIII., quibus exactis,



exactis, tumore quodam imi Ventris correptus est fere universali, verumque Hydropem æmulante, sed tamen inflammatorio, & comitato Febre Continua intensiore, quæ tumore sensim decrescente nihilominus magis intendebatur; hisque omnibus brevi confectus, diem suum celeriter obiit.

## CARDIACÆ LEGITIMÆ.

IX. **D.** *Lucretia Vaccaria* Vidua, Tertianis Febribus cum bilioso impense vomitu, & dolore stomachi non contemnendo frequenter obnoxia, a quibus non semel male plecti consuevit, anno 1707. correpta est pariter Tertiana Febre, circa initia quidem naturæ consimilis, sed in progressu longe ferocioris, quippe quæ tertia accessione veram Cardialgiam sibi comitem adscivit, quæ tamen Cardialgia ad duas plus minus horarum tantummodo perseveravit, remediisque oleosis, edulcantibus, anodynis, & hujusmodi cessit. Die sequenti Febris præter consuetudinem facta est duplex non sine quopiam ventriculi morfu in ipsa invasione, quod mihi ansam dedit cogitandi de propinando Cortice, priusquam quarta ingrueret fortior accessio. Sed quia sera admodum erat hora, quippe non longe distans hora futuri gravioris accessus in anticipationem proni, & quia denique minus metuebam in subiecto solitum, seu saltem similem laborem fere consueto, ac metuissem in alio minus assueto; ideo supersedi pro tunc a præscriptione Corticis. Sed me facti fere poenituit altera die; vehemens siquidem per totum principium, augmentum, atque etiam statum accessionis increbruit Cardialgia, vi cujus Ægra sibi erodi, & mordicari a Canibus ajebat orificium stomachi. Ejulabat, dum poterat; sed sæpius intercepta voce deficiebat animo: sicque alternatim ululans, suspiria edens profunda, vomitus inanes tentans, & animo deficiens, subfrigida cum minutis circa frontem sudoribus, cum pulsu exili, & crebro, cum facie semimortuam refe-

rente, oculis caligantibus, & temporibus collapsis, animam jam prope reddere videbatur. Quia vero per brevissima intervalla nonnulla identidem prodebat signa reviviscentiæ, pulsusque tunc temporis nonnihil resurgebat, & appropinquante hora declinationis, cætera quoque tantillum remittebantur symptomata, ideo Ægra remediis etiam pro renata adhibitis adjuta, potuit a tam forti accessione evadere, remanentibus tamen non modicis postremi Paroxysmi reliquiis. Supererat quoque summa stomachi subversio, imbecillitas, & ciborum omnium nauseatio, vox clangosa, jactatio frequens, frequensque pariter suspiriorum emissio. Quamobrem vel citam, & certam suspicatus mortem in futuro Paroxysmo graviore, si Cardialgia rediisset, vel periculosissimam saltem Febris continuitatem, si ea non rediisset [quæ continuas eandem quoque mortem, segnius licet, erat æque probabiliter allatura] Corticem valida Methodo statim præscripti, non tamen validissima, quoniam non pauca intererat adhuc inter prægressum, & futurum Paroxysmum fortio rem temporis distantia. Ope remedii, post levio rem, quæ parum distabat, accessionem, fortior altera vix conspicua fuit, vixque aliquis stomachi leviusculus angor; quapropter, repetito paulatim remedio, intra septem, vel octo dies e lecto surrexit incolumis. Transactis autem aliquot diebus, cum alvus ipsi non satis obediens videretur, meque perraro accedentem non facile posset consulere, suo Marte portiuunculam Aceti solutivi in condimentum radicum cichorii pro Acetario elixarum assumpsit. Forte paullo post ipse superveni, qui, re intellecta, Febrem altera die reversuram indixi. Sed prognosticum non fuit exacte verax, cum enim altera die ad eam accessissem, intellexi, Febrem jam nocte ipsa immediata ab epoto solvente, etsi levio rem, illam corripuisse. Quia vero Febris ipsa nullum fere laborem intulit, Corticem non amplius exhibui; sed duobus tantum, vel tribus elapsis paroxysmis levioribus, eadem



eadem sponte substitit: Ægraque perfecte, ac permanenter, nullo amplius per os usa solvente, sanata est.

X. Alteram mulierem nomine *Adamantam*, Ancillam in Domo Campo-rea, simillima Cardialgia cum duplici pariter Tertiana, quam describere superse-  
deo, correptam, cui ministrata jam fue-  
rant Ecclesiæ Sacramenta, quippe quæ  
proxime moritura credebatur, & vere vi-  
debatur, id suadentibus assiduis ex vo-  
mitu, atq; acerrimo stomachi morfu deli-  
quiis cum abolitione pulsus fere omnimo-  
da, facie hippocratica, frigidis sudori-  
bus, & intercepta loquela, hanc, inquam,  
mulierem juvenculam (neque tamen  
hystericam) intra paucos dies sanavit  
confestim Peruvianus Cortex, descripta  
jam Methodo oblatus, Recidivamque  
leviorem leviuscule pariter propinatus in  
totum sustulit.

#### CARDIACÆ SPURIAE.

XI. **A** Nno 1708. *D. Rosam* uxorem  
*D. de Roncaleis* Doct. Med.,  
Tertiana Intermittente cum stomachi  
angore, præcordiorum æstu, anxietate,  
animique defectione aliqua detentam,  
& auxilium Corticis implorantem, non  
satis unanimes erant in voto, ut exau-  
dirent duo curantes Medici, *D. Cleri-  
cus* videlicet, atque alter Medicus in  
illius societatem simul vocatus. *D. Cle-  
ricus* primus in curatione, meæ probe  
consciis Methodi, meique moris, fa-  
cile annuebat petenti, eo quia etiam  
præcedente accessu eadem symptomata  
non contemnenda observarat. Cumque  
postremo illo paroxysmo fortior adhuc  
esset, & diutius perseverans stomachi  
dolor, secumque frequentiore traher-  
et animi defectionem, Ægraque se ap-  
prime explicaret de sensu mordicationis  
acerrimæ in ore ventriculi, assereret-  
que Febre declinante, se ferre nequire  
aliud similem paroxysmum, neque hu-  
jusmodi affectionem habere quidquam  
hystericæ, sed esse merum, & grave  
symptoma Febris, justum sibi mortis ti-  
morem incutiens, adderetque insuper,

Clarissimum *D. Ramazzinum* longe le-  
vioribus de causis Tertianas admodum  
mitiores usu Corticis alias eidem sustu-  
lisse; ideo *D. Clericus* non modo se fa-  
cilem præbebat, sed & sponte instabat,  
ut offerretur Cortex, priusquam novus  
Paroxysmus [erat enim prope statum  
morbus] funestam Cardialgiam infer-  
ret. Contra alter Medicus non plane  
consentiebat sisti, aut suffocari mor-  
bum ad statum tendentem, in quo non  
adeo urgentem, ut narrabat Ægra,  
agnoscebat occasionem, reputans angore  
illum stomachi non transcendere  
consuetos benignarum etiam Tertiana-  
rum limites, neque adeo male vexari  
Ægram revera, quantum præ timore  
præconcepto eadem asseverabat, cuncta  
(ut agebat ille) aliquantulum magnifi-  
cans. Maritus anceps cuinam opinioni  
calculus suum apponat, advocat me  
tempore declinationis ipsius accessionis.  
Exponunt quod sentiunt ambo curantes  
Medici; neque unus ab altero adeo dif-  
crepat, quin uterque sit descensurus in  
opinionem illius, cui accedam ego.  
Hæsitavi tantisper & ipse, laudabilem  
Febris remissionem inveniens, quin &  
proximam infebrecitationem, mulierem-  
que audiens satis alacriter differentem.  
Sed & hoc ipsum me movit, ut crede-  
rem, eam probe noscere, quæ tam ex-  
acte referebat; & cum de Affectione,  
veram Cardialgiam saltem æmulante,  
ac ab ea parum distante, minime dubi-  
tarem, videremque *D. Clericum* alias  
non facile meticulosum, in hoc casu  
summe metuentem, tutiorem partem eli-  
gere satius duxi, & Corticem expeten-  
ti non denegandum credidi. Propina-  
tus autem ille est ipsa jam penitus decli-  
nante accessione *ad drach. ij.*, mane se-  
quenti *ad drach. j.*, & similiter *ad dra-  
ch. j.* vespere: & abolita est statim om-  
nis Febris. Ne vero suspicio incidat,  
fuisse exhibitum remedium morbo jam  
sponte evanescente, animadvertendum  
est, quod Recidivam leviolem non mul-  
to post passa est Ægra. Si quod enim  
certum indicium est, Febres sumpto  
Cortice fugatas, ab eodem vere fuisse  
depul-



depulsas, non autem sponte solutas, illud inter cetera est Recidiva post 20. circiter dies levi qualibet de causa contingens, esto etiam, quod ea non contingente saepius solutæ visantur ope Corticis Febres cæteroqui lethales, nec sponte solvendæ. Recidivam itaque, ut agebam, non multo post passa est Ægra; & quia novo simul, levioꝛe licet, dolore stomachi premebatur, eodem iterum remedio curata est integre.

Quod autem eo anno obscurum non nihil remansit circa hanc Curationem [neque enim status Ægræ ad periculum plane conspicuum adhuc pervenerat] anno sequente dilucidatum est. Cum enim eandem Tertianam insigni, & metueda [dicamus tamen etiamnum spuria] Cardialgia vere comitatam observassem, eodem curante *D. Clerico*, meque citius ac antea in consilium vocato, sed ulteriorem morbi progressum expectare, & observare volente, coactus sum festinanter, & methodo validiore Corticem propinare, cunctatione cæteroqui mea in grave periculum prope impingens, prius scilicet de eodem nimium certiorari sollicitus.

XII. Non multo post obitum *D. Josephi Galliani de Coccapanis*, *D. Anna Victoria de Forcirolis Marchionissa* ejus Uxor corripitur Tertiana duplici non plane Intermittente, nulloque cum sensu frigoris invadente. Protrahitur morbus usque ad nonam diem absque ullo gravi symptomate, remediisque vulgaribus caute tractatur. Eo tempore incipit Accessiones comitari dolor, angor, & morsus stomachi non contemnendus, modum tamen non excedens. Crescit in dies symptoma, & cum symptomate Febris. Monet illa me, ut caveam, ne sibi quoque contingat, quod contigit paullo ante Viro suo: se enim magnam in stomacho mordicationem, sævumque dolorem pati, constanter conquerebatur. Ægre tunc expirabat, sed suspiria potius edebat; acuebat vocem, dum clamabat præ dolore, & vicissim obmutescibat, clamare impotens; illam tamen remediis vulgaribus, & bezoarricis (erat

quippe in sudorem non negligendum proclivis) usque curabam; ipsa vero mihi quotidie, placide licet, obtrudebat casum defuncti Conjugis, & eadem via eodem se tendere, quamvis segnius, asseverabat. Revera dolorem oris ventriculi in dies majorem fieri constabat, illicque adjungebatur inanis, ac dolorifica pariter vomituritio ad horas & horas perseverans, ac lipothymiam secum sæpiuscule trahens. Febris ipsa difficulter se se exerebat: jamque vix amplius dignoscebatur illius accessus, sed sibi constanter æqualis jam prope fiebat; quod ideo majorem mihi in præscribendo Cortice suspicionem incuriebat de successu irritato. Cum tamen de Cardialgia, si non legitima, quæ violentius corripit, & certius interimit, saltem spuria, & nihilominus admodum periculosa, manifeste constaret, insuperque de Febre ad Continuum essentialiter celeri jam gressu tendente, decrevi Corticem exhibere festina, & validiuscula methodo. Quo factum est, ut intra tres, vel quatuor dies [assumptis scilicet primo hauſtu *drachmis duabus* Corticis, & *drachma una* mane, & sero per duos dies] Febris desierit, continuatoque ad *semi-drachmam* quotidie per aliquot dies eodem remedio, Ægra ipsa laudabiliter convaluerit. Cum tamen esset Rus profectura ad aeris mutationem, iterum correpta est Febribus similibus quo ad typum, sed levioribus quo ad intensiorem, & quo ad symptomata; quare, iisdem Febribus methodo prius vulgari tractatis, mox sibi relictis, nec tamen cessantibus, fuit opus, Corticem iterum, sed leviter, & per modum lentioris alterantis exhibere, a quo illæ integre depulsæ sunt, Ægraque, superveniente paullo post diarrhœa spontanea, ab omni suspitione recidivæ penitus liberata.

XIII. Inter plane insignes non referam curationem *Uxoris meæ*, Tertiana primum simplici, & Intermittente (Cardiaca tamen Notha) mox duplici, & subcontinua detentæ, usuque Corticis haud illaudabiliter sanatæ, non referam,



feram, inquam, inter penitus insignes hujusmodi curationem, licet eam & non vulgarem, & notatu dignam reputarint Amici Professores, mihi, Domuique meæ perpetuo faventes. Gravia equidem fuere morbi accidentia, graviusque præ cæteris acutus stomachi dolor ad plures & plures horas invadente Febre respirationem æque impediens ac vocem. Cum tamen pulsus tunc etiam temporis satis vigeret, me non insignis urgebat metus. Quia vero symptoma istud cœpit occupare plurimam Accessionis partem, Febrisque post quintum Accessum duplex, & subcontinua fieri, ideo, ut abundarem potius, quam deficerem in cautela, Corticem præscripsi, & liberaliter, & fere dixerim præmature. Eadem die assumpti remedii Febris supra expectationem meam visa est subsistere: sed revera, plurimis licet horis postponens, noctu accessit, mitior tamen, & ultima. Continuatus est usus remedii ad aliquot dies pendente convalescentia. Sed cum Ægra etiam vigente sanitate esset obnoxia dolori acerrimo in regione hepatis, vi cuius aliquoties icterica visa est fieri, licet nec complete, nec permanentiter in hac quoque convalescentia idem insurrexit dolor, huicque verus successit Icterus, cuius rudimentum fortassis erat dolor ipse Ventriculi in Accessu Tertianæ tam fortiter premeus. Curatus autem est Icterus propriis remediis; & licet pertinaciter pluries recurreret cum unico insimul febrili Accessu, cuius statim soboles erat Icterus ipse, continuato tamen vulgarium remediorum usu, omnimode sublatus est. Successit postmodum molesta convalescentia, plurimis incommodis de genere hypocondriaco identidem scatens, quibus circa Solstitium hybernum sopitis (decubuerat autem illa sub finem Æstatis) mox circa Æquinoctium Verum reviviscentibus, & paullopost in totum extinctis, pristinae, Deo dante, valetudini est restituta.

XIV. Dum hæc primum disponerentur Prælo, D. Comes Antonius de Marchettis Præses Armorum Civitatis Re-

gii, Patriciusque illius Urbis, decumbebat ex Intermittente Tertiana simplici primum, mox duplici. Jamque septima transierat dies, cum ingruente octavæ diei paroxysmo suapte natura levior, parumque cæteroqui conspicuo, ab insigni insimul Cardialgia correptus est, vi cuius frequenter animo deficiens cum pulsu exili, & laboriosis sudatiunculis, totam accessionem non sine gravi periculo, & assidentium metu transegit. Gravis hæc accessio cum novo symptomate jugiter conjuncta ansam dedit tribus curantibus, doctisque Medicis conjectandi, eam esse probabiliter accessionem nonæ diei insigniter anticipantem; sed illa vix paululum declinante vera successit potior Accessio cum renovatione ejusdem Cardialgiæ, quæ eousque processit, ut de Vita Egregii illius Viri, de cuius salute Urbs tota erat merito sollicita, non parum metuerent iidem cordati Medici, qui proinde præter medica præsidia subitam quoque Sacrorum administrationem institui iussere. Mane sequenti (agebatur jam dies morbi decima) consilio inito, statutum est inter eosdem Medicos tentare paroxysmorum, adjunctique symptomatis mitigationem, & omnimodam paulatim abolitionem per usum Chinæ Chinæ. Quamobrem parata est tinctura levis ex illius *unc. j.* extracta cum *lib. v.*, ni fallor, aquæ cuiusdam stillatitiæ, cuius percolata infusio exhiberi decernebatur ad *unc. iv.*, vel *v.* singulo trihorio. Et quoniam hujusmodi infusio ipsis præscribentibus Medicis visa est nimium diluta, ideo roborata est additione *semidrachma* Corticis in substantia, adjungendæ cuilibet infusionis, seu tincturæ cyatho. Advocor interim & ego Regium Lepidi hac una de causa, annuente ipso, ac tantum non imperante Serenissimo Duce; dumque hora ejusdem diei 14. illuc pervenio, video actu exhiberi primum cyathum infusionis cum additione antedicta. Narratur mihi morbi series, periculumque tum prægressum, tum imminens ex Accessione, & Cardialgia, quarum utraque primis horis no-



## CAPUT II.

ris nocturnis expectatur, durante nihilominus, ac tantummodo imminuta Accessione antecedente, Febreque idcirco continua jam reddita. His intellectis, quoniam conveniebamus omnes in Indicatione, & Remedio, nil aliud mihi proponendum superfuit, nisi methodus validior, quam propterea pro viribus inculcavi, eo maxime quia methodus blanda videbatur relinquere Aegrotantem adhuc obnoxium periculo, & Remedium dedecori. Acquievere statim ratiocinio huic Docti illi, & ingenui Professores, unanimiterque vota sua meo qualicunque associavere. Evestigio igitur oblatae sunt *drachmae tres* Corticis ex Vino, octoque circiter horis elapsis repetitae sunt *duae aliae drachmae* pariter ex Vino; alia vero *sesquidrachma* noctu offerenda relicta est. Hac statuta, & magna ex parte impleta jam methodo, discessi hora 21. Mutinam redux, relinquens prognosticum, quod nocte sequente levissima, ac vix perceptibilis futura esset Accessio, & quod continuato ad *drachmas* tantum *duas* altera die remedio, Accessio subsequens (ipsius videlicet undecimae diei) nullo pacto esset adventura. Ita adamussim evenit, prout literae curantium Virorum me certum reddidere. Protractus deinde est usus Corticis ad aliquot dies, primo quidem ad *drach. j.*, deinde ad *drach. ss.*, eoque post debitum temporis intervallum modice repetito, probe restitutus est Aeger, & supra plurimum expectationem a vera recidiva servatus immunis, utut liberum vivendi regimen, debilior nativa stomachi constitutio, & habitualis, insignisque Tibiarum tumor vix tale quidpiam futurum suaderent. Haud tamen inficior, familiaria ipsi incommoda usque permansisse, de more tamen semper circumgesta, unamve insuper, ac alteram Febriculam, occasione praesertim assumpti suasu Pharmacopolae Solventis, exacto circiter bimestri spatio illum corripuisse: quae tamen Febriculae uni statim venae sectioni, aliisque levissimis, paucisque remediis facile, ne dicam sponte, cesserunt.

*Historia mirabiles Perniciosarum Periodicarum agentium lethaliter in secundam praesertim Corporis Regionem, curatarum eadem Methodo. Harum differentiae sunt: Primò Diaphoretica, Secundò Syncopalis, Tertiò Algida, Quartò Subcontinua Malignans.*

## DIAPHORETICAE.

I. **A**NNO 1696. tot, & tam varias experiebar in me molestas, insolitasque sensationes, quas hic referre non vacat, meque a me ipso tam diversum noscebam, ut lethalem mihi ægritudinem impendere, nisi per quampiam aliam salubrem affectionem Chronicam, puta Quartanam, praeservatus forem, pluribus amicis conterraneis ore tenus, exteris vero media literarum communicatione, non semel nunciaverim. Hac de causa ad praecautiorem (metuebam etenim violentum aliquid in nervoso genere, vel circa originem illius) plura praeter morem meum meditatus sum, & expertus. Ipso namque Januarii Mense bis mihi venam seculi: adventante Vere venas hæmorrhoidales aperui; atque ex ipsa pharmacacia alterantia non pauca, praecipue Chalybis Tincturam, aliaque non infimæ notæ deprompsi, & in usum duxi.

His non obstantibus, die septima Julii correptus sum Febre levi, & brevi, cum paucis horrore invadente, & cum modico sudore penitus soluta, ut ideo de correspondente typo probabiliter tertianario, non esset dubitandum. Itaque post unam intermissionis diem rediit Accessio similis, quæ tamen hoc unum habuit peculiare symptoma, ut durante toto tempore augmenti & principio status, plane obsurduerim, quod nihilominus symptoma cum Febre facile evanescente facile pariter evanuit. Sequenti die, Amicorum curantium suasu (erant hi *D. Cervinus* tunc vivens, *D. Davin-*  
*nus,*



nus, & *D. Ramazzinus*: adstabat vero praxim tunc mecum observans *D. Clericus*) Amicorum, inquam, curantium suasu, quoniam non magna videbatur mittendi statim sanguinis jam antea pluries educti indicatio, serum vaccinum depuratum ad libras tres, & ultra potavi, a quo serosa pariter, celer, & copiosa est subsequuta dejectio. Cæterum immunis a Febre, hilaris, Amicos libentissime excipiens, & vix decubitus in lecto patiens, totam diem alacriter transegi. Altera autem die tertius de more rediit accessus, in cuius principio potius, quam in augmento, quandam pariter, sed leviolem, atque breviorlem passus sum surditatem. Paullo post dum quietus, & sine ulla jactatione consisterem, aliquam ad sudandum propensionem persensi; & licet hæc præcox nonnihil videretur, attamen blandiebar ipse mihi, breviorlem fortassis inde ominatus accessionem. Apparuit itaque statim sudor circa pectus, brachia, collum, & frontem, qui cum perseverasset, nec Febre inde imminueretur, coegit me mutare prognosim, & longam saltem, ni gravem mihi prælagire ægritudinem. Sudorem illum ad aliquod breve tempus bene tuli; sed dum quartum mutarem indusum, mihiq; adjutricem manum præstaret Chirurgus forte ibidem præsens, visus sum mihi de repente hanc sensationem pari, ut scilicet crura transversim uno ictu mihi obtruncarentur, & veluti semisectus exsolverer: adeoque symptoma, quo premebar, paululum meditatus exclamavi — Sentio aliquid in me, vi cuius vel quam cito morior, vel sensationum mearum compos non sum — Duravit hæc sensatio per aliquod spatium temporis; cum tamen interim motum haberem, & sensum in illis iisdem partibus liberum, ac exquisitum, mentem alacrem, pulsum validum, faciemque, ac oculos (quod in opposito speculo intruebar) a naturali statu parum, ac fere nihil distantes, aiebam, me vix mei compotem esse posse, cui, dempta Febre, robusto mors tamen proxima videretur; forte igitur hypochondriaca

quapiam illusionem tentatum me censui.

Post hæc paulatim remittitur sensatio illa molestissima; sed sudor notabiliter augetur, & cum sudore ipsa Febre, quæ cæteroqui minui debuerat. Agnosco tunc, me colliquari ex continua, & semper adaucta sudoris etiam male repentis profusione. Pulsus fit parvus, & celer, viresque non parum labefactantur. Superveniunt interea mihi faventes Amici Medici, & stupent novitatem rei; nondum tamen præcipitem exsolutionem, quam ego mei conscius me patenter experiri iisdem inculco, plane approbant. Non dissimulata tamen rei valde gravis veritate, iudicium suspendunt ad duas horas, post eas scilicet elapsas me iterum inspecturi, remanente tantummodo apud me præter *D. Clericum* Adstantem *D. Cervio* Collega quondam meo. Redeunt itaque hora statuta *D. Davinius*, & *D. Ramazzinus*; & cum me undequaque sudore frigidiusculo diffluentem inveniant, audiantque ab aliis, & ex pulsu ipso dignoscant, quantum de hora in horam deterior fiat conditio mea, statim præscribunt ea omnia, seu ea pauca, quæ in hisce arduis casibus suppeditare potest curta Medicinæ suppellex. Perseverat nihilominus pari passu sudor, intenditurque eo magis Febre: minutus, exilisque fit pulsus, crescit exolutio virium, maximaque fit mihi angustia, compressio, & flammea sensatio circa præcordia; nihilque mihi magis laboriosum, ac noxium, quam somnus, a quo, statim ac illum cogerbar admittere, lassitudine victus illico expergiscebar cum repentino tremore, anxietate, & inexplicabili molestia, ut ideo quietem illam omni cura studerem evitare. Jamque nox erat admodum protracta, nec plus quam per unam, aut alteram horam distabat dies. Cumque mihi celeri passu viderer deficere, sciscitatus sum *D. Cervium* (qui cum *D. Clerico* insomnem totam noctem ibidem transegit) ut explorato pulsu, & pensitato mature statu meo aperte diceret, quemadmodum nostra ferebat amicitia, an crederet, posse me expectare diurnam



nam lucem pro assumendo Sanctissimo Viatico, ut jam vespere communi consensu sancitum fuerat, an potius periculum esset, ne diem præveniret mors, uti videbar ex sensationibus meis posse suspicari: quo casu omni celeritate mihi ministrari, prout Catholicum decet, Sacramenta omnia enixe precabar. Nequivit tunc lachrymas cohibere tener Amicus [quem in interitu suo paribus lachrymis perlui] præ manibus pulsum meum detinens, diuque contrectans: tandemque post non brevem hæsitantiam, inquit — Tam parum distat dies, ut probabiliter credi possit adhuc tempestiva unius, aut alterius horæ dilatio: interim admonebimus post paucillum adhuc temporis Parochum, ut cuncta disponat satis prompte, ut sollicitudini etiam tuæ morem geramus — Arque ita valde diluculo ex largitate infinita Dei absoluta sunt cuncta, compleroque præcipuo Animæ negotio, & condito successive testamento, animum etiam converti ad sanitatis curam. Et cum jam a vigintiquatuor horis febricitarem ex novissima accessione, essetque nihilominus ea vel tunc longe intensior, ac fuissent antecedentes tempore summi vigoris, sudorque etiamnum protraheretur non tanto quidem profluvio, sed cum difficillima semper tolerantia, clareque cognoscerem, quod etsi illa die sperare possem leviusculam Febris, & colliquativi symptomatis remissionem, vitæque ipsius protractionem, adhuc tamen sequenti die mors mihi inevitabilis imminerebat, statim *sex drachmas* Corticis Peruviani in tenuissimum pollinem redacti mihi afferri jussi, quem manibus ipsis meis, tremulis licet, in Vino infundere volui, & asservari in pyxide usque ad adventum reliquorum Medicorum mihi faventium, re prius cum *DD. Cervio*, & *Clerico* communicata.

Accedentibus itaque *DD. Davinio*, & *Ramazzino*, postquam diversa illorum audivi ratiocinia, & proposita hinc inde remedia (circa quæ omnia non pauca utrinque ambages fuere) consue-  
ta inter nos libertate loquendi eisdem

obtrinxi, ne gravarentur fateri, quod ego jam optime conscius periculi mei evidenter noscebam: nempe *Primo*, remedia vulgaria, circa quæ plurimas audieram dubitationes, & noveram difficultates, id certi præferre, ut essent imparia huic morbo sanando: *Secundo*, futuram saltem Accessionem per 24. circiter horas tantum distantem, ab hujusmodi remediis inhiberi non posse: *Tertio*, eam periodum absolute crastina die futuram esse ultimam vitæ meæ. Judicium hoc absolute prolatum dum cauta tergiversatione modificare tantillum studebat *D. Davinius*, Artis nostræ, & præsagiorum ejus incertitudinem recolens, periculum tamen maximum nequaquam dissimulans, *D. Ramazzinus* in eum conversus — Cum Professore (inquit) sanæ adhuc mentis, suumque statum perspicue dignoscente, ulli officiosæ dissimulationi locus non est. Dein conversus ad me — Ingenue (inquit) vera fateor, quæ dicta sunt de nostrorum remediorum incertitudine, atque imbecillitate; fateor pariter, ab illis crastinam accessionem inhiberi non posse; fateorque insuper eandem, si non absolute inferat mortem, talem saltem illaturam esse perniciem, ut quod cras non contingit, postridie tamen sit eventurum. Sed (subjunxit) quid aliud ex hoc inferre potest vir prudens, nisi quod tentanda sint omnia Artis conamina, eaque, qualiacunque sint, manui Dei adjutrici committenda cum indifferentia ad exitum quemcunque? Suspicabatur siquidem Ille, quod cognito pro irreparabili exitio meo nulli remediorum incommodo me vellem subicere. Ad hæc itaque respondi: non alia de causa me exquisivisse judicium illud de statu meo, & ingenuam confessionem de inefficacia præsidiorum mihi propositorum, nisi ut remedium majoris spei in casu ferme deplorato ipse quoque proponerem. Corticem idcirco in pyxide asservatum ambobus inspiciendum exhibui: casum *D. Comitæ Nogarola* anno antea cto sanati *D. Davinio* commemoravi, & casum *D. Levizzani*



pag. 140. descriptum D. Ramazzino, aliosque casus non ab similes successive innui: aliquid simile de me ipso, saltem pro tunc hac eadem via nequaquam desperans. Atque ita implorata prius, si iisdem placuisset, dein impetrata permissione, quam illico consequi fuit facillimum, *sex integras Corticis drachmas* in Vino paullo ante infusas uno haustu potavi. Quid plura? Tota quidem die Febris perseveravit in eodem fere statu, sed sudores [semper circa frontem, collum, & pectus] satis moderate fluxerunt, noctuque, cum placide nonnihil quievissem, fere omnino fuere suppressi. Mane sequenti remissa notabiliter est Febris, neque hora suspecta quicquam suscepit incrementi; immo conspicua magis declinatione, etsi esset dies afflictioni destinata, semper decrevit; adeo ut tertia die post assumptum pharmacum ab omni Febre immunis omnino remanserim, atque ab omni symptomate.

Supererat, ut Corticem repeterem ad diutinum tempus; sed quia menti meae a pluribus jam mensibus, ut dixi, alte infixum erat, indigere me morbo depuratorio ad abluendas, & absumendas meorum fluidorum sordes (quas plurimas esse ex inusitato plurium mensium torpore, segnitie, somnolentia &c. alias conjeceram) ideo decrevi absolute, velle me Recidivam, quam certo opperiebar, pati potius, quam eandem forte declinando per continuatum usum Corticis fluidorum mei Corporis depurationem forsitan impedire, leviozem interim, ac diuturniorem relapsum in Febres mihi metipsum ominatus. Quod si, aiebam, contingat, ut recidiva hæc sit peior (quod non facile tamen crediderim) radice sua, vel eidem æqualis, mihi sat sit semel vixisse: neque enim mens est contra stimulum calcitrare, si sit in Fatis, ut moriar. Per dies undecim Febre vacavi. Octo ex his jam præterierant, ego vero non sine magno labore valebam e cubiculo egredi: adeo namque ponderosas citra tumorem tibias sentiebam, ac si plumbo essent obductæ; indicium mihi manifestum futu-

ri relapsus. Undecima tamen die omniconatu, quem exerere poteram, adhibito, Ecclesiam [inter quam, & domum meam sola media erat Via] adivi, die videlicet 25. Julii, domumque reversus, statim a prandio Febre iterum correptus sum, quæ duplicis Tertianæ Subcontinuae ab initio typum habuit, nullo sudore, nulloque præcipiti symptomate comitata. Cum autem ab illa, remissionem forte sufficientem ut Cortici obtemperaret circa initia saltem servante, curari renuissem per usum repetitum ejusdem remedii ob rationes allatas, acquisivit illa paullo post characterem Febris acutæ, a qua methodice ab iisdem DD. mihi faventibus sedulo curatus sum, superata videlicet opportunorum auxiliorum usu intra undecimam diem acutie, vi cujus in novum grave, sed non tam præceps discrimen adductus eram. Pariter intra vigesimam modificata est quædam, quæ rursus succreverat, recrudescentia, & abolita intra quadragesimam omnis Febris, etsi longam postmodum convalescentiam nocturnis, anomalisque motibus Febrium æmulis interspersam duxerim.

Illud denique non prætereundum (atque hujus historiæ prolixitas nonnullarum brevitatem compenset) quod, etsi aliquot ab hoc morbo præterierint menses, atque ipse Ruri degens satis firmo talo spontaneis laboribus, & assiduæ venationi indulgerem, si quando tamen Rheda vehebar, pedibus, ut mos est, supra Rhedæ pontem impositis, statim eam, vel similem saltem experiebar transversim in mediis cruribus sensationem, quam tertio *Diaphoreticæ perniciosæ* paroxysmo fueram expertus, adeoque, ne leviuscule saltem animo deficerem, quod prope sentiebam, opus erat, ut tibias horizontaliter collocarem, vel aliquo saltem modo, sive manu, sive aliter suras fortiter comprimerem, tremulo durante Rhedæ motu, quo auxilio adhibito nihil amplius percipiebam incommodi; duravitque sensatio ista ad duos, vel tres menses, ut ideo tunc, quantum licuit, ab usu ipsius Rhedæ abstinere fuerim



fuerim coactus. Tractu dein temporis non diuturno hoc ipsum quaecunque evanuit incommodum, & ab eo tempore in hanc usque diem mihi [Deo dante] valetudine firmiore ac antea perseveranter utilicuit.

Historiam autem hanc prolixam non ideo per extensum exaravi, quia eam inter insigniores collocem (plures enim graviores, si non quo ad malum exitum utrinque imminentes, saltem quo ad statum actualem Aegrotantium longe majori languore obditorum, & tantum non expirantium, in subsequentibus strictius sum relaturus) sed quia, cum mihi de cunctis intime conscio omnia phaenomena probe innotuerint, eorumque adhuc sum memor, operæ pretium duxi cuncta enarrare ad illustrandam praxim, ut possimus quandoque percipere, quod saepe Aegrotantes nequeunt se solis, nisi a nobis minute interrogantibus adjumentum capiant, satis dilucide exponere.

II. Vix evaseram ab enunciata ægritudine, nec adhuc convalescentiam meam plane compleveram, cum ob otio furis accitus fui ad curam Præclarissimi Viti D. Marchionis Joannis Galliani de Coccapanis a Secretis, & Status Consiliarii apud Serenissimum Ducem. Is tunc sexagenarius & ultra, gracilis, arthriticus, nephriticus, studiisque, curis, & arduis assidue negotiis defatigatus, in quarto Tertianæ Intermittentis paroxysmo sudorem tam copiosum, & laboriosum passus est, ut ab eo sensim refrigerato, & incrementum Febris loco declinationis inferente, brevi fuerit ad extrema redactus. Decumbebat jam perpetuo supinus sine ullo motu, & anhelosus; sudatiunculam assiduam, frigidam cum carnibus summe frigidis, & extremitatibus impense lividis patiebatur, pulsumque potius nullum, quam formicantem habebat. Non loquebatur sponte; interrogatus tamen respondebat, sed sepulta, & clangorem edente voce. Urina illi mingendi immemori omnino suppressa cum distentione vesicæ, sed absque ulla perceptione stimuli. Lingua

*Torri Therap. Spec.*

nigra erat, & aspera, ductoque hiant ore spiritu arescens. In hoc statu, in quo non amplius distinguebantur temporaneæ paroxysmi vicissitudines, incrementi videlicet, aut decrementi, sed angustia semper majore cuncta ruebant in præceps, Aegerque ad interitum properabat, vix cibum capiens, & sacris jam Ministris plane commissus, peracta prius ope Catheteris meliore, quo licuit, modo lotii extractione, Corticem illi propinare tentavi: quod cum tandem non sine difficultate successerit, cumque methodum meam in actum exerere perfecte potuerim, ille intra paucos dies incallescens, nec ullis deinceps accessibus prehensus, sensim, paulatimque restitutus est, & post diuturnam, laboriosamque convalescentiam [ratione dysuriæ superstitis] perfecte sanatus, obnoxius tantum consuetæ Arthritidi, atque dysuriæ, quibus periodice duntaxat recurrentibus, ad annos XV. vegetam, activamque Vitam inde protraxit, donec expleto LXXVI. annorum cursu, e vivis decesserit, atroci dysuria confectus, & duplici post obitum reperto Vesicæ Calculo.

III. D. Comes Andreas de Sanctis filius unicus Cl. quondam D. Nicolai a Secretis pariter, Statusque Consiliarii anno 1705. duos faciles sine tamen frigore invadentes passus paroxysmos Tertianæ simplicis, lato modo loquendo, intermittentis, adeo ut die vacua ipsam secundam Accessionem subsequente ægre in lecto detineretur, catervas amicorum excipiens, & cum illis tota die amœniter confabulans, tertium subiit paroxysmum sine frigore pariter, simulque sine ullo symptomate invadentem. In augmento Febris sudare coepit; cumque illi amans Genitor emulsionem ex seminibus melonum confectam circa horam status vellet exhibere, observavit pulsum magis depressum, ac fuerit in principio accessionis. Advocat statim ille me, serius alioquin adventurum, anceps videlicet, an emulsionem ab Aegro avide expetitam offerat. Observo & ego pulsum celerem, minutum, ac insigniter depres-



depressum; observo profusum sudorem, & jactationem irrequietam. Suspendo emulsionis oblationem, & judicium de morbo ad semihoram. Cumque omnia in pejus, & in præceps ruere satis prænoscam, præscriptis pro tunc Cardiacis refrigerantibus, aliisque usitatoribus in simili casu remediis, Corticem primo a Pharmacopola larga dosi parari jubeo, & asservari, dein insto, alium Medicum in consilium vocari. Fuit is *D. Davinius*, cui cuncta narravi; & quia tota metamorphosis intra unam, vel alteram horam initium coeperat, dixi: me Corticem mea methodo exhibendum parasse, si circa vesperam clariora, & certiora forent indicia imminentis, quod metuebam, exitii. Calculum ille suum addidit sententiæ meæ sub conditione perseverantis, aut adaucti periculi, meæ fidens experientiæ quo ad modum exhibendi, non satis adhuc intime, ut paullopost, eidem notum. Vespere itaque iterum inspecto Ægro, sudorem adauctum, & frigefactum comperimus; pulsum vero magis depressum, & celerem, faciem concidentem, oculos languentes, & irrequietam undequaque jactationem cum luctuosis suspiriis. His visis, statim præmissis Eucharistiæ Sacramento, Corticem, ut paratus fuerat, exhibuimus. Nocte perseveravit frigidus sudor cum anhelitu frequenti, ut ideo anceps *D. Ferrarius* Assidens, an ea ipsa hora Extremam Unctionem illi administrari curaret, metuens, ne in crastinum non viveret, me noctu advocari studuit, qui tamen ab extrema hac sacra functione pro tunc super sedendum duxi. Atque ita, cum mane aliquantulum recreatus, & paucis sudore diffluens Æger reperiretur, strenue repetitus est Cortex: ex quo quarta inhibita est Accessio, cujus loco brevis, sed copiosa, & celer subsequuta est diarrhœa biliosa, colore Corticis notabiliter infecta. Continuatum est autem ad aliquot dies more consueto remedium, Ægerq; brevi, quippe Juvenis, atque robustus ad pristinam valetudinem reductus est, nulla unquam, ne levi quidem Recidiva interruptam.

## SYNCOPALIS.

IV. **A**NNO 1695. paullopost absoluturam non sine plausu (uniquidem Deo sit gloria) *D. Comitissæ No-garola* curationem, obstrepente adhuc per aures Amicorum fausto hujusmodi curationis rumore, anxie advolavit ad me *D. Candrinus* Medicus, instans, ut cum eo ad invisendum *D. Marcum Martini* Professore Medicæ, Amicum suum jam pereuntem in tertio Paroxysmo Syncopalis Tertianæ, me citissime vellem conferre, inspecturus, utrum in hoc casu locum ullum [quod tamen vix sperabat] posset habere peculiaris mea, quam nuperrime audierat, Peruvianum Corticem offerendi ratio. Amico morem gerens, statim cum eodem accedo ad Ægotantem, invenioque jam sacrum Ministrum Animæ commendationem auribus illius intonantem, & candela accensa ad os apposita, spiritus exitum expectantem. Hoc viso spectaculo, ambo flectimus genua, piæ ceremoniæ complementum præstolantes, spectamusque a longe faciem Ægotantis cadavericam, colorem plumbeum, oculos semiclausos, albumque tantummodo exhibentes, anhelitum sublimem, supinumque sine motu decubitus. Excusat se Medicus mecum, & veniam postulat asseverans, quod ante tres, vel quatuor horas, Febre scilicet incipiente, non tam cito periturus videbatur Ægotans. Revera dum ibi aliquantulum moraremur, agnovimus veram Syncopem fuisse in actu tunc cum advenimus, Ægrumque jam sensim ab eadem leviuscule resurgere. Pulsum exploravimus, nec nisi aliquot vix perceptibiles, & cum inæquali pariter intermissione distantes pulsationes observare datum fuit, etsi Febris augmentum jam caperet, & tota, quantâ esse poterat, esset remissio ipsius Syncopes. Sic pariter & alia se habebant symptomata, remissa videlicet intantum, ut non amplius in ipso mortis agone esset Æger, prout fuerat paullo ante, sed tamen ita ut ad vesperam circi-



circiter (erat autem tunc meridies) esset tantummodo protrahenda Vita, videlicet usque ad statum Accessionis. In hoc prognostico concordēs discessimus, dixique ego Assidentibus in eo statu nihil ausis exposcere: quod si Ager vespere viveret, vespere illum iterum inviseremus. Dum petebamus domum, inquit *D. Candrinus* — Si viveret Ager vespere, quid tum? Subjunxi — Si viveret, sique non moriturum crederem nisi futura Accessione, tentarem quod peregi in casu *Comitis Nogarola*. Sed nec is probabiliter tandiu vivet: frequens enim, & gravis hæc Syncope imminētis jam mortis prænuncia est; neque volo ego sub hujusmodi incertitudine subire calumniam inevitabilem, vel saltem derisionem, qua illudetur mihi, tanquam desperatos omnes uno remedio temere restituere præsumenti. Hoc dicto tantillum substiti, quasi me dicti poenituisse; atque interrogavi, num Ager ex Pharmacopæa Fratrum ejusdem Medici medicamenta desumeret: & cum respondisset affirmative, hanc fraudem honestam velle me tentare subjunxi, ut scilicet pararetur validissima (qualem præscripsi in casu *Comitis Nogarola*) Corticis Tinctura, quæ nomine mixturæ cardiacæ insigniretur, offerreturque Aegrotanti post duas, vel tres horas, si viveret, nec esset in agone: hoc tamen pacto fideliter inito, ut si sanitatem acquireret, liceret arcanum develare; sed si occumberet, tantum Confectionis de Hyacintho, vel Alchermes, Aqua aliqua cardiaca dissolutæ, describeret in sua tessera Pharmacopæus, quantum par esset pro æquando pretio absumpti Corticis; ne scilicet mihi calumnia inde eveniret, vel saltem derisio. Factum est illico prout edixi. Extracta est Chinæ Chinæ Tinctura fortis, & Aegro malevivo post duas circiter horas oblata, & non multo post reperita. Vixit adhuc, atque ab Accessione illa, Syncopeque simul evasit. Die sequente exhibitus est Cortex in substantia *ad drach. j.* mane, & sero. Altera die, qua expectabatur quartus Paroxysmus, vix apparuit levis

umbra Febriculæ. Adhuc tamen nemo illum victurum credebat; adeo languidus, adeo debilis, adeo attronitus, & tantum inconcinne gembundus apparebat. Sed quid multis? Continuatō ad aliquot dies, ac repetito remedio cito sanatus est; & longam licet convalescentiam cum intermixtis levioribus Recidivis, necnon diuturnam virium imbecillitatem passus, perfecte convaluit; & in præsentem usque diem nonagenario major feliciter vivit.

## A L G I D Æ.

V. *D. Joseph Barberius* Tertiana Intermittente, primo simplici, mox duplici Ruri detentus (ita tamen ut leviter se haberet, & quotidie potis esset e lecto surgere) ut mihi se committeret, in Urbem delatus est. Eadem sui adventus die, dum solita Accessione corripitur [erat autem dies morbi quinta] adeo perseveranter frigescit, ut nunquam frigori succedat consuetus calor. Jamque plures horæ erant elapsæ ab invasione accessionis; & tamen nec pulsus elevabatur, sed summe depressus, frequens, ac humilis permanebat, qualis videlicet fuerat in ipsa invasione, nec cito ullum calorem externum acquirerebat, cum tamen ille intense siteret, & in se contractus, ac nonnihil hebes de nulla alia re conquereretur. Primo aspectu culpavi illius obesitatem, ratione cujus calor, & pulsus, ut mos est, difficilius sese exererent; sed cum protrahi hunc statum usque in alteram diem cum minima tantum remissione observassem; cumque paroxysmo paullo post subsequente singula intendi vidissem symptomata, Aegrumque jam Algidum universaliter fieri ut marmor, plurimis licet horis elapsis, pulsuque (si fas sit dicere) omnino carere, respirationem augeri, colorem faciei plumbeum, extremitatibus livida evadere cum aliquo etiam mentis torpore, & funesta tenuium urinarum paucitate, statim Sacramentis Ecclesiæ præmissis Corticem Peruvianum præscripsi valida methodo, quo solo in-



lo intra triduum ab omni accessione, & consequenter ab omni periculo liberatus est: quoniam & calor blandus expansus est per universum corpus, & pulsus paulatim elevatus, ac similipor-  
 tione restituta respiratio, ut & resti-  
 tutus naturalis faciei color, urinarum-  
 que debita cum abundanti simul quan-  
 titate consistentia. Paucis postea elapsis  
 diebus, a pauxilla pariter, & sine exa-  
 cerbationibus superstita Febre immunis  
 evasit intantum, ut valuerit denuo Rus  
 adire. Ibi tamen leviores aliquot, bre-  
 vesque Recidivas passus est; Urbique  
 etiam ipsi restitutus per totam hyemem  
 accessiones nonnullas irregulares, & er-  
 raticas identidem tulit, quas levioribus  
 primo remediis tractavi, mox soli Na-  
 turæ commisi, & adventanti Veri; quo  
 nempe sponte, ac facile evanuerunt.

VI. Strenuus, & ob id celebris Bajus  
 Urbis nostræ, *Julius Salviolus* anno  
 1707. decumbebat Tertiana, ut retulit,  
 (Febre non satis novi, an simplici, an  
 duplici; curabatur siquidem ab alio Me-  
 dico, cujus nomen libenter subiceo)  
 vi cujus Febris septima, ni fallor, mor-  
 bi die de repente ruit in præceps, con-  
 sueta videlicet, sed ferociore Accessio-  
 ne illum inopinato de medio fere tol-  
 lente. Terrefactus jure merito Medicus  
 de alio non cogitat, nisi de Sacramen-  
 tis celeriter ministrandis, & de vulga-  
 ribus Cardiacis. Cumque Ægrum ma-  
 ne sequenti [erat enim tunc sero] mi-  
 nime victurum crederet, dixit Adstan-  
 tibus, ut retulerunt, quod si forte vi-  
 veret in crastinum, nunciarent: alias se  
 minime rediturum. Funesto huic præsa-  
 gio justam occasionem dedit Algor uni-  
 versalis Ægrotantis, & perseverans abo-  
 litio pulsus. Cum vero in hoc statu per-  
 mansisset Æger per totam noctem, ma-  
 ne nescio quo spiritu ductus, institit ad-  
 vocari non Medicum suum, sed me, qui  
 alias in casibus arduis, & signate de vul-  
 nere quondam Abdominis penetrante il-  
 lum feliciter curaveram in Nosocomio.  
 Advocor itaque per internuncium titu-  
 lo caritatis, ut Hominem jamjam per-  
 euntem velim solari saltem, si non sit

locus curationi, mihi que interim subtri-  
 cetur circumstantia, quod ab alio cure-  
 tur Medico, cum quo nulli alii facile  
 est convenire. Accedo ad Ægrum, il-  
 lumque intueor a se ipso valde dissimi-  
 lem, exhaustum videlicet, ac si a duo-  
 bus jam mensibus ægrotasset; pulsus  
 diligenter perquirens, non percipio;  
 carnem vero universi corporis sentio fri-  
 gidam, ut marmor, urinamque paucam  
 video, ac impense rubram. Cæterum  
 mente alacrem, parum siticulosum, at-  
 que oculis adhuc vividis, sed supra con-  
 suetudinem micantibus præditum repe-  
 rio. Tum inquit ille — Jam nosco, &  
 sentio me mori. Deo dante munitus sum  
 Sacramentis, & promptus ad implen-  
 dam voluntatem Dei. Curabar ab alio  
 Medico, qui me jam mortuum putat,  
 heri siquidem sine pulsu me dereliquit;  
 an modo sim in eodem statu, ignoro:  
 agnosco tamen, me sic diu vivere non  
 posse. Nihilominus obsecrote, ut velis  
 curam mei suscipere, & dimissis omni-  
 bus delicatulis inspectionibus adjuvare  
 me, si ullus (quod vix credam) locus  
 est saluti meæ — Denique cum me hæ-  
 sitantem nosset, ne scilicet viderer in-  
 jurius alteri Medico, cum quo cætero-  
 qui de remedio convenire erat impossi-  
 bile, nil intentatum reliquit, ut me  
 suaderet ad opus: recolens, quod ab an-  
 tiquo Pater ejus fuit famulus Patris mei;  
 quod idem meus Genitor Ægrotantem  
 ipsum suscepit ad Sacrum Baptismatis  
 fontem, & similia. Sed mea jam me sa-  
 tis suadebat conscientia, ne illum for-  
 te sanabilem desererem, intentato re-  
 medio innocuo, & probabiliter saluta-  
 ri, videlicet Cortice, priusquam nova  
 insurgeret lipyriam referens, & plane  
 lethalis accessio.

Difficultas erat circa modum offeren-  
 di remedium, & evitandi calumniam,  
 si occubuisset Æger, vel censuram inur-  
 banitatis, si infcio Medico curante ob-  
 tulissem. Proposui ideo Febrifugum, ac  
 præscripsi in schedula juxta dosim, & me-  
 thodum in hisce casibus mihi familiarem,  
 dixique Ægro, & Assidentibus, statum  
 illius esse summe periculosum, ut ipsi  
 nosce;



noscebant, non tamen esse plane desperatum: & si quidquam esset, quod posset illum sanare, esse id solum, quod in ea schedula præscriptum prostabat [eo siquidem solo plures etiam pejus degentes sanati fuerant] an vero idipsum illi eventurum esset, me plane ignorare. Monui idcirco, ut iterum, ac statim advocaretur Medicus curans, illique nomine meo ostenderetur ea schedula; & quodocunque ipse eam approbasset, eadem uterentur: sin minus, sequerentur opinionem, quam vellent; neque enim amplius opus erat intervenitu meo, dum eo remedio uterentur, prout præscripseram, multoque minus, si non uterentur. At cum mihi obtruderetur [quod & ego certo prævidebam, neque ideo conscientiae meae videbar integre satisfacisse] hoc esse idem, ac nihil agere, ob prævisam indubitabilem rejectionem, & proscriptionem remedii, intimo quodam impetu motus sum ad id exequendum, christiana videlicet impellente caritate, quod nunquam peregeram, & quod nunquam posthac, nisi in similibus circumstantiis acturus sum. Spreto metu calumniae, neglectoque omni officio, Vitæ Ægrotantis infenso, auxilium spondi, statimque domum meam adii, & Corticem, quem penes me ad domesticos usus asservo [nil autem aliud medicamentosum degit domi meae, neque ipsa Theriace] in Vino disposui partitis dosibus exigentiae proportionatis.

Et quoniam casus urgens Nobilissimæ Virginis me celeriter advocabat longe ab Urbe, opus plene adimplendum commisi Juveni praxim sub me addiscenti, qui egregie opus ad suum complementum provexit; unde redux ego in Urbem inveni Ægrotantem [primus quippe fuit ille præ nobilibus, penes quem fuerim] jam excalefactum, & pulsu aliquo donatum. Cumque nulla amplius ab epoto valide medicamento Accessio apparuerit, sensim ac sensim intra paucos dies integre restitutus est. Dolui equidem, quod pendente usu, & actione Corticis, cum Medicus ordinarius

nil tale sciens, & ad Ægrum suum invisendum sponte reversus, pretiosa illi medicamenta, ipsamque resurgente pulsu Salvatellæ sectionem præscripsisset, Adstantes simulassent cuncta fieri, quæ ille quidem præscripserat, sed quæ vere nullatenus fiebant: magisque doleo, quod dum lætabatur ille de curatione felici, quam lubentissime illi concessissem, rem totam revelassent eidem, & in me forte indignationem illius concitassent. Sed quis plebeculam novit continere? Uno verbo; me vix bis, aut ter Ægrum invisente, tota curatio felicissime peracta est. Et licet ob diurnitatis impatientiam ad paucos tantum dies passus fuerit Æger remedium paulatim assumere, & deinceps renuerit illud repetere: immo licet prava victus ratione uteretur, & laboribus, ac ludis nervosis intemperanter indulgeret, nullam tamen unquam recidivam fuit expertus. Quod magis fortasse miratus erit Medicus ordinarius, qui re Corticis intellecta maximum illi timorem incusserat de morte nihilominus propter usum Corticis intra annum inevitabili Fato subeunda.

VII. *Jacobus N.* Auriga Serenissimæ Ducissæ Brunsvicensis Dominæ meae laborabat Tertiana duplici, illique medicinam faciebat alius a me. Is cum morbum repente fieri prope lethalem nosset, me accivit, qui, ut teneor ex officio, lubenter accessi. Algebat jam a duobus diebus Ægrotans, pulsus erat illi vix perceptibilis, sudatiuncula frigida colum, frontem, & superiores artus occupabat; Urina crassa erat, pauca, atque admodum saturata, anhelosa respiratio, supinusque decubitus. Adhuc tamen manifesta erant nonnihil statis horis subobscuræ cæteroqui accessionis indicia, necnon perceptibile levamen aliquod matutinis horis. Oblatus illi est ideo nulla mora interposita Peruvianus Cortex methodo mea, atque intra paucos dies sanatus est Æger, novam tamen post mensem circiter recidivam passus, a qua debiliore quidem, sed diutius protracta, novo tandem



usu Corticis perfecte liberatus est.

VIII. Ad Algidas referam quoque Febrim, mihi cæteroqui in exortu suo ignotam, qua derinebatur *D. Marcus Antonius Origonus* Sacerdos septuagenarius circiter, & in Juventute sua celebris Cantor. Curabatur ille Febre, ut aiebam, nescio qua a Medico Chinæ Chinæpenitus adverso: erat nempe ille idem, qui curabat Bajulum *Salviolum* nuper relatum. Is Febrim carere periculo, ac benignam esse, semper asseveraverat, ut relatum fuit, cum nocte quadam [nescio quo casu] Æger ruit in præceps; perfrigeratur repente totus, minuto sudore circa pectus diffluit, & circa superiores artus; fit subinde anhelosus, pulsuque fere abolito languet, ac deficit. Diluculo summa celeritate advocatur Medicus, qui re inspecta institit statim administrari Ægro festinanter deficienti Sacramenta Ecclesiæ, non aliud quicquam agendum superesse, falsus. Interrogatus postea, unde tam præceps exitium in morbo, quem ultima etiam visitatione tutum pronunciaverat, respondit ea ipsa nocte morbum eundem malignam impense naturam adeptum fuisse, neque de repentinis hisce mutationibus prævidendis, aut prohibendis, sicut nec reparandis, Medicum teneri. His auditis, convocatus est alter Medicus, nempe *D. Florianus*, ut casum inspiceret, consultaturus postea de remediis cum Medico ordinario, si locus fuisset. Inspecto autem Ægrotante, & intellecta rerum serie, respondit iste: exitium esse irreparabile; deinde subdidit, forsitan in hoc casu locum habere posse peculiarem quandam meam methodum exhibendi Chinam Chinam, prout a me in colloquiis familiaribus alias audierat: ideoque horratu est consanguineos Ægrotantis, ut me potius advocarent, & abiit. Ne vero ego renuerem alienam curationem suscipere solus, vel cum Medico Corticem non admissuro altercari [abstinere siquidem a curationibus alienis, & ab altercationibus mihi summa religio est] innuit, optimum consilium esse, ut preces porrigerent Sereniss.

Ducissæ Brunsvicensi, ejusdem Sacerdotis benignissimæ Protectrici, ut me ad illum invisendum, atque curandum mittere dignaretur. Ita ad unguem factum est. Accedo itaque jussus ad Ægrotantem, & invenio in statu supra relato. Nil valet ipse respondere præ languore interrogationibus meis, neque ab Affidantibus quicquam aliud extorquere possum, nisi quod tolerabiliter se habere videbatur diebus antea, sed quod nihilominus illum assidue febricitantem crediderunt, etsi Medicus bene habentem pronunciasset. Tandem protulerunt tanquam rem indubitatam, Illum diebus semper imparibus, & alternis pejus notabiliter habuisse. Hac una fretus circumstantia, Corticem illico præscripsi *ad unciam semis*, quam intra tres, vel quatuor horas duplici haustu potavit. Die sequenti pulsus aliquantulum resurrexit, nec ulla sensibilis accessio observata est. Repetitus est Cortex *ad drachmam unam* mane, & sero die subsequenti, dein per aliquot successivos *ad drach. ss.* semel tantum in die, intra quos dissipatis lethalibus omnibus symptomatis Febris evanuit, remanente tantummodo maxima virium imbecillitate, & recurrente post duas, vel tres hebdomadas una, vel altera recidiva levior, eodem Cortice repetito sublata, sed difficili convalescentia superstite: adeo ut non prius, quam post tres menses, valuerit domo egredi, & sacrificium offerre. Vixit tamen ad plures annos incolumis, atque vegetior ac antea.

IX. Ambigo, utrum ad Algidas pariter, an potius ad Diaphoreticas (quippe quæ parriceps utriusque naturæ visa est ante inhibitum illius progressum) referam Febrim, quia die 17. Februarii anni 1709. correptus est Nobilissimus Adolescens *D. Comes Claudius Rangonus*, robusto æque, ac obeso corporis habitu præditus. Curabat illum Medicus, cujus quoque nomen lubet subtrahere; non enim cum Opinantibus uspiam mihi res, sed tantum cum Opinionibus: utque mihi in exponenda morbi historia fuit relatum, Febris Ægrotan-



grotantem primo invasit cum rigore, & obscuro frigore, diuturno tamen, ita ut nonnisi post plures horas pulsus depressus, ut tunc temporis assolet, se se extulerit. Frigori fere statim præcox successit sudor in partibus superioribus, quo tum perseverante, tum mox cessante, Accessio nihilominus protracta est admodum, ac tandem soluta. Secunda die bene se habuit, non perfecte tamen creditus immunis a Febre. Tertia die rediit Accessio secunda anticipans cum quadam vomituritione; frigus fuit adhuc minus sensibile, sed longiuscule protractum: cæteræ Paroxyismi vicissitudines, sudor nempe immaturus, & declinationis protractio, eodem prorsus passu processerunt ac antea. Quarta die levius habuit, omni tamen Febre non plane carens, Urinamque reddens turbatam, crassam, rubram, & paucam; quamobrem a Medico curante præscripta est phlebotomia, clystere præmisso. Vespere tamen motu inexpectato novus Paroxysmus supervenit, quo Tertiana de simplici facta est duplex Continua, saltem Spuria, sive per subingressum. Die sequente, morbi videlicet quinta, cum nova, & proportionata anticipatione rediit mane hora 15. Accessio ex primariis tertia cum exiguo rigore: adeo pulsus initio Accessionis se minime concentravit, ut mos erat; verum etiam post duas horas, & ultra ab invasione Accessionis, sensibiliter apparuerit. Statim vero, & ex improvviso quædam erupit universalis cutanea efflorescentia cum papulis rubris, quæ insignem Ægrotanti molestiam intulit; subinde vero pulsus depressus est, ita ut per aliquot horas omnino latuerit, nec ullo tactu potuerit percipi. Ambigebatur tantum, an in sinistro carpo obscura quædam perciperetur pulsus formicantis imago; sed hæc eadem credita est illusio ab ipso Medico curante, vel motus arteriolæ extremorum digitorum tangentis Medici, & valide compri-mentis. Jactabatur tunc irrequietus Ægrotans, nesciens momento temporis consistere, potumque impatienter posce-

bat inexplebili siti vexatus, lingua licet non admodum arescente. Sudatiunculam interim, evanescente jam efflorescentia cutanea, patiebatur circa pectus, & frontem cum angustia, & inquietudine usque crescente.

Horret Medicus his visis, & jure pavet, sociumque in subsidium curationis exposcit. Accedo ego celeriter accitus, & quoniam sperabile videbatur, pulsus adhuc posse resurgere, febrilemque calorem posse se se exerere, licet ad aliquot jam horas uterque lateret, dedi manus adiutrices, ut ea præsidia adhiberentur tum interius, tum exterius, quæ motum humorum, & sanguinis promovere credi solent [quidquid sit de veritate rei] atque ideo cucurbitulas siccas universo corpori affigi consensi, frictiones insimul celebrari, stibiumque diaphoreticum subinde exhiberi, superepotis liquoribus, qui vim illius qualemcunque adjuvare possent: subdens insuper, quod resurgente, ut sperabam, pulsus, oportebat tempestive cogitare de inhibendo altero Paroxysmo periculosissimo, ac probabiliter lethali. Administrata itaque sunt cuncta, & plures elapsæ horæ ab ipsa administratione; nec tamen pulsus redire noscitur, etsi cæteroqui pulsus insigniter elato, ac turgido dotatus naturaliter sit Patiens, obesus licet. Crescit interim jactatio vorticosa, sitisque nullo poru explebilis; sudor ardentis pectoris, & colli jam indusia madefacit, sicco, & vix sub tepido existente reliquo corpore; manus pariter circa carpum sudant subfrigidæ, frons vero, & capilli copioso sudore diffluunt frigido, aut male repente, necdum umbra pulsus apparet. Admonitus Æger de periculo confitetur peccata sua, Venerabile Sacramentum Eucharistiæ mox assumpturus. Interim ego a duabus jam horis & ultra inculcabam Medico, necesse esse statim confugere ad usum validum Chinæ Chinæ, nec aliud quicquam superesse, a quo Vita Ægrotantis posset servari: altera siquidem die, dummodo tandiu viveret, novus debebat ingruere ex suborta



jam Febris duplicitate Paroxysmus, & subsequente postmodum die valde diluculo gravior alter, atque lethalis. Fatebatur Ille periculum praesens, fatebatur inevitabilem quartam accessionem [ & inde consequenter mortem ] Febrem tamen, duplicis licet tertianæ typum servanrem, ut jam Continuum, atque Malignam Cortici minime cessuram, mordicus sustinebat, ipsumque idcirco Corticem in illa ullo pacto convenire non posse. Opponebat insuper habitum Corporis obesum, in quo non profuturam Chinam Chinam hariolabatur. Obtrudebat etiam in casu jam pereuntis celebrem causæ morbificæ, & humorum fixationem, ac inde futuras recidivas. Has ego cum lubenter admitterem, immo & anxie exquirere profiterer, ac tantum inducias morti, subdebat animose, sæpius etiam Ægrotantes obire cum China China in stomacho, meque diversa asserentem esse nonnihil præoccupatum favore hujusce Remedii, neque se idcirco experientiæ meæ acquiescere posse ( *Experientia siquidem sine ratione*, confidenter ajebat, *est Navis sine Rectore* ) neque in meam sententiam æquo animo esse descensurum, nisi alius quispiam Professor vorum decisivum apponeret. Atque ita, licet nonnullas identidem interfereret officiosas protestationes, humaniorum recordationum titulo convalidatas, me tamen propositi sui tenax usque carpebat. Instabat denique, oblationem Remedii prorogari saltem in sequentem diem, substituens interim illi, immo anteponens Lapidem Bezoarticum, non tam ad promovendum sudorem illum symptomatiscum, quo durante videbat Ægrum in præceptis ruere, quam ad resistendum malignæ, ut ajebat, qualitati, pulsum depressimenti, cujus elevationem China China, ipso judice figens, præstare nequebat.

Ferebam ego patienter hæc omnia, atque ad singula placide respondebam, reponens tantummodo adversus peritam dilationem non modo occasionem præcipitem, sed & Casum funestum, quem

*Lib. 3. Cap. 5. Hist. 2. retuli de prædefuncta Genitrice D. Decumbentis, cui ob ejusdem Medici cunctationem nequivit ad complementum Cortex administrari. Tandem mea fretus experientia, ne dicam, quadam supra Auditorem quondam meum auctoritate, stimulante me acriter fervore servandi, quem ob frivolas cavillationes perire noscebam, coactus sum erumpere in hanc animosam propositionem coram præcipuis Equitibus Urbis nostræ, ipso paulo post conscio Serenissimo Duce Domino meo — Ni Æger iste Chinam Chinam cito hauriat, uti præscribam, illum perendie moriturum prænuncio; si cito hauriat, perendie sanum fore: utrumque autem ea certitudine, qua ignis congrue applicitus comburit stuppam, & non comburit non applicitus — Cum vero his non obstantibus suæ sententiæ immobiliter adhereret Medicus curans, nec alter conquisitus reperiretur, laberetur autem occasio præcepti, Ægerque jam inciperet sensibilius, atque universaliter perfrigerari, durantibus iisdem symptomatis, & præsertim omnimoda pulsus abolitione, Nobilissimus æque, ac omnifaria eruditione conspicuus D. Decumbentis Frater Primogenitus D. Marchio Joannes Maria, qui me uti suum Medicum ad curationem superacciverat, cognito, pro eximio, quo pollet, mentis acumine, parique prudentia, rationum pondere, meæque plurimum fidens imbecillitati, & tribuens experientiæ ( quam pro Cymbula cum Rectore humaniter habet ) institit ea, qua semper assolet, comitate, ac morum suavitate, ut peragerem libere quidquid eo casu proficuum crederem; asserens, id non ægre laturum Medicum curantem, quem ideo hæc audientem, atque silentio tacite comprobantem, secum adduxerat ab Ægrotante ad me. Suspensa itaque ad breve intervallum temporis, quæ proxime celebranda erat, Sanctissimi Viatici oblatione, præmissa est illi, quippe longiusculum tempus exigenti, celer oblatio Corticis jam parati ad drachmas tres ex Vino tenuiore potandas [ Medico curante ne*



te ne cubiculum quidem intrante, forte ne socius criminis videretur] atque eveftigio celebrata eft pariter Euchariſtici Sacramenti adminiſtratio, circa horam nempe inclinantis diei vigefimamtertiam.

Supervenit forte tunc temporis, me vix recedente, *D. Davinius* conquiſitus tempore diſputationis, ut diſſidium componeret, ſed non inventus, qui præterlapſam agnoſcens conſulendi occaſionem circa oblationem remedii, *Ægrum*que intelligens aliis intentum, abiit illo nequaquam inſpecto. Rediit tamen circa primam noctis horam, quo tempore pulſus incœperat nonnihil ſe exere, & laborioſus ſudor imminui. Admonitus eſt de rebus diſputatis, & actis, ac de ſuo circa eas iudicio requiſitus. Reſpondit ille: Remedium jam eſſe propinatum; nec proinde locum eſſe diſputationi, an eſſet propinandum, nec ne. Interrogatus poſtmodum, quid ipſe ſperaret ab uſu remedii, eidem fortassis haud ſatis fidens in tali anguſtia (quippe qui in præcedente, licet longe majore, *Ægrum* non viderat) reſpondit, *Chinam Chinam*, ut & alia quoque remedia, habere ſua vigoris, & inefficaciæ tempora, adeoque in quibuſdam Conſtitutionibus mira præſtare, in aliis nequaquam; quod & in ſuis *Conſtitutionibus Epidemicis Mutinensibus* aſſeruit jam *Cl. Ramazzinus* [licet in illis de *Pernicioſis noſtris* nulla ſit mentio.] Corticem ſcilicet in calidis, & ſiccis Conſtitutionibus prodeſſe; obefſe vero in frigidis, & humidis. Cum vero ea tempeſtate, qua nondum Ver advenerat, nullum adhuc periculum factum eſſet de Cortice, in aliis quandoque tempeſtatibus plurima operato, nullum, inquit, eo caſu ferri poſſe de futuro eventu iudicium. Subdidit tamen præter alia, ut amicum decet, officioſa verba circa uſum, & opportunitatem huiusce remedii plurimum tribuendum eſſe peculiari experientiæ meæ; atque his dictis diſceſſit. Eo vix abeunte, ipſe adveni circa primam pariter noctis horam, invenienſque pulſum ſeſe attollentem, & ſu-

dorem ſymptomaticum pari proportionem ſeſe imminuentem, alacri animo *drachmas duas* novi Corticis ſimiliter ex Vino potandas circa horam octavam ejusdem noctis offerri juſſi, mane vero hora 15. *alteram drachmam.*] Atque ita inæquali hac artificioſa partitione, intra horas ſexdecim *drachmæ ſex* Corticis fuerunt abſumptæ.

Inſpecto tunc temporis *Ægro*, Febrem inveni admodum conſpicuam cum calore univerſim expaſo, & cum pleno, ac valido pulſu, ad quem forte reſpiciens *D. Davinius*, qui mane quoque ſponte *Ægrum* inviſerat, phlebotomiam (ut mihi mox retulit) ſi ſupervenifſem, proponere meditabatur; ſed cum non ſupervenerim, urbane dimiſſus reſceſſit, non rediturus. Accedens autem ego, atque *Ægrum* inveniens jam univerſaliter excalefactum, pulſuque inſigni præditum, utut non modice febricitantem, tanquam rem habens in vado, nulli aliū remedio incerto fidere volui; ſed ſolī Cortici, nullo adjumento indigenti (leviore tantum inde ſervata Methodo) unice inſiſtere. Immediate poſt meridiem, majorem adhuc caloris, & Febris intentionem percipere mihi ſum viſus cum pulſu inſigniter elato, ac turgido. Veſpere autem notabilem inveni Febris remiſſionem [utut eam exacerbata eſſe, fuerit falſo prolutum] cum ſudore blando, ac univerſali, modico tamen, nec admodum copioſo, cui ſucceſſit nox tranquilla cum placido, & ſemel tantum interrupto ſomno, occaſione ſcilicet ſumendi *alteram*, quam præſcripſeram, *drachmam* Corticis; qua epota, pacatum iterum ſomnum uſque in ſequens mane *Æger* protraxit. Erat hæc dies ſuſpecta, morbi nempe ſeptima, qua die circa horam 13. contingere debebat Accessio gravior, quarta videlicet, ſupputatis tantum primariis. Aſt cum ego accederem hora 16. (neque enim ulla me angebat ſolicitudo citius accedendi, ob moralem certitudinem de fauſto futuro eventu) inveni *Ægrotantem*, ut prænuſciaveram, in tuto, exigua videlicet Febre detentum, urinam non amplius



amplius imminutam, rubram, ac crassam, sed copiosam, subcitrinam, ac diaphanam reddentem cum suo eneoremate, omnibusque signis coctionis: uno verbo sanum quo ad sublata lethalem periodum, & quo ad omnia, exceptis reliquiis sensibilibus Febris jam continuitatem adeptæ, quæ tamen reliquæ intra duos tantum dies ( quibus *semidrachmam* Corticis quotidie hausit Æger ad complendam unciam illius ) penitus extinctæ sunt, nullo alio concurrente remedio. Extirpata celeriter in hunc modum Febre, per septem dies vacavit ab usu Corticis, & cujuscunque remedii ( quo tempore non parva fuit difficultas in detinendo domi Ægrotante ) quibus elapsis iterum sumpsit primo mane *drach. j. ss.* Corticis, altero *drach. j.*, & per tres alios subsequentes dies *drach. ss.* pro qualibet vice; & sic novam *semunciam* Corticis ad præcautionem assumpsit. Interjecta vero alterius hebdomadæ quiete, aliam rursus *semunciam* in octo partes divisam intra octo pariter dies [quotidie scilicet ad *drach. ss.*] absorpsit, remedioque terminum posuit die ipsa Verni Æquinoctii, nullam inde, Deo dante, recidivam, nullumque incommodum passus, utur causam Febris intus detentam, fixatam, coercitam non nemo diceret, *Furemque domi latentem, necdum expulsam*, nova damna illaturum hariolaretur.

At bone Deus! Et si recidisset, ut ipse præmiseram posse contingere, quid tum? Nonne is antea, minime expectata recidiva, peribat? Ast inquiet aliquis, qui rem non vidit: Sanatus esset etiam aliis remediis, Lapide scilicet Bezoartico, Cardiacis, & hujusmodi. Effatum hujuscemodi non tam facile admittent periti Medici, & ingenui. *Mercatus* certe, cui notus non erat Cortex, longe aliam prognosim instituit in talibus circumstantiis. De *Mortono*, quippe suspecto, etsi veridico, non loquor. Verum concedatur. Nemo tamen spondere hoc ausus est cum Lapide Bezoartico, ut ego ausus sum experientia fretus, spondere cum Cortice. Tandem

hoc saltem ster: neque tam cito, neque tam blande ullis aliis remediis salutem obtineri potuisse, ut obtenta est usu Corticis, tot Syrupis, tot Confectionibus, tot Cucurbitulis, tot Vessicantibus locum surripientis. Subdet tamen quispiam. Forte tunc erat terminus naturalis morbi. Ita profecto. Febris tertiana duplex continua, & tandem maligna ( talem quippe descripsit ipse Medicus curans ) cum urinis ab ipso initio turbidis, & imminutis, cum sudore frigori Febris statim succedaneo, quæ die quinta constantem inferat, omnimodamque pulsus abolitionem cum sudoribus symptomaticis, partialibus, & male tepidis, jactatione irrequieta &c. vere sollet, dictum factum, ex se solvi feliciter, & aboleri. Hæc adamussim est via, qua quotidie ad salutem itur, sed æternam. Miror sane, quod ante factum nemo hæc tam secunda præviderit, cum ego fidenter prædixerim, innixus tamen virtuti Corticis, meæque de ipso, ac de mea Methodo experientiæ. Sed esto; demus hæc omnia, ipsique insimul Soli lucem denegemus. Quid inde? Saltem ( infero ) Cortex non nocuit, neque obstitit huic palam advenienti felicitati, vel humores figendo, vel aliud quodpiam crimen patrando. Potestne minus tribui remedio tam evidenter admirabili, & pereuntis Hominis liberatori? Sed neque hoc plane concedetur, si quindecim ab hinc annis ephemera corripitur Nobilissimus Patiens. Vivit interim perfecte sanus, viverque favente Deo. Hoc mihi sat est, etsi forte contendatur, illum aliunde vivere.

X. In genere pariter Algidarum Intermittentium insignis est ea, quam me suadente, licet curationi nequaquam præsentem, felicissime absolvit *D. Candrinus*, ut subinde ab eodem accepi, in ægritudine *D. Sigismundæ Nardæ* prope octogenariæ. Hanc itaque in quadam Accessione Febris tertianæ universaliter frigescentem, nec amplius recalescentem, pulsu penitus destitutam, & jam prodeplorata communiter habitam ( id suadente morbi præcipitis violentia, atque ætate



tate decrepita, cum cæteris alioris funestis, & deficientiæ pulsus symptomatis) intra paucos dies integre restituit Peruvianus Cortex post Extremam Unionem mea Methodo administratus, Ægra ad multos postmodum annos superstitere.

### SUBCONTINUA MALIGNANS.

**I**nnumeras propemodum Februm hujusce speciei referre possem historias, & quidem quoad accidentia plurimum dissimiles, in curatione autem simillimas, quatenus omnes jugulatæ sunt uno Cortice Peruviano, modo celerius, modo lentius, modo parcius, modo liberalius, prout opus visum est, administrato. Sufficiat tamen selectiores nonnullas adducere; atque una, vel altera fusius descripta, cæteras strictius, proportionem scilicet a peritis facile intelligibili, transfigere, quarum nihilominus momentum minime levius est, sed saltem æquale, etsi tale non semper appareat, ut ab Ægrotantibus ipsis satis notis, eorumque Assidentibus potest facile quilibet saltem Nostras certior fieri.

Nolim tamen pusillum aliquem, qui viderit in prægressis, & in subsequenti-  
bus Historiis, Sacramentorum administrationem præcessisse fere semper ante administrationem Chinæ Chinæ, sibi suadere id factum in gratiam remedii, quasi illud sit experimentum aliquod periculosum, quod tentare non liceat, nisi prius consulatur Animæ; sed sciat, videaturque, id factum esse ob exigentiam affectus summe periculosi, & exitiicerto imminentis, quoties ob accidens aliquod China China illud remorari potis non fuisset. Quamobrem in illis casibus non aliud actum est in hac linea, nisi quod æque actum foret semoto etiam Chinæ Chinæ usu; actumque est ideo præcise ratione Morbi, non ratione Remedii.

XI. *D. Jacobus de Carrettis* Sacerdos, Serenissimi Principis Foresti Estensis Capellanus, duplici Tertianâ laborabat, intermittente quidem, sed longas, sibi-

que immediate succedentes accessiones habente. Tractu dierum aliquot, non obstantibus remediis ex arte adhibitis, Febris cœpit quandam continuitatis speciem præferre, ut & symptomata Februm acutarum propria; servabat tamen adhuc periodos suas, obscuras quidem, sed aliquo nihilominus brevi rigore, levissimaque extremorum perfrigeratione conspicuas. Succedebat autem statim calor maxime mordax, Coma quoddam semper pervigil, urina summo opere saturata, & quoad quantitatem admodum imminuta, summaque perpetuo linguæ ariditas, atque scabrities sine siti, immo cum omnimoda non curantia potus. Prosequutus sum nihilominus curationem vulgari methodo, prout incœperam, sed irritò successu: exacerbationibus etenim jam fere abolitis quoad signa exteriora, cæterisque omnibus in pejus ruentibus, res eo sensim devenit, ut jam de vita illius actum esse pronunciaverim, spiritualibus tantum auxiliis, Sacrisque Ministris eundem committens; neque enim alium quempiam videre facile est, signis talibus plane lethalibus, non repente, sed paulatim de die in diem acquisitis stipatum, qui paullopost non occumbat. Jacebat siquidem supinus immobiliter quoad omnia membra, brachiis exceptis, ruebat in pedes, respirabat crebro anhelitu, & ore semiaperto; linguam nigram prorsus habebat, scabramque veluti folium borraginis, quam insuper nequibat exerere, dentesque nigro pariter, ac denso lentore obritos. Nullum verbum articulate proferbat; submurmurabat tamen assidue, sermone quodam balbutiens minime intelligibili, jactabatque brachia, quasi quidpiam vellet prehendere per aerem, sed tandem tremulis unguibus nil aliud, quam floccos linteorum carpebat, plicas cum eorum simbriis modo casu conficiens, modo ignarus iterum explicans. Hoc territus spectaculo abii: inumque jam prope attingens januæ vestibulum, conversus ad *D. Franciscum* Fratrem ejus me comitantem, condoleo cum eodem de Fratris jactura. Dum vero sejungor  
ab il-



ab illo, remque jam plane desperatam esse inculco iterum, subdo insimul quasi per modum contemptus, posse tantummodo tentari remedium, quod forte potuisset prodesse, si citius fuisset ausus tentare; sed modo neque sperabile esse levamen ullum, neque possibilem in Ægro deglutitionem remedii, ridiculumque esse in tali statu quicquam experiri. Animum tamen mihi addidit sedulus Frater ut præscriberem quidquid luberet, se offerens paratum ad omnem diligentiam, ut Ægro cochleatim remedium ingereret: mecumque pactum iniit de non revelando cuiquam nostro tentamine, ne aliis quidem Fratribus, jam cubitum euntibus, illique curam Ægri corpoream relinquentibus, ne scilicet remedio infanti opprobrium eveniret, aut culpa in casu evidentissime deplorato. Sub hac conditione præscripsi *unc. ss.* Corticis, quo citius fieri posset [ si quidem absolute posset fieri ] illi offerendam, subdens Fratri, me mane ( erat enim nox ) si Æger viveret, victurusque esset saltem usque ad tempus novæ obscurissimæ exacerbationis, aliquid ultra præscripturum. Haussit Æger cito, licet particulatim, totam dosim, & mane vixit adhuc; cumque aliquam remissionem leviusculam esset assequutus, prout semper horis matutinis quoquo modo antea consueverat, alacriter *aliam semunciam* Chinæ Chinæ præscripsit satis celeriter absumendam. Hanc pariter assumpsit; & ne longior sim, cœpit vespere, Febre non amplius exacerbata, melius se habere, & melius adhuc deinceps progredi; adeoque consueta methodo ad dies aliquot in usum ducta, repetito videlicet sensim remedio, pristinam tandem sanitatem cum segniore tamen convalescentia recuperavit, nunquam amplius recidens, sed plurimis licet ab eo morbo annis elapsis perfecta perfruens valetudine.

XII. Uxor Aurigæ cujusdam Aulici Tertiana duplici violenti motus, validæque intensionis detinebatur, cujus videlicet Paroxysmum quemlibet vix tantillum remissum, plurimumque a solu-

tione distantem, excipiebat superveniens alter, adeo ut Febris esset indefinenter Continua; motum tamen sensibilem servans Intermittentis ad instar. Præmissa, & repetita sanguinis missione, aliisque remediis methodicis, quoniam Febris ad gradum æqualis continuitatis properabat, taliaque celeriter acquirebat symptomata, qualia Febribus malignis, atque lethalibus competunt, decrevi Corticem temperanter saltem adhibere. Erat autem Ægra hæc tunc perpetuo vigil, perpetuo siticulosa, arescebant fauces, & lingua, jactabatur assidue, & non semel absque causa manifesta insigniter deficiebat animo. Urinam tenuem substantia reddebat, & quantitate modicam, pulsumque nonnihil quidem resistentem servabat in remissione Febris, sed in augmento, & statu summæ inequalem. Præscripto leviter, scilicet *ad semidrachmam* in forma boli cardiaci, Cortice per duos dies [ semel tamen tantum in die ] parum profici visum est quoad symptomata, quæ graviora potius fiebant, quatenus aliqua insuper aderat mentis confusio, & torpor; quod symptoma Sacramentorum ministrationem urisit: Febris tamen ipsa ad majorem aliquam remissionem videbatur interim pertinere. Quamobrem eundem Corticem mane, & sero repetendum duxi; quo circa nonam morbi diem peracto, Febris cœpit sensibilius imminui, & perfectam fere intermissionem acquirere; adeoque remedium fidentius continuatum est: sed interim pone unam aurem una Parotis apparuit, & altera die pone alteram altera. Tunc, fateor, non parum hæsitavi circa continuationem Corticis; sed meis motus rationibus, eidem remedio insistendum censui, rursus tamen semel in die, quoniam & Febris parvula facta erat, & Chinæ Chinæ quantitas decens absumpta. Quid plura? Intra decimam quartam morbi diem paulatim evanere Parotides, & intra decimam septimam omnimode Febris, convalescente citissime ( resumptis quippe facillime viribus ] Ægra, nullum inde incommodum, nullamve recidivam passa.

XIII. D.



XIII. *D. Catharina Mundatoria* septuagenaria ingruente Hyeme laborabat Tertiana duplici, per subingressum paroxysmorum Continua, eamque curabat *D. Candrinus*. Cumque accessiones ita inciperent se se mutuo excipere, ut de Continua essentialiter jamjam ille metueret, quod symptomata vehementiora insuper suadebant, cogitavit de offerendo Cortice; anceps tamen cum esset non parum, me statim in consilium vocavit. Ego cum remissionem laudabilem Febris accessu meo invenissem, nec symptomata reputassem adeo vehementia, quin solutio morbi via ordinaria sperari posset, idcirco reservata Corticis oblatione in casu majoris exigentiae, pro qua tempus sufficiens superesse mihi suadebam, ab hujusmodi oblatione tunc supersedendum duxi. Sed paullopost me dicti, & facti ferme poenituit; altera namque die exacerbatio fere insensibiliter, & subdole invasit; in augmento autem, & statu, tota quanta esse potest in Juvene, & tempore æstivo, fuit intensio, & violentia symptomatum. Linguae ariditas, & sitis nullo potu explebilis, jactatio assidua, & integumentorum projectio, urina crassa, & rubra, anhelitus anxius, calor mordax, pulsus tamen interim exilis, celer, & inæqualis, motus manuum, & linguae tremuli, subsultus tendinum, ardor faucium, & ipse singultus erant accidentia morbi. Sperabam equidem, hæc omnia consuetæ remissionis tempore debere remitti insigniter; sed aliud successit ab eo, quod expectabam: protracta namque est Febris, & protracta pariter sunt symptomata. Quamobrem cum mane sequenti cuncta adhuc non parum vigerent, licet parumper remissa, dubius hærebam, metuens, ne lapsa esset occasio exhibendi Corticem. Cum tamen Venæ sectio, aliaque valida præsidia sufficienter administrata fuissent, & periculum esset in mora, si in levioribus hæreremus, non modo ad Corticem confugi, sed quia metuebam imminens exitium in exacerbatione, vel sequenti, vel saltem correspondente, præmissis præ-

causis urgentia Ecclesiæ Sacramentis, illum validiore aliquantulum methodo usurpandum, ac mox repetendum duxi; quod illico factum est: & (mirum dictu!) cessit æque facile Febrifugo Cortici Febris illa jamjam Acuta Continua, sed indolis a primordio periodicæ, ac si prorsus Intermittens fuisset. Quamobrem intra paucos dies perfecte libera evasit Ægra, duas tantum, vel tres leves periodos Tertianæ simplicis intermittentis passa circa Æquinoctium Ver-num.

XIV. Vexabatur anno 1708. Tertianæ duplici insigniter continua *D. Lucretia de Pincettis*, septimum, ni fallor, agens gestationis mensem, eamque curabat *D. Davinius*. In ipso morbi statu, absolutis jam plene remediis generosioribus, & ingravescente nihilominus cum suis symptomatis Febre, non parum periculi in eo præsertim statu portendente, advocor & ego, qui licet accedam hora majoris remissionis, invenio tamen Ægram intense admodum febricitantem, asseriturque mihi, eam vere tunc temporis melius se habere, ac alio quovis tempore. Vix credo ego, posse in hac Febre observari incrementum sensibile, licet Adstantes asseverent, Febrem qualibet nocte cum sensibili, & extenso rigore exarcerbari. Redeo mane, narraturque mihi, Exacerbationem illam, quæ admodum intensa vere observabatur, invasisse cum manifesto rigore, ac frigore Intermittentium more. Huic innixus assertioni Corticem propono, statim ac aliqua fiat exacerbationis remissio, potandum. Annuit subridens *D. Davinius*, & Corticem præscribit leviuscule [sic namque convenimus] in forma boli. Sed cum Ægra deglutitioni inassueta difficulter bolos prima vice assumpsisset [assumpsit tamen] potui autem se promptam offerret, ideo *D. Davinius* Chinam Chinam iterum præscripsit, copiosiore quidem, ut optabam, sed, ut illi mos est, in dilutiori infusione; propterea hortatus sum ego Assidentes, ut diligenter agitent Vas, priusquam remedium



dium exhibeant, ut scilicet turbida, quantum fieri potest, evadat potio, & Cortice imprægnata, repetantque bis in die oblationem. Discedimus ambo; dumque mox inter nos familiariter loqueremur, novissemque ego *D. Davinium* officiose potius, quam ex animo consentientem in usu Corticis, sollicitavi, ut sensa sua libere aperiret. Cui instantiæ respondit, se quoque probe memorem effectuum utilium Chinae Chinae a me in Casibus arduis feliciter ministratae, cogitasse paullo ante de eadem hic adhibenda: sed revera post serium examen se phantasma hoc rejecisse, & modo tantum consensisse propter me, eam ceteroqui non præscripturum profecto, si curationem egisset solus: subdicens se non reputare Febrem illam expugnandam Cortice, quam pro Acuta potius, & fere æqualiter Continua noverat, quidquid de nocturno, ac periodico frigore, aut horrore venditarent, vel imaginarentur [nisi ab alia causa id forte penderet] assidentes mulierculæ. Mane sequenti accedo de more ad Ægotantem, quam die antecedente reliqueram cum Febre vere intensa, & cum symptomatis valde gravibus, Febriumque Acutarum, & ab essentia Continuarum propriis: Cumque nondum advenisset *D. Davinius*, interim interrogavi diligenter Adstantes, an ea quoque nocte Ægra consuetum rigorem passa esset. Et cum respondissent affirmative, ac constanter confirmassent, quod dixerant de noctibus antecedentibus, licet tunc quoque vigeret valide Febris, præsertim quoad frequentiam pulsus [quam tamen ex parte refundebam in gestationem] neque *D. Davinius* accederet adhuc, hortatus sum Ægram remedium averfantem, ut illud e manibus meis velleret assumere, priusquam discederem. Haud difficilem ea se præbuit; quamobrem ego assumpta pyxide, & effuso, abjectoque liqore pulveri subsidenti supernatante, subsidentiam illam crassam, paucoque liqore saturatam, indidi copiose in os illius, quæ cum gustasset, deglutisset-

que portionem satis insignem, renuit bibere quod remansit. Discedenti mihi occurrit obviam *D. Davinius*, cui rem gestam enarro, & insto, ut horretur Ægram ad complendum opus. Ille vero subjunxit, posse nos contentos esse hoc Catone; atque, hoc remedio jam pro viribus nostris administrato, ad alia progredi, licet cum spe perexigua, quæcunque forent, quæ valeremus eligere. Abii ego, adiit Ille, Ægraque superstitem portionem minime assumpsit. Quia tamen assumpserat insignem, intra duos, vel tres dies, obliterationis statim exacerbationibus, invitæ, ut ita dicam, sanata est; dissipatisque sensim paullo post minutioribus Febris reliquiis, ad Partum quoque naturalem feliciter perducta.

XV. Alteram mulierem gravidam octimestrem similiter curavi, nomine *Lauram de Artioliis*, laborantem Tertiana duplici per subingressum continua, sed ad Continuum essentialiter, acutamque properante, intensissimis quippe symptomatis sitis, ardoris, vigiliæ, nausea, vomitus, & aliis hujusmodi comitata, usque tamen incertis quidem horis, sed alternis constanter diebus nonnihil remittente. Huic præmissis remediis methodicis, & repetita præsertim, quæ maxime indicabatur, phlebotomia, cum majus in dies impendere periculum clare cognoscerem, crescentibus scilicet symptomatis, & præcipue delirio fere continuo, non sine gravi metu imminentis, prout signa omnia indicabant, abortus, cœpi Corticem præscribere per modum alterantis, dosi videlicet perexigua. Jamque vix bis assumpserat, cum nocte quadam in vigore exacerbationis ad remissionem vergente, abortum passa est, subsequente pauco lochiorum effluxu. Admoneor de successu jam præviso: & quoniam alia magis urgere videntur, supersedeo parumper ab usu Chinae Chinae, substituoque missionem sanguinis ex pede; incaluerat enim ad intensum usque ruborem facies, & mens erat subdelira. Visa sunt nonnihil augeri puerperia, & tota illa



illa die leviuscule se habuit; die tamen sequente [versabamur circa undecimam, ni fallor; & fere semper in omnibus casibus Subcontinuarum oblatio Corticis peracta est inter septimam, & undecimam diem: quod semel hic monuisse sufficiat] die, inquam, sequenti, procedentibus, licet nonnihil copiosius lochiis, Febris valde exacerbata est, & cum Febre symptomata omnia, itaut vita esset in non levi discrimine, Aegraque ob id Sacramentis Ecclesiae munita. Pulsus quippe celerrimus erat, minutulus, & minime resistens, linguae, & faucium ariditas maxima, sitisque inexplebilis, vomitus fere assiduus materiae porraceae, summa ciborum averfatio, quaedam adhuc alienatio mentis, respiratio frequens, infelixque decubitus. Cum vero Febrem huiusmodi considerassem, ut procedentem a prima radice, sive a fermento, nullam fere cum partu, vel abortu communionem habente, iterum renovavi usum Corticis etiam liberaliorem; quo mediante intra duos, vel tres dies, ut mos est, ab exacerbationibus, & paullo post sensim ab omni Febre immunis evasit, procedentibus semper (quod notatu dignum est) tempore usus Corticis, & repetitionis illius tertium renovata, rite, & juxta casus exigentiam puerperiis.

XVI. *Monialis* quaedam prope octogenaria, ac ideo jam emerita, & Cœnobio Sanctae Mariae Magdalens, quod diu gubernaverat, percata, laborabat duplici Tertiana per subingressum Paroxysmorum continua, suosque motus satis obscuros habente. *D. Davinio* curanti, quippe Medico illius Monasterii ordinario, in societatem adjunctus propono usum Corticis, septima die vix elapsa; Febris enim fere ardens fieri videbatur: tanta erat sitis, ariditas totius cutis, & sine quiete jactatio indefinens; quæ morbi, & symptomatum intensio ætati minime congruens magnum facebat negotium, & sollicitabat auxilia. Cum autem non conveniremus semper statis horis, retulere mihi *Moniales*, *D. Davinium* relinquere arbitrio meo liberam

præscriptionem Corticis, si mihi placuisset præscribere, ut & dosim illius. Præscripsi idcirco *ad drachmam* in forma boli quotidie mane per tres dies, & *ad semidrachmam* bis in die ad alios tres dies. Substitit Febris; sed perseverabat sitis, non obstante potu refrigerantium liberaliter permisso. Iterum præscriptus est Cortex *ad drach. ss.* semel tantum in die, cujus usu depulsa jam Febre, melius habuit Aegrotans; non tamen adeo feliciter convaluit, quin opus habuerit identidem repetitione Chinæ Chinæ ob duas saltem, quas passa est, recidivas in diuturna sua, & difficili convalescentia. Morituram certo credidisset quisque intra undecimam ad summum, ni per Corticem inhibitus fuisset morbi progressus. Vixit tamen adhuc ad sesquiannum, quo exacto, ut *D. Davinius* retulit, obiit Pleuritica, aut Peripneumonica, vigente extremo frigore algidissimi Januarii anni 1709.

XVII. *D. Dominicus de Traeris* inclinante Æstate anni 1708. corripiebatur ab aliquot jam diebus Tertiana duplici per subintrantes Accessiones continua, semper quidem intensa, sed obscuris exacerbationibus, ac remissionibus vicissim interupta. Et cum malum in dies augeretur ultra debitam proportionem, non obstantibus remediis ab alio, qui eidem assidebat, præscriptis, me quoque accivit, qui curationem postmodum solus exegi ob subortam immediate ipsius Curantis ægritudinem. Eo igitur tempore, quo primum ad Aegrum accessi, vix distinguebantur Exacerbationes, & Remissiones: distinguebantur tamen; & ab initio morbi longe clarius fuisse distinctas, certiorabar a cunctis. Lingua illi aridissima erat, labiaque præ rubore flammea, & arefacta, urinæ crassæ, rubræ, seu crocæ, ferme ac si Aeger vero Ictero laborasset: manus, & digiti assiduo tremore obsidebantur, mens confusa erat, & difficulter se explicans, cum aliqua tamen advertentia, & cognitione; nec semel, licet rariuscule, apparuerunt motus singultuosi. Pulsus tantum validus erat, frequens tamen supra modum cum acer-



acerrimo ad tactum calore . De vehementi aliqua suspicans ego Capitis insomnis, & subdeliri affectione, statim repetita nova præter celebratas ab initio sanguinis detractione, alvoque per clysterem subducta, & largo, quem tamen Ager, licet arescens, parum gustabat, imperato Aquæ, aliorumque refrigerantium potu, Opiatam præscripsi ex Confectionibus Cardiacis, aliqua ex parte; majore vero ex China China compositam, de qua bis, ac ter in die sumebat quantitatem modicam, itaut Methodum meam pro Subcontinuis Perniciosis descriptam impleret; quo factum est, ut intra quatuor circiter dies decremento quotidie manifesto Febris illa ad Ardentem tendens integre, ac nullo negotio sublata fuerit sine ulla penitus recidiva; ni recidivæ nomine donare velimus simplicem Tertianam, qua tum correptus fuit circa Solstitium Æstivum anni sequentis, tum facile insimul liberatus.

XVIII. Clarissimus J. Crus. D. *Peregrinus Barberius* Consiliarius Justitiæ Serenissimi Ducis, annum agens ætatis suæ 59. post diuturnam, gravemque ægritudinem, Romæ, ubi a longo jam tempore domicilium statuerat, contractam, postque plures Recidivas æque graves inde subortas, tandem ope Chinæ Chinæ in eum valetudinis statum devenit, ut valuerit adventante Vere, Roma relicta, fieri redux in Patriam, debilis licet, taloque male firmus. Varia post reditum passus Mutinæ per totam Æstatem incommoda, die tandem secunda mensis Septembris Febre corripitur, quæ Tertianæ duplicis, Subcontinuae tamen, typum periodicum servat. Accidentia morbi tertia statim ægritudinis die satis gravia se produnt, sitis nempe cum linguæ ariditate, jactatio, capitis dolor gravativus, mentis obtusio quædam, & perexigua morbo sui status dignotio, urinæ impenso rubore, & quantitate insigniter imminuta peccantes &c. Matutinis tamen horis tum Febris, tum symptomatum omnium succedit quotidie non contemnenda re-

missio. Administrata rursus Venæ sectione, quæ non longe ante morbum ob non modicum sanguinis sputum tussi rejectum fuerat celebrata, adhibitisque aliis pro re nata remediis, qualia methodice præscribi solent, morbus procedebat Acutorum gressu, ancipitis quidem exitus signa jugiter præbens, sed quinta potissimum die majus etiam portendens periculum. Sexta nihilominus tanta, talisque apparuit prægressæ Exacerbationis remissio, eaque sensim proportionem illa processit, ut vespere nullus fuerit, consuetæ cæteroqui, quotidiana Exacerbationis insultus. Duravit malicia isthæc usque ad vespertas septimæ diei: cum ecce ex improvviso tam vehemens succrevit Exacerbatio, ut vita illius in non leve discrimen fuerit adducta. Ad erant quippe non modo symptomata quintæ diei longe intensiora, sed & insuper alia graviora; delirium siquidem supervenerat tale, ut nec quicquam ad rem loqueretur, neque Medicum, aut Assidentes nosceret, neque de quoquam, eo postmodum sedato, memor esset amplius. Delirio successit soporosus affectus a Lethargo parum distans, vi cujus clamose vocatus vix palpebras attollebat. Pulsus hoc casu exilis erat, inæqualis, parumque consistens, respiratio crebra, lingua scabra, urina fere nulla, eaque lixivialis. Mane sequenti nonnulla equidem, sed paucula observata est remissio Febris, atque symptomatum, vi cujus validam oblationem Corticis sum meditatus; sed me cunctantem reddebant suspensiones de labe aliqua forsitan latente in infimo, vel medio Ventre, quod mihi per literas jam indicaverat Amicus doctissimus, solersque Anatomicus D. *Pacchionus* Romæ illi medicinam faciens; auxeratque postmodum suspensiones hujusmodi diuturna, & difficilima convalescentia, prægressum sanguinis sputum, dolor quinta ipsa morbi hujusce die inter medii, infimique Ventris confinia subortus, & respiracionem reddens nonnihil difficilem, egestio facum a longo jam tempore nonnunquam sanie quadam, vel ichore infecta-



fectarum, cum tenesmo temporaneo, quasi hæmorrhoides internæ, vel Intestina potius (quod sum suspicatus) cuniculoso quopiam, aut sinu ofoulcere obsiderentur &c. Verum his omnibus in gravi, celeriq; periculo tandem sepositis, mane ipso octavæ diei morbi Corticem propinavi ad *unc. ss.*, & sero ad *scrup. iv.* Per totam diem Febris semper facta est remissior; sed noctu hora insolita, quippe interturbata periodo, iterum exacerbata est sensibilibiter cum pulsu elato, & aliqua sensuum hebetudine, necnon cum superveniente surditate, ut Acutorum mos est, sive ut morem esse Chinæ Chinæ opinatur *Mortonus*. Die tamen nona iterum *scrup. iv.* Corticis mane tantum præscripsi, observaturus vespere quid inde succederet. Cum autem Febris vespere procederet quidem, sed non exacerbaretur neque tunc, neque noctu, die decima Venerabilis oblationem, eo mane cæteroqui destinatam, sum remoratus, novi interim Corticis *scrup. iv.* iterum exhibens. Hinc vespere Febris sensibilibiter remissa est; ego vero propinata jam intra horas 48. uncia una Chinæ Chinæ substiti pro tunc. Undecima die Febris facta est remissior, & longe remissior adhuc die duodecima. Cum tamen *Æger*, dimissa jam surditate, inciperet conqueri de superstite mentis segnitie, sibi naturaliter valde prompto omnino insolita, multumque incommoda, idque insonti Cortici adscriberet, institit propterea, ut remedium aliquod Caput roborans illi præscriberem, quod fungeretur vice Antidoti, Chinam Chinam, ut putabat, hebetescere facientem corrigentis. Id statim me præstiturum spondi; rursusque inscio novam Chinam Chinam ad *drach. ss.* in forma boli, ut aiebam, Cephalici, bis in die sumendam evestigio præscripsi; cujus usu cum Caput sibi in dies roborari assereret, simulque oblitterarentur leviores, noctu identidem obrepentes accessiunculae, recuperata tandem longe firmiore ac antea valetudine, fraudem illi meam revelavi, & risu unanimi laudata est insons deceptio.

*Torti Therap. Spec.*

XIX. *Peregrinus Zecchinus* Febre Tertianâ duplici, valida, celeriterque Subcontinua facta detentus, cum Exacerbationibus vehementibus æque ac obscuris, ordinatis tamen, urina supra modum rubra, vigiliis gravibus, crudaque, & ad excessum vergente alvi lubricitate, tam violenter torquebatur ab hujusmodi Febre, ut cum jam appropinquaret morbi status, & fere oblitterarentur incrementa, & decrementa accessionum, facile decreverim, imminente septima morbi die, offerre modicum Peruvianæ Corticis, quoniam reliqua remedia præscripta tam Chirurgica, quam Pharmaceutica, invalida deprehendebantur pro imponendo, ut par fuisset, moderamine effervescentiæ febrili nimium late furenti. Priusquam ergo septima invaderet de more fortior Exacerbatio, præscripsi Corticem ad *drach. j.* in forma boli mane, & sero sumendam, cum Aqua Card. bened. superbibenda tum eo die, tum etiam sequenti, ni prius ipse ad *Ægrum* invisendum rediissem. Sumpsit; eaque die, ut ferebat morbi conditio, gravissime habuit. Immo cum de vita illius prope actam esse crederet importuna, loquaxque ejusdem Soror, accessit ea ad me mane sequenti valde diluculo, ferme increpans, eo quod ad *Ægrum* proxime moriturum, extremisque Sacris nondum munitum, non adhuc rediissem. Uno verbo, adeo læsit patientiam meam gratians muliercula, ut coactus fuero primò respondere: me certo scire, nil damni ex mora mea *Ægrotanti* emergere vel potuisse, vel posse, dummodo interim constans esset usus jam præscripti remedii, cujus effectus nondum sensibilis esse poterat, tandemque subungere, quod, si erat illa impatiens moræ, Medicum diligentiores quæreretur, & abiret abs me. Reposuit illa mihi, se id facturam, dummodo ipse permitterem, nec ægre ferrem; quandoquidem id poscebat quamprimum valde deterior *Ægri* status. Tunc ego considerans, posse me subire censuram de caritatis defectu erga *Ægrotum* pauperem, insuperque posse contingere,

P

ut in



ut in Medicum aliquem Cortici infensum facile Mulier incideret, qui mala saltem succrescentia incepto Corticis usui posset adscribere, eoque proinde rejecto, inertia substituere, ne dicam noxia, meamque idcirco cessationem ab opere posse per accidens Aegro perniciosam fieri, & fortasse lethalem, Christiana statim pietate motus, — Redi Mulier, dixi, ad Aegrum tuum, ad quem & ipse mox redibo solo caritatis intuitu, ne scilicet quem servare manibus hisce debilioribus spero, forsan sub valentioribus pereat — Paulopost ad Aegrum accessi, & graviter quidem se habentem, sed non ut suspicabar, inveni. Nil itaque innovando, consuetos tantummodo Corticis bollos cum Aq. Card. bened. continuandos duxi, quorum ope intra triduum a Febre plane liber evasit. Cumque subinde valde copiosa Crisis per urinam, modica insimul comitante diarrhoea, cessisset, absque ulla etiam Recidiva perfecte convaleuit.

Non multo ante eadem sorte, eadem methodo, eodemque morbi non absimilis tempore, curaveram *Rev. D. Nicolaum de Septis* Ecclesiae Albareti Archiepresbyterum prope octogenarium, nec proinde morbo tam gravi suffecturum, nisi fuisset Cortice adjutus, quo mediante, a Febre statim evasit sine Recidiva, vitamque ad biennium feliciter protraxit. Illius tamen curationem ordinatim describere supersedeo, ut & postremam mere senilem, cui lente succubuit, aegritudinem, ne longior sim.

XX. Idem *D. Dominicus de Traeris*, paullo ante memoratus, sub initium Autumni 1710. concurrente non una causa procatartica correptus est Tertiana duplici Subcontinua cum symptomatis non longe absimilibus iis, quæ non multo ante retulimus, sed paululum remissioribus. His adjungebatur oblocutio quædam, & repetita plurimum Lumbricorum excretio per vomitum. Transacta die morbi septima, meditatus sum oblationem Corticis, dummodo aliqua, ut consueverat, apparuisset remissio in octavæ principio; metuebam siquidem

ex observata obscuratione præcedentis Exacerbationis, Febrem jam in continuam essentialiter degenerasse. Apparuit autem remissio non modo consueta, sed ut verum fatear, etiam major ac consuevisset: cumq; præcessisset nox satis tranquilla, & aliquis in carpis observaretur mador, mihi visus sum prævidere declinationem morbi Cortice non indigentem. Nihilominus nec satis fidens inconstantiæ morbi, nec quicquam metuens ab usu Corticis, quodocunque etiam bona Crisis fuisset imminens, neque inutilem plane reputans Corticem in verminoso apparatu, illum præscripsi in forma Opiatæ *ad semunciam* absumendam pro medietate statim, & pro altera mediate altero mane. Sumpsit ille, ut præscripseram; nec ulla amplius facta est exacerbatio Febris: immo renovata eadem Opiata, intra quatuor successivos dies absumenda, *ad drachmam nempe unam* Corticis quolibet mane, omnis omnino sublata visa est radix Febris, comitante videlicet usum Corticis copiosa, & critica excretionem urinæ, illamque subsequente critica pariter, copiosa, & diutius protracta expulsionem nocturni sudoris usque ad liberalem pulverinarium humectationem. Verum his non obstantibus post aliquod spatium temporis breviusculam recidivam passus est tribus levioribus Tertianæ Febris accessibus, a quibus tamen statim post salvatellæ apertionem convaleuit.

Historiam autem hanc non ideo retuli, quia in ea vires Corticis fuerint eximiae: puto enim morbum ex se fuisse tunc temporis propensum ad declinationem, & Crisim saltem imperfectam; sed retuli solummodo, ut pateat experientia duce, hujusmodi remedium Crises quoquo modo dispositas vel promovere pro viribus, & pro dispositione materiæ, vel eas saltem non impedire, aut remorari, ut ex Historia etiam hanc præcedente manifeste constat.

Tempore quoque primæ aegritudinis ejusdem *D. de Traeris* Casus alter contigit longe præstantior, ac vere admirabilis de Febre inæqualiter remittente,

sed



sed maligna, & effera, qua detinebatur *D. Geminianus de Emilianis* Sacerdos, & Ludimagister, quem curabat *D. Ferrarius*. Hic deinde me socium voluit eo nomine, ut decernerem, an oblatio Corticis more meo, quam meditabatur ipse probe conscius methodi, & efficacix illius, locum habere posset in tali Casu. Sed Historiam describere superse-  
deo, quia illam ab ejusdem relatu paulo infra Lector habebit. Equum est autem, ut illi uni adscribatur curationis honos, qui me cunctantem prius habuit (fateor) quam consentientem. Ejusdem pariter Sacerdotis Matrem eodem tempore ad extrema ferme redactam, & ambobus nobis curantibus ope Corticis restitutam describet idem *D. Ferrarius*, ejusque itidem Historiam inter communicatas infra reponam.

## C A P U T III.

*Historie memorabiles Intermittentium Perniciosarum, agentium ferociter in tertiam primario corporis regionem, eodem quoque ritu sanatarum. Harum species unica est*

## L E T H A R G I C A.

**I**N hac Febrium Perniciosarum specie postrema Lector animadvertat velim, eam esse graviolem ac esse videatur. Et licet in Casibus infra positis non semper describantur simul accidentia lethalem morborum soporis intensiorem indicantia; semper tamen cum *Lethargum profundum* dico, intelligo vere id, quod hoc nomine venit apud Medicos. Neque enim hyperbolice loqui, sed fideliter morbos describere mihi mens est, & quidem dissimulando potius nonnihil, quam amplificando illorum gravitatem: quod plane factum est quoque in antecedentibus omnibus. Si enim exactam Aegrorum hypotyposim prosequutus essem, profecto sicuti aliqua Historia, ubi nonnunquam id quoquo modo actum est, mirabilis visitur, ita quælibet alia non minus mirabilis appareret. Cæterum quam

gravis sit hæc species Lethargicæ Cerebrum lethaliter impetentis (ita ut, qui sic moriuntur, febricitantes a Medicis parum doctis, vel non parum vaftris, non ex Febre, sed ex Apoplexia casu suborta mortui dicantur) satis ostendit observatio, quæ hic velim consideretur; nempe quod in Febribus hujusce speciei fere semper contingit Recidiva, sæpe etiam gravis, subsequiturque difficilis convalescentia ex difficillima eradicatione causæ ad nervorum usque principia translata, ibique secundum aliquas sui reliquias tenax conturbenium agentis. Sed jam quæ modo dicta sunt ex re ipsa elucescent.

I. Decumbebat duplici Tertianæ Intermittente, intensa tamen, detentus *D. Comes Alphonsus Saxus* in medio cursu floridæ adolescentiæ suæ, eumque curabat *D. Riccius*. In quodam graviore Paroxysmo circa decimumquartum morbi diem incidit Ille repente in profundissimum soporem, a quo difficillime expergilcebatur. Gravitas symptomatis, & extraordinaria Febris intensio, eo adjuncto manuum tremore, qui bibentem in actione sua penitus impediabat, amantissimos Parentes impulit, ut pro servando Primogenito suo alterum etiam Medicum consulerent. Accitus ego verspertinis horis inveni illum gravissimo somno oppressum, non respondentem, etsi alta voce vocatum, vixque oculos aperientem, dum valide concuteretur, & dolorificis cruciaretur irritamentis. Apposuerat ideo statim Vessicantia, præmissis antea venæ sectionibus, aliisque remediis Medicus curans. Et quoniam sudor quidam in illius Accessionis progressu erumpere videbatur, proposuit idem Medicus Lapidem Bezoarticum ad hujusmodi excretionem promovendam; quod remedium lubenter admisit, sudoris inde progressum, & Febris, symptomatisque perniciosi remissionem sperans. Redeuntibus autem nobis circa primam noctis horam suppressum invenimus conspicuum antea eruptione quadam universali sudorem; cujus loco particularis, & minuta tan-



tum supererat circa frontem sudation-  
cula cum majori Febris intensione, uni-  
versali fere tendinum subsultu, & Le-  
thargo inexpugnabili, adjunctoque in-  
super narium stertore, & spiritu subli-  
mi. Metuens ego, ne in illa ipsa Ac-  
cessionem diutius protracta occumberet  
Æger, non ausus sum Chinam Chinam  
proponere, nisi sub conditione, quod  
pulsus post aliquot horas explorandus  
ab Assidente Juniore Medico mecum  
praxim observante polliceretur securita-  
tem aliquam de protrahenda Vita in al-  
teram saltem Accessionem. Interea pro-  
posui grana duo Salis volatilis Vipera  
statim exhibenda ex cochleari cum liquo-  
re idoneo, quibus superbibendam præce-  
pi, si fieri posset, liberalem Aquæ quan-  
tatem; dein Adstantem monui (D.  
Riccio cunctis, quæ proposueram, con-  
sentiente) ut adimpleta conditione,  
quam illi indigitaveram expulsa digno-  
scenda, in noctis decursu drachmas tres  
Corticis majori, qua posset, celeritate  
exhiberet Ægrotanti, dummodo is de-  
glutire non prohiberetur a somniculosa  
sua stupiditate. Deo dante, qua dili-  
gentia peracta fuere Animæ negotia in  
lethargico, eadem quoque fuere absolu-  
ta reliqua morbum respicientia per obla-  
tionem Corticis: & mane paucula ali-  
qua observata est Febris remissio, ut &  
aliqua mentis, ac sensuum alacritas.  
Atque ideo cum ea die levior tantum  
Accessio fieri consuevisset, speravi con-  
tinuationem remedii posse tempestive  
impedire Paroxysmum graviolem, at-  
que adjunctum soporem, tertio quo-  
que die, ut mox intellexi, aliquo modo  
antea etiam recurrere solitum. Sed præ-  
ter consuetudinem, & præter expecta-  
tionem curantis Medici, ea ipsa die af-  
fectionis de more minoris nova, & ve-  
hementior adhuc facta est Exacerbatio  
cum motibus convulsivis jugiter appa-  
rentibus, & cum lethargo fortiore;  
ita ut nec per capillorum evulsionem,  
nec per aliam quamcunque dolorificam  
vim illatam responderet, dimoveretur,  
aut oculos aperiret. Tunc vere credi-  
di, mortem imminere, Cortice ante

paucas horas oblato ad eam impedi-  
dam haud satis idoneo, propter viciniam  
insolitam, insolitamque vehementiam  
talis accessionis: etsi alioqui major Fe-  
bris accensio ab epota China China  
nonnunquam contingens in bonis ha-  
beri soleat ab Auctoribus; quod & ipse  
non semel observavi, observavitque præ  
omnibus Anonymus alias citatus his ver-  
bis — *Ce Febrifuge semble encore quel-  
que fois allumer la fièvre après la pre-  
mière prise. Mais il ne l'augmente,  
que pour la mieux combattre, & ce de-  
sordre apparent est la marque la plus as-  
surée de son triomphe, car plus il a ren-  
du un accès violent, plus on est assuré  
qu'il ne sera pas suivi d'un autre* —  
Sed ego hoc casu aliud sum suspicatus  
ob vehementem intensiorem Febris non  
modo, sed & simul symptomatis. Re-  
petito nihilominus interim Sale Viperi-  
no, meliore, quo datum fuit, modo,  
& juvenili, robustaque coadjuvante na-  
tura, sustinuit ille revera eandem ac-  
cessionem, in cujus progressu aliqua fa-  
cta est profundissimi soporis diminutio.  
Propterea statim repetitus est Cortex ad  
unc. ss. duplici haustu, Febrisque post  
aliquot horas cœpit remitti (prout de  
more jam suo) & cum Febre lethargus.  
Cum vero appropinquasset hora gravio-  
ris accessus, qua obitum illius sibi nun-  
ciarimetuebat, expectabatque trepidans  
afflicta Genitrix, loco novæ accessionis  
major apparuit veteris declinatio, in-  
tantum, ut ea ipsa die vegetus mentis,  
ac sensuum, & quo ad Febrem satis le-  
viter se habens, ab omnibus vel rudi-  
bus, & famulis, nedum Amicis, atque  
Nobilibus evidenter cognitus fuerit.  
Procedente itaque per gradus levamine,  
& continuato juxta methodum Chinæ  
Chinæ usu, brevi remansit a reliquiis  
febrilibus liber, ut statim a periodo li-  
ber remanserat, & a soporoso sympto-  
mate. Febris solutionem comitata est  
copiosa prius, ac critica urinarum ex-  
cretio, mox & diarrhœa spontanea non  
sine infectione quadam mucosa, & sub-  
cruenta, torminibus tamen casta, quæ  
ad aliquot dies moderate, & cum facili  
role-



tolerantia processit, clysteribus tantum ex lacte, & saccharo identidem injectis. Sic integram nactus est Ille valetudinem sine ulla recidiva, aliove unquam amplius salutis incommodo, excepto pertinaci tendinum subsultu, qui sicuti toto Aegritudinis tempore valide perseveravit, ita & tempore convalescentiæ, immo & post ipsam non plane substitit; sed sanum quoque, ac vegetum non modo noctu inter dormiendum, verum & interdiu, dum comederet, biberet, aliudve ageret, per aliquot hebdomadas afflictavit. At tædio tantum affecit, non noxa; tandemque sponte penitus evanuit.

II. Eodem fere tempore accersitus fui ad invisendum Judæum quemdam, nomen *Lazarum Pacificum*. Is, ut retulit Medicus curans, post Febrem primo validam, mox lentiolem, atque diuturnam, insuper diarrhœam contraxit, quæ postmodum in dysenteriam migravit eadem durante Febricula. Demum dysenteria rursus in diarrhœam conversa, cœpit simul Febris typum manifestum acquirere Tertianæ duplicis intensioris. Tantum scilicet valent alvinæ dejectiones sine coctione, aut sine prævia intestina secretionem ad abigendas Febres. Hæc autem Febris in invasione sua soporem simul ascivit admodum profundum, quo circa declinationem Accessionis evanescente, stupidus, attonitus, & immemor ad plures horas Ager remanebat. Cum vero symptoma istud quotidie cresceret, adeout fieret quasi continuum, pari pacto, ac tales fiebant, se mutuo excipientes paroxysmi febriles: cumque a principio Accessionis usque ad statum, & ultra, lethargus tam fortis ingrueret, ut jam mortem minaretur intra unam, aut alteram Accessionem in Subjecto morbi acutie primum, mox & diuturnitate confecto, Corticem Peruvianum proposui larga dosi celeriter exhibendum, adducens in exemplum casum recentem *D. Comitæ Saxi*. Et quoniam nondum mihi fuerat occasio ostendendi, vel communicandi huic Medico, cujus nomen & hic ju-

vat reticere, quantum in similibus casibus Cortex valeret (nondum enim mihi cum illo contigerant, quas supra innui *Cap. II. Hist. 9.*, circa hujusce remedii administrationem altercantuncula) subdidi, ut curiosus attenderet, visurus nempe, quæ cæteroqui non tam facile credidisset. Annuit ille tunc, meæ morem gerens assertioni, etsi non bene credulus (nescio autem cur non annuerit postea in aliis casibus, cum in hoc efficaciam remedii clare deprehendisset) & Corticem præscripsit, prout Illi indigitaveram. Et ecce statim imminuto paroxysmo, oblationem validiusculam Corticis subsequente, alteroque prorsus inhibito, symptoma ipsum soporis simul evanuit; quare brevi a Febre, a lethargo, & a diarrhœa liberatus est Ager. Tunc stupente Medico eidem communicavi plura illi incomperta circa usum Corticis, monuique ex corde, ne negligeret quæ candide communicaveram, si Aegrorum suorum salutem, & propriæ existimationi oprabat prodesse. Excepit ille monitum satis humaniter; sed paullopost memoria excidit. Recidit autem Ager post tres circiter hebdomadas in easdem Febres, sed leviores, aliqua tamen adhuc in somnum propensione comitatas, quibus methodice prius curatis, nec tamen abeuntibus, denuo repetitus est Cortex ad *semdrachmam* bis in die, cujus ope absque alio incommodo perfecte convaleuit.

III. Eximius J Crus, & Serenissimi Ducis a Secretis, & Status Consiliarius, *D. Gaspar Jovanardus* Febre corripiebatur Tertiana simplici intermittente, cum paucis tamen rigore invadente, cujus duobus jam paroxysmis elapsis celebrata est die vacuo phlebotomia, indicata a plenitudine, & ab urina rubra, crassa, & pauca. Eo ipso die circa vespas leviter incaluit, & aliquam alterationem suscepit, quæ tamen mane sequenti soluta est. Circa meridiem redit Accessio tertia principalis, qua invadente incipit Ager præter morem nonnihil obloqui, mox difficulter



conceptus suos exprimere, quod & ipse noscebat, impotens tamen sese corrigere, dum unum verbum pro alio identidem proferebat. Tandem dormire cepit: sed somno tam forti, ut difficulter posset ab Adstantibus excitari, & siquidem excitabatur, minime ad rem respondebat, iterumque labebatur in somnum. In Accessionis statu sopor imminuebatur: principia tamen nervosi generis in capite graviter affici, demonstrabant motus tremuli manuum, & subsultus tendinum. Declinavit nihilominus satis feliciter Paroxysmus, & mane sequenti satis leviter se habuit Aegrotus vix tantillum febricitans. Repetita est ideo statim phlebotomia, præmisso clystere, & acta quaecunque ex arte in hisce circumstantiis peragi solent. Vespere, sexta die, rediit febricula correspondens quartæ diei: & licet leviuscula fuerit, aliquem tamen mentis, & loquelæ torporem, mox & soporem induxit, quod mihi cæteroquæ ancipiti ansam dedit, ut decernerem de ministrando celeriter Cortice, priusquam quarta ingrueret (septima die) fortior Accessio. Consilium statim communicavi D. Candrino Assidenti, nil tale opinanti, nec exitium tam præceps, ut ego suspicabar, adhuc metuenti. Meis tamen annuens voris, atque rationibus (quas scilicet vel ipsis Auditoribus meis, qualis ille fuerat, libenter expono) noctu in remissione Febris obtulit Corticem, cujus *drach. vj.* duobus haustibus se junctis assumpsit Pateriens octo horis ante quarti fortioris Paroxysmi adventum. Visus est ille interim bene se habere; sed adveniente Accessione formidabilia supervenere symptomata, quæ cæteroquæ mitiora speraveram, delirium scilicet manifestum cum manuum, & linguæ tremore, dein lethargus insuperabilis, & cuilibet refractarius cruciatui, motus convulsivi artuum, & totius corporis, ac insuper in progressu Accessionis frequens, importunusque singultus. Vere a Cortice tam prope Accessionem oblato inhibitionem Paroxysmi nequaquam spera-

bam; sed neque illum cæteris majorem fore, immo potius a China China, ut frequentius afolet, nonnihil imminuendum, credidissem. Quod autem assequi tunc datum non fuit, fidenter expectabam de more subsequente Accessione, deducta videlicet in actum medicaminis activitate; pro cuius eventus ulteriori probabilitate, novum Corticem offerri curavi in gravissimæ illius Accessionis, quam quidem ægre transegit, remissione: non retardata tamen interim administratione Sacramentorum. Paulo post cepit se exerere virtus recens roborata Febrifugi; quippe nullus amplius rediit Paroxysmus, nulla oblocutio, sopor nullus, nec ullum ex iis, quæ antea visebantur, symptomatis. Atque ita intra tres circiter dies ab omni penitus Febre immunis evasit. Paulo post Rus adiit; ubi postquam ad aliquot dies permansit, dum Corticem per modum levioris alterantis assumebat, iterum nihilominus correptus est Tertianæ duplici, quæ tam levis visa est, ut renuerit ipse in Urbem regredi ad curationem illius. Quinto tamen Accessu me illum Ruri invisente, & redeuntibus iisdem omnino symptomatis, etsi aliquantulum mitioribus, coactus fui valida rursus methodo Chinam Chinam præscribere, a cuius usu ipsum supersedere jusseram statim ac Febris revixit: qua epota, sedata sunt omnia, subsequente interim sudore universali, sed modico, quo reliquæ Febris discuti visæ sunt. Recidit ille nihilominus in Febres mitiores, quæ sine Cortice remediis tantum vulgaribus sopitæ sunt: sed & iterum post aliquot dies suscitata, sibi que solis relicta, donec tandem beneficio tempestatis sponte evanuerint. Ab eo tempore nullam amplius Febrem passus est præter Ephemeram tempore Veris, a causa procatartica oriundam. Licet autem cuncta sui Gradus munia perfecte obiret, non tamen robustam valetudinem, qua fruebatur ante morbum, plane resumpsisse videbatur; adeoque nonnunquam usus est remediis domesticis, puta, Vino absyn-



thire, Syrupo de Cichorio cum Rheo, & similibus. Cum vero Autumno sequenti meditarer illi nervosiorum prophylaxim instituere, tincturamque chalybis, præmissis præmittendis, ad aliud quod tempus offerre, ex improvise gravissimis actus negotiis Romam migravit, ubi rigidissimo supra morem Hyemis anni 1709. tempore correptus Peripneumonia, ni fallor, ibi tunc temporis Epidemica, intra paucos dies non levi hujus Urbis jactura diem suum obiit.

IV. Nobilissima Matrona *D. Marchionissa Octavia Capraria Montecuccola*, jam proxime octogenaria, Febrem Tertianam patiebatur adeo absconditam, adeoque difficulter explorabilem ex pulsu [quippe summe inæqualis, ac systematico fere semper, præcipue vero tempore Paroxyismi] adeo latentem, inquam, Tertianam patiebatur, ut ea potius ex sopore profundo, de tertio in tertium invadente cum obscura quadam extremorum frigiditate, quam ex ullo alio caractere magis proprio distingueretur. Symptoma istud insigne pro vero Morbo habitum Medicos curantes discordes reddidit de repetenda phlebotomia ab initio jam celebrata, obstabat quippe ætas, & habitus corporis cachecticus reputatus, ac in Hydropem pronus exrecenti quadam infirmitate, quam non multo ante passa erat Bononiæ cum suspitione etiam tum incipientis Hydropis juxta assertionem curantium Medicorum. Ad componendum dissidium advocor & ego, qui ex relato nondum probe conscius periodi tertianarii, considerans affectionem capitis fere ut morbum essentialem, suspicansque simul quicquam aliud latere ob insignem pulsus inæqualitatem Ægræ, ut asseriebatur, etsi ferme octogenariæ, minime familiarem, insuperque observans, habitum illius nil cachectici vere præferre, calculum apposui pro altera sanguinis missione: qua feliciter peracta, & redeunte nihilominus per circuitum manifestum sopore profundissimo, ac Febre, facile deprehendi naturam soporis lethar-

gici esse aliam ab ea, quam ex relatione conjectaram. Certiorem adhuc de hoc me reddidere Assidentes, qui Circuitum sibi quoque observatum asseverabant, illumque paroxysmum jam tertium esse fatebantur, quo vere sopor parum ab Apoplexia videbatur distare; atque in eam facile forsitan degenerasset, nisi Accessionis remissio intulisset quoque remissionem symptomatis usque ad eum gradum, ut commodum licuerit Sacramentorum administrationem perficere. Periodo rite intellecta, dignovi statim, confugiendum esse ad Peruvianum Corticem pro inhibendo Lethargo insimul, & Paroxysmo. Sed quia vix a longe, & quasi per modum neglectus memorando Corticem ad impetrandas inducias [cum periodicus esset, & soboles ipsius Febris periodicæ sopor ille mortiferus] quia, inquam, vix Corticem memorando alter e duobus Medicis potior in Cura protinus exhorrescebat, ego ad evitandas fervidiores altercationes, quas semper dedecere duxi Viros maturos, gravemque personam agentes, præsertim in Praxi, & ad servandam insimul via certiore Matronam gravissime, & ocyssime periclitantem, dum Medicus curans Lapidem Bezoarticum constanter proponebat, velut remedium nobile, ut ajebat, & strenuum, hac Arte lepida usus sum, ne dicam fraude insonte.

Lapidem in primis Bezoarticum summis laudibus extruli, eumque esse veram illius morbi antidotum, proclamavi: opportunissimum autem illius usum fore die septima (erat enim illa dies quinta, tertiusve Febris Accessus) ad excitandum probabiliter sudorem universalem, optimum futurum pro morbi solutione. Interim vero subdebam: quærendum esse remedium aliquod tutum, atque canonicum, quod valeret quodammodo Chinæ Chinæ adinstar reprimere, & enervare futurum Paroxysmum, si posset fieri, & cum eodem fortasse symptoma soporis; non vero figere, & suppressimere affatim ipsum Paroxysmum, ejusque Causam, quemadmodum fieri



fertur [ajebam] a China China. Memineram forte tunc, me legisse apud *Cl. Lucam Tozzi* [quem Auctorem sciebam esse in debita existimatione apud Medicum curantem] post laudatum ab eodem Auctore ad Febres Intermittentes pulverem Corticis Peruviani, postque alia ab eo enumerata illius succedanea, memineram, inquam, me legisse hæc verba. *Meminit alterius pulveris Bartholinus, de Gannaperide dicti ad eundem usum.* Corticis autem Peruviani Planta ipsa, ut refert *Badus*, & alii, utque hodie satis notum est, ab Indis vocatur [præter alia, quibus donatur, nomina] *Gannaperide*, quod dubio procul *Cl. Tozzium* latuit. Hac itaque arrepta occasione, levem hanc, nulliusque momenti hallucinationem *Tozzi* ex industria secutus sum, quod nempe *Gannaperide* sit aliquid a China China diversum: dixique ideo Medico curanti, posse nos interim uti *Gannaperide*, quam loco Chinæ Chinæ commendat ex *Bartholino Lucas Tozzius*, seu saltem Extracto illius; non enim tam facile cognitu illud erat, ut Cortex ipse.

His auditis, Medicus curans nil quærens de natura Plantæ, ne hospes in Botanica videretur, licet hujusce notitiæ carentia Viro docto vere nil detrahat, in fide Celeberrimorum *Bartholini*, & *Tozzi* annuit. Quamobrem præscriptum est statim ad *drach. j.* in forma boli extractum *Gannaperidis*, seu [quod satis noverat Pharmacopola] Chinæ Chinæ; idque mane, & sero continuatum. Appropinquabat interim Accessio quarta, diesve septima, qua ex pacto celebrari debebat solemnis oblatio Lapidis Bezoartici; sed interim coactus ex improvviso idem Medicus alio migrare longe ab Urbe, enixe commendavit Assidentibus, ut memores essent, in illa Accessione prædictum Lapidem offerre, sicut ego hora congrua eram præscripturus. Quia vero jam quatuor *drachmas Extracti*, quantum sat erat, recentis assumpserat Nobilissima Pociens, Accessum Febris sortita est satis tolerabilem, & cum breviori, minusque profundo

sopore conjunctum: quapropter, ut hostem fortius insequerer jam fugere incipientem, loco Lapidis Bezoartici *novum Extractum China China* præscripsi. Et quoniam absentia Medici illius ab Urbe valde diu erat protrahenda, cœpi ad obtinendum majori certitudine intentum, uti ipsa China China in substantia, in formam boli redacta; & sic fere integram alterius Paroxysmi suppressionem sum nactus, ut & soporis adjuncti: continuato autem post depulsionem Febris ad aliquot dies remedio per modum levioris alterantis, feriatius postea sum diu ab eodem. Interim vero tres alios, vel quatuor passa est Ægra leviores paroxysmos, modico tantum sopore comitatos, quibus rursus levissima Corticis ope depulsis, diuturniorem nonnihil, sed minime incommodam sustinuit convalescentiam, ac inde congruam valetudinem usque ad annum 83. ætatis suæ: quo demum tempore senilibus morbis confecta vivere desit.

V. Ridebit fortasse quispiam, quod inter præclara Corticis facinora reponam sequentem historiam; plauder tamen & Cortici, & mihi, qui æqua lance cuncta pensitans, vim exinde medicaminis eximiam, & candorem insinul meum dignoscet.

*P. Crescentius ab Angelo Custode Carmelita Excalceatus* [in hoc namque Cœnobio frequentius, quam in aliis, Perniciosas Febres mihi contigit observare] tulerat jam, & ordinaria Methodo superaverat Æstate anni 1708. Tertianam duplicem continuam, vix tantillum remittentem, omnesque acutæ Febris characteres præferentem; immo unam & alteram recidivam pariter transegerat, biliosa diarrhœa inutiliter comitatam, lentoque semper pepasmo, vulgaribus tantum remediis promotum, sine ulla unquam ope Corticis ad bonum exitum perductam. Remansere tamen perpetuo signa imperfectæ judicationis, ac præ cæteris urina pauca, & impense rubra, irritis semper omnibus conatibus pro perficienda, & complete firmanda valetudine. Deniq; sub finem tempestatis Au-



rumnalis correptus est Tertianæ simplici intermittente, cujus duos ante adventum meum passus erat Paroxysmos satis leves. Cumque accessissem die vacua secundum Paroxysmum subsequente, & scirem, illum paullo ante pluries, ac per epicrasim etiam sufficienter purgatum remediis ipsi familiaribus, præscripti modicam sanguinis detractionem, a gravativo præsertim capitis dolore, rubraque urina indicatam, celebrandam tamen post tertium futurum Accessum, altero nempe intermissionis die, ni ego Aulicis tunc curis districtus prius rediissem ad illum invisendum. Advenit itaque sequenti die tertius Paroxysmus, in cujus principio Ager præter morem cœpit balbutire, variaque inconcinne loqui, & obloqui modo cum advertentia, sed impotens sese corrigere, vel coercere, & modo nullatenus compos sui. Post hæc in somnum delapsus est profundissimum Apoplectici adinstar, unde creditus est ab Assidentibus cito expiraturus. Circa vesperras invaserat illum Paroxysmus; jamque nox erat, dum hæc contingerent. Cum vero nec ipse accederem legitime impeditus, nec me invenirent, ut saltem possent alloqui, solliciti Patres me incassum querentes alium Medicum sibi amicum, familiaremque, nempe *D. Roncaleam*, advocarunt, qui viso spectaculo statim in ipso Febris augmento ratione præcipitis symptomatis phlebotomiam, quam pro die sequente ipse præscripseram, celebrandam esse judicavit; nec male. Sed pro sua erga me urbanitate subjunxit: se quidem phlebotomiam illico instituendam minime dubitare; verum si meum super hoc votum vellet, possentque tempestive exquirere, id illi pergratum futurum. Atque his dictis, discessit.

Advolarunt itaque rursus domum meam anxii Patres, ubi cum non adesset, præstolari sunt adventum meum usque ad sextam circiter noctis horam: neque enim mihi domum citius redire datum fuerat. Re intellecta, exprobravi illis officium urbanitatis, Aegrotanti fortasse noxium, rennique post tot ho-

ras elapsas a præscriptione Medici phlebotomiam vel admittere, vel suspendere Aegro non prius inspecto. Quamobrem ipsis licet officiose reluctantibus ad eum accessi, & inveni lethargicum quidem, & stertentem, sed dum clamose vocaretur, oculos aperientem, & submurmurando respondentem: quorum neutrum, ut retulerunt Assidentes, antea ullo pacto præstare potuerat; immo cum tantisper ibidem morarer, illumque variis modis conarer excitare, loqui cœpit, & veniam petere de incommodo mihi illato hora inopportuna, pergens tamen ultra, cœpit obloqui, aliaque effari extra rem, & minime coherentia, dein in soporem relapsus est, sed minus profundum. Hæc, & alia attente considerans prognosticum istud elicui, nempe, Illum certo evasurum ab ea Accessione, sed certo quoque in altera correspondente periturum, non obstante qualibet phlebotomia, aliove ordinario artis auxilio, nisi per Corticem Paroxysmus ipse venturus prompte inhiberetur. Hoc statuto, Remedium præscripti valida methodo in sequens mane exhibendum post Sanctissimi Viatici administrationem. Epoto autem Cortice levis facta est ipso intermissionis die insolita Accessio, jam parata pro duplicanda Tertianæ, ut magis lethalis evaderet subsequens, suapte natura gravior. Hanc tamen novitatem nihili feci, certus de inhibendo Paroxysmo fortiore, ut omnino contigit. Atque ita fere statim a Febre, a sopore, & mentis segnitie, aliisque symptomatis plane liber evasit: quod Patribus mirabile quidpiam ferme supra Naturæ vires visum est.

Præ cæteris autem peculiari observatione digna fuit insignis mutatio coloris faciei, & urinæ; fere namque per tres menses colorem subcitrinum, palpebrasque subtumidas circumtulcrat, urinam vero perpetuo croceam, rubramve, ac imminutam reddiderat: neque diutina diarrhœa spontanea, neque epicraticæ purgationes, neque deobstruentia, aliave similia remedia quicquam pro-



profecerant. Statim vero ac Corticem assumpsit, adeo bene coloratus, & vividus factus est, urina adeo decenter mutata est, citrina scilicet, palearis, ac concocta constanter reddita, viriumque robur adeo vigorose resumptum, ut fere superfluum reputarit. Ager uti novo Cortice ad prophylaxim, ut illi præscripseram. Obsequens fuit nihilominus quo ad hoc, sed nequivit se continere, quin consueta munia tam domi, quam extra exequeretur: quod illi sibi nimium, narratisque signis fidenti, incassum exprobrabam.

Jamque mensis circiter erat exactus, cum quodam die paullo post Brumale Solstitium ante fores Asceterii alia occasione prætergrediens ego vespertinis horis sciscitatus sum aliquid de illius valetudine; responditque Janitor: me opportune advenisse, Illum namque paullo ante domum reversum, denuo Febre correptum jacere. Accedo ad eum, & modice febricitantem invenio, Accessione a principio ad augmentum progrediente. Nullus illi tunc sopor, obloquutio nulla; sed tantum conqueritur de intenso capitis dolore. Interrogatus, an diebus antea ulla Febrem perferens, respondet negative; subdunt tamen Assidentes, se dubitare, Illum die quoque ad normam tertianarii circuitus correspondente levem aliquam Febrem insultum passum fuisse, licet nec decubuerit, nec officia sua, quæ tamen exegit infirmius, intermiserit: quod ipse tandem non amplius negavit, sed umbram Febris, imbecillitatisque appellavit. His auditis, subjunxi — Quoniam modo nullus est metus de ferali sopore, aliove gravi symptomate, quod nos cogat ad Corticem statim confugere, sanguinisque missionem alias præscriptam, & modo a dolore capitis rursus indicatam, omittere, sed nobis suppetit congruum tempus ad omnia, cras mane nulla interposita cunctatione detrahatur sanguis ex brachio ad *uncias octo* — Cætera præscripsi de more, & abii. Mane valde diluculo nunciatur mihi, Aegrotantem nocte in statu Ac-

cessionis in profundissimum soporem incidisse, ut olim, ac proinde quæri, utrum eo ita se habente debeat celebrari phlebotomia, an agi quidquam aliud. Phlebotomiam ego illico celebrandam inculco, accessurus subinde ad alia peragenda, si opus sit. Detracto sanguine accedo, invenioque Aegrotantem sopitum, supinum, stertentem, Apoplectici adinstar. Minime tamen apoplecticum esse deprehendo, quoniam & alta voce vocatus, & varie concussus oculos identidem aperit, se erigere tentat, & voces aliquas edit elaras, sed extra rem, & alias interruptas; ut proinde symptoma Febris sit ejusmodi lethargus. Relabitur tamen Ager statim in somnum, & videtur in agone versari, ut propterea nullus sit locus Cortici: adeo vehemens adhuc est Febris, nullatenus in remissionem prona, tamque breve intervalum temporis, quod superesse videtur ad expirandum. Præscribo interim cucurbitulas ficas partibus inferioribus affigendas, vessicantia vero & inferioribus, & superioribus artubus, liquores spirituosos cochlearum ingerendos, ipsumque tandem Corticem parari jubeo offerendum, si tempus sinat. Sed quid? Jam ruit ad mortem, nec ulla spes salutis affulget. Dimittitur ideo ut deploratus omnino. Cortex ipse paratus nequit exhiberi, nec tempus ullum superesset illius actioni, etsi exhiberetur; immo secundum portiunculam vi quadam in os ingestus, exit eadem, qua intromittitur, via. Reponitur ideo, ne per lintea effusus subeat nihilominus apud maleferiatos homines calumniam de occiso Aegrotante; ipse autem Ager in vero jam agone constitutus post aliquot horas in illa ipsa Accessione, qua primo decumbit, expirat, comprobans generale præsagium *Mercati*, nempe, quod *Perniciose, quæ ad cerebrum tendunt, lethales sunt, si in lethargum, aut phrenitidem commigrent.*

Vixit ille profecto ope Corticis, ut persuasum habeo, per mensem; quo elapso complevit, quod antea jam complere debuerat, nisi auxilium a Cortice retu-



retulisset. Defecit tamen huc Regula, quam alias universalem posui, Recidivas nempe post Corticem assumptum esse consuevisse suaradice leviores. Sed una exceptio Regulam non tollit. Est autem congruum, nonnihil perpendere varia in hoc casu, notatu digna. *Primo* namque obvium est conicere, quam parum felix, & quam imperfecta fuit pluries solutio morbi toties reviviscentis; licet exacta, diligentique Artis methodo per tres circiter menses curati, modicaque, ac tolerabili, longa tamen diarrhœa spontanea comitati; quin immo leviusculis purgationibus (diarrhœa videlicet subsistente) epicraticè repetitis, morbus vel perseverabat vicens, vel sopitus redibat, intantum ut post hæc omnia, postque tam longum tempus, valuerit in Tertianam Perniciosam iterum assurgere, mortifero quidem lethargo insignitam, sed tamen Corticis actioni illico obsequentem. *Secundo* meditatione nostra dignum videtur id, quod non sine ratione suspicati essent pluri mi, & forsitan ego ipse, si in primo hujusce difficilis Aegritudinis ortu fuisset propinatus Cortex, tunc scilicet cum Febris tertiana duplex continua aliquam, præsertim stata quadam hora inter levioris Accessionis decrementum, & incrementum fortioris media, remissionem periodice præferat, vi cujus forsitan usui illius locus aliquis adesse poterat: si, inquam, ab initio Cortex fuisset oblatus, & Febris cohibita, cuncta vero, quæ sequuta sunt, æque sequuta essent, tot nempe Recidivæ, & tandem mors, dignum nostra, ut ajebam, meditatione est id, quod in tali casu de Corrice essemus suspicati, non immerito quidem, falso tamen, ut patet. *Tertio* subit animadvertere, & repetere, quod jam dictum est, nempe Hominem absolute moriturum altera cæteroqui Accessione, ni Corticem assumpsisset, tunc, cum assumpsit, eo tamen mediante vitam vegetiorem ac antea (quod sane mirandum) protulisse saltem ad mensem. *Quarto* denique, quod licet Cortex, qui semel eripuit a morte,

reputari soleat a me ita eripuisse, ut in Recidivis metus æqualis infortunii remanere non debeat, maxime quoniam nova, & æqualiter valida Corticis assumptione, infortunium æquale, si redeat, videtur posse repelli; attamen nonnunquam, etsi raro, ut in hoc casu, redire potest idem prorsus exitum talique insuper vehementia, ac impetu, ut prima jugulet Accessione, neque ullum vivifico Cortici locum concedat.

VI. Infelicem exitum P. Crescentii pensabit facile felix, quantumvis laboriosa sanatio *Monialis cujusdam* ex eodem Ordine. Hæc anno pariter 1708. Tertianam soporosam satis intensam passa est, sine frigore invadentem, & periculum aliquod minitantem; a qua tamen absque adjumento Corticis solis remediis vulgaribus cito supra expectationem meam (qui longam saltem, ni gravem, ominatus fueram ægritudinem) liberata est. Post aliquot dies recidit insigniter, in secundo paroxysmo gravissimum lethargum passa. Proinde ea ipsa die declinante paroxysmo præscripsi Corticem *ad drach. j.* vespere; mane sequenti *ad drach. j.* pariter; sero *ad drach. j. ss.*, & mane alterius diei, qua die expectabatur tertius paroxysmus, *ad drach. ss.* Sperabam fore, ut ingestis longe ante hunc Accessum per horas circiter duodecim *drachmis tribus*, & *semis* Corticis, non computata postrema oblatione Accessioni proxima, Febris inhiberetur; sed mea me fefellit opinio: rediit namque Accessio satis gravis, & cum eadem æque gravis sopor. Quid si China China non fuisset oblata? Miratus sum pervicaciam morbi; & quoniam durante illa Accessione nil aliud poteram moliri, cucurbitulas dolorificas, & Vesicans Emplastrum cruribus affigi jussi, non omisso internorum remediorum volatiliu usu; atque inter ea præcipue Salis Ammoniaci spiritus tum externe, tum interne adhibitus est: quibus auxiliis adjuncta Agra evasit non sine difficultate a Lethargica illa Accessione. Mane sequenti, præmisso Sanctissimo Viatico (erat



(erat quippe adhuc somniculosa valde) exhibui paullopost *drach. ij.* Corticis uno haustu; nec altera die rediit ulla Febris, ullusve sopor, sed vegeta insigniter apparuit. Sumpsit nihilominus per sex continuos dies *drach. ss.* ejusdem Corticis quotidie ad præcautionem; sed tamen non multo post recidit cum sopore. Illo crescente ad eum usque gradum, ut Ægra per horas plurimas supina jaceret vix quicquam sentiens, utur molestum, ac dolorificum, neque proficientibus spirituosus liquoribus, aliisve remediis internis, aut externis, præscribo *drach. vj.* Corticis, quas omnes partitis tamen vicibus intra unum diem, ni fallor, absorber. Cessat illico Febris, sed non omnino sopor, qui gravis adhuc, etsi minus, periodice recurrit alternis diebus, ut antea recurrebat Febris. Adjuvatur consuetis, novisque volatilibus remediis, ex C.C., ex Vipera, & aliunde petitis; atq; inde levamen aliquod suscipit. Adjungitur tamen nonnunquam sopori periodico periodica quoque Febricula; sed hæc vix dignoscibilis. Tandem post renovatos quavis desinente menstrua purgatione (& quidem pendente cursu trium, aut quatuor mensium) soporis insultus, typo semper tertianario invadentes, sæpius sine Febre, rarius cum ea, sed leviori, tandem, inquam, appropinquante Hyeme desit utraque affectio, & sanata est Ægra, aliqua tantum superstita, de qua toto etiam morbi tempore graviter conquerebatur, capitis imbecillitate, quæ pariter tractu temporis paulatim evanuit.

VII. Decubuerat diu Venetiis, & quidem, ut ipse retulit, valde graviter, anno 1709. Cubicularius Domini de Prougen, cui nomen *Alexander Landinus*, tandemque ab omni periculo evaserat ope Corticis, quem proinde salibus quibusdam associatum ex curantis Medici præscripto secum tulit in itinere, Mutinam redux, ut pro re nata rursus assumeret. Iter ille suum feliciter transegit, absolvit; sed paullopost diarrhœa biliosa correptus est, valde

copiosa, torminosa, viresque admodum dejiciente per dies duodecim. Accitus ego Serum Vaccinum præscripsi per dies nonnullos, paucisque aliis remediis, ab altero, qui eidem assidebat, prius oblati, visus est satis laudabiliter judicari, & convalescere. Paucis tamen diebus elapsis [tantum scilicet evacuatio profecit] iterum labitur in Febrem tertianam intermittentem, primo levem, ut retulit idem Assidens, mox validam, in in cujus videlicet paroxysmo tertio soporem insignem cum aliqua obloquutione passus est. Quarto autem Accessu idem symptoma adeo vehemens increbuit, ut Decumbens ad plures horas immobilis, ac fere Catalepticus jaceret. Advocor rursus, & invenio hominem ab octo jam horis, velut simulacrum quoddam, supino ventre decumbentem. Oculos ille quidem servabat apertos, ac diaphanos, atque ob id tantum a cadavere aspicientibus distinguebatur, eos tamen attonitos, ac immobiles, nec quidpiam cernentes. Concussus, excussus, vellicatus, confricatus nil sentiebat, nec linguam, nec oculos, nec membrum ullum movens, aut retrahens. Difflebat autem profuso sudore in partibus tantum superioribus, ac maxime circa caput, nondum tamen frigido. Facies subcitrina erat, palloreque infecta mortali. Pulsus solus robur aliquod ostentare videbatur. Ob id Ægrum posse fortassis ab illa Accessione evadere, morituum tamen altera, cunctanter conjeci. Statim præscripsi clysterem acrem; ori vero salem volatilem Viperinum, ad aliquot grana industrie ingerendum, naribusque spiritum salis Ammoniaci frequenter admovendum curavi, non omissis frictionibus, ligaturis dolorificis, cucurbitulis siccis, & aliis hujusmodi remediis spiritus excitantibus, & ad motus, ac sensus munia obeunda revocantibus: post quorum usum, quandocunque resipisceret Æger, & deglutire valeret, Corticem tandem ad *semunciam* exhibendum præcepi. Prioribus administratis, visus est tantillum expergisci, ut proinde valuerit assumere Sa-



re Sacramentum Eucharistiæ: Febrisque interim suam declinationem noctu sortita est. Mane itaque prout dixeram, nulla mora interposita, rerum omnium ante gestarum prorsus immemori offertur China China pura, quam ex Vino oblatam, quia statim vomitu rejecit, opus fuit repetere in forma boli. Vespere *duæ drachmæ* exhibitæ sunt; atque *totidem* mane sequenti, qua die lethalis paroxysmus expectabatur. Sed dictum factum: incantamenti ad instar [ut de salvatellæ aperitione jure minore agebat *Galenus*] sublata est Febris, sopor, stupor, & quidquid funestissimi nudius tertius apparuerat, cum omnium admiratione; neque enim tam insignem mutationem potest facile mente concipere, nisi qui inspexit. Ad præcautionem tamen Corticis usum imminutum continuavit Ager ad paucos dies: unde omnino in pristinum restitutus est. Resumptis ille viribus Bononiam profiscitur, ibique iterum post tres hebdomadas Febre corripitur, mox revertitur Mutinam, ubi Febris pro Tertiana duplici statim se prodit. Accitus iterum ego die majoris afflictionis Aegrotum invenio obloquentem, atque intense febricitantem. Copiosæ mihi narrantur excretiones diebus anteactis prægressæ, præsertim sudoris immodici; Febris tamen his non obstantibus suscepit incrementum, & vires. Præscribo Clysterem injiciendum mane sequenti, ac successivam præcipio salvatellæ aperitionem, dein post horam Chinam Chinam *ad drachmas duas*. His peractis omnibus, die tertia vix redit umbra Febris; sed loco illius vomitus biliosus, & consimilis dejectio succedit cum quadam mentis hebetudine. Offertur iterum Cortex *ad drach. j.* & altera quoque die similiter exhibetur. Aboletur Febris omnino; sed perseverat torpor quidam actionum cum capitis dolore. Renovantur clysteres, & simul usus levior Corticis, videlicet *ad drach. ss.* quotidie per dies quinque cum *gr. ij.* *Salis volatilis. Viper. in forma boli, superhausto cyatho aquæ betonice*. Sublatis reliquis sym-

ptomatis, solus superstes manet capitis dolor ad dies quatuor, vel quinque: quibus exactis, superveniente biliosa diarrhœa, & vomitu consimili cum facili tolerantia, solui videtur; sed revera, eadem licet perseverante diarrhœa, & recurrente identidem bilioso vomitu, idem perseverat ad aliquot dies gravativus capitis dolor, qui tandem paulopost sponte evanescit, Aegrumque ab omni prorsus incommodo relinquit incolumem.

VIII. Vir honestus *Jacobus Barianus* decumbens ex Tertiana duplici, Perniciosa ob adjunctum soporem lethargicum, inferentem grave periculum vitæ, curabatur a *D. Clerica*, qui probe jam versatus in usu congruo Corticis, hunc obtulit Aegrotanti, illumque periculo, ut mos est, statim subtraxit. Unam autem, aut alteram recidivam leviolem, & sopore carentem passus Ager, vulgaribus evadebat remediis; cum ex improvviso rursus recidens in secundo Paroxysmo tam insignem lethargum patitur, quem describere supersedeo, ut vix credi possit ab illo evasurus. Tunc & ego in consilium advocor, interimque pendente adventu meo vena secatur; sed affectio soporosa æque perdurat. Supervenio tandem, & Corticis usum validiorem, si Ager alte dormiens, vix oculos aperiens, syllabasque tantum aliquas incoherentes edens, deglutire sit potis, Corticis, inquam, usum validiorem celeriter repetendum censeo. Offertur, assumit Ager; assumitque subinde Sanctissimum Viaticum. Evadit ab illo Accessu; nec alio tentatur, quippe munitus novo Cortice paulatim assumpto. Recidit tamen post aliquod tempus, sed longe minus graviter. Quia vero aliquam non levem prodit in somnum proclivitatem, Cortice iterum modice assumpto, & sensim continuato, integre convalescit. Idem post annum Quartana corripitur, a qua, post aliquod tempus duplici, & mox triplici reddita, lento, sed diuturno Corticis usu iterum liberatur; robustiorque subinde, ac coloratior factus, quam



quam antea, inculcata fruitur valetudine.

IX. *Filiolus* blandulus, & unicus D. Comitum Jo: Baptiste Saxi, Collegii Nobilium Convictor, detinebatur Tertianæ duplici per subingressum paroxysmorum continua, cujus symptomata gravia fuere crebri vomitus porracei, simulque verminosi, dejectiones confimiles, maxima ciborum averfatio, atque hæmorrhagia e naribus frequens, & cum excessu copiosa. Hic dum consueta Artis methodo caute curaretur, incidit in soporem profundissimum, in exacerbatione Febris invadentem, & usque ad remissionem illius perdurantem. Renovabatur symptoma quotidie, Agerque jam decolor, ab effusione cruoris, & viribus destitutus non erat par ferendo morbo quotidie magis illum oprimente, torpidumque, ac hebetem assidue detinente. Cum ergo ad summum devenisset vitæ periculum, jamque facies illi adeo immutata esset, ut vix vestigia servaret naturalis ideæ, illi Chinam Chinam, dummodo possem, ministrare decrevi. Et cum assumendæ amaræ Corticis potioni, vel bolis deglutiendis imparem cognoscerem, præscripsi remedium in forma Julapii, in quo tamen plurima Corticis latebat, ultroque addebatur substantia; eoque copioso pro ratione teneræ ætatis, & frequenter exhibito, paucis clysteribus interjectis, intra paucos dies Febrim omnino sustuli, Lumbricos, & soporosum symptoma adjunctum.

X. D. Joannes Buzzalinus post acutam ægritudinem, quam duplex Tertiana Continua intulerat, sat bene compositam, incidit in affectum soporosum, quem delirium, atque convulsio præcæferant, adeo gravem, ut fere Catalepticus videretur. Pulsus illi erat exilis, vixque tactu perceptibilis, Ipse vero immobilis quoad decubitus: haud difficulter tamen assumebat oblata, etsi cum stupiditate delirus. Notitia habita, quod Febris, quæ huic fero symptomati dedit originem, & quæ adhuc sub ipso, ut inquit *Mortonus*, larvata latebat, fuit ab ortu suo periodica, ansam dedit mihi circa decimam quintam morbi diem

acciro, ut cunctanter proponerem D. Ferrario curanti usum Corticis, quotiescunque aperitio Salvatellæ & Vessicantia illico apposita non proficerent. Cum ergo intra dies ea nil profecissent, ille autem adhuc deglutiendi capax videretur, cum jam Sanctissimum Viaticum assumpsisset, illi celeriter ministratum tanquam proxime morituro; idcirco præscriptus est eidem, statimque oblatus Peruvianus Cortex methodo modice valida, frequenter scilicet, sed non larga dosi, ut sensum observaretur actio medicaminis: quod cum prodesse nonnihil visum sit, alacriter continuatum est; eoque intra septem circiter dies integre restitutus est Ager ab omni stupiditate, & Febre constanter immunis.

XI. Similis pariter Cataleptico videbatur in quadam Tertianæ duplici Subcontinua recidiva Petrus Pini, quem a prima ægritudine liberaverat Cortex a D. Ferrario illum curante præscriptus. In novo itaque Febris reditu: quæ pariter continuitatem aliquam redolebat ut ante: cum sopor insuper gravissimus eidem adjungeretur, qui etiam tunc cum videbatur remitti, hominem tamen attonitum detinebat, ac ferre immobilem, loquela tantum aliquo modo superstita, & deglutiendi facilitate, cogitavit Medicus de communicando mecum casu, ei, quem supra descripsimus, non multum ab simili, ut decernerem, an & hic offerendus esset Cortex, nec ne: quoniam modo major, modo minor ad leges periodi febrilis observabatur intensio symptomatis, caput tamen quotidie gravius obruentis, & præceps periculum minitantis. Accessi ergo ad invisendum Aegrum, cui proinde Corticem exhibendum duxi. Cumque omni, quo posset, modo, repugnantiam suam medicamento ingrato, sibi que cognito ostenderet, mortem ego illi severe minatus, ni assumeret, vel invitum sumere, & congrue reassumere coegi: quo auxilio depulsa paullopost, ut assoluit, Febre, mentis alacer, ac vegetus factus est, & absque alia recidiva perfecte sanus.

XII. An-



XII. Anno 1707. assidebat Medicus Junior praxim mecum observans Nobilissimæ Virgini decumbenti longe ab Urbe. Ea occasione invisit ille quandam Aegrotantem nomine *Nicolaum Amici*, in Pago Florani degentem, & a Medico illius vicinæ curatum. Detinebatur Ager Tertianæ duplici per subingressum continua, suas tamen periodos adhuc non obscure servante. Processerat ad decimamquartam diem Febris, & supervenerat primo delirium, mox sopor gravis, qui singulis accessionibus gravior fiebat. Proponebat Medicus Junior cæteris abunde jam administratis usum Corticis, prout a me usurpâri aliquoties viderat; præsertim in *D. Comite Alphonso Saxo*, cui adstiterat; renuebat autem Medicus curans, haud satis conscius de efficacia medicamenti in hisce casibus, multoque minus de methodo mea. Cum ergo inter ipsos non convenisset de remedio, me interpellarunt per literas, sic expresse jubente ipso Loci Domino, *D. Marchione Philippo Antonio Coccapano*, *Aulæ Serenissimi Ducis Præfecto*, Viri omnium amantissimo, atque omnibus pariter dilectissimo tum propter eximios mores generis nobilitati conjunctior, tum propter summam erga egenos omnes, & præsertim Subditos suos beneficentiam. Statim ac intellexi morbi feriem, & gravitatem symptomatis, facile votum edidi pro valida oblatione Corticis, præsertim si forte cæterorum remediorum incapax fuisset Ager, & manifeste cæteroqui periturus. Interea qui aliquantisper distabat ab extremo statu, in hoc temporis intervallo ad illum devenit, nova accessione, novoque sopore ferocius ingruente, itaut vix Sacramentorum administrationem valuerit admittere. Dum ergo conelamatus credebatur, fuit oblatus Cortex methodo valida, Agerque præter expectationem servatus. Recidit tamen alias, longamque convalescentiam, & improsperam valetudinem passus, ab omni tandem morbo liber evasit, talisque permansit ultra biennium, quo tempore (ut mox

intellexi) Pleuritide correptus vitam cum morte commutavit.

XIII. Inter soporosas quoque Febres enumerare lubet sequentem, licet vere non tam ratione soporis, quam ratione Continuitatis acquisita, aliorumque symptomatum periculosa evaserit. Sed quoniam in ea proclivitas in somnum fuit symptoma fere continuum, nec leve, præcessitque Febrem ipsam Comatosus affectus gravis, ideo illius historiam coronidis loco ad hanc soporosarum speciem placuit revocare.

*Illustrissimus, & Reverendissimus Episcopus Urbis nostræ D. Ludovicus Comes Masdonus*, septuagesimum sextum agens ætatis annum, Nephritidi obnoxius, Rheumati, & Podagræ, post duos insultus levioris Apoplexiæ, in non levem totius sinistri lateris paraplegiam commutata, Tertianæ subinde correptus est, Intermittente quidem, sed duplici. Cum vero longe ab Urbe degeret, quo se contulerat ad mutandum aerem, neque ibi assiduum plane haberet curantem Medicum e propinquiore Civitate accitum, Virum cæteroqui diligentem, ac Doctum, sed cujus opera se non admodum indigum reputabat, res eo devenit, ut Febris suas quidem patenter servaret Exacerbationis, & Remissionis vicissitudines, sed non perfectam amplius attingeret solutionem. Interim somniculosus ille assidue jacebat, viribus summe destitutus, & summe pariter emaciatus, longe ab habitu suo naturali. Status illius Serenissimo Duci relatus movit animum Celsitudinis suæ, ut me mitteret ad invisendum decumbentem Præsulem, quem reperi vix transacta decimaquarta morbi die febricitantem intense in vigore Exacerbationis, remisse autem aliis temporibus. Interea tamen præter soporem non quidem profundum, sed fere continuum maximam observavi quovis tempore linguæ ariditatem, quam comitabatur loquela ob id nonnihil difficilis, vox, ut dici solet, clangosa, urina impense rubra, & quantitatis perexiguæ, ac tandem singultus. Imbecillitas Aegri me pau-



paulisper detinuit ancipitem, an illum exponerem itineri, ut in Urbem Lectica vectus transferretur. Deo tamen dante satis feliciter factus est redux; vixque elapsa imminente nocturna Exacerbatione, statim illi oblatus est Peruvianus Cortex *ad drach. j.*, die videlicet 15. Julii 1710. vespertinis horis. Sequenti die repetitus est mane tantum *ad scrup. iv.*, cæteris vero diebus *ad scrup. ij.*, primò bis in die, deinde semel tantum, eo quia prima statim Febrifugi oblatione admodum enervata, & paullopost omnino abolita remanserat Exacerbatio periodica. Quia vero non plane extincta erat Febris, quæ secundum tenues sui reliquias assidue perseverabat, & cum ea rubor, ac paucitas urinarum, linguæ ariditas, & ipse nonnunquam singultus, ideo brevi quiete interposita iterum renovatus est usus Remedii *ad scrup. ij.* quotidie usque ad complementum *unciarum duarum* a principio ad finem morbi; quibus absumptæ quoque sunt Febris-reliquiæ, & fugata connexa symptomata, itaut hoc uno auxilio, & interjecto clysmatum usu sine ulla purgatione, aut sanguinis missione [quæ duo notatu digna] non modo sit restitutus in pristinum sine ulla recidiva, sed & adeptus habitum corporis meliorem, atque pleniorum ac antea dignissimus Antistes, cum universali totius Civitatis, Gregisque sui lætitia, & plausu.

#### C A P I T U L U M IV.

*Aliæ insignes Historiæ, ab Amicis communicatæ, variarum specierum Februm Perniciosarum, curatarum ope Chinæ Chinæ nostræ Methodo administratæ.*

**N**E FIDEI tantum nostræ innixa prodeat in apertum veritas eorum, quæ ad ostendendam efficaciam Chinæ Chinæ nostræ Methodo administratæ summo hucusque candore protulimus, haud erit incongruens, Historias aliquot Curationum non minus insignium, ex alie-

na quoque fide, ac experientia depromtas, in medium afferre non in vanam quandam ejusdem Methodi gloriolam, sed in publicam utilitatem, & in unius testimonium multiplex veritatis. Quoniam vero qui præ cæteris talem Methodum amplexi sunt, & experti perutilem in Februm Perniciosarum periodicarum curatione, fuere ii, quos quondam ut Filios amore, & disciplina colui, modo honore ut Socios, & Collegas [quemadmodum eos pariter colit & Lyceum, & Civitas] illorum propterea hac in re præ multis expertorum, ac omni fide dignorum, Historias quasdam mihi humaniter communicatas peculiari hoc, & sejuncto Capite placuit propriis nuperrime recensitis adnectere.

Per hoc autem quod duos tantum Professores, Methodum meam, & (quod magis refert) occasionem, ac opportunitatem eadem utendi in Perniciosis præsertim Febribus apprime callentes, præ aliis selegerim, nolim argui, quod desint in hac Urbe quamplurimi, qui China China frequenter utantur primæva præcipue Methodo in vulgaribus saltem, ac diuturnis Intermittentibus; perpauci enim modo sunt ii (licet sint aliqui) quibus plane exosum sit istud Febrifugum. Immo addam, nec deesse quoque Ingenuos aliquot, qui cum viderint, aut intellexerint faustos, qui ab anno 1695. in hanc usque diem mihi pluries obrigerunt eventus ex libera-  
liore dosi Chinæ Chinæ in arduis jam memoratis circumstantiis oblata, consideratis ab eo tempore majori animi contentione, majorique fiducia ac antea iis omnibus, quæ coherentem ad experimenta mea sibi visa reperere apud alios etiam Auctores, Peruviano Cortice viriliter utentes, suam tandem sibi Methodum comparare cœperunt, quæ non contemnendas identidem curationes per Chinam Chinam absolvunt. Hos inter peculiari, & honorifica mentione dignus occurrit *D. Davinius*, Aulicus Collega meus Eruditissimus, qui paullopost exactam mihi feliciter anno prædicto 1695., ipso interveniente, *D.*



te, D. Comit'is Nogarola Curationem Lib. 3. Cap. 6. descriptam, aliasque plures, illo nedum præsente, sed & concurrente absolutas, quas nuper Cap. 2. hist. 1. 3. 9. 14., & 16. retuli, Methodum ampliozem, ac profiteretur ante, cœpit amplecti, media scilicet copiosioris Corticis infusione intra copiosum liquorem partitis vicibus absumentum, ut Galli docent, Anglive Auctores: qua Methodo curationes cæteroqui difficiles non sine sua, ut pluries factus est, admiratione ad bonum exitum postea perduxit. Ab hac deinde Praxi ad Theoreticas considerationes conversus, Lucubrationes quasdam in tutamen hujusce Febrifugi, *Hæctorico* plane robore conflatas, tum Latino idioma te, tum Hætrusco conscripsit, easque proprio velato nomine intra annum 1708. Diario literario, quod tunc sub titulo *Musei Minervæ*, vulgo, *Galleria di Minerva*, Venetiis cudebatur, voluit insertas, meisque etiam experimentis, & Curationibus [meo licet, ut par erat, sicuti & proprio suppresso nomine] corroboratas. Cum tamen nuperrime præclarum aliquem Casum hic inferendum ab eo expetierim, intentum assequi a modesto Amico nullatenus licuit. Atque ita illius modestia, ni semetipsam laude promerita, meum saltem Tractatum ulteriori auctoritate fraudavit.

Liceat nihilominus vim quodammodo aliquam officiose, prout amicum decet, eidem inferre, & ex iis ipsis Lucubrationibus, quas vere se scripsisse mihi olim factus est, prostantque sub nomine *Hæctoris ex Valle* in antedicti *Diarii Tomo sexto*, quidpiam saltem excerpere, quo mea nedum confirmentur asserta, sed & quædam dissipetur caligo, quam iisdem undequaque veris posset quadantenus offundere involuntarius nescio quis error, siue [ut ipse domesticæ suæ Academiæ morem servans loqui consuevit] *Hallucinatio* quædam, quæ forte eidem de minutulis circumstantiis minus sollicito irrepsit, retractis videlicet eo loci ad inferiora tempora meæ Praxeos initiis: quæ sane chronologi

*Torti Therap. Spec.*

graphica variatio communem quodammodo representans eandem praxim meam, plane tunc Mutinæ singularem, & cæteris omnibus incompertam, cum praxi contraneorum Medicorum illam aperte potius tunc improbantium, non parum mihi faceffit negotii, de factorum, dictorumque meorum veritate servanda, omnique delenda contrariæ suspicionis umbra prout hominem probum, honestumque decet, sollicito, ne forte turpem notam Nebulonis, aut Impostoris, quasi pro meis aliena vendicans, subire periclititer.

Etsi vero leviora hæc persequi speciem quandam garrulitatis præferat nemini profutura; malo tamen, fando quæ vera sunt, delicatulus nimium apud Catones videri, quam silendo mendax apud Momos, & Zoilos. Meæ potius me pœnitet inconsiderantiæ, qua mihi metipsi necessitatem quandam regerendæ hujusmodi Cantilenæ, nil tale prænoscingens, imposui tunc cum primam inventionem curandi per Chinam Chinam Febres Periodicas perniciosas in *Urbe mea*, mihi uni, ut ferebat veritas rei, utque notorium erat apud nos omnes, libere, & candide ascivi, atque ut quid vere meum (quicquid illud erat) in publicam utilitatem proferre, & dono libenter dare ingenua facilitate cordis pluries asserui, in prima scilicet editione hujusce *Therapeutices*, tum præfando ad Lectorem, tum in ipso Tractatus limine, tum denique magis expresse Cap. IV. Lib. III. Sed quænam quæso gloriola foret isthæc, ut eam reluctante veritate, vana quapiam impotentia animi tunc affectasse credi possum, postquam ibidem apertis literis factus sum, Methodum meam, quantumvis in Praxi utilissimam, & in successibus sæpe admirabilem, ortum tamen suum traxisse ab experimento fortuito, nulla doctrina, nullaque sublimi perspicacia mentis, sed paucula tantum industria mea comparato, cui etiam experimento similia habuisse subdidi ante me in *Urbe sua* [me quidem patenter inscio] *Richardus Morton*? Quia vero

Q

fuisse



fuisse me hujusce rei Auctorem primum in Urbe mea, effatum est, quod veritati ad amissim consonat, quædam modo me cogit necessitas, ut dubitationes omnes removeam, quas circa hoc scriptis olim suis præter intentionem Amicus cæteroqui favere intendens, nonnullis forsan, ut subaudio, haud satis gnaris potuit incurrere, priusquam curationum historias ab aliis Amicis, qui meam tunc Methodum illico sunt amplexi, communicatas subnectam.

In præcitato igitur *Diario* anno 1708. Venetiis impresso series quædam visitur quindecim *Epistolarum* de China China viribus, datarum partim sub anno 1696. partim sub anno 1697. Italico idiomate ab eo conscriptarum [ *Latinam Dissertationem Academicam* ejusdem Auctoris, & de eadem materia datam *Mutina* anno 1699. ibique pariter insertam pag. 119. hic prætergredior ] quatum titulus est — *Abbagliamenti Medicinali d' Ettore dalla Valle sopra gli effetti della China China &c.* — In earum itaque prima data sub die 21. Novembris 1696. pag. 237. ejusdem Diarii hæc leguntur — *Quest' anno dall' uso della China China qui si sono veduti effetti maravigliosi. Due tra gli altri, ch' avevano Febbri acute ridotti all' estremo con polso smarrito, e freddo esterno universale, che ha durato de' giorni intieri, per mezzo di questo rimedio copiosamente bevuto in vino, si sono tolti quasi di braccio alla Morte. Gli afflitti poi dalla quartana hanno in sì breve tempo recuperato l' appetito, il sonno, e le forze, che s'io non fossi testimonio di vista, nol crederei. Nella China China pare ritrovato il riparo non solamente alle Febbri croniche, ma quasi alla Morte, e dalla felicità de' successi ha preso tanto di credito appresso li Medici, & Cittadini, che nelle Febbri maligne, vicino all' estrema Unzione, di quella si vagliono, come unica, ed ultima speranza de' disperati &c.* In margine autem ipsius Narrationis ex se indeterminatæ sequentes sunt annotationes peculiare e regione impressæ — *Sig. Conte Nogaroli — Sig. Antonio Maria*

*Zani — Sig. Conte di Marsciano — Padre Lettore de' Cappuccini &c.*

Atque ut a Narratione exordiar, ex ea confirmatur aperte quod nuper retuli, scilicet Medicos hujus Urbis, etsi tum conscios de experimentis meis, & de noviter per illa detectis China China viribus, nondum tamen conscios satis fuisse Methodi meæ, nec Februm specialium, in quibus ea locum haberet: immo neque evasisse conscios tempore, quo impressa fuit Epistola isthæc, sub anno quidem 1696. data, sed anno tantum 1708. in lucem edita, nulla ulteriore addita limitatione, quæ cæteroqui probabiliter fuisset addita, si tunc saltem satis nota extitisset nostratibus Medicis praxis mea. Neque enim in malignis promiscue Febris, neque in Ægrotis omnibus desperatis, ac morti proximis, ut indicare videtur ipsa narratio, sed solum in iis, quibus ex Perniciosa quapiam Periodica Febre id contigisset, mihi mos erat China China uti peculiariter administrata: quod satis patet Tractatus meus universus, cujus proinde scopus fuit, quemadmodum in prima illius editione pluries sum protestatus, ad tollendas hujusmodi hallucinationes etiam tum [ utinam non etiamnum ] vigentes circa factum, ejusque modum, Perniciosas, seu malignas Febres, in quibus China China vere prodest, in suas species dividere, & ab iis, in quibus non prodest, discriminare, methodumque simul tradere Febrifugum hocce specialiter in iisdem administrandi.

Per eandem insuper Narrationem videtur liquere, Medicos Urbis nostræ operum China (illam me præscribente) tunc Spectatores, usque tamen activitatis illius semper uniformis in praxi, fuisse jejunos, tempori scilicet, aut peculiari Constitutioni identidem adscribentes, quod constanti illius virtuti, & peculiaris administrationis modo, præ cæteris vero noviter detecto lumini tum in conjectanda ulteriore China China energia, tum in dijudicandis Februm omnium eadem curabilium speciebus, debuif-



debuisset adscribi. Id omne deduci posse videtur ex verbis illis — *Quest' anno dall' uso della China China quì si sono veduti effetti maravigliosi* — operatio siquidem Chinæ Chinæ non est alligata talibus, vel talibus temporibus, sed talibus, ac talibus Febribus, & tali, ac tali modo illam in iisdem exhibendi. Quod si frequentius una Constitutione succedunt admirabiles illius effectus, quam alia, id accidit præcise, quia una Constitutione magis quam alia regnant febres quædam Periodicæ malignæ, atque præcipites, una China China certo domabiles, eæque simul incidunt in manus Medicorum tum earum naturam, tum Febrifugi rectam administrationem callentium. Cæterum effectus mirabiles, qui tunc fuere Mutinæ observati, observati quoque fuissent antea, si antea fuisset Mutinæ compertum, quod ejusmodi febres possent China China curari, simulque comperta fuisset Methodus illam peculiariter pro earundem curatione usurpandi, ut millies observati deinceps sunt iidem effectus, postquam hæc omnia favente Deo ipse detexi, & pro bono publico promulgavi. Tantum autem abest, quod quicquam ex his fuerit Medentibus nostris compertum, quin potius ipsa vulgatum Intermittentium, puta Quartanarum ec. completa, felixque curatio per Chinam Chinam ordinaria eorum temporum methodo oblata obtenta, pluribus tunc esset admirationi magis quam usui; quod de se ipso sincere fatetur Relator ingenuus, ceteroqui in Arte medica versatissimus, & Peruviano Cortice utens, verbis hisce ob candorem suum Cedro dignissimis — *Gli afflitti poi dalla Quartana hanno in sì breve tempo ricuperato l'appetito, il sonno, e le forze, che s'io non fossi testimonio di vista, nol crederei.*

Tandem ex ejusdem narrationis textibus simul collatis eruitur, quod anno 1696. nostrates Medici nondum aliud perceperant (atque hoc tantum percepisse est pauculum quidem) nisi quod curationes a me peractæ anno præcedente, quæque in dies peragebantur, &

quarum rumor ob insuetam novitatem in Arte per Urbem universam circumferebatur, fiebant a me sola China China dosi majore accesset in usu ægris pluribus prope morituris exhibita, nec quicquam amplius, quia nil amplius meæ Schedulæ in Pharmacopoliis cuique prostantes demonstrabant; ego vero nedum id Medicis amicis, forsan & non penitus amicis, pro bono publico sponte, ac sincere aperiebam; sed & regulas, & modum rationalem felicitis oblationis illius, dummodo Februm natura ex se ferret usum remedii, in quibusdam tantum, utut læthalibus, admirandi, in quibusdam aliis, utut mitioribus, inutilis, & in aliis quibusdam incerti. Sed quia hæc omnia scitu necessaria in Consultationibus, & familiaribus colloquiis a me tam caute, tam urbane, tam comiter declarari nequibant, quin tandem deberent expresse doceri; parum dispositos idcirco reperi ad ea attente, ac benigne excipienda promissæ barbæ Auditores; adeoque mirum non est, quod perperam putarint nonnulli voci publicæ magis auscultantes, quam meæ, posse servari per Chinam Chinam tumultuarie, ac sine lege in vino copiose epotam omnes fere quibusvis acutis, malignisve febribus detentos, etsi deploratos, ac morti proximos, idque forsan æque perperam in praxi tentasse, quemadmodum videtur innuere citata narratio verbis illis, non aliud, quam copiam Febrifugi pro medela universali indicantibus — *per mezzo di questo Rimedio copiosamente bevuto in vino* — & paullo post — *nella China China pare ritrovato il riparo non solamente alle febbri Croniche, ma quasi alla Morte; e dalla felicità de' successi ha preso tanto di credito appresso li Medici, e Cittadini, che nelle Febbri maligne vicino all'estrema unzione, di quella si valgono, come unica, ed ultima speranza de' disperati* — Ex opposito neque mirum est, quod nonnulli alii coherentes ad priorum fallacem conjecturam putantes, me vere indiscriminatum tunc omnibus Ægrotis ex quacunque acuta, vel



maligna febre ad extrema redactis Chinam Chinam offerre consuevisse, & quidem perpetuo in vino [cum tamen modo in vino, modo in Aquis stillatiis, modo in forma solida consueverim pro re nata præscribere] mirum inquam non est, quod de praxi mea tunc obmurmurarent, illamque modis variis traducendo tentarint evertere, eo ipso forsitan tempore, quo clam, sed inconcinnè imitantes, optato identidem fraudabantur eventu. Mirum potius esset, ne dicam ridiculum, si nec hodie eandem satis callentes, quia forte non satis callentes naturam febrium, postquam non potuerunt evertere, nec bene assequi, crederentur tamen illius Inventores in hac Urbe primi, talesve credi affectarent, aut paterentur. Et hæc quo ad sensa narrationis non aliud, si rite perpendantur, quam dictorum, factorumque meorum confirmationem continentia, nec nisi votis ad favorem propensis ab Amico, qui primæ Perniciosarum curationi anno 1695. mihi peractæ stupens interfuit, exarata.

Ex notis vero prædictæ narrationi appositis confirmatur pariter exitus felix modo memoratus curationis per Chinam Chinam a me primo absolutæ in generoso quondam Viro *D. Comite Bailardino Nogarola*, ex triplici Quartana perniciofa ad extrema redactæ: cujus tamen Febris symptomata [parcat quæso Relator certe non satis memor] nequaquam fuere *perfrigeratio universalis*, nec *pulsus abolitio*: ut in præcitata narratione videtur innui; sed *profundissimus lethargus*, *singultusque violentissimus cum motibus per Corpus universum tremulis, & convulsivis*, quemadmodum ex descriptione mea habetur *Lib. III. Cap. VI.* Non tamen negaverim accidentia perfrigerationis universalis, & abolitionis pulsus anno vere 1696. (qui fuit annus subsequens curationi *D. Co: Nogarolæ*) potuisse forsitan contingere *Secundo* ex Ægrotis ibidem relatis, ut eo anno contigit aliis pluribus a me descriptis, quos inter *D. Marchio Gallianus de Coccapanis*, & *D. Joseph illius Frater*, immo &

*ego ipse*, ut in historiis primâ, & secundâ Capitis secundi, atque prima Capitis primi hujusce Libri per extensum narravi.

Discrepantia potior, & gravioris momenti, ut obiter nuperrime tetigi, versatur circa tempus prædicti experimenti mei in præcitato *Comite Nogarola* primum habiti; eventus siquidem ille contigit, non anno 1696. ut contigere alii cum eo acervatim in notis prædictis enunciati, sed anno 1695. Mense Septembri, quemadmodum a me relatatum fuit in prima editione hujusce Tractatus *Lib. III. Cap. VI.* excerptumque fideliter ex Scheda originali historiæ per *D. Co: Aloysium* sanati Equitis filium subscripta: cujus præcisi temporis plures extant circumstantiæ planæ innegabiles, scriptæque memoriæ tam in Urbe, quam in Aula facillime petendæ ex iis omnibus, quæ idem *D. Comes Bailardinus* ante, & post ægritudinem suam palam, publiceque peregit; præterquamquod contemporanea fuit curatio viri Patricii *D. Geminiani Levizzani* descripta jam *Lib. I. Cap. X. Hist. xvi.* nec non alia longe memorabilior immediate subsequuta in *D. Marco Martini*, & relata hujus *Libri Cap. II. hist. iv.* eas namque omnes æqualiter successisse constat anno 1695. a quo tempore praxis hæc mea exordium sumpsit, & ante quod tempus nemo certe in hac Urbe Perniciosarum periodicarum curationem per Chinæ Chinæ administrationem noverat; nec quemquam adeo perfrictæ frontis reperiri posse crediderim, qui audeat oppositum effutire. Aliud est enim, quod quispiam forte apud nos, vel etiam alibi, curaverit media China China aliquam ex hujusmodi Febribus ante seram promulgationem Tractatus mei, nonnisi anno 1712. in lucem editi, scilicet post exercitam a me publice per annos 17. praxim in eodem Tractatu tardius expositam, adeoque aliud est, quod curaverit, me centies ac centies viam præmonstrante; aliud est, quod id egerit ante me, nempe ante annum 1695. tunc enim revera vix apud perpaucos



paucos ē nostris in usu erat, ut ad Lectorem præfatus sum olim, Chinam Chinam exhibere, & quidem more vetusto, ac in diuturnis tantum intermittentibus omni acutie, atque perniciē carentibus; nec enim aliter antea factitabam & ipse.

Quoad alios casus in eodem margine annotatos nil habeo quod addam; cum enim anno vere 1696. iidem evenerint, semper magis assertionum mearum veritatem roborant. Revera casus *D. Antonii Maria Zanni* a me ipso relatusest *Cap. I. hist. viii. hujusce Libri*: mihi namque eam curationem ascivi, quia, ut ibidem retuli, eam *D. Cervio* illum curanti ipse suggessi eodem tempore, quo egomet per idem remedium a Perniciosa Diaphoretica supra enunciata evaseram, ipso *D. Cervio*, & *DD. Davinio*, & *Ramazzino* mihi faventibus, meoque quod in propria causa molitus eram tentamini, facile annuentibus.

Historia pariter Febris *D. Comitis Ludovici de Marsciano*, quæ paullopost meam convalescentiam contigit, *D. Davinio* curante, *D. vero Ramazzino*, & me superaccitis, ea inquam ipsa vere contingit anno 1690., & a me descripta fuit *Lib. I. Cap. X. hist. xiii.* Eam vero Febrim inter benignas intermittentes, cujusmodi reapse fuit illa, simpliciter retuli, vulgari quippe usu Corticis facile sanata, nec enim in ea quicquam notatu dignum observare datum fuit, nisi facilem evanescentiam Tumoris in liene, qui depulsa per Corticem Febre statim obliterated remansit.

*De P. Lectore ex Cappucinatorum familia* per usum Corticis anno itidem, ut dicitur, 1696. (forsan nonnihil serius) sanato nullam habeo notitiam certam: siquidem eum ipse nequaquam curavi; si tamen is forte fuit quidam *P. Augustinus e Corrigio* in Cœnobio Mutinensi Lector, & mihi cæteroqui notus, eum curavit *D. Davinius* per Chinam Chinam more vulgari exhibitam, a febre Tertianā [ni fallor] duplici, lenta solum, atque diuturna; si vero fuit ille quispiam alius, febrisque

*Torti Therap. Spec.*

ipsa e genere Perniciosarum, & per Chinam Chinam a quocunque curata, cum id anno pariter 1696. asseratur *Mutina* contigisse, me non potuit non habere prævium quicunque curationem illam peregissee dicatur.

Ex his patet, Curationes in prædicto *Diario* adumbratas, quatenus Periodicas Perniciosas respiciunt (de vulgaribus enim nulla mihi sollicitudo) ad meam methodum ab origine debere referri, quemadmodum ad eandem suas, longe licet ante primam editionem mei *Tractatus exactas*, ingenue referunt Professores immediate infra subdendi: quorum tandem Historias mihi communicatas meis hætenus exaratis annecto.

#### HISTORIÆ COMMUNICATÆ

Ab Excellentissimo *D. Antonio Francisco Clerico* in Lyceo, & Urbe Mutinensi Pub. Med. & Chirurg. Prof.

UT primum mihi occurrit Synopsis Tua de Methodo exhibendi Corticem Peruvianum in Febris quibusdam Perniciosis, incidit in animum, Vir summe Colende, nonnullas hujusce generis Februm Historias tuis adjungere, cum earum China China expugnandarum Methodum didicerim a Te jam antea me in Praxim Medicam humaniter instruente; & præcipue eo tempore, quo *D. Comiti Bilarmino de Nogarola triplici Quartana Continua* laboranti adstiti, qui tunc ob morbi ferociam ab exteris etiam Medicis pro deplorato habitus, solo Peruviano Cortice Tua hac Methodo a Te solo feliciter administrato anno 1695. citra expectationem convaleuit. Tanti Remedii, illudque propinandi, Methodi nunquam oblitus, quoties tulit occasio, hæc Febres veluti jugulando, quamplurimos ab Orci faucibus eripui, præcipue anno elapso, quo tempore, grassantibus hujusmodi Febris, Medicus Xenodochii Militum sæpesæpius feliciter tanti Febrifugi vim expertus sum.

*I. Vir quinquagenarius duplici Tertianâ Continua tenebatur invadente cum frigore, & declinante cum sudore;*

Q 3

Hunc



Hunc torquebat magnus aestus, & summa jactatio, in Febris vigore sitis inextinguibilis, dolor Capitis, & Cardialgia, quæ per dejectiones biliosas qualibet vice solvebatur. Exhibitis omnibus iis auxiliis, quæ in Tertianarum curatione Ars Medica præstare valet, & parum proficientibus, Febres iisdem semper symptomatibus stipata vigesimam usque quartam diem attigerunt, quæ peracta, consueta Febre correptus est, sed intensiori, & longiori frigore, & cum fuit circa statum, in tam profundum lethargum incidit, ut adhibitis validioribus cruciatibus, eum sudore copiosissimo perfusum, ac stertentem, nullo modo expergiscere licuerit. Tota nocte hoc pacto se habuit, matutinis vero horis parumper remissa est cum symptomatibus Febris; hinc metu ne altera adveniente accessione e medio tolleretur, drach. vj. Corticis Peruviani in Vino generoso præscripsi, quo assumpto altera die vix febricitavit, & sic tertia, & quarta sequenti, intra quam omnino evanuit Febris; Hoc tamen non obstante per alios octo dies ejusdem Corticis drach. j. quolibet mane assumebat. Circa sextam ab infestatione diem apparuit ad aurem sinistram Parotis, & post octavam altera ad dexteram, quibus retrocessis, denuo irregulares Febricula Patientem infestarunt, quæ tamen Corticis ejusdem usu evanuerunt, & Ager pristinae sanitati restitutus est.

II. Miles Tertianæ simplici cum frigore, vomitu, & diarrhœa correptus est; quarta die, quæ vacua esse debuerat, recurrit Febris, & quinta sævis adeo stipata symptomatibus accessit, ut singultus, pulsus parvus, & frequens, algor in universa cute, intus summus aestus, sudor frigidus, & dilutus uno ictu apparuerint, unde nova recurrente accessione Agrum certo certius moriturum putavi. Cognita ergo Perniciosa Febris conditione, Corticis Peruviani unc. ss. Agro propinavi, & per tres subsequentes dies drach. j., quibus completis, cessantibus supradictis symptomatibus, a morbo omnino evasit, & quarta post Chinam Chinam assumptam die per Xenodochium

deambulantiem inveni. Cum vero alvus esset adstricta, me inscio, unam ex Pillulis, quam Agrotantibus ad solvendum ventrem, prout necessitas postulabat, exhibere consueveram, ab adstante desumpsit, & altera die ab assumpta Pillula iterum accessit Febris cum tanta symptomatum vehementia, ut certe moriturus videretur, dum sine pulsu, frigidum, sudore diaphoretico madefactum, cum respiratione frequenti, & absque loquela inspexerim. Iterum Corticis Peruviani unc. ss. exhibui, & per quatuor subsequentes dies scrup. ij. deinde loco alterantis scrup. j. per octo alios dies, & Ager ab assumpto Febrifugo paulatim perfecte sanitati donatus est.

III. Gibbus quidam, unus ex Assistentibus Xenodochii Militum, dum Febres hujus nature grassabantur, Tertianæ simplici corripiebatur: quinta die de stomachi dolore conquerebatur; declinante vero Febre cum sudore bene se habebat. Sexta die, quæ intermissionis futura erat, denuo invasit Febris cum alvi fluxu, & intensiori ventriculi morfu; hæc vero declinante omnia cessabant. Septima morbi die tanto impetu recurrit Febris, ut acerrimo dolore ad Ventrículum, & Intestina excitato, sanguinem per superiora, & inferiora ejiciens, frigidus, viscidoque sudore perfunderetur, & inde vox clangosa, pulsusque fere nullus perciperentur. In tam præcipiti Casu statim Corticis unc. ss. exhibui, quam rejecit; iterum eandem dosim, sed partitis vicibus propinavi, & post hanc vomitus sedari omnino, sanguis per inferiora imminui, & aliquantulum refici pulsus videbatur. In noctis progressu cetera symptomata paulatim remissa sunt, licet ferme cadaver esset Ager. His stantibus, per subsequentes dies drach. j. Corticis præscripsi, & quarta die Febris evanuit; hinc per alios octo dies ad scrup. j. propinavi, & interim præter quoque mei expectationem integre convaluit.

IV. Aurifex Febre Tertianæ duplici continua corripiebatur, quæ usque ad octavam diem regulariter processit; in invasionem enim frigus aderat, magnus aestus,

& si.



Et sitis in statu, Et sudor in declinatione, licet nunquam ad infebrecitationem deveniret. Perpetuam tantum, Et tantum contumacem vigiliam, ac corporis agitationem observavi, unde his repetita sanguinis missione, Et exhibitis iis remediis, quae Ars suggerit, nunquam mea occurrit menti, fore ut ille nova adveniente Febre de repente periclitaretur. Sed vespere Aegrotantis cubiculum ingrediens, eum invisi decubitu supinum, convulsus, brachiis contractis, Et oculis apertis attonitum. Vocatus non respondebat, pulsus erat parvus, Et frequens, respiratio brevis, Et difficilis, Et omnia mortem minantia. Dum cucurbitulis, vel frictionibus sub plantis pedum, vel exhibitione spiritus Salis ammoniaci cruciabatur, cervicem attollens, Et brachia quassando, in clamores tantum erumpebat. Statim unc. ss. Corticis praescripsi, quem summo cum labore (expers enim erat mentis, Et convulsus ore) propinavi. Totam noctem in tam deplorabili statu transiit; mane declinante Febre supradicta symptomata parumper declinarunt, Aegerque mentis compos Adstantes coepit cognoscere: unde denuo pro tribus vicibus drachmam Corticis praescripsi, dein successive drachmam semis per aliquot dies, Et tunc temporis cessante Febre una cum omnibus symptomatibus, a morbo lento pede sese restituens, optime convaleuit.

V. Miles post triduum ab invasione Febris deferabatur ad Xenodochium, quem dum invisi, ante vespertas obituum certe credebam. Interrogatus egre respondit: quartam esse sui morbi diem, Et Febrem primam, Et secundam accessisse cum frigore, pariterque cum sudore evanuisse; tertia vero die denuo correptum se a Febre cum frigore tamen minori, pauculo calore ad exteriora, sed maximo ad interiora, Et post octo, aut decem horas ab accessione apparuisse sudorem copiosius emanantem. De quarta vero Febre, qua tunc laborabat, se nihil scire aiebat, nisi quod pessime habebat. Tunc ego pulsum tangens, quomodo haberet nescivi, cum ne primam quidem pulsationem enumera-

re potuerim: carpum enim tractans glaciem tangere mihi sum visus. Talis erat Aegrotantis status; jacebat nempe ille sine pulsu, sudore frigidissimo, Et copioso per totum corpus perfusus, Et tanta singultus frequentia irritatus, ut vix verba facere posset. Cardialgia, Et Ventris torminibus cruciabatur, dejectiones nigricantes, ac sanguine immixtas reddebat, eaque die plusquam quinquaginta sedes habuerat. Totum corpus pustulis lividis, Et nigricantibus coopertum, facies cadaverosa, lingua arida, sitis inextinguibilis, urina nulla, summa jaectatio: uno verbo, tanta erat symptomatum congeries, Et ferocia, ut absque dubio brevi moriturus cunctis videretur Aegrotus. Interim quid agendum dubitavi, cum deesse tempus exhibendi Remedii metuerem, eo raptim ad mortem properante: nihilominus de Corticis innocentia certus, statim ejus drach. vj. in Vino generoso infusas propinavi, Et iterum vespere drach. j. Mane de eventu curiosus ad Xenodochium me contuli, Et Aegrotantem aliquantulum calefactum, cum aliquo, licet exiguo, pulsu inveni, Et sudorem, singultum, dejectiones sanguineas, Et omnia supradicta symptomata remisisse comperi: unde continuato Febrifugi usu ad drach. j. singulis subsequentibus diebus, intra paucos dies omnino a Febre evasit. Sexta die ad anum tumor apparuit, qui suppuratus, Et expurgatus cicatricem admisit, Et Patiens pristina sanitati restitutus est, nullamque passus est Recidivam.

Quamplurimas alias harum Februm Historias Tibi communicandas haberem, Vir Egregie, quas lubens omitto, ne pagina succrescens locum Observationibus tuis eripiat, quae miram hujus Remedii methodice, ut Tibi mos est, atque efficaciter administrati, vim absque aliorum calculis satis superque evincunt.



## HISTORIÆ COMMUNICATÆ

Ab Excellentiss. D. Ferrante Ferrario  
Mutinen. Prof. Eruditiss. & in Exe-  
dra publica meas vices supplente.

**P**OSTULAS a me, Clarissime, ac  
Humanissime Vir, Casus aliquos,  
quos China China utenti observasse mihi  
contigerit in Praxi, & jam libentissime  
obedio. Verum tui quoque sunt, quos nunc  
scribo; Horum enim alios Te consulente,  
alios, Te Methodum tuam mihi jam  
antea communicante, curavi. Debet Ti-  
bi Urbs nostra felix hoc de Peruviano Cor-  
tice periculum, cum pro Febris Perni-  
ciosis expugnandis mirum hunc, certum-  
que Remedii modum apud nos antea ten-  
taverit nemo. Debeo Ego Tibi quidquid  
debent ceteri; Cum tamen id, quod pu-  
blici juris jam fecerat Curationum tua-  
rum felicitas, intimius mihi amor, &  
ingenuitas tua aperuerit, in communi be-  
neficio fortiori præ ceteris vinculo obstri-  
ctus sum Tibi. En ergo Casus aliquos ex  
iis, quos in usu Corticis, pro Febris  
quibusdam Perniciosis curandis, mihi da-  
tum est observare.

I. Anna Compagnoni mulier valetu-  
dinaria, & doloribus uterinis sæpe sæpius  
obnoxia Mense Julii Anno 1706. Febre  
corripiebatur cum rigore, & vomitu. Vo-  
catus postera die, ut curarem, bene ha-  
bentem inveni, nempe omnino sine Febre,  
cum pulsu valido, hilarem, & nil de in-  
cepto morbo sollicitam. Tota eadem die,  
quæ morbi erat secunda, ita se habuit;  
unde ex iis, quæ evenerant, facile fuit de  
Tertiana Intermittente judicium ferre.  
Postero mane circa meridiem Febris ite-  
rum invasit cum aliquo ventriculi morsu,  
& vomitu bilioso, licet perpanco, duran-  
te tamen per plures horas irritò vomendi  
conatu. Pulsus in longum tempus parvus;  
attamen circa vespere omnino elevatus,  
Febre per sudorem universalem optime re-  
mittente. Præscripsi pro venturo mane  
levissimum medicamentum solvens, para-  
tum nempe ex Olei amygd. dul. rec. ex-  
pressi unc. iij., Mannæ elec. unc. ij. &

decoc. cordial. sol. q. s. ex quo aliqua se-  
quuta est alvi dejectio, & melior, Agra  
referente, stomachi status. Tota eadem  
dies sine Febre acta est. Mane tribus an-  
te meridiem horis invasit iterum, cum  
levi quidem rigore, & vomitu fere nul-  
lo, sed maxima cum agitatione, & per  
horas plurimas minutissimo pulsu. Cre-  
scente vespere, & magis increcente no-  
cte pulsus solutus est, & cetera remissa  
sunt symptomata. Cardiaca pro tunc præ-  
scribebantur Remedia, & mane dum omnia  
forent placida, missus est sanguis ex pe-  
de, Agra nil morbum suum timente, me  
tamen de eodem satis incerto. Eiusdem  
diei vespere febricitavit aliquantulum,  
jactabunda fuit, & tota nocte insomnis.  
Mane dum invisebam, cum pulsu satis  
celeri inveniebam, cum magna faciei mu-  
tatione, & virium detrimento. Suspica-  
tus tunc Perniciem Febris, timui necum  
ipse feram, quæ deinde insurrexit, tragœ-  
diam; cumque circa meridiem redirem,  
tactu valde frigidam, cum pulsu minutissi-  
mo, & vix perceptibili, cum anxietate  
magna, & frequentibus deliquiis, facile  
tamen per Aquam Cardiacam, quam præ-  
scripseram, repressis, inveni. Duabus  
elapsis horis redii iterum, & universo cor-  
pore algidam, diaphoretico sudore persu-  
sam, sine pulsu omnino, anhelam, & fa-  
cie cadaverosa, lugentibus Marito, &  
filiabus, morituram comperii. Territus  
omnino, de ministrandis Sacramentis tan-  
tummodo sollicitus fui, propinaturus post  
hæc, licet citra spem, Febrifugum. His  
administratis, illico hauriendam exhibui  
China China semunciam ex Vino; dein-  
de facta alterius semuncie infusione, ejus  
post horas quatuor dimidiam portionem,  
& post alias quatuor alteram dimidiam  
propinavi. Vixit præter spem omnium,  
& meam quoque usque ad horam noctis  
sextam morienti similis. Ex eo tempore  
melius habere cæpit insurgente pulsu, &  
viribus restauratis. Mane visa est revi-  
viscere, & increcente die magis conva-  
luit; idcirco, repetito postmodum per plu-  
res dies Febrifugo, omnino curata est.  
Alterum intra Mensem Recidivam du-  
plicis Tertianæ passa est, qua brevi per-  
com-



*communem Methodum liberata est, & vixit perfectissime sana.*

*II. D. Catharina Zanni annorum LXV. Mense Augusti anno 1706. Febre correpta est. Invaserat hæc cum frigore, & vomitu, cumque per diem protraheretur, credita fuit a Domesticis Febris quædam, ut aiebant, Catarrhalis, qua affligi alias consueverat. Cum tamen tertia die repeteret, vocatus valida Febre laborantem inveni. Mane altero cum non adhuc omnino remitteretur, præmisso Clystere, sanguis ex brachio detractus est. Recruduit eadem die post meridiem Febris, cumque postera dies majoris futura esse afflictionis videretur, cum de tertio in tertium fortiores, & magis præcoces fierent accessus, nil aliud præter cibum, & mature quidem, oblatum est. Rediit paullo post Febris cum frigore, deinde cum mordaci ad tactum calore, & aliqua interdum bilis per superiora excretionem. Cardiaca tunc Remedia, & pulveres testacei præscribebantur, & præventuro mane potus ex oleo amygdalatum dulcium paratus. Exinde Febris per subingressum Continua fiebat, servata tamen aliqua declinatione, sed amissa penitus apyrexia. His ita se habentibus optimum duxi, sero vaccino depurato Stomachum, & Intestina diluere, ideoque ad libras duas mane propinabatur; sed Febre majorem in dies vim sumente missus est denuo sanguis ex pede, & hoc factum est octava morbi die. Processit ea fortior semper, servato tamen periodico, licet obscuriori quodam augmenti circuitu. Undecima morbi die cum Febris consuetos motus tentaret, oris contorsione aliqua laborantem, & verba non bene ferentem observavi. Terruit me novitas rei, sed appropriatis Remediis evanuit hæc prorsus. Decimatertia morbi die, dum ante Auroram augetur Febris, eadem oris obliquitate, & loquendi impedimento, cum gravi insuper sopore tenebatur, unde crescente jam die hirudines Hemorrhoidibus apponendas curavi, sed spem omnem de restituenda sanitate amisi. Hac nova sanguinis missione, vel potius consuetæ Febris, licet tunc pauca,*

*subsequente declinatione, melius haberi visa est, & tentatis jam antea Bezoharticiis, & aliis Diaphoreticis validioribus sudor aliquis decimaquarta morbi die moveri observatus est. At decimaquinta die cum Febris augetur, Apoplexia correpta est Agra, quæ in Paralysem lateris totius dexteri degeneravit. Tenebatur sopore gravi; vocata tamen respondebat, quin declinante die mente melius constare coepit. Ut hæc vidi, ratus fieri omnia ratione, & motu Febris, de hac suppressenda, si per tempus licuisset, consilium coepi; quapropter, licet jam certe apoplecticam in futuris Paroxysmis morituram putarem, non omissis cæteris Remediis, Chinam Chinam exhibui ad drachmas duas, deinde singulo mane ad drachmam unam per sex dies. Testor Deum! coepit sedari Febris, ac sensim restitui Partis amissa motus, ac sensus, secuta postmodum sudorum, ac urinarum copiosa, ac critica evacuatione. Institi ego tunc in usu Remedii, vi cuius præter spem omnium a mortis imminenti periculo erepta est, & exinde post dies quadraginta motui adeo restituta, ut sine baculo gressum domi movere potuerit.*

*III. D. Joannes Buzzalini Mense Julio Anno 1707. Febre correptus est cum paucis frigoris sensu, sed magno capitis dolore. Remisit ea fere omnino in noctis progressu, postera vero die iterum invasit; hinc vocatus, ut curarem, duplicem Tertianam facile judicavi. Cum peteret Ager ut, si mitti sanguis deberet, potius cucurbitulis scarificatis, quam vena secta prius educeretur, genio indulsi, & quantum fuit opus, detractus est. Eadem die invasit iterum Febris cum modico pariter frigoris sensu, sed anticipato per horas aliquot accessu, & aucta intensione, atque etiam in diem crastinam extensione. Cum aliqua bilis excretio per vomitum fieret, largum seri vaccini depurati potum præscripsi, ex quo sequuta est magna ejusdem bilis quasi sincere per inferiora expulsio. Interim Febris magis intensa, & anticipatis in dies accessibus fiebat per subingressum Continua. Missus est iterum sanguis ex brachio*



chio, non omissis interim Cardiacis temperatis, decoctionibus refrigerantibus, Gelatina ex Cornu Cervi de more parata, & seri vaccini minus largis potionibus. Cum hæc fierent, augebatur morbus, & levi aliquo per noctem adjuncto subdelirio, nec non observatis adhuc plenitudinis in sanguine signis, quippe quod Adolefcens erat Ager, & ex antea actis meri potionibus, malaque victus ratione plenus satis, nulla coctionis intuens signa, sanguinem iterum ex pede detraxi. Die morbi undecima sudor aliquis, licet tenuis, apparuit; quapropter auxilio per Diaphoretica dato, duodecima, ac tertiadecima die universalis factus est, atque modice copiosus, auctis etiam interim, & melioribus, quoad omnia, factis urinis. His omnibus plurimum remittebat Febris. Quartadecima die minus sudavit Ager, sed copiosius minxit, pulsu interim magis elevato, atque equali reddito. Dum hæc erant, nocte decimam quintam diem præcedente sudor omnino, ac urina evanuerunt, & de repente facta est ad cerebrum metastasis, ex qua delirium, ac artuum terribilis citra expectationem sequuta est convulsio, ac pessima pulsus concentratio. Terruerunt hæc me valde: cumque in auxilium vocareris, nova celebrata est phlebotomia, & post appositas cucurbitulas repetitas affixa Vessicantia. Pulsus interim profundior, convulsio major, artus frigidiores, & facies cadaverosa fiebat, ex quibus moriturus jam certe videbatur. Tota eadem die, atque etiam nocte ita se habuit. Mane, dum mature inviserem, pulsum aliquantisper elevatiorem, sed tamen convulsam inveni, & Agram, licet non omnino, mente tamen adeo constantem, ut Viaticum sumere potuerit. Non amissa est tunc occasio, & aliquo symptomatum decremento, nec non Febre ab sui initio periodica simul collatis, statim propinata est, Te consulente, China China portio in formaboli, quam cum iterum supervenire incæpisset delirium, satis difficulter assumpsit deglutiendi nescius, sed tamen assumpsit. Tota eadem die pessime habuit, convulsione fortiore facta, & pulsu fere

penitus amisso. Iterum sub vespere, licet extreme delirans, deceptus est Ager, cum biberet, nova China China in potu oblatione. Mane melius aliquantulum habebat in omnibus, quapropter alteram Febrifugi portionem suscepit, & parum eadem die deliravit, pulsusque aliquantisper invaluit. Sequentibus diebus drachmam unam China Chinæ ter, aut quater suscepit, & circa vigesimam quintam morbi diem optima sudorum, ac urinarum subsequente Crisi, Febris sensim evanuit, ac brevi perfectissime præter expectationem omnium sanatus est.

IV. D. Joseph Guldonus Mense Septembris Anni 1707. Febre correptus est cum rigore, & vomitu. Remisit hæc omnino in noctis progressu, sed cum tertia die iterum invaderet, vocabar, ut opem ferrem. Cum de simplici Tertianæ certior fierem, in id mentem intendi, ut perpenderem, utrum aliquem Perniciosæ characterem reperirem, cum talis constitutio jam antea mihi innotuisset. Nil tunc invenire potui, quod suspicionem aliquam posset inferre; nec enim frigoris extensionem, quam par erat, longiorem, nec vomitum nimium, aut pravae qualitatis, nec diuturniorem durationem observaveram. Postera die præmisso Clystere celebrata est phlebotomia ex brachio satis abunde; præcesserat enim in Aegro ex more copiosior meri potio. Adfuit tertia accessio valida nimis, sed tamen nullo febrilis novi alicujus symptomatis juncta comitatu. Mane sequenti vacuus omnino a Febre fuit Ager, & copiosa seri vaccini hausta quantitate plurimum, & cum optima tolerantia dejecit. Nocte nihil obdormivit, & circa subsequenti diei meridiem en repente frequens vomendi impulsus cum paucis partium extremarum frigore. Successere mox inquietudo maxima, stomachi angor, deliquia, dein vera Cardialgia. Pulsu penitus caruit, frigidi facti sunt artus, & brevi frigidissimus sudor abunde per totum corpus effusus est. Territi sunt jure merito Domestici ejus, quippe quod eodem penitus modo, ut mihi referebant, Frater alter paucos ante annos occubuerat. Aderam ego tunc,



tunc, & dum ministrabantur Sacra, infusionem ex China China drachmis sex e vino paravi, cujus portionem statim, alteram vero quatuor horarum interposita mora, & alteram aliarum quinque in noctis progressu propinavi. Algidus sine pulsu, ac moriturus usque mane semper fuit. Crescente die percipi coepit pulsus, & aliquantulum incallescere; quapropter continuato Remedii usu melius in dies habuit, & veluti renasci, ut ipsemet agebat, cum omnium admiratione visus est.

V. D. Joseph Monici, cum Mense Augusti Anni 1708. Febre corripereetur cum frigore, dolore stomachi intenso, & vomendi irritamento, opem meam implorabat. Tertia die invasit iterum Febris iisdem propemodum, sed fortioribus stipata symptomatis. Prae ceteris mordax urgebat stomachi dolor, & frequens vomendi, irritus tamen semper conatus, ex quo maxima primum totius corporis agitatio, inde repetiti animi defectus subsequerentur. Pulsus durus erat, & inaequalis; hinc Cardiacis ex mixtura Sylviana pro tunc praescriptis in vespere iudicium de Febre trahebam. Cum iterum inviserem, aliquo perfusum sudore inveni, sed querulum, & licet plurimum remitteretur Febris, adhuc magis laborantem. Cum temperamenti gracilis omnino foret, & ante annos aliquot quasi in tabem pulmonum proclivis, statui praemisso Clystere mittendum esse die crastina parca dosi sanguinem ex brachio, quod factum est me praesente, & Aegro penitus a Febre immuni. Inclinate die cum iterum inviserem, inveni irrequietum satis, & stare loco nescientem, cum siti, & pulsu frequentiori. Haec omnia suspecta mihi erant valde; hinc cum in crastinum exeundum mihi foret ab Urbe, & alte hereret animo suspicio de hac Febre, D. Francisco Mariae Monici Chirurgo Fratri Aegrotantis scriptum reliqui, quod si Febris diris iisdem symptomatibus incrudesceret, Chinam Chinam ad semuncia pondus in vino more solito, ut ipse in aliis casibus a me factum viderat, exhiberet; nam de Fratris vita in quarta periodo dubitabam. Invasit Febris, quae fuit tertia,

effertis adeo juncta accidentibus, ut moriturus jam certe crederetur. Prae ceteris immanis aderat Cardialgia, hinc labiorum tremor, & convulsio, inde frequentiora deliquia, pulsus minutissimus, concentratus, & per intervalla affatim latens, atque demum funesta corporis perfrigeratio. Territus jure merito his omnibus Frater, monito, quod praescripseram, bene utens, statim China China drachmas tres e vino exhibuit; cumque sub vespere redirem, iis omnibus, quae mox narrabantur, symptomatibus adeo male mulctatum inveni, ut bene arreptum consilium meum judicaverim, quinimmo in noctis progressu drachmam alteram sumendam decrevi. Remiserunt mediam circa noctem symptomata; mane praescripti drachmas iterum duas Corticis interpositis moris sumendas; non enim fidere tunc poteram Febrī, quam intus foveri adhuc sentiebam. Nocte tota irrequietus fuit, & sequenti die, qua accessio quarta futura erat, non adfuit quidem haec, sed motus tot, tamque inaequales in Aegri pulsu, & statu observati sunt, ut multoties de ejus adventu dubitaverimus. Diem tamen totam hoc modo evasimus, & continuato Remedii usu, Deo dante, morti ereptus est, & maximo quidem cum labore, necnon intercurrentibus postmodum pluribus Recidivis sanitati tandem restitutus est.

VI. D. Geminianus Miliani Sacerdos, cum ruri degeret, prima Octobris die anno 1708. Febre correptus est cum paucio frigore, sed ingenti vomitu, nec non totius corporis circa articulos dolore. Cum parum diebus anteactis deiecisset, ratus totam in alvi defectu Febris causam delituisse Medicamentum purgans, quin & Catharticum suo Marte assumpsit, ex quo maxima sequuta est purgatio, & exinde major Febris intensio. Quarta morbi die cum a me pro aegrotante Filio consilium peteret Pater, institi, ut statim adduceretur in Urbem, quod factum fuit quinta morbi die duabus ante meridiem horis. Monitus de Aegrotantis adventu illico ipsius domum adivi, & ut primum pedem intra cubiculum movi, horruī lividam



ridam ejus faciem, oculos micantes, acutitas nares, incertam, tremulamque vocem, stomachi angustiam, paucam, ac turbidam urinam, & quod præ cæteris pessimum, pulsum minutissimum, atque convulsus. Territus tali rerum funestarum syndrome, statim de Sacramento Confessionis sollicitus fui, quippe qui imminens delirium (nec enim magna res erat dignoscere) prævideram. Interea cum stomachi affectio prope Cardialgiam urgeret, ratus particulas adhuc epoti Cathartici Ventericulum, & Intestina irritare, Olei amygdalarum dulc. rec. expressi uncias quinque præscripsi, non omisis interim, quæ in tam præcipiti casu opportuna videbantur, Cardiacis pretiosioribus. Tota die ita se habuit, & sub vesperam, cum levis sequeretur dejectio, melius aliquantulum haberi visus est de stomacho, pessimo tamen durante pulsu, & aliquo subsequente delirio. Urgebam interim, ut pro sequenti mane socius mihi jungeretur Medicus, ut me hesitantem circa sanguinis missionem confirmaret, quæ utut necessaria, tamen a pulsu pessimo in dubium vocari videbatur. Mane in consilium vocatus es Tu, Domine mi, qui, pensitatis omnibus, calculum tuum meo addidisti de sanguine mittendo, parce quidem, & ex manu sinistra. Tota eadem die, quæ morbi erat sexta, ita se habuit, sed circa vesperam pessime habentem invenimus; algidus enim erat, & subdelirans, & vix poterat ob motus manuum convulsivos percipi pulsus. Crevit mox adeo delirium, ut in lecto sedens exercitio Literaria Palestræ, cui olim incubuerat, vacaret cum admiratione simul, & commiseratione adstantium. Tunc ego (licet parum profutura opinarer) Vessicantia apponi, & repetitas affigi Cucurbitulas curavi, quod magna difficultate factum ob Ægrotantis contrariantis conatum. Totam noctem sic transiit, sed quamvis mentis expers foret, quotiescunque labiis apponeretur, aquam copiose ingurgitabat. Mane inveni non adeo delirum, sed potius attonitum, adhuc tamen copioso sudore frigido perfusum, pulsu omnino destitutum, & more

solito convulsus. Bibebat quidquid offerebatur; quapropter perfecto aliquo symptomatum decremento, de China China propinanda mecum ipse reputans, statim me contuli ad Te, ut de eadem consilium ferres. Ut me vidisti petebas, utrum decessisset Ægrotus noster, sed cum responderem vivere adhuc, & cogitatum meum de Cortice prolaturus forem, prævenisti ipse me subridens, & inquires: Labet etiamnum tibi offerre Corticem? Non abnuo; at ignoro, quis in hoc Casu sperari possit eventus. Quod observandum est, ut nedum Plebis, sed & Medicorum quorundam evitemus dicteria, sub forma Cardiaci Remedii propinandus est, ne ulla, utut ridicula, in nos deferatur culpa de hominis morte jam perituri. His dictis, quamvis ab Urbe discessurus fores, mecum te contulisti ad Ægrum, & statim Chinae China drachmas tres sub forma Cardiaci Remedii, nempe mixtura facta ex Confec. hyacinth. & Syr. de cortic. Citri, propinavimus. Mixturam totam assumpsit Æger, & cum hoc vidiissem, alteram non ab similem paravi, sed cum propinare post meridiem tentarem, jam adeo urgebat delirium, ut totam deglutiendi compos haud fuerit. Ea tamen, quam sumpserat, contentus eram, quippe quidem suffectura [si per tempus licuisset] pro imminuenda saltem, si non supprimenda futura accessione. Tota eadem nocte deliravit, frigidus, & sine pulsu semper fuit, sed mane sub aurora quievit, & cum inviserem, inveni aliquantisper calefactum, mente saniozem, licet attonitum, & aliqua pulsus reviviscentia praditum. Inexpectatum admiratus donum, statim de Sacramento Eucharistia sollicitus fui, deinde infusionem ex Chinae Chinae uncia una paravi in Vino, & copiosam portionem hauriendam tradidi. Hac servata per aliquot dies methodo coepit paulatim insurgere pulsus, & cætera evanescere symptomata; hinc copiosissimis effluentibus Urinis præter omnium expectationem, ac nostrum quoque, revixit, & post breves aliquas Recidivas optima, Deo dante, saluti restitutus vivit. Tunc temporis Mater ejusdem  
jam



jam septuagenaria Febre tertiana simplici, mox in duplicem, inde in continuam citissime mutata torquebatur cum maxima virium jactura, stomachi angore, ac dolore intenso, deliquiis, & pulsu adeo exili, ut vix perciperetur; deum jam fere ad extremum redacta ejusdem Remedii usu per plures dies ad drach. j. exhibiti a Febre tam dira, ceterisque symptomatibus paulatim liberata est, morti una cum filio, cujus funeri eodem tempore jungenda videbatur, felicissime erepta.

VII. Mirandum præ cæteris omnibus ratione ætatis, & felicitate successus Casum, quem tandem observare datum fuit, lubet subnectere. D. Dominicus Ferrari, toti Urbi ob ætatem ad nonagesimumquartum annum strenue productam notissimus, die decima Aprilis anni 1710. incidit in Febrem cum copiosa, & frequenti diarrhœa. Accitus statim adeo male mulctatum inveni, ut brevi morituum judicarem; Febre enim intensa, & frequentissimis dejectionibus modo biliosis, modo nigricantibus laborabat. Secunda morbi die Febris, & diarrhœa adeo fortiores fiebant, & ea, quæ in homine tam senesce poterant, tam fractæ vires, ut ne verbum facere quidem posset; quapropter Sacris Mysteriis rite firmato, nil aliud tunc Arte Medica præstitum, quam Eneumatum breviorum ex lacte chalybeato, & Cardiacorum pretiosorum, aliorumque Medicamentorum tam interne, quam externe ad roborandum ventriculum sedula administratio. Nil hac prodesse videbatur, nisi quod qui tertia, aut quarta die mori credebatur, ad sextam usque morbi diem præpter omnium expectationem dejectus est, quæ die cum mane inviserem, inveni minus oppressum, quippe a media tunc nocte parum a diarrhœa vexatum. Hora ejusdem diei vigesima rediit hæc copiosissima, ac frequentissima, quin aliquo frigoris sensu in extremis corporis partibus affici observatus est. Destitit aliquantulum in noctis progressu diarrhœa, & mane vivebat adhuc, licet vere miserimus. Post hujus diei meridiem, quæ morbi erat septima, en iterum immanis

dejectio, en totius corporis universa refrigeratio, & aliquis in pectore catarrhi sonus. Spem omnem tunc amisi; nihilo minus motum ultimum diarrhœæ, atque etiam Febris aliquo modo periodicum mecum ipse considerans, China China usus in animo venit, opinatus fore ut, si non Febri, saltem roborando ventriculo conferre posset: cum non desint Auctores, qui ob id eam commendent, & Praxis hoc ipsum confirmet. Hoc clam agere decrevi, & (annuente Te quoque, cui forte per viam occurrens quid facturum eram communicavi) statim tincturam ex China China semuncia, & drachma una Salis absynthii cum Vino per ignem paravi, quam addito Syrupo de corticibus Citri dulcoravi; hinc scrupulum unum ejusdem Corticis in forma boli, & tincturæ uncias quatuor Egroto sub vesperam propinavi. Hora noctis sexta altera unciarum trium ejusdem tincturæ portio exhibitæ est, & exinde substitit diarrhœa, cumque mane inviserem, vivum inveni, sed adhuc pessime habentem. Eadem die parum deiecit, sed valde febricitavit. Sub vesperam aucta est iterum diarrhœa, & Febris, sed utraque minor, propinatus est scrupulus alter Corticis, & eadem tinctura ad uncias tres. Sequenti nocte parum deiecit, & altera die melius habuit: sub vesperam Corticis scrupulum, & tincturæ parum assumpsit; noctem bene transegit, mane mutatus omnino est, adeo ut mirarentur mecum Domestici actionem Remedii; sed Remedium ignorabant omnes. Vegetus, alacris, & more suo lepidus factus est, & quod mirum, sublata omnino diarrhœa, & imminuta ad stuporem Febris. Destitit ego tunc ab usu Remedii, cum omnia bene cedere prospicerem; sed quatuor intra dies en iterum invasit maxima Febris cum diarrhœa, & copioso ad pectus catarrho. Desperavi tunc vere omnino, & pœnituit a Remedio destitisse: novum tamen animum induens drachmam semis Corticis cum unciis quatuor, quæ supererant, antea tincturæ propinavi. Evasis ab hac quoque Febre, hinc per alios subsequentes duos dies drachmam semis



semis Corticis assumpsit, deinde de tertia in tertiam diem alteram semidrachmam per duas vices deglutivit, ex quibus a Febre liberatus est. Post tres alios dies iterum drachmam semis Febrifugi sumpsit, & sane asserere possum, Aegrum diebus a China China vacuis pejus semper habuisse, quam dum Cortex propinabatur; tunc enim temporis alacrior erat, vegetiorque; quin pulcherrima res erat cernere Senem nonagesimo secundo anno confectum, vitam hoc uno Remedio protrahentem. Per quatuor alios dies a China China abstinui, ratus suffecturam, quam interpositis moris exhibueram. Sed sexta Maji die, quæ morbi erat vigesima sexta, en iterum Febre correptus est cum frigore, & diarrhœa, quarum tamen utraque modum non excessit: tunc tamen drachmam semis Corticis sub vespere, & alteram semidrachmam media nocte sumendas præscripsi. Evanuit Febris hæc sequenti mane, & exinde bene adeo in dies habuit, ut jam a morbo restitutus non solum e lecto propriis viribus valuerit surgere, ac vegetus per Urbem incedere, sed & Rus pergens, delicatioribus quibusdam suis plantulis sedulus Cultor cum omnium admiratione incumbere. Idem post biennium Tertiana duplici, subobscuris motibus invadente, iterum correptus, sanguinis missionem e brachio ad uncias sex bene tulit, inde eodem Cortice ad scrupulum unum per plures dies exhibitorursus curatus est; & prout ætas tam diuturna ferre potuit, satis incolumis redditus, certio rem me semper de vi mira Remedii faciens, cujus non exiguum quidem donum Homini tam seni fuisset vel unius tantum diei inducias impetrasse.

Possem Aegros alios quamplurimos subnectere simili methodo curatos, ut D. Annam Monici prædicti D. Josephi Matrem a Tertiana Perniciosa cum Cardialgia, & sudore diaphoretico, D. Monicam ejus Nurum gravidam septimestrem, & abortum ob horrendos vomitus, & deliquia ceteroqui passuram, a Tertiana simplici, mox duplici, inde continua liberatas. Sic Puella quedam de Malavossis Angela nomine a duplici Tertiana, in

cujus accessione singula immanes patiebatur Epilepticos insultus, tinctura Corticis curata est. Sic Marius Benassi a simplici Tertiana, cujus in secundo, & tertio accessu dejectio decoloris sanguinis, fluxus Hepatici ad instar, & diaphoretici sudores mortem inferebant, evasit. Sic D. Herculi Rebucci prope Mirandulam degenti Tertiana duplex usque ad accessum decimumseptimum protracta, & eo usque redacta, ut is in accessionibus gravi sopore in lethargum proxime transituro opprimeretur, summa cum Uxoris, filiorumque jam fere amissum lugentium lætitia, feliciter suppressa est. Sic Angella Toni a Tertiana in quarto accessu diarrhœam biliosam, mox diaphoreticum sudorem inducente, Angella Colli octogenaria a Diaphoretica, Ursula Chiapponi, Anna Bacciolani gravida septimestris a Cardialgia liberata sunt. Quin postrema hæc Mulier iterum paucis diebus a partu prioris naturæ Febribus tentata, quæ lochiorum insuper suppressionem induxerant, repetito Corticis usu statim fluentibus iterum puerperiis, optime convaleuit. Sic denique D. Mario Zuccati, Illustriss. ac Reverendiss. Præsulis nostri Co: Masdoni Domestico, Tertiana primum intermittente, mox subcontinua detento, quæ pulsus carentiam, sudorem diaphoreticum, gravissimum soporem, ideoque imminens, certumque mortis periculum induxerat, hoc uno Remedio properanter, & valida dosi exhibito, indeque continuato, salus restituta est. Sed ne nimius sim, hos, & alios casus quamplurimos omitto. Tibi vero, Vir humanissime, & Orbi toti juramento testor, hæc a me, parum quidem culte, sed minutim, ac fideliter deposita; Puderet quippe Conscientiam meam, & Fidem publicam Peruviano Cortici partibus nimis studens devovere.

**P**eculiarem sane sibi vindicat animadversionem unaquaque ex superioribus Historiis, quas nobis uterque Professor hic inferendas tradidit; præterquam enim quod in illis omnes fere observantur Febrium Perniciosarum a nobis



bis descriptarum characteres, ac differentiae, eximia insuper elucet Corticis Peruviani virtus in iisdem curandis, etsi illae extremam jam ferme perniciem intulerint. Licet autem singulae singulari quoque sint consideratione dignae: attamen, quae in iisdem occurrunt speciatim magis notanda, lubet Lectori obiter innuere.

Ex secunda itaque Historia, communicata a *D. Clerico*, patet, quam periculosum sit, Homini ex Febribus per Chinam Chinam curato Catharticum exhibere. An utile sit exhibere adhuc Febricitanti, vel per aliam Methodum a Febre liberato, iudicet quisque. Quarta Historia graphice pingens Febricitantem Catalepticum, convulsam, ac sine loquela ululantem, & nihilominus Cortice sanatum, non exigui ponderis est, cum huiusmodi accidentia & raro apparere soleant in Febribus, & fere semper, cum apparuerint, soleant interimere. Tertia pariter, & quinta, excretiones immanes atro-sanguineas, & nigricantes Febribus associatas exponunt cum symptomatis vere funestissimis, quae vix unquam a morte queunt sejungi, ni sejungantur ope Corticis.

Inter Historias autem *D. Ferrarii* insignis admodum videtur secunda, quae Apoplecticum insultum qualibet Accessione periodice recurrentem, & in Paraplegiam tandem commutatum, describit. Sanatio per Chinam Chinam obtemperata satis ostendit, Remedium istud fluida humani corporis nequaquam figere, neque suppressionem Febrium illius assumptioni subsequentem, inducere Apoplexias, aut alia ejusmodi mala, quae immerito reformidant inexperti. Idem quoque testantur Lethargus, & aliae soporosa affectiones, quae in iisdem Historiis curatae visuntur, curatis per Corticem Febribus. Neque minus evincunt oppositum, nullam scilicet inesse Chinæ Chinæ humores fundendi vim, aliae, quae ibidem prostant, Curationes Febrium ab immodica humorum fusione, aut colliquatione pendentium. Ter-

tia Historia est illa eadem, quam ipse retuli nuper *Cap. III. num. x.* Uniformitas narrationis uniformitatem veritatis luculenter indicat. Sexta pariter, quam ipse innui per transennam supra *Cap. II.* insignis est, quia non modo Subcontinuae Febris acutiem, ac malignitatem adeptae, sed verae Continuae Proportionatae Malignae curationem eximiam, ope Corticis absolutam, ponit ad oculos. Distinctam autem praeter omnibus considerationem meretur Historia septima, quae Senem nonagesimosecundo circiter ætatis anno Subcontinua Febre longiore, simul & diarrhoea correptum, ac subinde sanatum, robustaeque valetudini restitutum, quin & post biennium iterum pari ratione curatum exhibet ope Corticis pluries oblato. Historiam quoque similem habet *Badus* de Sene nonagesimumsecundum ætatis annum agente, Tertiana notha detento, per Chinam Chinam curato, & post biennium adhuc vivente. Corruit hinc vana eorum suspicio, qui pro reducenda in actum Chinæ Chinæ virtute, virium, & floridæ ætatis robur requiri, autumant. Sane China China longe melius ac Cardiaca quævis sic appellata, Febricitantibus quibusvis, utur debilibus, robur addit, cum Febres submoveat naturale robur exhaurientes; quod illa vere nequeunt præstare. Cessat pariter ex aliis Casibus acervatim ab eodem *D. Ferrario* recensitis occasio dubitandi, num *Fœminis Utero gerentibus*, aut *Puerperis*, possit utiliter exhiberi Cortex, cum utriusque felicitis Curationis ibidem proster exemplum duplex non aspernabile.

#### A P P E N D I X.

**P**Etierat a me Bibliopola, arrepta occasione hujusce novæ Editionis, ut cum non paucis auxerim suadente ipso Tractatum meum additamentis, novas itidem non gravarer addere insignium curationum historias, quarum, certe non exigua mihi suppeteret, si eas liberet persequi, copia. Sed ut fatear, morem



rem illi gerere in hoc supervacaneum censui ; tum quia satis jam fidei , ni fallor , assequuta sunt apud Rempublicam Medicam effata mea , quibus communis assipulatur hodie Medicorum praxis ; tum quia pluralitas casuum inter se valde conformium , quos possem inferere , nonnisi eandem quodammodo crambem eodem fere semper modo recoctam jugiter exhiberet ; tum denique quia præter recensitas a me in hoc ipso Tractatu historias vere memorabiles , plures alias ejusdem ordinis olim edidi in *Responsionibus meis Jatro-apologeticis ad Clarissimum Ramazzinum* , ubi rem omnem confecisse mihi sum visus , praximque meam satis illustrasse , & a quibusvis oppositionibus integre vindicasse . Ne tamen repetitis petitionibus ejusdem Bibliopolæ plane refractarius viderer , quod ipse facere detrectavi , fieri saltem ab Amico favere assueto , scilicet ab eodem D. Ferrario libenter curavi : quod ille quidem peregit suo more nimis humaniter , hæc ad me novissime scribens .

## HISTORIÆ NOVITÆ

Communicatæ ab Excellentiss. D. Ferrante Ferrario Mutinen. Prof. Eruditiss. , & in Exedra publica meas vices supplente .

**J**URE quidem merito demandas aliis , Vir Praclarissime , ulteriorem evulgationem Successuum semper felicium , quos hucusque peperit , & in dies pariet in Periodicarum Februum Perniciosarum curatione celebris Methodus , Praxisque tua , qua certe nil utilius inventum hætenus , aut excogitatum in Medicina universa . Quid enim allaborandum Tibi , ut tua ulterius comprobes dogmata , cum tota jam huic operi allaboret , ac plaudat Respublica Medica ? Nonne Urbs nostra , quæ Te hac in re legislatorem nedum primum , sed unicum late fatetur , quotidianas curationes hujusce ordinis a nostratibus Medicis feliciter gestas Tibi uni , vel tunc , cum agis alibi , receptas refert ? Utere igitur citra ullam sollicitudinem per totum hoc fervidum , ut asso-

les , anni tempus , Februum licet Periodicarum supra morem ferax , utere , inquam liberaliter , quo melius valetudinem tuam firmes , atque unde etiam prodesse non cessas , honestissimo Ruris otio , cum abunde jam dederis unde Febres activas fere omnes etiam graviores , & periculo plenas certo sanemus . Manu tua medemur omnes a Te uno in hac manu ducti . Utinam vero Methodum tuam omnes exacte teneamus in China China rite , opportune , ac , ubi tantum convenit , & prout convenit , administranda , Febresque [ quod præcipuum est ] dignoscamus a Febribus , tempus a tempore , & modum a modo , quæ omnia utut diticide a Te tradita fuerint , ac explanata , a cunctis nihilominus haud æque clare sunt forsitan percepta , unde identidem abusus emergit , nonnunquam vero & neglectus . Veniam tamen det minus expertis , siqui sint in nimietate peccantes , humanitas tua ; viam namque nimis lubricam sternunt ad errorem hinc metus exitii , illinc fallacitas curationis ; idque tandem firmum , ratumque habeas , quod nostrum nemo leges æquissimas a Te constitutas , ut par est , impleturus , quantumvis acutus & sagax , in ipso tamen opere , ubi præsertim sit nonnihil anceps usus Remedii , solertiam , aut perspicaciam tuam unquam æquabit . An eas ego saltem , qui Praxim medicam , & profecto jam diuturnam incessanter exerceo in hac Urbe , satis impleverim , ubi Peruvianum Corticem contigit viriliter adhibere in his , quas recens ad Te mitto , novarum Curationum historiis , Tu Judex esto : an impleverim ubi ab eodem contigit abstinere , memetipsum mihi constituo Judicem , quippe satis conscius quanta sit mihi religio , ne hoc insigni , atque insonti Febrifugo damnose abutar : illud namque fere nunquam exhibere consuevi , & consuesco , nisi in Febribus vere Perniciosis a Te descriptis , nec nisi præ urgentia symptomatum , in aliis Periodicis protracta etiam , quo diutius licet , illius oblatione , minime vero in Depurativis , neque in primis statim Februum cum aliquo etiam impetu erumpentium insultibus , sed ad normam cautionum



tionum a Te prudenter præscriptarum, citra circumstantias prædictas ab exhibitione ejusdem Corticis feriari ut plurimum soleo, quem (ut tuis utar ipsius verbis) in ulus longe digniores ampla manu profusus reservo.

I. Dominus Franciscus Belleardi Nobilis Mutinensis annum nunc agens septuagesimum quartum, adhuc, Deo favente, satis vegetus, licet Podraga quandoque corripiatur, duobus ab hinc annis Tertianæ Febre simplici tenebatur, quæ cum invaderet, soporem non levem inducebat; ideoq; aliqua, prout ætas ferre poterat, administrabantur remedia. Quartus accedens Paroxysmus in soporem veluti lethargicum impulerat Ægrotantem. Pulsus per horas plurimas fere nullus, membra tenui sudore frigido madefacta; facies tetra, supinum corpus. Quid in Homine jam senne tunc nisi mors proxime metuenda? Circa tamen noctis horam tertiam aliquantulum expergesfactus, dum appositam labiis aquam biberet, ebibit Chinæ Chinæ drachmas duas, quas prompte paraveram; per noctis decursum alias duas, mane vero circa meridiem alias duas, cum tunc temporis melius longe haberet. Sudavit per totam diem, febrisque abiit, nec rediit amplius ut antea, sevitiam suam post aliquot hebdomadas in breves podagricos insultus tantummodo exonerans.

II. Domina Catharina Ceretti Genitrix Domini in Medicina Doctoris Petri Cérretti, Adolescentis non exiguae expectationis, Præxique medicam etiamnum mecum exercentis, Tertianæ Febre simplici quatuor ab hinc annis correpta est. In primæ, & alterius Febris paroxysmo, nec non earundem progressu, de dolore Stomachi conquerebatur intenso, pro quo congrua præscribebantur remedia. Accessit tertia Febre, & Cardialgiæ passa est Ægrotans non levem cum magna virium jactura, & deliquiis quamplurimis, ita ut ob Matris periculum desperaret Filius. Cum vero non admodum deficeret tunc temporis pulsus, Domesticorum, Nati, & Ægrotantis sollicitudinem abduxi, Febris ferociam me domituum pollicitus.

Torti Therap. Spec.

Eam vero non omnino suppressere, sed quodammodo cohibere statutum est, idcirco duas tantum Chinæ Chinæ drachmas præscripsimus. Rediit postera die Febris, minoribus tamen comitata symptomatibus, ideoque totam prosequi tali pacto curationem decretum est, ut quotiescunque vires exereret Hostis, oblato Remedio frangeretur. Ita actum est. Res pro votis successit. Propinabatur juxta exigentiam China China, & hac methodo incessit quidem, sed pro lubitu, Febris, & feliciter curata est optima, & benemerita Mulier, quæ etiamnum, Deo dante, vivit incolumis.

III. Franciscus Bonettini annum nunc agens octavum supra octuagesimum, & his jam antea Apoplexiam, quæ in Paraplegiam degeneraverat, passus, Tertianæ Febre simplici tribus ab hinc annis corripiebatur. In unoquoque Februm accessu magno sopore tenebatur; ast, dum quartus accederet, ita Capite opprimebatur, ut per diem integrum Apoplexia vere detentus videretur, & animam certo certius proxime efflaturus putaretur. Pulsus per horas quamplurimas parvus, & tardus dein, celerior & febrilis factus est. Vespere aliquantulum expergesfactus est, ita ut, cum extreme sitiret, Chinæ Chinæ portiunculam ebibere sensim potuerit, & paucis ab illinc horis portionem prima majorem. Postera die, dum melius haberet, & omnia a Febre oriri mala dignosceretur, dosim pro more integra Remedii superhauisit, ita ut adveniente die, qua recurrere Febris debuerat, parva omnino supervenerit, & brevi subinde fuerit sanatus. Hoc eodem Anno 1729. Quartana simplici correptus, & non multum dissimili Capitis symptomate, quo supracitato anno tenebatur, gravatus, China China evasit, vivitque decrepitus, ambulatque per Urbem. An audiendi sint qui Chinam Chinam nunquam esse Senibus propinandam, & ab eadem metuendam esse Apoplexiam autumant, huic me verissima Historia, uti & non paucis aliis hujusce generis præctis observationibus committo.

IV. Dominum Bartholomæum Cotti, Vivum probitate, morumque integritate

R præcla-



praclarum, & Serenissimi Francisci Mutinae Principis Cubicularium emeritum, Febris Tertiaria simplex invaserat, cujus exordia, nedum progressum, sudores effusi cum magna virium, & animi jaetura excipiebant. A quarto superveniente Paroxysmo pessime mulctatus est, nihilominus Cardiacis remediis suffultus evasit, ita ut postero mane morbi impetum declinasse videretur. Ast quinta adfuit Febris, quae sudorem frigidum a meridie per totam usque noctem comitem habuit; ideoque, cum diutius fidere audacia foret nimia, habita non tantum morbi, sed Hominis ceteroqui non juvenis ratione, propinata est, & repetita consueto more China China. Domita est Febris, & superveniente haemorrhoidum familiari stillicidio convaleuit. Post mensem erraticas nonnullas Febres iterum passus est, quae mox evanuerunt, & vivit extunc alacer, atque prae prospere. Eodem modo a non dissimili Febre post aliquod tempus Domina ejus Uxor, nomine Margarita, correpta curata est, quae fere nullam exinde passa est Recidivam, & vivit floridissima.

V. Illustrissimi D. Michaelis Torretti Sereniss. Ducis Mutinae Consultoris, non impari modo curationem aggressus sum, dum duobus ab hinc annis Febre, quae Tertiariae continuae speciem praeseferebat, cum intensissimo capitis dolore laboraret. Eo proterva ejus Febris die septima devenerat, ut, tunc cum aliquantulum declinare nocturnis horis debuisset, gravior mane successerit, & tantum Capiti gravamen, & dolorem intulerit, ut motus fere convulsivos excitaverit, funestumque ipsi Capiti majorem decubitus proxime comminaretur. Ut deterior, quae pro more dierum expectari debebat futura nocte, Febris aliquantis per cohiberetur, de propinanda China China animus mox supeditavit; ast cum de splendida, & nedum Sereniss. Duci, sed toti Urbi percarra Persona ageretur, ne mihi nimium fesus viderer, Te, Excellentissime Torti, Ruri degentem consulere volui, ideoque Nuncio misso, & habito voto, exhibitum est horis aliquot ante meridiem ad dra-

chmas tres, & post meridiem usque ad vespem ad alias tres partitis vicibus Remedium. Protracta est usque mane Febris exacerbatio, quae nullatenus adfuit, sed minoribus stipata symptomatibus; dolor namque Capitis, & cetera omnia admodum fuerunt mitiora. De actione Corticis, de quo dubitabatur, certior tunc factus, ejus usum prosequutus sum, ad exigentiam tantummodo propinando. Mirum dictu, & magis mirum visu! Ingravescibat quandoque Febris; exhibebatur portio aliqua Febrifugi, & cedebat ita, ut similis Equo indomito videretur, cui cohibendo lupatum fortius perstringeretur. Cursum integrum hoc pacto peregit morbus, sed tandem urina, & sudoris superveniente constante Crisi sanatus est Vir egregius, qui integra satis, prout indefessum muneris sui exercitium ferre potest, valetudine pro bono publico perfruitur.

VI. Illustriss. Domina D. Laura de Fossano Nobilis Matrona Mediolanensis, dum Sanctam Lauretanam Domum pergens Mutinam pertransiret, quadam de repente Capitis stupiditate correpta est, a qua ita male habuit, ut in apoplexiam incidisse credita fuerit. Vocatus fuerat Dominus Leonellus Medicus Mutinensis, a quo plura administrata fuerunt remedia, ut morbus tolleretur. De facto convaleuit aliquantulum; ast altera superveniente die, cum iterum laboraret, ut antea, adjungebatur D. Caroccius Medicus pariter, & Lithotomus Mutinensis, qui dum febricitantem inveniret, putavit totam a sola Febre, quae alios fortassis habuisset accessus, ortum duxisse tragœdiam; Nihilominus cum res esset in ancipiti, Cardiacis, & Cephalicis protunc allaboratum est Remediis; & subsequenti mane, dum adhuc stupore Capitis aliquo gravaretur, celebrata est iterum sanguinis missio. Tota die melius habuit; altera vero superveniente en iterum sub meridiem apoplectica, & vere moritura visa est, sed clariori, atque fortiori invasione Febrem accessisse compertum est. Fortiora in usum revocata sunt remedia, ut Capite levaretur, & de China China propinanda mens fuit.

quin



quin a supradicto D. Caroccio eo modo, quo poterat, ad drachinas duas fuit exhibita. Superaccitus tunc temporis fui Ego quoque, & cum nullus dubitationi locus esset, quin omnia a Febre evenirent mala, majori propinandam esse Chinam Chinam dosi arbitratus sum, quod in noctis progressu actum est. Mane melius habuit, ut ita Testamentum conderet, & Sacramentis muniri potuerit. Exinde, licet Agrotans, uti nil transactarum rerum conscia, renneret, adstantium tamen, necnon nostris precibus commota, portionem alteram Febrifugi assumpsit, & sub vespere potavit alteram. Cessit omnino ea, quae insurgere die postera debuerat, Febris, & post paucos dies Mediolanum Cortice munita reversa est, quamvis invita, dum Sanctum Iter perficere anhelaret.

VII. Uxor Leandri Cavallieri, Ruralis Procuratoris Illustrissimi Domini Marchionis Levizzani Equitis Mutinensis, nomine Liberata, mense Julio huius anni 1729. Tertianae Febre simplici corripiebatur, quae non extra Benignioris leges ad sextum usque terminum progrediebatur. Cum vero invaderet iste, magna Stomachi angustia, deinde Diarrhoea, nec non subalgido sudore tenebatur. Cum pro more Benigna Tertianae fuisset antea curata, & usque tunc fauste omnia contigissent, commutationem Febris obstupui; ratus tamen id fortuito, aut propter erratum aliquod evenisse, non ultra fui sollicitus. Ast altero superveniente Paroxysmo eo impetus Febris, & citata symptomata devenere, ut Agrotans vita valde fuerit periclitata. Putavi supprimendam illico Febrem, cuius pertinaciam magna, & repetita China China dosi tandem edomuit felicissimo cum Agrotantis successu, quae post mensem irregularium Febricularum accessus aliquot passa, sanitati demum restituta est.

VIII. Admodum Reverendus F. D. Petrus Magelli Ecclesiae Sancti Joannis Baptistae Mutinae Parochus Titularis, nec non Sacrae Hierosolymitanæ Religionis Capellanus, Febre Tertianae duplici continua decumbebat. Huic gravia

symptomata, Capitis nempe gravedo, Stomachi, & Intestinorum irritamenta, sudores effusi, atque intempestivi, pulsus debiles, & magna virium jacturaungebantur. Nihilominus cuncta haec in morbi decursu remittebantur ita, ut circa diem decimamquartam a Febre evasurus, aut saltem bene habiturus videretur. Ast, postquam omnia ex Chirurgia, & Pharmacia convenientia remedia fuere administrata, comite, quin potius Duce Excellentissimo, & ter semper a me ob sapientiam, & atatem colendo D. Doctore Davini, Febris repente ita increvit, ut tunc temporis, quo declinare debuisset, sub vespere supradictae diei quartadecimae in Lethargum fere impulserit Agrotantem, qui & faeces, & urinas inscius per totam fere noctem ejecit, & sudore frigido cum pulsu exilissimo fuit perfusus. Mane cum aliquantulum mentis fieret compos, oblata est valida dosi, & subinde per plures dies repetita China China, quae morbum non modo edomuit statim, sed futuras Febres inhibuit, & vita periclitantem meritissimum Virum ceteroqui senem extremo forsitan imminenti Fato abduxit, qui tandem, dum Ruri degeret, pauca febricula, paucaque Diarrhoea correptus, febrile censum persolvens optima nunc perfruitur sanitate.

IX. Dominicus Carolus Zironi Nobilis Mutinensis, robustusque, & egregius Adolescens, dum hoc eodem anno 1729. Ruris amœnitate venando precipue perfruebatur, Febre correptus est, & illico, ut manu medica commodius juvaretur, ad Urbem transferri se iussit, ubi a D. Doctore Montursio primi ordinis Medico dignissimo opem postulavit. Febris in Tertianam per subingressum fere continuam abierat, & non parvisungebatur symptomatibus, dolori nempe Capitis intenso, nec non Ventriculi, & Intestinorum conatibus. Cum in tertia accessione male mulsetaretur, & vomendi, atque deijciendi necessitate quamplurima non modo urgeretur, sed pulsu languido, & virium jactura deficere videretur, vocatus fui Ego quoque, ut gravissima praestantissimi Juvenis indigentia



digitum apponerem. Pessime habentem vere inveni, sive pulsus exilitas, vultus languor, viriumque prostratio spectaretur. Cum plura antea in usum revocata fuissent praesidia, Cardiacis pro tunc Remediis pugnatum est. Postero mane, dum adhuc pessima Aegrotantis esset sors, & de eventu anceps nimis fierem, meam supradicto D. Monturzio opinionem aperui de propinanda portione aliqua Chinae Chinae, qua non omnino suppressi posset Febris, sed saltem in futuro Paroxysmo timendum non foret exitium, & de ejusdem Febris natura redderemur certiores. Annuit ille, & tres Febrifugi drachmae fuerunt exhibitae. Mirum dictu quos conatus, quam luctam exercuerit die postera Febris, quae se ferocem praeforibus ostendit, & caput non parum efferens, modo vomendi, modo desiciendi conamina cum magna Aegrotantis agitatione infinxit. Cum ab ungue, ut dici solet, Leonem apte tunc dignosceremus, fortiori, & continuata Remedii dosi fractae illi sunt vires, & a periculo deinde eductus est egregius Adolescens, qui sensim convaluit, & Rus iterum post mensem peregit, ubi, etiam dum pro praeservatione Chinam Chinam quandoque resumeret, Febris irregularibus captus est denno, a quibus tandem liber pristinae valetudini restitutus est.

X. Petrus Antonius Crispi, Valetudinario Collegii Nobilium Mutinae Famulus assignatus, Febre Tertianae simplici laboraverat, a qua post paucos accessus jam evaserat. Post mensem, & post aliqua in victu errata iterum Tertianae Febre simplici correptus est, cujus prior, & altera accessio graviores Stomachi comites habuit affectiones. Dum tertius invaderet febrilis Paroxysmus animo delinquebat, & vomitu magno torquebatur, cui subinde accessit Diarrhoea non modo, sed identidem sanguinis sincera quasi dejectio. Vocatus illico adfui, & vere morituum Hominem deprehendi; magna quippe virium erat iactura, pulsus exilitas, & totius corporis perfrigeratio. De propinanda statim China China consilium in arena captum est, cum omnia haec a sola

Febre oriri mala clarissime dignoscerem. Herebam tamen an ab imminente naufragio foret evasurus, nullatenus non omitendum esse Remedium satius putavi. Exhibitum itaque fuit statim, & per noctem dosi valida repetitum. Ab hoc sedata non modo fuerunt supradicta omnia mala, sed ita jugulata est Febris, ut fuerit extunc perfecte sanatus, & suo nunc ministerio nervose incumbat nulla exinde Morbi Recidiva, aut infimi Ventris molestia vexatus.

XI. Admodum Reverendus D. Nicolaus Mundatori Sacerdos, Filius D. Catharinae Mundatori, quam in Historiis tuis Historia decimatertia retulisti, Vir dignissimus, & Consortialium Ecclesiae Cathedralis Mutinae Massarius meritisissimus, aetatis ultra sexagesimum annum, & mole corporis athletica praeditus, Tertianae Febre simplici Mense Augusto hujusmet anni supradicti correptus est, cujus primum, & alterum quoque Paroxysmum alacriter, & aliqua in victu errata committens transiegit. Adfuit tertia Febris, quam pariter parum ipse pertimuit, sed cum ab amantissimo Nepote suo male habere dignosceretur, dum siti magna, & linguae ariditate extrema, nec non sopore deinde gravi teneretur, nec bene mente constare videretur, vocatus sum sub vespere, & aliqua praescripta sunt remedia. Sequenti mane facta est per cucurbitulas larga sanguinis eductio; optavit enim Aeger hoc modo potius, quam per venam sectam institui. Parum adhuc morbi sui timidus, & e lecto surgens diem totam hilaris peregit; ast de quarta futura Febre sollicitum reddidi, cum nec exacta pulsus quiete perfrueretur, & maxima linguae ariditate torqueretur, nec integra Capitis firmitate valeret. Noctem supervenientem insomnem omnino traduxit, & hora diei tertiadecima coepit magis Capite gravari, pulsus sensim imminui, dein sopore graviore detineri. Eores devenit, ut circa meridiem sopitus profunde, & sine pulsu perfusus fuerit frigidissimo sudore. Vocatus non respondebat, & frequenti anhelitu tamquam proxime moriturus



turnus supinus decumbebat. Ad horam usque noctis primam ita se gessit, qua excussus aliquantisper expergiscebatur, & appositam aquam ex arso ore hauriebat. Offerri tunc incœpta est China China, cujus drachmas duas ebibit in vino. In noctis decursu aliquantulum calefactus est, & menti restitutus. Sub Aurora iterum drachmas duas Febrifugi, & ante vespere alias duas assumpsit. Remisit fere omnino Febris, & mutata sunt omnia; hinc putavi rem in tuto positam, & si non integre jugulatum, saltem ita edomitum morbum, ut talem nequitiam pariturus esset imposterum tragediam. Ast sequenti mane circa meridiem en nova, & inexcogitata adfuit Febris accessio, quæ Agrotantem pari modo, ut antea, dejecit. Inefficaciam Corticis, quippe non pauca ejus dosi usus fueram, vel nimiam meam confidentiam tunc obstupui, & e medio tollendum meritissimum Virum magno mei mœrore arbitratus sum. Cum vero fortissimus ille esset, & temperamento, ut innui, athleticus, ferociam Febris sustinuit, & circa secundam noctis horam potuit iterum Chinæ Chinæ, quam ab alio Seplasiario petitam, & mihi magis expertam conferri jussi, uncix dimidium ebibere potuit, & sequenti mane alterum dimidium, ex quo (vel quia antecederet adhibitus Cortex non omnino perfectus, aut quia, habita ratione moli corporis athleticæ, largior dosis foret adhibenda) non modo a descripta Febre liber evasit Ager, sed debitum usum, ut par erat, proseguendo, a nulla alia usque modo vexatus est, nullamque passus usque adhuc Recidivam, Ruristranquillissimo perfruens otio floridæ sui Corporis sorti restitutus est.

XII. Monialis quedam in nobili S. Marci Mutinæ Cœnobio nomine Soror Anna Maria Lazarini annum agens sexagesimum quintum, tumorem Uteri veluti scyrrosum pluribus ab hinc annis, citra tamen magnam molestiam ferens, circa finem Augusti hujus supradicti anni Febre tenebatur, cujus varios accessus muneribus suis operam navans sustinuerat. Cum vero de die in diem magis gravata

Torti Therap. Spec.

retur, tandem opem medicam imploravit. Continua Febre laborare deprehensa est, cujus tamen (ipsa referente) plures cum frigore passa erat accessiones. Habita maturiori indagine, cum de quarta in quartam diem fortior invaderet Febris, Quartanam designare haud fuit difficile, quam insuper infimi Ventris dolores, & frequentes secessus, Stomachi-que angores comitabantur. Convenientia administrabantur remedia, & die magis opportuna celebrata est Phlebotomia, cum ad tollendam plenitudinem huic infra annum sæpius etiam Agra fuisset assueta. Febris interea ita invaluit, ut de quarta in quartam diem symptomata acriter angerentur, donec tandem, cum septimus invaderet Paroxysmus, Diarrhœa biliosa, & vomendi conatibus cum magno Ventris dolore, & lipothymia, pulsus languido, atque sudore subalgido torquebatur, & de ejus vita actum subinde videbatur. Periclitanti hoc modo benemerenti Moniali equum duxi Chinam Chinam congrua dosi exhibere, & repetere, ne supervenientibus novis Febribus occumberet. Ab oblatione Remedii mire sanata fuit a Febre, nec ulla alia illi subsequuta est, nec facta usque adhuc Tumoris immutatio, aut augmentum, sed pristina sua, quæ nunquam vere tranquilla fuit antea, salutis sorte perfungitur.

Et en, quos religiose quidem descriptos, referre placuit Casus, quibus alios addere possem quamplures interrupta, cui per annos multos incumbo, Praxi observatos, & infallibili hoc in usus mirabiles tantum, quibus perficiendis unice est idoneum, a me semper servato Remedio sanatos.

His ergo historiis omnibus sufficienter, ut reor, illustrata est praxis Methodi nostræ pro curatione Februm Perniciosarum tum Intermittentium, tum Subcontinuarum, mediante usu Peruviani Corticis. Quia vero hæc postrema modo citius, modo tardius, seu modo in ipso exortu, modo in progressu tantum ad Acutiem, & Malignitatem vergunt, neque tamen utriusque circumstan-

R 3 tia



tiæ eadem videtur esse ratio ; ideo ita-  
tura in præcedentibus Corticis oblatione,  
ubi Febris Intermittens, sive Subintrans  
in *lentiore* progressu suo essentialem con-  
tinuitatem affectet, considerandum su-  
perest, an idem agendum sit, ubi pari-  
ter idem contigit in ipso *principio*; quod  
jam sequenti Capite peculiariter disqui-  
retur, cum arduum sit hoc, magnique  
ponderis, ac utilitatis Problema, cujus  
sicuti frequens occasio occurrit in Pra-  
xi, ita exactum necesse est, ut præeat,  
accurataque indagine instituaturscruti-  
nium.

## C A P U T V.

*Utrum, quando Perniciosa secundi Ordi-  
nis, sive octavæ Speciei, nempe Sub-  
continua malignantes, continuitatem  
essentialem, & acutam affectant citis-  
sime, hoc est in ipso statim principio,  
expediat illico, aut liceat, Corticem  
administrare, Febrisque cursum inter-  
cipere. Id etsi probabiliter sæpe li-  
ceat, non tamen indiscriminatim vi-  
detur semper licere.*

**F**AUSTITAS Casuum recensitorum,  
aliorumque plurium, quos lubens  
subticeo, ob usum Corticis Peruviani  
tempestive exhibiti, & nonnullorum in-  
felicitas ob ejusdem remedii vel omis-  
sam, vel debiliorem, vel nimis seram  
administrationem, præbet occasionem  
non levem arduo Problemati: an scili-  
cet in ipso statim principio nonnullarum  
Februm Perniciosarum, in quibus non  
aliud, quam hoc, suppetit opportunum  
tempus pro utili Corticis oblatione, li-  
ceat nulla mora interposita ipsum Cor-  
ticem ministrare, & nascentem Anguem  
in ipso exortu confringere, priusquam  
Hominem interimat: quod equidem mo-  
do quæritur ordine habito ad id, quod  
quærebatur pariter in principio vulga-  
rium Intermittentium, ut vidimus *Lib.*  
*I. Cap. VIII.* Hoc autem Quæsitum,  
quod in septem speciebus Perniciosarum  
primi ordinis, nempe *Comitatarum*,  
quæ naturæ perpetuo *Corruptivæ* sunt,

locum non habet, cum apparente clare  
peculiari symptomate pernicioso, cer-  
tum exitum inferente, quocunque mor-  
bi tempore illud appareat, statim deve-  
niendum sit ad Corticem modo una,  
modo altera methodo jam descripta of-  
ferendum, locum habet quammaxime  
in solis Perniciosis *Solitariis* ( quarum  
tamen in praxi valde frequens est nu-  
merus ) in solis, inquam, Perniciosis  
*Solitariis*, nempe octavæ Speciei, seu se-  
cundi Ordinis, quas *Subcontinuas* appel-  
lavimus, tunc cum non pederentim, ut sæ-  
pius assolent, sed illico, ac celerrime ab  
ipso primordio ad Continuas acutas, &  
malignas properant cum magno Vitæ  
discrimine, quod impediri utplurimum  
potest usu ejusdem Corticis, si statim  
exhibeatur, secus vero, si protrahatur  
illius oblatio, & Febris interim æqua-  
lem, essentialemve continuitatem acqui-  
rat. Cum ergo alias dixerimus, Corti-  
cem offerendum esse in hisce Febribus  
in principio continuitatis earundem,  
locuti tunc fuimus de continuitate, in  
progressu tantum illarum incipere solita.  
Modo autem quæritur, quid agendum,  
si principium continuitatis cum ipso  
ferme coincidat Morbi principio.

Ut melius intelligatur a Junioribus  
status Quæstionis, quam analytice lu-  
bet pertractare, ponamus exemplum.  
Sit Febris Tertiana duplex, quæ prima  
die invadat matutino tempore cum fri-  
gore modico, & nausea quadam, cæte-  
risque consuetis symptomatis. Subsequa-  
tur calor ad tactum valde mordax, si-  
tis, & linguæ ariditas non facile hu-  
mectabilis. Protrahatur diutius Acces-  
sio; & cum paucis, nec universali su-  
dore remittatur quidem notabiliter,  
sed non solvatur perfecte. Sequenti die  
post meridiem nondum soluta prima Ac-  
cessione fiat nova exacerbatio cum ri-  
gore levissimo, brevissimo, vixque per-  
ceptibili, cui succedat paullopost ca-  
lor, & reliqua febrilia symptomata,  
intensionem plus quam modicam præse-  
ferentia. Nocte sequente male habeat  
Ægrotans, & tantummodo antelucanis  
horis somnum capiat, vi cujus mado-  
rem



rem quidem universalem, sed sudorem quoque particularem circa frontem patitur, & ad apyrexiam tandem deveniat, sed vix talem. Superveniat interim sudore nondum completo novum frigus brevissimum cum brevi pariter pulsus contractione, quæ accessionem inferat tertia die cæteris graviolem, longiorem, iisdem symptomatis, sed fortioribus, aliisque etiam, si lubeat, comitatam. Perseveret hæc satis intensa usque in sequens mane, quartæ videlicet diei. Aliqua postmodum se prodente illius remissione, eodem mane, præmisso clystere, Venasecetur, ni prius secunda die id factum fuerit: immo si factum fuerit, sed iterum indicetur, quarta hac, ut dictum est, die repetatur ante exacerbationem tali die accessioni veteri superventuram, ipsa veteri nequaquam soluta. Succedat Exacerbatio de more, & inde nova remissio, ad aliquam quoque intermissionem vergens, sed obscurius adhuc, ac vice antecedenter correspondente. Tempore huiusce remissionis quæritur: an Cortex possit exhiberi aliquo pacto, non quidem ad inhibendum instantem Paroxysmum quintæ diei (quod neq; posset obtineri tam cito) sed ad eum infringendum nonnihil, si possibile sit; adeo ut continuato modica vicissim, & vicissim pusilla dosi remedio, sperabile sit, quod Febris coerceatur tali fræno, ut nec libere debacchetur, augeaturve, quantum cæteroqui ferret illius apparatus, nec repente prorsus supprimatur, sed intra quatuor tantum, vel quinque dies sistatur penitus, & aboleatur non sine suspitione recidivæ, vel diuturnæ convalescentiæ, loco longioris, ac iudicatu difficilis ægritudinis, vel mortis ipsius: quorum alterutrum jam videtur minari violenta, utroque celeriter pergens Febris incipientis natura, non amplius Cortice domabilis, si ad essentialem, quæ prope imminet, continuitatem pertingat.

Ob hæc equidem rationem, & ob hoc grave periculum nullus videtur locus proposito Problemati; rem enim, quo citius fieri potest, esse ponendam

in tuto, nemo non dicet: immo ex nostris principiis *Cap. VIII. Libri I.* jam constitutis non aliud posse dici videtur. Cum enim ibi statutum fuerit, Febres Intermittentes etiam benigniores, eo ipso quod naturam *Corruptivam* fuerint adeptæ (quod præcipue ex symptomatis gravioribus deducebatur) esse quovis earum tempore curandas per usum Chinæ Chinæ ulteriorem illarum progressum inhibentis, idem multo magis dicendum videtur in istis Perniciosis longe periculosioribus, quippe gressu celerissimo ad acutam continuitatem, ac malignitatem tendentibus, & consequenter naturam *Corruptivam*, ut videtur patere, statim acquirantibus. Sed hoc idem principium, cui etiamnum insistendum est, si attente perpendatur, videtur aliquo modo obstare, & impedimento esse, quominus in opinionem de offerendo in hisce circumstantiis celeriter Cortice, præcipiti statim voto descendamus.

Enimvero juxta id, quod obiter tetigimus *Cap. II. Lib. III.* cum in huiusmodi Febribus præter Fermentum febrile sanguinem inquinans, & effervescente faciens, videatur suapte natura, & ex principiis intrinsecis peccare ipsemet sanguis, qui propterea nec fermentum affusum subigit prompte, nec prompte secernit, multoque minus defæcat se ipsum media ebullitione, sed potius nativas, & collectitias suas impuritates ipsi fermento influenti mutuo quodam fœdere conjungit: ideo etiam si per celerem oblationem Corticis obtineatur absorptio specifica, seu individualis Fermenti febrilis, non propterea obtinebitur correctio massæ sanguineæ, in hoc casu ab origine simul peccantis, & peculiari depuratione certo indigentis, ad differentiam Februm non modo Intermittentium, sed & Subcontinuarum *benignarum*, seu talium per subintrantes tantum Accessus, ac proinde *Subintrantium* appellatarum, in quarum postremis sanguis pariter non plus, vel paulo plus peccat ac in benignis Intermittentibus, ut *Libro V.* videbimus.



Neque satis nervose videtur ex hoc posse deduci, quod saltem de duobus principiis febrilibus, quorum unum advenit, & alterum inest ipsi cruori, de duobus, inquam, corrigatur unum, videlicet ab extrinseco adveniens, & sic, quod causa morbifica saltem pro medietate dometur; nam hæc ipsa subactio Fermenti febrilis, quæ tollit quidem a sanguine effervescentiam, quin & effervescendi occasionem, sed non tollit impuritates, quibus rationabiliter in hoc casu scaterere creditur, ob hoc ipsum, quod effervescentiam inhibet, tollit de medio instrumentum fortius depurationis ejusdem sanguinis, quod est ipsa effervescentia. Quamobrem, licet dempto uno principio de duobus activiore videatur, & sit correctæ, sive absorptæ pro dimidio Causa morbifica, quæ tamen remanet, illius portio contumacior potest evadere, & apta forsan tractu temporis, torpidior licet, ad plura suscitanda mala; quod secus fortasse fieret, si relicto alio principio agente per effervescentiam febrilem absumeretur. Sed per circulum jam revertimur, unde discessimus. Vel enim ista effervescentia evasura est depurativa sanguinis, vel corruptiva. Si primum, non est opus Cortice; contra, si secundum. Corruptivam quidem videtur ostendere gradus celerrimus ad Continuitatem, & Acutiem: attamen res aliter potest se habere ac videatur; & tunc minus congruenter forsan usurparetur Cortex, cum in hoc casu vere agnoscat necessestas depurationis in sanguine, quæ non agnoscitur immediate in benignis Intermittentibus, ut vidimus *Cap. VIII. Libri I.* nec in simpliciter Subintrantibus, ut modo dicebamus. Quamobrem hic crescit cautela de non impedienda fermentatione, vel ebullitione cruoris depurativa, quotiescunque talis ea sit, vel vere sit futura, licet ab exordio corruptiva videri potuerit.

Jamque ad apicem difficultatis devenimus, & consistit in hoc, quod non æque facile in principio dignoscere possumus, ut in progressu, an Fermenta-

tio, vel Effervervescentia febrilis Depurativa sit, an Corruptiva; sæpe etenim, quæ Depurativa esse videtur, aut esse futura, tractu temporis præter expectationem nostram sit Corruptiva, & e converso. Et nisi ab ipso exordio in hisce Febris celerrimi motus dignoscat Medicus, an ad depurationem tendant, an ad corruptionem, & nisi Corticem, ubi corruptiva sit Febris, statim exhibeat, actum est quantum sit pro usurpando utiliter Cortice; quoniam abolita paullo post omni periodo, ac permurata in Continuum essentialiter Febre, irrita est, & frustranea oblatio Febrifugi, & quod pejus est, etiam non raro cujusvis alterius remedii. Atque hic duplex est scopulus, in quorum alterum facile est impingere, nempe vel omitendo oblationem Corticis, dum tempus opportunum est, potestque inhiberi in ipso principio, aut etiam in augmento suo progressus morbi, qui ex tali omissione (in hoc casu gravissima) ad mortem fortasse postmodum terminabitur, vel exhibendo ipsum Corticem in principio, aut augmento morbi, qui cæteroqui salubriter, & fortasse tutius terminaretur.

Si res ista spectetur a priori, seu ante factum, contra usum Corticis facit: *primò*, quod etiam si Febris hujusmodi ab exordio Corruptiva videatur, tamen aliquando talis non est in progressu, sed post primum impetum, quo violenter erumpit, nonnunquam sensim mitescit, & majorem, veramque intermissionem acquirit vel sponte, vel ordinariis prudenter curata remediis. Contra est *secundò*, quod, etsi Corruptiva non modo videatur, sed talis revera sit Febris, hominemque tandem deducat ad periculum etiam extremum, ut Malignarum, Acutarumque ab exordio mors est, nihilominus exitium verum adeo certum, & præceps non est, ut in Perniciosis *Comitatis*, septem videlicet reliquarum specierum; adeoque in istis Febris *Solitariis*, ac *Subcontinuis* semper usque ad extremum vitæ sperabilis est aliquo modo salus vel a Natura, vel



vel ab Arte sine usu Corticis, in extremis hisce circumstantiis nequaquam proficiente, ut in aliis memoratis speciebus. Et hæc pro ostendenda carentia necessitatis absolutæ offerendi Corticem. Sed & pro innuenda illius inefficacia, incertitudine, atque insimul noxa (habito scilicet ad præcocem oblationem, non ad ipsam innocui cæteroqui medicaminis substantiam respectu) contra insuper est *tertiò*, quod, si in hisce casibus valetudine quoquo modo recepta finiendis offeratur Cortex in principio, & morbi cursus vix cœptus sistatur, id fit minus laudabiliter, minusque congruenter, quam si expleto naturali cursu subsistat. Etenim vel Febris, quæ Corruptiva videbatur, nec tamen erat, prohibetur quominus integram cruoris depurationem, atque defæcationem absolvat, difficulter, vel saltem cum aliqua incertitudine a Natura postmodum absque febrili effervescencia sperabilem: vel, si Corruptiva quidem erat Febris in prima eruptione, sed non talis permansura, ut supponimus, impeditur pariter ea naturalis intestina secretio, ebullitioni tandem paulatim successura, quæ dicitur *Cochio*, quæq; utut difficulter fiat, fit tamen, quomodocunq; superstes sit Ager; esto etiam quod nonnunquam ex huiusmodi difficilibus, atque identidem imperfectis judicationibus, a Natura, vel Arte sine Corticis usu peractis, adeo male plectantur homines, tonusque viscerum, & crasis humorum adeo labefactetur, ut peior sic sanato superstit dispositio, vitæ brevitatem, incommodumve notabile, aut habituale inducens, quam si in principio fuerit quomodolibet Febris illa suppressa. Contra denique est *quartò*, quod licet semper, ubi adest aliqua Intermisio, Febris quælibet quocunque tempore, certo saltem, si non plane tuto sisti consuecat, non tamen certo semper impeditur pertinax, & repetitus illius recursus, si in impetu suæ eruptionis suppressa fuerit; immo nec semper æque certo ac in aliis casibus ea sistitur in hoc, ubi nempe *statim* cœperit aliquam

continuitatem acquirere ab essentiali parum distantem, licet ut plurimum, ac fere semper sistatur: ut propterea ex dictis hucusque (quæ incunctanter propono, & admitto, ut rationabilia, & vera) nec semper tuta, nec semper utilis, nec perpetuo certa de consueto effectu esse videatur oblatio Corticis circa initia Subcontinux Perniciosæ, ut in casu proposito. Qua olim de causa egomet post curatam in memetipso ope illius Tertianam Perniciosam, ut *Hist. I. Cap. II. huiusce Lib.* tradidi, neque Recidivam præcavere per continuationem Remedii, neque eam typo Tertianæ duplicis denuo invadentem curare volui, me scilicet insigni sanguinis depuratione indigentem reputans, nec ideo satis apte curatum credens, si Febris rursus me graviter impetens statim fuisset suppressa; quidquid sit, an de me ipso recte tunc judicaverim. Atque hæc est facies rei spectatæ a priori, & ante factum.

Sed si res eadem spectetur a posteriori (& hoc est, quod animum meum torquet, ac pluries torfit) si, inquam, spectetur res ex alia facie, cum videlicet Ager, qui ab initio passus est Febrim per aliquod breve spatium temporis Intermittentem omnino, vel saltem quasi intermittentem, adeoque tunc temporis Cortice ferme citra dubium sanabilem, tractu dierum aliquot occumbit, de quo certo quodammodo dici potest post obitum — *Hic Homo post quatuordecim morbi dies defunctus, si ante dies decem Cortice fuisset usus, vere nunc viveret*, — fateor, quod talem intra memetipsum experior sollicitudinem de non oblato statim Febrifugo, ut me non solum pœniteat non obrulisse, sed & pigeat vel ob vana erga alios Medicos officia, vel ob metum calumniæ, si recidisset, vel serius etiam occubuisse, omisisse, utut etiam propter recensitas ante rationes simul abstinerim. Nec minus ferme contristor, dum recordor, quot mihi quondam periire ex Perniciosis Intermittentibus *Comitatis* Aegrotantes, priusquam nossem



nossem Methodum meam, licet nulla tunc fuerit in me, vel esse potuerit omissionis culpa, quam cæteroqui dubio procul modo subirem, si methodum ipsam in rationabilibus circumstantiis omitterem satis conscius de efficacia, & innocentia illius. In casibus enim Perniciosarum Comitatarum offerens Corticem haud vereor dicere cum *Mortono* — *Id facio conscientiae causa, utut ex præconcepta opinione reclamant Amici, Medici, vel ipsi Ægrotantes*. — Et hæc est ratio ingenua, propter, quam mordicus eo casu quandoque sustineo in Consultationibus, offerendum esse Corticem non propter gloriolam præminentiae in consulendo, vel in sanando, in casu, inquam, certi, & præcipitis exitii, ex Comitatis Intermittentibus resultantis, non in casu ancipiti Subcontinuae solitariae incipientis, in qua vel ipse sæpius hæreo, & sæpius abstineo. Cæterum, ubi agitur de Remedio Febrim alioqui plane lethalem certo tollente, Vitamque hominis statim perituri statim servante, hic est, ubi nequeo connivere, ne desim, ut modo aiebam, conscientiae propriae, mea maxime fretus experientia, in pluribus sæpenumero opponentibus desiderata, & per nugatoria tantum sophismata reluctantiibus. Quamobrem ab una Perniciosa Febris differentia ad aliam facto per rationem transitu, in Subcontinuis quoque Solitariis malignantibus curandis, ne frustra post factum doleam, operam do, ut ante factum, dum tempus est, serio pensitem intra mentetipsum inquiring — *Hic homo, qui fortassis post aliquot dies periturus est ex hac Febre, quam cæteroqui statim cohibere possum, debetne modo poni in tuto cum levi aliqua scrupulositate superstite, an incerto Fato relinqui.*

At hic iterum fit reditus ad primum Problema, explicatum tantummodo hucusque, nec tamen adhuc solutum, quin etiamnum sub clarioribus terminis repetendum: An scilicet pensitatis hinc inde, & admissis omnibus, quæ supra retulimus, adhuc nihilominus expediat

in principio, aut etiam in augmento Febris descriptæ hominem probabiliter (non tamen æque certo, ac in aliis Perniciosarum speciebus) intra paucos dies perituum, certo servare cum suspitione intempestive suppressionis morbi, recidivæ frequentioris, vel diuturnioris male firmæ habitudinis, forsitan contrahendæ ob impeditam depurationem fluidorum, media febrili effervescencia cæteroqui probabiliter subsequuturam, si absque usu Corticis idem homo minus celeriter, & per viam Criseos, aut etiam Coctionis, ut ajunt, convalesceret; An Illum periculosa incertudini sub spe firmioris valetudinis obnoxium relinquere, & consueta tantum methodo eidem mederi sine adjumento Corticis, nonnisi circa morbi initia hic profuturi.

Ad hosce terminos redacta Quæstio, claritatem quamdam videtur jam preferre pro solutione sui ipsius, saltem aliqua, si non integra, & omnimoda. Quoniam tamen agitur hic de re gravissima, & in praxi frequenter obvia, donari velim negotio tanti ponderis disquisitionem ulteriorem, & prolixius adhuc examen, etsi jam — *bis, terque recoctum*. Haud equidem fuisset difficile paucioribus rem totam complecti, minusque cunctanter, aut minus cæspitanter de eadem decernere; sed brevitatis, hoc saltem loco, in minorem Tyronum utilitatem cessisset, minus vero cunctabunda dicendi forma, in arrogantiam quamdam, qua veluti ex *Tri-pode* certa nimis dedissem responsa in re, circa quam in praxi vere non semel hæreo. Quia vero plurimum conferre potest ad solutionem Problematis, vel ad partem illius alterutram seligendam, ingenua prius, & severiore nonnihil indagine quærere, quid vere agat China China in Febres, cum illas sistit; & specialiter perpendere, quodnam intercedat discrimen inter curationem ipsarum Februm vulgaribus tantum remediis, vel etiam sponte Naturæ absolutam, & inter eam, quam Corticis oblatione consequimur: idcirco in hac

con-



consideratione parumper immorari nunc liber, priusquam ulterius procedamus in materia, quæ modo controversiam patitur, ut scilicet, si quicquam decernimus, quid vere decernamus, appareat, pateatque quid sperandum sit, quidve metuendum ex circa suppressione Februm exitus cæteroqui ancipitis, ab administrato circa initia Cortice coercitarum.

Ante omnia tamquam Theorema non alienum prorsus a veritate illud præmitti, & admitti quodammodo posse videtur, quod olim prodidit *Thomas Campanella*, Febrem scilicet suapte natura simpliciter morbum non esse, sed potius Remedium contra morbum, cum reapse, si modum servet, evadat tandem remedium Causæ, immo quodammodo & remedium sui ipsius. Atque id saltem ut verum potest admitti, ubi Febris depurativa fuerit, ut pluries diximus; ubi vero fuerit corruptiva, licet hoc nomine veluti per accidens morbi naturam induat; attamen, cum ex instituto ipsius Naturæ excitari videatur ad hoc, ut causam morbificam maturet, ac concoquat (ut verbis Antiquorum utar) hoc alio nomine, spectata, ut sic dicam intentione Naturæ, non immerito etiam Remedium potest audire, quemadmodum eam ab *Hoffmanno* vocari *Ignem Naturæ purgatorem*, diximus alias. Effervescentia enim febrilis, quæ ab heterogeneis particulis, salibusve dissym-bolis sive originariis, sive adventitiis, intra humani Corporis fluida ad turgentiam congestis, vel assidue, vel per intervalla excitatur, eo tendit, ut huiusmodi particularum subactionem, aut secretionem molitur, atque hac via ipsorum fluidorum depurationem, & naturæ illorum Crasis restitutionem producat. Per accidens autem videtur contingere, quod vel immodica sit, & immanis succorum effervescentium, ob Causæ scilicet vehementiam, vel copiam, excandescentia, vel quod eadem effervescentia sit debilior, quam par sit, pro obtinendo fine depurationis, adeoque in neutro casu (ob rationes quidem oppositas)

obtineri queat tentata cæteroqui fluidorum defæcatio. Per accidens pariter est, quod ex improportionem particularum agentium, & patientium, moventium, & commotatum, vel nimia fiat fluidorum fixatio, unde stagnationes, & inflammationes, vel quod peccantium particularum congeries, atque saburra tanta sit, ac talis, ut mole, vel activitate partes utiliores superet, adeoque naturæ fluidorum texturam plane dissolvat, pervertat, corrumpat, vel ipsa continentia Vasa per vim aperiat, aut etiam dirumpat, atque omnibus hisce modis inferat mortem. Cum vero hoc, quod per accidens fieri dicimus, non raro fiat, sitque accidens, cum contingit, inter contingentia maximum: ideo cum Febrem acutæ naturæ participem præ manibus habemus, eam veluti morbum, & quidem naturæ ancipitis, considerare consuevimus, & ut talem curandam suscipere.

Duplici autem via, ut alibi jam vidimus, cum ad salutem terminatur, solvi solet eadem Febris (sive per curationem Artis, ut vocant, Methodicam, sive sponte Naturæ solvatur) videlicet vel per *Crisim*, vel per *solam*, ut ajunt, *Cochionem*, sive *Pepasmm*: atque utroque modo vel perfecte, ac omnino, ita ut non recurat morbus; vel imperfecte, & cum suspitione aliqua Recidivæ, quæ proinde morbo tam per *Crisim*, quam per *solam Cochionem* soluto, & tam in spontanea, quam in artificiali curatione, non raro succedit juxta plura Hippocratis effata, qualia sunt — *Quæ relinquuntur in morbis post judicationem, recidivas facere consueverunt* — *Iis, qui non ob justam Causam levius se habent, fidere non oportet* — *Qui morbi diebus paribus judicantur, male judicantur, ac lubenter repetunt &c.* — propter quas observationes practicas optamus quandoque, ut Febris, quantum par est, protrahatur, neque sua sponte tam cito subsistat: secus ex ipsa spontanea, sed præcoci suppressione, Recidivam metuemus, atque ominamur.

Cum ergo Methodi vulgaris ope exercetur



cerur curatio, Medicus nil aliud agit, quam remove impedimenta, quæ sanationem vel per Crisim, vel per Coctionem possent remorari, eaque pro viribus conatur administrare, quæ eandem Coctionem, aut Crisim adjuvare posse creduntur; adeoque non aliud efficit, quam effervescentiam fluidorum, & præsertim sanguinis, moderari, scilicet vel promovere tantillum, si opus videatur, vel, quod frequentius est, sufflamina-re, ut sic redacta, quantum licet, ad opportunam mediocritatem ebullitione, possit deinde a Natura sponte fieri, quod faciendum est pro requisita eorundem humorum despumatione. Atque hac in re Medicus, ut Inspector morbi, & ut Naturæ Minister, adjutorque se gerit, eidem Naturæ deserviendo, & laborantem adjuvando, ut morbum vincat: eo pacto, quo Chirurgus cavi Vulneris, aut Ulceris repletionem promoveret, non quidem carnem ipsam, quæ ope Naturæ succrescit, regenerando, sed removendo impedimenta, ulcus scilicet abstergendo, fasciisque, ac spleniis consolidationem adjuvando, a sola Natura sic adjuta vere absolvendam.

Cum vero Chinæ Chinæ usu curatio Febrium perficitur, ipsa directe extinguitur febrilis effervescentia, illiusque inhibetur progressus, & noxa quævis inde emersura. Atque ita Medicus se gerit ut Dominus, & Arbiter morbi, & ut Instaurator Naturæ, morbum scilicet Remedio illum subigente repellens, ac vincens, Naturamque ipsa vel labentem, vel lapsam, non ad se erigendum blandimentis invitans, aut irritamentis stimulans, sed totis viribus suis sustentans, ac erigens: eo pacto, quo Chirurgus, dum membri alicujus luxati repositionem, vel fracti ossis coaptationem absolvit, morbum ipsum directe tollit, Naturamq; propriis viribus impotentem se restaurare manibus ipsis suis sublevat, & in pristinum restituit. Equus indomitus, & effrænis [ut rem eandem pluribus explanem exemplis] Equus, inquam, indomitus, quandoque est Febris. Ab eo Vita hominis trahitur, velut Currus,

quo Fata sinunt. Medicus moderator est, Aurigæ instar, lora tenens. Si vulgari utatur hic methodo in curatione Febris, id ager tantum, vel studebit agere, ut medium furens Equus teneat iter, ne in foveas hinc inde paratas obliquus feratur, Currumque, vel Hominem perdat; non vero impediet, quin cursum suum Equus expleat, usquequo illi suppetunt vires, & furor, non sine gravi metu, quod dum

*Fertur equis Auriga, nec audit currus habenas,*

offendat ille tandem ad obicem aliquem, ad quem allisa male consistens facile frangatur machina. Quod si China China utatur Medicus, id ager, ac si retracto magistra manu convenienter fræno, Equum vi sistat, aut retrogradum faciat, & hoc pacto totius incerti cursus declinet pericula.

Hæc quidem, quæ tantam præferunt speciem, vera sunt pro statu præsentis. Inquirendum superest, an eandem retineant speciem pro statu futuro, cui quoque necesse est, ut prospiciat providus, & prudens Medicus. Ut hoc feliciter assequamur, non abs re erit aliam instituere comparisonem, qua examinemus, quodnam adhuc intercedat discrimen, generaliter loquendo, inter curationem Febrium tum absque usu Corticis, tum medio Cortice peractam, & curationem aliorum morborum nequaquam Febrilium, ac præsertim Chronicorum; hinc enim non parum luminis forsan emerget ad id, quod quæritur, clarius explanandum. Et ut a curatione Febrium sine usu Corticis, idest vel a Natura tantum, vel ab Arte remediis, ut ajunt methodicis instituta exordiamur, ea inter hujusmodi curationem, & curationem aliorum morborum, præsertim diuturniorum, est discrepantia, ut Febres sic curatæ, vel etiam sponte solutæ per se ipsas, & ex se ipsis, videlicet per ipsam effervescentiam suam continuatam, vel repetitam, & rite, atque cum moderamine semper protractam, solvantur, ut ignis accensus extinguitur tandem per ipsam pabu-



pabuli sui consumptionem ; atque hac via sunt remedium , ut diximus , non tantum suæ Causæ , sui que Fermenti , verum & quodammodo sui ipsius : quandoquidem ipsum febrile , ut ut utile nonnunquam futurum sit , incommodum tamen , ac proinde quoquo modo morbosum semper est . Morbi vero Chronici , saltem quamplurimi , qui citra ullam effervescentiam , aut ebullitionem & fiunt , & sanantur , sæpissime saltem , ne dicam , semper , curantur per depressionem , aut absorptionem ipsius Causæ morbificæ , seu principii cujusdam salini peccantis , per hujusmodi absorptionem inconspicui reddit , nec amplius lædenti : qua ratione per usum Salsæ parillæ v. gr. , alteriusve similis alterantis , corrigi quotidie dicitur humorum dyscrasia multiplex in morbis quamplurimis diuturnioribus .

Hac posita diversitate , videtur id subsequi , quod Curatio Febris , quæ per defervescentiam ipsam febrilem rite , feliciterque perductam , atque *integre* , ac perfecte solutam , seu *judicatam* , absolvitur , ita defæcat eo casu succose effervescentes , & ita segregat per despumationem quamdam fermentum peccans , ut difficilima sit amplius ejusdem reviviscentia , aut cum succis jam depuratis nova commixtio , præsertim cum non minima illius portio tempore defervescentiæ fecerni non solum , sed & excerni consuescat . Ex opposito curatio morborum Chronicorum nequaquam febrilium , quæ per absorptionem solam principii peccantis peragitur , ita principium illud depriimit , illaqueat , ac abscondit , ut rationabilis super sit suspicio , quod tractu aliquo temporis possit illud , levi quapiam data occasione , rursus sui juris fieri , exaltari , conspicuum reddi , & in libertatem rursus aliquam vindicari , nisi provida Natura illud , priusquam denuo exalteretur , excernat . Et ob hanc rationem morbi hujusmodi Chronici , nonnunquam etiam Herculei , longe felicius curantur per supervenientem Febrilem validam , quæ completo cursu *perfecte* postmodum *judicetur* , quam per

quamlibet Curationem artificialem , per absorbentia , & specifica : ut & per evacuantia quævis [ quæ vi *excretoria* tantum , sed non *secretoria* pollent ] absolutam ; secus vero contingit , si Febris morbo Chronico superveniens judicetur *imperfecte* , ut sæpe assolet ; tunc enim ex imperfecta Febris judicatione , & ex morbo adhuc superstite , geminatur incommodum . Atque hæc est differentia , quæ intercedit inter Curationem Febrilem , ut ajunt , Methodicam , aut etiam spontaneam , & inter aliorum plurium morborum minime febrilium curationem .

Hæc autem ipsa curatio , quæ competit morbis , ab humorum effervescencia minime genitis [ ut aliam partem assumptæ comparisonis prosequamur ] ea , inquam , ipsa est , quæ Febribus adhibetur , quando curantur ope Corticis ; eo enim , & fermentum febrile absorbetur , & occasio effervescendi non minus , quam effervescencia ipsa demitur ab humoribus . Quamobrem Medicus Cortice utens , ubi vere Febrilem , seu effervescencia ipsam curare expediat , illique validum sufflumen imponere [ cujus rei opportunitas modo controversa est ] vere dici potest mederi Febri , illiusque Causæ : utens vero vulgari methodo , dici potest potius eidem Febri blandiri , litare , & sacra facere , tantum ne noceat , ut blandiri mos est Equo furienti , ne potiatur freno , cum nequit eodem cohiberi , ni fortassis illam violentioribus remediis irritando ad nocendum lacessat , ut acriori regimine furentem Equum exasperando , petulantior ille redditur , aut magis refractarius .

Hujusmodi ergo curatio , quæ per Corticem peragitur , & fit per absorptionem principii peccantis , hoc pacto depressi , & inconspicui reddit , vere fit per *Cōctionem* sui generis *peculiarem* , ut tetigimus *Lib. I.* , non eam scilicet , quæ Naturæ patienti competit , sed quæ competit Arti agenti , qualis est , quæ pari ratione fit in Morbis febrili effervescencia carentibus . Hæc tamen curatio per absorptionem facta , seu per *artificia-*



*ficialem Coctionem*, præsertim in morbi principio, obnoxia pariter est nonnunquam, & aliqua saltem ex parte, novæ reviviscentiæ principii absorpti, ni tractu temporis illud a Natura subigatur perfecte, aut e corpore eliminetur, vel nisi ab Arte ipsa pessundet penitus per diuturnam, & per intervalla repetitam oblationem remedii. Quæ conditiones cum sint incertæ, ipse alias Corticis usum in Intermittentium *Benignarum* principio proscripsi *Lib. I. Cap. VIII.* nisi illæ fuerint manifeste *Corruptivæ*; nisi enim tales sint, nulla est necessitas statim confugiendi ad Corticem neque ex parte morbi suapte natura salutaris, neque ex parte Remedii, etiamsi administraretur serius, semper nihilominus etiam tunc profuturi. In curatione itaque Februm facta per solam absorptionem, aut depressionem Febrilis fermenti, & præcipue in illarum principio, locum pariter videntur habere posse suspensiones *Hippocratis* suprarecensitæ de facili Februm imperfecte judicatarum recursu, quemadmodum locum habet eadem suspicio Recidivarum, & æque militat in curatione non absimili, ad alios Morbos non febriles communiter adhibita, ut non raro eventus patefacit, utque notavimus jam *Lib. I.*, & paullo supra confirmavimus.

Cum tamen hæc eadem suspicio minime remoretur Medicos a curationibus tot morborum per remedia sales humorum peccantes absorbentia, vel, si magis placeat, disgregantia, aut quovis alio modo corrigentia, quotidie exercitis; quinimmo cum suspensionem huiusmodi infringat spes, quod Natura resumptis viribus depressum jam, devinctum, & detentum compedibus hostem per consueta excretionum loca vel sensibilibiter excernat: eadem idcirco spes in concursu ejusdem suspensionis videtur eo magis fidentes posse nos reddere in huiusmodi quoque curatione Febribus adhibenda, quo majus est in hoc morbo, quam in illis periculum, & quo major est in hoc remedio, quam in illis certitudo effectus. Et sicuti in curationibus,

quæ ad Chirurgiam pertinent, quasque supra tetigimus per modum exempli, ut in coaptatione partium Ossis fracti, vel in occludendis statim omni arte periculosi, amplis, & penetrantibus Abdominis vulneribus, obvii tantummodo Morbi citam sublationem, subitamque, quantum licet, Naturæ, & membrorum redintegrationem quærimus, difficillimam deinceps, viisque naturalibus sæpe carentem, saniei, puris, vel cruoris excretionem uni Naturæ industriosæ absque magna sollicitudine relinquentes: ita, suppressa statim, ut sic dicam, per Chinam Chinam Febre periculum minitante, non videtur attendenda plurimum sollicitudo de sensibili aut insensibili expulsionem pauculæ materiæ absorptæ, a Natura jam victrice facile instituenda per tot naturales, & amplas, quæ hinc illinc prostant, patentque vias.

Denique quoniam curatio Februm, quæ fit ab Arte ope vulgaris methodi, ut & ea, quæ sponte fit a Natura (& hæc quidem non est exigui ponderis consideratio) illarum judicationem sortitur modo bonam, atque perfectam, nempe ad salutem, modo imperfectam, nempe ad alios morbos, aut Recidivas, modo malam, nempe ad mortem: curatio vero, quæ fit per Corticem, semper sortitur judicationem saltem imperfectam, & non raro etiam perfectam, ac optimam; hinc est, quod ad excludendum usum Corticis in principio Februm exitus cæteroqui ancipitis, opus esset, ut Medicus haberet certitudinem de futura Recidiva, & quidem graviore ex usu Corticis, & judicatione perfecta, & saluari, abstinendo a Cortice, vulgaremque tantum methodum usurpando. At revera vulgaris Methodus non vere sibi, sed ipsi innititur, ut vidimus, effervescentiæ febrili, quæ aut Criseos, aut *naturalis Coctionis* instrumentum est. Hæc autem ipsa effervescentia, cum simul sit instrumentum modo depurationis fluidorum, modo depravationis, & corruptionis eorum, non tantum pugnat adversus Causam morbificam, verum etiam (vel tunc cum proficit) ad-

ver-



versus Aëgrum, quem mille cruciatibus torquet: cum Cortex ex opposito contra solam nervose pugnet sine ullo tamen tumultu Causam Febris.

Non tamen ideo inficias ibo, quin iterum fateor, & quod fatetur *Mortonus* ipse, meliorem esse curationem, quæ fit per deflagrationem febrilis effervescentiæ, quando *perfecte* succedit, ac sit ea, quæ fit medio Cortice per inhibitionem progressus ipsius effervescentiæ febrilis: prior siquidem, ignis adinstat, est Remedium sui quasi per assumptionem, & consumptionem Causæ: Cortex vero per solam illius absorptionem, vi cuius ita compescit fluidorum turbas, ut aliquis forte tumultus queat iterum suscitari. Etsi enim hoc remedio non sola (quod perperam quispiam credat) tollitur effervescencia, sed ipsa simul, ut diximus, occasio effervescendi: attamen occasio isthæc non æque tollitur usu Corticis absorbentis, ac tollatur ope incendii febrilis, fermentum ipsum, quod effervescendi occasio est, veluti comburentis, quando *integre*, atque *perfecte* huiusmodi opus absolvit. Proinde (ut redeamus ad nos) pars alterutra nostri Problematis in Praxi non est casu, sed summa cum animadversione, & prævia consideratione eligenda. Cum enim, si subsequutura esset mors, idque nobis certo ab exordio morbi innotesceret, procul dubio offerendus esset Cortex: & si subsequutura esset salus per crism perfectam, aut per perfectam coctionem, idque nobis similiter constaret, satius esset, meo iudicio, circa initia huiusmodi Febris abstinere a Cortice; ideo utroque hoc scopo nobis proposito æquum est, cum se se offert agendi occasio, examinare diligenter conditionem rei, ut tutiorem insimul, & prudentiorem partem eligamus in casu utrinque nonnihil, cum disparitate tamen, ancipiti.

Dubium interim non est, quod si in æqua lance ponatur utraque Problematis pars, non præponderet ea, quæ suadet oblationem Corticis, cum longe majus sit, quod imminet ex illius omisso-

ne, quam ex oblatione periculum, possitque insuper istud facilius, & probabilius evitari, Natura videlicet ipsa, etiam præcisa effervescencia febrili, per mitiorem fermentationem morbosas particulas in sanguine resistentes secernente, & tractu temporis per loca idonea expellente secundum eam saltem portionem, quam non valet plane subigere. Sane si imminentes datum esset prævidere, ac præcavere huiusmodi Febres, siue illæ *Corruptivæ* futuræ essent, siue etiam *Depurativæ*, quod nobis prorsus occultum, adeoque si foret in potestate nostra

— *venienti occurrere morbo*, procul dubio omnibus, quibus possemus, remediis præcautionem febrilis effervescentiæ tentarem, etiamsi impedita huiusmodi effervescencia, quotiescunque ea depurativa futura esset, ipsa pariter præpediretur cruoris depuratio. Quia enim tunc esset incerta futura hæc depuratio, certus vero morbus, & consequenter incerta salus, esset autem sperabile quoquo modo depurationis opus tum a remediis ipsis Febrem prævenientibus, ac impredientibus, tum ab aliis successive adhibendis, tum a Dieta, tum ab ipsa Natura suarum secretionum, excretionumque nequaquam oblita: ideo cum ratione institueretur Prophylaxis pro inhibenda imminente Febre, fortassis Hominem interemptura, vel in morbos Chronicos, & insanabiles, vel in statum valetudinarium, Vitæque brevitate deductura, & fortassis ex opposito etiam profutura. Quidni ergo, si Febrem imminente licet (utinam æque fieri posset, ac liceret) impedire, ne adveniat, quidni, inquam, liceat impedire, ne progrediatur?

Quamvis autem hæc valde præponderent alteri Problematis parti, magisque adhuc præponderent, si celeritas, qua Febris ad Continuum properat, pendeat, ut nonnunquam potest pendere, non tam a prava præexistente sanguinis diathesi, quam ab influxu copioso, ac celeri ipsius Fermenti redundantis, & per copiosum proinde, ac celerem Corticis usum



usum procul dubio reprimendi: non tamen ideo contemnendæ sunt suspiciones haud irrationabiles in contrarium, quod nempe aliquando saltem satius sit, propositas Febres sinere progredi, quam statim suppressere; & consequenter congruum erit videre, ubinam talis suspicio possit habere locum probabilem, vel saltem ubi non possit habere. Statutis etenim circumstantiis, in quibus animose possit, debeatve Cortex offerri in istarum Februm principio, spreto scilicet in conspectu gravioris, evidentisque periculi, metu malorum, quæ forsitan suboriri possunt, & forsitan non, facile erit prudenti Medico se ipsum hic & nunc determinare ad hanc, vel ad illam partem, prout magis, vel minus indicari videbit Februm suppressionem, scilicet, prout magis, vel minus accedunt ad eas, de quibus ratione adjunctorum, & circumstantiarum, minime dubitandum est, quin sint statim sistendæ, tanquam vere Corruptivæ, ut infra.

Si ergo Febris orta Intermittens, statim vero *Subcontinua* reddita, & ad Continuum essentialiter citissime progrediens, qualem a principio descripsimus per modum exempli, si, inquam, ista, præter enunciata ibi, vel similia symptomata, habeat peculiariter ab exordio sui symptoma aliquod ex iis, quæ Febrem Intermittentem Perniciosam reddunt, puta *Lethargum*, *Syncopem*, *Cardialgiam* &c. non quidem in eadem præcipiti intensione (tunc enim uti Comitata denominaretur ab illo symptomate Perniciosa, non a Continuitate) sed neque in gradu plane vulgari, hoc est, cum distincto aliquantulum characterere non modici ponderis: eo casu Febris absolute pro *Corruptiva* habenda est, & ad exitum non multo post terminanda; siquidem præter imminentem Continuitatem, & Acutiem, habet insimul nescio quid præcipitis in adjuncto peculiari symptomate intenso, quod certam perniciem præmonstrat. Vix enim fieri potest, quod post principium hujusmodi grave, mors non subsequatur in statu,

in quo cuncta fortiora futura sunt: adeoque in talibus circumstantiis minime hæsitandum est circa oblationem Corticis in ipso principio, priusquam essentialis Continuitas, brevi superveniens, occasionem tollat cito labilem. Porrigendus autem est Cortex Methodo placidiore, ne uno ictu suffocetur Febris; eo tamen vigore porrigatur, qui potis sit statim eandem Febrem valide plectere, & enevare, exhibendo *v. gr. drachmam unam mane, & sero per tres, aut quatuor dies*, vel *drach. j. ss. prima vice*, & semel tantum ea die; mox *drach. unam mane, & sero secunda die, semidrachmam* vero tantum bis in die per tres, vel quatuor sequentes dies. Uno verbo, ea proportionem incedendum est, quam exigit motus Febris lentius, vel citatius ad continuam tendentis, cum sufficiat nobis eo passu, & eo motu progredi, qui apte sufficiat ad prohibendam Continuitatem essentialem. Hoc posito in tuto, quo blandius operamur in cohibenda Febre, eo melius. In istis casibus, ubi alicui in usu remedii non satis versato, & nescienti exacte metiri proportionem inter activitatem Febrifugi, & extenuationem Febris, obscuritatem aliquam, aut confusionem offundant antedicta, is poterit uti laudabiliter, & cum fructu *Mortoni* methodo æqualiter Chinam Chinam distribuentis, *drachmam unam* videlicet singulo quadrihorio usque ad extinctionem Febris, licet talis methodus facta collectione sit nonnihil superabundans in dosi, nimisque fortasse celeriter hoc loco Febrem suffocet. Nihilominus satius est sic agere cum aliquo excessu, quam nimis imbecilliter, cum deest notitia debitæ proportionis: ne scilicet si *Æger*, non subacta per Corticem nimis parce exhibitum Febre, naturali ferociæ morbi succumbat, dicatur culpa Corticis obiisse, & ipse demum Cortex videatur occidisse, cum non servaverit. Qui vero talem proportionem rite noscit, longe melius finem assequitur, immo eo præcise tempore, quo vult assequi, impendendo longe minorem Corticis quantitatem,



ratem, sed dosim modo largiorem, modo parciorem alternando, suspendendo, & crebrius, vel rarius repetendo pro morbi exigentia, & pro complemento propriæ intentionis. Illud tantummodo animadvertendum, quod si symptoma grave perniciem minitans eam minitur cito, vel cito pariter imminet, & sine intervallo temporis essentialis Continuitas, tunc statuta jam ut necessaria oblatione Corticis opus est uti ea ipsa methodo, quam descripsimus *Cap. III. Libri* antecedentis pro curandis Perniciosis istis ad Continuas Acutas tendentibus in suo progressu. Quod enim dictum est fieri debere in progressu, faciendum similiter est in principio, si eadem suadeat necessitas; adeoque & in hoc casu *duæ*, vel *tres drachmæ* Corticis, si opus sit, prima vice poterunt exhiberi. Sedata autem Febre, Recidiva erit præcavenda modis iisdem, vel similibus, qui eodem *Cap. III. citati Libri*, & alibi fuere propositi, quosque hic repetere supervacaneum foret.

Inventa jam circumstantia aliqua certa, in qua valde opportunum est, aut necessarium exhibere Corticem in descriptarum Februm principio, cum proportionem possumus sine determinata tamen regula uti hoc exemplari pro dignoscendis cæteris circumstantiis, in quibus rationabiliter liceat idem aggredi. Quo magis ergo Febbris Subcontinua in suo principio ad Continuum Acutam celeriter vergens juxta indicia suorum symptomatum accedet ad naturam perniciosam, Intermittentibus veris, seu Comitatis familiarem, adeoque valde præcipitem, etsi peculiare aliquod symptoma perniciosum non plane elucescat, eo magis fidenter tentare poterimus suum Corticis. Quo vero minus accedet ad talem naturam, sed potius nonnihil benignioris, lentiorisque progressus habebit ad Acutiem, & ad Continuitatem, etsi & a principio illuc tendat, eo cautius, & temperantius utendum erit ipso Cortice, illum videlicet vel plane omittendo, vel saltem minus celeriter exhibendo, procras-

*Torti Therap. Spec.*

stinando scilicet eadem segnitie, qua movetur Acutiem, & Continuitatem versus ipsa Febbris, cum advertentia tamen ne occasio interim præterlabatur. Atque in hisce Febribus quandoque contingit uti cum maxima securitate Febri-fugo circa earum augmentum, aliquot paucis nempe transactis diebus, in quibus nonnulla facta est ignis febrilis diffusio, acceditque illarum motus ad motum usitatiorem reliquarum Subcontinuarum Malignantium, quarum exempla protulimus in Historiis, quasque jam diximus Cortice curandas in ipsarum progressu, & transmutatione.

Tota difficultas reducitur ad primos dies, in quibus aliquando non prius Intermittens est Febbris, ac in Continuum migret, qui casus non infrequens est in praxi: immo sæpissime plures Acutæ Febres sic incipere consueverunt [neque enim semper oriuntur Continuae essentialiter, neque semper tales paullopost deprehenduntur] idque præsertim contingit iis tempestatibus, & Constitutionibus, quibus Intermittentes Febres solent vigere, puta Æstate, Autumno, aut Vere, rarius vero Hyeme, quo tempore Febbris Continua ut plurimum vere Continua oritur, & sibi semper, si non æqualis, saltem valde similis: secus aliis temporibus, ut dicebam, quibus potius videtur, quod Febres suapte natura oriantur Intermittentes, nec nisi per accidens, etsi quamcito, in Continuas degenerent; de qua diversorum generum continuitate fusius verba facturi sumus *Libro V.*, ubi *Subintrantium*, *Proportionatarum*, & simpliciter *Remittentium* Februm variam indolem declarabimus.

Inhærendo itaque arcte Problemati restricto ad primum istud principium Februm propositarum, & statuto, quod Cortex statim in illis propinandus sit, si aliquod symptoma Pernicioso analogum simul appareat, immo etiam quod idem faciendum sit, porportionem adhibita, in casibus peculiari quidem, & valde gravi symptomate vacuis, sed nihilominus ad naturam perniciosam accedenti-



dentibus, hoc est de futuro tandem exitio valde probabiliter suspectis, non aliud mihi dicendum superest pro clario-ri, magisve specifica determinatione, nisi quod posito hoc scopo, quilibet in illum collimare debet pro ratione sui captus, sui metus, suæ spei, & suæ credulitatis. Mihi sane non aliam mensura est, nisi metus meus modo major, modo minor, modo nullus, tam pro determinatione exhibendi, vel non exhibendi Corticem, quam pro electione modi, methodive illum modo citius, modo tardius, modo lentius, modo celerius, modo crebrius, modo rarius, modo parcius, modo plenius offerendi: quibus omnibus in casibus pro re nata utor arbitrio meo, sinens, ut & alii utantur suo. Felix, quem nulla præoccupat intempestivæ animositatis, aut formidinis vehemens affectio, sed quæ sunt metuenda metuit, quæ spernenda spernit, & quæ speranda sperat. At & hic vere

— *Pauci quos æquus amavit*

*Juppiter*, — quos inter nec ego sane.

Ubi vero rationabilis metus prudentem, & expertum Professore ab initio merito occupaverit; cumque sit res maximi momenti non servare periclitantem, cum possis; sed sinere in discrimine, ac tandem perire, quem certo sanare posses; hinc est, quod in valde ancipiti tutior pars eligenda videatur, & quocunque morbi tempore valde periclitetur hominis vita, ea sit omni, quo datum est, conatu statim ponenda in tuto, saltem pro imminente periculo, non neglecta prævisione futuri. Facit pro hac determinatione consideratio, quod in casibus istis res non se habet, ut in Intermittentibus vulgaribus, in quibus si congruum non censeatur Corticem offerre in principio, potest ille pro libito offerri in progressu; at hic si non offeratur statim, occasio prætervolat jactura irreparabili: facitque magis paritas inde a fortiori deducta, nempe quod sicuti in principio Intermittentium benignarum, a quibus abest omne periculum, potest secundum plurimos impune offerri Cortex, ita & mul-

to magis id fieri poterit in principio Subcontinuarum Perniciosarum, cum quibus non leve conjungitur, & ex quibus semper majus impendet periculum. Facit pariter alia consideratio, quod sicuti in Perniciosis Intermittentibus Comitatis, ex gr. Tertianis, tuto semper, & non raro sine ulla recidiva, ut retulimus in Historiis, offertur, Cortex in fine tertiæ sæpè sæpius Accessionis, hoc est die morbi quinta, ita videtur æquetuto, & simili cum sorte offerri die quarta in istis: neque enim citius possumus noscere Circuitum febrilem, & intermediam apyrexiam; utut brevissimam, & fugacem, quæ oblationi Corticis fundamentum præbet. Discrepan- tia autem unius, aut alterius diei parum immutare videtur conditionem hujusce rei. Immutat tamen aliquo pacto, quia cum Subcontinua ista Solitaria sint de genere Februm Acutarum simpliciter; Intermittentes vero Pernicio- sæ, seu Comitata sint de genere Pera- cutarum, & nonnunquam etiam Acu- tissimarum, quinta v. gr. dies, quæ in Perniciosa Solitaria habet rationem Prin- cipii, in Comitata potest habere ratio- nem Status, quo tempore minor est dif- ficultas in coercendo impetu Febris, præsertim exitium certum afferentis, quam in principio istius anceps insuper periculum tantummodo minitantis. Sed & hanc difficultatem nonnihil enervare videtur alia practica consideratio in con- trarium, qua constat, quod æquali cum fructu, & securitate exhibetur Cortex, ut pariter vidimus, in his ipsis Subcon- tinuis Malignantibus, *tardiuscule* tan- tum Continuitatem suam acquirantibus, puta die octava, aut nona: ut proinde æque bene fieri posse censendum sit in *Principio* eadem cogente necessitate, quod non male actum reputatur, ac re- peritur in *Statu*, immo & in *Augmen- to* ipso, quemadmodum etiam in Histo- riis *sequenti Capite* describendis pate- fiet.

Discrimen tamen aliquod (ut nihil subiceam) adhuc intercedit inter sup- pressionem Intermittentis Comitatae,

Sub-



Subcontinuaeque Solitariae, sed *tardigrada*, ex una parte, & inter suppressionem ejusdem Subcontinuae, sed *velocioris*, ex alia. In Perniciosis siquidem Intermit- tentibus Comitatis tota, vel fere tota malitia se tenet ex parte fermenti Cortice domabilis, pauca, vel nulla infectione superstita in sanguine. Item in ipsis Perniciosis Subcontinuis, sed tendentibus *pedetentim*, ac lentiore progressu ad Continuas essentialiter, vitium videtur pariter se tenere, praecipue saltem, ex parte ejusdem fermenti, seu portionis illius restitantis, nec quolibet Accessu integre subactae, fere ut in Subcontinuis benignis, seu mere *Subintrantibus*, secundario vero tantum ex parte sanguinis: & propterea in ipsis quoque sic progredientibus locus congruens videtur inhibitioni progressus ulterioris absque ulla gravi suspitione, in iisdem autem ad Continuas *celeriter* tendentibus vitium magna ex parte etiam a cruore pendere, jam sumus supra suspicati, ut proinde non pari forsan passu, aut certitudine processura sit contra istas actio Corticis. Potest tamen adhuc ex alia parte hic conjici, quod alias coniecimus, quodque etiamnum diligenter perpendendum videtur, nempe quod istae quoque pendere possunt principaliter ex Fermento ipso vel *copiosiore*, vel *crebrius influente*; & in hoc casu, de quo non pauca est probabilitas, ampla esset, ut patet, offerendi statim, & copiose Corticem occasio, atque libertas.

Haec tamen rursus haesitante, & data opera tantum problematice prolata, melius examinent, experianturve prudenter cordatiores Viri; neque enim semper ausus sum exercere, quod modo videor suadere, siue id factum sit ob diuturnam consuetudinem in contrarium, siue ob praesudicia quaedam in mea forsitan mente adhuc latitantia. Quod autem a me actum est, aut observatum, tum paullo infra, tum sequenti praesertim Capite fideliter describam, ut cæteris, si qui sint, minus expertis promodulo valeat deservire. Interim in hunc finem lubet praemittere practicam obser-

vationem *Mortoni*; siquidem ex ea, quam sit (ipso referente) diversitas inter oblatum, & non oblatum quandoque Corticem in harum, aliarumque etiam graviorum Februm *principio*, valde notabiliter videtur elucescere — *Nuperrime*: inquit ille de Febris Continuis in genere: *in familia Vicini mei Domini Man* (ubi octo ad minimum simul decumbebant uno, eodemque modo primum correpti) sex quos *invisi* ante tertium diem morbi, scilicet priusquam venenum [subintellige febrile] ex mora exaltaretur, mera Corticis exhibitione, cum, vel sine Venae sectione, pro ratione symptomatum, spatio bidui, vel tridui integre restitui: Dominum vero ipsum, atque ejus Conjugem (qui opem medicam ad septimum, vel octavum diem distulerunt) ex Orci faucibus non nisi spatio Lunae integra difficulter admodum, usu frequentium Vesicatoriorum, Alexipharmacorum, cæterorumque ejusmodi Antipestilentium remedium liberare potui. Cortex hic nihil valebat. Delirabant enim, lipothymia, subsultibus tendinum, cæterisque diris in genere nervoso symptomatis affiebantur Patientes, petechiis etiam, atque eruptione miliari quaquaversum interspersa notabantur. Hæc *Mortonus*, cujus observatio experimentalis non parum afferre potest fiduciae pro exhibendo in Subcontinuarum malignantium principiis Cortice vel utiliter, vel saltem innoxie. Ulteriore adhuc fiduciam potest addere *Sydenhamii* auctoritas in Epistola ad *Bradyum*, ubi hæc habet, quæ Lector attente perpendat velim — *At vero Tertiana, Quotidianaque, etsi post unum, alterumve paroxysmum omnino videantur intermittere, tamen non ita raro (quod & a me ante est notatum) postea ad Continuarum fere speciem vergunt, & ad remissionem tantum, etiam diebus, quæ intermissionem pollicebantur, accedunt, praesertim ubi Ager lecto defixus, regimine justo calidiori, aut medicamentis Febris per sudores ejicienda dicatis, fuerit multatus. Hoc in casu, a remissione quantumlibet exigua [id enim mihi unum superest] ansam arripiens, pulverem (in-*



tellige Chinæ Chinæ ) *quamproxime a paroxysmo ( quantum conjectura valeo ) ingerendum propino*. Immo nedum in hoc, sed & in Paragrapho immediate subsequenti magis aperte idem proficitur, inquiens: Febres quasdam ex *Intermittentium* genere nonnunquam grassari, quæ post secundum, tertiumve paroxysmum reponere se in classem Continuarum nituntur: subditque, nulla mihi est religio, Corticem vel in maxime Continuis hujus speciei sumendum proponere, qui ad apyrexiam certo agrum perducet, modo assiduus Lætuli calor, & intempestivus Cardiacorum usus Continuitatem Febri non conciliaverint: quo in casu Peruvianum Corticem nihil quicquam proficisse plus semel observavi. Ex quibus omnibus patet, Auctores istos minime vereri Corticem offerre in Subcontinuarum Perniciosarum principio, videlicet ante tertium morbi diem, vel post unum, alterumve paroxysmum, vel paullopost.

Animadvertendum est autem, quod aliquando, licet rarissime, Febres hujusmodi tali vigore, impetu, & celeritate ad Continuas Continentes tendunt, ut nequeat ullo pacto impediri a Cortice etiam circa initia propinato illarum progressus: quo fit, ut illum inutiliter quandoque administrari contingat, quod & Sydenhamius adnotavit, procedente videlicet hujusmodi habitudine Febris non tantum a regimine calidiori, & ab intempestivo Cardiacorum usu, aut ab assiduo Lætuli calore, ut inquit idem Auctor, verumetiam, & quidem principaliter [ ubi præsertim Causæ iste procathartica non adfuerint ] a copiosis impuritatibus præexistentibus in sanguine, & ab influxu parcioris fermenti commotis; atque iterum potius ab his, quam ab ipso copioso fermento, modicas, aut exiguas sanguinis impuritates agitante. In hujusmodi casu facile est rem dignoscere saltem a posteriori. Cum enim effectus boni Corticis sit citus, certus, statimque sensibilis, eo ipso, quod semel validiuscule, seu bis, ac ter modice administratus nil profit sensibilibiter, certum est, Febrem, etsi ob-

scure periodum quandam servantem, a fermento Intermittentium proprio nequaquam pendere: & tunc vel ab usu Corticis cessandum est, vel saltem non illi uni fidendum, sed aliis remediis tractanda Febris, non quidem quia nocuus [ quod sciam, aut unquam novirim ] possit esse Peruvianus Cortex, cum non proficit, posito quod congruenter sit adhibitus; sed solum ne inutiliter administretur. Privilegium enim, quod competit ex jure præscriptionis immemorabilis reliquis remediis, quod scilicet iis utamur credentes, quod insensibiliter tractu temporis profint, contrulerintque saluti intra 14. vel 20. dies acquisitæ ( intra quos sanantur & rustici qualibet Medicina destituti ) non competit Cortici; neque illud huic concedendum esse præsumpserim, quippe Remedio post annos 60. apud nos adhuc recenti, ac impuberi, nec mucida, & seculari, ut res exigit, barba insignito.

Difficultas itaque, si qua est, non consistit in hoc, quod exhibitus Cortex fortasse non profit, seu Febrem non tollat in casu nostri Problematis; sed consistit in hoc, quod profit nimis cito, Febremq; submoveat intempestive, cum fortassis expediret sinere eam vel aliquantisper, vel omnimode progredi. Et circa hoc tandem, non obstantibus iis, quæ supra retuli pro illius usu in Februm designatarum principio, iisque pariter, quæ sequenti Capite sum allaturus ex propria experientia, lubet nihilominus patefacere, quæ in contrarium mihi visus sum observasse, si non experientia mea ( quam cum cautela proportionata arduo Vitæ humanæ negotio semper instituerem, & exercere studui, ut Virum probum, & honestum decet ) saltem fortuito ex aliena experientia, animosioribus, minusque peritis ratiociniis, siue mavis inconsideratis præjudiciis innixa. Non hæc loquor de Professoribus veris, quos semper colam: loquor de Chirurgis quibusdam ( non omnibus ) audacibus æque ac imperitis, & superficiali quadam inconcinna Theorices tinctura infectis, quos ex Gallia huc



huc advexerunt bellicæ Cohortes, ac Turmæ, tunc cum vasti Torrentis ad instar Serenissimi hujusce Domini ditionem ferme universam, Urbesque omnes, ac præcipue nostram, quippe cæterarum Matricem, occupavere, donec Germanis, Nostratibusque simul armis, & Copiis depellerentur. Celticarum itaque Legionum Chirurghi non pauci (cæteris sua sit laus, sitque major tot Viris Illustribus floridissimi illius Regni, Academicarumque, ac Universitatum illius) in principio quarumvis Februm, quoquo modo periodum habentium, dilutam infusionem aliquot unciarum Chinæ Chinæ suis Ægrotantibus sine ulla ferme methodo propinabant: quo fiebat, ut persæpe advocater tractu temporis ad eos invisendos; quoniam & inde plures, contumacesque recidivas, & malum corporis habitum, & nonnunquam acutas Ægri tudines contraherent. Quæ mala cum pluribus accidisse observarem [licet plurimis etiam res ex voto successerit, aliisque eadem infortunia contigerint Cortice nequaquam curatis] aliena impensa, alienoque periculo didici, aut mihi didicisse sum visus, Corticem Peruvianum indiscriminatim in omnium Februm etiam periodicarum principiis fortasse non semper tuto exhiberi. Inter hos memorabilis mihi visus est casus *D. de Beauxendroits*, Honestissimi Viri, & Gallicæ Militiæ Præfecti, quamvis hic fortasse minus, quam alii alibi, errarit Chirurgus curans, sive potius Pharmacopola; utroque enim ille munere fungebatur.

Laborabat Vir iste Nobilis Tertiana duplici, ad Continuum Acutam celerime properante, cum accerrimo inter cætera symptomata capitis dolore, levem quandam mentis alienationem ipsi dignoscenti inferente. Illi statim obtulit valde perperam Pharmacopola Tartarum Emeticum, deinde Chinam Chinam paravit, & ex Vino bibendam præcepit, vel saltem infusionem illius [Chinæ Chinæ substantia quoad majorem partem in fundo remanente] ad cyathos plures, stans horis sumendos. Assumit ille, &

*Torti Therap. Spec.*

Febris incipit mitescere; dolor tamen capitis acutus perseverat. Accitus ego sanguinis missionem præcipio, & de continuando usu Chinæ Chinæ ambigo anceps. Expetit tamen Æger continuationem remedii, illique animum adjicit ignarus Pharmacopola. Sino ego utrumque [neque enim aliud agere in mea potestate erat] in manu consilii sui. Prosequitur Æger usum Corticis, & a Febre paullo post liber evadit. Sed licet infebricitans, non tamen bene se habet. Dormit parum, sibi que ipsi videtur noctu non plane mente constare, medio quasi inter somnum, & vigiliam statu se habens, accusansque dolorem capitis gravativum fere continuum. Suadeo illi novam sanguinis missionem, frequentemque clysmatum injectionem cum circumspecto, & parco victus regimine. Cuncta renuit; operaturque, & vivit suo Marte. Redeunt Febres; repetitque usum Corticis, me nequaquam vocato: illisque fugatis dum me per Urbem fortuito offendit, narrat quæ gesta sunt; conqueriturque graviter de contumaci capitis dolore. Et quoniam intra Arcem, cui præerat, proxime se recepturus erat ob imminentem Urbis expugnationem, nostramque per consequens liberationem, suasi saltem ex officio meo, ut sibi quammaxime caveret, & curam diligentem adhiberet. Sed paucis elapsis diebus, cum laboriosam, irregularemque noctu, & interdiu vitam traheret, imminente prandio repente Apoplecticus factus est, statimque vita functus, me quidem illum vix vivum, ac jam expirantem (quod post unam, vel alteram horam contigit) repertente. Certe mihi incongrua, & intempestiva visa est Emetici, ac Febrifugi oblatio; nihilominus fortasse idem contigisset, si aliter fuisset curatus: præstititque non parum funesto eventui & prava dispositio, & præposterum regimen victus. Sed & repentina rapidæ Febris suppressio aliquam hic sibi vindicat suspicionem.

Contra in Perniciosis Intermittentibus septem priorum specierum, videlicet pernicioso symptome *Comitatis*,



cum repentinus inopinato contingebat morbi prolapsus in exitium, stupidi, attonitique curantes Chirurgi, & ipsi Medici, ne per somnium quidem cogitabant de porrigendo Cortice, cum tamen tunc temporis tempestivus fuisset illius usus. Huiusce generis infortunium obtigit infelici Principi, *D. Duci de Lesdignieres*, ex Optimatibus Regni, & Nobilissimæ suæ Familiæ Unico, ac Ultimo. Cum laboraret Ille Tertiana duplici, sibi comparata ob laboriosam Expeditionem Tyrolensem: & cum post usum immodicum, diuturnumque Syrupi de Papavere, lethargicum repente soporem in quodam paroxysmo contraxisset, Medicus autem terrore perculsus statim Tartarum Emeticum larga dosi exhibuisset; superaccitus ego interrogavi, num Febris periodum aliquam antea servasset, & num diebus anteactis aliqua in accessionis initio observata fuerint soporis indicia; sed responsum retuli a Medico curante, symptoma illud esse plane novum, & quid distinctum a Febre, quæ nihilominus satis intensa observabatur periodicæ adinstar in suo vigore constitutæ; Ager vero quasi Apoplecticus jacebat. Erumpente non multo post Emetici operatione, ab acrioribus etiam clysteribus inferius proritata, & subsequente postmodum noctu accessionis remissione, mane statim plura proposui, Cortice nequaquam excepto, quippe qui conjectabam, Febrem obscure admodum mihi descriptam esse vere periodicam. Sed nil ex iis, quæ proponebam, admittebatur. Dabantur mihi a Medico officiosa verba, prætereaque nihil. Venæ sectio tantummodo communi suffragio sancita jam fuerat, & celebrata non sine aliquo etiam levamine. Tandem cum Laudanum opiatum mihi proponi non sine horrore audissem, eo scilicet nomine, ut diaphoresin promoveret ad solvendum penitus morbum, qui jam semiconfossus credebatur vi Emetici, palam edixi: ferendum prorsus esse a Narcoticis, neque fidendum ei mentis alacritati, quam Generosus Princeps adhuc conabatur

ostendere, cunctos benigne excipiens, meque ipsum non antea visum prompte, ac humaniter alloquens; immo cum expresse prædixissem Assidentibus, posse subsequente forsitan die renovari, quod contigerat antecedente, tanquam funestus Haruspex male audii a quodam de Familia, qui prognosticum longe diversum, ac longe felicius a curante Medico acceperat. Itaque neglectis omnibus monitis meis, altera die lethargo consimili correptus infortunatus Princeps diem suum obiit, remediis omnibus, etiam asperioribus, quotquot a Medico suo, & a Primario Chirurgo Serenissimi *D. Ducis de Vandomo* superaccerisito (quibus invicem acriter altercantibus Aegrum reliqui) excogitari potuere, incassum adhibitis; cum tamen Cortex valide administratus Accessionem, atque Lethargum mortiferum probabiliter inhibere potuisset. Atque his ex Gallorum aliquot Castrensum Chirurgorum abusu (doctissimos cæteroqui, ac eximios tam Chirurgos, quam Medicos politissimæ Nationis illius iterum excipio) circa oblationem Chinæ Chinæ in omnium fere Febrium Periodicarum principio, & circa omissionem illius in Perniciosarum curatione, incidenter excerptis, Caput hoc lubet claudere, reservatis in subsequens Historiis ex nostra Praxi, & observatione depromptis.

## C A P U T VI.

*Exempla nonnulla felicia cita oblationis Chinæ Chinæ in principio Periodicarum Perniciosarum, gressu celerrimo ad Continuas essentialiter, atque Malignas vergentium. Ea tamen nonnisi cautam circa hoc, circumspectamque fiduciam prudenti Medico videntur præbere.*

**N**ON OMNES equidem curationes, quas modo sum relaturus, Febrium Subcontinuarum Malignantium absolutæ sunt oblatione Chinæ Chinæ in primo præcise morbi principio, sed tan-



rum nonnullæ. Aliæ vero sunt absolutæ vel in augmento ipsius morbi, vel solum in principio, sumpto secundum majorem suam latitudinem, & extensionem. Nullæ autem in principio tam stricte sumpto tentatæ sunt, quin tertia saltem morbi dies vel præterierit, vel inclinavit; cum in prima morbi invasione, immo nec altera die, possimus esse satis certi de Idea Febris, multoque minus de periodo: quod tamen omnino necesse est pro congrua exhibitione Corticis. Cum ergo primi principii, & primi progressus morbi parum dispar sit ratio, ubi præsertim principium ipsum latitudinem aliquam, nempe ad tres saltem dies, necessario admittit, hinc est, quod Historiis invicem haud exacte similibus animadversiones Capite antecedenti præmissas, in præfenti corroborare aggredimur, ab iis incipiendo, in quibus ab ipso statim initio oblatus est Cortex, & progrediendo ad eas, in quibus oblatus est in augmento, vel circiter. Hoc igitur ordine servato.

I. D. Joseph Carrocus, e Nursia, Lithotomus Urbis nostræ peritissimus, anno 1707. corripiebatur Febre, cujus ortus, atque progressus fuit hujusmodi. Prima die cum levi horrore Ægrum invasit. Postridie mane vocatus D. Caudrinus invenit illum Febre carentem: proinde non rediit amplius ea die ad ipsum invisendum. Medico vix recedente, iterum accessit Febris, qua vix tantillum remissa, insignis noctu facta est exacerbatio, tertiam diem præpropera anticipatione præveniens. Vehemens ultra modum fuit hæc tum ratione intentionis, tum ratione symptomatum, inter quæ signate soporosis affectus emittit. Jacebat Æger somniculosus perpetuo, stupidus, interrogantibusq; vix, atque confuse respondens, vixque pariter mingendi memor. Urina illi pauca, ac impense rubra, vomiturius frequens, sed fere inanis cum sensu gravativo in regione ventriculi, anxietas, & præcordiorum æstus. Accito mane tertiæ diei celeriter Medico, eodemque

mirante morbi faciem adeo diversam redditam pendente cursu horarum 24., vix audebat ille clysterem præscribere, meque interim in consilium vocari instat enixe. Accedo & ego, haustumque olei amygdalarum dulcium sine igne recenter expressum, statim ut exhibeatur, suadeo, cujus blanda operatio per vomitum, perque secessum subsequuta, incidit, ut meditatus fueram, in horas cujuscumque leviuscule remissionis. Vespere accedens solus, cum ulteriorem adhuc venturo mane sperarem Febris remissionem, non obstante valida etiamnum eorundem symptomatum duratione, præcipio adstantibus, indici curanti Medico stata hora sequentis diei conventum nostrum; mihi namque mentem esse mittendi sanguinem, & subinde statim Corticem exhibendi, haud obscure iisdem aperui. Contigit forte, ut viciniæ, & amicitia causa Ægrum inviserit Cl. D. Ramazzinus, Mutinæ casu moram trahens, qui pensitato illius statu, & intellecta intentione mea, sciscitatus est primum, num ante plures horas Ægrum inspexerim; & cum responsum retulerit, me vix tunc discessisse, subjunxit humaniter, ut illi mos est, se quidem plurimam existimationem habere pro asserto meo, attamen non agnoscere locum ullum, neque tunc, neque (& quidem multo minus) in crastinum consultationibus Medici, ulliusve remediis, sed rem Sacerdotibus potius, quam Clinicis esse committendam. Adeo gravis erat in ipsa incipiente remissione status Ægrotantis. Quarta nihilominus, quæ subsequuta est, die, cum remissio esset mane, ut conjectaram, non parum conspicua, statim Venam secari jussi, Medico ordinario facile annuente, & satis liberaliter sanguinem detrahi. Erat hæc hora correspondens horæ matutinæ secundæ diei, qua Medicus infebriticantem Ægrum deprehenderat. Cumque eadem periodi proportionem paullopost expectanda esset accessio nova, & mox ipsa adhuc vigente nova ferox exacerbatio, tum continuitatem essentialem illatura, tum fortem



soporosum affectum gravem : propterea credens Ægrum his omnibus diu non suffecturum , habita ratione principii adeo vehementis , ad Corticem statim confugiendum duxi, durante adhuc aliqua periodi specie , priusquam ea integre obliteraretur. Præscripsi idcirco Corticem in forma boli *ad scrupulos tantum duos*, una hora , vel altera a missione sanguinis expectans, an vere, qui credebatur imminere, appareret Accessus longe gravioris superventuri prodromus . Et revera non multo post ille se prodidit ; quare vespere hora incipientis ( qualiscunque ) remissionis, Corticem iterum præscripsi, sed *ad scrupulos quatuor*. Noctu valide exacerbata est Febris, cum minore tamen symptomatum, præsertim vero soporis apparatu: quamobrem Febrifugum quinta die *ad scrupulos duos* mane , & sero repetendum duxi, & sic deinceps ; unde maxima morbi imminutio sexta die ; septima vero omnimoda Febris solutio.

Obtenta Febris expulsionem, per duos vel tres dies feriatus sum a Corticis oblatione , & clysteribus frequentibus usus sum ad alvum subducendam, atque iterum per intervalla resumpto usu Corticis modo *ad drachmam*, modo *ad semidrachmam*, modo per longiora , modo per breviora intervalla, prout metus recidivæ , aut ejus indicia plus, vel minus mentem meam torquebant, Decumbentem neque sanum , neque ægrotantem , sed medio quodam valetudinario modo se habentem, perduxi ad diem vigesimamprimam : qua die motu Naturæ spontaneo plura vomuit cum tolerantia, & notabili subinde levamine ; unde critica morbi solutio ea reputata est . Sed neque id plane evenit . Melius quidem habuit , viresque antea fractas resumpsit ; sed nocturnas identidem, levesque Febriculas nullum typum servantes perculit , a quibus solo victus regimine, solaque patientia liber evasit , intra quadragesimam diem perfecte convalescens.

II. Eodem fere tempore D. Antonius Pacchionus Sacerdos , & Phonsæus Ec-

clesiæ Cathedralis , Vicinusque meus, correptus est Tertiana duplici, non admodum quidem intensa, spectato calore ad tactum blando, & modica pulsus frequentia, sed per paroxysmos sese mutuo excipientes statim Continua. Pulsus illi parvus, atque depressus ab initio, linguaque admodum scabra, & arida sine ulla appetentia potus, urina tenuis, mens hebes, tarda, & querelis vacua. Tertia die cum sponte, nullo tunc assidente, nullaque occasione solus e lecto surrexisset, in terram procidit pronus, ubi quasi obdormiens paullopost repertus est, dicens: se propriam rectionem exinde minime tentasse, etsi potens, quoniam grata illi ibidem obvenerat post casum quies. Quarta pariter die, cum absentibus itidem assidentibus ad alvum deponendam in remotiorem locum se contulisset solus, novum casum passus est, nec nisi post dimidiam horam deprehensus humi jacens longe a cubiculo, vere dormiens, ac stertens. Expergefactus narrat iter, & itineris occasionem, immemor tamen, an alvum exonerasset, nec ne: etsi reduci potius, quam eunti casum sibi obtigisse, asseveraret. Ajebat interim, se licet rei non bene conscium placide obdormiisse, quasi ægre ferens se ab eo loco dimotum fuisse, rem tamen quodammodo stupens, sed nihil curans. Repetitum istud haud leve phænomenon reliquis adjunctum acutiei signis, inter quæ insignis fuit mutatio, ac extenuatio celer faciei, me impulit ( peracta jam sanguinis missione, aliisque paucis remediis, morbo incipienti possibilibus ) impulit, inquam, confugere ad Corticem, quoniam aliquo adhuc horrore interpuncta observabatur periodus Febris. Metuens igitur ego, ne in statu tantæ cruditatis, properantis acutiei, & latentis insidiæ, funesti aliquid, vel sinistri saltem, cui non facile mox esset occurrere, cito superveniret Ægrotanti, Corticem illico, quarta ipsa videlicet die, cœpi præscribere *ad scrupulos quatuor* in forma boli. Quinta die *drachmam j. ss.* assumpsit partitis vicibus, & tantundem sexta: se-



ta: septima *drachmam tantum*, & oblitterata est Febris. Substiti tunc ab usu remedii, Aegerque bene habuit ad paucos dies, perseverante tantummodo eadem, ipsi minime connaturali pulsus exilitate, atque concentratione, viriumque languore, cum appetentia tamen ciborum. Rediit post aliquot dies Febricula (feriente me semper ab usu Corticis) quæ duplicis pariter Tertianæ Subcontinuae typum habuit. Donec ea placide processit, remediis methodicis caute per aliquot dies ipsam tractavi; sed cum supervenisset mentis hebetudo, atque balbuties vera, cum impotentia, seu difficultate in exprimendis conceptibus suis, statim iterum eadem, quin & validiuscula methodo Corticem præscripsi, & Febris cum symptomate sublata est. Diuturnam nonnihil convalescentiam nihilominus passus est ille; nec nisi post aliquod spatium temporis nativam mentis alacritatem suscepit, etsi quoad reliqua redactus in pristinum. Eam tamen ipsam integre recuperavit non multo post, eaque, favente Deo, etiamnum (semper exinde sanus) valde laudabiliter utitur in cunctis, & in suis præsertim Modulationibus.

III. Faber Murarius, nomine *Petrus Antonius Arlottus*, patiebatur Tertianam duplicem per subingressum paroxysmorum continuam, eamque intensissimam. Huic nullum erat valde formidandum peculiare symptoma præter delirium aliquod, cum remittente tamen Febre evanescens. Tanta nihilominus erat Febris intensio, ut de genere ardentium ea videretur, omniaque symptomata febrilia, sitis videlicet, linguæ siccitas, jactatio, præcordiorum æstus, urinarum paucitas, ac flammeus color, vigilia contumax, & similia, talem speciem præseferabant, ut acutiem veram, & æqualem Febris continuitatem præ foribus esse, palam ostenderent; minor quippe quotidie fiebat admodum illius remissio, & obscurior periodus, quæ tamen usque perseverabat. Instabat ille, tolli celeriter Febrem, cui ferendæ imparem se fatebatur. Et

licet frequens sit in ore Aegrotantium, præsertim eorum, qui validis Tertianis etiam salutaribus detinentur, hujusmodi querela, hoc tamen casu metuebam & ipse, cæteroqui non facile meticulosus, quod metuebat & Aeger; vel saltem inevitabilem morbi diuturnitatem, si eum mansuefacere licuisset, suspicabar. Quamobrem præmissis præmittendis juxta exigentiam intensæ Febris, quinta morbi die coepi simul præscribere Corticem, sed diminute, *ad drach. ss.* videlicet mane, & sero: idque cum per duos dies peregissem non sine levamine, dosim adauxi *ad drach. j.* per alios duos dies; sed semel tantum in die: fuitque sensibilius inde juvamen; adeoque intra nonam circiter, vel decimam Aeger a Febre remansit immunis. Repetito vero post aliquot dies ad præcautionem per modum leviusculi alterantis remedio, perfecte convaluit, nullum exinde incommodum, nullamque penitus recidivam passus.

IV. *Christophorus Landuccius*, Homo provectoris ætatis, duplici pariter Tertiana vexabatur per subingressum Continua. Violenta Febris intensio, omniaque simul symptomata acutiem indicantia, qualia fuerunt ariditas, atque scabrities linguæ, subdelirium, anhelosa respiratio, urinarum tenuitas, stupida capitis affectio, manuum tremor, totiusque nervosi systematis oppressio imminens in ipso morbi principio, me facile adduxerunt, ut metuerem Hominem ætate satis provectorum, aliis morbis jam fractum, vertiginosum a longo tempore, atque surdastum, morbo increbrescenti minime suffecturum. Quapropter præmissis præmittendis pariter, ad normam affectus, subjectique curandi, circa ipsa morbi initia, vel saltem circa primum illius augmentum Corticem exhibui validiuscule, *ad drachmas* scilicet *duas* uno haustu, remediumque *ad drachmam unam* altero die bis obtuli, ac dein *ad semidrachmam* per aliquot subsequentes dies; unde Febris quameoito desit, optima statim, ac diutina subsequente valetudine. Post aliquod



quod tamen tempus haud breve, cum Febrifugum ad prophylaxim præscriptum assumere neglexisset, levioribus aliquot Febriculis fuit iterum correptus, a quibus cito, & facile (non bene sum memor, an sponte, an repetito Cortice) convaluit intantum, ut novam, juvenemque, vetere prædefuncta, valuerit, aususve fuerit etsi senex ducere Uxorem.

V. *D. Joseph. Ludovicus Agnanus*, duplici Tertiana per paroxysmos se mutuo excipientes continua laborans, etsi non leviter febricitaret, tamen nonnisi post aliquot dies, augmento scilicet morbi jam progrediente, coepit præbere segniora quoque acutiei advenientis indicia. Urgebat interim ille me, urbane quidem, sed fere dixerim importune, ne sinerem progredi morbum, cum liceret illum per Corticem corripere, allegans & gracilem habitum suum, & *D. Carolum* Fratrem a me paullo ante Corticis ope sanatum, Febre tamen valde diutius protracta, eaque constanter intermittente, ut *Cap. x. Lib. i. Hist. xii.* narravi. Ad hæc sponsor fui, me attento animo cautelam omnem impleturum, ne mihi occasio excideret, nolle tamen interim inhibere progressum morbi nullum adhuc mihi timorem incutientis, mihi, inquam, ob quandam illius in sudorem proclivitatem morbi lentam solutionem speranti. Cum nihilominus Ager mihi quotidie exprobraret moram, cresceretque non parum intensio Febris, atque symptomatum, simulque virium dejectio in subjecto valde gracili, morem gessi petitioni illius. Quod quidem nedum congruum fuit, sed & necessarium: quandoquidem cum mitius essem aggressus, ac diminute oblationem Corticis, Febris vero jugiter increbresceret, illique inciperet inter alia adjungi singultus [symptoma in Febribus mihi perpetuo metuendum] coactus fui celeriter, ac pleniore dosi illum præscribere. Intra tres, vel quatuor dies, ut mos est, Febris plane recessit. Plures tamen [quod prætereundum non est] recidivas subiit Ager, etsi leviores,

non obstante continuato, ac opportune repetito usu Corticis: adeo tandem Febriculas nonnullas irregulares propriis interim, publicisque negotiis addictus per urbem circumtulit, donec sponte potius, quam Artis ope, illæ evanuerint.

VI. *D. Nicolaus de Pincettis* tunc Mutinæ agens, postea *Saxolensis Militia Tribunus*, Tertiana duplici subcontinua plurimum intensa laborabat, illique medicinam faciebat *D. Candrinus*. Is in primo augmento morbi cum videret imminere uniformem continuitatem Febris, intendique symptomata acutiem jam jam demonstrantia (inter quæ non levis stomachi affectio, & angor) me quoque in consilium vocavit, ut Aegro impatienti, & irrequieto solamen daret. Decreverat ille jam meis alias circa hoc ratiociniis imbutus, Corticem tentare, illumque proinde jam pararat, meum tantummodo calculum expectans, ut exhiberet: in quam sententiam quo facilius me traheret, meas mihi metipsum obtrudebat, regerebatque rationes. Fateor, quod etsi clare noscerem imminere acutiem, & æqualem continuitatem Febris, Cortici in posterum minime forsitan cessuræ, attamen quia eam superabilem a natura Aegroti robusta sperabam per viam ordinariæ coctionis, fateor, inquam, quod si solus curassem, fortassis abstinuissem a Cortice. Sed quoniam remedium paratum erat, incerta spes mea, Ager impatiens, & præceptis patrum obtemperans, cumque præcipua alioqui remedia satis apposite præcessissent, præbui manus adiutrices usui remedii suapte natura innocui, neque tunc intempestivi. Sumpsit ergo Decumbens Corticem largiuscula dosi, ut citius desineret usus ingrati medicaminis, impatiens natura Aegri diuturnitatem remedii minime latura: & quâ celeritate Corticem absorpsit, eadem Febrem depulit non amplius reversuram, ut paullo post, ac in ipsa convalescentia indulserit & Vino, & cuicunque appetitui adverso exigentiæ boni regiminis.

VII. Nobilis, & Splendidus Vir, privata-



vatarum discordiarum Sedator eximius, & Pacifer, *D. Comes Rupertus Fontana* corripiebatur Tertiana duplici subcontinua eodem tempore, quo corripiebatur alia consimili Clarissimus quondam, atque ut temperamento analogus, ita & ætate non longe major, *D. Nicolaus de Sanctis*, qua, ut alias retuli, confectus obiit. Erant utrique haud inæqualia symptomata, vel si qua intererat differentia, graviora erant ex parte Comitris, quam ex parte Ministri, adeout iudicio omnium, qui utrunque Ægrotum officii, & amicitiae gratia invisebant [erant autem permulti, & quidem Civitatis Proceres] longe majus impendere illi, quam huic videretur periculum: mihi vero minor erat formido de morbo *D. Comitris Fontanae*, quoniam illum morbos etiam Herculeos ferre consuetum noveram. Patiebatur autem is frequentem lipothymiam cum stomachi angore, virium prostratione summa, summaque pulsus depressione, gemebundus ut plurimum languido questu, membris contractus, subfrigido sæpe sudore diffluens, & tempore majoris afflictionis actorum immemor; cum Ministere contrario priusquam in præceps rueret, satis alacriter se gereret, pulsumque consistentem, & spem critici sudoris exhiberet. Præcessit nihilominus ruina Ministri, ut præcesserat nonnihil invasio morbi, majorque fuit mei ipsius, aliorumque Medicorum cunctatio circa oblationem Corticis ibi, quam hic, ubi medebam solus, & ubi jam ex alieno periculo oculatior fiebam, ne ultro fiderem incertæ spei. Quamobrem serio pensitatis omnibus, circa primum morbi vigorem Corticem propinandum censui, exhibuique larga dosi, quam cum post plures horas tentassem reperere, portionem illius Æger vomuit, retenta tamen tum priore dosi, tum modica portione secundæ. Ægre quoque, licet imminuta dosi deinceps offerretur, tulit remedium ingratum stomachus aversus. Utcunque tamen tulit intantum, ut valuerit Pater intra duos, vel tres dies a Febre simul, & ab omni symptomate li-

berari, absque ulla penitus recidiva.

VIII. *D. Comitissa Hippolyta de Savignanis Scappinella*, ætate media anni 1706. conflictabatur Tertiana duplici subcontinua plurimum intensa, agebatque insimul quartum gestationis mensem. Cum videret anxius, & prudens Conjux, Febrem jamjam in Continuum, acutamque migrare, nosceretque quam grave malum sit, *Utero gerentem morbo acuto corripere*, pluries institit, ut Corticem Peruvianum [quem mihi familiarem in casibus arduis sciebat] vellem præscribere, quin immo non semel mihi segnitiam meam in hoc casu exprobravit, veritus, ne sero nimis, ideoque incassum tentarem, quod tempestive neglexerim. Fidebam ego contra robusto, & juvenili Ægræ temperamento, & tolerantia cuidam symptomatum, cæteroqui valde gravium, quæ recensere supersedeo. Cum tamen sudor quidam quasi colliquativus sine ullo levamine vires valde prosterneret, urina pauca esset, ac flammea, irritis refrigerantibus, & copiosis quibuscunque potionibus, perpetuæ urgerent vigiliæ, assidua jactatio corporis metum abortus incuteret; Febris vero jam proxime omne periodi indicium videretur amittere, Maritusque irrequies opem Corticis imploreret, factus sum petitioni indulgens, morbo jam ad statum prope vergente. Exhibitus ergo est Cortex mane, & sero *ad drachmam unam* per duos dies, postea per aliquot alios *ad drachmam semis* quotidie; & facile statim, prout de more, liberata est Ægrotans a Febre, atque ab omni febrem comitante Symptomate, vitæque tum illius, tum foetus (quarum utraque periclitabatur non parum) in tuto est posita. Sed hic notandum occurrit quod inde successit, quodque candide refero, velut partim militans pro remedio, partim adversus usum remedii in circumstantiis descriptis.

Vere, ut modo sum fassus, morbus erat circa vigorem suum, ad quem properabat summa vi, summoque impetu: quamobrem mihi visus sum exhibendo

Cor-



Corticem ( licet vere periculum non leve esset in morbo, & in mora remedii ) mihi, inquam, visus sum incendium effræne domus cujuspian suffocare per sectionem trabium, tectique proxime cremandi, non per effusionem aquæ extinguentis: nihilominus si præsidium certum neglexissem, & Ægra obiisset, simulque foetus, quæ infelix jactura! quæ Medici incuria! Vixit itaque; sed pluries ac pluries recidit, Tertianis modo simplicibus, modo duplicibus correpta, & modo sanata per usum methodicum remediorum vulgarium, modo sponte, modo per Corticem. Rus adiit, ibique pariter febriculas aliquot tulit. In urbem reversa, & optime habens, partum edidit felicem; processere egregie puerperia, Febremque ne Lacteam quidem sensit: immo ea occasione obliterated est tibiæ tumor œdematosus, eidem cujuslibet gestationis tempore familiaris. Completo puerperio Febribus iterum Tertianis intermittentibus, primò simplicibus, mox duplicibus tentatur, iisque diuturnis, & ipso Veris tempore inexpugnabilibus, a quibus tandem sponte Naturæ potius, quam Artis ope ( neque enim tunc Corticem mihi placuit adhibere, sed Febris pertinaciam patientia vincere ) perfecte convaluit; tantumque deinceps floridi coloris acquisivit, ac roboris, ut nunquam antea melius habere visa fuerit, licet anno subsequente morbo acuto correpta ( data tamen occasione evidenti ) diem suum obierit Fato ineluctabili, ut *Lib. V. Cap. IV.* in alium finem opportune adnotabimus.

Interim ex adverso hoc insuper notandum venit, quod quemadmodum Illi, quam Cortex curavit, pertinaces obtigerunt recidivæ, ita similes, immo etiam pertinaciores, iisdem ferme temporibus obtigerunt uni ex illius filiis simul cum matre decumbenti, sed nullo unquam Corticis usu curato. Quæ collatio, qualibet contingente recidiva, semper fiebat a me, jugiter admirante in curatione tam dispari tantam paritatem, ac uniformitatem eventus.

IX. *Sacerdos* quidam, cujus nomen subriceo, ne Medico, qui curam illius gessit, & meliorem fortasse partem elegit, videar me cavillose quodammodo succensere, vel promeritæ laudis quidpiam detrahere; Sacerdos, inquam, iste me consulturus de suo, quod infra subdam, incommodo, prænotionis causa narravit mihi: se ante annum circiter a violenta Tertiana duplici correptum fuisse, in cujus accessu primo statim delirus cum stupiditate, ac mentis hebes factus est. Tertia die his, & aliis gravibus symptomatibus territus Medicus, ac de ruina præcipiti, nec forsan immerito metuens, ea ipsa die tertia Chinam Chinam exhibuit, cujus usu ad aliquot dies protenso suppressa est febris omnino sine relapsu. Post dies L. circiter, translata forsan ad principia nervorum, ad quæ pariter ab initio tendebat, febrili materia, stupore crurum, & gravi ad motum segnitie capitur, dein balbutie, seu interceptione quadam liberæ loquelæ. Jamque ferme annus integer exactus est, nec dum tamen, pluribus licet remediis a Medico suo ordinario præscriptis, libere incedit, aut loquitur: Quid frugis reportaturus sit ex præscriptis a me, in fatis lateret.

Super hoc casu, si quid liceat conjectare, credi potest, quidpiam pejus evenitum fuisse, ni Cortex statim fuisset oblatus: fortassis enim quinta die lethargicus obiisset ægrotans. Quod si dies quinta potuisset tuto expectari, priusquam exhiberetur Cortex, forte vel morbus ab exordio violentus nonnihil de sua ferocia, ut nonnunquam assolet, remississet, discretis magis paroxysmis redditus; vel si talis perseverasset, dummodo non intulisset mortem, majori certe cum securitate, & absque metu novi, gravisque morbi, febris per Chinam Chinam foret depulsa. Sed quis de his audeat ante factum quicquam certo vaticinari?

X. En statim eventus oppositus in hoc alio casu, quem in Perniciosis potius Intermittentibus, quam in Subcontinuis indicassem, ut ferebat ordinis ratio, si mihi citius innotuisset: Utcunque, neque



que hoc loco inopportune memorabitur. Narravit mihi nuperrime non sine laudabili sollicitudine junior, sed non exiguae expectationis Medicus, se non multo ante habuisse præ manibus Tertianam febrim, cujus primus accessus cum frigore incipiens plurimam habuit cum intensione extensionem; quapropter coepit animo remote volvere oblationem Peruviani Corticis, quotiescunque febris ad continuitatem properasset, ut facile eventurum suspicabatur, nil aliud cæteroqui metuens, quia non ullum aliud symptoma deprehendebat. Secunda accessio cum aliqua vomitione, & modica dejectione materiæ excerni solitæ invadens, longe brevior habuit extensionem, & minorem pariter intensiorem, cui perfecta de more successit apyrexia, ita ut Ager die vacua difficulter ruerit, se in lectulo detineri: atque hic rerum status omne delevit a mente Medici de China China propinanda consilium. Paroxysmus tertius sine ullo frigore Aegrum invasit, sed cum vomitibus aquosis, & dejectione unica materiæ nullius prævæ qualitatis, cui paulopost successit alia quædam meri, & atrii sanguinis, qualem descripsimus *Cap. I. Lib. III.* Quæ dejectio frequentior facta, & ad septem, vel octo vices repetita, sine ullo quidem dolore, sed semper cum exitu copioso nigricantis tum concreti, tum dissoluti sanguinis, quasi ex venæ cujuscumque varicosæ ruptura ille prodiret, in eo ipso paroxysmo Aegrum Sacris Ecclesiæ properanter munitum de medio sustulit. Hujusmodi certe pernicioso, ac lethali symptomate comitatas Intermittentes, nisi in eo, quo illud apparuit, accessu hominem interfecerint, Peruviano Cortice valide oblato brevi sanari & diximus, & exemplis confirmavimus in Historiis. Atque id ipsum contigisset, ut reor, hoc casu, si dejectio secundæ accessionis, quæ modum naturæ servavit, quidpiam saltem hujusmodi tincturæ præferulisser, ita ut Medicus de necessitate sistendi febrem per oblationem Corticis suspicari valuisset, vel etiam si hujusmodi ob-

lationem necessariam tantummodo reputasset (ut ferme reputavit prima accessione) titulo impediendæ continuitatis, de qua tamen metum rationabiliter submovit secunda ipsa mitior accessio. Sed & hic divinationibus magis opus esset, quam conjecturis.

Hinc patet, quam lubricæ sint, ac fallaces conjecturæ nostræ, etiam cum maximam videntur præferre speciem probabilitatis; quod maxime verum elucescit in prænarratis, ubi una observatio aliam quandoque videtur infirmare. Propterea cum mihi satis adhuc exploratum non sit, neque nisi diutina, prudenti, & cauta experientia sit explorabile, quinam constanter sit profectus, & consequenter quidnam rationabiliter sperandum, quidve metuendum ex propea Corticis oblatione in Febris, de cæta, & celeri continuitate, acutie, atque malignitate acquirenda suspectis, ideo ab ulteriore, aut firmiore voto lubens abstineo, donec longior dies, aut crebrior occasio, & eventus, experientiæ nondum integræ solidiora fundamenta, majusve complementum adjiciat. Non enim æque experiri licuit, aut licet circa Februm subitam suppressionem, utut benigno id fiat, innocuoque intrinsece medicamento, ubi morbus est naturæ adhuc ancipitis, nec in certam perniciem plane propensus, præcipue circa prima illius initia indeterminata etiamnum, & instabilia, ut licuit, licet, semperque licebit, ubi vel morbus nonnihil protensus pravam inclinationem suam, si quam habet, clarius patefacit, vel pernicioso, ferali, funestoque stipatus symptomate, certum, ac inevitabile portendit exitium. Ibi namque prorsus incunctanter exhibendus est Cortex Methodo nostra, suis locis descripta, eamque, postquam publici juris est facta, salva conscientia negligi, aut omitti non posse, æque certo crediderim, ac credam sine nota impietatis omitti non posse oblationem funis, aut baculi, qui præsto sit, Homini submerso ingurgite, & ob defectum manus auxiliatricis pereunti.

Qua



Qua animi constantia hoc assero, & asserui toto *Lib. III.*, qui propositum fere totius Operis solus continet, non sum ausus asserere Capite præcedenti in casibus, & circumstantiis ibidem recensitis, utut Historiæ felices superius allatæ, aliæque consimiles, quas possem asserere, id ipsum haud inefficaciter suadeant. Mihi sat sit, observationes meas, praximque meam circa hoc circumspectam in medium adduxisse, ut inde docti, prudentes, & experti Viri, quodque magis refert, a præjudiciis immunes, eandem praxim non sine exemplo valeant in usum revocare, eamque vel ampliare, si nimis cautam, restrictamque reperiant, vel moderari, si audaculam. Vix tamen possibile reputo, eam ullo temeritatis stigmate posse notari, si cautionibus luculenter expressis, a Virro temperanter fidenti in actum deducatur. Sufficiat ergo non pusillis quidem, neque audacioribus, sed mode-

ratis tantum, & cordatioribus lumen aliquod, utut incertum, ac dubium, per animadversiones, & conjecturas meas prætulisse: ex iis etenim vel titubanter prolatis, nec uspiam firmatis, facile cuilibet sollerti ingenio pro re nata constare poterit, quid ipsa mea identidem suadeat, quidve dissuadeat hæsitantia, vel subitientia. Atque ita longe melius, ac si quicquam temere pronunciassem, quodnam sit cauti simul, ac providi Medici *munus*, & *officium*, tacitus innuam, & quempiam forte præcipitanter nimis de hac materia scripturum,

— *nil scribens ipse, docebo*

*Quid deceat, quid non,* —  
ratus interim, me, cum non ultra valem, alieno commodo satis præstiturum, si

— *fungar vice cotis, acutum*

*Reddere quæ ferrum valet, exors  
ipsa secandi.*





# THE RAP EUTICES

## SPECIALIS

### LIBER QUINTUS.

Febrium omnium Continuarum, necnon aliorum quorundam Morborum, præsertim recurrentium, examen continens, docensque in quibusnam earum, eorumve possit esse proficius Cortex: Item quænam illius utilitas ad Prægnantium, ac Puerperarum Febres, & quæ vis ejusdem in Clysteribus, ac Epicarpiis adhibiti.

#### CAPUT PRIMUM.

*Generalis præmittitur Febrium divisio, materia, de qua agitur, congruenter aptabilis.*



**E**XPLEVI hætenus quod sponderam, loquutus non modo, quod præcipuum erat, de opportuna, & minus trita oblatione Peruviani Corticis in Febris Intermittentibus Perniciosis, verum etiam de vulgari illius usu in aliis omnibus earundem Intermittentium non malignantium speciebus. Quia verò magni hujusce Remedii activitas hæc quoque pomæria transcendit, sed sorte nonnihil ancipiti, ita ut illis vis nulla adversus ullam Continuarum speciem ab aliquibus concedatur, quod falsum vidimus saltem in Perniciosis continuitatem aliquam recenter adeptis; ab aliis vero, quod æque falsum diximus, vis maxima illi tribuatur adversus omnes ipsarum Continuarum species, imo adversus alios Morbos per intervalla potissimum recurrentes, idcirco ne quid nostro huic qualicumque Tractatui desit in hac materia, lubuit veluti Corollarii loco quintum hunc Librum insituere, ubi omni, qua licuerit, claritate, ac certitudine patefiet, in quibusnam aliis præter jam dictas Febrium speciebus, & Morbis China China vere conveniat, & in quibus vere non.

Exordium itaque ducendo a Febris, quibus universali consensu magis congruit remedium istud, quam aliis quibuscunque Morbis, necesse erit aliquam earum divisionem præmittere, & explicare, ut de quibus vere loquamur, dum usum Corticis in illis vel approbamus, vel reprobanus, sine ulla æquivocatione innotescat. Hæc ergo, quæ sequitur, nobis erit divisio, si non omnibus numeris absoluta [quandoquidem id omnino perficere ad ritus scholasticos inutile simul, & contentiosum foret] saltem sufficienter commoda in eum præcipue finem, in quem illam construimus; eritque magna quidem ex parte ab Antiquioribus deprompta, sed insimul ad Neotericorum leges, quantum sat est, disposita, retento tamen adhuc in generalioribus præsertim membris veterum terminorum, quippe notiorum, sono: esto falsis ut plurimum suppositionibus, quas minime admittimus, in nixa primum fuerit eorum usurpatio.

Dividebant igitur Antiqui, saltem quamplurimi, nosque pariter impræsentiarum cum illis sub præmissa nuperime protestatione, Febres omnes in Simples, Putridas, & Pestilentes, seu Malignas; neque enim Pestilentes a Malignis

lignis



lignis differre dicuntur, ut notum est, nisi penes majorem in illis, quam in istis malignitatis gradum. Nos autem tertium hoc membrum generale Pestilentium, seu Malignarum omittimus modo; tum quia illud non alias *Febres* sub se continet, nisi antedictas, *Putridas* scilicet, ac, si velis, etiam *Simplices*, & solas, & omnes, vel saltem plurimas; tum quia cum tota diversitas earundem Malignarum ab iisdem non Malignis in nulla alia re sita vulgo statueretur antiquitus, nisi in venenata quadam qualitate, putredini, ut agebant, in Putridis superaddita, ipsisque secundum aliquos Simplicibus, ac minime putridis associabili, non est, cur sub duplici classe eandem penitus rem iterum producamus; tum denique quia malignitas ista [in quocunque illa consistat] si sit adjuncta Febribus, quæ per Corticem curari queant, quando sunt in statu benigno, non officit, quominus eadem in statu quoque maligno per illum curentur; secus si malignitas jungatur cum Febribus in statu etiam non maligno Corticem respuentibus. Propterea de ista malignitate Febribus accidentali sufficiat in divisione nostra aliquam tantum mentionem facere, ubi ea Febribus Cortici obtemperantibus fuerit associata, ut quæ nonnullas accidentales, perniciales tamen, ut alibi vidimus, ipsarum Februm differentias constituit. *Simplicem* ergo Febrim vocabimus cum Veteribus *Ephemeram*, seu *Diariam*, cujuscunque sit generis, *Synochum* imputrem dictam, & *Hecticam*, quam postremam dividimus in *Primariam*, quæ a principio invadit, & *Secundariam*, quæ, vel particularibus affectionibus, puta Phthysi, aut consimili viscerum corruptioni, vel aliis nonnunquam Febribus, præsertim Ardentibus, solet succedere, quatenus illæ, de genere licet Acutarum ab ortu, in Hecticam tamen veram, sed Secundariam, tractu temporis migrant.

*Putridas* autem, sive Humorales Febres [quorum terminorum nota est significatio, quantum exigat generica de-

signatio reliquarum Februm] dividebant Veteres in Continuas, & Intermitteutes, rursusque Continuas in Continentes, seu Synochos, & in Proportionatas, seu Periodicas. Nos vero majoris claritatis gratia pro fine nostro, & absque læsione substantiæ rei, prima quidem duo recipimus membra generalia, seu duo latiora Februm genera, *Continuarum* videlicet, & *Intermittentium*; sed Proportionatarum genus subalternum non a Continuis solis derivamus, verum partim a Continuo, partim ab Intermitteute summo genere, non ordine quidem plane metaphysico, sed ordine physico, ac practico, absque ulla etiam Scholarum injuria. Haud equidem immediate ex Continua, & Intermitteute Continuum Proportionatam deducimus, sed mediate, & per gradus physicos suæ compositionis, sui que exortus, videlicet ex *Continua Remittente*, & ex *Intermitteute Communicante*, seu potius *Subintrante*: adeoque *Continuas*, ut infra explicabimus, non dividimus immediate in Continentes, & Proportionatas, ut mos est, sed in *Continentes*, & quoquo modo *Remittentes*, sicut dividemus *Intermittentes* in *Discretas*, & *Subintrantes*, licet Subintrans stricte loquendo vix amplius dici queat Intermitteute: deinde ex *Continuis* quomodolibet *Remittentibus*, & suo loco describendis, simul ac ex *Intermittentibus Subintrantibus*, *Continuas Proportionatas*, seu *Periodicas* componi dicimus. Cum enim Febris *Continua Proportionata*, seu *Periodica*, sit revera mediæ inter Continuum, & Intermitteutem naturæ, habeatque communem cum Febre Continua ut sic rationem Continuæ, & cum Intermitteute rationem Periodicæ, non est extrarem illam ponere velut tertium quid ex Intermitteute, & Continuæ concursu, seu mavis ex Fermentorum earundem mixtura resultans, & de utriusque natura participans. Ita ex duobus Animalibus diversæ speciei unum tertium progignitur; & ita in eodem Stipite, uno Ramo Aurantia, altero Citrea



treea Poma ferente, unus & idem medius Ramus exurgens veluti Hermaphroditus inter illos (norunt hæc quotquot elegans insitionis artificium, & amœna monstra callent, Hortorum luxui inde progenita) Poma edit ex Citreo, & Aurantio mixta,

*Miraturque novas frondes, & non sua Poma.*

Haud aliter in Febrium genesi Febris Continua Proportionata ex Continua simul, & ex Intermittente quasi conflata visitur in praxi, qualis prostat in Ideali nostra Febrium *Arbore Cap. V. hujusce Libri*: adeoque cohærenter ad praxim, & ad intentum nostrum, quod clarius deinceps elucescet, & in cuius gratiam hæc dicta sunt, Febres *Putridas* appellatas immediate quidem dividimus in *Continuas*, & *Intermittentes*, sed utrasque æqualiter ad *Continuam Proportionatam* gignendam, ut infra, disponimus.

Primo itaque loco Febris *Intermittens* vel *Discreta* est secundum paroxysmos, & plane disjuncta, adeoque Legitima, vel est *Subintrans*, & consequenter *Notha*. *Subintrans* (ut de hac prius loquar) dicitur, quando priusquam deficiat unus paroxysmus suapte natura finiendus, subintrat alter; & si valde propinqua sit, vel immediate ante absoluta prioris solutio, cum alter succedit, hujusmodi Febris, dicitur tantum *Communicans*, vel *Coalterna*, & adhuc naturam veræ *Intermittentis* retinet, aut plurimum redolet: si vero paroxysmus prior, tunc cum alter subingreditur, non sit admodum propinquus solutioni suæ, tunc hujusmodi Febris dicitur *Subintrans*; jamque incipit a natura veræ *Intermittentis* nonnihil desciscere, & lenta quadam metamorphosi in *Continuam Proportionatam* transmutari: idque eo magis succedit, quo major est paroxysmorum sese mutuo excipientium commixtio, concurrente insimul intima dispositione cruoris ad æstuandum assidue, ut fusius dicemus *Cap. III. Discreta* ex adverso vocabitur quæcumque accessiones suas plane distinctas habebit, quemadmodum

*Torti Therap. Spec.*

veram, & Legitimam Intermittentem decet. Hæc autem vel irregularis est, nullum scilicet typum, nullum certum Circuitum, nullamque determinatam periodum servans, & *Erratica* dicitur; vel has omnes condiciones, atque periodos certas statuto ordine servat, & dicitur *Periodica*. *Periodica* tres sunt portiores, & omnibus acceptæ species, quarum quæ quarto quoque die invadit, *Quartana*; quæ tertio quoque die, *Tertiana*, & quæ quotidie, *Quotidiana* vocatur. Rursus notæ sunt, absque eo quod crambem hanc recoquamus, illarum subdivisiones in Legitimas, & Spurias, sicut & in *Simplices*, *Duplices*, vel *Triplices* &c. Item earum complicationes, aut commixtiones cum aliis tam ejusdem, quam diversi generis, unde *Complicata* dictæ, quas inter celebris est *Semitertiana*, aut *Hemitritæus*: pariterque tritæ sunt degeneraciones, seu transmutationes earum quandoque omnium in *Subintrantes*, mox in *Continuas* tum *Acutas*, tum *Lentas*, veræ nonnunquam *Cachectica*, nonnunquam *Marasmodis*, quin & *Hectica* ipsius æmulas &c.

Sed & his vulgatoribus, ac majori ex parte Benignis, addamus hic loci cum *Mercato* Perniciosas, seu Malignas Intermittentes; immo non quidem addamus, cum hæ non aliæ sint, quam prædictæ, sed in gratiam Corticis Peruviani specialiter, & mirifice in illas agentis, consideremus easdem sub qualitate, more, aut caractere Malignarum; quod omnibus quidem Intermittentibus potest competere sive ab intrinseco, sive ratione alicujus adjuncti funesti symptomatis, morbum gravissimum simulantis modo sub una differentia, modo sub alia, ut vidimus suo loco, sed præcipue Tertianis, quibus quælibet species malignitatis facile accedit. Cæterum Quartanæ quoque lethargus non raro, quibuslibet autem aliis saltem Continuitas essentialis, & inde Malignitas potest, ac solet nonnunquam accedere, eaque tam de genere Colliquativo, quam de Coagulativo; ut proinde quod

T

de Ter-



de Tertianâ, quippe potiore, dicitur, data proportione intelligendum sit de quacunque Intermittente. Præmissis itaque antedictis illarum divisionibus, subdividimus Tertianam tam simplicem, quam duplicem ratione moris in *Benignam*, & *Malignam*. De Benigna jam satis. *Malignam* distinguimus in *Solitariam*, & *Comitatam*, videlicet in eam, quæ ex prava natura sua ad Acutam, Malignam, & Pernicialem vergit, & in eam, quæ talis repente fit ob adjunctum ferale aliquod, & peculiare symptoma, morbo ipso, quem mentitur, & Febre, quam comitatur, deterius. Cum autem hujusmodi Malignum symptoma in Comitatis ab humorum colliquatione, vel concrectione necessario dependeat, propterea Febris eodem *Comitata* in *Colliquativam* dividitur, & *Coagulativam*. Colliquativæ soboles sunt *Cholerica*, *Subcruenta*, *Cardiaca*, & *Diaphoretica*. Coagulativæ vero, *Synopalis*, *Algida*, atque *Lethargica*, de quibus omnibus jam suo loco. Malignæ autem Tertianæ *Solitariæ* [idem dic de Quartana &c.] unam tantummodo speciem ponimus, quasi, ut *Mortonus* inquit, Proteiformem, quam *Subcontinuam* dicimus, neque illam ad ullum determinamus Colliquationis aut Concrectionis genus, cum ad utrumque sit identidem, & alternarim disposita. Et hæc est, ut & alibi, nostra Intermittentium divisio.

Divisio autem *Continuarum* nobis erit in *Continentes* appellatas, & *Remittentes*. Continuæ *Continentes* sunt (loquor cum communiore) illæ, quæ nulla vicissitudine exacerbationum, aut remissionum notatæ, a principio ad finem una veluti accessione protenduntur, sive id fiat per æqualem semper, sive semper crescentem, sive deinceps per semper decrecentem continuitatem, & dicuntur *Synochi putridæ*. Continuæ vero *Remittentes* [quas nomine Continuarum simpliciter placeret appellare, nisi nomen istud Continuis Proportionatis longa tituli possessione communiter tributum foret] ex adverso sunt, quæ non

una continuitate vel semper æquali, vel semper crescente, vel semper decrecente sunt præditæ, sed tali, quæ licet jugiter perseveret, aliquas tamen patitur identidem obscuras, nec certo plane ordine recurrentes exacerbationes, seu motiunculas, aliquasque pariter suscipit remissiones, sed eas quoque nec admodum conspicuas, nec certo prorsus ordine redeuntibus: adeoque a Continuis Continentibus *Remittentes* istæ distinguuntur secundum nos præcise per hoc, quod non adeo fixam, ut illæ, habeant continuitatem suam, sed plane inæqualem, & quidem vel inordinate talem, vel ad summum ordine quodam pendente potius a rerum externarum, seu non naturalium usu, quam ab intrinseca radice; non vero distinguuntur per hoc, quod habeant continuitatem suapte natura ordinate inæqualem, & certo quodam typo distinctam, ut habent Continuæ Proportionatæ. Istæ siquidem, nempe *Continuæ Proportionatæ*, seu *Proportionales*, quæ secundum nos ex Subintrantibus, & Remittentibus supra explicatis assurgunt, magisque ad Intermittentes in exortu suo, magis vero ad Continuas, & Acutas in progressu spectare videntur, sunt illæ, quæ licet nunquam omnimode solvantur, certas tamen, & periodicas habent incrementi, & decrementi vicissitudines, & juxta diversitatem periodorum, Februm Intermittentium adinstar (ex quarum fermento saltem partialiter pendent) *Quotidianæ*, *Tertianæ*, aut *Quartanæ Continuæ*, sive *Simplices*, sive *Duplices* &c., aut solo etiam retento generis nomine, *Continuæ* simpliciter, licet forsitan minus apposite, nuncupantur, ut paullo ante diximus; de quarum indole æquivoca fusius acturi sumus *Cap. III. hujusce Libri*. Harum subdivisiones, seu differentię accidentales plurimæ recensentur, quarum aliquæ Tertianam, aliquæ Quotidianam Continuum respiciunt. Quæ ad *Tertianam Continuum* pertinent, sunt præ cæteris *Causon*, seu *Febris Ardens*, *Affodes*, *Helodes*, *Synopalis minuta* &c. Quæ vero respiciunt.



*Quotidianam Continuum*, sunt *Hepiala*, *Syncopalis humorosa* &c.

Continentium autem ab antiquis aliæ dicebantur *Essentiales*, sive *Primaria*, aliæ *Accidentales*, sive *Secundaria*, aut communiter *Symptomaticæ*. Hæc tamen divisio (ut fatear) omnibus indiscriminatum Continuis aptari solita, præcedebat potius, quam subsequeretur divisionem Continentium, & Proportionatarum, nec male: quandoquidem Continua Proportionata, non secus ac Continentes, sunt *Essentiales*. Sed nobis pro dilucida nostræ intentionis explicatione commodius est essentialium, & Symptomaticarum divisionem a Continente derivare, tanquam a potiori, non excludendo præcisione nostra rationem Febris Essentialis ab ipsa Proportionata. Interim hoc pacto Symptomaticas ad Continentium genus, ad quod saltem plerunque spectant, revocasse non piget. *Essentiales* erant Antiquis, suntque & nobis illæ, quæ ex ingenito universali, ac proprio fluidorum vitio nulla concurrente peculiari determinatæ partis affectione excitantur. Symptomaticæ autem ex adverso appellabantur illæ, quæ non ex primario fluidorum vitio, sed ex peculiari nonnullarum corporis partium affectione, puta Inflammatione, Erysipelate &c. ortum suum trahere videbantur. Sed cum pluribus placuerit, *Platero* duce, illas potius ut *Essentiales* respicere, & adjunctum Erysipelas, Inflammationem &c. considerare velut quidpiam ab iisdem Febribus, tanquam a primo fonte promanans, eas idcirco non *Symptomaticas*, sed potius *Comitatas*, hoc est, peculiari morbo, aut incommodo in aliqua corporis parte ab iisdem excitato, stipatas lubuit nominare: quæ opinio plurimis etiamnum Neotericis arridet. Nos cunctis morem gerendo, quoniam id rei nostræ non officit, ut litem componamus, unicuique aliquid detrahentes, & aliquid superaddentes, retenta divisione nostra Februm, ut ajunt, Putridarum in Intermitteutes, & Continuas, Continuarum in Remitteutes [quibus Proportionatas

subnectimus] & in Continentes, nec non admissa hac postrema, scilicet Continentium in *Essentiales*, seu *Primarias*, ut supra, & in *Accidentales*, seu *Secundarias*, aut communiter *Symptomaticas*, easdem rursus Continentes *Essentiales*, majoris claritatis gratia, subdividimus in *Solitarias*, & *Comitatas*.

*Primaria*, seu *Essentialis Continens Solitaria* est Synochus jam supra exposita, ex sola fluidorum dyscrasia nullo insigni concurrente, vel concomitante solidarum partium vitio, genita; & in tres species dividi solet, quarum quæ pari semper passu, & intensione procedit, dicitur *Acmaistica*; quæ paulatim semper crescit, *Epacmaistica*; & quæ paulatim semper decrescit, *Paracmaistica*. *Comitata* vero est, quæ cum aliquo morbo particulari a se genito, vel saltem cum gravi quopiam Symptomate morbum verum simulante, aut etiam æquante, copulatur, estque illis ortu prior, aut saltem simultanea, ut iis originem dedisse credi possit. Cumque id potissimum accadat media Colliquatione, vel Concretionem fluidorum, idcirco in *Colliquativam* dividitur, & *Coagulativam*. Colliquativæ Febris soboles erunt v. gr. *Diabetica*, quæ scilicet immodicum urinæ profluvium, *Diaphoretica*, quæ nimium sudorem, *Dejectoria*, quæ frequentes alvi dejectiones inducit, & aliæ hujusmodi, quæ humores nostri corporis nimium fundendo, ac dissolvendo, enormes evacuationes, partiumque, quibus mediis illæ exercentur, molestas, atque morbosas affectiones sibi asciscunt comites. Coagulatoriæ vero Febris [quæ varias vel in una, vel in pluribus corporis partibus, aut visceribus, fluidorum stagnationes, aut concretiones inducens, alios morbos, vel affectiones saltem graves pro morbis habitas gignit] Coagulatoriæ, inquam, Febris erunt soboles, *Morbillosa*, *Variolosa*, *Scarlatina*, *Catarrhalis*, & aliæ pariter hujusmodi, immo & *Inflammatoria* quævis, aut *Erysipelatosa*, ut *Pleuritica*, *Arthritica*, *Anginosa* &c. dummodo Inflammatio a Febre, non Febris



bris ab Inflammatione ortum duxerit.

*Symptomatica* autem Febris nobis erit, quæ vero alicui morbo particulari, cui juncta est, sed ortu posterior, non dedit originem, verum illam ab eodem recepit; cujus sententiæ fuit & olim *Galenus*, subscribens Prædecessoribus suis — *A Febris* [ inquit ille ] *male habere, & vexari Antiqui dicebant eos, qui sine certa inflammatione, aut abscessu, aut dolore, aut erysipelate, aut, ut generatim, & universim dicam, absq; aliquo membro eximie præ aliis affecto agrotabant. Quod si vel propter lateris, aut pulmonis, aut alterius cujusdam partis inflammationem febricitabant, non jam febricitantes ipsos appellabant, neque Febris vexari dicebant, sed Pleuriticos, aut Peripneumonicos, aut Hepaticos, aut similibus aliis nominibus nuncupabant.*

*Symptomaticam* ergo, respectu habito ad partes, ex quarum affectione illa suboritur, dividemus in *Officalem*, & *Privatam*. *Officialis* dicetur ea, quæ pender ab actione vitata partis alicujus, cujus officium sit publicum, hoc est institutum in gratiam totius corporis, vel in gratiam speciei; quæ vero pender a vitio partis, cujus actio privata sit, & sibi soli deserviens, vocabitur *Privata*. *Officialis* erit idcirco Febris *Lactea* Puerperarum, & *Alba*, seu *Pallida* Virginum *Chlorosi* laborantium. *Privata* autem *Symptomatica* dividetur in *Fixam* & *Vagam*. *Fixa*, quæ alicui parti determinatæ laboranti, velut radici suæ, primitus adhæret, cum a pluribus, diversisque omnium plane corporis partium morbis pendere possit, subdividetur saltem in species aliquot frequentiores, & magis obvias, quales sunt *Inflammatoria* [ quo sub nomine *Erysipelatosam* quoque comprehendo ] *Pustulosa*, seu *Tuberculosa*, *Ulcerosa*, & *Lenta*, ea scilicet, quæ ex latente, & contumaci Viscerum, imi præsertim Ventris obstructione, tanquam a causa procedit, ipsa labefactata eorundem viscerum glandulosorum intimiore substantia. Quæ enim citra Viscerum labem ex diuturna tantum Februm Intermit-

tentium duratione, & successiva earum in Continuas transmutatione progignitur, adeoque obstructions ipsas, easque etiam vulgares, etsi durabiliores, producit, vel productas, & antea genitas auget, esto etiam, quod vel maciem, vel Cachexiæ initium valeat inducere, ad *Lentas* tantummodo essentielles ex *Intermittentium*, non ad *Symptomaticas* ex *Continuarum* stirpe debet referri. Ad *Inflammatoriam*, seu *Phlegmonodem Symptomaticam* spectabit Febris, quæ ab aliqua procedat Febrem ipsam præcedente partis alicujus Inflammatione; si enim Febris Inflammationem præcesserit, vel si utraque simul etiam fuerit excitata, Febris potius Comitata vocabitur, quam *Symptomatica*, ut supra diximus; & hac de causa juxta regulam modo traditam, una, eademque specificè, non individualiter, Febris, v. gr. *Podagrica*, *Pleuritica* &c. modo *Symptomatica*, inodo *Comitata* dici poterit. In suppositione igitur, quod Febrem vere præcesserit v. gr. punctorius dolor lateris, Tussis, & difficultas spirandi, Febris hujusmodi *Pleuritica* reducetur ad *Symptomaticam Privatam Fixam*, & quidem *Inflammatoriam*; ita & *Anginosa*, *Arthritica*, & alia quævis, quæ ex qualibet prius inflammata corporis parte processerit, quarum seges copiosa existit, ac propemodum innumera. In eadem suppositione, quod Febri det ansam comes affectio, non Febris affectioni comiti, ad *Pustulosam*, seu *Tuberculosam* pertinebit Febris *Herpetica*, quæ ex *Herpete*, & *Scabiosa*, quæ ex *Scabie*; ad *Ulcerosam* vero *Dysenterica*, quæ ex *Dysenteria*, & *Tabida*, quæ ex *Phthyssi*, vel alio quocunque ulcere sive interno, sive etiam externo, cavo, & sordido, originem ducat: sicuti ad *Lentam Symptomaticam* spectabit Febris *Marasmodes*, quæ cum summa corporis extenuatione, ac consumptione, & *Cachectica*, quæ cum universali, ac insigni illius tumefactione, mortiferoque pallore conjungitur. Et hæc de *Symptomatica Fixa*. *Vaga* ex adverso *Symptomatica* nobis nuncupabitur,



## CAPUT II.

cur, quæ nulli peculiariter parti de more addicta est, immo nec ulli præcise Februm generi, sed a nonnullarum partium actionem tam privatam, quam officialem edentium, morbo præexistente procedit, & per varias, quas facile suscipit, identidem vagatur Februm species. Hujus ordinis erunt Febris *Verminalis*, *Veneræ*, seu *Gallicæ*, & *Scorbuticæ*, quæ omnes ex certis quidem, sed variis partibus graviter affectis possunt pendere, & per diversa Februm, etiam non Continuum confinia vagari. Ad hæc, si possibilis sit generaliter mutua commixtio Februm Putridarum Continuarum, puta Symptomaticæ cum Essentiali, vel Continentis cum Proportionata &c. hinc emergent quoque *Continuæ Complicatæ*, complicationi Intermittentium cum Intermittentibus, vel cum Continuis, proportionem respondentes.

Hoc denique coronidis loco circa Symptomaticas animadvertendum, quod pro intentione nostra non modo consideramus ut tales Febres illas, quæ a morbo partis alicujus originem traxere, verum & eas [cujusque fuerint speciei, vel generis] quæ licet ortum ab iisdem non traxerint a primordio, talem nihilominus in progressu cum aliqua ex ipsis affectionibus connexionem acquisierunt, & tale fœdus iniere cum illis, ut Febris eadem, quæ primo fortasse hujusmodi affectionem genuit, ab eadem postmodum circulari quadam, & veluti reciproca causalitate, alimentum, fomitem, atque diuturnitatem suam mutuetur; quo casu Febris de *Comitata* in *Symptomaticam* transit. Atque istæ metamorphoses passim obviæ, etsi scholasticæ nugæ videantur, sedulo animadvertendæ sunt in praxi, easque hic lubuit obiter indicare, quandoquidem sic una, & eadem Febris pro varia sui habitudine modo curationi per Corticem instituendæ opportuna est, & modo non.

*Peruvianus Cortex inutiliter exhibetur in Febris Continuis Continentibus, seu non Remittentibus, tam simplicibus [ut vocant] quam Putridis, atque his quidem, tum Symptomaticis, tum Essentialibus, tum Solitariis, tum Comitatis, siue Malignæ fuerint, siue Acute simpliciter. Mortoni Praxis in hoc castigatio detegitur, ac vulgo sit credita; non tamen plane recipitur.*

**J**UXTA allatam nuperrime divisionem, & terminorum acceptionem, quæ nisi ordinate præmissa fuisset, ac per extensum explicata, ab aliquibus uno, ab aliis alio modo potuisset intelligi, jam seorsim examinare fas est singulas obiter Februm Continuarum species, ut quibus sanandis China China competat, & quibus non competat, clare determinemus.

Genericè interim præmittendum est tanquam Theorema inconcussum in Praxi, quod energia Peruviani Corticis unice se se exerit adversus fermentum illud, quod per intervalla sanguini affunditur, ut diximus *Lib. I.* illumque in febrilem effervescentiam concitat; minime vero adversus fermentum, quod in ipso jugiter sanguine radices habet. Hinc sequitur quod post Febres vere Intermittentes nullæ aliæ in linea Continuarum occurrant Cortice curandæ, nisi illæ, quæ accidentalem, ut sic loquar, continuitatem adeptæ, suam tamen primævam originem, vel potiore saltem suæ originis partem agnoscunt a fermento extraneo in eundem sanguinem influente, ut ipsarum Intermittentium mos est.

Hoc jacto fundamento, cui constans, quantum novi, astipulatur experientia, facile erit deducere, quod nullis Febris Simplicibus dictis, videlicet nec *Ephemeris*, neque *Synochiis imputribus* (quibus ob citam, & facilem solutionem superfluous esset, etiam si prodesset)



multoque minus *Hecticis* veris, tam *Primariis*, quam *Secundariis*, cujuscunque sit indolis fermentum pertinax, quod illas fovet, Peruviani Corticis aptetur actio.

Quoad *Continuas Putridas* dictas, si-ve *Humorales*, si *Continentes* illæ fuerint, more scilicet a nobis exposito, hoc est nullis *Exacerbationum*, aut *Remissionum* vicissitudinibus inter puncta, fuerintque pariter *Essentiales*, atq; *Primariæ*, tam *Solitariæ*, quam *Comitatae*, & tam de genere *Colliquativo*, quam de *Coagulativo*, singulæque tam *Malignæ*, quam simpliciter *Acutæ*, extra dubium videtur, illarum quibuscunque stabile intra cruorem, diversumque valde ab *Intermittentium* fermento fermentum habentibus, Corticem Peruvianum opitulari non posse.

Quia tamen nec obesse ex sui natura crediderim, aut unquam credidi, neque Aliorum favore Corticis opinantium, illudque remedium in quibuscunque etiam *Continuis* Febribus approbantium, auctoritatem temere seponendam duxi in juventure præsertim mea; ideo tunc meæ minime fidens Minervæ nondum satis expertæ, de Cortice in *Continuis Primariis*, & *Continentibus* exhibendo periculum aliquod innoxium, aliorum fretus auctoritate, ut dictum est, faciendum censui. Sed ut ingenue confitear, præscripto aliquoties non paucis *Ægrotantibus*, parca quidem, sed congrua, & partita dosi, sub specie boli cardiaci remedio, vel nullum inde levamen, sicut nec damnum ullum emergere agnovi, vel illud beneficium tantummodo, quod aliis remediis vulgaribus adscribendum facile creditur, tunc cum morbus, exacto jam *Acutorum* curriculo, finem suum si-ve bonum, si-ve malum assequitur; neque enim promptiorem antedicto, sicuti nec feliciorum, aut infeliciores terminum in iisdem Febribus usu Corticis obtentum potui dignoscere, non modo cum ipse præscripsi, sed & cum a *Frassono* Præceptore meo (postquam scilicet Remedii vires in *Casu xvi. Cap. X. Lib. I.* descripto fuit expertus)

præscriptum vidi. Penes me autem, cui operatio Corticis semper prompta, & celer apparuit, etiam cum diminute præscriptus est, apparuit, inquam, semper talis, habita saltem proportionem ad dosim præscriptam in aliis casibus: idcirco quotiescunque morbus Corrice curatus suum de more stadium absolvit, ut contigit tunc, profecto illius curationem Cortici non magis tribuam, quam cæteris remediis, aut ipsi Naturæ. Et ideo in hujusmodi Febribus quavis incrementi, ac decrementi alternatione carentibus, inutilem saltem, atque frustraneam crediderim, ingenue loquendo, oblationem ejusdem Corticis; nisi adhibita industria aliqua, mihi hucusque ignota, sensibiliores effectus datum sit intueri: licet non desint, qui nedum sperent se assequuturos, sed & censeant jam assequutos modum, quo aliis adminiculantibus auxiliis, commixtisque medicamentis, puta, Opio, flore Salis ammoniaci, Viperarum sale &c. Corticem ipsum, qui basis reliquorum est, ad *Febrifugi universalis* fastigium elevent. Neque hoc [ut nihil subiticeam] plane intentatum ipse reliqui; sed nec rem acu tetigisse mihi sum visus, neque tuta tantummodo, minimeque suspecta admittenti, ulla amplius mihi superest ultro experiundi cupiditas.

Cæterum si quis sit locus Cortici in Febribus *Continentibus*, is erit ad summum, atque etiam rariuscule, non in *Continentibus Originariis*, sed in iis, quæ ab *Intermittentibus*, vel *Subintrantibus* ortæ, prius in *Proportionatas*, mox & in *Continentes* degenerant. Istæ enim sicuti in puncto suæ metamorphoseos solent sæpiuscule curari Cortice, ita fortasse nonnunquam eodem curari poterunt, etiam postquam fuerint in easdem *Continentes*, saltem de recenti, penitus transmutatæ, vigente scilicet adhuc in illis aliqua primævæ originis conditione, etiamnum corrigenda per Corticem, qui insuper ob stare poterit occultis suppetiis a primo fonte extraneo fortasse larenter, & indefinenter sanguini accedentibus. De his tantummodo



modo Febribus recenter Continentibus factis fortasse loquutus est *Sydenham*, dum eas post amissam intermissione vocat nomine *maxime Continuarum hujus speciei*, in quibus cum fructu asserit Corticem exhiberi, dummodo intempestivus Cardiacorum usus ulteriorem Continuitatem Febri non conciliaverit: quo in casu, *Peruvianum* (inquit ille) Corticem nihil quicquam profecisse, plus semel observavi, quemadmodum alias retulimus.

Quoad Febres vero *Symptomaticas*, tam *Privatas*, quam *Officiales*, tam *Fixas*, quam *Vagas*, tam *Lentas*, quam *Acutas*, *Inflammatorias*, *Ulcerosas* &c., a quibusvis organicis partium vitiis pendentes, nemo, quod sciam, tam animosus fuit hucusque, ut in illis proficuum esse Corticem, absolute pronunciarit, salvo infra subdendis; nam præterquamquod Febres hujusmodi Symptomaticæ consuescunt de more, ac ut plurimum potius ad Continentium genus Cortici inaccessum referri, quam ad aliud, utpote a stabili vitio affectæ partis progenitæ, habent hoc insuper, ut non nisi sublato eodem vitio possint auferri; quod opus pariter solet excedere vires ejusdem Corticis. Id quod intelligendum est, tam si vitium organicum, puta Ulcus, Tumor &c. sit in aliqua parte nobili, & interna, quam si sit in ignobili, aut externa, dummodo Febri a tali affectione ortum, aut fomitem suum agnoscat, secus si agnoscat a fermento consueto, habeatque per accidens comitem aliam, sive præcedentem, sive simultaneam recensitorum generum affectionem.

Ne vero quod experientia propria compertum habui circa hæc omnia silentio præteream, præsertim in confirmationem, quod tenuissima sit, vel nulla vis Corticis adversus Febres *Symptomaticas*, nedum *Continentes*, verum & *Remittentes*, atque *Periodicas*, fateor, me pluribus Tabidis nondum consumptis, & præter quotidianas Febri putridæ dictæ periodos valde conspicuas, vix tantillum Febri habitualis appellatæ tem-

pore remissionis habentibus, Corticem obtulisse, tum ut eorum petitionibus indulgerem, tum etiam ut ipsas nimium increbrescentes periodos inhiberem. At licet ex usu remedii aliquod sensibile levamen ad aliquot dies fere semper observarim, cum manifesta etiam quandoque (non tamen semper) Exacerbationum consuetarum interceptione; at tamen morbus paullo post vires resumens cursum suum jugiter prosequabatur usque ad interitum Ægrotantis; quod infortunium [præter alios casus, quos subriceo, ne longior sim] eximiis Matronis, *D. D. Marchionissæ Fortunatæ Gherardina* tabidæ, gravidæ, & ope forsitan Corticis ad felicissimum partum perductæ, ac dein Vita functæ, demumque *Marchionissæ Lucretiæ Molsæ* pariter tabidæ contigisse memini. Nec aliter se quoque observasse refert in similibus casibus *Cl. Nigrifolus*. Contra, novi Militem in Xenodochio ictu sclopeti vulneratum, & ob diuturnitatem, profunditatem, ac sordem vulneris copioso pure scatentis, Febricula irregulari correptum, cui tandem superveniens Tertianæ cessit actioni Corticis; superstitæ adhuc ad longum tempus vulneris ulcere, nullam cum extincta Tertianæ, ut patefecit eventus, causæ, vel fomitis cognationem habente. Sicuti enim cum Febri fermentum suum præcise recipit a parte insigniter læsa, qui Symptomaticarum mos est, fermentum illud est indolis diversæ a solito Intermittentium fermento, habetque Focum Cortici forsitan inaccessum, unde inutiliter his etiam causis ministratur remedium: ita quando verum Intermittentium fermentum præcise luxuriat, etsi aliqua vigeat alicubi sejunctim labes, eventus nihilominus actioni Corticis proportionatus, intacta provincia extra ditionem posita, ab illius oblatione poterit expectari.

Sic, si Febri alicui Corticem admittenti, ut sunt Intermittentes omnes, & Continuæ nonnullæ, adjungatur per accidens Verminosa affectio, hæc non impediet, quominus Febri curetur eo-



dem Cortice ; neque enim ea Symptomatica erit, cum non a Lumbricis, sed a consueto pendeat talium Februm fermento, verum potius censenda erit Comitata illiusmodi affectione. Quod si vere a Lumbricis pendeat, sitque vere *Vaga Symptomatica Verminosa*, simulque ex ordine earum, quæ Cortici consuescunt obtemperare, adhuc tamen Cortice tractari poterit, tum quia in ea recognosci potest fermentum ipsius ordinarium, tum quia etiam ipsi Causæ suppositæ, Lumbricis nempe, idem Cortex convenire censetur [quacunque id ratione fiat] ut suo loco videbimus. Et sane non semel Febres periodicas, in quibus Vermes si non integram causæ, saltem cum causæ rationem habere visi sunt, Cortice sanatas vidimus, ut patet etiam ex una, aut altera ex nostris Historiis. Posito autem, quod Cortex ex vi peculiaris virtutis, qua pollere dicitur ad curandas Verminosas affectiones, curare quoque per consequens possit Symptomaticam aliquam non modo ex Intermittentium stirpe, verum & Vagam Verminosam inde genitam ex Continentium genere, attamen cum id non efficiat eo casu [dato quod possit efficere] ex vi febrifugæ virtutis, sed ex vi alterius, qua Vermes dicitur respicere, ideo hic a nobis id minime attenditur, sicuti nec attendetur in nostro Februm Stemmata infra ponendo, ubi Cortex non nisi ut Febrifugus consideratur; utque talis nulli Continenti, præsertim Symptomaticæ, prodesse potest ex natura sua sed tantum fortasse per accidens, quatenus Causæ Febrem huiusmodi producenti per accidens opponatur.

Hac occasione quæri posset, quid sit agendum, si Symptomatica aliqua Vaga, vel Fixa sit de genere non Continuarum, sed Intermittentium, nempe, an ea ratione suæ naturæ Corticem admittat, an ratione causæ illum respuat. Sed breviter dico, me Symptomaticas Febres, præsertim Fixas, collocasse sub genere Continentium, quia revera Continentes ut plurimum sunt, aut Remittentes simpliciter, vel ad summum Pro-

portionatæ: Intermittentes enim esse posse Symptomaticas, communiter negatur in Scholis, nisi Symptomaticæ vocentur omnes Intermittentes, eo quia ex obstructione alicujus Ductus, aut Glandulæ oriri dicantur. Verum usus invaluit, ut pro Symptomaticis habeantur illæ tantummodo Febres, quæ non a levi obstructione facile superabili, quæ per se morbus non est, sed a vitio aliquo, & fixo, & gravi solent procedere; cujusmodi vitium non videtur Febrem Intermittentem gignere posse. Quotiescunque vero eam progigneret, cum illud non sit Cortice superabile, ut superabilis fortassis est obstructio alicujus ductus Lymphatici, vel Chyliferi, Febrem Intermittentem [hac data hypothesi] producat, ideo etiam in Intermittente vere Symptomatica, & a gravi labe particulari progenita, si sit possibilis, Corticem minime prodesse crediderim. Duæ siquidem alias expressæ conditiones simul requiruntur ad felicem usum Corticis, nempe primo, ut Febris Continens non sit; secundo, ut ab aliquo gravi, & peculiaris partis cuiuspiam vitio non pendeat.

Quod si quærat, quid saltem sit agendum, si morbus aliquis Febrem Continuum gignere solitus, vel cum eadem associari, ut inflammatio aliqua, associetur Febri Intermittenti, vel ab eadem dependeat, dico, huiusmodi casum rarum, aliosque forsan possibiles, sed non consuetos, non cadere sub regulis generalibus; indicationes tamen in ipsa facti inspectione sumendas esse a potiori. Quamobrem in data positione, si Febris vere sit Symptomatica, & pendens a morbo, v. gr. ab Inflammatione, indicationes erunt sumendæ ab ipso morbo per Corticem minime curabili. Si vero sit Comitata non quidem symptomate simplici, utut gravi (tunc enim absolute curandam esse Cortice, vidimus jam *Lib. III.*) sed vero morbo, cum illa in tali casu huic originem dederit, indicationes sumi poterunt ab ipsa Febre, quæ idcirco ut Intermittens etiam curari poterit Cortice, si



ce, si urgeat aliqua necessitas, secus si non urgeat; hac enim non urgente, satius est forsitan pugnare remediis, utranque affectionem æque respicientibus, quam Cortice Febrem solam respiciente, cujus extinctioni fortasse non subsequetur extinctio morbi, licet a Febre geniti, cum possit ille suas jam jecisse radices, iisque seipsum alere, quin & Febrem sibi propriam, Continuum nempe paulatim accersere.

In hanc rem sit brevis ista casus infrequentioris Historia, videlicet de non mentita Pleuritide, copulata cum Febre Tertianâ duplici, ne Subintrante quidem, sed vere statis horis Intermitte. Eximius, aliasque memoratus Vir D. Comes Rupertus Fontana anno 1708. cœpit decumbere cum quadam Rheumatis specie in pectore, & faucibus, quam affectionem nomine Gravidinis appellabat, accedente insimul motu quopiam febrili, qui vespertinis horis cum horrore, & frigore, molestaque inter respirandum sensatione invadebat, & mane sudore modico superveniente solvebatur. Post tres, vel quatuor dies cœpit fieri aperte difficilis respiratio, simulque dolor lateris punctorius apparuit satis acerbis hora præsertim ingruentis paroxysmi; tandemq; Pleuritis, saltem Spuria dicta, se prodidit deficiente tantummodo consueta cæteroqui Febris Continuitate: siquidem servabat hæc exactissime typum Tertianæ duplicis, cujus minor accessio superveniebat quidem majori nondum solutæ, sed inter ipsam mitiorem, & subsequentem fortiolem manifesta intercedebat aliquot horarum apyrexia. Quia vero toto paroxysmorum admodum intensorum tempore valde graviter torquebatur Ægrotans, itaut præ nimio dolore lateris, difficili respiratione, & tussi molesta, fere deliquium animi pateretur, implorabat auxilium Corticis, cujus ope a Tertiana duplici Subcontinua, & ad Acutam properante alias convalescerat. At ego renui, non satis credulus remedium hujusmodi in Febre, licet Intermitte, cui conjuncta erat

pectoris inflammatio, & cui forsitan (ut tunc suspicabar) inflammatio ipsa primis diebus latens originem dederat, posse sufficere ad integram curationem, præsertim cum sputum subcruentum copiosum, & ad coctionem tendens, satis procederet. Igitur Ægrum tractavi ut Pleuriticum, non præcise ut Febricitantem tertianarium, & curatio successit ex voto: siquidem circa undecimam morbi diem sudoribus in fine accessionum abunde fluentibus, sputoque insigniter subcruento, & subflavo, copiose pariter per tussim excreto, tum Febris, tum dolor punctorius evanescere; illa quidem prius, iste posterius. Etenim extinctæ Febri aliqua inter respirandum, & screandum tristis sensatio in parte affecta superstes remansit, quæ post aliquot dies ope sputi semper cruenti, semperque copiosi tandem disperiit. In hoc casu ordinatus morbi progressus me non coegit ad usum Corticis, quem tamen Ægro poscente, quotiescunque minus congrue processisset morbus, fortassis obtulissem, licet animo non plane fidenti. Non est tamen ideo, quod improbem conjecturam oppositam, quin potius illam admitto, nempe quod si Corticem obtulissem, non modo statim cessisset Febris, sed & illa temporius sublata, ipsa forsitan facilius evanuisset inflammatio, uti ab eadem Febre non minus probabiliter pendens, atque progenita.

Cæterum quæ data occasione hic lubuit apponere de usu ancipiti Corticis in Febribus Intermitte, Symptomaticis, si quæ sint, vel morbo Comitatis, nil detrahunt, quin potius robur adjiciunt iis, quæ de minima, vel nulla illius activitate adversus Febres Continentes omnes, tam Comitatas, quam Solitarias, tam Symptomaticas, quam Essentiales, loquutus sum, & adhuc expertus loquor: cujus etiam sententiæ sunt omnes præcipui Scriptores (si attente asserta eorum perpendamus) cum moderamine, ac delectu Cortice utentes.

Quod si Mortonus, in administrando Corti-



Cortice plurimum versatus, ubi de illo agit, & de virtute illius Febrifuga, inquit, quod — *Febres Continentes Inflammatoriae, aequae ac Intermittentes hac antidoto penitus absque aliqua recidivatione quotidie evincuntur, ac extinguuntur* (quem Textum de aliqua animositate satis modeste notasse visus est Cl. Nigrifolus) animadvertendum est, ut sequenti Capite fusius dicetur, Mortonum per *Febres Continentes* revera intelligere non Continuas omni alternatione carentes, ut nos cum communiori intelligimus, sed Continuas *Proportionatas*, seu manifeste, ac periodice sese remittentes, ac exacerbantes, quas omnes indiscriminatim, quomodocunque remiserint, ac alternatim recruduerint, Cortice semper (utinam vere semper) sanabiles esse contendit. Hanc limitationem innuit ille in ipsa Praefatione suae *Pyretologiae* ad Lectorem, ubi idem ac supra repetendo, clarius tamen se explicat, inquit — *Febres Continuas Syneches dictas, & quascunque alias sive Inflammatorias, sive Colliquativas, quousque typum suum servant* [ & hic notanda satis explicita conditio typi ] *reapse a Polychresto hoc remedio rite exhibito aequae certo, ac cito ac Intermittentes ipsas fugari.*

Hinc est, quod ex professo considerans Inflammatorias ipsas, *Pleuriticam* nempe, *Scarlatinam*, *Morbillosam*, *Variolosam* &c., quas omnes Cortice quandoque curandas vult, tunc tantum eodem vere curabiles censet (quidquid sit de hujus asserti nimium forsitan late patetis soliditate) cum Continentes, eo quo intelligit modo, fortuito evaserint, & quandiu permanserint tales: hoc est manifestis Exacerbationibus, ac Remissionibus praeditae; secus cum fuerint verae Synochi hisce vicissitudinibus caesae, aut si in quopiam sui cursus stadio constiterint, in quo nondum ulla fuerit, serius tantum, & in alio stadio observanda ratio periodi. Cum enim haec non adfuerit, Febrisque Inflammatoria verae, ac secundum ipsum semper malignae Synochi naturam, & motum

jugiter aequalem praese se tulerit, tunc Corticem nullo pacto posse prodesse, constanter, apertisque literis asseverat — *Febris Synochus* (inquit ille de Febris Continuis in genere) *unam tantum generalem indicationem suppeditat* &c., subditque — *A Cortice Peruviano nihil opis omnino jam expectandum est, donec spiritus antidoti vires regere possint, & a veneno sopiti* (quaelibet namque Febris, ut alias adnotavimus, secundum hunc Auctorem a veneno plus minus activo ortum ducit) *Cardiacis, Alexipharmacis* &c. *exsuscitentur, & muniis suis iterum fungantur.* Quo facto, *Febris genium suum non mutare, & in Synechem Benignam transire non potest, ejusque mutationis specimen exhibere in Exacerbationibus, & Remissionibus periodicis, singulis, vel alternis diebus recurrentibus, & pro ratione victoriae partae, plus minus manifestis.* Et paullo supra — *A gradu veneni* (dixerat) *intensissimo suboritur Febris Synochus, ubi utut initia sub initium cuncta appareant symptomata, quia spiritus primo ictu mortificati, lucta instituenda impares redduntur; Febris tamen plus minus maligna est: spiritibus enim mortificatis, Antidotus febrifuga* [intellige semper Corticem] *nullius est usus, donec Arte vel Natura venenum quadantenus subigatur, & Febris typum Benignae, seu Synechis induere incipiat.* Quod idem etiam repetit, atque confirmat ubi de apparatu Variolarum — *Siquidem* [ait] *Cortex Peruvianus, ubi venenum spirituum vires vel aequet, vel superet* (quod in quaque Febre maligna, ac Synocha accidit) *nihil omnino valet, ut in Exercitatione praecedenti observavimus.*

De Inflammatoriis autem Febris agens, *Pleuritica* nempe, *Scarlatina*, *Morbillosa*, *Variolosa* &c., eas, ut aiebam, non in primo sui cursus stadio, neque unquam dum eundem semper tenorem servant, ut Synochorum mos est, nempe ubi — *Venenam* (ut inquit) *morbificum in statu spirituum depresso, ut in ceteris Malignis Febris, vires Corticis Peruviani, aut alterius cujuscunque Anti-*



*Antidoti specifica spernit*, sed in progressu earundem, fidenter curat eodem Peruviano Cortice, sub hac tamen semper conditione, ac circumstantia, ut videre est ubique apud ipsum, quod Febris jam in Remittentem regulariter, & Recrudescentem degenerarit, & non aliter — *Sin ob reliquias* (subdit ille de Methodo medendi morbillis) *veneni haftenus non subactas Crisis fuerit magis imperfecta, ut in Morbillis malignis, & Epidemiis, indeque Febris Syneches cum Exacerbationibus, & Remissionibus quotidianis conjuncta superstes fuerit, eam incunctanter Cortice Peruviano profligare oportet.* Nec aliter sentit ubicunque Febrem Inflammatoriam, aut etiam non Inflammatoriam, sed simpliciter Continentem (intelligendam tamen suo more, ut supra) Cortice Peruviano curandam proponit.

Verum si liceat super hac re promodulo meæ ingenuitatis aperte loqui, quando Febris Synochus, sive Solitaria illa fuerit, sive Comitata, Inflammatoria &c. ad eum statum devenit [devenit autem rariuscule, cum potius per decrementum insensile solvi consuescat] ut in periodice Remittentem degeneret, tunc sane ex se ipsa facile, ac omnimode solvitur absque adjumento Corticis, quem propterea in tali casu minime præscriberem, nisi diuturnitas Febris, fermentum ordinarium, atque sejunctum Intermittentium accusans, illiusque pertinaciam extincta etiam Inflammatione superstitem ostendens, plane me cogeret, utur idem Mortonus alacrem nobis addat animum universali assertionem, quod — *Quandiu Febris speciem Continentis* [intellige semper Proportionatæ] induerit, spirituum robur superest, quod sufficiat ad vires Antidoti in actum deducendas, cujus exhibitio ad Veneni [intellige semper Fermenti febrilis] reliquias frangendas apprimè necessaria est, Corticis scilicet Peruviani, cujus vires in hac aque certo, & cito efficaces, ac in Intermitte curanda, multo usu, & communi Medicorum consensu comprobantur. Sed de hoc quo-

que, quod aliqua distinctione, ac limitatione videtur indigere, in sequentibus ex professo.

Interim obiter indicare liceat, quod sicuti non facile admittimus id, quod ille agens de Febribus Continuis in genere universaliter adstruit, nempe — *Febrem quamcunque Synochum nunquam posse sanari, donec typum suum mutet, ac fiat Syneches*, sive ut vult, Continua Periodica, quasi possibilis non sit sanatio ullius Synochi in Proportionatam non permutatæ, ita nonnisi difficulter possumus universaliter admittere alterum, quod inquit ipse, nempe, quod quotiescunque eadem Synochus in periodice Remittentem, & Recrudescentem migrat [migrat enim nonnunquam] vires Corticis in ea aque cito, ac certo efficaces sint, ac in Intermitte. Atque id difficilior adhuc admittimus, si Febres hujusmodi a principio jam Continentes, seu Synochi, mox in Continuas Proportionatas conversæ, non Solitariae fuerint, sed vel Variolis, vel Pleuritide, vel alia inflammatione Comitatae. Ita nobiscum sentiunt aperte Sydenhamius, Nigrifolus, & alii — *In Continuis Epidemicis* [inquit Sydenhamius] *debellandis non alios effectus ex ejus* [videlicet Corticis] *usu expectare licet, quam eos, quos hodie in Pleuritide, Peripneumonia, Angina, ac id genus Febribus Inflammatoriis videmus, quibus non tantum non prodest, sed & plane obest.* Nigrifolus vero in Schol. ad Blegnum diversimode sentientem — *Ab ejus, nempe Chinæ Chinæ, usu* [inquit] *in internis inflammationibus abstinere melius semper sum arbitratus, nunquam in internis inflammationibus illam propinare ausus fui; quin parum felici exitu semper ab aliis exhibitam vidi.* Hæc Viri isti experti, licet non desint, qui eam in quibusvis indiscriminatim Continuis, Ardentibus, & Malignis Febribus etiam incipientibus, quin & signate in Pleuritide, ratione ipsius quoque inflammationis, usurpandam contendunt, sed inexperti. Pro officiosa tamen Mortoni excusatione, fas est suspicari, eidem



eidem forsitan crebriusculè contigisse in regione sua, quod non semel mihi anno præsertim 1708. contigit in mea, nempe, quod Febres Inflammatoriæ periodicam simul, & talem præ se tulerint remissionem, ut Intermittentes ipsas æmulari, ne dicam æquare viderentur, ut in casu *Co: Fontana* paullo ante descripto. In quibus sane circumstantiis cum Febris pro Essentiali, atque Primaria sese prodiderit, nec non de natura earum quæ saltem cum Solitariae sunt, Cortice sæpius consuescunt curari, credere non renuo, quin Viro illi animosiori felix sæpiusculè potuerit eventus favere. Facile autem est Homini ex propria industria semel, atque iterum remedio quopiam feliciter utenti, & eventus minus faustos, si qui fuerint, in alias postmodum causas refundenti, a particulari, infrequentius licet repetito bono successu, in universalem credulitatem, & assertionem labi. Quamobrem id saltem dari debere *Mortono* crediderim, forsan & incunctanter concedi, quod si quando contingat [quid enim verat posse contingere in quibusdam aliis Constitutionibus, quod contigit mihi non semel anno 1708.?] Febrem Pleuritide comitatam vere Primariam, & essentialem esse, quemadmodum a pluribus Scriptoribus habetur perpetuo talis, itaut Febris Pleuritidi, non Pleuritis Febri originem dederit, simulque contingat eam febrim esse Periodicam, Subintrantium more, crediderim, inquam, posse concedi, quod tunc non abs re sit, immo sit rationabile China China uti in ipso maxime Morbi principio: neque hæc plane inexpertus loquor; secus vero si Pleuritis sit essentialis, & comitata huiusmodi febris, non Febris comitata Pleuritide: quod attente Juniores animadvertant velim, & forte cum Junioribus etiam Seniores. In propatulo itaque posita quantum interim sat est, *Mortoni* mente, clarius adhuc a nobis develanda uti Auditoris in usu Chinæ Chinæ nimium prodigi a plurimis habiti, satis constat, totam illius liberalitatem in administran-

do Cortice pro curatione Februm Continuarum extendi simpliciter ad Continuas Remittentes, ac Proportionales, tam Comitatas quidem, quam Solitarias, & tam ab ortu, quam ex transmutatione tales, minime vero ad Synochos, seu Continentes veras, nisi quatenus istæ, mutata in progressu natura, & facie, in Proportionatas, seu saltem Remittentes migraverint.

Supereft ergo, ut de istis Proportionatis, ac Remittentibus [quæ tamen postremæ secundum nos considerantur quantum in se ipsis, ut diversæ ab iisdem Proportionalibus] peculiariter agamus, perpendendo, an vere in illis omnibus proficius sit Cortex, ut *Mortonus* videtur asserere, dato quod alicubi per accidens illum non prodesse ratione symptomatum, asseveret. Sed cum negotium istud nec sit facilis, nec contemnendæ indaginis in praxi, immo sit res summi ponderis, & sæpe obvia [cum valde raro occurrat Continua Febris, Putrida dicta, quæ aliqua non polleat sive manifesta, sive obscura, sive ordinata, sive inordinata Exacerbationum, & Remissionum vicissitudine] illius ideo examen plura exigens, & plura comprehendens, in sequens Caput reservabimus, varia circa hoc distinctione processuri. Interea sat fuerit, eas Continuarum species recensuisse, ac seposuisse, in quibus minime proficius Corticem experti credimus. Posito namque ex una parte, quod ille in Continuis Continentibus Primariis, ac Essentialibus tum Solitariis, tum Comitatis, tum Malignis, tum simpliciter Acutis, sicut & in Symptomaticis dictis nequaquam profit, & posito ex alia parte, quod in Intermittentibus omnibus tum Benignis, tum etiam Malignis miranda præstet, etiam si istæ aliquam continuitatem redolere incipiant, haud difficile erit dignoscere, quid statuendum sit de reliquis Febris inter duo hæc extrema constitutis: quippe quo magis ad Intermittentium naturam accedent, eo facilius Cortice curabiles erunt censendæ, dummodo a nullo gravi solidarum partium vitio



virio procedant [quæ, ut diximus, est altera conditio necessario requisita pro utili actione Corticis] quo vero magis accedent ad naturam Continuarum Continentium, seu Synochorum, eo difficilius; cui sane ratiocinio ipsa adamussim, quantum novi, respondet experientia. Jam vero hanc ipsam majorem, & minorem approximationem ad alterutrum ex istis extremis, in reliquis, quæ supersunt examinandæ, Februm speciebus (ne scilicet nos fallat hæc remota nimis, & indeterminata inspectio) quamproxime dimetiamur.

## C A P U T III.

*Explicatur adhuc Mortonus: mox statuitur, Chinam Chinam utilem esse in Febris Continuis per subingressum Paroxysmorum, Subintranibus appellatis; non ita in simpliciter Remittentibus, quarum peculiaris natura describitur. In Remittentibus autem periodice, si-ve Proportionatis, quæ generali Continuarum nomine solent donari, distinguit. Dissensus & hic aliquis a Praxi Mortoni.*

**C**ONVENIT ergo nobiscum, ut vidimus, vel ipse Mortonus, Corticem scilicet nullis Continuis Febris, quæ alterna careant remissione, ac exacerbatione, proficuum experientia dignosci. Discrepantia nostra hucusque sita est in hoc, quod cum ambo has Febres quacunque remissione carentes, Synochos appellemus, ut appellant Scholæ, Ille has ipsas Synochos, non Continentes postea vocat, ut eas vocant Scholæ, sed simpliciter Continuas, dum nos cum iisdem Scholis non Continuas tantum vocamus, sed & Continentes. Ex adverso dum Febres manifesto, ac periodice Remittentes nuncupat Ille Continentes, seu Syneches, nos pariter cum Scholis eas non Continentes dicimus, sed vel Continuas simpliciter, vel Continuas Proportionatas. Sed & alia insuper inter nos est discrepantia, scilicet, quod Ille omnibus Febris Continuis periodum ser-

vantibus, seu quomodolibet etiam Remittentibus (quas parum refert si Continentes appellare velit, vel aliter) asserit Corticem vere prodesse: nos vero id quandoque, & quibusdam facile concedimus, quandoque autem, & in quibusdam aliis, nequaquam. Prima discrepantia consistit in vocibus, quibus explicatis tollitur æquivocatio. Altera consistit in re essentiali, qua explicata, crescet dubio procul dissensus noster, ut in sequentibus.

Sed ad tollendam prius aliam æquivocationem, quæ mea fortasse culpa posset obrepere, ob aliquam novitatem a me invecam sub nomenclatura Remittentis Febris, advertendum est, ut innuebam Cap. I. hujusce Libri, me per Febrem simpliciter Remittentem intelligere speciem Febris ex ordine Continuarum a Proportionata valde diversam, sicuti per Subintransem intelligo speciem Febris ex ordine Intermittentium valde diversam pariter ab eadem Proportionata; adeoque secundum me omnis quidem Proportionata potest dici etiam Remittens, atque quoquo modo Subintrans, quatenus & remissionem necessario subit, & Exacerbationum minime solubium mutuum supervenientiam admittit: sed nec omnis Remittens, nec omnis Subintrans potest dici Proportionata juxta acceptionem meam mox clarius explicandam pro constituenda idea quadam istarum Februm, si non absolute vera quoad Theoriam [neque enim id sustinere ausim, neque ob id cum quoquam dimicare] saltem utili, & congrua quoad Praxim, quantum sit pro Cortice rite administrando, & pro indigitanda vera in iisdem Proportionatis illum offerendi opportunitate.

Quamobrem Februm istarum naturam, & incerta per consequens Ægrotantium

*Fata, si liceat mihi,*

*Fingere arbitrio meo,*

graphicam illarum descriptionem pro modulo mei captus prosequar fidenter ut infra, præmissa interim protestatione, me a multiplici earum subdivisione ad rem nostram



nostram inutili, uti hactenus abstinui, ita & nunc consulto abstinere: esto quod illæ non minus, quam Intermittentes, & Continentes, modo Solitariae sint, modo Comitatae, & tam Colliquativæ, quam Coagulativæ; immo forsan Symptomaticarum sortem subire possint. Malignarum vero characterem præ cæteris tam facile suscipiunt, ut nil facilius; adeoque plurimas saltem, si non omnes, Perniciosarum Intermittentium differentias [præter consuetas Intermittentium vulgarium, quas cum communi indicavimus in divisione, & infra apponemus in Febrium Schemate] haud difficulter sortiuntur; immo veram, & genuinam *Subcontinua* in Malignis Intermittentibus descriptæ naturam referunt. Illud enim rationi valde consensaneum videtur, nempe, Malignas Febres maxima ex parte a fermento Intermittentium cum fermento Continuarum commixto, & valde inæqualiter influente, progigni [quod & agnovisse visi sunt Veteres in descriptione Hemitritæi sæpius maligni, atque lethalis] unde crebræ reduplications, horrores, sensus caloris, & frigoris in eadem parte, aliæque consimiles sensationes, quæ non minus sunt indices exoticæ malignitatis, quam occultæ miscellæ fermenti Febres Intermittentes producentis cum insito Continuarum fermento. Cum itaque consonet probabilitati, ut dicebam, hæc conjectura, Febres nempe *Malignas*, quod adnotat & *Restaurandus*, ab *iisdem causis*, ac *Intermittentes*, magna saltem ex parte, *ortum ducere*, nulla Febris aprior erit malignitati suscipiendæ, quam Febris quælibet Proportionata Continua, præsertim Tertianæ, ut quæ ab utroque enunciato fermento, simul sub varia proportionem commixto, originem trahit. Hinc fortasse memorabile illud, & tritum *Hippocratis* — *Febres quæcunque non intermittentes tertia die fortiores fiunt, iudicium habent difficile*: neque enim ubi major est iudicii difficultas (etiam iudicii medici) quam ubi stat in anticipi, vel in propinquo character malignitatis, ut in Febribus huiusmodi,

præsertim Tertianis. Verum istas proportionatarum diversas habitudines hic examinare non vacat, utpote rem nostram minime alterantes; si enim malignæ illæ sint, si non, parum refert, quantum sit pro suscipienda actione Corticis, dummodo cæteroqui sit locus oblationi opportunæ illius: hoc vero non a præsentia, aut absentia malignitatis, sed a natura fermenti prædominantis, Febremque Proportionatam principaliter producentis, omnino dependet. Hanc unam idcirco inter alias habitudinem lubet perpendere, quæ huiusmodi Febres actioni Corticis suscipiendæ magis, vel minus dispositas, potest ostendere.

Contrahendo itaque huc, quæ alibi sparsim diximus, & posito quod alias firmavimus valde probabiliter, nempe fermentum omnium Febrium suapte natura Continuarum intra massam sanguineam oriri, delitescere, ac exaltari; fermentum vero Intermittentium extra sanguinem gigni, ac commorari ad tempus, & ad tempus in eundem sanguinem periodice influere, sequitur per consequens, quod Febris *Continua Periodica*, seu *Proportionata*, quæ de Continua simpliciter ratione continuitatis, & de Intermittente ratione periodi participat, ex utroque fermento partialiter constituatur. Verum & hic aliqua opus est explicatione, priusquam ulterius procedamus, ne cum hac quasi Hermaphrodita Proportionata *Subintrantem* simpliciter, vel simpliciter *Remittentem* confundamus, sed singulas seorsim minutiori indagine prosequamur, ut cuilibet Quæsito in titulo proposito seorsim pariter, & particulatim satisfiat: quod quidem ut facilius Tyrones valeant percipere, non erit abs re aureum hic *Sylvii* dogma præmittere, quo expresse monemur, *Aliud esse continue febricitare, aliud Febre continua laborare*; Adeoque posse quempiam febricitare quidem assidue, sed tamen per Febres intermittentes sibi invicem supervenientes, quas ideo *Subintrantes* libet appellare.

Per *Subintrantem* igitur Febrem (quæ stricte loquendo Intermittens amplius non



non est, quatenus *Ægereæ* detentus nunquam febrile desinit, cum unus Paroxysmus subintret, priusquam prior plane solvatur) per *Subintrantem*, inquam, intelligo Febrem ex natura sua Intermittentem, & per accidens tantum Continuum; quatenus per accidens est, quod novus Paroxysmus accedat ante perfectam solutionem antecedentis, qui cæteroqui suapte natura perfecte solveretur, si novus serius accederet. Id, quod manifeste cernitur in Tertianis duplicibus, sæpissime Subintrantibus, in quibus cum secunda accessio priori cito supervenit, de more inter ipsam secundam, & tertiam (quæ non tam cito solet succrescere) aliqua intercedit major remissio apyrexia proxima: signum evidens dispositionis naturalis ejusdem Febris, etsi Subintrantis, ad omnimodam solutionem. Et hæc Febris pro Intermittente habenda est, & ut talis curanda Cortice temporibus opportunis, perinde ac si foret pura Intermittens, ut ostendit experientia: nequaquam vero habenda est pro Proportionali, nisi tractu temporis unus Paroxysmus ita urgeat alterum, ut resistente in quolibet accessu notabili portione Fermenti febrilis minime subacti intra massam sanguineam, stabile quoddam exinde gignatur intra ipsum sanguinem febrile fermentum, ex supradictis portionibus fermenti extranei, & ex impuritatibus in ipso cruore præexistentibus coagmentatum, quod constituat inibi saltem per accidens radicem Febris Continuæ; cui sane si novus rursus accedat, ut assolet, fermenti extranei influxus, Febris, quæ a principio fuit mere Subintrans, per accidens saltem, intestina metamorphosi in Proportionatam migrabit. Dupliciter igitur considerari potest Febris Subintrans, scilicet vel quando talis est, quia unus Paroxysmus supervenit alteri prope solutionem esistenti; & in tali casu Febris hujusmodi ex quasi pura Communicans, quæ quandiu sic perseverat, veræ Intermittenti æquiparanda est in omnibus, & præsertim in usu Corticis: vel quando talis est, quia unus Paroxysmus cor-

ripit alterum a sua adhuc solutione distantem; & in hoc casu Febris Subintrans ad Continuum Proportionatam vergit, ac in eam facile transmutatur. Sed per hoc non fit, quin sit adhuc mera Subintrans, & quin, usquequo talis est, obediat Cortici, cui etiam ut plurimum cedere consuevit, statim ac in Proportionatam cessit, si ille tempestive fuerit exhibitus, priusquam scilicet Febris nova metamorphosi de Proportionata in simpliciter Remittentem transferit.

Per *Remittentem* autem simpliciter [quæ stricte loquendo Continens vere non est, cum aliquibus polleat interdum incrementi, & decrementi notis] ex adverso intelligo Febrem suapte natura Continentem, remittentem tantum per accidens, seu, ut ita dicam, Continentem *Spuriam*. Memet explicio. Raro visitur in praxi Febris Continua, quæ vel in eodem semper tenore perseveret, vel semper crescat, vel semper decrescat, qualis est Synochus Acmaistica, Epacmaistica, & Paracmaistica, sæpissime observantur Febres, quæ licet ab intensione sua non multum unquam recedant, aliquibus tamen horis, ut plurimum incertis, & modo diurnis, modo nocturnis, modo matutinis, modo pomeridianis, aut vespertinis, alicujus incalescentiæ, ut & alicujus nonnunquam refrigerii notas obscure præferunt; id quod potius dignoscitur postquam contigit, & *in facto esse* (sic venia rancidis veterum Scholarum terminis, rem tamen satis exprimentibus) quam dum efficitur, seu *in fieri*. Hoc autem non procedit ex influxu fermenti Intermittentium proprii, sed potius vel ex inæqualitate fermenti Continuarum insiti, cujus materia summe inæqualis esse potest, & inæqualem propterea fermentationem, aut effervescentiam inducere, vel ex influxu novi Chyli, novi scilicet cibi, ac novi potus, per alterata stomachi fermenta, & per vitiosos succos præterlabentis, ac Cruori ab intrinseco conspurcato, atque effervescenti, veluti novus hospes, se se immiscen-

tis,



tis, novaeque proinde, sed obscuriores turbas excitantis, ut in ipsa Hectica simplici fieri observamus tribus, vel quatuor horis a pastu, itemque in Febribus Inflammatoriis Pleuriticorum, aliorumque, Cortice de more, ut dicemus, non curabilibus. Vix enim possibile est, quod quidquid sive alimentale, sive medicamentosum, sive comestibile, sive sorbile, sive potulentum ingeritur ab Aegro Febrem Continuum patiente, aliquam in adventu suo, vel in sua digestionem, aut subactionem alterationem in effervescentibus jam fluidis non producat, concurrente insimul varia rerum non naturalium, ut vocant, habitudine; sicut vix possibile est, ut rebus iisdem postmodum subactis aliqua in iisdem fluidis non succedat tranquillitas. Quod si in Synochis veris, atque legitimis id non contingit saltem sensibilibus, ut in illis adfit eadem novi cibi, novique potus assumptio, aequaliterque concurrat varia rerum omnium non naturalium dispositio, ac usus, hoc fit, quia in illis tanta est, tamque valida sanguinis effervescencia, ut quidquid de novo accedit, sit parum sensibile, paucamque, aut nullam sensibilem mutationem inducat, cum potius a praexistente tumultu absorbeatur, ac secum rapiatur confusum, & inconspicuum. Sic aqua turbidi fluminis inconspicua est in Mari aestuante: non ita in eodem minus procelloso. Status autem sanguinis in Continua Remittente longe minus estuofus est, quam in Synocha; aestum tamen suum qualemcumque habet ab intrinseco, & quod novi habet ab extrinseco, siquid habet, recipit a rebus externis; non a fermento Intermittentium: adeoque Febris Remittens, qualis a nobis intelligitur, de genere Continuarum est in radice, & a fermento illarum viribus Corticis inexpugnabili originem suam agnoscit; unde & ipsa virtuti ejusdem Corticis refractaria censenda est, ut usus me docuit.

Jamque videor mihi, circumscribendo confinia Subintrantium, & Remittentium, naturam *Proportionatarum*

adumbrasse. Istae namque & fixam quandam Continuitatem habent, quam non habent regulariter merae *Subintrantes*, & claram quandam periodi rationem obtinent, quam non obtinent simpliciter *Remittentes*. Proportionatae siquidem habent hoc perpetuum, ut cum continuitate non levi distincta plus quidem, ac minus habeant periodi indicia, eaque ordine certo, sive quotidie, sive alternis diebus, sive per majora intervalla, & sive cum anticipatione, sive cum postpositione ut plurimum regulari recurrentia, ut Periodicarum Intermittentium mos est. Immo cum saepissime referant typum Tertianae duplicis, manifestus in illis est ejusdem character ob alternam similitudinem exacerbationum, quae fiunt diebus imparibus, & dissimilitudinem ab iis, quae diebus paribus accidunt, quatenus videlicet una die major, altera minor, una citior, altera tardior est Exacerbatio, & sic alternatim; ut proinde dubitandum minime videatur, quin ad Proportionatam gignendam [ & haec tandem est summa rei ] concurrat tum prava sanguinis dispositio ad aestuandum assidue ex principio, seu fermento intrinseco, ut de Continuis dictum est, tum novus adventus alterius fermenti recenter, ac periodicè aliunde influentis, ut de Intermittentibus.

Quia vero ex una parte uni fermento extinguendo, aut corrigendo par est Peruvianus Cortex, alteri vero non: & ex alia parte inaequalis esse potest in Proportionata hujusmodi fermentorum concursus, sive commixtio, adeo ut modo fortius sit fermentum continuitatem producens, modo fermentum producens periodum, unumque eorum in ea Febre teneat locum principii essentialis, alterum accidentalis; idcirco eam Proportionatam Cortice curabilem dico, cui est essentialis periodus, & accidentalis continuïtas, non sic eam, cui essentialis est continuïtas, & accidentalis periodus, seu [ ne videar distinctionibus metaphysicis rem practicam implicare, ac involuere ] eam magis, quae natu-  
ram



ram *Subintrantis* redolet, quam quæ redolet naturam simpliciter *Remittentis*, seu denique illam, quæ phænomenis omnibus inter se collatis, talis apparet intellectui practice judicanti, ut si eidem demi posset ea mali portio, quam infert noviter recurrens exacerbatio, ipsa probabiliter portio præexistens, ac exacerbationem patiens, sponte evanesceret; secus si appareat talis, ut etiam si dematur eidem quidquid mali noviter accedit ex ipsa exacerbatione, adhuc tamen remansura videatur superstes, fixa, & pertinax ea mali portio, quæ durabilem, & stabilem Febris continuitatem valeat conservare. Hanc distinctionem a posteriori me docuit usus ipse Chinæ Chinæ, & varius pro varia istius Febris ratione inde observatus effectus. Id quidem dignoscere a priori non ita facile; sed neque tam difficile, quin credam, eum, qui omnibus rite pensitatis practica quadam securitate ipsum non novit, saltem ut plurimum nomen boni, ac experti Medici nequaquam mereri.

Approximatio igitur major, vel minor ad alterutram ex recensitis speciebus, *Subintrantis* nempe, vel *Remittentis* tantummodo Febris, haud difficulter a perito Medico dignoscetur in praxi, licet nulla mensura certa hujusce rei possit constitui, sed pendeat quammaxime a judicio, & peritia ipsius Artificis. Siqua tamen saltem generalis potest indicari Tyronibus, ea est hujusmodi, nempe quod, quo clarior est, manifestior, & in suo typo magis regularis periodus, eo certior est effectus, ac usus Corticis, quia tunc Febris præfert magis naturam *Intermittentis Subintrantis*, quam *Continuæ Remittentis*: adeoque si exacerbationes sibi invicem respondeant typo periodicarum *Intermittentium* vero, & proprio, ipsaque exacerbatio non per meram incalescentiam se prodatur, somnolentiam, capitis dolorem, aut gravitatem, vel per quandam pulsus elevationem, atque turgentiam sensim obrepentem, & potius *in facto esse*, quam *in fieri* conspicuam, *Terti Therap. Spec.*

sed per motum aliquem adstantibus ipsis sensibilem, ac observabilem, nempe vel per frigus aliquod, utut breve, ac leve, extremorum, aut nasi, vel per horrorem, aut horripilationem aliquam, per unguium livorem, per oscitationem, aut pandiculationem, per internam quandam sensationem, auræ alicujus æmulam, uno verbo; per motionem aliquam motibus *Intermittentium* analogam, quæ introductionem fermenti per lacteas accuset (quod & confirmare potest aliqua simul incidens vomituritio, vel nausea) in tali casu Cortex fidenter, cæteris illum coindicantibus, poterit exhiberi; secus, vel nonnisi cunctanter, si notæ febriles sint potius in linea caloris, quam frigoris, ut supra, & eo minus si obscuriores illæ sint, aut irregulariter valde contigant fere in morem *Simplicis Remittentis*. Et hæc pro diagnosi desumenda ab ipsa Exacerbationum invasione.

Sed & alia signa nobis præbet ipsa *Remissio*, siquidem remissio *Proportionatæ* ad *Subintrantem* accedentis typum periodorum sæpe exprimit clarius, ac ipsa invasio. Posito enim, quod Febris habeat proportionem *Tertianæ* duplicis, etiam si una die v. gr. post potiorem exacerbationem remissio sit obscurior propter celerem supervenientiam minoris exacerbationis; attamen altera die post istam, nempe minorem, clarior apparere solet remissio ante supervenientiam tertiæ fortioris; & hac proportionem procedunt reliquæ. Quare ista vicissitudo alterna remissionis majoris, atque minoris, est index *Circuitus Subintrantium* proprii; & ideo in hujusmodi remissione sensibiliore conspicua est pulsus tranquillitas non modo respectively ad statum ipsius exacerbationis, verum etiam respectively ad tempus ipsum exacerbationem postremam antecedens, calor ad tactum blandus est, aut parum mordax, apparetque aliqua, utut imperfecta sudoris, aut urinæ copiosioris excretio. *Remissio* autem *Proportionatæ* accedentis ad simplicem *Remittentem* non habet eam, quam diximus,



correlativam inæqualitatem, sed æque obscura est una, ac altera die, pulsus non minus tumultuat post, ac ante ipsam, quæcunque illa sit, exacerbationem; unde parvi momenti est talis remissio, quæ vix apparet habito etiam ad statum exacerbationis respectu: calor siquidem adhuc sensibilibiter tactum ferit, nec ulla conspicua visitur urinæ immutatio, ullumve laudabilis diaphoresis rudimentum.

Dixi, Corticem in postremis hisce circumstantiis non nisi cunctanter exhibendum videri; experientia enim ostendit, id sæpiuscule contingere, si ille tunc offeratur, quod paullo ante innuebam, nempe quod, etiamsi per illius oblationem tollatur motus periodi, non tamen tollitur continuïtas, quæ illi viget superstes; ex quo patet, illiusmodi Febri vere essentialē esse continuïtatem, accidentalem vero periodum; illi namque, etiamsi non associaretur periodus illa qualiscunque, adhuc tamen tenaciter adhæreret ipsa continuïtas. Quod si offeratur Cortex in circumstantiis primo loco recensitis, non modo tollitur per eum periodus, verum & paullo post aboletur consequentione quadam ipsa continuïtas in huiusmodi Febre imbecilliter vicens, vel in eam suapte natura periodicam, quasi per accidens introducta.

Insuper non parum confert ad diagnosim Proportionatæ Corticem respuentis, vel admittentis, varium tempus exortus illius, variaque ipsius quocunque tempore nascentis origo. Quoad primum distinguere oportet inter Continuas Proportionatas, quæ Æstate, mediisque temporibus, & eas, quæ Hyeme solent generari. Quæ enim hyberno tempore regnant [regnant autem frequentius, quam tempore fervidiori Febres Continuæ Proportionatæ] de more graviores sunt, faciliusque de simpliciter Remittentium natura prædominante participant, quam quæ regnant Æstate, Vere, aut etiam Autumno, quibus temporibus ex Intermittentium Subintrantium radice solent assurgere; immo ausim dicere, Febres omnes Conti-

nuas Proportionatas Hyeme ortas, non alias esse, quam eas, quæ Æstate sunt Intermittentes, aut tantummodo Subintrantes. Omnis enim earum diversitas videtur consistere in hoc, quod Hyeme sanguis in sua compage strictior, & ob impeditam transpirationem aptior ab intrinseco ad fermentescendum febriliter, eo ipso, quod inficitur fermento extraneo Febrium Intermittentium auctore (quod fermentum tunc temporis inertius est, minusque activum) ab eodem non aliud ferme recipit, nisi primam occasionem effervescendi, periodicè repetitam; sed a se ipso, suoque expensu, nempe ab ipsa intima dispositione sua abunde habet, unde susceptam effervescētiā conservet jugiter, ac ultra protrahat, fermento videlicet infuso supra fermentum extraneum præpollente, illudque secum rapiente, & in propriam naturam transmutante. Oppositum plane solet succedere, saltem ut plurimum, Æstivo tempore; tunc enim laxior reddita sanguinis compages, liberaque gaudens transpiratione, & depuratione universali, minus disposita est, quantum ex principiis intrinsecis, ad febriendum tenaciter, & assidue; adeoque etiamsi aliqua in eodem degat impuritas, quæ Febrem sit potius inducere, ea tamen levior est, aut citius, faciliusve dissipabilis ac Hyeme. Quamobrem etsi accedat illi de novo Fermentum febrile extraneum, quod tunc temporis activius est, fortius, atque vehementius; non propterea transit illud in naturam fermenti præexistentis, sed illud superat, ac secum rapit, & dispositionem sanguinis intrinsecam qualemcunque ad febriendum assidue, convertit in dispositionem ad febriendum periodicè, seu ad defæcandum periodica effervescētia ab intestinis inquinamentis se ipsum. Et propterea, universaliter loquendo, tempestatibus fervidioribus Continuæ Proportionatæ feliciter curantur Cortice, quam rigidioribus, ut Hyeme, propter maiorem earum approximationem ad Subintrantes illis tempestatibus, & ad meras Remittentes his aliis. Et hæc quoad  
varium



varium tempus originis ipsarum Proportionatarum.

Quò verò ad variam ipsam illarum originem distinguere pariter oportet inter Continuum Proportionatam, quæ talis orta est, vel orta est simpliciter Remittens, & eam, quæ orta est Intermit-tens. In primis casibus maxima est conjectura, quod Febris pendeat a fermento Febrim essentialiter Continuum producente: in secundo casu altera opposita emergit conjectura, quod Febris orta Intermit-tens suum adhuc nativum characterem in radice servet, etiamsi fiat Continua, adeoque Cortici etiam-num possit se ipsam submittere, ut adnotat Sydenham, dum inquit [ siquidem fas sit textum alias relatum hic opportune repetere ] — *Cum autem Febres quædam apud nos grassentur, quæ etsi post secundum, tertiumve paroxysmum reponere se in classem Continuarum nitantur, tamen ad Intermit-tentes debeant referri* [ en hic quid sit in praxi Continuitas accidentalis ] *nulla mihi religio est, Corticem in Continuis huiusmodi sumendum proponere, qui dicto more ( videlicet ad scrup. ij. quarta quaque hora ) iteratus, ad apyrexiam certo Ægrum perducet.* In his itaque casibus, & circumstantiis, etiamsi periodus valde obscura sit, & confusa, nihilominus sæpe exhibetur Cortex cum certitudine eventus majore, ac exhibeatur in casu, ubi Febris fuit ab ortu Continua, etiamsi postmodum manifestiores nonnihil habeat periodos. Si tamen eas acquirat manifestissimas, tunc in Subintrantis naturam migrat, & fidenter Cortice tractanda est: sicuti contra, quamvis incæperit Intermit-tens, eo ipso, quod omnem jam periodi motum amiserit, atque in Continentis omnino, nedum Remittentis naturam transferit, inutilis solet esse Cortex; quoniam tunc fermento extraneo in sanguinem influenti prævalet jam fermentum in ipso sanguine præexistens, & data occasione suscitatum, demumque ex portionibus simul resistentibus extranei non subacti valide coagmentatum, ac ibidem permanenter vigen.

Et hæc est ratio, propter quam agentes de Subcontinua Maligna ( quæ cum Proportionata primo coincidit, mox etiam cum Continente, ut in Arbore infra posita ) fuimus adeo solliciti, quærentes anxie, utrum in illius præcipiti tendentia ad Febrim essentialiter Continuum, liceret in ipso principio Corticem exhibere, ne scilicet præterlaberetur occasio præceps, & sæpius irrevocabilis. Attente siquidem considerandum est punctum istius metamorphoseos, citra quod utilis, & ultra quod inutilis esse consuevit oblatio Corticis — *Cum enim* ( inquit egregie Experientissimus Mortonus de Febribus Continuis in genere ) *eadem ipsa Febris brevi temporis spatio genium suum sæpius mutare soleat, Medici interest varias metamorphoses, quas eadem Febris subit, animadvertere, ut inde tanquam Cynosura ductus, non temerario, & more Empiricorum Febres omnigenas, vel eandem ipsam in diversis suis stadiis heu quantum! mutatam, una methodo absque discrimine tractet.*

Punctum autem istud, seu linea hæc dirimens in Proportionata unum fermentum ab alio, & unam Febris naturam ab alia, exprimitur in citato Stipite nostro ea paritate, qua surculus medius insertus in Arbore physica, duorum generum poma ferente, mixti cujusdam generis edit poma, modo de uno, modo de altero magis vel minus participantia, prout magis vel minus ipse participat de succo nutritio unius, aut alterius lateralis rami, in ipsum medium influente.

Verum non est, cur similitudinem a Vegetabilibus emendicemus, cum in promptu sit doctrina Veterum in subiecta materia. Sit pro omnibus Daniel Sennertus, ut qui omnium Prædecessorum vota collegit. Hic verba faciens de Febribus Nothis, eas licet a duobus humoribus mixtis productas velit, non tamen Compositas vocat, sed Simples, sive incompositas, quippe ab intima duorum in unum coalescentium mixtione indivisibiliter procedentes. Sunt hæc illius verba — *Febres Nothæ non sunt compositæ:*



*positæ: nam licet Notha Febris ex duobus humoribus eodem loco, & tempore putrescentibus [hanc quæso putredinem lubeat benignius interpretari] oriri possit, ita tamen illi duo humores sunt mixti, ut unum mixtum constituent, & una forma contineantur: unde etiam cummixtus ille, & ex duobus aggregatus humor putrescit, simplex Febris est, mixtam tamen, ac mediam naturam quasi referens. Quidni ergo Notham vocemus nos Febrem Proportionatam, ex Continua, & Intermittente, sive ex utriusque succo radicali simul commixto progenitam? Quæ ergo unum tantum succum infringit China China, Febrem tantum ab eo principaliter succo prodeuntem, ut ut de utroque participantem, valet deprimere, non vero prodeuntem principaliter ab altero succo, quantunvis similem.*

Quod si quis quærat, quibus regulis sit procedendum circa Corticis administrationem in iis Proportionatis, quæ Solitariae non sunt, sed vel Symptomaticæ, vel Comitatae, respondeo: rationem Febris Symptomaticæ sicuti facilius forsan potest competere Proportionatis, quam Intermittentibus [siquidem istæ queant esse Symptomaticæ] ita ex adverso reddere illas curatu difficiliore, quam istas, etsi Proportionatæ quoque sint naturæ cæteroqui Cortice medicabilis. Idque ob duplicem rationem, nempe & ob vitium, a quo pendent, tali remedio, ut reor, insuperabile, & propter adjunctam periodo Continuitatem, quæ grave quidpiam ulterius est, ab eodem remedio superandum. Si vero Quæsitum restringatur ad Proportionatas Comitatas, responsio est, quod si Febris huiusmodi sit Comitata mero symptomate, ut ut gravi, & novum morbum simulante, hoc non obstat, quominus curetur Cortice; dummodo in illa prævaleat natura fermenti Subintrantium proprii, concurrantque conditiones pro recto usu Corticis requisitæ, ut supra est explicarum. Sed si sit Comitata morbo vero, ipsa autem ex se videatur Corticem admittere, adhuc nonnisi cum summa incertitudine optati successus il-

le poterit exhiberi tum ratione continuitatis supra periodum adjunctæ, tum maxime ratione morbi connexi, v. gr. *Inflammationis, Erysipelatis &c.*, qui morbus, licet ab ipsa Febre in facta suppositione progenitus, suas tamen, ut alibi dictum, potest jecisse in affecta parte radices, quibus se solo valeat subsistere, immo Febrem inde Symptomaticam gignere, sola interim periodo inutiliter sublata, siquidem ullo pacto in huiusmodi circumstantiis possit hæc submoveri.

Quod si morbus Febri associatus plane organicus fuerit cum læsione insigni, satis notum est, hunc reddere Cortici refractarias vel ipsas Intermittentes, nedum Continuas Proportionatas, quarum nonnullæ etiam Solitariae huic remedio nonnunquam non cedunt, ut diximus, si nempe de natura simpliciter Remittentium a prædominio participant, multoque minus cedunt, si vere sint Remittentes simpliciter, aut si in ipsas jam prorsus degeneraverint.

Et hic assentiri plane non possumus *Cl. Morton* Remittentes omnes, sive omnes non Synochos [data etiam eidem illarum distinctione in Legitimas, & Spurias] assignanti pro objecto actionis Corticis. Nos enim, licet æque ac *Mortonus*, ne dicam amplius, admittamus ut Cortice curabiles non modo eas Remittentes Proportionatas, quas ipse vocat *Legitimas*, seu *Simplices*, quæque vere sunt de natura Subintrantium, verum etiam multoties eas, quas vocat *Spurias*, seu *Mixtas*, quæque Malignarum, seu Perniciosarum characterem proxime induunt, quatenus Intermittentium ad instar Comitatae sunt uno, vel multiplici verendo symptomate, dummodo tamen in illis prævaleat fermentum Subintrantium, seu (quod idem est) Intermittentium, eo, quo explicuimus, modo: nihilominus, hac conditione deficiente, ab objecto activitatis ejusdem Corticis excipimus non modo Remittentes simpliciter a nobis dictas, verum etiam plurimas ex Proportionatis descriptis, ut supra, sive Malignæ illæ fuerint,



fuerint, five non, eas videlicet, quarum fomes magis sit intra sanguinem, quam extra illum.

Certe, si attendantur probe scripta *Mortoni*, & quæ candide prostant in illius historiis, facile constabit, quod ubi Cortex aliquando munus suum non exegit (ut alicubi ingenue faterur) in Febribus scilicet, quas ipse *Mixtas* appellat, quæque cum nostris vel simpliciter Remittentibus, vel Proportionatis quidem, sed de simplici Remittente maxime participantibus, plane coincidunt, Febris revera talis erat, qualis a nobis descripta est, plus scilicet de Continua essentiali, licet quoquo modo Remittente, quam de Intermittente Subintrante participans. Atque hinc mirum non est, si eo casu cogitur concedere, se haud raro sortem ceterorum Medicorum participasse, & restitutionem elasticitatis spirituum in quibusdam Remittentibus Febribus, facile in Synochos degenerantibus, Cortice quamvis adhibito, sepe incerto, sepe incassum tentasse.

Ex alia parte, ubi in iisdem Febribus *Mixtis*, seu *Spuriis*, ut vocat (vocat autem *Mixtas* in sensu valde diverso a sensu nostro) ubi, inquam, in iisdem Febribus eventum felicem sortitus est, & Cortici, nec forsan immerito, gloriam tribuit, non raro tardiusculus, ut pariter faterur pluribus in locis, & non nihil difficilis fuit effectus, protracta videlicet ad consuetum tempus morbi judicatione. At bona venia tanti Viti tarda operatio Corticis copiose administrati mihi, ut alibi fassus sum, redditur suspecta non quidem de noxa, sed tantum de incertitudine, an illi ascribenda vere sit gloria, nec ne. Sed interim praxis illius felix id attulit certi, ut Cortice tuto possimus uti etiam in casibus ambiguis de effectu remedii, idque simul attulit utilitatis, ut maiore fiducia posthac liceat Peruvianum Corticem effectis Confectionibus Cardiacis identidem substituere, ne dicam ob metum sagillationis antepondere. Anteponendus autem procul dubio foret, si quæ Au-

*Torti Therap. Spec.*

ctor iste se observasse refert in Febribus de Proportionatis in Synochos malignas degenerantibus, velimus attendere, a quibus scilicet plures ex iis evasisse inquit, licet exacto tantum consueto morbi stadio, quibus Cortex ab initio fuerat oblatus, quam quibus oblatus non fuerat — *Palam autem affirmo* (inquit ille) *me multo plures huiusmodi agrotantes, Deliriis, Subsultibus Tendinum, ceterisque id genus Symptomatis Malignis obsessos ab Orci faucibus Arte liberasse, ubi Antidoti usus curationem aspiciabatur, quam cum ab initio alia quacunque Methodo uterer: modo cum accersitus primo essem, umbra aliqua Remissionum, & Exacerbationum superesset. Fundamentum curationis in Cortice semper jacio. Postea pro modulo ingenii, juxta normam Artis, quod a Symptomatis indicatur, efficio, atque haud raro cum optato successu curationem ad umbilicum duco.* Hæc Auctor ille, qui licet utilitatem remedii fortasse per hæc (me quoque iudice) haud satis probet, illius tamen innocentiam in his quoque casibus videtur saltem sufficienter testari. Cætera, si qua sunt in ejus praxi, quæ aliqua castigatione indigere videantur, ea potius illius hypothese, quam ipsi Praxi satis methodicæ adscribenda sunt, & condonanda. Sed & eadem quoque hypothesis, seu Februm Ætiologia, etsi nobis nec arriserit in antea, neque arrideat modo, suis tamen non caret fundamentis, quoad plura solidis, plausibilibus, nec universim contemnendis, ut videre est apud eundem *Mortonum* in *Apparatu Curationis Morborum universalium*, ubi nonnullas etiam ex iis, quas in Scholiis ad ipsum *Lib. II.* protulimus, sibi metipsum opponit, & solvere satagit objectiones.

Ex qualicunque autem nostro in praxi dissensu contra facilis resultat conciliatio quædam tot contrariarum assertionum, quæ apud Scriptores minus exactos in hac materia passim occurrunt. Ajunt siquidem nonnulli, Corticem curare, præter Intermittentes, Febres quoque Continuas, atque Malignas, & ali-



qui non. Utrique recte, utrique minus recte; utraque etenim propositio de aliquibus Continuis, atque etiam Malignis vera est, de aliquibus falsa: quandoquidem juxta distinctionem nostram curat Continuas, necnon Malignas aliquas, & aliquas non curat; non vero curat omnes, aut curat nullas.

#### C A P U T IV.

*Allata nuperrime distinctio de Cortice in quibusdam Proportionatis utili, & in quibusdam inutili, illustratur quoad hanc postremam partem (de prima enim jam satis alias) nonnullis exemplis.*

**E**XEMPLA curationum Februm Continuarum Proportionatarum, quas Cortex ad bonam frugem reduxit, plura retulimus, ubi *Subcontinuarum* etiam Malignantium, quæ non aliæ sunt ab his, *Historias* descripsimus, quibus illustrata jam sufficienter est ea pars nostræ distinctionis, quæ stat pro Corticis oblatione; quandoquidem in illis casibus Februm continuas erat per accidens introducta, & superaddita præexistenti periodo. Modo casus aliquot lubet describere, ubi in Proportionatis continuas tatem essentialem cum accidentali tantum periodo sortitis, Corticis inefficaciam datum fuit experiri.

I. Corripiebatur in medio cursu prosperæ valetudinis *D. Comitissa Hyppolita de Savignanis Scappinella* Febre Tertiana duplici Continua, quæ inter Proportionatas est omnium frequentissima. Causæ procathartice Febris hujusmodi plurimæ fuerunt tum in ratione victus, tum in violenta corporis exercitatione. Illius Exacerbationes, licet regulares, parum tamen conspicuæ erant in invasione, quæ sine ullo sensu frigoris, immo potius cum levi aliqua incallescencia paulatim obrepente fiebat, tantumque sensibilis circa statum erat ipsa exacerbatio, quemadmodum transacto vigore notabilis erat ejusdem remissio. Uti plethorica tractata est ab initio,

semperque methodice in morbi progressu hujusmodi *Ægrotans*, quo toto tempore, spei ancipitis, atque metus identidem signa prodebat. In decursu morbi institit amantissimus Conjux exhiberi Corticem, memor, quod eadem ex Tertiana duplici Subintrante, immo Subcontinua acutiem veram acquirente, ope ejusdem Corticis, ipsoque tunc etiam suadente, ante biennium evaserat, sorte, qua diximus. Non ego assensum præbui, respondens: Febrem hanc dubio procul excedere vires Corticis, neque me velle subire censuram vulgi, si citra successum, etiamsi citra noxam, illum exhiberem. Acquievit ille dictis meis, maxime cum spoponderim, me non prætermisurum occasionem, si quando eadem apparuisset. Vix transacta decimaquarta morbi die, reddito nonnihil manifestiore Exacerbationum motu, sed & insimul gravioribus factis symptomatis, & cessante, quod antea apparuerat, sudoris universalis rudimento, Capiteque demum satis gravato, cœpi timere, ne muneri meo deessem, si Corticem omitterem jam mihi propositum a Conjuge, & a clariore aliquantulum Febris periodo indicatum, in circumstantiis crescentis periculi, & Naturæ feriantis ab omni motu critico. Sed ne subirem calumniam in casu carentiæ fausti successus, quoniam Febris ab ortu visa erat essentialiter Continua, Chinam Chinam præscripti sub forma boli cardiaci, mane, & sero sumendam. Duravit usus illius ad aliquot dies; sed æque perseveravit Febris de more increbrescens. Cognito invalido Cortice, usu illius abstinui, curationem aliis remediis pro varia morbi indicatione prosequutus; sed frustra: mille namque supervenientibus diris symptomatis, videlicet suppressione urinæ, nonnisi assidua ope catheteris per plures dies extractæ, & gangrænis hinc inde subortis, aliisque superadditis cruciatibus, die tandem morbi xxvii. obiit.

II. *D. Lucretia de Sigoniis Agnana*, post contractum ex numerosis gestationibus, & ex frequentibus abortionibus, suc-



successivisq; hæmorrhagiis, habitum corporis subtumidum, & decorem, præter morem suæ floridæ constitutionis, immo post superatam non multo ante acutam ægritudinem, a qua vix cœperat mediocriter resurgere, recidit iterum in Febrē Tertianā Continuā duplicem, exacerbationes inæquales, & plane inordinatas habentem, ac inconspicue cum quodam tantummodo sensu caloris, & vomituritione irregulari recurrentes, exiguamque simul, ac pariter irregularem remissionem sortitas; adeo potius mera Remittens, quam vera Proportionata dici posset hujusmodi Febris. Omni, qua datum fuit, arte, cautela, & industria curata fuit. Seriem remedium hic persequi, & indicationes eorum, foret inutile. Sat sit pro re nostra referre, quod post varias ambages, & plura exantlata Vitæ pericula, a die morbi undecimo usque ad decimumseptimum Febris tandem, Continua licet, cœpit ad notabilem remissionem redigi, & typo Tertianæ duplicis, uno die gravioris, altero levioris, perspicue distingui: quodque magis est notatū dignum, Exacerbatio ipsa, præsertim validior, aliquo frigore signabatur in morem Accessionis Intermittentis. Per tres Circuitus completos, nempe per dies quinque hunc motum observavi, nec tamen Corticem præscripsi: immo Conjugi, qui alias eodem remedio convaleverat, illum proponenti primis diebus obstiti, sperans vigesima prima die, si non solutionem morbi, saltem permutationem in melius. Sed res aliter cessit; tertia siquidem fortior Exacerbatio, ut ut suo frigore, levi quidem, ac horrore insignita, ferocem se prodidit in statu, & Ægrotantem male vexavit. Quamobrem transacto jam tertio septenario, & rebus, meliore licet facie quoad speciem, in pejus tamen ruentibus quoad rem ipsam, Conjugi filiis onusto morem gerendum duxi, prompta Corticis præscriptione. Peractum est id partitis vicibus, & dosi medica, sed quæ Febrē debuerat sistere: attamen jugiter perseveravit, iisdem pertinaciter recurrenti-

bus, obscuriore licet motu, Exacerbationibus; quare cum inanem experirer Corticis operam, postquam in ejus usu sufficienter perstiti, ab eodem feriatum, ad consueta iterum remedia revertens. Cum vero nulla proficerent, vocatus est in consilium D. quoque Davinius, Ægra tamen ad extremum prope redacta. Is viso gravissimo Ægræ statu, & intellecta morbi serie, ultimisque periodi Febrilis motibus, neque conscius de China China oblata [oblatus siquidem fueram in tumultuaria, & inutili Consultatione, de hoc remedio inter tot alia distinctam mentionem facere] ad me conversus, dum egrediebamur domo Ægrotantis, quam solo fere prognostico dereliquimus, dixit: parum abuisse, quin proposuerit usum Chinæ Chinæ, atque tantummodo abstinuisse, eo quia a me in illius oblationem proclivi, nullam de ea mentionem factam fuisse observarat ne per modum quidem dubitationis, cum tamen cæteroqui remedium tentari posse videretur, nisi Ægra jam foret suo Fato propinqua. Narra vi propterea, quæ immemor subticueram, quæque incassum tentaveram, refundens omnem culpam in ipsam naturam Febris ab ortu Continuæ. Suspiciatus tamen sum insuper de aliquo Uteri vitio organico, sive alterius Visceris infimi Ventris, puta, Pancreatis, aut aliarum Glandularum Mesenterii; sed hujusce suspicionis non nisi remota indicia, nulla vero proxima, aut immediata mihi præluxerant. Vixit illa per duos adhuc, vel tres dies, irritisque omnibus, quæ administrare licuit, remediis, die morbi xxxiii. desit vivere.

III. Clarius adhuc inefficaciam Corticis in Febribus Continuis ab ortu, & per accidens periodicis, patefaciet sequens casus, cujus compendiarie quidem, sed per singulos dies disposita series hic exhibetur. Egregius, Clarusque Adolescens D. Antonius de Roncaleis æstate anni 1709. correptus est Febre, quæ cum nullo rigore, aut frigore illum invasit. Habita est pro Ephemera, ut quæ post 24. horas plurimum remi-



fit; sed paullopost, secunda nempe die, circa vespertas iterum recrudit pariter sine frigore, sed cum vomitu, & stomachi angore, Tertianæ incipientis ad instar, & per dies pares sese moventis. Protrahitur Febris per totam tertiam diem æqualiter intensa, & sine ulla exacerbatione. Exhibetur ea die *Ol. Amygd. dul. ad unc. iv.*, subsequiturque modica dejectio biliosa, nec amplius redit vomitus, vel angor stomachi. Quarta die mane adhuc intensa est Febris contra expectationem; quare sanguinis missio, quæ cæteroqui statuta erat, ob id suspenditur, ejusque loco offertur cibus ob metum exacerbationis, citioris futuræ creditæ, respectu habito ad secundam diem. Et revera circa meridiem quartæ diei valide exacerbata est Febris, ut suspicatus fueram: quod Ægrotanti ansam dedit, ut a me avide statim Corticem expeteret, quem sciebat plurimis graviter febricitantibus opem tulisse; sed cum respondissem, Remedium illud non satis aptari huic Febri, acquievit ille quidem, sed animo turbatus est; illique propterea spondi, me oblaturum Corticem tempore opportuno, quotiescunque Febris remedium admitteret. Quinta interim die mane missus est sanguis, remissa aliquantulum Febre. Vespere subsequuta est Exacerbatio, obscura quidem dum fieret, sed paullopost manifesta. Fuit hæc omnium levissima præter expectationem. Sexta die mane admodum remissa est Febris, Ægerque visus est ab apyrexia non admodum distans. Successit ante meridiem Exacerbatio cum levi, brevique extremorum perfrigeratione. Tunc credidi, Febrem disponi ad acquirendam naturam, & motum Cortici obsequentem, si opus fuisset offerre; de quo tamen ut certior fierem, & remissionem illius Exacerbationis, & motum alterius correspondentem sollicitus expectabam. Modice intensa ea fuit: cum tamen esset in statu, circa vespertas Æger animo deliquit citra causam manifestam, Febrisque ultro protracta est. Septima die, perseverante Febre, nec alvo satis fluente, præscribitur cly-

ster ex Lacte, & Saccharo, quem diutius retinet, ægre fert, ac tandem reddit, summe biliosa, ac spumosa deiciens, & animo rursus delinquens, dum sedens alvum exonerat. Post meridiem durante adhuc ultima exacerbatione frigidiuscule sudat cum pulsu minuto, & celeri. Propterea rebus in præceptis ruentibus, & respectu habito ad prægressas Febris periodos qualescunque, confestim exhibetur Cortex *ad drach. ij. ss.* Octava die mane exhibetur iterum *ad drach. j. ss.*; utraque tamen vice sine fructu: sequitur siquidem pari passu Febris, ac sudatiuncula subfrigida. Vespere videtur pulsus tantillum resurgere, sed parum: quamobrem circa finem octavæ iterum præscribitur Cortex *ad drach. ij.* Nona vero, ne quicquam intentatum relinquerem pro salute Adolescentis plurimis nominibus mihi carissimi, eundem Corticem (quoniam aliunde non erat sperabile auxilium) per clysterem administrari jussi *ad drach. v.*, sed semper incassum; in fine siquidem ejusdem nonæ diei frigide sudans, e vivorum statione sublatus est.

IV. Denique decumbebat Mutinæ ex non levibus animi pathematis *D. Ludovicus Maggus* Canonicus Carpenis sexagenarius, gracilis, & delicatulus. Febris, qua detinebatur, Tertianæ duplicis Continuae regularem typum servabat. Et cum in ea æque elucesceret ratio continuitatis, ac ratio periodi, utra pars prævaleret, haud potui dignoscere: cum tamen admodum sensibilis esset statis horis quotidie remissio, Subintrantem potius, quam mere Remittentem, Proportionatam hanc suspicabar. Progrediente nonnihil morbo, cœpere admodum obscuræ fieri exacerbationes, & remissiones, quæ prius satis patenter sese probebant. Metuens ego proinde, habito respectu ad virium imbecillitatem, & tenuitatem pulsus, ne Æger consuetis licet ab initio jam satis methodice tractatus remediis, impar progressu temporis evaderet ferendo morbo in dies crescenti, decrevi Corticem illi præscribere mane, & sero *ad drach. ss.*: ex  
cujus



cujus remedii usu ad paucos dies continuato omnis plane sublata est exacerbatio Febris; restitente tamen jugiter tenui illo, sed tenaci, ejusdem filo, quod pariter ante usum Corticis, tempore quoque majoris remissionis superstes esse consueverat. Vere tam exiguum erat illud, ut vix nomen Febris mereretur: quare Aeger ipse sanum se reputans instabat, ut eum dimitterem ad patrios Lares. Illi tamen annuere non potui, quia nondum extinctum noscebam incendium, cuius fomes alter adhuc vigebat. Uno verbo: postquam per aliquot dies satis vegetus visus fuit, paulatim illi cœpere atteri vires, cœpit vox clangosa fieri, oculi rubore, ac lipitudine quadam perfundi, somnus diuturnus, & intempestivus, placidus licet, ac levis caput obruere, & ipse tandem vix febricitans, nec se febricitare noscens, aut credens, insensibiliter deficere. Quod demum plane contigit circa vigesimamquartam, ni fallor, morbi diem, qua placide, & sine ullo doloris, aut molestiæ sensu, perpetuo quievit, me in posterum relinquens ancipitem de usu, & virtute Corticis in hujusmodi Febribus Periodicis, quæ simul stabilem quandam, fixamque, utut levem, continuitatem sunt ab exordio sortitæ. Opinor equidem, ut ingenue loquar, quod ille valde citius obiisset, ni sumpsisset Corticem; Febris namque, pensitatis pensitandis, satis se prodebat pro Corruptiva cruoris, & Individui; sed æque censeo, quod dum absorpto fermento extraneo, quotidie influente, sublata est effervescentia periodica, ita & sublata sit occasio, etsi periculo plena, ipsi cruori, forsitan [si per moderatam effervescentiam licuisset] se defæcandi in progressu [quod tamen præ imbecillitate Aegri minime videbatur sperandum] ab impuritatibus in eodem stabili contubernio præexistentibus, a quibus postmodum per sepultam quandam, & inconspicuum ebullitionem citra ullam despumationem effervescentibus, ultima tandem, æque ac si Cortex fuisset omisus, Aegrotanti illata est clades.

Ex his casibus selectioribus, & ex aliis nonnullis, quos possem adducere, immo & ex quibusdam allatis inter infastos, *Lib. III. Cap. V.* recensitos, satis constat, quam incertus sit, & sæpe quam inutilis usus Peruviani Corticis in illis Continuis Proportionatis, quibus plus inest de natura Febris Continuæ simpliciter Remittentis, & per accidens periodicæ, quam de natura Subintrantis, ac Periodicæ, & per accidens tantum continuæ; Febris enim quo magis recedit ab Intermittente, & accedit ad Continuam, eo magis se subtrahit actioni Corticis, atque adhuc eo magis, quo magis continuitas illius accedit ad æqualitatem intensionis, atque tenoris.

Eam ideo mihi metipsi metam posui, quam in superioribus per extensum explicui circa usum illius in Febribus Proportionatis, mea qualicunque fretus experientia, cui aliquam, crassiusculam licet, conatus sum adaptare rationem. Cæterum, si cui lubeat ulterius experiari, experiatur; puto quidem sine noxa, sed & puto sine fructu saltem sensibili: quamvis me non lateat, nonnullos Febribus Proportionatis de natura Remittentium potius, quam Subintrantium, laborantes, & Cortice tractatos feliciter convaluisse, sed exacto tantum Acutorum cursu; cuius rei præter Auctorum testimonia, plura ipse possem adducere exempla. At China China, ut pluries sum fassus, propter excellentiam suam habet hoc præjudicium in existimatione mea, ut, cum soleat, ubi convenit, non modo semper prodesse, sed & cito, & manifeste, eo ipso, quod cito, & manifeste non profuit, minime credatur a me ullo pacto profuisse; ad differentiam aliorum plurium remedium, quæ cum nec cito, nec manifeste [utinam aliquo saltem modo] prodesse soleant, etiam tunc creduntur profuisse, cum non profecerunt, dummodo res, etsi forsitan aliunde, bene cesserit. Quos tamen protuli infastos eventus, non protuli quasi cladem illorum Cortex intulerit, & quasi alii felices non



non prostant, ad salutem, sed non citam, ut dixi, pendente usu Corticis, perducti: verum lethales consulto seligi, ut ostenderem, illum aliquando certo in descriptis circumstantiis satis non profuisse, quod æque certo ostendi non posset in casibus exitum felicem sortitis, dum talis exitus oblationi Corticis [etsi tardiuscule tantum, non vero celeriter, ut in Intermittentibus afolet] successisset. De reliquo sicuti potest Medicum decipere Febris Proportionata, a prædominio Remittens simpliciter, sub specie Febris a prædominio Subintrantis, & videri Cortice sanabilis, licet revera non sit, ut in relatis postremo casibus, ita potest decipere Proportionata, Subintrans, a prædominio, sub specie Febris a prædominio simpliciter Remittentis, ac videri ex iis, quæ sunt Cortice inexpugnabiles, & tamen revera eodem Cortice nonnunquam curari; quod non semel mihi metipso contigit hac in re quandoque minus plana cæspitanti. Ideo ubi prædominium Continuitatis sit minus perspicuum, sitque ex una parte locus rationabili dubietati, an Febris Proportionata sit Cortici cessura, nec ne, & ex alia parte sit rationabilis suspicio de aliorum remediorum invaliditate, minime improbare possum animositatem Medici, qui spreto Detractorum calumniis, innoxium medicamentum, etsi tunc vigoris ob circumstantias incerti, tentare velit.

Caveat tamen in hoc, ne sibi aduletur, tribuatque remedio plusquam par sit, si res ex voto successerit; sed videat, num illi, an aliis remediis, vel Naturæ adscribenda sit sanitas; facillimum quippe hic est incidere in Paralogsimum appellatum, *Ex non causa ut causa*. Sicuti enim non valet hæc illatio — *Æger tandem mortuus est sumpto Cortice; ergo propter Corticem* — ita neque valet hæc alia — *Sanatus tandem est sumpto Cortice; ergo propter Corticem* — ad summum enim inferri potest — *Ergo Cortex non obfuit Curationi*. Sanitas autem, quando a Cortice vere procedit, facile dignoscibilis est ex

insolita, qua acquiritur celeritate; non sic in aliis casibus. Si quid ergo certius, diutius observet in hac materia, quod ipse non satis observarim, facto prius, ut decet, serio, ac diligenti examine, in publicam demum utilitatem fideliter referat. Id forsitan quondam nobis sperandum erat a Doctissimo *Lancisio*, ut juvat conjectare ex paragrapho Epistolæ Illius ad me conscriptæ, quem retuli jam *Lib. II. Cap. VIII. in Schol. ad Mortonum pag. 188.* quandoquidem certior factus, Virum hunc Amplissimum e vivis decessisse non sine gravi jactura antequam suas edidisset, quas ibidem recensuit, circa hanc materiam Observationes, ut illas edidisse, ex eadem Epistola falso fueram suspicatus.

Hallucinationi meæ haud multum ab- similis ea fuit, quæ nuperrime, ut subaudio, occupavit nonnullos, quibus visæ nunquam fuere *Constitutiones Epidemicae Mutinenses*, olim a *Cl. Ramazzino* conscriptæ, exordio ducto ab anno 1690. ad usque annum integrum 1694. quæ sane hallucinatio, quoscunque corripit earundem Dissertationum ignaros, mihi dubio procul apud hos notam hominis toto hoc Tractatu parum veridici statim inuret. Putarunt ergo hi, falso licet, eundem *D. Ramazzinum* tunc apud nos Medicinam facientem, in iisdem Constitutionibus suis argumentum meum (quod ego Medicis Nostratibus ante annum 1695. nedum intactum, sed & ignotum asserui) aliquo saltem modo tractasse; idque illis visum est posse deduci ex iis, quæ Vir iste *Cl.* prodidit in Eruditissima Dissertatione sua recens edita *De Contagiosa Epidemia, quæ in Boves irrepsit*, ubi de China China verba faciens, meorumque interim assertorum veritatem propria auctoritate confirmans, hæc habet. *Equidem hoc presidii genus in febribus periodicis miranda præstat, ac præsertim in tertianis intermittentibus malignis, quæ in ipso impetu accessionis ægros interdum necant, quarum febrium in Constitutionibus meis epidemicis Mutinensibus mentio habui; hoc enim fe-*  
brifu-



*brisugum fermentum illud malignum si-  
ve penitus restinguit, siue ita enervat,  
ut periculum illud tollatur, ne ager in  
ipso febris accessu intereat.*

Textus autem hujusmodi sensus nec  
est, nec esse potest, quantunvis esse cre-  
datur, aut videatur, Auctorem hunc pro-  
mulgasse in Constitutionibus suis Epide-  
micis, aut eo tempore novisse, *Corticem  
Peruvianum miranda prestare in Tertia-  
nis malignis Intermittentibus, quæ in ipso  
impetu accessionis ægros interdum necant,*  
quales reapse sunt, quas descripsit olim  
*Mercatus*, mox *Mortonus*, & ego tan-  
dem. Ibi enim de istiusmodi Febribus ve-  
re nec egit ille, nec mentionem fecit,  
cum vix obiter innuerit, in Tertianis  
Febribus diuturnis, & contumacissimis a  
se descriptis, quæ ut plurimum (sunt ejus  
verba) *citra malignitatis suspicionem po-  
pulariter grassabantur, malignum quid  
nihilominus aliquando etiam adfuisse, vel  
eas, cum protractiores erant, in mali-  
gnas nonnunquam degenerasse; subdens  
insuper, quod præ multitudine hominum  
decumbentium pauci extincti faere; ac  
potius ex diuturnitate morbi, & frequen-  
tibus recidivis, quam ex Febrius vehe-  
mentia succubere.* Sed quotiescunque  
etiam ex vi paucorum verborum, quæ  
supra recensui, mentionem aliquam de  
Perniciosis nostris ipsum implicite ha-  
buisse quispiam contendat, quod parum  
refert; tantum tamen abest, ut Corti-  
cem Peruvianum in iis Febribus, im-  
mo in ullis primæ Constitutionis, seu  
*Dissertationis anni 1690.* [quæ potior  
est in hac materia] commendaret, ut  
contra asseruerit, eundem Corticem in  
illis omnibus *insalubrem plane, dolosum,  
ac noxium* extitisse, quemadmodum late  
videre est *num. xv. & num. xlvij.* ejus-  
dem Constitutionis. Et propterea illud  
remedium in *Quartanis* duntaxat, ac  
*Diuturnis* Febribus, & quidem in cali-  
dis tantum, ac siccis constitutionibus cum  
temporum, tum humorum, minime ve-  
ro in frigidis, & humidis, generaliter  
usurpari posse, ac revera anno 1691. ad  
easdem *Quartanas*, & diuturnas Febres  
fuisse feliciter usurpatum, prodidit in

sola Constitutione ejusdem anni 1691.  
*num. xxxiv. circa finem, & num. xxxv.:*  
quemadmodum parum utiliter, aut cum  
detrimento adhibitum fuisse in *Lentis*  
Febribus, Peticulari male judicata suc-  
cedentibus, retulit in *Constitutionibus*  
annorum 1692. 93. & 94. *num. xxxij.,*  
& *num. lvj.* Quæ cum clarissima sint,  
& prostant cuique, non est, quod quis-  
quam nisi cohærenter ad ea textum al-  
latum velit interpretari, quasi nempe  
dicat Auctor ingenuus in confirmatio-  
nem assertorum meorum, ut conjeci  
(utque fas est credere de Amico immi-  
nentis editionis Tractatus mei optime  
conscio) quasi, inquam, dicat — Sibi  
modo notum esse, Corticem Peruvianum  
miranda prestare in Febribus Periodi-  
cis, & præsertim in Tertianis Inter-  
mittentibus malignis, quæ in ipso im-  
petu accessionis Ægros interdum necant:  
cujus generis, aut naturæ Febrium,  
aliquo modo participes dici posse, putat  
nonnullas earum, quas descripsit in pri-  
ma ex Constitutionibus suis, licet tunc  
ad illas eundem Corticem parum salu-  
brem crediderit, talemque se reperisse  
ea saltem constitutione, persuasum ha-  
buerit.

Atque his quidem ita se habentibus [ut  
ad rem nostram reditus fiat] ne quæso  
dedignetur perpendere quisquis plurima,  
a nobis circa praxim hujusce remedii  
haud satis forsitan in antea actis dilucida-  
ta, in clariorem lucem, ut optandum  
est, aggrediatur evelire, ne, inquam,  
dedignetur perpendere qua diligentia,  
qua cautela, & examine, item quam  
longa, & accurata experientia sibi sit  
opus, priusquam quidquam certi valeat  
decernere. Quamvis enim supra lauda-  
tus Vir post repetitam, & firmam, ut  
illi tunc visum, plurium annorum ob-  
servationem, & experientiam usque ad  
totum nempe annum 1694. tam trepi-  
danter, tam restricte, immo non raro  
tam sinistre fuerit opinatus de Cortice  
in Constitutionibus suis [licet, ut ve-  
rum fatear, etiam sic sentiens eminu-  
erit velut insignior Corticis fautor in-  
ter omnes, quotquot tunc aderant, &  
in hanc



In hanc usque diem perstitere in hac Urbe, Medicos] quamvis, inquam, tam scrupulose tunc fuerit opinatus de Cortice; facta nihilominus progressu temporis animadversione magis exacta, admodum diversimode sensit. Etenim, perspectis paullopost, ac praesertim anno 1696. illius viribus, cum scilicet ego ipse cæteroqui proxime periturus remedium simul, ac sanitatem uno haustu potavi, eodem D. Ramazzino spectante, atque calculum suum apponere non renuente, cognitaque pariter in aliis casibus haud minoris momenti tanti medicaminis efficacia, ut prostat in *Historiis meis pag. 314. & seq. pag. 141. & pag. 423.* his, inquam, omnibus ab eo satis perspectis, aliisque deinde, ut reor, ex propria praxi depromptis, longe majora, & longe magis favorabilia scripsit Ille de hoc celeberrimo Febrifugo. Sic in *Orationibus*, seu *Prolusionibus* suis in Patavio Athenæo subinde habitis, & typis editis, ac signate in *Prima, Tertia, & Septima*, ut & in nuperrima *Dissertatione De Contagiosa Boum Epidemia*, tam late, tamque magnifice loquutus est de virtute illius, velut cujusdam *remedii plane divini, quod quolibet, un inquit, anni tempore, in quacunque regione, atate, sexu, temperamento, ad Febres periodicas exterminandas miranda præstet*, ut, posthabita in concursu recentioris, certiorisque palam repertæ (neque enim aliud potest inferri) prioris experientia, minime veritus sit, suam quadantenus mutare sententiam *more scilicet Magnorum Virorum*, ut de Hippocrate ajebat *Celsus, & fiduciam magnarum rerum habentium*. Utinam vero ipsum aliquando imitentur ii, qui non satis adhuc experti, in veritatis tamen injuriam, & in damnum publicæ utilitatis expresse sunt obloquuti de Cortice, ut & ii, qui favore illius nimium præoccupati nimia pariter, ac sæpius inania præcoci calamo scripsere hætenus, vel posthac scripturi sunt de eodem. Sed tam laudabilis animi candor raro visitur, ut qui datus est tantum *Magnis ingeniis, multa que nihilomi-*

*nus habiturus; nam levia ingenia, quia nihil habent, nihil sibi detrahunt:* quamvis id revera Viros omnes cultos deceret, ac bene moratos, in eo praesertim ministerio [omnia sunt verba ejusdem *Celsi*] quod utilitatis causa posteris traditur, ne qui decipiantur eadem ratione, qua quis ante deceptus est.

## C A P U T V.

*Proficuum asseritur Peruvianus Cortex, primò ad Febres Complicatas vulgatiores, puta, Hemitritæos, &c. secundò ad Lentas, praesertim Puerorum, Hecticas abusive dictas. Confirmatur exemplis postrema hæc assertio. Demum ad Febres singulas indigitandas, quibus utilis est China China, & quibus non, universalis earum Categoria, & varia insimul metamorphosis, Corticem modo admittens, & modo respiciens, iconice exprimitur, ac explicatur.*

**O**MNES dari, vel esse possibiles, quas tradiderunt Antiqui, Febrium Complicationes, haud facile admiserim; dari plurimas, haud facile negaverim. Juxta illos complicari possunt Febres Putridæ dictæ cum non Putridis, ut quando Febris periodica Hecticæ copulatur in Tabidis; quod passim videmus. Item commisceri possunt Putridæ cum Putridis; & hoc pluribus modis, nempe vel per Complicationem Continuarum cum Continuis (atque hæc, quam *Fernelius* vocat potius Confusionem Febrium, quam veram Complicationem, reapse mihi videtur confusio non modo Febrium, sed & quodammodo intellectuum) vel Complicationem Intermittentium cum Intermittentibus, tum ejusdem, quod facile, tum diversæ speciei, quod non ita facile, vel denique per implicationem Intermittentium cum Continuis: & hic quoque aliqua fortasse contingit hallucinatio. Inordinatæ siquidem Febrium praesertim Intermittentium, mox & Proportionatarum reduplicationes sæpe Medicis imponunt specie Hemitri-



mitritæi, seu Semitertianæ, aliæve con-  
similis Monstri, nedicam cum nonnul-  
lis, Chymeræ. Ex opposito ea, quæ  
nonnunquam visitur in typis inordina-  
tis Februm nunquam desinentium or-  
dinata vicissitudo, itaut statò ordine,  
quandoque bis in die, quandoque una  
die bis, & altera semel, adeoque ter  
intra duos dies, Febris recrudescat,  
itemque non multo post unam invasio-  
nem nova reduplicatio succedat, ista,  
inquam, vicissitudo, & alia quævis con-  
similis in praxi non semel obvia tollere  
videtur perpetuæ, qualem nonnulli re-  
putant, imposturæ suspicionem. Datis  
itaque ad abundantiam, quidquid sit de  
veritate rei, ut possibilibus combinatio-  
nibus Veterum ante memoratis, vel sal-  
tem earum plurimis, facile est ex dictis  
colligere, quid de singulis sentiendum  
sit quoad usum Corticis in iisdem.

Si enim commisceantur Putridæ cum  
Hecticis, diximus jam, experientia du-  
ce, illas per Corticem non submoveri,  
vel si leniantur, aut quoquo modo sisti  
videantur, hoc non impedire, quomi-  
nus Ægrotans tabe consumptus suo tem-  
pore ad interitum ruat.

Si possibile sit complicari Putridas  
Continuas cum iisdem pariter Putridis  
Continuis, certum est, quod si ambæ,  
vel etiam alterutra ex illis [cujusmodi  
duorum casuum prostat icon in Arbore  
nostra, data eorum possibilitate] si, in-  
quam, ambæ, vel alterutra ex illis sit  
de Continentium stirpe, Cortex non  
proderit; si vero fingantur duæ Conti-  
nuæ Proportionales, suspicandum meri-  
to est, ne parum prodesse possit adver-  
sus duos hostes remedium, quod uni ex  
illis sæpe non sufficit; vix enim perce-  
ptibile est in casu posito, quod in mas-  
sa sanguinea non sit tale [sive præexi-  
stens, sive noviter cumultatum] tali-  
terque radicatam fermentum, ut vires  
Corticis eludat, etiamsi aliqua extranei  
cujusdam accedat portio, cæteroqui eo-  
dem Cortice domabilis.

Quod si Complicatio sit Februm In-  
termittentium cum Intermittentibus,  
sive illæ dicantur esse diversæ, sive ejus-

dem speciei (in qua linea octo simul  
Tertianas in eodem Ægro dari posse,  
*Caprilus* non dubitavit asserere) extra  
dubium est, illis quomodolibet com-  
mixtis, ac per varios subintrantium,  
seque mutuo, ac diversimode excipien-  
tium paroxysmorum recursus, Conti-  
nuis per accidens factis, Peruvianum  
Corticem strenue opitulari, ac si forent  
disjunctæ, atque discretæ: dummodo  
non eo usque sinantur progredi, ut jam  
continuitatem essentialem, ac fixam,  
& in massa ipsa sanguinea stabiles ra-  
dices agentem acquirant, aut acqui-  
sierint.

Major difficultas versatur circa com-  
plicationem Intermittentium cum Con-  
tinuis, non Continentibus quidem,  
quæ, quoquo modo adsint, vim Corti-  
cis solent enervare, sed Proportionatis:  
cujusmodi esse dicuntur Semitertiana,  
aut Hemitritæus, cum scilicet Tertianæ  
Continuæ Quotidiana Intermittens, vel  
Tertianæ Intermittenti Quotidiana Con-  
tinua copulatur. Circa hanc rem, quæ  
non æque explicatur ab omnibus (cum  
aliqui ex Continuis symptomaticis, &  
Inflammatoriis, simul ac ex Intermi-  
tentibus Hemitritæos componant, alii  
ex variis, & inæqualibus Intermitten-  
tium tantummodo commixtionibus) fa-  
teor, me quoque non parum hæsitare,  
& probabiliter credere, famosam hanc  
Febrem esse de Tertianarum Intermi-  
tentium, multiplicium tamen, puta du-  
plicium, vel triplicium genere, quæ in  
hac Febris specie suas adeo frequenter  
repetunt Accessiones, ut illam non mo-  
do crebris rigoribus, & horroribus suis  
reddant toto decursu Horridam, sive  
Horrificam, verum etiam tali intensio-  
ne assidue præditam, ut simul de gene-  
re Continuarum ab ortu eandem repræ-  
sentent. Et revera tam facile est, ut li-  
cet Continua suapte natura orta non  
sit, talis tamen ob rationes recensitas  
evadat, simulque Maligna, & sæpissime  
lethalis, nostræ aliquando Subcontinuæ  
malignantis adinstar, ut non prorsus  
immerito ex Continua, & Intermitten-  
te quodammodo conflata dicatur.

Si ita-



Si itaque Hemitritæus, aut Semitertiana vere procedat, ut suspicor, ex Tertiana Intermittente multiplici (Vetribus ipsis, saltem aliquibus, non plane dissentientibus) sive ex crebro, & æqualiter inæquali fermenti Tertianam producentis influxu, patet, quod activitas Corticis valide, cito, ac frequenter oblata, par est morbo vincendo, dummodo id fiat, antequam Febris essentialem continuitatem acquirat, quod in enarratis circumstantiis proxime imminet. Cæterum quæ primis diebus apparet in Complicatis hujusmodi Febribus continuitas, sæpe non est essentialis, qualis creditur; idque conspicuæ pulsuum concentrationes identidem contingentes palam testantur. *Quamvis Febres quedam* (inquit satis apposite hoc loco Sennertus) *continuae videantur, si tamen sæpius fiat pulsus contractio, illa novi paroxysmi, novique materiae motus indicium est.* Ob hoc igitur in Semitertiana, sic dicta, Corticem opportuno tempore exhibendum censeo, & data occasione nonnunquam fidenter exhibui: nec de felici successu inexpertus loquor.

Si vero, juxta communioem Antiquorum, Febrem istam ex Continua Proportionata, & ex Intermittente prognatam quis velit, cum in illa duplici titulo prævaleat natura Febris Intermittentis, aut Periodicæ, & minore parte concurrat in eam natura Continua (ipsa siquidem Proportionata Continua participat aliquo modo de ratione, ac fermento Febris Intermittentis, ut diximus) major est probabilitas, quod in ea debeat esse proficiuus, quam inutilis Cortex, dummodo ille viriliter, ac tempestive offeratur: nisi videlicet jam Febris Intermittens, crebris, & subintrantibus reduplicationibus suis, ipsi Continuæ, ejusve præexistenti fermento suppetias contubernales attulerit, ipsius præexistenti fermenti naturam adeptas; vel nisi id fuerit jam subortum, quod non raro assolet, & quod ad Semitertianæ generationem concurrere autumat idem Sennertus, fretus auctoritate Spige-

lii, & aliorum, videlicet, nisi aliqua lateat in imi Ventris visceribus inflammatio, quæ Febri, cæteroqui Intermittenti, fixam continuitatem adjungat. Febrem siquidem Semitertianam censeat ille (suntque ejus verba) *ex Febre Primaria, & Symptomattica componi, & primo quidem natura sua Intermittentem Febrem esse, cui postea continuus calor accedit ex inflammatione Ventriculi, Intestinorum, & vicinarum partium*: quo casu nisi Cortex propinetur, priusquam fiat inflammatio, actum est; cum hujusmodi Febris & ex hoc capite, & ex more suo sit pravæ supra cæteras indolis, itaut non modo maligna, verum & epidemica, & contagiosa, & lethalis præ aliis merito reputetur, unde illud Q. Sereni

*Mortiferum magis est, quod Gracis Hemitritæum*

*Vulgatur verbis —*

Exempla tamen curationum Hemitritæi, etsi adeo periculosi, usu Corticis absolutarum exhibet, ut alias diximus, *Badius*; item & *Restaurandus* Capite peculiari — *De Cura Hemitritæi per Chinam Chinæ*, ubi animadversione dignum est Scholium Cl. *Nigrisoli* circa Febres hujusmodi Complicatas; quæ omnia consulat Lector, nosque a longiore circa hanc materiam eximat mora.

Quoad secundum in titulo propositum, nempe an China China conveniat Febribus *Lentis*, & Puerorum *Hæticis*, saltem abusive dictis, distinguere oportet *Lentas*, quæ de genere Symptomaticarum, ac Continentium sunt, & quæ sunt de genere Intermittentium a radice, ac proinde Essentialium, quemadmodum utraque species distincta est in Arbore infra posita. In primo enim casu Corticem non congruere, seu saltem non sufficere, jam satis constat ex pluries dictis. In secundo vero casu nullus dubito, quin conferat, saltem ut plurimum (quantum novi in praxi) immo quin absolute conveniat, usquequo in in *Lentis* hujusmodi aliqua subcernitur originariæ periodi umbra, ut explicite monet *D'Acquin*, qui egregie præ cæteris



teris sphaeram activitatis remedii paucis distinxit, ac circumscripsit; quare etiam si, rebus nimis ultro provectis, per accidens China China fortasse non proficit, attamen fidenter dico, quod rationabiliter, & tuto exhibetur; quoniam convenit naturae intimae ipsius Febris. Quamobrem pro statuenda oblatione illius, sufficit dignoscere Lentam a fermento Intermittentium pendentem, & gravibus viscerum vitiis (inter quae non connumero vulgares obstructions) minime copulatam, sufficit, inquam, dignoscere illam a Lenta ex radice Continentium Symptomaticarum, & ex gravibus viscerum laesionibus pullulante. Hoc autem unicuique in arte versato non admodum difficulter videtur posse innotescere; quandoquidem ex ipsius Aegrotantis relatu potest quilibet doceri, num Lentam illam diuturna Intermittens praecesserit, & ex seipso cognoscere [posito, quod Hecticam veram a meris Lentis discernat] an aliqua in Lenta huiusmodi observari possit incrementi, & decrementi qualiscunque nota: illius quidem per unguem v. gr. livorem temporaneum, ne dicam perfrigerationem: istius vero per interpolatas v. gr., nocturnasve sudatiunculas, vel per alia quaelibet obscura saltem periodi indicia. In quibus circumstantiis, aliisque similibus, si Febris Intermittens sive duplex, sive triplex, sive alterius compositionis praecesserit, immo aliquando, praesertim in Pueris, etiam si non praecesserit, sed praecesserit Febris Continua, dummodo tamen in Lenta succedente appareat levis aliqua imago periodi, Cortex exhibendus est cum spe boni exitus, si non certa, saltem probabili, & omnis suspicionis experte. Quod intelligendum est etiam, quamvis Febris diuturnitas Cachexiae rudimenta simul induceret, habito tamen aliquo ad huiusmodi circumstantiam respectu, simulque habita consideratione, quod a Cachexia ipsa ortum, aut fomitem Febris non trahat: tunc enim referenda esset ad Lentam Symptomaticam vires Corticis eludentem. Hac conditione absen-

te, & concurrentibus reliquis antedictis, Cortex in Lenta ipsa non sine spe propinandus.

Idem dicendum de Lentis illis, quae Pueros peculiariter vel ex praegressis Intermittentibus, vel ex simplici etiam *Adphagia*, seu ingluvie obsidere solent, & *Hecticarum* nomine *abusive* audiunt; nam praeterquamquod ab Hecticis veris videtur excipere *Hippocrates* aetatem infra completos pubertatis annos constitutam, experientia ipsa solet ostendere, Febres istas a cruditatibus genitas ad Cachexiam saepius, quam ad maciem Hecticae verae sequacem deducere: etsi, eas cum macie quoque conjungi, nequaquam inficier; quo casu si macies ad conspicuum gradum perducta sit, Corticis effectus valde incertus redditur; nontamen ideo semper ejus usus omittendus. Quamobrem in istis Puerorum Lentis sive ex praecedentibus Periodicis, sive ex nimia voracitate, & ciborum ingurgitatione procedentibus, videtur peccare vel fermentum Intermittentium, vel materia aliqua ejusdem farinae, vel saltem analoga, quae ab usu Peruviani Corticis post universalis congrua propinati correctionem non levem potest recipere, ut non semel usus me docuit, utque melius patefacient nonnullae ex sequentibus Historiis, quibus alias etiam curationem Lentarum in diversis aetatibus exhibentes placet immiscere.

I. Anno 1696. memoratus alias *D. Comes Andreas de Sanctis* tunc impuber, ex frequenti, ac intempestivo esu fructuum praesertim, & bellariorum, aliarumque rerum saccharo obductarum, incidit in Febrem Acutam Continentem (convaluerat autem non ita pridem ex diuturna Quartana sponte soluta) & periculo plenam, cujus symptomata & gravissima fuere, & insolita, adeo etiamnum ambigam, num ea Febris fuerit simul Variolosa; propter peregrinam quandam eruptionem cutaneam innumerarum pustularum, variolas quodammodo, sed admodum imperfecte, ac abortivo fere dixerim modo æmulantium. Febre non integre judicata, super-



pervenere insignes Abscessus ad articulos, aliasque corporis partes, sanie, & pure summe foetido abunde scatentes, qui Ægrum una cum *Lenta* quadam Febricula ad insignem maciem deduxerunt, nec nisi post bimestre saltem spatium sanati sunt, & ad cicatricem perducti. Illis nihilominus plane consolidatis eadem remansit superstes *Lenta* Febricula, crescente in dies totius corporis macie, nihilque proficientibus iis, quæ pro Febre extinguenda, & pro reparanda nutritione ad longum tempus præscribebantur remediis. Assidebat illi perpetuo *D. Candrinus*, medebaturque *D. Cervinus*, cui & ipse Socius de more adungebar. Professores isti mihi non semel obtruserunt per modum Quæsitæ, num in hoc casu locum aliquem posset habere *Peruvianus Cortex*, quem alias in Febribus Lentis, me præscribente [ & interim satis memori casus ipsos repetebant ] non parum profecisse observarant. Rejiciebam ego iisdem amice subridens propositionem, & ajebam: maximam esse inter casus illos, & istum disparitatem. Tandem cum quodam die strictius interrogarer (progrediebatur enim in dies carniæ consumptio) cur hoc casu abhorrerem a tentamine, quod cæteroqui innoxium fatebar, nec nisi de eadem inefficacia, quam in cæteris quoque remediis aperte experiebamur, suspicabar incertus, respondi: me non suspicari, sed omnino credere inutilem Corticem, & ob id timere me censuram vulgi, aliorumque etiam Medicorum, propter radicem Febris a Continente primitus proficiscentis, demumque de symptomatica fortasse participantis (metuebam siquidem de novo aliquo latente Abscessu interno) & nullam præsertim periodi speciem præferentis, quantum colligere potui toto morbi tempore, bis licet in die Ægrum invisens. Addebam corporis emaciationem jam ad marasmi gradum perducere, nec esse forsitan ullo pacto possibilem amplius reparationem. Ad hæc reponebant ambo: non omnia, quæ assereram, sibi talia prorsus apparuisse; ajebant siquidem, & præcipue

*D. Candrinus* incessanter Assidens: levem aliquam se nonnunquam deprehendisse Febris remissionem horis præsertim antelucanis: quo tempore, & somnus placidus, & levis quandoque sudatuncula succedebat, quam & quædam præcedebat trium, vel quatuor horarum spatium, major incalescentia. Hac una motus duorum assertione, Corticem tentandum censui, qui *ad drach. ss.* primò semel, mox & bis in die præscriptus, intra 15., vel 20. dies, Febrem omnem penitus sustulit, & ad mensem circiter continuatus, integram valetudinem, colorem optimum, robur pristinum, perfectam renutritionem, quin & obesitatem cum aliquo etiam excessu post modicum temporis admirabiliter invenit.

II. Nobilissima Virgo xv. agens ætatis annum, habitu corporis valde gracili, & fervido prædita temperamento, anno 1707., latrante Syrio, incidit in Febrem Tertianam duplicem, primò Intermittentem, mox Continuum per paroxysmos sese mutuo excipientes. Quantumvis omni cautela tractaretur, ne Febris plurimum valida continuitatem essentialem, atque acutiem periculosam acquireret, non aliud tamen utilitatis ab adhibitis remediis licuit referre, nisi tolerabiliorem, sed diuturniorem Febris intensionem cum periodis obscurissimis, & macie notabili. Ut rem paucis absolvam, progrediente morbo cum copiosis, serosisque dejectionibus, cum profusis sudoribus tenuioribusque simul urinis, & jugiter perseverante Febre jam familiari reddita, quæ aliquod tantummodo incrementum suscipere dignoscatur ab incalescentia quadam horis pomeridianis adaucta, cui nocturnus sudor cum vix perceptibili remissione respondebat, pariterque crescente ad gradum insignem totius corporis, præsertim vero brachiorum, & crurum extenuatione irritis omnibus, quæ tam pro retundendo febrili calore, quam pro reparanda, quæ absolvebatur in dies, humiditate, & pro nutritione instauranda, præscripsimus *D. Floranus* Medicus illius ordi-



ordinarius, & Ego, consilium cœpi de proponendo usu Peruviani Corticis, priusquam obscura illa, qualiscunque periodi umbra penitus oblitteraretur, Febrisque in habitualement dictam migraret. Sub conditione alicujus quidem incertitudinis, sed plurimæ insimul spei, & omnimodæ semper securitatis, remedium proposui: nec sine plurima suspitione de carentia successus fuit admissum, ob fixam videlicet, ac fere æqualem Febris perseverantiam, & ob insignem metuendam carni consumptionem cum calore adurente iisdem impresso, tactu judice. Propinatus itaque est Cortex per modum alterantis, scilicet *ad drach. ss.* quotidie, nec nisi post aliquot dies sensibile levamen emerit. Emerit tamen evidenter; & continuato ad non breve spatium temporis remedio, Deo dante, convaleuit Ægra, sed tamen plurimum emaciata. Recidit illa quidem pluries, Febris semper typum Tertianæ vel duplicis, vel simplicis primò referentibus, sed mox in Lentam degenerantibus, quæ licet exigua, ac vix perceptibilis, ab una tamen ad aliam usque Recidivam protendebatur. Modo curabatur illa eodem Cortice, quando gravior invalescebat Febris habitualis suspicio, modo sine eo, quando Febris motu clariore procedebat, & laudabili diaphoresi judicabatur. Hyberni Solstitii solvit illa vectigal per novam consuetæ Febris invasionem, idemque tributum postremo dedit Verno Æquinoctio sequentis anni 1708. quo elapso pristinas plane vires, habitum corporis pleniorum ac antea, integramque prorsus resumpsit valetudinem.

III. Vividus, promptusque Ephebus Serenissimæ Ducissæ Brunsvicensis Dominae meæ, *D. Comes Casar Furnius*, postquam passus esset Æstate anni 1708. longam ægritudinem ex Tertiana duplici Subintrante, & participante de veræ Proportionatæ natura cum symptomatis valde gravibus, nec periculo vere carentibus, immo post superatas Recidivas multiplices, a quibus omnibus sine ullo Corticis adjumento, sed consuetis tantum

præsidiiis cum delectu, & peculiari advertentia adhibitis, Deo favente, semper evaserat, Autumnali tandem tempestate convalescentiam suam acturus in paterna domo, adiit Oppidum Finalis Mutinæ, ubi Genitor pro Serenissimo Duce Gubernatoris munus exercebat. Ibi vix elapso Solstitio Hyemali Febre iterum correptus est, quæ juxta relatum D. Medici curantis, duplicis Tertianæ de genere Subintrantium, ut alias, typum præseferbat, cum quotidiana videlicet, pomeridiana, & alternatim graviore exacerbatione sine ullo frigoris sensu recurrente. Cum primum mihi nunciata fuit invasio hæc novi morbi, seu mavis recidiva præteriti, & scirem Ægrum jam satis a me antea expurgatum, ac repetita non semel [suaserat id gravis vertigo, & crebra simul, sed invalida hæmorrhagia e naribus] phlebotomia curatum: cumque recenter intelligerem, iisdem de causis rursus celebratam fuisse ope hirudinum novam sanguinis missionem, sedulo monui, ut Cortex, a quo toto morbi decursu abstinueram, præscriberetur, quotiescumque periculum aliquod immineret, priusquam gravius fieret. Patefacto voto meo, nil ultra quæsi.

Tractu dierum aliquot (refero, quæ ex literis curantis Medici apud me servatis excerpo) intelligo, Febrem aliis a Cortice curatam remediis, plurimum quidem imminutam esse, sed æqualiter continuam redditam cum rubore genarum præsertim a cibo, & conspicua admodum macie universali: quod movit mentem ipsius Medici ad præscribendum lac Vaccinum coctum, animo ad alterius lactis oblationem aliquando transeundi benigniori tempestate. Post brevem hujusmodi lactis usum refert Medicus, Febrem Continuum increbuisse cum manifestiore semper incalescentia aliquot horis a cibo, tandemque inquit: se periodum observasse Quartanæ Continuæ cum levi quodam frigore recrudescentis, quæritq; rursus, quid modo sentiam de China China non oblata. Inculco denuo illius oblationem, etiam validius-



culam, nulla mora interposita. Negligitur hæc: & responsum refero, quod jam Febris dupio procul non potest non haberi pro habituali, ideoque in animo esse præscribendi jusculum ex decoctione Testudinis, Cancrorum, & Ranarum, dummodo ipse consentiam. Interim subdit idem Medicus curans: rem esse eo perductam [sunt ipsissima illius verba] ut maxima sit universalis emaciatio, virium prostratio insignis, notabilis surditas, facies ferme Hippocratica, vigiliæ assiduæ, dejectiones copiosæ, & summe fœtidæ, oculi caligantes, Febris Continua cum incremento a pastu, genarum rubore, siti ardentissima, labiis aridis, & faucium ardore cum molestissimo insimul pyralismo.

Eodem tempore scribit ad me alter Medicus superaccitus, se plane invitum accessisse recenter ad curationem, ubi non Actoris, sed Spectatoris tantum partes erat acturus, aitque: se prima visitatione desperatam agnovisse Ægri salutem propter Febrem Continuant cum pulsu ne minimam quidem resistantiam habente, facie Cadaverica, totius corporis macie, ferinis unguibus, assiduisque vigiliis, Diarrhœa, Hæmorrhagia &c., tandemque concludit, aliis signis (ut inquit) lethalissimis, adjungi ulcus in Larynge cum screatu veri puris identidem subcruenti, neque levamen aliud adhuc dignosci, nisi moderamen aliquod vigiliarum nonnihil breviorum, quas tamen pensat somnus turbatus, & subdelirio persæpe intermixtus. Ambobus respondi: me hos reputare acutiei potius, quam morbi habitualis effectus, ac signa, maxime cum vix mensis esset elapsus ab ultima invasione morbi: nihilominus quando jam Æger est proxime acturus animam, siue id contingat ob unam, siue ob aliam causam, prudentis Medici esse abstinere a remediis in eo statu inutilibus. Hoc non obstante, si quid illis videretur tentandum, & si quidem aliqua, utut levis, appareret, aut apparuisset umbra periodi (manebat quippe mente reposta Idea primi morbi) loco Ranarum, atque Testudinum, quas

postmodum pro restaurando Ægro superstitite non improbassem, si fuisset opus, Chinam Chinam nondum oblatam, precabar, offerrent dosi validiuscula, quam idcirco indicavi, visuri forsitan, quæ antea non credidissent.

Amplexari sunt illi tandem consilium meum, jubar aliquod remissionis, & exacerbationis alternæ in Febre recognoscentes; sed loco substantiæ Corticis congruum visum est illis pro faciliiori Ægri assumptione substituere Julapium ex China China, nescio qua vi saturatum, ex cujus usu per sex dies administrati cum nullum levamen agnoscerent, ut retulere [interim tamen non obiit Ægrotans pro deplorato jam habitus] quinimmo cum major fieret, ut agebant, prostratio virium, Febrisque æque, & cum iisdem symptomatis procedere videretur, iterum Decoctionem non modo, sed & insuper Julapium ex iisdem Testudinibus, & Cancris, se libentius quam Chinam Chinam usurpaturos fatebantur, ni ego renuerem. Quibus tandem fidenter responsum feci: impræsentiarum solo Cortice viriliter agendum esse: reliquis remediis in posterum, si res exigeret, aut sineret. Præscripta itaque quotidie mane per tres dies *drachma una* Corticis in substantia, & *semidrachmam* ejusdem per quatuor alios dies superaddita Syrupo de eadem China China ad illum roborandum, iterumque ad alios tres dies exhibita quotie *drachma una*, Febris cæpit paulatim remitti, sed nondum quantum erat in votis curantium Medicorum, qui pro reparanda Ægri macie remedia a Cancris, & Testudinibus petita jugiter proponebant, verbisque officiosis tantum non implorabant, ut ego ab illis imploraveram promptiorem usum Corticis. Quamobrem ut ipsis morem gererem (sunt quippe viri docti non modo, sed & Amici) etiam præter credulitatem meam in illud remedium consensu, hac inita pactione, ut eidem quotidie mane præmitteretur saltem *scrup. j.* vel *drach. ss.* Corticis, quod libenter factum est ad longum tempus; sicque com-



communi concursu, & voto perfecte sanatus est Ager, pristinoque robori, mox & optimæ habitudini restitutus circa Æquinoctium Vernal, ante cuius etiam adventum placuit iterum Ægrotantem novo usu Corticis præmunire. An a Febre Lenta, & propemodum habituali sanatus is fuerit, an ab Acuta, iudicet Lector; a Cortice sanatum ambigat nemo.

IV. Æstate proxime elapsa D. Ludovicus de Arboribus ruri agens, quo me fortuito & ipse contuleram, institit, ut Filium suum natu majorem, infra pubertatem tamen constitutum, mihi que ab ortu notum, & pessime tunc habentem, vellem invisere ad solamen Matris, non ad curationem Filii, quem pro Tabido reputabat. Is alias pro Phthysico prope habitus est ob diuturnam tussim cum sputo semipurulento, difficultate spirandi, raucedine insigni, & lenta Febricula: sed ab his omnibus sedula adhibita curatione præter mei ipsius, curantis licet, expectationem plane convaluit. Ante tres annos quoque Spinam ventosam passus est in cubito, & in pede, quæ præter læsionem partium per triennium obsessarum, notabilem quoque totius corporis maciem invexit. Post hæc omnia circa prægressæ æstatis initia correptus est Tertiana Febre Intermitte, quæ tractu temporis in Lentam migravit, exsiccatis eodem tempore ulceribus articulorum, perennes cæteroque ichores fundere solitis. De curatione postremæ hujusce Febris conscius non sum; ab alio enim Medico curatus fuit. Id unum scio, quod adhuc lente febricitans Rus adiit sat male habens, & ab aeris mutatione opem queritans, suasu, ni fallor, ipsius curantis Medici. Ibi moram trahens assidue febricitavit cum vespertinis obscurissimis exacerbationibus, & nocturnis circa caput, collum, & thoracem sudatiunculis. Interim ulteriorem, summamque maciem contraxit, & quod pejus, maximam simul spirandi difficultatem, tussim molestissimam, sæpe siccam, sæpe quoque sputo viscido, ac crasso comitatam, cum raucedine assidua adeo gravi, ut

audientibus molestiam inferret. In hoc statu illum Ruri deprehendi, dum ante domum ipsius casu transueherer: cumque eundem Tabidum, saltem fieri coeptum & ipse censerem, ut ab omnibus etiam non Medicis censebatur, Patri a me exquirenti, an China China illum, si non sanare, saltem levare potis esset, negative respondi. Cum tamen interrogarer, num ea citra noxam saltem posset tentari, respondi, quod habito respectu ad primam Febris radicem, tentari poterat, sed parca dosi, quoniam cæteroqui conjunctæ pectoris affectioni non erat congruens. Quod si a dosi parca levamen aliquod emerisset, fidentius postea poterat plenior dosi usurpari. Præscripsi itaque non in Scheda medica [pudebat enim] sed lingua vernacula, mutato etiam charactere, *semunciam* Chinæ Chinæ in octo partes divisam, & abii, iter meum prosequutus. Assumpta ab eo intra octo dies China China, nunciat mihi Pater, Filium levius se habere, ac mane præsertim videri a Febre immunem, vel saltem infrebricitationi proximum. Tunc aliam *semunciam* in quatuor tantum partes distributam præscribo, eaque pariter assumpta, narratur mihi, Ægrum bene se habere, non modo quoad Febrem, quæ jam evanuerat plane, verum etiam quoad reliqua omnia. Vix licet credulus, aliam tamen iterum *semunciam* præscribo in octo partes divisam; nec aliud amplius a quoquam audio. Sub finem Autumni offendens Patrem Ægrotantis in Urbe mihi obvium, interrogo illum de valetudine Filii. Optimam respondet obtinere, nec quicquam aliud pati, nisi incommoda a Spina ventosa in articulis, usque adhuc tamen etiam consolidatis, relicta. Paullopost ipse occurrit mihi per Urbem circumvagus Filius, quem vix dignosco: adeo carnosus, validus, vividoque colore præditus est. Qualem tunc vidi, talem etiamnum, Deo dante, haud infrequenter video, & [quod mirandum magis est] ab ipsis Spinæ ventosæ reliquis prorsus immunem.



V. Lectissima Virgo D. Ursula Corsina, gracillima, & universa thoracis, toriusq; corporis structura omnino disposita ad Tabem, trigessimum circiter agens ætatis annum, cujus Fratrem, unamque insuper, & alteram Sororem sine ullo prævio sanguinis sputo Phthisis confecerat, corripiebatur lenta quadam Febricula cum tussi valde molesta, & paucio nihilominus sreatu. Febricula hæc primis diebus me ancipitem reddidit de natura illius, ambigentem scilicet, an Chronica, & Tabem forsitan illatura, an subdole Acuta, malique moris particeps esset; adeo difficilis, & obscurus apparebat illius character. Tractu plurium dierum manifeste se prodidit Febris vere pro Lenta, quam comitabatur tussis assidua, noctu præsertim excrucians, cum copioso subinde sreatu materiæ lymphaticæ spumosæ. Sæpius in die, horisq; incertis, modo noctu, modo interdum asseverabat Ægra sibi exacerbari, & alias nonnihil remitti Febrem; sed sæpius nil tale pulsus, urina, vel carniū temperies aperiebat. Non negaverim tamen, me bis, aut ter, intra spatium 40. dierum circiter sensibilem aliquam deprehendisse remissionem, & exacerbationem. Reliquum temporis pari semper tenore ac passu Febris Lenta commensa est cum acri ad tantum calore, tussi importuna, copioso sputo, albicante, spumoso, & crudo, insignique insuper corporis macie.

Cum non proficerent remedia, quæ plurima fuere, notis indicationibus adimplendis destinata, motus ego a recen-ter, & crebrius apparente sensibiliore nonnihil incrementi, & decrementi Febris vicissitudine, Corticem Peruvianum tentare decrevi, parca quidem dosi, nempe *ad drach. ss.*, sed ad plures & plures dies. Ab illius usu visæ sunt aboleri obscuræ ille febriles exacerbationes; sed Lenta Febris, sibi que deinde semper, aut fere semper æqualis, pertinaciter persistit; quamobrem ab usu Corticis sine fructu, aut sensibili utilitate adhibiti, super sedere coactus fui.

Jam vero ad marasum ferme deducebatur Ægrotans, Cum autem illi post tot

alia incassum usurpata decoctionem radicis Chinæ præscribere aggrederer, nescio quo cæstro percitus, radici Chinæ *Kin-kinam* etiam adjunxi. Atq; ita *ex drach. iij. rad. Chinæ, & drach. ij.* Corticis Peruviani in duabus aquæ libris infusis, atque ad medietatem decoctis, duos Syrupos confeci, paucio Syrupo de cortice Citri edulcatos, quorum unum quotidie mane sumebat, & constanter perseverabat. Ab usu novi hujusce remedii semel in die, ut dictum est, assumpti, Ægra sensim melius se habere cœpit; quapropter usus illius ad XL. usque dies protractus integram valetudinem inferre visus est Febre videlicet tandem devicta, vel ad inconspicuam deducta, tussi admodum imminuta, imminutoq; pariter sputo, remanente tantummodo insigni, quæ minime reficiebatur, carniū extenuatione. In hoc statu cum ea haud multum incommode perdurasset, eidem valedixi; animo tamen Lac exhibendi adventante Vere, aliquam interim quietem, & cessationem a remediis cuilibet anteponeus remedio. Sed vix mensis erat elapsus, cum iterum advocabar, ut Ægram inviserem, eadem Febre, eadem tussi, eodemq; sputo a pluribus jam diebus laborantem. A remedio, quod manifeste profuerat, indicatione desumpta, iterum Syrupum ex Cortice Peruviano cum radice Chinæ portionibus æquis decocto, turbidum insuper, & plurima Corticis substantia refertum, neq; semel tantum, ut antea, sed bis in die sumendum præscripsi: quo ad xxx. usque dies continuato, Ægra tandem perfecte convaluit, adeo ut nunquam antea æque valuerit, abolita in integrum tussi, & ne vestigio quidem, vel umbra Febris superstitæ. Quia tamen gracilitas membrorum, præsertim extremorum, non satis refici videbatur, Lac Asininum exhibui ad duos circiter menses, quo pro ratione sui habitus fuit omnimode restituta.

Aliam ex opposito Adolescentulam recens nuptam, ex nativa dispositione minime in Tabem pronam, & Febri manifestiores exacerbationes, sensibilesq; remissiones habente diutius vexatam, cum co-



piosis sudoribus, tussi molesta, & sputo spumoso, eadem pariter methodo curare institui, postquam consueta, quæ non pauca fuere, remedia nil proficere observassem. Sed incassum plane id sum molitus; hæc enim, licet longe minus disposita videretur ad Tabem, inevitabili tamen forte Tabida facta est.

VI. *Frater* impuber Sculptoris æneæ Tabulæ Stemma Februm genealogicum referentis, & primæ hujusce Therapeutices Editioni insertæ, laborabat a duobus jam mensibus Lenta quadam Febricula, quæ ad maciem insignem illum deduxerat. Cum pluries invisendi Operis gratia domum Sculptoris adirem, Puerum hunc macilentum, modo jacentem, modo erectum deprehendebam, sed semper febricitantem pari intensione, cum pulsu celeri, urina male colorata, appetitu vivido potius, quam prostrato, & siti fere nulla. Occasionem Febræ videbatur suppeditare diuturnum ulcus Intestini recti, ante aliquot menses a Chirurgo curati quidem, sed imperfecte, aliqua videlicet labe adhuc superstite. Cum interrogarer, data occasione frequentioris accessus mei, an quicquam posset administrari procuranda hujusmodi Febræ, tergiversabar, solum hordei cremorem indigitans pro alimento simul, & medicamento. Tandem cum quadam die sciscitaretur a me Sculptor, latinæ linguæ non ignarus, cujusnam generis esset Febris Lenta Fratris sui, quarum Februm varias species in Arbore mea incidenda observarat, respondi hæere me nonnihil circa hoc; sed tamen probabilius credere, eam esse ex illarum potius specie, quas in ramis delibratis excudebat, quam earum, quas excudebat in ramis Cortice obductis, & consequenter esse veram habitualement potius, quam mentitam, insuperque fortasse symptomaticam, adeoque Cortice Peruviano probabiliter non curabilem. Dum autem in confirmatione meæ assertionis adducerem æqualem semper Febris continuitatem a me deprehensam, subjungebatur mihi Ægrum nullo ordine, & tantum per accidens invisenti, Febrem nonnullis horis, immo & nonnullis inor-

*Terti Therap. Spec.*

dinate tamen diebus, intensiorem nonnihil, & nonnullis aliis remissionem observari, ut & exacerbationem illius aliqua nonnunquam brevissima, & fugaci horripilatione notari. His intellectis, nec tamen plane creditis, primo *Syrup. de Cichorio* compositum cum *Rhabarbato* ad aliquot dies præscripti, deinde præmissa protestatione de probabili invaliditate remedii, præscripti Corticem *ad drach. ss.* omni mane per dies octo. Quod cum non plane inutiliter cessisset, cepi idem remedium offerre mane, & sero ad dies quatuor. Validiori huic impulsui Febris nequivit resistere; sed abiit expulsa. Interjecta verò unius hebdomadæ quiete, rursusq; post eam repetito per octo dies usu Corticis *ad drach. ss.* quotidie mane, ita fugata est Febris, ut nunquam redire sit ausa, succedente loco illius decenti corporis renutritione, firmaq; in integrum valetudine.

VII. *D. Andreas de Ferrettis* Sacerdos quadragenarius [ut aliquod etiam exemplum Lentarum Februm in Subjecto proVectioris ætatis afferam] habitus corporis summe gracilis, adustique, ut loqui mos est, temperamenti, Febris acutis, & ardentibus facile obnoxius, semperq; ideo quoties vel ægrotabat, vel convalescebat, de Habituali suspectus, anno 1706. correptus est Febricula quadam ab ipso initio Lenta, quam proinde per duas hebdomadas, & ultra assidue circumtulit. Excarnis ille insigniter evaserat, & decolor, siti assidua premebatur, calorem exhibebat tactum ferientem, & sudationunculas tantum nocturnas patiebatur, a quibus levius se habere ad aliquot horas asseverabat; reliquo tempore summam præseferbat cutis ariditatem. Consilio meo jussus decumbere, subjecit se regi mini medico, maxime cum jam inciperet ægre stare, & circumvagari. Febræ diligenter inspecta, & quidem diversis horis, eandem fere semper æqualem reperi, non tamen tam exacte, quin pulsus una nonnunquam vice frequentior quam altera, nulla tamen servata lege, reperiatur. Tantummodo asseverabat ille, se noctes aliquot, vel aliquot saltem noctis horas transigere satis tranquillas, Febræ



tunc juxta sensum illius etiam citra sudorem leviori reddita, cujus tamen levaminis vix ullum ego vestigium clarum mane poteram tactu explorare. Tractatus est blandis remediis per plures dies, Alterantibus scilicet humectantibus, & refrigerantibus, Emulsionibus, Cremore hordei, jusculis Cancrorum, & similibus, præmissa parca sanguinis detractione, & interjectis clysteribus ex lacte, & saccharo, aliisque hujusmodi diutius administratis. Sed cum sine ulla diminutione protraheretur Febris, macies autem ingravesceret, & roridæ humiditatis consumptio, ad usum Corticis anceps confugi: quo *ad drach. ss.* quotidie mane per dies duodecim assumpto, Febris omnino sublata est, & repetito, continuatoque ad longiusculum tempus remedio, inhibita quoque est omnis Recidiva, & restituta in integrum naturalis carniū constitutio. Post duos annos iterum idem decubuit ex duplici Tertiana Continua satis intensa, & diuturniore, a qua per viam methodicam vulgatiorem liberatus est citra auxilium Corticis, cujus tamen usum jam proxime meditabar, ni Febris evanuisset.

Per hoc autem, quod utilitatem Corticis in enarratis casibus expertus commendem, non fit, quod incertum aliquando non fatear in Febribus Lentis, a radice quoque Intermittente procedentibus, juvamen illius; non enim desunt casus, in quibus quandoq; hoc remedium non sufficit, etsi suffecturum videatur. Hujusmodi exemplum habui, præter alterum supra indicatum, in *D. Paulo Passarino*, qui post duos menses ruralis ægritudinis ex duplici Tertiana Intermittente in Urbem redux factus est cum Lenta Febricula, prægressis periodicis succedanea. Hæc cum ingravescere nonnihil inciperet, & prorsus amittere levem, quam antea servarat, Exacerbationis, & Remissionis umbram, tandem post alia remedia inutiliter administrata tractata est Cortice *ad drach. ss.* exhibito bis indie, protestatione tamen præmissa de incertitudine juvaminis in circumstantiis hujusmodi. Licet autem ad nonnullos dies

productus fuerit illius usus, nihilominus Ager sensim consumptus Fatis cessit. Neque diuturna admodum fuit Ægritudo, quippe (ut mecum animadvertibat Medicus curans) priusquam Corticem præscriberemus, Febris illa aliquem jam acutiei characterem suscipere incœperat. Pectus huic Juveni erat non bene dispositum; alias enim de Phthyfi fuerat ille suspectus. Graveolens erat eidem halitus, tussisque molesta cum sreatu materiæ crassioris, minime tamen purulentæ. Quare præcordia saltem non bene constituta fortassis habebat. Alios tamen interim pejus habentes, magisque de Tabe suspectos, ut in Historiis supra relatis, Cortice sanatos vidi.

Hinc elucescit, remedium istud strenuam operam non semper quidem, sed tamen sæpius navare in curatione Februm Hecticas æmulantium, præsertim in ætate citra completos pubertatis annos constituta, necnon in aliis etiam ætatibus, dummodo circumstantiæ congruentes pro illius utili administratione concurrant, ut de aliis quoque Febribus naturæ ancipitis abunde jam dictum est, nec tamen forsitan dictum satis.

Ne igitur hac in re maximè momenti, a qua non raro pender Hominis Vita, decipiantur Tyrones, aliive parum versati, quibus cuncta, quæ diximus, post absolutam Tractatus hujusce lectionem [siquidem integram, ut prolixiorem ferre poterunt] facile forsitan memoria excident: idcirco ante complementum ejusdem Tractatus placet hic pro faciliiori, commodiori, & regulati usu Remedii, quoddam veluti locali memoriæ specimen cunctis exhibere in *Arbore* infra delineata, quæ universalem, quantum sat est pro re, de qua agitur, Februm Genesim, & frequentiores earum metamorphoses, atque idcirco congruentem quibusdam, & quibusdam non congruentem, immo & eidem Febri opportunam uno tempore, & alio non opportunam Corticis administrationem comprehendit. Pro cujus itidem *Arboris* clariore intelligentia, e re erit summam præmittere sequentis Pagellæ monita.

*Expli-*



*Explicatio Arboris generatim.*

**A**RBOR hæc simulat ( neque enim graphice potest exprimere ) Plantam, cujus Cortex *China China* dicitur. Et quoniam ab Hispanis vocatur illa *Palo de las Calenturas*, referente *Bado*, quod idem sonat, ac *Lignum Februm*, propterea nos quoque commodam hîc loci nomenclaturam eandem retinendo, Categoriam Februm ordine ad rem nostram magis, quam ad ritus scholasticos accommodato ( non enim rigorosam Februm Synopsim primario describimus, sed illarum obtemperantiam, vel reluctantiam Cortici ) volumus insculptam eidem Arbori, Febres ipsas, quas exhibent, magna ex parte extinguenti, cui prælusimus jam altera, utut pusilla *Icone*, simulque *Lemmate* sitis in fronte ipsa Tractatus.

Quia vero tota *Vis insita* est mero Arboris *Libro*, seu puro illius Cortici, nec ultra ipsum extenditur: propterea Febres, quas Cortex certo sanare solet, in nodis Ramorum Cortice obductorum, ideoque & fronde insignitorum, inscribi curavimus; quas vero Cortex non solet sanare, sculpi iussimus in nodis Ramorum decorticorum, omnique propterea fronde carentium. Quas tandem modo sanat, & modo non sanat idem Cortex, incisas volumus in nodis Ramorum secundum medietatem decorticorum, & secundum aliam medietatem Cortice obductorum: quod quidem ea, qua potuit, diligentia, & arte conatus est Sculptor exprimere, ut scilicet dimidia pars Rami, ut sic dicam, Hermaphroditi, duplicisque generis faciem præseferentis, productorem suum decorticatam respiciens, dirimatur, quantum licet, ab alia medietate, productorem suo Cortice tectum respiciente; idque pariter in ipsa Februm transmutatione, ubi tenuiores sunt surculi, mens fuit aliquo modo adumbrare, ut quantum fieri potuit, innotesceret, usquequo in ipsa etiam metamorphosi sit locus, vel non sit usui Corticis, quemadmodum attente consideranti patere poterit.

Ob eandem rationem non una ex istis

transmutationibus, propter quas in aliam naturam Febres degenerant, in eadem Arbore expressa visitur, vi cujus metamorphoseos identidem contingentis Febres nonnullæ de admittentibus Corticem evadunt non admittentes, & e converso. Hinc emergit quidam veluti earum Circulus imperfectus, quo mediante fere quælibet transit in quamlibet, ubi scilicet aliqua sit symboleitas. Sic Intermittentes omnes migrant facile in Continuas, & plurimæ Continuæ nonnunquam in Intermittentes. Intermittentes pariter ab una specie migrant in aliam, ut Tertianæ in Quartanæ, & e contra. Continuæ quoque plurimæ, etiam ab Intermittentibus ortæ, transire possunt in Hecticam, ut Lentæ, vel etiam Acutæ, & Ardentæ, ab iisdem Intermittentibus primitus ortæ. Unde vere quævis in quamvis potest transmutari, ut dicebam, dummodo non adsit inter illas omnimoda dissymboleitas, aut impropertio. Sic Hectica *v. gr.* non potest in Ephemeram, aut Tertianam Intermittentem degenerare cursu retrogrado, etiamsi in aliis casibus detur, aut debeat intelligi in Arbore nostra aliqua Februm plurimarum Circulatio non modo a Ramis majoribus ad minores, & a minoribus unius majoris ad minores alterius, sed & mox a minoribus ejusdem ad ipsum majorem, ordine, si non plane inverso, saltem quodammodo circulari. Quia ergo transmutationes omnes prosequi non est possibile sine confusione, nimiaque implicatione ramorum Arboris, sufficiat pro modulo adumbrasse potiores. Exemplo sint variæ metamorphoses Discretarum in Subintrantes, & Subintrantium in tandem Hecticam. Idem subintellige de Lentis etiam ex radice Intermittente prodeuntibus, aliisque in eandem Hecticam degenerantibus, de Benignis in Malignas conversis &c., intellige, inquam, hæc & similia, ne isthæc Februm divisio manca magis videatur ac sit, vel distributa in membra non satis opposita. Et hæc universim de constructione *Arboris*,



## Explicatio Arboris particulatim.

(A) **E**xhibet Ramum decorticatum, & segregatum ab aliis, Febrium, ut ajunt, SIMPLICIUM.

*Triplices, ut Benigna, putet quispiam, id, quod satis notum est, eo quod subscitur, excludi.*

(B) signat Ramum pariter decorticatum CONTINUARUM CONTINENTIUM PUTRIDARUM, ut ajunt, tam ESSENTIALIUM, quam SYMPTOMATICARUM &c.

*Notanda hic occurrit coalescentia (h) duorum ramusculorum, quorum unus ab ESSENTIALI COMITATA procedit, alter a SYMPTOMATICA FIXA, & ambo in unam INFLAMMATORIAM (intellige hoc nomine & ERYSIPELATOSAM) uniuntur, utrique communem. Pariter notandum, differentias individuales Febrium inde prodeuntium, nec non aliarum plurium positas esse pro exemplo innumerabilium.*

(C) denotat Ramum itidem delibratum, & Spurium Continuarum REMITTENTIUM SIMPLICITER, ex quo asurgit pro medietate Ramus Hermaphroditus PROPORTIONATARUM.

(D) ostendit Ramum suo Cortice polentem Febrium INTERMITTENTIUM DISCRETARUM, & specierum frequentiorum earundem, tam benignarum, quam malignarum.

*Character tamen malignitatis, Continentibus etiam, & Proportionatis saepius familiaris, exprimitur in solis Intermitte-ribus, immo in solis TERTIANIS, inter Intermitte-ntes potioribus, idem subintelligendo de aliis Intermitte-ntibus, in quibus peculiares, minusque observatas Febrium differentias constituit. Neque per hoc, quod eadem Maligna Intermitte-ntes non conspiciantur divisa in Simples, Duplices, vel*

(E) repræsentat Ramum suo pariter Cortice velatum, Spuriumque, Febrium Intermitte-ntium SUBINTRANTIUM, qui pro altera medietate producit Ramum Hermaphroditum PROPORTIONATARUM.

(F) exhibet ipsum Ramum Hermaphroditum Febrium PROPORTIONATARUM pro medietate velatum suo Cortice, & pro altera medietate nudum, parte nempe, qua respicit Intermitte-ntes, Ramumque Spurium SUBINTRANTIS, Cortice præditum, qua vero respicit Continentes, Spuriumque Ramum REMITTENTIS, decorticatum.

*De hoc Ramo generaliter notandum est, illum, paucis licet surculis, respectu ad alios habito, insignitum, esse tamen plurium divisionum capacem, quas hic repetere minime placuit, non secus ac Rami Continuarum, & Intermitte-ntium, a quibus proficiscitur; siquidem Proportionata quoque, præ cæteris Febribus in praxi frequentissima, vel simplices sunt, vel duplices &c.: item, vel Solitaria, vel Comitata, & vel Coagulativa, vel Colliquativa &c. Sed hic ad confusionem evitandam, sat est exposuisse quod ad intentum facit.*

(GGGG) monstrant, mediis complicationibus exiliorum aliquot surculorum, a Ramis majoribus prodeuntium, vulgatiores (saltem Antiquis) Febrium de genere quovis putrido Complicationes. Implicatio siquidem Hecticarum cum Putridis de Intermitte-ntium genere, neque ulla cum utilitate, neque sine confusione exprimi poterat.



## Ramusculorum Arboris minutiores Notæ.

(a) **I**ndicat transmutationem CAUSONIS, seu Febris ardentis, in Hecticam.

(b) transmutationem Synochi ACMASTICÆ in eandem HECTICAM innuit.

*Idem de pluribus aliis, ut dictum est, intelligas velim.*

(c) duarum pariter Symptomaticarum, scilicet MARASMODIS Lentæ, & TABIDÆ Ulcerosæ, insertionem in eandem indigitat.

(d) denotat ejusdem TABIDÆ, & MARASMODIS mutuum coalitum.

(e) exprimit metamorphosin Tertianæ Simplicis SUBCONTINUÆ Malignantis in Tertianam CONTINUAM ACUTAM, pariter Simplicem. Intellige quoque Malignam.

(f) binam comprehendit metamorphosin simul coincidentem, quarum una est ejusdem Tertianæ SUBCONTINUÆ

MALIGNANTIS, ACUTÆ, ac DUPLICIS factæ, altera Tertianæ Duplicis Intermittentis Benignæ, primò SUBINTRANSANTIS, mox ACUTÆ pariter factæ, in eandem Tertianam Duplicem Continuum.

*Idem intellige de Quotidiana, de Quartana triplici &c., quæ omnes de Subintransantibus in Acutas æque transire possunt.*

(g) notat utriusque recensitæ Febris ab ortu Intermittentis, mox in Continuum Proportionatam conversæ, ulteriorem propagationem, & transmutationem in ACMASTICAM.

(h) denique indigitat per modum exempli communionem originis plurium Febrium de genere inflammatorio, modo ad ESSENTIALES COMITATAS, modo ad SYMPTOMATICAS FIXAS pertinentium, ut notavimus in explicatione Rami (B).

*Intellige quid simile de pluribus aliis, tam ejusdem, quam diversi generis. Cætera per se patent.*

## CAPUT VI.

*Enodantur nonnulla Quæsitæ variis titulis comprehensa circa usum etiam ulteriorem Peruviani Corticis.*

Et Primò

*Quæritur, an ille conveniat aliis Morbis, præsertim periodicis, præter Febres; nec nisi cunctanter, creditur, spectatis exemplis.*

**V**IRTUTEM Peruviani Corticis adeo mirandam in Febribus tum clare, tum etiam subobscurè periodicis, nullam prorsus esse in aliis Morbis, & præsertim in iis, quibus ratione cujusdam, qualiscunque Circuitus, aliqua videtur inesse cum Periodis Febrium proportionalis analogia, sibi adhuc nonnulli, nec plane forsan immerito suadere nesciunt. Neque caret auctoritate plurium Viro-

rum illustrium hujusmodi opinio. Sebastianus liquidem Badus putat, Corticem prodesse posse in omnibus affectibus frigidis, & diuturnis, affertque testimonium Hieronymi S. Sophia celebrantis illum in Catarrhis, & Rheumatismis, in Ventriculo firmando, & signate in affectibus Hypochondriacis, pro quibus pariter curandis valere Corticem, probat insuper idem Badus auctoritate Nicolai Susannæ, & Christophori Paravicini, quibus addit Nigrifolus etiam Malpighium; quod & ex ineditis illius Consultationibus ipse nonnunquam deprehendi. Monginotius conjectat huic Cortici, etsi in alios usus hactenus traductus non fuerit, quam ad Febrium curationem (utor ipsis ejusdem verbis) Naturam tamen alias proprietates indicas certo indidisse pro superandis in genere, aut impediendis quibusdam aliis fermentationibus alios morbos inducentibus, illis præsertim, quæ ortum debent



bent exuberantiæ succorum accidorum. Ob id & ipse pro affectionibus hypochondriacis, & hystericis præstantissimum remedium appellat. Laudat item ad obstructions Lienis, Mesenterii, aliarumque partium, ad suppressiones quarundam evacuationum naturalium, ac proinde ad Chlorosim, aliosque affectus istis finitimos, propriamque experientiam in testimonium adducit, & alienam invitat. *Blegnyus* eundem Corticem, cuicunque Febris speciei destinetur, vel morbo, quem vaporis nomine donant (adversus quem Chinam Chinam eximiam credit) omni hydropis speciei, aut alteri cuiuspiam ægritudini, sive illius substantia, sive infusio, sive tinctura &c. exhibeatur, suo semper fungi munere, pro certo habet. *Morton* ad morbos omnes quoquo modo periodum habentes videtur admittere, atque præscribere, præsertim ubi absconditum latere posse credat febrile fermentum; idque probare nititur etiam ex curatione hemigranæ periodicæ habita in se ipso. Nec quid absimile quadam Epistola ad me conscripsit Accuratissimus rei anatomicæ Cultor, atque Promotor *Pacchionus*, Ophthalmiam videlicet periodicam, simulque vehementer dolorificam, & epilepticos insultus proxime minitantem, Cortice curatam asseverans in quodam Eminentissimo S. R. E. Cardinali. Eundem Corticem mirandas vires habere in confortandis spiritibus, & ad sanam, firmamque corporis crasim restituendam Viris hypochondriacis, & hystericis fœminis, dejecta jam quasi corporis œconomia, *Thomas Sydenham* propria observatione ratum facit, additque, magis conspicuum esse remedii effectum in illa hystérica affectione, qua Mulieres *spasmi* affectæ nîsus edunt fortissimos, & plusquam muliebres, pectora simul ferientes &c., quam in aliis. Lumbricos illum necare, & pellere, plurimi autumant; idque sibi multiplici experientia compertum esse, Cl. *Ramazzinus* asserit pluries in suis *Constitutionibus*, necnon Erudit. *Lanzonus* peculiari observatio-

ne. Dolorem Ventriculi acerbissimum stata hora qualibet die recurrentem Cortice feliciter a sollertissimo rerum naturalium scrutatore, Clarissimo scilicet *Vallisnerio*, sanatum legi. Antiepilepticam, quod magis miremur, esse Chinam Chinam, ipse, qui expertus est in casu nobilis Pueri Epilepticis insultibus una cum Tertiana Febre detenti (quo tamen casu ego eam respicerem potius ut mere Febrifugam) scribit *Tozzius*, *De Epilepsia*, credulitatem insuper suam aliis etiam experimentis innixam, innuens. Ad Asthma quoque convulsivum per intervalla recurrens, eandem proficuum esse, nonnulli asserunt: demumque accepi ab Excellentissimo *Corghio*, Mantuæ Medicinam exercente, historiam super hac re notatu dignissimam, quam ex illius Epistola ad me conscripta fideliter excerptam huc transferre non piget. Est autem huiusmodi.

*D. Comes Franciscus Cajetanus Ferrarius* Mantuanus, optimæ indolis Adulescens, mihi que sat notus, quandoquidem pluries illum Mutinæ decumbentem curavi, dum in eximio hoc Nobilium Collegio Convictor degeret, Anno 1709. ætatis vero 23., labente Octobris mense, ut habeo ex enunciata Epistola, correptus est Tertiana Intermittente, quæ in vigore accessioni gravem inferebat anhelitus difficultatem, veri Asthmatis æmulam. Ope Chinæ Chinæ sublata Febre, sublata est pariter difficilis respiratio, remanente tantummodo ad tempus aliquod [hypochondriaca quadam affectione, quæ pariter remediis opportunis curata est. Circa medietatem Aprilis anni subsequents, nempe 1710. iterum correptus est Febre, sed Continua, & ad acutam vergente, atque [ut puto] periodica, quam vehemens Asthma convulsivum comitabatur. Affectio isthæc ad plures dies omnia Medicorum, & remediorum conamina elusit; vixque bis, aut ter, spirituosis antiepilepticis ad breve temporis intervallum auscultasse visa est; sed paullo post æque recruduit. Itaque omnibus irritis, habita demum natione tum prioris morbi, & cura-

ratio-



rationis illius, tum affectionis hypochondriacæ ipsi priori morbo superstitis, tum sensationis cujusdam molestæ, superius orificium Ventriculi, totamque Mesenterii regionem occupantis, tum denique motus cujuspiam alterni, quo hujusmodi sensatio una cum convulsivo Asthmate recrudescerebat, sancitum fuit a curantibus Medicis, Corticem rursus offerre: quo *ad duas uncias* successive propinato, & Febris & adjunctum symptoma simul evanuerunt. Nonis Maji revixit Asthma solitarium, scilicet sine Febre, & cum molesto tantum in partibus jam memoratis sensu. Repetitus ideo est Cortex; & *trium unciarum* assumptione extinctus est morbus. Continuatum est per plures dies ad præcautionem remedium; vixque eodem omisso, fortior rediit morbus, sine Febre tamen, ut & deinceps semper: assumptis vero rursus *totidem unciis* Chinæ Chinæ substitit. Diutius propterea usurpatum est idem medicamen ad prophylaxim; sed eo non obstante, circa medietatem Julii æque ac ante insurrexit Asthma. Mutato proinde consilio, ad alia remedia animum convertere iidem Medici; sed nulla unquam arte datum fuit morbum compescere, nisi facto ad Corticem reditu, cujus Extracto antiepilepticis mixto, necnon solitaria illius infusione, eodem tempore utiliter sunt usi. Morbo vero jam declinante, ad Thermales Aquas confugerunt, quibus feliciter vias permeantibus, bene habuit Pater usque ad Decembris initium. Eo autem tempore, novo invalescente Asthmatis insultu, eodem medicamine sedatus est. Tunc memoria recolentes Medici levamen, quod intulerant Thermale Aquæ, statim ad valentiora diuretica transitum fecerunt, quibus valetudinem antea dubiam, subinde firmam, ac stabilem Ægrotanti reddidere.

In hoc sane casu (si quid liceat animadvertere) China China nonnisi simplicis Febrifugi munere functa est ab initio; Febrim enim pellendo, adjunctum quoque symptoma difficilis respirationis indirecte tantummodo visa est

sustulisse; ipsa vero Febris tam primò, cum fuit Intermittens, quam deinceps, cum rediit Continua, videtur fuisse de Perniciosarum Comitatarum stirpe, quarum Inconem aliquam nobis exhibuerunt *Mercatus pag.* hujus Tractatus 120., necnon *Mortonus pag.* pariter hujus Tractatus 131. In progressu autem cum Asthma solitarium redditum, & depulsæ jam Febris superstes, eadem China China pluries compescuit, in ipso tunc Asthmate a Febre olim primitus excitato, febrile fermentum adhuc quoquo modo latuisse suspicaretur *Mortonus*. Et revera difficilis illius respirationis radicem, si non plane intra Focum febrilem, saltem infra Septum transversum quærendam potius esse, quam supra illud, aut intra Thoracem, satis patefacere visa sunt accidentia concomitantia; quare quod hac occasione contigit Cortice adhibito, forsitan haud ita facile in Asthmate primario, ac idiopathico æque eventurum licebit conjicere.

Denique ut ad institutum redeam, eundem Peruvianum Corticem haud exiguis pollere viribus ad ipsam demulcendam sævitiam, & modificandam Causam Arthritidis, aliorumque hujusmodi affectuum identidem recurrentium, non desunt, qui affirmant. Quoad me tamen observavi non semel, hominibus arthritidi obnoxiiis, atque a Febre periodica per Chinam Chinam curatis, podagram sibi familiarem paullopost supervenisse, eosque ab omni in febres relapsu præservasse. Certe hisce casibus China China febrium causam reprimens, arthritidis causam nequaquam repressit, sed potius eam specie Criseos cujusdam visa est excitasse. Accepi nihilominus a præclaro quodam Concionatore ex Ordine Cler. Regul., se ad sedandos dolores podagricos, quibus crebro obnoxius erat, Chinam Chinam pluries usurpasse ex consilio cujusdam P. Capuccini, testem expertum se perhibentis, modo *ad sesquidrachmam*, modo *ad drachmas duas* cum magno levamine, itaut assumptis tractu 20. dierum *unciis duabus & semis* cititer



ter Corticis, valuerit intra illud tempus cum exiguo cruciatu a podagra liberari Hyemali tempestate, cum cæteroqui longe diutius, atque crudelius vexari consuevisset. An prædicta omnia vera sint, an sibi blandiantur aliquando tam speciosa asserentes, non parum ambigo, præsertim cum identidem neget unus, quod alter asserit, & uterque propriam experientiam adducat. Cum enim lis agitur inter duos Cortice utentes, præsertim Professores Artis, incertitudinem eventus satis probat assertio hinc inde opposita, quod nonæque conringit, quando ab aliquibus non expertis, & perperam præoccupatis negantur cæco quodam modo de eodem effectus palpabiles, quales in hoc Tractatu retulimus: hujusmodi enim controversia, quæ cadere nequit nisi inter Medicum Cortice utentem & inter non utentem, vel raro, & sine Methodo utentem, nullius justæ incertitudinis index esse potest.

Super hac re si mihi dicendum sit determinate quid sentiam, quidve sim expertus, haud erubesco fateri, me nec satis compotem esse opinionis, nec, quod magis est, experientiæ meæ; nam quoad primam, nimis alta, & inaccessa est, jam non dicam luminibus, sed potius fugacibus coruscationibus intellectus mei Virtus Corticis, ut de illius efficacia valeam hic & nunc a priori differere, aut ita opinari, ut cunctis placeam: quo vero ad secundam, ea adeo me semper cohibuit Obrectatorum Corticis dicacitas, ut illum in casibus, morbisve, in quibus nondum communi voto sufficiens creditus est, raro propinare sim ausus, etsi citra omnem penitus periculi aleam id fieri potuisse: qua via conatus sum — *posticæ occurrere sanæ* — quam cæteroqui declinare, non succedente effectū, nullatenus licuisset. Ut ergo videatur parum decere de rebus hisce haud satis expertum loqui, eni nihilominus quod ex manca, nec plane completa observatione mea circa prædicta potis sum edere: satius est enim [ut agebat Famigeratissimus Borellus] pauca, & minus elaborata, quam nihil ad Poste-

ros transmittere, ut scilicet (subdam cum Plinio) quatenus nobis denegatur diu vivere, relinquamus aliquid, quo nos vixisse testemur.

Si ergo reminisci liceat eorum, quæ diximus hæsitanter *Libro I.* circa virtutem Corticis, & circa succos in Februm Intermittentium curatione ab eodem probabiliter correctos sive per absorptionem peculiarem, sive per aliam quamlibet salium peregrinorum iisdem inexistentium retusionem: itidem quæ sumus effati circa vias, vasa, & loca, in quibus vividiorē conservari, ac exerceri suspicati sumus illius activitatem, non abs re erit pariter opinari, quod in morbis, qui suam sedem potissimum in Ventriculo, Intestinis, Mesenterio, Glandulis, Ductibusque Chylo-lymphicis obtinent, aliquid opis afferre possit, saltem ut afferre creduntur alia remedia actionis lentæ, minusque conspicuæ. Ob id in morbis hypochondriacis appellatis, & benignius acceptis, in Apepsia, Dyspepsia, indeque ortis affectionibus, non plane rejiciendum arbitramur. Et licet captu non sit admodum facile, quo pacto Cortex Febrifugus possit opitulari Hominibus hypochondriacis, humores parum dispositos ad febricitandum habentibus: nihilominus, quotiescunq; experientia respondeat, credi potest id fieri ea ratione, qua Melancholici, seu Hypochondriaci, & Quartanarii censentur humoribus consimilibus præditi: adeoque censendi videntur eodem quoque remedio curabiles. Utcunque, Corticem restaurare infirmas Ventriculi coctiones, ac inde habitum corporis firmiorem inducere, tono viscerum, infimi præsertim ventris, non solum restituto, sed & in meliorem statum redacto identidem obviam est. Circa quod consideratione digna videtur observatio *Mortoni* — *De Proteiformi Febris Intermittentis genio*, quæ observatio prostat in illius *Historia* 29., alias etiam a nobis memorata; In ea siquidem describitur *Vetula elumbis, ac paralytica*, & LXVII. annum ætatis agens, quæ post assumptas tractu temporis libras duas *Chinæ Chinæ*, quadante-



nus iterum juvenescere visa est, appetitum integrum, & firmam valetudinem brevi consequuta: jamque ubi octuagesimum aetatis annum pene attigit, vultu vivaciori, ac animo hilariori praedicta apparuit, corpore magis erecto, & gressu magis cito, ac firmo incedens, quam ante usum Corticis. Proinde affectionibus etiam suprarecentis, quæ simul hypochondriacarum nomine audiunt, quæque a vitiata digestionem ut plurimum pendere solent, proficius idem Cortex, quoquo saltem modo, censendus videtur.

Memini & ego [ne propria experimenta sub ticeam] me cuicdam Adolescentulæ hujusmodi affectibus male vexatæ Corticem cæteris non proficientibus præscripsisse; cumque ab ejus usu convalesceret, puto non sine aliis quidem rationibus, quod convalesceret ob ejus usum: cum tamen id non immediate contigerit, neque frequentia prostant hujusmodi exempla, quod hic conjecto; non ea certitudine assero, quæ Perniciosas Intermitteutes sanatas asserui. Patiebatur illa a duobus jam mensibus assiduum stomachi angorem cum frequentissimis vomitionibus materiæ acidæ, ac ciborum assumptorum, & cum ventris rugitibus, ac eructationibus valde molestis: identidem tentabatur Febriculis levioribus, sed per inæqualia, & sæpius valde distantia, nonnunquam & brevialia intervalia recurrentibus, quæ solvebantur levi sudore; & quandiu Febris aderat, cætera leniebantur symptomata, eadenque iterum ea deficiente suscitabantur. Maciem illa contraxerat admodum insignem, viriumque imbecillitatem, quæ vix sinebat eam e lecto surgere. Plura, & varia pro varietate circumstantiarum fuere a me præscripta remedia toto morbi decursu. Sed nec oleosa ad leniendos angores, nec restacea ad absorbendum acorem, nec salia fixa ad roborandas fibras, nec aperientia ad referendas vias, nec lenientia epicraticæ præscripta ad abstergendas sordes, quicquam profecerunt. Uno verbo, non *Rhabarbarum*, non *oleum amygdalarum*, non *serum ca-*

*prile*, non *juscula alterata*, non *sal Absynthii*, non *tinctura*, nec *magisterium Martis*, non *lac sive chalybeatum*, sive *coctum*, non aliud denique medicamentum visum est morbum dimovere a consuetudine sua. Solus Peruvianus Cortex ad drach. ss. per viginti circiter dies oblatus utranque paginam implere visus est; quod & in aliis quoque casibus non longe absimilibus [sorte quidem vel tardiore, vel minus conspicua] mihi nonnunquam contigisse, possum testari; sed æque possum testari, alias etiam cum nullo plane successu idem remedium me exhibuisse. Immo cum aliquando Uxorem meam ex Tertiana Cardiaca Spuria curassem Cortice, ut in Historiis retuli, plurima postmodum, etiam sibi familiaribus molestiora incommoda de genere hypochondriaco eidem successisse memini. Quamobrem etsi Corticem in recentis casibus prodesse aliquo modo identidem credam; tamen, nec tam certo, nec tam cito, nec tam insigniter prodest, ut prodest in Febris. Insuper cum ex duobus casibus *Lib. I. Cap. X. hist. iij. & iv.* relatis constet, febribus depuratoriis intempestive per Corticem suppressis gravia symptomata convulsiva, sive hypochondriaca emeruisse, quædam videtur inde elici posse conjectura, quod etiam citra Febrim in iis saltem affectionibus hypochondriacis, quæ non in mera ventriculi male coquentis dyscrasia consistunt, sed in nervoso universaliter genere alta jam convulsionum jecere semina, plane tutum non sit eodem remedio indiscriminatim uti; etsi illud idem in Febris Corruptivis, & præcipue in Perniciosis, sive plane Intermitteutes illæ fuerint, sive ab ortu de Intermitteentium stirpe, easdem fugando, omnia convulsiva symptomata ab iis producta strenue submoveat.

Ad Lumbricos necandos utilem esse posse, suadere videtur illius amarities, succis omnibus Intestinalibus, ubi hospitantur illi, facile communicabilis: siquidem verum sit, ut vulgo creditur, amara Lumbricos necare: quod tamen cum experimentis Clarissimorum *Redi*, ac *Val-*



ac *Vallisnerii*, neque cum meis antequam hæc primò ederem institutis concordat. Utcunque hæc sint, & quacunque ratione fiant, ego in Febris periodicis, quas Vermes potius comitabantur, ut reor, quam producebant, pluries Corticem propinavi cum successiva Febris, & Lumbricorum depulsione, cujusmodi exemplum vidi (non me quidem remedium præscribente, sed aliis Medicis) in *D. Comitissa Blanca* Febricitante, ac utero gerente, quæ post assumptam per aliquot dies Chinam Chinam copiosos Lumbricos per alvum excrevit. Observavi pariter Mercatorem quemdam Venetum, duplici Quartana Mutinæ laborantem (cui post horam ab assumpta me præscribente China China, Accessio inexpectata præter morem supervenit) Lumbricum post tres horas vomitu rejecisse satis insignem. In Historiis quoque nostris casus hujusce generis visitur *Lib. IV. Cap. III. Hist. IX.* habeoque insuper aliud exemplum a Juniore Medico Praxim mecum jam exercente, quod hic subdam. Curabat ille Puerum Febre Tertianâ simplici laborantem, quæ præter consueta, & consuetis etiam graviora symptomata insigni insuper intulerat delirium, maximam pulsus inæqualitatem, necnon totius corporis convulsivos motus cum halitu verminoso, & subcinereo fœcum colore. Cum autem symptomata hujusmodi in dies majora fierent, præscripsit ille circa quartam, vel quintam Accessionem Ægro admodum debili Peruvianum Corticem imminuta, sed repetita dosi: quo remedio ad quatuor dies assumpto, nedum Febris, verum & verminosa symptomata evanuerunt. Febre vero jam penitus abolita, & continuato nihilominus usu Corticis, verminosæ dejectiones subsequutæ sunt, quibus absolutis cito Æger, & plane convaluit. An utrique morbo in recensitis Casibus æqualiter adversatus sit Cortex, an uni Febrî, ad cujus solutionem quasi per accidens sit consequuta Lumbricorum excretio, præcise non novi; siquidem in affectu verminoso solitario haud satis mihi conti-

git Corticem experiri, ut meam alienæ possim vel opponere, vel juxtaponere experientiam.

De experimentis circa hanc rem extra humanum corpus a me, ut supra innui, aliquando institutis, modo nolim intelligi, utpote quibus haud satis forsitan fidendum est. Etenim, cum in iis adversus solos Lumbricos Vitulinos, atque Terrestres vini Corticis explorare tentaverim, fortasse haud satis efficaciter ab his ad Humanos licet quicquam arguere; quod enim uni Lumbricorum generi adversatur, id alteri potest forsitan congruere, & e converso. Ut enim in diversis speciebus Corporum Vermes internos alentium diversæ sunt eorundem Vermium species, ita diversum cuilibet eorum speciei potest convenire, aut adversari pabulum: etsi minime inficiet, dari posse nonnulla quibuslibet hujusmodi Insectorum speciebus pernicialia, qualia vulgo censentur, *Petroleum, Mercurius, Viride aris* &c. licet hæc veretalia, qualia putabam, ego non deprehenderim. Verum quamvis etiam licuisset mihi Lumbricos humanos [quos minime quærens sæpius inveni, rarius autem cum quæsi] facile ad manus habere, & ad experimentum paratos, adhuc tamen mihi metipsi haud integre satisfecissem. Hujusmodi etenim Vermes vel ab Hominibus ægrotantibus excreti, vel e denatis per sectionem extracti, possunt & ipsi ægrotare quodammodo, aut male se habere, & propterea inæquali inter se robore pollere: ut proinde eorum aliqui diutius, aliqui brevius possint in diversis liquoribus vivere, absque eo quod ad eorum citiorem, vel tardiorum necem liquor ipse multum contribuat, ut eosdem ab Ægrotantibus excretos modo citius, modo tardius sponte naturæ mori, observamus. Atque ideo neque hac via quid plane certi mihi visus essem deprehendere, etsi in amara *v. gr.* Corticis infusione Lumbricus aliquis humanus citius obiisset, ac obiisset in alio liquore alius consimilis; ut omittam (quod nostrorum experimentorum incertitudinem auget) cuncta, quæ a nobis in



bis in hujusmodi experimentis adhibentur, remedia, a succis, aut fermentis postmodum nostris alterata, probabiliter sortiri posse activitatem diversam ab ea, quam extra humanum corpus præferunt. Hac etiam de causa de seligendis humanis, non æque semper, ut dictum est, inventu facilibus, sollicitus non fui; sed Vitulinos tantum, atq; Terrestres, eosque quoad exteriorem apparentiam inter se æqualiter vegetos arripui, & uno, eodemque tempore in amaricantem Corticis infusionem, ac in diversos alios liquores conjeci, observaturus quinam esset eis locus infestior. Atque Vitulinis equidem Lumbricis primario lubenter sum usus [quod antea a quoquam institutum minime novi] quoniam cum Vitulorum æque ac Puerorum vivo hoc morbo laborantium valde similis sit odor, tum eorum halitui, tum omnibus etiam illorum excretis, immo & ipsis carnibus inexistens: propterea nec paucam inter utrosque Vermes intercedere symboleitatem, persuasum habui. Quamvis autem hinc nonnisi incertas, nulliusque forsan soliditatis conjecturas quis valeat elicere, minime tamen gravabor referre obiter, quæ observari in eo, quod spectat ad institutum nostrum. Cætera altioris indaginis quærenda apud *Cl. Valisnerium*, pluribus quidem in Lucubrationibus Illius, sed potissimum in elaboratissimo ejusdem Opere circa Vermium humani corporis Originem, ac Genesim, ubi peculiare edit observationes summa cura, ac diligentia institutas, singularemque suam proponit in hac materia, roboratque sententiam, naturalium Philosophorum studio, ac animadversione dignissimam.

Itaque ut rem perstringam, extracta e Vituli recens mactari intestinis numerosa Lumbricorum familia, Lacte, & Chylo inebriata, unum ex illis singillatim, & statim in unoquoque ex hisce, quos mox referam, liquoribus, magno vigente Æstatis calore, uno ac eodem tempore demersum volui, nempe in *Petroleo flavo*, *Mercurio*, *Aceto*, *Vino*, *Bile bubula*, *succo Absynthii*, *Oleo com-*

*muni*, *Mellicrato*, sive *Aqua mulsa*, Infusionibus *China China*, *Aloes*, *Colocynthis*, & *Viridis aris*, factis in Aqua communi, conjunctaque simul ipsa rerum infusarum substantia.

Statim ac in hosce liquores fuere conjecti Lumbrici Vitulini, observabiles admodum fuere motiones, & contorsiones eorum ad finem usque spectaculi hoc ordine servato, nempe ut insigniores apparuerint primò quidem, ac valde notabiliter in infusione *Viridis aris*, deinde in *Petroleo*, mox in infusione *Colocynthis*, & tandem *Aloes*. In cæteris liquoribus modicæ tantum, nec specialiter observabiles extitere eorum motiones, connumerando inter fluida, ut mos est, ipsum Hydrargyrum, in quo identidem vi illata submergebatur Lumbricus, qui aliquo etiam nonnunquam Mercurii granulo exterius onustus emergebat. Huic postmodum Aqua simplex superaddebatur, ipsius præexistentis Mercurii agitatione, quantum licet, roborata, qua Lumbricus ab externi aeris immediato contactu, ac injuria tutus evadebat.

Decem horarum spatio tota series experimenti instituta est, cujus progressus is fuit. Post horas sex elapsas primus obiit Lumbricus in *Aceto* demersus; post horas octo demersus in *Vino*; demersus autem in *Bile Bubula* [quæ mihi visa est hac occasione graveolens, ac male habens, magisque diluta, & minus ponderosa ac apparuerit in experimentis *Lib. I. Cap. III.* institutis, atque relatis ad exploranda *China China* phænomena, ut proinde facile credam, in omnibus individuis etiam ejusdem speciei non esse idem pondus, sicuti non est eadem consistentia bilis eorum] demersus, inquam, in hac bile mortuus est post horas novem circiter, & post novem pariter pro mortuo habitus, qui in *Mellicrato* positus fuerat, licet revera nondum plane extinctus, sed tantum ab interitu parum distans fuerit postmodum deprehensus.

In cæteris liquoribus omnibus vivebant adhuc, & quidem vegeti, suosque motus



motus [ in quatuor præsertim liquoribus paullo supra recensitis ] jugiter edebant: cum ego rædio quodam affectus, ad comparandam aliquam spectaculo novitatem, hos alios super liquores assumpsi, nempe *Vini spiritum*, *succum Alii* cum tantillo Aquæ solutum, & *Oleum Magni Ducis* Hetruriæ ad Vermes necandos, cum pauxilla pariter Aquæ portione commixtum. Singulis hisce liquoribus unum Lumbricum indidi, ut in reliquis a primordio peregeram; immo illum, quem in Oleo Magni Ducis, ut supra, infundere meditabar, eodem Oleo prius oblinivi, ac postmodum in antedictam mixturam conjeci. Paullopost Lumbricum in *Vini spiritu* submersum emori observavi: quod mihi incitamento fuit, ut alterum substituerem, qui pariter brevi eandem sortem subiit, ut & tertius secundo extincto statim substitutus. Interim cum reliquos vitam facile protrahere in aliis liquoribus observarem, nempe in *Oleo communi*, *Petroleo*, *Mercurio*, *succo Absynthii*, & *Alii*, *Oleo Magni Ducis*, infusione *China China*, *Aloes*, *Colocynthis*, & *Viridis æris*, necem illorum sum meditatus, eos a liquoribus, quibus innatabant, extrahendo, & in *Vini spiritum* conjiciendo: qua via singuli successive brevi interibant; scilicet non modo ii, qui in primis condebantur liquoribus, verum & ii, qui postremo, ut dictum est, in *Alliorum succo*, & in *Oleo Magni Ducis* fuere conditi, ubi scilicet, post horam circiter, viventes adhuc placide morabantur. Tam notabilis autem fuit celeritas necis eorum in *Vini spiritu*, & agitatio eorundem in infusione *Viridis æris* præ cæteris liquoribus, ut non semel ad explorandum, an Vermis aliquis, de quo adhuc ambigebatur, num esset extinctus, vere viveret [quod in Insectis hisce haud ita facile semper noscitur] tamquam ad Lydium lapidem factus fuerit recursus ad infusionem *Viridis æris*, ubi, sicut Lumbricus aliquis, qui non plane mortuus erat, statim motum aliquem edebat, ac proinde iterum submersioni in *Vini spiritu* dam-

nabatur, ibique illico necabatur omnino: ita quoties alii nullum motum edebant, certo mortui deprehendebantur, ac revera tales erant.

Postera die in iisdem Vasis, iisdemque liquoribus fere omnibus, institutum est experimentum Lumbricorum terrestrium, nempe in *Vini spiritu*, *Petroleo flavo*, *Aceto*, *Vino*, *Oleo communi*, *Mellicrato*, *Hydrargyro*, *succo Absynthii*, infusione *China China*, *Viridis æris*, *Colocynthis*, & *Aloes*. Parum absimilis ab antecedente fuit exitus experimenti postremi. Aliqua nihilominus in non paucis, nec levibus circumstantiis fuit diversitas. Lumbrici namque terrestres in liquoribus sibi infestis longe citius extincti sunt ac Vitulini, nisi forsitan id contigit eo quia Vitulini crassi erant valde, ac robusti; Terrestres vero etsi vividi admodum, ac vegeti, erant nihilominus modice graciles; propterea scena hujusce spectaculi vix ultra duas horas protracta est. Item in hoc experimento motus, agitationes, saltus, & contorsiones Vermium terrestrium fuere longe violentiores ac Vitulinorum in alio, primo quidem, ac longe sensibilius in infusione *Viridis æris*, deinde in *Petroleo*. In cæteris liquoribus plus minus modicæ. In *Vini spiritu* motus eorum breves, & pariter modici; sed mors citissima.

Necabantur itaque in *Vini spiritu* fere statim ac illum attingebant Lumbrici terrestres, eademque ferme celeritate interibant in *Aceto*. In *Viridis æris* infusione, & in *Vino* satis quoque celeriter moriebantur; ita tamen, ut dum unus in eadem infusione *Viridis æris* [ in qua Vitulini vivere ] extinguebatur, tres, vel quatuor successive eandem sortem subirent in *Vini spiritu*, ut & fere æqualiter in *Aceto*. In *Mellicrato* denique aliquantulum serius necabantur ac in *Vino*, non tamen admodum sero. In cæteris liquoribus, videlicet *Oleo*, *Petroleo*, *succo Absynthii*, *Mercurio*, infusione *China China*, *Colocynthis*, & *Aloes*, vivebant, & diutius vixissent, nisi ad aliquot eorum tor-



torquendos insigniter, in infusionem *Viridis æris* coniecissem, & ad alios statim necandos, in *Vini spiritum*, aut *Acetum*.

Hinc videtur posse conjici, cum primo in *Vini spiritu*, mox in *Aceto*, & tertio loco in *Vino* interire Lumbrici utriusque speciei fuerint observati, videtur, inquam, conjici posse, quod *Vino*, aliisque liquoribus ex *Vino* prodeuntibus, præcipue vero parti illius spirituosiori insit aliquid hujusmodi Insectis inimicum, quod illos hebetet, inebriet, ac tandem occidat, quemadmodum *Galinas* grano *Vini spiritu* imbuto nutritas, fere ut mortuas ad tempus in terram concidere, vulgo satis est notum.

Interim nec *China China* infusionem [quod erat nostrum tentamen] nec plures alios liquores ex supra memoratis, utut vario, exoticoque sapore præditos, quicquam contulisse ad illorum Lumbricorum necem, datum fuit observare, quamvis eorum nonnulli Vermibus insensissimi censeantur, & vere videantur in Praxi. An vero in Vermes Humanos agant remedia, quæ non agunt in Vitulinos, neque in Terrestres, & an agant quandoque fortius intra corpus, quæ infirmius agunt extra illud, idipsum est, quod adhuc ignoro, & quod diligentioribus attente magis explorandum concedo.

Quoad alios Morbos quodammodo periodicos [ut redeamus unde longe admodum fuimus digressi] quales sunt *Arthritis*, *Asthma* præsertim convulsivum, *Epilepsia*, *Præfocatio hysterica*, & hujusmodi, paucis me expediam, dicamque ingenue, nimis altas, & fortes mihi videri istorum morborum radices, ut eas actio Corticis, quantum vere opus est, possit attingere, vel plane confringere: nisi velimus in gratiam Celeberrimi *Sydenhamii* excipere violentos affectus hystericos, quibus revera ex propria quoque observatione habeo potius, unde Corticem aliquo modo proficuum credam, quam aliter. Immo generaliter loquendo, videtur non extra spem omnem, quod *China China*

*Terti Therap. Spec.*

aliquid forsan præstare possit quoad suspensionem, & protractionem intervalli inter unum paroxysmum, & alterum, etiam in aliis Morbis periodicis, iis præsertim, quibus frequentes, & violenti sunt paroxysmi, non quoad germanam, & completam illorum curationem. Cæterum, ut pateat, quam facile sit, & lubricum, ut adulemur nobismetipsis, ni cauti simus in suspendendo judicio, ubi agitur de nostris votis, & opinionibus favorabiliter explendis, narrare non piget duos sequentes Casus.

I. Mulieri quinquagenariæ a pluribus jam annis Epilepticæ & post trigesimum ætatis suæ in hunc morbum primo delapsæ, Corticem præscripsi ad longiusculum tempus, mox interposita quiete aliqua, iterum atque iterum eam coegi ad repetendam assumptionem præcipue prope tempora, quibus ut plurimum eo morbo consueverat corripì. Perstitit illa præter consuetudinem suam immunis ab insultu epileptico per notabile intervallum temporis, & (quod magis mirabere) cum aliquando morbus tentasset accedere, adeo languidus, & enervis apparuit, ut illi vix ad momentum temporis caligaverint oculi, defecerint vires, & palluerit facies, subsequente subita coloris, vitium, & visionis restitutione, cum antea semper decidere, convelli, spumam ab ore, & lotium a vesica emittere consuevisset. Pharmacopola, qui unus conscius erat de qualitate remedii, cœpit evulgare, Epilepticam quinquagenariam jam plane curatam Cortice; eum tamen acriter increpui de incauta assertione, nonnisi duorum, vel trium annorum tractu comprobanda. Et sane pendente ipso usu Corticis diuturniore, unum passa est paroxysmum satis gravem, qui prægressorum invaliditatem, & moram interpositam pensavit. Quamobrem omissus fuit ab Ægrotante usus remedii, & de more cursum suum proseguunt sunt epileptici paroxysmi, quibus non raro tentabatur. Sed revera affirmavit, opinabaturque, se ab assumpto remedio ali-

Y

quid



quid opis reportasse, asseruitque morbosos insultus toto tempore, quo iis vixit obnoxia, tanto nunquam intervallo feriatos esse, quanto feriati sunt tunc, cum Corticem assumebat: propterea post aliquos elapsos menses me alloquuta sponte statuit, velle se iterum experiri remedium, & quavis Luna ad plures dies repetere. An in eo consilio manserit, vere nescio. Epilepticam extitisse, extra dubium est.

II. Adolescens annorum XIX. ab ipso ortu surdaster, ac mentis hebes, post longam, lentamque Febrem tussiculosam, quæ illum ad insignem maciem prius deduxit, postmodum sponte sensim evanuit, Epilepticus subinde factus est. Jamque a pluribus mensibus novi hujusce morbi insultu identidem recurrente non parum vexabatur, cum increbrescentibus in dies paroxysmis eo devenit, ut iisdem per mensem integrum, alternis primo diebus, mox & quotidie corripereetur. Irritis remediis omnibus, visa tandem est mihi ordinata hæc, & crebra periodus, ipsaque morbi peculiaris origo, videlicet succedanea Febri, quamvis Continuae, admittere possentamen aliquod desumptum a Cortice, quemadmodum nonnullorum Auctorum mens est. Itaque præscripsi *semunciam* ejusdem Corticis cum *Conserve florum Peonie* hoc ordine distribuendam, ut scilicet prima die dimidium misturæ illius assumeret Ager, alteramque medietatem duobus sequentibus diebus, in duas partes subdivisam: quo pacto, prima assumptione *duas* Corticis *drachmas*, reliquis vero duabus *unam* tantum *drachmam* quotidie deglutiebat. Absumpta mistura illa, nova similis de novo parabatur, eadem partitione distribuenda, & sic deinceps: interposita tamen identidem inter unam & alteram *semunciam*, duorum, vel trium dierum quiete, quibus ab usu remedii feriabatur; adeoque unius Lunæ spatio non nisi *tres uncias* Chinæ Chinæ in totum assumpsit. Atque, ut verum fatear [ni per accidens id contigit] conspicuum juvamen, primis præsertim diebus, vi-

sum est emeruisse; siquidem loco Paroxysmorum alternis diebus, vel etiam quotidie invalescentium, levis tantum vertigo, & oculorum caligatio successit, quæ pariter illico evanescebat, verique propterea paroxysmi invasio ultra dies 15. protraheretur; immo cum fiebat insultus, levior erat, neque omnimodam inferebat, ut antea, sensuum abolitionem. Duabus interim circiter transactis hebdomadis, quibus habita est cessatio ab oblatione remedii, cum nonnihil increbrescerent iterum paroxysmi, modo scilicet post octo, modo post sex tantum dies, repetitus est denuo usus Corticis ad *semunciam* cum eadem *Conserve florum Peonie*. Mistura tamen hæc in quatuor partes æquales dividebatur, quotidie mane sejunctim sumendas, & post trium, vel quatuor dierum quietem, iterum repetendas, ita ut intra mensem *duæ* plus minus *uncie* Corticis fuerint usurpatæ. A nova hac oblatione nullum sensibile levamen datum fuit observare: etenim æque ac ante, exactis modo sex, modo octo, modo etiam quindecim diebus, redibat insultus, parique ratione, etsi nullus postmodum fuerit usus Corticis: & quomajus erat intervallum temporis inter unam, & alteram invasionem, eo fortior paroxysmus inde succedebat; levior vero, cum intervallum esset brevius. Id unum supererat adhuc tentandum, nempe ut uno, aut altero die ante paroxysmi adventum (siquidem ille præmonstrari solebat ex certis signis ante duos, vel tres dies apparentibus) larga dosis Corticis, *v. gr.* ad *tres* saltem *drachmas* uno haustu exhiberetur; videbatur enim posse conjici, quod hæc forsan via protraheretur nonnunquam, aut enervaretur insultus imminens. Neque hoc forsan intentatum reliquisssem nisi spontanea, & valde inæqualis, quæ paullopost observata est, intervallorum protractione ab hoc tentamine retraxisset: quamvis enim quodvis emerisset inde juvamen, merito me reddidisset ancipitem, an illud Cortici potius adscriberem, an Casui. Quamobrem



brems etsi in violentioribus forsan circumstantiis de levamine aliquo non prorsus desperarem primis vicibus, parum tamen sperandum credidi progressu temporis; veritus insuper, ne aliquando major paroxysmorum intensio protractionem invasionis eorundem, ut *Historia* præcedente adnotatum est, nimium compensaret, vel saltem ne morbi pervicacia remedii tandem vires diutino usu sperneret, ac enerves redderet, dato quod primis oblationibus videretur ille nonnihil mitescere; quæ omnia nonnunquam etiam in quarundam conrumacium Februm curatione experimur.

Ex enarratis itaque casibus facile, ut aiebam, deducitur, ad stabiliendum levamen certum in morbis istis Herculeis, paroxysmos inæquales, & modo semel in anno, modo bis in mense, vel etiam in die recurrentes habentibus, requiri perseverantiam plurium annorum in statu sano, & experientiam æqualem in pluribus subjectis, libertatemque experiundi non tantum innoxie, sed & longe a præoccupatione tum Vulgi, tum Professorum Artis.

Denique ut aliquid quoque de morbis quibusdam, non ex sui natura, sed per accidens periodicis subdam, sit casus iste. *Monialis* quædam dolorem acerbissimum patiebatur in ea parte genæ, cui subjacet Os, *Jugale* dictum. Recurrebat hic quotidie, noctu tamen statura hora, tamque vehementer illam excruciat, tamque gravia inferebat symptomata, ut de aliquo gravissimo affectu imminente in nervoso genere suspicarer. Cum ad longum tempus perduraret affectio isthæc molestissima, nec repetitæ sanguinis missiones, nec purgationes, nec revulsiones, nec diuturniora remedia, ut *Salæparilla* maceratio longiuscule usurpata, nec alia hujusce ordinis quicquam proficerent, tandem confugi ad Corticem, per octo saltem dies *ad drach. ss.* quotidie usurpandum tentandi gratia. Altera die ab incepto remedio sanum sibi dentem, paullo infra locum doloris confectum, evelli voluit, me licet reluctan-

te. Dens evulsus est post primam Corticis assumptionem, & inculpatæ omnino constitutionis repertus. Ab evulso dente bis tantum eundem Corticem assumpsit; & dolor, qui per mensem hora semper noctis tertia observari consueverat, evanuit; remanente tantummodo sensatione quadam molesta in parte, nempe circa os Zygomaticis in ipsa genâ: quæ sensatio ex simplici, utut levi, labri superioris contactu exacerbabatur. Cum tamen ea non magnum negotium facesseret, neque *Ægra* me urgentem haberet, quippe eam rarius invisentem, substitit illa sponte ab usu Corticis, post trium tantum dierum usurpationem. An levis adeo, & brevis usus remedii, an evulsio dentis sani cum affecta parte nullam ferme connexionem habentis, an Casus levamen attulerit, nescio, aliisque æquo animo dijudicandum relinquo. Id unum addam, me post aliquot menses eandem *Monialem* alloquutum intellexisse, ipsum ei dolorem quibusdam temporibus aliquando renovari, & per tres, vel quatuor successivos dies statura hora periodice recurrere, illique subitam sanguinis missionem [pro cujus celebratione me permittentem habebat] non parum opitulari. Adoque insuper, repetitam tandem hac ipsa de causa Corticis assumptionem ad septem dies nil opis omnino contulisse: ac idcirco eidem affectioni plane irregulariter recurrenti ipsam identidem obnoxiam fuisse.

Una superest examinanda Morbi species in eo, quem semel corripuit, iterum atque iterum recurrere solita, videlicet *Hæmoptoe*, seu Sputum sanguinis, etsi Morbus hic, ut verum fatear, non magis ad Periodicorum categoriam possit reduci, ac possit ad eandem revocari, quæ pluribus familiaris identidem est, Gravedo, Raucedo, Ophthalmia, *Ægilops*, & alia hujusmodi. Cum tamen *Hæmoptoe* non modo ut morbum periodice recurrentem, verum etiam ut Cortice Peruviano curabilem *Mortonus* consideret, immo & per idem remedium posse illius recursum, ipsique contermin-



nam Phthisim inhiberi constanter asserat; peculiarem idcirco hac de re disquisitionem instituere operæ pretium erit, maxime cum ex adverso Phthisicorum febribus putridis, etiam *Intermittentibus*, nil opis conferre posse eundem Corticem apertis literis testetur expertus ipsemet Auctor, & ego quoque non unum hujusce eventus exemplum nuper hoc eodem *Lib. Cap. II.* protulerim. Priusquam tamen quid super hoc sentiendum sit proferamus, utrumque *Mortoni* textum fas sit simul conferre, ac expendere; non animo quidem disquirendi, an ulla in iis subsit, vel appareat contradictio, quod meum non est; sed ut posita in propatulo veritate rei, illustretur, ut decet, hæc praxis, & a caliginibus, quibus involuta nonnihil est, integre vindicetur.

Inquit itaque laudatus Auctor, & bene inquit, in suæ *Phthisiologia lib. 2. cap. 4.*, ubi agens *De signis Pathognomon. Phthiseos pulmonaris confirmata*, & speciatim *de Febre Phthisicorum putrida* hæc habet — Ubi primum autem hæc tubercula Pulmonum inflammata in apostemata migrare incipiunt (sive hoc a Venæ sectionis satis tempestiva, vel copiose neglectu, seu a naturali tumorum dispositione in putrefactionem) Febris hæc inflammatoria in Putridam intermittentem transmutatur. Cujus paroxysmi in principio ut plurimum nullum certum ordinem servant, rigore, & horrore sæpius eodem die recurrentibus, sicuti in puris confectione fieri solet. Ubi vero pus jam plane fuerit confectum, hæc Febris typum quotidiana, aliquando etiam, licet rarius, tertiana imitatur; idque certo diei tempore cum algore, & rigore incipiens, cum intenso calore progrediens, atque adeo tandem in sudores nocturnos, & profusos, & colliquativos desinens. Durante algore, & calore, tussis, & anhelitus cum reliquis molestis symptomatis augentur. Durante vero sudore, & remissione, tussi, & reliquiis Symptomatis jam minoratis, Ager placide dormit, vires recolligit, & sibi jam spe futura sanitatis concepta abblanditur. Atque hanc Fe-

brem Putridam Intermittentem inter certissima signa Pathognomonica Phthiseos confirmata semper habere soleo, quippe quæ sicuti a Pure in Pulmonibus confectione ortum ducit, ita parulencia pulmonaris index est certissimus. Indequè provenit, quod hæc Febris Putrida intermittens Phthisim, quoties hunc morbum fatalem esse contigit, in extremum usque diem comitari soleat. Cujus paroxysmi cum colliquationibus inde provenientius magis, vel minus intensi, & protracti sunt pro magnitudine, vel numero tuberculorum in apostemata maturatorum. Nec quidem hæc Febris ope Corticis Peruviani, Antihectici Poterii, vel cujusvis alius medicamenti specifici, quorum vim in hoc casu sapissime sum expertus, neque ulla alia methodo (quantum scio) radicitus extirpari potest: nisi ulcus adeo fuerit benignum, ut medicaminum balsamicorum intus exhibitorum ope sanari, ipsaque sanguinis massa, ubi Febris fomes delitescit, in sanum statum copioso temperantium, atque alterantium usu reduci possit: vel saltem nisi Phthisis sit mere symptomatica, & ab alio morbo dependens, qui curationem perfectam ex usu specificorum admittere possit.

Textus ergo iste quemadmodum plane concordat cum experientia, & cum communi Medicorum sensu, ita plane cohæret Theoremati ab omnibus universaliter recepto, & a nobis pluries repetito, specialiter vero citato nuperrime *Cap. II. hujusce Libri*, nempe quod ad hoc ut China China in febribus Intermittentibus suo possit fungi munere, suasque vires exerere, necesse est, quod nullum vitium organicum, nullaque viscerum labe (adversus quam nequit ea pugnare) sit febris Intermittentis fomes, aut causa, intelligendo semper de vera, & minime palliativa hujusmodi Febrium curatione, ut in allato textu intelligendus est, dum loquitur de putridis Phthisicorum febribus *Morton* ipse, inquiens — quod illæ ope Peruviani Corticis vel cujusvis alius medicamenti specifici nequeunt radicitus extirpari; eas namque posse quoquo modo leniri, & ad



& ad tempus nonnunquam intercipi [interitu nihilominus Egrotantis nequaquam inhibito] neque idem Morton de curatione Phthiſeos Pulmonaris Cap. X. neque ego ipſe Cap. II. hujus Libri diſſitemur. Videamus nunc qua ratione, ſalvo hoc Theoremate, aſſerat idem Author, Hæmoptoen, quæ vitium organicum pulmonis eſt, per Chinam Chinam ſtrenue ſanari; deinde videamus, num ſalvo per datam hypotheſim utroque illius dogmate, itaut unum alteri theoretice contrarium non ſit, ſalva ſimul remaneat veritas, & ſubſtantia rei; circa quod vereor, ne plurimum hallucinetur Mortonus. Atque ut cuncta hæc claritate omnimoda valeamus perſequi, erit e re alterum illius Textum hic loci ſubnectere.

In Libro itaque tertio ſue Phthiſiologiæ ex profeſſo acturus de Phthiſi ab Hæmoptoe Cap. V. per extenſum ſic ait — Decantantur iſtud Medicorum adagium, quod Pus ſequitur Sanguinem, exinde originem ſuam traxiſſe videtur, quod Hæmoptoe celerius, & ſæpius quam ulli alii morbo purulentia Pulmonum, ſeu Phthiſis pulmonaris, ſuccedere ſoleat. Quod utrum a craſi Sanguinis ob nimium ejus diſpendium everſa, vel a copioſo humorum ex univerſo corporis habitu, quæ datur vita, in teneros Pulmones affluxu, vel a ſanguinis grumoli in ipſis Pulmonibus poſt Hæmoptoen relictæ putrefactione, vel tandem ab ulcere aliquo eroſionem vaſorum inſequenti accidat, parum ſcio. Hoc tamen perpetuo fere obſervare licet, quoties ſcilicet Hæmoptoe præcedit, Phthiſin pulmonarem ſubſequi ſolere: Ideoque prudentem, & honeſtum Medicum ad curationem Hæmoptoes evocatum decet, non tantum præſagio de Phthiſi ſubſequutura tempeſtively prius factæ, ſue, atq; etiam Artis Medicæ famæ conſulere, verum etiam quantum in ſe eſt, cautionibus, & medicamentis idoneis hunc fatalem Hæmoptoes exitum æque prævenire ac ipſum præſentem morbum curare: ſaltem nihil in ejus curatione facere, vel tentare, quod Aegrum Phthiſi magis proclivem reddat.

Torti Therap. Spec.

Atque hic plurimum refert inter Hæmoptoen accidentalem, & habitualemente diſtinguere. Accidentalem eam voco, quæ mere ab accidenti aliquo procedit, uti a vociferatione nimia, exercitio, vel vehementi tuſſi, ab hæmorrhagiæ ſolitæ ſuppreſſione, a lapidibus cretaceis in ipſis Pulmonibus generatis, vel ab aciculis, atq; aliis ab extra in eos demiſſis. Habitualemente vero, quæ a vitioſa, acri, & fermentefcente Sanguinis diatheſi dependet, itaut penus, & fomes morbi intus ſemper deliteſcat. Hæmoptoe iſta accidentalis ſicuti variis poſt Phlebotomiam, debitum diætæ regimen, & medicamentorum uſum curata recrudescit, ita utcunque profuſa, & copioſa hæmorrhagiæ fuerit, rariffime in Phthiſin terminari ſolet: verum Ager per debitum regimen liberatus paulatim, ſicuti poſt fluxus menſtruos immodicos, atq; alios ejusmodi fieri ſolet, &  $\chi\rho\alpha\theta$ , atque  $\delta\iota\sigma\alpha\rho\chi\theta$ , evadit, ac ſi nullum ejusmodi fluxum omnino ſuſtinuiſſet. Hæmoptoe vero habitualis, ſicuti ab inteſtino Sanguinis fermentefcentis motu, & ab aperientis vaſa acrimonia dependet, ita etiam Febrem una cum accelerato pulſu, & urina ſubruba ſemper conjunctam habet, & poſt incerta intervalla identidem ſolet recurrere. Ubi ſcilicet paroxyſmus febrilis incertus a Sanguinis adeo ferociter efferveſcentis impetu recrudescit, tenera Pulmonum vaſa, cum motum hunc citatiorem ferre non poſſint, iterum atque iterum dehifcere ſolent una cum magno purpurei liquoris diſpendio, qui ut plurimum fluere non deſinit uſquedum Orgaſmus febrilis, & motus Sanguinis inteſtinus inde dependens vel Artis ope, vel ſponte ſua ſaltem a quantitate liquoris imminuta penitus ceſſet. Et tunc etiam infide tantum induciæ dantur, donec vaſa iterum a præternaturali Sanguinis motu in paroxyſmo ſubſequenti nimis diſtendi contingat. Et quidem hæc eſt fatalis illa Hæmoptoe, quæ ut difficilem curationem admittit, atque Aegro ſæpius inexpectato ſupervenit, ita Febrem primum putridam, dein hecticam conjunctam habet, quæ in Phthiſin fatalem, atque incurabilem ſæpiſſime terminari ſolet.

Y 3

Hujus



Hujus vero Hemoptoes herculea Antidotus est Cortex Peruvianus, cujus egregias vires in presentis febrilis effervescencia sanguinis extinctionem, atque in futura recidivationis precautionem semper cum felicissimo successu expertus sum, quotiescunque scilicet eum in hunc usum applicui. Et sicuti presentem Hemoptoen cito, & tuto sistit, & futuram etiam prevenit, ita Hemoptoen hoc modo curatam nunquam in Phthisin terminari vidi. Flamma enim hoc modo penitus extincta, & Febre jam evicta, Sanguis illico in naturalem statum reduci solet, adeo ut ne vel minima suspicio inde subsequatur Phthiseos manere possit. Phthisis enim, quæ Hemoptoen sequi solet, originem suam non tam a vasis exilis debilitate, quam a statu sanguinis inordinato, & hæctico ducere videtur. Ideoque utcumque Phthisis Hemoptoe vulgari modo curata usitato succedat, frequentibus scilicet Phlebotomiis, medicamentis Emplasticeis, Opiatis, &c. quæ vi potius Sanguinis eruptionem supprimunt, quam internum Sanguinis statum alterant; hinc tamen nemo miretur, si flamma hæctica intus manens tandem Aegrum in Phthisin precipitet. Quoties tamen præsens sanguinis orgasmus post Phlebotomiam repetitam, succorum Temperantium, & Julapiorum, vel Electuaria, Strypticorum, & Opiatorum, aliorumque ejusmodi (quæ alibi e Capite de Hæmoptoe petenda sunt) usu ita domatur, ut locus opportunus exhibitioni Corticis detur ad flammam febrilem penitus extinguendam, & ad resolutionem obstructionum, quæ aliter novæ effervescencie ansam præbere possint, perficiendam, non tantum Palliativa in præsens, verum revera Eradicativa etiam, & perfecta curatio sine vel minimo Hemoptoes reditura, vel Phthiseos subsequutura periculo obtineri solet. Flamma enim hoc modo perfecte extincta, Sanguis ad motum, & crasin naturalem reducit, quo appetitus statim redit, Pulmones naturali motu, & temperamento fruuntur, & purpurei Penus dispendia sensim reparantur; donec Ager tandem, licet paulatim, priorem robustum, athleticum

statum redintegratum, vel forsan meliorem quam antea consequitur sine vel minimo hæctici caloris gradu, vel subsequutura Phthiseos metu.

Ex hoc Textu clare patet, Mortonum ex principiis suis primo supponere, Febrim quolibet, saltem primariam, quomodolibet remittentem, etsi continuam, esse curabilem Cortice, quod nos generaliter prolatum nequaquam admittendum esse, pluries jam diximus; secundo supponere, quod omnis Hæmoptoe, quæ ab externa causa non pendeat, sed ab interna (quam idcirco Habitualem vocat) semper habeat pro causa productrice febrilem sanguinis effervescenciam per paroxysmos incertos, & per incerta intervalla identidem recurrere solitam, adeoque adesse semper in hujusmodi Hæmoptoe Febrim, eamque non symptomaticam, sed primariam, sive essentialem, cujus symptoma sit ipsa Hæmoptoe, & proinde hanc unam Hæmoptoen esse sanabilem Cortice; cum cæteroqui eam, quæ ab externa causa procedens, Febrim non habet comitem, sola phlebotomia, & remediis vulnerariis, ac stypticis curari asserat, nullo de China China verbo habito; signum evidens, quod in ea Hæmoptoe, in qua Chinam Chinam commendat tanquam Antidotum Herculeam, minime considerat eam ut balsamicam, vulnerariam, aut stypticam, sed ut mere Febrifugam, cum subdat id fieri, eo quia remedium istud febrilem sanguinis effervescenciam per repetitos insultus Hæmoptoen producentem, & per incerta identidem intervalla reproducentem compescit.

Idcirco, ut ingenue fatear, haud prorsus rejicienda foret illatio Mortoni, utilem in Hæmoptoe sic descripta prædicantis Peruvianum Corticem, si vera foret illius hypothesis de Febre saltem erratica per paroxysmos incertos, incertave periodos recurrente, ac propter æstum suum, sanguinisque acrimoniam, tenera pulmonum vasa iterum atque iterum aperiente, ac proinde Hæmoptoen habitualement, ut vocat, comitante non solum, sed & radicitus producente: quem-



quemadmodum si vere nonnunquam contingeret, quod Febri cuiusdam Intermit-  
renti, etiam perniciosæ, adjungeretur  
in accessu tanquam *Symptoma* illius Fe-  
bris ipsa Hæmoptoe, quæ Febre recur-  
rente recurreret, & declinante cessaret  
[ut in nostris historiis cruentos alvi flu-  
xus, immo & nonnunquam insultus ve-  
ræ paralytis cum periodica Febre recur-  
rentes, & per Chinam Chinam indire-  
cte sublatis retulimus], nullus dubito,  
quin per oblationem ejusdem Chinæ  
Chinæ Febris subsisteret, & cum ea spu-  
tum ipsum sanguinis ab ipsa procedens,  
absque gravi metu Phthiseos subsequu-  
ruræ; dummodo non adesset insignis va-  
sis ruptura, capax etiam sublata Febre,  
profundum ulcus in Pulmone relinque-  
re. Hinc plane liquet, omnem fere *Mor-*  
*toni* Hæmoptoen per Chinam Chinam  
curare molientis hallucinationem [si  
qua in hoc est, ut esse autumo] non  
versari præcise circa cognitionem vir-  
tutis Chinæ Chinæ, in qua nonnisi con-  
suetam facultatem febrifugam etiam hac  
occasione agnoscit, atque considerat;  
sed versari potius circa cognitionem  
Morbi, & Causæ illum producentis: si  
enim revera Hæmoptoe eade causa, &  
eo modo fieret, quo opinatur *Mortonus*,  
nempe a Febre Periodica illam produ-  
cente, fortasse ad eam curandam China  
China posset esse *Antidotus*, ut ipse in-  
quit, *Herculeæ*, eo pacto quo diximus,  
eam posse forsan opitulari Febri alicui  
periodicæ comitatæ *Pleuritide*, & hac  
ratione prodesse per concomitantiam ei-  
dem *Pleuritidi*, dummodo Febris illa sit  
essentialis, illiusque merum symptoma  
sit ipsa *Pleuritis*.

Sed nisi longe aliter circa productio-  
nem hujusce Morbi Natura se gerat in  
Anglia, ac se gerere solet in Italia, aliis-  
que Regionibus, unde tot prodire de  
Hæmoptoe Tractatus Medici, vereor,  
ne antedicta *Mortoni* suppositio abludat  
a veritate rei; quandoquidem morbus  
hujusmodi a causa etiam non procathar-  
tica genitus Febrem non consuevit ha-  
bere (quantum novi, & quantum legi)  
productricem, immo nec regulariter co-

mitem, sed, ubi ea adsit, mere Sym-  
ptomaticam, nec intermittentem, aut  
recurrentem quidem, sed potius conti-  
nuam, atque habitualis subsequituræ  
prodromam, aut, si sic loqui liceat,  
ejusdem habitualis inchoativam, adeo-  
que cum res per experientiam Practicis  
omnibus satis obviam sic habeat, non  
video quinam locus esse possit Peruvia-  
no Cortici, quem ut mere febrifugum  
in ipsa Hæmoptoe *Mortonus* usurpat.

Quod si experientiam ipsam *Mortoni*  
velimus expendere in historiis eidem Ca-  
piti adnexis allatam, tres tantum nu-  
mero illæ sunt per extensum narratæ.  
Prima, & tertia nobis exhibent duos  
Phthisicos vita functos, quibus Cortex  
nullatenus fuit administratus, & per  
consequens ad illius vim hisce casibus  
ostendendam utilem nil conferunt. Se-  
cunda tantum quidpiam videtur præse-  
ferre aliqua dignum animadversione.  
Per hanc describit ille in *quadrage-  
rio Viro a decem annis tussiculoso, & in  
phthisin disposito* (cui tamen ætati non  
admodum frequens solet phthisis obtin-  
gere) *insignem Hæmoptoen respiratione  
difficili, & pectoris dolore stipatam,  
cum recidivatione singulis, vel alternis  
diebus satis notabili, per tres ad mini-  
mum septimanas, non obstante frequenti  
phlebotomia, aliisque remediis, perseve-  
rantem*. Huic cum insignem Febrem con-  
junctam observasset intervallis incertis  
sæpius recurrentem, semperque viam spu-  
to sanguinis subsequunturo sternentem, *Cor-  
ticem Peruvianum in haustu mistura ad-  
stringentis vulneraria, ac paregorica  
quarta quoque hora ad octavam usque  
vicem exhibuit, ac Febrem protinus ex-  
tinxit, Aërumque per sesquiannum, Sym-  
ptomatis omnibus imminutis, ipsaque tussis  
moderatiore jam reddita, aprici simul  
aeris beneficio ad habitum Corporis me-  
liorem ac antea feliciter perduxit*. Hic  
ipse tamen Ager paullopost sui negli-  
gens in novam, ut subdit ingenue,  
Phthisim incidit, qua e vivis subla-  
tus est.

Hic ergo subit animadvertere, Fe-  
brem hujusmodi vel fuisse periodicam  
essen-



essentialē, sputo sanguineo ratione subjecti per accidens comitata, adeoque Cortici cum suo Symptomate obsequentem, vel (quod probabilius est) fuisse continuam, & quodammodo inflammatoriam, incerto forsan ordine recrudescentem, copioso autem cruento sputo pariter comitatam, tandemque ope repetitæ Phlebotomiæ, aliorumque remediorum, immo & mixturæ antedictæ (in qua larga visitur Remediorum adstringentium, & balsamicorum, paucula vero proportionaliter dosis Corticis) ad vigesimam primam circiter diem, ut mos est plurium Acutorum sine China China curatorum, solutam cum temporanea restitutione ad pristinum, immo & meliorem statum; qua deinde transacta malacia, in hujusmodi casibus sæpius observari solita, in Phthisim veram rursus, ut assolet, Ager incidit, atque ut pariter assolet, tandem obiit. Quapropter, bona Auctoris venia, nil exinde concludi video in rem nostram, præcipue cum in vera Hæmoptoe Febris omnis ab initio saltem soleat abesse, & Symptomata esse tunc cum supervenit. Neque satis suffragari videtur id, quod legitur acervatim ad calcem *Historia prædictæ* de Vetula quadam septuagenaria hæmoptoica, de Aurifabro, & alia puella, de quibus nullam describit historiam, esto asserat eos omnes eodem modo sanatos; nam præterquamquod non omne spurum sanguinis etiam copiosum e Pulmonibus educitur, & præterquamquod illud in *Senibus*, & *Pueris* phthisin tam facile non solet accersere, certum est insuper, quod cum mixtura antedicta longe plus recipiat, ut adnotavimus, de remediis vulnerariis insignioribus, quam de Peruviano Cortice, illis potius, quam huic laus tribuenda videtur, maxime cum passim videamus, hujusmodi sputa meri sanguinis solo fisci eorundem remediorum usu, & non raro sponte Naturæ, præcipue si aliunde, quam a Pulmone procedant; ut propterea omnino statuendum sit, quod China China non aliter queat Hæmoptoen suppressere, nisi ubi

ipsa Hemoptoe sit merum *Symptoma Febris alicujus eo remedio curabilis*, quemadmodum de Phthisi loquutus est Mortonus ipse in calce *primi Textus* a nobis nuper transcripti, videlicet quod ea ope Corticis Peruviani, vel cujusvis alius medicamenti specifici sanari nequeat, nisi sit mere Symptomata, & ab alio morbo dependens, qui curationem perfectam ex usu specificorum admittere possit.

Hæc habui dicenda de Corticis actione adversus morbos extra lineam febrilem constitutos, quibus, vel eorum saltem nonnullis siquidem ille vere prodest, ut Affectionibus Hypochondriacis, Hystericis, & hujusmodi aliis, lentum tantummodo, & tardum est, non præsentaneum ejus auxilium; propterea ex hoc capite minus certa redditur illius operatio, quæ aliis quoque Causis, vel ipsi denum Naturæ nonnunquam potest adscribi. Quamobrem id saltem candidè fateri oportet, quod & fatetur Sydenhamus ipse post celebratas eximias hujusce remedii vires adversus affectionem hystericam vehementer spasmodicam, præ cæteris istius ordinis morbis, ipso judice, Cortici obsequentem — *Interim tamen* (inquit ille) *confitendum est, quod hoc medicamentum non ita certo, crebroque huic malo succurrat ac Febris Intermittentibus*. Quæ assertio, sicuti vera est in hoc casu, verior a fortiori in reliquis erit habenda. Ulteriore denique nobis suspicionem de exigua Corticis activitate, adversus morbos a Febris Periodicis diversos, aperte suggerit Mortonus ipse, de nimia cæteroqui erga hoc Remedium credulitate suspectus, in Præfatione suæ *Pyretologiae*, dum inquit — *Nusquam hætenus eum* (scilicet Corticem) *titulo Catholici Remedii* (ac si Archæus ad mentem Helmontii quocunque modo irritatus eo compefceretur) *donandum judicavi, utut non desint Auctores, uti videre est in Badi Anastas. Lib. I. Cap. XX., & Medici aliqui hodierni, qui vires ejus in Hydrope, Ictero, Hypochondriaca affectione, Scorbuto, immo in Peste ipsa, plurimisque aliis morbis tam Chronicis,*  
quam



quam *Acutis debellandis*, mirum in modum predicant. Verum, ut rem ipsam dicam, licet hoc *ἰσὸν πικρὸν* præ cæteris quibuscunque amaris abstersiva sua, seu quacunque alia qualitate humorum *ἀταξία* corrigendo, & partium labe factatarum tonum confirmando, ad Curationem *Hydropis*, *Scorbuti*, *Icteri*, *Hypochondriacæ affectionis*, *Digestionis eversæ*, appetitus prostrati, vel cujuscunque alterius morbosæ affectionis, incerto cum eventu, conducere nonnunquam observetur, nunquam tamen Corticem officium antidoti præstitisse memini, fomitem scilicet morbi venenatum delendo præterquam in *Morbis universalibus acutis*, præsertim in *Febribus Intermittentibus*, & *Remittentibus veris*, ac *Spuriis*, atque *Inflammatoriis*, & *Colliquativis*, quibus cum prioribus similitudo quædam est. Adde & hic congruam explicationem, mox & debitam limitationem ad normam eorum, quæ quinto hoc Libro statuimus; & germanas Corticis vires in univsum satis perspectas habebis. Id unum cura, ut genuinus ille sit, ac vegetus. Boni Corticis notas apud plures invenies; illas ideo de industria subticui: etsi nec graphica, nec plane uniformis sit apud omnes illius descriptio, sive de sapore, sive de aliis qualitatibus sit sermo; immo non desunt, qui Corticem hunc non e Trunco, vel Ramis Arboris, sed e Radice detrahi putant. Ita rebus caliginem offundit Locorum distantia. Bonum ego Corticem reputo, quem experientia talem alias deprehendi.

#### Quæritur Secundo,

*An, ubi Cortex vere indicatur, liceat ratione Subjecti illum administrare citra periculum Mulieribus Gravidis, Puerperis, Abortum passis, aut Menstruas purgationes actu patientibus: & incunctanter asseritur, experientia duce.*

QUAE diximus toto decursu hujusce Tractatus, & quæ passim tradunt Auctores omnes in administratione Cor-

ticis magis versati, nullum videntur proposito Quæsito locum relinquere. Ad tollendam nihilominus omnem, si qua sit adhuc, scrupulositatem in hac materia delicatiore, in qua suspicio quævis Prudentiæ soboles est, lubuit hæc pauca seorsim subnectere.

Chinam Chinam vel amarore suo, vel alia quavis qualitate adversari fœtui in utero esistenti, nemo ex iis poterit suspicari, qui nostras perlustrarint Historias; siquidem *Lib. IV. Cap. 1. Hist. 2.* ex Cholericis, & *Cap. 2. Hist. 14.* ex Subcontinuis Malignantibus, necnon *Cap. 6. Hist. 8.* ejusdem Libri prostant casus mulierum Gestantium, usu Corticis valde copioso sanatarum, & debito postmodum tempore vitalem fœtum feliciter enixarum. Sane si ubi adfuere vomitus, & alvi fluxus immanes, Febresque tum Matri, tum Fœtui suapte natura perniciales, atque insimul adfuit copiosa affatim Corticis exhibitio, repetitio, & diuturna continuatio, partus nihilominus ad suam maturitatem, & exclusionem vitalem auspicio pervenit, quid quæso nobis metuendum superest in quibuslibet aliis Gravidarum Febribus ab eodem sæpesæpius moderatiori Corticis usu? At sicuti res tantum per accidens, ac ob alium finem ibi recensui fœminarum utero gerentium casus in linea Febrium Perniciosarum, & in circumstantiis per consequens liberalioris oblationis Chinæ Chinæ, ita nonnullos alios in eadem linea possem recensere, quemadmodum nonnullos quoque videre est in Historiis a *D. Ferrario Lib. IV. Cap. 4.* mihi communicatis; innumeros autem possem adducere in linea Intermittentium benigniorum, atque vulgarium, consueto, atque parciore usu remedii depulsarum in iisdem prægnantibus, cum incolumitate tam fœtus, quam matris. Immo memini, *D. Marchionissam Gherardinam*, Tabidam, & Febre insimul putrida dicta detentam, auxilio, ut reor, Corticis, quo non sublata quidem, sed obscuriores redditæ sunt putridæ Febris cum rigore Fœtui infenso antea invaden-



dentis accessiones, felicissimum suo tempore partum edidisse, quemadmodum innui *Cap. 2. hujusce Libri*; adeoque quod Matri prodesse integre remedium non potuit, profuit per accidens foetui, Puellæ videlicet, quæ paucis ante matris obitum diebus in lucem prodiit, vivitque incolumis, & habitu corporis pollet, ut audio, inter Sorores omnes firmiore. Ut ergo inceptum argumentum prosequar, fidenter asseram, me in Febribus Intermittentibus benignioribus, in quibus majus, quod impendit periculum, est Abortus tum ratione concussionis violentæ corporis in frigida, & horrida Febris invasione, tum ratione vomitus, alvi fluxus, jactationis, aliorumque symptomatum, assuetum esse confugere ad Corticem, non tam ad curationem Febris [a qua parum timeo, si sit sincera] quam ad præcautionem ipsius abortus ex Febre imminentis, impedibilis vero, Febre inhibita. Ob id quasi in morem adagii dicere consueverat Experientissimus *Frassonus* Præceptor meus semper colendus: *Chinam Chinam esse Remedium Gravidarum, & Senum, quippe diuturnis Intermittentibus ferendis imparium.*

Quemadmodum autem centies observavi in Gravidis proficuum Corticem, ita nunquam, quod meminerim, noxium vel observavi, vel suspicari rationabiliter potui. Et licet quis metuat, ne insit eidem vis quædam irritans, ac stimulans, quæ tormina in Ventriculo, & Intestinis, immo tenesmus ipsum valeat excitare, ac subinde abortum parere, ego certe possum testari, me nil tale unquam animadvertisse, immo observasse potius oppositum, ut supra memoravi, in Febribus ipsis Cholericis, aliisque Tenesmo, aut Dysenteria accidentaliter comitatis, in quibus China China Febres submovens, inde producta simul tollebat recensita symptomata. Quod si uni inter innumeros aliquam excitet China China in Stomacho irritationem, id soli idiosyncrasie talis subjecti imputandum est, non remedio, nec ab ipso propterea abstinendum in aliis: sicuti

ab esu Casei abstinere non debet humana species, eo quia Caseus alicui hominum minime conferat. Sed & hic aliqua nonnunquam potest contingere hallucinatio, refundendo crimen aliarum forsitan dispositionum in medicamen insons. Memini; nec verus quidem est casus; *D. Comitissam Blancam* paullo ante memoratam, cui febricitanti simul, atque utero gerenti China China a curantibus Medicis præscripta fuerat ultimo tandem suæ ægritudinis tempore passam esse Tenesmus. Sed hunc ipsum in unico ferme hoc, quem noverim, casu, quis quæso potius non adscribat Lumbricis paullo post usum Chinæ Chinæ copiose per alvum excretis, ut retulimus, quam ipsi Cortici longe prius epoto? Convaleuit illa nihilominus ab omni morbo, partum felicissimum suo demum tempore enixa. Pariter si alicui fortasse contingerit observasse abortum ab epota non multo ante China China, ut apud nos quoque *Lib. IV. Cap. 2. Hist. 15.*, is si bene animadvertat, inveniet, puto, processisse abortum non a remedio, sed a morbo, in cujus gratiam forte nimis sero adhibitum est remedium, vel ab aliquo alio accidenti. Ita mihi nonnunquam contigit abortum cernere post venam sectam, quæ tamen secta fuerat ad præcautionem prævisi periculi. Neque propterea abstinere ego a venæ sectione in morbis prægnantium, ubi ea cæteroqui indicetur: immo eadem frequenter, & repetitis quoque vicibus identidem utor, tanquam remedio ut plurimum efficacissimo, & tuto, ad solam præcautionem abortus.

Quod dixi de Prægnantibus, cum proportionem dico de Puerperis, Abortum passis, & Menstruas purgationes actu patientibus, quarum nulli denegari potest usus Corticis, dummodo aliunde indicetur, maxime cum nullas illum suppressere evacuationes, alibi statuerimus, & cum apud plurimos, ut *Monginotium*, *Mortonum*, aliosque viderimus, eundem ad menses ciendos, & promovendos directe idoneum censerem, & in Puerperio (ut idem inquit *Mortonus*) salubriter  
mini-



*ministrari*. Saltem inferri potest, si huiusmodi etiam Auctores decepti sint, tribuendo Cortici virtutem, quam vere non habet, videlicet menses, vel lochia promovendi, inferri potest, inquam quod ille saltem nec Menses, nec Lochia cohibeat; neque enim poterunt Auctores illi decipi in facto: multoque minus credendum est, voluisse alios decipere. Sed omissa experientia aliena, jam propriam adducamus.

Quoad Puerperas itaque, aut abortum recenter passas, non admodum frequens est occasio utendi Cortice, nec consequenter frequens mihi experimentorum numerus, cum tempore partus, aut abortus raro suboriri soleat Febris ulla, loquendo etiam de admittentibus Corticem, quæ illius usum circa prima puerperii tempora (de quibus Quæstio posset esse rationabilior) statim exigat, præcipue cum ex rebus partus non bene procedentibus, quibus semper prospiciendum est, æque ac ex consueto fermento, occasionem plurimam Febris quælibet Puerperarum soleat nancisci. Quod si partum, aut abortum quavis de causa contingentem, Febris jam antecesserat, ut Quartana, aut Tertiana vulgaris, vix ulla occasio potest esse vel Corticem statim exhibendi, vel inceptum antecederet illius usum sine ulla, utut brevi (quæ sufficeret) interruptione, continuandi, habita ratione tum morbi moras admittentis, tum aliorum remediorum, partui ut plurimum, vel abortui necessariorum, quæ oblationi Corticis, in tali casu ex vi Febris minime periculoso, debent anteponi. Vera itaque, ac propria occasio exhibendi Corticem, illiusve usum continuandi tempore ipso partus, abortus, aut puerperii, erit tantummodo, si vel Febris Perniciosa a fermento, de quo jam alibi, pendens, immediate ante partum, aut abortum, vel non longe a partu, aut abortu suboritur, aut si Febris non Perniciosa, sive partum antecedens, sive subsequens, in eum statum deveniat tempore ipso partus, abortus, aut puerperii, ut aliquo modo periculosa evadat: sive deinde id accidat ob Ægræ

imbecillitatem, sive ob gravitatem symptomatum, quæ symptomata licet maligna, aut pernicialia adhuc non sint, a lochiorum tamen fluxu, etsi congruo, non allevantur, & consequenter non nisi sublata Febre possint auferri. In his circumstantiis, præmissis, quæ præmittenda sunt ratione partus, aut abortus, siquidem sint aliqua præmittenda, alacri animo offerendus est Cortex, eo prorsus modo, eaque dosi, quæ respondeat exigentiæ morbi, perinde ac si Ægrotans non esset Puerpera; quod a me feliciter actum est non modo in casu *Lib. IV. Cap. 2. Hist. 15.* relato, ac paullo supra citato, verum & in aliis minus urgentibus, actumque est æque feliciter a *D. Ferrario*, ut constat ex illius *Historiis* mihi communicatis, pariterque paullo ante citatis: adeoque (ut circa hoc aperte me explicem) allatas supra condiciones, & circumstantias oblationi Corticis tempore puerperii instituendæ opportunas, non retuli ut necessarias, quasi citra urgentiam insignem nequeat ille propinari, vel inceptus antecederet illius usus continuari absque suspitione periculi, sed quia extra illas superflua visa mihi semper est ejusdem oblatio, cum partus ipse, & puerperia rite fluentia soleant plurimum Morborum, Februmve præexistentium medelam se solis inducere. Atque ob id etiam Cortex in Puerperis haud crebro mihi usum venit. Addo, quod retroactis longe temporibus, priusquam me necessitas cogeret ad experimentum, hæsitabam & ipse, non satis conscius de modo intestinæ fermentationis excretoriæ lochiorum, aut menstruorum, sicut nec de modo intimæ actionis Peruviani Corticis (circa quæ, ac huiusmodi alia Naturæ arcana cæcutient diu *tabescentes omnes Sapientes terræ*) multoque minus de eventu successuro ex similitudine utriusque. At, quod inanes speculationes meæ nequam præstiterant, satis tandem me suavit, docuitque, nec tamen sine ratione, urgens necessitas, & ex re feliciter gesta subinde ortus usus diuturnior.

Inculpabilem quoque cohærenter ad ante-



antedicta esse Chinæ Chinæ oblationem, pendente ordinario Menstruorum fluxu, non modo evincit a fortiori usus felix ejusdem in fluxu lochiorum tam congruo, quam imminuto, & [ut reor] etiam immodico, verum & idem a posteriori pluries me docuit casus; siquidem non semel mulieribus, quibus præscripseram in Febribus diuturnioribus modo ad curationem, modo ad prophylaxim Peruvianum Corticem ad longum tempus, supervenere interim purgationes menstruæ. Cumque me tunc illas minime invisente nescirent præciso, quid agendum sibi, usum remedii sine ulla interruptione prosequutæ sunt, utpote non admonitæ de suspensione illius in tali casu; neque proinde remoram ullam iniecit remedium fluxui, nec ullam promovit exuberantiam; finem vero, pro cuius consecutione illud assumpserant, ipsæ feliciter attigerunt. Fortuito itaque factus compos tutissimæ administrationis illius in hujusmodi casibus, deinceps in iisdem cœpi exhibere incunctanter. Quamobrem ubi opus exigat præscribere Corticem in Febre periculosa [dummodo sit ex admittentibus illum] præscribo tam in hac circumstantia, quam extra illam, & tam copiose, si occasio ferat, quam modice, probe conscius, nullam esse circumstantiam a tempore, ætate, sexu, temperamento, vel alia quavis conditione petitam, quæ usum Corticis cæteroqui rationabiliter indicatum valeat prohibere. Ubi vero Febris careat periculo, & moram admittat, relinquo arbitrio Mulierum plus vel minus meticulosarum, usum illius inchoare, vel non, fluentibus Menstruis, inceptum prosequi, vel suspendere ad libitum, sive ad curationem assumant, sive ad præcautionem, dummodo usum suspensum, absoluto postmodum fluxu menstruo, iterum resumant. Atque eo facilius in eam interruptionem consentio, quoniam extra hanc quoque occasionem utile est, mihi que admodum familiare, Corticis administrationi intervalla aliquot vacua intermiscere, cum scilicet ad prophyla-

xim pro inhibenda recidiva præscribo. Idque eo præsertim nomine faciendum puto, ne de generante sensim in quendam veluti torporem Naturæ diu remedium ferentis tolerantia, ejusdem tandem assidui, placidique remedii vires nimia fragant, infirmæve ipsum ferendi consuetudo.

### Quæritur Tertiò.

*An ex eo, quod China China sit Remedium suapte natura innocens, liceat eam tentandi gratia indiscriminatim usurpare in quibuslibet Febribus, & Morbis, iis etiam, in quibus communiter deprehendi solet inutilis: & negatur.*

**S**UPERVACANEUM credidissem universale examen istiusmodi hic instituire, nisi hoc ipsum, tum generaliter tum specialiter in familiari colloquio medico præter intentionem suscipere fuisset olim coactus, atque in terminis quidem strictioribus, minusque disputabilibus; in suppositione videlicet cujusdam Morbi, in quo ex communi sensu, & experientia Auctorum quoque China China liberaliter utentium, ea reperta sit semper frustranea.

Ut rem paucis expediam, absque ulla hæsitantia dico, non debere, neque rationabiliter posse Corticem Peruvianum præscribi, ubi hæc duo non concurrant, nempe primo, quod aliqua saltem, utut levis, adsit rationabilis conjectura, posse illum prodesse; secundo, quod hujusmodi conjectura non destruat a communi experientia, & constanti assertionem Scriptorum Classicorum China China uti assuetorum, eamque iis casibus se observasse inutilem asserentium: quæ duæ conditiones solummodo possunt concurrere in iis Morbis, & casibus, in quibus nondum factum fuerit, quod sciamus, uilum tentamen illius a Practicis melioribus, adsitque nihilominus nonnulla conjecturalis ratio, sive in sanioribus hypothesibus, sive in observationibus nonnihil analogis fundata,



data, quæ suadeat tentamen hujusmodi; concurrentibus siquidem hisce conditionibus, naturalis innocentia remedii tentamen etiam inutile potius est excusare; iisdem vero absentibus, vel contrariis presentibus, illud idem tentamen non modo irrationabile censendum erit, sed juxta varietatem casuum, ac circumstantiarum, vel ridiculum, & imprudens, vel temerarium, vel forte noxium. Atque hic tota rei summa paucis restricta jam visitur.

Jam vero in ipso hujusce disquisitionis limine videri forsan poterit (ut alicui quondam visa est) contraria iis, quæ scripsimus de innocentia Remedii, triplex isthæc assertio. Ast quilibet diversimode præoccupatus animadvertat velim primo, quod pro curandis morbis remediorum usurpandorum ratio desumi non debet ex eo, quod noxia illa non sint, sed ex eo, quod positive proficua censeantur, atque ut talia praxis meliorum receperit; alias omnes Confectiones, & Julapia, quæ Cardiacorum nomine audiunt, in quovis morbo, puta in Suffusione, in Surditate, in Podagra, & similibus, possent rationabiliter usurpari pro peculiari eorundem morborum medela, parique ratione usurpari posset ad Verrucas, & pedum clavos Chinæ Chinæ potio, quia hæc non minus quam antedicta Cardiaca saltem innoxie usurparetur. Quid autem in linea Medica ridiculum magis? Animadvertat secundo, nos asseruisse semper innocuum quoad substantiam suam Peruvianum Corticem, talemque probasse rancidis inhærendo Adversantium principiis ex hoc, quod nullum excessum præferat in manifestis qualitatibus, nullamque pariter pravitatem velet in occultis; nullam enim qualitatem, aut vim latentem in eo vere deprehendimus, nisi febrifugam, attendatque, nos id inculcasse adversus primos inexperitos osiores Corticis, penes quos [ambigo an majore fatuitate dicam, an pervicacia] suspecta erat de venefica quasi, vel præstigiola natura novitas, & virtus admiranda remedii; Cæterum noxiam

millies in hoc Tractatu diximus esse posse, non substantiam illius quantum est in se, quippe suapte naturam insonantem; sed incongruam, & præ cæteris intempestivam, ac præcocem oblationem substantiæ illius, etsi per se ipsam insonantis: immo eo casu solum esse noxiam oblationem substantiæ illius Febrem sistentis, quia ipsa substantia perfecta est, & naturali suo fungitur officio; sed cum imperite per eam sistatur nonnunquam Febris, quam nullo pacto deceret sistere, quippe Depuratoriam, & stantem loco remedii, vel sistatur tunc, cum magis expediret ob eandem rationem sinere illam progredi; idcirco facta tecta remanente innocentia substantiæ remedii, noxia evadit imprudens illius oblatio, ut fusius explicuimus in *Responsionibus nostris Jatro — apologeticis ad Clarissimum Ramazzinum*. Id autem non remedii crimen est, sed crimen Medici remedium insons, ubi illud nullatenus convenit, vel ubi convenit culpabiliter præscribentis. Quid quæso innoxium magis quoad substantiam suam Pane, Carnibus, aliisque salubribus esculentis, quibus quotidie vescimur sani, quibusque utimur etiam in Morbis chronicis? Ecquis tamen proinde rationalis Medicus isthæc indiscriminatim in Morbis acutis, vel in ipsa Febrium invasione suis Ægris præscribat; vel innoxia, quæ præbet Ægris, medicamina suadeat Sanis? Nimis nempe notum est, nimisque vulgatum, quod

... data tempore profunt,

Et data non apto tempore Vina nocent.

His ergo pariter nominibus noxia nonnunquam esse poterit Peruviani Corticis, etsi natura sua innocentis, oblatio. Animadvertat denique tertio, administrationem hujusce Remedii, ubi secundum communem meliorum Practicorum sententiam, & experientiam nequit prodesse, quamvis noxia fortasse non sit, posse tamen esse nedum imprudentem, sed & temerariam, quippe de damno fortuito saltem suspectam: circa quod liceat fusius nonnihil pro

Junio.



Juniorum saltem institutione differere. China China, etsi per se ipsam innoxia, neque ullo modo sensibilibus perturbans œconomiam humani corporis, tandem cibus ea non est, sed Medicamentum, aridusque Cortex arboris exotici nobis ignoti, adeoque re ipsa lignum, haud secus ac lignum vere sint scobes cujuslibet alterius arboris, quæ tamen indiscriminatim nequaquam exhiberentur ulli febricitanti, eo nomine, quod sint naturæ per se ipsas innoxie, quia nempe aliquem [ni quid pejus] in stomacho possent inferre gravitatis sensum, ut China China ipsa vere nonnullis hujusmodi incommodum aliquando solet inferre. Ad hæc remedium istud, etsi stipticitatem potius aliquam consuescat inducere, quandoque tamen ventrem nonnullis solvit instar remediipurgantis, tuncque infirmior esse solet, vel brevioris durationis in nostro corpore vis ejus Febrifuga. Si ergo vel alvi stipticitatem inferat, vel alvum solvat cum aliquo, ut facile contingere potest, ægri damno, ubi solius innocentie titulo præter leges ordinarias administraretur, nonne id cum temeritatis nota patratum diceretur?

Sed quid quæso, si vera forent, non tot mala quidem, quæ plurimi somniarunt anteacti sæculi Scriptores ab ejus usu metuentes Ictericum, Obstructiones, Hydropem, Apoplexiam &c. sed ea solum, quæ suspicatus est ille idem famigeratissimus Sydenham, qui de illius naturali innocentia tot, & tanta testatur, ut suis ipsius Textibus alias retulimus? Narrat hic Auctor in Epistola ad Bradium, Febrifugum istud in Anglia in quandam olim desuetudinem, & contemptum ferme universalem abiisse, eo quod nonnulli ex Febribus Intermitte-  
tibus laborantes, eo paullo ante accessi-  
onem epoto, paucas post horas obie-  
runt, atque ex iis duos, vel tres nomi-  
natim profert sibi notos; idemque sibi  
contigisse in uno ex suis Ægrotis mihi  
olim fassus est Cl. Ramazzinus cum vi-  
veret, eo scilicet tempore, quo Corti-  
ci amicus erat, & opinionibus meis,

quemadmodum videre est in *Responsio-  
nibus meis Jatro — apologeticis* ad eun-  
dem §. 32. pag. 104. quas *Responsiones*  
quasi mei complementum Operis hor-  
tor, ne graventur legere Tyrones, &  
quotquot materiæ hujus Pyretologicæ,  
ac omnifariæ administrationis Peruvia-  
ni Febrifugi completa notione indigent.  
Equidem, ut ad *Sydenhamium* redeam,  
infaustorum eventuum prædictorum cul-  
pam omnem refundit Auctor ille non  
in remedium certe a se pro innoxio as-  
sertum, & habitum, sed in oblationem  
intempestivam; quia nempe more prio-  
rum temporum paullo ante accessi-  
onem Ægrotis fuerat exhibitum: cui ta-  
men malo asserit facile prospici simplici  
adhibita cautela exhibendi Febrifugum  
declinante solum, vel soluto integre pa-  
roxysmo, atque hac una via refert fuisse  
illud primævi æstimationi restitutum.  
Existimat quippe magnus hic Practicus,  
ea infortunia contigisse exhibitum paullo  
ante accessi-  
onem Febrifugo, quia eo  
tempore cumulatam jam tota paroxysmi  
imminentis materia, hæc a vi Febrifu-  
gi violenter repressa nequibat amplius  
methodo naturæ digeri, sed affatim suf-  
focata ægrum affatim suffocabat: cujus  
sententiæ videtur fuisse etiam Sponius,  
inquiens, *nonnullos ex conflictu excita-  
to inter Febrem, & Remedium interiisse*:  
Ego vero, ut ingenue fatear, non  
paullo ante accessi-  
onem quidem, sed  
actu invadente accessi-  
one, in ipso sci-  
licet frigoris, & tremoris initio cen-  
ties ac centies vidi a Præceptore meo  
*Frassono* exhiberi Corticem, illumque  
centies ac centies primis temporibus ex-  
hibui & ipse eodem modo in benignis  
Intermittentibus semper feliciter, ac  
semper innoxie. Aliam propterea lethali-  
um eventuum recensitorum causam  
fuisse sum conjectatus *Lib. III. Cap. 4.*  
eamque obiter etiam tetigi in citatis  
*Responsionibus meis Jatro — apologeticis*  
§. 35. pag. 118. Quod si ratio Causalis,  
propter quam Sydenham putat oblati-  
onem Corticis instante proxime accessi-  
one esse posse, & reapse fuisse lethalem,  
forte subsistat, quid metuendum non  
erit



erit ab illius oblatione in iis Febribus, aut Morbis, in quibus ille nullius esse juvaminis communiter deprehenditur, & in quibus ignoramus quinam sit, aut ubi sit cumulus materiæ morbificæ, quænam futura sit inter materiam ipsam, & remedium lucta, vel quodnam tempus illiusmodi tentamini magis propitium? Anne ergo præscribetur animo vere sanandi Tabidis, Peripneumoniciis, Pleuriticis e Morbi radice talibus, & aliis huiusmodi, postquam experientissimus *Mortonus* (memetipsum excipio, etsi in materia facti testem idoneum) illam esse testatus invalidam, & *Sydenham* plane noxiam, amboque ratione simul, & longa experientia freti, non obstante nativa innocentia remedii ab eis veridice decantata, hæc protulere, ut infra protulisse ostendamus?

Non ego hic quaero, an China China Sanguinem, aliosque humores figat, ut plurimi censente Medicorum vulgo, iique forsitan præ aliis, qui præ aliis ea abutuntur innocentiae titulo; hanc enim opinionem in eo sensu, in quo communiter solet recipi, rejeci jam satis tum *Lib. I. hujusce Tractatus Cap. 3.* tum maxime in *Responsionibus meis Jatro-apologeticis §. 41. pag. 136. & 137.* Dico tamen utroque loco, eam quodammodo figere febrile Intermittentium fermentum, quodcunque sit, illud combibendo, vel absorbendo per meum intelligendi modum, sive forsitan illud disgregando, & dissipando, ut censer *Antymus Conygius*, sive *Honoratus Fabri*. Quid possit illa agere in fermentum Continuarum ab essentia, quod certe non subigit, quidve in humores aliorum Morborum effectores, me latet; ac propterea ubi sciam, eam prodesse non posse [non posse autem credam, ubi nunquam ex meliorum experientia profuit] dubio procul prætextu innocentiae suæ nequaquam utar.

Rursus equidem pro mea ingenuitate repeto, nullam ex ejus usu, ubi ea ab imperitis præscripta nullatenus conveniebat, noxam sensibilem observasse, ut id malum observavi sæpius ex usu in-tempestivo in Febribus Intermittentibus,

maxime quidem in plane Depurativis nonnihil quoque protractis, ut recentibus etiam exemplis annotavi *Lib. I. Cap. X.*, non raro vero etiam in Febribus non plane Depurativis, illamque propterea suapte natura admissuris, sed nonnihil serius; neque tamen damnose id semper: nonnunquam enim, rarius licet, Febres huiusmodi omnino immature suppressas, neque rediisse, neque quicquam aliud morbosum peperisse vidi; sed heu quoties vidi & oppositum! nec sine ratione quidem: certum est quippe ex principiis nostris, quod is, qui Febrem sistit vere *Depuratoriam*, quæque talem cum facili ægrotantis tolerantia se prodit [si quidem non raro Depurativa est quoque; quæ ægrum haud leviter vexat] etsi medicamento utatur ex se innoxio, nihilominus errat; quatenus tollit de medio remedium absumptivum Causæ morbificæ, videlicet effervescentiam febrilem depuratricem infecti Sanguinis, ut illi substituat aliud remedium mere absorptivum ejusdem Causæ morbificæ, cujus semper certa non est post absorptionem eliminatio, vel subactio perfecta, dato quod nonnunquam id accadat, ut nuper sum fassus. Cum itaque qui per Chinam Chinam curare indiscriminatum aggreditur Febres etiam *Depurativas*, præsertim circa illarum initia, spontaneam impediatur solutionem morbi, qui mediis febrilibus deflagrationibus sensim jam *judicatur* per viam lentæ (verbo sit venia) *Cochionis*, ponatque per consequens in ancipiti spem cæteroqui moraliter certam felicitis exitus, temere, ac præter rationem operatur, peccatque directe contra tritum illud, & summopere verum *Hippocratis*, nempe quod — *Quæ judicantur neque movere, neque novare aliquid, sed sinere oportet.*

Ut vero ad oblationem Chinæ Chinæ, ubi ea ex communi vere expertorum observatione, ac sensu frustranea, & iners reperta sit, redeam, fidenter dico, non obstante quod in quibusdam ejusmodi casibus, qui pauci revera fuisse, nulla sensibilis noxa mihi fuerit ob-  
serva-



servata, temerariam nihilominus esse, nec omni carentem periculo illius administrationem, quantunvis substantia remedii ex se sit innocens. Atque iterum sic progredior. Quæcunque sit vis illius, sive absorbens, sive disgregans, sive figens, sive quidpiam aliud intra nos efficiens, certum est, quod vis illa maxima est, & talis, ut illi par ulla non sit in linea Alexipyretorum, neque Specificorum cujuscunque ordinis, certusque, citus, & constans illius operandi modus maximum supra humores nostri Corporis periodice febrientes dominium ostendit; ista vero vis incomparabilis, in quo consistat, nescimus, nescimus modum, quo ipsa agit, nescimusque tandem objectum, in quod agit, videlicet Causam febrilem, seu Fermentum febrile. Quid ergo, non obstante innocentia prædicta, possit illa per accidens nonnunquam efficere intra humores tam varios, tamque varie alterabiles nostri Corporis, vel in partes illius solidas: uno verbo, an possit ullo pacto vel sensibiliter, vel insensibiliter lædere, quando ad exercendam incassum vim suam validissimam, & ignoram citra veram occasionem violenter cogitur, ne dicam damnatur, id est, quod pariter me prorsus latet, & quod propterea me retrahit ab usu illius, ubi eam nequaquam prodesse sit notum. Neque enim hic agitur de vulgaribus, usitatisque Specificis, & alterantibus, quorum fere omnium innocentia, si quod est velimus fateri, consistit in hoc, quod neque sensibiliter lædant, ubi non congruunt, neque sensibiliter, ubi congruunt, proficiant, vel si proficiunt (quod incertum est quoque) id nonnisi longo temporis tractu pedetentim præstent; ut propterea parum intersit, an quis loco Specifici Cephalici crediti, v. gr. loco ungulæ Alcis, specificum Pectorale, puta Pulmonem Vulpis, vel Lucii mandibulam in vertigine usurpet: idem dic de Farfara loco Betonica &c. sed agitur de Specifico, & Alterante, quod ubi convenit, potest pereuntem hominem ab Orci faucibus & certo, &

statim eripere; idque non per qualitates, ut vocant, Sensibiles [quas tamen possidet, crediturque idcirco non exiguui caloris particeps] sed per occultam efficacissimam, de qua plane ignoramus, an sicuti Periodicis febribus in nostram utilitatem adversatur; sic alicui forsan dispositioni fortuitæ nostri Corporis, ubi hostem non invenit quem pessundet, sed alium loco illius plane refractarium nanciscitur, adversatura nonnunquam sit in damnum nostrum. Certe spirituosæ quædam potio efficaciter sudorifica, ad leges Artis composita, & opportuno tempore exhibita in subjecto febricitante, simulque in bonam diaphoresim sufficienter proclivi, non leve beneficium potis est revera producere; eadem vero in subjecto, vel morbo ad suscipiendam remedii actionem nequaquam disposito, non leve damnum ex opposito potest inferre.

Verum quid opus est ab aliis remediis exempla depromere, si de China China ipsa, ubi vim suam febrifugam nequivit exerere, quid non ab simile suspicatus est Autor, centies innocentiam illius intrinsecam religiose testatus, & in ejus usum summe proclivis, nempe *Richardus Morton*? Hic igitur in *Phthysilogia* suæ *Lib. II. cap. 10.* postquam ad Febres Phthysicorum putridas Intermitteutes leniendas, vel supprimendos nonnunquam ad tempus earum paroxysmos, atque impetrandas inducias, ut inquit, parum fidas, atque incertas (præmissis constanter, ut pariter inquit, lethali de Ægri vita prognostico) Peruviani Corticis usum proposuit; subinde tamen factus est ad calcem ejusdem Capitis, non modo quod ejus operatio illis casibus non æque certo, ac perpetuo scopum suum attingit, ac in simplicibus Intermitteutibus; verum etiam quod ubi eum non proficere perspexit, Ægrotantem [quæcunque fuerit dispositio præcedens] pejor quam antea se habuisse. En illius præcisa verba: *Libere tamen fateor, me non observasse Corticem æque certo, & perpetuo in Febre Phthysica intermittente scopum suum attingisse, ac in Intermitteute sim-*



re simplici a mere morbida sanguinis diathesi orta: Ubi autem minus proficere perspexi, semper suspicatus sum jam ladi cerebrum, & genus nervosum; atque Aegrum deliriis, & spasms magis obnoxium fuisse, quam antea fuerat: Nolo hic *Mortoni* effatum adeo scrutari, ut disquiram, an læsio Cerebri, & nervosi generis, quam suspicatus est, credita sit ab eo irreperere jam cœpisse ante oblationem Corticis, qui proinde nequaquam profecerit, an successisse oblationi illius, eo quod vis ejusdem proficere nesciens nocuerit. Mihi sat sit scire, quod post ejus usum invalidum Aeger in deterius ruerit, ut ab eodem caveam, ubi nequit prodesse. Cæterum quæri posset, qui fiat, ut deliria, spasmi, lethargus, & similia obsessi jam Cerebri, & nervosi generis symptomata, per Chinam Chinam statim tollantur in iis febribus, utut Pernicialibus, quæ Febrifugo revera auscultant; minime vero sublata fuerint, sed *magis aucta* in iis, in quibus illam perspexit invalidam. Sane non erit abs re, si forte id factum suspicemur ab egregia per se remedii vi, sed incassum exercita, & perperam in malum usum, tandemque in noxam traducta. Quod si non irrationabilis est hæc suspicio in casibus, ubi cæteroqui eadem China China nonnihil temporanei levaminis solet nonnunquam afferre, quanto rationabilior erit metus, ne possit obesse, ubi nunquam prodesse consuevit? Apertius adhuc quam *Morton* loquitur in Epistolis *Sydenham* æque exercitatus ac ille in usu remedii, a se pro innoxio ubi congruat habiti: ibi namque post exclusas a ditione Corticis Febres Continuas vere excludendas, incunctanter subdit, quod si in iisdem libeat de Peruviano Cortice periculum facere, *non alios effectus* (sunt hæc illius præcisa verba) *ex ejus usu expectare licet, quam eos, quos hodie in Pleuritide, Peripneumonia, Angina, ac id genus Febribus inflammatoriis videmus, quibus non tantum non prodest, sed & plane obest*: quod quidem intelligendum de Pleuritide morbo Febrem symptomaticam inflammatoriam se-

*Terti Therap. Spec.*

cum trahente; non de Pleuritico symptomate Febrim essentiallem, vel intermittentem, vel etiam continuam, sed satis conspicue periodicantem, nonnunquam comitante; quo casu non inutilem prorsus Peruviani Corticis operam sum aliquoties expertus. Quod de Febribus Inflammatoriis, ab interna scilicet inflammatione oriundis, asserit *Sydenham*, confirmat cum communi graviorum Scriptorum *Cl. Nigrisoli* in Libro, cui titulus — *Febris China Chinæ expugnata*, & specialiter in Notis ad *Blegnyum* num. 19. asserens se iis casibus eandem vidisse vel irritum semper conatu, vel exitu semper parum felici exhibitam. Neque aliter ipse mihi pluries observasse sum visus, ut subobscurè saltem indicare in animo habui, ejusdem *Nigrisoli* Observationem meis conformem innuens sub initia *Cap. II. hujusce Libri*. Quis ergo se vadem præbeat, nullam adesse latentem, & nobis occultam internam (quod sæpe accidit) inflammationem in iis Febribus, aut Morbis, in quibus contra experientiam communem illius usum tentare præsumimus?

Istiusmodi considerationes, totque Clarissimorum Virorum sano usui Corticis cæteroqui amicorum asserta nuper relata, & meis quoque Observationibus consentanea deprehensa, eam mihi cautelam indidere, ut nedum ab ejus oblatione semper abstinendum duxerim iis in Morbis, in quibus vere non indicatur; sed neque Sanis ipsis ad præcautionem (cum scilicet regnant, vel instant Constitutiones, & tempestates febrium Periodicarum feraces) fuerim ausus hucusque, vel impræsentiarum audeam proponere; minime quidem quia id improbem, sed quia hæreo nonnihil incertus, etsi de hujusmodi praxi, ex se certe non irrationabili, nulla experientia in contrarium; immo potius quæ haberi potuit, sit favorabilis. Convalescentibus enim ex iis febribus, & in relapsum pronis China China ad præcautionem communiter cum fructu, quin & necessario exhibetur, eamque hoc nomine etiam omnino sanis exhibitam fuisse, &

Z



se, & quotannis repeti consuevisse scimus Invictissimo quondam Galliarum Regi LUDOVICO XIV. Attamen cum experientia hujusmodi respectu Sanorum semper incerta futura sit, tunc cum favorabilis extiterit, [ nescimus enim an qui China China ad prævunctionem epota immunis remansit, debuisset ea omissa decumbere, nec ne ] solumque certa queat esse experientia de opposito, si nempe quispiam China China ad prophylaxim usus, nihilominus æque decumbar ac ii, qui nullatenus eam sumpsere; idcirco ab istiusmodi experimento, quod aliis etiamnum tentandum relinquo, hactenus abstinendum censui, cum me lateat, ut aiebam, quid illa in diversis diversorum corporum dispositionibus possit efficere, tunc cum Antagonistam suum luctæ suscipiendæ paratum non reperit, seu cum materia Febris remota nondum est in motu, neque ad effervescendum disposita. Equidem si China China suum munus in humanum Corpus exerceret præcise per hoc, quod naturali humorum Symmetriæ robur quoddam positivum adderet, quo mediante iidem valerent sibi sponte restitui, atque hinc spontanea pariter emergeret Morbi cessatio, absque ulla medicaminis in Morbum ipsum, ejusque Causam pugna, in hac suppositione China China, quasi quid mere balsamicum, videretur posse pro libito ad præcavendas Febres usurpari; sed hic, ni fallor, non videtur esse, nec esse posse illius agendi modus, qui ad febrile potius, ut reor, Fermentum præcise absorbendum, subigendum, atque domandum vi pluries repetita, ne rursus reviviscat, videtur dirigi, media quadam lucta, cui non absimilem videmus inter duos liquores ex mutua commixtione effervescentes: & quocumque etiam plane pacifice intra corpus nostrum id fieret, cum alioqui incertum sit, an qui subeundæ v. gr. Tertianæ Febri dispositus est, eam sit sortiturus *Corruptricem*, ac proinde arcendam pro viribus, an potius *Depurativam*; penes me autem satius sit hanc subire, quam ab ea præ-

caveri, ob easdem rationes, propter quas dixi nec expedire ab eadem, si invaserit, per Chinam Chinam curari; propterea etiam ex hoc capite ambigo, an Sanis ea suadenda sit ad prophylaxim, etiamsi certum foret [ quod sane non est ] posse per illam in statu sano Febres Intermittentes præcaveri. Quocumque nihilominus hac de re libeat iudicium ferre, id cuiusvis fidentioris arbitrio relictum volo; non enim [ ut fatear ] pari passu putarim procedere inter statum sani, & ægri hominis suspiciones meas superius allatas. Iis igitur jam satis usquemodo in conspectum positis, in rem eandem nostram concludo tribus hisce Theorematis plane inconcussis. Primum est, quod *China China est magnum, præstantissimumque Febrifugum, & suapte natura innoxium*. Secundum, quod *in Mundo universo non est Medicamentum, neque Alimentum ullum, quantunvis innoxium, quod extra opportunitatem datum nocere possit*. Tertium denique, quod *Medicamentum quodlibet semper extra opportunitatem datum censendum est, quando ibi administratur, ubi communis experientia ostendit, illud nequaquam prodesse*.

Non ego tamen per ea, quæ hactenus protuli, eos activitati Peruviani Corticis intendo constituere limites, ut de illius viribus nil ultra quærendum sit. Etsi enim fortasse nil detegendum supersit ultra quod est hucusque detectum; attamen non improbaverim qui ulterius pergere moliatur exploranda ad alios Morbos, aut Febres illius virtute: ad eas inquam præsertim Febres, quæ sunt naturæ quodammodo ancipitis quoad recipiendam modo, & modo aspernandam illius actionem, quarum Febrium genium versatilem fuse indicavi *Cap. III. hujusce Libri*, & in *Icone* paullo ante ob oculos posita expressum volui. Quod dico de hisce, aliisque Febribus, v. gr. Lymphaticis [ in quibus sæpius invalidum reperi Peruvianum Corticem ] dictum volo de Morbis omnibus, in quibus nondum ullum ex una parte de hoc remedio factum fuerit a gravibus, eoque uti assuetis Auctori-



ctoribus contrarium experimentum, atque ex alia parte ad tentamen hujusmodi aliqua moveat non commentitia, & aerea, sed probabilis, & prudens conjectura, sive in solidis rationibus physicis, sive in observationibus experimentalibus plurimum analogis verisimiliter fundata. His enim concurrentibus conditionibus cessat cautela antedicta de suspitione in contrarium, & congruenter subingreditur favorabilis praesumptio resultans ex innocentia substantiae Remedii.

Neque pariter per eadem, quae hic, & alibi, praesertim in nonnullis Additionibus hujusce novae Editionis loquutus sum de malo, & intempestivo usu Peruviani Corticis, sibi quispiam persuadeat, velle me ullum metum incutere, vel quicquam de illa fiducia recte, ac opportune utentibus demere, quam in prima Tractatus editione iisdem luculenter indidi; ea enim ex adverso mihi mens est, ut plane nolim ab iis, quae tunc de usu Corticis evulgavi, ne latum quidem ungem recedere, neque dogmata meae Praxeos, quaecunque fuerint, ullo pacto modificare, sive restringere, sed ea potius mediis iisdem Additamentis undique comprobare, tum ea parte, qua admirandam Remedii virtutem ad Perniciosas praesertim Intermittentes, & Subcontinuas eximiis laudibus extuli: quam partem satis receptam universaliter a Professoribus & scio, & laetor; tum ea, qua cautelas omnes usum inopportunum docentes insimul, atque verantes sum persequutus: quam partem, ut fatear, identidem haud satis exultam & video, & doleo. Atque ut circa hoc quoque praeter regulas particulares suis locis jam satis expositas, quidpiam generaliter subdam, liceat mihi Modulum quendam, sive Exemplar practicum operandi, atque pro re nata cavendi incidenter ab occasione depromere, illudque Practicorum oculis spectandum exhibere: qua equidem in re ne utiquam piget me quoad generalem quandam Ideam sequi vestigia, etsi nequeam quoad specialem sequi sensa Cla-

rissimi *Ramazzini*, mei quondam in hac materia Antagonistae semper spectabilis, semperque colendi. Clausit ille Dissertationem suam de *Abusu Chinae Chinae* hoc dogmate, videlicet, *Usus Peruviani Corticis in febribus intervallatis esse debere, qualis est usus Opii in doloribus demulcendis, atque ad tempus sedandis*. Dogma istiusmodi, utpote nimis restrictum, & arctum (eo maxime, quo Author se explicat sensu) sive Modulum hunc ab eodem pro Archetypo in hanc rem nobis oblatum debita proportionem carere, habito respectu ad opus faciendum, satis superque ostendi, rejecique idcirco in *Responsionibus meis Jatroapologeticis* ad §. 48. pag. 173., & seq.: quamobrem hunc alium potius illi substituendum dixerim, scilicet, *Usus Peruviani Corticis ad expungendas easdem Febres* (hic intellige Vulgares tantum: Perniciosarum siquidem Intermittentium curatio sub hac regula nequaquam cadit; ) *esse debere, qualis esse solet usus externus Sulphuris ad depellendam Scabiem*. Ut me clarius explicem in gratiam Tyronum, notum est Medicis omnibus, Sulphur bis, aut ter externe illitum, Scabiem multiplicis generis, sive humidam, sive siccam cito, ac certo depellere, & cutem mundare. Notum est pariter, de Scabiebus alias esse, ut sic dicam, Corruptrices liquidorum nostri corporis, cujusmodi sunt quae habent radicale vitium in cute, sive fuerint illae ab ingentis in ipsa cute vermiculis, aut Acaris ortae (omnibus enim Scabiebus unam hanc esse originem non ita facile admiserim) sive per contactum fuerint ab externo communicatae, alias vero esse eorundem liquidorum Depuratrices, cujusmodi sunt, quae post longas aegritudines solent erumpere, aliaeque non raro de genere praesertim humido, sponte prodeuntes, quae pustulis, & tuberculis pus, & ichorem manantibus solent scatere. Certe has utriusque generis Scabies, tum siccas videlicet, tum humidam [addamus insuper, etiam pro Depurativis nonnunquam habitas] illitione Sulphuris, impurgato



corpore, hyemali etiam tempore, expulſas non ſemel vidi abſque ullo ſubſe-  
quente ſanitatis detrimento, aut incom-  
modo, præſertim in robuſtis hominibus,  
aſſiduoque labori, motui, & corporis  
exercitio adſtriſtis, aut deditis. Felicius  
autem ſemper, ut & rationabilius, id  
accidiſſe obſervavi, ubi Scabie *recenter*  
per contactum ſuſcepta, priuſquam la-  
bes fluidis circulantibus communicare-  
tur, fuit illa per externam Sulphuris ap-  
plicationem depulſa vel ubi eadem labe  
iſtis fluidis jam communicata, & im-  
preſſa, aliquis ſubinde conſeſſus fuit  
Scabiei jam introductæ progreſſus, &  
diuturna quædam materiæ ſucceſſive e-  
rumpentis imminutio, atque conſum-  
ptio, demumque fuit poſt præmiſſam,  
prout opportuna credita eſt, venarum  
depletionem, atque ablutionem cavitati-  
um, Vernali tandem, aut Æſtiva tem-  
peſtate, favente ſimul tranſpirationis li-  
bertate, & Balneorum aquæ fluvialis  
commodo, adminiſtratum Sulphur. Con-  
tra vero pluries ac pluries, forſan &  
centies, novi ex ſuppreſſa per ſolam ejuſ-  
dem Sulphuris butyro excepti inunctio-  
nem Scabie ſponte orta, vel ægritudi-  
num diuturnarum, aut acutarum ſubſe-  
qua, ſtatim Febres Inflammatorias, ma-  
xime vero Pleuritides, Peripneumonias,  
& Pectoris hydropes, aliaque non abſi-  
milia mala erupiſſe, quorum non paucis  
funèſtum tandem terminum impoſuit  
mors ipſa.

Cuncta hæc, quæ dicta ſunt de variis  
Scabiei ſpeciebus, quarum plurimæ nun-  
quam, aut fere nunquam Sulphure ſunt  
attingendæ, ſi nempe Depuratoriæ ex-  
titerint; aliæ, quamvis Corruptrices,  
non omni tamen tempore, & modo poſ-  
ſunt attingi, quia nempe non ſemper  
æque tuto, etſi æque cito, depelleren-  
tur, cuncta, inquam, hæc ad varias  
Febrium Periodicarum, tum Depurati-  
varum, tum Corruptivarum ſpecies,  
æque facile quidem, & æque cito, ſed  
non ſemper æque tuto, quovis etiam  
earum tempore per Chinam Chinam fu-  
gabiles, proportionaliter debent referri.  
Nec aliud deeſt ad hoc, ut quis oppor-

tunitatem, modum, & locum exhiben-  
di Remedii poſſit ediſcere, niſi ut pri-  
mo loco ad Febrium Naturam, & Dif-  
ferentias, ſecundo ad Regulas, & Cau-  
tiones omnes, quas toto Tractatu re-  
cenſui, & inculcavi, tertio tandem ad  
ea omnia, quæ in *Reſponſionibus meis*  
*Jatro-apologeticis* nuper citatis eidem  
Clariffimo *Ramazzino* repoſui circa  
uſum, & abuſum Chinæ Chinæ, ani-  
mum a præjudiciis immunem diligenter  
advertat.

#### Quæritur Quartò.

*An Cortex Peruvianus per Clyſteres in-  
jectus, aut Carpiſ appoſitus quicquam  
curationi Febrium conferre valeat.  
Primus modus, utut imbecillus, non  
plane rejicitur. Secundus nil prope  
præbet fiduciæ, languida illinc, hinc  
inani reſpondente experientia.*

**F**EBRES Cortice curabiles, nullo per  
os exhibito medicamine, ſed ipſo  
tantum Cortice per Clyſteres frequen-  
ter ad plures dies injecto, facillime cu-  
rari vulgatum fuit ab *Helvetio* ante an-  
nos aliquot peculiari Libello ad hanc  
Methodum innuendam, & promoven-  
dam edito. Paradoxa tamen plerique  
viſa eſt hæc opinio; nec ſine ratione  
quidem; eamque diſerte ſatis examinat  
*Nigriſolus* in Libro alias citato, ad  
quem curioſos relegamus. Nos, quidi-  
miſſis opinionibus, de ſola experientia  
ſumus ſoliciti, ſi non aliena, quam ſuis  
Auctoribus relinquimus, & legentium  
fidei, ſaltem propria, quid nobis circa  
hoc experiri licuerit, paucis hic per-  
ſtringemus.

Et primò, quoniam huiusmodi cura-  
tio Febrium per frequentiffimos Clyſte-  
res, ter ſcilicet, ac quater in die, cur-  
ſu plurium dierum injectos, deberet  
abſolvi, Methodus hæc apud nos Ita-  
los, præſertim Circumpadanos, qui æ-  
gre admodum unum, vel alterum Cly-  
ſterem ad alvum exonerandam admit-  
timus, univerſaliter uſurpari nequit,  
illamque ideo, etſi certa foret, vix au-  
derem



derem cuiquam proponere. Quam ergo experientiam talis Methodi penes nos propemodum invisæ possidere possim, vel ex hoc uno deducat quilibet.

Fateor tamen, quod licet olim mihi non innotesceret hæc *Helvetii* Methodus, tamen meo Marte hoc tentamen quaecunque ipse inii Anno 1695. prout constat ex *Historia unica Cap. VI. Lib. 3.* descripta. Alias postmodum placuit mihi idem experimentum repetere, Ægro quidem inodo feliciter convalescente, ut tunc, modo non convalescente, ut in *Historia tertia Cap. IV.* huiusce Libri. Verum quoniam nunquam præscripsi Corticem in Clysteribus, quin simul præscripserim assumendum per os, sanationem, ubi contigit, longe probabilius tribuendam censeo ingesto, quam injecto remedio, dato quod, ut erat in votis, ipsa ingestionem roborarit injectio. Ex adverso cum ubi Æger servari non potuit, ne propinatus quidem profuerit Cortex, mirum non est, quod neque profecerit injectus, præsertim cum semel tantum, aut bis, ad summum ter, fuerit ope Clysteris intrusus.

Cæterum, si liceat libere proferre quod sentio etiam adversus me ipsum, vereor, ne quæ solis Clysteribus facile adscribitur medela, proficiscatur potius, maxima saltem ex parte, ab ipsa Natura: tum quia curatio huiusmodi nonnisi plurium dierum curriculo potest obtineri, quod æque solet contingere sponte, & citra hanc methodum: tum quia nonnisi difficulter potest ad Lacteas pertingere (siquidem *Bauhini* valvulam superare queat) injectum medicamen; nec, nisi ad illas pertingat, videtur posse corrigere saltem efficaciter Fermentum febrile, quodcunque illud supponatur, & ubicunque, in ipsis videlicet etiam Intestinis delitescens. Quoniam ergo vix potest intelligi, quod Febris ulla, quæ grave periculum inferat, ut aliqua v. gr. ex Perniciosis, possit debili hac methodo sanari, propterea nulli auctor ero, ut huic uni præcise fidat in casibus arduis, nisi videlicet simul Corti-

*Torti Therap. Spec.*

cem, & quidem largiore dosi per os exhibuerit, quærens in subsidium tantum ab injectione ejusdem tenue id, quod poterit obtineri. Si vero Febris sit mitior, atque diuturnior, videtur mihi longe major Ægro molestia ex remedio, nempe ex repetita toties Enematum admissione, quam ex morbo ad consuetum fere terminum nihilominus perventuro, aut ex breviori Corticis per os assumptione, morbum ipsum statim tollente. Quapropter huiusmodi methodo locus tantum esse videtur in iis casibus, ubi Febricitans Corticem vel renuit, ut si sit delirans, vel nequit assumere, ut si sit lethargicus, vel assumptum retinere, ut si assidue vomat; in quibus casibus, & circumstantiis melius est anticipem, aut imbecillam, quam nullam methodum experiri; siquidem seposita etiam anticipi, & infirmiore experientia mea, sufficiens testimonium perhibere potest de aliqua saltem activitate Corticis per Clysteres infusi assertio constans ejusdem *Helvetii* de maxima, adminiculantibus præsertim huiusmodi assertionem aliorum quoque Virorum fide dignorum suffragiis, quos inter *Clariss. Sbaralea*, qui de China China verba faciens, hæc habet — *Qui non tolerant in stomacho hunc pulverem, ad unciam unam in clysteribus utiliter recipiunt, ut nobis contigit observare in muliere cum facie semper maxime rubicunda: hæc enim assumptam per os Chinam non tolerabat; a prædicto autem clystere sanata est.* Si quis tamen curationem istam Chinæ Chinæ potius per os assumptæ, nec per vomitum forsan plane rejectæ [posito etiam, quod eam vel magna ex parte, vel non multo post assumptionem mulier illa vomuerit] quam per Clysterem admittæ tribuere velit, is, puto, de opposito poterit difficulter convinci.

De appositione Corticis ad carpos, non est, quod multa loquar. Experientia, quæ docet ipsius substantiam prævalere Extractis, atque Tincturis, videtur pariter suadere, virtutem illius consistere non in particulis spirituosiss, aut



volatilibus, per externum contactum facile communicabilibus, ac susceptibilibus, sed interreis, resinosis, ægre admodum per poros insensiles cutis usque ad sedem qualemcunque febrilis Fermenti traducibilibus, & consequenter vel tenuissimum, vel, quod credibilius est, nullum plane ab externa Corticis appositione juvamen esse sperandum. Huic ratiocinio respondere visa est experientia ipsa, quæ cum potis sit, si inaniter succedat, Medicum exponere derisioni vulgi, ideo semel vacua, non amplius a me tentata fuit. Sic autem se habuit. Quartanariæ cuidam pauperculæ, in Xenodochio degenti, Corticem in tenuissimum pollinem redactum, & Vini spiritu subactum, in formam Emplastri, sive, ut ajunt, Epicarpium, utrinque ad carpos apponi jussi, addendo quotidie per dies octo novum pulverem similiter subactum in locum exsiccari, atque deperditi. Paroxyismi interim pari passu procedebant: cumque Ægram tæderet remedii æque ac morbi, mihi que exprobraret illa prioris inefficiam, audaculæ mulierculæ reposui: me non alio, quam illo eodem *in specie* medicamento velle ipsam sanare. His dictis, evestigio jussi Emplastrum removeri, *duasque* novi Corticis *drachmas* non Carpis amplius admoventi, sed interius exhiberi, ex Vino potandas. Cum vero illa male credula suspicaretur, ne quid aliud loco Corticis, vel ipsi saltem Cortici furtim commiscendum, præscribere, subdidit: malle se (dummodo ipse non renuerem) illum eundem pulverem per os assumere, quem per octiduum circum brachia frustra gestaverat. Miratus ego pervicaciam mulieris, annui. Potavit illa Epicarpium ipsum Vino dilutum, & futuram arcuit Accessionem, continuatoque sensim remedio, recidivam etiam evasit, Cortici, cui prius maledixerat, plaudens postmodum, ac benedicens.

Sunt hæc, quæ de omnifario usu Peruviani Corticis, respectu habito ad singulas Febrium, aliorumque morborum species, hætenus mihi licuit colligere,

ac per novem lustra & amplius experiri; *nullius enim morbi nomen* (dicam cum Hippocrate, intelligendo tamen de morbis, quibus Cortex possit opem conferre) *nullius, inquam, morbi nomen desiderare oportet, quod hic non est adscriptum.* Qua vero sorte peractum id fuerit, videat Lector. Non hic mihi loqui mens est de inelegantia sermonis, vel de illius implexa, & in suo sæpius intercisa circuitu prolixitate. Tyronibus etenim scribens id egi, ut a Prælectionum mearum consuetudine nequaquam recederem, Stylo usus mere scholastico, ne dicam barbaro, verbisque identidem, quæ Priscianus, aut Orbilius horreat, videns non raro meliora, probansque, sed persæpe deteriora sequutus, utpote rem, quæ doceri exigit, non ornari, commodius explicantia. De his ergo levioribus, & superficiem tantum respicientibus hic non loquor; loquor unice de substantia rei. Hæc ipsa vero, si quædam spectemus crassioris Theorices intermixta specimina, delicatulis quibusdam, atque subtilibus, fore identidem ut parum arrideat, satis superque prævideo. Sed & hanc Theoreticam partem ipsemet non magni facio, ac do libenter castigandam doctioribus: non enim refert, si Remedium non prodest propter eam præcise rationem, propter quam illud profuturum conjeci, dummodo prosit. Materiam autem practicam, in ea præsertim, quæ præcipua est, Tractatus parte, adeo sartam tectam puto, experientia vindice, ab Adversantium cavillationibus, ut si quas forsitan subire cogar, eas universali Practicorum iudicio tacite sim relicturus, pacato interim animo cum Sydenhamio concludens — *Sicubi circa Theoriam me hallucinatum fuisse Lector deprehendat, errori veniam peto; verum quod ad Praxim attinet, profiteor, me omnia ex vero tradidisse, nihilque uspiam proposuisse, nisi quod probe exploratum habeam &c., ratus, quantulamcunque in hoc scientiæ genere accessionem, etsi nihil magnificentius, quam Odontalgia, aut Clavorum pedibus innascentium, curationem edoceat,*



*edoceat, longe maximi faciendam esse præ inani subtilium speculationum pompa, ac levicularum rerum notitia, quæ fortasse Medica ad abigendos morbos non magis ex usu futura est, quam Architecto ad construendas aedes Musica artis peritia.*

De Cortice dixi, quæ animadverti in Urbe, ac Regione mea. Quid præstet ille apud Alienigenas, immo non in Europa tantum nostra, sed & in America, & Asia, ex Scriptoribus fide dignis jam satis innotescit. Facile est autem ex eo, quod hucusque præstitit, quid sit in posterum præstiturus conjicere. Nemo proinde me insimulet vanitatis, si quando (quod ægre crediderim) votis respondentem non plane sortiatur eventum in Regione sua, ut ego dubio procul, eademque certitudine, qua protuli, sum sortitus in mea. Nul- lus ramen dubito, quin servatis exacte regulis, & limitationibus a me consti-

tutis, eventurum sit semper ubique terrarum, quod hic quotidie contingit, sive Curationem spectemus, sive Febres, ac Signa febrium curandarum. Sicuti enim ex Hippocrate — *In omni anno, & omni tempore mala malum, & bona bonum significant*, ita probabiliter idem significant in omni loco. Quia vero de his omnibus, quæ late spero, me vadem nequeo præbere, nisi iis tantum in locis, in quibus circumcirca eadem mihi contigit experiri, liceat ideo mihi met pariter, huic Tractatui finem imposituro, imitari eundem Hippocratem, Prænotionum Librum hac declaratione claudentem — *In Lybia, & Delo, ac Scythia (dicam ego: In Æmilia, & Longobardia Cispadana) præscripta vera comperiuntur. Proinde sciendum est minime difficile esse, in iisdem Regionibus posse aliquem pleraque ex ipsis assequi, si memoria tenens ipsa, judicare, ac recte expendere sciat.*

F I N I S.



# INDEX

## RERUM NOTABILIVM.

## A

**A** Bortum passa Mulier tuto potest curari *Peruviano Cortice*, si Febris id remedium exigat, non omissis aliis, quæ Abortum respiciunt pag. 346. 347.

— Circumstantiæ rationabiliores illum exhibendi Puerperis, vel Abortum passis. *Ibid.*

Absorptio Fermenti febrilis per *Corticem* facta est peculiaris, & suis generis co-ctio 269.

Abusus quandoque, & neglectus *China China* ob inscitiam medentium. 256.

Acetisolutivi portiuncula in acetario sumpta Febrem *China China* fugatam statim revocavit. 201.

Acetum, nondum statutum est inter Medicos, an refrigeret, an calefaciat. 19.

Acredinem salinam Fermenti Febrilis retundi vult *Borellus* a salibus contrariæ naturæ citra priorum exclusionem. 27. & 28.

Actio *Corticis* videtur suadere coacervationem Fermenti Februm Intermittentium extra cruorem. 71.

Actio *Corticis* sine evacuatione sensibili febrem fugans cohæret etiam principiis ipsius Scholæ *Paracelsi*, & *Helmontianæ*. 39. & 40.

— Neque minus cohæret novo Solidorum, quam vulgato Fluidorum Systemati. *Ibid.*

Acuta facta Febris, hominem tamen non interemptura, si ex se judicetur *integre*, atque *perfecte*, melius etiam quoad suspicionem recidivæ judicatur, quam si curetur per *Corticem*. 173. 174.

Adulterinus quandoque *Cortex* potest nos fallere. 3.

Admonitio Auctoris circa Innocentiam *Corticis* 86.

Admonitio de *Cortice* caute offerendo in Intermittentium principio. 87.

Ægris nonnunquam accepta magis officiosa jugulatio, quam sanatio minus serviliter præstita. 9.

Ægroti ex Perniciosis Periodicis ad extrema redacti, & repente animam cæte-

roqui efflati, debita oblata dosi *Corticis*, illico restituantur. 130.

Ægroti jam deplorato ex Perniciosa Intermittente, dummodo vita in futuram accessionem postredie adventuram debeat protrahi, exhibendus est *Cortex* methodo valida. 160.

Aeris nostri seculo examen multiplex. 111.

Algidæ Intermittentis Perniciosæ descriptio. 138.

Algidarum Februm *China China* sanatarum Historiæ 211. usque ad 219.

— Algidæ Febris Historia nu. v. 211.

— Alia num. vi. 212.

— Alia num. vii. 213.

— Alia num. vii. 214.

— Alia num. ix. 214.

— Alia num. x. 218.

Alvi fluxus loturæ Carnium similis, Perniciosæ Tertianæ associatus, curata per Chinam Chinam febre, simul evanescit. 199. 200.

— Item Fluxus atro-sanguineus. 246. Amara non videntur Vermes necare experientia *Redi*, *Vallisnerii*, & Auctoris 333. 337.

Amuletis, Purgationibus crebris, & Specificis invalidis &c. Medici nimium creduli Intermittentium curationem incassum tentabant ante inventum *Corticem*. 11.

Animadversiones in casu peculiari *China China* feliciter oblatae. 218.

Animadversio in oblationem *Corticis* haud satis felicem in Intermittentium principio. 84.

— Alia in oblationem adhuc minus felicem in Intermittentium plane Depurativarum progressu 86. 87.

— In casum infelicem 234. 235.

— In Historiam Hæmoptoes a *Mortono* *Cortice* curatae 343. 344.

Animadversiones Auctoris in Historias ab aliis Medicis sibi communicatas 254. a 255. & 261.

ANONYMUS stupet Italorum incredulitatem erga *Corticem* 10.

Apologeticæ Scribentibus de *Cortice* familiaris



- liaris est tutela fervidior ejusdem, 8.  
& 9.
- Iisdem necesse est se accommodare crassioribus Adversantium Principiis, ut eos convincant. 9.
- Apoplecticus insultus periodice cum febre recurrens, & in Paraplegiam commutatus, una cum febre per *Chinam Chinam* sublatus est. 249. 250.
- Appendix ad Historias. 255.
- Aqua Stibiata Pomponacii morbos plurimos sanat sæpius absque sensibili evacuatione. 28.
- AQUIN quidquid a *Cortice* dicatur relictum in corpore post Febres depulsas, maturari putat, concoqui, & discuti sponte. 31.
- Illius sententia de Intermittentium causis. 37.
- Arboris Februm Genealogicæ explicatio generalis. 327.
- Ejusdem explicatio particularis. 328. & 329.
- Ardentibus, Malignis ab ortu, & Inflammatoriis Febris curandis aptari *Corticem* asserunt nonnulli, sed inexperti, & falso. 299.
- Ars Medica superfluis Medicamentis alioqui ditissima, bonis, & certis, quæ innotuerint, identidem caret. 124.
- Asthmati convulsivo *Chinam Chinam* opem tulisse, Epistola *Corghii* ad Auctorem ratum facit. 330.
- Casus ipse describitur *ibid.* & 331.
- Asthmaticum affectum, Catharrum suffocativum, dolorem Pleuritico similem, Arthriticosque dolores Perniciosi Intermittentibus associatos observavit *Mercurius*, neque tamen veluti morbos consideravit, sed veluti accidentia, ut vere sunt, a Febre producta. 121.
- Atrabilaris Febris perniciosa Intermittens describitur. 136.
- Atrabilaris dejectio immanis Perniciosæ Tertianæ adjuncta una cum Febre curatur ope *China China*. 199. 200.
- Atrabilaris Febris *China China* curatæ Historia una *num.* vii. 199.
- Ejusdem Historia altera *numer.* viii. 200.
- AUCTOR anno 1696. usu *China China* ab imminente morte liberatur. 5. & 208.
- Historiam suæ ægritudinis, & curationis refert. 205. ad 209.
- Sobrius est in usu *Corticis* ad Benignas Intermittentes præ aliis Medicis *Cortice* utentibus, 76, & 97.
- Vix unquam eo utitur ad Intermittentes tempore Veris, & in principio Æstatis. 75.
- Illius cum *Mortone* coincidentia quædam fortuita. 170.
- Auget dosim *Corticis* germani, & vegeti, ut vere efficaciam fortiatur, Perniciosis fugandis in extrema angustia necessariam. 172.
- Quid suis Scriptis ominetur. 167.
- Quid de sua Methodo sentiat. 168. 169.
- Ejusdem Methodi discrepantia cum Methodo *Mortoni*. 171.
- Quid reddat Auctoris Methodum spectabilem, & præ reliquis admirabilem. 168. 169.
- Exemplum affert pro innuenda præstantia hujusce Methodi. 169.
- Methodus Auctoris ad Intermittentium diuturniorum recursum præcavendum post adhibitam Methodum Romanæ Schedæ. 61.
- Semel tantum, vel bis intra Annos circiter 50. illum fefellit *Cortex* in curandis Intermittentibus Febris. 4.
- Cogitata sua manca adhuc, & imperfecta circa Februm Intermittentium Causam, & Genesim innuit. 51. usque ad 60.
- In Dissertatione sua tricipiti, Anno 1698. edita, difficultatibus circa rem Barometricam a *Camerario*, atque *Fontana* sibi objectis respondens, *Schellamerum* valide impugnavit in ea materia plane deceptum. 111.
- Fermenti Nomen in Febris metaphorice usurpat. 40.
- Ubi tamen non bene sonat, aut superfluit, longe rejicit. 46.
- Fluidorum Systemati adhæret potius, quam Solidorum. 40.
- Non omnes complicationes Februm, quot, & quales erant apud Antiquos, facile admittit; sed ad abundantiam supponit. 316. 317.
- Quænam apud eum Continentes Febres. 290. 297. 301.
- Germanas *Corticis* notas describere renuit. 345.
- Sicuti & ejus Historiam. 2.
- Experimenta circa plurima instituit, quæ Lumbricos dicuntur necare, connumerando *Corticem* inter hæc. 334. 337.
- Experimenta ex *Cortice* commixto cum Sanguine, & Bile. 23.
- Expe-



- Experimenta ad explorandam vim *Corticis* sensibilem incassum instituit. 23.
- Se hallucinatum fatetur circa *Epistolam Lancisii* sibi inscriptam. 314.
- *Chinam Chinam* per *Clysteres* inject ad corrigendum Fermentum febrile, *Helvetii* methodo sibi adhuc incognita. 357.
- Tali Methodo parum tamen, aut nihil fidendum censet in casibus arduis. *Ibid.*
- *Hemitritæi* originem probabiliorem exponit. 318.
- Eumque *Cortice* curari posset affirmat. *Ibid.* & seq.
- Textum *Mortoni* de *Hæmoptoe* exponit. 341.
- Item de *Phthysicorum* Febre. 340.
- Item Capitulum ejusdem de *Proteiformi* Febre, *Intermittentis* genio, adjectis *Scholiis* recudit. 124.
- *Innocentiam* *Corticis* jurejurando testatur. 4.
- *Intermittentium* *Febrium* originem per conjecturas varias, & imperfectas requirit. 51. ad 60.
- *Virtutem* *Corticis* ad *Perniciosas* *Periodicas* a se detectam, & promulgatam, universaliter receptam fuisse lætatur. 355.
- *Cautiones* vero illius usum inopportunum docentes, atque vetantes, haud satis esse a nonnullis excultas docet. *ibidem.*
- *Corticem* *Peruvianum* esse *Hæmoptoes* habitualis Antidotum herculeam, ut asserit *Morton*, non admittit. 341.
- Non diffitetur cum *Mortono* posse putridas *Phthysicorum* Febres intermittentes aliquo modo *Cortice* leniri, interitu tamen *Ægrotantis* nequaquam inhibito. *ibid.*
- Experimentum facit de *Lumbricis* *Terrestribus*, & *Vitulinis* in Infusione *Chinæ* *Chinæ*, & in aliis succis. Vide, *Lumbrici Vitulini*, & *Terrestres*.
- Quasdam *Perniciosas* Febres observat forte a *Mercato* non observatas: sicut alias ab *Auctore* non observatas observavit *Mercatus*. 139.
- Methodus *Auctoris* ad *Perniciosas* *Periodicas*. Vide *Methodus Auctoris* &c.
- Generaliter non admittit suppositionem *Mortoni*, Febrem quamlibet, saltem primariam quomodolibet remittentem, etsi continuam posse *Cortice* curari. 342.

- Nondum cusa, vel nota sibi erant *Mortoni* Scripta, cum propriam Methodum ad *Perniciosas* exercuit. 123. 241.
- Syrupum ex *China* *China* præsertim pro *Pueris* describit. 64.
- *Nomenclaturam* *Veneri* *Febrilis* a *Mortono* usurpatam examinat, nec facile admittit, nisi lis sit de voce. 128. 129.
- *Refractariam* *Corticis* sæpius apprehendit *Lymphaticam* Febrem. 354.
- Suspectas habet *Virtutes* plurimas, a multis *Corticis* attributas. 331. 332.
- *Historiam* *Corticis*, scribere detrectat, quum eam apud *Badum* legere possit quilibet. 2.

## B.

- BACCONI** animadversio notatu digna in praxi medica. 170.
- BACCONUS** nullum inquit remedium semel oblatum curationi alicui grandiori posse sufficere. 16.
- BADUS** *Corticem* *Peruvianum* propugnavit Libro peculiari. 2.
- *Historiam* *Peruviani* *Corticis* conscripsit. 2.
- Asserta sua de *Corticis* activitate adversus varias *Febrium* species, plurimum ævi sui illustrium Medicorum auctoritate roboravit. 2. 3.
- Circa *Febrium* *Intermittentium* Causas non coincidit cum *Protospatario*, ut opinatur *Morton*, sed illi adversatur. 38.
- Morbis omnibus *Frigidis* mederi *Corticem* putat. 329.
- BARBETTE** opinio circa essentiam *Febris*, & *Intermittentium* Causas. 37.
- BELLINUS** primus *Medico-mechanici* *Systematis* antesignanus. 40.
- Ejusdem de Causis *Intermittentium* Sententia. 38.
- Laudatur 40.
- BELLOT** sectator *Magati* in re *Chirurgica*. 125.
- Benignarum* *Intermittentium* apud *Auctores* mentio frequens, & curatio copiosa; *Perniciosarum* fere nulla. 190.
- Bili* *Humanæ*, magisque *Bubulæ*, injecta *China* *China* pulverata cito submersa est; non ita in *Aqua*, licet hæc levior tunc apparuerit eadem *Bile*. 25.
- Bilis* absorbetur a *China* *China* facilius ac absorbeantur plures alii liquores, ob peculiarem proportionem particularum illius



- illius cum poris *China China*. 24. & 25.  
 Bilis æque ac Aqua extinguit ignem, nec est facile inflammabilis: ardet tamen Olei ad instar, si fortiori igne urgeatur. 26.  
 Bilis, & Olei analogæ est structura, licet inæquale sit pondus. 25.  
 Bilis poros *Corticis* facile replens, illius submersionem in ipsa Bile faciliorem reddit. Horum neutrum efficit Aqua. 25.  
 BLEGNY de Causis Intermittentium, & actione *China China* in illas opinio. 37.  
 — Afferit Morbos *Vaporis* nomine donatos, Febres quascunque, Hydropses &c. *Cortice* curari. 330.  
 Bolus Paregoricus Auctori familiaris non multo ante paroxysmum Tertianarum Cholericarum. 71.  
 BORELLI opinio de Intermittentium Causis. 35.  
 BORELLUS acredinem salinam Fermenti febrilis retundi vult a salibus contrariæ naturæ citra priorum exclusionem. 27. & 28.  
 — Idem ab actione *Corticis* deducit, Febres evacuationibus non esse curandas. 17.  
 — Ejusdem dictum. 332.

## C

- CAMERARI I difficultatibus Auctor respondit. 111.  
 CAMPANELLÆ opinio de prima Febrium Causa. 39.  
 Camphora, dubium est apud Medicos, an refrigeret, an calefaciat. 12.  
 CAPRILIUS octo simul Tertianas dari posse in eodem Ægro, non dubitavit asserere. 317.  
 Cardiacæ Febris Intermittentis perniciosæ descriptio. 136.  
 Cardiacarum Febrium *China China* sanatarum Historiæ 201. usque ad 205.  
 Cardiacæ legitimæ Historia num. ix 201.  
 — Ejusdem Cardiacæ legitimæ Historia altera num. x. 202.  
 — Cardiacæ Spuriæ Historia num. xi. 202.  
 — Ejusdem Cardiacæ Spuriæ alia Historia num. xii. 203.  
 — Alia similis num. xiii. 204.  
 — Alia pariter num. xiv. 204.  
 Carpis apposita *China China* nihil probabiliter conferre credendum est ad curationem Febrium. 357. 358.

- Narratio Historiæ cujusdam lepidæ idipsum confirmantis. *Ibidem*.  
 Casus minus felix notatu dignus. 232.  
 — Animadversiones in hunc casum. *Ibid.* & 235.  
 — Alius pariter casus. 285.  
 Cataleptici quodammodo facti Ægrotantes in Perniciosis Febribus *China China* feliciter curati. 236.  
 — Item. 238. 247.  
 Cathartica, aut Emetica nequeunt Fermentum Intermittentium, etiamsi in Ventriculo, aut Intestinis stabuletur, a scaturigine sua mineram instaurante radicitus extirpare. 49.  
 Catharticum post Perniciosam Febrem *China China* curatam assumptum in majus statim discrimen Ægrum conjecit; eodem tamen remedio ille iterum sanatus est. 246.  
 Catharhum suffocativum Perniciosis Intermittentibus associatum &c. Vide, *Asthmaticum affectum* &c.  
 Causa Febrium est res molis exiguæ. 22.  
 — Non aliter potest figi a *Cortice*, nisi per simplicem absorptionem ipsiusmet Causæ, seu Fermenti febrilis. *ibid.*  
 Causa antecedens Febrium Intermittentium ægre per diuretica, aut diaphoretica potest educi. 32.  
 Causæ Quartanam, Tertianam, & Quotidianam Febres producentes in quadam ratione univoca conveniunt. 152.  
 — Quænam probabiliter, sit hæc ratio. 152. 153.  
 Causæ Febrium quærendæ sunt in humoribus notis, alteratis in motu, & crasi, seu structura, non in fictitis putrescentibus, qui debeant evacuari. 28. 29.  
 Causas plurium Morborum periodice recurrentium non evacuatione semper sensibili, sed sæpius alteratione curare consuescimus. 28.  
 Cautela de non exhibendo *Cortice* deploratis omnino, & proxime animam efflaturis. 175. 176.  
 Cautiones usum *Corticis* inopportunum docentes, atque vetantes non satis esse a nonnullis excultas dolet Auctor. 355.  
 Censura adversus *Corticem* cuiuspiam patenter morituro frustra administratum inanis. 178.  
 Character perniciosus in primo exortu suo mitis: in progressu ferox. 140.  
 CHARAS peculiarem *China China* præparationem docet, ut inhibeantur Recidivæ. 15. 16.



CHINA CHINA circa annum 1649. in Italiam translata opera Eminent. Card. de Lugo, aliorumque PP. Soc. Jesu. 2.

— Illius historiam scribere detrectat Auctor, cum eam apud *Badum* possit legere quilibet. 2.

— A solo Bado illam transcribere quotquot ante, & post editionem hujusce Tractatus eandem sunt persequuti. *ibidem*.

— Illius varia nomina. 1., & 2.

— Item Locus Natalis. 2.

— Ejusdem quamvis innoxiae, oblatio intempestiva potest obesse, ut & oblatio aliorum remediorum, atque ciborum. 18.

— Illam Catharticus admiscere ad evacuandam simul Causam Febris, error est. 59.

— Eandem obesse pinguibus, ipsamve post annum, vel post septennium saltem Febres iterum, aliosve morbos accerere, ridiculum est. 5.

— Humano Sanguini recenter educto commixta illius concretionem, ut putarunt aliqui, non impedit. 23. & 24.

— Utiliter commiscetur cum Conservis, Syrupis &c. 64.

— Creditur causam Febris figendo, intus detinere ad graviora mala inducenda, sed perperam. 16. 17.

— Item. 21. usque ad 23.

— Relinquit Sanguinem in eo statu, in quo illum reperit, nec adversus illius impuritates pugnat. 71.

— Sive in forma solida exhibeatur, sive liquida, sive in Vino tenuiore, sive in generosiore, sive prævia, sive omitta infusione (quod perinde est) Febrim tollit. 3.

— Causæ Februm antecedenti per viam solius alterationis, non evacuationis adversatur. 20.

— Neque figit, neque fundit humores, aut Sanguinem. *ibid.* & 5.

— Quid vere efficiat, cum Febres sistit. 267.

— Si offeratur dosi congrua in Febre Intermittente, potest Medicus certo spondere Febrim minime redituram. 4.

— In Perniciosarum extremo periculo quum offeratur, expectanda est Accessionis Remissio. Vide, *Remissio Accessionis*.

— Narcosim nullam in se continet. 6.

— Nisi in principio Subcontinuae Malignantis, quæ Corruptiva futura sit,

exhibeatur, non amplius potest utiliter ægrotanti exhiberi. 264. 265.

— Esse Antidotum Hæmoptoes habitualis, ut *Morton* asserit, Auctor non admittit. 343.

— Infusa Clysteribus imbecillium est vi-  
rium. 357.

— Coctionem quandam humorum illico assumpta patenter inducit, 6., & 269.

— Hancque potest pro libito nostro inducere segnius. 30.

— Usus hujusce, & omissionis difficultates. Vide, *Difficultates*.

— Epilepsiæ opem ferre asserit *Tozins*, Vide, *Epilepsia*.

— Epileptico Adolescenti visa est levamen afferre. Vide, *Epilepticus*.

— Febrifugum universale hucusque non est. 294.

— Gravidis, & Puerperis tuto exhibetur. 21.

— Immo Gravidis febricitantibus convenire asserit *Frassonius*. 346.

— Etsi per se ipsam innocua, cibum tamen non est, sed Medicamentum, quod ubi nullatenus convenit, suspectum redditur. 350.

— Stipticitatem plurimis inferens, nonnullis solutionem Ventris, ubi extra rem præscribatur, per accidens saltem potest obesse. *ibid.*

— Quid possit agere in Fermentum Continuarum ab essentia, cui subigendo est impar; quidve in humores aliorum Morborum effectores, latet. 354.

— Ubi non proficit, quandoque obesse asserit *Morton*. 352.

— Etsi Sanis ad prophylaxin præscripta non improbetur, attamen nec landatur, 353. & 354.

— Non admodum tuto usurpari videtur in iis affectionibus Hypochondriacis, quæ non in ventriculi male coquentis dyscrasia consistunt, sed in nervoso genere alta jam convulsionum semina jecere. 333.

CHINA CHINA. Vide plura in Verbo, *Cortex Peruvianus*, *Febrifugum Peruvianum*, *Peruvianus Cortex* &c.

CHINÆ CHINÆ virtutem ad perniciosas Periodicas a se detectam, & promulgatam, universaliter receptam fuisse, lætatur Auctor: Cautiones vero illius usum inopportunum docentes, atque vetantes haud satis esse a nonnullis excultas dolet. 355.

CHINAM CHINAM in Hæmoptoe habitua-



bituali non ut balsamicam, vulnerariam, aut stypticam *Morton* considerat, sed ut mere Febrifugam. 342.

Chirurgorum quorundam Castrensiū abusus in præscribendo *Cortice* in quarumlibet Februm quoquo modo periodi speciem præferentium principio. 276.

Chocolatæ, Coffee, & Thè usus, ac juvenen anceps. 12.

Cholerica Febris Intermittens perniciofa describitur. 136.

Cholericarum Februm *China China* curatarum Historiæ. 194. usque ad 197.

— Febris Cholericæ humidæ Historia I. 194.

— Eiusdem Cholericæ humidæ Historia II. 195.

— Cholericæ siccæ Historia III. 197. 198.

Cholericis Tertianis occurrit Auctor non multo ante paroxysmum Bolo paregorico sibi familiari. 71.

Chylus, & Lympha. Vide, *Lympha*, & *Chylus*.

Cibi distantia ab assumpto *Cortice* quænam, Vide, *Intervallum*.

Cichorii succum sine metu noxæ præscribentes, Cichorium probe conditum sæpe proscribunt. 13.

Cichorium controvertitur, an ad caliditatem magis vergat, an ad frigiditatem. *ibid.*

Circumstantiæ, in quibus certo licet *Corticem* offerre in Subcontinuarum Malignantium principio. 272.

Circumstantiæ gravissimæ, quæ validam *Corticis* administrationem & suadent, & admittunt. 160. & 161.

Clysteribus infusa *China China* imbecillium est virium. 357.

Coctionem quandam humorum patenter illico inducit assumptus *Cortex*. 6. & 269.

Coctionem illam humorum, quam cito solet *Cortex* inducere, potest pro libito nostro inducere segnius. 30.

COLE opinio circa Intermittentium Causas. 35.

Comitata Febris quænam. 291.

Commixtionem Medicamentorum cum *China China*, vehiculo necessario excepto, *Sydenham* damnat. 68.

Comparatio inter suppressionem Febris Intermittentis Comitatae, Subcontinuae tardigradae, & Subcontinuae velocioris. 274.

Comparatio *Morroni* inter curationem Februm Proportionatarum in Malignas Sy-

nochos transeuntium peractam *Cortice*, & peractam sine *Cortice*. 309.

Comparatio usus Sulphuris in depellenda Scabie cum usu *Corticis* in expugnandis Febris Intervallatis vulgaribus data, & explicata. 355. 356.

Complicationes Februm quot, & quales apud Antiquos. 316.

— Omnes illas non facile admittit Auctor: ad abundantiam tantum eas supponit. 316. 317.

Conditio necessaria pro utili oblatione congruæ dosi *China China* in Perniciosis, mortem cæteroqui intra horas 24. illaturis. 226.

Conditiones Depurativæ Intermittentis. 74.

Conformationem foetus cujuscunque fuisse coævam Mundo in primo suæ speciei Ovo opinantur Neoterici non pauci. 44.

— Eam de novo fieri videtur libentius opinari Auctor. 44.

Continentes Febres quænam sint Auctori. 290. Item. 297. Item. 301.

— Quænam sint *Morrono* 297. Item 301.

Continentes Febres humorales nullas solet sanare *Cortex* experientia Auctoris. 293. & 294.

— Quænam *Cortice* sint fortasse curabiles, si quæ sunt, & quando. 295.

Continua Proportionata. Vide, *Proportionata*.

Continua Periodica. Vide, *Proportionata*.

Continua Periodica quælibet. Vide *Febris qualibet*.

Continuarum, & Intermittentium Februm similitudo, & dissimilitudo. 69.

Continuarum Februm Fermentum ipsi ab intrinseco Sanguini insidet. 70.

Continuitas Periodicarum perniciosarum acquisita solum in progressu, aliter considerata, & tractanda est ac acquisita in principio. 143.

Continuitas in Subcontinuae progressu superveniens, si celerrimo properet gradu, *valida*, ut in reliquis Perniciosis, *Corticis* oblatione curanda est. 165.

Continuitas Febris Intermittentibus circa initia superveniens, potest quandoque procedere ab influxu copioso, & celeri Fermenti extranei redundantis potius, quam ex prava Sanguinis diatesi. 271.

Continuitas blanda Februm Subintransim sine gravi symptomate, non constituit Subcontinuum Febrem Perniciosam; sed continuas cum gravitate symptomatum



- rum conjuncta, quæ acutiem simul ostendit. 142.
- CONYGII** opinio de *China China* Fermenti febrilis particulas dissociante, ac distrahente, non plane recipitur. 27.
- CORGHIUS** Asthmatis *Chinam Chinam* opitulari testatus est Auctori. 330.
- Idque Historia confirmavit. 330.
- Corruptiva Intermittens ab ipso initio *Cortice* potest curari. 69.
- Corruptivæ Febris *China China* feliciter curatæ exempla duo. 96.
- Corruptivæ Intermittentes, quocunque tempore tales se prodeant, *Cortice* sunt curandæ 75.
- Et quo pacto. Vide, *Quo pacto*.
- Corruptivæ Intermittentis conditiones. 74.
- CORTEX PERUVIANUS** nullas evacuationes criticas sistit, sed tantum symptomáticas. 21.
- Unica, & antiqua dosi exhibitus in paroxysmo leviori, correspondentem tantum leviozem fugare solet, non graviozem: oblatus vero in graviore fugat utrumque. 61.
- Etiam si absorbendo Fermentum febrile dicatur illud figere, non tamen figit cruorem, qui fermenti subjectum est. 21. & 22.
- Noxius non est, cum non proficit, seu cum Febrem non pellit; sed potius aliquando forsan cum nimis cito proficit: hoc est, cum Febrem aliquam citò submovet, quam expediret sinere progredi 276.
- Si quid attulit incommodi, non sua certe culpa, sed offerentis attulit. 4.
- Adulterinus quandoque potest nos fallere. 3.
- Caute offerendus in Intermittentium principio. 87.
- Experientia Auctoris nullas Continentes Febres Humorales solet sanare. 293. 294.
- Quas forte sanet, si quæ sunt, & quando 295.
- Non exhibendus deploratis omnino. Vide, *Cautela*.
- Dosi liberaliori exhibitus obesse non potest. Vide, *Dosis liberalior*.
- Vel nullam, vel facilem tantum, ac salubrem evacuationem excitat *Cortex*. 6.
- Eiusdem offerendi exemplum in Pernicioso. 292. 293.
- Febribus nullis, quæ Simples vocantur, ut Hæcticis, Synochis imputri-

- bus, aut Ephemeris aptatur *Cortex*. *ibid.*
- Eundem offerendi formula. Vide, *Formula*.
- Febrem Depurativam sistendo imprudenter, magis noxius *Cortex* esse potest, quam si Febribus illum non admittentibus adhibeatur. 349. & 351.
- CORTICE** in extremis angustis oblato, si intra illum eundem paroxysmum occumbat Ager, nil imputandum Remedio. 179.
- In Febribus Intermittentibus paullo ante accessionem epoto, nonnullos in Anglia occubuisse, narrat *Sydenham*. 350.
- De exhibendo, vel omittendo *Cortice* difficultates. Vide, *Difficultates*.
- CORTICEM PERUVIANUM** sunt qui non a trunco, vel ramis, sed a radice Arboris detrahi putant. 345.
- Illum, ejusdemque germani, & vegeti notas describere Auctor renuit. *Ibidem*.
- Optimus ille censendus, qui alias profuit. *Ibidem*.
- CORTICEM** neque figere, neque fundere Sanguinem experientia patet. 20.
- Eundem neque tormina, neque tensesmum, neque abortum in prægnantibus excitare. 346.
- Eundem olim in Anglia abisse in contemptum ob Casus infaustos ab illius oblatione paullo ante accessionem facta observatos, refert *Sydenham* 350.
- Hujusmodi tamen malo facile fuisse prospectum exhibendo Febrifugum declinante solum, vel soluto paroxysmo asserit idem Auctor. *ibid.*
- Eundem tamen in Benignis Intermittentibus, invadente paroxysmo, primis temporibus a se, aliisque fuisse innoxie semper exhibitum asserit idem, qui supra. *Ibidem*.
- Qui propterea aliam eorum eventuum causam fuisse autumat. *Ibidem*.
- Eundem plane obesse in Continuis ab essentia affirmat *Sydenham*. Vide *Peruvianum Corticem*.
- CORTICEM** in Febricitantibus Arthritidi obnoxiiis, Causam Febris reprimendo, Arthritidis Causam nequaquam repressisse; immo Podagram extinctæ febris paullo post supervenisse observavit Auctor. 331.
- CORTICI** nonnunquam adscripta curatio tardior, Auctori redditur incerta. 309.
- CORTICIS** Actio. Vide, *Actio Corticis*.



**CORTICIS** Innocentia. Vide, *Innocentia Corticis*.

**CORTICIS** vis validissima, & ignota, coacta se ipsam in cassum exerere contra objectum sibi impropotionatum in Morbis, quibus non convenit, satis probat oblationem Remedii iis casibus temerariam, & de damno suspectam. 352.

**CORTICIS** usus ubi non adsit probabilis conjectura posse illum prodesse, adsitque experientia de illius invaliditate, rationalis non est. 348. & 354.

**CORTICIS** substantia suapte natura est insons; sed ob incongruam, vel intempestivam oblationem potest esse noxia. 349.

**CORTICIS** noxa ob imprudentem, vel temerariam oblationem contingens, non est crimen illius, sed Medici perperam præscribentis *ibid.*

**CORTICIS** virtus sicuti Causæ Febrium Periodicarum adversatur in nostram utilitatem, sic ubi hujusmodi Causam non invenit, forsitan potest alicui fortuitæ dispositioni nostri Corporis adversari nonnunquam in damnum nostrum. 353.

**CORTICIS PERUVIANI** usus ad expugnandas Febres Intervallatas vulgares &c. Vide, *Peruviani Corticis usum*.

**CORTICIS PERUVIANI** virtus ad Perniciosas Intermittentes. Vide, *China China virtutem*.

**CORTICIS** Substantia. Vide, *Substantia*.

**CORTICIS** sex Scrupuli sejunctim assumpti non æquivalent activitati, licet æquivalent ponderi duarum Drachmarum uno haustu assumptum. 62.

**CORTICIS** effectus citus cito dignoscitur, an sperabilis. Vide, *Effectus*.

**CORTICIS** usus exuberans. Vide, *Usus*. Corticis Fraxini cum *Peruviano Cortice* collatio pro fugandis Febribus. 15.

**CORTICIS PERUVIANI** effectus est inhibere non paroxysmum ipsum, quo exhibetur, sed correspondentem. 179.

Crisis copiosa per urinam modica insimul diarrhœa comitatam post usum *Corticis* subsequuta. 226.

— Eadem Crisis per urinam simul, & sudorem, post usum ejusdem *Corticis*. 226. 227.

Criticæ evacuationes. Vide, *Evacuationes nonnunquam*.

Curatio præsentanea Febris Perniciosæ non minus exigit regulariter quam *drach. vi. Corticis* nec plus quam *unc. i.* 158.

— Integra vero, ac universalis curatio, *duabus* plus minus *unciis China Chinæ* perficitur. 165.

Curatio Perniciosarum in genere. Vide, *Idea*,

Curatio, quæ ad Morbos diuturnos, & non Febriles solet adhiberi, ea ipsa est, quæ Febribus adhibetur, quando curantur *Cortice* 269.

Curatio Febrium, & quorumvis Morborum, facta per absorptionem principii peccantis, obnoxia est reviviscentiæ ejusdem principii. 269. & 270.

— Melior est propterea, si fiat per febrilis effervescentiæ deflagrationem, quando hæc *perfecte* succedit, quam si fiat medio *Cortice* per absorptionem Fermenti, adeoque illa Curatio sub tali conditione, cæteris paribus, huic anteponenda. 271.

— Non ideo tamen videtur hæc in casibus periculi ancipitis absolute rejicienda. 270.

Curatio Perniciosarum Periodicarum ope *China China* probabiliter exercetur quodammodo indirecte, & fortuito, ubicunque generice ad Febres Continuas, & periculosas ea solet adhiberi, ut in Gallia, & alibi. 126.

Curatione Febrium, ut ajunt, methodica instituta, Medicus se gerit ut Inspector Morbi, & ut minister Naturæ: curatione vero instituta per *Chinam Chinam*, se gerit ut Arbiter Morbi, & ut Instaurator Naturæ. 268.

Curationes insignes Perniciosarum Periodicarum ex quavis earum specie, *China China* peculiariter administrata sanatarum, ordinatim dispositæ 194. usque ad 262.

## D

**D'AQUIN** quid opinetur circa Febrium Intermittentium Causas, & *China China* actionem in illas. Vide *Aquin*.

**DAVINIUS** Serenissimi Mutinæ Ducis Medicus, & Auctoris Collega, Lucubrationes quasdam tum Latino, tum Hetrusco Idiomate conscripsit in laudem *Corticis Peruviani* sub nomine *Hectoris e Valle*. 241.

— Diluitur umbra quædam, quam prædictæ Lucubrationes præter intentionem offundere visæ sunt assertionibus Auctoris, quibus se prodidit primum repertorem in Urbe sua Methodi curandi per *Chi-*



- Chinam Chinam* Perniciosas Intermit-  
tentes. 241. ad 245.  
— Illius modestia laudatur. *Ibidem*.  
— Quæ methodus illi familiaris in ex-  
hibendo *Cortice*. *Ibidem*.  
Decocta aliorum *Corticum*, & *Lignorum*  
pluries, ac diu usurpantur cum incerti-  
tudine eventus: Cur non & *Cortex Pe-*  
*ruvianus* cum certitudine? 16.  
Definitio *Februm Periodicarum Pernicio-*  
*sarum* in communi. 134.  
Defunctorum aliquot *Cortice* modo tracta-  
torum, & modo non, *Historiæ*. Vide,  
*Historia Defunctorum*.  
Dejectiones alvinas tum spontaneas, tum  
artificiales, ut plurimum in *Featribus*  
*Intermittentibus* parum proficere, ex-  
perientia comprobatur. 79.  
— *Historiæ* idipsum testantes. 79. ad 81.  
— *Historia* I. 79.  
— *Historia* II. 80.  
— *Historia* III. *ibidem*.  
— *Historia* IV. 81.  
— *Historia* V. *ibidem*.  
— *Historia* VI. *ibidem*.  
Depurativa, seu Perfectiva *Febris Inter-*  
*mittens*, non ab initio supprimenda per  
*Corticem*. 69.  
Depurativæ *Intermittentis* conditiones.  
73., & 74.  
Depurativam *Intermittentem*, licet *Cor-*  
*tice* curari possit, tutius videtur non cu-  
rare. 74.  
Depurativam nonnunquam, & nonnun-  
quam Corruptivam naturam *Intermit-*  
*tentium* efficiunt plura, 73. & 74.  
Depurativam *Febrem* qui sistit. Vide, *Fe-*  
*brem Depurativam*.  
Depurativas *Febres* præsertim circa initia  
sistendo &c. Vide, *Febres Depurativas*.  
Descriptio Methodi lentioris ad curandas  
*Subcontinuas Perniciosas*. 163. 164.  
Descriptio Specierum omnium *Februm*  
*Periodicarum Perniciosarum*. 136. usq;  
ad 144.  
Diæta quæ servanda tempore usus *Corticis*  
in *Perniciosis*. 166.  
Diagnos *perniciosis* symptomatis a non per-  
*niciosis* illustratur exemplo. 190. 191.  
Diagnos *Febris Subcontinuae Perniciosa*,  
illiusque ortus, atque progressus. 143.  
usque ad 145.  
*Diaphoreticæ Intermittentis perniciosæ*  
descriptio. 137.  
*Diaphoreticarum Februm China China*  
curatarum *Historiæ*. 205. usque ad 211.  
— *Diaphoreticæ Febris Historia* I. 205.

- *Historia* II. 209.  
— *Historia* III. 209.  
*Differentiæ Februm Periodicarum Perni-*  
*ciosarum* ab earum symptomatis pecu-  
liaribus derivatæ. 135.  
— *Prima Februm Intermittentium Per-*  
*niciosarum* differentia, quæ *Cholerica*  
dicitur. 136.  
— Item & quasi *Dysenterica*. *ibid.*  
— *Secunda differentia*, quæ dicitur  
*Subcruenta* 136.  
— Item & *Atrabilis*. 137.  
— *Tertia differentia Cardiacæ* nuncu-  
pata. 137.  
— *Quarta species Diaphoretica dicta*. *ibid.*  
— *Quinta species*, quæ *Syncopalis* ap-  
pellatur. 138.  
— *Sexta quæ dicitur Algida* *ibid.*  
— *Septima, nempe Lethargica*. *ibid.*  
— *Octava denique*, quæ *Subcontinua*  
nuncupatur. 142. ad 145.  
*Difficultates contra usum Corticis* in mi-  
tioribus febribus afferri solitæ, & per  
modum fictionis etiam admittæ, in ca-  
sibus præcipiti exitii locum non habent.  
97. 98.  
*Difficultates quænam sint contra usum Cor-*  
*ticis* in *Subcontinuarum Malignantium*  
principio. 264. 265.  
— Quæ contra omissionem *Corticis* in  
principio *Subcontinuarum Malignan-*  
*tium*. 265. 266.  
*Discrepantia inter Mortoni, & Auctoris*  
*Methodum* 171.  
*Discrepantia quænam sit inter curationem*  
*Februm* tum methodice, tum sponte,  
tum ope *Corticis* absolutam, & curatio-  
nem aliorum Morborum præsertim *Chro-*  
*nicorum*. 268. 269.  
*Discrepantia practica inter oblatum, &*  
*non oblatum Corticem* in *Subcontinua-*  
*rum Malignantium* principiis ex *Morto-*  
*no*. 275. 276.  
*Discrimen inter Febres* certum exitium,  
& inter alias anceps tantum periculum  
inferentes, quoad oblationem *Corticis*. 285.  
*Discrimen quodnam intercedat inter cura-*  
*tionem Februm* methodicam, vel etiam  
spontaneam, & eam, quæ fit ope *Chi-*  
*nae China*. 266. ad 269.  
*Distributio congrua dosis Corticis* pro cita,  
& certa curatione *Februm Perniciosarum*  
158. ad 160.  
*Distributio Historiarum Curationum Insi-*  
*gnium* secundum variam *Perniciosarum*  
actionem in triplicem humani Corporis  
regionem instituta, 194.  
Distri-



Distributione *Corticis* congruenter facta, curantur Perniciosæ Periodicæ cum minori *Corticis* quantitate, ac a multis curentur Benignæ. 163.

Divisio Februm omnium secundum Auctorem. 287. ad 293.

Divisio Periodicarum Perniciosarum, & specierum earundem, ab accidentibus potioribus illas concomitantibus petita. 135.

— Alia divisio ad ritus Scholasticos. *Ibidem*.

Doctrina Februm. Vide *Februm Doctrinam*.

DOLÆI de causis Februm Intermittentium opinio. 38.

DOLÆUS Purgantia ad tollendas simul Febres Intermittentes, & earum Causas, minus recte *Cortici* admiscet. *Ibidem*.

Dolor periodicus in Maxilla superiore *Cortice* sedari visus, sed non curatus. 338. & 339.

Dolorem Ventriculi periodice recurrentem *China China* sanatum refert *Vallinierius*. 330.

DONZELLUS (Joseph) quodammodo subscripsit *Protospatario* circa Februm Causam. 38.

Dosim liberaliorem *China China* tum universim, tum particulatim consideratam, obesse non posse probatur ex *Sydenhamio*, *Mortono*, *Monginotio*, & *Charas*. 124. & 125.

Dosis liberalior *China China* experientia 50. circiter annorum Auctori familiaris, in usu est quoque apud alios Practicos. 165. 166.

DUCIS DE LESDIGUIERES defuncti Historia. 278.

Dysenterica Febris Intermittens Perniciosa describitur. 136.

Dysentericæ Febris *China China* curatæ Historia unica num. iv. 197.

## E

**E**ffectus *Corticis* citus cum sit, cito dignoscitur, an ille sperari debeat, necne, ubi idem *Cortex* in casibus ancipitis naturæ fuerit oblatus. 276.

Emetica, & Cathartica Fermento febrili sæpius analogæ, & Febrim *Cortice* curatam statim revocantia, Causam febrilem nequeunt evacuare. 31.

Emetica, aut Cathartica nequeunt Fermentum Intermittentium &c. Vide. *Cathartica*, & *Emetica* nequeunt. *Torri Therap. Spec.*

Epilepsiæ *Chinam Chinam* opem ferre, asserit *Tozzius*. 330.

Epileptica quinquagenaria visa est curari *Cortice*; nec tamen curata est. 337.

Epilepticus Adolescens ab usu *Corticis* plurimum levaminis visus est ab initio reportasse; minime tamen sanatus est. 338.

ETTMULLERI Sententia de Februm Intermittentium Causis. 37.

Evacuatio Causæ febrilis sæpe succedit assumptioni *Corticis* sub velamine consuetarum excretionum. 27.

— Nulla sensibilis exigi debet a *China China*, etiamsi hæc dicatur febrile Fermentum præcipitare. 19. & 20.

Evacuatio artificialis in Febribus Intermittentibus neque a Causa Conjuncta indicatur, neque ab Antecedente. 18.

Evacuatione sensibili, datis etiam Galenicorum principiis, sæpius opus non est pro curandis Febribus. 30.

Evacuationem vel nullam, vel facilem tantum, ac salubrem excitat *Cortex*. 6.

Evacuationes omnes ad Februm Intermittentium curationem damnat *Morton*. 32.

— Ita sentit & *Sydenham*. 32. & 33.

Evacuationes nonnunquam criticæ succedunt post *Chinam Chinam* assumptam. 17.

Evacuationis defectus cuilibet alio præter *Chinam Chinam* Specifico Febrifugo posset imputari. 39.

Evacuationibus ad excessum usque tentatis, *Cortex* usurpandus saltem esset loco Febrifugorum ineptorum. 60.

Evacuatis sine Febris levamine copiosis humoribus, Aegrum ab imminente lethali ægritudine saltem præservatum pronunciant curantes Medici. 11.

Excretiones copiosæ in Febribus, materia incocta, quamvis spontaneæ, vel morbi longitudinem, vel difficilem solutionem protendunt. 18.

Exempla oblationis *Corticis* vario cum successu institutæ variis Intermittentium temporibus, & in circumstantiis variis Februm modo Depurativarum, & modo Corruptivarum, taliumque modo ob solam diuturnitatem, & modo ob supervenientia gravia symptomata. 82. ad 96.

— Historia I. 82.

— Historia II. 84.

— Animadversio Auctoris in oblationem *Corticis* non satis felicem in Intermittentium principio. 85.

A a

— Histo-



- Historia III. *Ibidem*.
- Historia IV. 85.
- Animadversio Auctoris in oblationem adhuc minus felicem in Intermit- tentium plane depurativarum progressu. 86.
- Historia V. 86.
- Historia VI. *Ibidem*.
- Historia VII. *Ibidem*.
- Historia VIII. 88.
- Historia IX. 89.
- Historia X. *Ibid*.
- Historia XI. 89.
- Historia XII. 90.
- Historia XIII. *Ibid*.
- Historia XIV. 91.
- Historia XV. 92.
- Historia XVI. 93.
- Historia XVII. 93.
- Historia XVIII. specialiter notan- da. 94.

Exemplum pro innuenda præstantia Me- thodi Auctoris. 169.

- Aliud illustrans diagnosim perniciosi Symptomatis a non pernicioso. 140.

Exemplum Circumstantiarum gravissima- rum, quæ *Corticis* administrationem va- lidam & suadent, & feliciter admittunt, & quomodo. 160. & 161.

Exemplum offerendi *Corticem* in Perni- ciosis lentiore Methodo, indicata ordi- natim distributione remedii. 164.

Experientiam, praxinque propriam nonni- hil hæsitantem circa oblationem *Corti- cis* in Subcontinuarum Malignantium principio exponit Auctor, ab aliena com- plementum sperans. 285. 286.

Experimenta Auctoris circa plurima, quæ Lumbricos dicuntur necare, con- numerando inter hæc *Chinam Chinam*. 335. ad 337.

Experimenta ex *Cortice* commixto cum succis humanis, præsertim cum Sanguine, & Bile. 23.

Experimenta quædam ad *Corticis* vim sen- sibiliter explorandam ferme incassum ab Auctore instituta. *Ibid*.

Extracta, Tincturas &c. *China China* no- verunt & primis illius temporibus Me- dici, qui tunc aderant. 65.

Extractum *China China*, & Tinctura il- lius utilia sunt, sed utiliora, si illis substantia ipsa *Corticis* adjungatur. 63.

## F

**F**ebrem Depurativam qui sistit per *Corti- cem*, tollit de medio remedium absum- ptivum *Caussæ* morificæ, ut illi substi- tuat aliud mere absorptivum cum incerta subactione ejusdem *Caussæ*. 351.

Febres Depurativas præsertim circa initia sistendo peccatur contra Aphorismum Hippocratis: *Quæ judicantur* &c. *Ibid*.

Febres Phthisicorum putridas Intermit- tentes posse aliquo modo leniri *Cortice*, in- teritu *Ægrotantis* nequaquam inhibito *Morton*, & Auctor non dissentit. 341.

Febres Malignæ ab ortu. Vide, *malignæ Febres*.

Febres Intermituentes, Ardentes, Inflam- matoriæ &c. Vide, *Intermituentes Fe- bres*, *Ardentes*, *Inflammatoria* &c.

Febres in suis transmutationibus possibili- bus quendam veluti Circulum imperfe- ctum videntur agere. 327.

Febres imminentes (ita & alias ægritudi- nes) sicuti licet impedire ne adveniant, cum fieri potest, ita congruum videtur eas impedire per *Corticem*, ne progre- dian- tur, postquam advenere. 271.

Febres ab ortu Intermituentes, ut tales esse considerandas etiam post acquisitam recenter continuitatem, & *Cortice* cu- randas docent *Morton*, & *Sydenham*. 124.

Febres evacuationibus non esse curandas ab actione *Corticis* deduxit *Borellus*. 17.

Febribus nullis, quæ Simples vocantur, ut Hæcticis, Synochis imputribus, aut ephemeris aptatur actio *Corticis*. 293.

Febrifuga vera non solent esse sensibilibus evacuantia. 19.

— Quæ talia sunt apud Auctores, atque vehementia, inutilia sunt, & noxia. 10. & 11.

Febrifuga nonnulla vegetabilia in locum *Pe- ruviani Corticis* suffecta, eodem sunt in- becilliora. 4.

— Ita, & alia quævis Febrifuga. *Ibid*.

Febrifugorum quorundam vis alchalyca. Vi- de, *Sennertus vim alchalycam*.

Febrifugum universale hucusque non est *China China*, licet aliqui se Arte talem eam reddidisse putent. 294.

Febrifugum diu quæsitum reperitur in *Cor- tice*, statimque repertum rejicitur. 12.

**FEBRIFUGUM PERUVIANUM** saltem loco Febrifugorum ineptorum usurpan- dum, post tentatas ad excessum usque evacuationes. 60.

Febrif-



Febrile Fermentum. Vide, *Fermentum Febrile*.

Febris fere quælibet transit in quamlibet, ubi aliqua sit inter illas symboleitas, 327.

Febris Algida, Ardens, Atrabilaris, Cardiaca, Cholericæ, Comitata, Continua, Diaphoretica, Dysenterica, Inflammatoria, Lethargica, Lenta, Maligna ab ortu, Subcontinua, Subcruenta, Subintrans, Symptomatica, Syncopealis, Verminosa &c. Vide, *Algida Febris, Ardens, Atrabilaris &c.*

Febris quælibet periodica Continua quo magis ad naturam Intermittentium accedit eo facilius se submittit actioni *Corticis*: Quo vero magis accedit ad naturam Continentium, seu Synochorum, eo facilius eidem se subtrahit 301. Item. 313.

Febris secundum *Campanellam* Morbus non est, sed Remedium contra morbum 267.

Febris acuta facta. Vide, *Acuta facta Febris*.

Febris quibus modis solvi consuescat. Vide, *Quibus modis*.

Febris Perniciosæ periculum extremum. Vide, *Periculum extremum Febris &c.*

Februm Intermittentium origo. Vide, *Intermittentium Februm origo*.

Februm Doctrina etsi utrumque Systema mechanicum, tam Solidorum scilicet, quam Fluidorum fatiget, nihilominus congruentius videtur superstrui huic, quam illi. 153. 154.

Fœtus Conformatio. Vide, *Conformationem fœtus*.

Fermenti nomen in Febris metaphoricè usurpat Auctor. 40.

— Ubi non bene sonat, aut superfluit, longe rejicit. 40.

— Exosum est Mechanicis præsertim Solidorum Systema profitentibus. 40.

Fermenti, seu potius Menstrui nomen, & usus in opere digestionis videtur adoptari ab Auctore; sed hæsitanter. 45.

Fermenti Februm Intermittentium Minera potius ultra, vel citra Sanguinem sita est, quam intra. 51.

Fermenti Perniciosi, seu venenati natura. Vide, *Natura Fermenti Perniciosi &c.*

Fermenti Februm Intermittentium extra cruorem videtur suadere coacervationem actio *Corticis*. 71. 72.

Fermenti febrilis absorptio. Vide, *Absorptio*.

Fermenti febrilis Acredinem. Vide, *Acredinem*.

Fermenti, seu Succu Febrilis stagnatio temporanea requiri videtur ad efficiendam periodum. 51.

Fermentorum Perniciosas, & non Perniciosas producentium symboleitas. Vide, *Uniformitas*.

— Illus sola retusio a salibus *China China* facta, absque ulla etiam sensibili evacuatione, sufficit ad curationem Februm. 27.

— Excretio ejusdem a *China China* absorpti (siqua nonnunquam requiritur) sæpius succedit absque sensibili consuetarum evacuationum incremento. 59.

Fermentorum Symboleitas & uniformitas. Vide, *Uniformitas*.

Fermentum Continuarum ipsi ab intrinseco Sanguini insidet. 69.

Fermentum Intermittentium. Vide, *Intermittentium Fermentum*.

Fermentum Perniciosarum. Vide, *Perniciosarum*.

Fermentum Perniciosum. Vide, *Perniciosum Fermentum*.

Fermentum febrile subit potius poros *Corticis*, quam iste poros illius. 26. & 27.

— Sic absorptum a Cortice per ordinarias Naturæ vias sensim, & sponte solet excerni. 27.

— Pro varia Subjectorum constitutione, & Succorum commixtione, modo indolis Colliquativæ, modo Coagulativæ potest evadere. 151.

— Vel non stabulatur in cavitatibus Ventriculi, & Intestinorum, vel saltem ab iis per purgantia, & vomitoria non solet educi. 31.

— Debet leniri potius, & corrigi, quam evacuari, & agitari. 50.

— Sub consuetis, nec adauctis evacuationibus, post epotam *Chinam Chinam* sæpius excernitur. 17. Item. 59.

— Credi potest habere structuram Bili, vel Oleo quadantenus analogam. 26.

— Ipsius fixatio, seu depressio per absorptionem a Cortice peracta, est vera omnium Febrifugorum, aliorumque Specificorum, quæ passim adhibentur intentio. 22.

— Commoda ejusdem sedes videntur esse Glandulæ Mesenterii in Intermittentibus. 47.

— Ejusdem correctionem aliquam per Clysteres tentat Auctor. 190. 191.



**Fermentum** quid reddat **Venenatum**. Vide, *Venenatum*, seu *Perniciosum magis* &c.

**Fluida** in machina humani Corporis quid pluries præstent ad motus omnes, quam suum esse mere fluxile. 42.

— Ad id confert plurimum eorum crassus, seu determinata compages. 42.

— In ipsis, & eorum motibus elegantissimam esse Mechanicam, sed nobis inexplicabilem. 43.

— Principium hujusmodi mechanices in Fluidis vitalibus esse id, quod ab *Hippocrate* dicitur: *Impetum faciens*. 43.

— Illustratur assertum hoc exemplo Molendini, aliarumq; machinarum Hydraulicarum, & Pneumaticarum simul. 43. & 44.

**Fluidi** nomine intelligendum quidquid actu fluit, vel aptum est fluere. 44.

**Fluidorum Systemati** adhæret Auctor potius, quam **Solidorum**. 40.

— In utroque Systemate æque difficulter explicatur ratio febrilis periodi. 40.

**Fluidorum** gravitas major, vel minor. Vide, *Gravitas*.

**Fluidorum** motus primario a spiritu illis intercluso, & secundario tantum a Solidis derivandus. 41. 42.

**Fluxus Alvi**. Vide, *Alvi fluxus*.

**FONTANÆ** objectionibus respondit Auctor. 111.

**Formula** antiquior exhibendi *Corticem* in Benignis Intermittentibus, reliquis omnibus anteponenda, dummodo opportune repetatur, & continuetur usus remedii. 64.

**Formula** certior, & simplicior fugandi diuturnas Intermittentes, & Recidivas arcendi. 66.

**Formula** duplex offerendi *Corticis* ex *Sydenhamio*. Ibidem.

— Alia ejusdem pro Infantibus. Ibidem.

**Formulæ** *Corticem* præscribendi plures ex *Mortono*. 67.

— **Tinctura** ejusdem diluta pro delicatulis. Ibidem.

**FRASSONI** obitus Anno 1680. 3.

— Ejus disciplinam in praxi subiit Auctor Anno 1677. Ibidem.

— Illius methodus in usu *China China*. 2.

— Ejusdem Epistola sibi inscripta confirmat *Badus* virtutem Peruviani *Corticis*. Ibidem.

— Ejusdem Dictum. 346.

**FRASSONO** Curationes omnes medio *Cortice* institutæ feliciter cesserunt. 3.

— Casus singularis excipitur. Ibidem.

**FRASSONUS** Auctoris præceptor laudatur. Ibidem.

— Inter primos *China China* fautores, connumerandus. 2.

— Gravidis Febricitantibus convenire non adversari *Corticem* asserit. 346.

**Fraxini Cortex**. Vide, *Corticis Fraxini*.

## G

**GALENI**, & **HIPPOCRATIS** doctrina purgationem in Febris minime suadet. 34. & 35.

**Galenicorum** etiam datis principiis, sæpius evacuatione sensibili opus non est pro curatione Februm. 30.

**Glandulæ Mesenterii** commoda sedes esse videntur Fermenti febrilis in Intermittentibus. 47.

**GRAAF** circa Causas Februm Intermittentium *Sylvio* subscribit. 36.

**Gravida Septimestris** ex Subcontinua Acuta per *Chinam Chinam* curata, & ad partum felicem perducta. 221. ad 223.

— Aliæ pariter. 254.

**Gravida quadrimestris** Cholericæ Febre laborans *Cortice* copiose epoto sanatur, & partum edit suo tempore felicem. 195. ad 197.

**Gravidis**, & **Puerperis** tuto exhibetur *Cortex*. 20.

— Item 345. usque ad 347.

**Gravidis Febricitantibus** *Chinam Chinam* non modo non adversari, sed & specialiter convenire ex *Frassono*. 346.

**Gravitas** major, vel minor Fluidorum ligno graviorum, præcise non efficit faciliorem, vel difficiliorem ligni submersionem, sed facilior, vel difficilior ingressus particularum fluidi intra poros ligni. 24.

## H

**H** Allucinatio *Mortoni* Hæmoptoen Habitualement *China China* curare molientis. 343.

**Hallucinatio** nonnullorum circa Textum *Ramazzini*. 314.

— Interpretatio germana ejusdem Textus. 315.

**Hallucinationem** suam fatetur Auctor circa Epistolam *Lancisi* sibi inscriptam. 314.



**HECQUETUS** laudatur ab Auctore, & colitur. 40., & 154.

**Hecticæ** abusive dictæ, Lentæ scilicet puerorum Febres, a cruditatibus genitæ, *Cortice* sæpissime curantur. 319.

**HECTORIS E VALLE**. Vide, *Davinus*.

**HELVETH** Methodi nondum conscius Auctor, *China China* per Clysteres injecta, Fermenti febrilis correctionem aliquam tentavit. 356. 357.

— Eidem tamen methodo parum, vel nihil fidendum censet in arduis præsertim casibus. *Ibidem*.

— Quibus in circumstantiis eam tentare liceat. 357.

**HELVETIUS** nullo per os oblato medicamento, sed tantum *Cortice* per Clysteres frequenter injecto, Febres curare satagit. 356.

**Hemitritæi** origo probabilior exponitur. 318.

— Ejusdem ortus, & compositio varia secundum Veteres. *ibid.*

— Curatur *Cortice* secundum Auctorem, *Badum*, & *Restaurandum*. 318.

**Hæmoptoe** si aliquando est merum Symptoma febris Intermittentis, etiam erraticæ (ut semper esse falso censet *Morton*) probabiliter sanari posset a *Cortice*, Febrem talis *Hæmoptoes* productricem faciente. 343., & 344.

**Hæmoptoes** Accidentalæ, & Habitualis differentia secundum *Mortonum*. 341.

**Hæmoptoes** Habitualis Antidotum herculeam esse *Peruvianum Corticem*, ut asserit *Morton*, non admittit Auctor. 341.

**Hæmoptoes** a *Mortono* curatæ, ut inquit, per Chinam *China* Historia. 343.

— Animadversio Auctoris in hanc Historiam. 343., & 344.

**Hippocratis**, & **Galen**i doctrinæ male conformis est usus Purgationis in Febribus 34.

— Ejusdem aphorismum. 351.

**Historia** peculiaris primæ inventionis, ac administrationis methodi ab Auctore traditæ. 187. usque ad 192.

**Historia** Præfecti cujusdam Gallicæ militiæ defuncti. 277.

**Historia** *Hæmoptoes* per *Corticem* a *Mortono* curatæ. 343.

**Historiæ** variæ circa varium *Corticis* usum in variis Intermittentium non Perniciosarum circumstantiis. Vide, *Exempla*.

**Historiæ** *Algidarum* *Februm*, *Ardentium*, *Torti Therap. Spec.*

*Atrabilarium*, *Cardiacarum*, *Cholericarum*, *Comitatarum*, *Continuarum*, *Diaphoreticarum*, *Dysentericarum*, *Inflammatoriarum*, *Lethargicarum*, *Lentarum*, *Malignarum*, *Subcontinuarum*, *Subcruentiarum*, *Subintrantium*, *Symptomaticarum*, *Syncopalium*, *Vermi-nosarum* &c. Vide, *Algidarum Februm Historiæ*, *Atrabilarium Historiæ* &c.

**Historiæ** Defunctorum, quibus falso vulgatum est fuisse oblatum *Corticem*, cum vere oblatus non fuerit. 179. ad 182.

— Historia I. 179.

— Historia II. 179.

— Historia III. 180.

— Historia IV. 181.

— Item. 186.

**Historiæ** Defunctorum, quibus vere *Cortex* fuit oblatus, tam iis scilicet, quibus jam deploratis propinatus fuit indulgendi gratia, quam iis, quibus etsi non desperatis nullatenus profuit. 182. usque ad 185.

— Historia I. 182.

— Historia II. 183.

— Historia III. *Ibidem*.

— Historia IV. *Ibidem*.

— Historia V. 184.

— Historia VI. 183.

— Historia VII., & VIII. 185.

**Historiæ** *Februm Perniciosarum* *Cortice* curatarum, communicatæ Auctori ab uno ex Collegis illius 248. ad 254.

— Historia I. 248.

— Historia II. 249.

— Historia III. 249.

— Historia IV. 250.

— Historia V. 251.

— Historia VI. 251.

— Historia VII. 252.

— Aliæ plures acervatim enunciatae. 254.

**Historiæ** ab eodem Collega in Exedra publica nunc vices Auctoris supplente novissime communicatæ. 256. ad 262.

— Historia I. 257.

— Historia II. *Ibidem*.

— Historia III. *Ibidem*.

— Historia IV. *Ibidem*.

— Historia V. 258.

— Historia VI. *Ibidem*.

— Historia VII. 259.

— Historia VIII. *Ibidem*.

— Historia IX. *Ibidem*.

— Historia X. 260.

— Historia XI. *Ibidem*.

— Historia XII. 261.



Historiæ Febrium Perniciosarum *Cortice* sanatarum Auctori pariter communicatæ ab alio ex ipsius Collegis. 245. usque ad 247.

— Historia I. 245.

— Historia II. 246.

— Historia III. *Ibid.*

— Historia IV. *Ibid.*

— Historia V. 247.

Historiæ Febrium Periodicarum Perniciosarum ex unaquaque specie, curatarum *China China* peculiari methodo oblata 194. usque ad 240.

— Item 245. usque ad 262.

Humorales Febres Continentes. Vide, *Continentes Febres*.

Humoristarum etiam data doctrina, sæpe non est opus evacuatione sensibili ad curationem Febrium. 30.

Humores per alvum, & per vomitum excreti in Tertianarum principio, sunt illarum effectus, non Causæ. 22.

Humoribus copiosis sine Febris levamine evacuatis &c. Vide, *Evacuatis &c.*

Humorum quaternarius numerus a Scholis jam dudum explosus. 29.

Hydropi Febres Intermittentes subsequenti ex *Restaurando* opitulatur *Cortex*: non sic Hydropi Febres præcedenti. 92.

Hypochondriacis affectibus *Corticem* opitulari putant *Badus*, & alii. 329.

Hypochondriacis affectionibus male vexata Adolescentula visa est curari *Cortice*. 333.

— In aliis hujusmodi casibus aliud observatum est, *ibidem*.

— Eodem tamen indiscriminatim uti tutum non est, *ibidem*.

Hypothesi qualibet probabiliore supposita circa Intermittentium originem, usus *China China* ad illarum curationem indicatur, & explicatur, nulla inde emergente sensibilis evacuationis necessitate. 57. ad 59.

Hystericis, & Hypochondriacis insultibus *Chinam Chinam* prodesse, Spiritusque, & crasin Corporis roborare, affirmat Sydenham. 330.

— Non plane dissentit Auctor. 337.

— Item 332. 333.

# I

**I** Dea quædam practica generalis pro curandis media *China China* Perniciosis Intermittentibus. 155. ad 156.

Inflammatoria Febris *Cortice* curari posse

asserunt inexperti nonnulli. 299.

Inflammatorias Febres *Mortonus* putat *Cortice* curabiles, quando manifestas exacerbationes, & remissiones habent. 298. 299.

Inflammatoriis Febribus *Corticem* non congruere, affirmant ex adverso *Sydenham*, & *Nigrisolus*. 299. Item. 353.

Infusio *China China* turbida, & referta ipso *Cortice*, longe activior est ac percolata. 63.

Infusio simplex *China China*, rejecta substantia, dupla saltem dosi exhibeatur necesse est, & longiore maceratione instituat, ut prosit. 67. 68.

Innocentia *Corticis* excusare potest tentamen illius in probabili conjectura fundatum, ubi nulla facta fuerit experientia de opposito. 349. & 354.

Innocentiam *Corticis* jurejurando testatur Auctor. 4.

— Ejusdem Admonitio circa hujusce innocentiam. 86.

Innocentiam, & præstantiam *Corticis* testatur *Badus*, atque *Conygius*. 7.

— Idem asserit *Restaurandus*, & *D'Aquin*. 7.

— Idem *Monginotius*, & *Sydenham*. *Ibidem*.

— Idipsum inculcat. *Morton*. 7. & 8.

Intermittentes Febres, & quæcumque ab initio tales fuere, necdum omnino a sua natura describere, sunt verum obiectum actionis *Corticis*. 10.

Intermittentes Malignæ quænam sint. 289. 290.

Intermittentes Corruptivæ quomodo *Cortice* tractandæ. 75.

Intermittentes ab ortu. Vide, *Febres ab ortu*.

Intermittentes quædam contumacissimæ reperiuntur nonnunquam *Cortici* non auscultantes. 76.

— Exemplum hujusce generis. *Ibidem*.

Intermittentes Perniciosæ. Vide, *Perniciosæ Intermittentes*.

Intermittentes putridæ Phthisicorum Febres. Vide, *Febres Phthisicorum*.

Intermittentium Benignarum. Vide, *Benignarum Intermittentium*.

Intermittentium Febrium origo per conjecturas varias, & imperfectas ab Auctore quæsitæ. 51. usque ad 60.

Intermittentium origo, & Causæ secundum celebriores plurium Neotericorum opiniones &c. Vide, *Sententia*.

— Opinio *Borelli* de earum Causis. 38. Item



— Item opinio *Blegny* 37. *Barbetta*. 37. *Bellini*. 38. *Badi*. 38. *Cole*. 35. *D'Aquin*. 37. *Dolai*. 38. *Donzelli*. 38. *Graaf*. 36. *Jonesii*. 36. *Monginotii*. 37. *Mortoni*. 38. *Mundii*. 35. *Sacchi*. 37. *Sponii*. 36. *Sydenham*. 36. *Sylvii*. 36. *Tozzi*. 36. *Villifii*. 35. *Etmulleri*. 37.

Intermittentium Fermentum probabiliter advenit Sanguini aliunde. 46.

— Videtur affatim Torrentis adinstar Sanguini accedere invadente paroxysmo, non paulatim tempore intermissionis in Sanguine congeri. 47.

— Item 69. usque ad 71.

— Nonnisi per Vasa lactea, vel per Lymphatica videtur posse in Sanguinem deferri, minime vero per Venas cum Sanguine refluxo ab extremis artubus. 60.

— Ubicunque condatur, tandem in lacteas secundi ordinis, seu in Vasa Chylo-lymphica citra Sanguinem posita, majori saltem ex parte influat necesse est, priusquam deferatur in Sanguinem. 51.

— Consideratum, ut easdem excitans (quæcunque sit illius materia) videtur potius accedere, vel inesse Sanguini, quam alteri cuiusvis succo, v. gr. Nerveo. 46.

— Etiam si in Ventriculo, & Intestinis stabuletur, non tamen potest per Cathartica, aut Emetica a scaturigine sua mineram instaurante radicitus extirpari. 49.

— In lacteis secundi potius, quam primi ordinis delitescit. 48. 49.

— Potest tamen forsan suum focum habere ubicunque repleti incipiunt Vasa lactea, vel Lymphatica. 47. 48.

— Idem vel in Vasis Chyliferis, vel in Lymphaticis, vel in Glandulis iisdem appensis probabiliter ad tempus congeritur, ut ad tempus pariter ab illis erumpat; vel cum iisdem Vasis saltem communicat, ut per ea deferatur in Sanguinem. *Ibidem*.

Intermittentium naturam nonnunquam Corruptivam, & nonnunquam Depurativam efficiunt plura. 73.

Intervallatæ Febres vulgares. Vide, *Peruviani Corticis usum ad expugnandas Febres Intervallatas* &c.

Intervallum temporis quodnam servandum inter oblationem Cibi, & Febrifugi in Perniciosis. 166.

Intestina non congerere intra se Fermentum Intermittentium, neque illud a-

liunde recipere, ut per Lacteas primi ordinis transmittant in Sanguinem, plura videntur suadere, inter quæ *Peruvianus Cortex*. 48. 49.

JONESII opinio circa Febrium Intermittentium Causas. 36.

Itali præcipue notantur de incredulitate erga *Corticem*, præsertim a Gallis. 10.

## K

**K**INKINA. Vide, *China Cina*, *Cortex Peruvianus*, *Febrifugum Peruvianum*, *Peruvianus Cortex*. &c.

— Illius varia Nomina. 1. & 2.

— Illius Historiam apud *Badum* legere potest quilibet. 2.

KINKINÆ cum radice Chinæ decoctio Febrem Lentam curavit Hæcticæ æmulam. 324.

— Non sic in alio casu, quantumvis simili. 325.

KINKINAM, seu *Quinquinam* vocant Galli, quam nos dicimus *Chinam Chinam*. 1.

## L

**L**ampadis ignis vitalis cum Lampade ignis elementaris comparatio. 71.

LANCISII Epistolæ Fragmentum ad Auctorem circa Febres Perniciosas *China China* curandas. 126.

— Auctoris hallucinatio deprehensa postmodum ab eodem circa sensum huius Epistolæ. 314.

LANCISIUS Pontificius Archjater, ejusque Tractatus — *De nativis, deque adventitiis Romani Cæli qualitatibus* — laudatur. 111.

LEIBNITII experimentum Hydrolaticum non parum luminis contulit ad abstrusum Barometri phænomenon explicandum, etsi rem adhuc forsan non conferit. 112.

Lenta Febris Hæcticæ æmula decoctione *China China* cum radice Chinæ curatur. 224.

— Non sic in alio casu, quamvis simili. 325.

Lentæ Febres quænam *Cortice* sint curabiles, & quænam non. 318. 319.

— Diagnos unius casus ab alio. *Ibid.*

Lentæ Febrium in Pueris, aliisque etiam Subjectis, *Cortice* sanatarum Historiæ. 226. usque ad 319.

Historia I. 319.



Historia II. 320.  
 Historia III. 321.  
 Historia IV. 323.  
 Historia V. 324.  
 Historia VI. 325.  
 Historia VII. 325.  
 Lethargum Februm in duplici casu inutiliter Cortice tentata curatio. 324. & 326.  
 Lenientia, aut Purgantia non æque prohibentur ante ac post usum Corticis. 78.  
 Lethargica Febris Intermittens perniciofa describitur. 139.  
 — Gravior est ex inspectione, ac esse videatur ex relatu. 227.  
 Lethargicarum Februm *China China* curatarum Historiæ. 227. usque ad 240.  
 Historia I. 227.  
 Historia II. 229.  
 Historia III. 229.  
 Historia IV. 231.  
 Historia V. 232.  
 Historia VI. 235.  
 Historia VII. 236.  
 Historia VIII. 237.  
 Historia IX. 238.  
 Historia X. 238.  
 Historia XI. *Ibidem*.  
 Historia XII. 239.  
 Historia XIII. *Ibidem*.  
 Lethargicas, seu Veterino comitatas Febres, momento temporis solvit *Cortex*. 6.  
 Ligna, seclusis poris, materiam habent Aqua graviorem. 24.  
 Lignorum innatatio in aqua procedit ex copia, & amplitudine quadam pororum compaginis lignæ. *Ibidem*.  
 Lochia suppressa in Febre Cardiaca, curata per *Corticem* Febre, statim revocata sunt. 254.  
 Locus natalis *China China*. 2.  
 Lumbrici Vitulini, & Terrestres in amara Corticis infusione diu vivunt, experientia Auctoris. 336.  
 — Item in infusione Aloes, & Colocyntidis, in succo Absyntii, in Petroleo, Mercurio ipso &c. *Ibidem*.  
 Lumbrici Vitulini citissime necantur in Vini Spiritu, deinde in Aceto, mox in Vino, Mellicrato &c. 335. & 336.  
 — Ita, & quidem citius, etiam Terrestres. 337.  
 Lumbrici Vitulini Oleo Magni Ducis Hetruriæ obliniti, ac in eodem aquæ commixto infusi, vivunt: non sic in Vini spiritu. 335., & 336.  
 Lumbrici Terrestres primo loco, mox &

Vitulini motus edunt plurimos, & violentissimas contractiones, præcipue quidem in infusione Viridis Æris, secundario vero in Petroleo. 336.  
 Lumbrici Terrestres necantur facile in infusione Viridis Æris: non ita Vitulini. 337.  
 Lumbricis diversi ordinis diversum probabiliter convenit, & adversatur pabulum. 334.  
 Lumbricorum post assumptam *Chinam Chinam* excretorum exempla 333. 334.  
 Lumbricorum excretio depulsæ per *Corticem* Febri subsequens. 238.  
 — Item quoque 333. 334.  
 Lumbricorum Humanorum necandorum, & aliorum, eadem forsitan non est ratio. *Ibidem*.  
 Lumbricos Humanos adhibere in experimentis fortasse non sufficit ad statuendum quid vere illos valentius necet. 335.  
 Lumbricos necare credita Remedia forsitan aliud præstant extra Corpus humanum, & aliud intra. 335. & 337.  
 Lumbricos a *China China* necari sibi compertum scribunt *Ramazzinus*, & alii. 330.  
 Lympha, & Chylus primario, secundario vero Succo omnes eidem Chylo immiscere soliti, videntur esse materia Fermenti Februm Intermittentium. 50.  
 Lymphaticam Febrem sæpius *Corticis* refractariam deprehendit Auctor. 354.

## M

**M**AGATI (Cæsaris) Methodus de rara Vulnerum solutione, & de Turundis oblegandis, laudatur. 125.  
 MAGATUS (Joh. Bapt.) Cæsaris Frater Apparicio cuidam tribuit ingenue primum usum ablegandarum Turundarum, Romanisque Chirurgis morem raræ Vulnerum solutionis: Cæsari vero Fratri adscribit Methodum hujus paxeos rationalem. *Ibidem*.  
 Malignæ Febres ab ortu falso asserunt nonnulli posse *Cortice* curari. 299.  
 Malignæ Intermittentes quænam sint. 289.  
 Malignæ Febres magna ex parte a Fermento Intermittentium cum Fermento Continuarum commixto solent progigni. 302.  
 MANZII Professoris Bononiensis prognosticum in lethali quadam Ægritudine, per administrationem *Corticis* subinde curata. 189.  
 Matheseos usus in Medicina laudatur. dummodo sobrius, & cautus sit in exercenda praxi. 40. 41.



- Mathesis Medico Practico decora est, & sæpius utilis, dummodo illam accom-  
modet Praxi: secus si Praxin accom-  
modet illi. 41.
- Ob id nonnunquam præ Medicos ma-  
thematicis imbuto excellit rudior in ope-  
ribus Artis magis versatus. 41.
- Illustratur id exemplo eorum, quæ  
identidem accidunt in corrigendis in-  
congruis aquarum fluentium motibus.  
41. & 42.
- Mathesis practicæ Medicinæ bene juga-  
ta felicius applicari potest Morbis orga-  
nicis, quam similaribus. 153.
- Id in rebus ad Opticem pertinentibus  
(pluribus aliis minime exclusis) maxi-  
me elucescit. 154.
- Mechanice naturalis fluidorum difficile  
explicabilis; multo magis vitiata in fe-  
bribus. 43.
- Medicamenta *China China* addita ad il-  
lam roborandum, ut plurimum super-  
vacanea. 65.
- Medicamenta inutilia præscribentes in le-  
gem de *Repetundis* incurrunt ex *Bado*. 13.
- Medicamenta evacuantia, titulo Febrifu-  
gi ante paroxysmum exhibita, si præser-  
tim plusquam par sit expellant, noxia. 18.
- Medicamenti administratio præpostera, ac  
ideo inutilis, nil detrahit eidem Medi-  
camento, cæteroqui salubri. 186.
- Medicamentorum cum *China China* com-  
mixtionem, vehiculo necessario excepto.  
*Sydenham* damnat. 68.
- Médici nimium creduli ante inventum  
*Corticem* primò crebris purgationibus,  
mox Specificis invalidis, Amuletis &c.  
Intermittentium curationem tentabant  
incaustum. 11.
- Medici cordatiores ante inventum *Corti-  
cem* diuturnarum Februm curationem  
sæpe Naturæ committebant, & Tem-  
pori. 12.
- Medici prudentia sola debent decernere in  
quibusdam casibus naturæ ancipitis, an  
*Cortex* sit offerendus, nec ne, habito  
ad rationabilem spem, metumve respec-  
tu. 274.
- Rationes quædam hinc inde militan-  
tes afferuntur, & perpenduntur. 274. 275.
- Medici universa Mathesi præstantes, & si  
nondum Theoriam Februm Periodica-  
rum, & Malignarum, aut Pestilentium  
satis extricarint; id tamen constanti la-  
bore adhibito aliquando sperandum vide-  
tur, quoad finit Artis incertitudo. 154.
- Medici Mutinenses anno 1696, tantum no-  
tant Curationes insignes Februm Per-  
niciosarum *China China* ab Auctore  
anno superiore absolutas, sed qua me-  
thodo ignorabant. 243.
- Medicis tempore primi adventus *Corticis*  
in Europam florentibus, condonanda  
aliqua trepidatio. 14.
- Medico perperam præscribenti imputanda  
est *Corticis* noxa, non ipso *Cortici*.  
349.
- Medicorum nonnunquam scrupulosa super-  
stitio, seu vana Artis ostentatio in Mor-  
bis curandis. 156. 157.
- Medicus tenetur tum Veterum, tum Re-  
centiorum Scripta callere, & ex utrif-  
que meliora seligere, ne suo muneri  
desit. 29.
- Nisi in principio Subcontinux Mali-  
gnantis, quæ Corruptiva futura sit,  
*Corticem* exhibeat, non amplius potest  
illum utiliter exhibere. 264. 265.
- Curans Febres *China China* id agit,  
quod agit Chirurgus reponens Ossa luxa-  
ta: curans vero aliis remediis agit,  
quod Chirurgus vulnera curans, & ul-  
cera. 267. 268.
- Medicus, qui in Febris Continuis Pro-  
portionatis, etiam de Continuitate es-  
sentiali suspectis, velit *Corticem* tenta-  
re cum incertitudine de activitate Re-  
medii in tali circumstantia, culpandus  
non est. 314.
- Medicus misericors potest etiam proxime,  
ut sibi videtur, morituris *Corticem* non-  
nunquam offerre, præsertim si sit requi-  
situs, præmisso tamen de innocui ten-  
taminis invaliditate prognostico, dum-  
modo Febris, qua detinetur *Æger*, sit  
ex natura sua de admittentibus *Corti-  
cem*. 176.
- Medicus, curatione Februm, ut ajunt,  
methodice instituta, se gerit ut Inspector  
morbi, & minister Naturæ: curatione ve-  
ro per *Chinam Chinam*, se gerit ut Arbi-  
ter Morbi, & Instaurator Naturæ. 268.
- Medicus unus idem Morbum in iisdem  
circumstantiis iisdem Remediis curare  
potest, non vero alius propter idiversi-  
tatem ordinis administratorum Reme-  
diorum. 122.
- Medicus, qui Febrem in Depuratoriam  
præsertim circa initia sistit peccat con-  
tra Aphorismum Hippocratis: *Qua ju-  
dicantur &c.* 351. 352.
- Menstruas Purgationes actu patientibus  
Fœminis tuto exhibetur *Cortex*, si Fe-  
bris tunc exigat. 348.



- Suspendio eo tempore usus illius ante inchoati arbitraria est, nec improbanda, si Febris moram admittat. *Ibid.*
- Mentis torpor quidam ex gravi febre immerito Cortici adscriptus, *Cortice* ipso furtim præscripto sublatus. 225.
- MERCATI Tractatulus de *Tertiana Perniciosa* recus. 100.
- MERCATO observatæ sunt Febres quædam Perniciosæ non observatæ ab Auctore, & Auctori quædam forte non observatæ a *Mercato*. 139.
- MERCATUS Tertianarum Perniciosarum primus Observator, & Scriptor. 98.
- Pro Perniciosarum curatione quo se vertat anceps, minime anceps fuisset, si novisset *Corticem*. 115.
- Asthmaticum affectum, Catrharum suffocativum, dolorem Pleuritico similem, Arthriticosque dolores Perniciosis Intermittentibus associatos observavit, nec veluti morbos consideravit, sed ut accidentia a Febre producta. 121.
- Mesenterii Glandulæ. Vide, *Glandula mesenterii*.
- Metamorphoses Febrium diversæ eas modo reddunt *Cortici* obsequentes, & modo non. 307.
- Methodi plures curandarum Febrium Methodo Auctoris succenseant necesse est. 177.
- Methodi lentioris ad curandas Subcontinuas Perniciosas propositæ descriptio. 163. 164.
- Methodo Auctoris quid probabiliter sint objecturi Vaniloqui. 167. 168.
- Methodo validissima offerendus est *Cortex* in extremo periculo, extremaque temporis angustia: modice valida in periculo modico. 158.
- Methodum Auctoris quid reddat spectabilem, & præ reliquis admirabilem. 168. 169.
- Ejusdem discrepantia cum Methodo *Mortoni*. 171.
- Exemplum pro innuenda præstantia Methodi Auctoris. 169.
- Methodus antiquior offerendi *Corticem* in diuturnis Intermittentibus ex Romana Scheda. 61.
- Methodus Auctoris ad Intermittentium diuturniorum recursum præcavendum post adhibitam methodum Romanæ Schedæ. *Ibidem*, & seq.
- Methodus exhibendi *Corticem* in Perniciosis duplex est, & pro occasionum diversitate adhuc varia. 158.
- Fortior generaliter convenit magis Septem prioribus Perniciosarum speciebus: levior vero Octavæ specie. *Ibid.*
- Methodus servanda in exhibendo ad prophylaxin *Cortice* post Perniciosas Intermittentes depulsas. 162. 163.
- Methodus, qua exhiberi debet *Cortex* in Subcontinuarum Malignantium principio, ubi illud expediat exhibere. 372. 373.
- Methodus *Mortoni*, ubi *Cortex* offerri debeat in Subcontinuarum Malignantium principiis, poterit usurpari ab iis saltem, qui non valent exacte metiri proportionem inter vires Remedii, & Morbi, ut fert Methodus Auctoris. 272.
- Methodus Auctoris ad Perniciosas Periodicas proponitur, non solum usquequo illæ patenter sunt periodicæ, verum etiam postquam jam in Continuas obscuratis admodum periodis degenerarunt cum asphyxia, & aliis signis lethalissimis 123.
- Methodus nonnullorum mitior offerendi *Corticem* in debiliorum Febrium diuturnitate utilis. 61.
- In Febribus Fortioribus satius est dosim justam semel saltem præmisisse. *Ibid.*
- Methodus *Talbotii*. Vide, *Talbotii*.
- Minera Fermenti Febrium Intermittentium potius ultra, vel citra Sanguinem sita est, quam intra. 51.
- MONGINOT, data Humoristarum hypothesis, nulla sæpe opus esse evacuatione sensibili pro curatione Febrium ostendit. 30.
- CHINAM CHINAM affirmat mederi Morbis ab exuberantia Succorum acidorum diversimode in Visceribus stagnantium, vel fermentescentium ortis. 329. 330.
- MONGINOTII de Causis Intermittentium opinio. 37.
- Morbi Herculei, ut credi possint vere curari ab aliquo Remedio, experientia opus est pluries repetita, & diutina perseverantia in statu sano. 339.
- Morbi omnes periodici extra lineam Febrilem, qui dicuntur a multis *Cortice* curabiles, aliquando forsitan fortuntur ab eodem aliquam modificationem, non curationem veram. 337.
- Morbis omnibus frigidis *Corticem* mederi putant *Badus*, & *S. Sophia*. 329.
- Morbis ab exuberantia Succorum acidorum diversimode in Visceribus stagnantium, vel fermentescentium ortis, *Chinam Chinam* mederi affirmat *Monginotius*. 329.
- Mor-



Morbos nonnullos præter Febres identidem recurrentes *China China* curat Morton. 133.

— Immo omnes quoquo modo periodum habentes, ac de latente præsertim Fermento febrili suspectos, posse a *Cortice* levamen obtinere, videtur innuere. 130.

— Ejusdem Auctoris limitatio rationalior quoad sphaeram activitatis talis Remedii. 345.

Morbos *Vaporis* nomine donatos, Febres quascunque, Hydropes &c. per *Chinam Chinam* curari asserit Blegny. 330.

Morbus idem in iisdem circumstantiis iisdem remediis curatus ab uno Medico sanari potest, & non ab alio propter diversitatem ordinis administratorum remedium. 122.

MORTON etsi Causas Febrium minus dilucide forsan explicavit, earum tamen curationem satis viriliter docuit. 39.

— Perniciosas Intermittentes sub aliorum Morborum larva delitescentes postremus descripsit, easque media *China China* feliciter jugulare docuit. 99.

— Morbos nonnullos præter Febres identidem recurrentes *China China* curavit. 133.

— Item omnes quoquo modo periodum habentes, ac de latente præsertim Fermento febrili suspectos posse *Cortice* leniri, videtur innuere. 330.

— Illius responsio ad objectionem petitam a Recidivis. 4. & 5.

— Febres Phthisicorum putridas intermittentes posse aliquo modo *Cortice* leniri, interitu Aegrotantis nequaquam inhibito, non diffitetur. 341.

— Hæmoptoen accidentalem, & habituales quomodo discriminet. *Ibid.*

— Hæmoptoes habitualis antidotum herculeam esse *Corticem* asserit; sed Auctor non admittit. *Ibid. & seq.*

— Hæmoptoes ab eodem curatæ Historia. 343.

— Inflammatorias Febres, quando manifestas exacerbationes, & remissiones habent, curabiles *Cortice* putat. 298. 299.

— Febrem quanlibet, saltem Primariam, quomodolibet remittentem; etsi Continuum, *Cortice* curabilem supponit. 242.

— CORTEX ubi non proficit, quandoque obesse asserit. 352.

— Evacuationes omnes in curandis Intermittentibus damnat. 32.

— Febres ab ortu Intermittentes, ut tales etiam considerat post acquisitam recenter Continuitatem, & *Cortice* curat. 124.

MORTONI Scripta ut in praxi utilissima laudantur, & obiter defenduntur in nonnullis. 172.

— Nondum cusa, vel nondum nota, quum Auctor propriam Methodum ad Perniciosas exercuit. 123., & 241.

MORTONI Sententia de Febrium omnium etiam Intermittentium Benignarum Causa. 38.

— Ejusdem hallucinatio Hæmoptoen habituales *China China* curare molientis. 343. 344.

— Illius Textus de Febribus Continentibus Inflammatoriis æque curabilibus *Cortice* ac sunt Intermittentes, explicatur. 297. 298.

— Ejusdem Comparatio inter curationem Febrium Proportionatarum in Malignas Synochos transeuntium peractam *Cortice*, & peractam sine. 309.

— Ejusdem Capitulum unicum recusum, de Proteiformi Intermittentis Febris genio. 124.

— Ejusdem Textus de Phthisicorum Febre putrida Intermittente per *Chinam Chinam* non sananda, sed tantum lenienda. 340.

— Item de Hæmoptoe per eandem *Chinam Chinam*, ut putat, sananda. 341.

MORTONUM præcesserunt in dignotione, & observatione Intermittentium Perniciosarum, Mercatus, Sennertus, Mercurialis, Saxonia, Riverius, & alii. 125. 126.

MORTONUS augendo dosim Corticis illam revera non intendit augere, quia *Corticem* magna ex parte putat effectum. 271.

— Solus inter omnes Perniciosarum Intermittentium Observatores congruam eorundem Febrium curationem docuit ope *China China*. 126.

— In Puerperio salubriter ministrari *Corticem* asserit, nulla idcirco vi adstrictoria pollentem. 20.

— Recentiorum licet doctrinis imbutus, Veterum tamen praxin asperiores, & minus castigatam identidem exercet. 132.

— Nomine Febris Continentis intelligit omnes Continuas Remittentes, seu Periodicas, non Febres omni remissione, atque incremento carentes. 298. Item. 301.



Motus febrilis principium. Vide, *Principium motus febrilis*.

Motus Fluidorum. Vide, *Fluidorum motus*.

Motus principium in humano Corpore. Vide, *Principium motus in humano &c.*

Motus Solidorum. Vide, *Solidorum motus*.

Mulieribus gravidis. Vide, *Gravidis*.

Mulieribus Menstruas purgationes patientibus. Vide, *Menstruas*.

MUNDII Sententia de Caussis Intermittentium. 35.

Mutinæ quando incœptus *China China* usus, & quomodo. 2., & 3.

Mutinæ perpauci sunt ex Medicis, qui non faveant Cortici: Plurimi autem, qui favent, varia methodo eodem utentes. 240. 241.

Mutineses Medici. Vide, *Medici Mutinenses*.

## N

**N** Arcosim nullam in se continet *China China*. 6.

Narcoticorum usus in morbis longe infidelior est usu *Corticis* in Febribus. 15.

Natura Fermenti Perniciosi, seu venenati, in primam Corporis regionem agentis, explicatur analogice pluribus modis. 148.

Natura, vel indoles Fermenti perniciosi in primam Corporis regionem sævientis Emetica est, atque Cathartica. 148.

Naturæ medicatricis nomine quid intelligendum. 74.

Necessitas exhibendi Corticem in extremo saltem Perniciosarum periculo probatur, & illustratur exemplo. 157. 158.

Neotericorum plurium Sententiæ potiores de Februm Intermittentium Caussis obiter consideratae favent curationi per *Chinam Chinam* institutæ, etsi ea nullam sensibilem inferat evacuationem 35. usque ad 39.

NIGRISOLI Sententia circa Caussas Februm Intermittentium. 36.

NIGRISOLUS luculenter de Cortice scribens laudatur. 8.

— Idem ad Febres Inflammatorias sanandas minime aptum esse Corticem testatur. 299.

— Idem ex Hippocrate humores nostros fieri meliores, ac mitiores concentratione, asserit & permixtione. 30.

— Corticem in Febribus Continuis abessentia, ut & in Inflammatoriis puta in

Pleuritide, Peripneumonia, Angina &c. plane obesse affirmat. 353.

— Hocque & Sydenham. *Ibid.*

Nomenclatura Arboris, cujus Cortex *China China* dicitur. 2.

Noxa Corticis. Vide, *Corticis noxa*.

Noxa Purgationis etiam *minorativa* dictæ in Febribus. 33. 34.

Noxam non arguit, sed ad summum imperfectam judicationem, Recidiva post Febres Cortice curatas. 14., & 15.

## O

**O**bjectio quævis adversus certum Corticis usum laborat semper suppositione aliqua incerta, quippe fundata super hypothesim aliquam semper incertam. 28.

Objectio resultans ex dictis de Fermento Intermittentium extra Sanguinem posito, qua videtur probari nullam Intermittentem esse posse Depurativam. 72.

— Ad objectionem responsio. 72. & 73.

Objectio nulla valida potest adduci contra Corticem, ignota vera Februm Caussa. 28.

Objectionis a Recidivis petitæ in curatione Perniciosarum peragenda per *Chinam Chinam* festiva prius, mox & seria Responsio. 174.

Oblatio *China China* impurgatis Aëgris Restaurando usitata. 77.

Oblationem *China China* sine prævia purgatione, aut Venæ sectione instituendam esse ult. Sydenham. 76. 77.

Oblationem Corticis remorari non debet Recidiva post depulsas Cortice Perniciosas. 173.

Oblationi Corticis Paroxysmus intensior succedens. Vide, *Paroxysmus intensior*.

Oblationis Corticis vario luccessu institutæ Exempla. Vide, *Exempla oblationis*.

Oblationis Corticis omissio. Vide *Omissio*.

Olei, & Bilis analogæ est structura, licet inæquale sit pondus. 25.

Oleum facillime absorbetur a Cortice præ aliis liquoribus. 25., & 26.

Omissio oblationis Corticis in Subcontinuarum principio forsitan indicatæ, corrigi nequit in illarum progressu, ut in meris Intermittentibus. 274.

Opera Mortoni nondum cusa, vel nondum nota, quum Auctor suam Methodum curandi Perniciosas Intermittentes exercuit. 123. Item, 241.

Ophtal-



Ophthalmiam Periodicam, Epilepticos insultus præ dolore minitantem, *Cortice curatam* refert *Pacchionus*. 330.

Opiata ex China China in *Zodiaco Medico-Gallico* descripta. 67.

— Eandem efficaciorē reddit *Nigrissolus*. 67.

Opiatæ ex China China cum Cardiacis Confectionibus mixta confectæ utilis quidem sunt effectus, sed inutilis expensæ. 68.

Opiniones incertæ de Febrium Causis nequeunt infirmare certam *Corticis* operationem. 16.

Opiniones Neotericorum communiores de Intermittentium Causis &c. Vide, *Neotericorum*.

Opium dubitatur, an refrigeret, an calefaciat. 13.

Oppositio vulgaris in *Chinam Chinam* ex sensibilis evacuationis defectu. 12.

## P

**PACCHIONUS** Ophthalmiam periodicam, Epilepticos insultus præ dolore minitantem, *Cortice curatam* refert. 330.

**PALO DE LAS CALENTURAS** vocatur ab Hispanis China China. 327.

Paralogismus ex non causa ut causa obvius æque potest esse, adscribendo *Cortici* effectum bonum, qui ab eo non procedat, ac malum. 314.

Paralyticam, ac elumbem Vetulam *Cortice curatam*, ac juvenescere visam refert *Morton*. 332. 333.

Parotides Febribus Periodicis supervenientes *Corticis Peruviani* medelam non respuunt. 220. Item 246.

Paroxysmo lethali jam invadente, vel proxime instante, Ægroque etiam ante jam conclamato, non exhibendus, nec infamiae exponendus *Cortex* insens. 176.

Paroxysmus intensior nonnunquam oblato *Corticis* succedens, certioris curationis indicium esse solet. 228.

— Frequentius tamen succedit mitior, idque pariter utile. 230.

Periculum extremum Febris Perniciosæ curationem etiam tantummodo Palliativam æquius quam Cancer admitteret, nedum veram. 156.

Periculum Reviviscentiæ principii depressi non remoratur Medica curatione plu-

rium Morborum nequaquam Febrilium. 270.

— Exemplo Chirurgiæ res hæc quodammodo illustratur. *Ibidem*.

Periodica Continua. Vide, *Proportionata*. Periodica Continua quælibet. Vide, *Febris quælibet Periodica*.

Periodica Perniciosa. Vide, *Perniciosa*. Peripneumonici, Pleuritici e morbi radice, Tabidi. Vide, *Pleuriticis e morbi radice &c.*

Perniciosa Febris in universum quænam sit. 134.

Perniciosæ Febris periculum extremum. Vide, *Periculum extremum*.

Perniciosæ Subcontinuae curandæ methodus lentior. 163. 164.

Perniciosæ Intermittentes, præsertim Comitatae, vocantur Intermittentes ab Auctore etiam tunc, cum extremo imminente exitio sunt Continuae. 139.

Perniciosæ Intermittentes non sunt admodum infrequentes in praxi: immo quandoque quasi epidemice grassantur. 98.

Perniciosæ pro sua curatione quandoque indigent drach. sex *Corticis* simul oblatis: quandoque vel duæ tantum drach. more veteri possunt sufficere. 161. 162.

— Curantur minori *Corticis* quantitate, ac alii curent Benignas, *Cortice congruenter distributo*. 163.

Perniciosarum Intermittentium Fermentum non nisi accidentaliter differt a Fermento non Perniciosarum. 152.

— Evincit id Peruvianus Cortex utrumque Fermentum æqualiter domans. 152.

Perniciosarum Febrium periodicarum omnium descriptio. 136. usque ad 145.

— Earum differentia. *Ibidem*.

— Item earum divisio. 134. 135.

— Alia earundem divisio ad ritus Scholasticos. 135.

Perniciosarum Febrium Periodicarum ex quælibet earum specie *China China* peculiari methodo ministrata sanatarum Historiæ ordinatim descriptæ. 194. ad 196.

— Earundem *Cortice* curatarum gravia symptomata non sunt curanda remediis peculiaribus, saltem si hæc remedia sint onerosa Ægrotanti: ea enim symptomata solvuntur sponte ad solutionem Februm. 132.

— Confirmat id *Monginotius*. *Ibidem*. Perniciosum Fermentum in primam Corporis



- ris regionem agens imitatur indolem Venenorum Colliquantium 145. 146.
- In secundam agens regionem æmulatur utranque naturam, Venenorum Colliquantium videlicet, & Fixantium. 149. 150.
- Agens vero in tertiam regionem Venenis tantum soporiferis analogice respondet. 150. 151.
- Perniciosum Fermentum febrile in primam Corporis regionem agens quasdam Perniciosarum species producit. 146. 148.
- Idem in secundam agens regionem quasdam alias gignit Perniciosarum species. 149. ad 151.
- Agens in tertiam regionem Perniciosæ Intermittentis speciem peculiarem constituit. 150.
- Perniciosus character in primo exortu suo mitis: in progressu ferox. 140.
- PERUVIANI CORTICIS usus in principio Subcontinuarum Perniciosarum ad hoc, ut posset damnari, oporteret habere certitudinem de futura judicatione perfecta morbi, abstinendo ab illo, & de Recidiva graviore, illum administrando. 270.
- PERUVIANI CORTICIS usum ad expugnandas Febres Intervallatas vulgares (Perniciosarum siquidem curatio cita, & coacta sub hac regula rigore non cadit) esse debere qualis esse debet usus externus Sulphuris ad depellendam Scabiem. 355.
- Comparatio hæc explicatur. 355. 356.
- PERUVIANI CORTICIS actio videtur suadere coacervationem Fermenti Februm Intermittentium extra cruorem. 72.
- PERUVIANO CORTICI non competit privilegium bonæ fidei, quod aliis Remediis competit citra successum adhibitis. 276. 277., & 313.
- PERUVIANO CORTICE Febres Phthysicorum putridas Intermittentes posse aliquo modo leniri, interitu Ægrotantis nequaquam inhibito, *Morton*, & Auctor non dissentit 341.
- PERUVIANUM CORTICEM damnant nonnulli, ac si Toxicum foret. 9.
- Non congruere Inflammatoriis Febribus affirmant *Sydenham*, & *Nigrisolus*. 299.
- Immo & plane obesse etiam in Continuis ab essentia. 353.
- Esse Antidotum herculeam Hæmo-

- ptoes habitualis, ut *Morton* asserit, Auctor non admittit. 341. 342.
- Mederi Morbis omnibus frigidis putant *Badus*, & *S. Sophia*. 329.
- PERUVIANUM CORTICEM offerendi methodus in Perniciosis duplex est, & pro occasionum diversitate adhuc varia. 158.
- Peruvianum Febrifugum. Vide, *Febrifugum Peruvianum*.
- PERUVIANUS CORTEX ut possit suo fungi munere in Febribus Intermittentibus, requirit, ut nullum vitium organicum, nullaque Viscerum labe sit ejus Febris fomes, vel Causa. 295., & 341.
- Offerendus est methodo validissima in extremo periculo, & extrema temporis angustia: modice valida in periculo modico. 158. 159.
- Qua methodo offerendus in Subcontinuarum Malignantium principio, ubi expediat exhibere. 272. 273.
- Item qua methodo offerendus ad prophylaxin post Perniciosas Intermittentes depulsas. 163.
- Non exhibendus, nec infamix exponendus, Paroxysmo lethali jam invadente, vel proxime instante, Ægroque jam conclamato. 176.
- Peruvianus Cortex. Vide plura in verbo: *Cortex*, *China* *China* &c.
- Phthysicorum Febres putridas Intermittentes. Vide *Febres Phthysicorum*.
- Placentinus *Schelhamerum* impugnavit. 179.
- Pleuriticis e morbi radice talibus, Peripneumoniciis, & Tabidis sanandis *Peruvianum Corticem* plane invalidum esse, immo & noxium a melioribus haberi. 352. 353.
- Pleuritis cum Febre Intermittente conjuncta Casus peculiaris ab Auctore observatus. 297.
- Podagricus quidam asserit se a dolore, & diuturnitate insultus allevari consuetum per usum *Chinæ* *Chinæ*. 331.
- Pomponacii Aqua stibiata curat varios morbos absque excretionibus sensibiliter adauctis, habita ad potum adauctum proportionem. 28.
- Præfecti cujusdam Gallicæ militiæ defuncti Historia. 277.
- Praxeos medicæ cardo consistit non in multiplicitate, sed in electione Remediorum, & in captanda occasione. 122.
- Praxis *Mortoni* id saltem attulit utilitatis, ut in casibus ambiguis de effectu Remedii possimus sine metu uti eodem. 309.
- Principium Motus Febrilis a Fluidis primario affectis petendum, 40.



Principium motus in humano corpore a Fluidis primo actuantibus Solida videtur deducendum: a Solidis vero diuturnitas motus eorundem Fluidorum. 43. 44.

Privilegium bonæ fidei, quo fruuntur alia Remedia citra successum adhibita, non competit Cortici. 276. 277. & 313.

Prognosticum Auctoris in peculiari quodam casu controversæ oblationis Corticis. 216.

Prophilaxis post depulsam Subcontinuum Periodicam quo pacto instituenda. 165.

Proportionata Continua quænam sit, & quo modo producat 288. 289. Item 290.

— A Fermento Continuarum, & Intermittentium simul commixto procedit. 302. 303.

— Ea neque simpliciter Subintrans est, neque simpliciter Remittens, sed de utraque, seu de Fermento utriusque simul concurrente participat. 304.

Proportionata talis orta, vel orta simpliciter Remittens, Cortici refractaria esse solet: secus si orta fuerit Intermittens. 307.

Proportionata quævis Continua potest dici Remittens, ac quoquo modo Subintrans; sed nec omnis Subintrans, nec omnis Remittens potest dici Proportionata, 301.

Proportionata Continua facile curatur Cortice, quando magis de natura, seu de Fermento Subintrans participat: difficillime vero, quando magis participat de natura, seu de Fermento Remittentis simpliciter. 305.

— Distinctio hæc explicatur. *Ibidem*.

Proportionatæ Corticem admittentis, ejusdemque respuentis varia descriptio. 305. usque ad 307.

Proportionatæ si Symptomaticæ sint, minime Cortice sunt curabiles. 308.

— Ita fere, si sint Comitatae vero morbo. *Ibidem*.

— Comitatae vero mero Symptomate Cortice curari poterunt, cæteris consentientibus. *Ibidem*.

— Vere, Æstate, atque etiam Autumno facile de natura Subintransantium participant: Hyeme facile de natura Remittentium simpliciter. 306.

— Characterem malignum suscipiunt facillime. 301. 302.

Proportionatarum accidentalem Continuitatem cum essentiali periodo habentium, & *China China* feliciter curatarum Historiæ. Vide, *Subcontinuarum* &c.

Proportionatarum essentialem Continuitatem

tem cum accidentali periodo habentium, & *China China* inutiliter tractatarum Historiæ. 310. ad 314.

Historia I. 310.

Historia II. *Ibid.*, & seq.

Historia III. 311.

Historia IV. 312.

— Animadversio in iv. Historiam. 313.

Proportionatis, ac Remittentibus omnibus curandis idoneam *Chinam Chinam* Mor-tonus reputat. Auctor in quibusdam admittit, in quibusdam non. 301.

Propugnatores Corticis quandoque abundant aliquo excessu, orto nihilominus ex admirabili deprehensa pluries illius virtute. 9.

Protestatio Auctoris de integritate, qua præditos putat sentientes aliter ac sentiat ipse, & de sua erga illos existimatione 177. 178.

Protestatio Auctoris de Innocentia Corticis per experientiam deprehensa, exceptis casibus intempestivæ oblationis. 178.

Protestatio Auctoris de usurpatione nominis *Fermenti Febrilis*. 40.

Protestationes Auctoris pro coronide Tractatus. 358.

PROTOSPATARIi opinio de Febrili miasmate a *Josepho Donzello* explicata. 39.

Puerorum Febres Lentæ, Hecticæ abusive appellatæ, Cortice frequenter curantur. 319.

Puerorum, & Vitulorum Lumbricis laborantium consimilis halitus, aliquam suadet symbolesitatem inter istorum, & illorum Vermes. 335.

Puerpera ex Febre Acuta Subcontinua feliciter Cortice curata. 222.

— Item. 254.

Puerperis, & Abortum passis tuto Cortex propinatur. 347.

Puerperis Febre Periodica laborantium tuto Cortex administratur, non neglectis quæ Puerperio congruunt. 346. 347.

Pulsus primas tenet pro manifestando characterem pernicioso in sex prioribus Intermittentium Perniciosarum speciebus: non autem in septima specie. 140. ad 142.

Purgantia agunt immediate in Solida, & mediate tantum in Fluida. 34.

Purgantia ad tollendas simul Febres Intermittentes, & earum Causas, minus recte *China China* admiscet *Dolans*. 37. 38.

Purgantia Cortici perperam admiscetur. 65.

Purgantia, aut Lenientia non æque prohibentur.



bentur ante ac post usum Corticis. 78.  
Purgantia ut noxia in Febribus damnat  
*Monginot*, & Corticem laudat. 32.

Purgatio, & Venæ sectio ante usum Corticis potest omitti: sed & sæpe potest institui. 76. 77.

Purgatio levis ante usum Chinæ Chinæ potest institui in quantum indicatur ab aliis Corporis dispositionibus, non ab ipsa Febre, ejusve Causa. 77.

— Quomodo eadem utendum, & quibus Solventibus utendum pro varia Febrium, & Tempestatum ratione. 77. usque ad 80.

Purgatio præsertim (sæpe etiam Venæ sectio) in Febribus Intermittentibus non indicatur nec ratione Causæ, nec ratione Febris, sed potius prohibetur ratione utriusque. 77.

Purgationis etiam *Minorativa* dictæ noxa in Febribus. 33. 34.

## Q

Quæsitæ nonnulla enodata circa usum Corticis. 329. usque ad 359.

Quæsitum maximi ponderis in praxi, exemplo pratico explanatum, mox fuse, & analytice pertractatum. 262. 263.

Qualitatem nullam sive manifestam, sive occultam, qua possit nocere, obtinet Cortex. 6.

QUANDO, UBI, & QUOMODO sit adhibenda *China China*, sunt tria attente respicienda in usu illius. 170. 171.

Quartanæ triplicis in uno subjecto, & duplicis in altero; in utroque autem jam complete Hydropem producentis, feliciterque *China China* curatæ cum Hydropis ipsius eradicatione, exempla duo. 80. 81.

Querimoniarum Aëgrorum etiam in extremo periculo Cortice sanatorum. 175.

Qui Corticem strenuum Febrifugum respiciunt, utuntur Remediis, quibus nullam, vel invalidam inesse virtutem pluries noverunt. 13.

Quibus modis Febris solvi consuescat, sive per curationem methodicam, sive sponte solvatur. 267.

Quid vere sentiendum de aliis viribus Cortici attributis præter Febrifugam. 339.

— Quid fateantur de hoc *Sydenham*, & *Morton*. 344.

QUINQUINA, seu *Kinkina* dicitur a

Gallis, quæ a nobis dicitur *China China*. 1.

Quo pacto in curandis Intermittentibus Corruptivis sit exhibendus Cortex, si id fiat pro symptomatum gravitate; & quomodo, si fiat præ sola Febrium diurnitate. 75.

Quo pacto, & per quas vias possit *Peruvianus Cortex* occurrere Fermento Febrili Perniciosas Periodicas producenti. 155. ad 156.

## R

RAMAZZINI monitum in Libro *De Principum Valetudine tuenda*. 111.

RAMAZZINI Ephemeridibus Barometricis adnexa Disertatio Auctoris, anno 1695. edita ad *Borelli* tutamen aliquod, non ad completam defensionem. 111.

— Responsiones suas Jatro-apologeticas ad Objecta, quæ postremo contra hanc Therapeuticen edidit *Ramazzinus*, Tyrionibus legendas commendat Auctor, quasi complementum sui Tractatus. 350.

RAMAZZINUS Auctori vel dissentiens, semper humanus. 279. 280.

— Nusquam tractavit Argumentum Auctoris, nec ei simile. 217. & 314.

— Et si in *Constitutionibus* suis *Epidemicis* Corticiparum amicus, & sæpe cunctabundus, fuit tamen vel tunc insignior ejusdem fautor inter alios Medicos Conterraneos. 315.

— Post annum 1695. longe melius cepit sentire de Cortice ac ante 180. Item. 315.

— Expositio Textus illius circa usum Corticis in Tertianis Intermittentibus Malignis. 315.

— Ejusdem Dogma æquiparans usum Corticis usui Opii non admittitur. 355.

— Lumbricos necari per *Chinam Chinam* scribit. 330.

— Laudatur. pag. 90. 91. 314. 316. & 355.

Ratio occurrendi tempestive Recidivis. Vide, *Recidivam*.

Ratio Remediorum usurpandorum. Vide, *Remediorum usurpandorum*.

Rationes militantes pro omissione Corticis in Subcontinuarum Malignantium principiis contemnendæ non sunt; licet illis præponderare videantur militantes pro illius oblatione. 271.

Recentiorum plurimorum opiniones circa Febrium Intermittentium Causas cursum examinatæ optimam suadent illarum



rum curationem media *China China* institutam, licet ab ea nulla fiat sensibilis evacuatio. 36. ad 39.

Recidiva facta, post sui depulsionem *Cortice* peractam, Subcontinua Perniciosa non adeo sollicitè iterum *Cortice* curanda est, ut reliquæ Perniciosæ recidivæ. 166. 167.

Recidiva post fugatas *Cortice* Febres ad summum imperfectam judicationem arguit, non noxam. 14. & 15.

Recidiva post curatas *Cortice* Perniciosas quandoque contingens, sed frequentius non contingens, ab oblatione *Corticis* non debet Medicum remorari. 173.

— Contingens post *Corticem* non satis diu usurpatum, priorem, vel similem Febrem de more iterum infert, non deteriore. 17.

Recidivæ periculum ex Fermento febrili tantum absorpto nec sensibilibus evacuato, æque imminet & aliis specificis ad alios morbos communiter adhibitis. 22. & 23.

Recidivæ depulsis ope *Corticis* Febribus succedentes, sæpe adeo leves, ut nulla prorsus egeant curatione. 15.

Recidivarum Febrium post assumptum *Corticem* oblectio diluitur. 4. & 5.

Recidivarum præcavendarum ratio. 15.

Recidivo eodem morbo, eadem quoque repetenda curatio. 15.

Remedia Vermes necare credita, aliud forsan præstant extra humanum Corpus, & aliud intra 334. 335. & 337.

Remedia pauca satis nota fere totam implent medicam supellectilem. 124.

Remediis incertis utuntur Medici, *Corticem*, qui certum præsidium affert, respicientes. 12.

Remediorum celebriorum abusus ad omnes indiscriminatim *Ægros* extreme periclitantes. 186.

Remediorum usurpandorum ratio desumi non debet ex eo, quod noxia illa non sint, sed ex eo, quod positive proficua censeantur. 348.

Remissio Accessionis expectanda, si fieri possit, cum *Cortex* offertur in extremo Perniciosarum periculo, ne cum dedecore, etsi citra culpam exhibeatur. 176.

Remittens simpliciter Febris quænam sit Auctori, 290. 301.

Remittens, ac quoquo modo Subintrans dici potest Proportionata quævis Continua; Sed nec omnis Subintrans, nec *Torti Therap. Spec.*

omnis Remittens potest dici Proportionata. 301.

Remittentes Febres omnes, & omnes Continuas Proportionatas *Mortonus* appellat *Continentes*. 297. Item. 301.

Remittentes omnes, sive omnes non Synochi, non sunt objectum actionis *Corticis*, ut vult *Mortonus*: immo nec plurimæ ex Proportionatis. 309.

Remittentibus, & Proportionatis omnibus curandis idoneam *Chinam Chinam* reputat *Mortonus*; sed plane Auctor non admittit. 301.

Remittentis simpliciter Febris descriptio, & productionis modus. 303. 304.

— Est quædam veluti Continens tantum spuria. 303.

— Motum cujusdam Incrementi, & Decrementi habet aliunde quam a Fermento Intermittentium. 303. 304.

Responsiones Jatro-apologeticas ad objecta, quæ contra hanc Therapeuticen edidit *Ramazzinus*, Tyronibus legendas commendat Auctor, quasi complementum sui Tractatus. 350.

RIVERIUS donat nomine *Insignis experimenti, quod silentio præterire sit nefas*, curationem Febris Malignæ Epidemicæ a se institutam repetita solum Venæ sectione, & purgatione. 170.

RESTAURANDI in eos, qui oblato *Cortice* Purgans postridie exhibent, acris censura. 59.

— Illius Responsio ad objectionem a Recidivis petitam. 5.

RESTAURANDUS, etsi acerrimus Humorista, *China China* usum doctrinæ *Hippocratis* consonum esse probat Tractatulo peculiari. 30.

— Idem non evacuationem, sed solum humorum alterationem quærit a *China China*. 30.

— Idem enervi licet methodo quarundam Perniciosarum curationem aliquam ope *Corticis* tradidit. 126. 127.

— Idem ut Humorista, dum purgationem aliquam in Febribus conatur admittere, illius omissionem experientia ductus potius commendat. 33.

Reviviscentiæ Principii depressi periculum. Vide, *Periculum reviviscentiæ*.



## S

**SACCHI** Sententia peculiaris de Caussis Febrium Intermittentium 37.

Salivam in masticatione, & digestionem primas tenere. 45.

— Ab aliis quoque succis in ventriculum, & intestina influis adjuvari. *Ibidem*.

Salium liquores componentium sola variatio texturæ potest eos modo infirmare, modo restituere. 27.

**SANCASSANUS** sponsor Operis inscribendi — *Magatus redivivus*. 125.

Sanguinis status quinam Vere, quinam Æstate, & Autumno. 78.

**SBARALEA** utilem se reperisse refert *Chinam Chinam* per Clysterem injectam. 358.

Scabies nonnullæ sunt liquidorum nostri Corporis Corruptrices, Depuratrices nonnullæ. 355.

**SCHELHAMERUS** a Ramazzino, & ab Auctore, mox & a Placentino circa rem Barometricam fuit impugnatus. 112.

Scholarum Humoristarum doctrinæ sunt innixa præcipua machinamenta contra *Corticem*. 14.

Scholia Auctoris ad Capitulum *Mortoni*. 124. ad 133.

Scholia Auctoris ad Tractatum *Mercati*, & ad singula illius Capitula. pag. 100. pag. 101. usque ad 106. pag. 108. usque ad 111. pag. 113. usque ad 116. pag. 117. pag. 120. ad 121. pag. 122.

Scopulus duplex, in quorum alterutrum facile est impingere, offerendo, vel omittendo *Cortice* in Subcontinuarum Malignantium principiis. 264.

Scriptores, qui recens advenientem Orbi nostro *Chinam Chinam* primo salutarunt, excusandi, & laudandi, si cauti fuere, vel nonnihil hæsitantes. 14.

Sectio Venæ ante usum *Corticis*. Vide, *Purgatio, & Vena sectio*.

Sectio Venæ sæpe, & Purgatio præsertim. Vide, *Purgatio præsertim*.

Senex nonagenarius, & ultra curatus *Cortice*. Et post biennium iterum. 253. ad 254.

— Simillimum quoque exemplum habet *Badus*. 256.

**SENNERTI** doctrina Febres Nothas describentis aptatur descriptioni, quam de Proportionatis Febribus habet Auctor. 307.

**SENNERTUS** vim Alchalicam Febrifugorum quorundam explicat ad depressionem Acidi Fermenti effervescentiam suscitantis. 19.

— In epilogum contraxit, quæ scripsit *Mercatus* de Tertiana Perniciosa. 99.

Sententiæ communiores plurium Recentiorum de Febrium Intermittentium Caussis. Vide, *Recentiorum*.

Similitudo graphice repræsentans discrepantiam inter solutionem Febrium spontaneam, & curationem illarum *Cortice* institutam. 174.

Solida ex Fluidis in prima humani foetus conformatione fuisse conflata. 44.

Solidorum motus in machina humani Corporis hydraulico-pneumatica primitus a liquido Fluidorum elatere, non a Solidis ipsis petendus. 41., & 42.

Solidorum Systema. Vide, *Systema Solidorum*.

Spiritus Vitrioli calidusne, an frigidus sit, ambigitur. 13.

**SPONII** Sententia circa Febrium Intermittentium Caussas. 36.

Subcontinua Malignans præsentibus omnibus quamproximæ Mortis indiciis per *Chinam Chinam* sanata. 219. 220.

— Si in suo principio censeatur cohibenda *Cortice*, blande tantum, nisi necessitas urgeat, & artificiosa valde distributione Remedii tractanda est. 272. 273.

Eadem in suo principio comitata symptomate valde gravi, analogo iis, quæ Comitatis Intermittentibus Perniciosis solent associari, statim *Cortice* curari debet. 272.

— Quo magis accedit ad naturam Perniciosarum Continuarum, eo fidentius vel in ipso principio tractanda est *Cortice*: Quo vero minus accedit, eo cautius, & temperantius. 272. 273.

— Omnes differentias Continuarum Proportionatarum potest sortiri. 143.

— Eadem cum Parotidibus *Cortice* feliciter curata. 220. Item. 246.

Subcontinua Febris celeriter ad Acutam vergens egre dignosci potest in principio, an Depurativa futura sit, an Corruptiva. 264.

Subcontinuae Febres frequentiores sunt Æstate, Autumno, ac Vere; Hyeme autem vere Continuae. 273.

— Quædam ex iis nonnunquam sunt, in quibus *Cortex* inutiliter exhibetur etiam in illarum principio. 276.

Sub-



Subcontinuae Febris Malignantis descriptio. 143.  
 Subcontinuae Perniciosae Diagnos, ortus, atque progressus. 143. ad 145.  
 — Quenam sint difficultates adversus *Corticem* in earum principio. 264. ad 266.  
 — Quenam adversus omissionem in earum pariter principio. 265. 266.  
 Subcontinuarum Februm Malignantium in suo progressu *China China* sanatarum Historiae prima num. xi. 319.  
   Alia num. xii. 220.  
   Alia num. xiii. 221.  
   Alia num. xiv. 221.  
   Alia num. xv. 222.  
   Alia num. xvi. 223.  
   Alia num. xvii. *Ibidem*.  
   Alia num. xviii. 224.  
   Alia num. xix. 225.  
   Alia num. xx. 226.  
 Subcontinuarum Malignantium in ipso principio *China China* feliciter curatarum, & infeliciter suppressarum Historiae. 279. usque ad 285.  
   Historia I. 279.  
   Historia II. 280.  
   Historia III. 281.  
   Historia IV. *Ibidem*.  
   Historia V. 282.  
   Historia VI. 282.  
   Historia VII. *Ibidem*.  
   Historia VIII. 383.  
 Animadversiones in hanc Historiam. 284.  
   Historia IX. 284.  
 Animadversio in hanc Historiam. 284.  
   Historia X. funesta. 284. 285.]  
 Subcontinuarum Perniciosarum curandarum methodus lentior. 163. 164.  
 Subcruenta Febris Perniciosa Intermittens describitur. 136.  
 Subcruentae Febris *China China* sanatae Historia prima num. v. 198.  
 — Ejusdem Subcruentae Historia altera num. vi. 199.  
 Subintrantis Febris descriptio 302. 303.  
 — Veræ Intermittentiae equiparanda est. *Ibidem*.  
 — Facile in Continuum Proportionatam migrat. *Ibidem*.  
 Substantia Corticis superstes infusioni, etsi non nihil exhausta, validior adhuc est ipsa percolata infusione. 63.  
 Substantiam simplicem Corticis præferendam esse Tincturis, extractis &c. testatur Morton, & Blegnyus. 65.  
 Succus nerveus est potius terminus, ad

quem progrediuntur quandoque Febres, quam terminus, a quo soleant incipere. 46.  
 Sulphur Scabiem depellit. 355.  
 Status Sanguinis quinam Vere, Æstate, & Autumno. 78.  
 SYDENHAM symptoma quoddam Febris Perniciosae gravissimum non ut morbum considerandum censuit; sed ut symptoma Febris Cortice simul cum Febre curandum. 127. 128.  
 — Idem Febribus Inflammatoriis Corticem non modo non prodesse, sed & obesse affirmat. 299. Item. 353.  
 — Medicamentorum commixtione cum China China damnat, excepto vehiculo necessario. 68.  
 — Oblationem Corticis in Subcontinuarum Acutarum principio videtur suadere. 275.  
 — Intermittentis cujusdam Perniciosae speciem aliquam exhibet *China China* sanabilem. 127.  
 — Illius cautela de non exhibendo solvente medicamento iis, qui Cortice curati sunt. 60.  
 — Evacuationes omnes damnat in curatione Intermittentium. 32. 33.  
 — Illius opinio de Causis Intermittentium. 36.  
 — Ejusdem Methodus ad diuturnas Intermittentes curandas quenam fuerit, priusquam vires Corticis satis nosset. 11.  
 SYLVII opinio circa Intermittentium Causas. 35.  
 — Ejusdem utilissimum Dogma. 303.  
 Symboleitas, vel uniformitas plurima Fermentorum &c. Vide. *Uniformitas plurima*.  
 Symptoma Perniciosum non differt a non Pernicioso nisi ratione majoris intensio- nis. 153.  
 — Perniciosum a non Pernicioso exemplis demonstratur. 140. 141.  
 Symptomata Februm, depulsis per Corticem Febribus, nullo indigent distincto Remedio. 71.  
 — Item. 121. & 122.  
 Symptomata Febris quanam. 292.  
 Symptomata Proportionata. Vide, *Proportionata, Symptomata*.  
 Symptomata Intermittens, si dari potest, Cortice curabilis non est censenda. 296.  
 Symptomatis Febribus nonnullis opitulatur Cortex. 295.



— Hujusce rei aliqua obiter recensentur exempla. 295.

Symptomatis perniciosi diagnosi a non pernicioso illustratur exemplo. 140.

Symptomatis lethalissimis omnibus comitata Febris *Cortice* curata, & notatu digna. num. v. 247.

Syncopalis Intermittentis Perniciosæ descriptio. 138.

Syncopalis Febris *China China* curatæ, Ægro licet in agone mortis ferme constituto, Historia unica. num. iv. 210.

Synochos permutatas in Remittentes, seu in Proportionatas, *Cortice* curandas censet *Morton*: non ita Auctor. 299.

Synochos veras nunquam sanabiles *Cortice* censuit *Morton*, quamvis eodem sanabiles dixerit Febres Continentes. 298.

Synochus nullam censet ullo pacto sanabilem *Morton*, nisi prius in Periodicam mutetur: Sic mutatam semper asserit curabilem *Cortice*: Neutrum facile admittit Auctor. 299.

Syrupus ex *China China*, præsertim pro Pueris, ex descriptione Auctoris. 64.

Systema Fluidorum. Vide, *Fluida in machina* &c.

Systema Solidorum in permultis laudatur. 44. 45.

Systema Solidorum plura pro certis supponat oportet, quæ talia forte non sunt. 42.

Systemati Fluidorum adhæret Auctor potius, quam Solidorum. 40.

— In utroque Systemate æque difficulter explicatur ratio Febrilis periodi. 40.

## T

**T**ALBOTII, & Asseclarum ejus Methodus in exhibenda *China China*. 62.

— Non plane laudatur, licet nec improbetur. 63.

— Illius præparatio non admodum efficax: & potius diuturno usu, quam ex se ipsa talis. 67.

Tertiana Perniciosa, & non Perniciosa differunt minus inter se ac differant Tertiana, & Quartana non perniciosæ. 153.

— Differunt enim solum ratione inæqualis intensiōis æqualium symptomatum. 153. 154.

— Ita & eorum Fermenta differunt for-

tasse solum majoris, & minoris intensiōis propriæ acrimoniæ, aut dyscrasiæ. *Ibid.*

*Thè, Chocolatæ, & Coffèe potus.* 12.

Theorema inconcussum in praxi est: *Corticem adversari Fermento Febrili*, quod Sanguini ab extrinseco, non illi quod eadem innascitur. 294.

Tincturæ, & Extracta *China China* jucundiora: sed certior effectus substantiæ illius. 63. 64.

TOZZI opinio de Causis Intermittentium. 36.

— Illius æquivocatio quædam levis circa nomenclaturam [*China China* Auctori dedit ansam felicitationis citra dissidium. 232.

— Asserit *Chinam Chinam* Epilepsia opem ferre. 330.

## V

**V**ALLESII expositio in Textum Hippocratis de Perniciosis Intermittentibus. 109. & 110.

VALLISNERIUS de INSECTIS plura scripsit, laude, & admiratione dignissima. 335.

— Dolorem Ventriculi periodice recurrentem *China China* sanatum refert. 330.

UBI, QUANDO, & QUOMODO sit adhibenda *China China*, sunt tria scitu necessaria in usu illius. 170.

Vegetabilia Febrifuga suffecta in locum *Corticis* sunt eodem imbecilliora. 3. 4.

Venæ Sectio. Vide, *Sectio Venæ*.

Venæ Sectione, & Purgatione ante *Corticis* oblationem si placeat uti, quomodo utendum, & quibus laxantibus utendum pro varia Febrium, Tempestatumque ratione 77. ad 80.

Venenatum, seu Perniciosum magis adhuc reddit Fermentum febrile varia dispositio *medii*, & *termini ad quem*. 148.

Veneni febrilis nomenclatura a *Mortono* usurpata examinatur, nec, nisi lis sit de voce, facile admittitur. 128. ad 130.

Ventriculi dolor. Vide, *Dolorem Ventriculi*.

Ventriculus & Intestina non excluduntur absolute ab hoc, quod præbeant vel sedem, vel semitam Fermento Febrili in Sanguinem ingressuro. 49.

Vermes amara non videntur necare. Vide, *Amara*.

Vermes. Vide, *Lumbrici*.

Ver-



**Verminosa Febris Periodica** *Cortice* potest tractari. Multo magis si verminosa affectio sit tantum comes, non Causa Febris. 295. 296.

**Vesicantia** certo dolorifica, incertum est, an proficua. 14.

**Vetula elumbis**, ac paralytica, assumptis tractu temporis libris duabus *China China*, iterum juvenescere visa est, referente *Morteno*. 333.

**Victus ratio** in Perniciosis *Cortice* curatis quænam. 166.

**Victus regimen** *China China* utentibus tale præscribendum, quale indicatur a morbo: nec enim aliud exigit Febrifugum ipsum. 66.

**VILLIS CHINAM CHINAM** neque Sanguinem figere, neque fundere putat, ut alia Febrifuga. 20.

**VILLESII** Sententia de Causis Intermittentium. 35.

**Vini usus** pro *Chinæ Chinæ* infusione, etsi non necessarius, non tamen noxius; immo utilis. 62.

**Vini usum** pro *China China* propinanda minime noxium esse testatur *Sydenham*. *Ibidem*.

**Vinum**, & ab eo prodeuntes liquores, præcipue vero illius Spiritus, experientia videntur specialiter adversari Lumbricis saltem Terrestribus, & Vitulinis. 336. 337.

**Vipera** controversum est, an calefaciat, vel refrigeret. 12.

**Virtus** *China China* in omni sexu, ætate, temperamento, ac climate semper æqualis. 14.

**Virtus Corticis**. Vide, *Corticis Virtus*.

**Virtutem Corticis**. Vide, *China China virtutem*.

**Virtutes plurimas** præter Febrifugam, *Cortici* a multis tributas, suspectas habet Auctor. 331. 332.

**Vis Corticis**. Vide, *Corticis vis*.

**Viscerum læsionibus** organicis associatæ Febres, siue Perniciosæ sint, siue non, *Corticis* medelam respuunt. 177.

**Uniformitas plurima**, seu symboleitas Fermentorum Perniciosas, & non Perniciosas Intermittentes producentium ostenditur. 153.

**Urina** post Corticem assumptum semper sensibiliter augetur, & in meliorem statim aperte mutatur. 59.

**Usus Corticis** exuberans quandoque fœdus societatis init cum Febribus etiam cæteroqui benignioribus, sed refractariis. 165.

**Usus Corticis**. Vide, *Corticis usus*.

**Usus Peruviani Corticis**. Vide, *Peruviani Corticis usus*.

**Usus Matheseos**. Vide, *Matheseos usus*.

**Utero gerentibus**. Vide, *Gravidis*.

## Z

**ZODIACO MEDICO-GALLICO** inserta sparsim Opuscula quædam de *China China usu*, Nigrifolus conjunctim recudit. 8.

— Variæ *China China* præparationes ex eodem Zodiaco. 67.

— Opiata *China China* elegans ex eodem. 67.

## F I N I S .



[illegible]

336. 337. 338. 339. 340. 341. 342. 343. 344. 345. 346. 347. 348. 349. 350. 351. 352. 353. 354. 355. 356. 357. 358. 359. 360. 361. 362. 363. 364. 365. 366. 367. 368. 369. 370. 371. 372. 373. 374. 375. 376. 377. 378. 379. 380. 381. 382. 383. 384. 385. 386. 387. 388. 389. 390. 391. 392. 393. 394. 395. 396. 397. 398. 399. 400. 401. 402. 403. 404. 405. 406. 407. 408. 409. 410. 411. 412. 413. 414. 415. 416. 417. 418. 419. 420. 421. 422. 423. 424. 425. 426. 427. 428. 429. 430. 431. 432. 433. 434. 435. 436. 437. 438. 439. 440. 441. 442. 443. 444. 445. 446. 447. 448. 449. 450. 451. 452. 453. 454. 455. 456. 457. 458. 459. 460. 461. 462. 463. 464. 465. 466. 467. 468. 469. 470. 471. 472. 473. 474. 475. 476. 477. 478. 479. 480. 481. 482. 483. 484. 485. 486. 487. 488. 489. 490. 491. 492. 493. 494. 495. 496. 497. 498. 499. 500. 501. 502. 503. 504. 505. 506. 507. 508. 509. 510. 511. 512. 513. 514. 515. 516. 517. 518. 519. 520. 521. 522. 523. 524. 525. 526. 527. 528. 529. 530. 531. 532. 533. 534. 535. 536. 537. 538. 539. 540. 541. 542. 543. 544. 545. 546. 547. 548. 549. 550. 551. 552. 553. 554. 555. 556. 557. 558. 559. 560. 561. 562. 563. 564. 565. 566. 567. 568. 569. 570. 571. 572. 573. 574. 575. 576. 577. 578. 579. 580. 581. 582. 583. 584. 585. 586. 587. 588. 589. 590. 591. 592. 593. 594. 595. 596. 597. 598. 599. 600. 601. 602. 603. 604. 605. 606. 607. 608. 609. 610. 611. 612. 613. 614. 615. 616. 617. 618. 619. 620. 621. 622. 623. 624. 625. 626. 627. 628. 629. 630. 631. 632. 633. 634. 635. 636. 637. 638. 639. 640. 641. 642. 643. 644. 645. 646. 647. 648. 649. 650. 651. 652. 653. 654. 655. 656. 657. 658. 659. 660. 661. 662. 663. 664. 665. 666. 667. 668. 669. 670. 671. 672. 673. 674. 675. 676. 677. 678. 679. 680. 681. 682. 683. 684. 685. 686. 687. 688. 689. 690. 691. 692. 693. 694. 695. 696. 697. 698. 699. 700. 701. 702. 703. 704. 705. 706. 707. 708. 709. 710. 711. 712. 713. 714. 715. 716. 717. 718. 719. 720. 721. 722. 723. 724. 725. 726. 727. 728. 729. 730. 731. 732. 733. 734. 735. 736. 737. 738. 739. 740. 741. 742. 743. 744. 745. 746. 747. 748. 749. 750. 751. 752. 753. 754. 755. 756. 757. 758. 759. 760. 761. 762. 763. 764. 765. 766. 767. 768. 769. 770. 771. 772. 773. 774. 775. 776. 777. 778. 779. 780. 781. 782. 783. 784. 785. 786. 787. 788. 789. 790. 791. 792. 793. 794. 795. 796. 797. 798. 799. 800. 801. 802. 803. 804. 805. 806. 807. 808. 809. 810. 811. 812. 813. 814. 815. 816. 817. 818. 819. 820. 821. 822. 823. 824. 825. 826. 827. 828. 829. 830. 831. 832. 833. 834. 835. 836. 837. 838. 839. 840. 841. 842. 843. 844. 845. 846. 847. 848. 849. 850. 851. 852. 853. 854. 855. 856. 857. 858. 859. 860. 861. 862. 863. 864. 865. 866. 867. 868. 869. 870. 871. 872. 873. 874. 875. 876. 877. 878. 879. 880. 881. 882. 883. 884. 885. 886. 887. 888. 889. 890. 891. 892. 893. 894. 895. 896. 897. 898. 899. 900. 901. 902. 903. 904. 905. 906. 907. 908. 909. 910. 911. 912. 913. 914. 915. 916. 917. 918. 919. 920. 921. 922. 923. 924. 925. 926. 927. 928. 929. 930. 931. 932. 933. 934. 935. 936. 937. 938. 939. 940. 941. 942. 943. 944. 945. 946. 947. 948. 949. 950. 951. 952. 953. 954. 955. 956. 957. 958. 959. 960. 961. 962. 963. 964. 965. 966. 967. 968. 969. 970. 971. 972. 973. 974. 975. 976. 977. 978. 979. 980. 981. 982. 983. 984. 985. 986. 987. 988. 989. 990. 991. 992. 993. 994. 995. 996. 997. 998. 999. 1000.

2 1 1 1 1

1892. April 1. 1892



AD CRITICAM  
DISSERTATIONEM

DE ABUSU  
CHINÆ CHINÆ

Mutinenfibus Medicis perperam objecto

*A CLARISSIMO QUONDAM VIRO*

BERNARDINO RAMAZZINO

In Patavina Universitate Practicæ Medicinæ  
Professore Primario

RESPONSIONES  
JATRO-APOLOGETICÆ  
FRANCISCI TORTI

Medici Mutinensis.



VENETIIS,  
APUD LAURENTIUM BASILIUM.

---

ANNO MDCCXXII.  
*SUPERIORUM PERMISSU, AC PRIVILEGIO.*



AD CRATICAM  
DISSERTATIONEM

DE ARBORIBUS  
CHINE

Mentibus Medicis perperam obsequio

A CLASSICO GIGLIOLANO

BERNARDINO RAMAZZINO

In Præsentia Universitatis Præfatus Med. can. c.  
Professore Primario

RESPONSIONES  
IATRO-APOLOGETICÆ  
FRANCISCI TORTI

Medici Medicæ



VENERABILIS

ABUOLIAUATUM BATHUM

ANNO MDCCXXII

SUPERIORUM REVISITIS, AD PRINCEPS



ALMO, INCLYTOQUE  
CLARISSIMORUM, ET DOCTISSIMORUM  
MUTINENSIIUM  
MEDICORUM  
COLLEGIO  
FRANCISCUS TORTUS

S. P.



*UAS ad Criticam Viri Clarissimi Ramazzini quon-  
dam nostri Dissertationem, De Abusu Chinæ Chi-  
næ, intuemini Responsiones meas, COLLEGÆ DOCTISSIMI, hesi  
aliquandiu anceps an scriberem: hesi diutius, postquam conscripseram,  
magis anceps an promulgarem. Re tandem apud memetipsum seriò  
perpensa, ad tria potissimè illas me adornasse novi; ad tutelam  
nempe meam, ad decus Vestrum, ad bonum Reipublicæ. Ex his quod  
meum est, Viri defuncti Manibus litandum facile credidi: non ita fa-  
cile, quod Vestrum, quod Publicum. Equidem quicquid in Scri-  
ptis legitur extincti Professoris, quod Dignitati Vestre minùs con-  
veniat,*



veniat, communive officiat utilitati; id omne ex infelici quodam mei calami Fato, velut ex malo fonte, tum Vobis, tum quibuscunque illud detrimento fuerit, dimanasse, persuasum est mihi: mea etenim si quondam de hac materia siluisset Minerva rudis, & citra venustatem veridica; nullus dubito, quin & Clarissimi Opponentis siluisset affabrè compta, & Censoria simul Majestate gravis: nec alio fortasse nomine Vos, imò Nos conjunctim omnes, immeritò quidem, criminatus est, nisi ut me unum, quasi ceteros seducentem, perstringeret, qui me unum seorsum perstringere quodammodo veritus est, Criticus Auctor. Idem propterea, qui, prima spectata mali scaturigine, Vobis aequè, ac publicæ Rei quadantenus obfuit, dum prodesse credit, calamus meus; damna præter intentionem illata æquum est ut rependat: siquidem judicio Vestro acri, & limato id congruum censeatur. His de causis Scripta hæc mea, qualiacunque ea sint, in manibus tandem Vestris posita volui, Vestro subjecta examini, Vestroque planè arbitrio relicta; ut sortem quamcunque illis destinarint Fata, nanciscantur à Vobis; lucem quoque publicam Vestris primùm ex placitis receptura, si Literatorum, Ingenuorumque conspectu haud prorsus indigna reputaveritis; sin minùs, nativis in tenebris latere contenta, nec vitam habitura, nec nomen. Quod si ea, faustis fortè sideribus obstricantibus orta, Vestro humaniter probentur calculo; nil posthac illis metuendum credam ab Aristarchis, aut Momis, postquam inter res Vestras Profanis intemerandas fuerit cooptata, nec ad me ampliùs, sed ad Vos tantùm, qui auctoritate non minùs præpolletis, quàm robore, ipsorum defensio pertineat. Si verò ex adverso tennes hi conatus mei, sive ut oneri suscepto impares, sive ut Opusculum levidense nimis, sint Vobis despectui; accepta saltem sit, precor, hæc ipsa mea grati animi erga Vos, erga Patriam studiosa propensio. Valete ad annos Nestoreos, VIRI DOCTISSIMI, per quos jugiter bene valet Civitas nostra.

Dabam ex Museolo meo Idibus Octobris MDCCXV.



# A P P R O B A T I O

## ALMI COLLEGII D.D. MEDICORUM

### CIVITATIS MUTINÆ.

**R** Esponsiones Jatro-apologeticas a Viro Clarissimo D. FRANCISCO de TORTIS, SERENISSIMI DUCIS Medico, & Almi Collegii D.D. Medicorum Mutinæ Priore, cum ad Patriæ decus, tum ad publicam utilitatem conscriptas, atque ob id etiam universo eorundem D.D. Medicorum Collegio, cui eas humaniter obtulit, quàm maximè acceptas, luce statim publica (cæteris, ad quos id pertinet, annuentibus) ipsius Collegii expensis esse donandas, omnes ejusdem Almi Collegii Doctores unanimiter decreverunt.

Hac die 18. Octobris 1715.

*Joannes Maninus Inclyti Collegii D.D. Medicorum Mutinæ Cancellarius de Mandato.*



APPARATUS  
ALMI COLLEGI D.D. MEDICORUM  
CIVITATIS MUTINÆ.

**I**N hujus Divini Remedii laudes non effundar, cum se ipsum  
fatis commendet.

*Ramazzin. de China China verba faciens Orat. 3.*

*7atr. argum. pag. 103. Edit.*

*Patav. 1708.*

**I**dem hæc non acrius accusavit in Senectute, quàm antea de-  
fensitaverat. Quamvis igitur fuerit acutus,  
ut fuit: tamen inconstantia  
levatur auctoritas.

*Cicero de Antiocho Philosopho sermonem habens  
in Lib. Acad. Quest. qui inscri-  
bitur, Lucullus.*



# PROLUSIO AD DISCEPTATIONEM UNIVERSAM.

## ET

### Scribendi Occasio.



**V**ix sub extremos Octobris dies anni proximè elapsi 1714. ad captanda bidui spatio, ne completi quidem, ruris otia secesseram, cùm mihi fortè ab Amico favente communicatæ, in manus incidere Constitutiones Epidemicæ Mutinenses Clarissimi quondam Viri D. Bernardini Ramazzini, mense Julio ipsiusmet anni Patavii recusæ, addita ad calcem nova Dissertatione Epistolari ejusdem Auctoris *De Abusu Chinæ Chinæ Ad D. Bartholomæum Ramazzini Nepotem suum Mutinæ Medicinam facientem*. Constitutiones ipsas sicco, ut fatear, pede prætergressus, ut qui primam earum editionem aliàs lustraveram, in Dissertationem tantùm adjectam curiosos oculos statim conjeci ea spe, ut argumentum nec parvi ponderis, nec modicæ utilitatis, quod pridem & ipse in Therapeutice mea Speciali enucleandum assumpseram, rursus a Viro Cl. majori saltem venustate, majoriq; eruditione absolutum intuerer. Sed meam profectò non parùm fefellit expectationem eventus; non enim Chinæ Chinæ abusum tantummodo jure, ac meritò reprehensibilem, in ea Lucubratione damnatum legi (cujusmodi vitium, nedum obiter pluribus in locis Operis mei, sed ex professo per integra Libri Capita, indicatis singillatim cunctis erroribus & ipse perstrinxi) verùm etiam invisò abusus nomine usum ipsum rationalem, atque methodicum, non sine plurima quidem admiratione, haud rarò notatum vidi, vanisque potius, si fas est dicere, terribilamentis, quàm rationibus, sincerisve experimentis, a Viro cæteroqui doctissimo tentatum ubique, acriterque persæpe etiam rejectum.

Præconceptam adhuc admirationem id

magis adauxit, quòd Vir Clarissimus istiusmodi abusus crimen, de quo potiori forsitan jure plurimas alias Regiones culpæ poterat, Mutinensi duntaxat Urbi, quam diu coluit loco Patriæ, fidenter objecerit; & quidem fide nixus unius tantùm præoccupati Relatoris, huic Remedio tunc temporis plus quàm par fuisset infensi, dolens usque adeò scandalum hoc, atque perinde ingemiscens, ac si de immani Civium omnium ageretur excidio. Hac idcirco, utinam non affectata, sollicitudine percitus, totum ferè Mutinensium Medicorum cœtum vehementer impetens, ac de enormi Chinæ Chinæ abusu usque ad quotidianam Ægrorum internecionem Paragrapho 48. suæ Dissertationis insimulans, spreta quasi ut pusilla, vel ut imbelli hac multitudine, minime veritus est *in cavernam* ut ajunt, *formicarum inspuere*: cum alioqui multos caveat sit necesse, qui singulos non metuit. Nihil tamen ex his, fateor, tanti penes me valuit, ut proinde præcitem illico manum calamo admoverem: neque enim mea tunc interesse credidi. Medicos omnes contrerraneos ab opposito crimine vindicare, multòque minùs refellere quemlibet de Peruviano Febrifugo malè sentientem, quantumvis immeritò. Præterquam enim quòd nimis operosum hoc foret, tanta insuper mei ipsius me non tenet fiducia, ut alios, qui sui planè sunt juris, placitis meis acquiescentes audacter velim, aut a propriis dimovere arroganter contendam.

Id unum præ cæteris nequivi aut satis mirari, aut tacitus præterire, Cl. nempe Virum, quem paulò ante in Therapeutice mea non amplius, ut olim in Constitutionibus suis Epidemicis, Chinæ Chinæ parum propitium, sed mutata sententia maximum hujusce Remedii Patronum, imò



imò & argumenti mei Fautorem asserui pag. 314. ad pag. usque 316., ab hoc ipso asserto, palam, & publicè a me ibidem promulgato, adeò discrepasse in hac nupera Dissertatione, ut non modò quicquid Peruviano Cortici adversum in iisdem Constitutionibus protulit, in hac Dissertatione confirmarit, verum etiam hanc, illis recens recusus velut quid planè cohærens annexam, ulteriori contra hoc Remedium, meamque Praxim sinistrè detortam asperferit acrimonia. Quæ sanè omnia apud Lectores Operis mei, quibus fortè minimè visæ sint Viri Cl. Lucubrationes, liberalem Chinæ Chinæ usum adusque sidera efferentes, me jam vel inconsultæ levitatis incusant, si mentem illius haud satis attigisse dicar, vel aperti mendacii, si de industria credar contemerasse.

Turpes hæc notas haud leviter perhorrescenti cum se mihi obtulisset illud Boetii *De Consol. Phil.*, eos nempe, qui *crimen aliquod affixum ferunt, videri meruisse, quæ perferunt*, ne silentio meo propriæ simul existimationi viderer deesse, & publicæ, quæ magis cordi esse debet, utilitati, rem totam in propatulo ponere evestigio decreveram, quippe de Cl. Viri scriptis æquè ac de meis, nec non de quocumque controversæ praxeos usu intimè conscius, ut versatilem, sed malè tornatam illius, modò *Palliati*, modò *Togati* opinionem, incudi quoque meæ paulisper redderem. Qui itaque gregarium quemlibet, Sciolumque contra scribentem, vel sibimet adversantem nequaquam fuisset moratus, nec unquam morabor, a censura nihilominus Famigerati Scriptoris, sua simul & mea in detrimentum Reipublicæ infirmare molientis, haud modice, ut par erat, timendum duxi; ne scilicet ii saltem terrerentur, quibus Causæ integræ momenta minimè perspecta essent, neve beneficium, quod Praxi Medicæ deferre fueram conatus, in suspicionem intentati maleficii veniret. In id autem tria potissimum assumpseram demonstranda; *Primò* nempe, Virum Clarissimum sicuti in enunciatis Constitutionibus suis parum amicè sensit de Cortice Peruviano, ut videre est in Constitutione anni 1690. num. 15. & num. 47., & in Constitutione unica trium annorum 1692. 93. 94. num. 32., & num. 56. (siquidem in Constitutione anni 1691. illum commendaverat num. 34. & num. 37.) ita postmodum constanter per annos tredecim subsequen-

tes, nempe ab anno 1700. usque ad 1712. inclusivè, quo tempore meum Tractatum edidi, mirificè non solum, sed & magnificè sensisse de eodem Febrifugo, solemniterque pluries, ac pluries scripsisse oppositum, ac scripserit tam in illis Constitutionibus, quàm in nupera Dissertatione; ipsum videlicet Corticem, ejus usum, & repetitum, & liberalem, ejusque vim super omnia, quæ hætenus innotuerint, Febrifuga eximiam, miris laudibus absque ulla limitatione deprædicando, & connumerando inter potiora, humanoque generi magis proficua divinæ munificentiae dona: *Secundò*, Virum eundem in hac sua Dissertatione, ubi iterum labitur in priorem, imò & pejorem sententiam, in hoc probabiliter aberrare, quòd nonnullis in rebus verè rationabilibus, & bonæ praxi consonis, in quibus non sinè lepore quodam affectat ostentare semetipsum a me non modicè discrepantem, tantum abest ut verè discrepet, quin potius illa eadem volens nolens repetat, confusè licet, quæ ipse ordinatim, ac per extensum in Opere meo prius exaraveram: quod sanè a me non parvi faciendum, ob spectabilem cæteroqui Viri Famigeratissimi auctoritatem, ubi ea mecum vel invita coincidat. *Tertiò* tandem, eundem Scriptorem, ubi revera dissentit a me, non modò hallucinari per plurimum, & a meliore praxi deflectere, sed & æquè dissentire a se ipso suisque publicis assertionibus, imò (tribuat id quivis ætati, impeditæque valetudini, libenter annuam) ab ipsa sæpius Facti veritate. Id elucescit quàm maxime, ubi adductis in medium peculiaribus casibus Denatorum, qui Viro Cl. mihi socio, quandiu ægrotaverunt, curæ meæ fuere commissi, Chinam Chinam, quam ne per somnium quidem iisdem præscripsi, si non apertè obitus illorum Ream, enervem saltem, atque frustraneam conatur ostendere ad sanandas Perniciosas eorum Febres quas olim pro præcipuo meæ Therapeutices argumento selegi, & pro objecto activitatis Chinæ Chinæ, adversus eas in summis etiam angustiis lethalibusque circumstantiis eximiae.

Jamque manum Operi cœperam admove, crebrisque memoratæ Lucubrationis marginem universum consperferam notis, ut iisdem postmodum ordinatè digestis uterer ad concinnandam longiusculam Dissertationem: cum ecce nil tale expectanti delatum est mihi nuncium infausum de Obi.



de Obitu Viri Cl., repentino (quod verè dolendum) fato sublato Nonis Novembris ejusdem anni 1714., dum octogesimum primum ageret, felici etiamnum pollens mentis acumine, ætatis annum. Casus profectò iste planè inopinatus ab incæpto opere calamum statim retraxit, ne scilicet Viri Celebris, mihiq; aliàs amicissimi Manibus, cineribusve adhuc tepentibus infensus viderer, quasi cum Protogene mortuo bella gerere fatagerem aut Leoni exanimi barbam vellere: cum ea præsertim in hujuscemodi contentionibus, ubi nonnihil asperè lacessitus quis fuerit, difficillima sit temperantia, quæ omnem excludat acerbitem; *quid enim est, aiebat Tullius, quod contra vim, sine vi fieri possit?* Seposito itaque consilio Dissertationem animo jam conceptam condendi, & cuncta, quæ sparsim annotaveram, ita contextendi, ut Auctorem salibus, diæteriisque ditissimum ubicunque me confricasset, vicissim refricando, servata semper utriusque dignitate, pro ingenii viribus retaliarem (si namque illi Machæra aderat, nec mihi deerat Veruina domi) decentius, ac laudabilius duxi, ipsas tantummodo Animadversiones, seu Responsiones meas, non quidem nudas, quales a primordio mihi excidere, sed eousque tantum adauctas, quoad fert mera, & inculpabilis defensio mea, insimul consarcinare, eodem planè retento contrariæ Dissertationis ordine, quæ me certè præ aliis Urbis hujus Medicis, etiam (si fas est dicere) nonnihil intemperanter, vellicat.

Hanc quoque nihilominus operam, extincto Antagonista, multò magis ac antea facilè dimissem, si de una mea ipsius tutela actum fuisset, præsertim ne viderer partæ in re medica, & in cultiori Philologia Viri Cl. gloriæ invidere. At (quæ & ab initio potissimè ad scribendum me impulit causa) cum de totius agatur negotio Reipublicæ, cujus vitæ, aut incolumitati necesse est modò, ut alterutrius nostrum noceat sententia, hanc idcirco Provinciam minimè deferendam censui; imò potius eidem aperiendum esse Reipublicæ, quam ex parte lateat error, & quam veritas: id quod, omni semoto vilis ultionis, aut turpis cujuslibet æmulationis affectu, mihi planè licere crediderim. Et sanè quidni liceat, cum idipsum religiosissimi doceant morum Censores? quostamen hîc immiscere minùs opportunum putassem, nisi priùs Cl. Aucto-

ri longè levior de causa (ut scilicet vanum quemdam Seculi morem piè sugillaret) placuisset uti auctoritate Sanctorum Patrum §. 49. suæ Dissertationis. Unam igitur inter tot, quæ prostant, huc libet transferre D. Basilii sententiam, nedum permittentis, sed & expressè moventis, ad criminationes hujusmodi (sunt hæc illius verba) *racendum non esse, non ut contradicendo nos ulciscamur, sed ne mendacio inoffensum progressum permittamus*: quod quidem hîc maximè videtur cavendum, ubi fallacia dogmatis, auctoritates vel nullius ponderis, vel mutilæ, minùsve sinceræ, & apocryphæ tandem narrationes (omnia namque singillatim ostenduntur talia) damnosam facilè praxim valerent in Artem inducere. Quæ cum ita se habeant, ut in progressu poterit sensim dignoscere quilibet etiam in re medica nequaquam versatus, ipsius potius indigentiam rei, quàm vota mea me expleturum dicam, si positis in mutuum conspectum rationibus a nostrum quolibet hinc indè deductis, Opus tandem meum defendere mihi haud difficulter obtingat, nebulasque omnes perfectè discutere, quæ eidem Operi, siue directè, siue indirectè, offundere visus est Cl. Auctor. Vindicato autem a velitationibus, imò & cavillationibus Viri Celebris Tractatu meo, minutiori postmodum obstrepentium, aut objurgantium plebeculæ, de quâ sanè minùs laboro, quàm de Ranis palustribus, videbor mihi quodammodo fauces præclusisse. Sic & publicam utilitatem, & rem meam, & Collegarum tandem meorum, imò Patriæ totius dignitatem unà tuebor. Nec proinde mihi tam justa causa compulsio, neque lædere quemquam, sed respondere meditati, severior quispiam Judex audeat obtrudere,

*Nullum cum victis certamen, & adherere cassis*

unquam probari. Occurram namque verbis Erasmi, & potiori quidem jure, ac pro sua Causa occurrerit olim, aut decertarit Erasmus ipse Apologia ad Libros prædefuncti Alberti Pii quondam Carpenis Principis, quæ sic habent, *Vehementer invidiosum habetur scribere in mortuos, & ut ajunt, cum Larvis Luctari. Sed quid facias, si in se scribant mortui, & impingant apud totius Orbis Tribunal, ad quæ connivere non decet? Valeat proverbium, Non esse luctandum cum Larvis, nisi contra proverbium mordent mortui. Fugit Apis; sed*



*sed in vulnere reliquit aculeum . Non est, quem referiam; sed est, cui medear . Est, cui medear, inquam: patriæ quippe Academiae dignitas læsa ( ut singula recolligam ) vulnerata commentitiis saltem in historiis veritas, & periclitans ob panicum terrorem incussum tot Ægrotantium salus, medelam profecto nullis dissimulandam officiis expostulant.*

Priusquam tamen pensum hocce peragere aggrediar, Febrifugique infantis æque ac benefici partes suscipiam, a proposito minime alienum putarim, generalem quandam æquivocationem, in scriptis Viri Cl. passim obviam, de medio tollere; qua nimirum detentus ille, conatus suos vel minimè ad rem, vel prorsus inaniter exerit, Securim, ut est in adagiis, adhibens ad referendas fores, & Clavem ad findenda ligna. Ejusmodi autem fallacia nullo statim negotio submovebitur, ubi quis animadvertat, Remedia medica duplici respectu posse pro noxiis, aut saltem pro suspectis haberi, nempe, vel ratione sui, vel ratione inopportune administrationis, sive deinde hæc referatur ad morbum, sive ad tempus, quorum alterutri remedium non congruat, sive ad utrumque. Priori modo suspectus, aut noxius esse poterit usus exempli gratia Medicamentorum Purgantium, præsertim validiorum, ob solam videlicet acriorem, & irritantem eorum substantiam ex se nocendi capacem. Altero autem modo, scilicet ratione intempestivæ administrationis, non solum Purgantia, Narcotica, aliaque plura, quæ utramque certè exceptionem patiuntur, sed præterea quotquot sunt in Medicina remedia, quotquot in Mundo alimenta, possunt obesse. Atque hoc nomine minimè negaverim, ut pluries fassus sum in Opere meo, suspectum nonnunquam dici posse usum Peruviani Corticis, quantumvis ille cæteroqui sit revera Remedium supra omnia Pharmaca, tum mitissimum, & suapte natura prorsus innoxium ( quippe quod sine humorum perturbatione, spirituumve irritamento, aut dissipatione, suum munus absolvit ) tum etiam efficacissimum in eo præstando effectui, cui illud præordinavit, cum condidit, Divina Bonitas, scilicet in sistendis, atque delendis Febribus illis, ad quas extenditur ejus activitas. Adeoque si vis huic Febrifugo ingenta, efficax, & ex se nunquam inanis, transferatur ob nimiam Medici con-

fidentiam, aut imperitiam, ad alios usus extra illius ditionem sitos, vel etiam ad ordinarios quidem, sed quorum non sit rationabilis opportunitas, eo certè casu, vel inutile illud evadet, vel fortè noxium; non quidem ratione sui, sed ratione administrationis minùs castigatæ; si videlicet, vel in Febre, quæ suapte natura ipsius Corticis medelam respuat, usurpetur, vel in ea, quam forte suppressere sit nefas, utpote *depuratricem* Fluidorum, & *cujusdam quasi lixivii loco* ( ut in eodem Opere meo locutus sum pag. 74. , & alibi ) *sordes sanguinis verè abluentem*, vel denique in ea, quæ ex una parte nondum debitam maturitatem acquisivit, & ex alia nullum portendit periculum, vi cujus ad suppressionem, aut extinctionem illius statim, ac præmature sit deveniendum. Hæc profecto Medicis incautis nonnunquam haud satis perspecta, nonnunquam etiam ante præcipitem Corticis oblationem neglecta, vertuntur postmodum ab iis ipsis post oblationem, vel irritam, vel minùs felicem, in crimen, & contumeliam illius, quantumvis infantis, eosque sero *pœnitet hujusmodi remedio usos fuisse*, cum potius deberet pœnitere, se illo perperam fuisse usos.

Contra nonnullis, æqua licèt hallucinatione detentis, fors identidem favet opposita. Hi namque Febres, nedum Intermittentes, sed & Continuarum naturam non parum redolentes, imò & quantenus vere præseferentes, quovis etiam earum tempore, fortuita Corticis oblatione nonnunquam feliciter curant ( quod non rarò quidem, sed non perpetuò contingere debere sum conscius ) absque ullo etiam subsequente Ægrotantium detrimento: quo fit persæpe, ut ab iis nimium gloriosa, adeoque vana Indo huic Antipyretico texantur elogia; Illud videlicet indiscriminatim posse ad Febres omnes, tam Continuas, quàm Intermittentes, quocumque etiam earum tempore supprimendas, & cum eventus certitudine, & impunè penitus usurpari. Has ob causas Scriptores quamplurimi, haud satis, ut reor, remedium experti, in Classes abeunt oppositas, quarum una uni vitio adhæret, & altera alteri; pauci etenim vere sunt, qui medium teneant iter tutissimum, paucis videlicet prælucente, quod Regiam præmonstret viam, claro lumine veritatis, aut constantis experi-



perimenti. Nimirum & in hac Gymnade cæteroqui satis frequenti,

*Plures Thyrsiferos, paucos est cernere Bacchos.*

Cum verò in praxi frequentissima occurrat, vel saltem videatur occurrere, administrandi hujusce Febrifugi occasio, frequenter quoque contingat facillimum est, vel quòd usus in abusum transeat penes audaciores, vel quòd abusus metu, a recto etiam usu quis meticulosus abstineat, ut de Phlebotomia, aliisque præsiidiis in peculiaribus quotidie casibus videmus accidere.

Absit ideo, ut ausim quemquam refellere, qui huic farinæ suum inesse furfurem asseveret, ut in vastissima materia medica cuique farinæ suus inest, sive de Remediis Pharmaceuticis, sive de Chirurgicis sit sermo; quibus equidem omnibus usus rationalis pretium comparat, irrationalis adimit. Hac ego potissimum de causa hanc eandem farinam, repetitis non semel laboribus pluries, ac pluries excusam, in Therapeutice mea jamdudum traxi. Secrevi quippe, qualis Pistorum mos est (siquidem per similia hujuscemodi liceat prolixius rem declarare) pluribus veluti distinctis, sæpiusque pertentatis Incerniculis, tum crassiorem, tum tenuiorem furfurem, quoadusque purissimum, & plane impermistum illum collegerim pollinem, unde non rubidus, aut secundarius panis,

*Sed tener, & niveus, mollique siligine factus* in escam venire potis est quam maxime vitalem, quæ nempe vel prope morituris auxilio sit præsentaneo. Hæc quidem omnia membratim, ac per gradus me præstitisse reor, materiam universam partitis vicibus minutissimè perscrutatus, cum primo statim loco Febres *Continentes* omnes, quotquot sunt, tam *Solitarias*, quàm *Comitatas*, tam *Essentiales*, quàm *Symptomaticas*, turmatim a ditione Corticis ablegavi, remanente, pro suscipienda illius actione, confertissimo agmine *Vulgarium omnium*, seu *Benigniorum Intermittentium*, quibus tamen nulla fomentum præbeat Viscerum, aut Solidi cujusquam labes. Id ipsum diligentius adhuc peragere mihi sum visus, cum nonnullas iterum Febres, tum *Periodicas*, tum *Periodicis* similes, sed suapte natura verè *Continuas*, videlicet vel simpliciter *Remittentes*, vel etiam *Proportionatas*, sæpe a proficua hujusce remedii administratione sejunxi, retentis iis *Periodicis* simul, &

*Torti Respons. ad Ramazz.*

*Continuis Febribus*, quæ contra suapte genio verè *Intermittentes*, sed fortuitam quandam continuitatem nactæ, cujusmodi sunt *Subintrantes* omnes, usu pariter Peruviani Corticis prudenter adhibiti haud difficulter fugantur, non amplius redituræ. Ultimam denique manum materiæ incernendæ, Cribro quodam peculiari, & Medicis hætenus ferme omnibus intentato, me imposuisse persuasum habeo, cum Februm earundem *Intermittentium* quidem, saltem *ab ortu*, sed nihilominus quammaximè *Perniciosarum*, curationem indigitaui, eodem Febrifugo, certa quadam, & speciali regula ministrato feliciter absolvendam, non modò tunc cum Febres illæ, moris cæteroqui maximè subdoli, atque maligni, tempestivè possunt dignosci, verùm etiam non rarò postquam curantes Medicos decipere, Ægrumque ad id rede gere, ut jam totus algens, pulsusque præditus ferme nullo, ac non amplius perceptibili, Nyctemerino tantum spatio distet a morte, nempe a futuro Paroxysmo, citra dubitationis aleam lethali.

Hic sanè hujusce Farinæ purus putus Flos est. Portionibus cæteris, utut summe utilibus, nonnihil tamen tenuissimè saltem Furfuris inesse nequaquam negaverim, idest, ut apertè loquar, non negaverim, locum fortè quempiam Superstitiosis quibusdam etiamnum in illis relinqui ad scrupulositates, ineptias, atque sophismata pertinaciter obtrudenda, ut mercem hanc utilissimam reddant in dies abjectiorem. Atque his, palato meliora etiam nauseante instructis, liberum sit expuere quod non arridet, meque habebunt minimè repugnantem, qualem in Opere meo apertis notis memetipsum spondi. Minimè verò metalem polliceor, ubi agitur de purissimo, mundissimoque hoc polline, quem postrema diligentia excussum secrevi, & cui ædepol nihil est, quod vel a dicacioribus queat opponi. Cum itaque intentum unicum, vel saltem primarium hoc sit Tractatus mei, docere scilicet recensitarum Februm *Perniciosarum* medelam, Peruviano Cortice peculiariter usurpato instituendam, cætera verò reliquas Febres respicientia, sint mera additamenta, cujusvis arbitrio vel ibidem relicta, id ipsum est, quod opposita, sed vera, & solida adminiculante experientia, turpem falsitatis, aut vanitatis notam præferre deberet evinci. Quòd si quis in Opus meum animadvertens,

C c

hoc,



hoc, quod potissimum dixi, contendat evertere, evincat quoque simul necesse est, crimen esse in Medicina, certò servare hominem cæteroqui certò pereuntem, si per Remedium id fiat quotidie obvium, de quo tamen quis ambigat, an Empyricum illud sit, an Methodicum, & an perpetui, an temporanei tantum quandoque levaminis.

Materiam hanc universam Farinæ nomine hætenus vocitatum, & recensita hucusque sedulitate particulatim secretam (patere Lector coactum assumptæ semel allegoriæ satis apposite rem explicantis progressum) totam denuo recens incernere aggressus est Cl. Ramazzinus. Et quidem quicquid ipse partite, nec sine labore segregaveram, ille primò commiscuit iterum, atque turbulenter confudit; dein uno tantum exilissimo, ac penè imperforato ad opus suscepto pollinario Cribro, materiaque, quanta illa extitit, nonnisi leviter excussa, vix tenuissimum collegit Pollinem; non illum tamen, qui meliore pollens substantia, in egregium panem solet evadere, sed volatilem illum, qui parietibus, ubi pinsitur, adhærere consuevit, ex quo nonnisi infirmissimus panis confici potest. Præposteram hanc cribrandi, aut incernendi normam visus est ille procul dubio tenuisse, cum usum omnem Peruviani Corticis *ad unam tantum, vel alteram Drachmam* contraxit *semel oblata, & quidem in diuturnis duntaxat Intermitteribus, ad impetrandas aliquot dierum inducias*. Reliquum Materiæ universæ utilissima adhuc abundè refertum Farina, nomine Furfuris, & recrementi, nedum inutilis, sed & noxii, planè rejecit, imò & projecit. Uno verbo (ut a Pistoria tandem ad Medicam Artem rem contraham) in id potissimè nervos intendit, ut quas deleveram difficultates, iterum suscitaret, ne minimum quidem easdem promovens, crambemque jam coctam recoctioni planè fastidiendæ rursus exponeret. Demum in eo totus fuit, ut peculiaris, distinctæque probationis defectum, quo persæpe laborat, oscitaturque jejuna illius Dissertatio, Rhetorica identidem suppleret industria, clamans undequaque, declamansque, Americanum istud Febrifugum *non tam facile, nec tanta copia, ad uncias videlicet integras in Vino infusum, pluries in die, largaque Dosi, ut Mutina fieri solet, indiscriminatim esse exhibendum, sed modo adhibito: quandoquidem remedium istud em-*

*pyricum prorsus, & amethodicum noxas plurimas solet progignere, & ob improprium illius usum, & ob occultam ejusdem malitiam*. Quibus omnibus generaliter, & indefinite hîc illic prolatis, quin plurima insit veritatis species, forsân ambiget nemo; sed factò, ut decet, scrutinio, pro quantum vacuitatis subest, deceptionis, & falsitatis! Si quispiam igitur rumoribus hisce Viri Cl. fortasse præventus, calculum præcocem opinioni illius statim apponendum censuerit (quod consuevit fatigare nonnemo) suffragium tantisper suum æquum est ut suspendat: *Scelestum siquidem, & crudele judicium est, si quid statuatur antea quàm cum accusatione comparata sit defensio*, clamat Lucianus *De non temere credendo calumniæ*, subdens insuper illud Phoclylidis,

*Ne Judex fueris, partes ni audiveris ambas.*

Ad hæc ego respiciens, e re fore censui, priusquam ad criticam Cl. Auctoris *Dissertationem* meas *Responsiones* apponam, Propositum Lucubrationis illius, æquè ac Therapeutices meæ, summam præmittere, ut ex juxta posito utriusque nostrum germano sensu, clariùs inde elucescat consensus, ac dissensus noster: mox erutis ab eadem Dissertatione potioribus textibus Peruviano Cortici infensis; aliis verò e directo consitis eidem Cortici apprimè faventibus, quos ex variis Cl. Auctoris Operibus, ante meæ Therapeutices evulgationem editis, placuit excerpere, atque transcribere ad literam, quid ab utrisque simul collatis resultet, haud frustraneum credidi nudis terminis, & citra fucum exponere; ultimoque tandem loco ipsam Viri Clarissimi *Dissertationem* in Paragraphos concisam (quam percurrenti si fortè alicubi hæreat aqua, sciat is, primi Exemplaris, non secundi, prout jacet illud hîc adamussim recusum, id esse vitium) cum Notis meis membratim respondentibus, pro pleniori, nedum Professorum Artis, sed & aliorum quoque Eruditorum notitia subnectere. An verò per hæc omnia neverim quod Colo aptavi, scilicet an satis ostenderim, cæssim licet, ac interrupte, Virum Cl. *malo suo* (quod agebat Seneca *De Vita beata*) *viam suam exercuisse*, ipsumve clarè demonstrarim vel præter intentionem nonnunquam consentientem mihi: cæterum præter rationem prorsus, & a me, & a se, & ab ipsa re dissentientem, *Judicet*, ut verbis illius utar, *Judicet*, inquam, *cui cor sapit*.

DISCRE-



# DISCREPANTIA INTER

Clarissimum Ramazzinum, & Me,

SIVE

## SUMMARIUM

*Propositi Cl. Ramazzini, ex illius  
Dissertatione fideliter  
excerptum.*

**O**Pinatur ille in hac Dissertatione ( quidquid aliàs senserit ) Chinam Chinam posse obesse Febricitantibus, tum ratione intempestivæ suppressionis Februm, tum etiam ratione *malitiæ* cujusdam *occultæ* illi insitæ, quam pluribus in locis innuit, sed nusquam probat. Ex eo pariter quòd *occulta* sit *virtus febrifuga* illius, arcanusque modus, quo ipsa operatur in nobis, cum nullam sensibilem pariat evacuationem; imò ex eo quòd in Europa quicquam ei analogum non reperiatur in Vegetabilium familia, concludit ille, rationalem esse non posse hujusce Corticis usum, sed merè *empyricum*, & *amethodicum*. Experimenta enim, ad explorandam ejus virtutem antifebrilem hætenus instituta, etsi planè non improbet; plurimistamen hallucinationibus putat obnoxia, ut indè nil utilitatis quis valeat eruere.

Illam æquo animo nusquam admittit, nisi in *diuturnis* tandem *Intermittentibus*, salvis etiam limitationibus infra recensendis: & quidem semel tantum exhibitam ad

*Dra-*

*Propositi mei saltem præcipui, ex  
Therapeutice meæ Speciali  
fideliter excerptum.*

**O**Pinor ego in Opere meo, Chinam Chinam nonnunquam obesse posse, ut possunt omnia Remedia selectiora, omnesque etiam cibi, quantumvis optimi, si *intempestivè* illa usurpetur, hoc est si per eam aliquando sistantur Febres, quas expediat omnino finire progredi, vel si sistantur præmaturè, quæ seriùs tantum essent supprimendæ. Posse verò ipsam obesse ob *malitiam occultam*, quam habeat, vel ex eo quòd *arcana* sit illius *virtus febrifuga*, nedum non consentio, sed oppositum rationibus, auctoritatibus, & experimentis satis abundè conor ibidem ostendere.

Illam in Intermittentibus omnibus admitto quidem, cum adest indicans; sed ut ab aliis vel invitè admittatur insudare detrecto: neque enim hic est Therapeutices meæ scopus præcipuus. Hanc unam tamen limitationem adjunctam volo, ut scilicet Febres hujusmodi tunc solum curentur Peruviano Cortice, quando naturam *Corruptivam* habeant, vel sensim adipiscantur; secus si *Depurative* sint, vel tales probabiliter sint evasuræ: tunc enim Febres sui ipsius, suæque causæ Remedium esse sum fassus. Adedque ferme ridicula Quæstio est penes me disputare, an Febris aliqua curanda sit ope Chinæ Chinæ, an *alterius* cujusvis *Specifici Febrifugi*; si etenim ea verè sistenda sit, nec melius, nec certiùs id assequi licet, quam usu Peruviani Corticis. Sed prudentis Medici est potiùs quærere, ac seriò perpendere, num verè eam Febrem sistere expediat, & an eo tempore, an

Cc 2

alio,



*Drachmam unam, vel duas*, ad impetrandas aliquot dierum inducias, ut nonnihil reparentur vires, quemadmodum fieri solet oblatione Opii ad sedandos dolores. Cæterum usum repetitum, aut diuturnum improbat, ne illo scilicet impediatur recursus Februm, quas iterum expectandas, exoptandas, imò & excitandas dicit remedii loco; nisi enim redeant, malè consultum putat rebus Ægrotantium: ignem nanque febrilem penes prudentes Medicos suum usum habere, novum non esse commemorat.

*Liberaliorem* illius usum in quibusvis casibus apertè damnat. Et licet de hoc generaliter tantum, & nonnihil etiam hyperbolicè loqui videatur, quasi pro certo habeat, exuberantem admodum Chinæ Chinæ profusionem fieri *Mutinæ* (Urbem quippe hanc inter tot reprehendendam seligit) quia tamen nulla alia uspiam reperitur taxatio licitæ dosi, quàm supra recensita unius, vel duarum ad summum Drachmarum, quamlibet idcirco dosim, quæ hanc excedat, ab eodem damnari censendum est.

Quamvis autem, ut dictum superius, in Febribus Intermittentibus, tunc solùm cum illæ nimis protractæ Ægros fatigant, *Drachmam unam, vel duas Peruviani Corticis* admittat, præscribatque juxta Methodum sanioris, ut ait, ætatis suæ; nihilominus eundem Corticem locum opportunum minimè habere autumat in Regionibus, Anni temporibus, Aerisve Constitutionibus humidis; in siccis verò felicius, sive, ut castigatius loquatur, minori damno

in-

alio; quod ex dignotione *Depurativi*, aut *Corruptivi* Februm generis planè dependet. Quomodo autem dignoscantur ab invicem hujusmodi *Depuratoria*, aut *Corruptiva* Intermittentes, ibi per extensum docentur Tyrones.

Et quia ego relapsum Sanatorum in pristinas Febres, quas Corruptrices censui, cum Chinam Chinam præscripsi, prohibere conor pro viribus: idcirco Remedium semel oblatum, pluries cum moderamine repeto. Dosis tamen mea minimè transcendit in hujusmodi Febribus dosim *vulgarem*, imò plurimis etiam vulgaribus *parior* est. Primo siquidem haustus non excedit unquam *Drachmas duas*, quod summum est. Alias *sex Drachmas* ad summum pariter impendo *trium hebdomadarum spatio* ad præcautionem. Atque ita quantitas universa *uncia unius* pondere continetur. Nonnunquam etiam, ubi lentiores curationem citiori præferendam putem (ut si præ sola Februm diuturnitate Chinam Chinam præscribam) per *semidrachmas* tantum, ad *quindecim* circiter dies exhibitas, negotium absolvo.

Ingenue tamen ibidem fateor, me *raro* in *vulgaribus* Intermittentibus Corticem præscribere consuevisse, quippe quas sæpiissime, ac quibusdam potissimum tempestatibus, pro *Depurativis* habeo, melioremque eo casu, cæteris paribus, reputo curationem sponte Naturæ absolutam, ubi liceat eam sperare, quàm *Specificorum*, sive *China China* adjumento quæsitam. Imò si quando ob suppressam, vel ad preces Ægrotantium importunas, vel ob metum fortè præcoccem, qui me corripuerit, Febrim, aliqua mihi suspicio incidat de Febrifugo nonnihil præmature administrato: Febris autem ipsa non multo post redeat: diuturniorem eo casu illi cursum denuò permitto, priusquam remedium repetam: illudque etiam sæpe non repeto, quoties Febre rationabiliter quoque depulsa, sed nihilominus redeunte, *levior* est, & ad spontaneam solutionem facile vergens illius recursus.

De sexuum, ætatum, temperamentorum, institutorum vitæ, & similium diversitate *accidentali*, & quò ad Chinam Chinam exhibendam, vel non exhibendam planè *superstitiosa*, non minùs quàm ad tot alia, quæ sine hisce cautionibus quotidie offeruntur Remedia, sum parum so-

lici-



inquit exhiberi. In temperamentis pariter Pituitosis Febrifugum hoc suspectum putat: adeoque Corpulentos, & præpingues homines in Cachexiam sensim delabi, ac tandem longum post tempus obire, se observasse refert. In temperamentis verò Melancholicis graviores adhuc noxas Chinam Chinam parere, nervosè asserit, de humoris atrabilaris ferocia ibidem nonnulla commentus.

Sed & insuper sexus, ætas, & vitæ conditio parum proficuum reddere solet, ipso Judice, Peruviani Corticis usum. Talem reputat, ut summam dicam, in Pueris, Adolescentibus, & Mulieribus, exceptis gravidis, & operosis, cujusmodi sunt Textrices, Loricæ, & servilibus operibus addictæ. Item ablegat a Monialibus, ab ædibus Nobilium, & Potentium virorum, & tandem (quod fortassis erat illi intentum primum) a Principibus; tutioremque usum habere antifebrile istud in Populari gente, quæ ex manuariis operibus victitat, quam in cæteris quibuscumque, tandem concludit.

Neque verò illud prætereundum, quòd, quamvis hujusmodi remedium admittat semel tantum in diuturnis Febribus, ad impetrandas aliquot dierum inducias; nihilominus neque id planè tutum censet, omnibus licet expletis conditionibus supra recensitis, ob suspicionem, ne Febris, quæ ad tempus sisti creditur, Medicum eludat, & sistatur omnino, quod pessimum reputat: quam ob causam non semel illum poenituit, eo Febrifugo se usum fuisse.

Remedio huic inesse facultatem

*Torti Respons. ad Ramazz. fi-*

licitus; atque ad ea omnia tantum respicio quòd ad dosim plus minus *liberalem* usurpandam, ut in aliis quoque Pharmacis præscribendis mos est, & quòd ad vehiculum illius plus minus activum, aut energeticum seligendum. Cæterum indicationem offerendi, vel non offerendi, sumo a *natura*, & *causa* Febris, nec non etiam ab *accidentibus* ejusdem, si *graviora* sint præter ordinem. In hunc finem ipsam Febrium omnium Periodicarum naturam diligenti indagine pluribus in locis Operis mei ex instituto persequor, & Causas illarum productrices inquirō, placita Scholarum, tam Veterum, quam Recentiorum perpendens: atq; inde ad quævis medendi Systemata, & ad quævis Scriptorum Hypotheses accommodatum esse Peruviani Corticis usum, pro curandis in quovis Subjecto iisdem Periodicis Febribus, luce meridiana clariùs ostendo.

Vim nullam fluida nostra *figentem* Chinæ Chinæ inesse, & rationibus, & practicis experimentis perspicuè demonstro, admittoque solum in ea Fermenti febrilis *absorptionem*, meliori quo possim mechanate explicatam. In quo sensu si quis contendat, a Peruviano Cortice *figi* nudum ipsum febrile Fermentum, dum ab illo *absorbetur*, me nequaquam dissentientem habet; dummodo hoc idem dicat de *cæteris absorbentibus*, citra dissidium apud omnes innocuis habitis, si ritè usurpentur. Neque enim absorptio materiæ adeò exiguæ, cujusmodi est Fermentum febrile, ullam subinde necessariò exigit sensibilem evacuationem: quod pariter quarumlibet Scholarum The-sibus cohærere, factò prolixiori celebriorum examine, indigito. Et quotiescunque etiam sensibilis evacuatio quærat, illam satis superque patefacit, quæ Chinæ Chinæ actionem perpetuò sub solis naturalibus excretionibus minimè adauctis facile tota possit delitescere Fermenti febrilis absorpti materia, & hac demum via integrè excerni.

In Febribus porro *Intermittentibus Malignis*, non solum admitto Peruvianum Corticem, sed ita admitto, ut nullo pacto patiar omissionem illius; unicum enim hoc est, verum, germanumq; Propositum Therapeutices meæ. Harum Febrium multiplex *differentia*, imò & tempestiva *diagnosis* hætenus parum nota, dilucidata est ex professo pro viribus a me, exemplo



*figentem fluida quæque* humani corporis, ut *Sanguinem, Spiritus &c.* pro re certa supponit, ne lites agat; atq; ob id fortasse Nepotem suum feriò admonet, ut diligenter animadvertat, Febres Intermittentes post epotam Chinam Chinam *nunquam* ad veram, & perfectam apyrexiam pertingere; non enim, inquit ille, Febres verè fugantur, sed potiùs concentrantur: ideoque non recurrunt quidem Paroxyfmi; veruntamen Febris ipsa, quæ creditur recessisse, tacitè cubat, ut ignis sub cinere doloso, & tacitè Corpus depascitur: adeòq; optandum est, ut in apertam flammam erumpant, sitque reditus illius remedi locò.

Utiliorem *forfan* diceret Corticem Peruvianum in Febribus Intermittentibus *malignis* a Mercato descriptis, si tales ab initio dignoscerentur; sed illas quoquè a Medicis Mutinensibus, tumultuariè, ut inquit, ad sacram Anchoram Chinæ Chinæ, ad uncias in Vino infusæ, incassum confugientibus, minimè curatas vidit; perpaucos enim ab hujusmodi Febribus correptos evasisse, sibi observatum testatur. Et si exemplum aliquod oppositum afferatur, hujusmodi portenta, inquit ille, visebantur quoquè antequam Chinæ Chinæ nomen innotesceret.

In hujus, aliorumque etiam assertorum suorum confirmationem auctoritates nonnullas, quodque magis refert, casus etiam nonnullos adducit: quibus tamen omnibus quænam vis insit, & quænam facti veritas, nonnisi invitè quidem, suo loco patefiet.

Denique in Febribus nullis, quibus

etiam Mercati, & Mortoni. In his casibus, ubi dignotio sit *tempestiva*, non plus, aut paulò plus Chinæ Chinæ præscribendum dico, ac in *vulgaribus* Intermittentibus: & hac proportionem, imò etiam parciùs procedendum assero, si *maligna* Intermittens sit de earum specie, quæ nil aliud perniciosi præseferunt, quàm dispositionem quandam proximam ad acquirendam continuitatem, quam *Febrim* idcirco *Subcontinuum* appellavi.

Quòd si vel ob Medici incuriam, vel ob Ægri calamitatem, *seriùs* dignoscatur *Perniciosa* Intermittentis *malignitas*, sitque *repentè* constitutus homo in angustia ferè *extrema*, dummodo victurus sit per horas 24., quatenus per totidem distet a futuro lethali accessu, etsi *frigidus*, & *arteria micatione destitutus*; in eo statu constanter statuo, inculco, & doceo, saltem Tyrones (neque hoc unum, quod mordicùs sustineo in Therapeutice mea, ab ullo Viro culto in circumstantiis hujusmodi refutari posse censuerim) assero, inquam, maxima, ne dicam certa spe felici exitus, offerendum esse Peruvianum Corticem, sed aucta dosi: itaut primus haustus, de quo mihi summa anxietas (secus eventu frustrarer) constet Drachmis, modò *tribus*, modò *quatuor*, modò *quinque*, modò etiam *sex*, si opus sit, pro diversa casus plùs, vel minùs *precipitis* exigentia; dummodo tamen in progressu, transactaque unius, aut alterius diei procella, admodum *temperanter* agatur in oblatione Remedii, suapte licèt natura prorsus innoxii.

Uno verbo ea regula, mensuraque procedendum volo in his casibus, ut non plus quàm *uncia dua* Chinæ Chinæ, pro *curatione* simul, & *præservatione* impendantur; una scilicet, vel etiam quid minùs pro *subita* extinctione Febris, & spatio *trium* *hebdomadarum* ad præcautionem altera. Et hanc Methodum, quam *meam*, ac *peculiarem* voco, possumque *novam* jure vocare, saltem in regione mea, imò & alibi, non abnuo, quin pro libito quisque appellet, vel *suam*, vel *alienam*, dummodo in commune beneficium eadem utatur.

Pro assertorum quorumcunque meorum veritate confirmanda, non modò *auctoritates* assero Scriptorum *expertorum* (inexpertos enim, vel sine methodo expertos fidenter appello quot quot oppositum sentiant, quamvis expertos se jactitent) ve-

rùm



bus obtigerit *continuitas*, qualiscunque ea sit, ne in iis quidem, quæ de Intermittentium natura quodammodo participare creduntur, aut sunt de earum *prosapia*, quamvis etiam quid malignum portendant, Peruvianum Corticem (quem adversus eas nimis liberaliter, ut dictum supra, *Mutinæ* usurpari putat) exhibendum censeat; plurimas enim deceptiones hac in re ait contingere, cum Febres ipsæ Continentes, & ab essentia Continuæ, quæ Cortici certè non auscultant, quosdam præferant nonnunquam parvus motus, quales sunt ii, qui Febribus Intermittentibus competunt: qua demum vana spe seducti Mutinenses Medici, Chinam Chinam ad uncias integras in Vino infusam pluries in die propinant; sed perperam, etsi illis curationes nonnullæ Ægrorum pro conclamatis habitorum fortuitò feliciter cesserint.

Interim hanc Methodum, neque novam esse contendit, neque inclytæ Scholæ Bononiensis usui consonam: miraturque ideo, Peruvianam hanc Plantam altas adeò radices egisse inter *Sculternam*, & *Gabellum*; non ita verò in Solo Bononiensi finitimo, cum cæteroqui apud Medicos temporibus Viri Cl. *Mutinæ* florentes, valde rarò, & valde cautè præscribi consuevissent Peruvianus Cortex, utpote *infidus*, atq; *suspectus*. Hæc Ille. Dispiciendum posthac particulatim, quo singula consistant robore.

rùm etiam *historias* quamplurimas *insignes* æquè ac *fideles*, de quarum certitudine ipse Cl. Ramazzinus expresse, uti socius in curatione, ita & testis a me non semel adducitur; neque tamen earum ullam pro ea, qua pollebat honestate, in Dissertatione sua vel minimum inficiari aggressus est. Utinam verò liceret mihi quas ipse adducit ex adverso, me fontem, seque testem criminis faciens, meo licèt suppresso nomine, pari silentio dissimulare; sed iusta dignitatis meæ tutela, & multò magis communis causa, quæ defendi debet, inofficiosam huiusmodi moderationem non patitur.

Ad *Continuas* denique *Continentes* omnes, siue minimè Remittentes Febres Chinam Chinam & ipse inutilem censeo, ut & ad plures alias diversorum generum nulla intermissione notabiles. Ad *Continuas Proportionales* sic dictas in Scholis, siue *Periodicas*, minimè proficuum pariter dico, si illæ ex radice *Continuarum* ab *essentia* prodeant; secùs si sint de Stirpe *Intermittentium* ab *ortu*, vel *Subintrantium*, dummodo nondum continuitatem *essentialem* sint assecutæ: quousque enim illuc non pervenere, eas etiamnum dico curabiles Cortice modicè exhibitò.

Ne tamen ulla hinc oriatur in praxi confusio, Febris *simpliciter Remittentis*, a me sic appellatæ, naturam, & signa diagnostica minutè sum prosecutus, eamque, licèt obscurè confusè, aut inordinatè periodica videatur, Cortice inexpugnabilem profero; non sic merè *Subintrantem*, quam quoquè describo, suisque signis a *simpliciter Remittente* distinguo. Atque hac posita duplicis generis Febre, *Continua* quoquè *Proportionalis*, ex hisce duabus quodammodo mistis, seu potius ex diversis Febbris utriusque Fermenti commistione conflatæ, naturam ancipitem, China China quandoque curabilem, & quandoque nequaquam curabilem, sub utraque hac conditione considero, propriisque clarè, quantum fieri potest, signis indigito.

Ac tandem ne quis error possit obrepere, distinctas omnium planè Febrium species, juxta seriem practicæ earundem Geneseos (quarum plurimæ Peruviani Corticis conatus eludunt, aliæ plurimæ eidem cedunt, aliæ denique modò cedunt, & modò non, pro varia ipsarum natura, ortu, & successiva nonnunquam Metamorphosi) in Icone peculiari ob oculos legendum, præsertim Juniorum, pono: ut ideo



laborem frustraneum assumpsisse videatur Cl. Ramazzinus, Opus meum eatenus tantum convellens, ut perspicue visitur, quatenus quæ ipse clarè disposui, & secrevi ab invicem, ille denuo simul confundit, mox susque deque declamatoriè perturbat.

An verò singula, quæ huc transtuli, in ipsa Therapeutice mea satis digesserim, ac ad umbilicum perduxerim, perduxerimve

ratione duce, & comite experimento, qui distinctè cupit dignoscere; prolixam autem nimium, quippe in gratiam Tyronum conscriptam, eandem Therapeuticen detrectat percurrere, adeat solummodo Cap. 1. 3. 7. & 8. Libri primi, Cap. 3. & 4. Libri tertii, Cap. 5. Libri quarti, & Cap. 2. & 3. Libri quinti, cunctaque ibidem comminuta, forsitan & supra modum, reperiet.



## DISCREPANTIA

Clarissimi Ramazzini a semetipso,

S I V E

## COLLATIO

*Potiorum Textuum summam huc translatorum, quos in novissima Dissertatione sua De Abusu Chinæ Chinæ, Anno 1714. evulgata, edidit Clarissimus Ramazzinus in contumeliam Chinæ China, præsertim ne posthac Juvenes relinquantur dubii [ut eos antea reliquerant Auctores ab invicem discrepantes] in quam partem se dedere debeant, quemadmodum infra deducitur ex eadem Dissertatione, Paragrapho septimo.*

A

**N**on est tam insons, ut vulgo creditur, Americanum istud Febrifugum. Ramazz. Dissertat. de Abusu Chinæ Chinæ Epist. nuncupat. lit. c.

B

Remedium istud natura sua *dolosum* est. Dissertat. ead. §. 50. circa finem.

*Plurium Textuum hic ad literam transcriptorum, quos in diversis Operibus suis, non juvenili, aut consistente ætate, sed in medio, ac ultimo Senio, ab Anno scilicet 67. ad 79. ætatis suæ, sive a 1700. ad 1712. Æræ Christianæ, idem Cl. Ramazzinus edidit in laudem Chinæ China, non Oratorem agens, sed Documenta Theorica, & Practica studiosæ suggerens Juventuti, ut in Orat. Jatr. argum. ipse ad Lectorem præfatur.*

A

**P**eruvianum Febrifugum, non arte quidem, aut industria repertum est; sed nobis divinitus concessum. Ramazz. Orat. Jatrici Arg. pag. 104. Orat. 3. Edition. Patav. 1708.

B

Peruvianus Cortex Antipyreticorum omnium, quotquot excogitavit Antiquitas, & Chymicorum solertia conflavit, est facilè Princeps. Idem ibidem pag. 101.

Noxa

Uti-



C

Noxa hujus Febrifugi tantò *pernici-  
sior* est, quantò occultior. *Dissert. ead.*  
§. 15. *lit. b.*

C

Utinam favore Numinum, & com-  
miseratione, qua solent in res humanas,  
aliud Febrifugum reperire daretur, quod  
*eadem securitate*, qua Peruvianus Cor-  
tex Periodicas sanat, reliquas Febres,  
quas Synochas, & Continentes vocant,  
sanandi facultate polleret. *Ibidem pag.*  
103. & 104.

D

Hoc Febrifugi genus apud me tanti  
non est pro Febribus Intermittentibus  
curandis, ut Medicina æquè benè hoc  
præsidii genere carere non posset, &  
Veterum Febrifugis, quæ si non tam  
citò, tutiùs tamen operantur, non pos-  
set esse contenta. *Ibid. §. 18. lit. b.*

D

Quot seculis desudarunt Artis Primo-  
res, ut Febrifugum aliquod reperirent,  
aut arte conflarent? Modò e Peruviana  
Regione Cortex ad nos defertur, *divi-  
num planè* remedium ad malè natam Fe-  
brium sobolem *exterminandam*. *Ibid.*  
*pag. 34. Orat. Secular.*

E

Certè constat, longè tutiora fuisse  
Veterum Febrifuga, quæ olim ului erant,  
quàm Indum istud. *Epist. nuncupat.*  
*ejusd. Dissert. lit. e.*

E. F. G.

Quàm diu a peritioribus Artis Magi-  
stris insudatum est ad Febrifugum ali-  
quod conflandum, ex triplici Regno  
materia petita? At omnes hæcenus illo-  
rum labores frustrante diligentia in ir-  
ritum cessere; & si aliquod Antipyreti-  
cum in illorum monumentis extat, non-  
nisi sub Grypho descriptum legitur, ut  
Delio Natatore opus sit, si mens Aucto-  
ris sincera habenda sit. *Solus* Peruvia-  
nus Cortex, nobis a Divina beneficen-  
tia munus concessum, sinè alterius rei  
mixtura, in qualibet regione, quocun-  
que anni tempore, ætate, sexu, tem-  
peramento, Febres saltem recurrentes,  
atque intervallatas fugat, & *exterminat*,  
quamquam non defuerint qui *hieron* hoc  
*picron* ex *Arbore Vitæ* decerptum temerè  
rare pertentarent Opio, aliisque rebus  
adjectis, ut solitis mangoniis vulgo im-  
ponerent. *Ibid. pag. 212., & 213. Orat.*  
*sept.*

F

In quacunque Febre Intermittente,  
in qualibet Regione, quocunque anni  
tempore, ætate, sexu, temperamento  
&c. Chinam Chinam indiscriminatim  
exhibere velle, magnum abusum esse  
judico. *Dissertat. ead. §. 8. lit. c.*

G

Chinæ Chinæ Fautores in ea laudan-  
da modum nesciunt, sed summis laudi-  
bus ad Astra efferunt, *Arborem Vitæ* il-  
lam appellantes. *Ibid. §. 7. lit. a. b.*

H

In Febribus Tertianis Intermittenti-  
bus Malignis Medici Mutinenses  
ad sacram Anchoram Chinæ Chinæ in-  
cassum

H

Equidem hoc præsidii genus in Fe-  
bribus Periodicis miranda præstat, &  
præsertim in Tertianis Intermittentibus  
Mali-



caſſum confugiebant ; perpaucos enim ab huiusmodi Febris correptos , evaſiſſe vidi. *Ibid.* §. 30. & 32. *lit. a.*

## I

Cum poſt tot conatus Magnorum Virorum , & facta tentamina , adhuc *ignotus* ſit operandi modus huius celebris Antipyretici , aſſerere neceſſe eſt , *rationalem non eſſe* illius uſum , ſed *merè empiricum , & amethodicum* . *Ibid.* §. 6.

## K

In Periodicis Febris *continuatus* huius Febrifugi uſus Obſtructiones , & Cachexias invehit , Hydropem & mortem . *Ibid.* §. 21.

## L

Sicuti Opium , pro ſedandis doloribus ſemel oblatum , rursus ad prophylaxim repetendum non eſt ; ita *nec repetendus* ad prophylaxim Peruvianus Cortex , pro ſedanda febre ſemel præſcriptus . *Ibid.* §. 48. *lit. a.*

## M

Ab hoc remedio Febres Intermittentes fugari videntur ; ſed Medicis nimis cre-

Malignis , quæ in ipſo impetu acceſſionis Ægros interdum necant &c. hoc enim Febrifugum fermentum illud malignum ſive penitus reſtinguit , ſive ita enervat , ut periculum illud tollatur , ne Æger in ipſo Febris acceſſu intereat. *Idem Diſſert. De Contagioſa Epidemia , quæ in Boves irreſſit pag. 37. Edit. Patav. 1712.*

## I

Licet autem in Peruviano Febrifugo &c. nondum teneamus quid verè ſit Febris , nec ſatis conſtet quid in noſtris corporibus præſtet hoc remedium &c. ; magnum tamen mortalitati noſtræ ſolamen foret , ſi conſimile præſidium haberemus , quo contra Febres vere continuas , quæ nobis exitium interminantur , *caco licet modo* , & Andabatarum more pugnaremus , quando idem penè *de omnibus Remediis* , quotquot habet Ars medica , proferre liceat , poſſe nos quidem pro lubitu fingere quid agant , quove modo operentur , ubi noſtri corporis penetralia ſubierint ; *modum* autem , & *ingenium* , quo morbum , & cauſas morificas oppugnent , verè , ac ſcienter nequaquam poſſe pertingere . *Idem Orat. Jatr. argum. pag. 104. & 105. Orat. 3.*

## K. L. M.

Profectò poſtquam huius remedii uſus innotuit , & præmiſſis juſtis purgationibus , *non ſemel tantum* , ut olim , ſed *plures ad dies* exhiberi cœptus (*ita habet Auctoris Codex*) donec febrile Miasma fuerit *penitus exantlatum* , talem circa Februm doctrinam , ac illam curandi methodum factam fuiſſe fateri oportet (*hic quoque ita habet Auctoris exemplar*) qualem in re militari poſt inventum pulverem pyrium omnes norunt . Quemadmodum autem abjectis Catapultis , & Arietibus , ſolo tormentario pulvere terræ cuniculis incluſo , & accenſo alta propugnacula temporis momento ſolo æquantur , & Arces obſeſſæ ad deditiorem coguntur ; ſic valere



credulis imponunt : non enim verè fugantur, sed potiùs *concentrantur*, *tacitè cubantes*, ut ignis sub cinere doloso, & corpus tacitè depascentes. *Ibid.* §. 24. *lit. b.* §. 25. *lit. a.* & §. 27. *lit. b.*

lere jussis tot pharmaceuticis præsiidiis, modico Quinquina pulvere exhibito *contumaciores* Febres *vinctas* dant manus. *Ibid.* pag. 102. & 103.

N

Aliquando Medico, qui Americanum istud Febrifugum exhibuit, in votis est Febrem repetere, sed fortiozem, ut tollantur ea mala, quæ China China ob Febris extinctionem invexit. *Epist. nuncupat. lit. c.* & *d.*

O

Optandum esset, ut in apertam flammam erumperet Febris, postquam Ager ad aliquot dies, ea silente, roboris aliquantum reportasset; nam reditus Febris remedii loco esset. *Dissertat. ead.* §. 25. *lit. b.*

P

Ægri Febris obstinationem fastidientes, inscio nonnunquam Medico Quinquinam capiunt; sed magno sui damno pœnas luunt, Hypochondriacis postmodum affectibus, Cachexiis, ac lentis Febribus correpti; ut postea cogantur Medicos accersere, qui multis remediis Febres *excitando* morbum vincant, & remedia quærant ad sepultum ignem suscitandum: in quem finem Spiritus Salis Armoniaci commendatur, & *Ficus Pharaonis*, qui Tertianas Febres *excitare* creduntur. Novum enim non est, ignem Febrilem penes prudentes Medicos suum usum habere. Sic Celsus scripsit, *licere Febres parvas augere; fortasse enim curationi opportuniore fient.* *Ibid.* §. 38. *lit. a. b. c. d.*

N. O. P.

Cum in universa morborum classe nullus extet nobis hostis infensior, & cui minùs fidere oporteat, veluti Febris; attamen eò audaciæ ventum est, ut inter Quæstiones Medicas sit, num ad alios morbos curandos Febrem excitare liceat, eò quòd interdum in quibusdam affectibus, veluti convulsione, & hypochondriorum dolore, superveniens Febris remedii loco fuerit, quasi in nostra potestate sit ignem febrilem accendere, ac pro lubitu ipsum restinguere. Quàm libenter scirem, quodnam corpus, sive de genere simplicium, sive compositorum proster, quo quis Tertianam Febrem, Quartanam, Synocham, vel quamcunque aliam *excitare* possit. Pro fabula enim accipitur, quod quidam de *Pharaonis Ficu* referunt, quam ajunt, Tertianam Febrem *excitandi* vim habere. Non absimilis priori est alia Quæstio, non adeò tamen audax, quam habet Celsus, num *Febrem lentam augere* liceat, ut *curationi opportunior fiat*: verùm quam suspecta, & quàm infausi ominis sint beneficia, & dona, quæ ab hoste proveniunt, satis compertum est, ut vetus proverbium admonet, *Hostium munera non munera*. O quàm egregiè in hanc rem Seneca. *Gravissima infamia est Medici opus querere; multi quos auxerant morbos, & incitaverant, ut majori gloria sanarent, non potuerunt discutere, aut cum magna miserorum vexatione vicerunt.* *Ibid.* pag. 94. 95., & 96.



# ANTITHESES RAMAZZINIANÆ

Ex unius nempe Viri Cl. Textibus hucusque citatis,  
atque registis excerptæ,

S E U

## VERSICOLOR PAVONIS CAUDA.

*Caudaque Pavonis larga cum luce repleta est,  
Consimili mutat ratione obversa colores. Lucr. lib. I.*

### China China est Remedium

I.

**N**on tam insons', ut vulgo creditur,  
sed natura sua dolosum, noxium, &  
perniciosum.

II.

*Arboris vitæ nomine perperam appel-  
latum.*

III.

*Veterum Febrifugis eo longè tutioribus  
posthabendum.*

IV.

*Quo nempe pro Febris Intermittenti-  
bus curandis æque benè carere posset Me-  
dicina, & iis tantummodo, quæ antea  
habuit, esse contenta.*

V.

*In quacunque Febre Intermittente, qua-  
cunque Regione, anni tempore, ætate, se-  
xu, temperamento indiscriminatim non  
usurpandum.*

VI.

*Semel oblatum, non ampliùs ad Pro-  
phylaxim repetendum.*

VII.

*Non continuandum, ne Obstructiones  
invehat, Cachexias, & Hydropem.*

*In Ter-*

I.

**P**lanè divinum, a beneficentia divina  
nobis concessum, & Antipyreticorum  
omnium facile Princeps.

II.

*Hieron picron ex Arbore vitæ decer-  
ptum.*

III.

*Veterum Febrifugis eo longè infirmiori-  
bus anteponendum.*

IV.

*Quo nempe contra Febres Intermitten-  
tes reperto, magnum mortalitati nostræ  
solamen foret, si Medicina consimile a-  
liud haberet contra Continuas.*

V.

*In quacunque Febre saltem Intermit-  
tente, quacunque Regione, anni tempore,  
ætate, sexu, temperamento indiscrimina-  
tim usurpandum.*

VI.

*Non semel tantum, ut olim, sed ad  
plures dies exhibendum.*

VII.

*Continuandum, donec penitus exantla-  
tum sit febrile miasma.*

*In Ter-*



## VIII.

*In Tertianis Intermittentibus Malignis, e quibus perpaucos evasisse observatum est, incassum adhibitum.*

## IX.

*Quippe Febres Intermittentes verè non fugans, sed potius concentrans.*

## X.

*Ejus enim operandi modus ignotus cum sit, usum quoque ejusdem irrationalem esse, empiricum, & amethodicum asserere necesse est.*

## XI.

*Ad tollenda ergo mala, quæ ob Febris extinctionem illud invexit, excitare Febrem debent Medici, & ad sepultum ignem suscitandum, remedia, quæ huic usui prostant, exhibere.*

## XII.

*In hunc finem commendantur Spiritus Salis Armoniaci, & Ficus Pharaonis, qui Tertianas Febres excitare creduntur.*

## XIII.

*Neque enim novum est in Arte nostra, ignem febrilem penès prudentes Medicos suum usum habere. Sic nos docuit Celsus, cum scripsit, licere Febres parvas augere; fortasse enim curationi opportuniore fient.*

Præter hæc recensitas, aliæ superessent pugnantes invicem Propositiones, ex unâ tantum Viri Cl. novissima Dissertatione facile depromendæ; quas tamen hîc juxta ponere supersedeo, quoniam mutua illarum repugnantia in Responsionum mearum decursu satis patet. Interim superiùs exaratas, neque ab hac unâ Cl. Auctoris

## VIII.

*In Tertianis Intermittentibus, præsertim Malignis, miranda præstans; adeoque ne Ager in accessu intereat fidenter adhibendum.*

## IX.

*Quippe Febres Intermittentes omnes fugans, & exterminans.*

## X.

*Ejus enim operandi modus ignotus sit licet, nil officit, quando idem penè de omnibus Medicina remediis asserere necesse est.*

## XI.

*Et tamen eò audaciæ ventum est, ut ad alios morbos curandos contendatur, num liceat Febrem, quæ nil nobis infensus, excitare, quasi in potestate nostra sit ignem febrilem accendere, ac pro lubitu restringere.*

## XII.

*Nullum tamen, aut simplex, aut compositum corpus prostat, Tertianam, aut Quartanam excitare potis: pro Fabula enim accipitur, quod Ficus Pharaonis Tertianam Febrem excitandi vim habeant.*

## XIII.

*Cum ergo inter morbos nullus extet nobis hostis infensor, & cui minùs fidere oporteat, quàm Febris, suspectum est, & infausi ominis, quod habet Celsus; licere nempe Febrem lentam augere, ut curationi opportunior fiat.*



Lucubratione, sed & ab ea, & ab aliis simul ejusdem Operibus excerptas, placuit uno intuitu ob oculos ponere, ut me illico quisque cernat ea ineluctabili necessitate compulsus, ut quicquid scribam in hac gravi, atque inter nos controversa materia, velim, nolim, cogar dissentire a Viro Cl. vel septuagenario, vel octogenario; ita tamen, ut quacunque ex parte illi adverser, ex alia semper adhæream: quapropter, si ex iis partibus meliorem fortè selegerim, eidem Auctori æquius adhærere dicar, quàm adversari; idque eò magis, si ab illo quoquè ipsa dignoscendæ melioris, aut deterioris partis documenta depromam. Cum itaque ille §. 7. suæ nuperæ Dissertationis Nepotem doceat, fidem potius adhibendam esse iis Scripto-ribus, qui de China China iudicium suum tulerunt data tantum occasione tra-ctandi de Febris, utpote qui de hoc Febrifugo sana mente, ac ingenuè disquisi-verunt, quàm iis, qui ex professo de eadem China China scripsere, ac edidere *Tractatus*: ipse autem Scriptorum utriusque Classis personam diverso tempore indutus, steterit pro Cortice Peruviano per annos 13. tunc scilicet cum de Febris tractavit, earumque remediis, ut in Orat. 3. Pa-tavina, & in Dissertatione De Contagiosa Boum Epidemia; & qui-dem non juvenili, aut virili, sed provectiori, atque, ut ipse alibi vo-cat, *saniori ætate* (quam unam inter varias, quas percurrit, attenden-dam esse præcipit. §. 3. & 8. ejusdem Dissertationis) steterit verò ad-versus Peruvianum Corticem vix ante paucos menses, sive ultima provectissimæ ætatis periodo, cum videlicet de ipso Cortice ex professo acriter scripsit, ac *Tractatum* edidit: idcirco meliorem partem me se-lecturum, nec illi verè me adversaturum putarim, si eum potius sequar pro China China, quàm adversus Chinam Chinam scriben-tem. His præmissis, evestigio rem ipsam aggredior.





## ANIMADVERSIONES

## IN TITULUM

## A CLARISSIMO RAMAZZINO

## CONSTITUTIONIBUS SUIS EPIDEMICIS,

Annexæque Dissertationi De Abusu Chinæ Chinæ  
conjunctim præpositum, qui sic habet.

(a) **C**onstitutionum Epidemicarum Mutinensium Annorum quinque Editio  
secunda BERNARDINI RAMAZZINI in Patavino  
Gymnasio Practicæ Medicinæ Professoris Primarii.

(b) Accedit Dissertatio Epistolaris de Abusu Chinæ Chinæ Ad D. Bartho-  
lomæum Ramazzini Mutinæ Medicinam facientem. Patavii 1714.

(a) (Constitutionum &c.) **P**rior hæc  
Tituli  
portio nihil ad me, quemadmodum nihil  
ad me Constitutiones ipsæ, quas non alio  
certè consilio recudere studuit artificiosus  
Auctor, nisi ut ab his colorem mutuatus,  
annexæ Dissertationi viam sterneret; quan-  
doquidem in illis quoque parum amicè  
identidem senserat de Peruviano Cortice.  
Scripsit ille quidem (atque hoc referre  
non erit inutile) hujusmodi Constitutio-  
nes ab anno ætatis suæ 56. usq; ad 61. & cum  
Juvenili ætate, ac in virili etiam statu Chi-  
nam Chinam in magno pretio habuisset; pro-  
cedente tamen ætate (cum videlicet easdem  
Constitutiones conscripsit) a priori senten-  
tia recessit non parum, ut de his omnibus  
in subsequenti Dissertatione §. 3. nos mo-  
net. Adedque in Constitutione prima, sci-  
licet anni 1690., usum Chinæ Chinæ im-  
prosperè cessisse sibi observatum refert; in  
secunda verò anni 1691., ejusdem Febrifugi  
administrationem saluberrimam fuisse  
testatur pag. 126. nuperæ Patavinæ Edi-  
tionis, confirmatque pag. 131.; subdens  
insuper pag. 132. ex vi oppositarum invi-  
cem observationum, in oppositis hisce Con-  
stitutionibus a se habitum, securiorem  
probabiliter esse Chinæ Chinæ usum, quan-  
do humores frano potius egent, quàm stimu-  
lo; quod in Constitutionibus calidis, &  
siccis evenit; secus in frigidis, & humi-  
dis. Atque idipsum tandem ulteriori, ut  
ait, facta observatione incunctanter statuit

sub finem ultimæ Constitutionis trium sub-  
sequentium annorum 1692. 93. & 94. ubi  
Chinæ Chinæ usum pro curanda lenta Fe-  
bre, Peticulari malè judicatæ identidem  
tunc succedente, parum salutarem fuisse  
adnotat. Omnibus porro hisce observatio-  
nibus haud semper uniformibus inter se  
collatis, pro coronide demum concludit  
pag. 192. earundem Constitutionum — In  
frigidis, & humidis Constitutionibus, qua  
corpora nostra crassis humoribus infarciunt,  
parum salutarem esse Corticis Peruviani u-  
sum, in calidis vero, & siccis Constitutio-  
nibus, in quibus humores aliquo egent sus-  
flamine, Remedium istud egregiam operam  
prestasse. Hæc ille tunc. Ejus verò sen-  
sa, qualiacunque ea fuerint, huc compen-  
diosè retulisse sufficiat, omitta earundem  
Constitutionum recusatione, quippe frustra-  
nea, ut earum connexionem cum subse-  
quenti Dissertatione minimè videar de in-  
dustria dissimulasse. Quid verò, & quan-  
ta quidem diversitate, post annum 61. æ-  
tatis suæ, nempe post annum 1694., sen-  
serit de eodem Cortice, postquam scilicet  
memetipsum vidit, sociumque non semel  
habuit, eo Febrifugo felicissimè semper  
utentem, in arduis præsertim circumstan-  
tiis, tam Intermittentium, quàm Sub-  
continuarum Februm lethaliter malignan-  
tium, quidve in illius commendationem  
palàm scripserit ab anno 67. usque ad 79.  
ejusdem ætatis suæ, scilicet ab anno Chri-  
sti 1700. usque ad annum 1712., satis con-  
stat



stat ex ipsius Auctoris Textibus superius transcriptis ; ut ideo tam insignis mutatio sententiæ, relapsusve in priorem, cæteroqui ab eodem repudiatam, contigerit ultimo biennio vitæ illius: quo tempore, & Exedræ addictus, & Ægros invivendi vix capax, quantum potuerit in praxi proficere, ut experientia ulteriore edoctum se nobis ostendet, nemo non novit.

(b) (*Accedit &c.*) Altera hæc Tituli pars magis ad me. Hic autem non nisi de *Abusu Chinae Chinae* constituit agere Cl. Auctor: egi ego in Opere meo de *Usu, & Abusu*. Ille universim, ac indefinite; ego

definitè, ac particulatim. Vide ergo Titulum meæ Therapeutices, Præfationem ad Lectorem editionis primæ 1712. totumque fermè, si lubet, Librum quintum; nec non Cap. 8. Libri primi, Cap. 5. Libri quarti &c.; & me æquè inimicum abusi, ac recto usui amicum ubique deprehendes. In eandem ergo metam tendimus: disquirendum superest, an eodem itinere, dum quinquam sit rectus usus, & quinquam abusus intimiùs examinabitur. Vereor tamen, ne huiusmodi examine minùs castigatè instituto, sibi que propterea nimium fidens, & nimium placens, *Ollam auxerit ante Lentem* Cl. Auctor.





## ANIMADVERSIONES

## I N

## EPISTOLAM NUNCUPATORIAM,

Quæ sic inscribitur.

**I**llustrissimis, atque Excellentissimis D. D. Equitibus, D. Marci Procuratoribus, & Patavini Gymnasii Moderatoribus, D. CAROLO RUZINO, D. FRANCISCO LAUREDANO, D. ALOYSIO PISANO, Bernardinus Ramazzini Felicitatem.

(a) **C**onstitutiones meas Epidemicas, quas olim circa finem prægressi Seculi evulgavi, & Mutinenses dixi, quia modo Agros, modo Civitatem affligerint, denuo in publicum prodire volui, sed nonnisi sub Nominum Vestrorum auspiciis, Patavini Lycei MODERATORES AMPLISSIMI, neque ab hoc proposito quidquam me dimovit, quod novum aliquod Opus non sint, scio enim Autoritatem Vestram eam esse, ut Antiquis gratiam, Obscuris lucem conciliare valeat.

Hisce tamen novum aliquid accedit, Dissertatio nempe de China China abusu, quem (b) ubique tam grandem, ac familiarem factum video, ut castigatione aliqua, & animadversione indigeat. (c) Non est enim tam insons, ut vulgò creditur, Americanum istud Febrifugum, ut aliquando Medico, qui illud exhibuerit, in votis non sit febrem repetere, sed fortiores, ut tollantur ea mala, (d) quæ China China ob febris extinctionem invexerit. (e) Certè constat longe tutiora fuisse Veterum febrifuga, quæ olim usui erant ad febris causam sensim eliminandam, quàm Indum istud, cuius operandi modum in nostris Corporibus, admirari potius licet, quàm intelligere. (f) Vos autem CLARISSIMI VIRI, quorum Incolumitas ad publicum bonum tanti interest, ita valere volo, ut Medicorum nullus Peruvianum Corticem, aut quidquam aliud pharmaceuticum Vobis unquam præscribat.

D A B A M P A T A V I I

Die 20. Julii 1714.

(a) Constitutiones &c.) **Q**uemadmodum prima pars Tituli nihil rei habuit cum Animadversionibus meis, ita nec quicquam habet prima pars Epistolæ Nuncupatoriæ, quippe quæ Constitutiones a me sepositas æquè connotat. Sat igitur sit & hanc ordinis gratia integram recusasse, ne mutila in publicum conspectum veniret. Cæterum cum altera tantum illius parte nonnulla mihi res est.

(b) (Ubique &c.) Animadvertant Geometriæ Respons, ad Ramazz.

graphi, hoc Ubique sumi a Cl. Auctore per strictam quamdam Synecdochen pro eo tantum terrarum spatio, quod inter Scultennam, & Gabellum intercipitur. Quod si illud idem Ubique semel saltem in tota Dissertatione occurreret, neque is, qui satis immerito insonti Mutinæ affigitur, illi uni imputaretur Chinæ Chinæ abusus, ferenda utique, dum amplior, etsi adhuc animosa plurimum, Censoria huiusmodi castigatio.

(c) (Non est enim tam insons &c.) Non esse

Dd



esse insons istud Febrifugum, facile est asserere; difficillimum nervose probare. Naturam illius innoxiam ex opposito satis, superque me ostendisse puto Cap. 1. & 2. Libri 1. meæ Therapeutices Specialis, & signatè a pag. 4. uque ad 15. inclusivè. Id nihilominus ex abundanti ultro confirmabitur in progressu ex ipsis Responsibus meis ad peculiare Paragraphos Ramazzinianæ Dissertationis, & præsertim ad §. 47., ubi fusiùs de indubitabili, & patente hujusce remedii innocentia. Et sanè quidni sit insons Febrifugum, quod Cl. Ramazzinus in *saniori aetate* appellavit (ut vidimus in *Collatione* Textuum illius) *Remedium planè divinum, ex Arbore vite decerptum, Antipyreticorum omnium facile Princeps &c.*?

(d) (*Quæ China China &c.*) Satiùs fuisset dicere, *quæ Medicus*, non *China China*, ob Febris extinctionem intempestivam *invexit*. Si enim præcisè ob Febris extinctionem quidquam mali contigit, idem, ut patet, contigisset effectus, si per aliud quodvis Febrifugum specificum, puta Gentianam, Centaurium &c. eo tempore Febris extincta fuisset. Medicus ergo rationem reddat præscripti eo tempore Febrifugi Corticis, non ipse tunc forsitan malè præscriptus Febrifugus Cortex. Num fortè culpabitur ut pravus cibus optimus, quem malè tulit Æger, quia illum Medicus sumendum præscripsit invadente accessione, cum debuisset ingerendum præscribere eadem soluta? Ad evitandos hujusmodi scopulos in Chinæ Chinæ oblatione, circumstantias omnes examinavi, in quibus liceat, vel non liceat Febres suppressere. Hoc est, quod methodicum reddit illius usum, quodque talem reddit usum cujuscumque remedii, nempe ut illud *tempestivè* administretur: posito enim quòd suppressendæ verè sint Febres, & cognito opportuno tempore suppressionis earum, quod ex Medici peritia dependet, non aliud quærendum Febrifugum, quàm China China, quàm certius, aut tutius nullum. Vide propterea totum nuper citatum Caput octavum, ni te pigeat, Libri primi Therapeutices meæ, ut & decimum, si exempla tempestivæ, & intempestivæ oblationis nosse velis in Intermittentibus benignis; si verò in Subcontinuis malignantibus, ac præsertim in earum principio, ne graveris inspicere a fronte ad calcem citatum pariter Caput

quintum Libri quarti; & si exempla desideres, etiam Caput sextum ejusdem Libri, ubi in historia prima occurret tibi curatio Ægrotantis a Cl. Ramazzino proclamato habiti, subinde tamen Peruviani Corticis administratione restituti. Sanè eo casu perspecto, miraberis cur idem Auctor, nulla etiam ratione habita aliorum plurium, arctis adeò limitibus rectum Chinæ Chinæ usum restrinxerit.

(e) (*Certe constat &c.*) Veterum Febrifugis quales olim laudes, sive, ut apertè loquar, quas criminationes in concursu Peruviani Corticis attexuerit Cl. Ramazzinus in suis Orationibus Patavinis, vidimus supra in *Collatione* Textuum illius lit. E. F. G., ubi *frustrantem Priscorum Medicina Patrum diligentiam, laboremque in iis, tam reperiendis, quàm arte conflandis planè irritum*, parum abest quin ore pleno derideat: ut proinde & hic subeat mirari, quo pacto iisdem Amplissimis Patavini Lycæi Moderatoribus hæc tam facile obtrudat in Veterum Febrifugorum commendationem, coram quibus ante paucos annos tam effusè effatus erat oppositum. Sed nec id inglorium prorsus dixerim Viro Cl., Carneadem in hoc imitato, qui coram Catone prisco, Galba, aliisque principibus Viris elegantem, & acutam habuit Orationem *pro Injustitia*, cum oppositam haud minus elegantem *pro Justitia* pridie habuisset *eisdem audientibus*. Quid de Veterum Febrifugis, partim noxiis, partim inertibus sentiam ipse, legi potest in mea Therapeutice a pag. 10. finem versùs, usque ad totam pag. 11.

(f) (*Vos autem &c.*) Non erat, ut in Epistolæ fine officioso incolumitatis omne averti ab Amplissimis, prosperaque longævitate dignissimis Viris Peruvianum Corticem deprecaretur, qui severo Interdicto Medicis omnibus observando, ab *Ædibus Nobilium, & Potentium Virorum*, ut infra §. 10., vulgare istud Antipyreticum *proscripsit*, Exedræ Practicæ Patavinæ Professor Primarius. Quemadmodum tamen ille Nobilium, & Potentium Virorum genus egregium jam bene valens, sinè Peruviano Cortice jugiter *valere voluit*: ita ego, ut revalescat non rarò malè valens ex Periodicis Febribus quodcunque genus hominum, universam Viri Cl. Dissertationem, ut in sequentibus, *valere jugiter volo*.





RESPONSES  
JATRO-APOLOGETICÆ  
AD IPSAM  
DISSERTATIONEM

In Paragraphos divisam, cujus tota series hæc est.

DE ABUSU CHINÆ CHINÆ

Dissertatio Epistolaris.

§. I.



Quæfisti à me per literas, nec semel (a) *Nepos* carissime, quidnam ego sentiam de celebri Febrifugo Peruviano, cujus usum (b) *istic* tam frequentem, tam magnum sensum factum ais, ut qui sine hoc præsidii genere ad febrem oppugnandam velit accedere, tanquam inermis accedat, ac si forte æger intereat (c) *pro magno piaculo* habeatur remedium istud non fuisse pertentatum. Quosdam tamen adhuc esse, ut scribis, ingenuos Medicos, qui sui juris sint, & hujusce remedii usum quidem non abhorreant, sed (d) *modum adhibendum* velint, ut nec tam facile, nec in tanta copia sit exhibendum, sed potius hac in re rationem, & experientiam consulendam, longe tamen vincere illorum numerum, qui sibi plaudunt ex hoc solo remedio curatas febres, quas Natura si non tam cito, tutius tamen curasset non ita facile redituras.

(a) (*Quæfisti &c.*) **P** *Is* *primùm a*  
*Capite fœtere*  
*incipit.* Nepoti pluries sciscitanti, usumque  
Chinæ Chinæ verè immodicum describen-  
ti (siquidem tam latè, ut in hoc Paragra-  
pho asseritur, ille scripserit) æquum erat

certè, ut hujusmodi excessum minimè  
probans rescriberet Patruus: neque enim  
is sine stomacho aliquo audire poterat,  
Mutinensibus Medicis fere omnibus pra-  
vum hunc esse morem (quod tamen lon-  
gè abest.) ut Febrim quamlibet armata

Dd 2

sem-



semper Peruviano Cortice manu indiscriminatim aggrediantur, imò apud eos hodie piaculum reputari, hoc intentato præsidii genere Febricitantem quempiam interire. At minimè æquum, ut a seipso paucos ante annos scribente, novis nullis emergentibus causis, dissentiret, ac in percunctantis opinionem planè oppositam, inexplorata rerum narratarum veritate, mediis typis publicis, præceps descenderet. Sanè si minùs frigide Urbis hujus Medicos, magis verò sobriè Nepotem suum dilexisset Cl. Auctor, æquius, ut opinor, hac de re iudicium tulisset: *Oportet siquidem solum diligere cum judicaveris, non cum dilexeris judicare*, inquit Cic. de Amicitia. Cæterum Relatori ad præscribendam Chinam Chinam tunc temporis parum propenso, mirum non est, si fortè usus laudabilis, a scrupulosiore tamen ipsius methodo nonnihil recedens, imposuerit nomine abusus; multòque minùs mirum, quòd accedentibus partium studiis, isthæc tandem Nepotem non modò, sed & Patrum ipsum transversum egerint. Quòd inter nimis austeros in oblatione Corticis collocandus tum fuerit Nepos Cl. Auctoris, satis superque nunc potest eruere quilibet pluribus ex locis Therapeutices meæ, ut pag. 214. historia 9. pag. 179. hist. 2. pag. 202. hist. 11., nec non etiam pag. 229. hist. 2. Idem namque ille est, cujus nomen locis citatis semper officiosè subticui; modo verò scriptæ Dissertationis occasione cum indicetur a Patruo, totius quoque Causæ cognitioni admodum conducit haud ampliùs occulere; quemadmodum nec grave est mihi, eum in hac materia opinabili, & libera palam ferre discrepantem a me, qui discrepat, aut discrepabat saltem, ut legitur in contextu, a *longè majore Medicorum Mutinæ degentium numero*. Occasione scribendi, quam captare sibi complacuit Cl. Ramazzinus, quantum sufficit explicata, minùs forsan posthac habebit unde obstupescat quisquam, Cl. Auctorem ab iis, quæ pro Cortice nuper scripserat adeò insigniter descivisse in hac Dissertatione, ubi Causam instantis Nepotis jam facit suam. Etsi enim profiteatur §. 49. *ad publicum beneficium isthæc se conscripsisse*, nihilominus & in Rempublicam (ut puto) inofficiosus, & sibi met ipsi, quæ antea docuerat refellens, quodammodo injurius, solis Nepotis sibi carissimi votis, Censu-

ram in *longè majorem Mutinensium Medicorum numerum* præstolantis, obsecundavit. Sed satius forsan fuisset respondere sciscitanti: *Ipse Testudines comede, qui cepisti*.

(b) (*Istic &c.*) Vastissimum illud *UBIQUE* Epistolæ Nuncupatoriæ statim ad breve *ISTIC* Mutinensis Pomcerii contrahit Cl. Auctor. Liceat ergo & mihi hoc idem *ISTIC*, quatenus solas connotat Mutinensium Medicorum domos, restringere sensim in pulcherrimum, & æquali extensione præditum *NUSQUAM*.

(c) (*Pro Magno Piaculo &c.*) Piaculum certè foret sinere, ut hoc remedio minimè pertentato Æger occumberet, si ex *Febre Intermittente Perniciosa* interiret, aut alia simili, ejusdem *tantummodo*, non alterius cujusvis remedii viribus cessura, unique *Natura* palam succumbenti linqureretur jam desperanda curatio, ne fortè aliquando rediret febris per Chinam Chinam fugata. Si verò obiret ex Febre, remedium hocce respuere, aut eludere solita, cujusmodi sunt omnes Synochi, aliæque ab essentia continuæ, tunc potius illiud pertentasse, ridiculum. Neque verò, ut quis *ingenuus* dicatur, & *sui juris Medicus*, necesse est illi, usum proficuum hujusce Febrifugi ab aliis præmonstratum, sibi que cognitum ut talem, rejicere, alienamve Methodum, ne servus videatur, etsi res exigat, minimè amplecti.

(d) (*Modum adhibendum &c.*) Modum adhibendum esse, ne nimis facile, aut nimia copia exhibeatur Remedium istud, *rationemque, & experientiam hac in re consulendam*, ipse quoque in Opere meo pluries inculcavi (quis enim tam ferreus, ut aliter sentiat?) quodque magis refert, perpetuò etiam utramque consului. Quamobrem si fortè me collocet Cl. Auctor in Classe illa numerosiore Mutinensium Medicorum, qui, ut inquit, in hujusce Febrifugi usu modum non servant, sciat se hallucinari quamplurimum, cum debeat me potius reponere in eorum Classe, qui modum adhibent. Et primò quò ad nimiam in Peruviani Corticis administrationem facilitatem, an ego vacem hujusmodi culpa, manifestè visitur ubicunque de abusu illius, vel de tot cautionibus, pro casuum varietate hic, & nunc in eo præscribendo adhibendis, locutus sum. Atque ut rem minutius persequar, si sermo sit de hac facilitate in Febri-



Febribus *Intermittentibus vulgaribus*, seu non malignis, videndum Caput octavum Libri primi, præcipuè a pag. 75. usque ad finem Capitis, & duæ priores pagina Libri secundi, videlicet pagina 95. quibus in locis me nedum cautum, sed & scrupulosum prodidi. Si verò sit sermo de *Subcontinuis malignantibus* (in *Intermittentibus enim malignis*, ac præsertim in præcipiti earum periculo me facilem non solum fateor, sed & profiteor) videndum Caput quintum Libri quarti; imò, & Caput sextum ejusdem Libri a pag. 283. usque ad finem ipsiusmet Capitis. Si denique sermo sit de *Continuis* absolute cujusunque speciei, legendum Caput secundum, tertium, & quartum, præcipuè verò tertium Libri quinti, tandemq; lustranda Icon Febrium China China curandarum, vel non curandarum, quæ prostat Cap. quinto ejusdem Libri. Ex quibus omnibus clarè elucescet, me hujusce Febrifugi usum a quamplurimarum Febrium curatione planè proscribere, ad alias planè admittere, ad alias verò, imò etiam ad eandem in diversis illius stadiis modò admittere, modò rejicere, summa in hoc adhibita circumspèctione, tantaque interdum, ut remedium istud, quantumvis natura sua prorsus innoxium, alias tamen ob causas sæpius contra Gravissimorum Scriptorum placita minimè verear excludere, vel alicubi nonnisi cunctanter admittere, aut potius permittere, ut latius de his omnibus in Responsionum processu.

Quò verò ad exuberantem illius profusionem, si quis me ab hoc quoque crimine immunem velit dignoscere, legere ne gravetur Caput septimum Libri primi, quod est ad quantitatem in *diuturnioribus Intermittentibus* præscribendam, ubi me non transcendere intra hebdomadas tres, pro earum curatione simul, & præcautione, pondus unciae unius Chinæ Chinæ clarè deprehendet. Quòd si loquamur de *Intermittentibus malignis*, aut etiam de *Subcontinuis*, ut vocitavi, pariter *malignantibus*, & in *acutas* sensim migrantibus, dispiciendum est Cap. 3. Lib. 3. præsertim a pag. 158. usque ad finem, & Cap. 4. ejusdem Libri a pag. 172. usque ad 174. inclusivè. Atque ibi me pro harum validissima curatione in occasione præcipiti non plus Corticis impendere, trium pariter hebdomadarum spatium, quàm sesquiunciam, aut ad summum uncias duas, peculiariter tantum distributas, cuique

*Torti Respons. ad Ramazz.*

obvium est cernere. At hæc quantitas, imò & longè minor, quæ in *Benignis* impenditur, quo jure poterit imbrobari a Cl. Auctore, qui, ut vidimus in *Collatione* Textuum illius Cortici favorabilium, Textu literis K. L. M. signato, admittit usum Corticis hodiernum *ad plures dies, donec scilicet febrile miasma sit penitus exanclatum*? Ad quòd equidem opus absolvendum, eam requiri ad minimum, quam taxavimus quantitatem, nemo non videt; quotidiana siquidem id ipsum experientia confirmat. Denique si de omnibus antedictis varia identidem, attentaque determinatione a me statutis, præter scrutiny rationis, quis etiam *experientiam* desideret, quam quoque *consulendam* esse monet egregiè Cl. Auctor, præter historias omnes tribus primis Capitibus Libri 4. comprehensas, quæ Methodum meam, & proficuum, & rationalem ostendunt, præter illas inquam, ut meam insuper cautionem quoque; imò, & nonnunquam hæsitantiam in præscribendo Cortice, in experimentis ipsis, & observationibus plurium, ac plurium annorum fundatam queat dispicere, adeat Cap. 10. Libri primi, Cap. 6. Libri quarti, & Cap. 4. Libri quinti, ni velit insuper inspicari casus alios innumeros per totum Tractatum meum dispersos. Quæ omnia in ipso Dissertationis limine per extensum indigitasse sufficiat, in reliquo clariùs adhuc exponenda ejusdem Dissertationis, ac Responsionum mearum progressu. An verò his omnibus satis patefiat, non solum *modum* ubique *adhibitum* fuisse a me in China China præscribenda; verum etiam fuisse definitè indicatum, quinam esse debeat, & qua religione servandus sit hujusmodi modus, a Cl. Auctore generaliter tantum deprædicatus: item an ipse *nimis facile*, aut *nimia copia* in Therapeutice mea illam præscribam, aut præscribendam doceam, ut fortasse visum est Nepoti, & Patruo, penes Practicos judicium sit. Quòd si fortè quispiam ex Nostratibus Medicus, me inscio, revera sit, vel videatur nimius in usu Chinæ Chinæ, illum, illosve, quotcunque sint, sicuti si regulis, & cautionibus a me positis eadem utantur, rectè utentes dicam; ita si secùs, forsitan abutentes. Sitne verò Mutinæ major Medicorum sibi ex hoc plaudentium, vel non plaudentium numerus, ego sanè, qui gressus alienos non dinumero, calculum hunc nequaquam subduxi.



## §. 2.

**Q**uaris ulterius an salutare consilium esset usum Chinæ Chinæ per-  
tentare ad solam prophylaxim, num scilicet antequam ingruat  
solita febrium periodicarum tempestas per æstatem, sive autu-  
mnum, bonum esset Chinam Chinam adhibere ad præcautionem,  
ne generetur fermentum illud, quod hujusmodi febres excitare solet.

(Quaris ulterius &c.) **F**Ucatum hoc  
abnuo scalpere, ne color <sup>Quæsitum</sup> Dissertationi ob-

ductus repentè concidat. Cum verò jam  
præ crassitie sua incipiat ille concidere,  
quamvis non scalptus, *alium* idcirco  
— Dic Quintiliane colorem.

## §. 3.

**U**T honestis petitionibus tuis satisfaciam, ad primum Quæsitum  
respondeo, juxta varias ætates, quas Divina Beneficentia per-  
currere mihi indulgit, (a) *varie ac diversimode* de Peruviano Cortice  
me sensisse; juvenili ætate, ac in virili etiam statu, fateor mihi in  
magno pretio habitam Chinam Chinam, & illa familiariter usum,  
non ita tamen ab illius vesano affectu me fuisse infatuatum, ut il-  
lam tanquam Panaceam omnibus remediis præferrem, procedente  
vero ætate, (b) *experientia edoctum* à priori sententia recessisse me non  
parum, & non nisi cum summa cautione remedium hujusmodi præ-  
scripsisse. Sic frequenter evenit non solum in re Medica, sed in aliis  
quoque facultatibus, quod agebat Demea ille Terentianus.

*Nusquam ita quisquam benè subducta ratione ad vitam fuit,*

*Quin res, ætas, usus semper aliquid adportet novi,*

*Aliquid moneat, ut illa quæ te scire credas, nescias,*

*Et quæ tibi putaris prima, in experiundo repudies.*

(a) (*Variè, ac diversimodè &c.*) **V**A-  
riè, ac diversimodè sensisse, aut saltem scri-  
psisse Cl. Auctorem de Peruviano Cortice  
diversis temporibus, verum est nimis. Ju-  
venili ætate, ac in virili etiam statu eam  
magno in pretio illi habitam quidem fuisse;  
sed procedente ætate à priori sententia ipsum  
recessisse non parum, bona ejus venia, di-  
stinctione indiget; enormis enim hic latet  
æquivocatio. Ante annum ætatis suæ 57.  
ac ideo tum in juvenili, tum in virili et-  
iam statu fuisse Cl. Virum usui Corticis  
fatis addictum ea vulgari, quæ tunc vige-  
bat methodo, minimè inficias iverim: id  
enim & me non prorsus latet. Ab anno  
57. usque ad annum 61. ejusdem ætatis  
suæ, nempe ab anno 1690. usque ad an-  
num 1694. (quo tempore Constitutiones

Epidemicas Mutinenses conscripsit) reces-  
sisse ipsum nonnihil a priore sententia, ita-  
ut nonnisi cunctanter, & cum recensitis  
paulò ante limitationibus, quas modò fer-  
me ad proscriptionem usque remedii coar-  
ctat, illius usum admiserit, ultro patet  
ex iisdem Constitutionibus. Ast progre-  
diente adhuc ætate, & praxi, æquè pa-  
tet, illum incomparabili huic Febrifugo  
strictiore longè fœdere, quàm in ipsa ju-  
venili ætate se devinxisse. Id statim pate-  
fecit, ac Patavinam Exedram cœpit con-  
scendere, fretus, ut reor, ulteriore ex-  
perientia ab an. 1694. ad an. 1700. acqui-  
ta: quo anno primam habuit in eodem Pa-  
tavino Athenæo Orationem, quam *Secula-*  
*rem* dixit; in cujus decursu non vulgari-  
bus Peruvianum Corticem laudibus extu-  
lit. Multò magis extulit in *Tertia* anno  
1702.



1702. ibidem habita, & in *Septima* habita anno 1706. Tandemque anno 1712. in *Dissertatione De Contagiosa Epidemia, quæ in Boves irrepsit*, eoque devenit, ut sphaeram activitatis hujusce remedii propagare conatus fuerit, quousque illam tunc me propagaturum spoponderam in *Synopsi Tractatus mei* antea edita. Quamobrem quasi iis, quæ ipse promulgaturus eram, prævium calculum vellet apponere, ad *Tertianas Perniciosas* curandas mirabile remedium esse Chinam Chinam pronuncia- vit: Quorum omnium veritas, absque eo quod hanc crambem ad nauseam usque recoquam, satis liquet ex *Collatione Textuum* illius supra prolatorum, ad quos Lectorem iterum remitto. Constat itaque evidenter, illum in provectiori, gravique ætate nempe ab anno 67. circiter ejusdem ætatis usque ad 79. eam mutasse strictio- rem sententiam, quam anno tantum 57. ad 61. professuserat, ut in mea *Therapeu- tice* asserui pag. 316. Adedque toto vitæ suæ cursu quater saltem diversimodè, sen- tentiis videlicet alternatim oppositis, opi- natus est de Peruviano Cortice Cl. Auctor. Juvenili siquidem ætate, ac in virili statu

illam in magno pretio habuit, ut hic fate- tur. In prima senectâ habuit in minori, ut patet ex *Constitutionibus Epidemicis*. In secunda senectâ usq; ad decrepitam ætatem (siquidem menti tam vegetæ ulla unquam obtigit ætas decrepita) habuit in maximo, ut *Opera* illius palam commonstrant. Ul- tima tandem Vitæ periodo, ab anno sci- licet 79. usque ad 81., quo fatis cessit, habuit in minimo, ut nupera hæc *Disserta- tio* rursus testatur.

(b) (*Experientia edoctum &c.*) Hancer- go, qua edoctum se profitetur Cl. Auctor ulteriorem experientiam, ab editione tan- tummodo Tractatus mei, Fungorum mo- re, citra cultum repente prognatam, ste- rile biennium octogenariæ ætatis produxit. Ast reclamat ille §. 18. hujusce *Disserta- tionis. Observationes istæ*, scilicet usui Cor- ticis infensæ, *multorum annorum sunt fru- ctus* (rectius dixisset *duorum*, quos retuli) & *longævitas a divina beneficentia mihi concessa*. Quid ergo? Insequarne amplius Virum, qui vel in dolo aliquo deprehen- sus, *unum pro re nata pedem habet in cal- ceo, & unum in pelvi?*

## §. 4.

**A**bsit tamen, ut febrifugi hujus vim arcanam contemptui ha- beam, etenim ingenue fateor Peruvianum Corticem unum es- se ex iis quæ facilius admirari possumus, quam intelligere. Sicuti enim divinum illud Hippocratis aliquando in morbis reperitur, idest quiddam abditum, quod humanum captum excedat, ita etiam in ali- quibus remediis observatur non raro το θεον & potissimum in Peru- viano Cortice. Admirandum est profecto quomodo ad exiguum pul- visculum quomodocunque exhibitum febris periodicæ furor conquie- scat, interdum etiam extinguatur, quod de quocunque alio remedio pharmaceutico non tam facile observatur, quod sciam. Opium equi- dem, ex quo Nobile illud Nepenthes dolorum sedativum, paucarum horarum spatio dynamin suam ostendit, spiritus animales consopien- do, sed hujusmodi virtus ephemera est, nam altera die dolor redit, ast Chinæ Chinæ beneficium non tam paucis diebus clauditur.

(*Absit tamen &c.*) **M**alo nodo malus Cuneus, dici solet; ast hic duro nodo mollis, & iners Cuneus a Cl. Auctore adhibetur: artifi- ciosa quippe isthæc laudum pondere caren- tium congeries enomiasticis Textibus, aliàs a Cl. Ramazzino editis, nequit supplere Commentarii vicem, ut ille fortassis au-

tumat; nisi Commentarii nomine veniat hic explicatio germano textui planè con- traria. Aliud namque est asserere, ut hic asseritur, inesse Chinæ Chinæ nescio quid arcani, quid abdit, quid tandem divini, uti quid divinum, aut potius quid divi- nandum latet in morbis, & asserere in eam præcisè finem, ut in progressu post-



modum ostendatur, illud idem Arcanum illudque mirabile, quod humanum caput excedit, & Chinæ Chinæ inest, illud inquam, ob hoc ipsum quod arcanum est, esse in praxi amethodicum, irrationale, merè empiricum, natura sua dolosum, ac noxium, malitiamque habens occultam, & noxam inferens tantò perniciosorem, quanto occultio-rem, ut infra §. 6. 8. 15. 47. 50. &c.: aliud est scripsisse, & sinè ulla limitatione pluries promulgasse, eam esse Remedium, non habens tantummodo quid divini (id nempe divini, quod etiam in morbis malignis, & in venenis exiti- alibus delitescit) sed divinum planè, tanquam munus, a divina beneficentia nobis concessum,

ad malè natam Februm sobolem, non consopendam tantum, ac interdum etiam extinguendam, sed absolutè exterminandam, & exaltandum penitus febrile miasma, dummodo ad plures dies exhibeatur: cui remedio simile aliud optandum est favore Numinum, & commiseratione, qua solent in res humanas, ad Febres verè Continuas, & Continentes pari securitate sanandas, ac sanantur ab eo Periodica &c., quemadmodum latius legitur in Collatione pluries indicata. Certè Glossa recens minimè cohæret veteri Codici, digna tantum quæ apud Mulieres, & imperitam plebeculam (si Cl. Auctoris verbis uti licet) locum habeat, non apud eos, qui sapiunt.

## §. 5.

(a) **C**ætera remedia, uti omnia emetica, cathartica, hydrotica in morbis quibusdam promptam opem quam spondent, re ipsa præstant, sed cum ratione, dum è corpore peccantes humores eductos adspicimus, aut exhibito Cortice, sive in mediocri, sive in larga dosi, saltem ut plurimum nihil sensibile propelli videmus, fortuitum enim est si aliquid per vomitum rejiciatur, sive propinata China China contingat alui dejectio, (b) virtute ergo secreta, & adhuc incomperta Febrifugum istud agit id, quod agit.

(a) (Cætera Remedia &c.) **Q**UOD perfunctoriè, ut sic dicam, habet hæc Cl. Auctor de carentia, saltem ut plurimum, sensibilis evacuationis ab epota China China, non videtur prolaturum per modum objectionis; sed etsi eo etiam nomine intelligatur, vulgarem huiusmodi oppositionem ad ultimas usque ineptias solutam vide Cap. 3. 4. 5., & 6. Libri primi Therapeutices meæ. Quod si te pigeat huiusce generis Pandectas evolvere, & nihilominus Cathartorum, Emeticorum, aliorumque similium remediorum inutilitatem, ac noxam, in concursu Febrifugi Corticis nil sensibile propellentis, paucis expressam nosse desideres; adi tantummodo Cl. Auctorem Orat. 3. Jatrici Argum. pag. 101., ubi hæc reperies. *E singulari huius remedii præstantia (loquitur de Peruviano Cortice) quod in Periodicas Febres vim suam potissimum exerat, id beneficii fuimus assecuti, ut verum discrimen inter Febres Intermittentes, ac eas, quæ verè sunt Continua, nec non inter illarum focum te-ueamus; neque amplius unica methodo Febres omnes curentur, tam Gastrica, quam*

*Venosa, continuato scilicet refrigerantium, & humectantium usu, tot repetitis vena- sectionibus, tot iteratis purgationibus, quæ humani corporis machinam potius infirmant (en ergo quid præstent in curandis huiusmodi febribus remedia, quæ humores e corpore educunt, quæque in hoc Paragrapho tam fidenter dicuntur re ipsa præstare promptam opem, quam spondent) sed illa tantum Febres, quæ de Intermittentium familia sunt, pulveris exigui haustu in vino soluti, aut compressa quiescant, aut etiam penitus aboleantur. Aboleri possunt igitur secundum ipsum Cl. Auctorem Febres, quæ de Intermittentium familia sunt, haustu pulveris exigui nihil sensibile propellentis. Quomodo autem tutò, & rationabiliter id fiat, videre est per extensum locis nuper citatis Therapeutices meæ.*

(b) (Virtute ergo secreta &c.) Hocce effectum per modum Consequentiae hic loci prolaturum, sinè ullo etiam antecedente, nemo, quod sciam, unquam negavit. Ratio tamen potissima (si velimus ingenuè fateri) cur tam secreta sit virtus huiusce Febrifugi, est quia secreta est Causa Februm



brem Intermittentem gignens; hac enim cognita, facile forsan esset dignoscere quidquid habet in se China China, quod hujusmodi Causæ opponatur. Ita quoque si Chinæ Chinæ in febres agentis ratio intima innotesceret, ad incompertam febrium ipsarum notitiam via facilis sterneretur. Ob hanc rationem Villis, Borellus, & alii ominati sunt, fore, ut ex hujusce Corticis virtute, quamvis adhuc occulta, lumen sufficiens aliquando trahatur ad detegendam *occultam* pariter Febrium Intermittentium naturam. Sed hi fortasse Viri, inquiet Cl. Auctor, ut in §. septimo, haud satis *sana mente disquisiverunt de hoc Peruviano Febrifugo*. Audiamus potius illum nulla præoccupatione detentum, neque (quod maximè cavendum præcipit eodem §. septimo) *de China China Tractatus edentem, sed ingenuè data occasione tractandi de Febris suum judicium ferentem*. Hariolari licet, inquit ille Orat. 3. Jatr. argum. pag. 103. *hariolari licet, ex admiranda hujus Corticis virtute Febris naturam medullitus aliquando*

*erutam iri; passim enim hujus celeberrimi Febrifugi Chymica Analysis instituitur &c.* Consequentia igitur, quæ ex hisce omnibus debet inferri de *virtute abdita* Chinæ Chinæ, respectu habito ad virtutem patentem aliorum remediorum, mediis evacuationibus sensibilibus morbos nonnullos curantium, ea non est, quam illaturus est Paragrapho sequenti Vir Cl., quod nempe *amethodicus* idcirco sit illius usus; sed est ea, quam infert, ab ipso Cl. Auctore sæpissimè laudatus Sydenham, in Præfat. ad Lectorem lib. de *Observationibus Acutorum*; videlicet Peruvianum Corticem hac de una causa, quod *virtute ignota sine evacuatione sensibili* determinatam morbi speciem delet, ac destruit, jure merito *Remedium Specificum* appellari; imò *unicum* esse in Medicina, cui verè competat *Specifici* denominatio: remedia verò, quæ mediantibus evacuationibus ad varios morbos curandos adhibentur, æquè improprie appellari *Specificæ*, ac quis *Scalpellum Phlebotomum* Remedium Pleuritidis *Specificum* vocitaret.

## §. 6.

**D***iu equidem*, seu frustrante diligentia à sagacioribus Medicis allaboratum est circa hunc Corticem, ut aliquid proferrent quod animum veritatis avidum expleret, *sed vincit adhuc natura latendi*, ut olim de Nili origine cecinit Lucanus. Cum ergo post tot conatus magnorum virorum, & facta tentamina per varia experimenta, num saltem pro solamine laborum in Vegetabilium familia in Europa aliquid analogum Peruviano Febrifugo reperiri posset, adhuc ignotus sit operandi modus hujus celebris Antipyretici, asserere necesse est rationalem non esse illius usum, sed mere empiricum, & amethodicum.

(*Diu equidem &c.*) **E**X eo quod Febrifugum istud agat virtute *adhuc incomperta*, ut supra adnotavit Cl. Auctor, *sitque adhuc ignotus*, ut modò repetit, *illius operandi modus*, haud satis percipio, cur necesse sit asserere, ut asserit, *rationalem non esse illius usum, sed merè empiricum, & amethodicum*. Hoc jacto fundamento, nunquam China China licebit uti; semper enim obstabit, qui semper *occultus*, & *ignotus* est, illius operandi modus: cum tamen aliquando utendum esse, & quomodo utendum sit, per varia ratiocinia, variasque regulas, quæcunque illæ sint, doceat idem Cl. Auctor in processu Dis-

sertationis, & signatè §. 48., remediumque istud, quod modò *amethodicum* dicit, tandem *methodicum, & rationale* affectet reddere, etsi modo illi etiamnum incompto vim suam exerat antipyreticam. Sic egomet illud idem, in prima licet inventionem suam, ut alia remedia ferè omnia, prorsus empiricum, ad rationales demum, & insolitos usus extendere pro viribus conatus sum, præeuntibus mihi aliis non paucis, egregii hujusce Febrifugi fortuito quondam detecti utilitatem eximiam legibus Artis promovere, & ampliare studentibus. Scilicet non pudet Medicos culti hujusce Seculi (inquit doctissimè suo more Eruditissimus D. Antonius



nus Franciscus Bertini in præclarissimo Opere suo, cui Titulus -- *La Medicina difesa* pag. 171.) non pudet, inquam, Medicos hujusce Seculi; imò referunt ii in decus suum, Chinam Chinam, qua primò a Barbaris uti didicere ad Quartanas tantum expugnandas, ad meliores usus quotidie transferre, nedum ratione, & observationibus fulti; verum & auctoritate ipsius Hippocratis, sic, illo notante, docentis. *Neque verò pigeat ex plebejis sciscitari, si quid ad curandi opportunitatem conferre videatur.* En igitur quo pacto ex mente Divini Senis remedia empyrica parum nota, & a plebejis ipsis petita accedente demum Medicorum observatione, studio, & industria, ad rationales Canones redigi possint. Verum quid multis? Nonne ignota nobis est virtus cujuscunque Specifici, quorum tam creber est usus, & copia tam ferax in Medicina, ut series eorum, si cuncta vellem persequi, facile volumen impleret? Nemo certè virtutem novit, seu modum actionis, quà Lapis Aetites abortum dicitur præcavere, Judaicus mederi Nephritidi, Hæmatites Hæmophthysi, tot Amuleta Quartanæ, aut Tertianæ Febri, tot alia Ictero, Epilepsiæ, Hystericæ affectioni &c. An igitur horum virtus, & actio, quantumvis *occulta*, *methodica* vocabitur, & *rationalis*, quia ut plurimum *futilis*, aut *nulla* est? Si hac ratione methodicus est rerum hujusmodi occultè agere creditarum usus inanis, verè ex Contrariorum regula erit amethodicus, nedum usus Peruviani Corticis apud Medicos, sed & apud Nautas

usus Acus nauticæ, quia *ignota*, & adhuc incomperta est virtus utique certa, quæ verè Magnes constanter respicit Polum. Extraordinarium magis est id, quod additur a Viro Cl., nempe amethodicum esse Chinæ Chinæ usum, eò quia in *Vegetabilium Familia* nihil illi analogum adhuc reperiri potuerit in Europa. Anne quidquid ab Indis ad nos defertur, cui simile non sit in Europa, vocabitur amethodicum in Medicina? Exulent igitur a Pharmacopoliis quævis Aromata. Si verò Cortex Peruviano Cortici analogus in Europa reperiretur, numquid propterea methodicus una evaderet Americanus, & Europæus Cortex? Sed hæc frustra obtruduntur a me Cl. Auctori, qui decreto irrevocabili jam sancivit, ex eo quod *ignotus sit adhuc operandi modus hujus celebris Antipyretici*, necesse esse asserere, *rationalem non esse illius usum, sed merè empyricum, & amethodicum.* Appello itaque a D. Ramazzino Cortici irato ad D. Ramazzinum Cortici benigniorem, & ante paucos anno ingenuè fassum, æquè *ignotum* esse operandi modum *omnium* fermè, quot quot habet Ars Medica, *remediorum*: ideoque optandum esse simile aliud Febrifugum pari *securitate* Febres verè Continuas sanans, ac istud sanat Periodicas; neque referre quicquam, etiamsi *ignoto* illius operandi modo, *caco nos modo Andabatarum more* contra easdem Febres pugnaremus. Vide propterea, tum Textum notatum lit. C.; tum maximè alium notatum lit. I. in *Textibus Ramazzinianis* Cortici favorabilibus, & ni obstupescas, obstupescam.

## §. 7.

**S**uppono Te clariores Scriptores legisse, non eos solum qui ex professo de China China scripsere, qua de re tot in dies prodeunt novitates, ut de hoc remedio jam habeamus Pandectas, sed etiam eos, qui data occasione tractandi de febribus, ac illorum remediis, de hoc Peruviano Febrifugo (a) *sana mente*, ac ingenuè disquisiverunt, facile enim Tibi fuisse existimo observare quàm parum convenient quæ ex professo de China China tractatus edidit, & illi qui data occasione de hoc remedio iudicium suum tulere, priores enim (qualis mos est eorum, qui de aliquo novo medicamento tractatus integros edunt, in eo quod laudandum assumpsere modum nesciunt, ac ut ait Juvenalis de magnis maiora loquuntur) summis laudibus remedium istud ad Astra efferunt, (b) *Arborem Vitæ* illud appellantes, alii vero suspensopede de China China procedunt, (c) *bona & mala* quæ non raro inferat



ferat ingenue exponentes, sic (d) *laudatur ab his, culpatur ab illis, ut legentes, ac præsertim Juvenes dubios relinquant in quam partem se dedere debeant.*

(a) *Sana mente &c.*) Quasi sana mente non disquisierint, qui ex professo de China China scripsere, ac edidere Tractatus. Sed hoc in obsequium defuncti missum faciamus. Sana certè mente de hoc Febrifugo disquisivit Cl. Auctor in suis Orationibus Jatrici Argumenti, ubi tot, quas partim recensuimus, partim etiam non recensuimus laudes effudit; & quidem majores, ac unquam effuderint ii, qui, ut inquit ille, in ea laudanda modum nesciunt, ac de magnis majora loquuntur. Sana inquam mente tunc disquisivit de China China Cl. Auctor; tum quia non aliter potis erat quicquam scribere; tum quia, non ad augendas de hoc Remedio Pandectas ullo scripsit percussus affectu, sed data tantum occasione tractandi de Febris, & signatè in tertia ex iisdem Orationibus (quæ circa Febres versatur tota) ut fusè jam vidimus. Qua postmodum, & quàm sana Minerva scripserit ille in hac Dissertatione, ubi ex professo de China China agens, sentit oppositum, decernere meum non est.

(b) (*Arborem vitæ &c.*) Ego certe, qui de hoc Remedio Tractatum integrum edidi, Arborem Vitæ illud me appellasse non memini. Memini tantum, pag. 4. ejusdem Tractatus dixisse hæc obiter; cum videlicet facilem relapsum in Febres, assumpta semel, ac unica tantum dosi China China, citra contentionem concessi -- Nisi hoc unum obstaret, Arborem Vitæ in China China superstitem divina clementia crediderim -- Sed hic Vir Cl. incidit solus in foveam, quam fecit. Mihi enim obstitit aliquid, ne Chinam Chinam appellariin Arborem vitæ. At illi, nullum de eadem Tractatum edenti, nil obstitit, quò minùs asseruerit, ut in præmissa Collatione Textuum, Hieron hoc Picron ex Arbore Vitæ fuisse decerptum. Sic dum Vi-

neta mea cædere satagit Cl. Auctor, cædit sua.

(c) (*Bona, & mala &c.*) Satis memetipsum citavi, ut ostenderem, quàm suspensio pede processerim in Opere meo, usum Chinæ Chinæ methodicum omni adhibita cautela ibidem indigitans. Malos verò æquè ac bonos eventus an ingenue exposuerim, quos ab illius administratione, vel præposita, vel præpopera, vel minùs castigata, vel minùs circumspecta procedere observavi, facile est cernere a pag. 276. usque ad 277. & a pag. 310., usque ad 313. ut & pag. 324. & 326. ejusdem Operis. Imò si quis ultro neam quoquè ingenuitatem meam velit adhuc clariùs dignoscere, lustret historias defunctorum, quibus, vel planè desperatis, vel constitutis in aliis quibusdam difficillimis circumstantiis inutiliter solum (neque enim noxiè) propinatus est Cortex: eas verò reperiet a pag. 182. usque ad 185. Tractatus ejusdem. Ut proinde, si fortè modò me petat, me certè nequam attingat Cl. Auctoris Censura.

(d) (*Laudatur ab his &c.*) Laudari ab uno, & culpari ab alio, est Fatum pluribus aliis Remediis commune; ut laudari ab uno, & ab eodem culpari, unius est Chinæ Chinæ in Scriptis Cl. Ramazzini. Inde puto & ego, fore posthac, ut non ampliùs ambigant Juvenes, in quam partem se dedere debeant. Viro enim Cl. in Collatione superius allata viam utramque præmonstrante, tam dextrorsum vergere impunè poterunt, quàm sinistrorsum. Nisi forsan illis in eo bivio, cui simile raro visitur, constitutis contingat, quod sibi metipsi, Veterum, & Recentiorum volumina, ut naturam Febrium exploraret, evolventi, contigisse refert idem Cl. Auctor pag. 89. Orat. Jatrici Argumenti, recollens illud Terentiani Senis -- Incertior multò sum, quàm dudum.

## §. 8.

(a) **I**N provectiori ergo ætate experientia edoctus, & observatis noxiis ab illa prognatis, cautius in illius usu processu, & mediocri solum dosi præscripti (b) ad drachmam unam vel duas in febribus intermittentibus, quando nimis protractæ ægros fatigarent: in hunc præ-



præcipuum finem, ut aliquot dierum induciis impetratis æger recrearetur, & vires resumeret, (c) *non sine spe*, imo cum certitudine febrem redituram, quæ una cum natura roborata, morbi causam expelleret, seu mutata aeris temperies, quæ in morbis diuturnis magnam vim habet, febris historiam absolveret; hæc mea est methodus, qua in ætate saniori sum usus. (d) *Cæterum* in quacumque febre intermittente, quacumque ætate, sexu, regione, tempore, temperamento, corporis habitu, Chinam Chinam indiscriminatim exhibere velle, magnum abusum esse iudico.

(a) (*In provectiori &c.*) **P**Ræter id, quod diximus §. 3., & dicturi sumus §. 18. de experientia per Cl. Auctorem acquisita in provectiori, ut inquit, ætate pravorum effectuum Peruviani Corticis, hic quoque loci animadvertat Lector, Virum Cl. ab anno 67. ad 79. ætatis suæ (quæ quidem ætas videtur nonnihil provecta) tot, tantaque scripsisse, ut vidimus, & posthac videbimus, in commendationem Chinæ Chinæ, ut minimè verisimile sit, noxas ullas ab ea prognatas illi tunc observatas fuisse. Universam ergo experientiam noxarum huiusmodi eo ipso anno ætatis 80., quo Dissertationem hanc conscribebat, praxique Medicæ exercendæ vitio corporis impar evaserat, ipsum acquisivisse necesse est, & tunc tantum Chinam Chinam cautiùs præscribere didicisse. Hæcine ergo longa illa multorum annorum experientia tam inconcussa, quam jactitat?

(b) (*Ad Drachmam unam &c.*) Præscribere tamen ad Drachmam unam, & semel tantum, idem est ferè ac non præscribere. Ad Drachmas autem duas in istiusmodi diuturnis, benignisque Intermittentibus Febribus, verè sat est, ad impetrandas aliquot dierum inducias; quandoque etiam ad extinguendam Febrim: neque ego hisce casibus hanc dosim vulgarem transcendendo, ut aliàs sum effatus; nec rarò quoque unam tantum Drachmam prima vice præscribo. Sed si ve unam præscribam, si ve duas, sequentibus semper diebus nonnullas iterum Drachmas, vel saltem semidrachmas sumendas præcipio, ne, si fieri possit, Febris, ut verè nocens depulsa, iterum redeat. Id ipsum commendavit aliàs Cl. Ramazzinus, tum in Dissertatione *De Contagiosa Boum Epidemia*, fassus ibi pag. 38., tacitèque approbans, ut ex contextu, quòd nostris temporibus huius remedii dosis largior esse

cæpit, quàm olim, tum in Orationibus Jatrici Argumenti pag. 102. his verbis. *Postquam huius Remedii usus innotuit, & non semel tantum, ut olim, sed plures ad dies exhiberi cæptus, donec Febrile miasma fuerit penitus exantlatum, talem Febres curandi Methodum factam fuisse fateri oportet, qualem in re Militari post inventum pulverem pyrium omnes norunt &c.*, ut fusiùs in Collatione Textuum illius lit. K. L. M. Immeritò ergo nunc ad unam, vel alteram Drachmam restringit rectum usum Corticis idem Cl. Auctor. Alia profectò mensura, & quidem pro Febrium varietate varia, statuenda est. Verùm de congruente singulis Febrium generibus Chinæ Chinæ dosi, plenior in sequentibus suo loco sermonem habebimus.

(c) (*Non sine spe &c.*) Plura hoc loco sunt perpendenda. Inquit Cl. Auctor, se Chinam Chinam præscripsisse *non sine spe*, imò cum certitudine Febrim redituram. Quoad spem reditura Febris, alicui forsan lusui locus esset, si viveret Vir Cl., cui placuit olim in suis Constitut. Epidem. pag. 125. annotare, quinam fuerit Medicis annus quæstuosior: modò cum cineribus joculari non decet; atque ob id etiam, quòd Viro, non quæstus, sed famæ cupido, minimè congruunt huiusmodi ludicra. Relinquamus ergo hanc spem cuiuspiam Agyræ, aut Circulatori, corium humanum cum se præbet occasio, lubenter negotianti. Quò ad certitudinem verò reditus Febris, quam habuit idem Vir Cl., cum Chinam Chinam præscripsit ad impetrandas tantum aliquot dierum inducias, quispiam me doceret velim, quomodo conciliandus sit Textus iste cum alio Textu Paragraphi 27., qui sic habet. *Hic nimirum Medicorum est error, ut si Chinam Chinam in hunc solum finem præscribant, ut paucos a paroxysmis dies liberos obtineant, interdum eludantur, Febre amplius non redeunte*



ante, sed tacite corpus depascente. Anne igitur unus ille potuit cum Febre pacisci, ut ea rediret? atque ita quidem ex privilegio speciali, ut quod ei licuit, cæteris Medicis nequaquam liceat? Ad hæc si satis cautè se China China usum putat in ætate saniori, quia usus est in hunc precipuum finem, ut aliquot dierum induciis impetratis Æger recrearetur, & vires resumeret, quando Febres nimis protractæ Ægros fatigarent; cur æquè cautè se, vel alios non putaret uti, si Febribus modicè tantum protractis, ea uterentur ad tollenda gravia Symptomata quandoque supervenientia, quæ vires etiam constantes non raro opprimunt, Ægrumque tandem in vitæ discrimen adducunt? Hunc sanè titulum pro præscribenda rationabiliter China China, Viro Cl. cæteroqui suspecta, potiore crediderim, quàm ut Æger a diuturnitate morbi recreetur, & vires resumat.

(d) (Cæterum &c.) Huic Textui ante annos octo hunc alium Textum præmisit, & post biennium sponte recusit Cl. Ramazzinus: feratque Lector coactam hanc repetitionem provocante materia. Solus Peruvianus Cortex, nobis a Divina beneficentia munus concessum, sine alterius rei mixtura (sunt illius præcisa verba, quæ in septima Oratione Patavina leguntur pag. 212. secundæ Edit., & pag. 19. primæ Edit.) in qualibet Regione, quocunque anni tempore, ætate, sexu, temperamento, Febres saltem recurrentes, atque intervalatas fugat, & exterminat. Si adversari sibi metipsi in eadem provectioni ætate non est hoc; quodnam erit? Certè quisquis non ultra conscius hæc legeret, facile Cl. Ramazzinum diceret anno 73. ætatis suæ

quo hæc primò conscripsit, & 75., quo ea recusit, infatuum eo vesano affectu erga Corticem Peruvianum, quo nec fuisse inquit juvenili ætate, cum Chinam Chinam habuit in magno pretio. Sed tantam rerum discrepantiam in tanta verborum similitudine miretur nemo: sic namque iisdem literis Comædia, & Tragædia componitur.

Si qua tamen limitatio extra tot frustraneas a Viro Cl. recensitas constituenda videatur, ea una potius est, quam ego indicavi pluries in Opere meo, locis antea citatis, & alibi; scilicet, ne quocunque morbi tempore (non quocunque tempore anni) imò nec in quacunque Febre Intermittente, nisi videlicet ea Corruptiva sit, Cortex adhibeatur; ne vel præmaturè sistatur Febris, quæ ferius sibi debuisset, vel ea sistatur, quæ absolute non erat sistenda. Quamobrem si arrideret Scholarum distinctio, dicendum esset, Chinam Chinam convenire in quacunque Febre Intermittente specificè, puta, tam in Quartanis, quàm in Tertianis &c. non in quacunque individualiter; sed in una convenire, non in alia: imò ubi etiam individualiter convenit, modò uno tempore illius convenire, modò alio. In hoc consistit, magna saltem ex parte, usus methodicus. Cætera ab eo recensita non prohibent Chinam Chinam usurpari; sed ad summum eorum nonnulla dici possunt quoquo modo prohibere quòd ad quantum, ut, si Puero ea sit præscribenda, minori dosi præscribatur, ac præscribatur Adulto. Sed hæc quibusvis remediis communia cum sint, & vel Tyronibus nota, non est cur illis Practicos velit morari Cl. Auctor.

## §. 9.

Certe in (a) Pueris, & Adolescentibus, ubi per æstatem febribus intermittentibus, quæ ut plurimum sunt tertianæ spuria, raro autem simplices, & exquisitæ, parum proficuum observavi Chinæ Chinæ usum, licet enim videantur aliquantulum mitescere, hoc febrifugo exhibito, sæpissime redeunt, & ad multos menses (b) contumaciores perstant, nec nisi ad oppositas anni tropas receptui canunt. (c) Vidi anno elapso Patavii in familia quadam, quæ multas puellas habebat, eodem tempore febribus istiusmodi laborantes, cum ferina tussi in principio accessionis, quibus cum varia remedia fuissent administrata, sed incassum, & Mater instaret, ut illis præscriberetur China China, nec Medici qui curationi aderant annuere vellent, Mater libere



bere dixit se tale remedium, cujus vim fuerat experta esse exhibituram, quod cum fecisset febres semper contumaciores sunt factæ, ac per totum autumnum, ac hyemem, usque ad veris principium perdurarunt; ætas enim hujusmodi ob errata in victu, & minorem per ambitum corporis humorum distensionem, ab hoc remedio, quod nihil è corpore educit, (d) *sed potius concentrat*, nil opis obtinet; fortior autem ætas, qualis est Juvenum & virorum facilius sustinet incommoda, quæ posset China China inferre.

(a) (*Pueris, & Adolescentibus &c.*) **N**E tēpus inutiliter teram, ostendendo proficuum Pueris, & Adolescentibus Peruvianum Corticem, (quod nonnisi experimentis potest nervosè probari) neve casus propemodum innumeros in medium adducam, qui in dies hoc idem evincunt; sat erit eos tantum rursus indicare, quos in Therapeutice mea protuli, ubi tam diuturniorum *Intermittentium*, quàm *Subcontinuarum*, atque etiam *Lentarum*, non contemnendæ curationes visuntur. Adeat ergo Lector Tractatum meum pag. 87. historia 7. pag. 94. hist. 17. & pag. 96. a principio ad finem. Item pag. 209. historia 3. pag. 227. hist. 1. & pag. 238. hist. 9. Item pag. 319. historia 1. pag. 320. hist. 2. pag. 321. hist. 3. pag. 323. hist. 4. & pag. 325. hist. 6. Non ergo *parum proficuum Pueris, & Adolescentibus est China China usus*, si ea solum cum decet, atque ut decet administratur. Potius non adeo frequens in illis est utendi occasio; quippe quibus facilius est, & febres sortiri *depurativas*, & eas sine gravi incommodo diutius perferre.

(b) (*Contumaciores perstant &c.*) Si perstant Pueris ad multos menses contumaciores Febres, cum redeunt ab epota China China, quomodo *illarum redditus* denuo post Chinam Chinam exoptatur a Cl. Auctore §. 25. *loco remedii*? Vel si *remedii loco stat redditus febris*, cur modò ab eo damnatur hoc idem remedium, cujus actio si diutius perstet, diutius juvabit? Hac data occasione, quærerem insuper, si liceret, cum Peruvianus Cortex commendetur sæpius a Viro Cl. in Constitutionibus suis Epidemicis ad Vermes Puerorum necandos, ut pag. 14. & pag. 61. ipsarum Constitutionum: & cum in præsentí Dissertatione dicatur habere *malitiam occultam*, qua noxas plurimas ratione sui possit progignere, qui fiet, ut solam *virtutem*, qua Vermes necat non *malitiam*, qua homini nocet, exerat in Pueris industrius Cortex?

(c) (*Vidi &c.*) Quidquid Patavii contigerit in Puellis unius Familiæ, quibus forsitan *semel tantum* (scitq; Deus qua dosi, qua lege, qua methodo, & quo morbi tempore) invitis Medicis Chinam Chinam exhibuit impatiens Mater, certum est, Mutinæ mihi longè aliter sæpius contigisse, ut retuli; nec ab uno tantum eventu malè parto assurgit Regula, sed a multiplici. Interim eo quoque casu nil magis profecerant *alia remedia incassum*, ut legitur, *antea administrata*. Neque proinde adhuc mente assequor, unde habuerit Vir Cl. durationem ulteriorem earum Februm ascribendam potius fuisse Chinæ Chinæ, quam aliis remediis æquè incassum administratis. Quoniam ergo, ut subdit, *Contumaciores Febres per totum Autumnum, & Hyemem his Puellis facta fuerunt*, cur illas Veterum Febrifugis, ipso iudice, longè *præstantioribus*, licet è corpore nihil *sensibile* pariter *propellentibus*, quibusque *solis*, ut inquit §. 18., *Medicina posset esse contenta*, non fugavit Cl. Auctor, unde erubescerent, & Chinæ Chinæ Fautores, & audacula Genitrix?

(d) (*Sed potius concentrat &c.*) Si quis Tractatum meum legere non renuat, inveniet passim in historiis, ut in 19. & 20. Cap. 2. Libri 4., nempe pagg. 225. 226. ab epota China China urinam copiosorem redditam; atque hoc quidem perpetuum est. Inveniet insuper, idem Febrifugum propinatum erumpentibus Corticis Sudoribus, fluentibus Menstruis, Puerperiis, Alvo &c. nunquam hasce evacuationes interturbasse; sed eas solum sistere consuevisse, quæ Symptomaticæ sunt; inquantum scilicet tollendo Febrem, indè quoque producta tollit Symptomata: non autem quia vi peculiari polleat easdem evacuationes sistente. Cur itaque tam fidenter, & gratis asserat Cl. Auctor, *hoc Remedium nihil è corpore educere, sed potius concentrare*, non video. At de his fusiùs alibi, præsertim §. 41.



## §. 10.

(a) **A**ST hoc de muliebri sexu dici nequaquam potest, sexus enim muliebris ex sua natura minus aptus est ad beneficia reportanda ex usu Chinæ Chinæ, minus enim operosus est huiusmodi sexus, & larium domesticorum magis amans; (b) Monialibus præsertim intra sua Claustra conclusis, parum salubrem esse Chinæ Chinæ usum, satis compertum habeo; perraro etenim induci potui, ut illis Chinam Chinam exhiberem, nec nisi cum protestatione (c) febrem redituram, & pertinacius duraturam, Medici enim non solum ab ægris, sed etiam ab aliis Monialibus interdum compelluntur præscribere ea, quæ nollent remedia, quod observavi pariter in puellis, quæ apud ipsas educantur. A Monialibus itaque antifebrile istud exoticum longe ablegare bonum judico, ab experientia sic edoctus, febres enim Sacrarum Virginum, ut ut parvæ, habent nescio quid abditum, cui malo abigendo potius alchalia volatilia, quam fixa conveniunt. (d) Ab Aedibus quoque Nobilium, aliorumque potentium Virorum, in ocio urbano, seu rustro cum victus lautitia degentium, Chinam Chinam proscribi utile judico, licet enim ubi interdum ex aliqua febre intermittente decumbant, quamvis cassiæ modico purgentur, aut vena secetur, non tam facile disponi possunt, ut satis tuto iis præscribi possit febrifugum, ut ab aliis malis postea non plectantur.

(a) (Ast hoc de muliebri &c.) **D**E hoc Ligno vitæ potest fructum carpere etiam post lapsum foemineus æquè, ac virilis sexus, ut diutius vivat. Si exempla cupiat Lector, adeat (seclusis hinc Mulieribus Gravidis, & operosis, quæ plures forent) adeat inquam Therapeutice meam pag. 81. historia 4. pag. 86. hist. 5. pag. 87. hist. 6. pag. 91. hist. 14. pag. 201. hist. 9. pag. 202. hist. 10. & 11. pag. 203. hist. 12. pag. 218. hist. 10. pag. 220. histor. 12. pag. 221. hist. 13. pag. 231. histor. 4. pag. 324. hist. 5., pag. 248. hist. 1., pag. 249. hist. 2., tandemque pag. 254. a fronte ad calcem, ubi prostant insignes Mulierum China China sanatarum historiarum. Sed forsitan id contigit, quia hisce temporibus sequior sexus Larium domesticorum est minus amans, ac olim.

(b) (Monialibus præsertim &c.) Quod est ad Moniales, adeat idem Lector pag. 80. historia 2. pag. 88. hist. 9. pag. 89. hist. 10. pag. 223. hist. 16. pag. 235. hist. 6. &c. Id unum sciscitarer a Cl. Auctore, si adhuc esset in vivis, num scilicet ad Vestales quoque illas quas Tertiarias vo-

cant, quæque Moniales cum sint, extra Claustra tamen vagantur, extendatur illius Interdictum. Nec festivè tantum sciscitarer, sed ad rem quoque: nuper enim dum hæc scriptitarem, venit domum meam Tertiaria quædam ex ordine S. Francisci, cui nomen Soror Maria Francisca Righi, ut me de invaletudine sua consuleret. Narravit illa mihi (narro ego, quæ ipsa retulit) se Quartanam Febrem diutius gestasse; pro cuius curatione cum Chinam Chinam jugiter respuisset, tandem assumptis, nunc Medicorum, nunc Mulierum suasu, pluribus Veterum Febrifugis, id opis reportavit, ut *Februm causa extenuata, & sensim exantlata* (quemadmodum loqui consuevit Cl. Auctor) elapso integro decennio convaluerit: post vacationem autem duorum mensium a Febre, sibi ex improvise succrevisse in infimo ventre Tumorem quemdam dolorificum, ferme ac si Corticem Peruvianum, obstructions, cachexias, & his similia, ex eodem Cl. Auctore, mala progignentem, potasset. His ita se habentibus, quærerem, an Peruviano Febrifugo post sex V. G. priores menses assumpto, citius illa, tutius, atque



que jucundiùs convaluisset necne. Jam verò rursus ad nos. Siquid cavendum est in Monialibus China China curandis, illud est, ut diligenter dispiciamus, num Febres earum verè pendeant a Fermento ordinario Febrium Intermittentium, an potius, ut persæpe accidit, a nervoso, vel lymphatico genere universo, atque occasione potissimum vitæ cœlibis: quo casu longè minùs efficax est actio Corticis. Hæc verò diversi ordinis Febres, per sua signa ab invicem dignosci aptas, non nisi peritis datum est internoscere, iisque tantum, qui callent ex praxi, quantum ab æqualibus absint similia, &

— *quid distent ara lupinis.*

(c) (*Febrim redituram &c.*) Ne me quidem latet, Febrim ferè semper redituram, si semel tantum ad Drachmam unam, vel duas exhibeatur Peruvianus Cortex, ut Auctor consuevit: non ita, vel non tam facilè, si repetatur. Si verò Febres post assumptam Chinam Chinam redeuntes, redeunt contumaciores, & pertinacius duratura, cur (quod pluries cogor regerere) cur inquam ex eodem Auctore §. 25. optandum, ut redeant remedii loco, ad absolvendam Febris Historiam? Aut cur Chinam Chinam præscribit & ipse ad impetrandas inducias, si has inducias excepturus est longior cruciatus?

(d) (*Ab Ædibus quoque Nobilium &c.*) Quò ad Viros Nobiles in otio urbano, vel ruresfri degentes China China curatos, neque tamen ab aliis malis, quæ asserente Cl. Auctore, Chinæ Chinæ potius portendit, subinde vexatos, videnda pag. 204. historia 14. pag. 209. histor. 2. pag. 214. hist. 9. pag. 239. hist. 13. &c. Forsan si Cl. Auctoris Edictum aliquantò citius emanasset, non ausus essem præscribere plebejæ istud Febrifugum Nobilissimis quibusdam Viris, ut puta Neapolitano Principi Limatulæ Duci, Tertianæ duplici Subcontinua, & ad Acutam properante detento; felicissimè tamen illius ope sanato: sicut neque Nobili Hispano Viro, & (quod secundum Cl. Au-

ctorem auget difficultatem felicitis curationis) præpingui, Domno Iosepho Marchioni de Borda, & Aragon, modò pro Sacra Cæs. Cath. Majestate in Regno Neapolis totius Hispanæ pedestris Militiæ Generali Castrorum Præfecto, qui cum Tertianæ pariter duplici, nedum Subcontinua, sed & Malignante, ac ferè Lethargica Mutinæ laboraret, ignobilis hujusce Febrifugi auxilio convaluit; neque tandem Parmam accitus ad invisendum Marchionem Joannem Franciscum Gonzagam, unum ex Generalibus Tribunis Militum Regis Christianissimi, Tertianæ simplici Intermittente, sed in Cardiacam Perniciosam conversa malè vexatum, calculum meum apposuissem tam facile, ut illi methodo valida, quemadmodum in hisce repentinis Febrium mutationibus mihi mos est, exhiberetur exoticum istud, *dolosum*, & vile Antipyreticum; quantumvis hoc idem a Doctissimis Viris Parmensibus curationi præsentibus (instante præsertim D. Clerico) etiam ut mihi, qui nondum illuc perveneram, pro eorum humanitate morem gererent, & præcipiti exitio occurrerent, in usum jam revocaretur, favente statim communibus nostrum omnium votis eventu, Doctissimisque pariter plaudentibus fortunato operi Mantuanis Professoribus, subinde cum Fratre decumbentis Equitis illuc pariter accedentibus. Has, inquam, Curationes recentes Nobilium Virorum tam feliciter absolutas fortasse non ausus essem hoc remedio pertentare, aut eo ab aliis jam pertentato, meis quoque suffragiis additis tam facile persequi, si mihi Animadversio hæc severa Viri Cl., dictatorio plane supercilio prolata, & experimentis imaginariis feriantis biennii extremæ illius fenestæ firmata, paulò prius innotuisset. Sed quoniam post res jam feliciter gestas tempestivè illa non exiit, fatius est, eam repetito pluries successu inanem deprehensam negligi, quàm Praxim hanc auspiciatissimam.

## §. 11.

(a) **S**ed quid Medico Aulico agendum, inquires, ubi aut Conjugem, aut Filium Principis, sive ipsum Regnantem Principem, febre aliqua intermittente inter æstivos ardores decumbere contingat?

(b) Num suo Principi, apud quem multoties gloriosas curationes, in hoc



hoc atque illo à se factas solo Peruviano Cortice, celebrarit, tam fidenter, tam animose (c) *portionem hujusmodi porriget*, ut illi (d) *præcordia non sudent* ob metum de aliquo improspere eventu? Hac in re si Galenum consulere velimus, optimum habebimus documentum, ille etenim, ut refert in Libro de *Præ. Ad Post.*, ab Imperatore, passione quadam stomachi ab assumpto cibo laborante, per noctem accersitus, & ab ipso interrogatus quoremedii genere hujusmodi passioni mederetur, cui Romani Medici nil opis afferre potuissent, prompte respondit se cæteris hominibus sic affectis (e) *vinum pipere inspersum exhibere solitum*, Regibus autem, non nisi *tutissima remedia* à Medico debere præscribi; (f) *num autem Peruvianus Cortex inter tutissima remedia recenseri debeat*, judicet cui Cor sapit.

(a) (*Sed quid Medico Aulico &c.*) **H**ic piis Auctoris Manibus pio silentio litanda, quæ cæteroqui congrueret acrior responsio. Nec enim illi fuerat satis, generalia sibi creasse ab exordio, quæ pro arbitrio resolveret Quæsitæ, nisi peculiare hoc quoque de rebus, ut juvat sperare, ne futuris quidem, esset denuo commentus, ut joculari visus cum Nepote, *as alienum interim luderet vel nondum cussim*. Emphaticus tamen, quo usus est citra opportunitatem loquendi modus, etsi indefinitus, casusque respiciens tantum possibiles (nullus enim hujusmodi hætenus Deo dante, saltem hic loci, contigit) videtur *fidenter* admodum, atque *animosè* ab Auctore vivente usurpatus; sed liceat modò defuncto, quod forsitan minùs licuisset viventi. Liceat, inquam, illi hæc impunè proferre, atque ab Aulis Principum pro libito suo Chinam Chinam proscribere. Monendus tantum Typographus, qui omnia simul Viri Cl. Opera quamprimum recusurus dicitur, ut Tractatui illius, *De Principum Valetudine tuenda*, Præceptum hoc tanti ponderis, ab Auctore ipso tunc omissum, peculiariter adjiciendum curet.

(b) (*Num suo Principi &c.*) Nisi duos de eadem Fidelia velit Cl. Auctor denigrare, non dealbare parietes, sed unum tantum, adeoque si Medicus ille Aulicus forem ego (ut in me unum conversa facile hariolatur Urbs tota) quem pictorio veluti calamo studet ille circumscribere, coloribus a Nuncupatoria Epistola mea forsan petitis, sed alteratis, & ad omnimodam usque mutationem confusis, sinè ulla prorsus hæsitantia hæc responderem. An apud meum Principem gloriosas cura-

Torri Respons. ad Ramazz.

*ziones jactarim*, an laudibus minimè promeritis, prout modestum hominem decet, potiùs obstitierim, tribuerimque divino tantum favori, quos ad Principem fama detulerat faustos eventus: item an ea, quæ modò minùs humaniter in me vibrantur spicula a longè præviderim,

— *iplos divinarimque lacertos,*

*Queis jaculanda forent;*

tandemque an his de causis Therapeuticen meam, nedum suadente, sed & ferè dixerim imperante eodem Principe invitus ediderim, ipse scit, qui mihi & Dominus clemens est, & æquus Judex. Id insuper addam (quæ mihi est gloria non levis) eundem Serenissimum Dominum meum, post editam, sibi que jam notam Dissertationem Cl. Auctoris, cum fortè haud leviter ægrotaret Vir quidam Principis existimatione dignus, de cujus idcirco salute sollicitus erat ipsemet Princeps, mihi animum, & stimulos addidisse, ut Ægro inspecto, repertoque in talibus circumstantiis, ut ei China China judicio meo posset opitulari, posthabitis, si quæ obstitissent, adversis cavillationibus, id remedium promptè, statimque præscriberem. Cui cum facile id me præstiturum respondiissem, quoties ea se mihi præbuisset opportunitas ex parte morbi, quæ se præbebat ex parte Subjecti, videlicet privatæ personæ, non æquè facile idem acturus, si fuisset in discrimine salus cujuscumque Principis, quibus Chinam Chinam minimè offerendam docet Cl. Ramazzinus, reposuit ille subridens, *cavendum esse pro viribus ab occasione hujusmodi: cæterum necesse esse, ut Principes, qui commune cum reliquis hominibus habent morborum fatum, communia quoque*

Ee

cum



*cum illis habeant remedia*. Ægrum itaque invisi ( ne desit complementum historię ) Tertiana duplici Subintrante nonnihil violenta detentum ; quam tamen, cum ad depurationem ea vergere videretur, nondum Peruviano Cortice attingendam censui : quamobrem methodo tantum vulgari adhibita, ad vigesimam primam usque diem protracta est illius judicatio, quamvis negotia Principis Ægrotanti commissa, citiorem exigent curationem. Cum verò post dies nonnullos incidisset suspicio non levis de Febre eadem recidiva, Corticem ipsum ad præcautionem præscripsi, facile annuente curante Medico, in hocce remedium suo pte genio pro re nata propenso. Paucis horis elapsis ab assumpto Febrifugo, quæ jam prope imminebat, successit Febris; eo tamen repetito, hæc statim penitus suppressa est sine reditu, simulque expleta sunt Principis æque, ac Ægrotantis vota.

(c) *Potionem hujusmodi &c.* Si ex Croco Metallorum, ex pulvere Alcorethi, ex Elaterio, Esula, aut Gummi gutta conflata esset *hujusmodi Potio*, possetne acerbius illa, ne ullo quidem colore quæsito, proscribi a Cl. Auctore, apertam hoc loco temeritatis notam Aulico Medico apud Principem præter rationem prorsus inurente? Nolo hinc historiolum recensere accusationis, ab Antiphilo Pictore ad Ptolemæum Regem delatæ adversus Apellem, Luciano referente : quæ insimulatio, probabilitatis limites non parum excedens, evanuit statim ac Rex animadvertit, *Antiphilum Apellea artis amulum esse*; nolo inquam recensere historiam hujusmodi; neque enim Apelles sum ego in Arte medica, aut Viri defuncti æmulatione dignus; neque fuit ille capax unquam livoris Antiphili. Sed ad quid quæso pavorem, quem verè nullum habebat Vir Cl., imò quem in reliqua Dissertatione, dummodo adhibeatur modus, se non habere profitetur, tam strenuè simulavit? Certè neque timuit ille, neque sensit quæ protulit. Nolim quis inferat, velle me ex *Albo medicaminum Chinam Chinam expungere* ( inquit ille §. 48. ) *absit hoc; habeat suos usus remedium istud: beneficium, quod afferre potest, ab illo excipiamus &c.* Si ergo suos usus habere debet remedium istud, si beneficium aliquod potest afferre, quo jure postea potio illius ex arte parata, sudores e præscribentis Medici præcordiis,

ob metum sinistri eventus debebit ciere?

(d) (*Præcordia non sudent &c.*) Sudent inexpertis præcordia; non millies, & innoxie semper expertis. Mihi fortassis ea sudarent, si quando in Febre aliqua, non tantum Intermittente benigna, de qua sum parum sollicitus, quippe sæpius depurativa; sed nonnihil graviore, præsertim in circumstantiis, in quibus Peruvianum Corticem, vel opportunum, vel absolute necessarium censeo ( quas omnes tamen avertat Deus, ut hucusque avertere dignatus est ) præsentaneum hoc auxilium vano quopiam timore perculsus, vel obstrepentibus hujusmodi terriculamentis inaniter divexatus, me omisisse dignoscerem, a munere meo, officioque Principibus meis debito turpiter declinans. Piget me sanè Cl. Auctorem tam emphaticè hic locutum, redarguere statim inconstantia, ac erroris; sed materiæ pondus vulneratæ veritatis dissimulationem non patitur. In toto Dissertationis decursu, & signatè paulò supra §. 8., ubi revelat ille Methodum sanioris, ut inquit, ætatis suæ, universaliter loquendo, Peruviani Corticis usum admittit, & approbat in hunc præcipuum finem, ut aliquot dierum induciis impetratis Æger recreetur, & vires resumat, additq; insuper infra §. 48. ad eundem finem obtinendum, scilicet ad obtinendum aliquod intervallum pro virium reparatione admittendum, & laudandum esse Chinæ Chinæ usum in Febribus præsertim intervallatis; quin imò §. 22. Ægris ipsis quandoque citra rationem poscentibus, in mediocri dosi, ut lādere non posset ( potest ergo ita exhiberi, ut lādere non possit ) eam exhibuit cum eventu, ut fatetur, satis felici: id, quod verè cohæret præceptis illius, ut scilicet usus Chinæ Chinæ in Febribus sit qualis est Opii ad sedandos dolores; utriusque enim remedii, ipso docente eodem §. 48., eadem esse debet, & regula oblationis, & cautio. At hoc saltem, quod fatigatis Ægris cujuscunque conditionis, imò & fœminis ipsis utero gerentibus ( quibus §. 13. non solum tutò, sed & cum beneficio asserit Chinam Chinam exhiberi ) concedit, & donat Cl. Auctor, quomodo tam fidenter, tam animosè Magnatibus denegat, quibus tamen dolore aliquo afflictis Opium præscriberet, quamvis, nisi cautè exhibeatur, haud neget eodem §. 48. periculum fortè subesse, ne ex somno excitare possimus, quem obdormire volumus? Si verò in Principibus quoque



quæ Chinam Chinam admittat, eo saltem nomine, ut tantummodo reparentur vires; cur in eundem finem, sine præcordiorum sudore, ac aestu, patio hujusmodi in dosi medicari, quæ, ut ait ille, nequit laderi, a Medico Aulico porrigi data occasione non poterit, imò & in dosi nonnunquam liberaliore, ut reparentur simul vires, & periclitans salus?

(e) (*Vinum Piperis inspersum &c.*) Sano consilio abstinuit eo casu Galenus a pipere, ut qui forsan prævidit, fore tandem longo seculorum tractu, ut exotica Vegetabilia, quibus aliud analogum non sit in Europa, cujusmodi est Piper, irrationabilia a Cl. Ramazzino declarentur, & amethodica, ut nuper vidimus §. 6. Documentum autem, quod inde trahere debet Posteritas, illud est ut Viris Principibus ea ipsa præscribantur remedia, quæ sæpius per experientiam profuere plebejis. Imperator enim ille, Commodus nempe, intellecto Galeni effato, statim *Vinum Sabinum pipere inspersum*, in vulgari gente remedium expertum, sibi laboranti adhiberi jussit; & sanitati feliciter fuit restitutus, ipso nedum fatente, sed & iisdem verbis modò relatis apertè docente Cl. Ramazzino, Orat. Jatr. argum. pag. 46.

Non omnia quidem remedia (ut nugæ etiam has persequar) præsertim sumptuosiora, quæ sibi potest comparare dives, æquè potest pauper, ut faciliè quæcunque potest pauper, potest & dives; quæ tamen uni verè conveniunt, quæcunque ea sint, conveniunt & alteri. Profectò non hominum, sed morborum varia conditio varietatem remediorum expostulat. Menti nunc subit, Virum Cl. mecum olim risum effusum risisse, cum fortè utrique nostrum nuntiatum fuisset, Medicum quemdam afflictæ Mulieri, filii sui unigeniti acerbum funus lamentanti, illudque ipsi Medico, qui morbo adstiterat, acriter exprobranti, hæc fidenter reposuisse - *Unicum tibi hunc esse filium quare incauta non monuisti? fortassis enim aliter, aliisve remediis curationem illius peregissem* - Sed quid, si Viri hujusmodi testimonio uteretur alicubi in sua Dissertatione Cl. Auctor, cum cæteroqui ex veteri Parœmia, *Nunquam Paterfamilias qui semel Scurra.*

(f) (*Num autem &c.*) Num inter tutissima recenseri debeat Remedium planè divinum; *Antipyreticorum omnium*, quot quot excogitavit Antiquitas, aut Chymicorum solertia conflagit, facile Princeps; Fe-

*brisugum non arte repertum, sed a divina beneficentia concessum, ad malè natam Februm sobolem exterminandam; Sacrum Amarum ex Arbore vitæ decerptum, cui simile aliud optandum a commiseratione Numinum in res humanas, quod eadem securitate Febres verè Continuas sanare sit potis, ac istud sanat Periodicas*; num, inquam, Medicamentum hujusmodi inter tutissima remedia recenseri debeat, Judicet cui cor sapit. Nisi fortasse tutissimorum nomine audiant hic ea solùm Remedia inertia, & varia, quæ nihil agunt, quæque tantùm ostentant magnificentiam, & pretium. Scilicet apud Magnates vel in ipsis remediis latet adulatio. Perniciosa profectò hujusmodi dogmata (ut universim loquar) affectatæ circumspectionis, & vigilantie plena, quibus ad captandam principum benevolentiam, usi sunt omni tempore Aulici præsertim Medici, non sinè aliquo ipsorum quoquè Principum detrimento, replevere jam superstitionibus Aulas quamplurimas: non hanc quidem, ubi decora tantùm Majestatis custodia, sed excessus nullus. Nimirum communiter malè audit, quod Medicus Aulicus accedat ad morbos immediato, diuturno, intimoq; contactu vix communicabiles, ut ad Febrem mali moris, Scabiem, Variolas, Morbillos, & hujusmodi; ne scilicet illæsus ipse, morbi tamen effluvia, quasi semina in vestimentis suscepta, in Aulam deportet, perinde ac si in Xenodochiis vera peste Infectorum noctu æquè, ac interdiu assidue ministraret, conviveret, ac obdormiret; cum tamen omni securitate domi suæ, & familiares, & Liberos illotis persæpe manibus contrectet, osculetur, & amplextur innoxie: a quibus procul dubio caveret amplexibus, nisi vacuitatem aerearum hujusmodi circumspectionum didicisset expertus. Cautela, quæ ad summum devenit subtilitatis, plerumque noxia. Hinc fit, ut in Constitutionibus Epidemicis nonnunquam grassantibus Medicus Aulicus ut ut doctus, sed tantùm ex Libris, si præ scrupulositatibus hisce a morbis communibus invisendis abstineat, cum neque signa diagnostica, neque prognostica, neque remedia ipsa callere queat illius Constitutionis peculiaris, ad curandos eosdem morbos, si fortè in Aulam irreperint, planè ineptus evadat, in incertum denuo Tyro-nem conversus. Populares morbi Magnum fecere Hippocratem, quæsitum Regibus, & Posteris admirabilem. Sed caveam, ne lon-



gè nimis ab instituto excurrat calamus.

Ut ergo ad *Remedia tutissima* redeam, si ab illorum censu excludat Peruvianum Corticem Cl. Auctor, necesse erit remediis tantum usualibus, & quotidie obviis, iis præsertim, quæ in Veterum monumentis extant, quippe tutissimis (etenim qui veteri utuntur *Vino Sapientes* putat ex Plauto) periodicas aggredi Magnarum Febres. Statim itaque in usum vocanda erunt celeberrima duo (neque enim alia peculiariter usurpari legimus a Viro Cl. in suis Operibus) & usitatissima Artis præsidia; Venæ sectio videlicet, ac Purgatio, vel horum saltem alterutrum; ut his præmissis, Specificorum dein Febrifugorum usus ab Antiquis celebratorum, quorum plurima, si arte facta sint, ex Mercurio, aut Antimonio erunt parata, minimè verò Peruviani Corticis, quippe parum tuti, sensim succedat. At bone Deus. *Tutissima erunt Remedia* in Febribus, præsertim intervallatis, Venæ sectio, & Purgatio, quæ & vires dejiciunt, & spiritus dissipant, & humores perturbant, & Venas exhauriunt, nisi summa cautione usurpentur, ut cæteroqui a prudentibus Medicis solent usurpari; & tutus non erit debita circumspectione adhibitus, qui vires non dejicit, qui spiritus non fatigat, qui humores non perturbat, qui Venas non exhaurit, sed ex Cl. quoque Auctore Ægrum recreat, & instaurat Peruvianus Cortex? Id sanè non aliud est, nisi nobismetipsis effingere Spectra, & pueriles metus incutere,

*Nam veluti pueri trepidant, atque omnia cecis*

*In tenebris metuunt: sic nos in luce ti-*

S. 12.

**E**X nuperis *Ephemeridibus* hebdomadariis, pro curiosorum pabulo ad nos deferri solitis, accepimus in Regia Persona pertentatum fuisse Corticis Peruviani usum, sed non multa Medicorum laude & fortuna, in casu intermittentis febris, ut reor, cum illius non expressa fuerit mentio, fugata enim, seu sopita febris prohiberi non potuit, quin rediret, continuato licet ad prophylaxim Febrifugi usu, at id forsan pro Regiæ Majestatis beneficio accipiendum, ut febris historiam suam perfecte absolveret.

(*Ex nuperis Ephemeridibus &c.*) **E**phemerides hebdomadarias non vacat legere:

*memus*

*Interdum, nihilo quæ sunt metuenda magis, quàm*

*Quæ pueri in tenebris pavitant, fugiuntque futura.*

Hæc tamen Lucretii neutiquam congruunt Viro Cl., qui alias minimè trepidanter purgationi, & Venæ sectioni, utpotè remediis minùs tutis, tutissimum Peruviani Corticis anteposuit præsidium. Hic ergo ipse sibi responsionem adornet, ne præservidè forsitan quis me locutum arbitretur. Adeamus itaque rursus pag. 101. Orat. Jatrici Argumenti, & videamus, an tutius putet ille, ad Febres, quæ de *Intermittentium familia sunt*, curandas, uti Methodo antehac recepta, an potius Peruviano Cortice. Inquit igitur de China China verba faciens; & inquit tam appositè, ut minimè tædio futurum sit, alibi transcriptum huc denuo summatim transferre: tantienim Viri effata etiam repetita placebunt. *E singulari hujus remedii præstantia id beneficii fuimus assecuti, ut non amplius unica methodo Febres omnes curentur, continuato scilicet refrigerantium, & humectantium usu, tot repetitis Venæ sectionibus, tot iteratis Purgationibus, quæ humani corporis machinam potius infirmant, quàm confirment; sed illa tantum Febres, quæ de Intermittentium familia sunt, Pulveris exigui haustu in vino soluti, aut compressæ quiescant, aut etiam penitus aboleantur.* Num ergo inter *tutissima Remedia* Principibus exhibenda, in concursu cæterorum, ac præsertim Venæ Sectionis, & Purgationis, recenseri debeat, ex ipsius Cl. Auctoris decreto, *Peruvianus Cortex*, iterum *Judices, cui cor sapit.*

propterea quò tendant hæc spicula, obscurum mihi. Qui præscripsit Corticem, repellat ictum, si operæ pretium putet; si se-



si secus, negligat. Rumores istiusmodi, re bene perspecta plerumque vacui, Invisissimum certè Galliarum Regem Ludovi-

cum XIV. nuperrimè extinctum, & China China, ut fertur, valde familiariter utentem dum viveret, neutiquam terruere.

## §. 13.

**T**Utiolem ergo usum habet hoc antifebrile in popularigente, (a) *quæ ex manuariis operibus vivit*, quales sunt Artifices continuis laboribus exerciti, quibus cum non vacet diu in lectulis ægrotare, suam si velint alere familiam, propinare licet potionem hanc febrifugam, (b) *etiam ab initio*, paucis præmissis, ad consuetos enim labores redeundo, congestos humores, & si quid noxæ Febrifugum affixerit, sudore discutiunt. Hoc itidem dicendum de Mulieribus operosis, quales sunt, quæ fervili opere sunt addictæ, uti lotrices, textrices, & aliæ huiusmodi. (c) *Gravidis quoque mulieribus*, sicubi à febre tertiana, seu quartana corripiantur, facta aliqua levi purgatione, scilicet etiam V. S. lubenter remedium hoc præscribi poterit, & cum beneficio, præsertim in postremis graviditatis Mensibus, prævalet enim metus, ne concussio illa, quæ in febribus periodicis, & præsertim quartanis contingit, foetum cum Matris periculo possit excutere, quod si ex China China præjudicium aliquod subsequi posset, remedio futuram uterinam proluviem, quæ partum consequitur.

(a) (*Quæ ex manuariis operibus &c.*) **P**ost-quæ per varios Virorum, & per Mulierum ordines vagatus est Cl. Auctor, nondum quemquam Cortici Peruviano impunè potando aptum dignoscens, reperit tandem ex infima Plebe nonnullos, in quibus ille tutiorem usum possit habere, in iis nempe, *qui ex manuariis operibus victitant*. Mirum profectò, quod Viri Cl. animadversiones subterfugerit passim obvia Gens Recutita; cum nescio quid peculiare insit huic populo, siue victum consideremus, siue genus ipsum Vitæ, in his activæ, in illis sedentariæ, & plerumque citra manuarii operis exercitium. Id si fortè addidisset, ut facile poterat, non aliud defuisset in posterum ad complendos Annales, nisi tandem investigare, quid præstet hoc Antifebrile in Ægyptiis apud nos identidem irrequieto pede circumvagantibus.

(b) (*Etiam ab initio &c.*) Scrupulosissimus alibi Cl. Auctor, hoc tamen loco Peruviano Cortici præter institutum favens, Quæstionem non parvi ponderis duobus tantum verbis liberaliter absolvit: quam quæstionem, agens ego de vulgari-  
bus Intermittentibus, toto fermè Capite  
Torri Respons. ad Ramazz.

8. Libri primi; agens verò de Subcontinuis in celerem malignitatem pronis, toto pariter Capite 5. Libri quarti nonnisi hæsitanter sum ausus resolvere; nempe, *An in huiusmodi Februm principio Chinam Chinam liceat exhibere*. Certè hic videtur oblitus noster Auctor eorum, quæ paulò ante sancivit §. 8. ad leges *sanioris Methodi* suæ: cumque illi antea Culices hæssissent in Cribro, modò Camelum illinc transmitti facile patitur. Cum enim ibidem docuerit, præscribendam esse Chinam Chinam *ad drachmam unam*, vel *duas* in Febribus, tunc solum quando *nimis protractæ* Ægros fatigant, ut aliquot dierum induciis impetratis, Æger recreetur, sine spe, imò cum certitudine Febrem redituram: modò recedens a lege, quam posuit, vult, Plebem, *quæ ex manuariis operibus vivit*, cuiusmodi sunt Artifices, quibus non vacat diu in lectulis ægrotare, curari posse propinata potione febrifuga Peruviani Corticis, etiam ab initio morbi, suam ut possint alere familiam. Sed nisi statim post Febrem una, vel altera Corticis drachma suppressam, incerto pede, nutante gressu, a lectulis ipsis ad Officinas migrent (quod difficile, ac periculosum simul) post aliquot autem dies pro



voto Viri Cl. revertatur Febris, ad consuetos profecto labores non admodum festinanter redibunt. Si verò tempestivè redeant, totque, & tanta, quæ ex hujusce Febrifugi usu secundum Virum Cl. imminet pericula, ut *Cachexia*, *Obstructiones*, & *hydropes*, avertuntur tam facile mediantibus laboribus, & exercitiis, ad quæ ipsimet denuo redeunt Artifices; cur non poterit idem effectus obtineri, si post propinatum idem Febrifugum, & Febrem depullam, Civibus quoque, Nobilibus, & Principibus, lusum Pilæ, Choreas, Equitationem, Venationem &c. auctoritate Artis imperemus? Hos puto labores, tanto etiam pensatos fœnore, multò libentius subibunt Potentes, quàm diros, & diuturnos labores Februm. Nec cæteroqui putarim expedire absolutè, quod avidis forsan, si qui sint, expediret Pharmacopolis, Febres nempe Divitum diutius durare, quàm Pauperum, ut illis scilicet *annus fiat quæstuosior*.

(c) (*Gravidis &c.*) Facilem quoque se

præbet Cl. Auctor in exhibendo Gravidis Mulieribus Peruviano Cortice; & quidem rectè: atque adhuc rectius, si absque prævia saltem *Purgatione* exhiberet. Sed hic insurgit difficultas non contemnenda (fatum nempe quoddam illius est, ut in contradictionem aliquam vel dicti, vel facti adeò frequenter impingat) si enim ex una parte China China *postremis præsertim*, ut ait, *gestationis mensibus* offeratur; habeat autem ex alia parte eadem *Quinquina facultatem figentem*, ut ille §. 41. *pro recerta supponit*, *motumque sanguinis compescat*, *fluida quæque in nostris corporibus cogat*, *omnesque evacuationes per se*, & non per *accidens* supprimat; qua ratione præjudicio, quod ex China China subsequi posset, futura erit remedio, ut hic asseritur, *uterina proluxies*, quæ partum amplius (hoc Febrifugo humores quosque *figente*, & qualvis evacuationes *supprimente*) non poterit consequi? Heu quot in Scopulos agimur, cum a cognita nobis veritate sponte deflectimus!

#### §. 14.

Cum autem varia, ac diversa sint hominum temperamenta, & corporis habitus, varios, ac diversos effectus operatur China China. (b) *In temperamentis melancholicis* graviores noxas parere observavi, humor enim atrabilaris ferox est, nec tam facile auscultat remedio febrifugo, licet ab initio primarius usus Chinæ Chinæ in febribus quartanis sibi famam, & nomen compararit, aut si paululum febrem infringat, non multo post ferocior caput exerat. (b) *In temperamento quoque pituitoso* suspectus est Chinæ Chinæ usus, & quamvis paroxysmi febriles in febribus spuris post longum usum Chinæ Chinæ conquiescant, proluxior est restitutio ad priorem sanitatis statum, crassi enim & pituitosi humores post hujusce remedii usum fixiores fiunt, & minus diffiabiles; homines corpulentos, & præpingues sensim cachecticos factos ex usu febrifugi, actandem (c) *longum post tempus* obiisse observavi, (d) *licet aliæ culparentur causæ*.

(a) (*In Temperamentis &c.*) Quod de Temperamentorum diversitate, de humoris Atrabilaris ferocia &c. profert hic, & in subsequen tibus prolaturus est Cl. Auctor, ea præsertim, qua utitur malè sonante Recentiorum auribus se explicandi forma, ejus dignitatis ratione habita dictum nollem: sic enim loqui Medici eo vix tempore consueverunt, quo illis barba femoralibus erat proluxior,

Atque supercilio brevior coma —  
Jamque mihi videor quempiam audire a Viro Cl., vel a superstite saltem illius Minerva sciscitantem, cujusnam speciei, aut differentię sit ferox iste humor atrabilaris; an scilicet ex *Melancholia naturali putrefacta*, & exusta, an ex *flava bile torrefacta*, & in cinerem redacta progenitus, postquam ei placuit per obsoleta hæc nomina, quasi per imaginaria quædam Veterum formidamina terrere ignarum vulgus.



gus. Ego verò, qui hujusmodi nomenclaturam retinui in Febribus, *Atrabilaribus* a me vocitatis, significatione licet longè diversa, ut scilicet solis Antiquiorum terminis me accommodarem, non rei, quemadmodum & terminis, & ipsi rei fictitiæ hîc se accommodat Cl. Auctor; ego inquam, datis illi omnibus hisce commentis, sciscitarer potius quid intelligat, aut ab aliis velit intelligi per hæc, quæ in præsentî Paragrapho, & alibi scripsit idem Vir Cl.; fateor enim, me ab hoc Labyrintho nescire tam facîle memet ipsum extricare. Nimirum inquit ille, *In Temperamento Melancholico Chinam Chinam graviores, ac alibi noxas parere, quia humor atrabilaris* (qui pro causa Quartanæ Febris manifestè hîc astringitur) *ferox est, nec tam facîle auscultat remedio Febrifugo, licet ab initio primarius usus illius in Febribus Quartanis sibi famam, & nomen compararit: aut si paululum Febrem infringat, illa tamen non multò post ferocior caput erexit.*

Tot contradictiones propemodum quot syllabas continet hæc Viri Cl. brevis assertio. Primò namque per hanc apertè supponit ille cum Antiquis, ut annotavimus, fictitium humorem illum atrabilem, in corpore universo prædominantem, esse Causam Quartanæ Febris. At §. 46. statuit omnino, secundum Ettmullerum, aliosque Recentiores, *Febres Intermitientes pendere a salso-acido Fermento existente intra ventriculum.* An fortè intelligendus etiamnum per hoc Fermentum humor atrabilaris, aut melancholicus per vas breve a Liene ad Stomachum inverso motu transmissus? Nugæ, Somnia. Secundò clarè assertit, Chinam Chinam noxas parere in casibus supra recensitis, eò quòd *idem humor atrabilaris non facîle auscultat remedio Febrifugo, quasi Quartanæ Febres consuecant eludere actionem Peruviani Corticis; cum tamen sit vel ipsis Mulierculis notum, eas de more hujusmodi remedio perpetuò vinci, ac edomari.* Septem ego Ægrotos (nec enim invisi plures) Quartana laborantes prægressa Hyeme felicissimè curavi solius Corticis ope, quorum duos tantùm Febris rursus corripuit, priusquam planè dimitteret, reliquis statim perfectè convalescentibus, robustis, ac pinguioribus redditis: quos inter peculiari mentione dignus est Co: Johannes Andreas Valentinus, e citrino, ferè dixerim, Sceletò in carnosum paulò post, & benè coloratum Athletam conversus.

Sed demus, humorem atrabilem, qui pro causa Quartanæ hîc habetur a Viro Cl., verè *non auscultare remedio Febrifugo.* An proinde dicetur ab eo noxam parere ipsum Febrifugum? Nonne §. 40., & 41. illi tribuit Auctor Cl. *facultatem figentem*, quæ tot noxas ibidem inferre dicitur? Quam ergo noxam inferet, ubi humor, qui figi deberet, *eidem non auscultat?* Insuper si hoc ipsum *non auscultare Febrifugo* in bonis habetur §. 16., ubi tutior asseritur illius usus in Temperamentis, & Febribus biliosis, præcisè per hoc, quòd *biliosus humor non se patiatur adstringi vinculis ejusdem Febrifugi*, cur in malis habebitur, quòd iisdem vinculis non se patiatur adstringi humor atrabilaris in Febribus atrabilaribus? Tertio tandem concludit Vir Cl., noxam graviozem inferri a Peruviano Cortice, quia *etiam si paululum Febrem infringat, ea nihilominus non multò post ferocior caput exerat.* At si de simplici Febris reditu sit sermo, nonne ex §. 25. *Optandum esset, ut Febris in aperam flammam erumperet, postquam Æger ad aliquot dies silente Febre roboris aliquantum reportasset, nam reditus Febris remedii loco esset?* Et ex §. 27. nonne Medici a China China eluduntur interdum, *Febre amplius non redeunte?* Si verò sit sermo de reditu ipsius Febris, sed fortiore, velut de graviore noxa, nonne ex ipsa nuncupatoria Epistola lit. d. *Sape Medico in votis est Febrem repetere, sed fortiozem, ut tollantur noxæ, quas China China ob Febris extinctionem invexit?* Et §. 27. nuper citato, nonne Rem *feliciter cessasse* annotavit, quibus Febris denuò caput erexit etiam ferocior, quàm quibus Febris visa est prorsus extincta, & oblitterata, seu parva subsecuta? Infelix China China, quid tibi agendum, sananti, & non sananti æquè rejectæ, redeuntibus, & non redeuntibus Febribus, iisque vel levibus, vel ferocibus æquè proscriptæ?

(b) *In Temperamento quoquè pituitoso &c.* Hîc quoq; loquendo de Temperamento pituitoso, Febres statim spurias in medium adducit Cl. Auctor, quasi ab humore pituitoso, & crasso pendentes, non verò a *Salso-acido Fermento Ventriculi*, ut ex professo autumat §. 46. Confundit pariter & hîc, unumque, & eundem efficit humorem in Temperamento prædominantem, & humorem Febres Intermitientes producentem; cuilibet nimirum Temperamento suam Febrim correspon-



dentem assignans, & cuilibet Febri, Antiquorum more, suum humorem: quæ omnia jam sunt e Scholis exhibita, & explosa. Hisce tenebris involutus, mirum profecto, quam clarè introspeciat Causas physicas effectuum, quos nondum in rerum natura observavit quisquam, dum rationes omnium malorum assignat, quorum nulla in pituitosis Temperamentis, aut Febribus comperiunt alii, a China China illatorum. Sed audiamus, quæ probationis loco in sequentibus est allaturus.

(c) (*Longum post tempus &c.*) Longum post tempus obeunt & Pingues, & Macilentis, obeuntque China China curati, & non curati, Medicis utentes, & non utentes. Fieri verò *Cachecticos ex usu hujusce Febrifugi* eosdem *Præpingues, & corpulentos homines*, mihi certè non observatum; potius enim oppositum comperit habui. Et ne videar gratis refellere quod planè gratis asseritur, verè præpingues, ac corpulentos homines, tam Mares, quàm Fœminas, plurimis retro annis China China curatos, curatafve, cum *facili restitutione ad priorem sanitatis statum*, & in hancusque diem inculcata valetudine utentes, vide Lector in Therapeutice mea pag. 87. historia 6. pag. 88. historia 9. pag. 204. historia 14. pag. 209. historia 3. pag. 211. historia 5. pag. 213. historia 7. pag. 214. historia 9. pag. 227. hist. 1. &c. Adde recens curatos ope Corticis, & quidem de Vita quam maximè periclitantes (numerum enim pinguium Hominum ex vulgaribus Intermittentibus felicissimè sanatorum quis meminit?) corpulentos, ac ætate provecos, D. D. Johannem Baptistam de Carandinis, Paulum Æmilium de Bignardis, & Antonium de Zanellis, Viros huic Urbi plurimis nominibus notos: quos omnes, ut & alios supra recensitos, ferme quotidie sanos, ac robustos intueor; potestque intueri, &

audire quilibet alius, cui grave non sit solutionem oppositionis Viri Cl. ex viva illorum voce repetere. Quod si eos, qui maturo jam Fato decesserunt e vivis, memorare liceret, pinguissimus certè omnium hujus Urbis erat Æger pag. 94. historia 18. descriptus, annoque 1678. (curante illum Præceptore meo colendæ memoriæ) per accidens China China oblata servatus: pinguisque pariter, ac corpulenta erat Ægra octogenaria pag. 231. historia 4. relata. Sed hos, aliosque omnes, etsi vel longævum simpliciter, vel diutinum ab epota China China vitæ stadium emensos, tandem longum post tempus obituros, jam divinavit Cl. Auctor.

(d) (*Licet alia &c.*) Quicumque dicantur esse *præpingues isti homines* innominati (quorum nempe saltem nomen a Viro Cl. indicatum optassem, quemadmodum nomina simul & historias Sanatorum ipse indicavi, tum in Therapeut., tum in hisce Responsionibus meis) quicumque inquam esse dicantur imaginarii isti Ægrotantes, indefinita tantum, & cuique arbitraria hîc enuntiatione prolata, qui ex *usu hujus febrifugi sensim cachectici facti, longum post tempus obierint*, posito quod illius infortunii *alia, ut inquit, culpantur Causa*, unde habet Cl. Auctor, certè culpandam fuisse longum illud post tempus Chinam Chinam, minimè verò causas easdem forsitan evidentes? Si ab ingurgitatione fructuum horariorum succedat Diarrhœa, num culpandum potius, quàm fructus recens comesti, epotum ter, aut quater ante biennium, vel triennium Colocate? Ita & qui moritur longo post Chinam Chinam assumptam tempore, aliis licet existentibus proximis interitus causis, an ne ob olim cum juvamine assumptam mortuus dicendus erit, quasi hoc Pharmacum sit Pomum Adami, quo cæteroqui non deglutito homines sint æviteri?

## §. 15.

(a) **N**on paucos hic memorare possem Mutinæ mihi observatos, in quibus hanc principalem causam credidi extinctam fuisse intempestive febrem; (b) *verum noxa hujus Febrifugi tanto perniciosior est, quanto occultior, cum enim ægri ab illius usu, non autem Naturæ beneficio evaluerint, si postea post aliquod tempus in morbos recidant, creditur à Medicis ab aliis causis prognatum morbum.*

(a) (Non



(a) (Non paucos &c.) **N**on paucos Mutinæ sibi observatos, quos memorare posset, non memorat Vir Cl., & quidem consultè; nam quos alicubi memorat, non raro illum juvisset subticuisse, ut in decursu videbimus. Quòd si nomina supprimat, eò quòd fuerint ab ipso *portionati*, tunc forsitan cum *Chinam Chinam* habuit in magno pretio, ut supra §. 3., affectuque suo in eam nimis effusè ferebatur, ut infra §. 18., sintque idcirco de eorum numero, pro quorum curatione illum pœnituerit, hoc remedio se usum fuisse, ut §. 27., sciat, *Chinam Chinam* fuisse infontem, & suo munere bene functam, dum Febrem sustulit; ipsum autem errasse in præscriptione, si malorum hanc principalem causam credidit, extinctam fuisse intempestivè Febrem; quod idem est ac dicere, oblatam fuisse intempestivè *Chinam Chinam*. Sed hoc perperam patratum quis negat? His non obstantibus, ego Febrifugum hoc a Barbitonforibus, Pharmacopolis, imò & Medicis haud multum circumspectis, non semel minùs opportunè (ut mihi tunc visum) sine ulla, neque tum, neque mox suborta noxia, oblatum novi; cum videlicet Fermentum Febrile, utut præmaturè forsitan, & ut ita dicam in statu suæ cruditatis a Febrifugo absortum, subinde tamen potuerit expelli, aut discuti, priusquam rursus exaltaretur: quemadmodum probabiliter, & quidem facilius, vel expellitur, vel discutitur, vel perfectè subigitur, cum tempestivè offertur idem Remedium. Nihilominus illud ego semper inopportunè saltem usurpatum suspicor, idque ipsum in Opere meo profero ubique; quotiescunque vel vitæ imminens, certumque periculum non adsit, ut in Febribus *Intermittentibus Perniciosis*, vel probabilissimum, ut in *Subcontinuis Malignantibus*, vel denique nisi corrupti-

væ naturæ indicia certa sint in *Vulgaribus Intermittentibus*, quas ut plurimum, nisi valdè diuturnæ fuerint, pro *Depurativis* habeo, vel tales nonnunquam evasuras spero. Quòd ad hanc ergo intempestivam Febris extinctionem, ne actumagam, me refero ad ea, quæ supra dixi in *Animadversionibus* ad Epistolam Nuncupatoriam, lit. d., & in *Responsionibus* ad §. 1. pariter lit. d., & alibi.

(b) (*Verum noxa &c.*) Noxa hujus Febrifugi, iterum repeto, nulla est; ex se enim Febrem submovet, quod ex se pariter bonum. Si malum aliquod nonnunquam sit subsecutum (quod non repugnat) ob tempus inopportunum, quo Febris præmaturè suppressa fuerit, expectanda erat opportunitas oblationis, nullaque fuisset noxa Febrifugi, quamvis eadem fuisset illius actio in corpus Ægrotantis. Sed jam æquivocatio isthæc pluries sublata, eò turpior est, quòd patentior, & crebrior. Cum verò ex istiusmodi æquivocationis repetito abusu gratis omnino affigatur *Chinæ Chinæ* beneficæ qualitas quædam *perniciosa*, ratione cujus in contextu imputatur illi quilibet *novus morbus ab aliis causis*, longè postquam ejus beneficio Ægri evaluerint, prognatus: adeoque cum a Cl. Auctore sustineatur mordicus, cavendum esse ab eadem *China China*, statim licet juvante, quippe tractu temporis nocitura; æquè gratis quis posset asserere, tum quòd *Salsæ parillæ V. G.* insit *occulta noxa*, qua homini in Febrem, aliumve morbum delapso, detrimentum attulerit, postquam hic ab illius usu, non autem *Natura* beneficio evaluerit a Lue Celtica; tum quòd veneno cuiquam vis insit balsamica, postquam eo per sua Antidota tempestivè debellato, prosperam nonnemo valetudinem fuerit subinde sortitus. Ut ego ad *Chinam Chinam* redeam: Proba est, dicam, materia, si probus illam adhibeat Artifex.

## §. 16.

(a) **I**n temperamento bilioso securior forsitan Peruviani Febrifugi usus, bilis enim humor subtilis, & facilis motus, non tam arctis vinculis adstringi se patitur, ut propriis viribus se non expediat. (b) Tempus quoque, regiones, & annorum constitutiones observandæ; æstivo tempore felicius, seu minori damno exhibetur hoc remedium, & sub finem Autumni, hyemali parum fausto successu, per totam enim hyemem fatigantur ægri, nec nisi ad primum veris accessum liberantur.



tur. Hoc idem evenit in regionibus humidis, ubi aer crassus, & humidus, magis, quàm in siccis quæ puriori aere gaudent, quales sunt Civitates Montibus proximæ, sive Montanæ.

(a) (In Temperamento &c.) **R**editum facimus ad consuetas contradictiones, seu potius ab iisdem nunquam recedimus. In temperamento bilioso securior reputatur a Cl. Auctore Peruviani Febrifugi usus, quia bilis ab eo non tam arctis vinculis adstringi se patitur, ut propriis viribus se non expediat. Hic ergo bilis supponitur Causa Febris alicujus Intermittentis, puta Tertianæ, cum tamen §. 46. hujusmodi opinio ab eo rejiciatur his verbis -- *Neque novum Intermittentes Febres Æstate pervagantes pendere a Salso-acido Fermento, licet ut plurimum opinio sit, a luxuriante bile progigni.* Sed pergamus. Cur quæso modò tutum est, quod humor biliosus non sinat se adstringi vinculis China China, si noxium nuper erat §. 14., quod iisdem vinculis se adstringi non sineret, seu quod hujusmodi Febrifugo non auscultaret humor Attribilaris? Forsan quia bonum est, flavam bilem non figi, Febrimque ab ea pendentem minimè infringi? At malum erat, interque noxas Corticis graviores numerabatur, non figi bilem atram, nec infringi Febrem ab ea pendentem. An denique tutius est modò, ut propriis viribus se expediat febrilis humor, quia ex §. 25. & 27. optandus est remedii loco reditus Febris a China China fugatæ; imò reditus Febris fortioris, ac ferocioris, ut ex eodem §. 27., & ex ipsa nuncupatoria Epistola? At nulla major noxa recensetur

§. 14. a Peruviano Cortice illata, quàm quod Febris paululum enervata, aut ad aliquod tempus depulsa, denuò ferocior exerat caput. Quidnam igitur inter hæc omnia bonum est, quidnam malum? Certe tota hæc Dissertatio nonnisi acervus contradictionum videtur.

(b) (Tempus quoque &c.) Expectabam hoc insuper, ut scilicet dilucidaretur a Viro Cl., an tutius sit exhibere Peruvianum Corticem crescente, an decrescente Luna, die Martis, an die Veneris &c. Sed non vacat amplius minutiora hæc, futilia, & vana singillatim persequi. Et quoniam adversus auctoritatem illius haud satis videntur posse experimenta mea, meæque ratiunculæ, illam demum pro me refellat, deleatque æqualis auctoritas. Ex ipso itaque tandem Bove lora sumamus. Idem nempe Vir. Cl. una Periodo sua sibi responsum faciat: pensetque prolixiores, quæ occurrerent animadversiones, repetita quidem, sed pressior illius confessio, tum paulò supra, tum in notæ jam Collationis textibus etiam allata literis E. F. G., videlicet. *Peruvianus Cortex nobis a divina beneficentia munus concessum, in qualibet Regione, quocunque anni tempore, ætate, sexu, temperamento, Febres saltem recurrentes, atque intervalatas fugat, & exterminat.* Ita ante sexennium Cl. Ramazzinus

*Ipse sibi Index, & Reus ipse sibi.*

### §. 17.

**C**uriosum porro est quod in Constitutionibus meis Mutinensibus annotavi, nam cum anno 1690. in austrina, & pluviosa tempestate à veris principio per totam æstatem campestris regio infra Mutinam Padum versus aquis exundaret, quam ob causam pessum ivere fruges cujuscumque generis, Rustici fere omnes eodem tempore ex tertianis febribus intermittentibus decumbebant, observatum est in illis, quibus fuit administrata China China, infelicitè cessisse illius usum, tardius enim convaluere, quàm ii qui soli Naturæ negotio commisso multo citius ad Agrorum culturam rediere; sequenti vero anno vagante urbana Epidemia tertianarum febrium in constitutione valde sicca, & æstate præservida Cortex Peruvianus in usum adhibitus, honorem, & famam, quam priori anno amiserat, visus est recuperasse.

(Curio-



(Curiosum porro &c.) **H**uic Paragra-  
pho, partim pro usu Chinæ Chinæ, partim pro illius  
omissione militanti, non aliud reponam,  
nisi quod Autumnali tempestate anni 1714.  
nuper elapsi, inter omnes, quas memine-  
rim, summè pluviosa, vixque integram  
ob id seminum, segetumve sationem per-  
mittente, æquè felicem, & æquè certum  
illius usum comperi (eam siquidem ad mul-  
tiplicis generis Febres sæpius præscripsi)  
ac quavis sicca, & suda tempestate. Quod  
si in Rusticis anno 1690. observavit oppo-  
situm Cl. Auctor; me vel tunc hujusmo-  
di diversitatem saltem in Civibus, non  
observasse sum conscius: quemadmodum  
plura alia, quæ de Constitutionibus eo-  
rum temporum ipse conscripsit, haud sem-  
per cohæsisse memini observationibus meis,  
etsi præ multitudine Ægrotantium, quos  
invisabam quotidie (*Urbi nota loquor*)  
longè major mihi, quàm illi obtigerit op-  
portunitas dispiciendi, quæ generaliter,  
quæ peculiariter in iis morbis acciderent.  
Profectò hujusce Febrifugi actionem sem-  
per ego uniformem deprehendi; efficacem  
scilicet semper in iis omnibus febribus, in  
quibus revera convenit; in iis, in quibus  
non convenit, semper inefficacem. Qui  
propterea nullos unquam Medicos audire  
consuevi dicentes -- *Hoc anno longè me-*

*lius, ac praegressis purgat Senna, aperit Cha-  
lybs, Alchermes roborat, attenuat Salsa,*  
rideo quoties eorum nonnullos audio iden-  
tidem exclamantes -- *Verè hoc anno mira-  
bilis est Peruvianus Cortex, proficuumque  
longe magis, ac annis elapsis; hujusmodi  
enim assertio, ex observata forsitan illis  
eventus diversitate procedens, infirmam,  
& cæspitantem eorum praxim accusat;  
quippe quæ ex eo solùm oritur, quod cum  
satis non distinguant ab invicem febres  
Cortice curabiles ab aliis Cortice non cu-  
rabilibus, aliquam tamen vicissim simili-  
tudinem allucinationum Matrem habenti-  
bus; quotiescunque regnant universaliter  
febres Cortici suapte natura obsequentes,  
alius verò generis fermè nullæ, in earum  
medelam uno Cortice indiscriminatim ad-  
hibito fortuitò impingunt, & remedium  
eo anno Mirabile prædicant, quoties verò  
diversæ intrinsecus inter se se febres va-  
gantur, aliquam licet symbolesitatem pri-  
mo aspectu præ se ferentes, easque om-  
nes sinè delectu curare satagunt eodem Fe-  
brifugo, res male cadit, & Chinam Chi-  
nam eo anno ut Maleficam, vel saltem sæ-  
pius Inutilem, summa quidem injuria,  
criminantur: haud secus ac olim Vetula  
cæcutiens fortuitò casum passa, suæ do-  
mus, non sui visus obscuritatem execra-  
batur.*

## §. 18.

**O**bservationes istæ quas memoravi, (a) multorum annorum sunt fru-  
ctus, & longævitatæ à Divina Beneficentia mihi concessæ; hæ  
affectum, quo à principio in Peruvianum Corticem nimis effuse fere-  
bar, paulatim attemperarunt, & varium, ac suspensum in hujus re-  
medii administratione reddidere; summatim igitur hoc Febrifugi genus  
apud me tanti non est pro febribus intermittentibus curandis, (b) ut  
Medicina æque bene hoc præsidii genere carere non posset; (c) & Ve-  
terum Febrifugis, quæ si non tam cito, tutius tamen operantur, fe-  
brium causam extenuando, (d) & sensim exantlando, non posset esse  
contenta, (e) qui veteri utuntur vino sapientes puto, ajebat Plautus in  
Cassina.

(a) (Multorum annorum &c.) **Q**uot  
annorum sint fructus singillatim quatuor opi-  
niones alternè oppositæ, quæ Cl. Aucto-  
rem varium, ac inconstantem reddidere in  
administratione Peruviani Corticis, ostendit  
supputatio a me facta §. 3.; ex qua infer-

tur apertè, confusam hanc, & indigestam  
observationum Chinæ Chinæ insensarum  
reminiscentiam (nullas enim, aut ferè  
nullas recentes tam brevi, sibi que tam in-  
opportuno tempore potuit ille institue-  
re) initium sumpsisse ab editione Tracta-  
tus mei, paucorumque proinde mensium  
sobo-



sobolem planè abortivam fuisse. Etenim si anno 1712. de Contagiosa agens ille Boum Epidemia argumentum ipsum meum ex præmissa ejusdem Tractatus Synopsi mea elucescens, sibi ferme adoptavit, ut patet ex Textu in *Collatione* transcripto lit. H.; edito autem immediatè post a me anno eodem 1712. ipso Tractatu, tam repentè sententiam mutavit, ut subsequente statim anno 1713. Dissertationem hanc Criticam e diametro oppositam scripserit (quod deducitur ex Paragrapho 47., obitum Comitis Torricini, qui eo ipso tempore contigit, connotante, quamvis in annum 1714. protracta fuerit ejusdem Dissertationis editio) satis constat, fallacium hujusmodi observationum reminiscentiam paucorum tantummodo mensium, non *multorum annorum fructum* extitisse, oblitterata illico penitus, vel saltem neglecta favorabilium omnium, quæ antea scripserat, memoria. Nisi hanc Camarinam movisset Vir Cl., neque ego in damna illius movissem fortassis. *Suo igitur ipsius indicio perit Sorex.*

(b) (*Ut Medicina &c.*) Medicina olim carens hoc præsidii genere, Tertianas Perniciosas, atque lethales a Mercato descriptas non sanabat, quamvis innumera tentaret remedia: hodie felicissimè sanat, etiam rebus in præceps ruentibus; sitque testis Urbs Mutinensis tota. *Æquè bene ergo hoc præsidii genere Medicina carere non posset. Sed asserta mea Cl. Auctori nequaquam probantur: etenim inquit ille infra §. 33. Antequam China China nomen innotesceret, hujusmodi portenta visebantur, ut in incerto esset, num Medicamentorum, an Fortuna beneficio Ægri convalescerent.* Probata igitur erunt mihi asserta illius, eaque præsertim, quæ in Tertia Oratione Jatrici Argumenti prostant a pag. 101. usque ad 105.; quorum plurima transcripta cum sint in *Collatione* Textuum illius Chinæ Chinæ favorabilium, præsertim litera C., litera I., & literis K. L. M.; idcirco ad evitandam prolixitatem, ea hic omittere satius duxi, atque illuc Lectorem relegare.

Hunc tamen insuper rogatum velim, ut Textum appositum novissimè, tum §. 5., tum in fine §. 11., rursus adire non renuat, ubi ait Vir Cl. -- *E singulari hujus remedii præstantia, id beneficii fuimus assecuti &c.* Ex his enim omnibus conjiciet, illum nova, quæ hodie cernimus Medicinæ incrementa, novosque progressus in ex-

plorandis Februm, præsertim Intermittentium Causis, & instituenda meliori earum curatione, uni inventioni auspiciatissimæ Peruviani Corticis adscripsisse: & quasi eo reperto multa quidem, sed non adhuc omnia expleta sint Medicinæ vota, simile aliud insuper remedium ad Febres Continuas, pro ejusdem Medicinæ complemento, a Numinibus implorantem videbit. Quibus equidem tam manifestè, ac per extensum ab eodem prolatis, decernet facilè quilibet cohærenter, *Hoc Febrifugi genus apud ipsum potius tanti fuisse pro Febris Intermittentibus curandis, ut Medicina æquè bene hoc præsidii genere carere non posset.* At reponet ille fortassis, tunc illud Febrifugum, anno videlicet 1708. apud ipsum tanti fuisse; modò tanti non esse. Videamus ergo quanti saltem apud eum etiamnum sit. Afferit ille §. 48. hujusce nuperæ Dissertationis, *admittendum, & laudandum esse China China usum, ad obtinendum aliquod intervallum pro virium reparatione: afferit §. 22., Corticem Peruvianum in Febris Intermittentibus revera aliquid posse, quia paroxysmos sistit per aliquot dies, atque interdum etiam omninò, ut amplius non redeant: asseruitque supra §. 4., Admirandum esse, quomodo ad exiguum pulvisculum Peruviani Corticis, quomodocunque exhibitum, Febris Periodica furor conquiescat, interdum etiam extinguatur; quod de quocunque alio remedio pharmaceutico non tam facilè observatur, quod sciat.* Hæc sunt effata Cl. Auctoris anni 1714., quæ in hac ipsa Critica illius Dissertatione leguntur. Quomodo ergo Medicina, quæ, ipso fatente, tot habet ab hoc uno Febrifugo, & quæ nullum aliud habet remedium pharmaceuticum, de quo quid simile observetur, quod sciat, æquè bene hoc præsidii genere carere posset?

(c) (*Et Veterum Febrifugis &c.*) De Peruviano Cortice, quem modò Veterum Febrifugis postponit immeritò, sic olim exclamavit Cl. Ramazzinus, ut in *Collatione* Textuum lit. D. *Quot seculis desudarunt Artis Primores, ut Febrifugum aliquod reperirent, aut arte conflarent? Modò è Peruviana Regione Cortex ad nos defertur divinum planè remedium ad malè natam Februm sobolem exterminandam.* Eundem Corticem alias appellavit ille, ut in citata *Collatione* lit. B., *Antipyreticorum omnium quotquot excogitavit Antiquitas, & Chymicorum solertia conflavit, facile Principem, Tandemque de eodem cum Veterum*



rerum Febrifugis comparato hæc protulit, ut in eadem Collatione lit. E. F. G. *Quam diu a peritioribus Artis Magistris insudatum est ad Febrifugum aliquod constandum, ex triplici Regno materia petita? At omnes hætenus illorum labores frustrante diligentia in irritum cessere; & si aliquod Antipyreticum in illorum monumentis extat, nonnisi sub Grypho descriptum legitur: ut Delio Natatore opus sit, si Mens Auctoris sincera habenda sit. Solus Peruvianus Cortex &c.* Hujusmodi ergo Febrifugis diu, sed frustra quæsitis a Peritiorum, Antiquiorumque Magistrorum Artis industria, sine Peruviano Cortice, qui solus, ipso docente, Febres fugare, & exterminare perhibetur, *Medicina posset esse contenta?* Illis, illis ergo in Chinæ Chinæ dedecus oportebat curare Puellas Patavinas §. 9. ab Auctore visas, nec tamen sanatas, Nobilemque Virginem ab eodem pariter §. 26. infra descriptam, solique tempori, & domui paternæ medicatrici commissam.

(d) (*Et sensim exantlando &c.*) Profecto sensim: & adeo sensim, ut ad biennium sæpius protrahatur in Quartanis ista Causæ febrilis extenuatio, Veterum Febrifugis, quæcunque in usum revocata fuerint, facile adscripta a Cl. Auctore, tanta quidem fiducia, ac si recens ab Academia venerit, praximque medicam nunquam exercuerit. Contra, non raro *vale-re iussis* illiusmodi Febrifugis, ubi simul

quis renuat uti Peruviano Cortice, intra quatuor, plus minùs, menses solet contingere plurium Quartanarum spontanea solutio. Saltem unum ex tot Veterum Antipyreticis, cui magis fidat, indicasset Cl. Auctor, ut facto experimento, & asserti tam utilis veritate detecta, tutius istiusmodi Remedium, China China seposita, totis ulnis possemus amplecti. Sed isthac (ut infra ipsemet inquit) apud mulieres, & imperitam plebeculam locum habent, non apud eos, qui sapiunt.

(e) (*Qui veteri &c.*) Sapienter admodum, in commendationem Febrifugorum a Veteribus usurpatorum, subdit Cl. Auctor effatum Plauti -- *Qui veteri utuntur Vino, sapientes puto* -- Desideratur tantummodo commentarium, quod in Orat. Jatr. Argum. pag. 183. huic ipsi Textui addendum censuit idem Cl. Ramazzinus, quod sic habet -- *Qui veteri vino utuntur Sapientes puto, agebat Comicus; rectè quidem, nisi tamen Vinum in vappam, seu acorem transierit. Non minus tamen sapientes judicandi, qui recenti utuntur Vino, si defæcatum fuerit; hoc enim Vini genus plus nutrit multoque plus spiritus ab eo elicitur.* Ita ille. In hisce terminis tam bene quadrat casui nostro, collatione facta vappescentium, ac mucidorum Febrifugorum Antiquitatis cum recenti, & vivifico Peruviano Febrifugo, expositio Cl. Auctoris, ut volupe mihi sit, absque ulla hæsitantia eidem subscribere.

§. 19.

**E** Quidem si damni dati, & collati beneficii à Chinæ usu ineatur ratio, non tam facile crediderim, ut ab æquis iudicibus illa possit absolvi à crimine objecto, magis damnosam illam esse, quam utilem, seu num liceat de Peruviano Cortice proferre, quod de Ottone scripsit Tacitus, *tantundem apud posteros meruit bonæ famæ, quantum malæ.*

(*Equidem si damni dati &c.*) **O** Mne damnum, quod China China possit inferre (si quod potest inferre) eo solùm nomine inferre valet, quod est verè Febrifuga. Nisi ea talis esset, neque esset in potestate imperiti Medici Febrem sistere, ubi, vel quando non convenit. Hoc est damnum unicum, quod ab usu illius, intempestivo tamen, queat fortasse procedere. Contra, ab usu recto quot beneficia prodeant, satis patet vel ex uno Tractatu meo, & ex adductis ibidem historiis. Si ergo damni

dati, & collati beneficii ineatur iusta ratio, ab æquis Iudicibus facile crediderim posse decerni, minimè damnosam illam esse, sed utilem. Quod si ratio ineatur laudum, & probrorum, quæ a Viro Cl. ea retulit, tunc verè crediderim, licere de ipsa proferre, quod ex uno tantum defuncti Auctoris versatili calamo (quandoquidem velit ei Posteritas fidere) *tantundem bonæ famæ apud Posteros ea meruit, quantum malæ.* Ita nimirum nobismetipsis haud satis faventes

*Cadimus, inque vicem præbemus crura Sagittis, Pers. Sat. 4.*

*Possem*



**P**ossem funestos casus referre non paucos, quos observavi toto eo tempore, quo Mutinæ Medicinam feci, sed prolixior essem, & Epistolæ leges transgrederer, unicum tantum in Viro insigni satis noto referam, dum casus, qui in gente vulgari contingunt sine rumore terra obtegit. Comes Joannes Carolus Morandi placentinus, olim Serenissimo Principi Cæsari Estensi Eques percarus, media æstate simplici quartana correptus est, cui Medicus magnus Peruviani Corticis Fautor, facta ut puto levi aliqua purgatione, seu etiam V. S. Chinam Chinam ad plures dies pro more suo præscripsit, at Eques ille contumaciori febre facta in pejus ruere semper cœpit, donec appetente hyeme hydrops ascites factus Placentiam asportari voluit, ut in Majorum sepulchro tumularetur.

(*Possem funestos Casus &c.*) **M**agnam potius esse dixerim Cl. Auctori penuriam funestorum casuum, quos possit obtrudere, si quem primo loco producit, a septem retro lustris cogitur emendicare, Verum nec rem planè tangit acu, neque me imparatum invadit; sed strenuè jam præmunium. Atque hinc dignoscat quilibet, me ingenuè bona, & mala exposuisse in Tractatu meo, non encomia tantum, laudesq; Chinæ Chinæ profusas, qualis mos est eorum, qui de aliquo novo medicamento Tractatus integros edunt, ut acutè notavit §. 7. Cl. Auctor. Hunc igitur eundem Casum vide Lector in Therapeutice mea, pro animi mei candore primò tantum obiter indigitatum in quadam parenthesi pag. 3., dein expositum quidem breviter, sed ad trutinam longiusculè expensum a pag. 91. ad totam pag. 93., suppresso licèt Ægrotantis nomine; atque ob id solum suppresso, ne viderer in infausti eventus discrimen velle me trahere, præter Experientissimum Frassonum Præceptorem meum, qui primò solus curæ adfuit, & ab Obrectatoribus suis ob id malè audiit, ipsum quoquè superaccitum eidem curationi Cl. Ramazzinum, cujus propterea mentionem facere opus erat. Neque enim satis meminera, quemadmodum neque modò satis sum memor, an Vir iste Cl., qui tunc Chinam Chinam habebat in magno pretio, & affectu suo nimis effusè in illam ferebatur, ante oblationem Peruviani Corticis, an solummodo post oblationem curationi a Præceptore meo susceptæ supervenerit;

atque ideo an calculum suum pro administratione Febrifugi hujus addiderit necne. Discrepat tamen in nonnullis a mea, in aliis manca est historia a Cl. Auctore laconicè nimis expressa; quam ideo nonnihil fusionem, usque tamen sinceram, apud me videre est loco citato his verbis. *Mensis itaque colenda semper memoria Præceptor Frassonus Nobili cuidam Viro (fuit is idem Comes Jo: Carolus Morandus, de quo hic Cl. Auctor, etsi nomen illius tunc reticuerim) Quartana Febre per mensem circiter detento, & supra modum vexato cum notabili anhelitus difficultate, atque œdematoso pedum tumore ante Febrem exortis, & cum ea in dies crescentibus, Chinam Chinam exhibuit, & Febrem sustulit. Post aliquot alios successivè dies tumor œdematosus, suapte natura in incrementum pronus, major est factus, ad tibias, & crura sensim procedens, ventre non immuni. Atque ita, increbrescente anhelitus difficultate, intra paucos tandem menses, a serosa colluvie universaliter obrutus Æger, fato cessit, Hydropicus Abdominis simul, & Pectoris.*

Hæc cum ita verè se habuerint, minimè consonat veritati, quòd Febris ab epota China China facta fuerit contumacior; ut asserit Vir Cl.; sicut nec eidem veritati pariter consonat, quòd Frassonus ad plures dies ipsam Chinam Chinam præscripserit. Præscripsit ille quidem pro more suo; sed mos illius, omniumque tunc Medicorum erat præscribere ad Drachmas duas, & semel tantum juxta Methodum etiam sanioris ætatis Cl. Ramazzini. Quòd si Febris, ut subdit ille, facta fuit inde



*contumacior*, cum Medici tunc solum eludantur, quando ea non redit, sed tacite corpus depascitur, ut §. 27.; imò cum res felicius cedat §. eodem, quando illa caput erigit etiam ferocior, quomodo hinc modò colligit Vir Cl., Chinam Chinam obfuisse, & Hydropem ascivisse, si Febris ex ejus effato nequaquam abiit, sed *contumacior evasit*? Prodeat tamen iterum e latebris in apertum Veritas. China China semel tantum ad Drachmas duas propinata fuit, & Febris recessit; sed Hydrops antea genitus incrementum, quod eo etiam Febrifugo minimè epoto suscepisset, æquè suscepit. Redit quidem pro more post nonnullas hebdomadas paroxysmis levioribus, uno tantum Corticis haustu depulsa Febris; sed nulla ferè ampliùs habita est illius ratio: quandoquidem conatus omnes ad se trahebat Hydrops usque succrescens, dum tractu temporis in lentiolem symptomaticam Febriculam sensim conversa, paulatim obliterabatur Quartana.

Hæc est germana facti series: & præterquamquod vivit adhuc in luctu Comitissa defuncti Viri tunc Conjux, omnium facilè memor, ipse nequeo non meminisse, qui eidem Comiti Johanni Carolo Placentiam proficiscenti, ut in *Majorum Sepulcro*, cum obiret, tumularetur, de mandato ipsius Præceptoris adstiti, Medicinæ sacris vix initiatus, circa annum videlicet 1678. Causæ morbi procatarticæ, quas brevitatis gratia ibidem subticui, modò verò cogor innuere, fuerunt labores insueti, & incommoda lata præsertim Liburni; ut Principi, cui famulabatur, morem gereret, non semel sub dio pernoctans in ipso Portu nebulis confertissimis oblitus; interdium verò ferme assidue, ac violenter equitans ad plures dies per juga, & montes, tam in profectione, quam in reditu. Quæ quidem omnia omnino præter consuetudinem perpeffus, cœpit paulò post lumbis dolere, imminuto sensim lotio, domi hærere, pallere, sibi gravis fieri, subtumidusque, & anhelosus, nonnihil ad

quemcunque motum evadere, ac mox Febre Quartana corripì, succedentibus postmodum iis omnibus, quæ supra retuli, transcripsique ex Therapeutice mea; ut indè cuique pateat, Casum hunc unicum minùs favorabilem, lapsu annorum vel tunc plusquam triginta mihi observatum, ac quodammodo pro suspecto habitum, fideliter manifestasse. Et quamvis pro Frassono curante tot, tantiq; ponderis militarent rationes (quas fusiùs ibidem sum persecutus) ut ob illas Practici eximii Placentini, *Eques Moraggini*, & *Stanislaus Homatus*, quibus Ægrum tradidi gravissimè habentem, ipsum Præceptorem meum omni culpa vacare pro sua ingenuitate asseruerint; eum nihilominus ego severior, ac forsan minùs æquus Judex, in ipso Tractatu meo ab omni suspitione parum cautæ oblationis remedii, solam Febrim, non Hydropem præortum mulctare valentis, nequaquam absolvi.

Interim tamen Lectorem enixè rogatum volo, ut dempto sibi, mihiq; repetitionis tædio, examen integrum hujusce casus videat in fonte, paginis supra citatis Therapeutices meæ: ubi quando Hydrops China China curari possit, si nempe a Febris pendeat, & quando non possit, si nempe Febres ipsas præcedat: crebris tum experimentis tum Scriptorum expertorum auctoritatibus, statutum reperiet, planèque discussas intuebitur nebulas omnes, quæ hinc Peruviani Corticis usui cavillosus quispiam vel tunc studuisset offundere: tandemque noscet, me, his non obstantibus, de Febrifugi administratione haud satis fortasse cauta, ipsum quadantenus Præceptorem meum (æquè audacter quidem, ac sincerè) notasse. Sed hoc idem si detur etiam Cl. Auctori; quid contra Remedium, cum tempestivè, atque ubi prodesse debet, non ubi nequit, offertur? Verùm rancescunt hæc a Viro Cl. nunc allata; imò dixerim, putent, quippe extincti jamdudum Frassoni Manibus, prout ab Opponente appinguntur, heu nimis infensa.

## §. 21.

**H**ujusmodi exemplum in quartana intermittente, multaque alia postmodum mihi observata in febribus periodicis, in quibus continuatus Febrifugi usus obstructions & cachexias invexit, ut ægri cum sanitate in gratiam nunquam redierint, ac tandem hydropici obje-



objerint, ut postremo contingit Domino Comiti Marsiano, alia inquam exempla cautiorem me fecere in præscribendo hoc Febrifugo, licet febres essent de genere intermittentium.

(*Hujusmodi &c.*) **C**L. Auctor suade-  
re contendens, *continuum Febrifugi usum obstructions, & Cachexias invehere, ac tandem Hydropem, & mortem, exemplum in signe inter multa, ut inquit, alia selectum (quæ tamen minimè indigitat) in medium proferre satagit, quasi per transennam memoria recolens obitum Generosi Viri D. Comitis Ludovici de Marsciano, anno 1703. Bononiæ vita functi, post septennium tamen (quod ille subticet) integræ valetudinis ab epota China China, quam D. Davinius anno 1696. curationi adstans, vota solliciti Ægrotantis proposuit pro curatione Quartanæ Febris, qua tunc tenebatur Nob. ille Patiens, D. tandem Ramazzino, meque ipso, cunctanter quidem ante, facilius verò post rem discussam, eo casu remedium admittentibus. Hanc quoque historiam nominatim expressam, atque descriptam videsis Lector in Therapeutice mea pag. 90. historia 13. sciasque illam non ibi relatum, ut simplicis Quartanæ curationem China China absolutam, velut quid Cedro dignum, promulgarem; pûduisset enim trivialia hæc pro magnificis venditare: sed ut Lienis intumescientiam (quæ nobis curantibus negotium facessabat non leve) a Quartana prognatam, ope verò Corticis una cum Quartana ipsa deletam, malè credulorum oculis subicerem, falsus hac in re nonnullam quoque hæsitantiam meam; quamvis in Sententiam Cl. curantis Viri, D. scilicet Davinii, qui votis Ægri enixè instantis annuerat omnium facillimè, revera descenderim. Ad calcem historiæ, quasi futuræ cavillationis extitisses prælagus, hæc quoque reperies, quæ placuit tunc subdere, seriore ejusdem Ægrotantis obitum connotantia, si quando & hunc in crimen Corticis quisquam vertere non erubisset. Sunt hæc præcisa verba pag.*

91. *meæ Therapeutices exarata -- Nisi fortè morosus quispiam recidivam morbi illius (videlicet Quartanæ China China curatæ) appellare velit lethalem ejusdem aggritudinem, post septennium a causa evidenti productam, Febrim videlicet acutam, ex suppressa cutanea quadam habituali affectione oriundam, & intra 14. dies per abscessum ad anum imperfectè judicatam: quod demum abscessu prius in Gangranam converso, mox difficulter curato, translatoque interim Ægro in aerem palustrem, Febris erratica subsecuta est, quæ tractu temporis Lienis tumorem ascivit, dein Icterus, mox Hydropem, & mortem. His adde modò, radicem omnium malorum verè fuisse suppressionem, nedum cutaneæ cujusdam affectionis habitualis, ut supra, sed & antiquæ simul Fistulæ ad anum (quod tunc subticui, quippe quod paucis notum) unde profundioris postea, altiorisve abscessus origo cum Febre acuta, indè Gangræna, & partium imi ventris intimiorum, ac connexarum labes, Hydrops denique, & mors. Ita sensit distinctè inter cæteros Vir Cl. D. Paulus Piela in Consultatione postrema, quam cum plurimis aliis celeberrimi Bononiensis Archilycei Viris illustribus, de mandato Serenissimi Ducis ibidem habuimus D. Davinius, & ego. Atque hinc sanè petenda Causa obitus Viri Generosi, non ex Peruviano Cortice ante tot annos epoto. Certè tot Medici insignes ex inclyto illo Athenæo, qui ad longum tempus curæ illius Equitis adstiterent, quibusque universa prægressorum morborum series apprimè innotuerat, quicquam mali a China China progenitum, ne per somnium unquam sunt suspicati. Vivit unus ex iis Cl. Simonius, quæ circa hoc sentiat valens testari, & parum candidam hanc oppositionem, futilemve potius has nugas potens diluere, si sit opus.*

## §. 22.

**I**ndulgentior tamèn fui in hujus remedii administratione, quando observabam ægrum ipsum instanter appetere tam decantatum præsidii genus, & quodammodo conqueri de mea procrastinatione, novi enim quanti momenti sit ægri confidentia in hisce remediis assumen-

dis,



dis, quæ sibi profutura animo conceperint. Ne igitur tam magnam confidentiam frustrarer, Chinam Chinam (a) in mediocri dosi, ut lædere non posset, & cum satis felici eventu exhibui, hac in re Celeberrimum Sanctorium nostrum imitatus, qui, ut in Methodo Vitandorum errorum Libro 13. Cap. 4. suadet Lapidem Bezoar, licet fictitium aliquando exhibendum, propter nimiam ægrorum confidentiam, & ut vitentur calumniæ propter confirmatam opinionem (b) quod malignæ qualitati obsistat: Hæc nimirum opinio de Lapide Bezoar, à veneranda Antiquitate in tanta existimatione habito, fuit penes hunc nostrum Professorem, ut illum præscriberet in fide Parentum, à qua opinione non multum abludunt nostrorum temporum Medici peritiores modicæ fidei circa omnia bezoartica, & alexipharmaca, de quibus virgilianum illud dicere liceat, possunt quia posse videntur, quod dictum tamen Peruviano Cortici non videtur congruere, nam revera in febribus intermittentibus aliquid potest quia paroxysmos sistit per aliquot dies, atque interdum etiam omnino, ut amplius non redeant.

(a) (In Mediocri Dosi &c.) **M** Ediocrem dosim Chinæ Chinæ a Cl. Auctore constitui in una tantum Drachma, maximam vero in duabus, vidimus jam ipso fatente §. 8. Quantitas autem Drachmæ unius, vel paulò major, præsertim semel tantum oblata, nedum ledere non poterat; verum nec ferè prodesse, nisi de Febre Intermittente planè facili sermo sit, & sponte ad solutionem vergente. Profectò si fortè hujusmodi, aut simili Methodo religiosè semper hæsit in Praxi Cl. Auctor, ægrè admodum de activitate remedii ferre poterat Judicium undequaue absolutum, ut illud damnaret. Neque jure crediderim potuisse ab illo decerni, an sinistri successus, quos identidem memoravit, aut perhibuit se posse memorare, unique Cortici fidenter attribuit (nisi ab inopportuna forsan oblatione processerint) a Cortice verè processerint, an a dosi illius enervi, ac invalida, remque propterea infectam relincente. Sed urget ille, asserens, eo pacto se Chinam Chinam exhibuisse cum satis felici eventu. Hic, fateor, curiosus quærerem, siliceret; cum verò non liceat, mente saltem mea scrutabor, quinam fuerit eventus ille, qui dicitur felix. Vel enim (repetitæ occasione donari velim repetitiunculas quoque nonnunquam meas) Vel enim post aliquot dies Febris denuo caput erexit etiam ferocior: sic enim rem feliciter cessisse Ægrotantibus annotat §. 27., annotavitque in Epitorti Respons. ad Ramazz.

stola Nuncupatoria, Febrim, sed fortior rem redeuntem, pensare damna Chinæ Chinæ, ob ejusdem Febris extinctionem Ægris illata: & hunc eventum, quidquid dicat Auctor, procul dubio parum felicem dixerit Æger ipse. Vel Febris non amplius rediit: & hic eventus secundum eundem Cl. Auctorem omnium pessimus est; ex §. enim 25. Optandum esset, ut Febris, quæ diebus a paroxysmo vacuis tacitè cubat, ut ignis sub cinere doloso, in apertam flammam erumperet, nam reditus illius remedii loco esset. Sive ergo reciderit Æger a Cl. Viro China China curatus, sive non reciderit, difficile est eruere ex Theorematis hujusce Dissertationis, quinam fuerit eventus felix, & quinam sinister. Ad lubricas istiusmodi angustias persæpe redactus, quocunque tandem se vertat Cl. Auctor, semper illi A fronte Precipitium est, a tergo Lupus.

(b) (Quod malignæ qualitati &c.) Gratiâ tandem habeo quamplurimas cineribus Viri Cl., quod in re obvia quidem, sed in casu nostro plurimi æstimanda, quippe quæ prima forsan, ut mox declarabitur, Controversiæ nostræ jecit semina, partes meas tam liberaliter, tamque ingenuè suscepit. Decernit ille cum celeberrimo Sanctorio, confirmatam apud Medicorum vulgus Opinionem, quod Lapis Bezoar malignæ, ut ajunt, qualitati obsistat, vanam esse, Medicosque peritiores nostrorum temporum esse modicæ fidei circa omnia Bezoartica, & Alexipharmaca, de  
Ff qui-



quibus Virgilianum illud dicere licet,

— Possunt, quia posse videntur; atque ideo, subdam ego, diligenter repouenda erunt inter tutissima illa Remedia, de quibus §. 11. Regibus præscribenda. His præjudiciis explosis, comparat in contextu eundem Lapidem Bezoarticum Peruviano Cortici, fateturque, cuncta hæc, quæ de Bezoarticorum, & Alexipharmacorum invaliditate ab eo dicta sunt, nequaquam congruere huic Febrifugo; nam revera (inquit ille) in Febris Intermittentibus aliquid potest, quia paroxysmos sistit per aliquot dies, atque interdum etiam omnino, ut amplius non redeant. Lectorem hic, quæso, ne pigeat adire Therapeutice meam pag. 214. historia 9., vel saltem pag. 216. Ibi videat, totam discrepantiam, quæ anno 1709. inter me, & Cl. Auctoris Nepotem Relatorem abusus Chinæ Chinæ in Urbe nostra, insurrexit, quæque forsan Scriptis hisce Cl. Viri aniam præbuit non minimam, in hoc uno constitutam fuisse, quod ille Febris Tertianæ duplicis, ab ortu suo Intermittentis, aut Subintrantis, mox recens Continuae, ipsoque Judice, malignæ jam factæ, cum totali asphyxia, frigidisque circa Pectus, Caput, & Collum sudoribus curationem (quam ego Chinæ Chinæ ope certam pollicebar, ut contigit, inhibito per eam superventuro novo paroxysmo, cæteroqui planè lethali) ille inquam Lapide potius Bezoartico, quam

China China absolvendam contenderet, eo præcisè titulo, ut *maligna obsisteret qualitati*. Quid ergo mihi, tam secunda necogitanti quidem, propitium magis poterat obvenire? Profectò

— *Inesperata accidunt magis sæpe, quam quæ speres,* inquit Plautus in Mostell. Etenim nonne ultronea ferme hæc est Cl. Patruī ingenuitas, quæ Corticem Peruvianum, Paroxysmos Februm revera sistentem, Lapidi Bezoartico anteponit, peritioresque nostrorum temporum Medicos eos vocat, qui virtutem alexipharmacam illius celeberrimi Lapidis parvi faciunt, opinionemque ipsam, confirmatam licet, quod *maligna*, ut vulgus Medicorum loquitur, *obsistat qualitati*? Sed nonne simul rationaliserat in casu tam præcipiti sollicitudo mea, ut rationalis felixque fuit ipsa Febrifugi oblatio? Nimirum ope illius Perniciosa Febris recessit sine reditu a Subjecto *Præpingui, Pituitoso, Adolescenti, Nobili, & lautitia victus utenti*; quæ conditiones, nedum conjunctim omnes, sed & seorsim singulæ, Peruviani Corticis usum prohibent ex Cl. Auctore, ut supra vidimus: jamque septennium interim inculpatae valetudinis labitur a China China assumpta. Hujusmodi noxam ex vi occulta malitiae suæ intulit illa, intra mensem ad uncias duas epota. Nec majorem forsan, magis venoxium abusum mox vidit, aut ante viderat Mutinæ studiosus Relator.

### §. 23.

**A**Tque id est, quod valde admiror, & in variis meis Operibus (a) virtutem hanc arcanam commendavi, & nunquam satis admirari cessabo, (b) sed optandum esset, ut in periti, & prudentis Medici manibus esset hoc remedium, eò enim ventum est, ut vulgaris quisque Medicus, & juvenis, qui recens ab Academia venerit, non vereatur periodica febre laboranti ægro Febrifugum istud ad multos dies, & in liberali dosi præscribere ea securitate, qua Magistros suos operari vidit.

(a) (Virtutem hanc &c.) **N**on solum virtutem arcanam Chinæ Chinæ (cujus usum ex hoc ipso quiddam arcanum est illius virtus, §. 6. hujusce Dissertationis vocat *amethodicum*) sed usum ipsum liberalem, & amplum ejusdem virtutis, illamque possidentis Peruviani Corticis, cum exclusio-

ne ferè omnimoda cæterorum præsidiorum Artis, in variis Operibus suis commendavit Cl. Auctor, ubique asseverans, ut vidimus, — *Antipyreticum istud esse Remedium cum securitate Febres Periodicas sanans: in Tertianis malignis, Fermentum illarum, sive penitus restinguendo, sive quamplurimum enervando miranda præstans, Æ-*  
grum-



grumq; ob id vindicans ab interitu: in qualibet Febre recurrente, quocunq; anni tempore, Regione, Ætate, Sexu, Temperamento exhibendum; non tamen semel tantum, ut olim, sed ad plures dies, donec febrile miasma sit penitus exantlatum; valere jussis tot pharmaceuticis præsidis, tot repetitis venæ sectionibus, tot iteratis purgationibus, quæ humani corporis machinam potius infirmant, quam confirmant &c. Vulneribus hisce consolidandis, quæ sibi metipsum gladio veritatis infligit Cl. Auctor, Emplastrum tergiversationis hujusce Paragraphi profectò est impar. Interim tamen nequit saltem non commendari sagax solertia, qua semetipsum expressæ contradictioni subtrahere studuit. Sed jam jacta erat alea, nec ullus supererat amplius (manu licet magistra calamum contrectaret) industriosæ defensionis locus. Quod si quis verè fuisset, Viri certè sollertissimi dexteritatem nequaquam subterfugisset, ut de illo meritò dici possit,

— Si Pergama dextra

Defendi possent, certè hac defensa fuissent.

(b) Sed optandum &c.) Optandum omnino, ut in periti, & prudentis Medici manibus sit hoc Remedium; & magis adhuc optandum, ut in periti, & prudentis Medici manibus sint alia Remedia, non ob præposteram aliquando administrationem tantum, sed suapte natura insimul

periculosa, cujusmodi sunt Cathartica, & Emetica, Opiata omnia, Diaphoretica, ea præsertim, quæ vocant Spirituosiora, Venæ sectio, & alia hujusmodi generosiora præsidia. Ex horum quippe usu minus castigato longè majora impendent damna, quam ex usu promiscuo Peruviani Corticis; licet sinè rigidiuscula, ut hìc, Cl. Auctoris animadversione, vulgaris quisque Medicus, & Juvenis qui recens ab Academia venerit, non vereatur illa quotidie præscribere, ea securitate, qua Magistros suos operari vidit. Non est tamen ideo, quòd approbem nimiam, si sit nonnunquam, Juvenum facilitatem, quam verè corripiendam & ipse judico: dico tantummodo, errorem ipsius præcociis Februm extinctionis sæpe leviores reperiri a posteriori (ut cum Scholis loquar) ac a priori apparuerit: errorem verò Febri-fugi oblatis in Febre, cui nullatenus illud convenit, ut in Synocha, aut alia quavis Febre per essentiam Continua, ad solam ferme palati frustraneam multam forsan restringi; damnum enim, saltem sensibile, nullum exinde visitur. Propterea, quam jure exquirimus Cl. Auctor, & ego, peritiam, prudentiamque in Medico Chinam Chinam præscribente, eam non solum, sed & majorem exopto ego in Medicis, alia Remedia, si malè administrantur verè periculosa, quotidie tamen, ac si bellaria forent, facillimè præscribentibus.

§. 24.

**S**ed hoc etiam esset tolerandum, nisi quoque (a) Chirurghi, & Pharmacopola, incio Medico hanc arrogarent auctoritatem, sibi plaudentes quod pauca impensa agrum è lecto cui diuturnæ febres affixissent citissime exemerint non sine prævia purgatione, & venæ sectione, quæ duo magna remedia præmittenda censent, ut methodice videantur operari, quod si febris omnes illorum conatus eludat redeundo, in promptu habent ægrotantium errata in victu, & rebus non naturalibus, seu non exhibitam ad plures dies debitam Chinæ Chinæ quantitatem, sed isthæc apud mulieres, & imperitam plebeculam locum habent, non apud eos qui sapiunt, febres enim intermittentes ab hoc remedio fugari videntur, ac Medicis nimis credulis facile imponunt, (b) non enim vere fugantur, sed potius concentrantur, & quia paroxysmi non repetunt, putant nonnulli febrem abjisse.

(a) (Chirurghi, &c.) Scandalum hoc an ipse præviderim, ab excellentia, & præstantia ipsa

remedii facile oriundum: imò prognatum olim apud extraneos quosdam Chirurgos, nec planè innoxie tunc Mutinæ propagatum,



tum, an observarim, enunciarim, & malè tulerim, videre est in Therapeutice mea; primum quidem pag. 186., secundum verò a pag. 276. usque ad finem Capituli. Id bonæ frugis, quod ex malo semine, & tunc, & postea collegi; nempe ex profusa, & amethodica Corticis oblatione, ignaris hisce gentibus identidem usitata, fuit, ab hac ipsa cæteroqui reprehensibili, ac temeraria praxi, non malos eos semper, quos suspicatus essem; sed non rarò potiùs bonos, & felices, quos non ita facilè expectassem, eventus successisse. Quamobrem etsi administrationi præposteræ illius malè aptetur excusatio de erratis Ægrotantium, vel de non satis continuato usu remedii, si Febris redeat: nihilominus hæceadem excusatio planè contemnenda non est, ut illam videtur planè contemnere Cl. Auctor, si verax alioqui ea sit, & candida. Cum ergo sæpe, ut dictum supra, res bene ceciderit, quamvis remedium minùs congruenter fuerit administratum, colligo ego, nullam verè ab hoc Febrifugo ratione substantia sua noxam hominibus inveni; sed eam solummodo nonnunquam (nec enim semper) quam mera intempestiva Depurativa Febris extinctio potest inferre. Bona scilicet leges ex malis quandoque moribus etiam in Re medica procreantur.

(b) (Non enim verè fugantur &c.) Sciebam equidem, objici a Medicis Cortici Peruviano infensis, illum, qui solam Causæ febrilis quasi sopitæ actionem ab iisdem

creditur impedire, solas per consequens Febres fugare consuevisse, minimè verò Febrium Causam, pro illis iterum suscitandis intus latentem; sed Febres ipsas verè non fugari, imò eas concentrari potiùs (apertis adeò saltem notis) nondum audivi. Me itaque sponte recipio inter Medicos illos nimis credulos, quibus facile imponunt abditæ huiusmodi Febres, quæ sinunt Ægrum facilè cibum appetere, bene ferre, meliùs nutriri, optimè quiescere, vires resumere, equitare, iter facere, ludere &c. sinè lassitudine, sinè molestia, sinè siti; uno verbo, sinè ullo Febris indicio. Certè Maligna valde sit oportet concentrata sic huiusmodi Febris. Modò infortunium nosco a Cl. Auctore toties deprædicatum, si nempe non recidat Æger: necesse quippe est illi, latentem huiusmodi Febrem toto vitæ suæ tempore circumferre. Quis tamen ideo vel somniasset unquam, Cl. Auctorem, de suis Ægris cæteroqui sollicitum, in hunc errorem scienter incidisse, ut illis non semel imponeret, præscriberetque in ætate saniori, jam experientia edoctus, & noxis Peruviani Corticis observatis, illud idem Febrifugum (quemadmodum se præscripsisse fassus est §. 8., & alibi) sub vano prætextu, quod recrearentur ipsimet Ægri, & vires resumerent; cum tamen sciret, ab hoc remedio non fugari Febres, sed concentrari, tacitèque ab illis, ut infra §. 27., corpus humanum depasci potiùs, quam recreari?

## §. 25.

(a) **A**dverte quæso mi Nepos, ac diligenter observa, febres intermittentes post epotam Chinam Chinam nunquam ad veram, & perfectam apyrexiam pertingere, qualis contingit quando natura sponte per sudorem, aut alias vias accessionem discutit, nam in tertianis exquisitis in die intermissionis vera & absoluta ex pulsu observatur infebriticatio, non sic vero ubi assumpta fuerit China China, nam pulsus percipitur parvus, & cum aliqua frequentia, quod etiam (b) à Doctissimo Ettmullero fuit annotatum, sic facile decipiuntur Medici qui putant febrem recessisse, quæ tacite cubat, ut ignis sub cinere doloso, sed optandum esset ut in apertam flammam erumperet, postquam æger ad aliquot dies silente febre roboris aliquantum reportasset, nam reditus febris (c) remedii loco esset.



(a) (*Adverte queso &c.*) **M**ulierum more a crassioribus tantum indicibus carentiam Febris eram nuper metitus; sed Medico *Vena tangenda est*, ajebat Seneca. Venam itaque, seu potius pulsantem Arteriam attentè scrutatus Cl. Auctor, Nepotem monet, ut diligenter advertat, *Febres intermittentes post epotam Chinam Chinam nunquam* (ne toto quidem Vitæ cursu?) *ad veram, & perfectam apyrexiam pertinere*. Hæc observatio respicit Rem, non Ratiocinia: quamobrem videtur turpe, contrectato pulsu, Medicos non convenire circa existentiam, aut carentiam Febris. Vadem tamen me pretio quolibet dare volo, nullum inter Obtrectatores Peruviani Corticis reperiri Medicum tam exquisito præditum tactu, ut ex pulsu (et si frequens ille dicatur, ac parvus) valeat dignoscere Hominem hoc Febrifugo potius, quam sponte, aut alia quavis via ex Febre Intermittente sanatum, si aliunde nesciat. *Ist hac verè apud Mulieres, & imperitam plebeculam locum habere possunt, non apud eos, qui saltem digitis sapiunt*. Haud tamen inficior, quod si cuipiam Febricitanti diuturnis simul obstructionibus, aliisve similibus affectionibus detento, & diebus etiam a paroxysmo vacuis aliquam pulsus frequentiam de more habenti, offeratur Cortex, eadem ad aliquot dies perstare non possit pulsum frequentia, quæ prius aderat, ut illi perstaret, vel sponte, vel alia quavis arte sanato; verum illam eandem frequentiam citius evanescere continuato usu Febrifugi, quam si aliter fuerit curatus Ager, non semel quoque compertum habui. Cæterum si Febris ante assumptum Corticem perfectè intermittebat diebus a paroxysmo vacuis, quomodo sublato per Corticem paroxysmo, cæterisque in suo statu relictis, poterit ipsam occupare intermissionis diem Febris depulsa? Aliud sanè docet nos Praxis, aliudque docuit ipsum Cl. Auctorem. Si enim Febres ab assumpta China China non recessisse, nec verè fugatas esse observasset ille in Aegris suis, neque ad veram, & perfectam apyrexiam pertigisse, sed concentratas cubasse, & corpus tacitè depavisse, ut in hoc Paragrapho videtur monere Nepotem, & in §. 27. alios Medicos; dubio procul non dixisset in Orat. Jatrici Argumenti, *Febres, quæ de Intermittentium familia sunt, exigui hujusce pulveris haustu etiam penitus aboleri*: item eundem Peru-

Torti Respons. ad Ramazz.

vianum pulverem *Febres, saltem recurrentes, & intervallatas fugare, & exterminare*, ut qui verè datus est nobis *ad malè natam Februm sobolem exterminandam &c.* quemadmodum in *Collatione textuum* lit. D., & E. F. G. potest facillè quilibet intueri.

(b) (*A Doctissimo Ettmullero &c.*) Ettmullerum, cujus auctoritate hic liberaliter nimis abutitur Vir Cl., videbimus in responsione ad §. 35. dicentem, *Chinam Chinam esse Remedium egregium, feliciter* (nota illud feliciter) *curans tam Quartanas, quam Tertianas Febres etiam duplicatas, seque verissimum arbitrari, hunc Corticem fugare* (nota quoque istud fugare) *suos usus quasvis Intermittentes; nec has solum &c.* An hæc cohærere possint aliis, prout jacent in hoc Paragrapho, per Virum Cl. adductis, judicet interim Lector, usquequo germana omnia Ettmulleri sensa, in citato §. 35. a nobis aperienda, & ad trutinam expendenda, clariùs intueatur.

(c) (*Remedii loco &c.*) Febrim aliquando remedii vicem supplere posse, in Morbis præsertim Herculeis, cujusmodi sunt Epilepsia, Apoplexia, & alii, nos docet Hippocrates, & experientia confirmat. Atque hisce casibus sicuti Februm suppressio debet esse suspecta, ita potest esse optabilis illarum inopportunè depulsarum reditus, ut ipse in Tractatu meo pag. 82. historia 1. observavi: idque semper asseram, quotiescunque Febris habeat characterem *Depurativæ*. Dicam scilicet, illam per nullum Specificum Antifebrile, quod eandem valeat ejicere (quodque præter Chinam Chinam nullum est adhuc) posse fugari sinè metu aliquo erroris. Dixi *sinè metu*, aut *suspensione erroris*, aut *damni*, non *sinè certitudine*: plerumque enim, ut paulò superiùs annotavi, Febres quasdam Intermittentes mihi contigit observare, ab ignaris Empyricis hoc remedio absque ulla indè orta noxa fugatas, quas ipse in quibusdam saltem circumstantiis, præsertim temporis, eo tunc remedio non attigissem. Quamvis enim aliquid audaciæ sublit in hisce casibus; si tamen vivida sit Fluidorum crasis, motus eorum liber, moxque cribrationes ac secretiones adamussim peragantur, sæpissime probè subigitur, aut expellitur Fermentum illud, quod minùs castigatè fuit in statu cruditatis absorptum. Et si verò in hujusmodi tantum suppressione audacula, & amethodica optandum fortasse nonnunquam

Ff 3



quam sit, ut revertatur Febris; quando tamen methodicè illa depellitur, non est cur eandem votis adèdardentibus revoce-

mus. Neque idcirco vidimus adhuc votivas Tabulas pro Febris reditu in Templis nostris appensas.

## §. 26.

(a) **N**ovi olim Nobilem Virginem in Monasterio S. Magdalenaë Mutinaë educatam, cui duplici tertiana spuria correpta, & ad mensem integrum decumbenti, facta aliqua purgatione, aliisque solitis remediis, Peruvianum Febrifugum exhibere constitui, sed non sine alterius Medici consilio. Vocato itaque ad consultandum D. Antonio de Abbatibus, & exposita morbi historia, Chinam Chinam proposui, ut unicum remedium ad febris pertinaciam debellandam, seu aliquot dierum vacationem à tam diris paroxysmis obtinendam, at ille modeste tamen ac humaniter pro more suo professus est huic remedio se assentiri non posse, rationibus, & (b) *experimentis à se habitis*, at ego tandem ab ipso obtinui, ut assensum præstaret, sed non ex animo, ut reor; propinata itaque Chinæ Chinæ potione ad aliquot dies, paroxysmi oblitterari visi sunt, sed Nobili ægrorante pejus se habente, in summum moerorem, & anorexiam prolapsa, quare mihi in votis erat reditus febris ad priorem statum, sic ad menses integros decumbere in lecto coacta est, ut de illius salute non parum timeretur, è Monasterio tandemeducta, & apud suos liberaliori vitæ commissa, longum post tempus convaluit.

(a) (*Novi olim &c.*) **H**istoria hæc a quinque retro lustris nonnisi ob inopiam petita, imò & repetita, est illa eadem, quam in Constitutionibus Epidemicis Mutinensibus habet Auctor Cl. pag. 42. Edition. Mut., pag. verò 57. nuperæ Patav. Edit., etsi aliqua in narratione novissima hujusce Dissertationis observetur a prioribus diversitas. In Constitutionibus siquidem tam primæ, quam secundæ impressionis dicitur oblata China China *in forma boli, cum in Vino infusam* Ægra respueret: neque ibi fit ulla mentio de repetitione remedii; & quidem appositè ad ejus ævi praxim; tunc enim apud nos nondumerat in usu, Febrifugum istud ad plures dies exhibere. In hac verò Dissertatione aliter factum asseritur, *propinata videlicet ad aliquot dies Chinæ Chinæ potione*. In aliis quoque variat narratio; imò & discrepat nonnihil, quæ in Mutinensi editione Constitutionum Epidemicarum reperitur, ab ea, quæ modo legitur in Patavina Editione ipsarum Constitutionum: in hac enim Domino quondam Antonio de Abbatibus Dignitas Archiatri Serenissimi

Ducis Mutinaë, quæ viventi a Cl. Auctore in illis officiosè tributa fuerat hujus historiæ occasione, adempta est, dum recuderentur, extincto. Sed hæc rem nostram non ita immutant, quin stet propositum Viri Cl., quòd nempe post Chinæ Chinæ usum Ægra illa pejùs habuerit, sive ad longum, ut in Dissertatione dicitur, sive ad modicum tempus, ut in Constitutionibus Epidemicis. At quomodocunque hæc fuerint, quomodocunque Febrifugum fuerit oblatum (certè tamen semel) qualiscunque fuerit jam Ægræ status, qualiscunque Febris illius, diuturnioris licèt, natura, & qualescunque Cause peculiariter illam producentes, concomitantes, atque foventes, mihi quæ Ægram licèt non invisenti, magis fortasse notæ, quàm Cl. Auctori, hac in re (si liceret cuncta persequi) non parum decepto: posito nihilominus, quod omni cautela circa singula hæc adhibita, fuerit Cortex parum feliciter propinatus, subsequente videlicet laboriosa, difficili, seraque, ac diutina, ut hic asseritur, convalescentia, non tamen morte, quid indè propterea? Nunquid deterior multò fors Ægrotantis eva-



evasis? Nunquid alia Remedia *ad mensuram integrum* prius administrata, inter quæ dubio procul *Febrifuga Veterum*, causam *Febris*, ut asserit Vir Cl., *sensim exantlantia*, profecerant plurimum? Nunquid ergo si nē Cortice felicius convaluisset a *tam diuturnis*, ut Auctor inquit, *paroxysmis* ea Constitutione, qua (ut adnotat ille pag. 15. earundem Constitutionum Edit. Patav.) *nunquam visa contumaciores Febres*, ad *recediendum* magis prona, & *qua magis Medicorum industriam eluderent*? siquidem (sequitur) *nec repetita phlebotomia*, *nec purgationes*, *nec mille Alexipharmaca* (en hic involuta *Febrifuga Veterum*) *que pleno gutture tanquam manus Deorum*, *Receptorum Chorus* adeo celebrat, quicquam profuere. Adeo igitur mirum non est, in tam *pervicaci Constitutione* morbosa repertam esse Adolescentulam, cui fortē uni opem cæteroqui consuetam Cortex non tulerit, quando id nonnunquam, raro licet, accidere, atque ob id ipsum quoque, raro me in benignis Intermittentibus, persæpe *Depurativis*, Corticem eundem præscribere consuevisse, apertis literis prodidi, allatoque simul Exemplo confirmavi in The-

rapeutice mea pag. 75. & 76. Verum quid multis? Tutela Chinæ Chinæ semel a Viro Cl. improspere, forsan & improprie oblata, quid ad me?

(b) (*Experimentis a se habitis &c.*) Ornamentum postremæ huic narrationi superadditum esse crediderim, non quidem quod Aulicus quondam Professor iste oblationi Peruviani Corticis nonnihil obstiterit, ac *minimè ex animo assensum suum præstiterit*: etenim & ille, & reliqui ferè omnes Mutinenses Medici, præsertim Seniores eorum temporum, usui illius quammaximè reluctabantur, ut dixi jam in *Therapeutice* mea pag. 3.; sed Mantissa quædam colorata est. quod obstiterit non solum rationibus, verum & *experimentis a se habitis*: tantum enim abest, ut ulla, siue fausta, siue infasta de hoc Febrifugo ille habuerit experimenta, ut certò sciam, ipsum, qui sympatheticas potius curationes in deliciis habebat, aliquando nugatorium Febrium transplantationem in perterebratos Arborum Cortices tentare maluisse, quàm implantationem (liceat nonnunquam vocabula condere) huiusce Corticis in Corpus humanum.

## §. 27.

(a) **H**ic nimirum Medicorum est error, ut si Chinam Chinam in hunc solum finem præscribant, ut paucos à paroxysmis dies liberos obtineant, (b) *interdum eludantur*, febre amplius non redeunte, sed tacite corpus depascente; non absimiles casus alias mihi contigere, ut me poenituerit hoc remedio usum fuisse. Rem felicius cessisse annotavi quibus post aliquot paroxysmos febris denuo caput erexit etiam ferocior, quàm quibus febris visa est prorsus extincta, & oblitterata, seu parva subsecuta.

(a) (*Hic nimirum &c.*) **Æ** Grè admodum cavere poterunt Medici ab errore, a quo nequivit ita cavere Vir Cl., quin illum ob id poenituerit, hoc remedio se usum fuisse, ut subdit in contextu. Sed tunc fortè nondum advenerat tempestas, qua maturescunt Ficus, ut *Ficu febrifera Pharaonis* præscripta, de qua §. 38., posset errorem corrigere, depulsamque Febrem iterum revocare. Cum itaque in Medici potestate non sit, præcipere Febri discessum ea lege, ut postliminio brevi revertatur: neque *Ficubus Pharaonis* queat illam vel invitam cogere rursus ad reditum

pro libito suo; non aliud agendum supererit, ne Febris ipsa in *apertam denuo flammam* renuens erumpere, corpus tacite depascatur, nisi abstinere prorsus ab oblatione Febrifugi, etiam *ad impetrandas inducias*, & *ad virium reparationem*; quod cæteroqui faciendum docuit Cl. Auctor §. 8., & magis adhuc expressè docebit §. 48. absque ulla formidine erroris. Atque ideo, vel præceptum Viri Cl. de China China exhibenda *ad impetrandas aliquot dierum inducias*, & *ut recreetur ager, viresque resummat*, planè corruat necesse est, vel nullus sit error Medici id remedium in ejusmodi finem præscribentis, etiamsi febris vim si-



bi illatam in recessu indignata, votis eam reducem exoptantibus minimè auscultet.

(b) (*Interdum eludantur &c.*) Præscribant ergo Medici Chinam Chinam, repellantque opportunè in eum potiùs finem, ut, si fieri possit, Ægros, non *ad tempus tantùm*, sed *jugiter* a paroxysmis liberos reddant: sic enim *non eludentur a Febre amplius non redeunte*. Sed præscribant *tempestivè*, regulisque ac cautionibus debitis; itaut non usurpent, nisi *Ubi, Quando, & Quomodo* decet, ut in Therapeu. mea pag. 170., & alibi. Si ita segerant, nunquam eos poenitebit, se fuisse usos tam strenuo Febrifugo: poenitebit potiùs post rem prosperè gestam tam serò uti didicisse. Tunc & Ægri sibi *rem feliciùs cessisse* dignoscant, nec *tacitè se depastos* a Febre suspicabuntur (quomodo enim se depastum suspi-

bitur a febre, qui, ut nuper fatebatur §. 25. ipse Cl. Auctor, eadem *Silente per Chinam Chinam febres reportat robur?*) non suspicabuntur, inquam, se depastos a febre, sed sibi rem longè feliciùs cessisse dicent, si ea vel *non revertatur amplius*, vel saltem nonnisi *mitior, ac parva*, quàm si *ferocior caput extulerit*. In primo etenim casu illam fuisse a Febrifugo opportunè mulctatam, sensu ipso experientur; in altero minùs opportune; absque eo quòd alienum, & quidem satis paradoxum, de rebus suis iudicium exquirant. Neque enim homini China China sacro, qui jam, ipso notante ut supra, Cl. Auctore, *roboris aliquantum reportet in dies*, opus esse crediderim consulere Oracula, & trepidanter quærere, sit ne sibi melior continuata sanitatis possessio, an relapsus in Morbum.

### §. 28.

(a) **D**ominus Augustus Quirinus Rivinus Scriptor recens, in suo Libro Elegantissimo Medicarum Dissertationum, Typis Lipsiensibus an. 1710. edito in Dissertatione de Febris Intermittentibus, eos sugillat, qui postquam aliquo specifico febrem propulsatam videant, ut illam amplius non esse redituram prædicent, sibi plaudunt, & gaudent, ait enim *Medicos quosdam gratulari, quando ægotantes è charibdi in Scillam deduxerunt, idest febrem feliciter profligarunt, agro interim vel contabescente, vel intumescente ab humoribus pravis, atque hydropè, & paulo post mentione facta de Veterum Febrifugis, qualia sunt Centaurium minus, Absinthium, Carduus Benedictus, radix Gentianæ, & alia huiusmodi quorum usum commendat, hæc subdit verba.* (b) *Idem hoc de Cortice Peruviano Gannaperide, vel ut alias vocatur China China, censeo, ut pote qui præ cæteris amaris, aut Febrifugis revera nihil peculiare, aut tanta laude dignum præstet. Certe sive genuinum, sive adulteratum sit, quod venditur, ab ejus usu interdum quidem febrem aliquando delituisse, seu plerumque subsecutam pejorem recidivam, in aliis & frustraneam, & nocivam extitisse.*

**N**il minùs me terret ratio satis, & experientia munitum, sed me simul nil magis angit, quàm Auctoritate impugnari. In id nanque discriminis non semel adducor, ut Scriptoribus omni honore, ac estimatione cæteroqui dignissimis, ullo pacto hac in re nequeam subscribere: imò cogar, impellente me nota nimium veritate rei, non modò contrariis aliorum illustrium Virorum adductis testimoniis eos refellere, verùm & iis memetipsum fidenter opponere omnium

infimum, sed fortasse præ multis expertum. Puderet me sanè cum quoquam tanta decertare fiducia, si de subtili quapiam doctrina lis ageretur; sed ubi disquiritur factum, quæ de illo sum millies expertus, ingenuè referre, & adversus Opponentem quemlibet constanter sustinere haud erubesco. Ob id penes me nulla auctoritas in hac materia experimentalis magni penditur, nisi ab Auctore illa profiscatur, qui per quatuor saltem, vel quinque lustra hoc remedio liberaliter sit usus.



usus. Atque ob id ipsum in Tractatu meo inter tot Auctores huic Febrifugo usque ad excessum addictos, paucos selegi pro Antesignanis; eos nempe, qui longam, crebram, & rationalem de illo experientiam nacti fuerunt; relictis totalis, qui, quamvis miranda prædicent, forsan toto Praxeos illorum decursu vigesies Antifebrile istud non præscribere. Quod de Auctoribus faventibus assero, multò magis assero de adversantibus; quos inter impossibile ferè crediderim numerari quemquam, qui plures, ac pluries, ut opus esset, Febrifugum istud administraverit. Atque id duplici quidem de causa: primò nempe, quia possibile verè non est, hujusmodi Pharmaco crebrò uti, & crebrò falli, saltem ut de noxa possit meritò quis suspicari, nisi præter rationem prorsus utatur: secundò, quia credibile non est, quòd Vir honestus, ac probus, qui semel, bis, aut ter eodem usus, quacunque demum de causa, quantunvis irrationabili, sed sibi apparenter vera, umbram non levem suspicionis admiserit, audeat remedium sibi suspectum deinceps præscribere, atque, ut cæteroqui expediret hoc casu, ulterius experiri, sua jam satis suspicionem occupatus. Atque hæc præmisisse lubuit, ne posthac Lector nimiam mihi facilè imputet in rejiciendis oppositis auctoritatibus confidentiam; licet hanc quoque omni, quoad finet veritas, modestia me ubique temperaturum pollicear.

(a) (D. Augustus &c.) Jam verò obicitur mihi statim auctoritas D. Augusti Quirini Rivini, *Scriptoris*, spectata saltem Libri impressione, *recentis*; quæ quidem qualitas non parvi facienda in casu nostro. Etenim (ne vel hoc ipsum subdiceam) Auctores ferè omnes, quantunvis famigeratissimi, qui ante annos plus minùs viginti quid finistri, quidve suspecti de hoc Cortice sibi tunc haud satis noto scribere; cum scilicet nondum universalis, ut modò, peracta erant de illo experimenta felicia; mirum non est, si solo ducti conjecturarum suapte natura fallacium, & rariorum, incertorumve successuum lumine id egerint, suisque in Scriptis mistas identidem laudibus exceptiones, aut suspensiones quasdam protulerint, accuratiori Posterorum indagine discutiendas. Persæpe quoque absque ulteriori veritatis scrutinio ad unius Cuculi tantum cecinere plures: quo dein factum, ut etiam hodie remedium istud egregium damnent non-

nulli tantummodo in *Fide Parentum*, aut ad modulum sui captus; cum tamen, si eis invisendum detur, futurum sit fortasse, ut illud ægrè internoscant a Cassia, vel Cinnamomo. Ut igitur redeam ad recentem Scriptorem, cujus Librum, ob locorum distantiam, nondum est datum posse mihi tam facilè comparare, omisso illius priore Textu generali, qui nec de *China China*, vel alio *Specifico* Febrifugo quicquam loquitur, neque me (quoscunque sugillet) ullo pacto afficit, cum de qualibet præpostera Febres pellendi methodo possit intelligi, sive id fiat per insigniter evacuantium, refrigerantium, aut humectantium abusum, sive per exuberantem sanguinis effusionem, sive alia quavis via minùs laudabili, omisso inquam hujusmodi Textu, quippe Corticem Peruvianum usque adhuc minimè improbantem, ad alterum me convertito magis specialem, usuique hujusce Febrifugi minùs faventem: siquidem misellus hic Textus, qui per omnes errans Grammaticæ Regulas undique claudicat (luxationem, ut reor, passus, dum dimotus e sede sua) graviore insuper vitio aliquo non laboret.

(b) (*Idem hoc &c.*) In hoc Textu cum statim ambigat Scriptor ipse, *an adulteratus sit, an genuinus, qui Lipsia venditur Peruvianus Cortex*, omnino dicendum erit, ut mos eidem geratur, Corticem illum adulterinum esse, non quidem ob facilem Febrium recursum, quæ post assumptum etiam quandoque germanum Corticem solent recurrere, nisi diutius ille usurpetur, ac repetatur; imò etiam nonnunquam, rariùs licet, quamvis & continueatur, & repetatur usus illius, ut passus sum in ipso Tractatu meo: sed aliteratum suspicabor ex hoc solum, quòd ille *præ cæteris*, ut inquit, *amaris, aut Febrifugis, qualia sunt, Radix Gentiana, Centaurium minus, Absynthium, Carduus Benedictus &c. revera nihil peculiare, aut tanta laude dignum præstet*. Hic ergo cum non ausim, quasi Corchorus inter Olera, cum Professore Botanices, qualem agnosco D. Rivinum, de re Botanica disputare, quæram saltem, num tanti sit apud ipsum Rivinum Ramazzini auctoritas quanti est apud Ramazzinum Rivini. Si pari utrinque, ut reor, passu procedat res, dicam statim ex Cl. Ramazzini effato, ut in *Collatione* aliàs citata lit. B., Chinam Chinam, nedum vulgare antifebrile, cujus-



cujusmodi sunt Gentiana, Absynthium, Centaurium &c., sed & *Alexipyretorum omnium*, quotquot excogitavit *Antiquitas*, aut *Chymicorum solertia conflavit*, esse facile Principem. Cum verò hoc ipsum Judicium suum in præsentī Dissertatione retractare, aut revocare studeat idem, qui protulit Cl. Ramazzinus, appellare demum liceat ad supremum Tribunal universæ Reipublicæ Medicæ, instando enixè, declarari communibus Medicorum Febrifugum hoc expertorum suffragiis, an *sincerus*, & *genuinus Peruvianus Cortex* in sistendis, & statim, & semper, Februm Intermittentium paroxysmis, præstet revera aliquid peculiare præ cæteris *amaris*, aut *Febrifugis* superius recensitis. Proh magna Europæorum Mercatorum cæcitas, qui ex America Chinam Chinam ad nos asportant, cum satius foret, Absynthium, & Centaurium nostrum ad Americanos devehere! Quod si ad Posteritatis Tribunal Causæ hujusmodi examen placeat prorogare, nullus dubito, quin decantatis Veterum Febrifugis cum China China collatis id sit eventurum, quod olim Cristis Gallinaceis in Pavonis Caudam velitantibus contigisse, falsè fabulatur Cælius Calcagninus in suis Apologis. Cum enim illæ in *summo capitis fastigia* prominentes, Pavonis Caudæ insultarent, quod *postremissimo loco* nata esset, scopæque instar terram verreret; *Respondebo his*, inquit illa, *quum vos palidula, ac ætate exesa, e militari cono me hostibus minitantem suspicietis*. Sed ad nos iterum.

Evincit quoquē, Chinam Chinam, quæ Lipsiæ venalis prostat, *sinceram* non esse (quod suspicatur & Langius Professor Lipsiensis) evincit, inquam, id ipsum assertio altera ejusdem D. Rivini, nempe, a Peruviani Corticis usu interdum tantum, & aliquando *Febrem delituisse*: in aliis *illum*, & *frustraneum*, & *nocuum* extitisse; bono enim, & germano assumpto Cortice, si depulsa Febris dicatur etiam solum *delitescere*, id saltem non contingit *interdum*, sed *semper*; adeoque in hoc sensu nec evadit ille unquam *frustraneus*; dummodo Febris sit, vel Intermittens, vel de Intermittentium profapia, quod omnino requiritur. De *noxa* verò, quæ nonnisi ab usu præpostero, ut diximus, potest procedere, loqui amplius planè detrecto. Revera ut hæc omnia, quæ obtruduntur, queant subsistere, non aliud

conjectare licebit, nisi quod hic Scriptor loquatur promiscuè de Febribus omnibus, tam continuis, quàm Intermittentibus: quo solo casu plura ex dictis poterunt haud difficulter admitti. Nec forsitan emendicatam quis dixerit istiusmodi conjecturam; quandoquidem §. 35. hujusce Dissertationis ex Cl. Ramazzino habemus, absque eo quod aliunde quæramus, in Actis Lipsiensibus improbari usum Chinæ Chinæ, in Constitutione quadam Uratislaviensi anno 1699. universaliter adhibitæ (& quidem perperam) ad *Febres Continuas populariter grassantes*. Forsan & illuc respicit hujusce Lipsiensis pariter Scriptoris observatio.

Cæterum cum adducta illius auctoritas, prout jacet, non congruat experientiæ meæ; neque id ego præsumam, ut mihi potius, quàm illi acquiescat quivis hoc remedium nunquam expertus Lector (expertos enim jam inter meos connumero) fas sit, omisis tot aliis, qui simul congesti efficiunt, ut *de hoc Remedio jam habeamus Pandectas*, recentem aliquem Auctorem Lipsiensem pro Conciliatore nostro seligere, cujus Scripta approbet, ac magni faciat ipse D. Rivinus. Sit iste celebris Christianus Johannes Langius; cujus Opera Medica omnia, duobus amplis voluminibus comprehensa, edita sunt Typis pariter Lipsiensibus anno 1704. curante, ut legitur in fronte illorum, eodem D. Augusto Quirino Rivino Patholg., atque Botanices P. P.; ut nempe sui *conjunctissimi Affinis* (quemadmodum ipse ad Lectorem præfatur) labores, ac Scripta Cedro digna, & Orbi perutilia commendaret immortalitati. Cum ergo in his Langianis operibus reperiatur part. 3. Volum. 2. pag. 361. *Disputatio disertissima De China China virtute febrifuga*, in qua quicquid ferme in eam usque diem a diversis Auctoribus tum in approbationem illius, tum etiam in contemptum prolatum fuerat, collectum, examinatum, & discussum visitur ad pag. usque 375. idcirco ad id saltem me refero, quod in ea Disputatione adversus Obrectatores Corticis adstruit Vir ille Celeberrimus: etsi fatear, omnia, quæ in ea Lucubratione ab eodem Langio traduntur, etiam de favorabilium numero, mihi non semper probari, ut qui suspicor, haud completam sufficienter, fuisse defectu temporis Viro illi Clarissimo, anno ætatis suæ 46. vita functo, hujusce Febrifugi elegant-



gantio rem praxim. Interim saltem, quod nobis præcipuum est, reponere liceat, illa eadem quatuor Amara Febrifuga, a D. Rivino Chinæ Chinæ, non quidem prælata (ut illa huic præfert Cl. Ramazzinus) sed tantum æquiparata, & æquè commendata, nempe *Centaureum minus*, *Absinthium*, *Carduum Benedictum*, & *Gentiana Radicem*, illa inquam eadem nominatim in citata Disputatione a Cl. Langio Chinæ Chinæ ita posthaberi, ut secundum ipsum pag. 372. *His, aliisque, ut inquit, hujus generis pluribus Medicamentis Antifebrilibus, quæ ordine recensere nimis esset prolixum, extra controversiam præripiat palmam China nostra China, dubio sine ex sua singularissima textura &c.*

Tandem quoniam hisce Langianis Disputationibus D. Rivino Placuit (ipse sic Lectorem admonet) in margine breviter annotare, quæ prolixius in contextu pertrahantur, ut hoc felicius contenta evolventi, & vel obiter insipienti appareant, referam ipsius D. Rivini verba, pag. eadem 372. Paragrapho 50. in margine apposita, quæ sic habent. *China China reliquis An-*

*tifebrilibus antefertur.* Antefertur equidem, fateor, a Langio; sed a Langio Practico egregio, Scriptore recenti, D. Rivini Discipulo, illiusque conjunctissimo Affini; atq; id ipsum patitur, & sponte studet exscribere, ac annotare sine ulla limitatione Præceptor ipse D. Rivinus, forsan ut quadam veluti approbatione fortuito apposita, propriis ipsius verbis lis hæc dirimatur. Quod si denique ipsi D. Rivino Scriptori recenti recentissimum aliquem quis opponendum velit, is legat D. Bernardinum Zendrinum, qui in suo De China China Tractatu, Typis Venetis hoc ipso an. 1715. edito, sensa ubique profert sensibus D. D. Rivini, & Ramazzini aperte contraria (reliqua ejusdem Tractatus non est quod persequar, aut perquiram curiosus) ne verbum quidem habens de hac Ramazziniana Dissertatione, paulò ante Patavii impressa, & apud Venetos Bibliopolas publice prostante: indicio manifesto, tam rationes Cl. Ramazzini, quam auctoritates D. Rivini, & aliorum contra Chinam Chinam allatas, libero huic Scriptori nullum negotium facessere valuisse; sed exolevisse neglectas.

## §. 29.

(a) **U**tilior forsan esset Corticis Peruviani usus in febribus intermittentibus malignis, si tales ab initio dignoscerentur, observantur enim aliquando tertianæ febres vere intermittentes, sed mali moris & perniciosæ, (b) de quibus *Mercatus* peculiare Caput habet, quales febres Hippocrati non prorsus fuerunt ignotæ, in septimo enim Epidemiorum hæc habet verba. (c) *Cholerica affectiones magis in æstate fiunt, & febres intermittentes, & quibus horrores accedunt, hæc quandoque malignæ fiunt.* In hujusmodi casu (d) si aliqua pravitatis signa se prodant, quæ ut plurimum obscura sunt, & Medicos fallunt, non alienum erit hujus Febrifugi usum pertentare, periclitari enim oportet, cum morbus periculosissimus est, ajebat Hippocrates.

**H**Actenus conatus est Cl. Auctor ostendere, amethodicum esse, & irrationalem usum Chinæ Chinæ, suapte naturalis, ut inquit, dolosa, ac suspecta, tum universaliter loquendo, tum etiam peculiariter in Febribus Intermittentibus, nullam malignitatem præferentibus; in quibus, ut vidimus, non ad cautionem omnimodam (quæ hoc remedio obtenta ipso Judice noxia foret) sed ad inducias solummodo aliquot dierum impetrandas,

dummodo adsit certitudo de illarum reditu, nonnunquam permittit; dosi tam satis exili, quippe non repetita, imò & in nonnullis tantum, non omnibus usurpanda Ægrotantium generibus. Cuncta hæc ferè ex diametro opponuntur iis, quæ de innocua hujus Remedii substantia, usu illius, & dosi, ad Febres Intermittentes non malignas abigendas, toto primo Libro Therapeutices meæ præmissi; ut propterea idem primus scopus unicus hucusque



que fuerit castigationis a Cl. Auctore in antea actis tentatæ. Huic tamen labori suo forsitan pepercisset, si primam, & alteram tantummodo paginam Libri secundi non renuisset evolvere; ubi apertissimis notis (quod a Lectore velim considerari) me nullatenus repugnantem polliceor cuilibet, qui in *benignis* Intermittentibus Peruviani Corticis opera uti recuset: cum eo Febrifugo ipse quoque in iisdem Intermittentibus non admodum frequenter utar, quippe pro *Depurativis*, seu *Persektivis* sæpius a me habitis.

Enimvero etiamsi contendere velit Cl. Auctor, vel alius quispiam, solam effervescentiam febrilem etiam periodicam, esse instrumentum *unicum* depurationis Fluidorum; atq; hanc depurationem esse jugiter a Natura, paucio adminiculante remedium apparatus, nobis expectandam, usquequo saltem magnum non superveniat, impendatque periculum: adeoque *nullum* unquam esse locum, hac semota conditione, oblationi cujusvis *Specifici*, quod citò paroxysmos sistat absque crisi valde copiosa, & palam sensibili (cujusmodi nullum adhuc præter Chinam Chinam repertum est) ego sanè ita sentientem nullo pacto refellere aggrediar, quantumvis forsitan rigide nimis sentientem. Neque me ab hoc proposito dimoveret quispiam alius, qui minimè innixus hujusmodi ratiocinio, haud planè forsitan contemnendo, sed quavis inepta, aut futili motus ratiuncula, hoc ipsum tamen in re faciendum vellet. Etsi enim id rigorosè semper exigere in praxi, sæpe non cedat in proximi utilitatem; neque tamen cedit in evidens, & gravissimum damnum illius, ut contingit, quoties quis in periculo, & certo, & gravi, *certum* pariter hujusce Febrifugi a Deo dati spernit auxilium. Cuilibet propterea, qui duræ aded cervicis non sit, ut in extrema etiam angustia Remedium istud ablegandum judicet (iis videlicet in Febribus, iis in circumstantiis, eaque Methodo adhibita, de quibus abundè in Tractatu meo) cuilibet inquam hæc, quæ putarim negari non posse, facile admittenti, etsi in reliquis dein omnibus adversanti, absit, ut unquam succenseam, ut qui nullam hinc assertis meis, saltem potioribus, injuriam, nullumq; grave (quod majoris momenti est) Praxi Medicæ damnum fateor inferri.

Sola itaque oppugnatio *Methodi* meæ in

*Perniciosæ* a me descriptis evulgatæ, sola inquam hæc, si fortè a Viro quopiam existimatione digno (quod vix crediderim posse contingere) tentaretur, potis esset me commovere nonnihil; nullius tamen impugnatoris, utut Celebris, rationem haberem, nisi se profiteretur satis expertum: qui autem ritè expertum poterit se profiteri, rationem impugnatoris habere nequibit. Pro usu verò qualicunque alio Peruviani Corticis in *vulgaribus* Intermittentibus, pro quarum curatione nil ferè speciale prodidi, quod a pluribus ante me non fuerit annotatum; nec ea mihi pro pensio est, nec illud otium, ut velim decertare, & Causam, quam cum tot Viris pari voto mecum sentientibus habeo communem, mihi uni advocare. Atque ideo si intra hosce cancellos substitisset, ut hactenus substitit, Cl. Viri dissensus, omnes profectò illius, etsi alicubi valde peculiæres, ac acerbiusculas animadversiones tulissem tacitus; verum eas jam usquequaque ad nimietatem exuberasse, in bonæ simul praxeos, & veritatis detrimentum; atque ita quidem, ut tantum qui stertit non videat, paulò infra clariùs patebit. Quod autem palam cœpit

*Omnibus & Lippis notum & Tonsoribus esse,*

id certè a me citra quoddam dedecus amplius dissimulari non poterat. Et porrò dissimulare religioni mihi ducere, cum publica potius res agatur, quàm mea; nec exinde minùs quàm existimatio mea, periclitetur Reipublicæ utilitas. Jam verò his interjectis pro Lectorum pleniorè notitia, Animadversionum Cl. Auctoris simulque Responsionum mearum filum resummo.

(a) (*Utilior forsitan &c.*) In hoc Paragrapho Vir Cl. tertii præcipuè Libri Therapeutices meæ, quippe potioris, asserta quadantenus infirmare aggressus (id enim ex asse conficere haud ita planum) progreditur ad expendendum, quem locum in Tertianis Intermittentibus *Perniciosæ* a Mercato descriptis, queat habere Peruvianus Cortex. Atque hìc, priori deposita severitate, duo admittit non exigui ponderis; unum quidem absolutè, alterum conditionaliter tantum. Quod absolutè concedit, est, Febres Tertianas *malignas*, & *Perniciosas* a Mercato descriptas esse verè *Intermittentes*; itaut (quem admodum subdit §. sequenti) *ad perfectam apyrexiam deveniant*. Mirum autem visum est mi-



est mihi, quod Cl. Auctor admittat, Febrim adeo ferocem, quæ heri hominem pessimè exercuit, & cras est nedum reversura, sed & eundem statim interemptura, hodie illum planè dimittat, *nec concentrata tacitè cubet, nec corpus illius tacitè depascatur*; cum omnia hæc mala contingant, neque *unquam amplius homo ad veram, & perfectam apyrexiam peringat* ex Cl. Auctoris effato §. 25., & 27., quoties Tertianæ Febris *benigna* curatur Peruviano Cortice, post duas tantum hebdomadas forsitan reversura, & facile iterum recessura. Alterum, quod conditione apposita admittit pariter Vir Cl., est Febrifugum istud utilius *forſan* (nec enim certò) esse posse in *Malignis Intermittentibus*, si tales ab initio dignoscantur. Addo ego, & *etiamsi tales ab initio non dignoscantur*, sed Medicum fallerent; dummodo in illa ipsa accessione, qua tandem dignoscuntur, Æger non pereat, sed in alteram accessionem prorogetur illius vita, utut frigidus, & arteriarum pulsu fere omnimodè destitutus, expirare videatur: in his enim quocumque circumstantiis ille, ferè dixerim certò, China China secundum Methodum meam oblata restituitur. Imo sæpe etiam, etsi non tam certò, restitui poterit sola usurpata Mortoni Methodo, qui Febres hæc in extremum, quod modò diximus, discrimen hominem adducens, graphicè describit, & China China non rarò feliciter curat, ut videre est, tum apud ipsum, tum Lib. 2. Tractatus mei pag. 124., ubi Caput peculiare istius Auctoris recensum visitur, & Scholiis meis additis etiam ulterius dilucidatum. Quod ejus Methodo in usum ducta potest *sæpe contingere*; mea similiter adhibita solet contingere *semper*, aut ferè *semper*. Experiantur ter saltem, aut quater increduli, dummodo ingenui; meque tunc, si tanta illos teneat fiducia, mendacii redarguant. Quod si eas *ab initio* per sua signa, perque suos peculiare characteres dignoscendas velit Cl. Auctor, ut curationi suscipiendæ fiant opportuniore; id ex professo me per extensum scio tentasse haud oscitanter, forsitan & integrè præstitisse, Cap. primo Libri 3., Mercato præsertim, & Mortono præeuntibus.

(b) (*De quibus Mercatus &c.*) Mercatus itaque non unum peculiare Caput habet de hujusmodi Febribus, sed *multiplex*; illiusque Tractatulus de hac materia verè

aureus est, ac utilissimus, etsi non admodum comptus; adeoque plurimis philologico ornatu luxuriantibus longè antefendus. Primus ille fuit, qui ferocissimas hæc Febres observavit, exactissimè secundum varias illarum species descripserit, ac pro more suorum temporum peculiariter curare docuerit. Et tamen incuriosa Posteritas nullum indè traxit emolumentum; adeo ut major Scriptoribus omnibus fuerit sollicitudo scribendi quodammodo ad pompam, ne dicam ad Lectoris stomachum, de *benigna* Intermittente Tertianæ, quæ neminem, quousque talis manet, tollit de medio, quàm vestigiis Mercati inhærendo, quidquam scribendi de *Perniciosa*, & ex se ferè semper lethali. Excipe Lector Mortonum, qui de Mercati Scriptis, ut licet conjicere, minimè conscius, propria nihilominus observatione easdem Febres (minùs dilucidè quidem) exposuit; quodque laudandum magis, feliciter curare docuit Peruviano Cortice, rebus etiam in præceptis lapsis, liberaliter oblato. Utriusque Auctoris scripta circa hanc materiam habes recusa in Therapeutice mea Speciali, Scholiisque meis haud planè forsitan inutilibus adaucta: quæ simul omnia secundum Librum constituunt ejusdem Operis, ut nuper innui.

(c) (*Cholerica affectiones &c.*) Textus hic Hippocratis a Cl. Ramazzino allatus quasi quid peregrinum, ille idem est, quem primò observavit Mercatus, bisque de eodem meminit, Vallesii simul expositionem indigitans. Ego & Textum a Mercato citatum, a Cl. verò Ramazzino nunc recitatum, & ipsam Vallesii expositionem in Scholiis adduxi. Cuncta videlicet apud me, primò pag. 100., secundò pag. 108. & 109. Sed hæc forsitan, utut repetita, debiliorem Viri Cl. obtutum subterfugere.

(d) (*Si aliqua &c.*) Tandem fatetur Cl. Auctor, in hisce Febribus, *si aliqua prævitatis signa se prodant, quæ ut plurimum obscura sunt, & Medicos fallunt, non alienum esse* (rectius dixisset, necessarium esse) *hujus Febrifugi usum pertentare*. Hæc una confessio mihi sufficeret, nisi ea statim infirmaretur ab exemplis per eum allatis; quodque pejus est, commentitiis. Sed de his quàm mox. Non alienum itaque putat ille uti China China in Intermittentibus Perniciosis, *si aliqua prævitatis signa se prodant*: cum verò istiusmodi signa,



signa, ut inquit, *obscura sint*, & Medicos *fallant*, Thesis vix statuta statim vacillat. Saltem (fidenter subdam) obscura non erunt signa pravitatis, cum Æger in angustiis supra recensitis constitutus, non sine maxima difficultate febrilem paroxysmum incipit vix vivus transigere. In hujuscemodi casu, ni prius dignota sit Perniciosa Intermittens, offeratur a curante Medico Peruvianus Cortex; sed, bona venia Cl. Auctori, non ad drachmam *unam*, vel *duas* (neque tamen *ad uncias*, & *uncias*) exhibeatur: ea siquidem pusil-

la dosi præscriptus, nec citò dein, ac pluries, saltem ad Mortoni, vel Sydenhamii mentem repetitus, id ager solummodo, ut Vir Cl. possit jure, ac verè testari, quod nonnisi declamando testatur Paragrapho sequenti, *paucos nempe qui evaserint, sibi fuisse observatos*. Secus verò fiet, si exhibeatur idem Cortex Methodo validiore, sed congrua, & rationali, qualem in Therapeutice mea docui Cap. 3. Lib. 3., felicemque jugiter per plurimis Exemplis ostendi.

## §. 30.

**M** Emmini me vidisse Mutinæ variis temporibus Constitutiones quædam tertianarum febrium intermittentium, sed malignarum, quæ tertia quaque die suas habebant accessiones cum rigore & horrore, & more solito per sudorem fiebat solutio, ut ad perfectam apyrexiam devenirent, sed quarta, aut quinta accessio tanto rigore invadebat, ut ægri non amplius incalescerent, concentrato pulsu, ac toto corpore perfrigerato, nec multo post interierint. In tam gravi, ac subita tempestate Medici tanquam è gravi somno excitæ, cum antea super utramque aurem, ut dici solet, obdormirent nil tale expectantes in febribus, quæ cum frigore, & rigore accederent, absoluta in febricitatione postmodum subsequente, tumultuarie ad sacram anchoram Chinæ Chinæ ad uncias in vino infusæ confugiebant, sed incassum, paucos enim evasisse observavi.

(Memini &c.) **M** Emmini & ego quod meminuit Vir. Cl. varias scilicet Mutinæ contigisse Constitutiones Perniciosarum Intermittentium, quæ non ea solum, qua narrat via, sed valde multiplici, in Tractatu meo ordinatim exposita, Ægrotantes non paucos *ante repertam Methodum meam* (id namque addere necesse est) *Peruviano Cortice penitus intentato*, trahebant repentè, ac inopinatò ad interitum. Sed simul meminî, debuissetque & ille meminisse testis de visu, plurimos alios ejusdem generis Ægrotos, ne dicam omnes, eadem Methodo curatos, ocyssimè pariter, ac inopinatò *evasisse*. Saltem quot vidit ille Perniciosis hujusmodi Febribus laborantes, quibus ego meam Methodum adhibuerim, tot vidit repentè restitutos; pereuntem verò neminem. Et siquidem ullus sinceræ Inductioni locus concedatur; nonne vidit ille me duodeviginti abhinc annis, cum mihi graviter decumbenti tam humaniter adstitit (medicas enim manus nobis invi-

cem pro re nata præbebamus adjutrices) nonne inquam vidit, post latam a memetipso, atque ab eo citra dissimulationem admissam de imminente mea morte sententiam, epoto, dosi quidem maxima, unoque haustu, ad sex videlicet usque Drachmas Peruviano Cortice, omissa postmodum consultò repetitione Remedii, ab Orci faucibus illicò ereptum, ut fusè in Therapeutice mea pag. 205. atque ita quidem ereptum, ut ab eo tempore (superato videlicet novo Febris insultu, quem tunc præcavere non libuit) firmiorem ac antea in hanc usque diem traxerim valetudinem? Nonne pariter alios Ægrotos inspexit hujusce ordinis, quandoque etiam mihi socius in curatione, eodem remedio statim sanatos, nec ullo amplius morbo tentatos? Hujusmodi sortem faustissimam experti sunt, tum Æger ibidem a me descriptus pagin. 93. anno videlicet 1695. usu Corticis Peruviani, Viro Cl. tunc facillè consentiente, curatus; tum alter eodem remedio, me præscribente, ipso



ipso verò desperante, restitutus an. 1707. de quo pag. 279. & adhuc vegetus, etsi jam senex: ut plures omittam, de quorum Ægritudine, & cura omnimodam pariter certitudinem habuit, quamvis ad eos invisendos verè non accesserit. Ast hæc narrantur, & narrata sunt a me; fortasse verò non admitterentur (inquiet aliquis) a Cl. Ramazzino, si respondere potis esset. Scripta sunt a me (subdam) & a Viro Cl. lecta, nec tamen negata; licet omnem lapidem moverit ille, ut asserta sua exemplis quibuscunque, ac undecunque conquisitis, imò etiam interdum minùs germanis, fulciret; mea verò enervaret. Usque tamen libet eundem audire, hæc ante biennium, anno scilicet 1712. de China China locutum in Dissertatione *De Contagiosa Epidemia, quæ in Boves irrepfit* pag. 37. ut retuli in *Collatione Textuum* illius lit. H. *Equidem hoc presidii genus in Febris periodicis miranda præstat, ac præsertim in Tertianis Intermittentibus malignis, quæ in ipso impetu accessionis agros interdum necant &c. hoc enim Febrifugum fermentum illud malignum sive penitus restinguit, sive ita enervat, ut periculum illud tollatur, ne Æger in ipso Febris accessu inereat.*

Hic ergo quæro: Si Cortex Peruvianus in *Malignis Intermittentibus*, ipso Judice, *miranda præstat; si Fermentum illud malignum, vel penitus restinguit, vel plurimum saltem enervat; tandemque si periculum illud tollit, ne Æger in ipso Febris accessu*

*inereat*, cur tot additis limitationibus, cur tanta incertitudine, ac nutatione, verboque *forſan* interjecto, protulit §. antecedenti, *Peruvianum Corticem in iisdem Malignis Intermittentibus esse posse forſan utilem, si tales ab initio dignoscerentur? item, non alienum esse, usum illius percontare, si malignitatis signa se prodant, quæ tamen obscura sunt, & Medicos fallunt &c.* Rursus si verè, ac absolute ille utilis est in hujusmodi casibus, & incunctanter usurpandus, eo quòd in *Malignis Febris*, præsertim *Tertianis* verè *miranda præstat*, ut ante biennium asseruit; ubinam gentium quæso, ubinam terrarum miranda hæc observavit, aut commodius observare potuit ille, quàm Mutinæ; imò etiam, ausim dicere, quàm me præscribente? Si verò Mutinæ, ea miranda vidit, quæ prædicat, ubi verè vidisse certum est ex antedictis, qua animi fiducia nunc jactat, Mutinenses Medicos pro curandis hujusmodi Febris tumultuariè ad *Sacram Anchoram China China intassum confugisse, ac per paucos evasisse sibi observatum?* Habet profectò quid admirabile hæc inconstantia, eoque admirabilior ea est, quò brevioribus distincta temporum intervallis. Etenim Textus nuper citatus, ingenuus planè, ac etiam ultroneus, vix quatuor mensibus præcessit ortu Therapeuticen meam; ea verò vix in lucem edita, statim conceptum suum sortita est, orta que nuper hæc Viri Cl. Dissertatio, Auctori æquè suo infensa, ac Operi meo.

## §. 31.

**S**UCCURRIT nunc mihi funestus casus Domini Francisci Guidoni, qui ex hujusmodi febre misere oppetiit; laborabat Vir iste Nobilis Media æstate tertiana febre, quæ exquisitæ speciem referebat, ut altera die prorsus apyretos esset, & è lecto si vellet posset exurgere, die quinta h. e. quinto circuitu accessit febris tanto rigore, & frigore una cum mentis stupore, pulsu exili ut vix perciperetur, unde Medicus ad visitationem pro more accedens, ad ægri adspectum attonitus institit me non procul habitantem subito pro Consultatione acciri, in qua Vir ille cæteroqui doctus ingenue confessus est se deceptum à febre, quæ tertianæ exquisitæ morem, & leges omnino servabat, nullo se prodente pravitatis signo. Proposuit ille Peruvianum Febrifugum more suo propinandum, annui ego memor dicti illius, quod habet Celsus, *in præcipiti periculo multa recte fieri alias omittenda*, sed altera die aphonus, & gelidus æger mortuus est.



**H**ucusque tribus, vel quatuor Casibus a tempore valde diutino emendicatis, inter tot, quos ipse referre se posse identidem obtrudebat, parum profecit, nihilque probavit Cl. Auctor. Et quotiescunque etiam ii pleno robore constitissent, nec potuissent rejici a me ea facilitate, qua sunt rejecti, ut exempla probationis invalidæ; quid quæso a Viro Cl. probatum foret, ubi agebatur de usu Peruvian Corticis in Intermittentibus tantum diu turnis, & cæteroqui *benignis*, cujusmodi curationum felicissimarum ipse plusquam quingenta, si omnium memor essem, tribus illis, aut quatuor ab eo recensitis opponere possem exempla? Forsitan modò, ubi agitur de re valde gravi, videlicet de oblatione ejusdem remedii in Febris Intermittentibus quidem, sed *Perniciosis*, atque lethalibus, fortioribus exemplis utetur, nec ullam exceptionem admissuris; ut nempe Quartum Librum meæ Therapeutices impugnaturus, Historias in eo contentas, quippe felices, funestis ab ipso mox afferendis infirmet.

(*Succurrit &c.*) Jamque memetipsum armis meis confodere aggreditur, unius ex meis Ægris Perniciosa Tertianæ confecti casum opponens, ipse paulò ante mortem ejusdem Ægrotantis in consilium accitus. Sed hæc quoque narratio variat in pluribus; & primò in circumstantia gravi, quæ vel ipsa dirimit Matrimonia: adest quippe *error persona*. Non enim D. *Franciscus* Guidonius, qui multò ante objerat Apoplecticus, neque a me fuit unquam curatus; sed D. *Antoninus* Francisci, & Opizonis frater fuit, quem Perniciosa illa Febris sustulit; ille verò Medicus ego fui (atque hinc dignoscat quilibet, an Censoria virgula Viri Cl. me peculiariter petat, & an ictum, auras licet, non me sugillantem, queam dissimulare) ille inquam ego fui, qui me deceptum fassus sum a tam celeri prolapsu in illud exitium, quod tardiusculè forsitan, lentius eventurum a longè fueram suspicatus. Neque enim adeò deceptus fui, quin futurum mentis stuporem tempestivè prænosces, priusquam scilicet Æger in præceps rueret, curarim, ut ille rebus suis, animæque confuleret: cujus rei sollicitudo me impulit, ut D. Marco Antonio Origono Sacerdoti, Ægrotantis familiari, viventi adhuc, & memori, negotium anxie committerem (quod ille egregiè præstitit) quoniam Uxorem de imminente periculo

haud rebar satis adhuc persuasam. Cæterum nec morbi series, qualis a Cl. Viro describitur, nec alia minutiora mihi uni nota, non illi, qui cuncta habuit ex relatu meo, & quorum facile postmodum erit oblitus, cum re ipsa concordant. Ut cunque tamen hæc fuerint, certum est, Virum illum Nobilem ex Perniciosa Febre, primò Intermittente, mox Subcontinua, & repente soporosa (quo casu quis forsitan alius, subortam ex improvviso Apoplexiam, vel vafre, vel stolidè pronunciasset) præcipiti lapsu occubuisse. Me vesperi fassum esse Cl. Ramazzino, qui post administrata ob prævisum opportunè periculum Sacramenta Ecclesiæ fuit in consilium vocatus, deceptum memetipsum a motu morbi supra suspicionem quoque meam matutinam citiore, verum est: ultròque fateor, me aliàs etiam magis deceptum, inscio licet Viro Cl.: ac si diutiùs vivam, magis adhuc forsitan decipiendum. In hoc tamen uno me tum deceptum sum fassus, quòd tempus adhuc mihi sufficiens pro China China venturis accessibus exhibenda futurum esse antea conjectaram; cum tamen ob excidium immodicè præceps amplius ea nequiret administrari. Hoc ergo solum nomine, quòd nullus ei locus esset, de Peruviano Cortice mentionem habui. Oblatum verò fuisse huic Ægrotanti, aut propositum a me Remedium hujusmodi, ut fidenter asserit, brevique verborum ambitu affabrè circumscribit Cl. Auctor, summa dixerim illius etiam non viventis pace, ne per somnium quidem consonat veritati. De assertorum meorum honestate, nec ipsi, si quos novi, Obrectatores mei solent suspicari. Prostant nihilominus apud Pharmacopolam *Hortensium Candrinum*, Virum probum, honestumque Schedulæ meæ, Adversaria propria, & Codices fideles, ac integerrimi, lituram non admittentes, unde cuicunque lubeat, vel curæ sit, facile datum est certiorari. Ibi cuncta cernuntur, quæ usui fuere, & inter cætera a Cl. Viro proposita, mihi que statim probata, Ceratum Vesicatorium, & Lapis Bezoarticus, quæ forsitan Celeberrimum imitatus Sanctorium, *in fide Parentum* proposuit.

Hallucinationem tam masculam, quòd nempe obtrudat ille pro oblato minimè oblatum hoc casu, imò neque propositum Peruvianum Corticem, absit ut exprobrem Cl. Auctori, pie quippe quiescenti, deque his omnibus sibi nunc vanis forsitan riden.



denti; in cujus obsequium laplam fortè longa die memoriam tantum culpabo. Id unum innuam Lectori; obstupuisse me non parum, cum primò hæc legissem, miratus nempe quomodo Vir circumspectus, ubi de Facto agitur, hujusmodi commentitia tam fidenter, tam animosè scripserit, ut illi non sudarint præcordia (quemadmodum loqui consuevit ille §. 11.) ob metum de improspere eventu: improspere namque illi eventus est, se fuisse itthæc narrando deceptum, vel eum videri, cui fuerit animus alios fortasse decipere. Atque hæc Corinthiis audientibus, & satis scientibus recitat? ajebat olim Lucianus de quodam Historico nugatore, apud Corinthios se vidisse jactante, quæ illum neutiquam vidisse ipsimet norant Corinthii.

Obit itaque Vir ille Nobilis, Peruviano Cortice ne proposito quidem planè jejusus; quandoquidem præceps illius lapsus, in Subcontinuis cæteroqui Febribus, cujusmodi hæc evaserat, haud ita repente fieri solitus, contigit præter ordinem quoque; inclinante videlicet die minoris afflictionis: erat enim ea Febris Tertiaria duplex, ab initio tamen penitus intermitens. Cum verò paucis horis distaret potior, & planè lethalis accessio; jamque patenter inceptum esset præcox præter morem exitium, lethalia prorsus de more paulò post incrementa suscepturum, ab exhibendo incassum, imò & proponendo Febrifugo abstinendum duxi, ne quem servare illud non poterat, occidisset videretur. Scilicet Virum jam conclamatum, & postridie, ut patefecit eventus, moriturum, postridie quoque ab epoto minimè cruciante Peruviano Cortice (si fortè fuisset exhibitus) occubuisse, fuisset certe, ut infra §. 48., amaris China China potionibus miserum Ægrum conficere: interiisse verò deglutito Lapide Bezoartico, & Vesificantibus Emplastris inaniter divexatum, fuit, illum pro viribus Artis dubio procul reficere. Sicuti ergo perperam culpatur hoc casu non assumptus, neque præscriptus Cortex; ita perperam culparetur, si morituro fuisset incassum exhibitus. Revera nonne quotquot obeunt, obeant necesse est non multò post assumptum, vel cibum, vel potum, vel cardiacum medicamentum, vel quid aliud æquè innocuum, nisi ex inedia deficient? Nonne pariter identidem postridie ab epoto solvente,

aut leniente Medicamento pereunt Ægroti, quos tamen non Leniens illud pro innoxio habitum, sed Fatum eorum dicitur sustulisse? Exempla sanè hujusmodi, inculpato nihilominus Remedio simul ac Medico, haud infrequenter occurrunt in praxi. Unum liceat hîc referre, non quidem ut defunctum Antagonistam retaliem, ac quodammodo vicissim criminer, sed ut inopinata quandoque artis infortunia haud intempestivè commemorem; unum, inquam, liceat referre de Viro Nobili, dum casus, qui in gente vulgari contingunt, ut ajebat §. 20. Cl. Auctor, sinè rumore terra obtegunt. Nimirum ita res accendunt lumina rebus: quemadmodum enim sub initia hujusce Paragraphi succurrebat in rem suam eadem Cl. Auctori funestus casus D. Antonii Guidoni, Francisci nomine inconsultè appellati, ita in rem meam

Succurrit nunc mihi, & quidem succurrit certa reminiscencia (multoque magis hujusce eventus deberet meminisse, si viveret, idem Cl. Auctor) funestus casus D. Honorii Baroccii, qui ex hujusmodi infortunia miserè oppetiit. Laboraverat Vir iste Nobilis levioribus quibusdam sed diuturnis Febribus, a quibus jam ferme convaleverat, vel saltem adeò leviter affici videbatur, ut jam e lecto exurgeret, possetque, si vellet, etiam e cubiculo egredi. Usque tamen obstinata alvi stipticitate premebatur; pro qua sollicitanda Medicus illi præscripsit sex tantum drachmas Electuarii Lenitivi. Eo remedio assumpto, Æger superpurgationem passus, in deliquia subinde incidit, Febremque intensissimam una cum pulsu exili, ut vix perciperetur; unde Medicus ad visitationem pro more accedens, ad Ægri adspæctum attonitus, institit, me non procul habitantem subito pro Consultatione acciri; in qua Vir ille cæteroqui doctissimus ingenuè confessus est, se deceptum a Remedio tam blando, tamque parca dosi exhibitio in morbo tam levi, ubi nulla unquam se prodidere infausi ominis signa: sed vix Febricula quædam mitior superstes remanserat, actiones tamen minimum lædens. Irrita fuere nihilominus quævis in eo præcipiti periculo licuit experiri Artis auxilia: Altera enim die aphonus, & gelidus Æger mortuus est.

Loripedem rectus derideat, Æthiopem albus, Juven. Sat. 2.



## §. 32.

(a) **E**odem fato obiit D. Comes Fortunatus Cortesius, D. Joannes Altimanus, & complures alii eodem pene tempore, perpau-  
cos enim ab hujusmodi febre correptos evasisse vidi. (b) *Credo equi-*  
*dem*, quod si attentius hasce febres, quæ æstate potissimum aliquan-  
do caput exerunt, observarent Medici, credo inquam quod signa  
quædam pravitatis deprehenderint; magnarum enim calamitatum par-  
va solent esse ab initio signa, ut in morbis pestilentibus evenit. *Sæ-*  
*pe exiguus mus augurium tibi triste dabit*, ajebat Doctissimus Fracasto-  
rius de Contagione.

(a) (*Eodem Fato &c.*) **E**odem verè Fato obiit;  
China China videlicet nec assumpta, nec  
ei præscripta, D. Joannes Altimanus, ut  
habetur ex Consanguineis, ex Pharmaco-  
pola, & ex ipso curante Medico ordina-  
rio, nempe D. Riccio: neque enim casus  
ille, ut nec subsequens quicquam ad me;  
quod quis crederet, oppositum indicante  
prævio contextu? Asserit is, qui verè adsti-  
tit Febrem fuisse ab initio Intermittentem,  
mox in Malignam degenerasse; cui tamen  
curandæ, nec ipse, nec D. Ramazzinus su-  
peraccitus opportunum unquam putassent  
Peruvianum Corticem: tantum abest, ut  
vel propositus ille fuerit, vel in usum du-  
ctus. Ita ille: cujus effatum quod ad non  
oblatam Chinam Chinam nequit in du-  
bium revocari, cæteris etiam adminicu-  
lantibus: quod verò ad carentiam oppor-  
tunitatis illam exhibendi, standum erit  
amborum placitis, cum non aliter deceat.

D. autem *Marchio* (non *Comes*, ut ha-  
bet Cl. Auctor) Fortunatus Cortesius in  
quadam Ægitudine verè fuit olim cura-  
tus (ne quicquam reticeam) & a Cl. Ra-  
mazzino Medico illius ordinario, & a me  
simul in consilium vocato. Evasis tamen  
ille tunc a diuturnioribus Febribus; puto  
etiam ope Chinæ Chinæ; sed non satis  
memini, ut asseram. In ultima verò Æ-  
gitudine, cui compendiariorum succubuit,  
solus illi adstitit Vir Cl. proinde quibus  
pharmacis (dicam & ipse verbis illius ex  
§. 34. petitis) *Æger iste fuerit potionatus*  
*in postrema Ægitudine, omnino mihi igno-*  
*rum*. Hæredes Defuncti, consuetusque  
illius Pharmacopola Joseph Sallarolus cen-  
sent, nullum, aut fere nullum (nullis  
videlicet hac de re extantibus monumen-  
tis) brevissimo illius morbi tempore præ-

scriptum fuisse remedium: nullam pro-  
pterea exegit idem Pharmacopola, nul-  
lam Hæredes solverunt expensam. Certè  
Corticem Peruvianum minimè usurpatum  
fuisse, asserit hoc quoque casu idem D.  
Riccius, qui & hunc ægrum pessimè ha-  
bentem invisit, cum fortè Mulierem quan-  
dam de Nobilis ejusdem Viri famulatio  
tunc Ægrotantem curans, ad eum quoque  
officii causa non semel accessisset. Chirur-  
gus pariter Andreas Tassonus, qui pro suo  
quoque munere eidem adstitit, de solis  
Vesicantibus paratis, sed ob præcocem il-  
lius obitum nequaquam appositis, memorem  
se perhibet, de Cortice nil conscius. Quod  
si nihilominus, omnibus insciis, Chinam  
Chinam se exhibuisse contendat Cl. Auctor;  
cum Methodus illius non transcendat dra-  
chmas duas; hæc autem in præcipiti pericu-  
lo nequeant sufficere; habet hinc potius  
unde eum poeniteat suæ Methodi, pusil-  
læque, ac invalidæ suæ dosis, quam un-  
de aliis exprobet abusus nomine usum li-  
berioris, virilemve adeò fidenter tradu-  
cat Methodum, qua nullatenus usus est;  
qua verò uti necesse est hisce casibus, ut  
Cortex prosit. Quamobrem qua ratione  
inferret ille, noxium, vel frustraneum  
saltem fuisse funestis hujusmodi casibus  
ipsum Peruvianum Corticem, si verè fuis-  
set oblatus; eadem ratione saltem, for-  
san & potiore, mihi modò liceret infer-  
re, funestos probabiliter illos extitisse,  
eò quia non fuit oblatus, vel non obla-  
tus saltem Methodo mea.

Expectassem proinde potius, ut retulif-  
set hoc loco, ubi proprios luctus alienis  
intermiscere non renuit, Casum antiquio-  
rem, quem sibi olim contigisse, centies  
mihi narravit Cl. Auctor de quodam Lai-  
co Oblato ex Cœnobio Canoniorum Re-  
gula-



gularium Rhenanorum, quos vulgò S. Salvatoris; Mutinæ verò, ab Ecclesia desumpto nomine, S. Hieronymi appellant. Hic ergo cum Quartana Febre ab aliquot mensibus detineretur, adedque jam valde debilis, ut & valde senex existeret, atque ex Catarrho intra bronchia delitescente assidue substerrens; Cl. autem Ramazzinus invadente accessione (cui a nonnullis jam diebus non ut antea præibat amplius omnimoda apyrexia) duas, pro more illius temporis, Corticis drachmas illi exhibuisset, *ad impetrandas*, ut puto, *aliquot dierum inducias*, ea ipsa accessione decessit e vivis: quo pacto recedente febre, verè *optandum esset*, ut ea rediret. Hunc inquam casum potius, quam supra recensitos expectassem ut referret Cl. Auctor, ad innuendam, si non *malitiam occultam*, & prope veneficam, saltem invalidam, ac enervem in arduis hisce, ac *Perniciosis* Casibus Chinæ Chinæ virtutem. Sed forsitan meminit, quòd sicuti se mihi quodnam falsus erat ab eventu hoc inopinato aded terrefactum, ut hac una de causa in Constitutionibus suis Epidemicis non nihil meticolosè scripserit de usu hujusce Febrifugi (licet causam hanc ipsam subticuerit, ne sibi magis noceret, quam Cortici) ita postquam mecum rem eandem meliùs examinavit, viditque post editas Constitutiones suas tam crebrò quid possit, quidve præstet remedium istud ritè usurpatum, falsus erat pariter ingenuè mihi, se clarè jam dignovisse, protractam serò nimis eo casu fuisse Febrifugi oblationem, ac propterea perperam expositum infamix Remedium saluberrimum, cujus magis intempestiva esse potest serior, quam præcox administratio; cum ob ejus innocentiam, atque salubritatem de ipso dici queat oppositum, ac de alio quovis remedio dici solet; videlicet, in eo usurpando *leviora esse perpetuè peccata commissionis, quam omissionis*. Ita ille tunc.

Ut ergo rem contrahamus, ea tantummodo, quam supra vidimus, est vis, &

veritas omnis trium Historiarum, a Cl. Viro allatarum, quibus probare satagit, se *Mutinæ perpaucos vidisse Perniciosis Intermittebantibus correptos, qui China China epota ab iis evaserint*; cum tamen contraviderit nonnullos, si eorum placuisset illi tantulùm meminisse, & noverit alios plurimos, in Historiis octoginta circiter, toto fermè Libro quarto, & alibi a me descriptos, iisdem quidem Febribus confossos propemodum; sed ejusdem nihilominus Febrifugi ope pristinx incolumitati, qua etiamnum a tot annis integrè utuntur, felicissimè restitutos.

(b) (*Credo equidem &c.*) Credo & ipse, Medicos, si attentè advertant animum, posse tempestivè per sua signa, si non perpetuè clarè cognoscere, suspicari saltem rationabiliter morem pessimum harum *Februm Perniciosarum*. Nisi enim id credidissem, octo distinctas illarum species, ac differentias cum signis omnibus earum diagnosticis, prout mihi observare licuit, non essem exactissimè persecutus toto Capite primo, imò & secundo Libri tertii, quemadmodum pro viribus exequi conatus sum. Neque Tractatulum Mercati idipsum docentis, nec non etiam Mortoni descriptionem compendiarium præmisissem Libro secundo; ut ex illorum Auctorum, meisque observationibus simul collatis, facilius, & clarius evaderet obscura cæteroqui hujusmodi Februm tempestiva Diagnos. Sed & insuper quando Medicum etiam oculatum decepit nonnunquam fraudulentus hic hostis, dummodo eo ipso accessu, quo se prodit, hominem non interficiat, sat habet idem Medicus ex observationibus, & Methodo mea, unde hostem eundem, ultimum licet excidium interminantem, confodiat. Ut propterea suis Historiis, tum paucis, tum veritati minùs consentaneis, everSIONem Tertii mei Libri, praxim hanc utilissimam, totque insignibus Historiis in Quarto expositis confirmatam, continentis, irritò planè conatu tentarit Cl. Auctor.

### §. 33.

(a) **I**N Febribus porro continuis, dummodo de periodicarum profapia sint, si malignum quid portendant, jamdudum scio familiarem esse istic Chinæ Chinæ usum, & in larga dosi, sed multæ deceptiones hic etiam contingunt, nam febres continentes, essentielles ut vocant, interdum etiam inflammatoriæ, persæpe de natura intermit-



tentium participare creduntur, cum enim in febribus vere continuis observentur (b) aliquando parvi motus, & horrores ex internis vellicationibus, quales febres intermittentium naturam sapere existimant, unde consuetum remedium præscribere non dubitant; habent enim id omnes fere morbi, ut vespertinis horis graviores sint, *Quale est ad vespertinam exacerbari, ita & in omni morbo*, aiebat Hippocrates 4. Epidemiorum, omnibus pene ægrotantibus commune est, ut accedente Sole ad occasum magis molesti sint, atmosphæra etenim tunc gravior est, ac perspiratus debilior, quod in morbis melancholicis manifeste deprehenditur. Quartana febris, annotante Fernelio in Libro de Abditis morborum causis, nunquam, vel raro antemeridianis horis, sed pomeridianis suas habet accessiones. (c) *Quod si unum vel alterum exemplum afferatur eorum, qui in aliqua febre continua pessimis accidentibus comitata, ut pro conclamatis haberentur, Chinæ Chinæ potione ad uncias integras in vino infusæ pluries in die exhibita, evaserint, ut hoc solo remedio ab Orci faucibus videantur erepti, talia exempla tanti non sunt, ut animum faciant ad Chinæ Chinæ usum indiscriminatum, ac tam liberaliter adhibendum. Antequam Chinæ Chinæ nomen innotesceret, hujusmodi portenta visebantur, ut in incerto esset num medicamentorum, an fortunæ beneficio ægri convalescerent; quemadmodum enim, uti aiebat Celsus, moritur aliquis de quo Medicus securus fuit, quod non raro evenit, ita aliquando quidam deserti à Medicis convalescunt.*

(a) (In Febribus &c.) **N**on recedendo penitus a tertio, & quarto, ad convellendum progreditur Librum quintum Therapeutices meæ Cl. Auctor. Ut ergo cunctis ab eo turmatim objectis singillatim a me satisfiat, pauca hæc pro responsione lubet innuere. In Febribus recen-  
*ter tantum* Continuis factis (de Continuis enim ab ortu, seu *Continentibus originariis*, tam *Solitariis*, quàm *Comitatis*, tam *Essentialibus*, quàm *Symptomaticis* &c. hic sermo non est, utpote quibus, nec meo, prout latè in Therapeut., nec Viri Cl. iudicio, China China quicquam prodest) in Febribus, inquam, *recenter tantum* continuis factis, ac ideo Subcontinuis a me appellatis; dummodo de *Periodicarum*, hoc est de *Intermittentium*, aut *Subintransitivum* *prosapia* sint, si malignum quid portendant, idque contingat in morbi progressu; familiarem mihi esse Chinæ Chinæ usum, non in tam larga, sed in modica, & opportuna dosi, ex Libro tertio Tractatus mei Cap. pariter 3. potest certè Lector habere a pag. 163. usque ad 166. Si verò Continuitas illis accadat citius,

ac in ipso fere morbi principio, plurima cautione, ac circumspectione agendum esse, & perpendendum, an ope Chinæ Chinæ, an *Methodo* potius *ordinaria* tractandus sit morbus, expressè inculcavi; omnesque problematicas rationes hinc indè pugnantibus fusè examinavi toto Cap. 5. Libri Quarti; imò & exempla insuper coherentia retuli Cap. 6. ejusdem Libri. In Continuis autem de *Periodicarum* quidem, sed *Continuarum* *prosapia*, hoc est de *Proportionatarum*, five *Proportionalium*, ut vocant, Stirpe, quæ modò ad *Subintransitivum* tantum, modò ad *Continuarum* *originalium* genus reducuntur; nonnisi cum distinctione procedendum dixi in oblatione Peruviani Corticis, in uno casu proficua, in altero frustranea forsitan evasura: prout scilicet fermentum peccans, vel est præcipuè insitum sanguini, & febrem naturæ suæ Continuum gignit, vel præcipuè ab extrinseco accedit eidem sanguini, & febrem naturæ suæ producit Intermittentem. Ac tandem ipsam Theoreticam distinctionem ad praxim contraxi, docendo Signa ipsa diagnostica ejusdem Febris, modò ad unum genus, modò ad alterum pertinentis;



ris; adeoque modò Cortice curabilis, & modò non, Cap. tertio Libri Quinti, præcipuè a pag. 304. usque ad 308. neque enim eundem calceum omni indiscriminatim pedi inducendum uspiam asserui.

Quibus omnibus a LECTORE consideratis, facile erit illi decernere, an *multa illa deceptiones*, quas hic contingere autumat Cl. Auctor, siue de activis intelligat, siue de passivis, se teneant ex parte mei, cuncta minutè explicantis, & dividētis (quod omnino requiritur, ut cum utilitate exhibeatur hisce Casibus China China; secus saltem frustra exhibetur) an potius se teneant ex parte illius, cuncta, quæ ipse clarè distinxeram, turbulenter iterum confundentis; quasi ut damnare queat sic commissum, quod damnare nequibat tam clarè secretum.

(b) (*Aliquando parvi motus &c.*) Quænam sint hæ Febres Continua, nonnunquam etiam Inflammatoria, quibus aliquando parvi motus, & horrores ex internis vellicationibus, aliisque causis obtingunt Intermittentium ad instar, quæque tamen Peruviano Cortice non sunt curabiles; adeò perspicuè explicare, illasque ab aliis eodem Cortice verè sanabilibus, per sua diagnostica signa distinguere, ac unam Speciem ab alia vicissim sejungere conatus sum in citato Libro Quinto Therapeutices meæ Cap. 3., & signatè pag. 303., ut omnino supervacaneum censeam aliud addere. Imò aliquando eousque perrexit cautela mea; ut in Febre Inflammatoria nequaquam Continua, sed planè Intermittente) quam semel tantum licuit observare) a Corticis nihilominus oblatione abstinendum duxerim pag. 297. ejusdem Tractatus mei: ut proinde modò minimè repētendum sit mihi quod aliàs luculenter aperui. Dicam tantummodo in gratiam Tyronum; distinctiones illa practicas unius Continuae Febris ab alias, inter quas Febres nonnulla sit Symboleitas, & similitudo, quæ pluribus identidem erroribus ansam præbet, esse hujusmodi, ut si probè attendantur, Medicum in Chinæ Chinæ administratione apprimè versatum ostendant, efficiantque, ut ferè nunquam incassum illam exhibeat, cum non exhibeat nisi ubi eam propemodum certò profuturam prænoscat, atque etiam prænuntiet; si verò minùs exactè observentur, aut intelligantur, detegant illum eo remedio cæspitanter tantum, aut fortuito utentem, ac non rarò iis, qui bene uti

Torri Respons. ad Ramazz.

norunt, etiam ridiculum. Non omnes, qui habent Citharam, sunt Citharædi.

(c) (*Quod si unum, vel alterum &c.*) Octoginta circiter exempla, non unum, vel alterum attuli in Therapeutice mea Febrium lethalissimis persæpe accidentibus comitatarum, & China China, non ad uncias integras pluries in die exhibita, sed dosi decenter liberali, ut aliàs dictum est, & clariùs etiam dicitur §. 48., felicissimè expugnatarum. Istas omnes appellare Continuas non recuso, etiamsi ab ortu fuerint, vel Subintrantes tantum, vel proflus etiam Intermittentes; perniciæ siquidem in apertum prodeunte, statim in Continuarum castra se receperunt: adeoque & Continuæ tunc dici potuere; eo tamen modo, quo in eadem Therapeutice mea locutus sum pag. 139. An verò talia exempla tanti sint, ut animum faciant ad Chinæ Chinæ usum liberaliter adhibendum, judicent Practici. Quod si etiam (jure merito reponam ego) unum, vel alterum exemplum afferatur eorum, qui in aliqua Febre Continua, pessimis accidentibus comitata, ut pro conclamatis haberentur, Chinæ Chinæ portione exhibita nequaquam evaserint; talia exempla tanti non sunt, ut animum faciant ad illius usum, quasi noxius ille fuerit, tam liberaliter prohibendum: antequam enim Chinæ Chinæ nomen innotesceret, hujusmodi portenta crebrò visebantur.

At verò portenta, quæ visuntur postquam Chinæ Chinæ non nomen tantum, sed usus melior, me promulgante saltem, innotuit, sunt, ut Perniciosa Febris de Intermittentium, vel Subintrantium Stirpe, sed mox Continua recenter reddita, & gravissimis accidentibus comitata, quæ proinde in extremum vitæ periculum Ægrotantem redegerit, post biduum, vel triduum ab epoto hoc Febrifugo statim solvatur: idque non semel, aut bis; sed decies, vigesies, sexagies: neque etiam fortuito; sed ex præmissa Prognosi expressa, quòd ita sit eventurum. Adeò celer, adeò constans, & adeò certa moraliter est vel in hisce angustiis Peruviani Corticis actio. Quæ verò nonnunquam, sed perrarò, in hujusmodi casibus, siue Naturæ opera, siue Fortunæ, aut Artis ordinariæ beneficio contingit restitutio Ægrotantium pro conclamatis habitorum, nonnisi lentè, ægrè, ac difficulter contra ipsam Medici expectationem, atque Prognosim succedit. Ad hunc Lydium Lapidem exami-



nanda est acquisita salus: atq; ita unde illa processerit vel ipsæ dignoscent mulierculæ; ea quidem facilitate, qua Cuminum dispiciunt a Pipere, & fissa a non fissis, cocta a non coctis fictilia Vasa: siquidem & hic, si qua subest labes,

— *Sonat vitium percussa, malignè*

*Respondens viridi non cocta fidelia limo,* ut cecinit Persius. Sanitas per Corticem obtenta (dixi pluries in Opere meo, & signatè pag. 313., 314., 276., & 294.) facile dignoscitur ex insolita; qua acquiritur celeritate; id, quod fusiùs explicui in Schol. ad Mortonum, pag. 130. ejusdem Operis, istiusmodi cavillationem jam tum prævisam explodens. Sed pergamus.

Virtutem hanc certam *sistendi paroxysmos*, quam Chinæ Chinæ tribuit in diuturnis Intermittentibus Cl. Auctor, ut videre est in fine §. 22., eo quò scilicet eas illico post remedium illud assumptum cernit subsistere, quantumvis etiam non raro, & sponte, & ex improvise subsistant; cur illi denegat in iisdem Febribus recentem Continuitatem adeptis, adeoque difficiliùs sponte sua, tam citò saltem, solubilibus, adscribitque salutem Fortunæ potiùs, quàm Cortici; cum tamen eundem prorsus, æque certum, & æquè celerem in his, ac in illis intuetur effectum? Febres, qua de Intermittentium familia sunt (ajebat ille in Orat. Jatrici Argumenti pag. 102.) pulveris exigui haustu in vino soluti, aut compressæ quiescunt,

aut etiam penitus abolentur. At de Intermittentium adhuc familia sunt, si me Deus juvet, saltem quò ad suspiciendam actionem Corticis, Intermittentes illæ, quæ ab eodem etiamnum Fermento Intermittentium majori ex parte pendentes, vix cœperunt se se reponere in Continuarum classem. Admirandum est profectò (ajebat nuper idem Vir Cl. §. 4. hujusce Dissertationis) quomodo ad exiguum pulvisculum quomodocunque exhibitum Febris Periodica furor conquiescat, interdum etiam extinguatur; quòd de quocunque alio remedio pharmaceutico non tam facilè observatur, quod sciam. At Febres istæ, de quibus portenta visuntur, Periodicæ sunt. Si ergo eas oblata China China statim sanatas videat, ut saltem octogies videre potest in historiis meis; cur earum extinctionem Naturæ potiùs, vel Casui velit adscribere, quàm admirando Pulvisculo, cui nullum, quod sciat, equiparari potest remedium pharmaceuticum? Quid verò, si ante pulvisculi exhibitionem Medicus fiat sponsor de subsequendo ipsam felici eventu? Prognosim de certa, & cita morte, omisso Peruviano Cortice, & de certa, ac cita salute, eodem assumpto, a me in praxi præmissam ante oblationem illius, & quidem in circumstantiis gravissimis, vide in Tractatu meo pag. 214. Historia 9., ubi hanc, quam Cl. Auctor obtrudit cavillationem, penitus explosam comperies.

### §. 34.

**C**um decem ab hinc annis clauso jam Lyceo Mutinam venissem ad otia captanda, nec satis cavere possem, quin implicarer in curandis ægris, ac forte ex febre continua decumberet insignis Juris Consultus, vocatus ad consultandum cum Medico, qui curæ aderat, ac postmodum quoque accersito Domino Paulo Piela Clarissimo Medico Bononiensi, qui paucis ab hinc annis omnium dolore è vivis excessit, varia quidem administrata sunt remedia, sed ægro in pejus labente, unde alter Medicus, magnus Chinæ Chinæ virtutum assertor, declamare cœpit nullum aliud superesse remedium, quàm Peruvianum Corticem suo more exhibere; modeste responsum febrem eam non esse, cui conveniret tale remedium, sed illo instante, ac domesticis omnibus nos arguentibus, quod in re desperata unicum remedium arceremus, prædictus D. Piela, & ego assentiri necessarium esse credidimus, ne quidquam relinqueretur inausum. Per duos vel tres dies, si bene memini, quolibet mane, & forsan etiam pluries in die propina-



pinata Chinæ Chinæ potio pro more, sed ægro in deterius ruente, & pulsu ita depresso, ut vix perciperetur, quo viso aperte protestati sumus, ab hoc Febrifugo desistendum, quo facto pulsus paulatim cœpit assurgere, ac sensibilibiter percipi, torpore quo prius æger tenebatur discusso, sic tandem post multos dies solo victu, remediis omnibus ablegatis, præter spem prioris Medici, qui inter mortuos illum referebat, perfecte convaluit Vir ille, dignus fane qui longum tempus viveret, sed paucos post annos communi fato cedere illi necesse fuit, num autem in postrema ægritudine solito Febrifugo potionatus fuerit, omnino mihi ignotum.

(Cum decem ab hinc &c.) **C**Asus hic, quem pro libito magna ex parte fabrefacit Clarissimus Auctor, est ille idem, quem obiter egomet innui in Tractatu meo pag. 179. historia prima. Ibi namque ultimum, lethalemque describens morbum eximii hujus Jurisconsulti (cujus nomen modò suppressit Vir Cl., ego verò candidè tunc patefeci) hanc aliam, quæ jamdudum præcesserat ægritudinem; imò & tentatum in illa Peruviani Corticis usum paucis hisce lineis adumbravi -- *In alia difficillima Ægritudine ejusdem Patientis non sinè fructu remedium illud (videlicet Peruvianum Corticem) vix vix indicatum, cum aliis tamen quamplurimis, longo temporis tractu (in hoc uno me fefellit memoria; brevis enim, ut infra, fuit ille temporis tractus), præscripsimus; & ab eo morbo contra ipsam expectationem nostram evasit. An Cortex simul cum aliis remediis, an sola Naturæ actio opus illud absolverit, ignoro --* Ita ego tunc loco citato.

Si minùs ingenuè scripsissem, tribuissemque absolutè curationem gravissimi illius morbi, qui ad extremum usque marasimum Ægrotantem perduxerat, soli Peruviano Cortici, mihi que uni arrogassem dignotionem opportunitatis illum utiliter exhibendū, post alia remedia administrata; sed Ægro, ut inquit Vir Cl., in pejus labente; imò, ut subdit, re jam desperata, dubio procul hoc adamussim quadraret narrationi illius, utut in plurimis plurimū alteratæ. Etenim si re desperata, & cum Æger in pejus labebatur, propinata fuit per duos, vel tres dies, ut inquit, *China China potio*: item si brevi illo oblationis tempore (scilicet verè per biduum tantummodo) quo nondum actio Corticis se se poterat exerere, Ægrotus ille in deterius quidem, ut cœperat, etiamnum ruere videbatur

(siquidem poterat non moriens pejùs habere) sed tamen assumpta jam intra illud biduum modica quantitate Febrifugi, duarum nempe drachmarum quadripartitarum, illiusque virtute in actum, ut mox assolet, paulatim deducta, *pulsus*, ut pariter inquit, *cœpit assurgere, torpore, quo prius Æger tenebatur, discusso*, itaut solo victu, remediis omnibus ablegatis, convalesceret ipsemet Æger; profectò aliquid non alienum a probabilitate scripsissem, si adscripsissem Febrifugo curationis gloriam, inique meritum oblationis, qui tanta efficacia dicor illud proposuisse. Et tamen eo moderamine, eoque neglectu hæc omnia transegi, ut mihi abundè suffecerit merè dixisse, *illud non sinè fructu fuisse præscriptum*: neque a me uno quidem, sed ab omnibus simul curantibus Medicis, ut verè fuit unanimiter, & electum, & exhibitum. Oblatio autem illius instituta fuit per modum levioris alterantis, videlicet ad simplicem semidrachmam, manè, & serò; non tamen in forma potus, ut ait Vir Cl., sed in forma boli, per duos tantum dies, nempe die 25., & 26. Septembris anni 1704., ut habetur ex Schedis meis, & ex Adversariis, Codicibusque Pharmacopæi Hortensii Candrini simul collatis. Ex quibus constat, duas solummodo Peruviani Corticis drachmas intra biduum partitis, & exiguis dosibus, nonnisi lentè, ac imbecilliter agentibus, fuisse præscriptas. Propositum autem, usurpatumque fuit eo modo, eoque casu id Febrifugum in Febre Continua (quæ tamen ab exordio sui talis non fuerat) solum tentandi gratia, nullaque ferme spe, etiam ut Domesticis illud feliciter pluries expertis, morem gereremus; cum cæteroqui vix ulla tunc esset offerendi Corticem indicatio, ullave saltem solida ratio. Propterea subdidi, nos præscripsisse



plisse quidem *Remedium huiusmodi*, sed *vix vix indicatum*.

Qua ergo sui ipsius securitate, postquam hæc scripserim, quæ a Viri defuncti Uxore, & Filio, bis propter Chinam Chinam vivente, semperque deinceps melius ac antea valente, possunt confirmari, illudit ille mihi, inquiens, *declamasse me* (neque enim cum D. Piela, & D. Ramazzino ullus erat, qui, ut ait, *declamare* posset, & festivè appellari, *Magnus China China virtutum assertor* præter me) ut Peruvianus Cortex exhiberetur, si remedium illud, non modò *vix vix indicatum* fuisse sum fassus; verùm etiam post absolutam feliciter curationem in dubium revocavi, meque insuper *ignorare* sum protestatus, num Cortici simul cum aliis remediis, num soli potius *Natura* eadem fuerit adscribenda, quæ contra expectationem nostram successit sanatio? Neque enim unus ego, sed omnes, quotquot curæ aderamus, Medici, *Ægrum illum inter mortuos referebamus*. Atque hac una de causa, si benè meminisset Cl. Auctor, *declamavi* (quoniam hoc verbo uti eidem placuit) cum D. Piela, Viro mihi amicissimo, & humanissimo, ut Bononiam reversurus ante morbi exitum, funestum illud præsagium, quod nobiscum privatim edebat, nullo pacto officii causa ante discessum suum occule-

ret, sed apertè potius pro ingenuitate sua revelaret Domesticis.

Hæc sunt, quæ mihi uni obtruduntur de oblato Cortice Peruviano, quando communibus offertur Mutinensium, & Bononiensium Medicorum suffragiis, & quando tandem Æger evadit a Morbo lethali. Quid si solus præscripsissem, & Æger occubuisset? Tunc certè non fuisset *ignotum* Cl. Auctori, num solito *Febrifugo* fuerit *portionatus*, ut modò inquit, in *postrema Ægitudine*: sciret enim omnino, fuisse *portionatum*. Sed etsi distinctè narraverim in citata historia quo pacto res tota cesserit, ejusque veritatis, nedum Confanguinei, sed & Adstantes Cives, honestique Viri possint esse Testes, id omne nihilominus Viro Cl. omnino *ignotum*. Mirum solummodo, ei potius notum non fuisse omnino (quandoquidem Chinam Chinam ante septennium epotam minimè veretur ille criminari de morte Ægrotantium) insignem illum Jurisconsultum, qui *paucos post annos Fato cessit*, occubuisse propter illum eundem Corticem, quem in præcedente sumpserat Ægitudine, licet tunc toxicum illud, quippe Clarissimi Auctoris suafu opportunè omissum, suis non valuerit *amaris potionibus*, ut eidem loqui libet §. 43. *miserum Ægrum conficere*.

### §. 35.

(a) **C**asus hic, & plures alii, quos Mutinæ variis temporibus, & hic quoque Patavii, de infauſto successu huiusce remedii observavi, mihi in mentem revocant quod in Actis publicis Lipsiensibus Anni 1701. memini me legisse de Constitutione quadam Uratislaviensi Anni 1699. in qua (b) *febris continuis* populariter grassantibus, China universaliter exhibita causa potissima habita fuerit, quæ Annum illum nefastum plurimorum morte reddiderit, qualis historia fusius legitur in Ephemeridibus Curiosorum Naturæ Anni 1702. talia leguntur de Chinæ usu in continuis febribus. Nimiis essem si referre vellem mala, quæ apud gravissimos Scriptores de China China leguntur. (c) *Videndus Ettmullerus* de Usu, & Abusu præcipitantium, ubi ait persæpe concentrari acidum morbosum, quod compressum ad instar spiræ contortæ, ubi vim resumat, suos nifus impetuosiores reddere, quod idem experimur in Automate ubi diu quieverit, motus enim suos ab initio velociores efficit. (d) *Legendus Thomas Sidenham* de febre intermittente, ubi de Quartana, agens de usu Pulveris Peruviani, quem magis laudat paulatim sumptum, & pluribus vicibus, quàm in ipsa accessione, ut fieri solet, sic enim ait sensim sanguinem



nem turgere, & officium suum absolvere, neque enim bonum putat febrilem motum illico compescere, & sanguinis despumationem cohibere. Legi quoque meretur Observatio D. Danielis Grugeri in Ephemer. Ger. Decadis 3. Anno 3. (e) ubi de intempestivo Chinæ Chinæ usu varios casus refert, sed unum præcipue memoratu dignum de Pastore quodam, qui prius Epilepsia laborabat, singulis mensibus recurrente, sed Quartana correptus, quæ ipsi remedio erat, & ut ex Hippocrate à magnis morbis liberat, præterlapso dimidio anno tædii ex longa febre pertæsus Corticis Chinæ Chinæ drachmam unam ad aliquot dies assumpsit, febris quidem abiit, ast Epilepsia rediit.

(a) (Casus hic, &c.) **P**rovido sanè consilio plures alios casus infestos, Mutina, & Patavii, ut ait, sibi observatos, generalibus tantum, & gratuitis hisce terminis jactat, sed ne unum quidem describit, aut memorat Cl. Auctor: si enim omnes ejusdem sint ponderis, ac recensiti hucusque, nullo negotio evanescent in auras. Tres, aut quatuor protulit ille, accusavitque ut nefastos ob infortunatum, ut contendit, exitum Peruviani Corticis in diuturnis Intermittebantibus administrati: eos tamen nec funestos omnes, nec a modico tempore, sed a septem lustris, & amplius in hanc usque diem petitos; omnes verò fallaces a me deprehensos, atque ut tales Orbi detectos. His nihilominus ab eo tempore usque ad hodiernum forsitan quingentos opponam, si opus sit, in eadem linea planè propitios. Tres alios objecit sinistri eventus in Intermittebantibus Perniciosis, eosque nedum fallaces, sed apertè falsos a me demonstratos. His quoque octoginta circiter felicissimos (minimè supputatis, quos communicarunt Amici) in Therapeutice mea, tum sparsim, tum conjunctim facilè opponendos exposui, & plurimos adhuc in hisce responsionibus meis perquam recentes, compendiariò saltem, exponam. Unum denique expectationi haud satis respondentem in Continuis obtrusit; eumque partim commentitium, partim invalidum, nec bono tandem successu carentem, ipso fatente. Huic in sola Therapeutice mea insunt, qui possunt opponi, saltem viginti quinque planè inculpabiles, cum ex Subcontinuarum malignantium, tum ex Lentarum genere; ex eo tamen, de quo clarè, quantum sufficit, ibidem locutus sum. Neque enim ullam Febrem Continuum, quæ talis ab ortu jam fuerit, Peruviano Cortice curandam volo; sed illam tantum quæ per accidens recenter fit talis, quæ-

que fuit ab ortu Intermittebant, vel ad summum Subintrans, ut alias dixi.

Cæterum si Casus infelicem nonnunquam eventum sortitos; eos videlicet, ubi a me incassum oblatus est Cortex, aucupabatur Cl. Auctor (quandoquidem immortales nequit efficere homines pharmacum istud, sicuti neque iis ita unquam officere, ut sinè calumnia dici queat occisus, qui servari non potuit) eos non aliunde emendicare habebat opus, quam ex Tractatu meo Lib. 3. Cap. 5., & Lib. 5. Cap. 4.: ubi quotquot toto vitæ meæ cursu malè cecidisse observavi, aut saltem me observasse memini; eos omnes, nedum ingenuè descripsi, sed ea simul ratione indigitavi, ut inde regulam elicerem aliis communicandam, qua mediante ab exhibitione frustranea Remedii, quod cum non sanat, ab hominibus malè feriat necare dicitur, in similibus circumstantiis quisque caveret.

(b) (Febribus Continuis &c.) Continuis Febribus ab essentia talibus, quales rationabiliter fuisse puto, quæ in citata Constitutione Uratislaviensi populariter grassabantur, & cujusmodi sunt omnes, quæ nomine Continuarum simpliciter solent donari, Peruvianum Corticem, nisi noxiè, saltem inaniter adhiberi, non est quod aliorum testimoniis conetur probare Cl. Auctor; cum delendo nimix hujusmodi fiduciæ, & Praxeos intemperantis abusi, ipse quoque in Tractatu meo, tum rationibus, tum observationibus sedulò allaboraverim. Mihi propterea hæc, quæ ex Actis Lipsiensibus, ac ex Ephemeridibus Curiosorum Naturæ petita est Auctoritas, nullo pacto adversatur. Sed si qua alicubi unquam reperiretur, quæ Chinam Chinam excluderet, ubi eam incunctanter necessariam statui, scilicet in Perniciosis Intermittebantibus, earumque præcipiti periculo jam detecto, Methodumque meam expresse da-



sē damnaret, in funestis etiam circumstantiis illarum de more perutilem; huiusmodi, fateor, auctoritatem, aut auctoritates, quotquot fuerint, creberrimæ, semperque uniformi experientiæ meę reluctantes, nihili facerem, etiamsi forent Responso Æsculapii, aut Oracula Apollinis. At nulla adversa, saltem quæ rem percutiat, uspiam profecto reperiri potest auctoritas. Si enim Methodum Auctoribus penè omnibus usque adhuc incompertam tradidi; quo pacto poterit ea ab iis, quibus cognita nunquam fuit, aut in usum deducta, expressè damnari? Liceat ergo mihi hac in re peculiarem tantum observationem, & longam, rationalemque experientiam promulganti, Scriptorum quorumcunque conjecturas, si quæ sint, quæ genericè prolatae adversari videantur, ut falsas Magnorum Virorum haud satis expertorum suspiciones, aut hallucinationes potius corrigere, quam ut Oracula venerari.

(c) (*Videndus Ettmullerus &c.*) Viden-  
dus utique Ettmullerus; sed secundum  
id, quod §. 7. præcepit Cl. Auctor, vi-  
dendus ubi de *Febribus* agit, ac illarum  
*Remediis*: ibi namque hæc saltem legun-  
tur pag. mihi 198. *Vocatur etiam* (loqui-  
tur de *China China*) *Antiquarium Per-*  
*uvianum, ex eo quod in Quartana sit sin-*  
*gulare, utut etiam Tertianas Chronicas;*  
*item Tertianas duplicatas etiam Nothas fe-*  
*liciter curet.* Et paulò inferiùs cum *Gentianæ*  
pulverem loco pulveris *Chinæ Chinæ*  
assumi quoque posse priùs dixisset,  
subdit hæc verba -- *Utut certum sit, Chi-*  
*nam China esse egregium remedium, tam*  
*in Quartanis, quàm Tertianis diuturnis.*  
Neque ibi quicquam legitur, quod illius  
usum vel minimùm improbet: tantum-  
modo hanc cautelam subjungit. *Sed ob-*  
*servetur, quod ritè præmissa debent esse uni-*  
*versalia, & quod post usum Chinæ Chinæ*  
*leniter expurgandum sit Corpus, alias certò*  
*recidivant Febres.* Hoc tamen monitum,  
non tam de præmittendis universalibus,  
quàm de purgatione quacunque post pro-  
pinatam *Chinam Chinam* instituenda, ut  
scilicet inhibeatur relapsus in *Febres*,  
mihi, ut verum fatear, ostendit apertè,  
hunc Auctorem cæteroqui præclarum, in  
usu tamen Peruviani Febrifugi fuisse pa-  
rum versatum, ob rationes etiam infra  
recensendas: nullum enim mea, & uni-  
versali expertorum ferè omnium observa-  
tione, medium certius est ad revocandas

*Febres China China depulsa*, quàm post  
Antipyretici illius oblationem quælibet,  
utut levis, successivè administrata purga-  
tio. Sed hallucinatio huiusmodi, pluri-  
bus aliis Scriptoribus, hoc Febrifugum  
procul dubio rariùs expertis, fallacique  
tantum ratiocinio fidentibus, etiam com-  
munis, maximè condonanda est huic Au-  
ctori, qui brevi dies suos implevit, nec  
trigesimum nonum ætatis annum transe-  
git (obiit verò anno 1683.) scripsitque  
Posthuma hæc valde juvenis, eoque tem-  
pore, quo vix cœperat (nec forsan cœpe-  
rat iis in regionibus, ad quas nonnisi se-  
riùs pervenit) experimentis increbrescere  
fama remedii, illi fortasse vix noti.

Hujus rei conjectura est valde firma,  
ne dicam probatio certa, quòd illè Re-  
medium describens loco citato, primò il-  
lud sub *Radicis*, mox sub *Corticis* nomi-  
ne designet, tribuatque illi *saporem ferè*  
*instar Cinnamomi*; cum tamen quò ad sa-  
porem minùs distent a *Cydoniis malis*  
*Mespila*, quàm *China China* a *Cinnamo-*  
*mo*. In *Phytologia* postmodum Schroderi  
dilucidati melius edoctus, verum *Chinæ*  
*Chinæ* saporem se paulò magis nosse in-  
dicavit: novis tamen interim & ibi al-  
lucinationibus eum detentum videas; non  
modò quia in Italia Medicinam facientem  
dicat *Digbæum Anglum*, & in Gallia  
*Redium Italum* (hæc enim sunt de le-  
vioribus) sed maximè quia genuinam  
*Chinam Chinam ex Roma* afferri asserit,  
quasi in Romano Solo hæc *Planta* fron-  
descat, aut in *Peruviano* florescat *Roma*;  
tandemque quia contendit *Gentianam* no-  
stratem (proh lapsus!) esse æquiparan-  
dam, forsan & præferendam, eidem *Chi-*  
*næ Chinæ*:

*Verùm hæc tantum alias inter caput*  
*extulit herbas,*

*Quantum lenta solent inter Viburnæ*  
*Cupressi.*

Fatetur nihilominus iterum hisce verbis,  
eam esse *Remedium expertum contra Febres*  
*Intermittentes quascunque, etiam Chronicas,*  
*in specie Quartanas, item, usum il-*  
*lius esse in debellandis Febribus Intermit-*  
*tentibus Francofurti quoque satis frequen-*  
*tem, nec carere optato successu &c.* Quæ  
omnia, & his similia leguntur Classe pri-  
ma *Phytologiæ* Schroderi dilucid. pag. mi-  
hi 43., & 44.

Si ergo Auctor iste alibi, nempe ubi  
*De Usu, & Abusu Præcipitantium*, suis in-  
nixus ratiociniis quicquam protulit, quod  
Peru-



Peruviano Cortici minùs favere videatur; quanti ponderis in hoc censenda sit illius assertio, ex superius dictis, & infra dicendis eruat Lector. Addo nihilominus, Ettmullerum ibidem, in citatæ nempe Dissertationis De Usu, & Abusu Præcipitantium Capite tertio, §. 5. priusquam suas exceptiones adducat, hæc præmittere - *Superius dixi, Corticem Peruvianum fugare suo usu quasvis Intermittentes; id quod verissimum arbitror: nec has solùm, quin &c. ubi verò easdem exceptiones protulit, expressè loqui de usu tantùm, ut inquit, illegitimo, cùm videlicet (sequitur ille) paulò ante, non post paroxysmum assumitur Cortex, vel proprio ausu, vel Medici præcoci consilio, & nedum ad Intermittentes Febres, sed & ad Continuas quoquè, tam benignas, quàm malignas, Symptomaticas, Lentas, & quæ ex decubitu materia peccantis in quandam partem oriuntur: quibus in Febribus, vel perperam, vel saltem incassum usurpari eundem Peruvianum Corticem certum est, ut præter Ettmullerum ipse quoquè Libro 5. Therapeutices meæ satis admonui.*

Cæterum notatu dignum est quod nuper innui, nempe omnem suspicionem malorum, quæ ibidem recenset hic Auctor, quæque ait posse contingere ex usu illegitimo Peruviani Corticis, locum habere tantummodo, ipso quidem latè fatente, ubi Cortex ingruente paroxysmo exhibeatur; secùs si exhibeatur post paroxysmum solutum. *Obtinet hoc (inquit ille eodem §. 5. capitis tertii) Obtinet hoc de Cortice dicto, ante paroxysmum more hætenus recepto exhibito: subdens postmodum ferme immediatè. Concinnior itaque, actutior ista videtur exhibendi methodus, quæ post paroxysmum, & intermissionis tempore, idque præsertim in infuso cum vino, repetitis tamen crebrius vicibus, exhibetur: ut ideo hac via, cita, tuta, & jucunda magis videatur cura.* Hæc ille; qui proinde crebram, & repetitam, ut patet, oblationem Remedii, nedum non improbat, ut eam improbat Cl. Ramazzinus; verùm potiùs, ea sic instituta, citiorem, tutiorem, ac jucundiorè indè curationem emersum sperat.

Quòd si nonnullas hinc illic intersevit Scriptor iste querimonias, facilem nonnunquam Febrium recursum connotantes, etiamsi Cortex adhibeatur ex arte; id ego quoquè, rariùs licèt, contingere nequaquam diffiteor: sed cum sæpissimè, ac de

more contingat oppositum, usui potiùs, quàm exclusioni Remedii favet hæc infrequens ejusdem Auctoris observatio. Alias, si quas obtrudit mucidiusculas scrupulositates, partim desumpsit ille a Scriptoribus nonnullis priorum præsertim temporum (quorum alii adèd nervosè a Bado fuere impugnati, ut ne hîscere quidem ausi fuerint, alii experientia ulteriore adèd profecerunt, ut eo extincto palinodiam sponte cecinerint) partim deprompsit a semetipso; cui & propria brevis ætas, & recens adhuc Corticis in eas præsertim Oras adventus, locum nequaquam relinquere, quo meliùs præconceptam qualemcunque hæsitacionem diutiori, & crebriori usu emendare potuerit. Sed si vixisset, ut facilè poterat, in hanc usque diem, & triginta duorum annorum, qui ab ejus obitu usque adhuc præteriere, experientiam fuisset nactus, aliarumque Nationum tot nova, & tam præclara legisset monumenta; nullus dubito, quin sinè ulla trepidacione cum reliquis consensisset, hujus remedii usum, & innocentiam planè incunctanter admittentibus.

Ad rationem denique petitam ab Acido morbofo Spira ad instar compresso, quam adversus, non Chinam Chinam, sed Præcipitantes omnes generaliter, & quidem, ut rursus ait, *sub illegitimo usu* adhibitos, adducit idem Ettmullerus, & Automatis exemplo illustrat, liceat respondere in casu nostro, Spiram Acidi morbofi haud difficulter forsan ita compressam iri, ut omni elasticitate deperdita nequeat ampliùs resilire, si sufficienti Absorbentis Corticis quantitate, congruo tempore, ac modo, prout a me indicatum est, propinata, prematur illa fortiùs, ut tandem penitus infringatur.

(d) (Legendus Thomas Sydenham &c.) Legendus quoquè, perlegendus, nocturnæque manu, ac diurna versandus Celeberrimus Thomas Sydenham, quem pro Antesignano & ipse habui toto Therapeutices meæ decursu: proinde qui me renuit sequi, sequatur Sydenham, mecumque vel invitus ferme coincidet. Revera hanc ipsam hujusce Scriptoris cautelam, a Cl. Ramazzino hîc loci recensitam, de oblatione Corticis Peruviani partitè potiùs, & extra accessionem, quàm acervatim, & in ipsa accessione in Quartanis, aliisve diuturnis Intermittentibus, apposui & ego; imò & usu proprio confirmatam, exercitamque in illis iisdem circumstantiis



stantiis expressè tradidi pag. 61. ejusdem Therapeutices meæ. Id nihilominus lubet addere, hanc ipsam videlicet cautelam, etsi rationalem in illiusmodi saltem casibus, appositam tamen fuisse in Libro suarum Observationum Medicarum ab Anglo illo Scriptore, cum nondum usus Remedii, a 25. circiter annis tantum tunc in Europam delati, erat universaliter satis perspectus: neque ipse perfectam illam adhuc erat nactus, quam deinceps acquisivit experientiam, fiduciamque, in reliquis postea ejusdem Operibus abundè patientem. Mirum verò, quòd auctoritatem hujusce Scriptoris ullo pacto attulerit Vir Cl. haud satis animadvertens, quòd dum inquit, a Sydenhamio *laudari pulverem Peruvianum pluribus vicibus sumptum*, sibi statim officit, qui eundem pulverem *minimè repetendum esse* inculcat ubique. Sic & loco ipso per Cl. Opponentem allegato, & innumeris aliis asserta mea ubique confirmat Doctissimus Sydenham; illius verò dogmata omnia funditus evertit. Liceat ergo, ipso provocante, hic immorari tantisper, variosque ejusdem Sydenhamii Textus, prout prostant in Tractatu meo, huc iterum transferre in conspectum Dissertationis Cl. Ramazzini, mala jugiter ad se se attrahentis, ut Cecias nubes.

In hac Dissertatione §. 21., & alibi inquit is, Chinam Chinam *noxas plurimas, videlicet Obstructiones, Cachexias, & Hydropem invehere*, quemadmodum & vidimus, & posthac videbimus. Inquit verò Sydenham in Epistola Responsoria ad Bradyum pag. mihi 342. -- *Verè affirmare possum, non obstante tam vulgi, quàm paucorum e doctis præjudicio, me nihil mali Aëgris accidisse ab ejus usu vidisse unquam, vel cum ratione suspicari potuisse: & paulò post. -- Profectò si tam effectorum durationem, quàm Corticis hujus innocentiam exploratam haberem, principem illi locum inter omnia, quot quot sunt, remedia deferre nullus dubitarem &c. Tantùm abest, ut de ejus insalubritate meritò quis conqueratur. Vide Therapeutice meam pag. 7., & 8., ibique plura etiam alia reperies ab hoc Auctore nonnihil acriter exarata. Scias enim, hæc de innocentia Peruviani Febrifugi scripta fuisse a Sydenhamio etiam ad dissipandas nebulas, quas illius usui, cum primum cœpit in Anglia crebrius adhiberi, offuderat casus aliquis, in quo illud, ut ait, *minùs opportunè fuerat Aëgro**

*ingestum*; cujus inopportunitatis conjecturam aliquam ulteriorem addidi & ipse in Tractatu meo pag. 176.

Subdit Cl. Ramazzinus, dosim Chinæ Chinæ esse debere *ad Drachmam unam, vel duas tantum, nec eam esse repetendam ad prophylaxim*, pluribus quidem in locis, sed præcipuè §. 8., & §. 48. Asserit Sydenham, loco ipso per Cl. Virum nuperrimè citato, præscribendam esse *unciam unam China China*, pro curatione Quartanæ Febris cum Conserva Ros. commistam; eamque *bis in die paulatim esse assumendam*, donec tota Confectio sit absumpta, subditque hæc verba -- *Repetatur porro ad tres alias vices interjectis semper diebus quatuordecim*. Uncias ergo quatuor, seu Drachmas 32. Chinæ Chinæ impendit Sydenham pro curatione, & prophylaxi Quartanæ Febris. Sed tunc nondum firmo talo incedebat ille in præscriptione Corticis. Efficaciùs adhuc agit in citata Epistola ad Bradyum pag. 342., & 343. ubi ulteriore experientia confirmatus, unciam unam Chinæ Chinæ *intra biduum intermissionis ejusdem Quartanæ duodecim scilicet partitis vicibus, singulo quadrihorio repetitis, integrè absumit; quaterque renovat, octo tantum diebus interjectis*, eandem oblationem unciae unius, ut supra. Vides Therapeutice meam pag. 66.

Contendit Cl. Ramazzinus, *In Malignis Intermittentibus incassum confugere Medicos ad Sacram Anchoram China China*, cum Febres hujusmodi ab initio difficulter dignoscatur; de quo latè §. 29., & 30. Affirmat Sydenham in eadem Epistola pag. 253., Febres Intermittentes Symptomate insigni Apoplexiam veram æmulante comitatas, quas inter magis *Perniciosas* collocat Mercatus, quasque ego *Lethargicas* appellavi, *Omissis omnino evacuationibus quibuscunque, in primaria Apoplexia fieri solitis, expectandum esse tantummodo, donec paroxysmus sponte evanuerit; quo tempore Cortex (modo citius idem ingeri non potuerit) quàm primum est exhibendus, & in intervallis ab hujusmodi accessionibus liberis idem sedulo repetendus, usque dum perfectè convalesceret Aëger*. Ita ille. Vide Therapeutice meam pag. 127., & 128.

Denique improbat Auctor Dissertationis usum Corticis Peruviani *in Febribus illis Continuis, quæ de Intermittentium prosapia sunt, & quid malignum portendunt*, ut nuper §. 33. Contra in citata Epistola scribit incunctanter hæc Sydenham pag.



349. (vide Therapeuticen meam pag. 275. & pag. 307. Cum Febres quadam apud nos grassentur, qua etsi post secundum, tertiumve paroxysmum reponere se in classem continuarum nitantur, tamen ad Intermittentes debeant referri, nulla mihi religio est, Corticem vel in maximè Continuis hujus speciei sumendum proponere, qui dicto more (videlicet ad scrupulos duos quarta quaque hora) iteratus, ad apyrexiam certò Ægrum perducet. Atque ita secundum Sydenhamium singulis diebus naturalibus quatuor drachmæ Peruviani Corticis impendentur pro certa curatione Februm maximè Continuarum, quæ sint de Intermittentium pro-sapia, pro quibus peculiariter curandis, subdit insuper ibidem. Hic autem observandum, quòd quò magis Febris ad Continuitatem accedit, eò major Corticis quantitas est exhibenda. Itane igitur istiusmodi Patronis suam causam fatagit sustinere, & meam prostrernere Cl. Auctor? Scilicet dum Chinam Chinam ab horto Medico evelle-re aggreditur Anagyrin incautus movet.

Legendus itaque (repetam & ipse) Thomas Sydenham, nedum in Observationibus Acutorum, sed & in Epistola Responsoria ad Bradyum, & in Dissertatione Epistolari ad Cole. Imò si adeò placeant, quæ Sydenham scripsit, eadem quoquè ratione legendi Viri alii Celeberrimi, non alia sentientes, Sebastianus Badus in Anastasi Corticis Peruviae, Richardus Morton De Cortice Peruviano, & ejus virtute Febrifuga, Christianus Joannes Langius De Febrifuga pariter ejusdem Chinæ Chinæ virtute, Franciscus Maria Nigrisolus, simulque Nicolaus Blegnyus, Talbotius, Restaurandus, Monginotius, d'Acquin, & Sponius Lib., cui titulus *Febris China China expugnata &c.* Videndus etiam Guilielmus Cole, Hadrianus Helvetius, Theophilus Bonetus, Antonius Franciscus Bertinus, Joannes Jones, Joannes Jacobus Mangetus &c. Legi quoquè merentur inter antiquiores Rolandus Sturmius, Gaudentius Brunaccius, Antymus Conygius, & inter Recentiores Ansanus Franciscus de Hieronymis, Carolus Franciscus Cogroffius, Bernardinus Zendrinus, alique pro-pemodum innumeri, quos modò recensere non vacat; in progressu tamen vacabit opportuniore loco.

(e) (Ubi de intempestivo &c.) Observationes de intempestivo, ut ait Cl. Auctor, China China usu adversus tempestivum usum nil probant, ut pluries dixi; quodnam

enim tam levidensis texturæ cerebrum, ut remedii, quantumvis optimi, administrationem etiam intempestivam commendet? Quamobrem ad observationem D. Grugeri exclamabo tantum. Quodnam crimen Peruviani Corticis, si Pastor ille ignorabat Aphorismum Hippocratis 70. Sectionis quintæ - *A Quartanis capti non admodum a Convulsionibus capiuntur: si verò prius capiantur, & Quartana supervenerit, liberantur?* Quænam Febris magis depurativa, quàm isthæc? Anne propterea ignari Pastoris loco damnabitur Remedium egregium, quod illam sustulit? atque ubi Coquus peccavit, vapulabit Tibicen? Suppressionem Februm Intermittentium, quæ aliorum nonnunquam morborum semina deleant, rejectam vide in Therapeutice mea pag. 74. 269., & alibi. Oportet ergo distinguere Ubi, quando, & Quomodo sit exhibendus Peruvianus Cortex, ut exhibeatur utiliter, quemadmodum expressè monui pag. 170. ejusdem Tractatus. Nec aliter quidem nobis agendum in praxi; nec enim ipse aliter, ac in Scriptis tradiderim, in praxi exerceo.

Uno Augusti mense currentis anni decem saltem Ægrotos vidi Quartana intermittente recens correptos (hujusmodi enim febrium feracissimus fuit hic mensis) quibus nil ferme aliud suasi, nisi temporaneam ipsius Quartanæ gestationem. Nemi-ni eorum Chinam Chinam adhuc præscripsi; cunctis tamen præscripturus, si quando tempus, & opus id tulerit. Interim citra exigentiam Febris, vel deterioris, vel diuturnioris redditæ, ea utar sobrietate, quam mihi familiarem jugiter prodidi pag. 76. & 97. præcitatæ Therapeut. meæ. Summa itaque negotii hæc est. Febris haud infrequenter homini potest prodesse, ac revera nonnunquam prodest; sæpius verò illi, aut vitam adimit, aut œconomiam vitalem plurimum labefactat. Atque ita sæpius utile, imò & necessarium est, China China febrem delere (quoniam inter Febrifuga non aliud æquè idoneum prostat) nonnunquam verò temerarium, aut noxium. Munus ergo boni Medici est hæc duo probè distinguere, ut a Barbitonforibus, & Pharmacopolis distinguatur & ipse. Atque hæc sunt, quæ non adeò facilem reddunt rectam, & rationalem administrationem celeberrimi hujusce Febrifugi: qua de re vide Therapeut. meam, tum Cap. 8. Lib. 1., tum maximè Cap. 5. Lib. 4. Sic & in Febribus frequen-



quenter recidivis satius est pedetentim progredi, nec illarum recursum statim reprimere; sed ita præbere se temperantem, ut partim ex se ipsa, partim remedii vi Febris deficiat. Neque pudeat Medicum, Ægris Chinam Chinam pro Febrium qua-

rumdam suapte natura diuturniorum medela intempestivè poscentibus, respondere quandoque illud Ovidii.

*Quod malè fers, assuesce; feres bene;  
multa vetustas*

*Lenis* —————

§. 36.

(a) **M**emoratu quoque dignum est, quod in paulo ante citata Uratislaviensi Constitutione legitur de duobus Clarissimis Medicis Riccardo Louver celeberrimo Anatomo, qui Elegantissimum Tractatum de Corde edidit, & Sohott, qui in febre continua ex temulentia orta Peruvianum Corticem sumpserunt, quinono, vel undecimo die, aut circiter utrumque è medio sustulit. (b) *Nefas porro ducerem* omittere id quod refert Doctissimus Joannes Vvillelmus Rhambergius in Ephem. Cur. Nat. Decad. 3. Anno IX. & X. ubi narrat historiam cujusdam legionis pedestris, quæ prope Manheimium æstiva Castra posuerat, & paulo post 400. fere milites febre tertiana correpti fuere, quibus Chirurgus ad aliquot dies Chinam Chinam exhibuit, qui brevi omnes hydropici evasere cum omnimoda virium & appetitus prostratione.

(a) (*Memoratu quoque &c.*) **I**N Febre Epidemica per essentiam Continua citatæ nuper Constitutionis Uratislaviensis, quæ occubuerunt duo illi Cl. Medici, jam dictum est supra, Peruvianum Corticem perperam usurpatum fuisse; de quo abusu satis clamat Tractatus meus, ubi semper, si non ut noxius, (quod profectò non auderem asserere) saltem ut frustraneus in illiusmodi circumstantiis a me rejicitur. Quod si contendatur, eam Febrem fuisse de genere Subcontinuarum a me descriptarum (quod tamen minimè admittam) certè, quocunque modo usurpatus fuerit a duobus illis Medicis Peruvianus Cortex, non fuit saltem usurpatus *Methodo mea*, iisdem ignota, quod mihi sat est. Neque enim Febres Perniciosas, nedum Continuas, sed nec Intermittentes, Cortice semper curabiles dico, nisi ille *mea Methodo*, quam idcirco *Specialem* appellavi, diligenter administraretur; secùs si Methodus quælibet apta semper esset ad opus, *peculiarem* meam promulgassem incassum. Ita nempe observavi Mutinæ; atque haud aliter putarim contingere potuisse & Uratislaviæ. Singulari nihilominus animadversione dignum est, quod mors illorum Virorum, quæ contigit exacto, ut mos

est, Acutorum stadio, tam fidenter, tamque animosè a Cl. Auctore imputetur Peruviano Cortici, quamvis extra rem assumpto; qui scilicet, ut faciliè decernit ille, *utrumque è medio sustulit* (quasi de mortifero quodam pharmaco sermo esset) minimè verò tribuatur *Temulentia*, aut *Continua Febris epidemicè grassanti*, ac populariter, ut supra, *funesta*. Profectò ego nescio quid nominis pseudo-prophetica huic divinationi conveniat.

Divinationem sanè, seu potius rationalem consequentiam valde dissimilem ex hoc alio Casu (quoniam de Medicis incidit sermo) eliciendam ego censuerim. Vidi nuper Medicum hujus Urbis laborantem Febre Continua generis, cui verè proficius judicio quoque meo, minimè censendus erat Peruvianus Cortex. Febris namque vix de *Remittentium simpliciter*, non de *Subintrantium* stirpe videbatur. Comitabatur illam dejectio valde frequens, jactatio, & faucium ariditas. Post septimam circiter morbi diem (quo tempore amicitia causa ad illum invisendum accessi) Diarrhœæ cœpit adjungi sudor aliquis, inanis tamen, & nullius adhuc juvaminis. Nonnullos post dies, cum rursus ad eum accessissem, narravit ille mihi, se morbi vim, & vehementiam per-



pertesum, eo ipso mane potasse pulveris Peruviani drachmas duas uno haustu; ægrè tamen, nec planè ex animo consentiente Docto Amico ipsum curante: subdidit nihilominus, totidem pariter ejusdem pulveris drachmas se potaturum postridie. Admonitus a me de probabili vacuitate hujusce tentaminis, non ideo tamen abstinuit; cum me satis novisset a remedii semel jam sumpti repetitione minùs alienum, ac a prima illius sumptione, si fortè fuisset consultus. Animosior adhuc factus est ille, postquam ab ore meo excerptit haud difficulter, omnem suspicionem tandem restringi ad irritum tantum, minimè verò ad noxium usum Febrifugi quavis malitia carentis. Sumpsit itaque iterum Corticem, prout animo præconceperat; mox tamen cessavit, consilio etiam meo remedii modica jam dosi adhibiti effectum, quicumque indè emerisset, tantisper expectaturus. Accedente interim morbi statu, & Diarrhœa nonnihil mitiore reddita, largior non parum sudor cœpit erumpere; qui ad vigesimam primam usque diem protensus, visus est Febrim ferme penitus extinxisse. Non proinde tamen ea substitit; sed obscuris moribus quotidie exacerbata, ansam rursus paulò rationabiliorem dedit Ægroto (me quoque non dissentiente) ut Chinæ Chinæ parciore dosibus assumptæ vires iterum experiretur. Quod etsi ad plures dies tentasset, semidrachma nempe illius, primò bis, deinde semel in die epota; nihilominus ad trigessimam quintam circiter diem protracta est integra judicatio Febris, consueto temperationis Diarrhœæ cursu, & spontaneis de more sudoribus tandem soluta.

Post illius solutionem ingenuè fassus est ille mihi, se primis quoque morbi diebus morbofo pariter nescio quo percitum cœstro (cum alias nunquam in suis Ægris curandis quicquam tale peregisset) nonnullas ejusdem Chinæ Chinæ drachmas clam quidem omnino, sed & incassum potasse. Non ego idcirco unquam crediderim, sanationem hujusmodi, quippe seriusculam, & difficilem, hoc casu adscribendam Cortici; sed Naturæ, opus, quod jamdudum molita erat, tandem perficienti. Id po-

tiùs exinde concludendum putarim: primò nempe, Chinam Chinam, sicuti hunc Medicum sanitati restitutum, me quidem judice, nequaquam sanavit; ita duos illos Medicos a Cl. Auctore citatos, & vita functos nequaquam interemisse: secundò, eventum hunc, aliosque non absimiles mihi observatos, semper magis in dies suadere posse, usum verè proficuum, & rectum Peruviani Corticis, nec ampliores, nec strictiores pati cancellos iis, qui a me fuere in Tractatu meo constituti: tertio denique, Antifebrile istud verè Specificum, tam cum apertè convenit, quàm cum minùs videtur convenire, nullas evacuationes criticas, cujuscunque sint generis, a Natura institutas, aut præordinatas interturbare; ipsumque tantummodo forsan obesse posse nonnunquam, ubi præproperè Febrim seriùs curandam valeat sistere; non ubi vim suam Febrifugam nequit exerere.

(*b*) (*Nefas porro ducere &c.*) Nefas ego duxissem potius recensere historiam hujusmodi. Toxicum certè aliquod paulò ante contudisset necesse est in eo Mortario incautus Pharmacopola, in quo Chinam Chinam postmodum quoque contudit; unde quadringentorum simul Abdominum inflatio subsecuta. Dixit potius Relator historię, ea de causa, qua tota ferme Legio illa decubuit, (fortè ob locum, victum, aquas, & aerem) plurimos ex iis militibus, ab imperito etiam Chirurgo China China sinè methodo oblata curatos, subtumidos quoque, aut Lienosos factos fuisse; quemadmodum in Urbibus, aut Locis palustribus, Februm æstivarum feracibus, sive adhibito, sive non adhibito Peruviano Cortice, quotannis videmus accidere. Si enim verè *hydropici prope Manhemium 400. illi milites omnes evasissent ob Chinam Chinam*, ut asseritur, *ad aliquot dies assumptam*; cum tantus sit apud nos, exprobrante Cl. Auctore, ejusdem Febrifugi abusus, jam hydropicorum chiliades Mutinæ numerarentur. Sed hujus ingenii historias, bona cujuscvis venia, inter Fabulas liceat reponere. Scilicet ad has nugas, ad has vaniloquentias confugere opus est Cl. Auctori, ut suam, cui germanæ non suppetunt historię, Causam futilibus tueatur.



## §. 37.

**F**ebres hujus generis, quæ ubi eò pervenerint, ut amplius non recalescant corpora, audio istic algidas a Practicis appellari, (a) *sed scito illos decipi*, nam febres algidæ alio nomine castrenses dictæ, à sui initio usque ad finem algorem habent comitem perpetuum, de quo vide Ettmul. de Febr. Helmo. de Febr. Sylvium, & alios. (b) *Hinc magnum documentum* habere possunt castrenses Medici, quàm periculosum sit in febribus hujusce indolis hoc Febrifugo uti, nam in morbis hujusmodi generis (quod idem de Epidemicis dicendum) sanum consilium est pravos & malignos humores ad ambitum corporis per diaphoretica sensim promovere, potius quàm figere, & concentrare, uti fecit Chirurgus ille imperitus.

**P**ost tentatas hætenus, & successivo particulatim ordine repetitas aggressiones Tractatus mei, generale quaquaversum certamen tandem indicit, & hinc illinc classicum canit Cl. Auctor, modò hanc pro re nata, modò illam partem invadens; omnimodam demum totius Operiseversionem molitus. Deinceps ergo quò me trahet identidem Cl. Viri vexatio inconstans; eò tendet lacerata, ut tempestivè occurrat, præsens ubique defensio mea. Pergendum igitur.

(a) (*Sed scito illos decipi &c.*) Hospes adedò non sum in Medicina, ut Februm nomenclaturas frequentiores ignorem, earumve differentias confundam, qui aliquando saltem novi distinguere, Ægro tante ne inspecta quidem, Bubonocelen, sive Herniam intestinalem ab hysterico dolore, & sola Subligaculi præscriptione (admotione verò Peritis commissa) statim sanare indè ortam passionem Iliacam, cui antihysterica remedia, & incassum, & perperam quis adhibeat. Quòd si istiusmodi Intermittentes Febres, quas descripsi pag. 138. Therapeutices meæ, quæque Sextam apud me Perniciosarum differentiam constituunt, *Algidarum* nomine, quippe alio peculiari carentes, indigitavi; minimè propterea me *deceptum* puto. Qua enim ratione *Continua* Febres, quæ a sui initio usque ad finem algorem habent comitem perpetuum, *Algida* appellantur, ut docet ex Tripode Cl. Auctor; eadem quoque ratione *Algida* nuncupantur a me *Intermittentes* illæ, quæ ab initio Accessionis usque ad finem illius, consueti caloris loco, eundem pariter algorem habent comitem perpetuum: hac una differentia

adjuncta quòd illæ *Algida Continua* vocantur; istæ *Algida Intermittentes*.

Vix tamen hic risum continere queo, mente recolens, quòd de hujusce nomenclaturæ novitate me criminari contendat Vir Cl. auctoritate Helmontii, Ettmulleri, & Sylvii in medium adducta, cum non aliis ferme, quàm hisce Patronis Causam ipse meam possim tueri. Si enim de Helmontio sit sermo, nemo unquam præ illo Scriptore, in morbis, aliisque rebus explicandis vocum novitate Medicinam ferè dixerim inquinavit; & tamen minùs ægrè tulerunt Scholæ Blas, Gas, Archeum, AlKæst &c. Helmontii, ac ferat modò nomen *Algidarum Intermittentium* Cl. Ramazzinus.

De Ettmullero, & Sylvio non aliud dicam, nisi me ab utroque Scriptore *Algidarum*, seu *Frigidarum Intermittentium* denominationem didicisse. Ettmullerus siquidem Cap. 17. De Febribus pag. mihi 187. Februm *Frigidarum* exemplum aliquod allaturus, statim *Tertianam Intermittentem* describit his verbis huc summam translatis -- *Exempla Februm Frigidarum non tam a Sylvio fuerunt observata* (statim igitur auctoritate Sylvii semetipsum, & me tuetur Ettmullerus) *sed & mihi contigit observare &c.* Erat hic Artifex, qui laborabat perfecta Tertianâ, seu recurrebat febris tertio quoque die, anticipando semper duabus horis cum nullo subsequente calore &c. Paroxysmus ingruerat cum insigni rigore, & horrore gravissimo, qui ultra horam integram durabat; postmodum cum deberet succedere calor, nullus apparebat omninò &c. Paroxysmi observabant ordinarium typum, anticipando per horas duas.

Hæc



Hæc Ettmullerus. Ne verò ulla suspicio incidat, hujusmodi *Tertianam* minime fuisse *Intermittentem*, etsi symptomatis prædictis stipatam, sed fortasse *Continuam*, observetur quid in illius curationis progressu manifestè subdas ipsemet Scriptor. *Prescribo*, inquit, *die intermissionis &c.* & rursus, *Die intermissionis denuò continuavit Mixturem &c.* Iciens ergo ictus est eodem lapide, ut assolet, Opponens Cl.

Prodeat tandem in Scenam & Sylvius, qui Cap. 30. De Febribus Intermittentibus §. 7., & 8., pag. mihi 241. hæc habet -- *Ratione Symptomatum graviorum (quemadmodum de Synochis jam dictum) nomina diversa sortita sunt Febres Intermittentes. Nam primò Algida observantur nonnunquam, non tantum frigore præsertim, sed frigore tantum molesta; adeo aliquando, & frequentius levis, aliquando & rarius nullus sequatur Calor. Tales etiam semper Algidas in Nosocomio Academico habuimus ita manifestas, ut non tantum incipiente, atque augesciente, sed etiam vigente, ac declinante, imò cessante Paroxysmo, idest semper, tum suo, tum Adstantium, aut Medicorum sensu molestè ubique frigerent, nunquam reperent, minùs tolerent ullibi Ægri. Suntque hæc Algida graviores semper forsitan Quotidianæ. Hæc pariter Sylvius. Et hac pariter occasione Asciam cruribus suis illisit Cl. noster Auctor. Mirumque planè, quod ob tam decentem, quam respuit immeritò, nomenclaturam, velit auctoritate præsertim Sylvii me redarguere Vir idem Cl., cum potius habeat unde Sylviu[m] ipsum corripiat, qui majore forsitan pusillorum scandalo haud veritus fuit in Catalogum Februm plures referre magis peregrinas, Sputatorias puta, Ureticas, imò & Cacaatorias, Nasutulis fortè plurimis non benè olentes.*

(b) (*Hinc magnum documentum &c.*) Maximum documentum, quod in *Algidis Intermittentibus* curandis possint habere tam Urbani, quàm Castrenses Medici, est, ut fidenter utantur Peruviano Cortice, qui teste experientia illas quotidie sanat; nunquam verò easdem sanant, quæ incassum tunc adhibentur Medicamenta Diaphoretica. Hujusmodi enim Febrifugus

Cortex Fermentum omnium Intermittentium Februm, etiam Perniciosarum, cujuscunque demum naturæ illud fuerit in diversis earum Speciebus, *absorbet*, sive, ut explicat citatus a Viro Cl. Ettmullerus de usu, & abusu Præcipitantium, *invertit*, *attemperat*, *saturat*, aut etiam si ita placeat, *figit*, atque *concentrat*: quod perinde est, tum apud eundem Auctorem, tum apud me; in eo videlicet sensu, in quo explicui in Therapeutice mea a pag. 21. usque ad 23. & non aliter. Quid igitur mali putat innuere Vir Cl., dum ait, etsi gratis, Chinam Chinam morbosa semina *figere*, & *concentrare*, si D. Hippocrates Lib. de Vet. Med. docuit apertè, *Concentratione*, & *permixtione meliora, ac mitiora omnia fieri in homine?* Tantum ergo abest, ut ex hujusmodi *Concentratione*, aut *Fixatione* Fermenti febrilis mole *perexigui* (intellige idcirco *concentrationem* illius intra porosam Substantiam Corticis, non intra viscera humani corporis) sive in *Algidis*, sive in *Æstuosis* Febribus quicquam sequatur incommodi; quin potius enervato æqualiter, & absorpto principio illo diversimodè hic illic fermentante, omnes Intermittentium Perniciosarum Species etiam oppositæ, vel saltem, quæ tales nobis apparent, nempe tam de genere *Colligativo*, quàm de *Coagulativo*, *victas dent manus*; quemadmodum annotavi, manu ducente semper experientia, pag. 20. toties memorati Tractatus mei. De hoc itaque Febrifugo rursus affirmare liceat, quod generaliter olim de Remediis *Antifebrilibus* scripsit idem Hippocrates Lib. De Affectionibus, illud nempe *Vim habere in Tertianis, & Quartanis Febribus*, ut totum corpus conservet in consueta caliditate, ac frigiditate, & neque præter naturam calefiat, neque frigeat, ut cæteroqui in *Algidis* solet frigeat, & in *Æstuosis* calefiat: eo enim ipso, quod inhibet Paroxysmum febrilem, inhibet simul ejus comitem Algorem, ac *Æstum*, ut in historiis propemodum innumeris demonstra- vi toto ferme Libro Quarto ejusdem Therapeutices. Ut quid ergo inutiliter pugnatur amplius ratiociniis hinc indè fallacibus, ubi litem omnem dirimunt facta?



## §. 38.

(a) **V**ide quaeso mi Nepos quomodo ex nimia facilitate præscribendi Peruvianum Febrifugum in febribus, hoc remedii genus factum fuerit adeo commune Chirurgis, Pharmacopœis, Agyrtis, & ipsis quoque Foeminis, ut non amplius in Medicorum potestate sit illud rite administrare, & si Medicus rationibus velit obistere, ægri ipsi febris obstinationem fastidientes, inscio illo Quinquinam capiant, quale vitium in hisce regionibus satis obvium & familiare est, sed magno ægrotantium damno, qui poenas luunt, postmodum hypochondriacis affectibus, chachexiis, ac lentis febribus correpti, ut postea cogantur Medicos pro curatione accersere, qui multis remediis, (b) atque febres excitando morbum vincant, & remedia quærant ad sepultum ignem suscitandum, in quem finem laudatus Ettmullerus spiritum salis armoniaci commendat, & (c) ficus Pharaonis, qui tertianas febres excitare creduntur. (d) Novum non est ignem febrilem penes prudentes Medicos suum usum habere. Sic Celsus scripsit licere febres parvas augere, fortasse enim curationi opportuniore fient. (e) Aureus extat locus apud Hippocratem de febre, quæ in Apoplexia interdum accenditur, qualem locum observat Ballonius Medicus experientissimus, nam si Apoplexia sit sine febre, venam secandam suadet, si vero cum febre præsertim acuta, à V. S. omnino cavendum, ipsi enim Naturæ arma præripimus, quibus hostem suum potuisset confodere. Alter locus Hippocratis extat in Libris Epidemiorum, *Puerperis convulsis ignem fac*, aiebat ille, hoc est febrem magnam excitato, febris enim continua græce pyr dicitur, parva autem pyretos. Idem præstat ignis febrilis corporibus male affectis, ac ignis agris humidioribus.

*Sæpe etiam steriles incendere profuit agros,*  
aiebat Virgilius in Georgicis, varias quidem rationes inibi affert Poeta vere physicas, sed illa potior est, cum ait.

————— *sive illis omne per ignem*

*Excoquitur vitium, atque exsudat inutilis humor.*

(a) (Vide quaeso &c.) **I**psam Peruvianam Febrifugam excellentiam sibi met aliquando obfuturam; adeoque fore, tum ut faustorum eventuum frequentia illius *abulum* apud imperitos accersat, tum ut ex hujusmodi *abusuali* quod quoque fundamentum acquirat Adversantium dicacitas, pro eo excludendo etiam tunc cum legitime deberet admitti, jam pag. 186. Therapeutices meæ sum pridem vaticinatus. Neque tamen usum rectum apud gnaros supprimendum credam, ne apud ignaros invalescat abusus. Quod si *nimia in præscribendo Peruviano Fe-*

*brifugo facilitati* imputet Cl. Auctor, quod remedium hocce, inter pretiosiora certè servandum, *factum sit commune Chirurgis, Pharmacopœis, Agyrtis, & ipsis Foeminis*, jure potiori imputabo ego *nimia facilitati* Obrectatorum illius in eo *proscribendo*, quod præstantissimum, & tutissimum hujusmodi Medicamentum hodie apud Uulgus audiat pro Pharmacopœia, quod (ut olim de phlebotomia in Apoplecticis scripsit Celsus) *Ægrotantes vel liberet, vel occidat*: quo fit interdum, ut illud, magno cæteroqui in pretio, & honore habendum, vilescat; sitque non modo (æquæ



dò (æquè indecenter quidem) nunciusui, nunc ludibriis *Chirurgis*, *Pharmacopais*, *Agyrtis*, atque *Mulierculis*; verùm etiam in Fabulis materiam dicteriorum suppeditet vel *Pueris ipsis*, & cuicunque insimul libet claudicare cum simulantibus Claudum, & pro re nata cum *Pueris puera* scere.

(b) (*Atque Febres excitando &c.*) Ad suscitandam iterum Febrem a China China depulsam Remedium certissimum est, nec ullum aptius prostat (quid enim aliunde emendicat Cl. Auctor?) quàm quælibet paulò post instituta purgatio, ut dictum est nuper, & latius adhuc olim pag. 65. 78., imò & exemplo confirmatum pag. 202. ipsius Therapeutices meæ: nisi fortè inter ipsam Chinam Chinam, & Purgans aliquod peculiare, V. G. de amaricantium Stirpe (quod quis observavit, quodque ego haud satis experiri studeui) detur aliqua Symboleitas, quæ mutuum eorum nexum facile ferat, & sinè dissidio patiatur. Ut cunque; generalis hæc Peruviani Corticis, nescio an dicenda mira proprietas, an potius infirmitas; quòd nempe ab assumpto quovis vel levissimo Leniente, hujusce Febrifugi virtus adeò infringatur, & langueat, ut redeat statim Febris antea fugata, hæc inquam proprietas, Medicis haud satis expertis (hujusmodi sunt omnes, qui hæc non callent) minùs perspecta, in causa forsan aliquando fuit, estque etiamnum, ut Auctores nonnulli cæteroqui docti, ad educendam, ut putant, e corpore Causam febrilem, ipsi Chinæ Chinæ admisceant Purgantia Medicamenta, vel post biduum, aut triduum in eundem finem ea præscribant, vel, ad alvum, ut identidem assolet, stypticam leniendam, etiam post octiduum: quo fit persæpe, ut frustranea verè in primo casu evadat Febrifugi oblatio; in posterioribus verò casibus culpetur idem Febrifugum de inopinato Febris reditu, vel de pejore etiam noxa, si Febris per Catharticum revocata redierit gravior: cum tamen culpa omnis verè sit adscribenda purgantibus, utut levissimis, perperam commisis, aut subinde superepotis, ut crebra diligentes Scriptores, Observatoresque docuit experientia. Sic omnino quidem injustè damnata ab uno, vel altero Auctore minùs attento China China insonante, plures postmodum in fide aliena eisdem condemnatoriæ jejuni prorsus, & inexperti subscribere sententiæ.

Nec minùs hodie forsan hallucinantur

nonnulli, Chinæ Chinæ virtuti eousque fidentes, ut illam æquè fartam testam putent a Purgantium injuria, si eadem post epotum, ac si ante epotum hujusmodi Febrifugum assumantur; quod profectò experientiæ quotidianæ manifestè repugnat, prout pluries, ac pluries observavi. Solvens equidem Medicamentum ante Chinam Chinam præscriptum futuram Corticis in futurum præscribendi actionem non impedit; subsequens autem delet de more prægressam. Quòd si quis, dum China China utitur, intermisceat quoque usum Purgantis cujuspiam; sed pari simul passu, & dosi æquè liberali in ejusdem Chinæ Chinæ oblatione etiamnum perseveret; is forsan damnum, quod Purgans intulit, ne utiquam dignoscet, quia veneno nova successit antidotus; facile tamen dignosceret, si purgante exhibito, a Corticis postmodum exhibitione feriretur paulisper; Febre scilicet ante novam Febrifugi oblationem iterum redeunte. Ad quid igitur Sisyphicum rotare inutiliter, vel texere vicissim, atque retexere telam Penelopsis? At de hoc jam satis. Redeamus ad Virum Cl., pro suscitandis Febribus intempestivè depulsis remedia quærentem.

(c) (*Ficus Pharaonis &c.*) De Ficu febrifera, quam *Pharaonis* appellant, quamque in Sardinia in Ducatu Galuriæ abundè reperiri ferunt, fusè loquitur Badus (quem deinde secutus est Morton) de Cortice Peruviae Lib. 1. a pag. 125. ad 129., adducitque auctoritatem Hieronymi Cardani, & testimonium de visu Petri Aponensis. Hæc tamen, nec forsan immeritò, inter fabulosas narrationes referunt plurimi. Sed quid, si Ficum febriferam Pharaonis inter Fabulas recenseret, simulque temerariam assereret, imò & a nostra potestate longè distitam praxim ipsam excitandi Febres, pro aliorum morborum medela, eamque idcirco rejiceret, & derideret idem, qui modò laudat, Cl. Ramazzinus? Audiamus illum denuò in Orat. tertia Jatrici Argumenti pag. 94. 95. ita loquentem, etsi aliàs quoque in memorabili *Collatione Textuum* illius audiverimus lit. N. O. P. -- *Cum in universa Morborum classe nullus extet nobis hostis infensor, & cui minùs fidere oporteat veluti Febris, attamen eò audacia ventum est, ut inter Quaestiones medicas sit, num ad alios morbos curandos Febrem excitare liceat* (quid ego dicendum de affirmativa sententia, si tam audax est sola Questio?) eò quòd interdum



dum in quibusdam affectibus, veluti convulsione, & hypocondriorum dolore, superveniens Febris remedii loco fuerit, quasi in nostra potestate sit ignem febrilem accendere, ac pro libitu ipsum restinguere. Quam libenter scirem, quodnam corpus, sive de genere simplicium, sive Compositorum prosteret, quo quis Tertianam Febrem, Quartanam, Synocham, vel quamcunque aliam excitare possit. Pro Fabula enim accipitur, quod quidam de Pharaonis Ficu referunt, quam ajunt Tertianam Febrem excitandi vim habere. Sic suis ipsius pennis capitur Cl. Auctor. Sed pergamus.

(d) (Novum non est ignem febrilem &c.) Ignem febrilem, quando debitam succorum ebullientium despumationem promovet, suum usum habere penes prudentes Medicos, latè dixi & ego in Opere meo Cap. 8. Lib. 1., præcipue pag. 73., & Cap. 5. Lib. 4. præsertim pag. 267.; secus verò, quando eorundem Fluidorum immanem effervescentiam, corruptelam, aut in visceribus stagnationem producit, sive illam consequitur. Num verò ad ancipitem hanc succorum defecationem quærendam. liceat prudenti Medico sequi Consilium Celsi, parvas nempe Febres augere, ut curationi fortasse opportuniore fiat; ex ipso audiamus iterum Cl. Ramazzino, qui ex professo hanc quoque Quæstionem eadem pag. 95. Orat. Jatrici Argumenti resolvit his verbis. Non absimilis priori (videlicet nuper expositæ) est alia Quæstio, non adeo tamen audax, quam habet Celsus, num Febrem lentam augere liceat, ut curationi opportunior fiat. Verum quàm suspecta, & quàm infausi ominis sint beneficia, & do-

na, qua ab hoste proveniunt, satis comperum est, ut vetus proverbium admonet, Hostium munera non munera. O quàm egregiè in hanc rem Seneca. Gravissima infamia est Medici, opus querere: multi quos auxerant morbos, & incitaverant, ut majori gloria sanarent, non potuerunt discutere, aut cum magna miserorum vexatione vicerunt. Ita & hanc Quæstionem adversus semetipsum resolvit Vir Clarissimus, ex eodem ore calidum pariter, & frigidum efflans, ut eandem Pultem calefaciat, & frigefaciat pro libito.

(e) (Aureus &c.) Aureus potiùs uterque locus est Cl. nostri Auctoris nuperri-mè recensitus, dignusque planè, quem observaret Ballonius, si modò viveret, ut cum Hippocratis, & Celsi Textibus conciliaret. Sed sive ex auro, sive ex aurichalco fuerint loca per Cl. Virum allata, locum certè ullum nequeunt habere, ubi Febris Corruptiva per Corticem tempestivè, methodicè, ac verè ex arte fuerit ante depulsa. An verò eadem posita, quæ solumponi debet, Corruptrice Febre, locum opportunum habeant tot alia ex Græcis dictionibus satis notis, & ex Virgilii Georgicis huc gregatim, confertimque translata, ne dicam intrusa, non quæram. Quispiam fortè animosior haud planè importunè huc traheret Jambos illos Nicostriati,

Loqui si indefinenter, multaque & velociter

Prudentiam indicaret: utique hirundines

Fortasse quàm nos sapere dicantur magis.

### §. 39.

**N**on semper terreri Medicum decet, si videat in febribus calorem augeri, pus enim fit aiebat laudatus Ballonius, hoc est humorum maturatio, merito itaque reprehendit idem Scriptor eos Medicos, qui in febribus cum videant calorem augeri, mittunt sanguinem, quod procul dubio non facerent, si abscessum viderent in parte aliqua externa, nam potius maturantia, & calorem foventia, quàm V. S. & refrigerantia adhiberent, quæ enim suppurantur non revertuntur, aiebat Hippocrates, ipsa enim maturatio judicatio simul & abscessus. Haud aliter evenit in periodicis præsertim febribus, ex usu Quinquinae intempestivo, impeditur illa humorum maturatio, quam Natura intendebat, hinc postea habitus cachectici fiunt, & dispositiones ad hydropem.

(Non



(Non semper &c.) **C**alorem Februm etiam intensiorem, ac sensibilibus adauctum non semper debere Medico terrorem incutere; sed esse pluries verum opificem intestinæ secretionis heterogenearum particularum dissidentium ab invicem, turbasque effervescentis sanguinis excitantium, ac proinde esse quoque non raro instrumentum bonæ Judicationis morbi; tum locis nuper citatis in Paragrapho antecedenti lit. d., tum alibi in tota Therapeutice mea adeo inculcavi, ut fortè nimium. *Neque enim* (ajebat Galenus in Comment. Aphor. 12. primæ Sect. Hippocratis) *neque enim fieri potest, ut magna incrementa suscipientibus accessionibus, non proxima sit Morbi consistentia*, ac per consequens ipsa impuritatum ebullientium secretio. Atque hanc a Natura expectandam potius nobis esse, si probabiliter queat expectari, quàm intercipiendam, aut quodammodo impediendam China China, qua solùm absorbetur Fermentum effervescentiam gignens, ac fovens; iisdem pariter locis, atque insuper pag. 174.; item pag. 270., ac 271., aperitissimè prodidi: cum verè melior, ac perfectior censenda sit (ut ibi sum falsus, atque iterum repeto) judicatio Febris, quæ sponte fit ab ipsa Natura, *perfectè, ac integre* judicante, quàm quæ obtinetur a Cortice Peruviano, aut alio quovis Absorbente Specifico. Ac propterea verum nonnunquam erit, aut esse poterit (nec tamen perpetuò) quòd ubi adauctus Februm æstus ad *depositionem* tendat, ex usu *Quinquina* tunc, ut ait Clarissimus Auctor, *revera intempestivo, impediatur illa humorum maturatio, quam Natura intendebat.*

Id autem certè non est de nihilo; etiam si nen adeò facilè indè *fiant habitus cachectici, aut dispositiones ad Hydropem*, ut si nè ulla hæsitantia ipse decernit; quasi ex sola Februm, Cortice nullatenus curatarum *diuturnitate* Cachexiæ nunquam contingant, aut Hydropes, de quo vide Therapeut. meam pag. 92.; & quasi eodem Cortice ritè administrato non curentur eadem Cachexiæ, aut dispositiones ad Hydropem ab ipsa Februm *diuturnitate* prodeuntes, ut experientia multiplici confirmarunt Raymundus Restaurandus, Cap.

*De Hydropis succedentis Febris curatione ope China China*, ac alii quamplures; imò quasi suppressis etiam intempestivè Febris, quandoque Natura non queat Fermentum ipsum febrile, præmaturè licet absorptum, sponte subigere, aut ad illius perfectam expulsionem converti; & quasi denique, redeuntibus nonnunquam post Corticem, sive præmaturè forsan, sive etiam tempestivè administratum, Febris, aliquem rursus iisdem progressum permitendum esse ipsemet non suadeam, priusquam repetatur Febrifugum; vel ad omitteendam planè illius repetitionem non horter Medicos pag. 15. 166. Therapeutices meæ, quoties levior, ut crebrò assolet, illarum recursus solutionem quoque spontaneam, ope ipsius febrilis æstus *depurativi* jam redditæ sensim promovendam, haud longè distare prænunciet: Ad quid ergo fuit istæ Viri Cl. Declamationes non nisi aerem ferientes?

Quia verò idem sæpenumero Febrilis æstus (ut vela contraham) in *diuturniorum Intermittentium* progressu succos nutritios potius exhaurit, cruoremque ipsum per repetitas deflagrationes spiritibus depauperat, graviaque sensim accersit etiam symptomata, ut *corruptionis* potior sit metus, quàm spes futuræ *depositionis*: item cum in iisdem Intermittentibus, mox Subintrantibus, ac dein *Subcontinuis* redditis, cum symptomatis pessimis in dies increbrescentibus, ille idem æstus acutiem certò, mox & necem probabiliter interminetur; denique cum in ipsis Intermittentibus quidem, sed *Perniciosi* (& hæc est rerum summa) laudatus nuper a Viro Cl. hujusmodi febrilis calor, nonnunquam & funestus alior, certam, ultimam, & inevitabilem, nedum portendat, sed & jam inferat cladem; propterea in hisce casibus, & circumstantiis, in quibus tantum Peruvianum Corticem absolutè laudat Therapeutices mea, & quidem adhibitum Methodo pro casuum varietate pariter varia, ipsum proscribi eo nomine, *ne videlicet impediatur illa humorum maturatio*, quam in Febris *salutaribus* promoveri nonnunquam solet calor adauctus, minimè admittam; etsi mille Hippocratis, & Ballonii Textus ad suam sententiam detorquere conetur idem Cl. Auctor.



## §. 40.

**H**æc olim non ignota erant Medicis Mutinensibus meorum temporum, uti D. Joanni Manzano Viro sane doctissimo, sed Chinæ Chinæ nimis infenso, D. Joanni Baptiste de Grandis, D. Scajolæ Equiti, D. Antonio de Abbatibus, D. Antonio Ferrarino, Viro, si quis alius, omnigenæ eruditionis, Protomedico vere dignissimo, hæcenus ultimo eorum, qui in Aula Estensi hujusmodi titulo fuerint insigniti, ast ii omnes jamdudum è vivis excessere; vivit tamen adhuc D. Franciscus Tonanus felicissimus Practicus jam senex, Platonis ætatem prætergressus, qui eorum quæ diximus testis esse potest, scitque ipse quàm raro, quàm caute à laudatis Viris præscriberetur in quibuscumque febribus Peruvianus Cortex, utpote quem suspectum habebant, & infidum, cum nihil de causa morbifica viderent excerni, ac idem evenire, quod interdum in Corporibus à Cacodæmone obsessis evenit, quando ab Exorcista malignus spiritus solum in aliqua parte figitur, sed non expellitur.

(*Hæc olim &c.*) **M**edici Mutinenses temporum Viri Cl. meorum quoque fuere temporum. Cum enim ille Mutinam primò domicilium transtulisset Vir jam maturus; tum verò Praxi medicæ primam ego navarem operam Adolefcens, Concives meos optimè noveram ante adventum illius, non in Exedris, ut longè seriùs, sed in Cuneis tunc sedentis. Eorum ferè omnium trepidationem, cunctationem, imò & aversionem, quò ad recipiendum Chinæ Chinæ usum, vivente Frassono Præceptore meo (qui primus Mutinam advocavit hocce Febrifugum, statim ac illud in Europam cepit deferri) satis in propatulo posui pag. 2. Therapeutices meæ. Sed antiquiores illi priorum temporum Mutinenses Medici (rectius dicam omnes ferme illius ævi) quidquid novi Arti accessisset, quod non novisset Galenus, pro commentitio reputantes, nedum de Chinæ Chinæ usu tunc apud eos nascente; sed de ipsa quoque Sanguinis Circulatione, de Chyliferis ductibus, aliisque ad oculum patentibus Inventis haud modicè dubitabant; veterem adhuc Hepatis hæmatosim, Facultates Viscerum attractrices, & mille alia figmenta contra mechanicum humani Corporis artificium, quod manibus contrectamus, acriter sustinentes. An propterea Medici hodierni deliramenta hæc nequaquam secuti, aliamque cohærenter ad detecta exercentes pra-

xim, ut Nugatores, aut Novatores improbi erunt damnandi?

Addo tamen hîc, quod in eodem Opere meo pag. 3. innui, videlicet, post obitum egregii illius Viri, qui contigit anno 1680., plures eorum paulatim mutasse sententiam, & Peruviano Cortici humaniores evasisse. Hujusmodi fuit inter cæteros D. Antonius Ferrarinus Archiater certè dignus, qui sibi transmissam in Schedulis a Celeberrimo Malpighio Talbotii Methodum, mihi de mandato ipsius Malpighii libenter, & ex animo communicavit, laudavitque; cum cæteroqui antea fuisset ab hoc Remedio omnimodè aversus, ut constat pag. 94. Therapeutices meæ hist. 18. Ille namque fuit, quem ibidem descripsi Frassono repugnantem, quamvis nomen illius, quod tunc aperire haud opus erat, subticuerim; quemadmodum pag. 212. historia 6. & pag. 214. hist. 8. subticui quoque nomen D. Francisci Tonani, ante paucos menses, post editam nempe Cl. Auctoris Dissertationem vita functi; sed cujus testimonio nihilominus non indiget prævia confessio mea. Miror verò, quòd Catalogum Medicorum Mutinensium sui temporis contexens Vir Cl., Virum dignissimum D. Antonium Frassonum unicum Præceptorem meum prætermiserit, de se quoque bene meritum, & Chinæ Chinæ in hac Urbe primum, ac celeberrimum Fautorem, Medicumque experientissimum qui



qui unus tot saltem Ægrotos quotidie invifere confueverat, quot invifebant conjunctim omnes alii a Cl. Auctore hic recensiti: simulque miror, quod tot alios suppresserit, eodem Febrifugo, præfertim post Frassoni obitum, palam utentes; quasi solummodo a Cl. Ramazzini discessu itrepserit in hanc Urbem merx vetita, & contagiosa Peruviani Corticis.

Parcant, quæso, Manes Viri Critici, Medicos Mutinenses hodiernos Antiquiorum severitate castigare molientis, parcant inquam, si & hac in re quæ opinabilis non est, sed historica, illum inconstantia redarguere cogor, & contradictionis planè inexcusabilis. Inquit ille hoc Paragrapho, *Medicos Mutinenses suorum temporum raro admodum prescribere consuevisse in quibuscunque Febris Peruvianum Corticem, utpote quem suspectum habebant, & infidum &c.* Ante annos verò 24. (quod non breve est temporis spatium) anno scilicet 1690., dum priorem suam de Constitutionibus Epidemicis Mutinensibus Dissertationem conscriberet, uteretur autem satis liberaliter, forsan & præ aliis, Peruviano Cortice; nescio quo actus tunc spiritu, *Medicis Mutinensibus suorum temporum* hac eadem de Causa, quod nempe China China ea Constitutione fuerint usi, Num. 15. ejusdem prioris Dissertationis pag. 71. Edit. Patav. ita succensuit -- *Major itaque pars Medentium apud Nostrates* (semper illi cum majore hujus Urbis Medicorum parte lis est) *ut vulgi calumniis, & assiduis Ægrotorum querimoniis se subducerent, in hac Tempestate ad Peruviani Corticis sacram Anchoram confugere, at parum prosperè; nam in periculosiores scopulos Ægrotantes suos persape deduxere. Usu Febrifugi per aliquot dies equidem sub doloso cinere latebat ignis; verum postliminio violentior recandescebat. Qui tamen peritiores erant, ac rebus Ægrotantium magis quam propria ambitioni consultum volebant, Nabant sine Cortice.* Major ergo Mutinensium Medicorum pars anno etiam 1690. Peruviano Cortice utebatur, imò & abutebatur, si Cl. Auctori habenda sit fides. Sed illum fortasse paulò post suasit religio quædam, ut ad leniendam hujusmodi fugillationem molliora hæc verba subdiderit in secunda Constitutione, anni videlicet 1691. Num. 34. pag. 126. -- *Sicuti præcedenti anno Peruviani Corticis usus in Quartanis ac diuturnis Febris*

*improsperè cessit, ita hoc Anno saluberrimus fuit; & ii qui passi sunt recidivas, Febres mitiores postmodum experti sunt, ac antequam Hyems accederet, perfectè convalescunt: quod & propè finem rursus confirmavit Num. 37. ejusdem secundæ Constitutionis pag. 131. sic inquit -- Sicuti in Superioris Anni Constitutione noxius fuit China China usus, ut adnotatum, ita in hac ab illa toto Cælo diversa valde salubris compertus est; multi quidem Quartanarii hoc Autumno per Urbem vagari visabantur, sed quot quot ad hoc remedium confugere, vel integrè sunt restituti (possunt igitur, ipso fatente, non solum inducias obtinere, sed & sine Febris recurso, & sinè noxa integrè restitui Ægrotantes, absq; eo quod eadem Febris tacitè cubet, & corpus eorum depascat) vel si nonnulli recidivas passi sunt, paulo post convalescere. Ex his omnibus, ut reor, satis patet, Medicos Mutinenses, non aliquot tantum, sed majorem, ut inquit, eorum partem, modò quidem feliciter, modò, ut asserit ille, improspere, temporibus Cl. Auctoris China China uti consuevisse: atque ita quidem, ut ejus Censuram de intemperantia minimè declinare potuerit vetustior ille Virorum Cœtus, qui modò ut maxime temperans in medium adducitur in reprehensionem hodierni.*

Quod si curiosus quispiam, qui Catalogum eorum legerit Medicorum, quos Vir Cl., quinario tantum, vel senario numero comprehensos voluit, alium pariter Catalogum, non totidem tantum, sed plures Professores Cortici amicos continentem, præ oculis habere desideret; occurrent primo statim loco recensendi, quippe temporibus Viri Cl., & quidem valde remotis florentes, modò verò è vivis sublatis, laudatus nuper D. Antonius Frassonus Chinæ Chinæ celebris administrator, D. Annibal Cervius Cl. Auctoris antiquus olim Antagonista, adeoque eidem notissimus, nec non D. Marcus Antonius Montagutus Medicus quondam Aulicus eximius, quo vivente nedum ego, sed & ipse non multò post D. Ramazzinus (qui cæteroqui, ut doctrina, ac ætate me longè præibat, ita & ordine temporis, ac dignitatis merebatur præire, nisi aliter Domino placuisset) ad Serenissimi Francisci Secundi gloriosæ memoriæ Ducis extraordinarium Famulatum fuimus acciti; ut proinde quinam in usurpanda China China fuerit mos Aulici illius, &



doctissimi Professoris, cum viveret nobiscum agentis, ipsum Cl. Ramazzinum nequaquam latere potuerit; occurretque demum inter recentius defunctos D. Joseph Candrinus, eidem Cl. Auctori Præceptor quondam suo sat notus. His accedent secundo loco, viventes adhuc, & benevalentes (memetipsum omitto, quem inter Juniores olim meritò collocandum diceret Vir Cl., novus tamen & ille in hac Urbe, cum ego novus in Praxi) occurrent, inquam, inter adhuc viventes D. Jo: Baptista Riccius Practicus pariter notissimus profectionis ætatis, D. Paulus Florianus ætate simul, & experientia spectabilis, qui tempore militaris incendii Genuensis Urbis, ubi domicilium contraxerat, in Patriam concessit iterum, Genuensis pariter Badi Chinæ Chinæ Propugnatoris celeberrimi sensibus imbutus, vivaque ipsius voce etiam instructus; tandemque Aulicus ipse Collega meus, scientia, & eruditione Clarissimus, D. nempe Johannes Baptista Davinius: Viri sanè omnes, & Docti, & Peruviano Cortice usi temporibus Cl. Auctoris, eodemque etiamnum pro re nata, nec raro, nec trepidanter utentes, sed simul nec abutentes, ut ex quamplurimis visitur, quos

recensere tædiosum foret, meæ Therapeutices locis. Sed quid si inter alios abundè China China utentes numerandus foret Auctor ipse, nec non etiam (ultimis quidem temporibus) illius Nepos, qui tamen dicitur Relator abusus, aut criminis, ejus est complex? Absit tamen, ut id ulli eorum exprobre, de quo mitius judicium infra ferendum mihi §. 49. An verò quisquam ex iis Professoribus, quorum non meminit Vir Cl., quia illum non meminisse juvabat, putarit, aut putet, *Malignum Cause morbifica Spiritum veluti exorcizatum figi a China China in aliqua Ægrotantium parte* (ut quodammodo fieri videtur ab illis, qui eam semel oblatam non amplius offerunt, unde febrile fermentum per temporaneam absorptionem nonnihil figitur, sed non planè subigitur) an potius putet, *Spiritum illum ab ægrotante corpore penitus expelli*; meum non est investigare. Ad me quod attinet, si fortè uspiam, in Ventre porro inflato (lubet seriis ludicra quandoque miscere) quadringentorum illorum Militum, de quibus §. 36., verum Cacodæmonem a Malefica China China, vel a Chirurgo Incantatore illuc relegatum, delituisse crediderim.

## §. 41.

**Q**uinquam autem facultatem figentem habere (a) pro re certa suppono, cum motum sanguinis, & spirituum compescat, & alvum ipsum densiorem faciat, observatur enim, iis qui ad plures dies hoc remedio usi fuerint, ventrem adstringi, ut clysteribus indigeant: vim hanc hujus Febrifugi fluida quæque in nostris Corporibus cogendi, talem esse credidit (b) Gedeon Harveus, ut scripta hæc verba reliquerit, *omnes evacuationes suppressit China China per se, sed non per accidens.*

(a) Pro re certa &c.) **S**upponit pro re certa Cl. Auctor, quod ab aliis Scriptoribus admodum controvertitur & a quamplurimis mordicus negatur, *Quinquam scilicet facultatem figentem habere, & vim Fluida quæque in corporibus nostris cogendi.* Recens tamen acquisita hæc est eidem cognitio, cum §. 4., 5., & 6. ignotam illius, abditam, secretam, & incomperatam adhuc virtutem, humanum caput excedere, constanter asseruerit, pleno ibidem hæc decantans gutture, *Diu equi-*

*dem, sed frustrante diligentia a sagacioribus Medicis allaboratum est circa hunc Corticem, ut aliquid proferrent, quod animum veritatis avidum expleret; sed vincit adhuc natura latendi &c.* Quòd si iis in locis se locutum dicat de sola Virtute febrifuga sibi verè occulta, hic verò de sola figente sibi nota, tamquam de duabus rebus toto Cælo diversis; itaut in vi figente, & nota nullatenus consistat febrifuga occulta: ut quid, quæso, in tota Dissertatione soli Virtuti occultæ, quæ febrim pellit, irascitur Auctor Cl., nec pugnat unice contra



tra Figentem damnosam; quam tamen corrigere posset (si adesset illa) per contraria sua satis obvia sine detrimento Febrifugæ in abscondito degentis?

Verum ut isthæc quoque sileat de Figente Peruviani Corticis Facultate fallax cantilena; aliud est, Chinam Chinam compescere turbas febriles effervescentis præter naturam sanguinis, absorbendo fermentum illud acidum, seu salso-acidum, quod §. 46., ut videbimus, adstruit pro Causa Februm Intermittentium idem Cl. Auctor; aliud est, figere motum ipsum naturalem cruoris, atque spirituum, cæterorumque fluidorum, ut valde crassa æquivocatione videtur ille confundere, Ocream fronti quasi applicans, & Galeam tibiæ. Quid quæso spirituum agitatorum, aut irritatorum turbas sedat, compescit, & consopit magis, quam Opium, ut habet §. 5., & 48. Vir Cl.? Et tamen ex hoc ipso virtutem eidem Opio rarefacientem potius, quam densantem fluida, tribuit, mechanica adducta ratione, Pitcarnius adversus Ettmullerum Dissert. De Circul. Sang. in Anim. gen., & non gen. Quod si cum eodem Ettmullero, quem libentius sequitur Vir Cl., absorptionem ipsam Fermenti febrilis, mole dubio procul perexigui, velimus donare nomine fixationis, attemperationis, vel saturationis illius, quæ omnia idem sonant apud eundem Auctorem; facile in Cl. Opponentis castra descendam: dummodo liberiores subinde fieri fluidorum motum, cum circularem, tum fermentativum concedat; nec plus figi a China China sanguinem velit, quam figatur a Chalybe, qui pariter dicitur Acidum obstruens absorbere, dum ad Chlorosim V. G. curandam, aliasve tollendas ipsius sanguinis stagnationes assumitur; de quibus vide latè Therapeut. meam a pag. 21. usque ad 23. Verum historias potius Februm Syncopalium, Lethargicarum quoque, si lubeat; sed præ cæteris Algidarum, Peruviano Cortice sanatarum, ubi marmoreum frigus, & micatio pulsuum jam ferme abolita, stagnationem, aut fixationem ferè omnimodam cruoris, atque spirituum apertè prodebat, lustrare sufficit, eamque signatè, quam proprio testimonio firmare potest, ni renuat, ipse Cl. Auctoris Nepos, pag. 214. recensitam. Ex subita namque eorundem pulsuum elatione, ex calore quaquaversum ad exteriora diffuso &c. facile erit dignoscere, an China China illis casibus Cruentis,

Spirituum, & Fluidorum omnium fixationem induxerit.

Per hoc verò, quod Febrifugum istud de more alvum densiorem faciat (quod facile admiserim, etsi non paucis quoque identidem solvat, reddatque laxiorem) nolim deduci a Viro tam docto, eadem ratione figi Spiritus, & densari Sanguinem, qua densantur feces alvinæ. Pudet hæc ulterius persequi: proinde liceat tantum reponere, Vina generosa, & meraca, si austeriora sint, ut austeriusculus est Chinæ Chinæ sapor, alvum adstrictam facere: interim tamen sanguinem, aut spiritus non figere; sed in ebrietatem magis quam Vina tenuia, dulcia licet, ac alvum laxantia, compellere.

(b) (Gedeon Harveus &c.) Gedeonis Harvei auctoritati fortasse subscriberem, nisi opposita, diuturna & multiplex me retraheret experientia. Evacuationes Sudoris, Urinæ (cujus excretionem depulsis Febris China China peculiariter promovet) Menstruorum pariter, ac Lochiorum, imò & ipsius Diarrhææ, dummodo Criticas, nunquam ab hoc Febrifugo suppressas vidi, ut in Therapeut. mea pag. 42. innui; pag. verò 226. exemplis confirmavi; atque magis adhuc posui ob oculos casu recenti, in responsione mea nuper ad §. 36. hujusce Dissertationis allato lit. a. Symptomaticas equidem a Febre pendentes indirectè, sive per accidens supprimit, sistendo Febres, quæ immaturas hujusmodi excretiones producunt; non verò per se, sive per vim propriam, ipsiq; peculiariter insitam. Proinde non nihil allucinatus est (si hoc vocabulo uti liceat sine crimine) Vir quidam doctus, qui commendari a me in Therapeut. mea Peruvianum Corticem pro curatione Dysentericæ suis in Scriptis promulgavit; fortasse quia Febres quasdam Perniciosas, quas ratione adjuncti dysenterici cujuspiam Symptomatis Dysentericas appellavi Lib. 3. cap. 1., eo facile remedio sanari protulerim: quod tamen de Dysenteria vera, & essentiali, quæ Morbus est, non Symptoma, nequaquam intelligendum, ut expressè monui pag. 182. ejusdem Operis. Sed alterutro forsitan loco, haud satis clarè memetipsum explicui. Antifebrilis ergo solum, non antidysenterica est China China: neque idcirco prædictam, aut ullam aliam evacuationem, præsertim Criticam, seu quæ febrilis symptomatis rationem non habeat, figit, aut sistit per se, di-



se, directè, ac ex natura sua, ut falso autumat Gedeon Harveus.

Ubi experientia loquitur, auctoritates silent: si tamen ulla arrideat, ea nunc desumatur a Scriptore in usu Remedii plurimum exercitato, qualis est Morton, cujus testimonium crebra, & longa praxi credibilius redditum, poterit citra injuriam cuilibet alteri opponi; maximè cum a Mortono ratiocinium confirmetur ea ipsa experientia, quæ ab Harveo aliter se habere creditur ex vi ratiocinii. Inquit itaque *De Peruviani Corticis Virtute Febrifuga* Exercit. 1. Cap. 7. laudatus Auctor, *figentem* hanc, atque *obstruentem* vim Cortici objectam explodens. Quo pacto *Pharmacum*, quod in *Puerperio* (nulla certè evacuatio magis sollicitè servanda, quàm isthæc) *salubriter ministratur*, inter *obstruentia* numerari potest? Ast suspectus semper habebitur Morton. Vertamus nos ad Ettmullerum, a Cl. Auctore in hac materia tanti habitum, & videamus, an

Scriptor iste, ubi *China China* facultates ex professo recenset, *figentem* illi, & *condensantem* attribuât. Inquit ergo ille in *Phytologia* Schroderi dilucidati pag. mihi 43. edit. Lugdun. in Fol. -- *China China calida, & sicca est, vim habens aperiendi* (en primo statim loco vis aperiens, non *figens*) *discutiendi, attenuandi, resolvendi, putredinem arcendi, roborandi*. An hæc omnia cum supposita virtute *figente*, & Fluida quæque *cogenta* conveniant, vel rudes judicent Pharmacopæi. Quod si de hac celebri figendi vi auctoritatem ratiocinantis quis optet, in promptu est Sententia Villisii, a Cl. Auctore pluries pro sua Causa citati, & de *Febris* cap. 6. scribentis. *Annotetur, quod hoc remedium, non quemadmodum vulgaria Febrifuga sanguinem figendo &c. accessiones febriles sistit &c.* Suum ergo sequatur novum Scriptorem Vir Cl. Ego meos, utut veridicos, præcisè non sequor; sed ratione manucente experientiam.

§.

42.

**N**unc autem quando usus, quem penes arbitrium, jus est & norma medendi, ita Mutinæ obtinuit, ut tanto in honore Febrifugum istud sit, ut nullibi magis, expectandum num ad longum tempus duratura sit illius fortuna, habent enim sua fata medicamenta, sicuti cætera omnia. Radix *China* ab Indiis Orientalibus in Europam deventa, olim inter Medicamenta ad morbos chronicos, & contumaces propulsandos, principatum obtinuit, ac tantam affinitatem cum natura humana habere credita, ut cum cibariis ipsis locum obtineret; modo pene obsolevit illius usus, ac in Officinis cariola reperitur. Qualis fors Quinquinam maneat, imposterum decernet tempus.

(Nunc autem &c.) **E**t si usus ita obtinuerit Mutinæ, ut hic non minùs, quàm alibi in præscribendo Peruviano Cortice *Ars Medica*, non secus ac *militaris*, suos *Fabios* habeat, suos *Marcellos*; sortem nihilominus faustam, quàm intrà universæ jam Europæ confinia *China China* sortitur, eousque duraturam crediderim, quousque illa germana, sincera, & minimè adulterata ad nos devehetur. Radix *China*, quæ a Viro Cl. confidenter hic loci traducitur velut inutilis, plus forsan ac verè mereatur, ab eo contemnitur. Si tamen illa de

more beneficia præstaret in morbis Chronicis, quæ *China China Cortex* perpetuò præstat in Febris, non tam facilè in Officinis cariem contraheret. Quemadmodum verò Peruvianum Febrifugum tandiù plurimi habitum est apud nos, quandiù in Scriptis Viri Cl. habitum est in tanto honore & pretio, ut nullibi magis; ita fortassis posthac in minore habebitur, postquam scilicet adeò sinistrè de ipso locutus est varius pro re nata, & versatilior ginglymo Cl. Auctor,

*Quem penes arbitrium, jus est, & norma loquendi.*

Verum



## §. 43.

**V**erum hic mirari subit quomodo (a) intra Scultennam, & Gabel-  
lum tam altas radices egerit Planta hæc Peruviana, non ita ve-  
ro in solo Bononiensi finitimo. Certe (b) apud Bononiensem Scholam,  
quæ cæteris pro Regula Policleti esse potest, satis moderatus semper  
fuit, estque etiamnum, ut audio, hujus febrifugi usus. (c) *Quan-  
ta cautione* Peruvianum Corticem præscriberet Celeberrimus Mal-  
pighius, satis patet ex Centuria Consiliorum hujus Auctoris Pata-  
vii impressa Consilio 97. in quo Vir iste Sapientissimus in Febre len-  
ta cum tensione abdominis post usum Aperientium, Diureticorum,  
Chinam Chinam proponit ad scrupulum unum singulo mane, sive al-  
ternis diebus per quindecim dies. Itidem in Opere ejusdem posthu-  
mo, Londini impresso, hæc de China China leguntur verba. (d)  
*Remedia, quæ vulgariter inventa creduntur à casu, & fortuito, & à sola Empirica,*  
*egent pariter, ut examinentur à ratiocinante, & reducantur ad tutam operandi na-*  
*turam; Id experimur in usu Chinæ, quæ sine arte adhibita, non solum est causa re-*  
*cidivarum, sed etiam fixationum, & ut plurimum cachexiæ.* (e) *Hinc necesse*  
*fuit pro illius tuto usu ab eadem elicere tincturas in pauca dosi, & paulatim,*  
*& aliis cautionibus, à priori erutis, eam exhibere.* Omittam referre, quæ  
de hujus remedii (f) malo usu Scripta extant (g) apud Georgium Bagli-  
um in Libro de Fibra Motrice, (h) Nicolaum Lemerii in cursu Chimi-  
co, (i) Theophilum Bonetum in Medicina Septentrionali, Mercurio  
Compitalitio, apud Polialthem.

(a) *Intra Scultennam, &c.* **N**ON intra  
Scultennam tantum, & Gabel-  
lum altas radices egit Planta hæc Peruviana; ve-  
rùm eas quaquaversum diffudit, totque  
saltem in Regionibus jecit, quot sunt na-  
tales loci Scriptorum omnium, quos re-  
censere cepi §. 35. lit. d. & quorum se-  
riem ulteriorem nunc persequi hæc ipsa  
me cogit uni *Scultenna*, atque *Gabello* ad-  
scripta fertilitas: cum alioqui ab imo  
trunco ad elatiores usque ramos satis con-  
spicua pateat hæc Planta ad Arnum, ad Pa-  
dum, ad Sebetum, ad Tyberim. Tam la-  
tæ propagationis ampla hinc illinc speci-  
mina exhibent Viri Clarissimi, Hierony-  
mus Bardi, Johannes Nardius, Vincen-  
tius Protospatarius, Hieronymus San-  
ctasoffia, Franciscus Reditus, Antonius  
Vallisnerius, Lucas Tozzius, Joseph, &  
Thomas Donzellus, Joseph Lanzonus,  
Pompejus Sacchus &c. Sed has in Solo tan-  
tùm Italico. Quas verò in Transalpinis  
Provinciis, Exterisque Nationibus non  
egit illa radices? Eam scilicet, præter

allegatos citato Paragrapho Auctores Ce-  
leberrimos, excoluere insuper ad ripas I-  
beri, Tamesis, Sequanæ, Rhodani, &  
Rheni, Gaspar Kaldera, Joseph Villero-  
bel, Thomas Villis, Robertus Bradyus,  
Dionysius Jonquet, Digbæus, Hæferus,  
Rolfincius, Glantzus, Zuvelferus, Tho-  
mas, & Erasmus Bartholinus, Martinus  
Lister, Andreas Nicolus, Moyse Cha-  
ras, Fridericus Illmer, Johannes Dolæus,  
aliique adhuc non pauci ad tædium evi-  
tandum reticendi.

Prope alia ergo Flumina, a Nostratibus  
etiam longè dissita, firmissimas radices  
egit, & ramos expandit Orbi toti specta-  
biles exotica hæc Planta; magis quidem,  
& minus pro varia Soli, & Cultorum ra-  
tione; sed centum in locis longè majores,  
atque altiores, quàm Mutinæ. Præ-  
ter Cultores verò, seu Scriptores, quos  
retuli, suis Operibus notos ( quibus ad-  
dere quis posset omnes a Viro Cl. pro suæ  
Causæ testibus adductos, & infra addu-  
cendos ) quot Medici tacitè in Hortulo  
suo domestico, ad privatam scilicet pra-  
xim,



xim, hanc alunt, aut excolunt Plantam, etsi omnium oculis non exhibeant palam? Horum numerum novit, qui stellas dinumerat solus, & arenas Maris. Primis certe temporibus, quibus usui cepit esse Febrifugum istud, quinquaginta saltem Illustrium Medicorum testimonia de illius innocentia, & vi ad Febres quascunque Periodicas, nonnunquam etiam Continuas, Scriptis mandavit Sebastianus Radus nunquam satis laudatus. Modo quot millia possint haberi, conjiciat quisque: ut proinde prorsus immerito mihi, cui forsitan nonnullam quis alius tribueret utilioris administrationis laudem, culpam liberalioris, imò & turpe abusus crimen fidenter, etsi dissimulanter, objiciat Auctor Clarissimus.

Nolim tamen hic me quispiam redarguat verbis illius §. 49., quod *communium errorum reprehensionem in propriam calumniam referam*, cum de Cortice Peruviano *Mutina* non scripserim solus: extat siquidem in Diario, quod vocant Italicè *Galleria di Minerva* Venetiis edito, Tom. 6. pag. 119., Dissertatio quædam Anonymi *De China China in Febris utilitate, & de vana quorundam methodo &c.*, sub dat. *Mutina* die 5. Novembris 1699.; in qua Lucubratione non parum erudita, & eleganti, cum plurimus, & latus admodum suadeatur Chinæ Chinæ usus, huic potius, quam meæ Therapeuticæ in hoc castigatori, videtur adaptari posse, atque congruere Cl. Auctoris Censura. Verum patent nimium peculiare illius in Opus meum suggillationes: & dato etiam, quod utrique nostrum plectendo idem intendatur Arcus, tutelam saltem meam in damnum bonæ praxeos renuo negligere, aut in detrimentum veritatis. Alienæ quidem Lucubrationis sensa, a sensibus præsertim meis non parum aliena, tueri meum non est; sed nec silentio prætereundum, quod sicuti Dissertatio illa *Academica* inscribitur, non *Medica*; ita Auctor illius (quod certo scio) longè aliter ac ediderit in eo Scripto, Corticem Peruvianum præscribit in praxi.

(b) (*Apud Bononiensem Scholam &c.*) Scholæ Medicæ Mutinensi, cujus partem sat debilem ago ipse, pro *Regula Policleti* esse posse *Bononiensem*, *Patavinam*, *Pisanam*, *Ticiniensem*, aliasque inclytas Universitates, tam meo, quam meorum Collegarum, & Comprofessorum nomine minime cunctabor fateri. Quænam sit illa-

rum inter se se ipsas proportio, res esset audaciæ plena velle decernere. Utcunque de ea res sit, certum est, illas omnes usum Peruviani Corticis admittere longè latiorrem, ac in sua Dissertatione sanciverit Cl. Auctor. Et quoad Bononiensem Scholam, ipse quoque nedum audio, sed & scio, *moderatum*, ut decet, apud eam *semper fuisse*, ac *etiamnum esse hujus Febrifugi usum* (quis enim ullius immoderantiæ velit arguere prudens illud, ac celeberrimum Athenæum?) sed æquè scio, *moderatum* illum usum longè transcendere cancellos angustissimos, a Cl. Auctore constitutos; meamque praxim, quæ apud eum audit *abusus* nomine, haud ita audire in solo Bononiensi finitimo.

Hujusce rei fidem manifestam facit Dissertatio lucubratissima circa hanc materiam anno 1711. a Clarissimo Viro, in praxi æquè, ac in Exedra exercitatissimo D. Francisco Simonio conscripta, & a Clarissimo pariter, Scriptisque suis doctissimis Orbi jam noto, D. Jacobo Sandrio subscripta, & approbata. In ea siquidem responsoria ad aliam Dissertationem e Pisauero missam ad duos hosce Viros Celebres Bononiensis Universitatis, de suo circa usum Quinquinæ judicio requisitos, occasione cujusdam Epidemicæ Constitutionis, in Urbe Pisauensi grassantis, responsa hæc sapientissima, & verè practica expressa leguntur. Planè asserimus, *Febrem quamcunque Peruviano Cortice curabilem*, quantum quidem nobis observare licuit, de natura Intermittentium esse oportere, licet sæpenumero continuè *Ægros vexet*. Præsupponendum enim hic est, quod optimè docet Sylvius de le Boe in Appendice Prax. Med. Tract. 9., aliud esse continuè febricitare, aliud Febre continuè laborare: atque hæc duo non tam a plebeis, verum Medicis quoque haud rarò malè confundi (& hoc est, quod ego explicare, & distinguere totis viribus conatus sum in Therapeutice mea a pag. 303. usque ad 307.) cum de facto possint *Ægri continuè Febris affligi, sed Intermittentibus*, quæ idcirco neutiquam pro Continuis habenda &c. Reliqua, quæ quoniam sunt, quæ Febres istas comitantur Symptomata, sive benigna, sive maligna appellata, nihil ad præfatam Diagnosim spectant, nihilque de Speciali earum natura mox indicata detrahunt &c. Quare neque ab istorum præsentis malignitate, & perniciæ Corticis Peruviani usum frustrari, tum ratione, tum experientia didicimus. Tandem exclusis



exclusis a ditione ejusdem Corticis Febris ab essentia Continuis, Symptomaticis quoque omnibus, Inflammatoriis &c. (quod & ipse in eodem Opere meo planè decerno) sic in ea Dissertatione concluditur. *Omnibus hisce conditionibus ex parte Februm ritè perpensis, atque servatis, nos quoque divinam planè, & admirabilem hujus Corticis utilitatem ultro asserimus, atque iis omnibus elogiis libenter subscribimus quibus ejus famam condecorarunt Celeberrimi Scriptores plurimi. Quin imò facile id etiam largimur, quod . . . . . D. Franciscus Torti jampridem se ostensurum promissit in suo, quem propediem avidè expectamus, de re ista Tractatu; Perniciosas scilicet, & Malignas Febres (modò indicata natura sint) ejus usu tutò curari posse &c.*

Hæc sunt sensa duorum inclytæ Scholæ Bononiensis luminum, quibus vel præibat, quoniam præibat ætate, vel saltem astipulabatur in praxi, cum viveret, Cl. *Livizzanus*, Famigeratissimi *Malpighii* amicissimus; astipulaturque hodie eidem veritati, sibi & usu, & dogmate planè compertæ, Cl. quoque *Albertinus* ejusdem Celeberrimi *Malpighii* Propinquus, alique sat noti. Imò, si liceat addere, quæ ex ore ipso eorundem Professorum nuper accepi, dicam, Cl. *Simonium* perplures casus mihi narrasse *Nobilium Virorum Perniciosos* Intermittentibus laborantium, & *China China liberaliter* oblata ab eodem felicissimè sanatorum; Cl. verò *Albertinum* mihi pariter exposuisse, se non modò in vulgaribus Intermittentibus eo Febrifugo familiariter uti consuevisse; sed & illud celebri cuidam Pharmacopolæ, *Perniciosa* Tertianæ detento, præscripsisse *ad drachmas sex*, tempore inter tertiam, & quartam accessionem medio, partitè oblatis; calculum suum libenter apponentibus Viris Eximiis, D. D. *Livizzano*, & *Salano*, in consilium vocatis. Quo præsidio adhibito, *Æger* cæteroqui moriturus facile restitutus fuit, atque etiamnum vivit incolumis. Malè itaque praxi meæ objicit Vir Cl. praxim Bononiensis Scholæ, cujus usum saltem recentiore, cum suam Dissertationem conscripsit, haud satis callebat.

De aliarum Scholarum ritu non loquor, cum nec loquatur Auctor Cl., & cum de illo satis superque loquantur nedum Scriptores, verum & fama universalis. Jam notum quippe quinam generaliter Italiæ nostræ, quinam Galliæ, quinam Angliæ,

quinam Hispaniæ mos sit. Accepi nuper a Sacerdote Aragonensi inclytæ Soc. Jesu, Viro fide dignissimo, Scholam Cæsari-Augustanam in usu adedè frequenti Febrifugum hoc habere, ut nihil magis; neminemque, cui præstò sit illud, quod immediatè a P. P. ipsis beneficæ illius Societatis ab Indiis asportatur, Febres unquam recidivas pati. Sed nimium distant a Cælo nostro, ut Viri Cl. assensum mereantur, aut fidem, istiusmodi Scholæ, Cæterum si Patavinam suam Orbi tam celebrem, sibi (uni forsan, qui de Cortice tam malè sentiat) vel modicè faventem novisset ille, non reticuisset profectò.

Sed quoniam cuncta, quæ sibi quoquo modo favorabilia tantummodo imaginabatur, in medium tam facilè adduxit, cur non licebit & mihi Scriptorum qualiumcunque meorum sortem, modestè ut decuit hucusque suppressam, approbationemque omnimodam, quam a permultis insignibus nostri Sæculi Professoribus (una quidem suadente materia) Scripta eadem sortita sunt, cavillationibus Viri Cl. saltem ad defensionem opponere? Cur inquam non liceat, cum idipsum non me tantum respiciat, sed & publicum Bonum, cui in primis servando mea hæc instituta est Apologia? Sanè apud Homines a partium studiis liberos magno momento erit, ut ab illis Methodus mea in beneficium usum adoptetur, & ea doctissimis ævi nostri Professoribus probata compareat. Inter tot tamen, tantosque Viros laboribus meis propitios unus sit instar omnium Celeberrimus *Lancisus*, Vir, si quis alius, omnigenæ eruditionis, *Archiatroque Pontificius* verè dignissimus, & effectuum Chinæ Chimmæ utilissimorum Observator neutiquam recens, ut ex Therapeut. mea pag. 126. Illius ergo Epistolam perelegantem (innumeras aliunde acceptas supprimo, ne jactare videar, vel ostentare) exuberante licèt erga me humanitate refertam, cum primò Opus meum recepit, excepitque, liceat proferre; eo saltem titulo, ut Romanæ Scholæ, quam non immeritò repræsentat unus, haud malè acceptum probem Tractatum meum: cujus omnia quotquot sunt, satis ab Opponentium sophismatis tuta, imò & facta tecta, in eadem Epistola, ipso Judice, reputantur. Unum autem ex integra Romana Academia *Lancisium* seligo, quòd hic illius est Caput, non quòd aliis ea careat Viris Illustribus ob egregia scripta Orbi jam notis, & de Opere



Opere meo humaniter æquè sentientibus. Excipe tamen (quod auspiciatissimum mihi) Excellentissimum Barnabam Ciccolinum, Romæ scriptitantem, atque in Libello suo novissimo, cui Titulus -- *La Filosofia e Medicina de' Savj* -- acriter incandescentem adversus non me unum quidem, sed Neotericos omnes, vel minimè lectos, vel perperam intellectos, atque Atomistarum nomine illis affixo, confidenter traductos; eo tamen ingenii acumine, ac robore, ut verear, ne (quod agebat Cic. 1. de Orat.) *aliis miserandus, aliis irridendus esse videatur*. Et hoc illi responsum; nec unquam aliud.

Quia verò quadam veluti pietatis, ac religionis specie Vir iste bonusea ineptiit Magistrali securitate, ut ideo a probabilitate minimè alienum sit suspicari, quòd Religiosiores saltem Viri, sapientia quidem, zeloque pollentes, sed rei Medicæ haud satis gnari, nonnullam illi fortasse adhibitori sint fidem; quippe facilè metuentes, ne doctrina, quam tradidit Renatus des-Cartes, etiam castigata, nimium nihilominus accedat adhuc ad errores Democriticos; quam verò tradidit Petrus Gassendus, ad Epicureos (quibus Sectis, Cartesianæ præfertim, necessario addictos Recentiores Medicos, quotquot sunt, satis absurdè arbitratur, blateratque Excellentissimus Ciccolinus) idcirco, non ut illi quicquam reponam, sed ad tollenda, si qua fuerint, super hac re Pusillorum scandala, pauca hæc raptim liceat addere, tum Medicos omnes Neotericos universim tum memetipsum peculiariter a futilibus hisce facillimè vindicantia.

Notum sit itaque, hodiernam solidiorem Medicinam, quæ Theoricam, qua Practicam, pro suo stabili fundamento unicè agnoscere Structuram organicam humani Corporis, postremò tantum ævo nostro melius detectam, oculo iudice: adeoque in Viscerum, Glandularum, Ductuum &c. compage, textura, dispositione, ac usu; item in varia Fluidorum natura, motu, commistione, fermentatione, secretionem &c. hic evidenter, illic probabiliter cognitis, omnes fundari Hypotheses, & omnia Systemata Recentiorum Theoretica; sive deinde cuncta hæc Scholasticè considerata, vel more Peripatetico, vel Cartesiano, vel quovis alio (quod perinde Medico est) explicentur, pro vario scilicet Philosophantium, & Scholarum totius Orbis arbitrio, aut ritu: eandem ve-

rò Medicinam Recentiore, quò ad exercendam Praxim, sisti, velut in basi sat firma, partim in Inventis iisdem Anatomicis, partim in observatione experimentalis; qua identidem non modò remedium ferè omnium, etsi ex arte administratorum, incertitudo perspicitur, quam præseferunt tum ratione sui, tum ratione Subjecti suapte natura mutabilis; verum etiam certa quotidie visitur nonnullorum, a Veteribus in magno pretio habitorum, inefficacia; clarèque dignoscitur, Priscam, quæ ad noviter detectorum normam minimè correctæ sit, mendendi Methodum, nec cohærere principiis constituentibus humanum Corpus, nec respondere expectationi Medentium in morbis curandis, peritiorum iudicio, & consensu unanimi. Utinam tam perspicuè didicissemus, quæ feligenda sint, ac utilia, quemadmodum didicimus, quæ vana, vel noxia sunt, atque vitanda. Hinc emerfit Galenicæ nonnunquam, vel Galeo saltem adscriptæ Methodi castigatio in nonnullis; in nonnullis aliis approbatio, prout detecta veritas identidem suadet, propriumque munus exigit, & quæsitæ præ cæteris Ægrotantium salus.

Cæterum nec Priscorum Medicina probos, piove facit Homines, nisi aliunde sint tales, nec Recentiorum impios, aut improbos. Sic potiùs conscientia suæ non deessent quandoque, qui nova medici ordinis minimè ponderata, aut examinata cæco quodam instinctu contemnunt. Hac de re vide Therapeuticam meam pag. 29. 30. Nihil ergo rei magis habet Neotericorum Medicina cum philosophia Cartesii, vel Gassendi, quàm cum Philosophia Aristotelis: a quibus etiam omnibus Scholis, si libeat, potest illa præscindere. Hanc idcirco praxim, non minùs quàm vetustiore, potis est exercere citra religionis detrimentum Christianus quilibet Medicus, ac summè pius, non secus ac illam exerceat Judæus, vel Scythæ. *Physicam Aristotelis, & Galeni Ignaram* longè ante hoc Seculum promulgavit, suamque *Novam Medicinam*, novamque Sectam fundavit Jo: Baptista Van-Helmont; necdum tamen in Scholis ortum habuerat Cartesii, vel Gassendi Philosophia.

Quod est ad me, nulli me Factioni profiteor serviliter deditum, sive de rebus Medicis sermo sit, sive de Philosophicis: neque ideo Remedia, quæ, Hippocrate duce,



duce, incerta protuli, sive *periculoso* identidem *experimento* obnoxia (cujusmodi sunt eorum non pauca) planè ob idipsum proscribenda censeo; iis siquidem utor & ipse defectu certiorum, ut patet undique ex Tractatu meo; ea tamen utor fiducia, & cautela, quæ incertitudini nunc majori, nunc minori æquum est ut respondeat. Inertia solummodo, & inutilia, quæ nempe talia deprehenderim, quantumvis magnifica, constanter rejicio: contra verò, efficacia, quæ scilicet longo usu expertus sum talia (sunt autem hæc numero non multa quidem; sed nec tam pauca, quin satis) constanter quoquè adhibenda sustineo; ut abundè jam in eadem Therapeutice mea. Hanc sanè si lustrasset, ut cæteroqui par erat, Excellentissimus Ciccolinus solis paginis 12. 13. & 14. ab eodem citatis, vel etiam pag. 122. & 124. magisq; attentè considerasset quæ a me sunt absolute, quæ tantum comparative, aut cum aliqua limitatione prolata, quæque pariter in tota historiarum inibi narratarum praxi mihi usui fuere remedia, vel denique si Lexicographos, ubi illi opus erat, consulere non erubisset; profectò nec tam facile pro Bajulis a me fortuito alicubi memoratis Apparitores, aut Lictores intellexisset, nec tot absona, falsa, & vana, quæ puderet hic recensere, æquè inaniter quidem ac illepidè obtrusisset.

Sed quoniam ex Opere meo latine conscripto laborare noluit, ut satis perciperet quid obiter saltem de Cartesii doctrina senserim pag. 145. commodius certè poterat, atque etiamnum posset idipsum ediscere ex Dissertatione quadam mea Epistolari anno 1706. vernaculo sermone exarata ad Doctissimum D. Marchionem Ursium, & ab eo edita in Eruditissimo Libro suo, cui titulus -- *Lettere di diversi Autori in proposito delle Considerazioni del Marchese Giovan Gioseffo Orsi &c.* a pag. 287. usque ad 330. ejusdem Operis: ibi namque, ubi fusè de Cartesio, nec non de Gassendo, & Aristotele sermonem habui, me nullius in verba Magistri quò ad res Philosophicas unquam jurasse, apertè visitur. Ea siquidem semper, quæ tam in Sententia ejusdem Aristotelis, quàm Cartesii, Gassendi, aliorumve saniora, & meliora credidi, ni mea me fefellit electio, conatus sum hinc indè excerpere, & pro ingenii viribus etiam connectere; quæ verò deteriora, planè rejicere: id perpetuò præ omnibus ratum habens; in

hisce videlicet rebus, persæpe etiam vanis, veritatem in puteo latere, nulli hominum in hac vita unquam se prodituram. Jam verò unde digressus sum denuo revertor. Epistola itaque Famigeratissimi Lancisii sic habet.

Viro .....

D. FRANCISCO TORTO

*Med. Doct. & Mutinensis Academiae  
Professori longè .....*

JO: MARIA LANCISIUS

S. P. D.

**V**ix librum, Therapeutices specialis ad Febres quasdam perniciosas, quem avidissimè prestolabar, Clarissimus Pacchionus noster abs te mihi reddidit, cum statim aperire illum, atque evolvere occæpi, tametsi nondum compactum, & conglutinatum. Nec sanè Titulus ipse citra admirationem modestia tua occurrit: rem enim summis dignam ingentis, & in arte medica exercitatissimis tractandam aggressus, Juniorum, & Candidatorum propositam tibi utilitatem profitearis. Tum utraque, ad Principem nempe, atque ad Lectorem epistola singularem animi tui moderationem, ac eruditionem nobis exhibuit. Subinde Librorum singula Capita percurrimus, ex iisque, perspicua methodo dispositis, specimen prodire conspeximus pulcherrimorum undique argumentorum, quæ varietate simul, & veritate, procul a fastidio, atque offensione, mirificè blandiuntur. Deinceps attentissimè legimus primum, & secundum Librum, in quibus, ut experimenta de China usu tanquam pretiosam Recentiorum mercem extollis, ita Priscorum, ac Mercati præsertim animadversiones circa perniciosarum Februm discrimina aureum veluti pulverem agitare non prætermittis, aequissimus semper Judex, verique amantissimus. Ex reliquis autem tribus Libris tot, rartaque, omnia tamen tuo ab ingenio cum fructu jucunditatis, atque utilitatis, deprompsimus, ut, quemadmodum tu sine plena rerum Physico-Mechanico-Anatomicarum scientia, ac longo usu, scriptis illa tradere nequisses; sic neminem, qui eadem penitus persequi velit, absque magno suorum studiorum emolumento a lectione recessurum existima-



*stimamus. Placuerunt, fateor, inter cetera, qua Libro 3. Cap. 2. nervosè, ac doctissimè a te proponuntur: etenim insequeris eò loci perniciosarum Februm fermentum, aut subsistens, aut fugiens a primis in secundas chyli vias, atque ab iis in tertias circulantis sanguinis, quartaque excurrentis succi nervei semitas, itaut, quocunque se hostis recipiat, turbas faciat, classicumque canat; armata semper Peruviano Cortice manu feliciter profliges, atque proster nas. Quid? quod Arborem immortalitate dignam, in calce libri delineatam, Studio-  
forum in gratiam posuisti. Scilicet ut ab ejus singulis ramis, ut scribis, non decorticatis (modò memoria committantur) totidem quasi hasta ad confodiendas febres, plerumque exitiales parari facillimè possint. Hæc autem omnia eo quidem judicio ubique rimatus es, ut nihil a stylo tuo (satis aliquin robusto, atque eleganti) excidere videatur, quod non sit vel gravissimorum Virorum auctoritate, vel longo tuo experimento confirmatum. Quamobrem si fortè imprudens quispiam (caveat hic sibi Excellentissimus Ciccolinus) carpere aliquid tuis in Scriptis ausus fuerit, latrabit semper ille, non mordebit. Neque verò præterii sine grata humanitatis tuæ commendatione locos illos, quibus me, meosque labores officiosè commemoras. Hoc sanè faciet, ut jure multò majori meis in Commentariis æternorum tuorum Operum debeam meminisse. Vale Vir  
..... Amicis pariter, & Republica.*

*Datum Romæ XIII. Kalen. Martii  
MDCCXII.*

(c) (*Quanta cautione &c.*) Tanta cautione, remotioribus præsertim temporibus, Corticem Peruvianum, ut & alia ferme omnia remedia, præscribere consueverat oculatissimus Malpighius, ut fuerim ausus in Therapeutice mea pag. 14. proferre, suam illi in hoc condonandam esse cautelam, quippe eidem de more quidem familiarem, sed circa usum hujusce Febrifugi fortè nimiam. In citato tamen per Cl. Auctorem Consilio nihil illi condonandum duxerim; neque enim eo casu valde ancipiti quicquam ampliùs ipse proposuissem. Habebit fortasse quid donet illi, aut potius quid parcat, sed de excessu, idem Cl. Auctor, qui duas tantùm Chinæ Chinæ drachmas exhibere consuevit; neque tamen repetere: cum contra hic Malpighius drachmas quinque ad quindecim dies partitis vicibus offerendas proponat. Atque hanc ipsam & mi-

hi iis nonnunquam casibus Lentarum, & Diuturniorum febrium, ex Intermittentium tamen radice, esse Methodum præscribendi Peruvianum Corticem, potest quilibet intueri pag. 61. & 62., imò & a pag. 318. ad 321. ejusdem Therapeutices meæ.

(d) (*Remedia &c.*) Ad hunc Textum petitum ab Opere Posthumo ejusdem Malpighii, & signatè ad primam illius partem respondeo, hic improbari a Viro illo circumspèctissimo Chinam Chinam tanquam recensitorum malorum productricem, si ea, ut clarè inquit, fuerit sine arte adhibita. Adhibeatur itaque ex arte, ut in Tractatu meo sum conatus explicare pro viribus; atque ita, non modò evitabuntur Recidivæ, Fixationes, & Cachexia, quas arte non adhibita metuit (fortassis & supra modum metuit) famigeratissimus Malpighius; sed hæc ipsissima mala, Fixationes nempe, & Cachexia, si præextiterint, a Febris diuturnis inventæ, eodem Febrifugo una, & eadem opera sanabuntur. Audiamus in hanc rem, præter Restaurandum, Monginotium, aliosque plures super hac materia citatos in Therapeut. mea pag. 92. 93., & præter historias a me ipso allatas, tum ibidem, tum pag. 90. historia 13. & pag. 91. hist. 14., audiamus inquam sex Medicos Insignes, ex Inclyto Collegio Mediolanensi, videlicet Jo: Horatium Castillioneum, Jo: Paulum Cambiagum, Hieronymum Cardanum, Franciscum Guadignanum, Sebastianum Calvum, & Christophorum Paravicinum, apud Badum lib. 3. pag. 205. hæc attestantes ab anno 1658., quo tempore novus adhuc erat in Europa Peruvianus Cortex. Illorum verba sunt hæc. *Facta igitur a nobis per decem continuos annos (non per decem dies, aut menses) multiplici experientia, omnibus, quibus ex præscripto exhibitus fuit, profuit. Aut enim eos omnino a Febre immunes reddidit unica vice assumptus, aut si ex delictis in victus ratione, vel ex alia causa (adderem, si bene ferret Cl. Auctor, qui sapiebat plurimùm, - ex non continuato illius usu) Febris rediit, denuò eo assumpto liberi evasere. Mirum dictu! Lienosi, Cachectici, extincta Febri, nullis aliis assumptis remediis, a Cachexia, & Lienis infarctibus liberati sunt &c.* Nullis, quod sciamus nocumentum attulit &c. En ergo quomodo China China ex arte illorum solummodo temporum præscripta, & repetita



ita *Recidivas* facile tollebat, & *Fixationes* intrâ Lienem, & *Cachexias* ipsas curabat. Idem confirmat senioribus hisce temporibus famigeratissimus Jo: Jacobus Mangetus Bibliot. Medico-Pract. lib. 6. §. 20. pag. mihi 239. his verbis: *Cortex non tantum Febrem, sed nonnunquam etiam Hydropem inde ortum depellit: & quidem in substantia ipsa exhibitus, non Tinctura specie; etenim ex eodem Auct. ibidem §. 16. In Substantia sumptus efficacior est: certius enim, & citius paroxysmos sistit &c.*

(e) (*Hinc necesse fuit &c.*) Quemadmodum prima pars hujus Textus respicit usum Chinæ Chinæ *sinè arte adhibita*, hoc est adhibita, vel *Ubi*, vel *Quando* non convenit (qua de re jam pluries ad fastidium usque) ita secunda hæc pars respicit *Modum* eadem utendi rationalem. Atque hic animadvertat Lector, quam parum cautè, quam parum appositè Cl. Ramazzinus Chinæ Chinæ usum *quemcunque* §. 6. merè empyricum, irrationalem, & amethodicum prædicans, utatur hoc Textu, quem Malpighius, ut satis patet, protulit in eum præcisè finem, ut ejusdem Febrifugi usum, non merè empyricum, sed methodicum, rationalem, & planè jam *tutum*, mediis præparationibus variis, apud Medicos factum ostenderet. Adeoque nil aliud hinc posset inferre noster Auctor, nisi ad summum, necessarias esse præparationes a Malpighio allegatas, ut *tutò* possit China China adhiberi ad eas Febres, ad quas illius actionem pertingere docet experientia, cum in substantia nuda exhibetur.

Licet autem quò ad istas Remedii præparationes ego experientia multiplici ductus possim asserere denuo, quod & asserui in Therapeut. mea pag. 64. cum Mortonò, & Blegnyo; Efficaciorem scilicet esse substantiam simplicem hujusce Febrifugi, quàm Extracta, & Tincturas illius, ut sentit quoque Lemeryus in cursu Chymico, a Cl. Auctore infra citatus, & in Bibliotheca Medico -- practica, ut annotavimus nuperrimè, Jo: Jacobus Mangetus, alique; nihilominus neque renuo rursus admittere, quod in obsequium Viri tamen celebris admisi pag. 63. ejusdem Therapeut.; posse videlicet *Tincturam* potius, quàm *substantiam* ligneam Corticis, eamque *paulatim* potius, quàm *cumulatim* exhiberi, ubi non magna urgeat necessitas, vel sollicitudo citioris, aut cer-

tioris eventus: uno verbo, in *diuturnis*, & *benignioribus* Intermittentibus. In *Perriciosiss* liquidem, tam Intervallatis, quàm Subcontinuis, etsi quandoque Extracta, & Tincturæ ex usu esse possint, nec inutiliter; haud tamen vereor affirmare, *certiorem* semper esse, *citior*em, nec propterea *minus tutam* curationem, quæ *Substantia* Corticis assumpta obtinetur, quàm quæ obtinetur ope *Tincturæ*, aut *Extracti*: quemadmodum in Libro, cui Titulus, *Oculorum, & Mentis vigilia*, pag. 274., auctoritate Mortonii, & propria experientia fretus, huic eidem Malpighianæ animadversioni respondet Cl. Sbaragli, ejusdem pariter Scholæ Bononiensis Professor, & (quantum ex ejus Scriptis licet conjicere) Peruviani Corticis administrator nequitiam scrupulosus. Sed & his missis, Malpighius certè temporibus suis ne cogitavit quidem de Febribus hujusmodi lethalibus China China curandis, vel de tam valida illius virtute in extremo etiam earundem Febrium exitio; imò in angustiis *proxime*, *certaque* jam necis. Neque enim metum *Recidivarum*, nec *Fixationum*, nec *Cachexia*, nec aliorum quorumvis morborum, servato tunc *Ægrotante* subinde facile curabilem, in tam gravibus circumstantiis objecisset, satis conscius aurei effati, quod habet Celsus lib. 8. cap. ult. *Nihil interest, an satis tutum præsidium sit, quod unicum est.*

His omnibus de causis, *suam* in Therapeut. mea, loco citato, *cautelam* dixi *condonandam* Malpighio, Viro sanè, quem libenter & ipse fateor *Sapientissimum*, qualem modò prædicat, qui sibi favorabilem putat, Cl. Ramazzinus. Neque ego propterea tanto Viro, velut crimen aliquod unquam objecerim, quòd ille populari, crebræque praxi minus addictus, sæpius etiam in otio rurali Sectionibus Anatomicis, præsertim minutioribus, occupatissimus (quibus studiis, utilitate sua nequaquam carentibus, longè a Medentium, & *Ægrotantium* turba eminenter incaluerit, inaccessa peragrans loca, & *nullius ante Trita pede*) humilioribus hisce, quantumvis æquè saltem utilibus, minùs vacare potuerit, aut potius voluerit. Nullus enim dubito, quin pro sua ingenuitate, si vixisset in hæc usque tempora, alienæ saltem praxi eam fidem in hoc fuisset adhibiturus, quam anatomicæ illius dexteritati alii adhibere consueverunt. Nec proinde illius ego *curiosam diligentiam* sa-



*libus Aristophanis perfricuerim*, ut satis manifestè, dissimulanter licet, olim perfricare visus est Cl. noster Auctor: & quidem acrioribus, ac unquam perfricuerit illam iisdem temporibus Auctor Dissertationis *De Recentiorum Medicorum studio*. Videtis curiose Lector Dissertationem Cl. Ramazzini De Constitutionibus trium annorum 1692., 93., & 94. §. 58., & 59. pag. 193. Edit. Patavin., ibique Mantissam hanc illi Dissertationi, etsi jam planè absolutæ, pruriente nihilominus calamo eleganter assutam reperiens.

(f) (*Malo usu &c.*) Quis quæso de *malo usu*, nedum Peruviani Corticis, sed & aliorum remediorum, puta Phlebotomiæ, Purgationis &c. acria non scribat? Contra *malum* huiusce Febrifugi *usum* scripsi & ego, qui tamen dicor alicubi a Cl. Auctore, *Magnus China China virtutum assertor*; scripsere Sydenhamius, imò & Mortonus ipse, aliique ferè omnes, innoxii cæteroqui, & saluberrimi Remedii Fautores, ut passim videre est, tam in Scriptis eorum, quàm in ipsa Therapeutice mea. Sed quid indè? Opus esset ostendere, *malum* usum, quem damnant auctoritates omnes, tum hoc, tum aliis Criticæ huius Dissertationis locis adductæ, esse illum *eundem*, quem specie recti usus exercent *Mutineses Medici*; sive, ut citra fucum loquamur, quem titulo *peculiaris*, ac perutilis *Methodi* proponit, ac laudat eadem Therapeutice mea: *rectum* verò usum illum esse *tantummodo*, quem limitibus arctissimis conclusum ferme ad nihilum tandem redegit Cl. Auctor. Ad hæc oporteret (ut vim probationis haberent eadem auctoritates) oporteret, inquam, ut Scriptores illi *Methodum* ipsam *meam*, in circumstantiis præsertim, in quibus eam *peculiariter* proposui, nedum præcisè damnarent, sed & damnarent *experti*, non ratiociniis tantum innixi; meque *re ipsa* falsitatis evincerent, aut vaniloquentiæ. Sed quis, Mortonò excepto, aliisve perpauca, Peruvianum Corticem in Perniciosis Febribus a Mercato descriptis, methodicè, ac ex arte fuit unquam, saltem constanter expertus, ante evulgationem Tractatus mei, specialem Methodum, nondumque notam tradentis, ut praxi meæ suam in iisdem Febribus, & circumstantiis æqualiter exercitam, queat opponere experientiam?

Quæ igitur de *malo* huiusce Corticis *usu* generaliter scripta extare dicuntur apud

Georgium Baglivum, Nicolaum Lemery, & Theophilum Bonetum in variis Operibus suis, nil probant adversum me, nilque adversus Peruvianum Corticem: cum vix aliquid per transennam apud ipsos legatur de *abuso Antifebrilium omnium* in genere, ut & de *usu* Chinæ Chinæ nonnunquam, ut ajunt explicite, *intempestivo*; quem quoque *intempestivum* nihilominus etiam admittunt in *curatione coacta*. Contra verò reperio plurima apud eosdem Auctores de vi, certitudine, & securitate huiusce remedii, quæ aciem legentis Cl. Ramazzini fortasse subterfugerunt, quæque facile a curiosis Lectoribus possunt adinveniri, ut in sequentibus.

(g) (*Apud Georgium Baglivum &c.*) Georgius ergo Baglivus, ut aliquid obiter innuam de singulis, Lib. 2. Prax. Med. Cap. 3. pag. mihi 156. hæc habet. *China China est Remedium profectò herculeum in curatione Intermittentium; dummodò tamen (quæ peritorum omnium cautela est) non detur, si aderit suspicio inflammationis alicujus visceris, vel ascessus interni; neque in principio, crudis adhuc existentibus humoribus &c.* Item lib. eod. pag. 234. de inutili, ac noxia locutus bilis evacuatione in Tertianis -- *Evincit id*, inquit, *nuperrima Corticis Peruviani, aliorumque Febrifugorum artificialium detectio, quibus prudenter, & tempestivè datis, Febres omnes Intermittentes, a quibuslibet demum causis productæ, felicissimè eliminantur, nullis in medium productis Questionibus præparationis, aut evacuationis humorum.* De Remedii deniq; Specificis agens pag. 242. principem statim locum tribuit Peruviano Cortici, inquiens. *Sint constantia, videlicet Remedia specifica, methodo præscribendi munita, & morbo specificè, ac ferme infallibiliter respondentia, prout est in Intermittentibus Cortex Peruvianus &c.*

Quod si in Tractatu De Fibra Motrice, & Morbosa identidem succenset usui Chinæ Chinæ, perpetuò loquitur cohærenter ad superius relata, tum de illius oblatione ante sublatam, ut clarè semetipsum explicat, *Cacochiliam*, tum de abusu ejusdem in Febribus *Mesentericis Romanorum*, ut vocat, ex vitio illius visceris non levi proficiscentibus, ac proinde *Symptomaticis*; adversus quas nil posse Peruvianum Corticem, communiter notum est, & a me pariter, nedum annotatum, sed & fusiori explicatione declaratum pag. 295., & 296. Tractatus mei. Oportet ergo probè digno-



dignoscere Februm species, differentias, & transmutationes, ut pluribus aliis in locis Tyrones docui. Sed hoc (ut aiebam pag. 102. ejusdem Tractatus) quod maxime oporteret docere, idipsum est, quod nequit satis doceri. Qui ergo omnes hæc Februm vicissitudines exactè, quantum licet per observationes, & experimenta, non callet, nunquam erit Corticis opportunus administrator; remediumque a perito Medico ferè nunquam incassum adhibitum, si fortè bis, aut ter cum successu, quater, aut quinquies sine successu exhibebit. In hos scopulos, in has Syrtes forsitan impegere Scriptores nonnulli, Chinæ Chinæ usui frigidiusculè tantum plaudentes.

(b) (Nicolaum Lemery &c.) Nicolaus verò Lemeryus in cursu Chymico Part. 2. Cap. 6. de Quinquina pag. mihi 454. ait -- Hoc est Remedium tutius, quod usq; adhuc repertum sit adversus Februm Intermittentium fermentum &c. Usus illius prima oblatione liberalem præcipit, continuatque diminuta dosi bis in die per octiduum, & semel in die per aliud octiduum; asseritque constantem illius repetitionem impedire Februm recursum, dummodo Ager fuerit antea ritè purgatus; impurgato enim corpore Chinam Chinam exhibere, minimè tutum existimat. Hac de re vide Therapeut. meam lib. 1. Cap. 9.

(i) (Theophilum Bonetum &c.) Quò ad Theophilum denique Bonetum, in variis hujus Auctoris Operibus tot sunt, quæ favent usui Peruviani Corticis, ut cuncta recensere non vacet; siquidem apud vastorum hujusmodi Collectaneorum Scriptores qui aliena diversorum generum acervatim referunt in Studentium commodum, quisque reperit facilè quod sibi congruit. In Polyalthe itaque suo Bonetus Tom. 1. Lib. 1. de Febr. Tit. 5. Cap. 1. de Intermitt. in gen. §. 59. de China China hæc habet ex Sponio pag. mihi 221. *Omnium usitatissimum, & certissimum omnium est Febrifugum &c.*, suadetque ex eodem ad præcavendum Februm recursum dosim liberalem ad uncias usque duas §. 61.; item ex Sacho hæc addit eodem §. 59. *In his Febris China China valde salutaris ab experientia probatur &c. & si revertatur paroxysmus, nova China exhibitione supprimitur.* Ex Villisio quoque §. 60. sic loquitur pag. 222. *Usus pulveris Corticis Peruviani hunc morbum (hic intellige Quartanam) certissime curare perhibetur &c.* Denique

(ut plura alia omittam loca tam vasti Operis) ibidem ex Boyle sic concludit. *Si credendum erit magno Digbeo, culpandus potius Medicus, quam nobilis hæc Medicina, si post hujus exhibitionem unquam revertatur Febris; nam cum illum consulerem super hac re, sanctè mihi asseveravit, ex 30. aut 40. circiter Quartana detentis, quos hoc solo remedio curavit, ne vel duos relapsos fuisse: neque tamen inde crediderim, Cachecticos illos paulò post obiisse, aut Hydropicos. Sed citati Auctores, de inhibendo relapsu adeò solliciti, nesciebant adhuc Theorema practicum Cl. Ramazzini; videlicet, Oportundum esse, ut Febris redeat remedii loco: Medicosque Chinam Chinam præscribentes interdum eludi, Febre amplius non redeunte; sed tacitè corpus depascere.*

Idem Bonetus in Mercurio Compitalitio, ubi de China China sermonem habens nihil edit de proprio, sed tantum Villisii verba transcribit, scilicet lib. 6. De Febre Intermittente in genere, pag. 207. hæc nobis innuit. *Qui ea ratione (videlicet usu Peruviani Corticis repetito) crebras inducias Quartana procurabant; alacres, & viridi ad negotia quaque expediti degebant, cum secus enerves, & pallidi in languorem, & vitiosum corporis habitum redigerentur. Vix unus e centum hoc remedium incassum tentavit: nec tantum in Febre Quartana; verum in aliis Intermittentium Speciebus cum fructu adhibetur &c.*

Tandem in Medicina Septentrionali felicissimas adducit idem Bonetus Februm curationes, ope Chinæ Chinæ absolutas. Harum tres juvat recensere. Prima legitur Volum. 2. Lib. 5. De Febris Sect. 1. De Medicam. Antifeb. Obser. 5. pag. mihi 177., estque observatio Erasmi Bartholini, qui primò in se ipso anno 1679., mox in aliis felix de illa periculum fecit, ejusque famam illis in Regionibus antea obscuram illustravit; imò & rationibus validis usum ejusdem ea ipsa observatione confirmavit. Et quasi Regionibus illis indecorum putasset, apud alienigenas credi minùs ex cultum ibidem esse remedium illud, quod non multò ante Europæ innotuerat, hæc addidit. *Celeberrimus Vir Villisius multis experimentis edoctus stant lib. de Febr., eximias esse hujus pulveris vires in Febre Quartana debellanda; id, quod & Nobilissimus Robertus Boyle testatur in diversis editis a se Scriptis. Quare neque nos decuit usum ejus in terris hisce Septentriona-*



libus salutarem fuisse silentio pratermittere, ut optimis rebus honos imprimis habeatur, neque in Medicamentorum cognitione confessa cum ancipitibus, & obscuris confundamus. Et paulò post -- Adeò verissimum esse deprehenderim quicquid laudati Auctores (alios enim antea citaverat, præsertim Antymum Conygium, sive Honoratum Fabri) de hoc pulvere bono publico divulgaverunt; neque in hisce terris minorem esse ejus nobilitatem, quam in Meridionalibus.

Observatio altera habetur eadem Part. 2. Medicin. Septentr. lib. 7. Paraleipom. ad lib. 3. Sect. 3. de Febribus Intermitt. pag. mihi 550. Observat. 19., estque illa observatio Ferdinandi Friderici Illmer, pariter digna, quæ lustretur; licet hic ob suam prolixitatem omittatur. Ex ea siquidem non minùs Peruviani Corticis efficacia, quàm inefficacia potius vulgaris Methodi, aliorumque Antifebrilium ferme omnium, eo casu inutiliter usurpatorum, clarè deprehenditur.

Sed tertia Observatio, quæ hanc immediatè antecedit pag. 549., estque Obser. 18. rem planè conficit. Exhibet hæc Auctorem ipsum, qui eam describit, Theophilum Bonetum Quartana laborantem, & in ipso morbi principio, post sextum videlicet Paroxysmum, China China intra biduum ad drachmas, non duas tantum pro more, sed sex assumpta, perfectè sanatum, atque ad calcem Observationis pag. 550. plura de hoc Febrifugo egregiè locutum; inter quæ nonnulla hæc cursim excerpta. Circa usum istius Febrifugi, notandum, quò simplicius exhibetur, eò efficacior ejus vim deprehendi; neque consortium aliorum medicamentorum exposcere. Nam neque adjuvante indiget, quod vim illius intendat, cum hætenus nullum adeò efficax antipyreticon innotuerit, hinc ut quicquid in societatem illius venerit, infirmius sit, & inutile: neque corrigente, cum nullum ab ejus usu ex arte exhibiti, experientia teste, damnum emergat &c. Si Recidiva succedit, ea vel Ægri intemperantia adscribenda, aut quia intempestivè, vel coactè id assumptum

est &c. Quid clarius? Quid Cortici favorabilius? Itane illum auctoritatibus Bagli-vi, Lemerii, & Boneti mulctat Cl. Auctor? Certè & hac vice Carpathius testem.

Quid verò si ego, præter responsionem hanc ab iisdem petitam, retaliarem Virum Cl. auctoritatibus quinquaginta forsitan Scriptorum supra enumeratorum, tot, & tanta eidem adversa canentium? Quid, si unius Langii Dissertationem? Quid, si solam Mangeti Bibliothecam, vel Medico-practicam, vel Pharmaceutico-medicam cum Auctoribus in eadem, præter a nobis expositos, recensitis, Rajo, Courtine, Goodall, Hulse, Robinson &c. opponerem? Sed puderet, ubi de praxi lis agitur, alio uti teste, quàm experientia; maximè cum non de primæva vulgari Methodo, nec de Febribus tantum diuturnis, de quibus solummodo passim loquuntur Auctores, inter nos sit Quæstio suborta; sed de Methodo recenti, & de usu paucissimis noto, cujus Judicium penès Seculum istud deinceps erit, serosque Nepotes, non penès prægressum. Id unum liceat a Mangeto supra laudato in rem nostram excerpere, Bibliot. Pharmaceutico-med. lib. 17. pag. mihi 697., quod sic habet. Pro ejus vi febrifuga (loquitur de China China) quidam acriter militarunt, dum alii nobile hoc medicamentum totis impugnarunt viribus, (en igitur quàm facile sit, & simul quàm vanum, notas jam, sed effectas, atque hodie inanes contra illud congerere auctoritates) donec tandem ultimis hisce annis ab omnibus prope Medicina Cultoribus, Ægrorum suorum solatium verè expetentibus, non tantum amicè excipitur (en ex adverso quàm facilius sit, sed simul quàm æquius, potiore auctoritate, & experientia firmatas, condere pro eodem Pandectas) sed etiam pro Panacea quadam quasi specie non immeritò salutatur. Cur ergo ultimis hisce annis desit saluberrimam hujusmodi Medicinam ita salutare, qui ante paucos annos, imò ante paucos menses tam humaniter, tamque benignè salutaverat Cl. Auctor?

#### S. 44.

Sed forte quis dicet ignotam fuisse novam hanc Methodum Chinam exhibendi in larga dosi ad uncias, & pluries in die, ac in illius usu persistere donec febris extincta fuerit. At ista Methodus nova non est, (a) licet pro nova venditetur, jamdiu in Germania

usui



usui esse cœpit, ut videre est in Epistola responsiva Roberti Bradi ad Thomam Sydenham, ibi enim verba hæc scripta reperio. Equidem scio quosdam haud infimi subsellii Medicos, qui in magna quantitate, & dosi sæpius repetita eum exhibent; alios item qui ex eodem extracta, infusiones, & ex infusionibus iulapia, & emulsionem conficiunt, quibus modis se non tantum intermittentes, sed & continuas quasdam certo curare affirmant. Profecto hac in re (b) nil inausum, nil intentatum reliquit Medicorum industria, ut etiam excogitarit ex Chinæ China decocto Clysteres Febrifugos.

(a) (Licet pro nova &c.) **P**ro nova certè non venditatur a me Methodus mea, quam patior libenter, ut appellet quisque pro arbitrio, vel meam, vel alienam, vel ad imitationem alienarum confarcinatam, quemadmodum in Therapeut. mea lib. 3. Cap. 4. pag. 168., & seq. Posse nihilominus, forsan & debere, novam vocari, habito ad circumstantias quasdam respectu, quæ se tenent tum ex parte Februm curandarum, tum maximè ex parte modi exhibendi Peruvianum Corticem, illumve industri quadam, & inæquali partitione distribuendi, pro ratione angustiae temporis, & imminentis exitii, ne inutiliter administretur, ex eodem Cap. 4. lib. 3. a pag. 168. usque ad 173. luce meridiana clariùs apparet.

Sed hæc novitas, seu, quod refert, peculiaris utilitas Methodi meæ non consistit in exhibenda, ut hic inquit Cl. Auctor, China China in larga dosi ad uncias, & pluries in die &c.: hujusmodi enim lata nimium, & indeterminata loquendi forma satis a me exhibita est pag. 162. Tractatus mei; sed consistit ad summum, ut alias recensui, & ut patet ex eodem Opere meo pag. 163., in duabus plus minus uncias Chinæ Chinæ, intra tres hebdomadas assumptis; una ex illis ad curationem, altera ad præcautionem præscripta, in casibus Februm Perniciosarum, ac summè lethalium, ubi major necessitas, quam in benignioribus impenditur copia Febrifugi. Dosim ista copiosiore, quæ scilicet pro una Ægritudine curanda, uncias duas longè transcendat Peruviani Corticis, tanquam abusum a me damnatum vide pag. 164., & 165. ejusdem pariter Tractatus mei. Distributio autem istiusmodi dosis liberalior est mihi tantummodo in primo Cyatho, sive in prima Remedii oblatione, in casibus tamen solum maximè urgentibus, & deficiente tempore lentius agendi: tunc siquidem semun-

ciam de more, paulò etiam plus, aut paulò minus, pro affectus, ac temporis exigentia præscribo. Atque ita sufflamine statim imposito Febri præcipiti, reliquum Corticis ad alteram usque unciam, lentiore sensim pro renata progressu, consumptum volo. De his omnibus fusè, & ordinatè in eodem Opere meo a pag. 158. usque ad 173., ubi totum Corticis impendium, & tota simul meæ Methodi novitas abundè perspicitur. Novum quippe revera est, propinare hoc pharmacum in iis circumstantiis, in quibus nulla amplius pharmaca locum habent, magis novum, propinare tam utiliter; & maximè novum, hanc utilitatem pendere ab industri quadam modicæ potius, quam exuberantis tandem quantitatis distributione.

Sed si Methodus ista nova non est, & si jamdiu in Germania, ut inquit, usui cœpisse, cur illum soli Murina sequaci impunitat, non verò Germania, ut asserit, præeunti Cl. Auctor? Ast hallucinatur ille non parum, dum in asserti sui probationem adducit Epistolam Bradii (fallitur & in hoc, quòd responsivam vocat, cum sit sciscitatoria ad Sydenham) Robertus enim Bradyus, ut patet ex eadem Epistola, & ex Responsorio annexa Sydenhamii ad ipsum Bradyum pag. 332., & seq. in Operibus præcitati Sydenhamii, Edit. Patav. 1700., est Professor Cantabrigiensis; verbaque a Cl. Ramazzino hic recensita scripsit idem Bradyus e Cantabrigia, Urbe, non Germania, sed Angliæ celeberrima, ut videre est loco citato. Crebrò nimis profectò labitur vel inter plana hæc cœspitans Vir Cl., ut queam ipse tam crebrò dissimulanter connivere. Quòd ille §. 31. Franciscum pro Antonio extinctum, sive occisum voluerit: quòd §. 32. alium quempiam de Marchione Comitem fecerit: quòd §. 33. Fernelii Libros De abditis non Rerum, sed Morborum Causis inscriptos dixerit: quòd denique hoc ipso Paragrapho Epistolam Bradii Sciscitatoriam pro Res-



*ponforia* sumpserit, & Nationum Medicinam confundens, Germanicam Scholam citavit loco *Anglica*, vel Germaniam ipsam ad Tamesim, & Camum pro Anglia collocavit; id omne illi facile condonandum dixerim; quamvis id ipsum alii non ita facile laturos sint Medici, neque Geographi. Sed quod morem ejusdem Anglicæ Scholæ, quam mihi, tunc licet inscio, præeuntem in liberaliori Chinæ Chinæ usu ad Perniciosas Intermittentes pluries asserui in Opere meo, velit ille adscribere insuper Scholæ Germanicæ in contumeliam Methodi meæ, ut scilicet omne illi adimat novitatis decus; id certe non æquè facile ferendum mihi: quemadmodum nec bene tuli, nec unquam feram, venditatum falsò ab eodem (puto quidem sine crimine) pro infastè alicubi exhibito, nullatenus exhibitum, aut propositum Peruvianum Corticem.

Sed quoniam Germanum effinxit invita Natura Robertum Bradyum, cur saltem illius germana sensa nostro Cortici adeò favorabilia, & ex immediato ejusdem contextu clarè patentia non subdidit Vir integerrimus? Subdam ego de more prolixior quod de industria omisit ille, cum maxime ipsum juvabat brevitati studens; imò totum, prout jacet, Bradii Textum, a Cl. Ramazzino partim allatum, & partim omissum integrè huc reddam. Si ergo Thomæ Sydenham Londoniensi sub die 30. Decembris anni 1679. scripsit e Cantabrigia Robertus Bradyus -- In Sectione prima Cap. quinto Libri tui paucis egisti de usu Corticis Indici, & ejusdem exhibendi Methodo. Equidem scio quosdam haud infimi subsellii Medicos, qui in magna quantitate, & dosi sæpius repetita eum exhibent; alios item, qui ex eodem extracta, infusiones, & ex infusionibus julepia, & emulsionem conficiunt: quibus modis se non tantum Intermittentes, sed & Continuas quasdam certò curare affirmant. Magnum procul omni dubio in curandis Intermittentibus est remedium. Ego quidem per 20. plus minus annos dictum Corticem varia forma, & multiplici preparatione maximo cum successu exhibendum curavi. Si verò peculiare quippiam de usu hujusce Corticis nosti, vel quid melius progrediente experientia fueris edoctus, id ne graveris, precor, in lucem proferre. Hæc omnia e Cantabrigia Bradyus. In Anglia ergo, non in Germania, (penes Mortonum saltem, & Sydenhamium) usitata erat Me-

thodus, non quidem eadem, sed nec longè absumilis a mea, præscribendi Peruvianum Corticem, ut candidè fassus sum in Therapeutice mea locis citatis, & alibi. Quodnam autem Bradyo responsum dederit Sydenham, & qua Methodo se usum dixerit in ministrando Ægrotis Peruviano Febrifugo, satis patet ex Textibus illius a me transcriptis, tum olim in Tractatu meo, tum denuo in hisce Responsionibus Jatro-apologeticis. Quod si insuper particulam quamdam finalem Responsionis ejusdem Sydenhamii ad Bradyum, pro melius dignoscenda eximia vi Corticis ex arte adhibita, meorumque insimul dictorum exploranda fide, illustrare libeat; quoniam hæc ipsa Sydenhamii conclusio rebus quoque meis tam bene congruit, ut mihi fortassis hodie idem de Opere meo liceat affirmare, quod de suo quondam Sydenhamius asseruit; hæc illius verba summatim huc translata haud piget subdere. Si placuisset ad ea animum advertere, quæ annis abhinc quatuor tradideram; quo pacto scilicet Cortex debuerit ministrari, tum postea repeti, Ægro convalescente, viverent fortassis haud pauci eorum, quos jam terra tegit; ut ut homines vilipendant tennes sanè illos conatus nostros, communi omnium bono dicatos, & monita spreverint ibidem dictata. Hæc eadem itaque mihi fors obtigit a Cl. Ramazzino, cui mea minimè placuerunt vel dono missa. Nullo igitur pretio mercem hanc venditavi, quæ tantum abest, ut illum emptorem habere meruerit, quin potius habuerit contemptorem.

(b) (Nil inausum &c.) Ausus iste tam insolens præscribendi Clysteres ex China China decocto, si apud Cl. Auctorem malè audiat ut enervis, aut parum efficax, eadem quoque ratione non admodum gloriose audit apud me pag. 330. Tractatus mei; quamvis non semel & hac via mihi usui fuerit idem Peruvianus Cortex. Si verò malè audiat alio nomine; sciat idem noster Auctor, ad ausum hujusmodi, præter Helvetium Facinoris Auctorem, pervenisse quoque e Schola inclita Bononiensi (quæ cæteris, ipso Judice, pro regula Polycleti esse potest) Clarissimum Sbaragli, per superiora, & per inferiora Febrifugum hoc pro casuum exigentia in Ægrotantium corpus immittere non renuentem, ut in Oculorum, & Mentis Vigiliis pag. 273. Sciat insuper, ad eundem ausum nedum pervenisse in curatione aul-



picatissima Pueri quinquennis, remedia quævis per os respuentis, sed & Practicis stimulos addidisse ad idem tentamen Georgium Baglivum, quem §. antecedenti citavit Cl. Auctor tanquam Scriptorem ului Chinæ Chinæ adversantem. Legatur Casus apud eundem Baglivum lib. 1. Prax. Med. Cap. 13. pag. mihi 128. Quid ergo miratur adeo Vir Cl. de *Clysteribus Febrifugis* ex China China paratis, qui Moniali cuidam nihil per os assumenti, ad 66. dies per solum Clyste-

rem *Nutrientem*, singulis diebus injectum, vitam se prorogasse refert in suis Constitutionibus Epidemicis Mutinensibus, a pag. 107. usque ad totam pag. 109. ? Metuitne forsan, ne qui parantur ex China China Clysteres, *Cachexiam* pariant, aut *Hydropem*, eadem, qua *Nutrientes* illi alimentum intrudebant via? Certè si crebro, & copiosè repetantur, inflabunt Abdomen: cujusmodi infortunium fortè contigit quadringentibus illis militibus prope Manhemium æstiva castra sortitis.

## §. 45.

**J**am multa habita sunt experimenta permiscendo Chinam cum variis Spiritibus, cum succis corporis animalium, cum succo pancreatico, cum bile, cum sanguine recenter extracto, ad observandum, num aliqua fiat effervescentia, & colorum mutatio. Hujusmodi tentamina, quæcumque ea sint, non improbo, sed dico hac in re non paucas contingere hallucinationes; in Stomacho etenim ex succo acido, qui inibi ex naturæ lege hospitatur, & alchali fixo Chinæ Chinæ fit lucta, & exinde novum concretum, quod ad alias partes demissum, diversas habet vires, quod permixtum cum succo pancreatico, cum bile, cum sanguine, quid operetur scit Deus. Quantum in rerum natura possit mixtio, ex nitri, sulphuris, & carbonis permixtione, unde emergit pulveris pyrii tantarum virium compositio, jam satis notum. Sat celebre est illud Aufonii de Muliere moecha, quæ Marito zelotypo toxicum dedit, ac postea ut illius vim geminaret, Argentum vivum porrexit, sed antidotum prioris veneni exhibuit.

(Jam multa &c.) **N**E quis possit ambigere, utrum ipse petar, & an ventiletur Opus meum in hac Dissertatione Critica universa, placuit Cl. illius Auctori in ipsa quoque Specialia experimenta mea, seu potius tentamina quædam, ad explorandam febrifugam virtutem Corticis aliquando instituta, & pag. 23. mei Operis exposita, nonnihil animadvertere. Et licet ex iis me nihil solidi elicuisse sim fassus; imò licet in iis nil improbandum se reperisse quodammodo fateatur Vir ipse Cl. nihilominus aliquid tandem expiscatur, quod carpat, generaliter inquires, *Hac etiam in re non paucas contingere hallucinationes*: quasi fallax fuisset regula investigandi per hæc tentamina virtutem Corticis, quotiescunque etiam per illa phænomenon aliquod speciale, ac novum innotuisset. Sed, bona ejus venia,

hallucinatur ille non parum, ordinem philosophandi experimentalem invertens. Ex actione quidem cujuspiam Remedii quid peculiare agentis extra corpus humanum, haud satis certò potest elici conjectura, quòd idem pariter acturum sit intrà corpus humanum, ob tot aliorum, diversorumque succorum commixtionem, quibus inficitur, ut pag. quoque 335. Tractatus mei minimè sum veritus confiteri. At verò si illud idem Remedium, nempe in casu nostro China China, certò agat quid peculiare intrà corpus humanum; scilicet Fermentum febrile nobis occultum certò corrigat, ut certò corrigit; subinde autem per experimenta extra corpus habita nobis constet (quod tamen nequivit constare) illam succos V. G. insigniter acidos, amaros, aut salsos retundere, eosque omni acrimonia Naturæ modum excedente spo-



liatos, ad dulcedinem quandam reducere; plurima certè probabilitate, ne dicam evidèntia, inferri poterit, tum quod China China humores nostri corporis præter naturam acidos, amaros, aut falsos redditos, vi sua cogat dulcescere, tum maxime quòd ipsum febrile fermentum ab eadem retusum, acidum revera sit, amarum, aut falsum.

Aliud ergo est, quærere per experimenta extra corpus instituta Remedium febrifugum; aliud est, Remedii febrifugi jam reperti quærere vim intrà corpus exercitam, per experimenta illam demonstrantia extra ipsum corpus. Si ex Toxicis, Hydrargyri, & humanæ simul Salivæ permi-

sione, Toxicum ipsum extra corpus humanum dulcescere, suæque acrimonia spoliari, aliquando observare potuisset Mulier Mœcha, ab hujusmodi commistione intrà corpus Mariti Zelotypi dubio procul abstinuisset, aliterque cecinisset Ausonius. Sed & aliter caneret hodie, si Medicos quosdam nosset in usu Chinæ Chinæ parum versatos, qui hoc Febrium *Alexipharmacum* propinato, & Febre depulsa, aliud paulò post *Pharmacum purgans* exhibent, quo Febrem statim revocant, dum arcere contendunt: exclamaret quippe; nec forsitan lepidè minus,

*Et cum Fata volunt, Pharmaca bina nocent.*

#### §. 46.

(a) **E**x permixtione solutionis Vitrioli cum solutione Chinæ Chinæ observavi speciem quandam atramenti, unde suborta mihi suspicio idem fieri in Stomacho ex potione Chinæ Chinæ dum acido permiscetur, sicque fermenti febrilis crasim inverti, ac impotentem fieri ad novos motus febriles excitandos. Neque novum intermittentes febres æstate pervagantes pendere à falsoacido fermento, licet, ut plurimum opinio sit (b) a luxuriante bile progigni. Æstate acida quæque avide appetimus ac utimur, & fructus hujusce naturæ exquirimus, unde Ventriculi acidum tunc temporis abundare non alienum est credere, quamvis enim in principio febrium intermittantium rejici soleat multa bilis, irritamentum prius in Stomacho factum ab acido turgente, vasa cholidoca trahere potest in consensum, veluti fit in nephritica passione; puto ergo Chinam Chinam totam vim suam in Ventriculo exerere, quia video in febre intermittente, alterum paroxysmum, qui expectabatur, omnino sisti, quod certe admirationem facit; in aliis autem locis extra Ventriculum, aut parum, aut nihil operari, seu quia illius virtus sit infracta, seu quia contrarietatem non reperiatur, nam ubi febris (c) primo periodica, postea continua facta fuerit, nihil admirandi observo, quod Chinæ Chinæ, licet larga dosi assumptæ, mereatur adscribi, febris enim ad plures dies perstat & paulatim solvitur.

(a) (Ex permixtione &c.) **E**xperimenta omnia ad Chinæ Chinæ virtutem indagandam tentata, per commistionem illius cum aliis Succis extra humanum corpus, reputat fallacia Cl. Auctor; in *Stomacho etenim*, aiebat ille Paragrapho antecedenti, ex succo acido, qui inibi ex Natura lege hospitatur, & alchali fixo Chinæ Chinæ fit lussa, & exinde novum concretum, quod ad

alias partes demissum diversas habet vires, & permistum cum succo pancreatico, cum bile, cum sanguine, quid operetur scit Deus. Statim tamen in præsentì Paragrapho horum omnium oblitus, suum ille Experimentum, pari penitus modo institutum adducit, solutionem nempe Vitrioli cum solutione (rectius dixisset, cum infusione) Chinæ Chinæ permiscens; suamque indè fidenter deducit hypothesim, qua modò vult, Chi-



*Chinam Chinam totam vim suam exerere*, non amplius in sanguine, ut immediate dixerat, sed in Ventriculo: in aliis autem locis extra ventriculum, aut parum, aut nihil operari. Illi ergo uni datum sit per contrarias undiq; semitas adire Corinthum, & quomodolibet propriam sententiam proferre, ac proprium experimentum. Verum quid proprium illius experimentum dixi, quod ab Ettmullero, Langio, & aliis fuit ille mutuatus; quodque omnibus ex infusione Gallarum, & solutione Vitrioli atramenta conficientibus, ut olim in suis Constitutionibus Epidemicis pag. 121. annotavit Vir ipse Cl., quotidie est obvium? Cum ergo (ut hinc æstimeretur pondus experimentorum illius) cum, inquam, tam ex permissione infusionis Gallarum, Cinnamomi, aliarumque rerum porosarum, colore quadantenus his similium, quam ex permissione infusionis Chinæ Chinæ cum una semper solutione Vitrioli, eadem suboriatur Atramenti species (ut facto experimento observavi) eodem quoque pacto deberet a Gallarum, Cinnamoni &c. pulvere Fermenti febrilis crasis inverti, & impotens reddi ad novos motus febriles excitandos, ut redditur a China China, secundum hypothesein Viri Cl.: quod tamen indè sperare foret ridiculum.

(b) (*A luxuriante bile &c.*) Tertianas Febres Æstate pervagantes a luxuriante bile progigni, opinabatur Paragrapho 16. hujus Dissertationis ipse Cl. Auctor, ut vidimus: modò non illi arridet amplius, quæ tunc placuit opinio; fortasse quia similem quoque me fovere sit suspicatus. Cum enim experimenta mea, pro investiganda Chinæ Chinæ actione quondam instituta, ad trutinam revocasset ille Paragrapho antecedenti, ut ea parvi penderet; ex iisque longè faciliorem deduci ipsius Chinæ Chinæ nexum cum Bile, quam cum Limpha, Salvia, Urina, aliisque diversis fluidis, ut reor, considerasset; aliqua hinc mihi occasio suspicandi, Virum Cl. me propensum saltem putasse ad statuendam pro Intermittentium Causa eandem Bilem, maximè cum pag. 26. Operis mei hæc verba protulerim -- *Quod de Bile, & Oleo constat per experientiam* (sermo ibi est de facili absorptione Chinæ Chinæ intra Bilem, & Oleum observata) *potest fortasse per conjecturam credi de Fermento febrili: sive ad illud constituendum Bilis concurrat, sive aliud Fluidum oleosa forsitan nature particeps*, Sed facile poterat cer-

tior fieri, me nusquam determinatè adstruxisse Bilem, ut Causam Intermittentium, si animadvertisset ferè ibidem hæc alia verba, pag. 24. ejusdem Tractatus exarata -- *Parum refert observare quid China China operetur intra Bilem qualemcunque, cum nos lateat quinam sit, vel esse possit, ad Causam Intermittentium constituendam Bilis concursus.*

Multò magis id poterat ille dignoscere, si Conjecturas meas omnes de Intermittentium Causis, toto ferme Cap. 6., nec non etiam 8. Libri primi prolatas, & pro imperfectis a me ipso habitas, legere non renuisset; ubi nempe me in generalibus tantum quibusdam Theorematis firmum, in peculiaribus summè hæsitantem deprehendisset. Et jure quidem merito: quemadmodum enim in meo Tractatu, anno 1712. publici juris facto, occultam planè protuli ad ea usque tempora veram, & germanam Intermittentium Causam; ita minimè verebor fateri, idem contigisse in hanc usque diem; æquè conscius, Naturam ulli nondum Medicorum liberaliorem, sed æquè avaram ac antea se præbuisse, in pandendo hujusmodi arcano. Tantum abest, ut Bilem luxuriantem, aliumve liquorem determinatè humani corporis (quamquam eorum aliquem certè peccare necesse sit) hujusmodi criminis reum audeam proferre. In re tam obscura sat sit suspensiones nonnullas in eodem Tractatu cunctanter olim enunciasse locis nuper citatis.

Non est igitur cur mihi obtrudat Vir Cl., *Intermittentes æstivas pendere a Salso acido Fermento, non a luxuriante bile*, atque (ut in contextu) *Chinam Chinam totam vim suam in ventriculo exerere*; siquidem revera hanc litem mecum agere satagat: mihi enim abundè sufficit, quòd eadem China China Fermentum febrile pessundet, sive acidum dicatur illud, sive salsum, sive amarum, sive alius saporis, aut indolis. Quòd verò Febrifugi actio, incipiendo a Ventriculo, non prætergrediatur secundas Chyli vias; & quòd sanguis (quem in Intermittentibus merè passivè se habere centies dixi) nullam probabiliter judicio meo sensibilem alterationem patiatur ab eodem Febrifugo, jam literis cubitalibus scripsi in ipsa Therapeutice mea iisdem pariter citatis Cap. 6. & 8. Libri primi. Sed quid, si ad componendam litem, quam mihi, non eo, quo forsitan censuit, modo, de hisce revera sentienti, vide-



videtur indicare Vir Cl., opinionem Eru-  
ditissimi D. Zendrini quispiam in medium  
adduceret? Cum enim Professor iste pro  
Intermittentium Causa Bilem adstruat,  
sed Acidam redditam, & in Duodeno præ-  
fertim Intestino suæ dyscrasiæ vires in  
Chyli damna exercentem; jam ferè cessa-  
re deberent Cl. Ramazzini querimoniam  
contra eandem Bilem; quatenus in hujus-  
modi Hypothesi Causa februm, & acida  
esset, quamvis constituta in ipsa bile, &  
vix infra Ventriculum (quod illi displicere  
nequit) sedem haberet.

Scio equidem fore, si viveret Vir Cl.,  
ut D. Zendrini sententiam de Februm  
Intermittentium ortu, & circuitu mini-  
mè admitteret, saltem ut proficiscentem  
a Viro docto quidem, sed qui de præstan-  
tia, actione, dosi, & usu Chinæ Chinæ  
post me nuperrimè scribens, innumera  
protulit, tum Theorica, tum Practica,  
Operi meo, sensibusve meis in eodem ex-  
positis planè conformia; adeoque Scripto-  
re sibi suspecto: posset nihilominus illum  
a partium quarumlibet studiis immunem  
ex hoc saltem agnoscere, quod in non-  
nullis aliis, nec parvi quidem ponderis,  
pari a me facilitate discreparit; licet con-  
sensus, æque ac dissensus sui, prout li-  
berum Philosophum decet, nullam omni-  
no rationem habuerit, aut scrupulosam  
solicitudinem. Quod verò in tot aliis me-  
cum coincadat pro tutela, & administra-  
tione Febrifugi optimi; id ejusdem Reme-  
dii præstantiæ adscribendum omnibus Pro-  
fessoribus notæ, non literariæ amicitiae  
nexui inter nos exinde suborto.

Seposita itaque illius auctoritate Claris-  
simo fortasse Ramazzino suspecta, sepo-  
namus quoque omnem considerationem de  
quovis concursu Bilis ad Febres Intermit-  
tentes, & de quacunque illius dyscrasia,  
& motu, tam fermentativo, quam pro-  
gressivo &c.; quem progressivum laudatus  
D. Zendrinus Circularem statuit, Vena-  
rum Meseraicarum ope, fretus experien-  
tia Reverhorst, aliorumque nonnullorum  
Anatomicorum, præeunte Borelli ratio-  
cinantis conjectura. Eos tamen (ut hoc  
obiter innuam, unde aliquando speranda  
solutio non contemnendi Problematis) eos  
inquam rejecit in sua Historia Hepatica  
anno 1711. edita accuratissimus Anatomicus,  
idem pariter & Amicus D. Jo: Ba-  
ptista Bianchi Part. 1. Cap. 11 §. 11. pag.  
52. his verbis -- *Multa minus per venas  
meseraicas refugitur biliosus hic humor, ut*

*inde per eas in Portam derivatus, hinc per  
Hepar rursus in Ductum excretorium, &  
Intestina confluent, Circulationem habeat  
& suam per viscera Abdominis, amulam ex-  
posita salivaria circulationi per viscera, &  
sanguinem; quantum ferunt Modernorum  
aliquorum insomnia (& hic asterisco no-  
tat in margine Jo: Alphonsum Borellum,  
Nuck, & Reverhorst) Nam præterquam-  
quod in Intestinorum cavitatem non hiant  
Meseraica; nil contra Circuitus leges, &  
animalem Machinam deformius excogitari  
potest bilioso hoc motu circulari; ut vel Me-  
dicina initiatis patet. Hæc citatus D. Bian-  
chi. Amicus ille mihi; Amicus D. Zen-  
drinus; nec dubito, quin utrique, non  
minus quam mihi, amica futura sit Veri-  
tas, quotiescunque eorum alterutri obtin-  
gat, illam e tenui, qua etiamnum obvol-  
vitur, caligine, educere. His ergo dimis-  
sis omnibus, mihi potius esset e re, Hy-  
pothesim ipsam Cl. Ramazzini de salso-  
acido Fermento febrili propius examina-  
re. Eam nihilominus in pluribus quidem  
fortasse non contemnendam, sed quæ suos  
in plurimis aliis patitur Manes, ego hic  
in obsequium Defuncti minimè vellicabo;  
ne videar, ut ab exordio jam dixi, velle  
me luctari cum Larvis.*

Id unum rursus disquiram, si liceat;  
quo nempe jure dicatur hic China China  
corrigere Fermentum acidum, aut salso-  
acidum, tanquam Causam Intermen-  
tium Februm, cum ex adverso §. 14. di-  
ctum fuerit a Viro Cl., *humorem atrabi-  
larem, seu melancholicum* (qui dubio pro-  
cul statuitur acidus ab admittentibus hæc,  
& similia Veterum commenta) *non auscul-  
tare huic Febrifugo.* Quod si verè China  
China agat in Febres Intermittentes, eas-  
que depellat, in quantum Fermenti febrilis  
salso-acidi morbosam crasim invertit, &  
ad novos motus febriles excitandos impotentem  
reddit, totamque vim suam exerit intra ven-  
triculum (quem nullo pacto irritat, aut  
lædit, sed præ amore suo potius robo-  
rat) parum verò, aut nihil operatur in aliis  
locis extra ventriculum, ut modò conjicit  
Vir idem Cl., profectò nescio, quo pa-  
cto ea per modum operandi tam blandum,  
tamque tutum, cujusmodi est simplex im-  
mutatio Crasis Fermenti febrilis ventricu-  
lo inexistentis, possit de tot noxis alibi  
recensitis suspecta reddi, ac dici *sanguinem  
figere, viscerumque Obstructiones, &  
Cachexias* inducere; cum ad loca extra  
Ventriculum sita non extendatur, ex ejus-  
dem



dem Viri Cl. effato, illius activitas.

(c) (*Primò Periodica, postea Continua &c.*) Quotiescunque Febris primò Intermittens, mox Continua *recenter* facta (de illa enim, quæ continuitatem essentialem adeptam jam sit, mihi sermo non est) quotiescunque, inquam, Febris hujusmodi post assumptam dosim congruam Chinæ Chinæ, *ad plures adhuc dies perstet, & tantum paulatim solvatur*; ultrò concedo, nec quicquam admirandi contingere in curatione illius hoc pacto peracta, nec Chinam Chinam mereri, ut illi adscribatur sanationis gloria, tanquam iners, & effecta ea fuerit; quemadmodum pluries protuli in Tractatu meo, videlicet pag. 276. 297., 313 & 314. Ast in hisce Febribus, *continue* quidem (ut nuper agebat ex Sylvio Cl. Simonius) Ægrum vexantibus, sed non ideo verè *Continuis*; in quibus nempe viget adhuc primæva Intermittentium conditio, ipsumque adhuc prævalet Periodicarum speciale Fermentum, etsi paroxysmorum confusio veram continuitatem simulet; in hisce inquam Febribus, sive mortem proximam, ratione cujusdam adjuncti perniciosi Symptomatis, sive acutam, malignamque metamorphosin, hinc & mortem quoque, seriusculè saltem, minitantibus, exhibito, ut decet pro varia casuum exigentia, Peruviano Cortice, non *paulatim*, sed *illico*, nempe intrà bidduum, aut triduum succedit salus, æquè ac fit in veris Intermittentibus, ut latè dixi in responsione ad §. 33. lit. c.

Id autem evenit (ut me rursus nonnihil explicem) quia in istiusmodi febribus per accidens tantum, hoc est per productiones, aut intempestivas renovationes, & communicationes paroxysmorum *Continuis* redditis, non fermentum quoddam sanguini *ingenitum*, quod Cortici refractarium est, peccat, ut in *Continuis* ab origine talibus; sed illud tantummodo, quod eidem

sanguini per crebras, & repetitas vices aliunde accedit, nec tamen qualibet vice integrè absumitur, sed secundum quasdam sui portiones haudquaquam subactas paulatim in ipso cruore conturbinales agit radices, minimè tamen indigenas; unde assidua, sed præter ordinem incidens, febrium protractio. Hujusmodi idcirco radices nondum firmæ, sive istæ fermenti *extranei* reliquæ sensim aggestæ, haud difficulter evelluntur ope Corticis, etsi fortasse in illas non immediatè amplius agat ipsemet Cortex, sed solum mediatè, quatenus nempe suppetias, unde alimentum trahunt, & quo per interceptionem paroxysmorum sublato arescunt illæ, omnino prohibet, arcet, ac destruit: adeoque consecutione quadam ipsam febrium etiam exitialium *fortuitam* continuitatem quàm citò, ac planè admirabiliter delet, ut fusè, satisque, ut reor, dilucidè explicare hæc omnia conatus sum pluribus in locis Therapeut. meæ, præsertim Cap. 6. & 8. Lib. 1. Cap. 3. Lib. 5., & alibi.

Quod si miranda hæc non observavit Cl. Auctor; neque mirum mihi, ea non fuisse illi observata: si enim in saniori ætate nullo pacto in Febribus quamcunque continuitatem adeptis, exhibuit unquam Peruvianum Corticem; in juvenili verò nondum mos invaluerat, præsertim apud nos, uti Febrifugo hujusmodi, aut hisce *casibus*, aut hisce *modis*; quandonam quæso potuit ille quicquam *admirandi* observare in hac materia? Si tamen non observavit, aut se observasse non meminit, ne in Curationibus quidem eo mihi socio absolutis; id saltem facile poterat in Historiis meis observare, toto ferme Libro quarto descriptis, ipsosque restitutos Ægrotantes etiamnum bene valentes interrogando prohibito, de *citissima* illorum post assumptionem Corticis sanitate acquisita, ore ipso tenus certior fieri.

### §. 47.

**D**Um hæc ad Te scriberem, (a) allata est mihi Epistola, quæ funestum casum Comitum Torricini, Serenissimi Ducis Guastallæ Ministri, referebat. Vir iste parva febre laborare coepit, ut vix annotationem sensibilem haberet; modico Cassiæ à Medico familiari purgatus est, ac alterantibus ad universalem purgationem disponebatur. Medicus alter majoris autoritatis accessit, qui Chinam Chinam proposuit, ut ægrum ad solitum ministerium, quàm primum remitteret, reposuit



reposuit alter sibi non satis tutum videri impurgato Corpore hanc febrem velle abolere, sed prævaluit consilium, quod citam sanationem pollicebatur. Exhibita China China, modo in tota substantia, modo in vino infusa, sed parum fausto successu, augebatur enim febris in dies, facta manifeste continua, sed die 20. nequitiam suam aperte prodidit, vocati illico è vicinis regionibus alii Medici, sed Vir ille inter Medicorum controversias misere oppetiit. Casus huiusmodi, hic & illic identidem occurrentes, (b) sive ob remedii improprium usum, sive ob ejusdem occultam malitiam, in causa sunt, ut Peruvianus Cortex à Doctis Scriptoribus, veluti (c) *Voil-lisio*, *Etmullero*, titulis parum honorificis vocitetur.

(a) (*Allata est mihi &c.*) **U**T Mutinam corrigat Cl. noster Auctor, Guastallam plectit; parcitque nemini, ne parcat Cortici. Mihi quoque allata fuit haud absimilis Epistola, funestum videlicet eundem eventum apportans, data sub die 17. Novembris anni 1713., octo nempe vix elapsis diebus ab obitu Nob. illius Viri. Annexa insuper aderat historia Morbi, quotidianum tum Febris, tum Curæ progressum describens, & quatuor Assidentium Medicorum nomine firmata: quæ quidem in pluribus non exigui ponderis circumstantiis discrepat a narratione summaria Viri Cl. . Meum non est hic inquirere (mihi etenim, etsi super hac ipsa re expressè requisito, semper a munere Judicis abstinendum duxi) meum, inquam, non est inquirere solerti indagine intimam naturam, aut speciem illius Febris, neque accidentia omnia eam concomitantia, quæ oblationi Corticis ansam, ut reor, rationalem præbuere. Huiusmodi enim examine minimè prævio, culpa semper vacare dixerim Corticem etiam inutiliter oblatum; quin & præscribentes Medicos, qui auxilium suapte natura tutum, quamvis incassum (ut persæpe aliis remediis adhibitis fieri solet) rationabiliter tamen tentavere, præeunte Mortono, aliisque Scriptoribus, præsertim in circumstantiis prævisi forsan exitus, cæteroqui etiam funesti: qua de re Apologeticam propediem edendam esse ab iisdem curantibus Medicis, vel eorum saltem nonnullis, Responsionem ad hæc ipsa Cl. Ramazzini objecta, haud obscure subaudio. Quæ cum ita sint, neque non admirari in Cl. Auctore rem confidentiæ, & animositatis plenam, dum ipsum tam lubricè, tamque præcipiti lapsu irruere intueor in damnatorium illud iudicium

suum adversus Viros illos egregios curatione functos, quos apertæ redarguere videtur imperitiæ, aut ignorantie: quasi ex ipsa Corticis oblatione mors Ægrotantis emerferit; nempe, *vel ob remedii*, ut subdit in contextu, *improprium usum*: en imperitia Praxeos; *vel ob occultam ejusdem malitiam*: en ignorantia Botanices; vi cujus eos fefellit *occulta malitia* Peruviana Plantæ, Cl. Auctori, quippe doctiori apprimè nota.

At (bone Deus!) culpari equidem quandoque solet de morte Ægrotantium, etsi sæpius etiam immeritò, Remedium aliquod ex se tumultuosum, & magnum, videlicet in corpora nostra sensibiliter, ac fortiter agens. V. G. Purgatio, aut Venæ sectio, tunc cum Æger, cæteroqui haud multum graviter habens, statim a Purgatione, aut Venæ sectione ruit in præceps, ac moritur. Sed cum ab assumpto remedio nullam molestiam, auturbationem sensibilem inferente, morbus stadium suum ad plures, & plures dies pro more absolvit, donec Ægrum sensim tabescentem conficiat, ut in casu, de quo agitur; magna profectò confidentia est asserere, ejusmodi remedii culpa Ægrum periisse: quasi, ut aiebam in Therapeutice mea, idem sit mori post assumptum, imò longè post assumptum, ac propter assumptum remedium.

Cœpit autem hic offerri China China in substantia ad drachmam tantum nona morbi die; cum scilicet Febris jam sensibiliter ingravescebat, adeo ut verrentur Medici, ne oneri diutius ferendo par esset Ægrotus; imposuitque terminum remedio in substantia oblato dies duodecima. Substituta equidem fuit die 13. tinctura ejusdem Chinæ Chinæ; sed & hæc statim omissa. Interim circa undecima Febris



bris mitescere visa fuerat, apparentibus in urina coctionis signis; itaut in fine duodecimæ Medicus novissimè superaccitus Ægrum a Febre immunem asseruerit. Subinde tamen sensim recruduit morbus, qui vigesima tandem die Patientem gravi senio, laboribusque confectum sustulit.

Hæc omnia me docuit recensita curantium Medicorum *omnium* Relatio. Cur igitur lentus, ac serior Ægrotantis interitus Cortici imputatur antea exhibitio, cum eidem Cortici recenter oblato non adscribatur unquam, me quoque consentiente, lenta, seriorque sanatio? Cur illi potius hæc culpa tribuitur, quam Mannæ (fuit enim *Manna* oblata, non *Cassia*) vel sanguinis missioni, aut omissioni illius, quoniam de hoc præsidio Narratio silet, vel Confectionibus, aut Elixiribus calidioribus, vel Bezoartico Lapidi, vel Vino, vel Aquæ, quorum utrumque controvertatur, vel aliis omnibus, quæ usui fuere, infontibus quidem, ut reor, singulis; sed jure potiori a rigido quopiam Censore culpabilibus? Memini me dixisse alias, Corticem Peruvianum tunc solum forsan obesse posse, cum suas exerit vires, & Febrem sistit, sed *depuratricem*; quam nempe satius esset protrahi diutius. At cum Febrem nequit sistere, ut nequivit hoc casu, cur eam dicamus deteriorem fecisse? Anne meliorem fecisset, quæ Chinæ Chinæ in augmento morbi, absentibus coctionis signis, & tendente ad urinæ vias excretorum motu, præferebatur, aut illi præmittenda proponebatur nova purgatio? Minimè gentium certè. Cortex ergo nec Febrem, nec Ægrum sustulit. Si Febrem fugasset, Cl. Auctor *illam optasset rursus, sed fortiolem, remedii loco*. Non fugavit, nec prohibuit, quin paulò post fortior fieret. Voti ergo compos abundè factus, quid Cortici irascitur, qui & Cardiacis, & Bezoarticis, & Febrifugis Veterum, & Febri ipsi medicatrici locum, an tempus de more ad curationem sufficiens concessit, forsan & impetravit?

Hæc contingere dum scriberet Vir Clarissimus: dum autem ipse hæc rescriberem; imò potius dum anceps adhuc hærerem, au scripta hæc ante spatium trimestre jam condita promulgarem, *allata est mihi Epistola*, quæ casum, nedum periculosum, sed & præcipitem D. Augustini Tomasii, Plebis Massæ Finalensis Archipresbyteri referebat. Vir iste die 21,

Junii 1715. Tertianæ Febre laborare cœpit, quæ primo accessu *vix sensibilem frigoris annotationem habuit*, eademque penitus caruit accessibus subsequenter. Tertio paroxysmo brevem, quam antea præferulerat, apyrexiam amisit, continua duplex jam reddita, cum anxietate, & inquietudine maxima, siti inextinguibili, lingua scabra, urina crocea, crassa, pauca, & lixiviali; usque tamen periodum servans, exacerbationemque, ac remissionem, quantumvis obscurissimam. Admonitus ego, ut supra, per literas D. Morandi Medici curantis de periculo Decumbentis Viri mihi conjunctissimi, illuc confestim transfero die 29. ejusdem mensis, hora ipsa invadentis, seu potius recrudescentis quinti paroxysmi.

Tam gravis fuit hujusmodi exacerbatio, ut indè vita Ægrotantis in manifestum discrimen fuerit adducta: siquidem præter Symptomata prænarrata supervenit sudor circa brachia, collum, & frontem subfrigidus, copiosus, viresque summè deiciens, qui licet ad femora tandem nonnihil pertingeret; nihilominus Febrem quàm minimùm levabat. Pulsus tunc temporis parvus factus est, & inæqualis, respiratio anhelosa, urina ferme nulla, subortusque tandem Singultus. Priusquam tamen is patenter se proderet, quod mox contigit Corticis Peruviani drachmas tres ex Aqua Card. b. potandas exhibui hora quinta pomeridiana. Sex horis elapsis, mictio copia insignis, colore verò, & consistentia laudabilis subsecuta est; quod animum addidit ad duas iterum drachmas ejusdem Corticis statim ex Vino tenuiore offerendas, hora nempe noctis tertia. Mane hora undecima, nova drachma oblata est pariter ex Vino tenui, & hora vigesima, alia iterum drachma: tandemque, post administratum Eucharisticum Sacramentum, consimilis alia mane diluculo sequenti die, quæ majoris afflictionis dies esse debuerat. Sed dum in usum duceretur remedium, res omnes horridam, quam præsetulerant, faciem adedò insigniter mutavere, ut intra triduum, ea scilicet ipsa die, qua id futurum prædixeram, Febris abierit, critica simul erumpente urinæ copia. Repetitum est nihilominus, post biduum vacationis omnimodæ, idem Febrifugum ad præcautionem, seu (si dicere liceat sine Cl. Auctoris stomacho) ad *prophylaxim*, quandoquidem omnis jam Febris evanuerat; primò quidem ad drachmas duas, die



die tertia Julii; postmodum ad drachmam tantum, duobus subsequentibus diebus: tandemque, interjecto octo dierum spatio, rursus oblatum est Remedium ad drachmas duas die 15. ejusdem mensis, deinde ad Semidrachmam per quatuor dies successivos. Atque ita consumptis trium hebdomadarum curriculo unciis duabus Chinæ Chinæ, Ager, tum statim ab omni Febre liberatus est, tum paulatim ab omni relapsu præservatus.

Cuncta hæc testari possunt Viri Docti, & ingenui Finalenses Medici, D. nempe Morandus curans, & D. Manfredus, qui pro sua humanitate me ibidem invisit officii causa, ipsumque Aegrotantem gravissimè habentem, socio sibi adjuncto D. Ignatio de Grossis, Viro nedum literato, & pluribus nominibus spectabili; sed & Medicinæ Theoricæ, ac Practicæ haud parum gnaro. An Scriptis Cl. Ramazzini circa historiam Comitissæ Torricini calculum facillè sint addituri unanimes Guastallenses Medici, ut mea circa hunc Casum asserta promptè roboraturi sunt, si res exigat, Finalenses; non longa, ut reor, dies ostendet.

(b) (*Sive ob remedium &c.*) Hic pedetentim quæso. Duplex hæc fovea, -- *Sive ob remedium improprium usum, sive ob ejusdem occultam malitiam*, - eo non est, ut uno saltu queat tam facillè transigi: distant enim non parum hæc duo ab invicem. Oportet ergo omnino distinguere inter *malum usum, & malam occultè naturam*. Primum, quod ex præscribentis imperitia procedit, conceditur obesse posse; debitis tamen additis limitationibus, ut pluries effatus sum. Secundum gratis omnino, etsi dubitativè, hic prolatum, minimè admittitur: nec nisi cum aliquo propriæ existimationis, ac ingenuitatis detrimento, potest quicquam viriliter asserere, quod clam, & occultè noceat id, quod evidenter, etiam quandoque cum minùs appositè usurpatur, prodest. Innocentiam intrinsicam Chinæ Chinæ satis me probasse puto toto ferme Libro primo Therapeutices meæ. Sed & post eam editam sanctè testari possum, me in nonnullis casibus planè incurabilibus Morborum quorundam, non febrilium quidem; sed periodo nihilominus aliqua recurrentium, aut recrudescentium, præsertim de genere convulsivo, experiundi causa quod a pluribus Classicis Auctoribus suadetur (etsi mihi minùs credulo minùs pariter probaretur) præ-

scripsisse Corticem Peruvianum ad plures dies quotidie, modò ad drachmas duas, modò ad sesquidrachmam, modò ad drachmam, aut semidrachmam; ita ut tractu temporis modici, puta duarum hebdomadarum, consumptæ fuerint uncia duæ, aut tres ejusdem Corticis; nihilque incommodi, aut damni Aegrotantes hujusmodi fuisse passios, etsi fuerint imbecilles, consumpti, & ad marasimum usque perducti: imò potius eorum nonnullos, non omnes, insignem, & immediatam opem reportasse præter ipsam expectationem meam. Et quamvis, fateor, haud diuturnum fuerit levamen istiusmodi, cæteroqui conspicuum; deinceps tamen longè levior, & tolerabilior evasit consueta morbi recrudescencia: eaque ipsa, cum recurreret, novo semper usu Corticis mitescebat.

Quid simile pluries contigit D. Comitissæ Barbara de Stofis, cujus infrequentem æquè ac diuturnam ægitudinem hic pertransennam innuere, haud inopportunum crediderim. Laboravit hæc ad duos annos, necdum tamen laborare desit peculiari quodam convulsivo Asthmate, cujus paroxysmus statis horis quotidie a prandio recurrebat, per octo circiter horas ferociter perseverans, cum ferina, siccaque tussi, interceptione loquelæ omnimoda, contractis digitis, convulsis oculis, tenuique, brevi, ac interciso ducto, erecta licet perpetuè cervice, difficulter spiritu. In vigore paroxysmi attonita, & ferme immobilis evadebat; post ejusdem paroxysmi solutionem qualemcunque actorum circa eam immemor, quippe omni ferè sensu tunc destituta. Macilenta proinde reddita erat insigniter (præter morem obesi cæteroqui plurimum habitus sui) quò ad partes omnes supra abdomen, cum articulorum dolore, ac duritie, imò & ossium pectoris nonnullorum distorsione inæquali; tumida æquè insigniter, ut assolent leucophlegmatia affecti, quò ad inferiores. A solo ferme usu Corticis admodum liberali, cum ampliùs par non esse ferendis paroxysmis, in ipso mortis agone illam constituisse sæpè visis, auxilium præsentaneum incantamenti ad instar, ut Galenus loqui consueverat, retulit ea non semel. Redibat tamen, sed admodum mitior, post modicum temporis morbus, irrita remedii repetitione, a cujus usu propterea, cessante sensim insimul occasione, congruo parto aliis quoque remediis loco, jamdudum



dum cessavit, eo usura tantum in majoribus, si fortè redirent, angustiis. Nunc temporis, in statu licet valetudinario versetur jugiter, atque nonnihil ægrius sit illi ad vespèras quò ad tussim, & quò ad spirandi modum, nec nisi elata cervice queat decumbere in lecto, & quidem ad aliquot tantum horas; illam tamen, quantumvis adhuc excarnem, sed in artibus pariter inferioribus talem, nec amplius tumidam, revixisse dicunt quotquot laborantem videre: quod & ipsa latè fatetur testaturque cunctis domi, & non rarò extra, matutino tamen tempore, ac festo quoquè die, illam invisentibus. Sic citrà omnem noxam, imò non citrà levamen evidens in circumstantiis adèdò difficilibus liberaliter usurpatus est Cortex: ut fileam exuberantem hujusce remedii consumptionem, quam in nonnullis Europæ Provinciis fieri notum est absque eo quòd ulla, quòd sciamus, reclamet insignis, quæque famam excitet adversam, experientia.

Et ne longè ab hac Urbe recedam, recens aliud hic prostat exemplum in Sene jam ferme nonagenario, D. Sebastiano de Gherardis, qui ante biennium Quartana Febre correptus, epoto Peruviano Cortice, brevi, & facilè sanatus est. Admiratus ille hujusmodi Pharmacothèon, sponte sua deinceps, & absque Medici præscripto, identidem cœpit idem remedium assumere: quo in hanc usque diem (parum abest, quin assidue) usus, & in posterum constanter, ut asserit, semper usus, firmiorem sibi suadet se comparasse, & posthac comparaturum valetudinem. Tantum abest, ut noxam ullam ex *occulta*, quam metuit Vir Cl. illius *malitia* persentiat. Noxa igitur omnis, quæ huic Febrifugo possit attribui, sola erit Februm *immatura* suppressio; quasi ideo nunquam supprimendas velit, nisi cum periculum, ne anceps quidem, sed certum, & inevitabile imminet, parum refert: neque enim quicquam plus a Medico exegerim ex debito officii sui, etsi quid amplius consulam ex abundanti cautela.

Hujusmodi ergo est, quam hucusque sum persecutus, & quæ toties obiicitur Peruviani Corticis *malitia occulta*, & *perniciosa noxa*. Sed abigatur tandem musca hæc importuna,

*Quæ quamvis de pelle Viri sit sæpe repulsa:*

*Assultat morsura tamen, ———*  
ut cecinit Homerus; turpisque demum

hæc, & malitiam habens minimè occultam loquor de malitia physica, nempe de falsitate, non de morali) diluatur obiectio, paritate ineluctabili adducta; sitque judicium apud ipsos Peruviani Corticis Obtrectatores. Eja, sit hoc Febrifugum, vel possit esse *noxium*, tum ob *improprium usum*, tum ob *occultam simul malitiam*, credaturque illi inesse hæc ipsa malitia, & hæc noxa, quæ nobis occulta est, cum verè nulla sit, solisque forsan appareat Adversantibus. Quid inde? Illam certè non semper exerit; mille enim saltem homines in una hac Urbe, quæ Criticæ hujus Dissertationis subjectum est, & ubi a duodecim annis præsertim, Deo dante, perfectissima, & inculpata viget universalis salubritas; mille inquam ad minùs homines in una hac Urbe videre est, ex variis Febris periodicis, a variis itidem Medicis una China China curatos, modò a duobus, modò a septem, modò a quindecim, modò a viginti retrò annis; & quidem diversi inter se se temperamenti, ætatis, & sexus, omnes verò etiamnum penitus incolumes; pluresque etiam illorum ab ea curatione nullo amplius morbo tentatos: argumento satis firmo, & cuicumque socium interroganti facile obvio, quòd remedium istud sæpe sæpius *occultam*, quam dicitur habere, *malitiam*, non exerit; imò quòd illam (datis etiam variis probationibus ex adverso allatis) exerit rarissimè, si a septem lustris in hanc usque diem Cl. Ramazzinus, omnia callens hujusce Civitatis in hac materia, vix sex, aut septem fallacissimos Casus, minùs, ut autumat, felices, novit colligere, aut expiscari; sed ea sorte, qua quis Anguillas prehenfas sibi a manibus præ lubricitate elabi mox videt. Ergo, infero (etsi paritas hæc sit prorsus injuria Chinæ Chinæ longè magis infanti) infero inquam: ergo ad summum noxia est China China, & ob *improprium usum*, & ob *occultam malitiam*, solummodo ut noxia sunt, & propter *improprium usum*, & propter *malitiam occultam*, seu *maius patientem*, inter Chirurgica quidem Remedia *Vena sectio*, inter Pharmaceutica verò *Purgatio*; imò & præter hæc, *Narcotica* omnia, *Diaphoretica* verè talia &c. ut & inter extrinsecus apposita, *Vesicantia*, *Caustica* &c. Ecquis enim tam perfricatæ frontis erit uspiam Professor Medicus, qui hæc audeat inficiari, & Chinam Chinam hisce remediis magis suspectam, aut periculosam asserere?



Si liceret subducere calculum Ægrotantium omnium, quibus obfuit Venæ sectio, & Purgatio, remedia adeo decantata, sed in Morbis quibusdam, præsertim Acutis, adeo controversa, puta in Variolis, in Febribus Peticularibus, & tot aliis, ubi agitur immediatè de Corio humano; præponderaretne, quæso, ratione inita, illorum clades, quos Chirurgi Phlebotomoni, vel Crater Pharmacopolæ, vel etiam obductus auro soporifer Bolus de medio sustulere; an eorum, quos China China iniquè dicitur interemisse? Certè pauci occumbunt, quibus ægrotantibus præscripta non fuerit Venæ sectio, aut Purgatio, quamvis sæpissimè non ob id verè obierint; nonnunquam tamen ob id ipsum quoque. Paucos verò ex iis interire observamus, quibus China China exhibetur; nec unquam profectò ob eam assumptam. Patet hoc satis ex Therapeutice mea, in qua candidè eorum historias exposui, qui toto Vitæ meæ decursu indifficillimis jam, gravissimisque circumstantiis positi, eoque remedio, frustra illud me præscribente, tractati obiere, cum contra mille subticuerim feliciter eodem sanatos in circumstantiis facilibus: patetque adhuc magis ex Dissertatione ipsius Cl. Ramazzini, tot propitiis casibus a me allatis nil in ea valentis reponere; res enim ipsa loquitur: tam paucos verò, quodque magis refert, tam vanos adversi exitus opponentis. Cur ergo uni Cortici imputabitur mors paucorum gravissimè certè jam habentium; non ita verò Phlebotomiæ, Purgationi, aut Narcosi mors innumerorum sæpe non tam graviter affectorum? Sed infaustos eventus, quos peperit *Phlebotomia*, aut *Purgatio*, propter assuetudinem *sinè rumore terra obtegit*.

Anne verò, ob fortuitos hujusmodi funestos casus, contra Cathartica, Venæ sectionem, Opium &c. Invektivæ acerbiores erunt ejaculandæ, quàm contra Pisonem, Verrem, aut Catilinam vibrarit Cicero? Et tamen non longè ab similes in hac Dissertatione vibrantur contra Corticem Peruvianum; qui nihilominus (etiamsi tractu temporis illum nocere posse pertinaciter quispiam contendat) prodest certè statim ac usurpatur: cum ex adverso Phlebotomia, & Purgatio, quæ ex Cl. Auctore *humani corporis machinam infirmant potius quàm confirmant*, statim certò debilitent; sitque in ancipiti semper, an in posterum sint profuturæ. Quocunque

ergo modo noxia dicatur, aut suspecta China China; cum tamen semper minùs noxia, & suspecta illa sit, aut saltem non magis, quàm Purgatio, & Venæ sectio; sitque ea sæpiùs, atque etiam magis, quàm Purgatio, & Venæ sectio proficua (Febres enim quamplurimas perniciosas sæpissime sanat, quas minimè novit sanare Catharsis, aut phlebotomia) eadem saltem fiducia, imò longè majore, debet illa in usum posse revocari, ac revocantur quotidie, secundum rationem quidem, atque ut plurimum citra dissidium, celeberrima illa duo, & alia quævis methodica Artis præsidia.

(c) (*Villisi, Ettmullero &c.*) Quàm decenter, quàm candidè virtutem febrifugam, utilitatemque Peruviani Corticis a septem jam lustris fassus sit Ettmullerus pluribus in locis (pro ratione saltem eorum temporum, & proprii usus non adhuc planè completi) vidimus nuper §. 35. Cunctatio illius alicubi nonnulla; tum ob suspicionem *intempestivæ* oblationis, ac præcisè eò quia minùs tutò offeratur remedium *invadente*, quàm *recedente* Accessione; tum ob metum recursus Februm, ignorata posteriorum temporum methodo tunc verè frequentioris: condonanda penitus Ætati, Tempori, Regioni, & Consuetudini haud satis liberaliter introductæ.

Quàm verò favorabiliter de eodem Cortice Villisius scripserit, etsi ante annos abhinc quadraginta desierit vivere, non est cur per extensum referam; cum non paucos illius textus, ab Erasmo Bartholino, & Theophilo Boneto §. 43. lit. f. in laudem ejusdem Corticis citatos, nuper viderimus. Revera nullus forsan Scriptor primis illis temporibus æquiùs sensit de hujusmodi Febrifugo, quàm Thomas Villis, unicum tantummodo Februm reditum, quem nondum inhibere quis norat, hic illic obtrudens. Interim tamen apertis notis testatur Lib. 6. de Febribus, illud esse *unicum adhuc repertum Febris Quartanæ alexiterion*; quod nimirum ipsius, *aliarumque Intermittentium paroxysmos, saltem pro tempore, inhibet &c. quod fere in omnibus paroxysmos tollit &c. ita ut vix unus e centum hoc remedium incassum tentavit &c. quod non tantum in Febre Quartana, verum in aliis Intermittentium Speciebus, quibuscunque nimirum apyrexia quadam intercedit, cum fructu adhibetur &c.*, quod in quibusdam valdem imbecillis, & lecto affixis *sinè*



*finè praviâ pharmacîa solitariè sumptum effectus laudabiles procuravit &c. quo denique usi non pauci Quartana laborantes, alacres, & vividi ad negotia quævis expediti degebant, cum secus enerves, & pallidi in languorem, & vitiosum corporis habitum redigerentur: in quem vitiosum corporis habitum hodie redigi eos autumat noster Auctor, qui hoc Febrifugo in iisdem Quartanis utuntur. Quod si ergo, ut aiebam paulò ante, tum Villisius, tum Ettmullerus de Febrium recurso perpetuò suspicantes, hujusmodi nihilominus curatio-*

*nem, tunc temporis veluti palliativam ab ipsis creditam, non modò non respuebant, sed admittebant libenter, & laudibus prosequiebantur, ubi tantum morbi diuturnitas, fractæ vires, appetitus dejectus, & id genus alia idipsum suassent; quantò libentiùs hodie, si essent in vivis, ipsius Febrifugi usum feliciorè admitterent ad Febres, tum Intermittentes, tum Subcontinuas, vel Malignantes, vel jam Malignas, & perniciales, nullaue alia tandem arte, aliove remedio sanabiles?*

## §. 48.

(a) **S**ed ex his, quæ hætenus de Peruviano Cortice diximus, nolum quis inferat, velle me ex albo Medicaminum Chinam Chinam expungere; absit hoc, habeat suos usus remedium istud, beneficium quod afferre potest, ab illo excipiamus, & malo, quod interdum ex illo consequitur, bene uti discamus; periti Nautæ ventis etiam adversis aliquando portum fortiter occupare norunt. Illius usus sit qualis est Opii, quod magnum est dolorum sedativum: in doloribus nephriticis, cholicis, podagricis, aliisque similibus singulare beneficium ab Opiatis habemus, non quod morbi causam tollant, sed quia gravia symptomata compescant, vigilias scilicet contumaces, & spirituum dissipationem, interim reparatis per somnum viribus, morbi causa auferenda propriis remediis. At quia scimus, quod ubi vis Opii expiravit, redituros pristinos dolores, an rursus altera die repetenda opiata ad prophylaxim? Nemo prudens Medicus id aget, sed ægro petenti, & instanti denuo idem remedium offerri, reluctabitur, ne morbi causam figat, & contumaciorem reddat, Opiata enim ea cautione sunt exhibenda, ut è somno excitare possimus, quem obdormire volumus. Mehercle si papaveris virtus nobis ignota esset, aut Plantam hujusmodi Europa non aleret, ac ex Indiis ad nos deferretur succus concretus, cujus grana tria vel quatuor paucarum horarum spacio dolores quoscunque gravissimos sedarent, ut post aliquem somnum ad analgysiam devenirent, majori certe admirationi esset talis planta, ex qua haberetur tantarum virium succus, quàm Cortex Chinæ Chinæ, quæ exhibita præsentem febrem non tollit, sed eam quæ altera die erat reditura. Sicuti ergo composita ex Opio à prudenti Medico non exhibentur in vehementia dolorum, nisi ad obtinendum aliquod intervallum pro virium reparatione, ita ut diximus, ad eundem finem obtinendum admittendus, & laudandus Chinæ Chinæ usus in febribus præsertim intervallatis. (b) *Ast quotidie, ac pluries in die larga dosi, ut istuc fieri solet, in febribus, quæ maligni aliquid præferant, amaris potionibus Chinæ Chinæ in vino infusæ, miserum ægrum conficere, (c) id est quod periculosum, & omnino empiricum existimo.*



(a) (*Sed ex his &c.*) **P**ost præmissam Rhetoricam Præfatiunculam, concludit tandem medicæ Cl. Auctor, omnem usum Chinæ Chinæ, cujus dosim taxavit jam §. 8. ad drachmam unam, vel duas, ad unicam quoque oblationem restringi debere: neque repetendum esse ad prophylaxim remedium; quemadmodum sedatis per Opium doloribus, *altera die rursus repetenda non sunt ad prophylaxim Opiata*. Hac occasione virtutem ejusdem Opii admirabiliorem, & præstantiorem prædicat, ac sit Chinæ Chinæ virtus; cum tamen §. 4. virtutem Opii tantummodo *ephemeram* dixerit; *beneficium verò Chinæ Chinæ non tam paucis diebus claudi*. Insuper haud ignotam hic nobis supponit virtutem Opii, quippe *Europæi Papaveris sobolem*; ignotam verò virtutem Chinæ Chinæ, quippe *Plantæ Americane*; cum tamen æquè ignotus, aut controversus sit modus, quo agit Opium, ac modus, quo agit China China; & æquè notum sit, Chinæ Chinæ virtutem esse Febrifugam, ac esse narcoticam Opii virtutem. Hæc quidem leviora sunt; sed sibi de more contraria. Contrarium nihilominus huic assertioni de non repetendo ad prophylaxim Febrifugo magis est, quod Orat. 3. Jatrici Argumenti docuit idem Cl. Auctor, ut in Collatione Textuum lit. K. L. M.; ubi nempe longè meliorem factam esse ait *Februm doctrinam*, illasque curandi methodum, postquam hujus Febrifugi usus innotuit; nec semel tantum, ut olim, sed plures ad dies illud exhiberi ceptum, donec febrile miasma sit penitus exantlatum. Sed tunc cum ita scripsit, annum licet agens 75., & *Dogmata hæc Theorica, & Practica studiosa suggerens Juventuti*, in juvenili tamen adhuc ætate forsan & semetipsum constitutum dicet; quo tempore *Chinam Chinam*, ut alibi vidimus, *habebat in magno pretio, & in eam affectu suo nimis effusè ferebatur*. Missa ergo faciamus, & ut fructus immaturos præfervidæ juventutis seponamus quæcunque favens Peruviano Febrifugo scripsit ille ad annum usque 79. ætatis suæ; sitque nobis hæc ultima Dissertatio Prototypus unicus opinionis acceptabilioris Viri Cl. in hac materia.

Inquit itaque ille in hoc Paragrapho, *laudandum, & admittendum esse Chinæ Chinæ usum in Febris præsertim interval-latis, dummodo ea Opii more semel oblata non repetatur ad prophylaxim; sed tantum*

*ad obtinendum aliquod intervallum pro virium reparatione, unica vice usurpetur*. Sed neque hoc sufficit: alia namque ad rectum illius usum requiritur necessaria conditio ex paragrapho 27. depromenda; ut scilicet Medicus, priusquam *dolosum* istud Febrifugum præscribat ad intervallum illud temporis obtinendum, *certitudinem* habeat, vel eam sibi comparet, de novo post aliquot dies Febris reditu, aliàs gravissimè erraret. *Hic nimirum Medicorum est error* (scripsit ille antedicto §. 27.) *ut si Chinam Chinam in hunc solum finem præscribant* (in hunc autem solum finem licere Chinam Chinam præscribere contendit ille in tota Dissertatione, ut vidimus, & paulò infra videbimus) *ut paucos a paroxysmis dies liberos obtineant, interdum eludantur, Febre amplius non redeunte, sed (en damnum gravissimum) tacitè corpus depascente*. Id sibi quondam in Nobili Virgine, quæ nonnisi ægrè, ac serò a diutino morbo convaleuit, contigisse refert §. 26., subdens statim citato §. 27. hæc verba -- *Non absimiles casus alias mihi contigere, ut me poenituerit hoc remedio usum fuisse*.

Crediderim autem hæc, & similia illi contigisse eo tantum tempore, quo nimis effusè ferebatur affectu suo in *Peruvianum Corticem*; exinde tamen ita profecisse, ut in *saniori ætate* didicerit modum præscribendi remedium istud cum certitudine reditus Febris: secus, deficiente hujusmodi certitudine, caro nimis quis emere aggrederetur breves aliquot dierum inducias, si subesset periculum, ne corpus *tacitè depastum* iret, *Febre amplius non redeunte*. Quòd autem ita exinde profecerit Cl. Auctor, ut nonnisi cum certitudine reditus Febris Chinam Chinam in *saniori ætate* præscripserit, palàm faciunt hæc illius verba, ex §. 3. huc iterum revocata -- *In provectiori ergo ætate experientia edoctus, & observatis noxis a China China prognatis, cautius in illius usu processit, & mediocri solum dosi præscripsi ad drachmam unam, vel duas in Febris Intermittentibus, quando nimis protracta ægros fatigaret; in hunc præcipuum finem, ut aliquot dierum induciis impetratis æger recrearetur, & vires resumeret, non sine spe, imò cum certitudine (hic enim est cardo rei) Febrem redituram &c.* Hæc mea est Methodus, qua in *ætate saniori* sum usus. Et ex hac Methodo, atque ex hoc dogmate colligo ego, cæteros Medicos, qui de futuro rursus



sus Febris reditu *certitudinem* non habeant (eiusmodi sunt quotquot in hoc Orbe sunt) etiam si semel tantum, & dosi unius, vel duarum drachmarum præscribant Peruvianum Corticem, adhuc eo remedio uti non posse sine trepidatione, & suspitione, ne corpora *Ægrotantium* tacite depascat Febris latens, nec in apertam flammam forsitan amplius eruptura.

Atque ut in epilogum hac occasione contrahatur universa Cl. Viri Sententia, etsi scripserit ille §. 4., & in præsentī confirmarit, se nec contemptui habere, nec parvi facere Peruvianum Corticem, utpote qui non vulgaria commoda præstat in Medicina; attamen sensum usum illius ad eas redigit angustias, ut tandem ferme penitus feriantem velit. Etenim, ut ordine recenseam, illum neque proficuum censet in *Pueris*, neque in *Adolescentibus* (en pars Virorum non infima) neque in *Mulieribus* (quæ medietatem saltem constituunt humani generis) præsertim verò *Monialibus*, nec in *Puellis*, quæ apud ipsas educantur, nec in *Nobilibus*, aut *Potentibus Viris*, multoque minùs in *Principibus*. Item nec in *Temperamentis Melancholicis*, nec in *Pituitosis*, nec in *Homnibus corpulentis*, aut habitu præpingui præditis, nec in *Regionibus humidis*, aut aere crasso refertis, sicut nec *Hyberno tempore*, aut alia quavis *Humida, Australi, ac Pluviosa Constitutione*. His demum omnibus exclusis, unam tantum, vel duas ad summum illius drachmas concedit alicubi; non quidem innoxie, sed *minori damno* usurpandas: at *semel* duntaxat; cavendo a *repetitione* remedii; easque tandem, ut modò annotavimus, salva conditione *certitudinis* de novo Febris reditu, secùs nonnisi cum *damno*, vel saltem nonnisi cum *periculo* exhiberentur. Adeòque (si velimus citra fucum sincerè loqui) æquè pro Februm curatione, ac pro earundem præcautione locum habere poterit, imò & debebit, gravissimum effatum Viri Cl. Paragrapho finali ab eodem prolaturum; videlicet -- *Consilium tandem magis sanum esse, remedium istud natura sua dolosum prorsus omittere*. Hæc est germana Conclusio totius Operis, ut ex supradictis patet; quantumvis *Ex albo Medicaminum* se minimè expungere velle *Peruvianum Corticem*, hoc ipso Paragrapho profiteatur verbo tenus idem Cl. Auditor.

Quòd si revera aberat ab illius animo inauspicatum istud propositum, quemad-

modum tamen præsentī, quàm in quarto Paragrapho abundè testatus est; imò si *Beneficium*, quod *China China* potest afferre, ab eadem libenter est excepturus, & malo, quod interdum ex illa (sic ait ipse) consequitur, bene uti discere etiamnum satagit, ut in hoc contextu; cur postea beneficium istud, coarctato supra modum usu remedii, ad nihilum redigit, & quæ largiore usu parta sunt experimenta felicia, tanquam malè, aut temerè parta contemnit? Notum est, Artem Medicam consuevisse ex rebus, quæ nullius suapte natura sunt usus; imò & ex deleteriis ipsis Venenis, industri præparationum, & correctionum magisterio, salubria identidem medicamenta, quæ Dracones subinde mitigatos vocant, conficere, potiùs quàm illa, etsi vel inutilia, vel absolutè nocentia, planè rejicere. Si ergo Viro Cl. cordi erat *publica solùm utilitas*, ut sequenti Paragrapho latè asserit, cur quæso medicamentum istud, magna saltem (quod negari nequit) ex parte saluberrimum, ea demum parte, qua noxium reputat, non est conatus ita præparare, atque corrigere, ut dein sine metu, & suspitione posset ad notos saltem, si non etiam meliores usus adhiberi? Atque ut ad specialia descendam; censebatne Vir Cl. Cortici huic certè *Febrifugo* inesse ulterius vim quamdam *figentem*, quæ *Obstructiones*, & *Cachexias* tractu temporis posset inducere? Cur igitur hanc vim sibi notam præparatione aliqua delere non studuit, intacta Febrifuga, sibi, ut fatetur, ignota, adeòque secundum illius hypothesim a figente diversa? Si verò modum eam vim delendi non norat, cur saltem non docuit illam infringere per remedia, volatilitatem aliquam substantiæ Corticis impertiri apta, vel per aperientia peculiaria commissa, vel per hujusce generis alia?

Mehercule si isthæc addere, aut commiscere fortassis erubuit, vel hujusmodi correctionem tentare, ne Remedium suapte natura egregium temerare videretur, memor eorum, quæ protulerat in Orat. Jatr. argum. ut in Collatione lit. E. F. G. nempe -- *Solum Peruvianum Corticem*, nobis a divina beneficentia munus concessum, sine alterius rei mixtura, in qualibet Regione, quocunque anni tempore, ætate, sexu, temperamento; Febres saltem recurrentes, atque intervallatas fugare, & exterminare, quamquam non defuerint, qui Hieron hoc picron ex Arbore Vita decerptum re-



*merare pertentavit Opio, aliisque rebus adjectis, ut solitis mangoniis vulgo imponerent -- si inquam ob hæc tam clara effata sua fortassis erubuit, Chinæ Chinæ correctionem per hujuscemodi additamenta tentare, facile semetipsum excusare poterat titulo junioris ætatis; nonnisi enim, ut & nuper innui, 75. annum agebat, cum isthæc conscripsit. In provectiori ergo, & saniori ultima ætate longè aliter sentiens, liberè quoque poterat addere, & Orbi pandere quicquid malitiam remedii seriùs detectam valeret infringere. In hoc feracissimo Campo suam longè meliùs, & in majorem proximi utilitatem poterat Minervam exercere; innocuisque experimentis sedulò institutis, docere nos usum Corticis saniozem adhuc, atque certiozem, aut, si ita libeat, etiam tutiozem, potiùs quàm hucusque repertum, tamque utiliter exercitum, in viso Abusus nomine falsò traducere. Satiùs namque fuisset, Remedium simpliciter bonum, et si quadantenus, ut modò autumat, imperfectum perficere, quàm ex toto proscribere; imò & proscribere, quia nimis efficax, & bonum, nempe quia sæpe non ad tempus tantum, sed perpetuò valet Febrim depellere. Felicia venena Correctorem nacta. Infelix Remedium ultra venena exulare jussum. Sed magis infelix hominum conditio, quos media China China mortieripere nefas est in morbis exitiis, ob metum superstitionis; cum tamen, eodem metu minimè obstante, liceat passim eodem remedio ex præscripto ipsius Cl. Auctoris, aliquot tantum dierum inducias impetrare in morbis benignioribus.*

(b) (*Ast quotidie &c.*) Omne igitur crimen, *admisso, & laudato* per Cl. Auctorem *China China usu pro virium reparatione*, omne inquam crimen, si quod est, consistit in *larga dosi ejusdem China China, quotidie, ac pluries in die in Febris, quæ maligni aliquid præferant, exhibitæ*: quasi ad libras consuescant illa præscribi (quod tamen liceret, ubi nulla alia proffaret salutis via) & quasi inter libras illius, & inter drachmas ad summum duas, quas semel tantum concedit Vir Cl. non detur medium. Alibi, nempe §. 30. & 33. magis determinatè locutus ille, improbat *portionem China China ad uncias integras in Vino infusæ pluries in die exhibitam*; quo nomine magis in Methodum Talbotii, verè Corticis uncias in copiosa Vini quantitate acervatim, cumulatimque infundentis ani-

madverteret, quàm in meam, vel in Mortoni, aut Sydenhamii Methodum, qui eam tantummodo, qua tunc uti opus est, Febrifugi dosim qualibet vice præscribimus. Sed quemcunque petat sugillatio isthæc, vanus est ictus; ea siquidem, quæ subest æquivocatio, *apud mulieres tantum, & imperitam plebeculam locum habere potest: non apud eos, qui sapiunt.* Aliud est infundere in Vino, aliove liquore unciam integram, vel etiam uncias integras (si ita velit) Chinæ Chinæ, & pluries in die portionem debitam, ac modicam illius exhibere: aliud est, uncias easdem integras pluries in die, seu qualibet dosi propinare. Providus Pater Familias pluries Vini Congios infundit in Dolio; illud tamen Familiæ distribuit solum ad Lagenas, & Cotylas, ebrietatem cavens.

Hujusmodi tamen Methodum, qua nimirum una, vel duæ Peruviani pulveris unciae, in phiala vino plena infusæ, partitis haustibus exhibentur, quæque in vulgaribus Casibus, & quandoque etiam in arduis, sed nonnihil lentioribus, haud inutiliter solet administrari, neque mihi, ut verum fatear, universaliter loquendo planè probatur, præsertim in Casibus præcipitis exitii: non quidem ob inanes hæc Viri Cl. declamationes, molem universam hyperbolicè commensas; sed ob rationes, quas olim innui in Therapeut. mea, tum Lib. 1. cap. 7., tum Lib. 3. cap. 3., præsertim a pag. 162. ad pag. usque 163. Id enim est sæpe *ad Sacram China China anchoram verè nonnihil tumultuariè confugere*, quod plurimi perpetuò hic illic factitant exemplo Talbotii, & aliorum, quodque solis nihilominus Empyricis, aliisve parum expertis vix condonandum, dosi per vices quodammodo fortuita utentibus. Hinc nanque identidem fit, ut tunc cum res magis urget, haud satis valida sit; nimis verò, cum minùs res postulat, dosi remedii. Hæc ipsa dosi magis adhuc incerta redditur, & fortuita ex Muliercularum ut plurimum assidentium socordia, liquorem scilicet modò magis, modò minùs turbidum (quicquid clamet Medicus) offerentium; adeoque remedii particulis modò magis, modò minùs imprægnatum. Ex qua sola inæqualitate, inverso nonnunquam ordine instituta, cum labitur occasio præcepti, periclitatur non raro, nonnunquam & perditur, quæ cæteroqui servari poterat, hominis vita; tumque incassum solummodo dicitur oblatum remedium



dium, cum potius dici deberet oblatum & perperam. Medicus ergo Navis hujusce Palinurus, præscribat quoties, & prout opus est, dosim certam, certis quoque temporibus exhibendam, ea adhibita partitione inæquali, & industri, quæ morbi, & temporis exigentiæ respondeat, ut fusè Tyrones docui in Therap. mea eodem cap. 3., imò & 4. Libri 3.

Ad me igitur, Methodumque meam quod attinet, repeto quod centies dixi; nimirum sesquiunciam circiter, vel uncias duas Chinæ Chinæ, spatio trium hebdomadarum epotas, pro curatione simul, & præservatione sufficere; siue sermo sit de *Subcontinuis Malignantibus*, ubi lenior; siue de *Perniciosis Intermittentibus*, ubi validior requiritur Methodus. Licet enim in Tractatu meo, maximè verò in historiis, identidem de *Methodo validissima, de dosi liberali &c.* indefinitè sermonem habeam; attamen non alia determinatè uspiam legitur dosis, nec alia debet, aut potest intelligi, quàm supra recensita. Id satis patet vel ipso *Indice* ejusdem Tractatus, ubi sub litera C. hæc prostant. *Curatio præsentanea Febris Perniciosa non minùs exigit regulariter, quàm drachmas sex Corticis, nec plus quam unciam unam, pag. 158. Integra verò, ac universalis Curatio duabus plus minùs unciis perficitur, pag. 165.* Me legat ergo locis ibidem citatis curiosus quilibet, ac insuper etiam pag. 163. ipsiusmet Operis. Totum dosis augmentum penès me, in Casibus tamen solummodo urgentissimis, quando nimirum præ foribus mors est, altera die hominem interemptura, totum inquam augmentum dosis tunc consistit in prima oblatione, a futuro accessu magis remota: illam etenim ex quatuor ut plurimum drachmis Febrifugi conflata volo; & pluribus etiam, si minor; paucioribus, si major sit ab eodem paroxysmo distantia. Hoc jacto curationis fundamento, rem totam per drachmas deinceps, ac mox etiam per semidrachmas absolvo, usquequo duæ circiter unciae pulveris, trium saltem hebdomadarum decursu, compleantur. Hac una Methodo sanati sunt, & ab Orci faucibus erepti *amaris China China potionibus*, minimè verò confecti, quotquot in historiis retuli.

(c) *Id est quod periculosum &c.* Res periculosa profectò, & valde insalubris est mors. Amara pariter, etsi a Cratere dulci, & ab incruento Medici calamo illa proficiatur, quocunque tandem modo ab eodem

Torti Respons. ad Ramazz.

Medico conficiatur *Ægrotus miser*. Sed nec dulce sonat nostratum Medicorum aurbus crebrum modulamen illius *Istic*, quo Mutinæ ita de more fieri intonat Cl. Auctor, summa nobis confidentia crimen alienæ internecionis attribuens. Verùm mitamus isthæc, & pacificum nunc Senem in veritatis gremio placidè quiescentem sinamus. Hoc unum liceat reponere, *amaris China China potionibus non modò non confici Mutina miseros Ægrotantes*, seu, quod idem est, non modò Methodum meam revera nec *periculosam* esse, nec merè *empyricam*; sed potius mirum esse, quod ea tam confidenter, vel a Viro Cl., vel ab ejus Nepote abusus Relatore diffametur ut talis, & velut merx planè improba, cum nullam unquam quisquam eorum inde prognatam noxam me curante observavit. Sexies illis videre me contigit illam exercentem. Ter vidit Patruus, ut ex Therap. mea pag. 93. hist. 16. pag. 205. hist. 1. & pag. 279. hist. 1. Ter quoque vidit Nepos, ut pag. 202. hist. 11., pag. 214. hist. 9., & pag. 229. hist. 2. Quam felices, & simul quàm arduæ fuerint illiusmodi curationes, ipsi norunt. Ne unam quidem præter illas, siue faustam, siue infelicem inspexere; imò unam ambo inspexere, ipsis quidem assidentibus, me verò superaccito, ob id solum infaustam, quia ibi Methodus mea nequivit, ut proposueram, administrari, quemadmodum visitur in eadem Therapeutic. pagin. 179. histor. 2. Quo ergo pacto ut malam redarguant Methodum, quam quoties viderunt in usum deductam, semper proficuum novere, nunquam verò frustraneam, aut noxiam? Quod si aliarum quoque curationum, quas recensui in Opere meo, & quibus ipsi minimè interfuere, exitum omnem investigassent curiosi, nil pariter carpendum reperissent; nec probabiliter reperere, cum non carpsent.

Quos enim in tota Dissertatione sua retulit ex adverso Cl. Auctor Casus parum felices; ii nec sibi constant, nec meis ullo pacto opponuntur; quatenus videlicet nonnulli ex illis *Ægrotis* a morbo tandem evasere; alii verò vita functi Corticem nullatenus potaverunt; & alii pariter tandem obitum passi (fuere autem duo intra septem lustra) potaverunt methodo tantum vulgari, non mea, de qua agitur, quippe ex Quartanis Intermittentibus laborantes: atque unus quidem ex his, post septennium inculpatæ valetudinis a China



China epota, obiit demum ex alio morbo acuto ab origine, mox in Chronicum converso: alter verò ex Chronico pariter, nempe ex Hydrope, ante epotam Chinam Chinam inchoato; præscribente tamen illam Frassono ante annos 37., non me, ut retuli in Therapeutice mea; ubi *unicum* hunc casum, antequam Viri Cl. Dissertatio mente illius conciperetur, rigidiusculè examinavi pag. 92. hist. 15.

Septem ergo, ut rem minutiùs persequar, vel octo sunt Casus, per Virum Cl. a septem lustris ostiatim quæsti, & nominatim oppositi, dempto casu D. Co: Torricini Guastallæ defuncti, qui me nullatenus tangit, & de quo jam satis §. 47. Duo ex iis Ægrotis, ut nuper ajebam, a morbo convaluere, ipso fatente, nempe Virgo in Monasterio S. Mariæ Magdalenæ Mutinæ educata, de qua in Dissertat. sua §. 26., & insignis Jurisconsultus, de quo §. 34., ipso pariter fatente restitutus: quibus si tertium Casum addere velit ille sibi, ut inquit §. 9., visum Patavii in Puellis illis, quarum nomen minimè protulit, quibusque etsi Chinam Chinam exhibuerit Mater, febres nihilominus (non continuato, ut reor, Febrifugo) usque ad Veris principium perdurarunt, nil officit; quandoquidem & illæ pariter sanitatem demum sunt assecutæ, & eam frustra ab aliis remediis citiorem quæsierunt. Atque ita jam tres ex adductis a Viro Cl. Ægrotis (*multas* hæcæ puellas unius familiae pro uno tantum Casu numerando) sanitatem tandem integram sunt sortiti. Tres alii, qui verè decesserunt e vivis, decessere prorsus jejuni Peruviano Cortice; nempe D. Antonius Guidonius de quo §. 31., & D. Marchio Fortunatus Cortesius, Dominusque Jo: Altimanus, de quibus §. 32. Duo ergo tantum supersunt, videlicet D. Comes de Marsciano, de quo §. 21. per septennium ab hausto Cortice strenuè valens, ac tandem ex aliis evidentibus morbis confectus; & D. Co: Jo: Carolus Morandus, de quo §. 20., qui verè post fugatam Cortice Quartanam, in Hydropem antea inceptum ultro progredi minimè desit; sed ad interitum, quò jam tendebat, pertigit anno, ni fallor, 1678., vel circiter, me hæsitantem semper relinquens, ut candidè fassus sum in Therapeut. mea, num hoc casu intra annos nunc quidem 37. *singulari*, minùs fausto, fuerit ad leges circumspèctoris Præxeos præscriptus idem Cortex, minimè

adeò profuturus Hydropi, a Quartana nequaquam producto, sed ab aliis peculiari-  
bus causis. Hi omnes sunt Ægroti, Viro Cl. nedum referente, sed penè dixerim flente, China China confecti. Atque ne unus quidem ex recensitis, ex iis scilicet, qui verè Chinam Chinam hausere, illam hausit *Methodo mea*: quam tamen unam in fine hujus Paragraphi, quem modò expendimus, tanquam in totius Dissertationis epilogo, manifeste traducere satagit Cl. Auctor; sed *Methodo tantum Vulgari*. Ut proinde hisce exemplis quibuscunque, non mihi uni, sed omnibus vel religiosissimis Chinæ Chinæ fautoribus bellum, inane quidem, nil tale putans indixerit. Sic dum *Fullonem adoritur* Vir Cl., *percutit Fabrum*.

Sed quod majorem ultimo tandem loco incutit admirationem illud est, quò omnes hosce Casus verè nihili unquam fecerit, aut usui Corticis quicquam officientes putarit ipse, qui modò tanti facere ostentat, Cl. Ramazzinus. Licet enim asseruerit §. 8. hujusce Criticæ Dissertationis, *se in proveciori ætate experientia edoctum, & observatis noxis a China China prognatis, cautius in illius usu processisse*, ac subinde has omnes historias in asserti sui probationem attexuerit; nihilominus hæ ipsæ historiæ, de quarum veritate satis sibi conscius extiterat, minimè obstiterunt, quò minùs in maximas Chinæ Chinæ laudes fuerit effusus in Orationibus Jatr. argum. pluries citatis; imò nec obstiterunt, quò minùs ad ultimos usque annos incolatus sui in hac Urbe, quæ idcirco miratur adhuc novissima illius effata, fuerit usus eodem Febrifugo: & quidem semper fidentiùs, ac liberaliùs, quàm antea.

Atque ut clariùs elucescat hæc veritas, & cuncta ordinatim enucleem, sciat Lector, Virginem in Monasterio S. Magdalenæ educatam ægrotasse, & convaluisse (neque enim obiit) anno 1690. Jurisconsultum insignem, Dominum nempe Nicolaum de Sanctis, a Secretis Serenissimi Ducis Mutinæ, ægrotasse pariter, & convaluisse anno 1704. Eodem anno 1704. ex Perniciosis Tertianis Febribus, *China China nequaquam epota*, Fatis cesserunt D. Antonius Guidonius, D. Marchio Cortesius, & D. Jo: Altimanus. Anno 1703. occubuit D. Comes de Marsciano, & circa annum 1678. vel 79. D. Comes Morandus. Cl. autem Ramazzinus post hos morbos, & post



& post hæc funera gressu nedum pari, sed & firmiore in eadem semper praxi procedens, ut Urbi huic universæ notissimum est, Orationes suas Jatrici argumenti, quas Peruviani Corticis quisque diceret Panegyricas, conjunctim edidit anno 1708. Dissertationem verò *De Contagiosa Boum Epidemia*, anno 1712. immediatè ante editionem Tractatus mei; longè verò post editionem *Synopsis* ejusdem Tractatus: in qua Dissertatione sua ferme sibi adoptare visus est argumentum ipsius Therapeutices meæ, sub Prelo tunc existentis. Atque ita quidem, ut ideo putarint nonnulli (temerè tamen) Virum Cl. in ea Dissertatione, dum meus cuderetur Tractatus edita, indicare voluisse semetipsum ante me conscium Methodi, quam propediem eram promulgaturus; explosa verò a me pag. 314. & sequent. Operis mei omni suspitione, quòd illi Methodus hujusmodi innotuisset priusquam mihi, ipsum in oppositam partem animum convertisse, acriter impugnando quod sibi amplius nequibat asciscere. Sed falluntur quotquot de tam perspectæ dignitatis Viro tam sinistrè opinantur. Scripsit ille tunc quæ sentiebat de admiranda Corticis virtute, ut veritati subscriberet sibi cognitæ, mihi que plauderet illam promulgaturo. Mox illum facti pœnituit; neque tamen mentem mutavit, sed cor.

Mentem igitur suam (ut revertar unde recessi) ingenuè patefecit ille in prædicta Dissertatione *De Contagiosa Boum Epidemia* anno 1712., longè scilicet post sinistros Casus nuperrimè memoratos; patefecit inquam textu illo insigni alias recensito, videlicet -- *Equidem hoc prasidii genus* (loquitur de China China in Febribus periodicis miranda præstat, ac præsertim in Tertianis Intermittentibus Malignis, quæ in ipso impetu accessionis agros interdum necant &c. hoc enim Febrifugum Fermentum illud malignum sive penitus restinguit, sive ita enervat, ut periculum illud tollatur, ne ager in ipso Febris accessu intereat. Cui textui (ne vel hoc subdiceam) haud satis percipio quomodo quadret textus finalis hujusce Paragraphi, nempe, - *omnino periculosum esse, amaris China China potionibus uti in Febribus, quæ Maligni aliquid præferant, quasi benignitas, vel malignitas Fermenti febrilis, contra id quod experimur, reddat Febrem, etsi Intermittentem, Subintran-tem, aut Subcontinuum in primo casu curabilem Cortice, insanabilem in secun-*

do: & quasi non liceat in extremo Vitæ periculo uti China China more Opii, & pro Curatione etiam palliativa perperam credita (quæ similitudine, ab Opio nimirum, aliisque Narcoticis desumpta, ipse quoque sum usus in Therapeut. mea pag. 15. 173., & alibi) cum tamen *ad imperandas in Febribus minimè periculosas aliquot dierum inducias*, ex Viri Cl. effato in hoc ipso Paragrapho, *admittendus sit, & laudandus China China usus*; imò cum ex eodem contextu *usus illius esse debeat qualis est Opii*. Sed redeamus in viam. Alias ergo noxas sibi observatas post annum 1708. imò post 1712., opus erat recensere Viro Cl., non Historias inanes, longè ante edita Corticis encomia sibi notas, quæ tamen encomiis subinde prolatis non obstitere. Rumor itaque omnis tandem desinet, partim in Puellas Patavinas, quibus anno 1713. empiricè prorsus Chinam Chinam obtulit Mater, & quarum *sana-rio* in subsequens Ver dilata fuit, partim in Historiam Co: Torricini eodem anno Guastallæ extincti, Auctori nostro, dum hæc scriberet, communicatam per literas; sed illi satius fuisset, ut reor, hanc quoque Cicadamala nequaquam corripuisse.

Sunt hæc, a Viro Cl. objecta, septem, vel octo Corticis facinora, quæ deprædicantur infasta. Prodeant ergo in apertum necesse est, non quidem ad ostentationem, nec meæ tantum defensionis habita ratione, sed & publicæ utilitatis, quæ fuere præclara. Verum hæc jam satis prodire in Therapeutice meæ. Ægrotantium restitutorum series (non hic est sermo de Ægrotis citra grave periculum febricitantibus, qui forent innumeri, sed de *letaliter* decumbentibus) facta supputatione omnium hic illic cumulatim descriptorum, seclusis etiam Historiis ab aliis communicatis, numerum implet 74. Horum 64. cujuslibet sexus, temperamenti, ac ætatis, incolumes vivunt adhuc, suntque vivi testes virtutis eximiae, quam Deus indidit huic remedio. Reliqui ab eo, quo describere, tempore (agitur jam quintus annus, etsi segnior processerit impressio completa totius Operis) obierunt: quatuor quidem jam octogenarii descripti olim, cum convalescerent ope Corticis, in eodem Opere pag. 87. hist. 6. pag. 88. hist. 11. pag. 89. hist. 10. & pag. 231. hist. 4. sex alii virilis, aut inclinantis ætatis, & ex causis planè evidentibus, sive, ut ajunt, procatartice, in varios demum morbos dela-



psi, descriptique pariter quondam, cum China China fuere servati, pag. 198. hist. 5. pag. 200. hist. 8. pag. 212. hist. 6. pag. 244. hist. 18. pag. 229. hist. 3. & pag. 238. hist. 12. omnes verò, tam primo scilicet, quam secundo loco recensiti, post annos, modò *septem*, modò *octo*, modò *sex*, & ad minimum *duos* ab epota China China, e vivis sublatis, neque illa in postremis, quibus succubere, ægritudinibus usi.

Unum tamen excipiam, & aliis addam, memoratum olim in citata Therapeutice mea pag. 93. historia 16. qui *viginti* ab hinc annis præsentaneo Corticis auxilio a periculosa Febre feliciter evaserat; sed nuperrimè dum hæc scribere jamdudum defuissem, occubuit, eodem remedio rursus, sed incassum, adhibito. Ne itaque ab ingenuo more meo unquam deflectam, quem admodum in eo Tractatu lib. 3. cap. 5. & lib. 5. cap. 4. historias omnes defunctorum, quos China China servare, nequivit sum fideliter persecutus; ita modò hunc ejusdem sortis eventum, imminente harum Responsionum evulgatione præter expectationem mihi observatum (quandoquidem

*Multa cadunt inter calicem, supremamque labra)*

candidè recensere, meum existimo. Idem igitur Vir Nobilis D. Geminianus Levizanus, de quo jam loco citato, paulò ante Æquinoctium Autumnale hujusce anni 1715. duplici Tertianæ Subcontinua ruri correptus, in Urbem se transtulit; ubi methodicè a me, ut loqui mos est, ab initio tractatus, non modò nil opis ab Arte retulit, sed accessionibus, quæ se mutuo excipiebant, obscurioribus redditis, & ingravescentibus in dies symptomatis, e Subcontinua periodica ad Acutam, & Continentem febrem jam properanter tendebat. Usque tamen motum levem exacerbationis, & remissionis haud planè contemnendæ servabat eadem Febris: ut proinde Peruviani Corticis usum, non plena quidem, sed nec minima fiducia, fore proficuum crediderim. Illum itaque præscripsi parciore tantum dosi, ut morbi, remediique vires sensim explorarem; ad drachmam nempe unam per dies quatuor quolibet mane in Aqua Cardiaca. Me interim aliò migrante, ad invisendum scilicet Ægrotum Nobilissimum ruri graviter decumbentem, cum postridie reverterer, actionem aliquam Febrifugi saluta-

rem probabiliter percepturus, non sinè admiratione quadam oppositum deprehendi, æqualem videlicet, imò & fortiolem, ut suapte natura ferebat progressus morbi, Febris quoque progressum agnoscens, perinde ac si Chinam Chinam nullatenus Æger potasset; quem idcirco in novissima exacerbatione insigniter soporosa, & gravi Sacris celeriter muniendum putavere Medici, qui vicem meam brevi eo tempore suppleverunt. Admonitus interim ego de levi quidem, sed perceptibili motu, quem Febris adhuc servabat, recolensque memoria, quod mihi narratum fuerat contigisse primis morbi diebus (nisi me fefellere adstantes decepti & ipsi) Febrim scilicet, dum ruri ageret Nobilis Patiens, claros Tertianæ duplicis, Subintrantis licet, paroxysmos præ se tulisse, facile persuasum habui, illam etiamnum de Subintrantis potius, etsi gravioris, atque contumacioris, quam de simpliciter Remittentis natura participare; adeoque Cortice justa dosi exhibito curationem illius (quam non aliunde licebat sperare, quoniam frustranea visebantur alia, quæ simul ex usu erant Artis præsidia) esse tentandam. Duas itaque Chinæ Chinæ drachmas summo mane in forma boli sumendas statim præscripsi, & totidem mane sequenti: quibus oblatis, non modica facta est morbi remissio, & consuetarum exacerbationum abolitio omnimoda, superstitè tantum levior Febricula vix perceptibili. Hæc tamen cum intrà duos, aut tres dies minimè solveretur, ut cæteroqui assolet hisce casibus; imò pertinaciter perstaret, comitante illam voce exili, & facillima etiamnum ad somnum, placidum licet, propensione; maximum mihi terrorem incussit: præcipuè cum simul de pondere quodam in regione thoracis toto morbi decursu conquestus fuerit Æger, quamvis sinè ulla unquam difficili respiratione. Fuit autem ejusmodi, qui me tunc corripuit timor, ut actum esse probabiliter de vita Ægrotantis facile pronunciaverim, latentem aliquam in præcordiis labem suspicatus, quæ decumbentem Virum sensim esset confectura. Intermissio idcirco ad aliquot dies Febrifugo, in hisce circumstantiis inutili a me credito, & continuatis tantummodo reliquis remediis vulgaribus, pari adhuc passu procedebat superstes Febricula, sed cum tolerantia adeò facili, ut jam non parum spe Adstantes omnes conciperent,

& Con-



& Consanguinei; me tamen apertis notis jugiter reluctante.

Ne verò Febrifugo planè posthabito violenter iterum recandesceret Febris, & reviviscerent Exacerbationes, facile illis postliminium præstituro foco superstitite: & cum inania ex alia parte experirer quotquot ad omnimodam Febris extinctionem administrabantur remedia, ad ejusdem Corticis usum iterum transitum feci, præscribendo ad drachmas tres in formam Opiatæ, intra tres tamen dies partitè absumendæ. Quæcunque fuerit eventus causa, ab eo certè tempore levius se habere cœpit Ægrotus quò ad omnia, & quò ad ipsam quoque Febriculam; quæ tamen nunquam integrè obliterabatur. Vox illius cœpit se exere-re, & sonora evadere; sputum quoddam crassum, nonnunquam subcruentum, ac identidem ferme semipurulentum facile excerni; somnus de more placidus levamen ferre; urina antea crassa laudabilis fieri; appetitus non modicè redire, ac ferè dixerim nimis: itaut solidos cibos appeteret Æger, & è lecto surgere sibi permitti constanter efflagitaret. In hac rerum tranquillitate cum tamen nunquam planè recederet obstinata Febricula, jamque instaret vigesima morbi dies, Consanguineis, & Amicis illius, qui inter sanos eum planè referebant, mihiq; nedom non fidenti, sed & omnino malum exitum metuenti, parum aberat quin illuderent, apertè dixi, me adduci non posse, ut unquam crederem, Ægrotum ab eo morbo evasurum, etsi illum domi ambulātem cernerem: quandoquidem laticæ illiusmodi Febres me vel prope quadragesimum diem alias decipere. Nihilominus ne forte, ut aliis videbatur, propitia abuterer, Corticem ad semidrachmam in forma boli ad quatuor adhuc dies continuandam præcepi, tredecim sic illius drachmis toto morbi tempore partitè consumptis. Quod quidem eo fructu visum est fieri, ut vigesima quinta morbi die Æger mihi cubiculum mane ingredienti nuntiare potuerit, se nocte prægressa a Febre omnino liberum semetipsum dignovisse, & etiamnum talem se mihi perhibere, ac perfectè jam sanum. Immunem verè tunc a Febre & ipse deprehendi, pronuntiavi, & metum libenter deposui; subdens tamen Uxori sollicitæ, me reapse non reputare levamen illud pro ultimo morbi termino, cujus solutionem

seriutculè protrahendam etiamnum censebam; attamen deprehensam febris carentiam tanti ponderis esse apud me, ut jam jam Ægrum in tuto positum crederem, neque ampliùs eum tentari posse, nisi febriculis forsan levioribus, & paulatim facilè recessuris. Revera vespere motu nonnihil sensibili novus accessit febrilis insultus; quo statim terrefactus Æger, se de vita desperare palam fateatur, cibum, quem antea benè appetebat, aversans, me tamen illum redarguente de pusillanimitate intempestiva. Sed heu vana quam sunt hominum judicia! Mane sequenti gravissimè habentem invenio, & faucibus quasi stertentem, quem pridie tutum putaram. Præscribo tumultuariò plura, sed incassum; nec Cortici locus, aut tempus est, nec ulla mihi ampliùs fiducia. Post meridiem exacerbatur febris cum sopore, & gravi anhelitu. Animæ idcirco iterum consulit, & postridie manè, vigesima nempe septima morbi die, dum levius habere creditur ab Adstantibus, me ideo statim acciri curantibus, sub eorum oculis spe rursus concepta lætantium, sinè stertore, sinè labore ullo placidè expirat.

Recentem hunc eventum, qui minimè successit ex voto, tanquam quid infrequens in hac Praxi (*Omnibus namque Malis Punicis inest aliquod granum putre*) excipe prudens Lector; & ex numerosa, quæ superest faustorum serie, & ex perspecta, etiam cum planè tollere morbum nequit, sed tantum mulcere, innocentia remedii, conjice quam sæpe fidendum sit, quam rarò cunctandum in usu Peruviani Corticis, ubi præsertim satis patens Febrrium indoles, & imminens periculum illius administrationem rationabiliter suadeant. At verò quid hìc immoror, librando Casus felices olim relatos, ut eos huic uni, ubi remedium distulit tantum, non prohibuit cladem, vel paucis quibusdam commentitiis, & vanis, a Viro Cl. adductis, longè præponderantes ostendam? Nonne præter sexaginta quatuor in Therapeutice memoratos Ægrotos adhuc superstitēs, noone, inquam, septem alios, quasi in defunctorum locum suffectos (neque enim China China semel curati immortales fiunt) & septem famosis Casibus a Cl. Auctore oppositis jure merito præferendos, in harum Responsionum decursu recensui, quippe qui post editam eandem Therapeuticen, decubuerunt, & feli-



feliciſſimam in periculoſiſſimis circumſtan-  
tiis ſanationem unius Chinæ Chinæ ope  
fuere ſortiti? Ut omnes ſimul colligam,  
fuere hi Viri Nobiliſſimi, D. D. *Dux Li-  
matula* Neapolitanus, *Marchio Borda* Hiſ-  
panus, *Marchio Gonzaga* Mantuanus: item  
D. D. *Jo: Baptiſta de Carandinis*, *Paulus  
Æmilius de Bignardis*, *Antonius de Zanel-  
lis* Mutinenſes, & Archipreſbyter Maſſæ  
Finalenſis paulò ante deſcriptus.

Quòd ſi alios addere lubeat admirabili  
hoc Febrifugo recens curatos, quorum  
nulla hætenus facta eſt mentio; in prom-  
ptu erunt Viri pariter Nobiliſſimi, D. D.  
*Marchio Thomas de Obiciis*, & *Comes Ful-  
vius de Rangonis*, ambo ex Tertianâ du-  
plici Subcontinua cum ſymptomatis non  
parum gravibus, & pejora minitantibus  
ægotantes; *Monialis* ferme octogenaria e  
Cœnobio S. Claræ lecto ferè ſemper af-  
fixa, quæ a Tertianâ Intermittente con-  
valeſcens, poſt nonnullos ſubinde meſes  
e Subcontinua iterum longè graviore de-  
cubuit; D. *Lucretia Ferraria* ejusdem pa-  
riter ætatis, ex Pernicioſa Lethargica ad  
ferreum mortis ſoporem properans; D.  
*Claudius de Donnolinis* ex Subcontinua Ter-  
tiana in Algidam converſa ad extremum  
vitæ planè redactus; D. *Dejanira de Ray-  
naldis Rovighia*, quæ ex Quartana triplici  
Subintrante in Continuum demum ſopo-  
roſam ruebat gradu præcipiti; D. *Alphon-  
ſus Tonanus* ex Quartana itidem, primò  
ſimplici, mox duplici, ac demum conti-  
nua, cum aliſque vomitibus, ſingultibus,  
& animi deliquiis graviffimè habens; D.  
*Joannes Amorofi* jam ſenex, & ex Algida  
Tertiana Lipyriam æmulante quàm ma-  
ximè, & quàm proximè periclitans; D.  
*Margarita Vaccaria* prope nonagenaria,  
quæ unoquoque poſt tertium Febris Ter-  
tianæ paroxyſmum accellu, in profundif-  
ſimum ſoporem cum renovatione Paralyſis,  
quam ante aliquot meſes ex Apoplexia  
contraxerat, & a qua demum evaſerat,  
denuo labebatur, itaut alternis diebus  
novum veluti levis Apoplexiæ inſultum  
experiri videretur, una cum febrili pa-  
roxymo invadentem; tandemque D. *La-  
vinia de Speramanis* in domo Camporea  
moram trahens, cui Tertianâ primò ſim-  
plex, mox duplex in Pernicioſam migra-  
vit ex Catarrho, ut vocant, ſuffocativo,  
in vigore acceſſionis ſtertorem planè mor-  
tiferum intra bronchia pulmonis excitante;  
ita ut recurrente bis, aut ter,  
ſemperque ferociùs, cum paroxyſmis fe-

brilibus horrendo hoc ſymptomate, Æ-  
gra brevè pro conclamata habita fuerit a  
ſacris ipſis Miniſtris, ſpiritus exitum quàm  
mox expectantibus. Quam quidem Perni-  
cioſæ Tertianæ ſpeciem a Mercato de-  
ſcriptam, mihi verè nunquam contigit  
obſervare, ut in Therapeutice dixi; hanc  
tamen obſervavit, curavitque unus ex *Ju-  
nioribus illis Medicis*, quem Cl. Auctor di-  
ceret recens ex *Academia veniſſe*, Corti-  
cem præſcribens doſi liberali (drachmas  
tamen ſex partitè oblatas non excedente)  
ea ſecuritate, qua *Magiſtrum ſuum operari  
vidit*, eademque pariter ſecuritate Febrim  
inſimul, & exitiale illud Symptoma ſu-  
ſtulit, omnibus quotquot aderant, poſ-  
ſuntque cuncta teſtari, non parum ſtu-  
pentibus.

His Ægrotis alii accedere poſſent infe-  
rioris notæ, cujuſmodi fuere nescio quis  
de Famulatio D. Duciffæ Maſſenſis, nunc  
Mutinæ commorantis, nomine *Jacobus*,  
ex duplici Tertianâ Subcontinua Mali-  
gnante quàm graviter habens; *Jacobus An-  
tonius Corghius* miniſter in Xenodochio,  
ex Tertianâ duplici in Subcontinuum acu-  
tam permutata non modico poſitus in diſ-  
crimine; *Chriſtophorus Ricciolius* ex Ter-  
tiana duplici Subcontinua cum Diarrhœa  
immani ſingultuoſus factus, frigidus, &  
omnimodæ aſphyxiæ propinquus; *Antonia  
Pini* ex Cardiaca Tertianâ duplici ad Con-  
tinuum properante cum delirio, luctuoſis  
ſuſpiriis, & voce exili ad obitum vergens;  
*Ludovica de Manzeriis* in quarto Tertianæ  
Syncopalis paroxyſmo ſua cæteroqui pro-  
xima prænoſcens funera; *Dominicus Dori-  
cius* ſeptuagenarius, ex Lethargica Perni-  
cioſa Catalepticus jam redditus; & *Ber-  
nardinus de Eloranis*, ex Algida pariter  
Tertiana ad interitum ruens: quos omnes  
Ægrotos unum hoc Alexiterium ex arte  
adhibitum promptè reſtituit; non me uno  
quidem, ſed & aliis quoque Medicis illud  
præſcribentibus; iis nempe, qui ſui jam-  
dudum facti ſunt juris, nec verè dici que-  
unt ampliùs recens ab Academia veniſſe.

Scio equidem, *Pauperis eſſe numerare pec-  
cus*. At ſi ſeptem tantum pecudes, & ma-  
cras, & vetulas pro integro ſuo grege hu-  
cuſque oſtentavit Cl. Auctor, qui ſe nobis  
perhibebat tam divitem; cur centum pin-  
guiſſimas, pluresque ex iis adhuc tenellas  
e grege meo ſeligere ipſe non poſſim, &  
digito commonſtrare, nec tamen haberi  
pauperculus? Quid verò ſi Febricitantes  
omnes Viri Cl. ut ſine parabolis loquar,  
per-



persequi vellem China China fortasse curabiles, quibus tandem ea posthabita, vel neglecta, non Galenus, non Hippocrates, non Celsus, non Ballonius, sed solus *Acesias medicatus est?* Absit, hoc tamen ut unquam mediter. Hoc igitur, quo nuperimè recensui, pacto *Mutinae amaris Chinae Chinae potionibus quotidie, ac pluries in die larga dosi oblati, in Febris, quæ maligni*

*aliquid preferant, Egri miseri conficiuntur, Clamet, pugnet, obltrepat, verbis, cavillationibus, sophismatis, auctoritatibus Vir Cl. Philologia ipsa, & Arte Rhetorica in subsidium vocata, ceu qui motum progressivum dari pernegabat: ego interim filens, sed eandem semitam calcans, eodemque jugiter passu pergens, responsum faciam.*

## §. 49.

**H**Æc habe mi Nepos pro responsione ad primum tuum quæsitum, de quo multa alia haberem dicenda, provocante materia. Scio me hac Dissertatione non multum gratiæ reperturum apud eos, qui communium errorum reprehensionem in propriam calumniam referunt, sed neminem hic nominavi, nec veteris Comœdiæ more volui quemquam perstringere. Mens mihi ad publicum beneficium solum fuit isthæc conscribere, non laudes quærere, eas potissimum, quibus uti solent Scriptores in re Medica, cum aliis Scriptoribus ampullosis titulis laudes cumulando, quæ nec ipsis Medicinæ Parentibus vix convenirent, ut alias similes ab iis exigant. Revera novum non est hoc vitium, sed ad summum devenit. Suppetit mihi egregium dictum D. Hieronymi in Epistola ad Celantiam, quæ Epistola creditur D. Paulini. *Est sane grande, & subtile artificium, laudare alterum in commendationem sui, & decipiendo, animum sibi obligare decepti.*

(*Hæc habe mi Nepos &c.*) **S**ERA in fun-  
do parsimo-  
nia. In calce Dissertationis cessatio Viri Cl. a profusè adhibita hucusque libertate, seu mavis licentia, ubi præsertim officiosas protestationes ipsum destruit Factum, haud planè satisfacit iis, in quos peculiariter hæc etiamnum cuditur Faba. Communis namque in Republica Medica perperam vocatur error, qui non modò uni tantum Mutinensi Scholæ, sed uni duntaxat adscribitur, imputaturque illius parti; ne uni dicam Scholæ meæ, cui fortè largiuscula illa haud malè aptatur appellatio numerosioris Mutinensium Medicorum partis, de immodico Chinæ Chinæ usu apud Cl. Auctorem §. 1. notatæ. Apud hosce igitur omnes Urbis Mutinensis Professores si multum gratiæ fortasse non reperit Vir Censorius, nec plurimum ob id certè meruit reperisse. Neminem quidem ex his nominavit ille; sed injurius sibi met ipsi Pictor (respice Paragraphum undecimum Ramazzinianæ Dissertationis Lector, qui supinè non dormis) si cui nec

vario, nec valgo, distortis tamen de industria cruribus a se depicto, nomen addere necessum putet, ut notum faciat. Me saltem noluit perstringere, qui veteris Comœdiæ more noluit perstringere quemquam. Ita piè credendum cineribus Viri Cl. Verum ut quid cineribus dixi? Ipsi viventi credendum; meque jam meæ poeniteat præconceptæ suspicionis: mihi siquidem ipsi de Opere meo, cum illud primum ex me recepit humaniter, hæc sub die 12. Septembris 1712. rescripsit lingua vernacula, nisi & hîc (quod ægrè admitterim) non idem sint Scriptura, & Leucaus. -- Ho sempre avuto somma venerazione alle cose di V. S. .... sì in voce, come in iscritto, l'averò sempre usque ad cineres &c. Non ho dubbio, che quest'Opera non sia per esser ricevuta se non con lode da gli Uomini dotti, molto più, che quelle leggende, che sono ..... colle quali taluno si crede d'immortolare il suo nome. Mi rallegro con V. S. .... che sia entrata nella Classe de' veri Scrittori con un'Opera, che merita nome di Libro,



*Libro, e le rendo per un tal favore infinite grazie &c.* Officiosus hisce verbis, quamvis supra merita commendatus, minimè tamen contra honestatem a Viro ingenue me deceptum credam, qui necillum unquam decepi, cum laudibus promeritis sum prosecutus, neque ab eo antehac recepi unquam, unde me sic deceptum suspicari potuerim.

Ut igitur & huic, & cuicunque graviori notæ defunctum Virum tandem eximamus, dicamus etiamnum, *isthac*, quæ in præsentī Dissertatione prostant, *ab eo fuisse conscripta* exercendi ingenii, sive, ut dici solet, arguendi gratia (qui nobis olim quoque mos fuit in Disputationibus, cum in hoc Mutinensi Lycæo Medicinam ambo pari munere profiteremur) imò *ad publicum solum*, ut asserit, *beneficium*: illud beneficium scilicet, quod ex mutua ingeniorum collisione solet emergere, eruto inde claro lumine veritatis. Convellendum dubio procul assumpsit ille (quis non videt?) Tractatum meum; non eo tamen fortassis animo, ut everteret, cum verè sentiret, quæ sentio; sed ut *functus* quodammodo *vice coris*, vomerem mihi, rastrum, & marram acueret, ad detegendam facilius, effodiendam & expugnandam ab inquinamentis omnibus veritatem. Ita mentem illius modò lubet interpretari. Suadeamus insuper nobis (ut Nepotem quoque subtrahamus a nota Relatoris minùs sinceri) eundem Cl. Auctorem, ut hæc lepidius nobis obtruderet, Dissertationem suam inscripsisse Nepoti forsitan inscio, nec de China China quicquam locuto, nec responsum ullum per literas unquam quærenti. Juvat hoc credere; tum quia tantam in Viro modesto, cujusmodi est Nepos defuncti Auctoris, non libet fiduciam arguere, ut numerosiori, forsan & digniori, Mutinensium Medicorum parti, Peruviano Febrifugo liberaliter, ut decet, utenti, tam facile succensuerit; tum maximè quia abundè jam constat, ipsum longè aliter ac olim de China China sentire cœpisse, suamque laudabilem mutationem sententiæ usu ipso practico prodidisse non semel.

Exemplum recens hujusce metamorphoseos ipse nuper aliud acturus ex inopinato deprehendi: cum enim quispiam de Familia D. Caroli Foresti a septem circiter diebus febricitaret, illique Cl. Auctoris Nepos Medicinam faceret; mihi constitit

ex inspectione fortuita Adversariorum Pharmacopœi, dum scilicet meæ cujusdam Schedulæ rationem quærerem, hujusmodi Ægrotanti præscriptam fuisse sub die 16. Julii labentis anni 1715. a memorato curante Viro unciam unam Chinæ Chinæ in vino infusam, & immediatè postridie drachmas tres ejusdem medicaminis in forma boli, quæ dosis postrema quater renovata fuit in morbi decursu: atque ita unciis duabus, & semis Chinæ Chinæ larga satis manu, etiam supra morem meum, administratæ, convaluit Æger. Magis adhuc recens Exemplum nuperrimè sum intuitus apud Aulicum Pharmacopolam in Tabula Scedularum Medicarum, pro R. R. P. P. Capuccinis ab ipso pariter conscriptarum; ibi enim, sub die 30. Julii proximè elapsi, primò semunciam Chinæ Chinæ descriptam vidi, dein (& quidem immediatè post) unciam unam, quæ subinde fuit pluries repetita. Subsequentibus postmodum mensibus eadem proportionem rem processisse, admonent Schedulæ peculiare: ut omittam, quæ insuper ex Amicorum, & Pharmacopæorum relatu hac occasione mihi certò innotuere de crebra, & liberali oblatione ejusdem Febrifugi, quæ hodie citra ullam hæsitantiam, aut frugalitatem in usu est eidem Cl. Auctoris Nepoti. An ergo censendus ille dosim parciolem, majori urgente periculo aliis usitatam, abusus nomine apud Patrum traduxisse? Saltem si ante biennium, cum nondum Collega noster evaserat, tam sinistrè opinabatur; eo exacto, meliusque perspecta utilitate remedii, in meliorem quoque sententiam, prout hominem ingenuum decebat, tandem devenit. Quod illi quidem gloriosum planè, & ad delendas admissi olim præjudicii notas abundè sufficiens.

Quod si nimis officiosæ, adeoque affectatæ cuipiam videantur piæ istiusmodi erga Defunctum Virum, & erga Superstitem meditationes meæ, ut affectatæ visæ sunt mihi protestationes illius in principio hujusce Paragraphi, easque idcirco ingenuitati meæ minùs cohærentes putet; is, ne candori meo quicquam detrahat, posthabitis quibuscunque meis, aut semotis, quæ præstare sum conatus, officiis; expensis verò æqua utrinque lance totius Causæ momentis; prout illi videbitur concedens, de Cl. Auctore, de me, ac de integra tandem controversia nostra judicium ferat.



## §. 50.

**A**lterum *quæsitum*, num scilicet salubre foret pertentare Corticis Peruviani usum ad prophylaxim, paucis absolvam. Suppono Te pro remedio prophylactico non intelligere huius remedii usum, profligata febre, ne amplius redeat, licet etenim à Medicis in hoc sensu communiter accipiatur, proprius tamen non est illius sensus, nam ut Joannes Goræus in suis Definitionibus medicis, nomine prophylaxeos intelligendum est remedium illud, quod potius operetur ne morbus aliquis accedat, quàm quod jam profligatus redeat, sed hoc multo ante scripserat Galenus in Commento Aphorismi 22. Sectionis secundæ, puto igitur secundum rationem licere experiri Febrifugum Peruvianum, sed modica dosi ad aliquod tempus quolibet mane, antequam febrium periodicarum, & continuarum quoque per æstatem, & autumnum ingruat tempestas, nam ex Hippocrate, *Quæ facta tollunt, antefacta fieri prohibent*, quem locum primo adspectu obscuriorem egregie exponit Vallesius, purgationes, Venæ sectiones, solita morborum remedia antefacta, ut primo vere, fieri prohibent morbos æstate, & autumno. *Quibus convenit Venæ sectio, vel purgatio, hos Vere purgare, vel Venam secare oportet*, aiebat Hippocrates Aphorismo 47. 6. Sectionis, in cuius Aphorismi expositione aiebat Galenus se hisce remediis multos præservasse gravissimis morbis per autumnum laborare solitos, huius tamen remedii ad prophylaxim usum, si quis velit experiri, exhibendum existimo in iis, qui commodo fruuntur sanitatis statu, nam si quid noxii Chinæ insit, convenienti corporis exercitio facile excutient. At forsan consilium magis sanum erit remedium istud, natura sua dolosum omittere, nam ex Celsi monitu *cavendum ne in secunda valetudine adversæ præsidia consumantur*. Vale.

Dabam Patavii die 20. Julii 1714.

(*Alterum Quæsitum &c.*) **M**ihi istic nec seri-  
tur, nec metitur, aiebat apud Plautum Epidicus. Sed neque hic forsitan metet Nepos ipse Viri Cl., aut alius quispiam. Non metam ego, qui nomine *Prophylaxeos* usus sum in Opere meo, intelligendo præcautionem a novo quoque morbi præteriti, sed facile recurrentis insultu; sive proprius hic sit vocis illius sensus, sive communiter adoptatus etiam ut talis. Nihil inquam emolumenti hinc referam, omnium ferè Medicinæ Scriptorum vestigia secutus, & posthac pariter secuturus; hi enim de inhibendo Asthmatis, Epilepsiæ, aut alterius Morbi intervallati recursu locuti, huiusmodi verbum perpetuò usurpavere. Me tamen usque magis firmabit in posterum exemplum ipsum Cl.

Auctoris, in hac ipsa Dissertatione vocem *Prophylaxeos* sub eadem significatione bis usurpantis, nempe nuperrimè §. 48. circa medium, & §. 12. circa finem. Sic & in minimis sibi adversatur, miliumque torno inaniter sculpsit Vir cæteroqui doctissimus. Denique nec metet, aut manipulos colliget Nepos ipse Viri Cl., aut quispiam alius, ob dogmatis incertitudinem, ubi hæc ipsius verba perpendat -- *Puto igitur, secundum rationem licere experiri Febrifugum Peruvianum quolibet mane* (nota hic facilem citra exigentiam repetitionem remedii *malitiam occultam* habentis ex §. 48. *altera die ad prophylaxim minimè repetendi*) *quolibet*, inquam, *mane modica dosi, ad aliquod tempus &c.* & paulò post perpendat hæc alia verba, palinodiam de more canentia, -- *At forsan consilium magis sanum*



num erit, *Remedium istud natura sua dolum omittit*. Hæc ille. *Remedia tamen natura sua dolosa*, qualem contumeliosè vocat Chinam Chinam Vir Cl. ad extrema redactus suæ Antifebrifugæ Dissertationis, nusquam legitur in Genesi, Deum, qui Medicinam condidit, unquam creasse.

Hæc habe mi Lector pro responsione ad objecta Cl. Ramazzini, cujus animadversiones, quantumvis futes, tacitè negligendas minimè credidi; non me quidem perturbante Scripto, acriore licet, Viri, qui in vivis non est; sed sola, ut inquit ipse, *provocante materia*. Non alia tamen hujus ingenii ex me fortasse posthac habiturus est quispiam, si vel dilaceretur a Cynicis Opus meum, aut aliquam simultantem fiventibus. Cum enim nullum amplius ex illius propugnatione commodum Reipublicæ queat emergere; ipse verò nihili faciam labores meos, nisi quatenus cessuri sint in bonum ejusdem Reipublicæ; non est, quòd in posterum commovear tam facile, animo potiùs pacato deinceps laturus.

— rhonchos, & ludibria turba

*Nasuta, & quicquid fingere livor amat*. Id unum vix potis esset animi fortasse mei firmitatem nonnihil inflectere; si nempe utiliore, atque potissimam Tractatus partem, Methodum videlicet Specialem curandi Perniciosas Febres a Mercato descriptas (quæ summa Operis est) quisquam arte clarus refutandam susciperet. Sed quis unquam, qui artem calleat, nudam observationem meam, non ratiociniis suapte natura fallacibus, sed constanti innixam experimento, ubi præsertim nullum aliud pro *Curatione* pereuntis hominis planè *coacta*, sed nihilominus planè tuta prostat auxilium, aggrediatur refellere? Et quancumque id etiam contingeret, qua necessitate cogente aggredieret ipse, observationem, & experientiam meam argumentis, rationibusve tueri, aut auctoritatibus etiam fulcire, cum satis ea semetipsam tueatur, & fulciat? Cætera ejusdem Tractatus, utut non prorsus inania, cuilibet tamen Sophistæ pro

arbitrio ventilanda tacitus, & lubens relinquo. Solo diutiùs vivente, & novissima Scripta sua proeximio, quo pollebat, ingenii acumine, etiamnum defenditare volente Cl. Ramazzino, potuisset perennare lis nostra: tunc enim publicæ utilitati, quæ stimulos addidisset, accessisset quoque voluptas mea, ab amœnitate styli resultans Eruditissimi Antagonistæ; cujus aculeos, suo semper melle conspersos, pluries experiri, mihi haud injucundum fuisset; & cui propterea minimè hæsitassem aptare, quod Joannes Franciscus Picus *De Imitatione* disputans cum Petro Bembo, scriptum reliquit; videlicet -- *Tantum suavis acrimonia præferunt illi ipsi aculei, tantumque me Viri Clarissimi simul & pupugit, & oblectavit oratio; ut iterum pungi cupiam, quo possim iterum oblectari*. Istiusmodi conditione semota, præstat silere.

Hucusque igitur per me satis actum in hac materia; forsan & nimis: neque idcirco lubet amplius per eandem lineam Serram reciprocare. Etsi verò quæ Stylo Apologetico hætenus reponenda censui, ferme invitatus, quippe coactus, & lacessitus addiderim; nihilominus haud planè inutiliter tempus me trivisse rebor, si vel ex Disceptatione hujusmodi, vel ex Therapeutice ipsa jampridem edita nonnemo forsan pro exitialium saltem Febrium, de quibus præcipuè sermo est, curatione rectius instituenda, quicquam profecerit; etsi per quem profecerit etiam dissimulet: vel si quis alius, me viam præmonstrante, hanc mox arenam ingressus, sed materiam feliciùs *exhauriens*, præcipuam exinde sibi comparet famam: vel denique si paucis malè feriatis invisus, bene merear tandem de pluribus, & bene cordatis. Adeoque, ut Doctissimi Vvillissii verbis utar, ex Pharmaceut. Rational. Præfat. ad Lect. depromptis, — *Si leves hi conatus alios ad Studium istud meliùs excolendum instigarint, quicquid ab invidis, ac malevolis opprobrii metiar (metam potiùs, vel patiar legendum puto) opera me mea nequam pœnitebit*.

F I N I S.

CATA-



# CATALOGO DI LIBRI

Che si trovano presso Lorenzo Baseggio Libraro in  
Venezia l'Anno MDCCXXI.

**A** Natomia del Cavallo, infermità, e  
suoi rimedj di Carlo Ruini. fol. tom.  
2. fig.

Arcadia di M. Jacopo Sannazzaro. 24.

Achille Cattolico del P. Diego de Rosis  
della Compagnia di Gesù. 12.

Ateneo dell' Uomo Nobile di Agostino Pa-  
radisi fol. Tomo primo della Nobiltà:  
Tomo secondo dell' Onore.

Agnensi ( Jo: Baptistæ ) Conceptio Imma-  
culata B. V. M. 1215. anagrammatibus  
celebrata. 16.

Buon Pensiero del P. Carlo Gregorio Ro-  
signoli della Comp. di Gesù. 12.

Baronii ( Cæsaris Cardinalis ) Annales Ec-  
clesiastici fol. tom. 12.

Bidermani ( Jacobi è Soc. Jesu ) Epigramma-  
ta 12.

Boerhaave ( Hermanni ) Opera omnia Me-  
dica 4. 1723.

Catechismo Istorico che contiene in ristret-  
to l' Istoria Santa, e la Dottrina Cri-  
stiana dell' Abbate Claudio Fleury. 8.  
tomi 2. 1728.

— detto in lingua Francese, ed Italia-  
na 8. tom. 2.

Discorsi di Sagre Controversie di S. Fran-  
cesco di Sales. 4.

Consolato del Mare col Portolano. 4.

Cuoco, Pasticcere, e Confettoriere Fran-  
cese del Sign. de la Varenne. 12.

Compendio delle Meditazioni sopra la vi-  
ta di Gesù Cristo per ciascun giorno  
dell'anno del P. Ambrogio Spinola. 12.

Clericati ( Jo: ) Decisiones miscellaneæ. 4.  
1724.

Carriere ( Francisci ) Historia Chronologi-  
ca Pontificum Roman. 12.

Cassutii ( Jo. ) Notitia Ecclesiastica Hi-  
storiarum Concilior. Canonum &c. fol.  
1729.

Dizionario Italiano Francese, e Francese  
Italiano di Gio: Veneroni 4. tom. 2.

Donato volgarizzato colla giunta d'al-  
cuni avvisi per la Grammatica volgare  
per ripurgare li principianti dallo scor-  
retto scrivere, e parlar Toscano di  
Francesco Onorato Fondelli. 8. 1716.

Del Bene, ovvero Filosofia morale del

Cardinale Sforza Pallavicino. 4.

Discorsi di Guid-Ubaldo Bonarelli in di-  
fesa del doppio amore della sua Celia. 12.

Deleboe Sylvii ( Francisci ) Opera Medi-  
ca. fol.

Ecclesiastico Istruito nei Misterj dell'uffi-  
cio Divino da Paolo Medici 12. 1715.

Farmacopea, o nuovo Tesoro d' Arcani  
Farmacologici, Galenici, Chimici o  
Spargirici di Frà Felice Passera infermie-  
ro Capuccino. fol. tomi 2.

Filli di Sciro Favola Pastorale di Guid-  
Ubaldo Bonarelli. 12.

Fisica de' Peripatetici, Cartesiani, ed Ato-  
mistì al Paragone della vera Fisica d'Ari-  
stotele del P. Stefano Pace. 12. tomi 3.  
con fig. 1729.

D. Fulgentii Opera 8.

Giornale de' Santi, Meditazioni per tutti  
li giorni dell'anno dedotte dalla vita del  
Santo accennata in compendio, del P.  
Gio: Stefano Grosè della Compagn. di  
Gesù. 12. tomi 3.

Grammatica della lingua Todesca di Mat-  
tia Chirchmair. 12. 1719.

— Italiana, e Francese del Veneroni.  
12.

Gersonne della perfezion religiosa del P.  
Luca Pinelli. 12. 1729.

Hugonis ( Hermanni ) Pia Desideria. 12.  
Istoria del Mondo del Signor di Chevreau  
tradotta dal Francese da Selvaggio Can-  
turani. 4. tom. 2. 1715.

— della Volgar Poesia, e Comentarj  
intorno alla medesima di Gio. Mario  
Crescimbeni terza edizione accresciuta  
4. 6. vol. 1731.

Industrie per fare una buona Morte del P.  
Giulio Cesare Recupito della Compagn.  
di Gesù. 12. 1722.

Jungken ( Johan. Helfric. ) Lexicon Chi-  
mico-Pharmaceuticum. 8.

Janua Grammaticæ. 8. Viterbii 1709.

Lettera toccante le considerazioni sopra  
la maniera di ben pensare del Co: \*\*\* 4.

Lettere di Seneca tradotte da Angelo Ni-  
colosi. 12. tomi 4.

— del Cardinal Sforza Pallavicino. 12.

Lucerna Salis Philosophorum, 12.

Lamy



- Lamy (Bernardi) Apparatus Biblicus, si-  
ve Manuductio ad Sacram Scripturam in-  
telligendam. 8. fig. 1722.
- Melchiori (Barth.) de Homicidio 8. 1729.
- Manna dell' Anima del P. Paolo Segneri.  
24. tom. 13. 1719.
- Mente del Savio di Gio: Batista Comazzi. 12.
- Massime con esempi tratti dalla Storia Sa-  
cra, e profana, antica, e moderna per  
istruzione de' Giovani dell' Abbate di  
Bellegarde tradotte dal Franc. 12. 1722.
- Moretti (Petri Mariæ) Tribunal Con-  
scientiæ, Selectiores casus proponens,  
rationibus utrinque discutiens, atque  
tutioribus sententiis definiens. 12. tomi 2.
- Manuale Theologiæ Dogmaticæ sive ad  
tritissimam in Fidei controversiis quæ-  
stionem ubi scriptum est Catholicorum  
vera, Acatholicorum falsa responsio a  
quodam Societatis Jesu Theologo colle-  
cta addita controversia præliminari de  
indifferentia Religionis 24. 1726.
- Navar Manuductio ad praxim executionis  
Litterarum Sacræ Pœnitentiariæ. 8.
- Natalis Alexandri O. P. Præcepta, & re-  
gulæ ad Prædicatores Verbi divini in-  
formandos cum ideis Concionum per to-  
tum Annum 4. 1731.
- Osservazioni pratiche circa il Veneto Foro  
criminale misto con alcuni generali av-  
vertimenti circa il civile raccolte da Be-  
nedetto Pasqualigo N. V. 12. 1725.
- Ovidii de Fastis, Tristibus, & Ponto cum  
Notis Biman. 12. 1726.
- Opera omnia. 12. 3. vol.
- Penna volante ridotta al Morale del P.  
Maestr. Gio: Maria Muti. 12.
- Critica, o sia la critica della vita  
espressa in lettere del detto. 12.
- Profodia Italiana, ovvero l'Arte con l'uso  
degli accenti nella volgar favella d'Ita-  
lia del P. Placido Spadafora, settima  
impressione accresciuta. 8. tomi 2. 1718.
- Prodigio del Divino amore del P. Gio: Eu-  
sebio Nieremberg. 12. tomi 2.
- Prezzo, e stima, che si deve fare della  
Divina grazia del detto 12. tomi 2.
- Plico d'ogni sorte di tinture raccolto da  
Gallipido Tallier. 12.
- Poesie Toscane di Vincenzio da Filicaja. 8.
- Pratica degli Esercizj Spirituali di Sant' I-  
gnazio del P. Sebastiano Izquierdo. 8.
- Perazzo (F. Jo: Benedicti) Thomisticus Ec-  
clesiastes. fol. tomi 3.
- Quaresimale di D. Francesco Zappata 4.
- Quanto più alletti la Bellezza dell'animo  
che quella del corpo di Stefano Pignatelli.  
12.
- Ruæi (Caroli) è Soc. Jesu Carmina. 12.
- Ranft (F. Francisci) O. P. Historia Hære-  
ticorum, & Hæresum. 8. 1720.
- Veritas in medio seu Theses Damna-  
tæ cum vita Paschasii Quesnel. 8. 1720.
- Rudimenta Poetica ad usum candidatorum  
Latinæ Poeseos. 12.
- Satire di Salvator Rosa. 12.
- Scienza delle Medaglie antiche, e moderne  
con nuove scoperte fatte in questa scien-  
za, traduzione dal Francese di Selvag-  
gio Canturani. 12. grande con fig. 1728.
- Scelta di Sonetti, e Canzoni de' più eccel-  
lenti Rimatori d'ogni secolo compilata  
già da Agostino Gobbi ora in questa terza  
Edizione notabilmente accresciuta 12. to-  
mi 4. 1727.
- Scioppii (Gasperis) Grammatica Philoso-  
phica à Petro Scavenio aucta, atque scho-  
larum Usui destinata a Tobia Gutberleth.  
Hac Editione subnectuntur ejusdem  
Scioppii Paradoxa literaria, & de Rhe-  
toricarum exercitationum generibus dis-  
sertatio. 8. 1728.
- Sidronii Hosschii, & Gulielmi Becani Ele-  
giæ. 12.
- Spondani (Henrici) Continuatio Annalium  
Eccles. Baronii ab anno 1197. quo is desit  
usque ad annum 1652. fol. tomi 3.
- Sarbievi (Matthiæ Casimiri) è Soc. Jesu  
Lyricorum lib. 4. Epodon lib. 1. alterque  
Epigrammatum. 12.
- Seftani (Q.) Satyræ. 12.
- Sennyei (Ladislai) Soc. Jesu. Examen Or-  
dinandorum sive institutiones practicæ  
non modo ad ordines ritè exercendos, sed  
resolutiones etiam ad animarum Curato-  
res instruendos utilissimæ. 12. 1725.
- Tyrociniū æloquentiæ Sive Rhetorica no-  
va & facilior auctore Carolo Pajot è Soc.  
Jesu. 12.
- Vita divina, e strada per acquistare la perfe-  
zione del P. Eusebio Nieremberg 12. 1722.
- Virtù, e miracoli di S. Francesco So-  
lano Min. Off. scritta da F. Raimondo da  
Roma Min. Off. 12. 1727.
- di S. Giacomo della Marca Min. Off.  
12. 1727.
- Vocabolario della Crusca compendiato da  
un'Accademico Animoso secondo l'ulti-  
ma impressione di Firenze del 1691. 4. to-  
mi 2. 1728.
- Verità eterne del P. Carlo Gregorio Rosi-  
gnoli. 12.
- Verna (Jo: Baptistæ) de Pleuritide. 4. 1713.
- Vallensis (Andreæ) Paratitla Juris Canon.  
4. 1731.















